


Yompor Po'ñoñ ñeñf' attō Yepartseshar

Jesucristo e'ñe etserra a'pochtaterrnay

Yomprosho



New Testament in Yanesha' (PE:ame:Yanesha')

**Yompor Po'ñoñ ñeñf attō Yepartseshar Jesucristo e'ñe
etserra a'pochtterrñay Yomporesho
New Testament in Yanesha' (PE:ame:Yanesha')**

copyright © 2008 Wycliffe Bible Translators, Inc.

Language: Yanesha'

Translation by: Wycliffe Bible Translators, Inc.

Yanesha'[ame], Peru

Copyright Information

© 2008, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Yanesha'

© 2008, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-30

Contents

SAN MATEO	1
SAN MARCOS	96
SAN LUCAS	153
SAN JUAN	253
HECHOS	313
ROMANOS	388
1 CORINTIOS	430
2 CORINTIOS	470
GÁLATAS	496
EFESIOS	510
FILIPENSES	525
COLOSENSES	535
1 TESALONICENSES	544
2 TESALONICENSES	552
1 TIMOTEO	557
2 TIMOTEO	568
TITO	576
FILEMÓN	581
HEBREOS	583
SANTIAGO	614
1 PEDRO	624
2 PEDRO	635
1 JUAN	641
2 JUAN	650
3 JUAN	652
JÚDAS	654
APOCALIPSIS	658

COHUEN ÑOÑETS ÑEÑT QUELLCA' SAN MATEO

Arrpa' all aquellcaret allohuen pa'so'chñechno ñeñt pa'tañeshañ pen Jesús

(Lc. 3.23-38)

¹ Arrpa' all aquellcaret Jesucristo pa'tañeshañ e'ñe pa'so'chñechnohuenet. Jesucristopa' David po'm'reneñ, e'ñe Abrahamoteñ. Allohuen añ so'chñetspa' ñeñtara mereñtsorecmuet.

² Abrahampa' chemere'tana Isaac. Isaacña'pa' chemere'tana Jacob. Jacobña'pa' chemere'tana Judá epuet ñaña pa'mo'nasheñechno.

³ Judáña'pa' chemere'tana Fares epuet ñaña Zara. Ñet pachoret'pa' añ pa'so'cheñ Tamar. Faresña'pa' chemere'tana Esrom. Esromña'pa' chemere'tana Aram. ⁴ Aramña'pa' chemere'tana Aminadab. Aminadabña'pa' chemere'tana Naasón. Naasónña'pa' chemere'tana Salmón.

⁵ Salmónña'pa' chemere'tana Booz. Ña pachorpa' añ pa'so'cheñ Rahab. Boozña'pa' chemere'tana Obed. Ña pachorpa' añ pa'so'cheñ Rut. Obedña'pa' chemere'tana Isaí. ⁶ Isaíña'pa' chemere'tana David ñeñt añcha'tarettatse't. Davidña'pa' chemere'tana Salomón. Ñeñt'pa' arrot Urias puetaporot.

⁷ Salomónña'pa' chemere'tana Roboam. Roboamña'pa' chemere'tana Abías. Abíasña'pa' chemere'tana Asa. ⁸ Asaña'pa' chemere'tana Josafat. Josafatña'pa' chemere'tana Joram. Joramña'pa' chemere'tana Uzías.

⁹ Uzíasña'pa' chemere'tana Jotam. Jotamña'pa' chemere'tana Acáz. Acázña'pa' chemere'tana Ezequías. ¹⁰ Ezequíasña'pa' chemere'tana Manasés. Manasésña'pa' chemere'tana Amón. Amónña'pa' chemere'tana Josías.

¹¹ Josíasña'pa' chemere'tana Jeconías epuet ñaña pa'mo'nasheñechno. Ñehua, Josíaspa' alla chemere'tos allempo a'chapatarettet alla'par all anetso ñeñt pa'so'cheñ Babilonia.

¹² Allempo hua'cherret Babiloniotpa' Jeconíasña'pa' chemere'tuerrana Salatiel. Salatielña'pa' chemere'tana Zorobabel. ¹³ Zorobabelña'pa' chemere'tana Abiud. Abiudña'pa' chemere'tana Eliaquim. Eliaquimña'pa' chemere'tana Azor. ¹⁴ Azorña'pa' chemere'tana Sadoc. Sadocña'pa' chemere'tana Aquim. Aquimña'pa' chemere'tana Eliud. ¹⁵ Eliudña'pa' chemere'tana Eleazar. Eleazarña'pa' chemere'tana Matán. Matánña'pa' chemere'tana Jacob. ¹⁶ Jacobña'pa' chemere'tana José ñeñt'pa'tcha' puerrollar pa' María. Maríaña'pa' cheyore'tana Jesús, ñeñtara ñeñt Cristotats.

¹⁷ Allempoteñ corre't Abraham tarremphua allempo corre't ñaña David, ñeñtña allponsheña chemere'shatnomuetspa' allo'tsenca'ye 'charrasheña puechenet pa'tatssheña. Ñaña allempoteñ corre't David tarremphua allempo a'chapatarettet Babilonio, ñeñt'pa'cho'ña allo'tsenerrerr 'charrasheña puechena pa'tatssheña ñeñt allponsheña chemereshaterrtserr allempo. Ñaña allempoteñ a'chapatarettet Babilonio tarremphua allempo eñalleta Cristo, ñeñt'pa'cho'ña allo'tsenerrerr 'charrasheña puechenet pa'tatssheñet ñeñt allponsheña chemereshaterrtserr tarremphua allempo eñalleta ñaña Cristo.

*Arrpa' atto eñalleta Jesucristo**(Lc. 2.1-7)*

¹⁸ Te'pa' o'ch neserrpare'tatas atto allempo eñalleta Jesús. Allempoña María ñeñtcha' pachor pa' Jesús'pa' añca'ye o'patenaya José ño'ch yore'. Ama yoreña'pa' Maríañapa' ahuepa't a'chomenta Parets Puecamquëñoť. ¹⁹ Joséña ñeñtcha' puerrollar pa'pa' ñaña'pa' e'ñe cohuen acheñer ñeñto'marña ñapa' ama mueno o'ch pencach. Ñaña'pa' atet cotape'ch o'ch ser e'ñe a'nahuota. ²⁰ Allempoña atet cotape'chenpa' machayoto' orrtoña Yompor po'millañoťeñer. Ñeñť orrtoya puechopoñopa' atet otos:

—José Davidna'tare, amach pa'llpatsto; pocte'ca'ye o'ch peyore María ñeñtcha' petapor pepa' tarro'mar ñapa' o'ca'ye a'chomenta Parets Puecamquëñoť. ²¹ Te'pa' eñalletatancha' asheñorr, ñeñťña'pa' peso'chcha' Jesús tarro'mar ñapa' ñeñtcha' a'queshpaterre' pa'cheñer po'chñarofet. Arrpa' allohua ñeñť atet och mellañoťeñ.

²² Ñeñťpa' tarro'mar atet pa' attoch etsota ñeñť atet eñorana'tane't Isaiás ñeñť a'mtahuete't Yompor po'ñoñ, ñeñťpa' atet ote't:

²³ Ñeñťña shopshesha'pa' amach a'pllareťoteye' a'chomento; cheyore'tanach asheñorr, ñeñťña'pa' sochetcha' Emanuel.

Ñeñť ña so'chñetspa' atet oten: Te'ña Parets'pa' e'ñe parro'tseney.

²⁴ Allempoña José oyerr ñemoť, atet och Yompor po'millañoťeñerpa' ñaña'pa' atet'cho' pa'. Yoran María ñeñtcha' puetapor pa'. ²⁵ Tarraña ñapa' ama a'plleñe tarremphua allempoch emare'tua; ñeñťña asheñorrpa' soch JESÚS.

2*Atto eñotañnesha'pa' huacha'tet o'ch enteñeta' Jesús allempo eñalleta*

¹ Allempo eñalleta Jesús all Beléño, e'ñe alla Judeopa' añ añcha'tarettatse't Herodes. O'ña eñalletuapa' eñotañnesha'ña huacha'tet allot huena atsrretpa' o' chacha'tet Jerusaléño. ² Ñetña'pa' atet otyesoset:

—¿Erro'tsena'tña ñeñť eñalletatsa ñeñtcha' pa'mcha'tareter pa' judionesha'? Yapa' yeñoteñ o' eñalleta tarro'mar yapa' o' yentoñ po'rantor allot huena atsrret; yapa' ñeñtecopña yehuena o'ch yeconcorpana'teña'.

³ Allempoña añcha'taret Herodes e'man atet ñoñetspa' ñaña'pa' ñeñťa na' pueyo'chro ama eñmato pueyo'chro. Allohuen jerusaléño'marnesha'pa'cho'ña ama esesha' eñmatatseto ñamet pueyo'chreto. ⁴ Allempoñapa' agotatan añcha'taretnesha' ñeñfara judioneshet; o'ch ap'chet allohuen cornanesha' ñeñť atarr sherba'yets judioneshacop. O'ch ap'chet ñaña ñeñť atarr etsotayene' ñoñets ñeñť atet anaret judioneshacop. Allña a'p'to'tyesanet:

—¿Erra't otete'tña allcha' eñalletaña ñeñtcha' Cristoterrets?

⁵ Ñetña'pa' atet ochet:

—Arr anetso Beléño allara Judeo tarro'mar quellcopa' atet anuaret, atet quellquë't ñeñť a'mtaye't Yompor po'ñoñ. Ñeñťpa' Yomporña atet otatse't:

⁶ Añ Beléñ ñeñť judana'tarnesha' po'patseñ, e'ñe po'ño'ch ñeñť anetser ñeñť atarr asherben entyeñet allohuen ñeñť añcha'taretetyetsa allo'marnesha'. Tarro'mar all Beléño allcha' eñalleterra ñaña ñeñtcha' atarr añcha'tarettertsa ñeñtcha' cohuanperre' allohuen neyochreshachno ñeñfara israelnesha'.

⁷ Allempoña otuoset atetpa' Herodesña' e'ñe a'nahua agotaterran ñaña po'potantañ eñotañnesha' ñeñt' cha'cha'tats allempo Jerusaléño. Allña'pa' e'ñe aco'pa a'p'to'tare'tyesapanet:

—Rantopa' ¿e'ñe'tña esempoteñña señch ñeñt' sorrtoya ñenmañ?

⁸ Allempoña eñotatosetpa' ñaña'pa' otanet:

—Te'pa' o'ch ahues Beléño, e'ñech aco'pa se'nyesos ñeñt' cheshatoll. Ñerra'm o'ch señchpa' o'ch sotuerren allochña'pa' napa'cho'ña o'ch ahuen o'ch neconcorpana'teña' namña.

⁹ Ñetña'pa' allempo e'mhuanmuet atet otanet ancha'taretpa' allempoña'pa' ahuanmuet. Rantoña ñeñt' entnenet allot huena atsrretpa' ta'netsa allenet senet, atfotapa' o' chap e'ñe allo'tsen cheshatoll. O'ña chap allo'tsen cheshatollpa' o' muechecosa e'ñe alla ento e'ñe pocto.

¹⁰ Allempoña enterreterr rantopa' atarr nanac coshet. ¹¹ Allempoña'pa' o' be'tososet pocollo, allña entoset cheshatoll epuet pachor María. Concorpana'tosyetpa' ma'yochosyet. Toran'pesyesoset po'tsapotpa' aposet e'ñe atfa oro, aposet tsach puese' ñeñt' atarr eñmosa't. Aposet ñaña eñmosa't puerets. ¹² Allempoña ñetpa' eñotatanet Yompor puechopoño allochña'pa' attoch ama oñerreto Herodesesho'mar. Allempo puerreret pa'nyetopa' aña coterret po'poñ toñ.

Allempo cheshatoll Jesús'pa' anmet Egipto allcha' a'queshpachet

¹³ Puerra'cherrtsetpa' Yomporña po'mllaño'eñerpa' alla orrtterrannerr José puechopoño't. Ñeñtpa' atet otererr:

—Petantaye'cha o'ch pa'yech cheshatoll pachore'na, orraye'chap all anetso Egipto allcha' sey'chosa. Eempohuañenña'pa' o'ch alla noterrperr atet'cha' pe'pa. Herodes po'ño'chpa' e'natan'cha' añ cheshatoll attoch muetsatach.

¹⁴ Allempoña o' tantapa' anman cheshatoll, pachore'na yeta tsapo, ahuanmuet Egipto. ¹⁵ Allña'pa' alleneta atfo'ña'pa' o' rromuen Herodes. Atfo'ña etsota Yompor po'ño'ñ atet ote't ñeñt' a'mtaye't po'ño'ñ; ñeñtpa' Yompor atet otatse't: “Egiptot'cha' nagotater Nechemer.”

Allempo Herodes'pa' mueñan ñeñt'cha' muetsue' allohuen asheñorro'tollesha'

¹⁶ Ñehua, allempoña Herodes'pa' o' eñoch cha sheca'nenñ eñotañnesha'pa' ñaña'pa' ñeñt' atarr atsrre'mate'. Atto atsrre'ma nanacpa' allempoña'pa' mueñan ñeñt'cha' muetsue' allohuen asheñorro'tollesha' ñeñt' Beléño'tsa'yen ñaña ñeñt' allohuen allampaño'tsa'yen Beléño. Allohuen asheñorro'tollesha' ñeñt' echene' epa po'charña ama't ñaña allohuen ñeñt' eñalleyetsa chenta' e'ñe poctacma muetsanatuet. Ñehua, ñeñt' atet eñotatos eñotañnesha'pa' ñaña'pa' atet cotape'ch ahue'te' epa char eñalletuaña ñeñt' cheshatoller. ¹⁷ Atfo'ña etsota ñeñt' atet ote't Jeremías ñeñt' a'mtaye't Yompor po'ño'ñ ahuat; ñeñtpa' atet ote't:

¹⁸ Ñeñt' anetser Ramopa' atarrcha' e'morrterra yahueñets, atarr gogatstena; allpa' Raquelca'ye ya'na'tene' puechoyoresha'; ama mueno o'ch esesha' emya'te' tarro'mar puechoyoresha'pa' ama eñallmeñe, o' e'ñe muetsanatuet.

¹⁹ Allempoña rroma Herodes'pa' Yomporña po'mllaño'eñerpa' alla orrtterrannerr José puechopoño all Egipto. ²⁰ Allña'pa' otererr:

—Te'ñapa' o'ch petanterra, o'ch alla ñaner cheshatoll pachore'na o'ch alla pepuerrerra israelnesha' pa'nyo; o'ca'ye colla'huaña ñeñt' o'pataye't añ cheshatoller ñeñto'ch muetsayeñ.

²¹ Atet otuepa' ñañapa' allenta tantena o' alla anerran cheshatoll pachore'na alla ahuerret israelnesha' pa'nyo. ²² Allempo ahuerretpa' ñetñapa' e'mare'tueret añ añcha'tarettertsa Judeo ñeñt Herodesoñ puechemer ñeñt sochetsa Arquelao. Ñeñto'mañña mecha'tenet serrtset all. Puechopoñoñapa' alla eñotatererr ñeñto'mañña allempopa' alla serr Galileo. ²³ Cherr Galileopa' ahuerret paterr anetso ñeñt pa'so'cheñ Nazaret. Allñapa' alla ye'cha'huerra. Attotca'yeña etsotaña ñeñt atet otyese't ñeñt a'mta'yesaye't Yompor po'ñoñ; ñetpa' atet otyesete't ñeñtcha' Cristoterretspa' "oteñetcha' nazareto'marnesha'."

3

Allempo orrta Juan ñeñt serrpare'tosets all amayo

(Mr. 1.1-8; Lc. 3.1-9, 15-17; Jn. 1.19-28)

¹ Allempoñapa' orrta Juan ñeñt apatose' acheñenesha' Yomporecop. Ñañapa' arr serrpare'tatosanet amayo e'ñe alla Judeo. ² Allñapa' atet otosanet:

—Te'pa' o'ch soctape'cherr ello cohuen Yomporecop tarro'mar o' chapmoch allempoch ayochreshatterra Yompor ñeñt pue'ntaño'tsen.

³ Ñehua, añmapa' ñocopca'ye eñose'tña Isaías ñeñt a'mtaye't ahuat Yompor po'ñoñ. Allempopa' atet ote't:

E'morrterrach puesheñarr po'ñoñ all amayo allcha'ña serrpare'taterranña acheñenesha'. Puerranarotpa' añcha' toma'ntaterranet toñ, ñeñt'pa' atetcha' oterranet: "Te'pa' o'ch sa'cohuenetyes toñ allcha' oñmos Partsesha', o'ch e'ñe sa'pacharreyesoñ pa'tep." Arrpa' allohua ñeñt atet aquellcare't ahuatoteñ Cristocop.

⁴ Ñeñtña Juanpa' camello pue'ch apomotaret ñeñt pa'shtam pen. Allo chanena ñeñt'pa' pa'rrom. Allñapa' rra'yesane't ahuañchenclla* ñeñtña puerran pe't epuet pets po'moñ. ⁵ Allempoña jerusaléño'marnesha'pa' chocma hua'cha'tyenet ñesho ñaña allohuen judeo'marnesha'. Hua'cha'tyeyññaña ñaña allohuen jordanaso'marnesha'. ⁶ Allña ñetpa' a'meta'yesoset po'chñaret, Juanñapa' apatyesanet Yomporecop. Ñeñtña oñ all apatyesanet añ pa'so'cheñ Jordanas.

⁷ Allempoña entapan shonte' saduceonesha' ñaña fariseonesha' ñeñfareta ñeñtet judioneshet. Ñetpa' tarro'mar hua'chenet añ muenenet o'ch apatapanet Juan. Juanña serrpare'tatapanetpa' otapanet:

—Sapa' ama cohuenayayso atarr ashcarñafes, cha sottena ñerra'mrrate' shechpa sompor sepen. Po'ño'chca' ama eseshaye' sotenaye e'ñech sapataretteñoña o'ch sequeshperra allochñapa' amach coñchatuerrso Yompor allempoch yoro'chtatuer tsapatonet. ⁸ Napa' añcha'ña notapas o'ch sorrtyes ñeñt e'ñe cohuen enten Yompor ñeñt atet pena ñeñt po'ño'ch o' cotape'cherran ello cohuen Yomporecop. ⁹ Sapa' cha soteneñ seyo'chro año' es sepallteno, sapa' año' e'ñe seyemtena satañ Abrahamañ. Tarraña napa' o'ch notas amach atet

* 3:4 Ñeñt ahuañchencllapa' arrapo' enteñ palestino'marnesha'.

soctape'chatsto tarro'mar ñeñt'pa' ama esoye' enteñe Yompor. Tarro'mar o'ch notas ñerra'm Yompor muenetseñ ama't añ mapue' ñeñt' senten arr o'ch a'pnasereñ Abraham po'mñeneñ. ¹⁰ Ñeñto'marña napa' o'ch notas ñerra'm amach soctape'cherro cohuen Yomporecop o' mameshamerra o'ch çhaponasa attoch coñchaterres Yompor. O'ch netma'ntatasa atet ñerra'mrrate' allempo o'ch a'mata'tmochet tsach. O' e'ñe onañchachet gach allcha' tet e'ñe allohua huañen puepallactar. Ñeñt' allohuen tsacheçhno ñeñt' ama cohuenaye' me'tetsopa' a'mata'tueretcha' sarrrochetcha' all huorten tso' allcha' e'ñe a'poyataturer.

¹¹ Elloña Juanpa' atet oterraneterr:

—Ñeñtes cotape'cherre' cohuen Yomporecop napa' ama't e'ñe po'ñoçh napatensoñ Yomporecop, napa' e'ñeca'ye oñoçhaya napatenes. Tarraña Cristo ñeñt'cha' huapatsa chenta'pa' ñapa' añcha'ca'ye chorratossa Parets Puecamquëñ ñeñt' atet ñerra'm tso'. Ñapa' ñeñt' atarr ahuamencatesha' nañapa' ama tama ahuamencateyayno. Ñapa' ñeñt'ña atarr sherbets, nañapa' ama es nesherbena attoch ama't po'sapatapa' o'ch nanmoñ. ¹² Ñapa' atarr ahuamencat' ñapa' ñach acrerre' allohuen acheñenesha'. Ñapa' añ toma'ntena ñeñt' orrene' puehoshnat alloch shoshnan po'trigo o'ch e'ñe pue'llomñochayama. Ñeñt'ña pue'llomerpa' o'ch a'yapache' o'ch añno'ch allecma añno'teñ e'ñe cohuen. Pue'she'marñaapa' o'ch huapore'ch tso allcha' e'ñe poyhua. Ñeñt'ña tso'pa' ama emaya'pahuo ama't errponaña. Ñeñt'pa' allohua atet serrpare'tatanet Juan.

Allempo apataretta Jesús Yomporecop

(Mr. 1.9-11; Lc. 3.21-22)

¹³ Allempo huapa Jesús Galileoç, çhap Jordanaso allo'tsen Juan, ñapa' añ muenen o'ch apataç Juan Yomporecop. ¹⁴ Juanñaapa' eñoratsa çha mueneñeñ o'ch emman Jesús. Ñeñt'pa' atet otaç:

—Ama pocteyaye o'ch napatapaç pa, añña poctetsa p'achña napatose'. Papa' eso'maruachña'ca'ye p'onna nesho, p'aca'yeña ñeñteç atarr sherbets.

¹⁵ Jesúsñaapa' atet otererr:

—Papatapno'çach Juanacha' tarro'mar atet'ca'ye poctetsa o'ch yetsota allohuen ñeñt' poctetsa Partsocop.

Allempoña Juanpa' e'ñe pocte' eñch, ¹⁶ allempoñaapa' apatapan Jesús. E'ne apatue'pa' o' çha'nerrña Jesús oñoç, enetñaapa' ahuepa't atorarettá. Allostña e'ñe sohua'nma Parets Puecamquëñ, Jesúsñaapa' e'ñe atet entaç ñerra'mrrate' yeç o' sohua'nma entot, e'ñe çhap ñesho. ¹⁷ Allempoñaapa' çha e'morrtatsa ñaña ñoñets entot atet eñorena Yompor. Ñeñt'ña ñoñetspa' atet oten:

—Añmapa' ñeñt'ña Nechemer ñeñt' atarr nemorrentena. Ña atarr nanac nocshatene'.

4

Allempo oneñe'pa' topatenan Jesús, mueneñ o'ch atet p'atan Jesús ñeñt' ama pocteye' enteno Yompor

(Mr. 1.12-13; Lc. 4.1-13)

¹ Allempoña Parets Puecamquëñpa' anman Jesús all amayo. Ñeñt'pa' añecop atet pa attochña allpa' o'ch huapoña oneñeç, tarro'mar ñapa' añ mueneñ o'ch atet p'atyes ñeñt' ama pocteye' enteno Yompor.

² Allñapa' ama rreno e'ñe aña torrena attoch etsotuan ora allohuen ñeñt' cohuentetsa Pomporecop. Ñeñto'marña ama't o' pa'tatsoch çharramatpa' ama't coñe'tapa' ama es rreno yeto ama't ñaña tsapo. O'ña pa'tatsoch çharramatuapa' çho cheporratsa. ³ Allempoñapa' huapoña oneñeñ. Atto topatosa Jesúsapa' atet otos:

—Pa ñerra'm po'ñoçhte' Parets Puechemereppa' o'ch pot: Añ mapue' puenasepa' pan.

⁴ Jesúsñapa' atet otaþ:

—Napa' ama nemno o'ch atet neþa tarro'mar Yompor po'ñoñ ñeñt' anuaret ahuatoteñ ñeñt'pa' atet oteneý: “Allohueney acheñenesohueneypa' ama e'ñe rreñtsa ñapue't yocrram' yepeno. Añe'naña yocrram' yepen yecamquëñecop ñeñt' allohuen allpon oteneý Yompor.”

⁵ Allempoña oneñe'tpa' o' aneñt' all Jerusaléño, ñeñt' anetserpa' anaret Partsocop. Allñapa' a'tapatos nanac eno allohuanen Parets pa'paquëll.

⁶ Allñapa' otuererr:

—Papa' ñerra'm po'ñoçhte' Parets Puechemereþ te'pa' þomacha arrot tarro'mar amach þa'tserrþo tarro'mar Parets po'ñoñ ñeñt' anuaret ñeñt'pa' ama'tña atet oten:

Yomporpa' o'ch mueñoñaþ po'millañoñeñneshar ñeñt'cha' pecuamþsapue'. Ñetcha' þagapapuet, o'ch enatapapet attoch amach þa'tserrþatca'toso mapyo.

⁷ Allempoña Jesúsapa' alla otererr:

—Añpa'çho'ña anuaret Yompor po'ñoño: “Amach ya'llocchame'tatsche Yompor ñeñt' Yepartseshar yepen.”

⁸ Allempoña oneñe'tpa' o' alla anerranerr Jesús all atarr aspeno e'ñe a'noso. Allotña gatyuesuererr allohuen ñeñt' allpon all añcha'taretetyena pa'namen acheñenesha' ñeñt' yeçha'yetsa erraþaren añe patsro, gatyuesuererr all atarr cohuentatyeneñ. ⁹ Oneñeññapa' alla otuererr:

—Ñerra'm na pema'yocheñoñen o'ch peconcorpana'tna, napa' napaþcha' ora allohuen ñeñt' cohuen pentyen arr.

¹⁰ Jesúsñapa' alla otererr:

—Te'pa' o'ch orrerreþ oneñeñe. Napa' ama nemno o'ch atet neþa tarro'mar Yompor po'ñoñ ñeñt' anuaret ñeñt'pa' atet oteneý: “Añach ñapue't yema'yochena Yompor ñeñt' Yepartseshar yepen, e'ñech ñapña yesherbe'.”

¹¹ Allempoña oneñeñ topatuahuan Jesúsapa' o' ahuer o' queçhpa'ner. Allempoñapa' çhaçha'toña Yompor po'millañoñeñneshar; ñetñapa' e'ñe cohuen sherboset Jesús all. Arrpa' allohua huañ atto oneñe'tpa' topate-nan Jesús allempo.

Allempo e'ñe ñenmã torrena Jesús Partsocop all Galileo

(Mr. 1.14-15; Lc. 4.14-15)

¹² Allempoña Jesús e'mare'tan Juan o' yottamþset, ñañaapa' allenta ahuer Galileo. ¹³ Cherr Galileopa' ama a'pohuerro anetso Nazareto, arraña serr Capernaumo, allña yeçha'huerra. Ñeñt' Capernaumpa' e'ñe sa'patopño'tsen, allara ñeñt' otenet Zabulonneshar' pa'netser ñaña Nef-talenesha' pa'netser. ¹⁴ Ñeñt'pa' allña yeçha'huerra allochñapa' attoch etsota Isaías po'ñoñ ñeñt' a'mtaye't Yompor po'ñoñ; ñeñt' ñapa' atet ote't ñeñte anetsrecop:

15 Ñeñt Zabulónnanesha' pa'netsro ñaña Neftalenesha' pa'netsro ñeñt all sa'patopño all Jordanas yomta'n, allara Galileo all ye'cha'yena pa'namen acheñenesha' ñeñt ama judioneshayayeto.

16 Ñeñt acheñenesharpa' ñetpa' aña ye'cha'yenet ñeñt ama cohuenaye' enteno Yompor; ñetpa' cha ottenet ñerra'm checmeto'tseneta. Tarraña te'ñapa' o' enteret ñeñtcha' e'ñe cohuen a'puetarsam'perrahuet pocta'pñet. Ñetña ama't aña o'patyesahuetañe't rromueñets ñeñtara chenquëñets, te'ñapa' ama't ñocpuetpa' o' a'puetarsam'psare'tterret e'ñe cohuen. Arrpa' allohua atet nane't Isaías po'ñoñ.

17 Allempo cherr Jesús Galileo allempoña e'ñe ñenma't serppare'tatuerranet all. Ñeñt'pa' atet otuerranet:

—Te'pa' o'ch soctape'cherr ello cohuen Yomporecop tarro'mar te'pa' o' cherrmoch allempoch ayochreshaterra Yompor ñeñt pue'ntañ'o'tsen.

Atto Jesús'pa' chore'tosan pa'tatssheña ñeñt e'ñe caca torrenet rromuet (Mr. 1.16-20; Lc. 5.1-11)

18 Allempo Jesús'pa' chopeñe'chyen all sa'patopño'mar; ñeñtña sa'ppa' añ pa'so'cheñ Galileas. Allña'pa' entosan acheñ epsheña; ñeñtña puecheñarrpa' añ pa'so'cheñ Simón ñeñtara sochetsa Pedro epuet pa'mo'nasheñ Andrés. Ñetña'pa' terrayetset e'ñe alla sa'po tarro'mar ñetpa' e'ñe ñeñt'pa' po'taruas penet. 19 Jesús'ña'pa' atet otosanet:

—Te'ñapa' o'ch notas, socta'n na attoch neyochresha' neperres. Ñeñt atet sepena ahua'toteñ e'ne' cac te'ñapa' o'ch ney'chaterres attoch se'nerr ñaña acheñ ñeñtcha' same'ñaterra.

20 Ñetña'pa' allorocma na'nmuet po'terrayapa' o' cotet Jesús.

21 Allempoña meterrerr allop'a' entuerranerr po'poñ acheñ epsheña; ñeñtña puecheñarrpa' añ pa'so'cheñ Jacobo* epuet pa'mo'nasheñ Juan; ñeñt'pa' Zebedeo puechemerasha'. Ñetña'pa' po'noñto'tsa'yenet; allo'tsen ñaña pomoret all a'cohuenetyenet po'terraya. Jesús'ña'pa' chore'tuerraneterrpa' atet otuerraneterr ñamet:

—Te'pa' o'ch socta'n sam'a.

22 Ñetpa'cho'ña e'ñe allorocma na'nmuet po'noñt ñaña pomoret o' cotet ñamet Jesús attoch pueyochresha' perranet ñamet.

Allempo Jesús'pa' ye'chatenan shonte' acheñenesha' (Lc. 6.17-19)

23 Allempoña'pa' chopeñe'chyen Jesús errañaren Galileo'mar. Ye'chatyesosan judionesha' e'ñe ñet po'prahueto. Allña'pa' serppare'tatosanet cohuen ñoñets atto ayochreshattena Yompor. A'crratyesosan acheñenesha'; ama't pa'namen osyenahuet, ama't pa'namen a'prama'yenahuet, ñaña'pa' e'ñe a'crratyesuosanet.

24 Atteñapa' e'mare'tuet errañaren ama't Sirio'mar. Huapatyesoñet allohuen ñeñt muerochtatyen atsnañets. Huapatyesoñet ñeñt osyen pa'namen atsnañets ñaña ñeñt atserrpañachno. Huapatyesoñet ñaña ñeñt chorra'yena oneñet ñaña ñeñt otañachno ñaña echarrañachno. Allohuenetpa' ñaña'pa' e'ñe a'crratyesuerranet. 25 Shonte' acheñenesha' ñeñt cota'yese'. Cota'yese galileo'marnesha', ñaña decapoliso'marnesha'

* 4:21 Jacobopa' ñeñtara ñeñt sochenet Santiago.

ñaña jerusaléño'marnesha', ñaña judeo'marnesha'; ama't ñeñt yeçhetsa Jordanaso yomta'npa' o' e'ñe coña'yesuet.

5

Allempo Jesúsapa' serrpare'tatosanet all aspento

¹ Allempoña entan shonte' acheñenesha' ñeñt cotene', Jesúsñaapa' ahuo' aspento. Allña anorrospa' huaçha'toña allohuen pueyochresha'chno. ² Ñañaapa' yeçhatapanetpa' atet otapan acheñenesha' ñeñt po'ñoçh atarr cosheñtso'tsa'yenet:

Acheñenesha' ñeñt po'ñoçh atarr cosheñtso'tsa'yenet
(Lc. 6.20-23)

³ —Nanac cosheñtso'tsa'yen allohuen ñeñt ama esoye' asherbenaye' entyetso pueyochreto Yomporecop tarro'mar ñetpa' o'paterretcha' Yompor po'cohuenña atto ayochreshattena pue'ntañot.

⁴ 'Nanac cosheñtso'tsa'yen allohuen ñeñt lleca'yetsa Yomporecop tarro'mar ñetpa' coshaterranetcha' Yompor.

⁵ 'Nanac cosheñtso'tsa'yen allohuen ñeñt ama añeye' e'neneto ñeñt e'ñe ñocpueta tarro'mar ñetpa' o'pataterranetcha' Yompor allohuanen pats.

⁶ 'Nanac cosheñtso'tsa'yen allohuen ñeñt nanac muenene' o'ch e'ñe orrtatyenet ñeñt e'ñe pocte' enten Yompor. Ñetpa' e'ñe atet mueneñet ñerra'mrrate' cho nanac yachporrena ñaña nanaccha' yo'ñpa'ten. Nanac cosheñtso'tsa'yenet ñet tarro'mar Yomporña e'ñe atet muenaterranet.

⁷ 'Nanac cosheñtso'tsa'yen allohuen ñeñt nanac cohuen muerannetsa tarro'mar elloña Yomporpa' atarrcha' muererranet ñet.

⁸ 'Nanac cosheñtso'tsa'yen allohuen ñeñt e'ñe pueyochretopa' ama eñalle sosya'tsañ ama't coñe'ta tarro'mar ñetpa' enteretcha' Parets.

⁹ 'Nanac cosheñtso'tsa'yen allohuen ñeñt çhocma amo'tstanna'tatenahuet tarro'mar ñetpa' po'ñoçhcha' Yompor puechemer perranet.

¹⁰ 'Nanac cosheñtso'tsa'yen allohuen ñeñt e'moñe'tyenet atto ñetpa' e'ñe pocte' es pa'yenet Yomporecop. Nanac cosheñtso'tsa'yenet tarro'mar ñetpa' o'paterretcha' Yompor po'cohuenña atto ayochreshattena pue'ntañot.

¹¹ 'Sapa'cho'ña nanac cosheñtso'tsa'yenes ñerra'm esempo errotuuanen penset no'mar. Nanac cosheñtso'tsa'yenes ñerra'm cho sapa' sasare'tyenset, e'moñe'tyenset, pa'namen sosey toma'tamñesyenset.

¹² Chocmuepa'chña socsha tarro'mar shonte' ñeñt o'patatensa Yompor pue'ntañot; ñeñtcha'ña atarr socshaterre'. Ama't ahuatoteñ allempo ama se'ñalletena' attecma e'moñe'tyesete't ñaña ñeñt a'mta'yesaye't Yompor po'ñoñ.

Acheñenesha' ñeñt sherbets Yomporecop arr patsro ñetpa' atet atma'ntatarettenet ñerra'm pos ñaña puetare'

(Mr. 9.50; Lc. 14.34-35)

¹³ 'Sapa' ñeñtes name'ñenaya añ netma'ntatensa atet ñerra'm pos ñeñt atarr sherbene' allohuen acheñenesha' arr patsro. Tarraña pospa' ñerra'm o'ch huañer po'poserrteña amach errotenot ellopa' ya'poserrtatere. Allempopa' o'huañcha' es sherba' acheñenesha'cop; añeçpach sherberr o'ch yehuapore'ch a'yo allcha' atmama'ch acheñenesha'.

14 'Ñaña añ netma'ntatensa puetare' elloña ñeñña atarr sherbene' acheñenesha' arr patsro. Sapa' chocmach cohuen es sorratyen. Atetcha' sepena ñerra'mrrate' paterr anets ñeñ e'ñe a'noso'tsen aspento. Ñeñña anetserpa' chocmach cohuen orrtena allemateñ, amach errotent ma'natacheto. 15 Ñaña ñerra'm esempo ya'llchaten lampareña' ñeñpa' ama tarrecpaye' ya'llchateñe o'ch ye'rramañpes coyño. Ñeñpa' añecopña ya'huortateñ o'ch yene' enonet attoch e'ñe choyo'tampesuan allohuen ñeñ pocollo'tsa'yen. 16 Sapa' attecmeupa'chña sorratyen ñeñ cohuen enten Yompor. Allochña' po'potantaña'cho'ña e'ñech cohuenare' entennaset atet es sorratyen cohuen. Attochña ñetpa'cho'ña cohuentatapreternasetcha' Seyomporer ñeñ pue'ntañotsen.

Atto Jesús'pa' ye'chatosanet atarr sherben Yompor po'ñoñ ñeñ atet anaret ahuatoteñ

17 Jesús'ña'pa' atet otterraneterr:

—Amach soctape'chatsto napa' añecopfe' nohuapa o'ch nehuapore'taterr Yompor po'ñoñ ñeñ ahuatoteñ atet anaret atet ñerra'm Moisés po'ñoñ ñaña añ po'ñoñ ñeñ quellca'yese't ñeñ a'mta'yese't Yompor po'ñoñ. Napa' ama añecpaye' nohuapo o'ch nehuapore'tach, napa' e'ñechca'yeña netsotatuer. 18 E'ñe po'ño'ch notenes: Ama ahuapore'tpahuoyaye Yompor po'ñoñ ñeñ atet anaret ahuatoteñ, ama't tayoteñ tarrempohuach esempohuañencha' chenca'huerra pats ñaña enet. Ama't patrra ñoñets ñeñ atet anaretpa' amach chenguërro ama't e'ñe patrra quellec puehempotollohuenpa' amach chenguërro ama't tayoteñ tarrempohuach esempohuañencha' e'ñe etsotuerra ñeñ atet oten ahuatoteñ. 19 Ñeñto'mañña ñerra'm esesha' o'huañ e'ñeye' ame'ña'po' entan ama't patrratolla ñoñets ñeñ atet anaret ahuatoteñ ñaña ñerra'm attach ye'chatan po'potantañ, ñeñña acheñerpa' amach tama sherbeno Yomporecop ñeñ atto ayochreshattena ña pue'ntañot. Tarraña ñerra'm esesha'chña e'ñe etsoterre' ñaña ñerra'm e'ñech atet ye'chatan po'potantañ, ñeñña acheñerpa' ñeñtcha'ña atarr sherberrets Yomporecop attoch ayochreshatterra ña. 20 Napa' o'ch notas, po'ño'chca'ye sa atet e'ñe pocte' es sorratyen, ellochña señtana'tuerepa'ch atet es cohuen orrtatyeneñ fariseonesha' ñaña añ ñeñ atarr etsotayenayeñ ñoñets ñeñ atet anaret. Ñerra'm amach señtana'tuerranetopa' amach errotent so'pataprechoña Yompor po'cohuenña atto ayochreshattena ña pue'ntañot. Attoña ama't ahuatapa' amach se'cherro all amcha'tarettena pue'ntaño.

Atto Jesús'pa' ye'chatosanet ama e'moñe'tanna'tpahuoyaye (Lc. 12.57-59)

21 Jesús'ña'pa' alla yerpatterraneterr ñeñ atet anarettete't ahuatoteñ ñoñets, ñeñpa' atet otterraneterr:

—Sa ahuatoteña' se'marte'ña atet otarette't ahuat acheñenesha'. Ñeñpa' atet otarette't: “Amach muetsatsteto acheñ. Ñerra'm esesha' muetsene' acheñpa' ñapa'cho'ña muetseretcha' tarro'mar ñeñtota'ña o'patateret coñcheñets.” 22 Elloña na te'pa' o'ch noterres, ama't ñeñ atta e'moñe'tene' pamo'tspa' ñapa'cho'ña ñeñtota'ch o'patateret coñcheñets. Ñaña ñerra'm esesha' atarr sosyot sochatse'teñet pamo'ts ñeñpa'cho'ña

ñeñto'ach o'patateret coñcheñets allo'tsa'yen añcha'tareñesha'chno allecma a'pocatenet ñoñets. Ñaña ñerra'm esesha' puepencare'teño' atarr sosyo' sochatse'teñet pamo'ts ñeñtpa'cho'ña acheñerpa' añ o'patenaya tso' ñeñ parrarets errañaren.

²³ 'Ñeñto'marña napa' o'ch notas: Ñerra'm esempo cho es ñapuen Yomporecop allecma sherbeñet Yompor allña'apa' taya o' peyerposya ñamo'tsña'pa' cha ñatsrre'mateñ, ²⁴ ñaña'pa' ñeñicha' ñap Yomporpa' pena'ner alla. O'ch ahuerreñ, pemo'nasheñña ñanom ñamo'tsterra'. Allempochña pepuerrera allecma sherbeñet Yompor allempochña ñaphuer Yompor ñeñt' p'o'patateña.

²⁵ 'Ñaña ñerra'm esempo esesha' setmantene' o'ch anmaset añcha'taretesho allcha' sa'pocataerra' señoñ, saña'pa' e'ñech allorocma samo'tstera ñeñt' se'moñe'tene' tayepa'tña'pa' ama sethena' añcha'taretesho. Chosachña amo'tsterraya ñeñt' setmantene' te't atot pomataterret añcha'taretesho ñaña'pa' o'ch pomuensa' guardiyesho ñeñicha' seyottañpse'. ²⁶ Po'ñochca'ye o'ch notas, ñerra'm choch yottañpsasetpa' allenasachca'ye o'pono allotpa' amachca'ye ahuen cha'nmaterrseto. Esemphuañencha' choch secha'nmaterret ñerra'm esempoch e'ñe setsa'tierra ora allohuen ñeñt' allpon quelle muenenet. Ama't e'ñe eptalla centavotollña ñerra'm ama setsa'tueña'pa' amachca'ye cha'nmaterrseto allot. Ñeñto'marña notenes o'ch e'ñe cohuen samo'tstera ñeñt' se'moñe'tene' tayepa'tña'pa' ama chennasa' ñeñt' atarr yoro'chen senten socop.

Atto Jesús'pa' ye'chatosanet ama achtapret'pahuoyaye taporets

²⁷ 'Ñaña sapa' ahuatoteñ se'marte'ña atet otarete't' acheñenesha': "Amach chetapretatsteto taporets." ²⁸ Elloña na te'pa' o'ch noterres, ñerra'm esesha' cohue' coyanesha' pueye'cheño', o'ca'ye ochña'tet pueyo'chreto.

²⁹ 'Ñeñto'marña notenes: Ñerra'm seclle' ñatyenes ñeñt' ama poc'teye' enteno Yompor, añ poc'tetsa o'ch seque'chpuerr ñeñt' seye'chena seclloyot. Ñeñtpa' e'ñe atet ñerra'mrrate' cho serroten seclle' o'ch sehuapore'ch, ama't ñeñt' seclle' secohuenrote'tsen ñeñt' atarr sesherbene'. Añña ama tama yoro'chenayaye socop o'ch sa'ypo'ñer e'ne tayecma ñeñt' soctape'chatene' sosya'tsañ. Añcha'ña atarr yoro'chen socop ñerra'm ama tayecma sa'ypo'ñerepa' esempohuañenpa' orach huapore'terrset coñcha'puetso all parraren tso'. Ñeñtpa' añ toma'ntena atet ñerra'mrrate' o' ya'chencaterr paterr yechets ama't yecle' ama't yot, te't esempohuañen ora yechtsohuenpa' huapore'terryet coñcha'puetso. ³⁰ Attecma ñaña ñerra'm sotpa' ñatyenes ñeñt' ama poc'teye' enteno Yompor añ poc'tetsa o'ch seque'chpuerr ñeñt' atet cho'cma ñatse'tatyenes sot. Ñeñtpa' e'ñe atet ñerra'mrrate' cho sepechen sotpa' o'ch sehuapore'ch, ama't ñeñt' secohuenrote'tsen sot ñeñt' atarr sesherbene'. Ñeñtpa' o'ch alla noterrser. Añña ama tama yoro'chenayaye socop o'ch sa'ypo'ñer e'ñe tayecma ñeñt' soctape'chatene' sosya'tsañ. Añcha'ña atarr yoro'chen socop ñerra'm ama tayecma sa'ypo'ñerepa' esempohuañenpa' orach huapore'terrset coñcha'puetso.

Atto Jesús'pa' ye'chatosanet ama asanna'tpahuoyaye
(Mt. 19.9; Mr. 10.11-12; Lc. 16.18)

31 'Ñaña te'pa' o'ch noterrser po'poñ: Sapa' ahuatoteñpa' señoñe'tña atet otarettete't: "Ñerra'm esesha' serre' puetaporpa' apa'nme'pa'ña pappell all aquellcare't attoch que'chpuerran puetapor." 32 Elloña na te'pa' o'ch noterres: Ñerra'm ama añecpaye' que'chpuerrano puetapor atto ama çhoye' aguënano po'psheñeñ yacma, ñerra'm attota serran puetapor; ñaña'pa' ochña'taterrancha' puetaporeshe'mañ po'psheññesho't; ñeñtpa' ama cohuenaye' enteñe Yompor. Ñaña ñerra'm esesha'ña yorerre' ñeñt asaretpa' ñeñtña yacmarpa' çhach chetapretenan po'psheñeñ puetapor; ñeñtpa'çho'ña ama cohuenaye' enteñe Yompor.

Atto Jesús'pa' yeçhatosanet amach natsteto po'ñoñ Parets pa'so'chño

33 'Ñaña te'pa' o'ch noterrser po'poñ: Sa ahuatoteñpa' se'mare'tña ñeñt atet otarettete't: "Amach e'ñe orrena na'yeneto po'ñoñet Parets pa'so'chño tarro'mar ñerra'm erra'tsen nene' po'ñoñ Parets pa'so'chño ñeñtpa' atarr huomenc ñoñets amach atta puesatscheto, çhocmachña e'ñe a'pocatyenet ñeñt atet o' nohuetña po'ñoñet Parets pa'so'chño." Ñeñtpa' atetca'ye otarettete'tña ahuatoteñ. 34 Tarraña elloña na te'pa' o'ch noterres: Ama't e'ñe erra'tsena pa'so'chño'pa' amach senatsto señoñ. Amach sotatsto o'ch sena' señoñ Yompor pue'ntañ pa'so'chño; ñeñtpa' ama tama huomencaye' senteñe ñeñfecop atet senen señoñ. Tarro'mar napa' o'ch notas ama't pue'ntañpa' ñeñt po'conañ pen Parets ñeñto'marña attera atarr huomenc ñerra'm Pamo'mte'. 35 Ñaña amach sotatsto o'ch sena' señoñ Yompor po'patseñ pa'so'chño tarro'mar ñeñtpa'çho'ña attera atarr huomenc tarro'mar ñeñtpa' ñeñtña nen Parets pa'tconet. Ñaña amach sotatsto o'ch sena' señoñ Jerusaléñ pa'so'chño tarro'mar ñeñtpa'çho'ña attecma atarr huomenc tarro'mar ñeñtpa'çho'ña ñeñt pa'netser pen Parets. 36 Ñaña amach sotatsto o'ch sena' señoñ e'ñe sa soñ pa'so'chño tarro'mar ñeñtpa'çho'ña ama soyaye seyeçhcatar. Ama't e'ñe pue'parra sechpa' amate' erroteno't sello'tacheña sa. Ñaña ñerra'm esempoch sello'tenpa' amach erroteno't alla sa'quelluetatereña sa. 37 Ama't errotena sepa'yesa'chpa' atetcha' sotanna'tyesa: Ñeñtpa' atetcha'ca'ye yepe'. Ama palltenoña o'ch sena'yen señoñ ama't e'ñe esa pa'so'chño tarro'mar ñerra'm atet sepa'yenapa' ñeñtpa' oneñeshota huena.

Atto Jesús'pa' yeçhatosanet ama atsa'tatpahuoyaye atto e'moñe'tenyet (Lc. 6.29-30)

38 'O'ch alla noterrser po'poñ: Ñaña sapa' ahuatoteñ se'mare'tña ñeñt atet otete't: "Ñerra'm esesha' pochoclle'che' pamo'ts, semoñseño't ñeñt apochoclle'charetpa' sepo'choclle'ch ñaña ñeñt pochoclle'chene' pamo'ts. Ñaña ñerra'm esesha' pue'moñe'teño'tan a'cayanpsan pamo'ts pa'spa' semoñseño'tpa' sa'cayanpes ñaña pa's ñeñt a'cayanpene' pamo'ts pa's." Ñeñtpa' atetca'ye otarettete'tña ahuat. 39 Tarraña na te'pa' o'ch notas ellonet: Amach semoñsatstoña sa e'ñe sañeña ñerra'm esempo e'moñe'tyenset. Atet ñerra'm esempo esesha' pue'moñe'teño'tetas o'ch taclaset setsa'po secohuenrot, sañapa' poctepa'chña señch taclerrserrepa' ñaña po'psheñtaño't. 40 Ñaña ñerra'm esempo esesha' muenene' o'ch temantaset attoch puerratampsaset seshtam, sañapa' poctepa'chña señch puerratampsasetpa' seshtam ñeñt muenenet

ama't ñaña po'pmañ seshtam allo sepmatena. ⁴¹ Ñaña ñerra'm esesha' sanmatsre'tatene' e'ñe atta pa'terr kilómetro, sañapa' poctepa'chña señch o'ch sanmatsre'ch ama't epa kilómetro. ⁴² Ñaña ñerra'm esesha' es senamuene', sañapa' sapepa'ch. Ñaña ñerra'm esesha'ch senamuene' o'ch es sarchapa' sañapa' sarchepa'ch.

Atto Jesúsapa' ye'chatosanet amorrentpo'ch yeñch ñeñt'ye'moñe'tyene'
(Lc. 6.27-28, 32-36)

⁴³ Ñaña sapa' se'marte'ña atet otete't ahuat: "Mueryetcha' pamo'tset ñeñt muerenahuet. Tarraña ñeñt e'moñe'tenahuetpa' ñetpa'cho'ña o'ch e'moñe'chet ñamet." Ñeñtpa' atetca'ye otete't ama't ahuatoteñ. ⁴⁴ Tarraña ñaña te'pa' elloña o'ch noterres: Semueryach ama't ñeñt se'moñe'tene'. Ñaña ñeñt sarrnomare'tenaya sañapa' o'ch senamaterrñañ Yompor pa'nateña. Ñaña ñeñt erro't sepepe'pa' sañapa' añcha' atet sepoñ ñeñt atarr cohuen enten ña. Ñaña ñeñt sa'muero'chtatene' sañapa' o'ch sema'yocham'pesya. ⁴⁵ Attochña sapa' eñotenset po'ño'ch puechemer penes Yompor ñeñt pue'ntaño'tsen tarro'mar sapa' añ sorrtatyen cohuen ama't e'ñe allohuenacop e'ñe atet pena Sompor ñapa' e'ñe cohuenare' es orrtatyen ama't allohuenacop. Atet ñapa' chocma huapata'muenane't po'puetarenña allohuenacop ama't atsrre'mña'fecop ñaña ñeñt cohuenacop acheñer. Ñaña ñapa' chocma huatateñ añecop ñeñt e'ñe pocte' es pets ama't ñaña añecop ñeñt ama pocteye' es pa'yetso. ⁴⁶ Ñeñto'marña notenes: Ñerra'm aña e'ñe semorrentena ñeñt semorrentenaya saña ñeñtpa' amach e'ñeye' sorrtatenoña ñeñt e'ñe po'ño'ch cohuentetsa, attoña Yomporpa' amach es apuerrso ñeñt'cha' atarr socshaterre'. Tarro'mar ñeñt ama ame'ñenayo Yompor, ñetpa' aña morrentenet ñeñt e'ñe morrentenahuet ñamet. Sapa' e'ñeca'ye señoteñ e'ñe atet pena ñeñt puehqu'ño'te'na cobrenan acheñenesha' shonte' quelle. Aña atarr cohuentetsa ama't ñeñt ama yemorrentenayepa' o'ch yemorreñcha e'ñe cohuen. ⁴⁷ Ñaña ñerra'm e'ñe aña cohuen saguën ñeñt e'ñe samo'ts sepen, ñeñtpa' amach erro'teno't sem'tanoña ñeñt ama ame'ñetso, tarro'mar ñetpa' e'ñe aña cohuen aguënet ñeñt e'ñe pamo'ts penet. ⁴⁸ Ñeñto'marña napa' notenes: Sapa' e'ñepa'chña cohuenare' es sorrtatyen allohuenacop e'ñe atet pena Sompor ñeñt pue'ntaño'tsen e'ñe cohuenare' es orrtatyenña ña.

6

Atto Jesúsapa' ye'chatosanet amach pommo'cheño'te'na es cohuen ortatatsteto

¹ Jesúsña'pa' atet o'terraneterr:

—E'ñech señota, amachña e'ñe sommo'cheño'te'naña es sorrtatyeno cohuen Yomporcop attoch acheñenesha'pa' o'ch entenset sapa' atarro' cohuen acheñeseñ. Tarro'mar ñerra'm ñeñt'epa'na es sorrtatyen cohuen, Yomporña ñeñt pue'ntaño'tsenpa' amach es apuerrsoña sa ñeñt'cha' atarr socshaterre'. ² Ñerra'm esempo es sapueñ huocchañnesha'pa' e'ñechña a'nahua sapuenanet. Sommo'cheño'tpa' amach sotatsto entasepa' allohuen acheñenesha' attoch e'ñe cohuen entasetañ. Tarro'mar ñeñtpa' ommoña'fenesha' atet petsa. Ñeñt ommoña'fenesha'pa' ñerra'm esempo es apueñet huocchañnesha'chnopa' o'ch orrtachet allo'tsa'yen allohuen

acheñenesha' all puerahuo'mar ama't ñaña toño'mar; attochña allohuen acheñenesha'pa' e'ñech cohuen entenanetañ. Tarraña napa' o'ch notas, ñeñt atet petsapa' Yomporñaapa' amach es apuerraneto ñeñtcha' atarr coshaterrahuet. Tarro'mar ñetpa' aña e'nenet acheñeneshach cohuentatenahuet. Ñetpa' e'ñech alla atsa'taretterret. ³ Tarraña sapa' ñerra'm esempo es sapueñ huocchañesha'chno amach esesha' sotapsa'tatsto ama't ñeñt e'ñe parro seyemtannena. ⁴ E'ñechña a'nahua es cohuen sepa'yen, allochñaapa' Sompör ñeñtña entene' allohuen ñeñt a'nahua es sepa'yen, ñachña sapuerre' ñeñtcha' ello atarr socshaterre'.

Atto Jesúsapa' ye'chatosanet e'ñech cohuen ma'yochet
(Lc. 11.2-4)

⁵ Jesúsñaapa' atet oterraneterr:

—Ñaña ñerra'm esempo sema'yochena sapa' amach atet sepatsto atet pena ommoñañenesha'. Ñetpa' añe'paña ma'yochenet attoch acheñenesha'pa' e'ñech cohuen entenanetañ. Ñeñto'marña allempo ma'yochenetpa' arrach tomyesoset all shontena acheñenesha' puerahuo'mar amapa' all etsape'tyena toñ allecma hua'chena shonte' acheñenesha' attochña allohuen acheñenesha'pa' e'ñech cohuen entenanetañ. Tarraña napa' po'ño'chpa' o'ch notas: Ñeñt atet ommo'chetsa Yomporñaapa' amach apuerraneto ñeñtcha' coshaterrahuet tarro'mar ñetpa' aña e'nenet acheñeneshach cohuentatenahuet. Ñetpa' e'ñech alla atsa'taretterret. ⁶ Sañaapa' ñerra'm esempo sema'yochenapa' o'ch sebe'tosyes so'ponro chochña seyottam'psa attochña sapa' amach sommo'cheño'a sema'yocheño'a Sompör, ñeñt'pa' e'ñech ñapue't allo'tsenes epas. Allochñaapa' Sompör ñeñt e'ñe ñap'ta sentene' ñachña sapuerre' ñeñtcha' ello atarr socshaterre'.

⁷ Sa ñerra'm cho sema'yochenapa' amach atta nanac señosatsto atarr aton e'ñe orrena ñeñt atet pena po'poñ acheñenesha' ñeñt ama ame'ñenayo ñeñt ya Yeyomporer. Ñetpa' atarr tematen ma'yochenetaña' tarraña ñeñt'ach alla oterrete't. Chate' otenapuetañ ñerra'm atarr tematen eño'setpa' e'ñe'e' cohuen entenanet Yompor attoch e'ñe cohuen e'mñnotenamet. ⁸ Sañaapa' amach atet sepatsto atet penet ñet tarro'mar sapa' ama't ama es senamuena' sema'yocheño'a, Sompörña e'ñe eño'tuennas ñeñt sepallta'yena. ⁹ Sañaapa' atetcha'ña cohuen sema'yochaña sa:

Yompore Partso ñeñte'p pe'ntaño'tsen, yentapepa'ch pa atarr Partso'p.

¹⁰ Chapuepa'ch Nompore allempoch atarr pa'yochreshatterra arr pat-sro. Yetsotonapepa'ch arr patsro ñeñt atet pemnen pa Nompore ñeñt atet penet ñaña all pe'ntaño.

¹¹ Chocmuepa'ch Nompore pa'pueney ñaña yocrrañ ñeñt allpon yepallta'yena pate'tets yet.

¹² Pe'pretna'huonayepa'ch Nompore allohuen yo'chñar ñeñt ama poct-eye' pentapretenye atto Nompore yapa'cho'ña ye'pretnannena ñerra'm esempo erro't yepannena.

¹³ Ñaña amach Nompore pemnatatsche sosya'tsañ o'ch atarr topateney. Añcha'ña choch Nompore pa'ypo'ñataterrey allohuen sosya'tsañe'chno. Tarro'mar e'ñe pa Nompore ayochreshattetsa ñeñte'p atarr Partseshatets, e'ñe pa'p'ta ñeñte'p Nompore

aye'chochtatare'ttetsa e'ñe errponañohuen. Ñeñtach nenamaþ; ñeñtpa' attepa'ch Nompore.

¹⁴ 'Ñerra'm sa chocma seþretnannena atto errof seþannenapa' sapa'cho'ña chocmach peretnerresña Sompore ñeñt pue'ntaño'tsen. ¹⁵ Tarraña ñerra'm ama cho seþretnannenopa' Somporepa'cho'ña amach peretnernasoña saña so'chñar.

Atto Jesúsapa' yeçhatosanet ñeñt e'ñech po'ñoçh tore'teñets Yomporecop

¹⁶ Jesúsñaapa' atet oterraneterr:

—Ñaña ñerra'm esempo semneñ sema'yocheñoñ Yompor o'ch sequeçhpa' serrar ñeñtpa' e'ñe pocte'. Tarraña ñeñtpa' ama añeçpayaye attoch entas acheñenesha' ñerra'm çha sellca'huenta. Tarro'mar ñeñtpa' ommoñañenesha'ña atet petsa. Ñetpa' ñerra'm esempo queçhpunenet puerrar Yomporecop ñetpa' atatch atsocloyayenet allochñaapa' attoch eñotenanet acheñenesha' ñetpa' Yomporecop' atet penet. Tarraña na po'ñoçhpa' o'ch notas: Ñeñt atet ommo'chetsa puefore'teñoñ Yomporñaapa' amach es apuerraneto ñeñtcha' atarr coshaterrahuet. Tarro'mar ñetpa' aña e'nenet acheñeneschach cohuentatenahuet. Ñetpa' e'ñech alla atsa'taretterret. ¹⁷ Tarraña sa ñerra'm esempo e'ñe sema'yocheñoñ Yompor o'ch sequeçhpa' serrar sapa' atterachña sorrtena e'ñech cohuen satsaño'tyena ñaña se'pacle'chyena. ¹⁸ Allochña acheñenesha'pa' amach çha eñotaseto sapa' cho sequeçhpunen serrar ma'yochaya Yompor. Sapa' e'ñech ñapña Sompore sentene' ñeñt pue'ntaño'tsen. Allochñaapa' Sompore ñeñt e'ñe ñapña sentene' ñachña sapuerre' ñeñtcha' ello atarr socshatterre'.

Atto ñeñtcha' seshonterr ñeñt atarr sherbets arrca'ye seshonteñ all Yompor pue'ntaño

(Lc. 12.33-34)

¹⁹ Jesúsapa' alla oterrer:

—Ñaña amach seshonta'yesatsto checmañats aña patsro ñeñtcha' atarr semorrentena. Ñeñtpa' atarr apomþpere'chña atarr aptsaña. Ama't eñeþpa' o'ch be'tosamþsonasapa' o'ch yoratsre'tamþesuas. ²⁰ Yompor pue'ntañoçhña seshonta'yesthesia ñeñt e'ñe po'ñoçh sherbets. Ñeñtpa' ama apomþpere'chño ñaña ama aptsaña. Allpa' ama't eñeþapa' ama be'teno attoch yoratsre'tamþesuas. ²¹ Tarro'mar ñerra'm all Yompor pue'ntaño seshonta'nen ñeñt atarr cohuen senten, yeñoteñ e'ñe ñeñña paterr senen seyoçhro ñeñtña atarr sherbets Yomporecop. Tarraña arr patsro ñerra'm aña seshonta'nen ñeñt atarr semorrentena, yeñoteñ e'ñe ñeñña paterr senen seyoçhro ñeñtñaapa' ama es sherbenaña Yomporecop.

Atto yeçlle'pa' añ toma'ntena ñeñt po'lampareñ pen allohuen yeçhets

(Lc. 11.34-36)

²²⁻²³ Jesúsñaapa' alla oterraneterr:

—Yeçlle'pa' añ toma'ntena atet ñerra'm ñeñt po'lampareñ pen ora yeçhets. Ñerra'm e'ñe cohuen huomech yeçlle'pa' e'ñech cohuen entateney puetare'. Allochñaapa' attoch e'ñe cohuen torratyenana allemeñ yeçhets tarro'mar e'ñe cohuen a'puetarsamþsarettenet. Tarraña yeçlle'ña ñerra'm ama e'ñe cohuen huomþcheyayepa' amach e'ñe cohuenaye' entateney puetare' attochña amach eshcaye'

torratyenano allemeñ yechets tarro'mar cha ottena ñerra'mrrate' checmeto'tsa'yeneta. Attecma pena ñaña yeyoçher. Ñerra'm e'ñe cohuen yoctape'chyen yeyoçhro, ama aña es ye'nyeno ñeñt e'ñe yocpa, attoña çhennayaña e'ñe ora allohuen Yompor poçtaþña ñeñt po'cohuenña pen. Attoña ora yoctaþña' e'ñech a'puetarsañpsarettena Yomporeshot. Tarraña ñerra'm ama cohuenaye' yoctape'cheno yeyoçhro, ñerra'm aña ye'nyen ñeñt e'ñe yocpa ñeñtpa' amach errotenot a'puetarsañpenyeña ñeñt yoctaþña yepen. Ñeñtña yoctaþña yepenpa' atarrcha' a'checmetañpennay yeyoçher.

Amach aña yema'yochratsto ñeñt e'ñe yocpa attoch yegana aton quelle; ñeñt atetpa' amach errotenot yema'yochroña ñaña Yomprecop

(Lc. 16.13)

²⁴ 'Ñeñtpa' atetcha' yetma'ntacha: Ama't puesheñarrofeypapa' amach errotenot e'ñe cohuen yetaruasoña epsheño'mar yamo'mtayecop. Tarro'mar ñerra'm atet yeþapa' puesheñarr e'ñech cohuen yemorrenteñoť yocsheñeshocmañen yesherbeñ, po'psheñeñña' amach e'ñeye' yemorrenteño; çhach yottena ñerra'm cha yetsena'teñ. Ñeñto'marña ñeñtpa' amach cohuenaye' yesherbeñe. Ñerra'm aña e'ñe sema'yochrena ñeñt e'ñe socpa attoch segana aton quelle, ñeñt atetpa' amach errotenot sema'yochroña ñaña ñeñtecop atarr sherbets Yomprecop.

Atto Yomporpa' ñach e'ñe cohuen cohuanpene' ñeñt puechemerasha' pen

(Lc. 12.22-31)

²⁵ 'Ñeñto'marña te'pa' o'ch noterrser: Amach aña sellcatsto ñeñt atto yocrena arr patsro. Ama't seyoçhrapa' amach sotatsto, esuachca' yerrerrerte' tsapatonet, esuachca' yorrite'. Ñaña amach aña sellcatsto ñeñt e'ñe sechtsocpa. Amach sotatsto, esuachca' yechorrate'. Tarro'mar Yompor ña yapuene' yo'rreñña allo yocrena ñeñtña atarr nanac sherbets. Ñeñto'mar yeñoteñ ña yapuene' ñaña yerrar ñeñtña ñocoppa' ama esoye' enteñe. Ñaña ña yeçhcatene' ye'chets ñeñt atarr sherbets. Ñeñto'mar yeñoteñ ña yapuene' ñaña ama't ñeñt yechorra'yena ñeñtña ñocop ama esoye' enteñe. ²⁶ Senteñte' atto correna otreshaçhno ñeñt anomcha'tyetsa entonet. Ñetpa' ama çhoye' nare'tatseteneto ñaña ama çhoye' apcha'yeneto puerrar ñeñtcha' rra'yenet. Ñetpa' ama es echenaye allcha' es añño'tyenet. Ama't atto correnet Somporna ñeñt pue'ntañ'tsenpa' e'ñe yeçhcatyesuanet ñeñtcha' puerrar pa'yenet. Elloña sa Yomporpa' atarr morrentensa sa; ello semtaneñ ñeñt atto atarr morrentenana otreshaçhno. ²⁷ Ñaña amach sellcatsto attoch amach serromo tarro'mar ama't sellquëñañ attoch atarr atomat socrra arr patsro, tarraña ama't e'ñe puesheñarrofesapa' amate' errotenot so'chtatoña socreña ama't e'ñe pamtarra.

²⁸ 'Eso'mare'tcha'ña sellca'yesaña attoch sepashta. Senteñte' atet yeçhquëna roreçhno ñeñt chopyets ñota allemeñ. Ñetpa' ama çhoye' taruasa'yeneto ama't mamesha ama çhoye' taneneto ñeñt chorra'yenet atto e'ñe cohuen orretyenet. ²⁹ Tarraña napa' o'ch notas: Ama't añcha'taret Salomón atto e'ñe a'cohuentate't ahuat, ama't ñapa' ama chorrane'teña ñeñt atarr cohuen ñeñt atet atarr cohuentena ror. ³⁰ Ñaña

ñeñt ror pue'chorpa' ñeñtara ta'te' ñeñt choppyets allemeñ ñeñt sentyen te' tarraña ñeñtpa' mamecpa. Ama't cohuen chopyleneñ te'pa' tsapatoneñña'pa' o'ch etomaniperetpa' e'ñech colla'huerrapa' o'huañcha' cohuenta. Ñehua, Yompor atto cohuentatyenan ama't ñeñt e'ñe mamecpa, elloña sapa' atarr chorratyensañ saña; saña'pa' eso'marte'ña amaña e'ñeye' seyemteño. ³¹ Ñeño'marña notenes: Amach atarr sellca'yesatsto. Amach sotatsto: "Esuachca'ye yerra'te'. Esuachca'ye yorrte'." Amach sotatsto: "Esuachca'ye yechorrate'." ³² Tarro'mar allohuen acheñenesha' arr patsro ñeñt ama ame'ña'yetsa, ñetpa' ñeñtña e'ñe paterr e'nenet. Ñehua, Somporña ñeñt pue'ntaña'tsen ñapa' e'ñe entuenes ñeñt allpon pa'namen sepallta'yena arr patsro. ³³ Sapa' añcha'ña e'ñe ñanom sema'yochrena Yomporcop attoch atarr ayochreshattena ña. Ñaña añcha'ña sema'yochrena ñeñt e'ñe pocte' enten ña, allochñapa' ñachña sapa'yene' ñeñt allpon sepallta'yena saña. ³⁴ Amach e'ñe tayecma sellca'yesatsto ñeñtcha' setantyesoya tsapatoneñ. Tarro'mar ama't e'ñe tayoteña'pa' chocma eñall ñeñt allcatañyetsa ama't e'ñe pate'tets yet.

7

*E'ñe attotapa' amach yotteñe'channa'tatsto
(Lc. 6.37-38, 41-42)*

¹ Jesús'pa' atet oterraneterr:

—Sapa' e'ñe attotapa' amach sottene'chatsche po'psheñeñ allochñapa' amach otteñe'cherrso saña Yompor. ² Tarro'mar ñerra'm atet sottene'chyeñ po'potantañ, Yomporpa'cho'ña e'ñech attecma otteñe'cherres saña. Ñerra'm errponochcha' sottene'chyeñ po'potantaña'pa' sapa'cho'ña e'ñech allponoch otteñe'cherres saña Yompor. ³⁻⁵ Amach atet sentatsche po'potantañ ñerra'm ñetpa' ama cohuenaye' es peneto, ama't sapa' ama sentenoña ñeñt atet sepa'yena sa ñeñtpa' ello semtaneña po'potantañ ñeñt atet es pa'yenet ñet. Ñerra'm ama cohuenaye' es sepeno saña'pa' amach sotatscheña po'potantañ: "Napa' o'ch noctape'chatuerres e'ñe cohuen." Tarro'mar ñerra'm atet sepenapa' cha sommo'chena. Ñanomcha'ña añ sehuapore'terr ñeñt ama cohuenaye' sepeno sa, allochñapa' attoch seño'ch co'tape'chate' samo'ts e'ñe cohuen. Ñeñtpa' añ toma'ntena o'ch sentoñ po'psheñeñ pa'cloyo'tsen puepachña ama't sa seclloyopa' allo'tsen tsach; ñeñtña'pa' ama senteñe. Ñerra'm atetpa' amach errotent socheña po'psheñeñ napa' o'ch nechternap peclloyot pepachña tarro'mar añ tsach ñeñt seclloyo'tsenpa' cha a'npuennasña attoch e'ñe cohuen es sentyen. Ñanomcha'ña añ sehuapore'terr tsach seclloyot allochñapa' attoch e'ñe cohuen es sentyen. Attochña e'ñe cohuen sechterrñañ po'psheñeñ puepachña pa'cloyot.

⁶ Jesús'pa' atet oterraneterr po'poñ:

—Ñeñt ama quechpuenaye pachmareñ ñaña patpareñ amach alla seserrpare'taterranete'te Parets po'cohuenña. Tarro'mar ñetpa' atta penet ñerra'mrate' ochec. Ñehua, ochec ñerra'm esempo ama'tcha' atarr cohuen ya'ppa' ya'nach rrema'pes chach achota'teypa' o'ch shet-say. Ñaña ama't atet ñerra'm chañcho ñerra'm esempo es yena'

ñesho ama'tcha' atarr cohuen yenten ya, yeser, chañchoñapa' attach atmama'tamñsey tarro'mar chañchopa' ama esoye' entenano ama't ñeñt atarr cohuen.

Chocmach es yenamueñ Yompor ñaña chocmach ye'neñ
(Lc. 11.9-13; 6.31)

⁷ Jesúsapa' alla yeçhatterraneterr po'poñ, ñeñtpa' atet otarraneterr:

—E'ñe senamueño, Yomporñapa' apascha'. Se' name'teño'tpa' señchcha'; seçhore'teño, Yomporñapa' e'ñe pue'mñoteño'espa' e'ñech cohuen toramñsapas. ⁸ Tarro'mar ñeñt es enamare'tetspa' ñetña es aguë'tset; ñaña ñeñt es e' name'tets ñetñapa' chocmach eñchet ñaña erra'tsen ñeñt çhore'tyene' ñetñapa' e'ñe e'mñotenanet Yompor.

⁹⁻¹¹ 'Yompor ñeñt pue'ntaño'tsen chocmach e'ñe cohuenare' es apa'yeney ñerra'm esempo es yenamueñ. Ñapa' amach ñaña apuenye ñeñt ama cohuenaye' yenteno ya. Ama't sa ñeñtes arromña'tes atet sepeñ saña sechemer, e'ñech cohuen es sapueñ ñerra'm esempo es enamuenes. Atet ñerra'm allempo pa'chporrño't es enamuenes, o'ch enamas mam* ñeñtcha' rra', sapa' ama't puesheñarrofesapa' amach ñaña sapueñña sechemer mapue' ñeñt ama arrapahuoyaye. Amapa' ñerra'm cac enamuenes sañapa' ama't puesheñarrofesapa' amach ñaña sapueñña sechemer shechep ñeñt atarr amuerochtatañ. Ñeño'marña sa ama't arromña'tes ama't ñaña atsrre'mña'tes sapa' e'ñe seño'teñ apa'yese' sechemerasha' e'ñe cohuenare'. Añña ñeñt Seyomporer sepen saña ñeñt pue'ntaño'tsen elloña ñapa' e'ñe eño'teñ atto e'ñe cohuenare' es apa'yenes saña ñeñtes es enamueñe'.

¹² Ñeño'marña atet notenes: Ñerra'm erra'tsente' e'ñe cohuen senten ñeñt semnen sa ñeñtcha' atet ponas po'psheñeñ, sapa'çho'ña e'ñech attecma sepanet saña. Tarro'mar ñeñtpa' atet otene'y Yompor po'ñoñ ñeñt ahuatoteñ, ama't Moisés po'ñoñ ñeñt atet anaret ama't ñaña ñeñt a'mta'yesaye't Yompor po'ñoñapa' e'ñe attecma otyesete't.

Atto Jesúsapa' toma'ntaterraneterr ñerra'mrrate' yetarro'tollo yebe'ten esheccha' yeçhap Yomporesho

(Lc. 13.24)

¹³ Jesúsñapa' atet toma'ntaterraneterr, ñeñtpa' atet otanet:

—Sebe'tos yetarro añe'oll tarro'mar ñeñt atarr yetarr, atarr toñ ñeñtpa' alla sen chenca'puetso. Shonte' acheñenesha'pa' e'ñe alla be'tosçha'tyenet. ¹⁴ Ñeñtña añe'oll yetarr, añe'oll toñ ñeñtñapa' arr sen corra'puetso allña sapa' corretsasach. E'ñe puesheña'ttsa entene'ña ñeñt toñer.

Ñeñtpa' añ toma'ntena attoch yocter Cristo, çhoch yesuanemña ñeñt ama cohuenaye' entapretenye.

Allohuen acheñ ñeñt e'ñe po'ñoçh cohuen acheñer, ñetñapa' añcha' ortatyenet ñeñt e'ñe cohuenare'

(Lc. 6.43-44)

¹⁵ Jesúsñapa' atet otarraneterr:

—Sapa' seño'tach tarro'mar huaponasach ñeñtcha' ayçha'natatsa ñetpa' a'mteneto' Yompor po'ñoñ. Ñetpa' puehquëño'tetpa' ottenetañ atet ñerra'm atarr cohuen acheñret e'ñech attetañ ñerra'mrrate' carrnero

* **7:9-11** Ñehua, Jesús añ toma'ntatanet pan ñeñt puerrar penet all pa'nyo.

ñeñt ama errot añañeyaye ama't mamesha. Tarraña ñetpa' atta shequënet tarro'mar e'ñe po'ñoçh ñetpa' e'ñe atet ñerra'mrrate' ma'yarr ñeñt añach e'nyen ñeñt e'ñe ñocpa. Atotcha'ña e'ñe a'chencatuerran acheñenesha'.¹⁶⁻²⁰ Tarraña sapa' attotcha'ña e'ñe sechme'tyesan. Tarro'mar allohuen acheñenesha' ñeñt e'ñe po'ñoçh cohuen acheñeneshar, ñetpa' añcha'ña orrtatyetet ñeñt e'ñe cohuenare'. Tarraña po'potantañ acheñenesha' ñeñt po'ñoçh ama cohuenayaye, ñetña'pa' añach orrtatyetet ñeñt ama cohuenayaye. Ñeñt'pa' atetcha' netma'ntacha. Ora allohuen ñeñt e'ñe cohuenare' narmetsocheçhno'pa' pue'merpa'çho'ña e'ñech cohuenare'. Ama't parrochapa' amach me'toña ñeñt ama cohuenayaye. Aña po'pchañeçhno narmetsocheçhno ñeñt ama cohuenayaye, pue'merpa'çho'ña amach cohuenayaye. Ñeñt'pa'çho'ña ama't parrochapa' amach me'tenoña e'ñe cohuen. Ñaña yapa' e'ñe yeñoteñ ama't errotenapa' ama arroteye' yetoquënoña llo'm ajçot. Ñaña ama't errotenapa' ama arroteye' yetoquënoña ap rrenagachot.† Ñeñto'marña attoña yeñoteñ erra'tsen'te' ñeñt e'ñe cohuenare' narmetsoch, ñaña ñeñt ama cohuenayaye; pue'merotña yechme'teñ. Ñaña allohuen narmetsocheçhno ñeñt ama cohuenaye' me'tyetsopa' a'mata'tueretcha' sarrrotueretcha' tso.

Atto amach allohuenacmaye' çhapueto all añcha'tarettena Yompor pue'ntaño

(Lc. 13.25-27)

²¹Jesúsña'pa' atet oterraneterr:

—Ñeñt notyenayeñ: “Papa' po'ñoçh na'yochreshater nepeneþ”, tarraña amach allohuenacmaye' çhapueto all añcha'tarettena Nompör Parets ñeñt pue'ntaño'tsen. Añach çhapyerrets all ñeñt e'ñe po'ñoçh atet pene' ñeñt atet muenen Nompör ñeñt pue'ntaño'tsen.²² Allempopa' shonte'ch acheñenesha' ñeñt'cha' notyerrayeñ: “Po'ñoçh Ayochreshate e'ñe peso'chña'pa' çhocmaca'ye ya'mtonape'tña peñoñ. Ñaña yeçhore'teño'teþ peso'chña'pa' çhocmaca'ye yequeçhpatache'tña shonte' oneñe'teçhno. Ñaña yeçhore'teño't peso'chña'pa' epaye'ca'ye yorrtatyese'tña partsoteñets.”²³ Naña allempopa' na'meta'huerranetcha', notyerranetcha': “Ama't ahuatapa' ama nentarso, ama neyochreshayayso. Te'pa' orrerres, sapa' aña setsoten ñeñt ama cohuenaye' nenteno.”

Atto Jesús toma'ntatana acheñ ñeñt e'ñe eñotene' ñeñt po'ñoçh sherbets ñaña ñeñt ama eñotene' ñeñt sherbets

(Lc. 6.47-49; Mr. 1.22)

²⁴Jesúsña'pa' atet oterraneterr:

—Allohuen ñerra'm erra'tsencha' e'mñotene' neñoñ ñeñt atet e'ñe cohuen neyçhatenanet, ñerra'm ñetña e'ñech atet penet, ñetña'pa' e'ñech eñoteñet ñeñt e'ñe po'ñoçh sherbets. Ñeñt acheñer ñeñt atet petsapa' ñapa' e'ñe atet ñerra'mrrate' puesheñarr yacma ñeñt atarr es eñotets. Ñaña'pa' tomatan pa'paquëll, e'ñe echarr pe'.²⁵ E'ñe tomatue'pa' huata huomenc, apellchena oñ, orrnota, pocollña'pa' orrnotamþsa. Ama a'matanþse tarro'mar quellpachpa' e'ñe echarr atomatare't.²⁶ Tarraña

† 7:16-20 Ñehua, Jesús añ toma'ntatanet uva ñaña higo ñeñt puenareñ penet all pa'nyo.

po'potantañña ñeñt e'mñnotene' neñoñ ñetña ñerra'm amach atteye' peneto ñeñt notenanet, ñetñapa' e'ñech atteta ñerra'mrrate' puesheñarr yacma ñeñt ama es eñoteno. Ñapa'cho'ña tomataneñcha'ña pa'paquell, tarraña amach echarroye' pe. ²⁷ E'ñe tomatue'pa' huata huomenc, apellchena oñ, orrnota, pocollñapa' orrnotamñsatsapa' chepa'tcha' mata'nerretspa' e'ñe muellotsetuerra.

²⁸ Allempo serrpare'tatuanet Jesús, acheñenesha'ñapa' epaye' cohuanrrorteñet ñeñt atet ye'chatenanet ña. ²⁹ Tarro'mar ñapa' atarr cohuen ye'chatenanet ñerra'mrrate' ñeñt allsensarettetsa Partsheshot. Judionesha' pa'mcha'tarefernesha' ñeñt atarr etsotayenayeñ ñoñets ñeñt atet anare't, ñetñapa' ama e'ñeye' atteye' ye'chateneto.

8

Atto Jesús a'crraterran puesheñarr yacma ñeñt aptsarñat
(Mr. 1.40-45; Lc. 5.12-16)

¹ Allempoña err Jesús aspento'tpa' co'ta'huanererr acheñenesha' nanac shonte'. ² Allñapa' huapoña puesheñarr ñeñt osen puetsarñats ñeñt otenet lepra. Chap Jesúseshopa' allenta concorposana Jesúsapa' atet otos:

—Ayochreshate ñerra'm pa muenats papa' ñeñtep atarr ahuamencateshap pa'crrataye'cherren allochñapa' attoch e'ñe cohuen entuerren acheñenesha'.

³ Jesúsña anretapa' allenta a'p'le', atet och:

—Napa' nemneñca'ye, metuerrepa'ña peptsarña allochñapa' attoch e'ñe cohuen entuerrep allohuen acheñenesha'.

Yacmañapa' allorocmuepa'tcha' metuerña pueptsarñapa' cha cohuenterrtsa. ⁴ Jesúsñaapa' alla otererr:

—Te' atto o' na'crraterreppa' po'ño'ch ama't e'ñe puesheñarrapa' amach potap'sa'tatsche ama't mamesha. Corneshachña pegatena' all peptsarse't. Atet nane't Moisés ñoñets añ acheñrecop ñeñtcha' a'crrataretterrtsapa' te'ñapa' o'ch es panom ñeñtcha' papos all ñeñt Yomporecop allochñapa' attoch e'ñe cohuen enterrep allohuen acheñenesha'.

Atto Jesús a'crraterran puesheñarr capitán pueñañra; ñeñtpa' romo'marnesha'
(Lc. 7.1-10)

⁵ Allempoña cherr Jesús Capernaumopa' allñapa' huapoña puesheñarr solltar po'ca'ptaner, ñeñtñapa' romo'marnesha' ama judioneshayaye. Ñañaapa' atarr otare'tosan Jesús, ⁶ ñeñtpa' atet otos:

—Nompocha' nepaclopa' atarr pa'nattenapa neñañra. Alla panena po'mayo nanac muero'chtana cha echarrtena.

⁷ Jesúsñaapa' atet och:

—Ama'tpa' napa' o'ch ahuen o'ch na'crratera'.

⁸ Capitánña puepatare'teño'pa' atet och:

—Na Nompocha'pa' ama cohuenayayno attoch pebe'tosapo'tamñpesna nepaclo. Arro'tach pot: “Ama'tpa' correrrepa' peñañra”, neñañrañapa' acrrerroche'ch. ⁹ Tarro'mar napa' ñeñten ñeñt atet petsa ñeñt atet otenen ñeñt neyechenaya na. Napa'cho'ña eñall ñeñt neyechena naña ñeñt nesolltarer nepen. Ñerra'm puesheñarr solltar noteñ: “Papa' o'ch ahuep a'yo”, ñañaapa' o'chcho' ahuo'. Naña

po'psheññ solltar ñerra'm noch: "Papa' apon arr", ñaña'pa' o'ch'cho' huapa. Ñaña po'psheññ na'taruasañer ñerra'm noch: "Papa' arrcha' petaruasa'muen", ñapa' allcha'cho' taruasa'muen. Ñeñto'marña napa' neñoteneñ ñerra'm erroten potenpa' e'ñechca'ye atet pena.

¹⁰ Allempo e'man Jesús ñeñt atet oten capitán, ñaña'pa' atet otan allohuen acheñenesha' ñeñt co'a'nene':

—Ñapa' atarrca'ye yemtenna, ama't ñapa' amaca'ye judioneshayaye. Napa' po'ño'ch o'ch notas: Ama't ahuatapa' ama nentareña acheñ ñeñt e'ñe atet neyemtenaya, ama't allohuen israelena'tarnesha'pa' ama't puesheñarra ama nentareña ñeñt atet atarr neyemtenaya.

¹¹ Ñeñto'marña te'pa' o'ch notas: Shonte'ch acheñenesha' ñeñt ama judioneshayaye ñeñtcha'ña e'ñe neyemterraya. Allochñapa' esempohuañenpa' ñetñapa' allenñateñcha' e'ñe huacha'tuerret ñeñtcha' anorr'cha'tyesuerrets all e'ñe Yomporesho all añcha'tarettena ña pue'ntañ. Allcha'ña rrallme'chapreteret yatañnesha'chno Abraham, ñaña Isaac ñaña Jacob. ¹² Shonteña judionesha' ñetcha'ña chapatsetañ all añcha'tarettena Yompor, tarraña ñetñapa' amach chapueto all tarro'mar ñetpa' ama naye' yemteneto. Ñetñapa' allach ahupore'taretterret a'yot checmeto. Allñapa' allcha' yahuanrrorterret, panmueño'fet atserrpa' rraso'tyesosetcha' pa's.

¹³ Allempoña Jesús'pa' alla otterranerr capitán:

—Te'pa' o'ch ahuerreñ pepaclo, e'ñe atto atarr peyemtennapa' attetepa'ch p'ocop.

Pueñañrañapa' e'ñe allempocma correrra.

Allempo a'crratosan Jesús Simón Pedro pa'so'mue

(Mr. 1.29-31; Lc. 4.38-39)

¹⁴ Allo'tñapa' chap Jesús Pedro pa'paclo. Allñapa' entosñañ pa'so'mue alla panena po'mayo'cha atsna'ten, cha hueraten. ¹⁵ Jesúsñapa' allenta a'p'losñañ potpa' cha metuerretsña po'urateña. Allenta tantapa' o'yema'tallme'cha'pa.

Allempo Jesús'pa' a'crraterran shonte'pa'namen atsnañe'chéchno

(Mr. 1.32-34; Lc. 4.40-41)

¹⁶ Ñeñte yetrocma allempo ellerrenpa' huacha'tateññañeterr shonte' ñeñt chorra'yena oneñe't. Jesúsñapa' e'ñe po'ñoño'ta que'chpatuerranet oneñe't ñeñt chorra'yenahuet. Ñaña allohuen ñeñt atsna'tyetspa' o' a'crratyesapanet. ¹⁷ Ñeñtpa' tarro'mar atet pa' allochñapa' attoch etsota Isaías po'ñoñ ñeñt a'm'taye't Yompor po'ñoñ; ñapa' atet ote't: "Ñapa' ñach yahuanman'perre' ñeñt yemuero'chtatyene', ñapa' ñach ahuanerre' allohuen ñeñt ya'tserrpa'yene'."

Allempo Jesús'pa' ye'chatan ñeñt muenene' o'ch co'er

(Lc. 9.57-62)

¹⁸ Po'pocheño allempo Jesús'pa' entapuenanerr shonte' acheñenesha' cha emchorra'hueñerr, ñaña'pa' atet otan pueyochresha':

—Te'pa' o'ch ahuañpsey yon'ta'n.

¹⁹ Allñapa' huapoña puesheñarr ñeñt atarr etsotene' ñoñets ñeñt atet anaret. Ñaña'pa' atet otos:

—Na te'pa' Maestrocha' nemneñ o'ch noctare'tyeseñ ama't errohua-nencha' pechopeñe'chyes.

20 Jesúsñapa' atet och:

—Te'pa' napa' peñotencha' ama't nepacllapa' ama necheñe allcha' neychenañ. Ro'quëppa' chocma eñall pa'pon allecma yeçhena.* Oteçhnopa'cho'ña chocma eñall pa'ma' allecma yeçha'yenet. Tarraña naña Ñeñten Acheñetosetspa' ama eñalle ñeñt e'ñe nepaquëll nepen allcha' nepanena.

21 Po'pocheño Jesúsapa' atet otenanerr po'psheñeñ pueyochresha':

—Te'pa' o'ch pöcta'n attoch e'ñe po'ñoçh neyochresha' neperreḑ.

Tarraña ñeñña acheñerpa' atet otan Jesús:

—Te'pa' arrcha'ña ñanom pemnaterren o'ch ahuerren apuesho o'chña nepampa'huera' apañpa' allempochña nohuerrapa' o'ch noctaḑ.

22 Tarraña Jesúsapa' atet otererr:

—Acheñenesha' ñeñt ama yerpa'penaye Yompor, ñetñapa' pampanna'tetepa' parro arromñatecmuet. Tarraña pöcoppa' ñeñteḑ o' peyerpuera Yompor añ pöctetsa o'ch pöcta'n attoch po'ñoçh e'ñe neyochresha' neperreḑ.

Allempo a'mchecherran Jesús huomenquësha' ñaña sa'p ñeñt emo'yarertetsa

(Mr. 4.35-41; Lc. 8.22-25)

23 Allempoña Jesúsapa' a'tapos noñto pueyochresha'ñapa' cota'huanmet, ahuañpset rroçha'sonet atarr sa'po. 24 Allñapa' machayotepa'tcha' huomenquëshatañpesnomuet. Emo'yare'ña çha esha'tena noñto, atteña oññapa' chorramoch noñto. Jesúsñapa' çha muen. 25 Atteña pueyochresha'ñapa' ponemñyet Jesús all muenpa' opueret atet ochet:

—jPa'qeshḑataye'chey Ayochreshate po'ñoçhuachca'ye yoclla'huerrate'!

26 Ñañaapa' atet otanet:

—Eso'mare'tña nanac seyoren. Sapa' ama e'ñeye' seyemtenno.

Jesúsña tanterrapa' e'ñe po'ñoñoña a'mtsoññetuerran huomenquësha' ama't ñaña emo'yare'pa' o' e'ñe a'mtsoññetuer. Attoña ñetpa' o' alla e'ñe cohuen mueçhettañperret. 27 Atta cohuanrrorteñet ñetñapa' atet otanna'tyeset:

—Ta'mca'ye, añ acheñerpa' esona'tarte'ca'ye. Atarropa't es a'mchechaten, ama't po'ñoñoḑapa' a'mchechaterran huomenquësha' ama't ñaña emo'yare' oñ.

Atto gadaro'marnesha' ñeñt chorrena oneñeñ ñetñapa' huapuet Jesúsesho
(Mr. 5.1-20; Lc. 8.26-39)

28 Allempoñapa' o' etsotoset yomta'n all sechenet. Allpa' añ pa'ney pene' gadaro'marnesha'. Allñapa' huapoña ñaña epsheña acheñ tarraña ñetpa' añ chorrenahuet oneñeñ. Ñeñpa' arroñ huenet allecma pampa'yeñet arromñateçhno. Allenetñapa' ama eseshaye' setso tarro'mar ñeñt chorra'yena oneñeñ ñetpa' atarr añcha'noçhetyenet allenet. 29 Allempoñapa' rranare'tapet Jesús, atet ochet:

—Eso'maruachca'ye, Parets Puechemerecha' ḑa'tsrre'moçhtana'tosey. Papa' añecopte' pehuena o'ch peçoñchaterrey ama't ama çhena' allempoch ya'coñchatareñterra.

* 8:20 Ñehua, Jesús añ toma'ntacha zorra ñeñt berrotets all pa'nyo.

³⁰ Ñehua, allpa' a'yente'tsa'yen shonte' chañchočhno all rratse'tyen.

³¹ Ñeñto'marña oneñeñechnopa' atet otare'tapet Jesús:

—Ñerra'm čhoch pequečhpatosey acheñpa' arrña pemñaye'chosey chañchesho allochñapa' o'ch yechorra'yerrr ñaña chañchočhno.

³² Jesúsñapa' allenta otanet:

—Ama'tca'yepa' orrasca'ye.

Allempoña oneñeñechnopa' quečpa'neret acheñpa' o' chorrereter ñaña chañchočhno. Chañchoña allempo chorrosya oneñeñechnopa' čepa'tcha' matrra'tua allohuen ñegoneť, shorčha'tuos allotpa' e'ñe ño'shrra'tuosa oño.

³³ Acheñenesha'ña ñeñť cohuañpene' chañcho, ñetñapa' allenta matrra'tet ñamet po'yorñoť, ahuanmuet anetso. Allñapa' serrpare'tyesoset ora atet o' perra ñeñť chorra'yese't oneñeť. ³⁴ Allentepa'tcha' ahuanmaña allohuen anetso'marnesha' ahuo'ch enteñeta' Jesús. Ñetña entoset Jesúsapa' atet otoset:

—Te'pa' o'ch ahuerreř arrot, yenyot.

9

Atto Jesúsapa' a'crraterran ñaña ñeñť echarrtaña

(Mr. 2.1-12; Lc. 5.17-26)

¹ Allotña Jesúsapa' a'terr noñfopa' pechaterra, čherr anetso all a'puena.

² Allñapa' huapatañpsoñet echarrtaña, puechechnape'na. Jesúsñapa' eñotapanet ñetpa' atarr nanac yemteñet. Allempoña ñapa' otapan echarrtaña:

—Chochña neyochre pocserra tarro'mar te' ñeñť po'chñarpa' ařretna'huareťterra.

³ Puesheña'tetsña ñeñť etsotayenayeñ ñoñets ñeñť atet anaret ñetñapa' atta otatse'tyeset pueyočhreto e'ñe ñagattseta, ñeñťpa' atet otet: “Añ acheñerpa' čha achmenan Yompor.” ⁴ Jesúsñapa' o' eñotamet ñeñť atet otyenet ñocop, ñañaapa' atet otanet:

—Sapa' eso'mare'tcha'ña atet soctape'chatse'tyesña seyočhro. ⁵ Sapa' čhate' soten ñeñť atet o' notue echarrtaña po'chñar o' ařretna'huareťta ñeñťpa' ama torrapahuoyaye. Sapa' añaña atarr torrapo' senten attoch na'crrater čoncha'ña ote': “Petantena pechope'chnen.” ⁶ Ñehua, napa' o'ch neñotatas na Ñeñten Acheñetosets, napa' ñeñten aparetan llesens attoch nach peretnerre' ochñarets aña patsro.

Ñeñto'marña Jesúsapa' atet otterrannerr echarrtaña:

—Te'pa' o'ch petantena, pechta'nen pemue'pa' pechope'chnen, ahuenepř pepaclo.

⁷ E'ñe otue' atetpa' echarrtañañapa' čha tantetsa allorocma, ahuer pa'paclo. ⁸ Acheñenesha'ña all ñeñť entene' ñetñapa' čha yorenet, eloñapa' alla cohuentaterrñañet Yompor. Atet otyenet:

—Yomporca'yeha o' llesenserran ñeñť ama't e'ñe acheña.

Allempo Jesúsapa' hua'ña'nman Mateo attoch pueyochresha' per

(Mr. 2.13-17; Lc. 5.27-32)

⁹ Jesúsña meterrerr allotpa' entnoman puesheñarr acheñ ñeñťñapa' añ pa'so'cheñ Mateo.* All anen allecma cobra'yenan acheñenesha' quelle ñeñť gobiernocop. Jesúsñapa' atet otosan Mateo:

* 9:9 Mateopa' ñeñfara ñeñť sochenet Leví.

—Te'pa' o'ch p̄octa'n attoch neyochresha' nepperreḡ.

Mateoñapa' čha tantnomtsapa' allenta cotan Jesús.

¹⁰ Allempoña čhap ñaña allempoch rrallme'chen Jesús pocollo. Allña'pa' huačha'ta po'potantañ shonte' ñeñt' po'taruas pene' o'ch cobra'yeñet acheñenesha' quelle ñeñt' gobiernocop. Ñeñtpa' atarr ashcañnesha' entyeñ allohuen acheñenesha'. Ñaña epuet po'potantañ ochñañeneshačhno ñetñapa' all anorrčha'tyesoset all anen Jesús epuet pueyochreshačhno. ¹¹ Añña fariseonesha' ñeñt' allo'tsa'yen ñetña allempo atet eñchetpa' allenta otoñet pueyochresha':

—Eso'mare'tña ñeñt' semaestrór sepenpa' rrallme'chapretenañña añ acheñeneshar ñeñt' puehquēño'te'na cobra'yene' acheñenesha' ñaña epuet acheñenesha' ñeñt' atarr ochñañeneshačhno.

¹² Atto e'manet Jesús, ñañapa' atet toma'ntatanet:

—Ñeñt' e'ñe huomech entetsapa' ñetpa' ama e'neñetoña apartañ. Añña ñeñt' atsna'tetspa' ñetñapa' čhocma e'nenet ñeñt'cha' a'crraterrahuet.

¹³ Napa' ama añecpaye' nohuapo attoch nečhore'tos ñeñt' e'ñe atet entetsañ ñetpa' e'ño' cohuen es p̄a'yenet. Napa' añecopña nohuapa attoch nečhore'tos ñeñt' atarr ochñañ entyetsa. Allochña'pa' attoch o'ch cotape'cherret ello e'ñe cohuen Yomporecop. Socoppa' añ p̄octetsa ñerra'm o'ch ahuerrespa' seño'tuerrepa'čhña ñeñt' atet yečhateney añ Yompor po'ñoñ ñeñt' atet anaret ahuatoteñ. Ñeñtpa' atet oteney Yompor: “Napa' ama e'ñe añña cohuen nenteno o'ch sapuenen sayara ñeñt' semtsen nocop. Añe'ñaña atarr cohuen nenten o'ch semuereña allohuen samo'tsesha'.”

Allempo Jesús'pa' eñotatanet atet'cha' tore'tet Yomporecop ñeñt' po'ñočh sherbets

(Mr. 2.18-22; Lc. 5.33-39)

¹⁴ Allempoñapa' ñeñt' pueyochresha' pen Juan ñeñt' apataye't acheñenesha' ñetña huačha'toñet Jesús'pa' atet otoset:

—Yapa' tore'tetsay Yomporecop ñaña fariseonesha'pa'čho'ña tore'tetset. Pañapa' ¿eso'mare'tña ama tore'tenoña peyochresha'?†

¹⁵ Jesúsñapa' alla toma'ntatanet, atet otanet:

—Ñeñt' ahua'ñarefečhno all rrallme'chapreteñet ñeñt' errete' sena'tetsa, ama p̄octeyaye o'ch yotanet amach es serra'yesatsto. Amach yellcatatstaneto tarro'mar atet coshapreteñet ñeñt' sena'tetsa. Tarraña ñerra'm esempo machayota sa'nerranet ñeñt' sena'tetsa, ñeñtña parro yemuetyena allempoña ñetpa' e'ñe puellquēño'tet quečpa'huerretča' puerrar, amach arrenaye' enterreto. Ñeñtpa' attochña tore'terret allempo Yomporecop e'ñe po'ñočh. Arrpa' allohua huañ ñeñt' atet Jesús toma'ntata ña sena'tostsa.

¹⁶ Elloñapa' alla toma'ntaterraneterr ñeñt' atet yečhen judionesha' arr patsro, ñeñto'marña atet otanet:

—Yapa' ñerra'm mellashañ yeshtampa' amach yelltatsche emarr lletamtso. Tarro'mar ama't atet yepatse'čpa' ñeñtpa' e'ñech orrena yellteñ tarro'mar ñeñt' emarr lletamuetspa' ñerra'm esempo yatsama'tampespa' čhach chellama'ta čhach martse'tatannya shetamt-soshe'm. Ñeñtña yelltenpa' allo'nach sen rrrartse'tats nanac.

† 9:14 Añ tore'teñetspa' añecop o'ch yetorra Yomporecop. Amach añecpayaye atomat, ñeñtpa' añecpa mameshacop o'ch yequečpa' yerrar.

¹⁷ Jesúsñapa' alla toma'ntaterraneterr po'poñ ñeñt atet ye'chen judione-sha' o'ch ye'chcatenet pa'rrom orrot. Ñeñto'marña atet otanet:

—Ama't puesheñarro'teyapa' amach yeshatstoña vinos emasa mel-lasha'mañ orroto ñeñt aye'chcataret pa'rrom. Tarro'mar ñerra'm atet yepe'pa' o'ch chasa'ña vinospa' chach a'ptsan orrot, vinosñapa' e'ñech shebhua, ñeñña orrotpa' ama't mameshapa' amach es sherberro. Añña ñerra'm emasa vinos, arrcha'ña yeshe' emerra orroto ñeñt aye'chcataret pa'rrom. Allochñapa' ama'tcha' chasa' vinospa' amach cha potsa'psoña vinos, ñeñtpa' allach ye'chen epo'mar.

Ñeñtpa' attoña Jesúsapa' eñotatanet ña pocta'pña e'ñe etserra.

Atto Jesúsapa' tantaterran Jairo po'señ ña'ña alla'crratnoman puesheñarr coyanesha' ñeñt a'plla'nmue' pa'shtam

(Mr. 5.21-43; Lc. 8.40-56)

¹⁸ Allempo atet eñorena Jesúsapa' huapa ña'ña puesheñarr ñeñt añcha'tarettetsa judioneshacop, concorposñañapa' atet otos:

—Nesñeñpa' e'ñe errete' rromuets. Tarraña ama't o' rromañpa' te'pa' o'ch pocterren, ama't attapa' o'ch pa'pñeña' potot attoch o'ch alla cor-rerra.

¹⁹ E'ñe otue'pa' allempoñapa' allenta cota'ner Jesús epuet pueyochresha'. ²⁰ Allñapa' cota'nmanet ña'ña puesheñarr coyanesha' ñeñt atsna'tets. Charra' puechena epa char ñeñt atto chocma yella'yena. Ñaña'ña' allenta cota'nenan Jesús chenta' pa'che'ño't, allñapa' a'pñlerrña'ña' pa'shtam pa'rrpe'mot. ²¹ Tarro'mar, ñapa' atet oten pueyo'chro: "Ama't pa'shtama na'pñlloñpa' ñeñfach na'crraterre'." ²² Allempo atto a'pñl'huoñ pa'shtampa' Jesúsña' allenta puetallerra pa'che'ñone'pa' entan coyanesha', ñeñtpa' atet och:

—Choña nesñeshacha' p'ochsherra tarro'mar atto atarr peyemtenna na, attoña te'pa' o' e'ñe na'crratnomuep.

Coyanesha'ñapa' allorocma correrria.

²³ Jesúsña' allempo chap añcha'taret pa'pacillo allñapa' entosan ñeñt penclla'tam'pesyene' arromña't llequëñtsore'cho, entosan ña'ña shonte' acheñenesha' all puellquëño'tet atarr ano'tatse'tyenet. ²⁴ Jesúsñapa' atet otosan acheñenesha':

—Sahuanerra arrot, añ shopshesha'pa' amaca'ye choye' rromueno, chaca'ye muen.

Ñetñapa' pachñare'teño'tetpa' atta che'tatsetyesapet tarro'mar ñetpa' e'ñeca'ye eñoteñet choca'ye rromuen. ²⁵ Allempoña cha'nma'cha'tatuosan ñeñt shontetsa all, ñaña'ña' be'tosos o'pono. Allempoña Jesúsapa' rromota'tosan shopshesha'ñ potot ñaña'ña' chepa'tcha' tanterrtsa. ²⁶ Allempoñapa' e'mare'tuet erraparen anetso'mar Jesúsapa' o' tantaterran arromña't.

Atto Jesúsapa' a'crraterran epsheña aporo'yet

²⁷ Ahuerrerr Jesús allotpa' cota'ne'm ña'ña epsheña aporo'yet. Rranare'tneñet chenta' atet otneñet:

—Pemuera'ye cherrya ñeñte'p Davidna'tare.

²⁸ Chap Jesús pocollopa' all be'tosos allña rromuera'ña ña'ña aporo'yet. Jesúsñapa' a'p'to'tapanet:

—¿Seyemtenna'fe' napa' ahua'mencaten attotcha' necuaterres?

Ñetñapa' atet otoset:

—Yeyemtenp̄aca'ye, Ayochreshate.

²⁹ Allempoñapa' allenta a'p̄llacle'chanetpa' atet otanet:

—Atto atarr seyemtennapa' attetepa'ch socop.

³⁰ Allempocma e'ñe cohuen cohuerret. Jesúsñapa' atet otanet:

—Po'ñoçh te'pa' o'ch notas: Amach esesha' sotaḡsa'tatsto, ama't e'ñe puesheñarra.

³¹ Elloña ñetñapa' ahuanmuet a'metare'tyeset Jesús. Erraḡaren allampano'mar e'mare'tuet Jesús atet pena.

Atto Jesúsapa' a'crraterran ñaḡa ñeñt̄ opanatets

³² Allempo ahuen epsheña aporo'yet allña Jesúseshopa' huapaterñañeterr ñaḡa opan ñeñt̄ chorrena oneñeñ. ³³ Jesúsñapa' allenta queçhpatan oneñeñ ñeñt̄ atto opanatateñ, opanñapa' allenta eñorerra. Acheñenesha'ñapa' cohuanrrorteñetpa' atet otyenet:

—Israelnesha'pa' ama't ahuaḡapa' ama puentarano ñeñt̄ atet pena te' Jesús.

³⁴ Fariseonesha'ñapa' puesasare'teñoḡetpa' atet otyeset:

—Oneñeñte' pompor ahuamencat̄ pene' attot̄ queçhpatenan oneñeñeçhno acheñenesha'.

Atto Jesúsapa' atarr muerenana allohuen acheñenesha'

³⁵ Alloḡñapa' asuahuanom Jesús allohuen anetso ama't ñaḡa all ama tama eñalle acheñ. All yeçhatyesosanet puerahuo'mar. Serpare'tatosanet ñeñt̄ cohuen ñoñets atto ayochreshattena Yompor. A'crratyesosan ñeñt̄ osyen pa'namen atsnañets ñaḡa ñeñt̄ pa'namen atsotyenet. ³⁶ Allempo entosan shonte' acheñenesha'pa' ñañapa' nanac muerenanet. Tarro'mar e'ñe atet entenanet ñerra'mrrate' carrnero ñeñt̄ ama acuamḡsareteyaye; ñeñto'marña nanac allpatatareḡtenet tarro'mar ama eñalle ñeñt̄cha' ahuamencat̄ penahuet. ³⁷ Ñeñto'marña atet otan pueyochresha':

—Shonte' narmets ñeñt̄ nanac ellom̄re'tets ñeñt̄cha' a'yapaçhetañ. Tarraña atarusañña ñeñt̄cha' a'yapaçhe'pa' ama atarr atonayayeto.

³⁸ Te'pa' añcha'ña sanamoñ pamo'mte' mueñanepa'ña ñeñt̄cha' a'yapaçherrets pa'mro.

Ñeñt̄pa' atet toma'ntatanet Jesús atto atarr shonte' acheñenesha' ñeñt̄cha' ame'ñerrtsañ tarraña ñeñt̄cha' ame'ñaterrahuetpa' ama atarr atonayayeto. Añcha'ña yanam Yompor ñeñt̄ Yamo'mte' yepen mueñanepa'ña pa'tarusañer ñeñt̄cha' torra'yerrtsa ñocop allemeneñ anetso'mar.

10

Allempo Jesúsapa' acran çharrasheña ñeñt̄ puechetsa epsheña ñeñt̄cha' llesensa'

(Mr. 3.13-19; Lc. 6.12-16)

¹ Allempo çhapa'muen allempo Jesús agota'mueanan pueyochresha' çharrasheña ñeñt̄ puechetsa epsheña. E'ñe apçha'huet ñeshopa' ñañapa' ap Janet llesens attoch queçhpatyaset oneñeñeçhno acheñenesha'. Ñaḡa llesensanet attoch a'crratyaset acheñenesha' ñeñt̄ osyen allohuen pa'namen atsnañt̄soçhno ñaḡa ñeñt̄ pa'namen atsotyenet.

² Ñehua, ñetpa' arro'tsa'yenet pa'so'chñeçhno; allohuenetpa' çharrasheñet puechena epsheña ñeñt̄ llesensa'. Ñeñt̄ ñanom atarr

sherbets ñeñtpa' Simón ñeñtara sochetsa Pedro, allotpa' ñaña Andrés ñeñt e' ñe pa'mo'nasheñ; allotñapa' ñaña Jacobo ñeñt Zebedeo puechemer epuet pa'mo'nasheñ Juan. ³ Allotñapa' ñaña Felipe ñaña Bartolomé; allotñapa' ñaña Tomás ñaña Mateo ñeñt cobraye't acheñenesha' quelle ñeñt gobiernocop; allotñapa' Jacobo ñeñt Alfeo puechemer, allotpa' ñaña Tadeo. ⁴ Allotñapa' ñaña Simón ñeñt cananistanesha' ñeñt nanac torratse't pa'netsrecop, allotpa' ñaña Judas Iscariote ñeñtcha' pomuerre' tsapaonet Jesús.

Allempo Jesús'pa' llesensan pueyochresha' o'ch ahuanemyeset allcha' serrpare'tyeneta'

(Mr. 6.7-13; Lc. 9.1-6)

⁵ Ñeñña çharrasheña puechena epsheña llesensanet attoch ahuanemyeset pa'namen anetso'mar, ñeñtpa' atet otapanet:

—Amach arrenta setatsto all yeçha'yena ñeñt ama judioneshayaye. Ñaña amach arrenta setatsto samario'marnesha' pa'netsro all yeçha'yenet. ⁶ Arrcha'ña seta all yeçha'yena israelena'tarnesha'. Ñetpa' e'ñe atet nentenanet ñerra'mrrate' carrneroçhno ñeñt paya'tyetsa. ⁷ Allcha' soñemyespa' seserrpare'tatiesnomanetcha' atetcha' sotyesnomanet: “Te'pa' o' çherr allempoch ayochreshattena Yompor ñeñt pue'ntaño'tsen.”

⁸ Ñaña alla oterranerr pueyochresha':

—Ñeñt atsna'tyetspa' sa'crratyesnomanetcha', ñeñt rromayetspa' setantatiesnoñcha', ñeñt osyen puetsarñatspa' sa'crratyesnoñcha' attoch e'ñe cohuen entuerranet acheñenesha', sequeçhpatatiescha' ñaña oneñeçhno ñeñt chorra'yenaya acheñenesha'. Sapa' e'ñe atta aparetes huomencñats atto es cohuen sorrtatyen Yomporcop, ñeñto'marña sapa'çho'ña e'ñech atta sapa'yesanet saña, amach secobratstaneto ñeñt atet o' sepa'yesanet.

⁹ Ñaña o'ch notas: Ñerra'm o'ch sahanmapa' ama't puetallarrapa' amach sesha'tatsetnomo quelle. Ama't orotlillen, ama't huallatlillen, ama't cobretlillen amach sesha'tatsetnome. ¹⁰ Ama't e'ñe coñe'ta amach es sanmatsto allcha' sechopeñe'chyes, ama't sebolsa, ama't e'ñe epma seshtam, ama't sesapata, ama't secarra, amach sanmatsche tarro'mar ñeñtescha' torra'yetsapa' e'ñe pocte' rratyesapasetcha'.

¹¹ Ama't erra'tsena anetser ama't ñaña all ama tama eñalle acheñ ñerra'm erra seçhapa'çhpa' çhochña ñanom sa'p'to'tyesosanet erro'tsente' cohuen acheña' allcha'ña seçhap. Allñapa' allcha'ña sa'posa tarrempohuach esempoch seserrerr ñaña allot. ¹² Ama't erra'tsena pocoller allcha' seçhap, e'ñe sehuoncha'teñoç o'ch senamatosanet Yompor pa'nateña. ¹³ Ñetña ñerra'm e'ñe cohuen acheñret, Yomporñapa' a'natenanetcha'. Ñerra'm ama cohuenayaye acheñretpa' Yomporñapa' o'ch alla apuerres sa pa'nateña. ¹⁴ Ñerra'm erra anetsro ñeñt allo'marnesha'ña ama cohuenaye' agapaseto tarro'mar ñetpa' amach mueneto o'ch e'mñotapaset ñeñt atet seserrpare'ten, saña'pa' o'ch sem'terrerr ñaña allot. Ñerra'm allempo sem'terrerrña ñaña allot, ñeñña setco'tsa'yen pañe'te' patspa' çhoch sepa'shetca'tyesnomña setac. Attoçña allo'marnesha'pa' o'ch señoatnomanet ñetpa' amaca'ye pocteye' entenanetoña Yompor. ¹⁵ Po'ñoçh te'pa' o'ch notas:

Esempohuañen allempoch acrarretuerra allohuen acheñenesha'pa' añ anetso'marnesha' ñeñtcha' ama cohuenaye' sagapaye te', ñetñapa' nanaccha' a'coñchatareñterretña allempo. Ama't sodomo'marnesha' ñaña gomorro'marnesha' ñetpa' amach tama a'coñchatareñterreto atet ñerra'm ñeñt anetso'marnesha' ñeñtcha' ama cohuenaye' sagapaye te'.

Allempo Jesúsapa' eñotatenan pueyochresha' chocmach eñall ñeñtcha' e'moñe'tahuet

¹⁶ Ñaña sapa' ñerra'm o'ch ahues te'pa' señoçhcha' po'ñoçh chocmach eñall ñeñtcha' se'moñe'te' ama't sapa' amach cho erroñ sepenaneto ñet. Ñeñto'marña notenes te'pa' o'ch nemñas e'ñech attes ñerra'mrrate' carrnero o'ch ahuo' allo'tsa'yen ma'yarroçhno. Ñeñto'marña sapa' señoñatach atet ñerra'm shecheppa' atarr eñote'. Tarraña sapa' amach erroñ añaño atet ñerra'm yeppa' ama erroñ añañeyaye.

¹⁷ Ñeñto'marña notenes: Señoñatach tarro'mar acheñenesha'pa' erroñuanencha' perrset, sanmareñterrach añcha'taretesho allcha' otteñe'cherrset. Nalle'tyerrsetcha' all judionesha' po'prahuo'mar.

¹⁸ Po'ñoçh e'ñe no'marpa'rremanaterrsetcha' attoch mueroçhtaterrset, sanmareñterrach añcha'taretesho ñaña allo'tsa'yen ñeñt nanac añcha'tareteçhno allcha'ña sa'meta'yesosnancha' neñoñ. Ñaña arrcha' sa'meterrnan neñoñ allo'tsa'yen ñeñt ama judioneshayaye.

¹⁹ Ñaña allempoch sanmareñtetyesapa' ama't mameshapa' amach cha sellca'psatsto, amach sotapsa'tatsto: Erroñuachca'ye notoste' añcha'taretesho ñerra'm o'ch a'pto'tare'tapuen. Tarro'mar allempopa' Somporcha'ña Puecamquëñ señoñatyesose'ña all. ²⁰ Attoña amach e'ñe sochaya se'ñora'yeseoso, añcha'ña Sompor Puecamquëñ ñeñtcha'ña se'ñoratyese'.

²¹ Allempoch atet perrsetpa' ñeñt e'ñe semo'nasheñ sepen ñato' ñeñtacha'ye sepomuere' attoch muetsaterres tarro'mar ñapa' amaca'ye ame'ñenno. Amapa' ñato' pomporpa' o'ch pomuerran ñaña puechemer. Ama't ñaña puechemerpa' ñato' patparñoñpa' o'paterranach pamo'mte' attoch muetsatater. ²² Shonte'ch

acheñenesha' ñeñtcha' se'moñe'terre' tarro'mar sapa' naca'ye e'ñe same'ñena. Ama'tcha' atarr mueroçhtaterrsetpa' tarraña esesha'ch e'ñe ahuanta'huanmue' e'ñe pueyemteñoñen na, ñeñtcha'ña a'qeshpatareñterrtsa. ²³ Ñerra'm esempo e'moñe'terrset ñeñt

anetsro allo'tsenes o'ch seyetamñpsanetpa' o'ch sahanma po'poñ anetso. Allpa'cho'ña ñerra'm attecma e'moñe'terrseterrpa' o'ch seyetamñperraneterr o'ch sahanerrerr ñaña po'poñ anetso. E'ñe po'ñoçh notenes: Amach e'ñe sepa'huenta' ora allohuen israelnesha' pa'netsropa' na Ñeñten Acheñetosets o'ch alla norrterra.

²⁴ Ñaña o'ch noterrser: Ñeñt yochreshatspa' ñerra'm e'moñe'teññañet po'maestror, e'ñech attecma e'moñe'terrñañet ñaña ñeñt pueyochresha'çhno pen. Ñaña ñeñt ñañretsotyets ñerra'm e'moñe'teññañet pamo'mte' e'ñech attecma e'moñe'terrñañet ñaña pueñañresha'çhno.

²⁵ Ñeñt yochreshatsoçhno'pa' e'ñepa'chña pocte' entyeñet o'ch atet a'pareñterret atet ñerra'm po'maestror. Ñaña ñeñt ñañretsoçhno'pa' e'ñepa'chña pocte' entyeñet ñaña o'ch atet a'pareñterret atet ñerra'm pamo'mte'. Ñaña señoçhepa'ch ñerra'm na puesochatse'teñoñetan

otennet napa' oneñeño' pomporen ñeñt' otenet Beelzebú, sapa'cho'ña ellochña atarr sochatse'terrset. Ama't na ñeñten e'ñe samo'mte' sepenen atto atarr sochatse'tennet na, sapa'cho'ña ñeñtes nechemereshachno nepen, elloña sapa' atarrcha' nanac sochatse'terrset saña.

Atto amach yemcha'tatsto ñeñcha' muetse' yechets, añcha'ña yemcha'na't Yompor

(Lc. 12.2-9)

²⁶ Ama't atteña' tarraña sapa' amach semcha'tatstaneto tarro'mar yapa' yeñoteñ allohuen ñeñt' atto e'ñe a'nahua shecare'tyenet te', esempohuañenña'pa' a'metam̄psaretterretcha'. Ama't allohuen ñeñt' e'ñe a'nasotyenet te'pa' esempohuañenña'pa' e'ñech eñotataretetuerret. ²⁷ Ñeñño'marña ama't erra'tsena neserrpare'tatyenes te' e'ñe saptoche', esempoña sapa' e'ñech señotatuer ora allohuen acheñenesha'. Ama't erra'tsen ñeñt' atet neserrpare'tatyenes te' e'ñe a'nahua o'pono pocollo, esempoña sapa' seserrpare'terrcha' allcha' e'ñe cohuen e'muerres allohuen acheñenesha' atet ñerra'mrate' enot seserrpare'ten shelletot. ²⁸ Amach aña semcha'tatsto ñeñcha' semtse'. Tarro'mar añach muetsonaset sechets, secamquẽñña'pa' amach errotenot muetsonaseto. Añcha'ña semcha'na't Yompor tarro'mar ñerra'm ña muenatspa' e'ñe ña po'huamencotpa' o'ch a'chencatonay ye'chets yecamquẽña'cho'ña o'ch a'chencatonay coñcha'puetso all parraren tso'.

²⁹⁻³¹ 'Elloña te'pa' napa' o'ch notas: Chocmach seyemcha Yompor, po'ñoch ñapa' ñach secuam̄pene'. Ama't otetollesha'pa'cho'ña chocma cohuan̄peñ. Ñehua, ama't yapa' yeñoteñ otetollpa' ama tama sherbeno. Ama't yepomatset epa otetollesha'pa' ñeñtpa' ama tsa'teyaye, e'ñe puetallarratollá centavo tsa'tena. Tarraña ama't atteña' ama't patrra otetoll amach rromo attoch shora nom ñerra'm ama Sompom muenataye atet. Ñeñño'marña notenes: Ama't mameshapa' amach semcha'tatsto, Yomporcha'ña e'ñe seyemta. Atto atarr morrentenana otetollesha' elloña sapa' atarr nanac morrentensa. Ñehua, ama't allpon sechetollesha' allpon soño'tsen ñapa' e'ñe eñotennas.

Atto ama a'nasotpahuo Jesucristo acheñesho'mar

(Lc. 12.8-9)

³² 'Elloña napa' o'ch noterrser: Allohuen ama't erra'tsench'a' ñeñcha' ama na'nasotenaye acheñeneshesho, napa'cho'ña Ñeñten Acheñetosetspa' amach na'nasotuerraneto namña Nomporesho all pue'ntaño. ³³ Tarraña ñerra'm esesha' na'nasotenaya na arr patsro acheñeneshesho, napa'cho'ña na'nasoterranetcha' Nomporesho all pue'ntaño.

Atto Jesús'pa' orrtatosan e'ñe ño'mar elloptanna'teñets

(Lc. 12.51-53; 14.26-27)

³⁴ 'Sapa' chate' sotenapañ añecopte' nohuapa o'ch e'ñe cohuen namo'tstanna'tatera acheñenesha' arr patsro. Ñeñtpa' ama atteyaye. Añecpa'ña nohuapa allochña'pa' e'ñe no'marpa' acheñenesha'ña'pa' o'ch atta elloptanna'tyeset. ³⁵⁻³⁶ Ñehua, ñeñt' noten te' ama't ñeñt' e'ñe pamo'tsna'tarecmuet ñato' no'marach e'moñe'tannerret. Tarro'mar ñato' eñallcha' ñeñcha' name'ñerraya, pamo'tshetñapa' ñato' amach ame'ñerrneto. Ñeñño'marña notenes e'ñe no'marpa' ñato' puechemerpa'

o'ch epatare'tenan pompör, ñaña ñato' puechoyörpa' o'ch epatare'tenan pachör; ñaña ñato' ñeñt pa'to'ñen pen o'ch epatare'tenan ñaña pa'so'mue.

³⁷ 'Tarraña ñerra'm erra'tsencha' nemorrenterrayañ ñerra'm ñetña pompora atarr morrentenet ñamet pachoret ñeñña acheñerpa' ama e'ñeye' pocte' nenteñe attoch neyochresha' neperranet. Ñaña po'potantañ ñeñcha' nemorrenterrayañ ñetpa'cho'ña ñerra'm puechemera atarr morrentetpa' ñaña po'sñet ñeñpa'cho'ña acheñerpa' ama e'ñeye' pocte' nenteñe attoch e'ñe neyochresha' neperranet. ³⁸ Tarro'mar ñerra'm erra'tsen ama e'ñeye' sehuanmaye ñeñt atet muenenet e'ñe ñocueta attoch coferrnet e'ñe poctacma, nañapa' amach pocte' nenteñe o'ch neyochresha' neperranet. Ñeñtpa' añ toma'ntena atet ñerra'mrrate' cho sechechñen secorsoch alloch semueroçhta saña. ³⁹ Tarraña ñerra'm esesha' e'ñe añña e'nenet o'ch correna atomat attoch e'ñe coshenet arr patsro, ñetña'pa' a'chencaterretcha' ñañeñeta. Tarraña ñerra'm esesha' e'ñe pocte' entene' o'ch es sehuanmuet nocop ñeñt atet muenenet ñeñt e'ñe ñocueta arr patsro ñeñña acheñerpa' corretsach pocsheñeshocmañen e'ñe tayoteñ errponañohuen.

*Ñeñcha' apuerrey Yompör attoch atarr coshaterrey
(Mr. 9.41)*

⁴⁰ Jesús'pa' alla oterranerr pueyochresha':

—Ñerra'm o'ch sahanma, ñerra'm esesha'ch e'ñe cohuen sagapue' sa, ñetpa' na'naca'yeña aguënet e'ñe cohuen. Ñaña ñeñt e'ñe cohuen naguëne' na, ñetpa' Nompore'naca'yeña aguënet ñeñt nellensene' na. ⁴¹ Ama't erra'tsena ñeñt e'ñe cohuen aguëne' ñeñt a'mtene' Yompör po'ñoñ tarro'mar ñapa' Yompörca'ye po'ñoñ a'mten, ñeñña acheñer ñeñt e'ñe cohuen aguëne'pa' Yompörcha'ña apuerre' ñeñcha' atarr coshaterre'. E'ñech attecma apuer ñeñt atet coshatenan ñeñt a'mtene' po'ñoñ. Ñaña ama't erra'tsena ñeñt e'ñe cohuen aguëne' ñeñt e'ñe pocte' es orrtatyets Yompörecop tarro'mar ñapa' Yompörecopca'ye e'ñe pocte' es orrtatyen, Yompörcha'ña apuerre' ñeñcha' atarr coshaterre'. E'ñech attecma apuer ñeñt atet coshatenan ñeñt e'ñe pocte' es orrtatyets Yompörecop. ⁴² Ñaña añ ñeñt ama esoshe'maye' enteneto, erra'tsencha' apapue' ñeñcha' orros tarro'mar ñapa' noca'ye neyochresha', ama't coñe'ta oñ apapet, napa' po'ñoçh o'ch notas, Yompörcha'ca'yeña apuer-rahuetña ñeñcha' atarr coshaterrahuet.

11

*Juan ñeñt apatañtatse'tpa' mueñan pueyochresha' Jesúsesho
(Lc. 7.18-35)*

¹ Yeçhatuahuan Jesús pueyochresha' ñeñt çharrasheña ñeñt puechetsa epsheña atetcha' pa'yaset, allempoñapa' ahuo' ñaña Jesús allo't yeçhatysets; serrpare'tatyesan acheñenesha' all pa'netsreto.

² Añña Juanpa' allo'tsena all yottampeñet. Allña'pa' o' e'mare'tan Cristo atet pa'yena, allenta mueñan pueyochresha' Jesúsesho. ³ Ñetña o' çhapuet allpa' atet otoset:

—Ñato' p̄ate'ña ñeñteḗ e'ñe po'ñoçh Cristotets ñeñt̄ atarr yecuen ahuatoteñ o'ch huapa. Ñerra'm amate' ñeñteyaypepa' o'ch e'ñe p̄otey allochñapa' añcha' yecua' po'psheññ ñeñt̄cha' huapatsa ñeñt̄ e'ñe Cristo.

⁴ Jesúsñapa' anapanetpa' atet otapanet:

—Te'pa' o'ch ahuerres seserrpare'tatuercha' Juan ora allpon ñeñt̄ atet sentyesuennana' arr ñaña ora allpon ñeñt̄ atet se'myesuennana' arr. ⁵ O'ch e'ñe seserrpare'tatuer ora ama't atto aporo'yetechnopa' te'ñapa' o' e'ñe necuatyesuerranet ñaña ñeñt̄ checa'repayetspa' te'pa' o' e'ñe chope'chyesuerret cohuen, ñaña ñeñt̄ a'ptsaresyen leprapa' te'ñapa' o' e'ñe a'cohuentataretetuerret ñamet, ñaña ñeñt̄ paquetneshachnopa' ama't ñetpa' te'ñapa' o' e'ñe e'myesuerret cohuen, ama't ñaña ñeñt̄ rromayets te'ñapa' o' alla atantataretetuerret, ñaña ama't ñeñt̄ huocchañeshachno te'ñapa' o' e'ñe neserrpare'tatuerranet añ cohuen ñoñets alloch qeshperret ñamet.

⁶ Jesúsñapa' alla oterranerr Juan pueyochresha':

—Ñaña ellonetpa' o'ch sotuer Juan ñeñt̄ atet notenes, atarr cosheñtso'tsen ama't allohuen ñeñt̄ atarr neyemtenaya na, ñeñt̄ ama e'nenaye po'psheññ ñeñt̄cha' coshaterrahuet.

⁷ Allempoña Juan pueyochresha'pa' o' ahuanerret. Jesúsñapa' alla serrpare'taterranerr acheñenesha' ñeñt̄ atet pe't̄ ahuaña Juan, ñeñt̄pa' atet otanet:

—Ahuaña allempo sete't̄ amayo all serrpare'ten Juan, sapa' amaca' añecpaye' sete'teña all o'ch sentena' amuesma' atet a'yma'tateñ ñorr. ⁸ Ñaña amaca' añecpaye' sete'teña all o'ch senteña' ñeñt̄ atarr cochnesha'tetsa pa'shtam all, tarro'mar yeñoteñ amayopa' amaca'ye eñalleña all ñeñt̄ atarr cochnesha'tetsa pa'shtam. Yapa' yeñoteñ arrña yentenña ñeñt̄ atarr cochnesha' chorra'yenaya shetamuets añcha'taretepahuo. ⁹ Sapa' añecopca'yeña sete'tña amayo o'ch senteña' all ñeñt̄ po'ñoçh a'mtene' Yompor po'ñoñ. Napa' o'ch notas: Juanpa' atto atarr sherbenan Yomporpa' ello metana'tuan allohuen ñeñt̄ atto a'mtenet Yompor po'ñoñ. ¹⁰ Tarro'mar Juanpa' ñocop eñose't̄ Yompor ahuat̄. Ñehua, allempopa' atet otne't̄ na ñeñt̄ atetcha' p̄osa Juan nocop esempoch huapa, ñeñt̄pa' atet anaret̄ ñoñets ahuatoteñ:

Papa' peñoche'pa'ch napa' o'ch nemñonaḗ p̄uesheñarr ñeñt̄cha' ñanom otatsa ñeñt̄cha' p̄a'cohuentatyese' p̄ocop allcha' p̄oñmos.

¹¹ Ñeñto'marña na te'pa' e'ñe po'ñoçh atet notenes: Allohuen allpon acheñenesha' ñeñt̄ eñalletetsa arr patsro ama't p̄uesheñarra ama eñalleña ñeñt̄ atarr sherbets atet ñerra'mrrate' Juan ñeñt̄ apatyese't̄ ahuaña acheñenesha' Yomporcop. Tarraña ñeñt̄ ama esoshe'maye' enteneto ama't mamesha, tarraña ñerra'm pueyochresha' peñ Yompor ñeñt̄ pue'ntaño'tsen atto te'pa' ayochreshattena ña, ñeñt̄ña acheñerpa' atarca'ye sherben, ello metanenan atto atarr sherben Juan.

¹²⁻¹³ 'Tarro'mar añña ñoñets, Moisés po'ñoñ ñeñt̄ atet anaret̄ ñaña añ ñoñets ñeñt̄ quellca'yese't̄ ñeñt̄ a'mta'yese't̄ Yompor po'ñoñ, ñetpa' ñeñt̄ña serrpare'tete't̄ attoch atarr ayochreshatterra Yompor tarremphua allempo orrtosa Juan. Ñaña allempoteñ serrpare'tatosanet Juan ama't teme'ttsen e'ñe po'huamencocma serrpare'tatyaset atet penaña Yompor po'cohueña attoch ayochreshatterra ña ñeñt̄ pue'ntaño'tsen. Ama't atsre'mñañesha'pa'

e'ñe ñeñña atarr muenet pueyočhrocmañen. ¹⁴ Ñaña ñerra'm po'noch same'ñyañcha' Juanpa' ñaca'yeña Elíasoterrets ñeñt atarr secuen ñeñtcha' sehuerroya. ¹⁵ Allohuenes ñeñtes ne'mñotene' neñoñ, çhaponasepa'chña seyochro ñeñt atet notenes.

¹⁶⁻¹⁹ Jesúsñapa' atet otterrannerr acheñenesha':

—Ñehua, napa' o'ch neñotatas ñeñt atet pena patantarr acheñenesha' ñeñt yentyen te' ñeñt ama't errofena ama acshatpoteneto. Ñeñtpa' fariseonesha' atet petsa. Tarro'mar ama't allempo orrta Juan ñeñt apatañtate't ñapa' ama rranete ñeñt yocrrañ yepen allohueney, ama orranete ñeñtecma yorren allohueney. Ñeñto'marña ñapa' cha so'tyese't cho'te' chorreña oneñet; ama't e'ñe mameshapa' ama pocteye' señche'te. Te'ñapa' o' norrtterra naña Ñeñten Acheñetosets. Napa' pa'namen nerra'yen ñaña norryen. Saña te'pa' atta sesochatse'tyenen naña atarro' arratsñaen ñaña atarro' orraññaten napa' año'chña e'ñe neyemuetyena ñeñt atarr ochñañenesha' ñaña ashcarñaatečno ñeñt atarr cobra'yene' acheñenesha' quelle. Tarraña ama't atet sepennoñpa' Nomporna e'ñe eñotene' ñeñt po'ñoçh atarr sherbets ñocop. Ñaña allohueney ñeñtey e'ñe puechemeresha' pohueney ñeñtey cotene' ña poctañña yapa'cho'ña e'ñe yeñotuenña ñeñt po'ñoçh atarr sherbets. Ñeñto'marña yorrtatyeyñña ñeñt cohuen enten ña. Sañapa' ama't e'ñe mameshapa' ama acshatpahuoyayso, e'ñe attes ñerra'mrrate' cheshanesha' ñeñt chocma po'poñ entanna'tuenet amach mueno o'ch yem-tana all yellsheñen po'potantañ pacmachoresha' all plazo all shontena acheñenesha'. Ñetñapa' amach mueneñeto o'ch coshaprechet pacmachoresha'. Ñeñto'marña ñetpa' atto yellsheñenetpa' atet oteñet po'potantañ pacmachoresha': “Yapa' ama't o' yerequërca'hua allo yocshame'tenapa' sañapa' amaña seshe'rarampenye; allōtpa' ama't o' yepoc-torare'tua ñeñt ya'chpeñtsorech allo yellcanrrortenapa' sañapa' amaña sellcapretenyo.”

*Atto Jesúsapa' eños epo'mar anetsocop all ama ame'ñyeto
(Lc. 10.13-15)*

²⁰ Allempoña Jesúsapa' cha muene' che'ptare'tyenan acheñenesha' all pa'netsreto all epaye' entatyenanet po'partsoña ahuañmo'choteñ. Ama't entatyenanetañ po'partsoña ñetñapa' ama es cotape'chenaye ello cohuen Yomporecop, ñeñto'marña allpa' cha muene' che'ptare'tyesanet. Ñeñtpa' atet otyesanet:

²¹ —Nanaccha' llequëñtso'tsa'yenes coraziño'marneshacha', nanaccha' llequëñtso'tsa'yenes saña betsaido'marneshacha'. Tarro'mar ama't atarr norrtatyennaseñ nepartsoña sesho, sañapa' amaña soctape'cherroña ello cohuen Yomporecop. Ñerra'm arrcha'ña norrtatañ nepartsoña tiro'marneshesho ñaña sidóno'marneshesho, ñetñapa' ahuatoteñte' cotape'cherretañ e'ñe cohuen Yomporecop. Ñetpa' attoch e'ñe orrtetañ cha llecatenanet po'chñaret, cotnashe'mach chorra'yetsañ, tsapñach epachshema'tyenetañ all anorrcha'tyenet puellquëño'tet. ²² Ñeñto'marña te'pa' notenes: Esemphuañen allempoch acraretuerra allohuen acheñenesha'pa' tiro'marnesha' ñaña sidóno'marnesha' ñetñapa' amach tama a'coñchatare'terretoña allempo. Coraziño'marneshacha' ñaña betsaido'marneshacha' saña allempopa'

atarrcha' a'coñchatareñes. ²³ Ñaña sa capernaumo'marneshacha' chate' sotenapañ atto e'ñe cohuen sentyena sañeña, Yomporñapa' allentach a'tapaterres pue'ntaño. Ñeñtpa' amachca'ye atteye' perrsoña Yompor; allachca'ye huapore'terres o'pono coñcha'puetso all parraren tso'. Tarro'mar ama't atarr norrtatonaseñ nepartsoña sesho, sañapa' amaña semnoña o'ch soctape'cherr cohuen Yomporecop. Ñerra'm arrcha' ñanom norrtatañ ahuatoteñ nepartsoña sodomo'marneshesho ñetpa' allorocmate' cotape'cherretañ cohuen Yomporecop. Allempopa' amate' a'poyatatare'tterretañeña pa'netser. Ora'te' allo'tsenaraña. ²⁴ Ñeñto'marña te'pa' notenes: Esemphuañen allempoch acrare'tetuerra allohuen acheñenesha'pa' sodomo'marnesha' ñetpa' amach tama a'coñchatare'tterretoña allempo. Capernaumo'marneshacha' saña allempopa' atarrcha' a'coñchatareñes.

Jesús'pa' atet oten, e'ñe same'ñeñoten na, napa' na'huaña'mperrescha' ñeñt atarr amuerochtatañ sentyen

(Lc. 10.21-22)

²⁵ Allempoña Jesús'pa' ma'yochenana Pompor, ñeñtpa' atet oten:

—Na Apacha' o'ch na'ye'chochtatonañ, papa' pa' ñeñte'p atarr ayochreshattetsa pe'ntaño ama't ñaña arr patsro. Na'ye'chochtatonañ tarro'mar ora añe'chno ñeñt pecohuenña pepen, ñeñtpa' ama arr-eye' pe'chapateñe pueyo'chro ñeñt atarr eñotañ entyetsa. Papa' aña pe'chapaten pueyo'chreto ñeñt ama eñotañeye' entyetsa. ²⁶ Tarro'mar Apa e'ñe pemuereñot ñeñtpa' atetña e'ñe pocte' penten pa. Arrpa' allohua ñeñt atet ma'yochenana Pompor.

²⁷ Jesús'pa' alla o'terranerr acheñenesha':

—Nomp por allohuen po'cohuenña e'ñe eñotatuenen. Na ñeñten Puechemerenpa' ama po'ño'ch eseshaye' neñotenaye, ñaptaña Nomp or e'ñe eñotenen. Nomp orpa'cho'ña ama po'ño'ch eseshaye' eñotenaye naptaña na ñeñten Puechemeren e'ñe neñoteñ Nomp or; ñaña erra'tsencha' ñeñt e'ñe pocte' nenten na ñeñten Puechemeren ñeñtñapa' o'ch neñotater Nomp or. ²⁸⁻³⁰ Sehua'cha'ta nesho allohuenes ñeñtes nene' seyo'chro ñeñt atarr amuerochtatañ sentyen. E'ñe same'ñeñoten na, napa' na'huaña'mperrescha' ñeñt atarr amuerochtatañ sentyen. Napa' aña'ña nenerrnas ñeñt amach cha muerochtaterrso; ñeñtña sapa' e'ñe'ch pocte' senteñ. Atto'chña sapa' señotenen napa' atarr nemuerensa ama atsrre'mo'chen entñeno ama't e'ñe puesheñarrocpa. Ama't e'ñe mamesha ama aña'ye' ne'nen ñeñt e'ñe nocpa. Atto'chña e'ñe cohuen nocshaterres seyo'chro ama't e'ñe secamquëñohuen.

12

Allempo Jesús pueyo'chresha' taso'tam'pesyenomuet trigo aña yetro allempocma amesen judionesha'

(Mr. 2.23-28; Lc. 6.1-5)

¹ Allempoña cherrerr pam'tarr allempo chocma amesen judionesha'. Allempoña Jesús'pa' arr oñem chetso'mar epuet pueyo'chresha'chno. Allempo oñenet pueyo'chresha'ñapa' e'ñe pa'chporrñofetpa' taso'tam'pesyenomuet puechma'tets trigo o'rra'yenomuet. ² Fariseonesha'ña ñeñt entahuet atet pa'nmuetpa' ñetñapa' allenta otyeset Jesús:

—Pecue'ñaca'yeña añ peyochresha' taso'tam̄pesyesnomuet trigo; atet̄ penet̄ ñeñt̄ ama pocteyaye o'ch atet̄ yeḡa taruasats añe yetro tarro'mar te'pa' añe yetro ñeñt̄ atet̄ anaret̄ ahuatoteñ allempocmach yamesen.

³ Jesúsñapa' atet̄ otanet̄:

—Sapa' ama'trra selleyareña ñeñt̄ atet̄ pa ahuat̄ David allempo cheporra'nma epuet̄ ñaḡa allohuen ñeñt̄ cotene'. ⁴ Ña allempopa' be'tosos Yompor pa'paclo allñapa' rrosan pan ñeñt̄ atma'ntataret̄ atet̄ ñerra'mrrate' ñeñt̄ nenet̄ all Partsocop. Ñehua, ñeñt̄ panpa' ama pocteyayñe o'ch rros David ñaḡa ñeñt̄ epuet̄. Ñeñt̄pa' añach ñapueḡ rrene' cornaneshachno; ñeñt̄pa' atet̄ anuaret̄ judioneshacop. ⁵ Ñaḡa ama't selleyareña ñoñets ñeñt̄ atet̄ anaret̄ ñeñt̄ Moisés po'ñoñ all oten atet̄ pena ñaḡa cornaneshap' Parets pa'paclo. Ñehua, ñet̄ puesherbeñoḡetpa' ama ameseneto añe yetro allempocma yamesen. Ñetpa' ama't atet̄ penetpa' Yomporñapa' e'ñe pocte' entenamet̄. ⁶ Napa' o'ch notas: Napa' ñeñten arro'tsenen nanac nesheren ello nemtaneñ ñeñt̄ atet̄ sherben Parets pa'paquél. ⁷ Ñehua, añ ñoñetspa' ñeñt̄ña atet̄ ote't̄ Yompor ahuat̄: "Napa' ama e'ñe aña cohuen nenteno o'ch sapuenen sayara ñeñt̄ semtsen nocop. Añe'naña atarr cohuen nenten o'ch semuereña allohuen samo'tsesha'." Ñerra'm cho chennasañ seyo'chro ñeñt̄ atet̄ oteney Yompor, amach erroḡ sotatscheña ama't erra'tsena acheñer ñeñt̄ e'ñe pocte' enten Yompor. ⁸ Ñeñto'marña te'pa' o'ch notas, na Ñeñten Acheñetosets ñeñten allsen-sareten, naca'yeña atet̄ otets este' poctetsañ ñeñt̄cha' atet̄ yeḡa añe yetro allempocma yamesen.

Allempo Jesúsapa' a'crraterran ñeñt̄ chelletsapot
(Mr. 3.1-6; Lc. 6.6-11)

⁹ Metuerrerr Jesús alloḡpa' be'tosuerrerr judionesha' po'prahuo. ¹⁰ Allñapa' allo'tsen puesheñarr yacma ñeñt̄ cha chellena pot. Fariseone-sha'ñapa' allenta a'ḡto'chet:

—Añe yetro allempocma yamesenpa' ta'm ¿pocte'te' penteñ o'ch pa'crrateñer acheñ?

Tarro'mar atet̄ a'ḡto'teñet̄ allochñapa' esheccha' otteñe'chet.

¹¹ Ñañapa' atet̄ otanet̄:

—Sapa' ñerra'm cho shora'nen ama't puemocarra secarrneror añe yetro allempocma yamesen, ama'tcha'ña allenta sechtere ama't ñeñte yetro allempo yamesen allohuene. ¹² Ñehua, acheñpa' ellocayē meta-nenanña ñeñt̄ atto sherben carrnero. Ñeñto'marña napa' notenes e'ñe pocte' o'ch atet̄ yeḡa ñeñt̄ cohuentetsa ama't añe yetro allempocma yamesen.

¹³ Allempoña Jesúsapa' atet̄ otan yacma ñeñt̄ chelletsapot:

—Te'pa' o'ch notap̄ petapuerr̄ ḡot.

E'ñe otue'pa' ñañapa' allentepa'tcha' tapuerran pot, e'ñe allorocma cohuenterra pot e'ñe attecmaterr̄ ñerra'm po'pshem̄tañoḡ pot.

¹⁴ Fariseonesha'ña cha'nmaçherretpa' cotape'chatanna'tyesnerret, atarr o'pateñet̄ Jesús attoch muetsatachet.

Atet̄ ote't̄ Yompor ahuat̄ Jesúsocop

¹⁵ Jesúsña eñotanetpa' ahuerr̄ allot. Shonte' acheñenesha'chno coḡa'huaneretter. Allohuen ñeñt̄ atsna'tyetspa' e'ñe a'crratyesuerranet.

¹⁶ Atet̄ otyesanet̄:

—Po'ñoçh amach esesha' sotaþsa'tatsto napa' na ñeñten Yompor Puechemeren.

¹⁷ Ñehua, ñeñtpa' atet þa allochñapa' attoch etsota Isaías po'ñoñ ñeñt a'mtaye't Yompor po'ñoñ, ñeñtpa' atet ote't Yompor Puechemerecop ñeñtcha' Cristoterrets:

¹⁸ Añmapa' ñeñtcha' atarr torrerrtsa nocop, ñapa' ñeñt nenen ñeñtcha' atarr sherberrets. Ñapa' ñeñt atarr nemorrentena ñeñt e'ñe nocshatene'. Ñapa' ñach ahuaenca't neperr necamquëño't, ñach eñotaterre' allohuen pa'namen acheñenesha' ama't ñeñt ama ju-dioneshayaye. Añcha' eñotaterranet ñeñt e'ñe cohuen ñoñets attochña e'ñe pocte' nentuerranet.

¹⁹ Ñapa' amach es otnare'tyerraneto ama't mameshapa' amach ama'toçhetyerro. Ama't mameshapa' amach che'chame'tyerraneto ama't allecma chopeñe'chyen acheñenesha'.

²⁰ Ama't ñeñt mueroçhetyetsapa' ñapa' e'ñech muererranet. Ñeñtpa' atetcha' netma'ntacha ñerra'mrrate' ama't puecharra cho'ne'ch tsopa'ne'pa' ñañapa' amach cha a'meyatere. Ñaña ñerra'm lam-pareñ cha muene' mayen ñeñtpa'cho'ña amach emayatere. Ñapa' amach cha es añcha'noçhtana'tyerro, ñarraña esempohuañenpa' e'ñech atta a'mchechatuerran ora allohuen ñeñt ama pocteye' enteno Yompor.

²¹ Ñeñto'marña allohuen pa'namen acheñenesha'çhno ñachña e'ñe yemuetuerret. Arrpa' allohua huañ atet ote't Yompor ñeñt quellquë't Isaías.

Atto puesheña'tets oteñet Jesús ñapa' oneñeto' po'huamencot quechpatenanña po'potantañ oneñeteçhno acheñenesha'

(Mr. 3.19-30; Lc. 11.14-23; 12.10)

²² Jesúsapa' alla huapaterrñañeterr puesheñarr yacma ñeñt aporo'yë ñeñt chorrena oneñet cha opanatateñ. Jesúsñapa' a'çrrataþ, ñeñtña opanerpa' o' alla eñorrera, ñaña o' e'ñe cohuen cohuerr. ²³ Allohuenña acheñenesha'pa' atarr cohuanrrorteñet, ñetñapa' atet otyeset:

—Ñato' añte'ca'yeña David po'm'reneñ ñeñtcha' Cristotosets.

²⁴ Fariseonesha'ña allempo e'mare'chetpa' ñetñapa' atet otyeset:

—Atto quechpatatyenan oneñeteçhno acheñenesha' añaca'ye ahua-menca't pene' Beelzebú ñeñt pompor pen allohuen oneñeteçhno.

²⁵ Jesúsñapa' eñotanet ñeñt atet cotape'chatse'tyenet pueyoçhreto ñocop ñeñt atto otyeñet ñapa' oneñeta pompor po'huamencot quechpatatenan oneñeteçhno acheñenesha'. Ñeñto'marña ñapa' atet otanet:

—Ñerra'm puesheñarr añcha'taret elloptannena pa'cheñer e'ñe ñagattsetpa' e'ñech poctacma a'çllatanna'tuerret. Attecmach þannerra ñeñt parro yeçhetsa paterr anetso, ñerra'm çho elloptannenet e'ñe ñagattsetpa' ñeñtña atto huomencatenetpa' ñeñtpa'cho'ña çhachca'ye huañerrets. Attecmach þannerra ama't ñeñt e'ñe pamo'tsna'tarecmuet ñerra'm elloptannerret e'ñe ñagattsetpa' ñeñtña atto huomencatenetpa' ñeñtpa'cho'ña çhachca'ye huañerrets. ²⁶ Attecmach þanna'ta ñaña oneñet pueyoçhresha'çhno ñerra'm oneñeteçhno e'moñe'tannenet, ñerra'm huapore'tannenet e'ñe ñagattseta amach errotenot allo'na atarr huomencatneneto. Po'ñoçh oneñetpa' amaca'ye huapore'tanneno.

27 Sapa' atet sotenen napa' Beelzebo' po'huamencot nequechpateññañ e'ñe ña pueyochresha', ñehua, te'pa' o'ch notas: Ñeñt seyochresha' sepen sa ñeñt eñotene' ñamet o'ch quechpatachet oneñeñechno acheñenesha', ñetpa'cho'ña amaña Beelzebú po'huamencoteye' quechpateñetoña oneñeñechno acheñenesha'. Ñetpa'cho'ña Yomporoña po'huamencot quechpateñetña oneñeñt. Ñeñtña o' eñotatas ñeñt atet sotennoñ ñeñtpa' amaca'ye po'ñoçh atteyaye. 28 Po'ñoçhca'ye Yompor e'ñe Puecamquëñot ñeñtña ahuamencat nepene' attoñ nequechpateñña oneñeñechno acheñenesha', ñeñtcha'ña señotate' te'pa' o' neçhapatonas Yompor po'cohuenña ñeñt atto po'ñoçh atarr ayochreshattena ña.

29 Ñehua, yapa' yeñoteñ ñeñt atarr ahuamencattetsa atto atarr ahuamencattena oneñeñt, ñaña'pa' e'ñe po'huamencot cohuanpésyenán allohuen e'ñe cohuen ñeñt pa'paquëll pa'yen. Tarraña ñerra'm esempo o'ch huapoña ñeñt atarr ahuamencatesha' ñeñtcha' metanose'ña po'huamenc atet ñerra'm na Nompor, ñeñtcha'ña rromose' o'ch huancos, allochña'pa' o'ch be'tosos all ñeñt pa'paquëll pa'yen o'ch e'ñe puer-ratampos ñeñt allpon o'patyena ña.

30 Ñeñto'marña te'pa' o'ch notas allohuenes: Ñerra'm eseshas ñeñtes ama netorrapretenaye ñeñtña acheñerpa' chaca'ye epatare'tennan ñeñt atet netorra'yena na. Ñeñtpa' o'ch netma'ntatasa atet: Ñerra'm esesha' ama na'yapachapretenaye ñeñt na'yapachén na, ñeñtña'pa' cha a'parratse'tam'penen a'yenet.

31 Ñeñto'marña te'pa' o'ch notas: Allohuen pa'namen sosya'tsañechno ñeñt ama pocteye' enteno Yompor ama't ñaña achñare'tanna'teñets ñeñtpa' a'pretna'po' nenteñ. 32 Ñaña ñerra'm esesha' nesasene' na Ñeñten Acheñetosets ñeñtpa' a'pretna'po' nenteñ. Tarraña ñerra'm esesha' añ achñare'teññañet Parets Puecamquëñ ñeñtña'pa' amaca'ye a'pretna'pahuoye' nenteñe. Ñeñtpa' amach a'pretna'pahuoterro e'ñe tayoteñ errponohuañen.

Allohuen acheñ ñeñt e'ñe po'ñoçh cohuen acheñer, ñetña'pa' añcha' orrtatyenet ñeñt e'ñe cohuenare'

(Lc. 6.43-45)

33 Ñehua, yeñoteñ allohuen acheñ ñeñt e'ñe po'ñoçh cohuen acheñer, ñetcha'ña orrtatenet ñeñt e'ñe cohuenare'. Tarraña po'potantañ acheñenesha' ñeñt po'ñoçh ama cohuenayaye ñetña'pa' añach orrtatenet ñeñt ama cohuenayaye. Ñeñtpa' atetcha' netma'ntaterra: Ora allohuen ñeñt e'ñe cohuen narmetsoch pue'merpa'cho'ña e'ñech cohuenare'. Añña po'pchañ narmetsoch ñeñt ama cohuenayayepa' pue'merpa'cho'ña amach e'ñe cohuenayaye. Ñeñto'marña attoña yeñoteñ erra'tsente' ñeñt e'ñe cohuenare' narmetsoch ñaña ñeñt ama cohuenayaye narmetsoch, pue'meroña e'ñe yechme'tenanet. 34-35 Sapa' ama cohuenayayso. Cha sottena ñerra'm shechpa e'ñe sompor sepen allohuenes. Ñeñto'marña amach errotenot señoso cohuen tarro'mar sapa' po'ñoçhpa' ama cohuenayayso. E'ñe atet atarr soctape'chatse'tyen seyochro ñeñt ama cohuenayaye, atotca'yena señosatse'tyen. Ama't erra'tsena acheñer ñeñt e'ñe po'ñoçh cohuen ñapa' añcha'ña orrtatyén ñeñt e'ñe cohuenare' cotape'chen pueyochro

tarro'mar pueyočhroña all cotape'chenan shonte' ñeñt e'ñe cohuentetsa. Tarraña po'poñ acheñer ñeñt po'ñočh ama cohuenayaye, ñapa'čo'ña añach orrtatyen ñeñt atet cotape'chen pueyočhro ñeñt ama cohuenayaye tarro'mar pueyočhroña all cotape'chenan shonte' pa'namen sosya'tsañ. Tarro'mar ñerra'm shonte' yoctape'chen yeyočhro ñeñt cohuentetsa, ñeñtpa' e'ñech ñeñta cohuen yeserrpare'ten. Tarraña ñerra'm shonte' yoctape'chen ñaña yeyočhro ñeñt ama cohuenayayepa' ñeñtpa'čo'ña e'ñech ñeñta yemnen o'ch yeserrpare'tyen. ³⁶ Po'ñočh napa' o'ch alla noterrser, esempohuañen allempoch acraretetuerra allohuen acheñenesha'pa' allohuen ñoñets ñeñt atta otatse'tyen acheñenesha' ñeñtñapa' a'metatatyeretcha'. ³⁷ Tarro'mar ñerra'm e'ñe cohuenare' seserrpare'tyen te' Yomporñapa' e'ñech pocte' entuerrnas señoñ allempo. Tarraña te'pa' ñerra'm čha señosatse'tyen ñeñtña señoñerpa' ñeñtachña secoñchaterre' allempo.

Atto Jesús pa' otan acheñenesha' ñeñt ama cohuenaye' cotape'chetso ñetñapa' čhocma e'nenet partsoteñets
(Mr. 8.12; Lc. 11.29-32)

³⁸ Allempoña allponsheña ñeñt atarr etsotayenayeñ ñoñets ñeñt atet anaret epuet ñaña allpon fariseonesha' ñetña e'ñe puehquëñoŋetpa' atet ochet Jesús:

—Yapa' Maestrocha' yemneñ o'ch porrtatonay pepartsoña ñeñtcha' yeñotate' p'apa' po'ñočhte' Parets Puechemerep' ñeñtepte' Cristotsets.

³⁹ Ñaña'pa' atet otanet:

—Acheñenesha' ñeñt corra'yetsa te' ñetñapa' ama cohuenaye' cotape'chyeneto, ama añeye' cosheneto Yompor ñeñto'marña ñetpa' e'ñe orrena otanet ahuo'ch norrtatanet nepartsoña. Tarraña amach es norrtataneto. Napa' añach paterr neñotatanet atet eñotatane't Jonás ahua't nínivo'marnesha' allempo a'mítane't Yompor po'ñoñ. ⁴⁰ Ñehua, yeñoteñ Jonás allempopa' allo'tsena cacacotmo ma'pamuet, ye'to ama't ñaña tsapo ñeñt añecmuen cac. Atetcha' neperra naña Ñeñten Acheñetsets, napa'čo'ña nema'pamuetcha' o'pono e'ñe allohuanen patso, ye'to ama't ñaña tsapo. Ñeñtcha'ña eñotaterrahuet atet penaña ñeñt huetsa Yomporeshot. ⁴¹ Tarro'mar ahua't allempo serrpare'tatane't Jonás nínivo'marnesha', ñetñapa' allempocma cotape'cherret e'ñe cohuen Yomporcop. Te'ña arr seshopa' allo'tsenen na ñeñten ello metanene' ñeñt atet serrpare'tate't Jonás. Tarraña sañapa' amaña soctape'chenoña ello cohuen Yomporcop. Ñeñto'marña esempohuañen allempoch acraretetuerra allohuen acheñenesha' ñeñtña nínivo'marnesha' ñeñt e'ñe cohuen cotape'cherrets Yomporcop ahua't, ñetpa'čo'ña orrterretcha', ñeñtcha'ña señotaterre'ña sapa' ama't mameshapa' ama pocteyayeña ñeñt atet sepa'yese't tarro'mar ama soctape'cherro ello cohuen Yomporcop. ⁴² Ñaña te'pa' o'ch neyerpatasa ñeñt atet pa' ahua't pueheñarr coyanesha' ñeñt añcha'tarettate't atarr bačhayo allohuanen pats sa'ponet. Ñeñtña coyanesha'pa' alloteñ on o'ch e'mñotenana' Salomón pueserrpareñ ñeñt atet atarr eñotañte't. Te'ña arr e'ñe seshopa' allo'tsenen ñeñten pueheñarrana ñeñten atarr es neñoten naña, ello nemítaneñ atto eñotañte't Salomón. Tarraña sañapa' amaña es sotapoteno. Ñeñto'mar esempohuañen allempoch acraretetuerra allohuen acheñenesha', ñeñtña

coyanasha' ñeñt e'ñe cohuen e'mñotatset ñapa'cho'ña orrterrach, ñeñtcha'ña señotaterre' sapa' ama pocyeyayeña ñeñt atet sepa'yese't tarro'mar sapa' ama es same'ñe'te ama't e'ñe mamesha.

Atto Jesús'pa' eñotatanet ñato' oneñetpa' o'ch alla chorrerranerr acheñ allot'cha'nom ahuaña

(Lc. 11.24-26)

⁴³⁻⁴⁵ 'Ellonetpa' o'ch alla neñotaterrseerr po'poñoneñ ñeñtcha' atet aþaretterra acheñenesha' ñeñt te'pa' ama e'ñeye' cohuen cotape'cheneto Yomporecop. Ñehua, oneñet ñerra'm esempo'cha'nom acheñenesesho't, ñeñtña oneñetpa' o'ch auyes erraparen ama't amayo'mar e'nyese' po'psheñeñ allcha' ye'cherrerr allcha' e'ñe amesuerrerr cohuen. Tarraña ñerra'm amach erra eñchepa' atteñapa' o'ch ot: "Napa' o'ch alla ahuerren nepacollo allot'necha'nom ahuaña." Atetcha'cho' pa. O'ch alla ahuerren pa'paquell, e'ñech cohuen atarrapo'tuaret, e'ñech cohuen añño'tyesaret, tarraña amach eseshaye' ye'chetso all. Allempoñapa' o'ch alla ahuerren allo'tsa'yen pamo'tsesha'pa' o'ch enana' po'poñ cancherrsheña oneñete'chno ñeñt nanac sosyare', ñeñt ello metana'tuene' ñeñt atet sosyaten ñeñt hua'ñene' o'ch ye'chaprecha. Allohuenetpa' o'ch chorreñet ñeñt acheñer. Allempoña tsapatonetpa' allo'nach sen ñeñt acheñer sosyatnomuets huomenc. Elloch metanerran ñeñt atet patse'tyese't ñenma't. Po'ño'chcha'ca'ye atet perraña acheñenesha' ñeñt te'pa' ama e'ñeye' cohuen cotape'cheneto Yomporecop.

Allempo huapoña Jesús pachor ñaña pa'mo'nasheñnesha'

(Mr. 3.31-35; Lc. 8.19-21)

⁴⁶ Allempo atet eñorana'tenana acheñenesha'pa' o' huapa Jesús pachor epuet ñaña pa'mo'nasheñnesha'. O' chapuet allpa' ñetñapa' alla tom'chenet a'yo't. Añ muenenet ahuo'ch serrpare'tatoset. ⁴⁷ Allempoña pueheñarrpa' atet otan Jesús:

—O'ca'ye huapaña pachor ñaña pemo'nasheñnesha'. Ñetpa' a'yo'te'tsa'yenet, mueneñet o'ch serrpare'tatospet.

⁴⁸ Ñaña'pa' atet otan ñeñt otene':

—¿Ama't seño'teñe ñeñt e'ñe po'ño'ch nachor nepen ñaña ñeñt e'ñe po'ño'ch nemo'nasheñ nepen?

⁴⁹ Allempoñapa' yochan pueyochresha'pa' atet otanet:

—Napa' añca'yeña ñeñt e'ñe po'ño'ch nachor nepen ñaña ñeñt e'ñe po'ño'ch nemo'nasheñnesha' nepen. ⁵⁰ Ñehua, ama't erra'tsena ñeñtcha' e'ñe atet þohuene' ñeñt atet muenen Nompore' ñeñt pue'ntañotsen ñeñtca'yeña e'ñe po'ño'ch nemo'nasheñ nepen ñeñtña no'ch nepen ñeñtña nachor nepen.

13

All toma'ntatanet Jesús ñeñt a'parre'tene' puerets

(Mr. 4.1-9; Lc. 8.4-8)

¹ Ñeñte yetropa' cha'nerrerr Jesús pocollo'tpa' anorruerr sa'patopño.
² Allña'pa' emchorra'huererr shonte' acheñenesha' ñeñto'marña Jesús'pa' a'tap noñtopa' ahua'mpes mame' allpononet allña'pa' anorros noñto.

Acheñenesha'ña allohuenetpa' alla tom'cha'tet sa'patopño. ³ Allñapa' esocmañen yechatyenan acheñenesha' pa'namen toma'nteñtso'chno. Ñeññ ñanompa' atet otanet:

—Ñeñña a'parrene' puerets ñañapa' ahua' allcha' a'parre'tyenana' puepuer.

⁴ All a'parre'tyeñ patanta'tetsñapa' alla chapyes toño'mar. Allñapa' hua'cha'tyesa o't e'ñe a'ñyallmechuenana' puerets.

⁵ Po'poñechnoñapa' alla chapyes mapuetromeso'mar all ama tama eñalle pats. Ama nanac o'pono'tseno patso ñeñño'marña mame'tollapa' cheparesuañ.

⁶ O'ña enome'ta'muen atsrre'tpa' alla a'uyatuer. Ama er'cha'tena' ñeñño'marña alla hueya'huerra.

⁷ Po'potantañña pueretspa' alla chapyes allcha' chepares aj. Allpa'cho' mameshapa' cheparesuañpa' ajñapa' mameshapa' atesha'tua alla ca'matuerranña narmets alla a'cllatuer.

⁸ Po'potantañechno ñeññapa' arr chapyes all e'ñe cohuen patso. Ñeññapa' e'ñe cohuen chepares. Allempoña atesha'tuapa' ñeññapa' atarr aton ellom're'tyes —puecha'tetspa' charroch charra' pue'llomer, po'pchañechnopa' pechapoch charra' pue'llomer, po'pchañechnopa' ma'poch charra' pue'llomer.

⁹ Allempoña Jesúsapa' alla o'terraneterr:

—Ñeññes po'ño'ch ne'mñotene', chaponasepa'ch seyo'chro ñeññ atet netma'ntatensa añ ñoñets.

Atet otanet Jesús ñeññecop atet toma'ntatyenanet

(Mr. 4.10-12; Lc. 8.9-10)

¹⁰ Allempoñapa' ponem'ya pueyochresha'pa' atet otoset:

—¿Eso'mare'tña peserrpare'teño'pa' atta es petma'ntatyenanet?

¹¹ Jesúsñapa' atet o'terraneterr:

—Sa te'pa' Yomporña o' muenaterres attoch seño'terr ñeññ ama eñotpahuoyaye ama't ahua'toteñ ñeññ atet penaña Yompor po'cohuenña atto ayochreshattena ña pue'ntaño't. Tarraña po'potantañechnoñapa' ñeññ atta es pue'cha'yetsa, ñocpuetñapa' amach erro'teno't eñoterrñañeto Yompor po'cohuenña. ¹² Esesha'te' o' cherranet pueyo'chreto ama't e'ñe allpona Yompor po'ñoñ elloña Yomporpa' allo'nach eñotatnenanet nanac shonte'. Tarraña esesha'ña ñerra'm ama' chenaneo pueyo'chro tarro'mar ñetpa' ama po'ño'chaye' aguëññañeto Yompor po'ñoñ, ama't allpon eñotyenetañ pueyo'chro ñeññapa' chach puerratan'perranet Yompor.

¹³ Ñeñño'marña ama't neserrpare'tatenanet toma'nteñtso, ñocpuetñapa' ama eñoteñetoña ñeññ atet netma'ntatenanet. Attoña ama't enteñetañ, ñetñapa' ama amnataretteneto o'ch es chapahuet pueyo'chreto. Ama't e'mueñetañ amaña chenaneoña pueyo'chreto ñeññ atet ye'chateny Yompor po'cohuenña. ¹⁴ Atet penet ñetpa'te'ñapa' po'ño'ch o' etsotua Isaías po'ñoñ ñeññ a'm'taye't Yompor po'ñoñ ahua't. Ñeñña'pa' atet ote't Yompor: Ama'tcha' po'ño'ch e'mueñetañ ama't e'ñe ahua'tapa' amach chapanetoña pueyo'chreto. Ñaña ama'tcha' cho e'ñe es entenetañpa' amach chapanetoña pueyo'chreto.

¹⁵ Tarro'mar ñeññ acheñenesha' te'ña ñet pueyo'chretopa' nanac echar'tenet attochña amach es chenahueto pueyo'chreto. Te'ña ñetpa' amach mueneñeto o'ch es e'mñotet taye'to'te' es chenahueto pueyo'chreto. Te'ñapa' amach mueneñeto o'ch es entet taye'to'te' cherranet pueyo'chreto. Attochña amach es cotape'cherreto no'cop ama't e'ñe mamesha attochña na'qeshpaterranetañ.

¹⁶ Allempoña Jesús pa' alla oterranerr pueyochresha':

—Saña po'ñoçhpa' atarr cosheñso'tsenes sa tarro'mar atto o' senterrñañ Yompör po'cohuenna seclloyot te'ñapa' o' e'ñe çherrnasa seyochro. Ñaña atto se'muerrñañ Yompör po'ñoñ, te'ñapa' o' e'ñe çherrnasa seyochro. ¹⁷ Po'ñoçhca'ye notenes e'ñe ahuatoteñpa' shonte' ñeñt a'mta'yese'ñt Yompör po'ñoñ ama't ñaña ñeñt e'ñe pocte' es pa'yestse'ñt allempo, ñetñapa' atarr muenetañe'ñt o'ch enterrñañetañ Yompör po'cohuenna ñeñt o' senter sa te'. Tarraña allempo ñetpa' amaña eseshaye'ña enterrapaye Yompör po'cohuenna. Ama't atarr muenetañe'ñt o'ch e'mñoterrñañet Yompör po'ñoñ ñeñt o' se'muerr sa te'. Tarraña allempo ñetpa' amaña eseshaye'ña e'muerrapayeña Yompör po'ñoñ.

Arrpa' all eñotatanet Jesús ñeñt toma'ntatenanet ñeñt a'parre'tene' puerets

(Mr. 4.13-20; Lc. 8.11-15)

¹⁸ Jesúsñapa' alla oterranerr pueyochresha':

—Ñeñto'marña te' sapa' se'mñoten o'ch neñotatas ñeñt atet yeçhateney ñeñt atet o' netma'ntatua atet ñerra'mrrate' puesheñarr ñeñt a'parrene' puerets. ¹⁹ Ñehua, añ puerets ñeñt çhapyesets toño'mar, ñeñtpa' añ notenes acheñenesha' ñeñt e'mñotenayeñ Yompör po'ñoñ ñeñt atto ayochreshattena ña. Ama't e'mñotenetañ tarraña ama çhenaneto pueyochreto ñeñt po'ñoçh atet oteney Yompör. Ñeñto'mar allorocmach huapa oneñe'pa' o'ch alla puerratanñperranet Yompör po'ñoñ e'ñe pueyochreto. ²⁰⁻²¹ Ñaña ñeñt çhapyesets mapuetro'meso'mar ñeñtpa' añ notenes acheñenesha' ñerra'm esempo e'mñoteññañet Yompör po'ñoñ e'ñech allorocma pocsheñsha' aguëññañetañ Yompör po'ñoñ. E'ñech cohuen ame'ñeretañ tarraña ñeñtpa' mamecpach atet penet. Tarro'mar ñetpa' e'ñe atet penet ñerra'mrrate' narmets ñeñt chepuets mapyo amach eñalle puereçh. Tsapatonetña ñerra'm o'ch huapanet topateñets ñeñtcha' mueroçhtatahuet tarro'mar ñetpa' o' ame'ñeretañ Yompör po'ñoñ, ñetñapa' allorocmach alla queçhpuerretña Yompör po'ñoñ. ²² Ñaña puerets ñeñt çhapyesets ajmo'mar, ñeñtpa' añ netma'ntatena po'potantañ acheñenesha' ñeñt e'mñotenayeñ Yompör po'ñoñ. Ama'tcha' çhapanetañ pueyochreto, tarraña ñetpa' allo'nach senet e'ñech añ atarr cotape'çhenet ñeñt lleca'yenet arr patso ñeñt e'ñe ñocueta. Añach muenenet o'ch esocmañen es eçhyenet, tarraña ñeñtpa' çhaca'ye shequënanet. Attoña ñetpa' amach errotenot orrtatyesñañetoña ñeñt e'ñe cohuen enten Yompör. Ñetpa' e'ñe atteta ñerra'm narmets ñeñt cha a'cllaten ajma' ñeñto'marña amach errotenot me'teneto o'ch ellonñre'tyaset. ²³ Ñaña añ puerets ñeñt çhapyesets e'ñe cohuen patso ñeñt e'ñe cohuen cheparsatspa' ñeñtña toma'ntenaya po'potantañ acheñenesha' ñeñt e'mñotene' Yompör po'ñoñ, ñoñetspa' e'ñech cohuen çhenanet pueyochreto. Ñetñapa' ñeñt po'ñoçh orrtatyenet ñeñt atarr sherbets Yomporecop. Attoña ñetpa' e'ñe atet penet ñerra'm narmets ñeñt atarr aton ellonñre'tyets —pate'tets çharroch çharra' pue'llomer, po'poñpa' pechapoch çharra' pue'llomer, po'poñpa' ma'poch çharra' pue'llomer.

Atto Jesús pa' toma'ntaterranet atet pena ñeñt a'parre'tene' ta'tllom e'ñe all a'parraret cohuen trigo

²⁴ Allempoña Jesúsapa' alla toma'ntaterraneterr, ñeñtpa' atet oterraneterr:

—Yompor po'cohuenña ñeñt atto te' ayochreshattena ña pue'ntañot, ñeñtpa' atet pena ñerra'mrrate' puesheñarr yacma ñeñt a'parrene' cohuen puerets pa'mro. ²⁵ E'ñe cohuen a'parre'tuepa' tarraña allempo manrrenet allohuenet, e'ñe't a'nahua huapa ñeñt e'moñe'tene'pa' allñapa' ahuo't a'parre'tyesuenana' ta'tllom' e'ñe all a'parraret cohuen trigo. Ahuo'tña a'parre'tueña'pa' o' ahurr a'nahua. ²⁶ Narmetsñapa' o' cheparesua o' me'tyesuapa' allempoñapa' entet ñaña ta'te' o' chepares epuet trigo. ²⁷ Allempoñapa' hua'cha'ta pamo'mte'pa'taruasañer, ñetñapa' atet otoset: “¿Ama't, Nomporcha' cohuenaye' pa'parrenoña puerets pa'mro? Errotenotuañaca'ye o' chopña ñaña ta'te' all.” ²⁸ Ñaña'pa' atet otanet: “E'ñeca'ye cohuen na'parraña nepuer all. Ñeñt ne'moñe'tene'pa' ñeñte'ca'yeña o' atet pañpsen.” Pa'taruasañerñapa' atet ochet: “¿Ama't pemno o'ch ahuey o'ch ya'mare'tuerra'ña ta'te'?” ²⁹ Ñaña'pa' atet otanet: “Amachca'ye sa'mare'tatsche te't'cha sa'marampennan netrigo. ³⁰ Allepa' chepuepa' epuet. Esemepoch pomella'hua trigopa' allempochña noch ñeñtcha' a'yapa'che' trigo: Ñanomcha' añ sa'yapa'cha' ta'te' o'ch sehuancachmech attoch ya'poyatater. Sehuanca'huepa' choscha'ña a'yapa'che'ña ñaña trigo o'ch sañño'teña' allecma neshontateñ.”

Atto Jesúsapa' toma'ntaterranet atet pena pue'llomer ñeñt otenet mostazllom'

(Mr. 4.30-32; Lc. 13.18-19)

³¹ Allempoña Jesúsapa' alla oterraneterr:

—Añ Yompor po'cohuenña ñeñt atto ayochreshattena ña pue'ntañot, ñanomp' e'ñech puesheña'ttsa ame'ña'yetsa. Allempoteññapa' allo'nach sen atonetnomtsa ñeñtcha' ame'ñerrtsa attochña e'ñe epa'huerra erracmañen Yompor po'cohuenña.

Ñeñtpa' añ toma'ntaterraneterr mostazllom':

—Ñeñtña pue'llom'netollpa' puesheñarrñapa' o' anem' pa'mro allcha' nare'teña'. ³² Ñehua, e'ñe yeñoteñ mostazllom' ñeñtpa' atarrca'ye nanac añe'folleshallmerr, tarraña ñerra'm o'ch yenare'chpa' allempoña choppa' allo'nach sen rrorranmats cohuen, atarrchetnomuets, elloch metana'tuan po'pchañ narmetso'chno. Ñeñtña narmetsocherpa' o'ch hua'cha'toña o'te'chno ñeñtcha' ama'tanatyesosets puetacro'mar.

Atto Jesúsapa' toma'ntaterranet ñeñt atet pena chase'

(Lc. 13.20-21)

³³ Jesúsapa' alla serrpare'taterraneterr ellonet ñeñt atet pena Yompor po'cohuenña ñeñt atto atarr ayochreshattena ña pue'ntañot. Ñeñtpa' ama'tcha' añe'folla ñeñtcha' ñanom orrtatsa tarraña e'ñe ña po'huamencot mame'tollapa' o'ch e'ñe epa'hua ora erraparen. Ñeñtpa' añ toma'ntaterraneterr atet pena chase':

—Ñeñt chase'pa' allo tsetenan coyanesha' harina' ñeñt oñetsetstaten attoch a'chasatan harina' esheccha' e'ñe a'muesatue. Ñeñtña chase'pa' ama'tcha' añe'folla net, ama'tcha' aton harina' ñeñt ma'pa' arroga, mame'tollapa' o'ch e'ñe a'muesatuanña ama't atarr aton harina'.

*Jesús*pa' ora allpon ñeñt atet yechatyenan acheñenesha' ñeñtpa' attoña pa'namenot es toma'ntatyenanet

(Mr. 4.33-34)

³⁴ Ora allpon ñeñt atet yechatenan Jesús acheñenesha', ñeñtpa' atto es toma'ntatyenanet. Allempopa' ama serrpare'tataneto e'ñe atta, chocmaña serrpare'tatenanet toma'nteñtso. ³⁵ Attoña o' etsoterra ñeñt atet ote't ñeñt a'mtaye't Yompor po'ñoñ ahuat ñeñt atetcha' yechaterr Cristo:

Napa' neñerrcha' e'ñe toma'nteñtso; na'poterrcha' ñeñt ama a'potareteyaye ama't ahuatoteñ allempoteñ Yompor yečcatan añ patser.

*Atto Jesús*pa' eñotatteranet ñeñt atma'ntatarettetsa ta'tllom epuet trigo

³⁶ Allotña Jesúspa' sa'nman acheñenesha'pa' o' cherr pocollo. Allña huačha'toña pueyochresha'pa' atet otoset:

—Te'pa' o'ch potey e'ñe eñotochen ñeñt toma'ntena ta'te' ñeñt chepuets pa'mro.

³⁷ Ñañapa' atet otanet:

—Ñeñt nare'tene' e'ñe cohuen pueretspa' ñeñtpa' naca'ye Ñeñten Acheñetosets. ³⁸ Ñeñt na'muer nepenpa' ñeñtca'yeña añe patser. Ñeñt cohuen pueretspa' ñeñtca'yeña Yompor pueyochresha' ñeñtcha'ña čherrets all añcha'tarettena Yompor. Ñeñt ta'te'pa' ñeñtca'yeña oneñet pueyochresha'. ³⁹ Ñeñt e'moñe'tene' ñeñt nare'tam'pse' ta'te' ñeñtca'yeña oneñet pompor. EsemPOCH čherr allempoch pomella'huapa' ñeñtpa' añ toma'ntena allempochña mellapoterra. Ñeñtcha'ña a'yapačherretspa' ñeñtca'yeña mellañoteñnanesha' ñeñtcha' huačha'ttsa entot. ⁴⁰ Atef apčhenet ta'te' te' o'ch a'poyatachet tsopa' atetcha' perrñañetña oneñet pueyochreshačhno allempoch mellapoterra. ⁴¹ Nehua, na Ñeñten Acheñetosetspa' nach mueñerre' nemllañoteñnaneshar ñeñtcha' a'yapača'tuerre' allohuen ñeñt cotape'chatyenuhuet sosey ñaña allohuen ñeñt e'ñe añe etsotayen patpareñ. Arročha' a'yapačharetterra allo'tsa'yen ñaña Yompor pueyochreshačhno, ama't e'ñe all ayochreshattena ña. ⁴² O'ch e'ñe a'yapačharetetuerretpa' allempochña asaprrotarettet o'pono all huorten tso'. Allñapa' allcha' yahuanrrorterret, panmueñoťet atserrpa' rraso'tyerretcha' pa's. ⁴³ Allempoña allohuen ñeñt e'ñe pocte' es pa'yets ñetñapa' poptetsetach e'ñech attet ñerra'm atsrret. E'ñech cohuen popuetyenet all añcha'tarettena ñeñt pompor penet. Allohuenes ñeñtes ne'ññotene' neñoñ čhaponasepa'chña seyočhro ñeñt atet notenes.

*Atto Jesús*pa' toma'ntaterraneterr shonte' quelle ñeñt e'potarettetsa patso

⁴⁴ Po'pocheño Jesúspa' alla toma'ntaterranet po'poñonef. Ñeñtpa' añ toma'ntatanet Yompor po'cohuenña atto atarr ayochreshattena ña, ñeñtñapa' atarr aye'čočen. Ñeñtpa' atet toma'ntatanet ñerra'mrrate' shonte' quelle ñeñt e'potarettetsa e'ñe patso. Ñeñtña quelle puesheñarr yacmapa' machayotach entos. O'ña entuepa' o' alla pampa'ner ñañapa' o' ahuerr e'ñe pocsheñesha' allenta pomhuahuerran ora ñeñt allpon ečhyen allochñapa' attoch echan quelle alloch rañferrana ñeñt patser

allo'tsen quelle. Attochña ganam̄perrana atarr shonte' quelle ñeñt atarr ye'chena.

Atto Jesúsapa' toma'ntaterraneterr ñeñt atarr coñnesha' serets

⁴⁵ Po'pocheñopa' atet toma'ntaterraneterr:

—Yompor po'cohuenña atto atarr ayochreshattena ña ñeñtapa' atarr aye'chochen atet ñerra'mrrate' ñeñt atarr coñnesha' serets. Puesheñarrña ñeñt pomatsre'tyetsa ñeñfach atarr e'nyen ñeñtcha' rañña. ⁴⁶ Pamtarrñapa' entosan serets ñeñt atarr nanac coñnesha' ñeñtñapa' atarr tsa'te'. Ñañaapa' allentach ahuerri o'ch pomhuahuerran ora ñeñt allpon echyen allochñapa' attoch echan quelle alloch rañtterrana serets ñeñt atarr nanac coñnesha'.

Atto Yompor po'cohuenña e'ñe atet pena ñerra'mrrate' añecmuen terraya

⁴⁷ Jesúsapa' alla toma'ntaterraneterr; ñeñtapa' atet otanet:

—Yompor po'cohuenña atto atarr ayochreshattena pue'ntañof ñeñtñapa' e'ñe atet ñerra'mrrate' terraya añecmuen. O'ch terrayet sa'popa' o'ch e'ñe ap'cha'huan allohuen pa'namen cacachno. ⁴⁸ Ñerra'm o'ch e'ñe chorra allemponapa' o'ch chetam̄peret topñaso, o'ch anorrcha'tet allcha' acret ñeñt e'ñe cohuenare' ñeñtcha'ña esha'tanetet puecañtro. Ñeñtña ama cohuenayayepa' o'ch saprrochet. ⁴⁹ Ñeñtapa' atetcha'ca'ye perraña allempoch mellapoterra. Cha'nma'cha'tcha' mellañoteñnesha' ñeñtcha' ellopa'tetstaterre' ñeñt atsrre'mñañnesha' ñaña ñeñt e'ñe pocte' es pa'yets. ⁵⁰ Ñeñtña atsrre'mñañnesha'pa' huapore'teretcha' o'pono all huorten tso'. Allñapa' allcha' yahuanrrorterret, panmueñotet atserrpa' rraso'tyerretcha' pa's.

Attoch e'ñe cohuen yorrtatyen cotapñats ñeñt ahuatoteñ atarr sherbets ñaña attoch e'ñe cohuen yorrtatyen cotapñats ñeñt e'ñe etserra atarr sherbets

⁵¹ Allemponapa' allenta a'p'to'tanet:

—¿Eñoto'chena't sentenña allohuen ñeñt atet notyenes?

Ñetñapa' atet ochet:

—Eñoto'chenca'ye yenteñ.

⁵² Allemponapa' atet otanet:

—Ñeñto'marña ama't allohuen erra'tsen ñeñt atarr etsotene' ñoñets ñeñt atet anaret ahuatoteñ, ñerra'm elloña ay'chatarettet ñamet ñeñt atet pena Yompor po'cohuenña atto atarr ayochreshattena ña, ñeñtña acheñer atarrcha' cohuen orrtatenan cotapñats ñeñt ahuatoteñ, elloña cohuencha' orrtaterran ñaña ñeñt e'ñe etserra cotapñats. E'ñech atet pena ñerra'mrrate' ñeñt apacllatesha'. All año'tyenan ñeñt atarr morrentena errotenopa' o'ch orrtatenan ñeñt errete' año'ten all; errotenoñapa' o'ch orrtatyenan ñaña ñeñt año'ten ahuatoteñ all pa'pacillo.

Allempo serrpare'tatan Jesús acheñenesha' all Nazareto

(Mr. 6.1-6; Lc. 4.16-30)

⁵³ Serrpare'tatuanet Jesús ñeñt atet toma'ntatyesanet, ñañaapa' ahuerri allot. ⁵⁴ Cherr pa'nyo all Nazareto ye'chatuerraneterr all po'prahueto. Allñapa' nanac cohuanrrorteñet, atet otyeñet:

—Ñapa' errahuañaca'yeña eñotanña ora allohuen ñeñt atet pa'yena. Eseshahuañaca'yeña eñotatene'ña atto' orrtatenan partsoteñets. ⁵⁵ Ñapa'

aña puechemer ñeñt po'taruas pene' o'ch torrenana tsach attoch es yechcatyen pa'namen. Pachorpa' aña María. Pa'mo'nasheñpa'cho'ña aña Jacobo, José, Simón, Judas. ⁵⁶ Allohuen po'chanesha'pa' e'ñeca'ye yechme'tuenanet parro'marneshayarramche'. Ta'm ñaña'pa' errotenofte'ña atarr es eñotyen.

⁵⁷ Ñeñto'marña all e'ñe ña pa'nyo ama eseshaye' acua'penaye entenaye. Allempoña Jesús'pa' atet otanet:

—Ñeñt a'ñtene' Yompor po'ñoñpa' chocmaca'ye añcha'na'tpo' entyeñña allohuen acheñenesha', arrña pa'nyo allo'tsen e'ñe ña pamo'tsna'tarnesha' ñetñapa' ama acua'penaye' enteñeto. Ama't ñaña ñeñt parro yechenet pa'paclette, ñetpa'cho'ña ama acua'penaye' enteñeto.

⁵⁸ Ama ame'ñeñeto ñeñto'marña allpa' ama atonocheye' orrtataneto po'partsoña.

14

Allempo e'ñe cohuen es orrtatyes Jesús, Herodesña'pa' cha otapañ Juanañte' o' tanterra ñeñt apataye't acheñ Yomporecop

(Mr. 6.14-29; Lc. 9.7-9)

¹ Allempoña añcha'taret Herodespa' e'mare'tenan atet pa'yena Jesús. Ñehua, Herodespa' all añcha'tarettena anetso Galileo. ² Allempoñapa' atet otan ñeñt sherbene':

—Añepa'tca'yeña Juanañ ñeñt apataye't acheñ Yomporecop; ta'mca'ye chate'ca'ye tanterraña rromot. Ñeñto'marte'ca'yeña te'pa' orrtaterranña partsoteñets.

³ Ñehua, allempopa' ahuañmo'chacma rrematenana' Juanañ o' huan-cachpa' allña yottamñsach attoch coshatan Herodías ñeñt pa'mo'nasheñ Felipe pue'tapor. ⁴ Tarro'mar Juanañpa' ña otaye't Herodes:

—Amaca'ye pocteyaye o'ch peyoramñpes pemo'nasheñ pue'tapor.

⁵ Ama't atarr mueneñeñ o'ch muetsatacheñ e'ñe allempocma tarraña Herodespa' mecha'tenan acheñenesha' ñeñto'marña ama eshcaye' muetsatache. Tarro'mar acheñenesha'pa' e'ñe cohuen enteñet Juanañ atet ñerra'mrrate' ñeñt a'ñtene' Yompor po'ñoñ.

⁶ Allempoña coshame'tapreteñet Herodes allempo eñalletña allña'pa' o' tancosa Herodías puechoyor. ⁷ Herodesña'pa' ñeñta atarr cohuen ent. Ñeñto'marña och:

—Na po'ño'chpa' o'ch nena' neñoñ e'ñe Parets pa'so'chño, ama't es penamuenpa' napa' napa'pcha'.

⁸ Pachorñapa' allenta otare'ch e'ñe a'nahua:

—O'hua p'ochte' añcha'taret: “Añcha' p'apuen Juan poñ.”

Allempoña shopshesha'pa' atet otan Herodes:

—Napa' añ nemnen o'ch pepechennana' Juan poñ ñeñt apataye't acheñenesha', o'ch penon platopa' o'ch p'aphuerren e'ñe arrma.

⁹ O'ña enamhuepa' añcha'tareñña'pa' cha lleca. Tarraña ama't llecañpa' o' nohuanña po'ñoñ huomenc e'ñe Yompor pa'so'chño ñaña allo'tsa'yen ñeñt hua'ñen ñeñt e'muene' atet oten ñeñto'marña otanet:

—Te'pa' o'ch sañ Juan poñ.

¹⁰ Allempoñapa' o' mueñan pa'cheñer o'ch pecheñeta' Juan all yotamñpeñet. ¹¹ Allempoña o' huapaterrñañet poñ platopa' aphueret shopshesha'. Ñaña'pa' aneñ pachorecho o'ch apueña'.

¹² Allempoñapa' ahuanma Juanañ pueyochresha' o' aneret apecharef o'ch pampuereta'. O'ña pampa'huereta'pa' o' ahuanerret o'ch e'mare'tateñeta' Jesús.

Allempo Jesúsapa' rratenan shonte' acheñenesha'; ñeñña acheñenesha'pa' allo'tsen amnaroch mil

(Mr. 6.30-44; Lc. 9.10-17; Jn. 6.1-14)

¹³ Jesúsapa' allempo e'mare'tan Juanañ, ñaña' ahuanpes noñto o' sa'nman acheñenesha' o'ch ahuo' all ama acheñempañoayey. Acheñenesha'ñapa' allempo e'mare'chet ñetñapa' allenta ahuanmuet ñamet. Allohuen anetsotpa' e'ñe ahuanmuet o'ch entereta' Jesús. Ñetñapa' alla oñmach'a'tet patso'mar. ¹⁴ Allempoña sehuosa Jesús noñto'tpa' alla entuerraneterr o' alla shonta'huerrerr acheñenesha'. Ñaña' atarr nanac muera'huerraneterr. Allñapa' o' alla a'crratyessuerraneterr patsnañefer. ¹⁵ Atteñapa' ellerren pueyochresha'ñapa' oteñeta' Jesús:

—Te'pa' arro'tseney all ama acheñempañoayey ñaña o'ca'ye ellerren. Te'pa' o'ch p'och acheñenesha' ahuanemyerretepa' anetso'mar allcha' rañña'yesuerret puerraret ñeñtcha' rra'yesuerret.

¹⁶ Jesúsñapa' otanet:

—Amachca'ye ahuanmatsterreto. Sachca'ye apa'yesahuet ñeñtcha' rret.

¹⁷ Ñetñapa' atef ochet:

—Ya arrpa' amaca'ye es yechenoña ama't coñe'ta; yapa' e'ñeca'ye amnara pan yechen ñaña epatoll cac.

¹⁸ Allempoña Jesúsapa' atef otanet:

—Sanmon arrma o'ch sapuenna'.

¹⁹ Allempoñapa' otan acheñenesha':

—Te'pa' o'ch sanorrcha'tyes e'ñe all cohuen emmo'ratyen pasetma'.

Allempoña agapan ñeñt amnar pan ñaña epatoll cac, o' cohua' enonet, parasyoso'tam'psan pan allotñapa' shota'tan pan, apanatyesan pueyochresha'.

²⁰ E'ñe epa'huet, allempoña o' rrallme'chet allohuenet e'ñepa'tcha' yetrra'tuahuet. E'ñe yetuahuetpa' cha a'pchatyaset ñeñtñapa' a'yapa'cheret.

Ñeñña a'yapa'cherretepa' chepa'tcha' chorrats charra' puechena epa cañter e'ñe tamo'yare'. ²¹ Ñeñña rrallme'chatspa' atarr shonte' acheñenesha'; ñato' allo'tsente' amnaroch mil ñeñt e'ñe yacmaneshoche'. Ellonetpa' allo'tsa'yen ñaña coyanesha'chno ñaña cheshaneshachno.

Atto Jesúsapa' e'ñe cohuen chope'chnen enot oño

(Mr. 6.45-52; Jn. 6.16-21)

²² Allempoña Jesúsapa' otan pueyochresha':

—Te'pa' o'ch sa'tacha't noñto o'ch sota sanom o'ch se'pchaterra yot. Napa' o'ch neso'tnom' ora acheñenesha'.

²³ O'ña so'tuanmanetpa' ñaña' ahuo' aspeno e'ñe ñapuef allña ma'yochosa. Ama't o' tsapuenpa' ñaña' allo'tsena ñapuef.

²⁴ Noñtñapa' ñeñta rro'chaso'tsenara sa'po, emo'yare'ñapa' cha anmape'cham'penanet, a'puerrame'tam'penanet orno. ²⁵ Atteña allempoña puetarenmochpa' huenanet Jesús cha chope'chnen enot oño. ²⁶ All chope'chnen allempoña entapueñ pueyochresha', ñetñapa' cha toratsetyaset pueyo'chret, atef otanna'tyaset:

—Choyeshe'matsste'ca'ye huaponaya.

Pueyorñoŋetpa' atŋa rrannartet.

²⁷ Jesúsñapa' eñorana'tuenanet, atet otuenanet:

—Choñaca'ye socshapuenna, naca'ye o' nohuapa, amach atŋa señcha'tatstapno.

²⁸ Allempoña Pedropa' eñorana'cha ñeñŋpa' atet och:

—Ñerra'm po'ñoçhte' pa Partshesha', te'pa' o'ch potosen, aponca'ye nesho, pechope'chnom paña enoŋ oño.

²⁹ Jesúsñapa' allenta och:

—Aponca'ye.

Ñaña'pa' allenta sohua noñtoŋpa' o' chope'chnom ñaña enoŋ oño o'ch ahua' Jesúsesho. ³⁰ Chope'chnomtsapa' o' cohua'nman huomenquēsha' ñeñŋ cha emo'yartatenan sa'ppa' cha yore'ch. Cha yore'chpa' alla muene' esha'ta oño. Allña'pa' rranare'ta atet otan Jesús:

—¡Pa'queshpatosen Partshesha'!

³¹ Jesúsña tecma rremaŋpa' atet och:

—Papa' ama't e'ñeye' peyemtenno. Eso'mare't cha pe'charrtatenña peyoçher.

³² E'ñe a'taça'tatseta noñtoŋpa' huomenquēsha'ñapa' çhepa'tcha' muet-soñeñterrtsa. ³³ Ñeñŋña noñto'tsa'yenpa' allentepa'tcha' concorpanrrortana'tapetpa' atet otyeset:

—Po'ñoçhepa't papa' e'ñe Parets Puechemerep.

Allempo Jesús'pa' a'crratyesosan pa'namen atsnañeŋeçhno all Genesareto

(Mr. 6.53-56)

³⁴ Allempoña pechatamŋsetpa' arr etsotaset all oteñet Genesareto. ³⁵ Ñeñŋña ane'tañnesha' allpa' o' cheme'tapet Jesús. Atto cheme'tapetpa' ñetñapa' allenta mueñet achen, o'ch e'mare'tatenana' achenesha' allampaño'mar. Allotñapa' huapatyesoñet allohuen atsnañeŋeçhno. ³⁶ Ñeñŋña atsnañeŋeçhno'pa' o' enamyesoset ama't poso'moŋa o'ch a'plla'yesosñañet pa'shtam. Allpon ñeñŋ a'plla'yese' Jesús pa'shtam allponçho' e'ñe corra'yesuerrtsa.

15

Atto Jesús'pa' eñotatenanet ama añeye' ya'sosyatenaye Partsocop ñeñŋ yerra'yen yenamot

(Mr. 7.1-23)

¹ Allempoña fariseonesha' ñaña ñeñŋ atarr etsotayenayeñ ñoñets ñeñŋ atet anaret judioneshacop ñetñapa' arroŋ huacha'tet Jerusalénoŋ. Chaça'tet Jesúseshopa' atet otyeset:

²—Eso'mare'tña peyochresha'ñapa' queçhpuerretña ñeñŋ atet yeyche't ya ahua't yatañeshohuen. Ñeñto'mar o'huañ e'pota'tetña Partsocop allempo rrenet.

³ Ñaña'pa' atet otanet:

—Sapa'çho'ña ñeñto'mare'trraña saŋpare'teññañña saña Yompor po'ñoñ ñeñŋ atet anaret allochñapa' e'ñech sañeña seyçheña e'ñe setsotayen. ⁴ Ñehua, po'ñoçhca'ye yeñoteñ Yomporpa' atet oteneŋ: “Semorrenteñoŋpa' señcha'na'chcha' sompor ñaña sachor.” Elloña ñaña po'poñoneŋ atet oteneŋ: “Ñerra'm esesha' sasare'tene' pompor

ñaña pachor ñeñtapa' muetsetepa'." 5 Tarraña sañapa' amaña atteye' sepeno tarro'mar sapa' chaña atet sotyen:

—Ñerra'm esesha' atet otene' pompor ñaña pachor: "Ñeñt nechen o'ch napapeñpa' tarraña amach napape te'pa' o'ch nene' Yomporecop" 6 ñeñña acheñerpa' sañapa' atetcha' soteñ: "Pocoppa' ama pallteno o'ch es pap pamo'mte'." Sapa' attoca'yeña sehuapore'teññaña Yompor po'ñoñ allochñapa' e'ñech aña setsoten ñeñt e'ñe sañeña seycheña. 7 Sapa' atar-rca'ye ommoñañeshas tarro'mar atarr seshcare'ten amaña Yompor-eye'ña seshherbeno. Isaíaspa' e'ñe cohuen a'mítane't Yompor po'ñoñ, saña te'pa' e'ñe atet sepena atet ote't; allempopa' atet ot Yompor:

8 Ñeñt acheñenesharpa' e'ñe puenamoña cohuentatennanetañ; pueyoçhretoñapa' ama chenaneo ñeñt cohuen nenten na.

9 E'ñe orrena ma'yochennet, ñeñt atet yeçhatannenetpa' ñeñtapa' e'ñe acheña naye't ahuat poctapña.

10 Allempoña Jesúsapa' chore'tan acheñenasha' ñeñt shontetsa, ñetñapa' atet otanet:

—Sañapa' e'ñepa'chña cohuen se'mñoten allochñapa' attoch e'ñe cohuen çhaponasa seyoçhro. 11 Ama aye' ya'sosyatene' Partsocop ñeñt yerra'yen yenamot. Aña'yeña ya'sosyatene' yeñoñ ñeñt cha'nets yenamot ñeñt atet yeñosatse'tyen.

12 Allñapa' atet oteña' pueyoçhresha':

—¿Peñoteñe't fariseonesha'ñapa' allempo e'monapet peñoñ ñeñt atet potyenanet ñetñapa' cha'atsrre'muet?

13 Nañapa' atet toma'ntatanet ñeñtcha' atet apare'tterra fariseonesha', ñeñtapa' atet otanet:

—Allohuen narmetsoçhno ñeñt ama aye' nare'taye Apa ñeñt pue'ntaño'tsen ñeñtñapa' a'mare'taretetuerrach. 14 Ñetpa' ottetepa'ta. Ñetpa' e'ñe atet penet ñerra'mrrate' pueheñarr ñeñt aporo'yetpa' ñapa' o'ch echa'nman po'psheñeñ ñeñt parro aporo'yeteçmuet. Allempo atet penet ñerra'm aroro'tonta echa'nmana'tnomuet epsheño'maret çhach shora'nmoset aroro'to. Arrpa' allohua ñeñt atet toma'ntatanet atet ñerra'm ya allempo ama yoctape'cherra' ñeñt cohuentetsa Yomporecop amach erro'tenot yoctape'chache po'psheñeñ ñeñt ama eñotenaye ñeñt cohuen enten Yompor.

15 Allempoña Pedropa' atet ot:

—Yapa' çhochña peserrpare'tatey e'ñe cohuen eñotoçhen ñeñt atet petma'ntatena ñorra'.

16 Nañapa' atet otanet:

—Ama't sapa'cho'ña ama'tña seño'teña'. 17 Sapa' ama't çhennasoña seyoçhro ñeñt yerra'yen yenamotpa' alla sen yato ñeñtapa' çhocmach yener a'yo. 18 Aña ñeñt cha'nets yenamot ñeñt atto yeñosatse'tyen ñeñtapa' e'ñe yeyoçhrot huena ñeñtña çhocma ya'sosyatene'ña Partsocop. 19 E'ñe yeyoçhrot huena cotapñats ñeñt ama't mameshapa' ama cohuenayaye, ñeñtapa' aña: muetsanna'teñets, chetapretanna'teñets, cañoresha'teñets, etatsre'tyeñets, toma'tamñsanna'teñets, sasare'teñets. 20 Ñeñt allohuen sosya'tsañeçhno ñeñt huetsa yeyoçhrot ñeñtña po'ñoçh ya'sosyatene' Partsocop. Tarraña allempo yerrallme'chyen ama't ama ye'pota'tyesopa' ñeñtapa' amaña ñeñtaye'ña ya'sosyatene'ña Partsocop.

Atto puesheñarr coyanesha' ñeñt ama judioneshayaye ñapa' atarr yem-tapana Jesús

(Mr. 7.24-30)

²¹ Ahuerrerr Jesús alloṭpa' alla ḥhap allampaño anets Tiro ñaña Sidón.
²² Allñapa' o' huapa puesheñarr coyanesha' ñeñt allo'marnesha' ñeñt canano'marnesha'. Ñañaapa' allenta rranare'tospa' atet otos:

—Pemueraye'chosna, Nepapareshacha' p'apa' ñeñteṭ Davidna'tareṭ. Na nacñe'terpa' atarr mueroḥtateñ oneñe't.

²³ Jesúsñapa' ama't mameshapa' ama eñorana'teño. Atteñapa' o' ponemña pueyochresha' otoset:

—Pe'mñochñaca'ye tecma allochñapa' o'ch ahuerri, ḥaca'ye coṭa'neney perranare'tnomue'.

²⁴ Ñañaapa' atet otanet:

—Napa' e'ñe añeṭpa allsensareten ñeñt israelena'tarneshacop; ñetpa' e'ñe atet nentenanet ñerra'm carrneroḥno ñeñt paya'tyetsa.

²⁵ Coyanesha'ña ñeñt ama israelena'tareyayepa' ñañaapa' allenta on e'ñe ñesho concorposñañapa' atet otos:

—Choña Nepapareshacha' pebensañṭsaye'cherrnan nacñe'ter.

²⁶ Jesúsñapa' toma'tatana acheñenesha' ñeñt ama israelena'tarneshayaye ñeñto'marña atet och:

—Ama pocteyaye o'ch yeprratanṭpes yacñe'ar puerrar o'ch yehua-pore'tamṭes allo'tsen ochec o'ch rre' ñaña ochec.

²⁷ Coyanesha'ñapa' atet otererr:

—Ama't atteñ Nepapareshacha' tarraña ama't ochecpa'cho'ña rra'yenan ñeñt a'shore'tatyen pamo'mte' po'mesaṭnaḥo.

²⁸ Allempoña Jesúsṭpa' atet otererr:

—Chepa't nesñeshacha' atarr nanac peyemtenna ñeñteṭñapa' attetepa'ch ṭocop atet pemnen ṭa.

Pacñe'terñapa' allorocma correrra.

Atto Jesúsṭpa' a'crraterranerr po'potantañ atснаñe'ḥno

²⁹ Ahuerrerr Jesús alloṭpa' alla oñem sa'patoṭño'mar e'ñe Galileaso. Alloṭpa' ahuo' aspenṭo allñapa' anorros. ³⁰ Allñapa' alla huacherrñañe'terr shonte' acheñenesha'. Huapatyerrñañe'terr checa'repaḥno, mancoḥno, aporo'yeteḥno, opananeshachno ñaña huapatoñe't shonte' po'potantañe'ḥno. Ñeñtñapa' alla nanatyesosñañe't pa'rrṭoṭ. Ñañaapa' e'ñe a'crratyesuerranet. ³¹ Allña acheñenesha'pa' ḥa atarr cohuanrrorteñe't allempo eñchet atto opanaḥno ḥa eñora'yerrtsa, mancoḥnopa'cho'ña ḥa cohuenyerrtsa, checa'repaḥnopa'cho'ña ḥa chope'chyerrts, aporo'yeteḥnopa'cho'ña ḥa e'ñe cohuen cohua'yerrts. Atet e'ñe cohuen eñchetpa' allohuenetñapa' cohuentateññañe't israelnesha' Po'yomporer.

Allempo Jesúsṭpa' rratenan shonte' acheñenesha', ñeñtña acheñenesha'pa' allo'tsen pa'tatsoch mil

(Mr. 8.1-10)

³² Allempoña Jesúsṭpa' agotan pueyochresha'pa' atet otapanet:

—Napa' ḥa atarr nemuereña allohuen acheñenesha' ñeñt shontetsa arr. O' ma'pamtoset nesho ama eñallmeñeto ñeñtḥa' rret. Ama pocteye' nenteñe o'ch ahuanerret e'ñe pa'ḥporrñesha' te't ama a'ñshe'mterreto toño.

³³ Pueyochresha'ñapa' atet otoset:

—Errahuachca'ye yentña allpon rreñets ñeñtcha' yerrach shonte' acheñ, arrpa' amayaca'ye.

³⁴ Jesúsñapa' atet oterraneterr:

—Sapa' ¿errpona't sechenña pan?

Ñetñapa' otereterr:

—E'ñeca'ye cançhrra ñaña coñe't cacatollesha'.

³⁵ Allempoñapa' otan acheñenesha':

—Te'pa' sanorrcha'tyes patso.

³⁶ Allñapa' agapan ñeñt cançherr pan ñaña cacatollesha'. Agaphuepa' o' parasyoso'tenanerr Pompor allotñapa' o' shota'tan pan, shetse'tan ñaña cac, apanatyesan pueyochresha'. Ñetñapa' o' epatyeset ñamet allohuen acheñenesha' e'ñe epa'huet. ³⁷ Allempoñapa' o' rrallme'chet allohuenet, e'ñe yetrra'tuahuet. O' e'ñe yetuahuetpa' cha a'pchatyeset ñeñtñapa' a'yapaçheret. Ñeñtña a'yapaçherretpa' chepa'tcha' chorrats cançherr cañter e'ñe tamoyare'. ³⁸ Ñeñt rrallme'chats atarr aton acheñenesha' ñato' allo'tsente' pa'tatsoch mil ñeñt e'ñe yacmaneshoche'. Ellonetñapa' allo'tsa'yen ñaña coyaneshachno ñaña cheshaneshachno. ³⁹ Allempoña Jesúsapa' so'tnerran acheñenesha'pa' ahuer, a'tapos noñtopa' ahuañperr o'ch ahuo' anetso ñeñt pa'so'cheñ Magdala.

16

Atto fariseonesha' ñaña saduceonesha' enamoset Jesús gatapanetepa'to' po'partsoña

(Mr. 8.11-13; Lc. 12.54-56)

¹ Fariseonesha' ñaña saduceonesha' ñetpa' o' ahuanmuet o'ch enteñeta' Jesús. Cha'cha'tet Jesúsesho ñetña puehquënoñetpa' atet otyesoset:

—Yapa' añ yemnen o'ch pegatapuey pepartsoña entot allochñapa' attoch yeñotosep po'ñoç p'apa' Parets Puechemerep.

Ñetpa' cha mueneñet o'ch topatoset Jesús. ² Ñañapa' añ yerpatapanet ñeñt atet otyenet ñet pa'nyeto:

—Sapa' ñerra'm esempo sentnen o'ch tsatatetnena enet, sañapa' chocmach atet sotyeseñe't: “Tsapatpa' atarrcha' char.”

³ Aromtañañapa' ñerra'm esempo senta'muen enet cha tsatatta'muena, sañapa' chocmach atet sotyesa'muene't: “Choch huata'muena ñeñto'mar o' cha rrenarsa'muen.” Sapa' atarr señoteneñña ñeñt sentyen ento ñeñtña señotatene'. Tarraña ñeñt atet norrtatyennas nepartsoteña eso'marte'ña ñeñtñapa' amaña eñotatensoña ñeñt atet pennas Yompor te' o'ch orrtatonas po'cohuenña. Ñeñt'pa' attate' seshquën. ⁴ Acheñenesha' ñeñt corra'yetsa te' ñetñapa' ama cohuenaye' cotape'chyeneto, ama aye' cosheneto Yompor ñeñto'marña ñetpa' e'ñe orrena otennet ahuo'ch norrtatanet nepartsoña. Tarraña amach es norrtataneto. Napa' añach paterr neñotatanet atet eñotatane't Jonás ahuañ nínivo'marnesha'.

Jesúsñapa' sa'nerranetpa' ahuer.

Atto Jesús toma'ntaterraneterr ñeñt po'chaser pen fariseonesha'

(Mr. 8.14-21)

⁵ Allempoña pechatra'tet yomta'n o' chapuet all, pueyochresha'ñapa' o' yerpuerret ñetpa' ama anmueto pan ñeñtcha' rroset all. ⁶ Jesúsñapa' atet otapanet:

—E'ñech señoṭa ñato't semeñe'teña'ña fariseonesha' ama't ñaña saduceonesha' po'chaser allo tsetenet pan.

⁷ Ñetña cōtape'chyestetpa' atet otanna'tyeset:

—Amaca'ye yanmoña pan ñeñto'marte'ca'yeña oteney año'ch yemeñe'tatscheña fariseonesha' po'chaser.

⁸ Jesúsña allempo eñotanet atet cōtape'chyenet ñaña'apa' atet oteraneterr:

—Eso'mare't sellquēñesha' sotanna'tyena año' eñalle ñeñcha' serra'. Sapa' ama'tña e'ñeye' seyemtenno. ⁹ Teme'ttsena'tña ama es sechenoyoña seyo'chro. Ama'tña seyerpuenoña allempo natontat amnar pan ñeñt nerratallme'chpa' allo'tsen amnaroch mil acheñenesha'. Ama't seyerpuenoña ñaña ñeñt allpon chorrarerrets cañtro ñeñt sap'cherr allempo. ¹⁰ Ama't ñaña allempo natontaterrerr ñeñt can'cherr pan ñeñtña nerratallme'cherrerra' allo'tsen pa'tatsoch mil acheñenesha'. Ñaña ñeñt allpon chorrarerrets cañtro ñeñt sap'cherrerr allempo. ¹¹ Errotenoṭuañaca'yeña ama señoṭenoña ñeñt atet notas ñorra' attoch ama semeñe'tatsche fariseonesha' ama't ñaña saduceonesha' po'chaser ñeñtpa' ama rreñtsoye' notenso.

¹² Allempoña ñetpa' o' chapanet pueyo'chreto, atet otanna'tet:

—Amuepa'tca'ye añeye' otenye pan po'chaser; añepa'tca'yeña oteney amach yemeñe'tatsche fariseonesha' ama't ñaña saduceonesha' po'chaser ñeñt atet ye'chatannenet ñeñt ama cohuenayaye, te't mamesha epa'hua erracmañen e'ñe atet pena chase' mameshapa' o'ch a'chasa'huan ora all yeneñ.

Atto Pedropa' otan Jesús, p'apa' p'aña Yompor Puechemerep ñeñtep Cristotosets

(Mr. 8.27-30; Lc. 9.18-21)

¹³ Allempoña chap Jesús all Cesarea ñeñtara Filipino, allña'apa' otosan pueyo'chresha':

—¿Errotena't otyenenña allohuen acheñenesha', na Ñeñten Acheñetosets eseshante'?

¹⁴ Ñetña'apa' atet otyeset:

—Patantarr acheñenesha'pa' atetca'ye otyenpet p'apa' Juanañpo'te' ñeñtepo' apatañtase't Yomporcop. Po'potantañña'apa' atet otyenpet p'apa' Elíaso'po'te'; po'potantañña'apa' atet otyenpet p'apa' Jeremíaso'po'te' amapa' añe'po'te' po'psheññ ñeñt a'mtaye't Yompor po'ñoñ ahuat.

¹⁵ Allempoña'apa' alla a'p'to'terraneterr:

—Saña'apa' ¿errotena'tña sotenenña sa?

¹⁶ Simón Pedroña'apa' eñoratsapa' atet och:

—Papa' ñeñte'pca'ye atarr yecuen ama't ahuatoteñ; ñeñte'pca'ye Parets Puechemerep ñeñte'p Cristotosets. Ñeñtña Parets ama arromñateshayaye.

¹⁷ Jesúsña'apa' atet och:

—Nanac cosheñtso'tsene'p, Simóna ñeñte'p Jonás puechemerep tarro'mar atto peñotenenpa' ñeñtpa' ama arromñateshaye' peñotatenaye; naña Nompor peñotatene' ñeñt pue'ntaño'tsen. ¹⁸ Napa'cho'ña te'pa' o'ch notap' p'aña, p'apa' añcha' nesocherre'p Pedro. (Ñehua, añ so'chñets Pedropa' añ toma'ntena ñeñt atarr es echarr atet ñerra'm mapue'.) Ñaña p'a e'ñe peyemteño'ten na, na po'ño'chpa' naña

Cristotsets, ñeñtapa' allochca'yeña norrtaterrña allohuen ñeñtcha' name'ñerraya ñeñtcha' ap'cha'yerrtsa e'ñe na pame'ñeñofet. Atarrcha' huomenc echarr ne'pa'yerranet allohuenet ñeñtetcha' ap'cha'yerrtsa pame'ñeñofetan na attochña ñocpuetpa' amach eñalle ñeñtcha' huapore'terrahuet, ama't ahuata. Ama't rromueñets po'huamencpa' amach errotetnot metanerranetoña ñet po'huamenc. ¹⁹ Ñaña na te'pa' o'ch napuerre'p llesens attoch pa'poterrñañ Yompor po'cohuenña ñeñt atto ayochreshattena ña pue'ntañot; ñeñtapa' añ toma'ntena atet ñerra'mrrate' llave alloch petoramper allohuen ñeñt muenene' o'ch pueyochresha' perranet. Ñaña ñerra'm erra'tsencha' e'ñe pocte' pent ñeñtcha' pena'yes arr patsropa' Yomporpa'cho'ña ñeñt ento'tsen e'ñech attecma pocte' enterranet. Ñaña ñeñtcha' ama pocteye' penteno ñeñtcha' pena'yes arr patsro, Yomporpa'cho'ña ñeñt ento'tsen e'ñech attecma amach pocteye' enterraneto.

²⁰ Allempoñapa' otan pueyochresha':

—Amach esesha' sota'psa'tatsto ama't puesheñarra napa' na ñeñten Cristotsets.

Atto Jesúsapa' eñotatan pueyochresha' ñapa' amtsaretterrach

(Mr. 8.31–9.1; Lc. 9.22-27)

²¹ Jesúsña e'ñe allempoteña' mo'tetnomi eñotatyesnomue' pueyochresha' ñeñt atet anaret ñocop, ñapa' muero'chtateretcha'; o'ch ahuo' Jerusaléño allña'pa' allcha' muero'chtateret. Añcha' erro'tuanen perre' ñeñt pompornesha' pen allohuen judionesha' ñaña ñeñt pa'm'cha'tare'ternesha' pen allohuen po'cornaneshar ñaña ñeñt atarr etsotayenayeñ ñoñets ñeñt atet anaret judioneshacop. Allña'pa' allcha' muetsatateret tarraña puema'pamtañoña Pomporpa' o'ch alla tantater. ²² Pedroña'pa' allenta anem'i a'yenetpa' allña'pa' atet otos:

—Arepa'chña Partseshacha' atteye' perrpeto ama't errponaña. Yomporapa'chña e'ñe pecuam'pene'.

²³ Ñaña'pa' puetallsa a'yenet mame'pa' atet otan Pedro:

—Orrap a'yo neshot oneñeñe, papa' e'ñe orrena pepatare'tenen; papa' amaca'ye Yomporaye' atet poctape'chatenaye, ñeñtapa' acheñarramche' pocta'pña.

²⁴ Allempoña Jesúsapa' atet otan pueyochresha':

—Ñerra'm esesha' muenene' o'ch coternnet na e'ñe po'ño'ch attoch neyochresha' neperranet, añ poctetsa sehuanmuete'pa'ña ñeñt atet muenenet e'ñe ñocpueta. Attochña ñetpa' o'ch e'ñe toma'nteret ñeñt chechnene' po'corsoch allcha' muero'chtet ñamet. Attochña coternnet e'ñe po'ño'ch. ²⁵ Tarro'mar ñerra'm esesha' e'ñe aña muenenet o'ch correna atomat attoch e'ñe coshenet arr patsro, ñetña'pa' chach a'chencatenet e'ñe ñañeñeta. Tarraña ñerra'm esesha' e'ñe pocte' entene' o'ch es sohuanerret e'ñe pocreñohuenet nocop, ñeñtña' acheñerpa' ñaña'pa' corretsach pocsheñeshocmañen e'ñe tayoteñ errponañohuen. ²⁶ Ama't errponenaparen esocmañen es yeyoratse'tyes ora allpon ñeñt yentyen aña patsro, tarraña ñerra'm ñeñt'ach e'ñe ya'chencaterre' yecamquëñohuen, ñeñtña'pa' ama't coñe'tapa' amach es sherberrre'. Tarro'mar ama eñalle po'poñ ñeñt atarr sherbets, aña atarr nanac sherbets ñeñtcha' a'queshpaterre' yecamquëñ. Tarro'mar yocoppa' ama es eñalle ñeñtcha' yepomuerr alloch alla

yerañterra yecamquëñ. ²⁷ Po'ño'ch napa' Ñeñfen Acheñetosets o'ch nohuerra epan ñaña nerñllaño'eñnaneshar. E'ñech Nomp por po'cohuenñot nohuerra. Allempochña netsa'terranet e'ñe puesheña'ttsocmuet errotente' pa'yese't. ²⁸ Po'ño'chca' te'pa' o'ch notas, patanta'ttsos ñeñfes arro'tsa'yenes ama't ama serromhuena'pa' o' senterrñañ Yompor po'cohuenña atto napa' Ñeñfen Acheñetosetspa' atarrcha' na'yochreshatterra.

17

Allempo Jesús pa' po'poñetañpsana pueyochresha'
(Mr. 9.2-13; Lc. 9.28-36)

¹ Allempo pechapmaterrerr, Jesúsñapa' ahuanerranerr pueyochresha'; añ anem Pedro ñaña Jacobo ñaña Juan ñeññ Jacobo pa'mo'nasheñ. Ñetpa' arr anmanet atarr aspen to e'ñe ñapfochayet. ² Allña Jesús pa' machayotepa'tcha' po'poñetañpsosanet. Pa'cloyotpa' cha'poptosa e'ñe atet ñerra'mrrate' atsrret poptetsa. E'ñe pa'shtamohuen atarr huallama'to poptosa cha' a'puetaresue a'yohuen. ³ Allñapa' machayotepa'tcha' orrtanet Moisés ñaña Elías. Ñetñapa' alla serrpare'toset epuet Jesús. ⁴ Pedroña eñoratsapa' atet otan Jesús:

—Atarruca'ye Partseshacha', cohueno'tseneyte' arr. Ama't pocte' penteñe napa' o'ch natomatonas ma'ppahua quërpachet—puepahuarrpa' p'ocopcha', po'ppahueñpa' Moisésocopcha', po'ppahueñpa' Elíasocopcha'.

⁵ Allempo eñorena Pedropa' cha' orrtosahuet os ñeññ atarr cohuen poptetsa chepa'tcha' a'pomañpsosanet. Cha' e'morrtostsa ñoñets osot; ñeññña ñoñetspa' Yompor otosahuet; ñeññpa' atet ot:

—Añmapa' ñeññ no Nechemer ñeññ atarr nemuerena ñeññña atarr nocshatene', ñeññcha'ña e'ñe cohuen se'mñoterr.

⁶ Allempo atet e'muet ñoñets pueyochresha'ñapa' alla rrema'rrtet patso atarr nanac yoren. ⁷ Jesúsñapa' allenta ponerranetpa' a'p'lla'huerranet, atet otanet:

—Setanterra, amach cha' seyorenatsto.

⁸ Allempoña o' cohuerretpa' arepa'tcha' eseshaye' enterreto, ñapña enteret Jesús.

⁹ Allempo ona'cherret aspen toñ Jesúsñapa' atet otanet:

—Te'pa' amach esesha' sota'psa'tatsto ama't e'ñe puesheñarra ñeññ atet o' sentua. Tarremphuach allempoch netanterra rromot na' Ñeñfen Acheñetosets, allempochña seserrpare'taterña allohuen acheñenesha'.

¹⁰ Pueyochresha'ñapa' atet otnerret:

—¿Eso'mare'tña otenña ñeññ atarr etsotene' ñoñets ñeññ atet anaret, Elías o'ch ñanom huerrtsa?

¹¹ Ñañapa' atet otnerraneterr:

—Elías po'ño'chpa' ñachca'yeña huerrtsa, ñapa' e'ñechca'ye a'cohuentatuer ora allohuen. ¹² Tarraña napa' o'ch notas: Elías pa' o'ca'ye huaphuerrañ arr tarraña amaca'ye eseshaye' cheme'tapueraye ñeññapa' chaña erro'tuanen papueret ñeññ atet muena'yenet ñet. E'ñech attecma perrnet namña Ñeñfen Acheñetosets.

¹³ Allempoñapa' o' çhapanet pueyoçhreto ñeñt' otenanetpa' añepa'tca'ye Juanañ ñeñt' apataye't' acheñenesha' Yomporecop ñeñt'epa'tca'yeña Elíasoterrets.

Atto Jesúsapa' a'crraterran cheshachor ñeñt' otetsa
(Mr. 9.14-29; Lc. 9.37-43)

¹⁴ Cherreterr all shontena acheñenesha' puesheñarrña yacmapa' ponmapuerrana Jesús concorposñaña. ¹⁵ Atet otos:

—Pemueraye'chosnana, Ayochreshate, nacñe'ter çha otena, nanac mueroçhtena. Epaye' coya'n'mame'tateñ tso, errotenopa' o'ch coya'n'mame'tach ñaña oño. ¹⁶ Nanomhue peyochresheshopa' ñetñapa' ama erroteye' peto attoch a'crrateret.

¹⁷ Jesúsñaapa' atet ot:

—Sa ñeñtes acheñres ama't mamesha'pa' ama ayemtenaye' sentpenno; çhach po'poñ sentuena seyoçhro nocop. O' allponmatuanen allo'tsenen arr patsro napa' atta atarr na'huantennas, atta necuenes ñato' attotpa' o'ch same'ñerna.

Allempoñapa' atet otanet:

—Ama'tpa' sanmonca'ye chesha' arr.

¹⁸ Jesúsñaapa' atet otapan oneñeñt' ñeñt' otatene':

—Te'pa' po'ñoçh o'ch notañ, pequeçhpuer cheshachor.

Oneñeññaapa' allent'epa'tcha' queçhpa'ner. Cheshachorñaapa' allorocma correrá.

¹⁹ Allempoñapa' ponerñya pueyochresha', e'ñe ñap'tochayetpa' atet otoset:

—Yañapa' ¿eso'mare'tña ama eshcaye' yequeçhpatereña oneñeñt' atto otatenan cheshachor?

²⁰ Ñañaapa' atet otanet:

—Tarro'marca'ye amaca' e'ñeye' seyemtenno ñeñt' atet notenes. Napa' o'ch notas, ñerra'm po'ñoçh e'ñe na seyemtenañ napa' e'ñeca'ye na'poc'tatenña neñoñ ñeñt' atet notenes. Ama'tcha' allponatollo'ta seyemtenna ñerra'mrrate' mostazllometoll sañapa' ama't erra'tsena senamuennon' ama't ñeñt' atarr echarr sentenpa' nañapa' atet'cha' nepennaseñ. O'ch netma'ntatasa atet ñerra'm o'ch sot: “Añ aspenetpa' rrote'tepa' a'yenet”, aspenetñapa' atet'cha'çho'ña pennasañ ñeñt' e'ñe atet soteñ. Ama't mameshapa' amach eñalleña ñeñt' torrapo' senten ñerra'm e'ñe po'ñoçh na seyemtena. ²¹ Ñehua, ñeñt' atet oneñe'tpa' amach errotenot yequeçhpatacheña acheñ e'ñe atta. Chochña yema'yochena ñaña yema'yochreño't ama't yerrarpa' o'ch yequeçhpue' mame'. Attot'cha'ña yequeçhpatereña oneñeñt' ñeñt' atet.

Jesúsapa' eñotateraneterr puepocheño ñapa' çhocmach muetseret
(Mr. 9.30-32; Lc. 9.43-45)

²² Allempo chopeñe'çhyenet parro all Galileo'mar, Jesúsña allpa' eñotatan pueyochresha', ñeñt'pa' atet otnomanet:

—Na Ñeñten Acheñetosetspa' pomuerrnet'cha' attoçhña errotuanencha' pernet. ²³ Atteñapa' o'ch muetsatater'net tarraña poma'pamtañoñapa' o'ch alla netanterra. Ñetñapa' ñeñña atarr nanac lleca'rrtatyeshahuet.

Atto Jesúsapa' tsa'ta impuesto añecop Parets pa'paclecop

²⁴ Allempoña Jesús epuet pueyochreshačhnopa' o' alla čhačherreterr Capernaumo. Allñapa' huapanet ñeñt̄ tsa'tatenaya acheñenesha' quelle ñeñt̄ impuesto; ñeñt̄pa' Parets pa'paclecop. Ñetpa' atet otoset Pedro:

—Semaestrorpa' ¿ama't pomuenana'ña quelle impuesto añecop Parets pa'paclecop?

²⁵ Pedroñapa' atet otanet:

—Chocmach tsa'ta.

Allempo čhap pocollopa' Pedroñapa' ama otenana'ña Jesús, ñañapa' ñanmacma otapan Pedro:

—¿Errořena't, Simóna, penteñña řa? Ñeñt̄ amıcha'taretečhno ñeñt̄ añe patsro'tsa'yen, ¿eseshatña cobrenetña quelle ñeñt̄ impuestocop, ñato' añate' cobrenet ñeñt̄ e'ñe ñet pamo'tsna'tarecmuet amapa' añte' cobrenet ñeñt̄ ello'marnesha'?

²⁶ Pedroña atet otan Jesús:

—Añca'ye cobrenet ñeñt̄ ello'marnesha'.

Jesúsñapa' atet och:

—Ñeñteřpa' ñeñt̄ e'ñe pamo'tsna'tarecmuetpa' ama'trra ñeñteye' cobreneto. ²⁷ Ama't pocten amach netsa'tatsto řarro'mar napa' ñeñten Puechemeren ñeñt̄ pa'paquell pene' ñeñtecop tsa'tenet, řarraña attoch ama ya'tsrrer'matanetopa' e'ñeca'ye poctet' o'ch netsa'ta. O'ch ahueř oño o'ch pego'tena' all. Erra'tsencha' ñanom pechta' pegoroř ñeñt̄ñapa' o'ch pečhete. Puenamopa' allcha'ca'ye pent puetallarr quelle. Ñeñt̄ña quellepa' o'ch řaner ñeñt̄ñapa' alloch petsa'tanet nocop ama't ñaña řocop.

18

All eñotateney ñeñt̄ acheñer e'ñe po'ñočh atarr asherben enteñ Yompor (Mr. 9.33-37; Lc. 9.46-48)

¹ Allempoña Jesúsapa' a'řto'teña' pueyochresha', ñeñt̄pa' atet ochet:

—Ñeñtey allponey ñeñt̄cha' e'ñe pueyochresha' perr Yompor ñeñt̄ pue'ntañotsen, yapa' añ yemnen te'pa' o'ch řotey, ¿erra'tsenoteyte'ñaca'yeña ñeñtey atarr sherbets ñeñtey atarr amıcha'taretoyen entyenet?

² Jesúsñapa' cheshatolla čhore'tpa' řomach e'ñe allo'tsa'yenet.

³ Allempoñapa' atet otanet:

—Po'ñočh napa' o'ch notas: Ñerra'm ama čho sequečhpa'huerro sommo'cheña attoch o'ch atet sepena cohuen ñerra'mrrate' añ cheshatoll ñeñt̄ ama eñotenana' o'ch ommo'chena, sañapa' amate' errořenoroř es so'paterroña atto atarr ayochreshattena Yompor pue'ntañoroř. ⁴ Ñeñt̄ allpon ñeñt̄cha' e'ñe pueyochresha' perr Yompor ñeñt̄ña acheñer atto o'huañ cohuen enta ñañeña ñeñt̄pa' o' e'ñe atet perra ñerra'm cheshatoll ñeñt̄ ama eñotenana' pommo'cheña. Ñeñt̄ñapa' atarr nanac asherben enteñ Yompor. ⁵ Erra'tsenotes sa ñerra'm e'ñe same'ñeñoten na e'ñe cohuen saguēñ ama't ñeñt̄ ama asherbenaye' entyenet atet ñerra'm añ cheshatoll, na'ñaña e'ñe cohuen saguēñ.

Atto čhocmach huaponaya ñeñt̄cha' yetpatyene' o'ch atet řatyesey ñeñt̄ ama pocteye' enteno Yompor (Mr. 9.42-48; Lc. 17.1-2)

6 'Ama't erra'tsena ñeñt ama pommo'cheñoŕeye' ame'ñenno atet ñerra'm chesha'toll ñeñt ama eñotenana' o'ch ommo'chena, tarraña ñerra'm esesha'ña po'psheñeñ o'ch atet patach ñeñt ama pocteye' enteno Yompor, ñeñtña acheñerpa' atarrcha' yoro'cheno'tsen tarro'mar ñapa' aña o'patenaya coñcheñets ñeñt atarr huomenc. Ama't ñocoppa' ama tama yoro'chenayayñe ñerra'm ama atet patenana' po'psheñeñ, e'ñech allorocma o'ch çharachetañ mapue' añecmuen pa'çhno'po allpon ñerra'm puetse'tamets o'ch huapore'chet oño epo allcha' ño'shach mapue'. 7 Atarr llequëñets acheñeneshacop arr patsro ñerra'm esempo esesha'pa' o'ch atet ptyenanet ñeñt ama pocteye' enteno Yompor. Tarro'mar çhocmach huaponaya ñeñtcha' yetpatyene' o'ch atet ptey ñeñt ama pocteye' enteno Yompor. Tarraña napa' o'ch notas, atarrcha' yoro'cheno'tsen ama't erra'tsena acheñer ñeñt orrtatene' ñeñtcha' topatyene' po'psheñeñ ñeñt name'ñenaya o'ch atet ptyenanet ñamet ñeñt ama't mameshapa' ama pocteye' enteno Yompor.

8-9 'Ñaña o'ch noterrser: Ñerra'm sechets ptyenes ñeñt ama pocteye' enteno Yompor atet ñerra'm sot, setac, seclle', añ poctetsa o'ch sequethpuerr ñeñt çhocma atet pats'e'tatyenes sechets. Ñeñt'pa' e'ñe atet ñerra'mrrate' e'ñe allorocma o' sepecherr sot, setac, o' serrotterr seclle', o'ch sehuapore'ter. Añ cohuen socop ama't e'ñe sepo'yota'teño' corretsasach tayoteñ errponohuañen. Añña ama cohuenayaye socop esempohuañenpa' e'ñech ora epo'mar sotpa' o'ch huapore'terrset coñcha'puetso all parraren tso' ñeñt ama ahuañaño ama't errponaña. Ñaña añ cohuen socop ama't e'ñe setcotpa' sepsheñtatquëño' corretsasach tayoteñ errponohuañen. Añña ama cohuenayaye socop esempohuañenpa' e'ñech ora epo'mar setacpa' o'ch huapore'terrset coñcha'puetso all parraren tso' ñeñt ama ahuañaño ama't errponaña. Ñaña añ cohuen socop ama't seclloyot sepsheñtaclo'yeño' corretsasach tayoteñ errponohuañen. Añña ama cohuenayaye socop esempohuañenpa' e'ñech ora epo'mar seclle'pa' o'ch huapore'terrset coñcha'puetso all parraren tso'.

Acheñ ñeñt ama ame'ñetsopa' arrpa' all atma'ntatarettet atet ñerra'm carrnero ñeñt chenquëtsa
(Lc. 15.3-7)

¹⁰ Jesús'pa' alla o'terranerr pueyochresha':

—E'ñech señota, añepa'chña atarr asherben senten ñeñt ama ommo'chetso ñeñt atet petsa ñerra'm chesha'toll ñeñtñapa' e'ñech pueñmañesha' yemtena. Tarro'marña te'pa' o'ch notas, ñeñt ama pommo'cheñoŕeye' name'ñenayo ñocpuetpa' eñalletca'yeña po'millañoŕeñer ñeñtcha' cohuanpenahuet. Ñeñtña po'millañoŕeñetpa' çhocma Yomporesho'tsenet allña e'ñe cohuen e'mñotenanetña Yompor pue'ntaño. ¹¹ Po'ñoç na Ñeñfen Acheñetosets añecopña nohuapa attoch na'queshpatyesos acheñenesha' ñeñt chenquëtsa.

¹² Ñehua, ¿ama't atet senteñeña? Ama't erra'tsen acheñer ñeñt echene' shonte' po'carrneror, çharroch çharra' echen tarraña ñerra'm puemocarrña machayota a'chencachpa' pamo'mte'ñapa' o'ch sa'nman allohuen po'potantañ ñeñt o' noventa nuebarña all aspento o'ch ahuo' e'nerraya'puemocarr ñeñt chenquëtsa. Allcha' e' name'tyera'pa' attotach enter. ¹³ Ñerra'm ña o'ch enterpa' ñeñtcha'ña atarr coshaterre'. Elloch

metanan atto coshenana po'potantañ noventa nueve po'carrneror ñeñt ama paya'tetso. ¹⁴ Atetca'ye penaña ñaña Sompör ñeñt pue'ntañ'tsen; ñapa'cho'ña amaca' mueno o'ch chenca ama't puesheñarro'tolla acheñ.

Attoch e'ñe cohuen yamo'tstera yemo'nasheñ

(Lc. 17.3)

¹⁵ Jesúsñapa' alla oterraneterr; ñeñt'pa' atet otanet:

—Ñerra'm erroten p'onas semo'nasheñpa' o'ch ahues ñesho e'ñech sapuet o'ch soctape'chatera' e'ñe cohuen. Ñerra'm cho e'mñoterespa' allempoñapa' o'ch amo'tso't senterra. ¹⁶ Ñerra'm soctape'chatueña' amach e'mñotasopa' se'ñ puesheñarr amapa' epsheña ñeñt'cha' sa'poc'atatapreterre'. Atet'cha' se'pa allochñapa' ñeñt'cha' e'ñosets epsheña amapa' ma'psheño'marescha' e'ñosets allempopa' e'ñech po'ño'ch same'ña ñeñt'ñoñets tarro'mar e'ñech attecma otenet. ¹⁷ Ñerra'mña atet'ña o' se'pohuerña' amach e'mñoteresopa' allempoñapa' o'ch soch allohuenet ñeñt' cho'ma ap'chetsa pame'ñeño't Yompör. Cotape'chateretepa' ñamet. Ñerra'm o'ch cotape'chatuet allohuenet'ña, ama't ñet'ña amach e'mñoterranetopa' sañapa' e'ñech atta senter ñerra'm po'poñ acheñer ñeñt' ama semo'nasheñeyaye. E'ñech atet senteñ ñeñt' acheñer ñeñt' ama ame'ñetso, atet ñerra'mrrate' ñeñt' pue'shqueño'te'na cobra'yene' acheñenesha' quelle ñeñt' gobiernocop.

¹⁸ Ñehua, te' po'ño'chpa' o'ch alla noterr'serr: Ñerra'm errot'encha' e'ñe pocte' sent ñeñt'cha' sena'y'es arr patsro, Yompörpa'cho'ña ñeñt' ento'tsen e'ñech attecma e'ñech pocte' enterranet. Ñaña ñeñt'cha' ama pocteye' senteno ñeñt'cha' sena'y'es arr patsro, Yompörpa'cho'ña ñeñt' ento'tsen e'ñech attecma amach pocteye' enterraneto.

¹⁹ Ñaña o'ch alla noterr'serr: Po'ño'ch ñerra'm epsheñas arr patsro o'ch e'ñe sa'poc'atue epsheño'mares ñeñt'cha' senamuennan Nompör ñeñt' pue'ntañ'tsen ñapa' ama't erra'tsena senamueñ cho'mach e'ñe atet pennas. ²⁰ Tarro'mar ñerra'm erro'tsen ama't e'ñe epsheña amapa' ma'psheña ñeñt' ap'chetsa e'ñe pame'ñeño'tetan na, ñaña allpa' allo'tsenencha' e'ñe ñesheto.

²¹ Allempoña Pedropa' a'p'to'tenana' Jesús, ñeñt'pa' atet otos:

—Parteshacha', ñerra'm cho'ma epaye' erro't penen namo'ts, ta'm çerponoche'tcha'ña nepretne' ñato' e'ñech cançhrocha nepretne'?

²² Jesúsñapa' atet och:

—Napa' ama notenpe e'ñech cançhrocha pepretne', añña notenep atonochcha' pepretne'—ama't cançhrochcha' çarra', ñaña po'poñ cançherr, allponochcha' se'p'etne'ña samo'ts.

Atto Jesús'pa' e'notatanet ñerra'm amach e'ñe cohuen yep'retnannenopa' Yompörpa'cho'ña amach peretnerrye yamã

²³ Jesús'pa' atet oterraneterr:

—Ñeño'marña Yompör po'cohuenña ñeñt' atto ayochreshattena ña pue'ntañ'o't ñeñt'pa' atet ñerra'mrrate' puesheñarr añcha'taret. Ñeñt'ñapa' añcha' muenen o'ch a'poc'atayesan atto te'ba'y'eñ allohuen pa'taruasaf'rechno. ²⁴ Allempoña all e'ñe a'poc'atayesanetpa' allñapa' huapatoñet puesheñarr pa'cheñer ñeñt' tebene' patoner quelle ñeñt' allpon tebenpa' ñeñt' oteñet shonte' millones. ²⁵ Ñaña'pa' ama echenano allpon quelle alloch tsa'terra ñeñt' allpon teben.

Po'patronarñapa' atet otanet: "Te'pa' o'ch sepomuer epuet pue'tapor epuet ña'na puechemerasha' ña'na o'ch sepomhuerrñañ errponte' echyen allochñapa' ama't allapa' o'ch tsa'terrna atto tebenen." ²⁶ Allempoñapa' allenta concorpana'cha pa'taruasañer ñeñt' tebene', ñeñt'pa' atet otare'ch: "Amach nomporcha' pema'yore'tatsetno, netsa'tuerrpach aco'pa." ²⁷ Po'patronarñapa' alla morrentera allenta a'rroyer allempocma e'sshohuerrñañ all quellquëññañet ñeñt' allpon teben. ²⁸ Ñeñña pa'taruasañerpa' o' cha'nerr entuerran po'psheñeñ ñeñt' parro ataruasatarettenet ñeñt' tebene' ña'na, ñeñt'pa' e'ñe coñe'ta quelle. Ña'napa' cha'rrema'huerre'pa' allenta mueño'che' atet otuer: "Peta'terrnañaca'ye ñeñt' allpon petebenen." ²⁹ A'rroyerpa' ña'napa' allenta concorpana'tana ña'na ñeñt' o' mueño'cho'tue. Allñapa' atet och: "Amach pema'yore'tatsetno, netsa'terrpach aco'pa allpon ñeñt' netebene'p." ³⁰ Ña'napa' ama't mameshapa' ama pocteye' eñche, ñeñt'apa' anem' allcha' yottam'psach. Allñapa' allach esempohuach e'ñe tsa'tuerra ñeñt' allpon teben. ³¹ Añña po'potantañe'chnoña ñeñt' parro ataruasatarettenetpa' ñetñapa' ama't mameshapa' ama pocteye' eñcheto ñeñt' atet pa' ñeñt' e'ñe atta e'sshohuarettertsa ñeñt' allpon tebane't po'patronar. Allempoña ñetpa' allenta ahuanmuet po'patronaresho. Allñapa' a'metan'peret. ³² Allempoñapa' o' alla agotater po'patronar. O' cherr po'patronareshopa' atet otapuer: "Pa' na'taruasañre, ama't mamesha ama cohueneshayape. Pa'napa' atta potare'ten napa' ahuo'ch ne'pretnerre'p ña'napa' e'ñe atta ne'sshohuerrna'p ñeñt' allpon petebenen. ³³ Ama't e'ñe poctey' papa'cho'ña o'ch pemueryañ ñeñt' parro petaruasen. Atet nepena na e'ñe cohuen nemuererr'pa." ³⁴ Allempoña po'patronarpa' e'ñe patsrre'mueñesha' pomuer, o' apuer ñeñt'cha' coñchate' esempohuañen allcha'ña e'ñe tsa'tuerrna ñeñt' allpon teben. ³⁵ 'Sapa'cho'ña e'ñe puesheña'ttsosña ñerra'm amach se'pretnerre samo'tspa' e'ñech attecma perres saña Nomp'or ñeñt' pue'ntaño'tsen. Chocmuepa'ch e'ñe cohuen se'pretnannenaña sa e'ñe seyochrocmañen.

19

Atto Jesús'pa' ye'chatosanet ama asanna'tpahuoyaye
(Mr. 10.1-12; Lc. 16.18)

¹ Serrpare'tuanerr Jesús'pa' err Galileot. Arr cherr Judeo, ñeñña Judeapa' e'ñe alla Jordanaso yom'ta'n. ² Cota'huanererr shonte' acheñenesha' allñapa' a'crratyesuerraneterr allohuenet patsnañeferet.

³ Allñapa' o' alla hua'cherrñañerr ña'na fariseonesha'. Ñetpa' añ muenenet e'ñe pueshquëño'tetpa' o'ch eñorachet ñeñt' ama cohuenayaye. Attoña ñetpa' atet otoset:

—Ta'm ¿poctey' te' o'ch yeser yetapor ñerra'm esempo erro'tenet?

⁴ Jesús'pa' atet otapanet:

—Ama't selleyareña atet oten Yompor po'ñoñ ñeñt' aquellcare't ahuatoteñ. Ñehua, allpa' atet oten, Yomporpa' e'ñe ahuatoten allempoteñ es ye'chcatyes allempo ye'chcatan ña'na asheñorr, ye'chcatan ña'na peno. ⁵ Allempo Yomporpa' atet ot: "Ñeñto'marña yacmapa' ñerra'm esempoch sena'ta, coyanesha'pa' o'ch echan puerrollar, añ poctey' o'huañcha' tama yemteñet pamo'mte' allochñapa' yacmapa' attochña e'ñe parrocmat epuet pue'tapor. Attoña epsheño'maretpa' e'ñech patrra

po'chets penet." ⁶ Atto tcha'ña o'huañcha' puesheña'tetstet, allochñapa' o'ch e'ñe puesheñarratet. Ñeñt' atto Parets e'ñe pa'rtratatan yacma epuet puetapor amach čha ellopa' alla sannerreto.

⁷ Ñetñapa' atet otereterr:

—Ñerra'm po'ñočh atetpa' česo'mare'tña nanña Moisés ñoñets all oteney o'ch yař yetapor papell aquellcaret attoch yesannerra, allempoñapa' e'ñech pocte' o'ch yeser?

⁸ Ñaña'apa' atet otarraneterr:

—Sapa' ama es sečhenoyo seyočhro ñeñto'marca'yeña Moisés'pa' muenatas o'ch sese' setapor. Ama't atet muenataseñpa' tarraña Yompor e'ñe ahuatoteñpa' amaca'yeña atteye' oteno. ⁹ Na te'pa' o'ch notas: Ñerra'm esesha' serre' puetapor, puetaporñapa' ñerra'm ama čho aguēnana po'psheñeñ yacma, ñeñt' e'ñe atta serre' puetapor, ñaña'apa' čhach ochña'tam'perrana puetaporeshe'mañ ñerra'm o'ch alla yorerranerr po'poñ coyanesha'. Ñeñt'pa' ama pocteye' enteñe Yompor. Ñaña ñeñt'cha' yorerre' coyanesha' asareť, ñeñt'ña yacmarpa' čhach chetapreten taporets. Ñeñt'pa'čho'ña ama pocteye' enteñe Yompor.

¹⁰ Pueyochresha'ñapa' atet ochet:

—Ñerra'm amate' asapahuo yetapor ama't ahuatapa' amate' tama pocteyayeña yocop o'ch yeyore coyanesha' ñeñt'cha' yetapor yeřa'.

¹¹ Ñaña'apa' atet otanet:

—Tarraña atetpa'čho'ña e'ñeca'ye poctet' tarraña ama allohuenacmaye' čhennasoña seyočhro atet tarro'mar ama allohuenacmaye' seyčhenona atet. Ñeñt'pa' aña eñotene' ñeñt' atet cotape'chaten Yompor. ¹² Ñehua, atet ñerra'm puesheña'tets yacma ñeñt' atta eñalletenet e'ñech atta yečquēnet po'chets amach mueneñeto coyanesha'. Ellonetpa' eñall ñaña po'potantañ yacmanesha', ñetñapa' čhoch acaparettenet ñeñto'marña amach mueneñeto coyanesha'. Ellonetpa'čho'ña eñall ñaña po'potantañ yacmanesha', ñetñapa' añecpach ama mueneñeto coyanesha' esheccha' e'ñech aña ma'yočhrenet Yomporecop attoch atarr ayochreshattena ña pue'ntañot. Ñeñt' atet cotape'chenet Yomporecop ñeñt'pa' e'ñe pocte'. Attepa'chña pet ñerra'm Yompor cotape'chatenahuet atet.

*Atto Jesús'pa' bensare'tam'psapan cheshanesha' ñeñt' huapatoñet
(Mr. 10.13-16; Lc. 18.15-17)*

¹³ Allempoñapa' huačha'tachet ñaña shonte' cheshatollesha' Jesúsesho. Ñetpa' añecopña huačha'tachet o'ch a'plla'yesapanet Jesús attoch bensare'tam'psapanet. Jesúsña pueyochresha' allempo entapan ñeñt' huačha'tate' cheshanesha'čno ñetñapa' ama pocteye' eñchet o'ch anmoset cheshatollesha' Jesúsesho ñeñto'marña ama amnataretapueto. ¹⁴ Tarraña Jesús'ñapa' atet otanet:

—Pocte'ñacho' semnachñaca'yeña cheshanesha' onosetepa' e'ñe nesho. Amachca'ye čha sepatare'tatstapaneto tarro'mar allohuen ñeñt' atarr neyemtenaya na e'ñe atet ñerra'mrate' cheshatoll, ñetcha' o'patenetña Yompor po'cohuenña ñeñt' atto ayochreshattena ña pue'ntañot.

¹⁵ Allempoña Jesús'pa' a'plla'yesapan cheshanesha' allohuenet e'ñe puesheña'tset. Allempoñapa' ahuer allot.

Atto puesheñarr ñeñt huepueshameñ ñeñt atarr eçllayoret ñañaapa' eñorana'tosana Jesús

(Mr. 10.17-31; Lc. 18.18-30)

¹⁶ Allempoñapa' huapa puesheñarr yacma Jesúsesho, ñeñtpa' ora huepueshameñ. Ñañaapa' atet otos:

—Maestro, p̄apa' atarr cohuen acheñreḗ, te'pa' o'ch p̄otapuen çerrofena'tcha'ña nepaña na e'ñe cohuen attochña napa' corretsanach e'ñe tayoteñ ama't errponañohuen?

¹⁷ Jesúsñapa' atet otaḗ:

—Eso'mare't p̄otenenña napa' atarro' cohuen acheñren. Arr aromñatenesha' ama't e'ñe puesheñarrapa' ama eñalleña ñeñt e'ñe cohuen acheñer. Ñaptaña Yompor ñeñt e'ñe po'ño'ch cohuen. Ñerra'm añte' pemnen attoch p̄apa' corretsaḗpach e'ñe tayoteñ ama't errponañohuen añ poctetsa p̄ocop o'ch e'ñe pepohuoñ ñeñt atet oten Yompor.

¹⁸ Huepuesha'ñapa' alla a'ḗto'tererr:

—¿Erra'tsente'ña ñoñets ñeñtcha' atet nepohua?

Jesúsñapa' atet otererr:

—Ñeñtpa' añca'ye, amach pemtsatsto acheñ, amach pechtapretatsto taporets, amach petyesatsto, amach petoma'tañḗpsatsche p̄amo'ts e'ñe atfa. ¹⁹ Ñaña e'ñe pemorrenteñoḗpa' pencha'na'chcha' p̄ompor ñaña p̄achor. Ñaña añcha' atarr cohuen pemorrenta p̄amo'ts e'ñe atet atarr pemorrentena e'ñe p̄añeña.

²⁰ Huepuesha'ñapa' alla oterranerr Jesús:

—E'ñe cheshoteñ ora añechnopa' napa' e'ñeca'ye netsotueñ. Ta'm çerra'tsenmeñte'ña ñeñt nepalltena?

²¹ Jesúsñapa' atet otererr:

—Ñerra'm añ pemnen o'ch e'ñe petsotua ñeñt pepalltenmeñ te'pa' añcha'ña atet peperra, o'ch ahuerreḗpa' o'ch pepomhuerr ora allpon ñeñt pechyen o'ch p̄apa'yera' huocchañneshachno ñeñt atarr es pallta'yetsa, attochña p̄apa' pecherrcha' ñeñt atarr nanac sherbets Yompor pue'ntaño. Allempochña pehuerrapa' o'ch p̄oçterren attoch e'ñe neyochresha' neperreḗ e'ñe poctacma.

²² O'ña e'mhuan huepuesha' ñeñt atet och Jesúsapa' ñañaapa' puelquēñesha' ahuer tarro'mar ñapa' shonte' esocmañen echyen.

²³ Jesúsñapa' atet otan pueyochresha':

—Po'ño'ch napa' o'ch notas: Ñeñt atarr eçllayoreḗpa' atarrca'ye nanac echarr attoch agapoñet Yompor po'cohuenña ñeñt atto ayochreshattena ña pue'ntañoḗ. ²⁴ Ñeñtpa' atetcha' netma'ntacha. Yapa' yeñoteñ berr añecmuen allpon ñerra'm huaquēsh* atarrca'ye torrapo' o'ch esho'tosa añeñollponatollo atet ñerra'mrrate' acosh puetatollo. Ñeñtpa' atetca'ye penaña acheñ ñeñt eçllayoret ello atarr torrapo' o'ch agapan ñaña Yompor po'cohuenña ñeñt atto ayochreshattena ña (tarro'mar ñetpa' ama mueneñeto o'ch sehuanmuet ñeñt atarr morrentenet ñet attoch pueyochresha' perranetañ Yompor).

²⁵ Pueyochresha'ña allempo e'met Jesús atet oten, ñetñapa' çha muene' lleca'rrtetpa' atet otanna'tyenet:

* **19:24** Ñehua, Jesús añ toma'ntatanet camello ñeñt payara penet all pa'nyo, ñeñt e'ñe allpon ñerra'mrrate' huaquēsh.

—Tarraña ñerra'm atette'pa' amate' esesha' a'queshpataretterrtso ama't puesheñarra tarro'mar yapa' yeñoteñca'ye huaquëshpa' amaca' esho'tenoña acshequeto.

²⁶ Allempoña Jesús'pa' atfa cohua'yesanetpa' atet oterraneterr:

—Sa arromñañeshaspa' amach es errotenaye' apen senteno. Tarraña Yomporpa' ama eñalle ñocop ñeñt atarr torrapo' enten.

²⁷ Allempoña Pedropa' atet och:

—Partseshacha', po'ño'ch yapa' o' e'ñe yesuanom ora allohuen attoch e'ñe yocterreḡ. Yapa' ¿eso'tcha'ña apuerreyña Yompor?

²⁸ Jesús'pa' atet otanet:

—Po'ño'ch notenes, allempoch etserrater pats allempoch nanorruerr neconaño allcha' necohuenetuerra nepartsoteñot na Ñeñten Acheñetosets sapa'cho'ña allcha' sanorryesurr seconañe'chno e'ñe puesheña'ttsos çharra' puechena epa seconañ ñeñtes noctene'. Sa ñeñtes noctene' allcha' sanorryesos allotcha'ña sa'mcha'taretterraña añecop ñeñt çharra' puechena epa Israel po'nñrenñenesha'.

²⁹ Jesús'pa' alla oterraneterr:

—Allohuen erra'tsencha' acheñer ñeñtcha' e'ñe sehuanmue' allohuen ama't pa'pacllohuen, ama't pa'mo'nasheñnesha' ñato' poçhanesha' ñato' pompor, pachor ñato' po'patseñ, attochña na e'ñech cohuen sherberrnet, ama't erra'tsencha' ñeñtcha' sehuanmue' allohuen, elloña ñetpa' o'ch alla aguërret shonte' esocmañen ñeñt atarr cohuen. Ama't allponapa'tets sehuanomyesnomuet, elloña çharrochcha' çharra' alla agapyerret. Elloña tsapa'netpa' o'ch aguërret ñeñt alloch ñetpa' corretsetach beñecpuen pocsheñeshocmañen. ³⁰ Te'pa' señoche'pa'ch, eñall shonte' acheñ ñeñt ama esoye' senteno sa te' tarraña ñetña allempopa' atarrcha' asherben enteranet Yompor. Ñaña eñall shonte' acheñ ñeñt atarr asherben sentyen sa te', tarraña ñetña allempopa' amach asherbenaye' enterraneto Yompor.

20

Atto Jesús'pa' toma'ntaterraneterr e'ñech allponeshacma atsa'taretta allohuen ataruasa'ñe'chno pamtarr yet

¹ Yompor po'cohuenña ñeñt atto ayochreshattena ña pue'ntañot, ñeñt'pa' añ toma'ntena ñeñt atet pena puesheñarr ane'tañ. Ñaña'pa' ahuatecma ahua'muen e'nyenaya' acheñ ñeñtcha' taruasat pa'mro o'ch toteññañeta' puenarem. ² Ñeñt allpon entospa' atet otosanet: “Ama't semno o'ch setaruasena' na'mro. Pamta'tetspa' netsa'tasach allpon quelle ñeñt paterr denario.”* Ñetña'pa' e'ñe pocte' eñchet allenta mueñanet pa'mro, allcha' totoset narmetsmo. ³ O'ña enome'ta'muenpa' o' alla ahuererrr allecma shontena acheñenesha' ñeñt e'nyene' taruas. Allña'pa' entuerranerr tama allponsheña, ñetpa' ama es otteneto. ⁴ Ñaña'pa' atet otosanet: “Sapa'cho'ña ñerra'm semne'pa' o'ch setaruasa' na'mro; napa' netsa'tasach allpon ñeñt poctetsa.” Ñetpa'cho'ña allenta ahuanmuet pa'mro allcha' totoset ñamet narmetsmo. ⁵ Allempo çhap poctopa' alla ahuererrr ane'tañ, alla entuerranerr po'potantañ acheñ. Ñetpa'cho'ña attecma otuerraneterr ñeñt atet otan ñorra' po'potantañ. Ñetpa'cho'ña allenta mueñerraneterr pa'mro allcha'

* **20:2** Denariopa' quelle ñeñt allpon tsa'tenet pamtarr ñeñt taruaset all pa'nyo.

totoset ñamet narmets. O'ña ellerrenmochpa' o' alla ahuererr; allñapa' entuerranerr po'potantañ acheñ. Ñetpa'cho'ña e'ñe attecma otuerraneterr ñeñt atet otan ñorra' po'potantañ. Ñetpa'cho'ña allenta mueñerraneterr pa'mro. ⁶ Atteña o' ellerrenpa' o' alla ahuererr; allñapa' entuerranerr po'potantañ acheñ, ñetpa'cho'ña ama es otteneto. Ñetpa'cho'ña atet otuerraneterr: “Sapa' ¿eso'mare'tña atta sellapene't tomcha'tyesetsña arrma? Amaña es sotteno.” ⁷ Ñetñapa' atet ochet: “Yapa' amaca'yeña eseshaye' yetaruasatenaye ñeñto'marca'ye ama es yotteno.” Ñañapa' atet otanet: “Ñehua, sapa'cho'ña o'ch ahues na'mro, ama't mameshapa' setaruasa'nen. Napa' netsa'tasach allpon ñeñt poctetsa.” ⁸ O'ña puenaso'tenpa' ane'taññapa' otosan ñeñt cohuanpene' allohuen pa'taruasañer: “Te'pa' o'ch pechore'ter ataruasañnesha', o'ch petsa'tyesapuerranet e'ñe puesheña'ttsocmuet. Añcha' ñanom petsa'tapuerra ñeñt taruasosets chenta' alloteñach ñamotech tsa'tyesapuerrahuet attotach petsa'tuanet ora allohuenet ama't ñeñt aromtañohuen.” ⁹ Ñeñtña taruasosets ellerronet ñetñapa' o' huacherret. E'ñe allponeshacma atsa'tare'teyesapuerret ñeñt paterr denario. ¹⁰ Atteña allempo o' huacherra ñaña ñeñt taruasosets ahuatecma, ñetñapa' cha otenapuetañ ñato' atoncha' atsa'tare'ttapuerret. Tarraña ñetpa'cho'ña e'ñe puesheña'ttsocmuetpa' e'ñe allponeshacma atsa'tare'ttapuerret ñeñt paterr denario. ¹¹ Allempo agapetpa' ñetñapa' cha po'poñ entet, cha e'moñe'tueret ane'tañ. ¹² Ñeñto'marña atet ochet: “Añenesha' ñeñt huapatsa chenta'pa' ñetñapa' mamesha taruasoset. E'ñe allponeshacma petsa'tapuerranet ñeñt e'ñe allpon petsa'tapuerrya yaña. Ama't yapa' o' yellapen ya'ñetse' yetaruas, nanac etay atsret all yetaruasen. Eso'mare'tña e'ñe allponeshacma petsa'tapuerrya ñeñt allpon petsa'tapuera ñaña ñeñt taruasosets mame'.” ¹³ Allempo atet otuer ataruasañ, ane'taññapa' atet och: “Ama, masheñcha', choye' neshquēpe, e'ñe allpona netsa'tenpa' ñeñt allpon ya'poctata'muen aromtaña. ¹⁴ Te'pa' ñanerr peçllayor, orrerreñ. Napa' e'ñe pocte' nenteñ na allponcha' netsa'cha ñeñt huapatsa chenta' allpon netsa'tasa saña. ¹⁵ Sapa' ama't pocteye' senteñe allpon ñeñt e'ñe nocma napa' e'ñech atet nepe' ñeñt atet nemnen na. Ñato' tarro'marte' cha muene' se'moñe'tenenña' napa' atarrca'ye amuerañan.” ¹⁶ Ñeñto'mar te'pa' o'ch noterrser: Ñeñt ama esoye' senteno sa te' tarraña ñetña allempopa' atarrcha' asherben enterranet Yompor. Ñeñtña atarr asherben sentyen te', ñetña allempopa' amach tama asherbenaye' enterraneto Yompor. Ñeñto'mar te'pa' o'ch alla noterrser: Ama't shonteñña ñaña ñeñt ahua'ñare't ñeñtcha' neyochresha' neperreñ, tarraña ñetpa' e'ñe puesheña'ttseta ñeñtcha' e'ñe pocte' nenterr na ñeñtcha'ña e'ñe neyochresha' neperr poctacma.

Allempo Jesús'pa' alla eñotaterraneterr ñapa' chocmach amtsaretterra (Mr. 10.32-34; Lc. 18.31-34)

¹⁷ Jesús'pa' ahueney Jerusaléñone't pueyochreshohuen. O' ahuanenan pueyochresha' a'yenteye' allñapa' atet otnenanet:

¹⁸ —Te' po'ñoçh o' ahueney Jerusaléño, allcha' pomataternet na Ñeñten Acheñetosets. Añcha' nerrmaterre' ñeñt pa'micha'tare'ternesha' pen allohuen judionesha' po'cornaneshar ñaña ñeñt atarr

etsotayenayeñ ñoñets ñeñt atet anaret. Ñetñapa' atetcha' oyesnet na'mtsaretterrepa'to', ¹⁹ o'ch pomuerrnet po'poñ acheñesho ñeñt ama judioneshayaye. Ñetña pueche'tatseteño'tetanpa' allcha'ña achmãare'terrnet, ashterrnetcha', attotcha'ña o'ch corso'tampernet, tarraña poma'pamtaño'ch alla netanterra.

Ñeñt pachor pen Jacobo ñaña Juan, ñaña'apa' enamuenan Jesús attoch anorrcha'tyesuerr puechoyoresha' Jesúsesho

(Mr. 10.35-45)

²⁰ Allempoñapa' ponmosya ñeñt pachor pen Jacobo ñaña Juan ñeñt Zebedeo puechemereshá'. Huapa epuet epsheño'mar puechoyor, ñaña'apa' concorpana'tosana Jesús attoch es enamos. ²¹ Jesúsñapa' atet otaþ:

—¿Eso'tña pemnen?

Ñapa' atet otos:

—Napa' añ nemnen te'pa' o'ch pemnatapon añ nechoyor epsheño'mar o'ch anorruerret pesho allcha' pa'mcha'taretterra e'ñe pecohuenño. Puesheñarrpa' anorrosepa'ch pecohuenrot, po'psheñeñña'pa' anorrosepa'ch pe'chcoterot, allcha' cohuentapreterrpet.

²² Jesúsñapa' atet otanet:

—Sapa' amaca'ye seño'teñe ñeñt po'ño'ch senamuenen. Añca'yeña senamuenen attoch semueroçhtapreterrna samã. Ta'm ¿e'ñe'te' po'ño'ch pocte' senteñ o'ch semueroçhterra samã tarro'mar napa' çhocmach na'mueroçhtataretterra?

Ñeñt mueroçhteñetspa' Jesús'pa' atet toma'ntatanet ñerra'mrrate' atarr pesherr es yorren orranitso ñaña atto yapatarettena e'ñe atet ñerra'mrrate' çho ya'mtsaretterra Yomporecop. Ñetñapa' atet ochet:

—Yapa'çho'ña atetcha'ca'ye yepe'.

²³ Ñaña'apa' alla oterraneterr:

—Ñehua, po'ño'chpa' sa'mueroçhtataretterrach samã attescha' ñerra'm na, sa'mtsaretterrach samã. Tarraña añña attoch sanorryesos nesho necohuenrot ñaña ne'chcoterot allcha' secohuentapreterrna ñeñt'pa' amachca'ye naye' semnaterraye. Añcha'ña anorryesuerrets all ñeñt e'ñe o'patatenna Nompor.

²⁴ Añña po'potantañ pueyochresha' ñeñt çharrasheña allempo e'met ñeñt atet enamuen Jacobo epuet pa'mo'nasheñ Juan, ñetñapa' ama pocteye' eñcheto çha muene' e'moñe'chet. ²⁵ Allempoña Jesús'pa' alla çhore'terranet allohuen e'ñe ñesho ñeñt'pa' atet otanet:

—Sapa' seño'teñe' ñeñt atet pena po'poñ acheñenesha' ñeñt ama judioneshayaye. Ñet ñeñt pa'mcha'tareter penet e'ñech pa'mcha'noçhteño'cmañen pomnaren pa'yenan allohuen pueyochresha'çhno. ²⁶ Sapa' arepa'chña atteye' seþanna'tatsto e'ñe sommo'cheño't. Socoppa' añña poctetsa o'ch atet sepena. Ñerra'm erra'tsenotes ñeñtes atarr añcha'taretoyen entetsañ ñeñtes acheñres socoppa' añ poctetsa o'ch atet senterra ñerra'm ama esoshe'mayayso ñeñt atet pena ñeñt atta atarr taruasetsets po'potantañecop. ²⁷ Ñaña ñerra'm erra'tsenotes ñeñtes muenene' o'ch atarr asherben entenset ñeñtesña acheñrespa' añ poctetsa o'ch atet senterra ñerra'm ama esoyayso allochñapa' attochña e'ñech cohuen setorrena po'potantañecop atet ñerra'mrrate' acheñ

ñeñt atarr taruaset e'ñe atta. ²⁸ Ateñ ñerra'm na Ñeñten Acheñetoset, napa' ama añecpaye' nehuapo añe patsro allochñapa' sapa' o'ch atta atarr sesherbapuen na atet ñerra'mrrate' napa' atarr amcha'tareñ sentenen. Napa' añecopña nehuapa allochñapa' nachña sesherbōse'ña sa, ñeñto'marña napa' naña pomosta nañeña o'ch nerromos socop attochña netsa'tuerrnasa so'chñar ñeñtes shontes pa'namen acheñes. Attochña sapa' amach sañeña rromatso so'chñarecop.

Allempo Jesús a'crraterranerr epsheña aporo'yet
(Mr. 10.46-52; Lc. 18.35-43)

²⁹ Alloñapa' alla meterreterr Jericótpa' cota'huanererr shonte' acheñenesha'. ³⁰ Allcha' oñmuetpa' allñapa' ahuepa't anorros epsheña aporo'yet e'ñe toñetopño. Ñetña eñotatareñtet añ huetsa Jesús. Ñeñña aporo'yetpa' allenta rranare'tapet Jesús, ñeñtpa' atet otapet:

—Pemueraye'chnomya, Ayochreshate, p̄apa' ñeñtep̄ Davidna'tarep̄.

³¹ Acheñenesha'ñapa' cha muene' che'ptare'tnometña aporo'yet, atet otoset:

—O'hua semma.

Aporo'yetñapa' elloña alla rranare'terreterr atet otereterr:

—Pemueraye'chnomyañaca'ye, Ayochreshate, p̄apa' ñeñtep̄ Davidna'tarep̄.

³² Jesúsñapa' alla tomos o' chore'tanetpa' atet otanet:

—¿Eso'tña semnen ñeñtcha' atet nep̄oses?

³³ Ñetñapa' alla otereterr:

—Ayochreshate, yapa' añ yemnen o'ch pecuatnomuey attoch o'ch cohuen yenterrapa.

³⁴ Jesúsñapa' allenta muerosanet attoña ñapa' a'p̄llacle'chosonet. A'p̄llacle'chuanetpa' aporo'yetñapa' allorocma enterret e'ñe cohuen. E'ñe cohuerretsetpa' cha cota'nmuet ñamet Jesús.

21

Allempo chap Jesús Jerusaléño
(Mr. 11.1-11; Lc. 19.28-40; Jn. 12.12-19)

¹ Atteñapa' o' cha'cha'tet allame'tets Jerusaléño. Chapuet aspeno ñeñt pa'so'cheñ Olivopen. Allñapa' allo'tsen anets ñeñtpa' añ pa'so'cheñ Betfagé. O'ña chapmochet all anetso, ² Jesúsñapa' atet otnoman epsheña pueyochresha':

—Sapa' o'ch sota o'ch se'chap a'yenteye' e'ñe allara anetso. Allñapa' allcha' sentos ashen all huanquēñet epuet ñaña puechoyor ñeñt rre'ptor. Ñeñña ashenpa' o'ch sepyañp̄sospa' o'ch sanerrnan. ³ Ñerra'm essha' erro't sotapue' sañapa' atetcha' sotosonet: “Yepartsesharca'ye muenene'ña añ ashen. Mameshapa' o'ch alla apuerrsa'.”

⁴ Ñeñtpa' tarro'mar atet p̄a allochñapa' attoch etsota añ po'ñoñ ñeñt a'mtaye't ahuat Yompor po'ñoñ. Ñeñtpa' Yompor eñorataye't atet:

⁵ Atetcha' soch síono'marnesha' ñeñtara jerusaléño'marnesha': “Secue'tach, te'chca'yeña huaponasaña ñeñtcha' Sa'mcha'tareter seperr. Atto huena ñapa' amaca'ye pommo'cheñoteye' chapoña all, ñeñto'marña ama't rre'ptorechora ashenpa' ñeñtachca'ye monta'na.” Arrpa' allohua huañ añ po'ñoñ ñeñt a'mtaye't ahuat Yompor po'ñoñ.

6 Allempoña pueyochresha'ña ñeñt' mueñapa' ñetñapa' allenta ahuanmuet all anetso. E'ñe atet otapanet Jesús, ñetñapa' e'ñe'cho' atet' p'oset. 7 Allempoñapa' huapaterrñañet ashen epuet ñaña puechoyer. Ñetñapa' nohuerret pa'shtam ashnache'ño'pa' montatueret Jesús. 8 Shonte' acheñenesha' ñetñapa' to'tma'tyesoñet pa'shtam toño allcha' oñem Jesús. Po'potantañe'chnoñapa' tsorrm'o're'tyaset tsach pue'mo'rer allo topanetyeset toñ. 9 Allohuen acheñenesha' ñeñt' ota'chetsa ñaña ñeñt' co'ta'huanene' chenta' ñetñapa' puerrannarteño'etpa' atet atarr cohuentatyeseññañetpa' atet otenet:

—¡Acsherrapo'ch allohueney! ¡Aye'cho'chtaterrapo'ch Jesús ñeñt' am'cha'taret David po'm'reneñ! ¡Aye'cho'chtaterrapo'ch Jesús ñeñt' llesensen Yompor! ¡Ya'ye'cho'chtaterrñañepa'ch Yompor Parets ñeñt' pue'ntaño'tsen!

10 Atteñapa' o' chap Jesús Jerusaléño. Chap allpa' allohuen anetso'marnesha' epaye' cohuanrrortapet. Ñetñapa' atet otyeset:

—¿Esesha'te'ña añ acheñer?

11 Acheñenesha' ñeñt' co'ta'nene'pa' ñetñapa' atet otoset:

—Añca'yeña Jesús ñeñt' a'm'tene' Yompor po'ñoñ. Ñapa' Galileo'tca'ye huena allara anetso Nazareto.

*Atto Jesús'pa' a'cohuentatosan Parets pa'paquëll
(Mr. 11.15-19; Lc. 19.45-48; Jn. 2.13-22)*

12 Allotña Jesús'pa' be'tosos Parets pa'pacillo. Allñapa' mueño'tuosan allohuen ñeñt' pomatsre'tetsa all ñaña allohuen ñeñt' rañta'yetsa. E'ñe cha'nma'cha'tatosanet allot, a'coye'tam'psosanet po'mesa'chno allecma can'yatyenet po'çllayoret, a'coye'tuosan ñaña allecma anorryen ñeñt' pomuene' yepe'chno. 13 Allempoñapa' atet otosanet:

—Yompor po'ñoñ ñeñt' atet anuaret ahuatoteñ allñapa' atetca'ye oten Yompor: “Añ ñeñt' nepaquëll nepenpa' añe'cpaca'yeña sherben allecmach ma'yochennet.” Tarraña sañapa' e'ñe atet sepeññañña Yompor pa'paquëll ñerra'mrrate' eñet ñeñt' epotyetsa mapuetpono.

14 Allña Parets pa'pacillo'pa' hua'cha'toña aporo'yete'chno ñaña ñeñt' checa'repays. Ñaña'pa' e'ñe a'crratyapanet. 15 Añña ñeñt' pa'm'cha'tare'ternesha' pen allohuen judionesha' po'cornaneshar epuet ñaña ñeñt' atarr etsotayenayeñ ñoñets ñeñt' atet anaret, ñetñapa' entoñet ñeñt' atarr co'chnesha' atet orrtatyen Jesús ñeñt' ama't eseshapa' ama puentareto. Ñaña e'mueññañet cheshanesh'a' all Parets pa'pacillo puerranarotetpa' atet otyenet:

—¡Aye'cho'chtaterrapo'ch Jesús ñeñt' am'cha'taret David po'm'reneñ!

Ñetña atet entetpa' ñeñt'epa'tcha' atarr atsrre'matahuet.

16 Allempoñapa' atet ochet Jesús:

—¿Ama't pe'muenoña atet ota'chre'tapa' cheshanesh'a'?

Jesúsñapa' otanet:

—Ne'mueñca'ye. Sañapa' ama't selleyareña Yompor po'ñoñ. All anaret ñoñetspa' ñeñt'ña atet oten:

Ama't cheshatollesha' e'ñe puenamotet e'ñech cohuen pe'ñoratos a'chota'chre'teñtso. Ama't ñeñt' ora momuenmeñ pe'morrtatoscha' e'ñe cohuen pocop.

17 O'ña yerpatuerranet añ ñoñets ñeñt atet anaret ahuatoteñ ñocop, allempoña sa'nerranet ñeñte anetsrotpa' o' alla ahuerrerr Betanio. Allpa' allecma ommuena.

Allempo Jesús pa' eñora higohecop amach eñalletatsto pue'mer

(Mr. 11.12-14, 20-26)

18 Tsapat puetaren alla ahua'muenerr Jesús anetso Jerusaléño. Toñoñapa' cha cheporra'nma. 19 Allña pa' entnoman higoch toñetopño'tsen. Ponmosya ama entoñe pue'mer, pasopanrepa'tcha' entosñañ. Jesúsña chepa'tcha' eñorostsa higohecop, ñeñtpa' atet otos:

—¡Arepa'ch eñalleterro pue'mer ama't e'ñe ahuata!

E'ñe otue'pa' allorocmuepa'tcha' hueya'huaña pasopaner. 20 Pueyochresha'ñapa' e'ñe enteñet o' hueya'huaña higochpan. Ñetña pa' atta cohuanrrortefiet, atet otanna'tet:

—Errotenotuañaca'yeña o' a'uyatachña e'ñe mamecmate'.

21 Jesúsña atet otanet:

—Po'ñoçhca'ye o'ch notas: Ñerra'm seyemteña Yompor, ama çhoye' se'charrtateno seyoçher, amach añayaya atet sepo atet nepa' higoch. Añe'nachña e'ñe setsoten ñeñt ello atarr torrapo' senten. O'ch netma'ntacha atet ñerra'mrrate' añ aspenet. Ñerra'm eseshascha' otets aspentecop, “Añ aspenetpa' rrote'tepa'ch arrot, arrepa'chña esha'tosa sa'po allcha' e'ñe chencosa”, aspenetña pa' atetcha'cho' pñonasa. 22 Ama't allohuen erra'tsencha' es senañ Yompor e'ñe sema'yocheñoç, ñerra'm çho senamueñ e'ñe seyemteñoçmañen, ñeñtña pa' sagaçcha'.

Atto allsensarettena Jesús

(Mr. 11.27-33; Lc. 20.1-8)

23 Allempoña Jesús pa' o' alla çherrerr Jerusaléño, allña pa' be'tosuerrerr Parets pa'paclo. Allña pa' yeçhatuerranerr acheñenesha'. Atto yeçhatenan acheñenesha'pa' allempoña huachatoña ñaña ñeñt pa'mcha'tareternesha' pen allohuen judionesha' po'cornaneshar epuet puesheña'tets ñeñt pompornesha' pen allohuen judionesha'. Ñetña pa' atet otoset:

—Ñehua, yapa' añecop yohuena yemneñ o'ch potey çerrote't apuenpetña llesens? ¿Esesha'tña pñapuenetña llesens attot pñorrtatyenña ñeñt çhocma attecma pepa'yena?

24 Jesúsña pa' atet otapanet:

—Ñehua, napa'cho'ña nemneñ o'ch na'pñotapas saña ama't patrra ñoñets. Ñerra'm sanaposencha'pa' napa'cho'ña attochña notapas naña allot apuennetña llesens ñeñto'mar atet nepena. 25 Sapa'cho'ña o'ch sotosen, ahuafimo'cha allempo apate't Juanañ Yomporcop, ñapa' çeseshatña llesense' ñato' Yompor amapa' acheñafe' apue'ña llesens? Nemnen o'ch sotosen ñeñt atet soctape'chen sa.

Ñetña pa' e'ñe a'nahua otanna'tyeset:

—Ta'm errotcha'ca'ye yochte'. Ñerra'm cha yoch Yomporeshotca'ye apetña llesens, ñapa' çhate'ca'ye otey: “Ñehua, saña pa' eso'mare'tña ama se'nñocheña ahuaña allempo serrpare'tatosan acheñenesha'.” 26 Elloña ñerra'm cha yoch acheñeshota apet llesenspa' acheñenesha'ña pa' çhate' e'moñetyet, çarro'mar ñetpa' e'ñe cohuen eñçhete't Juanañ, çhocma otyeñet ñapa' ñeñtca'yeña a'mtose' Yompor po'ñoñ.

Ñeñto'marña ñetpa' mecha'teñet acheñenesha'. ²⁷ Ñeñto'marña ñetpa' atet ochet Jesús:

—Ta'm yapa' amaca'yeña yeñoteñe; errotte' huapaña Juanañ, errotte' apetña ñaña llesens.

Allempoña Jesúsapa' atet oterraneterr:

—Napa'cho'ña te'pa' amach notaso samña allot apareten namña llesens attot atet nepa'yena.

Atto Jesúsapa' toma'ntaterraneterr puesheñarr yacma atet penaña epsheña puechemer

²⁸⁻³² Jesúsñapa' alla oterranerr judionesha' pa'mcha'tareternesha':

—Ahuañmo'cha allempo huapa Juanañ, ñapa' añecop huapa attoch ñach seyçhatterre' allohuen ñeñt e'ñe pocte' enten Yompor. Tarraña sañapa' ama same'ño. Aña e'ñe cohuen ame'ñapaya ñeñt atarr ochñañeneshaçhno atet ñerra'm añ ñeñt po'taruas pa'yene' e'ñe puehquëñoñet cobra'yeñet acheñeneshaçhno quelle ñeñt gobiernocop ñaña aña e'ñe cohuen ame'ñapayaña Juanañ ñeñt atarr ecañoresha'feçhno. Allempo sentanet atto ñetpa' cõtape'cherret ello cohuen Yomporecop, sañapa' amaña eseshas cõtape'cherrayeña cohuen Yomporecop attoch o'ch same'ñera samña. Ñeñña te'pa' o'ch netma'ntacha. Ñehua, puesheñarr yacma eñall epsheña puechemer. Ñañaapa' atet otenana' puesheñarr puechemer: “Te'pa' nechemere, o'ch ahua'muenep ya'mro allcha' petaruasa'muen.”* Ñañaapa' ellonta otapan pompor: “Amaca'ye nemno, amachca'ye neto.” Tarraña elloñapa' cõtape'cherran cohuen allempoñapa' ahuo' pompor pa'mro taruasats. Allempoña pomporpa' ahuo' ñaña po'psheñeñ puechemeresho, ñapa'cho'ña atet otos atet otuan po'psheñeñ puechemer: “Te' nechemere, o'ch ahua'muenep ya'mro allcha' petaruasa'muen paña.” Ñañaapa' e'ñe cohuen otapan pompor: “Ñehua, apacha' o'ch ahuen o'ch netaruasa'muen ya'mro.” Tarraña ñañaapa' ama't atet otaña' ama to.

Jesúsñapa' alla oterraneterr:

—Te'pa' o'ch na'p'to'tas sa, ñeñt epsheña puechemer, çerra'tsena't sentenña sa ñeñt e'ñe po'ñoçh atet petsa ñeñt atet muenen pompor?

Judionesha'ña pa'mcha'tareternesha'pa' ñetñapa' atet ochet:

—Añca'ye ñeñt ñanom, ñeñt otapue' ñapa' año'ch to taruasats tarraña elloñapa' allenta ahuo' taruasats pa'mro. Ñeñtca'yeña etsotene'ña ñeñt atet muenen pompor.

Jesúsñapa' atet oterraneterr:

—Ñeñto'marña te'pa' o'ch notas: Ñeñt puehquëñoñe'na cobra'yene' acheñeneshaçhno ñaña ñeñt atarr ecañoresha'feçhno, ñetñapa' po'ñoçh allenta aguërrer Yompor po'cohuenña ñeñt atto ayochreshattena ña. Sañapa' amaña allentaye' saguëreña samña tarro'mar sapa' chaña atarr se'charrtatenña seyocher.

Atet atma'ntatarettena ñeñt ataruasañeçhno ñeñt ama cohuenayaye
(Mr. 12.1-12; Lc. 20.9-19)

³³ Jesúsñapa' alla oterranerr judionesha' pa'mcha'tareternesha':

—Te'ñapa' se'mñotencha', napa' o'ch netma'ntatasa po'poñ. Eñall puesheñarr ane'tañ, ñañaapa' nare'tanatatnoman shonte' uvach;

* **21:28-32** Ñeñt po'taruas penet ñetpa' toteneta' uva.

pa'muerñapa' e'ñe ora uvachmatatue. E'ñe concha'tam̄pesue allotñapa' eñan ñaña allcha' a'pecho'toñet uvas po'ñer. Allñapa' tomatatnoman torrepo' allotcha' cohuan̄psoñet pa'muer.

'Tomatuepa' na'nman ñeñtcha' taruasatats ñeñtcha' coyerrahuete allpon ñerra'm esempoch toteñet. O'ña nare'tanatatupepa' o' ahuo' po'poñ anetso baçhayo. ³⁴ Chap allempo yen uvachllom̄pa' ñaña'p' mueñerran po'psheññechno pa'taruasañer ñetcha' enamuerrtseta' uvachllom̄ po'psheññ pa'taruasañresho ñeñt cohuan̄pene' uvachma'. ³⁵ Allempoña chenete allpa' enamosan ñeñt allpon o'patena pamo'mte', arepa'tcha'ña es apapuenayeña uvachllom̄, elloña ñeñtapa' cha rremapoñet pa'taruasañer, cha nalle'tapueñet pueheñarr, cha muetsapet po'psheññ, po'psheññpa'cho'ña cha rrolle'tapoñet. ³⁶ Allempoña ñeñt pamo'mte' pen uvachma'pa' o' alla mueñerranerr po'psheññechno pa'taruasañer shonte'. Allempo chapuet ñamet allpa' attecma errotuanen a'parettapuet ñamet.

³⁷ 'Allempoña ñeñt pamo'mte' penetpa' ñaña'p' atet ot: "Te'pa' o'ch nemñe all ñeñt e'ñe na nechemer. Ñato'rraña ñeñt'pa' mecha'na'tapetcha'." ³⁸ Ñeñt'pa'cho'ña ama't mameshapa' arepa'tcha'ña mecha'na'tapeto. Allempo entapoñet puechemer ñetñapa' atet otanna'tyeset: "Añmapa' ñeñt'pa'yeña puechemer ñeñt'pa' o'paterraya pompor puenaren̄ esempo. Ñapa'cho'ña te'pa' o'chca'ye yemtsa'p' allochñapa' yachca'yeña e'ñe o'paterrayaña pompor puenaren̄. Te'pa' o'ch ahuey o'ch yemtsa'p' ñaña." ³⁹ Allempoñapa' o' rromapet o' chetare'tnomet narmetsmot a'yenet, allña muetsapetña ñaña. Arrpa' allohua atet toma'ntata Jesús e'ñe ñañaña.

⁴⁰ Allempoña Jesús'pa' atet oterraneterr:

—Ñehua, ñerra'm esempoch huerra ñeñt pamo'mte' pen ataruasañechnopa' ¿señoteñe'tña ñetpa' atetcha' a'paretterret?

⁴¹ Judionesha'ña pa'm̄cha'tareternesha'pa' atet oterreterr:

—Ñerra'm huerrachpa' ñeñtña ama matsrre'm̄nopa' e'ñech a'cllatuerranet pamo'mte', nanaccha' coñchatuerranet; narmetsmoñapa' elloch nerranerr po'potantañ ñeñt'pa' taruaserrtserr all uvachmo. Nerranerrcha' ñeñt'pa' e'ñe po'ñoç apuerre' pue'mer ñerra'm esempoch yen.

⁴² Allempoña Jesús'pa' atet oterraneterr:

—Sapa' ama't ahuatapa' ama'tña selleyareña ñeñt atet anuaret Yompor po'ñoñ ahuatoteñ. Tarro'mar ñeñt'pa' atet oten nocop, na atma'ntataret mapue'. Ñeñt'pa' atet oten:

Añ mapue' ñeñt ama pocteye' entyeno ñeñt tomatyene' pocoll, ñeñtña te'pa' o' anare'tterra ñeñt'pa' ello atarr cohuen sherberrets e'ñe atet ñerra'm quellpach allo e'ñe cohuen echarr orratenet pocoll. Ñeñt'pa' Yomporca'yeña atet patene', ñeñto'marña yapa' e'ñe cohuen yenteñ. Arrpa' allohua atet toma'ntaterrerr Jesús e'ñe ñañaña.

⁴³ Ñeñto'marña sa ñeñtes judioneshaspa' te'ña Yomporpa' puer-ratam̄perrescha' po'cohuenña ñeñt atto ayochreshattena ña. Añcha'ña apuer ellonet po'potantañ achenesha' ñeñt ama judioneshayaye ñeñt'pa' po'ñoç orrtaterre' e'ñe ña po'cohuenña atto atarr ayochreshattena ña. ⁴⁴ Allohuen erra'tsencha' atetsa añ mapyo ñeñtña mapue'pa'

e'ñech a'yosatse'tuanet. Ñaña ñerra'm eseshesho shora'nom ñeñt mapy-erpa' e'ñech a'peptse'tuosanet.

Attoña Jesús'pa' toma'ntatanet ñerra'm ama esesha' pocteye' entenaye Cristo ñerra'm erra'tsencha' ama aguerraye, ñeñtña acheñerpa' chocmach huapoña ñeñtcha' atarr muerochtaterrahuet.

⁴⁵ Allempo atet e'myes ñeñt pa'mcha'tareternesha' pen allohuen judionesha' po'cornaneshar ñaña fariseonesha', ñeñt atet toma'ntatanet Jesús, ñetña allempopa' chapanet pueyoçhreto ñocpuetepa't serrpare'tenña Jesús. ⁴⁶ Ñetñapa' mueneñetañ o'ch rremuetañ tarraña ama esesha' rromaye tarro'mar ñetpa' cha mecha'teñet acheñenesha'. Ñehua, acheñenesha' e'ñeca'ye cohuen enteñet Jesús ñapa' po'ñoçh ñeñt a'mtene' Yompor po'ñoñ.

22

Atto atma'ntatarettana puesheñarr amcha'taret puetare'tatan shonte' rreñets ñeñtcha' rret allempoch sena'ta puechemer

¹ Jesúsñapa' alla toma'ntaterraneterrpa' atet oterraneterr:

² —Yompor po'cohuenña ñeñt atto ayochreshattena ña pue'ntañot ñeñt'pa' o'ch netma'ntacha atet ñerra'mrrate' puesheñarr amcha'taret. Ñeñtña amcha'taret'pa' o' puetare'tatan shonte' rreñets ñeñtcha' nanac rret allempoch sena'ta puechemer. ³ O'ña a'potatuan rreñetspa' o' mueñan pa'taruasañrenesha' o'ch otyeñeta' ñeñt ahua'ñare't o'ch rrapreteneta' rreñets. O'ña otyesuarettetpa' ñetñapa' arepa'tcha' eseshaye' sechatso o'ch ahuet all. ⁴ Po'pocheñopa' o' alla mueñerranerr po'potantañ pa'taruasañrenesha'. Ama seneta'pa' atet otapanet: “Sotoscha' acheñenesha' ñeñt ahua'ñare't: ‘Amcha'tare'tca'ye sagotatene', atetca'ye oten: Rreñetspa' o' e'ñe na'potatue. Huacsheçhno ñaña besereçhno ñeñt ne'soya'tatyen o' e'ñe nemtsatue ñaña o'ca'ye e'ñe na'potatue. Te'pa' sona'cha'tepa'to' ahuo'ch serrapreteña.’ ”

⁵ Ahua'ñare'fnesha'ñapa' arepa'tcha' a'cua'psenaye' eñchetofña ñeñt hua'ñenahuet. Ñeñtapa' ahuanemyeset ñopa'tets. Puesheñarrpa' ahuo' pa'mro, po'psheñeñpa' ahuo' pomatsre'tatsa. ⁶ Po'potantaññapa' ñeñtapa' o' rremapoñetña pa'taruasañrenesha'pa' errotuanen pet, atteñapa' o' muetsanatu. ⁷ Amcha'tare'tñapa' ñeñtña atarr atsrre'mate'. Allempoñapa' o' mueñan ñaña po'solltar-renesha' ñeñtcha' a'cllatenaya' ñeñt amtsañeçhno, ñeñtcha' a'poyatatuenaya' ñaña pa'netser. ⁸ Alotña amcha'taret'pa' atet oterranerr po'potantañ pa'taruasañrenesha': “Rreñtsoçhnoña po'ñoçhpa' epaye'ca'ye. Tarraña ñeñtña ahua'ñare'tpa' ñetpa' amaca'ye cohuenaye' nentenaneto. ⁹ Te'pa' orras saña allo'tsen toñeçhno tarro'mar allpa' shonte' chopeñe'chyen acheñenesha'. Allohuen errroncha' sentyes o'ch sotyapanet onetepa' arr o'ch rraprennetpa' rreñets ñeñt shonte' na'potaten.” ¹⁰ Allempoña alla ahuanerrerr pa'taruasañrenesha', ñetñapa' añ co'a'yeset toñ. Ñeñt allpon pocta'yeset toño'mar e'ñe sechatyesuahuet, ama't atsrre'mña'eçhno ñaña ñeñt cohuen acheñ. Atteñapa' o' cha shontosa ñeñt hua'ñenet. Allña pocollo all sena'tena puechemerpa' e'ñe queçhcosa ñeñt ahua'ñare't.

¹¹ 'Amcha'tare'tñapa' allenta be'tos o'ch entapan ñeñt hua'ñatyen ñeñtcha' rrallme'chosets all. Allñapa' entan puesheñarr yacma. Ñaña'pa'

ama añeye' chorreno shetamuets emarr ñeñfecma chorrenet all atto coshapreteñet ñeññ sena'tetsa. ¹² Am'cha'taretñapa' atet och: "Eso'mare'tña masheñe pebe'tenña arr amaca'ye añeye' pechorreno shetamuets emarr attoch p'ochshaprecha ñeññ sena'tetsa." Ñaña'apa' ama eñoro. ¹³ Allempoña an'cha'taretpa' otan pa'taruasañrenesha': "Sehuancoñ pa'tac ñaña potpa' chosa huapore'terre' a'yot checmetot. Allña'apa' allcha' yahuanrrorterret, panmueño'tet atserrpa' rraso'tyerretcha' pa's." ¹⁴ Tarro'mar ama't shonteñña ñeññ ahua'ñaretpa' tarraña puesheña'ttsaña ñeññ e'ñe cohuen a'craet.

Atto a'pto'chet Jesús, pocte'te' o'ch tsa'tet impuesto
(Mr. 12.13-17; Lc. 20.20-26)

¹⁵ Allempoña fariseonesha'pa' ahuanerra. Ñetñapa' cha atarr cotape'chatanna'teneta'. Ñetpa' aña atarr e'nenet attoch e'ñe puehquëño'fetpa' ama't parrochapa' o'ch eñorachet Jesús ñeññ ama pocteyaye. Allochña'apa' atto'cha'ña otteñe'chet. ¹⁶ Ñetñapa' e'ñe a'nahua mueñet ñet pueyochresha' epuet ñaña puesheña'tets Herodes pueyochresha'. Ñetña chapuet Jesúseshopa' e'ñe puehquëño'fet atet otoset:

—Maestrocha' yapa' yeñoteneñ p'apa' ama peshquëno ama't mamesha ñaña ñeññ atto peychaten Yompor pocta'ña ñeññpa'cho'ña e'ñe cohue-nacma, ama shequëñtsoyaye ama't mamesha. Ñaña p'apa' ama aña ñapueñ pemorrenteno ñeññ atarr an'cha'na'tpo' entyen allohuen acheñenesha'. Allohuen acheñ e'ñe cohuen pentueñ. ¹⁷ Ñeñto'marña te'pa' yapa' yem-neñ o'ch peñotatapuey erra'tsent'e'ña e'ñe po'ño'ch cohuentetsa. ¿Pocte'te' penteñña pa' o'ch yetsa'ta impuestos añecop ñeññ an'cha'tarettetsa all anetso Romo ñeññ ama judioneshayaye? Ñato'amate' pocteyayeña yocop ñeññey judioneshay o'ch yetsa'cha an'cha'taret romo'marnesha' ñeññ ama judioneshaye.

¹⁸ Jesúsñapa' eñotapanet ñeññ atet cotape'chyenetañ ñocop, ñaña'apa' atet otanet:

—Sapa' atarr ashcarña'es, eso'mare'tña semneñña o'ch seshcare'tenen. ¹⁹ Ñehua, ama't atteseña' segatenca'ye puetallarr quelle ñeññ alloch setsa'ta impuestos.

Allempoñapa' gachet puetallarr quelle ñeññ otenet denario. ²⁰ Ñaña'apa' atet oterraneterr:

—Ñehua, sapa' o'ch soten, ¿eseshat sentenña ñeññ atma'ntarettetsa all? ¿Eseshat pa'so'cheñ aquellcarettetsa all?

²¹ Ñetñapa' atet ochet:

—An'cha'taretpa'ye atma'ntarettetsaña all, ñaña ñoca'yeña pa'so'cheñ ñeññ aquellcarettetsa all.

Jesúsñapa' alla oterraneterr:

—Ñeñte'pñapa' añ poctetsa o'ch ya'p an'cha'tare' ñeññ ño ñeññ atet poctetsa gobiernocop, tarraña elloneña ñeññ Yomporo o'ch ya'p ñaña ñeññ atet poctetsa ñocop.

²² Ñetña atet e'mueñet Jesús atet anapuenanetpa' atta cohuan-rrorteñet tarro'mar Jesúsapa' atarrca'ye cohuen anapuenanet. Atteñapa' quechpa'huaneretpa' ahuanerret.

Atto a'p̄to'chet Jesús, ñerra'm po'ñochte' atanterrapo' rromot, ta'm, allempopa' errotencha'ña yeperra
(Mr. 12.18-27; Lc. 20.27-40)

²³ Ñeñte yetrocma huača'toña ñaña patantarr ñeññ saduceoneshatets. Ñehua, ñeññ saduceoneshatets ñetñapa' ellonet echenet poctapña ñeñto'marña ñetpa' atet otenet amate' errotenot yetanterroña rromot ama't errponaña. Ñetñapa' atet otoset Jesús:

²⁴ —Añ Maestrocha' ñeñtca'yeña atet otye'tña Moisés ñeññ poctetsa ñeñtcha' atet yeña. Ñerra'm esempo rroma yacma o'ch sa'nman puetapor tarraña ñerra'm ama chemere'tnomopa', añ poctetsa pa'mo'nasheñcha' alla yorerre'ña po'norrar allochñapa' attoch eñalletteraña ñeñtcha' puechemer perr pa'mo'nasheñeñ. Ñeñtapa' atetca'ye quellca'nmonayña ahuat Moisés. ²⁵ Ñehua, te'pa' eñall cancherrsheña yamo'ts ñeññ e'ñe poctacma pa'mo'nasheñecmuet. Ñeññ puesheñarr popo'naretpa' o' yoran coyanesha' ñeññ puetapor pa'. E'ñe allponmatatsapa' o' rroma, atta sa'nman puetapor ama chemere'tnomo. Allempoña ñeññ po'rrocho'merpa' o' yorerran pa'mo'nasheñeñ puetapor. ²⁶ E'ñe allponmatatsapa' ñapa'cho'ña o' rromuerrerr ñaña, ñeñtapa'cho'ña ama chemere'tnomo. Allempoña po'psheñeñ pa'mo'nasheñpa' o' alla yorerranerr ñaña po'norrar. E'ñe allponmaterrtsapa' ñapa'cho'ña o' rromuerrerr ñaña, ñeñtapa'cho'ña ama chemere'tnerrerro o' atta rromuerrerr. E'ñe attecma pohuet cancherrsheño'maretpa' e'ñe pueyoruarochetña ñeñtara puesheñarr coyanesha'. Allohuenetpa' e'ñe attecma pet rromayestset ama't puesheñarrofetapa' amaca'yeña chemere'tnomo. ²⁷ Allempoñapa' cho rromatsña ñaña coyanesha'. ²⁸ Te'ña ñerra'm po'ñochte' atanterrapo' rromotpa' añña coyanesha'ñapa' allempopa' zessha'tcha'ña e'ñe ñapuet puetapor perre' tarro'mar allohuenet cancherrsheño'maretpa' e'ñeca'ye pueyoruarochet?

²⁹ Jesúsñapa' atet otapanet:

—Chaca'ye atarr sepanteñ tarro'mar amaca'ye chennasoña seyoçhro ñeññ e'ñe po'ñoçh atet yeçhateney Yompor po'ñoñ ñeññ atet anuařet ahuatoteñ. Ñaña añña sepantatene' tarro'mar sapa' ama sepocteññañe Yompor po'huamenc. ³⁰ Tarro'mar esempohuañen allempoch tanterret po'pocheño, allempopa' ama't puesheñarrofeta amach sena'terreto, ama't coyanesha'pa'cho' amach eseshaye' apuerraye ñeñtcha' yorerrahuet. Tarro'mar allempopa' e'ñech atet ñerra'm Yompor po'mllañoeteñnashar ñeññ pue'ntaño'tsa'yen. ³¹ Sapa' ama'tña selleyare ñeññ atet ote't ahuat Yompor e'ñe socop attoch señoçh po'ñoçhpa' ama't ñeññ o' colla'huapa' ñetñapa' corretseta. ³² Ñehua, ñeñtapa' atet oteney Yompor: “Napa' na ñeññen Po'yomporer pen Abraham ñaña Isaac ñaña Jacob ama't ñetpa' o' rromhuet ahuatoteñ.” Ñehua, yapa' yeñoteñ Yomporpa' ama añeye' Po'yomporer penaye ñeññ rromuets e'ñe poctacma, ñapa' añca'yeña Po'yomporer pene' acheñ ñeññ corretsetach. Attoña Yomporpa' e'ñe allame'tsa entenanet allohuen ñetñapa' e'ñe bettetseta.

³³ Allempoña allohuen acheñenesha' ñeññ e'muene' Jesús atto emma'huan saduceonesha', ñetñapa' atet otanna'tyeset:

—¡Errofenotuañaca'yeña atarr es eñoten, atto atarr cohuen yeçhatyeny!

Añmapa' ñeñĩ ñoñets ñeñĩ atarr sherbets, e'ñe metana'tuenan allohuen po'poñeçhno ñoñets

(Mr. 12.28-34)

³⁴ Ñaña allempo fariseonesha' e'mare'chet atto Jesús emma'huan saduceonesha' ñetñapa' apçhanna'tet parro. ³⁵ Allempoña puesheñarrotet ñeñĩ atarr etsotene' ñoñets ñeñĩ atet anaret ñaña'pa' otenana' Jesús. Ñeñĩpa' tarro'mañña atet a'p̄to'tos ñetpa' çhoca'ye mueneñet o'ch topa-
chet Jesús. ³⁶ Ñeñĩpa' atet otos:

—Maestrocha' çerra'tsena't ñoñtsor ñeñĩ atet anaret ñeñĩ atarr sherbets ñeñĩ ello metana'tuene' ora allohuen po'poñeçhno ñoñets ñeñĩ e'ñe parro atfecma anaret?

³⁷ Jesúsñapa' atet otap̄:

—Añca'yeña ñeñĩ ello atarr sherbets, ñeñĩ ñoñetspa' atet oten: “Atar-
repa'ch yemorrenteña Yeyomporer ñeñĩ Yepartseshar yepen e'ñe ora yeyoçhrocmañen. Ñaña e'ñe yecamquẽñoç yemorrençhach, ama't ñaña ora yocap̄ñoñhuen.” ³⁸ Ñeñĩpa' ñeñĩca'ye ñoñets ñeñĩ po'ñoçh atarr sherbets, ñeñĩpa' elloca'yeña metana'tuenan po'poñeçhno ñoñtsoçhno. ³⁹ Allotpa' po'poñ ñoñets ñeñĩ atarr sherbets ñeñĩpa' atet oten: “Atar-
rcha' yemorrenteña yamo'ts e'ñe atet atarr yemorrentena yañeña.” ⁴⁰ Añ epo'mar ñoñets ñeñĩña e'ñe etsotatuene' allohuen po'poñeçhno ñoñtsoçhno ñeñĩ atet ana'yesaret, ñaña allohuen Yompor po'ñoñ ñeñĩ a'mta'yese't ahuat.

Atto Cristo ñeñĩ Po'partseshar pe't David ahua't, elloñapa' o' alla po'mreneñ per

(Mr. 12.35-37; Lc. 20.41-44)

⁴¹ Allempoña fariseonesha'pa' ñetñapa' allo'tsenareta all apçhenet e'ñe ñoçhayet, ⁴² Jesúsña allpa' atet otanet:

—Sapa' çerrofena't sotenña sa añecop ñeñĩcha' Cristotosets? Çesha't soten ñeñĩcha' po'mreneñ perre'ña ñeñĩcha' Cristotosets?

Ñetñapa' atet ochet:

—Davidcha'ca'ye po'mrenñoç huapaña ñeñĩcha' Cristotosets.

⁴³ Ñaña'pa' alla oterraneterr:

—Ñerra'm po'ñoçhcha' David po'mreneñ perre'pa' sapa' ama't seño'teñeña Davidpa' allempo eñorache't Parets Puecamquẽñ ñapa' atetca'ye ote't po'mrenñecop ñeñĩara ñeñĩcha' Cristoterrets: “Napa' ñeñĩca'yeña Nepartseshar nepen.” David allempopa' atetca'ye eñose'tña añecop ñeñĩcha' Cristoterrets:

⁴⁴ Yompor Paretspa' atet otennan ñeñĩ e'ñe Nepartseshar nepen na (ñeñĩara ñeñĩcha' Cristoterrets): “Te'pa' o'ch ãanorruerr arr necohuenrot allcha' pecohuentapreterrna. Attoçhña ama't ñeñĩ pe'moñe'tene' napa' o'ch e'ñe name'ñatuerranet allochñapa' o'ch atet perret ñeñĩ pemnen ãa.”

⁴⁵ Ñeñĩpa' atetca'ye ote'tña David, ñeñĩcha' Cristoterretspa' ñeñĩca'yeña Po'partseshar pe'tña ama't allempoteñ. Ñehua, ama't seño'teñeña Cristo ñeñĩ Po'partseshar pe't Davidpa' ñeñĩña te'pa' o' alla po'mreneñ per ñaña.

46 Ñetñapa' ama't puesheñarrofetapa' ama eseshaye' anapuenaye' entaye. Ñeñto'marña allempoteña' ama't puesheñarrofetapa' ama eseshaye' a'p'to'tenaye' enterraye.

23

Atto Jesús'pa' a'metare'tenan fariseonesha' ñeñt atet ye'chenet ñetpa' ñeñt'pa' ama cohuenaye' entapretenaneto Yomp'or

(Mr. 12.38-40; Lc. 11.37-54; 20.45-47)

¹ Allempoña Jesús'pa' alla serrpare'taterran allohuen acheñenesha' ñaña e'ñe ña pueyochreshachno. Ñeñt'pa' atet otanet:

² —Aña fariseonesha' epuet ñaña ñeñt atarr etsotayene' ñoñets ñeñt atet anaret, ñetpa' añecpa anarettenet ñetcha' seño'tatene' ñoñets ñeñt atet nonaset Moisés ahuat. ³ Ñeñto'marña socoppa' e'ñe pocte' o'ch se'pohuena ñeñt atet otaset, amachña čhaña satpare'teñe. Tarraña sapa' amachña atet se'patsto ñeñt atet patse'tyenet ñet. Tarro'mar ama't atarr cohuen serrpare'tenetaña' amaca'yeña e'ñeye' atet peneto ñeñt atet serrpare'tatenset. ⁴ Ñetpa' čhaca'ye atarr atontatennasetña ñoñets ñeñt'cha' e'ñe atet se'pohueneñ ñetpa' ñeñt'aca'yeña nennaset ñeñt atarr torrapo' sentyen. Ñeñt'pa' atet'cha' netma'ntacha ñetpa' čhaca'ye ottenet ñerra'mrrate' añ huanquënnaset ñeñt atarr eñerr se'muen attoch sechechnom. Tarraña ñet ama't mameshapa' amaña anmapretenseto, ama't pota'p'otetapa' ama echantapretenseto ñeñt chechatnenset. ⁵ Fariseonesha' allohuen ñeñt atet etsotayeneña' ñeñt'pa' e'ñe pommo'cheño'teta atet penet allochñapa' acheñenesha'ñapa' e'ñech cohuen entyeñet ñeñt atto atarr torra'yenetañ Yomporecop. Tarraña ñeñt'pa' e'ñeca'ye orrena. Ñaña ñetpa' čhaca'ye ateshatomuerrtatendet poreñ allñapa' all quellquëññañetañ Yomp'or po'ñoñ ama't ñeñt'pa'čo'ña alloca'yeña huancato'tenet. Tarraña ñeñt'pa' e'ñe añecpa atet penet attoch acheñenesha'pa' e'ñech cohuen entenanet. Tarraña ñeñt'pa' e'ñe orrena atet penet ñeñt atto ommo'chenet. Ñaña ñetpa' añe'naca'yeña allpocha'p'tatenet ñeñt čhera'rretenet pa'shtamueto pa'rrpe'monet. Tarraña ñeñt'pa'čo'ña e'ñe añecpa atet penet e'ñe pommo'cheño'tet. ⁶ Ñaña ñetpa' ñerra'm čho rrallme'chapretenetpa' añaca'ye atarr muenenet o'ch anorr'cha'tyenet allecma anorryen ñeñt atarr añcha'na'tpo' entyen allohuen acheñenesha'. Ñaña ñetpa' e'ñe attecma penet ama't all judionesha' po'prahuo. ⁷ Ñaña ñetpa' e'ñe pommo'cheño'tet añe'ñaña atarr muenenet acheñenesha'pa' o'ch huom'cha'tyesapanet pue'm'cha'naño'tet ñerra'm esempo chopeñe'chyenet toño'mar allecma shontena acheñenesha'. Ñaña pommo'cheño'tetpa' añe'ñaña atarr muenenet o'ch otanet acheñenesha' ñetpa' e'ño' partsesharerochet.

⁸ 'Tarraña saye'ña neyochreshacha' ñato'tña semnena'ña o'ch otas acheñenesha' sapa' e'ño' partseshareroches. Ñaña sa allohuenespa' e'ñechña semo'nasheñecma se'p'annena, tarro'mar sa allohuenacpasp'ap'taca'yeña Separtseshar sepenen na ñeñten Cristotosets. ⁹ Ñaña arr patsro ama't puesheñarra amach seyomp'orer se'patstaneto. Tarro'mar sapa' e'ñeca'ye patrraña Somp'or ñeñt pue'ntaño'tsen. ¹⁰ Ñaña sapa' amach semnatsche ama't puesheñarra e'ñe pue'chore'teño'tetaspa'

o'ch otaset: Na'yochreterneshacha'. Tarro'mar sa allohuenacpaspá' naptaca'yeña Sa'yochreshater sepenen na ñeñten Cristotosets. ¹¹ Tarro'mar ñeñt po'ñoç cohuen amcha'tarettetsa sesho ñeñtpa' ñeñca'yeña atarr torretsaña po'potantañecop attoch orrtatanet ñeñt atarr sherbets ñocpuet. ¹² Tarro'mar allohuen ñeñt e'ñe cohuen entetsa e'ñe pommo'cheñoñ ñeñña tsapatonetpa' amach esoshe'maye' entereto. Tarraña allohuen ñeñt ama esoshe'maye' entetso te' ñeñña tsapatonetpa' atarrcha' cohuen enteret.

¹³ 'Atarr nanac llequëntso'tsenes fariseoneshacha' ñaña samá ñeñtes e'ñe etsotayenayeñ ñoñets ñeñt atet anaret judioneshacop tarro'mar sapa' sommo'cheñoñe'na atarr seshcare'tyen. Tarro'mar ama't sapa' amaca'ye senteññañeña Yompor po'cohuenña, ellonetpa'cho'ña ðhocma sepatare'teñña po'potantañ ñeñt e'nene' Yompor po'cohuenña. Cha sa'npanpeñña acheñenesha' attoch ñetpa'cho'ña amach enterrñañeto Yompor po'cohuenña ñeñt atto atarr ayochreshattena ña pue'ntañoñ.

¹⁴ 'Atarr nanac llequëntso'tsenes fariseoneshacha' ñaña samá ñeñtes e'ñe etsotayenayeñ ñoñets ñeñt atet anaret judioneshacop, tarro'mar sapa' sommo'cheñoñe'na seshcare'tyeñ. Ama't rretorranesha'pa' ñeñte'naña seprratampesyenña pa'paquëll. Elloña e'ñe sommo'cheñoñpa' aña atarr semnen o'ch atet sepena ñerra'm atarr cohuen acheñres ñeñto'marña all sema'yochena allecma shontena acheñenesha'pa' amach tematenayaya sema'yocheno. Ñeñto'marña na te'pa' o'ch notas, sapa' elloña atarrcha' sa'coñchataretterra.

¹⁵ 'Atarr nanac llequëntso'tsenes fariseoneshacha' ñaña samá ñeñtes e'ñe etsotayenayeñ ñoñets ñeñt atet anaret tarro'mar sapa' sommo'cheñoñe'na atarr seshcare'tyen. Sapa' ðhocma sechopeñe'chyen erracmañen patso'mar, seþchatyena ama't ñaña sapa'mar. Ñeñtpa' añecpa atet sepena attoch same'ñatyasya ama't e'ñe puesheña'ttsa e'ñe sa soçtañña ñeñtes judioneshas. Ñeñt allpon same'ñatyenapa' ñetñapa' aña seyçhatyenanet ñeñt ama cohuenayaye ñeñt e'ñe atet sepena saña. Ñeñto'mar ñetpa'cho'ña ello atarr nanac o'patatarettenet coñcheñets, e'ñe epoche'ttsoçma so'patatenanet coñcheñets.

¹⁶ 'Atarr nanac llequëntso'tsenes tarro'mar ama't ñeñt ama seçhenoyo seyoçhro sañapa' ñeñtara seyçhateñña po'potantañeçhno. Ñeñtpa' e'ñe atet sepena ñerra'mrrate' aporo'yetcemas echa'nmannetsa. Ama't seyçhateneñ ñeñt po'ñoçhpa' amaca'ye atteyaye. Ñeñtpa' atet soteneñ: "Ñerra'm esesha' nene' po'ñoñ ñerra'm aña Parets pa'paquëll pa'so'chño nenan po'ñoñ saña ñeñtpa' cha soten aña' esoyaye ama pallteno o'ch e'ñe po'ñoç a'pocatan po'ñoñ." Tarraña po'poñpa' atet soteneñ: "Ñerra'mña añ oro pa'so'chño yena' yeñoñ ñeñt Parets pa'paclo'tsen allempoña po'ñoçhpa' ðhocmach e'ñe ya'pocatat yeñoñ." ¹⁷ Sapa' atarr otatsñaes, ama añeye'ña seçhenoyoña seyoçhro ñeñt cohuen enten Yompor. Chaca'ye sottena ñerra'mrrate' aporo'yetcemas. Ama't señoñeña atet sherben oropa' e'ñeca'ye attecma sherbenña ñaña Parets pa'paquëll. Tarro'mar allempo nete't oro Parets pa'paclo, ñeñña oropa' añca'ye e'ñe cohuen a'pocataye't Partsocop ñeñtara Partsopo'. ¹⁸ Ñaña po'poñpa' atet soteneñ: "Ñerra'm esesha' nene' po'ñoñ e'ñe altar pa'so'chño allecma neñet ñeñt amtsarettetsa Yomporecop,

ñeñtpa'cho'ña cha soten año' esoyaye, ama pallteno o'ch e'ñe po'ño'ch a'pocatan po'ñoñ." Tarraña po'poñpa' atet soteneñ: "Ñerra'mña añ pa'so'chño yena' yeñoñ ñeñt amsarettetsa Yomporecop ñeñt nenet altarro enot, allempoña po'ño'chpa' chocmach e'ñe ya'pocatat yeñoñ." Tarraña ama't atet sotatse'tyeneña' ñeñtpa' amaca'ye po'ño'choyaye. ¹⁹ Sapa' ama añeye' sechenoyoña seyo'chro ñeñt cohuen enten Yompor. Cha sottena ñerra'mrrate' aporo'yecemas. Ama't señoteñaña altarpa'cho'ña atarrca'ye sherben. E'ñe attecma sherben ñerra'mrrate' ñeñt amsarettetsa Yomporecop ñeñt nenet all altarro enot. Tarro'mar altarpa' ñeñtca'yeña a'pocatatene'ña Yomporecop ñeñt nenet all. ²⁰ Ñeñto'marña yeñoteñ ñerra'm esempo yenen yeñoñ altar pa'so'chño, ama e'ñe ñapta altar pa'so'chño yenenoña yeñoñ; añohuenca'yeña yenenña yeñoñ e'ñe pa'so'chño allohuen ñeñt na'yenet all, allecma sherba'yenet Yompor. ²¹ Ñaña ñerra'm esempo yenen yeñoñ Partsopo' pa'so'chño, ama e'ñe ñapta Partsopo' pa'so'chño yenenoña yeñoñ. Yompore'naca'yeña pa'so'chño yenenña yeñoñ tarro'mar ñapa' e'ñeca'ye ño pa'paquell. ²² Ñaña ñerra'm yenen yeñoñ Yompor pue'ntañ pa'so'chño, Yompore'naca'ye pa'so'chño yenenña yeñoñ ama't ñaña Yompor po'conañe'naca'ye pa'so'chño yenenña yeñoñ tarro'mar enetpa' Yomporca'ye po'conañ pene' tarro'mar allpa' allo'tsenca'yeña Yompor.

²³ 'Atarr nanac llequëñtso'tsenes fariseoneshacha' ñaña sa ñeñtes e'ñe etsotayenayeyñ ñoñets ñeñt atet anaret judioneshacop tarro'mar sapa' sommo'cheño'te'na atarr seshcare'tyen. Ora allohuen ñeñt senarenñ sepen ama't chocma sapueñeyñ Yompor allpon ñeñt pocetsa ñocop — mentapan, anísopan, cominopan—sapa' cha sepsenña ñeñt ñoñtsor ñeñt atet anaret ñeñtca'yeña ello nanac sherbets. Ñeñtpa' attoch e'ñe cohuen es sepa'yeñaña po'potantañ. Ñeñtña sapa' chaña sepseyñ. Ñaña attoch semueranna'ta ñeñtpa'cho'ña sañapa' chaca'yeña sepseyñ. Ñaña attoch po'ño'ch e'ñe cohuen same'ñañatena Yomporecop ñeñtpa'cho'ña sañapa' chaca'yeña sepseyñ. Sapa' e'ñe ñeñtñaña sepalltena. Ñaña atto chocma es sapa'yen Yomporecop ñeñtpa'cho'ña chocmach atet sepena amach cha sepsatstere. ²⁴ Sapa' ama't ama choye' chennaso seyo'chro ñeñta atarr semneñ o'ch sey'chach po'potantañ acheñenesha'. Ñeñtpa' e'ñe atet sepena ñerra'mrrate' aporo'yecemas echa'nmannetsa. Añ ñoñets ñeñt atet anaret socop ñeñt setseten e'ñe so'na socapña ama't ñeñtpa' atarr coñe'tot sherben Yomporecop, sañapa' ñeñfaca'ye atarr semneñ o'ch sey'chateñ po'potantañ. Tarraña añ ñoñtsor ñeñt atarr nanac sherbets Yomporecop, saña ñeñtpa' ama chennasoña seyo'chro ama't e'ñe mame-sha. Ñeñtpa' o'ch netma'ntacha atet ñerra'mrrate' ñeñt atarr es añe'toll allpon ñerra'm chopo'yetoll saña ñeñtpa' chaca'yeña seyorasoteñ tarraña ñeñtña atarr añecmuen allpon ñerra'm huaquësh* sapa' ñeñtñaña sañyen e'ñe atfa.

²⁵ 'Atarr nanac llequëñtso'tsenes fariseoneshacha' ñaña sa ñeñtes e'ñe etsotayenayeyñ ñoñets ñeñt atet anaret judioneshacop. Sapa' e'ñe se'pame'teneñña setaza enotpa' o'ponotñapa' ama se'parro'teñe. Seplatopa'cho'ña enota e'ñe se'pata'teñ o'ponotñapa' ama se'pata'teñe. E'ñe

* **23:24** Ñehua, Jesús añ toma'ntatanet camello ñeñt payara penet all pa'nyo, ñeñt e'ñe allpon ñerra'mrrate' huaquësh.

atet sepena saña. E'ñe sa'cohuentatena ñeñt' eno'mar ñeñt' atet seyçhena sa allochña'apa' attoch entenes allohuen acheñenesha' sapa' e'ño' cohuenes, tarraña o'pono seyoçhropa' amaca'yeña sa'cohuentateñe, allña'apa' e'ñe chorren shonte' sosya'tsañeçhno ñeñt' atto e'ñe seshquëñofe'na çhocma es sepratatñpesyen, atarr es seye'chapretannena, ñeñt'ña'apa' e'ñeca'ye socpa. ²⁶ Ñeñtes fariseoneshas, sapa' ama añeye' seçhenoyoña seyoçhro ñeñt' cohuen enten Yompor. Chaca'ye sottena ñerra'mrrate' e'ñe aporo'yeteemas. Socoppa' añca'yeña poctetsa, ñanomcha'ña o'ponot se'pame'tña setaza, seplatopa'çho'ña ñanomcha'ña o'ponot se'patach. Allochña'apa' o'ch e'ñe cohuenta emoshernto'mar.

²⁷ Atarr nanac llequëntso'tsenes fariseoneshacha' ñaña sa ñeñtes e'ñe etsotayenayeñ ñoñets ñeñt' atet anaret judioneshacop. Sapa' e'ñe attes ñerra'm apampaña ñeñt' a'hullama'ttanpenet. Eno'tpa' e'ñech cohuen orrtenañ. O'ponotña'apa' e'ñech chorren arromña'ap ñaña pa'namen ñeñt' nanac sosey. ²⁸ Sapa'çho'ña e'ñerramche' attesña saña. Po'ñoçhca'ye ñeñt' atet sorrtyen acheñenesha'ña'apa' e'ñe atet entenset ñerra'mrrate' sapa' e'ñe cohuenare' es sepa'yen. Tarraña o'ponoña seyoçhropa' e'ñe aña shontetsa alloch sommo'chyena, atarr seshcare'tanna'tyena, pa'namen sorrtyen ñeñt' ama't mamesha ama cohuenaye' entapretenso Yompor.

²⁹ Atarr nanac llequëntso'tsenes fariseoneshacha' ñaña sa ñeñtes e'ñe etsotayenayeñ ñoñets ñeñt' atet anaret judioneshacop tarro'mar sa te'pa' satomaten enot ñeñt' atarr cohuen senten sa all pampa'yesete't ñeñt' a'mta'yesaye't Yompor po'ñoñ. Ñaña añe'na sa'cohuentam'pesyen all pampa'yesete't ñeñt' acheñeneshar ñeñt' e'ñe pocte' es pa'yesete't. ³⁰ Saña te'pa' atet sotyeneñ: "Ñerra'm allempocmach ye'ñalletañ allempo corre't yatañneshañ, atto ñetpa' muetsanachete't ñeñt' a'mta'yesaye't Yompor po'ñoñ, yañapa' amate' eso'mar yemtsapretaneto." ³¹ Ñeñt' atet sotyeneña' te'ña e'ñe sa señoño'tpa' o' sa'metam'psa e'ñe sañeña po'ñoçh sapa' po'mrenñesca'ye ñeñt' muetsanataye't ahuat ñeñt' a'mta'yesaye't Yompor po'ñoñ. ³² Ñeñto'marña sa te'pa' ñeñtaca'yeña e'ñe setsoteññañ satañneshañ ñeñt' allpon sosya'tsañeçhno ñeñt' e'ñe motetnomnas ahuatoteñ e'ñe sa satañneshañ.

³³ Sapa' ama cohuenayayso atarr ashcarñates, çha sottena ñerra'mrrate' shechpa sompor sepen. Sapa' errotenohuachñaca'yeña sequeshperrate'. Sapa' añaca'ye so'patenaya coñcheñets ñeñt' parrare' tso' all o'pono. ³⁴ Ñeñto'marña te' napa' o'ch nemñernnas ñeñt'cha' a'mta'yerre' neñoñ, ñaña ñeñt' atarr eñotañ nepa'yen, ñaña ñeñt' atarr etsotayene' neñoñ ñeñt' atet anaret ahuatoteñ. Tarraña saña ñeñt'pa' çhachca'yeña semtsanatuerrnan ñeñt' patanta'tets, po'potantañña'apa' e'ñech secorso'tam'pesuerrnan. Po'potantañña sapa' çhach senalle'tyesuerrnan e'ñe all sa seprahuo'mar. Atarr se'moñe'tenanet ñeñto'marña çhocma soçtare'tenanet anetso't o'ch sa'yetatuanet ñetña'apa' o'ch ahuanemyeset po'poñ anetso'mar. ³⁵ Attoca'yeña ora allohuen ñeñt' e'ñe pocte' es pa'yestse't ñeñt' amtsanatyese'rettatse't ashataretetyesete't po'rras, saña'apa' allempoteñ e'ñe sa'yohuarettena ama't teme'tsen, sa ñeñtes corretsa te', ama't allempoteñ amtsare'tta Abel ñeñt' ama es yeçchatetso ama't coñe'ta tarremphua allempo semtser ñaña Zacarías ñeñt' Berequías puechemer. Ñeñt'ña sapa' alla semtser Parets po'ponro puecha'petarot allo'tsen altar allotecma sherbete't Yompor. Ama't

allohuen ñeñt amsanatyesearettatset allempo sañapa' e'ñe allempoteñ sa'yohuaretterra. ³⁶ Po'ñoçhca'ye notenes, acheñenesha' ñeñt corretsa te' ñetñapa' atsa'tataretterretcha' e'ñe ora allpon atserrpatsetyesonete't ñeñt e'ñe pocte' es pa'yestset Yomporecop.

Atto Jesúsapa' puellquëñoñan jerusaléño'marnesha' atarr ya'na'tosanet (Lc. 13.34-35)

³⁷ Te'pa' e'ñe nellquëñoñ o'ch notas sa ñeñtes jerusaléño'marneshas, ñeñtes muetsanatyeseaye't ñeñt a'mta'yeseaye't Yompor po'ñoñ, sa ñeñtes rrollapechyesaye't ñeñt amñarettatset sesho, te'ña napa' o'ch notas: Napa' atarr atonoche'tats nemneñeñ o'ch na'yapaçha'huerrsoñ allohuenes nesho attoch e'ñe cohuen necuampensoñ. Nemneñeñ o'ch na'yapaçha'huerrses atet ñerra'mrrate' atollop a'yapaçhene' puechyoresha' o'ch e'ñe seto'tuanet. Tarraña sañapa' ama't e'ñe mameshapa' amaña semno. ³⁸ Te'ñapa' all seyçhena sa, Yomporñapa' o'ch a'ypo'ñerres. ³⁹ Tarro'mar te'pa' o'ch alla noterrerr: Na po'pocheño'pa' amach alla senterrne'te. Esemphuañeñapa' senterrencha', allempoñapa' atetcha' soterren: "Aye'choçhtatpahuëpa'ch Jesucristo ñeñt huapatsa ñeñt llesensen Yeyomporer."

24

Atto Jesúsapa' eñotatanet e'ñech a'mata'taretetuerra Partsopo' all Jerusaléño

(Mr. 13.1-2; Lc. 21.5-6)

¹ Jesúsñapa' çha'nerrerr Parets pa'paclo't. Alla ahuenerr allempoñapa' ponemña pueyochresha'. Ñetñapa' allenta cohuatyeset ñeñt atarr coçhnesha'tyetsa allo orratarettena Partsopo'. ² Allempo Jesúsapa' atet otanet:

—Ama't senteñeñ ora allohuen ñeñt coçhnesha' tarraña napa' o'ch notas: Po'ñoçhca'ye çherrcha' allempoch e'ñe a'mata'taretetuerra. Ama't e'ñe puenñarra mapyetpa' amach a'puerroña all allo orratenet Partsopo' e'ñechca'ye poctacma a'coye'taretetuerra.

Atto Jesúsapa' eñotatanet shonte'ch entyerret pa'namen ñeñtcha' eñotaterahuet o' çherrmoch allempoch mellapoterra

(Mr. 13.3-23; Lc. 21.7-24; 17.22-24)

³ Ñeñta otuanenanetpa' allenta ahuen Olivoño. Allñapa' anorruien, pueyochresha'ñapa' o' alla huacherrñañeterr, e'ñe ñap'ochayet. Ñetñapa' atet otuererr:

—Yapa' yemneñca'ye o'ch potey ¿esempo'tcha'ña atet perra? Ñaña ¿eso'tcha' yentyerrña ñeñtcha' yeñotaterre' allempoch pehuerrmocha o'ch mellapoterra?

⁴ Jesúsñapa' atet otanet:

—E'ñech seño'terra, allochñapa' amach esesha' seshquërraye. ⁵ Tarro'mar shonte'ch orrterrtsa ñeñtcha' ayçha'nataterre' neso'cheñ, ñeñtcha' otyerrets: "Napa' ñeñtenca'yeña Cristotets." Ñetñapa' shonte'ch shequëret acheñenesha'. ⁶ Ñaña allempoña sapa' se'mare'tyerrcha' o' quellareñtsotyerr allampaño'mar, ñaña se'mare'tyerrcha' o' quellareñtsotyerra ora erraparen anetso'mar. Saña allempopa' amach çha seyorenatsto ama't e'ñe mamesha. Ñeñtapa' atetcha'ca'ye e'ñe po'ñoçh perra. Tarraña allempopa' amach çhena' allempoch

e'ñe mellapoterra. ⁷ Pa'namen acheñ ñeñt e'ñe po'poñe'ttsocma mereñtsoretpa' ñetpa' quellaranna'terretcha'. Ñaña pa'namen anetsof ancha'taretechnopa' quellaraterrancha' pueyochreneshačno. Orrterrach allemeñ muecheñets o'ch e'ñe chaporrñatsotyerr erraḡaren. Ñaña orrterrach pa'namen atsnañtsočno ñeñt atarr apatanna'tpo'. Pella'yerrach pats ora erraḡaren. ⁸ Ñeñt atet o' notuas te'pa' ñeñtña allempopa' ñeñtcha'ña ñanom muerochtaterrahuetña allempo.

⁹ Allempoña sapa' pomuerrsetcha' attoch erroḡuanen perrset allcha'ña muetsatyerrset. Atarrcha' e'moñe'terres allohuen acheñeneshačno tarro'mar sapa' naca'yeña e'ñe same'ñena. ¹⁰ Ñaña shonte'ch acheñ allempo ñeñtcha' quechpuerre' Yompor. E'ñe ñagattsetapa' e'moñe'tanna'terretcha' attoḡcha' pomatatanna'tyerret. ¹¹ Ñaña allempopa' orreyerrach shonte' ñeñtcha' aycha'naterrtsa ñetpa' año' a'mñenet Yompor po'ñoñ. Tarraña po'ñoḡ amach Yomporeye' po'ñoñ a'mterreto, ñetpa' attachña shequëretña shonte' acheñenesha'. ¹² Allempopa' atonterrach erraḡaren pa'namen sosya'tsañečno allochña atarr atpare'terrñañet Yompor po'ñoñ. Ñeñto'marña shonte' acheñpa' o'huañcha' allo'na morrentanna'tnenet. ¹³ Tarraña ama'tcha' erroḡuanen aḡaretterret, esesha'ch e'ñe ahuanta'huanmue' ñeñtcha' ama nequechpuerraye, ñeñtña'pa' ñeñtcha'ña a'quesḡataretterrtsa. ¹⁴ Ñaña allempopa' añ cohuen ñoñets atto ayochreshattena Yompor ñeñtcha'ña ñanom serrpare'tatyeretña acheñenesha' ora erraḡaren allohuanen añe patsro. Attoḡña eñotateretña ora allohuen pa'namen acheñenesha' ñeñt po'ñoḡ atet oteney Yompor. Allempochna po'ñoḡ mellapoterra.

¹⁵ Ñehua, ahuat Daniel ñeñt a'mñtaye't Yompor po'ñoñ, ña po'quellcopa' atet ote't: "Cherrcha' allempo ama't ñeñt ama masosyaye' enteno Yomporpa' ñeñtña'pa' cherrcha' all ama't ñeñt e'ñe Partsocpa anareteñ. Ñeñtpa' ñeñtacha'yeña e'ñe a'chencatuerrahuet." Ñehua, ñeñtcha' lleyerre' añ ñoñetspa' ñetña'pa' eñoteretepa'ch. Ñeñto'marña ñerra'm esempoch senter o' chap all ñeñt e'ñe Partsocpa anaretpa' ¹⁶ allempoña ñeñt allpon Judeo'tsa'yen ñetña'pa' allorocmuepa'ch yetrra'terret, ahuanerretepa'ña aspentareronef. ¹⁷ Atet ñerra'mrate' puesheña'tets ñato' ñetña allempopa' eno'tsa'yenetcha' pa'pacllato, ñetña'pa' sohuete'pa'chña tecma tarraña amachña be'tosatsetnomuetoña po'ponreto attoch yoratsre'tnomuet. ¹⁸ Ñaña puesheña'tets ñeñt pa'mro'tsenpa' allempoña ñetpa' amachña onatsterreto attoch erreta' pa'shtamuet. ¹⁹ Allempopa' atarrcha' llequëñets añecop ñeñt achomenare' coyanesha' ñaña ñeñt allohuen emaretetolleshačno. (Tarro'mar ñocpuetpa' atarr torrapo' attoch yetrra'tet ñamet.) ²⁰ Ñaña Yomporcha'ña sema'yocha allochña'pa' amach cha huapoto allempoch seyetañpesya ñaña amachca'ye añ yetro seyetatsto allempocma samesen. ²¹ Allempopa' orrterrach muerochteñets ñeñtcha' atarr muerochtaterre' allohuen acheñenesha'. Ñeñt ama't ahuatapa' ama puemurochtareto atet atarr nanac huomenc. Ama't allempoteñ e'ñe errete' ayeḡcataretta añ patser ama puemurochtareto atet. Allempoña ello'pa' amach atet alla muerochterrete'te ama't errponaña. ²² Allempoch atarr amurochtataretterret. Tarraña allempoña Yomporpa' ñach oterrets te'pa' allohuach. Ñerra'm amach oto

allohuachpa' allempoña ama't puešeñarrapa' amach esesha' queshper-
tso. Tarraña ñeñña ame'ñenaya ña ñeñt acrenpa' ñocpuetña'pa' oterrrcha'
te'pa' allohuach.

²³ 'Ñehua, allempoch orameñ muerochteñetspa' ñerra'm esesha' sote':
"Arro'tsenca'yeña Cristo", amapa' o'ch otaset: "Tarro'tsenca'ye Cristo",
sañapa' amach same'ñatstaneto. ²⁴ Orreyerrachca'ye ñeñcha' otyerrets
ña'pa' ño'ña Cristotets. Tarraña ñeñpa' attachca'ye shecare'tyerranña
acheñenesha'. Orreyerrach ñaña ñeñcha' otyerrets ñapa' ño'ña
a'mtene'ña Yompor po'ñoñ, tarraña ñeñpa'cho'ña e'ñech attecma
shecare'tyerran acheñenesha', amachña Yomporeye'ña po'ñoñ a'mteno.
Ñeñcha' atet shecare'tyerrets, ñetña'pa' orrtatyerretcha' ñeñt ama't
ahuata acheñenesha'pa' ama puentare, attochña cohuanrrortateretña
acheñenesha'. Ama't ñeñt Yompor pa'carnesharpa' mueneñetañcha'
ñeñte'nachña shequërret. ²⁵ Señoche'pa'ch ama't ama chena'
muerochteñetsopopa' napa' o' e'ñe notuas sa. ²⁶ Ñeñto'mar te'pa' notenes:
Ñerra'm allempoch atet oterrrset: "Tarro'tsenca'yeña Cristo a'yo all
amayo", sañapa' ñato'tña sesena'ña all o'ch senteña'. Amapa' ñerra'm
atetcha' oterrrseterr: "Tarro'tsenca'ye Cristo o'pono pocollo", sañapa'
ñato'tña sesena'ña all o'ch senteña'. ²⁷ Tarro'mar ñerra'm esempo
cherr allempoch nohuerra na Ñeñten Acheñetosets e'ñe allohuen
acheñenesha'pa' entapuerrnetcha' tarro'mar allempopa' atetcha'
ne'pater ñerra'mrrate' meratste', o'ch meratsta huomen'pa' e'ñech
a'puetaresuan ora enet erra'paren, ama't allot huena atsne' ama't e'ñe
allohuanen emuena. ²⁸ Ñeñpa' e'ñechca'ye atet perraña ñeñt atet senten
te' ñerra'm erro'tsen ñeñt rromuepa' allcha'ca'yeña shonterraña tse'm.

Atetcha' perra allempoch huerra Cristo Ñeñt Acheñetosets
(Mr. 13.24-37; Lc. 21.25-33; 17.26-30, 34-36)

²⁹ 'O'chña huañerr ñeñt muerochteñetspa' allempoñapa' e'ñech
allorocma mayerr atsne'. Arrorrrpa'cho'ña o'huañcha' atsnom.
Rantochnopa'cho'ña shorcha'terrcha' entot. Ñaña ñeñt huomenc
orra'yetsa ento te' allempoña ama't ñeñpa' pella'yerrach.
³⁰ Allempoñapa' orrterrach ento ñeñcha' seño'taterre' naca'yeña o'
nohuerra Ñeñten e'ñe Acheñetosets. Allempochña nanac llecanrrorterra
allohuen pa'namen acheñenesha'chno ñeñt a'ñe patsro'tsen.
Entapuerrnetcha' na Ñeñten Acheñetosets o'ch nesuam'perra osot
e'ñe entot. E'ñe nepartsoteñohuen e'ñech necohuenteñesha' nohuerra.
³¹ Nemñercha' nemllaño'eññaneshar ñetcha'ña poctora'nerrtset atarr
huomenc. Ñetcha'ña a'yapa'cha'huerret allemateñ ñeñt acren Nompor
nocop e'ñech pa'tatsshemto'marohuen allotecma orrnotena. E'ñech
allemateñ a'yapa'cha'hueretcha' e'ñe allohuanen añ patsrot.

³² 'Ñaña te'pa' señoche'pa'ch ñeñt atet pena higoch. Ñehua, es-
empoch senteñ higoch o'ch em'cachyen puetacretollesha' allotcha'
o'ch alla tapna'tyerrerr pasopaner, sañapa' ñeñcha'ña seño'tatene' o'
chenmoch allempoch huorateterrerr. ³³ Attecma'ch perra ñerra'm esem-
poch sentyerr ñaña ñeñt allpono' notuas, sapa' ñeñcha'ña seño'taterre'
po'ño'ch o'ca'ye cherrmoch allempoch e'ñe etsuerra, o'ca'ye e'ñe al-
lame'ttsamerra. ³⁴ Napa' po'ño'ch o'ch notas, acheñenesha' ñeñt e'ñe
corretsa te' ñetña amach e'ñe rromhueneta'pa' allempocmach e'ñech

etsoterra allohuen añechno. ³⁵ Esempohuañen añ enet ñeñt senten te'pa' e'ñech chenca'huerra; patspa'cho'ña attecnoch perra e'ñech chenca'huerra. Tarraña naña neñoña' amach chenguërro ama't e'ñe ahuata.

³⁶ 'Tarraña ñeñt yetroch nohuerrapa' ñeñña' ama eseshaye' eñotenaye. Ama't erro'tsente' atsne' ama't erro'tsen tsapro ñeñpa' ama't mellañoteñesha' ñeñt pue'ntaño'tsa'yen ñetpa'cho'ña ama't puesheñarrofetapa' amaña eseshaye'ña eñotenaye allemPOCH nohuerrerr po'pocheño. Ama't na ñeñfen Yompör Puechemeren napa'cho'ña te'pa' ama neñoteñe, ñapaña Nompör Parets eñotene'.

³⁷ 'Tarraña allemPOCH nohuerra po'pocheño na Ñeñfen Acheñetosets, allemPOpa' e'ñech atet perret e'ñe atet pete't ahuat allemPO corre't Noé. ³⁸ Ñehua, allemPOpa' ama es puecha'yeneto aña e'ñe cotape'chete't atto atarr pa'namen muenenet ñeñcha' rra'yenet, orrare'tyesete't, sena'tanatyena yacmaneshachno, coyanesha'chnopa'cho'ña apanatyese'te't ñeñt yoranatyesehuate't. Ñetña' ñeña e'ñe cohuen entete't. Atteña' chap allemPO be'tosos Noé po'huarcopahuo. ³⁹ Ama es puecha'yese'te't machayotepa'tcha' cho'pa oñ erracmañen, attoña aña yanatuerranet oñ allohuenet. Attecnoch perra ñerra'm esempoch nohuerra na Ñeñfen Acheñetosets. Machayotachca'ye nohuerra. ⁴⁰ Ñaña allemPOpa' atetcha'ca'ye perra; puesheña'tetspa' anmare'terrach; ama't ñeñt e'ñe pamo'ts pannenetañ ñeñña' allach asa'nmare'terra. Ñato' allemPOpa' allo'tsencha' epsheña yacma pa'mro, puesheñarrña' anmare'terrach po'psheñeñña' allach asa'nmare'terra. ⁴¹ Amapa' ñato' allemPO allo'tsencha' epsheña coyanesha' ñeñt parro puetse'tets mapyo, ñeñpa'cho'ña puesheñarpa' anmare'terrach po'psheñeñña' allach asa'nmare'terra.

⁴² 'Ñeñto'marña te'pa' o'ch notas: Chocmuepa'ch seño'sertenna tarro'mar sapa'cho'ña ama señotenno esempoch nohuerra na ñeñfen e'ñe Separtseshar sepen. ⁴³ Napa' e'ñech machayota nohuerra atet pena eñe't allemPO atta es sepcha'yena machayotach huaponasa o'ch yoratsre'tensa'. Tarraña sa ñeñtes apacllates señoche'pa'ch ñerra'm señoteñeñ e'ñech esempo tsapro huaponasa eñe't, sapa' chochña seño'sertenañ attoch amach semnacheña o'ch toram'psas sepaclo o'ch be'tosam'psasa o'ch yoruennasa' ñeñt allpon semorrentyena. ⁴⁴ Ñeñto'mar notenes sapa'cho'ña chocmuepa'chña seño'sertenna tarro'mar allemPOCH atta es sepcha'yenapa' allemPOCHña nohuerra na Ñeñfen Acheñetosets.

Atetcha' aparetterra ataruasañ ñeñt e'ñe cohuen etsotene' atet yecheña pamo'mte' ñaña atetcha' aparetterra po'poñ ataruasañ ñeñt ama etsotaye ñeñt atet yecheña pamo'mte'

(Lc. 12.41-48)

⁴⁵ Jesúsña' alla toma'ntaterraneterr po'poñone't, atet otterraneterr:

—Allohuensapa' atetcha' sepa e'ñe cohuen atet ñerra'mrrate' puesheñar yacma ñeñt atarr ame'ñañatetsa ñaña e'ñech eñotenan ñeñt atarr sherbets. Ñeñña yacmarpa' añ yechenaya pamo'mte' e'ñe alla pa'paclo. Añcha' po'taruas pen chocmach apa'yesan allohuen po'potantañ pamo'mte' pa'taruasañer puerraret allpon ñeñt poctetsa puesheña'tsocop. Ñapa' attecnoch penanet, chocmach apuenanet

ñerra'm esempoch çherrerr allempo atet anaret ñocop o'ch alla apa'yerraneterr po'pocheño. Ñapa' çhocmach atet pena amach queçhpuenaneto tarro'mar ñapa' e'ñe eñoteñ attoch e'ñe coshatenan pamo'mte'. ⁴⁶ Ñeñña ataruasañpa' atarrcha' coshatapuerran pamo'mte'. Ñerra'm esempoch huerra o'ch alla entuenan pa'taruasañer ama çho queçhpuenanano ñeñt po'taruas apa'neñ ahuañmo'chofeñ. ⁴⁷ Po'ñoçh o'ch notas, ñeñña yacmar atarrcha' coshatueñ pamo'mte'. Añcha' coshaterre' o'ch nohuer añcha'taret ñeñtcha' cohuanpsaprete' ñeñt allpon echyen pamo'mte'. ⁴⁸⁻⁴⁹ Tarraña ñeñña ataruasañer allempo ama huerra' pamo'mte' ñerra'm ñapa' atta oten pueyoçhro, namo'mte'pa' amach ahuen huerro, allempoña ñapa' çhach ashtapechyenan ataruasañeçhno ñeñtcha' rratañ. Ñañapa' ñerra'm attach allemeñ rrapretyen ñaña attach orrare'tapretyen allcha' atarr posa'tare'tyen, ñeñña ataruasañ atetpa' ama't mameshapa' ama cohuenayaye. ⁵⁰ Ñeñña ataruasañer ñerra'm ñapa' attach ottatse'tyena amach es puecha'yeno amach eñoteñe ñeñte yetroch huerra pamo'mte' ama't erro'tsencha' yetro huena. ⁵¹ Machayotachña huerra pamo'mte'pa' atarrcha' coñchatuer, allach mueñuer all ñeñt o'patenaya allohuen ñeñt po'ñoçh ama ame'ñetso ñeñt atta shecare'tyets. Allñapa' allcha' yahuanrrorterret panmueñoet atserrpa' rraso'tyesosetcha' pa's.

25

All atma'ntatare'tta ñeñt atet pena çharrasheña shopshare'

¹ Jesúsñapa' alla yeçhaterraneterr, ñeñtpa' atet otanet:

—Allempoch añcha'tare'tterra Yompor ñeñt pue'ntañotsen allempoch nohuerra na, ñeñña allempopa' atetcha' perra e'ñech atet ñerra'mrrate' çharrasheña shopshare' ñeñtcha' tatsa allcha' cohuet allempoch huerranet ñeñt e'ñe errte' sena'tetsa. Ñetñapa' anomyeset po'lampareñ alloch poctapueñet ñerra'm esempoch huerra. ²⁻⁴ Ñeñña amnarsheña ñetpa' atta es puecha'yenet ñeñto'marña ama anmuetoña po'poñ aceite' alloch a'huortaterret po'lampareñ allempoch huañ ñeñt anmampsset po'lampañeño. Po'potantañ amnarsheña ñetpa' atarr eñotenet attoch eñose'rteñet e'ñe cohuen, ñeñto'marña ñet e'ñe ellonetpa' anomyeset aceite' puetellño alloch a'huortaterret po'lampareñ ñerra'm esempo huañapset ñeñt po'lampareñeño'tsenet. ⁵ Allña ñetpa' cohueñet, ama ahuenaye' huerranetoña ñeñt sena'tetsa. Ñetña all machayota moñe'tyesetpa' çhepa'tcha' manrra'tuatset. ⁶ O'ña ñarenen tsappa' allempoñapa' machayota e'muet rranarets, ñeñña' atet oten: “Tayaca'yena huennasaña ñeñt sena'tetsa ñeñt atarr secuen. Secha'nomñaca'ye' o'ch sepocteñ.” ⁷ Allempoñapa' allenta tantra'tuaña allohuen shopshare' ñetñapa' a'cohuenetyeset po'lampareñ. ⁸ Amnarsheñaña ñeñt ama yerpa'pesnomaye aceite' ñetñapa' atet otare'chet po'potantañ amnarsheña ñeñt çhocma anmue' aceite': “Te'pa' o'ch socya'y yaña aceite' ñeñtcha' ya'huortatnom. Yapa' o' maya'huaña yelampareñ.” ⁹ Ñeñña e'ñe cohuen eñotene' eñose'ratsapa' ñetñapa' atet ochetña po'poñ amnarsheña ñeñt enamuenahuet aceite': “Amachca'ye yocyasos te't yehuañapen yaña. Sapa' arrña seta all pomueñet o'ch serañteña' samña socop.” ¹⁰ Ñet

ahuanmatset o'ch rañfeñeta'pa' ñeñña sena'tetsapa' e'ñe allorocma chen. Ñeñña po'poñ amnarsheña ñeñ e'ñe po'ño'ch chocma eñose'rtetsa, ñetñapa' be'toscha'tet parro epuet ñeñ sena'tetsa. Allñapa' allcha' atarr coshame'tapreteret. Allñapa' e'ñe echarr yottam̄pset. ¹¹ Allña e'ñe o'chtatsapa' o' hua'cherraña po'potantañ amnarsheña shopshare' ñeñ ahuanmatsa ñorra'. Ñetñapa' atet otuerret: "Petoram̄psaye'chapuerrey Nepapareshacha'." ¹² Ñaña'pa' atet otapuerret: "Te' napa' o'ch notapuerres, sa amaca'ye po'ño'chaye' seyemtenno."

¹³ Jesúsñapa' alla otterranerr ñeñ e'mñotene':

—Ñeñto'marña na te'pa' o'ch notas: Sapa' chocmuepa'chña e'ñe cohuen seño'srtena, tarro'mar sapa' amaca'ye seño'teñe erra'tsencha' yetñatsro allempoch nohuerra na Ñeñen Acheñetosets, ñaña erro'tsencha' yetro ama't ñeñpa' ama seño'teñe.

All atma'ntataretta ataruasañe'chno ñeñ aparettatsa puesheña'tets quelle ñeñ otenet talento

¹⁴ Jesúsñapa' alla ye'chaterraneterr po'poñ, ñeñpa' atet otterraneterr:

—Allempoch añcha'taretterra Yompor ñeñ pue'ntaño'tsen allempoch nohuerra na, ñeñña allempopa' e'ñech atet perra ñerra'mrrate' puesheñarr yacma o'ch ahua' ñachayo. Ñeñña yacmarpa' o'ch agotnoman pa'taruasañrenesha'pa' o'ch apa'yesnomanet quelle ñeñ allpon echen; ñetñapa' o'ch cohuan̄psoñet tarremphoach esempohuañencha' huerra.

¹⁵ 'Puesheñarrpa' apa'neñ amnarmeta talento, ñeñpa' atarr shonte' quelle allpon ñerra'm amnar mil. Ñapa' añecop apa'neñ attoch ellopa' o'ch atontatan po'patronar po'çllayor. Po'psheñeñpa' apa'neñ epmeta talento, ñeñpa' allpon quelle allpon ñerra'm epa mil. Po'psheñeñpa' apa'neñ puemetarr talento. Ñeñpa'cho'ña allpon quelle ñerra'mrrate' paterr mil. Ñehua, puesheña'ttsetpa' e'ñe allpona apa'yesnomanet ñeñ e'ñe allpona eñotyenet attoch ellonetpa' atontatet quelle. Ñeña apa'yesuanmanetpa' ñaña'pa' allenta ahua' ñachayo. ¹⁶ Ñeñ agapue' amnar mil ñaña'pa' allorocma ahua' allcha' taruasatan quelle; attoña ellonetpa' o' alla ganerrerr po'poñ amnar mil quelle. ¹⁷ Atet pa' ñaña ñeñ agapue' epa mil. Ñapa'cho'ña ellonetpa' ganerrerr po'poñ epa mil quelle. ¹⁸ Tarraña añña ñeñ agapue' paterr mil ñaña'pa' allenta anem̄ allcha' pampueña'; atto'ca'yeña ñapa' cha e'potañña quelle.

¹⁹ 'O'ña atomatpa' o' huerranetña po'patronaret, allenta agotatuerranet attoch entuerranet po'taruas erro'tente' taruasa'yeset e'ñe puesheña'ttset. ²⁰ Ñeñña agapue' amnar mil ñaña'pa' huapapa' apapuenan po'patronar po'poñ amnar mil quelle, ñeñpa' atet otapueñ: "Añña Nompocha' ñeñ p̄apa'nmuen amnar mil quelle ahuaña, napa' elloca'ye neganerrerrña peçllayoro' po'poñ amnar mil quelle." ²¹ Po'patronarpa' atet och: "E'ñe pocte' neyochrecha'; p̄apa' atarr cohuen pesherbeneñ. Papa' e'ñe cohuen petsoton ñeñ atet notnomuep̄. Ama't allponatolla napa'nma'p̄ ahuaña, p̄aña'pa' atarro't cohuen pesherbatoñ. Ñeñto'marña te'pa' o'ch nenuerrep̄ pach necuan̄psapreterre' ñeñ atarr aton. Te'ña papa' pebe'tos allcha' atarr p̄ochapreterra." ²² Allempoñapa' ñeñ agapue' ñaña epa mil, ñapa'cho' huapapa' apapuenan po'patronar po'poñ epa mil quelle.

Ñapa'cho'ña atet otapueñ: "Nomporcha' ñeñt' ñapa'nmuen ñaña epa mil, napa'cho'ña ellocaye neganerrerrña peçllayoroť po'poñ epa mil quelle." ²³ Ñapa'cho'ña po'patronarpa' atet och: "E'ñe pocte'; ñapa'cho'ña atarro't cohuen pesherbened. Papa'cho'ña e'ñe cohuen petsoton ñeñt' atet notnomuep. Ama't allponatolla napa'nmañ ahuaña, ñaña'apa' atarro't cohuen pesherbaton. Ñeñto'marña te'pa' o'ch nenuerrep ñaña pach necuanpsapreterre' ñeñt' atarr aton. Papa'cho'ña te'pa' pebe'tos ñaña allcha' atarr pöcshapreterrna." ²⁴ Allempoñapa' huapa ñaña ñeñt' agapue' paterr mil quelle. Ñaña'apa' atet otapueñ: "Napa' ñeñoteneñ Nomporcha'. Papa' amaca'ye matsrre'mña; ñapa' çhocmaca'ye peprratam pesyen ama't ñeñt'pa' ama poyaye ñaña çhocmaca'ye pöcsechatyenña ñeñt' ama ñaye' nare'tatyenaye; çhocma es ña'yapaçha'yen ama't ñeñt'pa' amaca'ye ñaye' na'yenaye. ²⁵ Ñeñto'marña napa' çha nemçha'teneñ. Ñeñto'marña ñeñt' ñapa'nmuen ahuaña paterr mil quellepa' ñaña'apa' çha nepamponañ. Te'ñapa' o'ch alla napapuerrep ñeñt' e'ñe pö." ²⁶ Allempoña po'patronarpa' atet och: "Paña po'ñoçhpa' amaca'ye cohuenaye' pesherbenedo ama't mamesha; atarrca'ye quellañtsoñ. Ñerra'm e'ñe po'ñoçh peñotenoñ çhocma es neprratam pesyeneñ ñeñt' ama noyaye; ñerra'm po'ñoçh çhocma nocsechatyeneñ ñeñt' ama naye' nare'tatyenaye; ñerra'm po'ñoçh çhocma es na'yapaçha'yeneñ ñeñt' ama naye' na'yenayñe, ñerra'm e'ñe po'ñoçh atet pentenoñpa' ²⁷ eso'maruañaca'ye amaña bancoye' penennanoña neçllayor alloçhña'pa' te'ña o' nehuerrapa' nagaphuerreñcha' ñaña allo atontatonet neçllayor." ²⁸ Allempoñapa' atet otan ñeñt' tomçha'tyets all: "Te'pa' çhosa puerratam perre'ña ñeñt' paterr mil quelle o'ch sapuer ñeñt' echene' çharra' mil quelle." ²⁹ Ñeñto'marña te' napa' o'ch notas: Ñeñt' es echets shonte' e'ñe puesherbateñoťet pamo'mte', ñetña ellonetpa' o'ch alla aparetterret po'poñ aton. Tarraña ñeñt' ama es echetsopa' ama't allponatolla ñeñt' echyenetañ aprratam psaretterretcha'. ³⁰ Ñaña añ ataruasañer ñeñt' ama nesherbene'ye, te'ñapa' çhosaña huapore'te' a'yot checmetoť. Allña'apa' allcha' yahuanrrortenet panmueñoťet atserrpa' rraso'tyesosetcha' pa's."

Allempoch ellopa'tetstataretterra ñeñt' toma'ntenaya carrneroçhno ñaña ñeñt' toma'ntenaya cabraçhno

³¹ Allempoch nohuerra na Ñeñten Acheñetosets, nohuerrach e'ñe nepartsoteñoñhuen epan allohuen nemillañoťeñnaneshar. Allempopa' nanorruerrcha' neconaño allcha'ña e'ñe nepartsotuerr e'ñe necohuenteshasha'. ³² Allempoñapa' e'ñech nesho apçherra allohuen pa'namen acheñ ñeñt' yeçha'yetsa arr patsro. Allempochña nellopa'tetstateranet e'ñe atet pena ñeñt' pamo'mte' pen carrnero, ñaña'apa' o'ch ellopa'tetstatenan carrneroçhno ñaña cabraçhno. ³³ Acheñeshasha'ña ñeñt' e'ñe cohuenpa' ñetña'apa' necohuenrotcha' nenuerranet ñeñt' e'ñe atet ñerra'm carrneroçhno. Ñaña ñeñt'ña ama cohuenayayepa' ñetña'apa' neçcoterotach nenuerranet ñeñt' e'ñe atet ñerra'm cabraçhno. ³⁴ Ñaña allempoch atarr na'mcha'taretterrapa', atelucha' noter ñeñt' necohuenronte'tsa'yen: "Sapa' sonaçha't allohuenes țarro'mar Nompör o'ca'ye atarr bensare'tamperres. Te'ña sapa' o'ch saguërr ñeñt' o'patatensa ahuatoteñ. Ama't allempoteñ

Nomporpa' errte' yechcatene' pats sañapa' allempoteñ o'patatasa atfoch sa'nicha'tarettapretera. ³⁵ Tarro'mar napa' allempo nachporre'tpa' saca'yeña nerratallme'chaye't. Allempo ne'chapue't sesho all ama nentare sañapa' 'chocma e'ñe cohuen sagapne't. ³⁶ Allempo nemuelle'tpa' saca'yeña nepashtaye't. Allempo natsna'te'tpa' sañapa' 'chocma secuan'pesne't. Allempo yottan'pesnete'tpa' saca'yeña e'ñe cohuen nemo'taye't." ³⁷ Allempoña ñeñt e'ñe cohuen es ne'pa'yesaye'tpa' ñetñapa' atetcha' oterrnet: "Ta'm Partseshacha', ¿esempo'tña yentape't allempo pachporre't allempo yerratallme'chape't? ¿Esempto'tña yentape't allempo po'ñpa'te't allempo yonape't? ³⁸ ¿Esempto'tña yentape't allempo pe'chapue't yesho all ama pentare allempo e'ñe cohuen yagapape't? Ta'm ¿esemपो'te'ña yentape't allempo pemuelle't allempo yepashtape't? ³⁹ ¿Esempto't yentape'tña allempo patsna'te't ñaña allempo yottan'psapete't allempo yemo'tape't?" ⁴⁰ Allempoña na ñeñten Partseshanpa' atetcha' noterres: "Te' napa' o'ch notas: Po'ño'chpa' allempo e'ñe cohuen atet se'pa'yesnane't na nemo'nasheñnesha' na'naca'yeña e'ñe cohuen atet sepen. Ama't puesheñarra ñeñt ama esoshe'maye' entyese'te acheñenesha' allempo, tarraña saña allempopa' atto e'ñe cohuen es se'pa'yesanete't, na'naca'yeña e'ñe cohuen atet sepen allempo."

⁴¹ Allempoña ñeñt ne'chcoteronte'tsenpa' atetcha' noterranet: "Sapa' orrerres arro't, sapa' aña so'patenaya ñeñt atarr yoro'chen. Te'ñapa' orras all huorten tso' erraparen ñeñt ama amayaño ama't errponaña. Ñeñtña tsorpa' añ o'patateñet oneñeñ e'ñe pueyochreshohuen. ⁴² Tarro'mar na allempo nachporre'tpa' sapa' amaca'ye saye' nerratallme'chaye'te. Allempo no'ñpa'te'tpa' amaca' saye'ña nonaye'te. ⁴³ Allempo ne'chapue't sesho all ama nentare sapa' amaca'ye cohuenaye' sagapne'te. Allempo nemuelle'tpa' sapa' amaca'ye saye' nepashtaye'te. Allempo natsna'te't ama't ñaña allempo yottan'pesnete'tpa' sañapa' amaca'ye semo'tne'te." ⁴⁴ Allempoña ñetpa' atetcha' oterrnet: "¿Esempho'uañaca'ye, Parteshacha', yentape't allempo pachporre't ñaña allempo po'ñpa'te't ñaña allempo pe'chapue't yesho all ama pentare ñaña allempo pemuelle't ñaña allempo patsna'te't, ñaña allempo yottan'psapete't? ¿Esempto'tña yentape't atet allempo yapa' ama't coñe'tapa' ama es yapape'te?" ⁴⁵ Allempoña napa' atetcha' noterranet: "Te'pa' o'ch notas: Po'ño'ch sa allempo ama a'cua'psenaye' sentone'te allohuen na nemo'nasheñnesha', na'naca'yeña atet sente'tña allempo." ⁴⁶ Allempoña acheñenesha' ñeñt ne'chcoteronte'tsen, ñetñapa' ahuanerretcha' allcha' coñcherret e'ñe erponohuañen. Añña ñeñt e'ñe cohuen es pa'yestse't ñetñapa' ahuanerretcha' Yomporesho allña ñetpa' corretsetach pocsheñeshocmañen erponañohuen.

26

Atto atarr o'pateñet Jesús o'ch muetsatateret
(Mr. 14.1-2; Lc. 22.1-2; Jn. 11.45-53)

¹ Jesúsñapa' allempo serrpare'tatuahuanet allohuen añ ñoñetspa' allempoña' atet otan pueyochresha':

² —Sapa' señoṭeñ o'ca'ye epomtama'pa' o'ch čhapa'muen pascuapo. Allempoña na Ñeñten Acheñetosetspa' allempochña pomuerrnet attočha'ña corso'tam̄perrnet.

³ Allempoña allohuen judionesha' pa'm̄cha'tareternesha' ñetña'pa' apčhet. Añ apčhatsa allohuen ñeñt̄ judionesha' po'cornaneshar pa'm̄cha'tareternesha' epuet ña'ña ñeñt̄ atarr etsotayenayeñ ñoñets ñeñt̄ atet anareñ epuet ña'ña ñeñt̄ pompornesha' pen allohuen judionesha'. Ñetña'pa' arr apčhenet cornesha' pa'paclo, ñeñt̄ña cornesha'pa' ñaca'yeña atarr nanac pa'm̄cha'tareter penet, ñeñt̄pa' añ pa'so'cheñ Caifás.

⁴ Allña ñetpa' cotape'chatannenet, Jesús a atarr o'patenet. Ñetña'pa' atet otanna'tyeset:

—Errotuachca'ye yepe'te' attoch yeshcach e'ñe a'nahua esheccha' yer-mach attočha' yemtsatach.

⁵ Ñetña allempopa' alla otanna'tyerreterr:

—Tarraña te' pascuapo allempo shontena acheñenesha' amachca'ye yerrmatsche allañaca'ye čha yatsrre'moçhtateñ acheñenesha'.

Atto puesheñarr coyanesha'pa' shosan eñmosať Jesús poño
(Mr. 14.3-9; Jn. 12.1-8)

⁶ Pamtarña Jesús pa' Betanio'tsen all Simón pa'paclo, ñeñt̄ña Simónpa' ñeñt̄ ose't̄ puetsarñats. ⁷ Jesúsña'pa' alla anen all rrallme'chen. Allña'pa' huapoña puesheñarr coyanesha', huapatan eñmosať ñeñt̄ ama matsa'to; huapatam̄pes puetellm̄o ñeñt̄ña puetellm̄pa' añ socheñet alabastro. Ñeñt̄ña eñmosaťpa' alla she' Jesús poño. ⁸ Pueyochresha'chñoña ñetña eñchetpa' čha atsrre'muet, atet otyeset:

—Eso'mare'tña atta a'pertatosanña eñmosať. Ñeñt̄ eñmosaťerpa' amaca'ye matsa'to. ⁹ Chochña'cho' pomoseñpa' ganañcha' shonte' quelle allempoñapa' apa'yesaneñcha' ña'ña allohuen huocchañnesha'chño.

¹⁰ Jesúsña e'manetpa' ña'ñapa' atet otanet:

—Eso'mare'tcha' čha muene' satsrre'moçhtana'tapña coyanesha'. Ñapa' atarrca'ye cohuen p̄osen. ¹¹ Tarraña ama'tcha' čho pomosaneñ eñmosať alloch es apa'yesaneñ huocchañnesha'chño, tarraña čhocmachca'ye eñallña huocchañnesha'chño arr patsro. Nañapa' po'ñočhpa' amachca'ye allo'na sentenno arr patsro.

¹² Ñeñt̄ atto shosnan te' eñmosať nechtso, ñeñt̄pa' añecpa'naca'ye sherben tarremphua allempoch a'yana'terrneterr ñeñt̄cha' epuet pampa'pesnet. ¹³ Po'ñočhca'ye notenes: Ora erracmañen añ patsro errach serrpare'tatyenet añ cohuen ñoñets allempopa' serrpare'chetcha' ña'ña atet penen te' añ coyanesha', attochña ña'nach yerpuenet.

Atto Judaspa' pomuerran Jesús
(Mr. 14.10-11; Lc. 22.3-6)

¹⁴ Allempoña pueyochresha' ñeñt̄ čharrá puechetsa epsheña, puesheñarrña ñeñt̄ pa'so'cheñ Judas Iscariote, ña'ñapa' allenta ahuo' allo'tsa'yen ñeñt̄ pa'm̄cha'tareternesha' p̄a'yen allohuen judionesha' po'cornaneshar.

¹⁵ Chap allpa' ña'ñapa' atet otosanet:

—Ñerra'm o'ch negatas Jesús attoch serrmue'pa' ¿errpona'tcha'ña setsa'tna?

Ñetña'pa' atet ochet:

—O'chca'ye yapaṣ ma'poch čharratlla quelle.

¹⁶ Allempoña ñapa' aña e'ñe cotape'chyen errotenotcha' pomuerranña Jesús.

Atto Jesús'pa' rrallme'chatnenan pueyochresha' attoch čhocmach yerpueret ñeñt' yoten te' Santa Cena

(Mr. 14.12-25; Lc. 22.7-23; Jn. 13.21-30; 1Co. 11.23-26)

¹⁷ Allempoña čhapa'muen ñeñt' yetñatsro allempoch rrerretterr pan ñeñt' ama anareteyaye chase'. Chapa'muen ñeñt' yeterpa' Jesúsñapa' huačha'toña pueyochresha' ñetñapa' atet otoset:

—Te'pa' ¿erra't pemneñ allcha' ya'potonaṣ ñeñt'cha' perra' pascuapo?

¹⁸ Ñaña'pa' atet otanet:

—Te'pa' o'ch ahues anetso; o'ch sečhap allo'tsen puesheñarr acheñ. Ñeñt'pa' atetcha' sotos: “Ñeñt'ña Maestro Jesús'pa' atetca'ye oten: ‘Te'pa' o' čhappoch allempoch nerroma, te' pascuapopa' arrcha' nerra'nom pepaclo neyochreshohuen.’”

¹⁹ Atet otanet Jesús'pa' ñetñapa' atet'cho' pet. Allca'yeña añño'tosñañetña rreñets allcha' rrallme'chet.

²⁰ O'ña ellerrotenapa' Jesúsñapa' anorros allcha' rrallme'chatnenan pueyochresha' ñeñt' čharrasheña puechena epsheña. ²¹ Allña rrallme'chetsetpa' Jesúsñapa' atet otanet:

—Po'ñočca'ye notenes: Puesheñarrofes sa ñeñtescha'ca'ye nepomuerre'.

²² Ñetñapa' čha atarr lleca'rrtet. A'p'to'tyeset e'ñe puesheña'ttset:

—Parteshacha' ta'm ¿amafe' na nepomuerrmochape?

²³ Ñaña'pa' atet oterraneterr:

—Ñeñt' netsapechapretene' nerrarpa' ñeñt'cha'ca'yeña nepomuerre'.

²⁴ Po'ñočca'ye te'pa' allo'na sen etsotnomtsa ñeñt' atet anuaret Yompor po'ñoño nocop Ñeñten Acheñetosets; attočha' muetsaterrnet. Tarraña nocoppa' e'ñe pocte'; añña po'ñočh acheñer ñeñt'cha' nepomuerre' ñocopñapa' atarr llequēñets. Añ acheñerpa' e'ñeca'ye pocteñ ñocop amachñácho' eñalletatstañe.

²⁵ Judasña ñeñt'cha' pomuerre'pa' ñaña'pa' atet och:

—Maestrocha' ta'm ¿amafe' na nepomuerrmochape?

Jesúsñapa' atet och:

—Pate'ca'ye atetca' p'toten.

²⁶ All rrallme'chenet, Jesúsñapa' chetan pan parasyoso'tan Pompor Parasyoso'tuepa' shota'tan panpa' apa'yesan pueyochresha'. Ñeñt'pa' atet otanet:

—Sagapyes o'ch serre' añmapa' ñeñt'cha'ña nechets sepen.

²⁷ Alloñapa' chetan ñaña orramets parasyoso'tuerrerrpa' apa'yerraneterr. Ñeñt'pa' atet oterraneterr:

—Sorr ñaña añ narmetsos allohuenes. ²⁸ Añpa' nerrasca'ye sepeñ ñeñt'cha' ashatarettatsa shonte' acheñeneshacop alloch apre'tnaretterret po'chñaret. Añ nerraspa' alloch e'ñe etserra a'poclaterra acheñeneshá' Apuesho. ²⁹ Napa' o'ch notas: Te'pa' amach alla norrerre'te añ narmetsos tayoteñ tarremphuach allempoch alla ello yorrerrerr parro allempoch añcha'taretetuerra Apa.

Atto Jesús'pa' eñotatan Pedro ñapa' čhocmach a'nasocha
(Mr. 14.26-31; Lc. 22.31-34; Jn. 13.36-38)

30 Allempoña o' morrechuanmuet Yomporecoppa' ahuaneneterr Olivoṽno. ³¹ Allñapa' atet otosanet Jesús:

—Añ tsaprocmaç sa allohuenespa' sa'ypo'ña'huanmuencha' tarro'mar Yompor po'ñoñopa' atetca'ye anuaret, ñeñtpa' atet ote't Yompor nocop: "O'ch nemtsater ñeñt' cohuanṽpene' carrnero, po'carrnerorñapa' çhach matrra'tyesa allemeñ."

³² Jesúsñapa' atet oterraneterr:

—Tarraña esempoch alla netanterra napa' nanomcha' oterrtsa Galileo.

³³ Allempoña Pedropa' atet och:

—Ama't allohuenet ñerra'm a'ypo'ña'huerrpetcha'pa' naña ama't ahuaṽapa' amach na'ypo'ñerrpe.

³⁴ Jesúsñapa' atet otererr:

—Po'ñoçhca'ye o'ch notaṽ, aña tsaprocma amach eñena' atolloppa' ṽañapa' o'ch ma'poch ṽa'nasotenna.

³⁵ Pedroñapa' alla otererr:

—Ama'tcha' yerromhuanen parropa' nañapa' ama't parrocha amach na'nasotaṽo.

Allohuen pueyochresha'pa' ñetpa'çho'ña e'ñe attecma otyeñetañ ñamet.

Atto Jesúsapa' ma'yochuena all oteñet Getsemaní

(Mr. 14.32-42; Lc. 22.39-46)

³⁶ Allotñapa' çhap Jesús pueyochreshohuen all narmetsm̃o, ñeñtpa' añ pa'so'cheñ Getsemaní. Allñapa' otosanet:

—Te' sapa' allach sanorrçha'tos arrma, napa' o'ch nema'yochena' tarranteye'.

³⁷ Allñapa' aña anmos Pedro ñaña Zebedeo puechemeresha', epsheña. Jesúsñapa' çha nanac llequëna, nanac allpatena. ³⁸ Allempoñapa' atet otosanet:

—Napa' çha chepoçhenen nellquëña neyoçhro, çha muene' nerromuen nellquëno't. Sapa' allasa'tach arr secuapretosno'tach.

³⁹ Ñañapa' ahuo' a'yenteye' all rremosa patso atet ma'yochosa:

—Apa, ñerra'm errotentoṽpa' arepa'çhña pemnatatsche o'ch çhapona ñeñt' atarr amuroçhtatañ nenten.* Tarraña ñerra'm ṽach muenats añepa'çhña atet peṽaton ñeñt' pemnen ṽa, amachña añeyaye ñeñt' nemnen na.

⁴⁰ O'ña atet ma'yochuapa' o' ahuer allo'tsa'yen pueyochresha' ma'psheña. O' çherr allpa' alla entuerranet ñetñapa' çha atarr manrrenet. Allempoñapa' otuerran Pedro:

—Ama't mamesha are'tcha'ña acuenaye' sentoso. Amahuachñaca' secuapretosnote' ama't mamesha. ⁴¹ E'ñe señose'rteñoṽpa' çhoña sema'yochosa allochñapa' attoch amach sañeña a'puerrataterro topateñets ñeñt'cha' sehuapoya atarr huomenc. Ñeñtpa' ama't atarr semneñeñ tarraña sechetsñapa' amaca'ye ahuaamencaṽeye' penso, ñeñto'marña notenes çhocmach sema'yochena.

⁴² Jesúsñapa' alla ahuererr puepocheño o'ch ma'yocherrerr, ñeñfara atet otuerrerr:

* **26:39** Ñeñt' amuroçhtatañ ñeñtpa' po'ñoçh arr atma'ntataret ñerra'mrrate' ñeñt' atarr pesherr yorren orranitso.

—Ñerra'm Apache' aña pemnaten o'ch çhapona ñeñtcha' atarr na'mueroçhtate', ñerra'm ama errotenot ða'huañatamperrno, ñeñtpa' e'ñe pocte'. Añepa'chña atet peþaton ñeñt pemnen ða.

⁴³ O'ña alla ma'yochuerrerra' allempoñapa' huerrerr alla entuer-ranerr pueyochresha' ñetñapa' o' alla manrrerretter, çha nanac atserr moñe'tenet. ⁴⁴ Jesúsñapa' alla sa'nerraneterra' ahuerrerr ma'yochatsa poma'pocheñoñhua. E'ñe attecma ma'yochuerrerr atet otua ñorra'. ⁴⁵ O'ña ma'yochuerrapa' allempoñapa' alla huerrerr pueyochreshesho, atet otuerraneterr:

—Ama't teme'ttsenpa' alla't semanrren; ama'tpa' alla sames. Te'pa' señocheþa'ch o' çhap allempoch pomataterrrnet na Ñeñten Acheñetosets attotcha' errotuanen perren ñeñt atarr ochñañenesha'. ⁴⁶ Te'ñapa' setan-terra o'ch ahuey o'ch yepocte'. Secue'ca'ye ñeñtcha' nepomue' ñeñtpa' alla'tsena.

Allempo rromoset Jesús

(Mr. 14.43-50; Lc. 22.47-53; Jn. 18.2-11)

⁴⁷ All atet eñorena Jesúsþa' çha huapatsa puesheñarr ñeñt puey-ochresha' peneñ ñeñt a'pchenahuet epsheña, ñeñtñapa' añ Judas. Ñañaþa' huachã'tatan shonte' acheñenesha' occhelletareret ñaña et-sachperetareret. Ñehua, añ ñeñt huachã'ttsapa' añ mueñenahuet ñeñt pa'mñcha'tareñnesha' pen allohuen judionesha' po'cornaneshar ñaña ñeñt pompornesha' pen allohuen judionesha'. Ñetca'yeña mueñene'ña ñeñtcha' rremuenaya' Jesús. ⁴⁸ Ñehua, Judas ñeñt pomuerre' Jesúsþa' ñañaþa' atet otnoman acheñenesha' ñeñt anom attoch cheme'toset Jesús. Ñeñtþa' atet otnomanet:

—Erra'tsencha' nehuomñcha'tos e'ñe netso'ttsapa'teñoçpa' ñeñtca'yeña Jesús. Sañaþa' ñeñtcha'ña serrmos.

⁴⁹ Allempoña huapapa' çha ponmosaya Jesús huomñcha'tos e'ñe puetso'ttsapa'teñesha' atet otos:

—Tsapo, Maestrocha'.

⁵⁰ Jesúsñapa' atet otapñ:

—Eso'maruañaca' masheñe, penña arr nesho.

Allempoña acheñenesha'þa' ponmosyet Jesúsþa' rromoset e'ñe po'huamencocma.

⁵¹ Allempoña puesheñarr ñeñt epuet Jesúsþa' ñañaþa' po'cchella cheta'þa' o'ch çhonto'tapanenñ cornesha' pueñañra, puetepa'tcha' tsorroñ. Ñeñtþa' año pueñañra ñeñt pa'mñcha'tareñer pen allohuen judionesha' po'cornaneshar.

⁵² Allempoña Jesúsþa' atet och:

—Penerr alla þocchell allecma peneñ. Allohuen ñeñt orrotetsa po'cchelloþa' cochlochca'ye colla'huerrret. ⁵³ Papa' çhate' þotenapañ amate' errotenot es nenameña Nompör. Ama't peñoteñe ñerra'm çho nenañþa' ñapa' allorocmach mueñoneñ shonte' nanac po'mllañoñeñneshar ñeñtcha' nemoñsayañ, ⁵⁴ tarraña ñerra'm atet neþapa' amate' errotenot etsotoña ñeñt atet anuaret Yompör po'ñoño nocop. Allña oten ñeñtþa' atetcha'ca'ye perra.

⁵⁵ Allempoña Jesúsþa' atet otan acheñenesha':

—Eso'mare't sehuachã'tennanaña e'ñe occhelletareroches ñaña etsachperetareroches attoch serrma'n. Napa' çe'ñe't atet sentenen

ñerra'mrrate' eñeñen? O' allponmatuanen nanorryen Parets pa'paclo'mar, all neyčhatyen, eso'mare'tña ama allempocmaña serrma'ne'te. ⁵⁶ Ama'tpa' atepa'ca'ye perra allochñapa' attoch e'ñe etsotuerra ñeññ allpon quellca'yese't nocop ñeññ a'mta'yese'ye't Yompor po'ñoñ.

Allempoña allohuen pueyochresha'pa' allorocma a'ypo'ña'huanmet, ñetñapa'yetrra'tuet.

Allempo chapata'mueñet Jesús all apcha'muena allohuen judionesha' pa'micha'tareternesha' ñeññ a'pocatyene' ñoñets ñocpuet

(Mr. 14.53-65; Lc. 22.54-55, 63-71; Jn. 18.12-14, 19-24)

⁵⁷ Acheñenesha' ñeññ rromose' Jesús'pa' ñetñapa' anmet allo'tsen Caifás ñeññ pa'micha'tareter pen allohuen judionesha' po'cornaneshar. Allñapa' all apchenet parro allohuen ñeññ atarr etsotayenayeñ ñoñets ñeññ atet anare't epuet ñaña ñeññ pompornesha' pen allohuen judionesha'. ⁵⁸ Pedroñapa' cota'nmanet tarraña ñapa' chenta' en a'yo't. E'ñe cornesha' po'pampohua allñapa' anorros epuet ñeññ guardianesha' allochñapa' esheccha' entan Jesús attoch erro'tuanencha' pet.

⁵⁹ Cornaneshaña pa'micha'tareternesha' ñaña ñeññ pompornesha' pen allohuen judionesha' ñaña allohuen ñeññ a'pocatyene' ñoñets ñocpuet ñetñapa' aña atarr e'nenet ñeññicha' toma'tamñse' Jesús allochñapa' attoch muetsatachet. ⁶⁰ Ama't shonte' huapatsañ ñeññicha' toma'tamñpsosayeñpa' añicha'taretnesha'ña ama't puesheñarrofetapa' ama eseshaye' entayeña attoch muetsatachet. Atteñapa' huapa ñaña epsheña ñeññicha' toma'tamñse'. ⁶¹ Ñetñapa' atet otoset:

—Añ acheñer ahuañapa' atetca'ye oten: “Napa' atarr ahua'mencaten attoch na'materrñañ Parets pa'paquell. Allotña poma'pamtañopa' o'ch alla natomater.” Ñapa' atetca'ye otña allempo.

⁶² Allempoñapa' cornesha' ñeññ nanac añicha'tare't allenta'tompa' atet otan Jesús:

—Pañapa' ¿ama'tcha'ña ñapananeto? ¿Erro'tenote'tña otteñe'chenpet?

⁶³ Jesúsñapa' ama eñoreno. Allempoña cornesha'pa' alla otererr:

—Te'pa' o'ch notap o'ch potey e'ñe Yompor pa'so'chño ñeññ ama arromñañeshayaye, ñapa' ¿pa'tña ñeññep Parets Puechemerep, ñeññep'te' Cristotosets?

⁶⁴ Jesúsñapa' atet och:

—Napa' po'ño'chca'ye ñeññen e'ñe atet poten. Elloña napa' o'chca'ye notas, o'ca'ye e'ñe chapmoch allempoch e'ñe senterren na Ñeññen Acheñetosets o'chca'ye alla nanorruer Parets po'cohuenrot allcha' nepartsotapretera. Ñaña po'pocheño o'ch sentapuerren o'ch ne-suanñperra oso Yompor pue'ntañot.

⁶⁵ Cornesha'ñapa' ñeñña e'mpa' allenta' rrarre'tan pa'shtam e'ñe pat-srre'mueño't, ñeññpa' atet ot:

—O'ca'ye čha achmāre'tanña Yompor. Ñeññepñapa' amach ye'natsche po'psheñeñ ñeññicha' a'metamñpsose'. Te' ama't sapa' o'ca'ye se'm atet achmāre'tenan Yompor. ¿Erro'tena't senteñña sa?

⁶⁶ Ñetñapa' atet otyeset:

—Ña po'ño'chpa' atarca'ye nanac achmāre'tenan Yompor, pocte'ñacho' te'pa' o'ch semtsatach.

⁶⁷ Allempoñapa' a'coshare'tyeset e'ñe pa'clloyot, cho'ña chota'tyeset; po'potantañechnoñapa' taclapechyeset. ⁶⁸ Pachmāre'teñoŋetpa' atet otyeset:

—Te'ña ñerra'm po'ñochte' Cristoŋpa' eñoratenperrepa' Parets allochñapa' attoch pōtey esesha'te'ña pechota'tyene'.

Atto Pedropa' a'nasotana Jesús

(Mr. 14.66-72; Lc. 22.56-62; Jn. 18.15-18, 25-27)

⁶⁹ Pedropa' a'yote'tsen all anen pampo. Allñapa' huapoña coyanesha' ñeññ cornesha' pueñañra, ñañapa' atet otosan Pedro:

—Paca'ye e'ñe cotaye'tña Jesús ñeññ galileo'marnesha'.

⁷⁰ Pedroñapa' anapue'pa' cha a'nasocha. Allohuenetñapa' e'ñe e'mhueñet atet ot:

—Napa' amaca'ye neñoteñe ñeññ atet pōtenen.

⁷¹ Allempoña Pedropa' ahuerr, cherr allotecma be'tenet o'ch chapuet o'pono pampo. Allñapa' entuererr po'psheñeñ coyanesha' ñeññ cornesha' pueñañra. Ñañapa' atet otan ñeññ parro allo'tsa'yenet:

—Añ acheñerpa' ñeññca'ye cotene'ña Jesús ñeññ nazareto'marnesha'.

⁷² Pedroñapa' alla a'nasotererrpa' atet oterrerr:

—Te' napa' o'ch notas e'ñe Yompor pa'so'chño, napa' amaca'ye nentareña añ yacmar ñeññ pōtenen.

⁷³ O'ña o'chterrerrpa' huapoña ñaña ñeññ tomcha'tyets all, ñetpa'cho'ña atet otoset:

—Po'ñochca'ye pāpa' Jesúsca'ye pueyochreshaŋ. E'ñe atet peñen ñerra'mrate' galileo'marnesha', ñeñño'marca'yeña o' yeñotaŋ.

⁷⁴ Allempoña Pedropa' e'ñe puehquēññoñanetpa' atta otatse'tyerraneterr, ñeññpa' atet otanet:

—Napa' e'ñe Yompor pa'so'chño notenes, ñerra'm amate' po'ñochoye' notensopa' te'pa' nerromuepa'. Napa' po'ñochca'ye ama nentareña añ yacmar.

Ñeñña otuanetpa' e'ñepa'tcha' allempocma eñeña atollop.

⁷⁵ Allempoña Pedropa' alla yerpurrana ñeññ atet oteñ Jesús: “Amach eñena' atollop pñaña' o'ch ma'poch pñanasotenna.” Allempoña Pedro cha'nom alloŋpa' ahuo' a'yenet allñapa' all atarr yahuosa huomenc.

27

Allempo chapata'mueñet Jesús allo'tsen amcha'taret Pilato

(Mr. 15.1; Lc. 23.1-2; Jn. 18.28-32)

¹ Tsapañña puetarenpa' ñeññña pa'mcha'tareternesha' pen allohuen judionesha' po'cornaneshar ñetñapa' apcha'mueneterr parro epuet ñeññ pompornesha' pen judionesha'. Allña apchenetpa' ñetñña allohuenetpa' cotape'chatanna'tet affotcha' muetsateret Jesús. ² Jesúsñapa' o' huan-cota'tuet allempoñapa' anma'mueñet allo'tsen amcha'taret Poncio Pilato (ñeññ nen gobierno Romot ñeññ amcha'tarettetsa allo'marneshacop). Allca'ye poma'mueñetña Jesús.

Atto tsomerra Judas e'ñe ñañeña

³ Judasña ñeññ pomue' Jesúspa' allempoña ñapa' eñoch Jesúspa' chochca'ye muetseret. Allempoña puellquēññoŋpa' ello alla cotape'cherran cohuen. Allempo atet cotape'cherrpa' ñañapa' alla pomuerran quelle ma'poch charratlla. Alla apuerrana' cornaneshar

pa'm̄cha'tareternesha' ñaña ñeñt̄ pompornesha' pen allohuen judionesha'. ⁴Allñapa' atet otuerranet:

—Napa' o' čha norrtaterr ñeñt̄ ama cohuenayaye, o'ca'ye čha nepo-muer acheñ attoch muetseret ama't ñapa' ama't coñe'ta amaca'ye eñalleña po'chñar.

Ñetñapa' atet anaprra'tet:

—Ñeñtpa' amaca'ye errotenoña yocop, ñeñtpa' p̄ocpaca'ye.

⁵ Allempoña ñapa' atta huapore'terrana' quelle o'pono Parets pa'paclopa' o' alla ahuerr; e'ñe puellquẽñoŋpa' tsonña'huerra ñañeña.

⁶ Cornanesha'ñapa' o' alla cheterret quelle. Ñetñapa' atet otanna'tyeset.

—Añ quellepa' alloca'ye atsa'tare'tta attoch shataterrñañet acheñ po'rras. Ñeñto'marña te'pa' amate'ca'ye pocteyaye o'ch alla yenererr allecma apthenet quelle Parets pa'paclo.

⁷ Allempoña e'ñe ñagattsetapa' atet a'poc̄tachet o'ch rañtoñet allo añ po'patseñ ñeñt̄ yečcatyene' patsrro' allochñapa' allcha' pampa'yeret ama't erra'tsena acheñer ñeñt̄ ahuapña ñerra'm esempo rromayenet allampaño.

⁸ Ñeñto'marña ñeñt̄ patserpa' añ sochet Errasatsotnanen tarro'mar ñeñte quellayero rañtyet allo ashataretterra errasats. Ama't teme'tsen ñeñt̄ patser socheñet Errasatsotnanen. ⁹ Attoca'yeña etsotaña atet ote't Jeremías ñeñt̄ a'mtaye't Yompor po'ñoñ ahuat, ñeñtpa' atetca'ye quel-lquẽ't Cristocop: “Cheterretcha' ñeñt̄ ma'poch čharratlla quelle ñeñt̄ allpon po'tsa' nen israelena'tarnesha' atto muetsatateret. ¹⁰ Ñeñt̄ña quellepa' allochca'ye rañferrñañet po'patseñ ñeñt̄ yečcatene' patsrro'. Atetca'ye otenenña Partsesha' o'ch atet nepa.”

Atto Jesús'pa' a'p̄to'tare'teñ am̄cha'taret Pilato

(Mr. 15.2-5; Lc. 23.3-5; Jn. 18.33-38)

¹¹ Allempo čhapachet Jesús am̄cha'taret Pilatesho, allñapa' all am̄cha'tareñapa' allenta a'p̄to'tap̄:

—Papa' ¿pa'tña am̄cha'tarettetsaña judioneshacop?

Jesúsñapa' atet och:

—Napa' ñeñtenca'ye atet p̄oten.

¹² Ñeñt̄ pa'm̄cha'tareternesha' pen judionesha' po'cornanesha' ñaña ñeñt̄ pompornesha' pen allohuen judionesha' ñetña allpa' atarr ote-ñe'chyesoset Jesús. Ñañapa' ama't mameshapa' ama eñoreno, ama't parrocha ama anapuenaneto ñeñt̄ atto a'metare'teñet. ¹³ Allempo Pilatopa' atet och:

—¿Ama't pe'muenoña atet a'metare'tenpetpa' esocmañen otenpet?

¹⁴ Ñañapa' ama anapuenaneto ama't e'ñe parrocha. Ñeñto'marña am̄cha'taretpa' nanac cohuañe'teñ. Ama eñoteñeto eso'marte' ama eñoreno ñocop.

Atto am̄cha'taret Pilatopa' otanet ama'tpa' čhosa muetse'ña Jesús

(Mr. 15.6-20; Lc. 23.13-25; Jn. 18.38-19.16)

¹⁵ Ñehua, ñetpa' atetca'ye yečchenet. E'ñe pate'tets char allempoch čherrerr pascuapo, ñeñt̄ña am̄cha'taret ñeñt̄ nen gobierno Romoŋpa' ñañapa' čhocmach a'royerran puesheñarr judioneshacop ñeñt̄ ayottam̄psarettetsa allempo, ñeñt̄ara ñeñt̄ pamo'ts penet ñet. O'ch apanet erra'tsenčo' enamuenet ñeñt̄ muenenet ñet. Ñeñtpa' añecop

a'rroyenanetña puesheñarr pamo'tset attoch e'ñe cohuen coshatenan allohuen judionesha'. ¹⁶ Ñaña e'ñe allempopa' allo'tsen puesheñarr judionesha' ñeñt ayottam̄psarettetsa ñeñtpa' añ pa'so'cheñ Barrabás. Allohuenetpa' e'ñe eñotueñet añecopña yottam̄peñet ñapa' chocma atpare'tane't am̄cha'taret ñeñt nen gobierno Romot. ¹⁷ Ñeñto'marña allempo ap̄cha'hua allohuen acheñenesha'pa' am̄cha'taretña Pilatopa' a'p̄to'tapanet:

—¿Erra'tsena't semnenña ñeñtcha' na'rroyonas, ñato' añcha' Barrabás amapa' Jesús ñeñt otenet Cristo?

¹⁸ Ñehua, Pilatopa' eñotapan judionesha' pa'm̄cha'tareternesha' ñetpa' e'ñe pue'moñe'tateñme'chatsa o' pomueret Jesús. Ñeñto'marña Pilatopa' añ muenen o'ch a'p̄to'tan allohuen acheñenesha' tarro'mar ñapa' añca'ye e'nen attoch a'rroyerran Jesús.

¹⁹ Ñaña tarro'mar allempo anorros po'conaño allcha' a'poclatan ñoñets, puetaporñapa' oñmach po'ñoñ all oteñ: “Amach erro't pepatsche Jesús ñeñt e'ñe cohuen acheñer tarro'mar ama't añ tsapro napa' o' nechopo'teñ; napa' ñeñtña atarr neyore'te.”

²⁰ Tarraña ñeñt pa'm̄cha'tareternesha' pen judionesha' po'cornaneshar ñaña ñeñt pompornesha' pen allohuen judionesha' ñetñapa' añña atarr cotape'chatenet acheñenesha' attoch ñetpa' allohuenetpa' o'ch ochet Pilato:

—Añcha' p̄a'rroyerrnay Barrabás, Jesúsñapa' pemtsatachepa'ch.

²¹ Allempoña am̄cha'taret Pilatopa' o' alla a'p̄to'terraneterr:

—¿Erra'tsena'tña po'ño'ch añ epsheño'mar semnen ñeñtcha' na'rroyernnas?

Ñetña anaprra'tetpa' atet ochet:

—Añcha'ca'ye p̄a'rroyerrnay Barrabás.

²² Pilatoñapa' alla oterraneterr:

—Ñehua, añ Jesús ñeñt otenet Cristopa' ¿erro'te'tcha'ña nepe'?

Allohuenetñapa' alla otereterr:

—¡Ñapa' pecorso'tam̄psachñaca'ye!

²³ Pilatoñapa' atet oterraneterr:

—Ñapa' ¿eso'tña pen ñeñt ama't mameshapa' ama pocteye' sentapreteñe?

Ñetñapa' alla rrannarterretter huomencpa' atet otterretter:

—Ñapa' ¡chopañaca'yeña corso'tam̄psate'!

²⁴ Pilatoñapa' e'ñe eñoteñ attoch ñapa' amach erro't pe, elloña acheñenesha'pa' cha atarr atsrre'moçhtana'teñet. Allempoñapa' chetan oñpa' e'pota'ta allochñapa' attoch eñotatanet ñapa' amaca'ye ñaye' otteñe'chenaye, ñeñtpa' atet oterraneterr:

—Napa' amach seyohuatsetno attoch rroma añ acheñer ñeñt ama't coñe'ta ama çoye' erro't es peno. Ñeñtpa' ama nocpa'nayaye, ñeñtpa' e'ñeca'ye saptecpa.

²⁵ Allohuenña acheñenesha'pa' ñetñapa' alla otereterr:

—Attoch rromapa' ama'tpa' yohua'yete'pa'—ya ñaña ama't yenrenñohuen.

²⁶ Allempoñapa' a'rroyerranet Barrabás, Jesúsñapa' ashtach allempoñapa' otan po'sollarneshar:

—Te'pa' o'ch secorso'tamipeña'.

²⁷ Ñehua, solltarnesha'ña ama aneñeta' allcha' corso'tamĩpsoset ñetñapa' arrña ñanom anmet Jesús amcha'taretepahuo. Allña agotachet allohuen po'potantañ solltarnesha' ñeñt' allo'tsa'yen o'ch e'ñe apchet Jesúsesho. ²⁸ Allñapa' pa'llocchame'teñoftet Jesúsapa' rrotamĩpes pa'shtam, chorrachet shetamuets tsamamuen ñeñt' pa'shtam pen ñeñt' po'ñooh amcha'tarettetsa. ²⁹ Pellta'toñet ña'ña choyo'mets agrechpa' ñeñt'ña choyo'mtachtet ñeñt' atet choyo'mtena ñeñt' po'ñooh amcha'tarettetsa. Orrachet ña'ña tsacheþ pototo po'cohuenrot ñeñt' atet orren ñeñt' po'ñooh amcha'tarettetsa. Allempoñapa' concorpa'yesyet. Pa'llocchame'teñoftetpa' e'ñe atet þachet ñerra'mrrate' ñeñt' e'ñe po'ñooh amcha'tarettetsa. Pachmãre'teñoftetpa' atet oteñet:

—Puetare' amcha'taretecha', atarruaca' cohuenepþe' þa ñeñteþ judionesha' pa'mcha'tareteþeþ.

³⁰ Pueche'tatseteñoftet a'coshare'teñetpa' o' chetamĩperetña ña'ña tsacheþ pototpa' alloña asto'tame'teñet poño. ³¹ O'ña achmãre'tuahuetpa' allempoñapa' rrotamĩperet shetamuets tsamamuen chorrateret e'ñe ña pa'shtam. Allempoñapa' anmet a'yo allcha' corso'tamipeñeta'.

Atto corso'tamĩpsoset Jesús

(Mr. 15.21-32; Lc. 23.26-43; Jn. 19.17-27)

³² E'ñe ahuanmatsetpa' allña oñenetpa' o' poctet puesheñarr yacma ñeñt' cireneo'marnesha' ñeñt'pa' añ pa'so'cheñ Simón. Ñañapa' allenta chechatnomet Jesús po'corsoch.

³³ Chapachet all socheñet Gólgota ñeñt' yoten yeñoño Poñetalleþno. ³⁴ O' chapachet all Jesúsapa' aposetañ vinos ñeñt'pa' añ atsetaret pueretso ñeñt' atarr pesherr. Atta amille'pa' ama mueno o'ch orr.

³⁵ Allempoña o' corso'tamĩpesuetpa' solltarnesha'ñapa' allenta yellsheñe'chatotñet pa'shtam po'suertot attoch orrtet e'ñe puesheña'ttsetpa' o'ch yorayesñañet pa'shtam puema'tets. Attoña etsoterra añ ñoñets ñeñt' a'mtaye't'ahua't Yompor po'ñoñ. Ñehua, allempopa' e'ñe atet ñerra'mrrate' Cristo otatset, ñeñt'pa' atet oten: “Yellsheñe'chaterrnanetcha' neshtam po'suertot attoch orrtet e'ñe puesheña'ttsetpa' o'ch yorayesonet nesh-tam puema'tets.” ³⁶ Allempoña solltarnesha'pa' alla anorrcha'tet o'ch cohuanĩpsset. ³⁷ Ñehua, poñot all corsocho all noñet tsachtall aquellcare't attochña eñoteñet ñeñtecop corso'tamipeñet. Ñeñt'ña quellcpa' atet oten: “Añ Jesúsapa' ñeñt'ca'yeña judionesha' Pa'mcha'tareter.”

³⁸ Allñapa' corso'tamĩpsset epuet ña'ña epsheña eñet, puesheñarrpa' nosñañet po'cohuenrot, po'psheñeññapa' nosñañet pue'chcoterot. ³⁹ Ñeñt'ña oñmachets allpa' ñetpa'cho'ña chocma achmãre'tneñet. Pachmãrñoftetpa' coño'coñtana'tyesneñet, ⁴⁰ ñeñt'pa' atet otyesneñet:

—Pa ñeñteþ þommo'cheñoftpa' þotatsete't' þo'ch a'materrayeñ Parets pa'paquell, poma'pamtañocmo'ch alla þatomatereñ, te'ñapa' þa'quesþaterrañaca'ye e'ñe þañeña. Ñerra'm po'ñochte' Parets Puechemereþpa' pesuerrañaca'yena tayecma corsocho.

⁴¹ E'ñe attecma achmãre'teñ ña'ña ñeñt' pa'mcha'tareternesha' pen judionesha' po'cornaneshar ña'ña ñeñt' etsotayenayeñ ñoñets ñeñt' atet anaret ña'ña ñeñt' pompornesha' pen allohuen judionesha',

ama't allohuenet fariseoneshohuen. Ñetñapa' pachmãare'teñoŧpa' atet otatse'tyeñet:

⁴² —Te'ña pãapa' o' pã'queshpãtyes po'potantañ, pãaña' eso'mare'tcha'ña ama eshcayé' pã'queshpãterroña e'ñe pãñeña.

E'ñe pachmãare'teñoŧetpa' atet otyereterr:

—Papa' ñeñtepo'ca'ye israelnesha' Pa'nicha'tareterepãa' pesuerrañaca'ye corsochoŧ allochñapa' attoch yame'ñaña yamã. ⁴³ Papa' pãa yemtenaya Yomporpa' te'ñaapa' a'queshpãatterpepa'ñaca'ye ñerra'm po'ñochte' e'ñe cohuen muerenpã. Papa' ñeñtep po'ñoche atet otets Yomporo' Puechemerepã.

⁴⁴ E'ñe attecma pe' ñamã eñet ñeñt epuet corso'tampeñet ñetpa'cho'ña atarr es otnare'chet allot po'corsochoŧ.

Atto rroma Jesús all po'corsocho

(Mr. 15.33-41; Lc. 23.44-49; Jn. 19.28-30; Heb. 9.11-14)

⁴⁵ O'ña chap poctopa' o'huañ atsnom o' e'ñe checmetua ora errapãaren añe patsro, o'ña ellerrotenmochapa' o' alla puetarerr. ⁴⁶ Allempoña ellerrotnenmochapa' Jesúsñapa' rrana huomenc, ñeñtpa' atet ot e'ñe ña po'ñoño:

—Elí, Elí, lama sabactani. Ñeñtña ñoñtsorpa' atet oten: Eso'maruachñaca'ye Neyompor-recha' pã'ypo'ñerren.

⁴⁷ Puesheña'tetsña ñeñt tomchets all ñeñt e'mue' atet oten Jesús, ñetñapa' amaca'ye e'mueññañeto po'ñoñ ñeñt atet oten, ñeñto'marña ñetpa' cha otyeset:

—O' cha chore'tante' Elías ñeñt a'mtaye't ahuat Parets po'ñoñ.

⁴⁸ Allempoñapa' mata puesheñarr ñeñt allo'tsen, e'chomosan chella'so ñeñt atsotso'tpo' o' ne' tsachpãpa' allotña tsotso'tatosañña Jesús. ⁴⁹ Po'potantañña' atet ochet ñeñt tsotso'tatene':

—Amach es pãapatsche, te'pa' attachca'ye yecue' ñato'rraña huapa Elías ñach a'queshpãatose'.

⁵⁰ Allempoña Jesúsapa' o' alla rranerrerr huomencpa' rroma.

⁵¹ Allempoña besom allo yottampeññañet Parets pa'paquell o'ponopa' ahuepa't rrrarra'nom e'ñe poctacma, ellopa'tetsta enoteñ e'ñe sotatsohua. Allempoñapa' o' pella pats atarr huomenc, rrrarna'tyes mapuetačno.

⁵² Torna'tampesyes apampaña. Shonte' ñeñt pueyochresha' pen Parets ñeñt o' colla'huañ, ñetñapa' ahuepa't e'ñe tantrra'tuerret. ⁵³ Allempoña tanterra Jesúsapa' ñetpa'cho'ña o' sohuanerretña all apamparettete't o' alla ahuanerret anetso Jerusaléño ñeñt anaret Partsocop, allñapa' shonte' acheñ ñeñt entapuerrahuet.

⁵⁴ E'ñe allempo rroma Jesús, solltarnesha'ña epuet po'captaner ñeñt allpon cohuanmpene' Jesús, ñetñapa' e'ñe enteñet ñeñt atet pã'yesa allempo, atto pella pats. Ñeñto'marña ñetpa' atarr yorenet. Allempoñapa' atet otet:

—Po'ñochuaca'ye añmapa' Partsepa'tca'ye Puechemer.

⁵⁵ Allo'tsa'yen ñamã shonte' coyaneshačno, ñetñapa' a'yota cohuanrrorteñet. Ñetpa' ñetca'yeña cota'huanmue'ña Jesús Galileoteñ ñeñt sherba'yese't. ⁵⁶ Ñeñtpa' María Magdalena ñamã po'psheñeñ María ñeñt Jacobo pachor ñamã José. Allo'tsen ñamã ñeñt pachor pen Zebedeo puechemerasha', ñamã po'potantañečno coyaneshačno.

*Atto pampuet Jesús**(Mr. 15.42-47; Lc. 23.50-56; Jn. 19.38-42)*

⁵⁷⁻⁵⁸ Atteñapa' o' ellerren. Puesheñarr ñeñt eçllayoret ñeñt pa'so'cheñ José ñeñt arimateo'marnesha' ñeñtara Jesús pueyochresha' ñañapa' ahuos Pilateshopa' o'ch oteña' pocte'ch eñch ñach asuatose' Jesús ñeñt rromuets corsocho. Pilatopa' atet otan pa'cheñer:

—Te'pa' o'ch sa'rroyoñ arromñañ anerepa'.

O'ña ellerren Joséñapa' o' çherr corsocho, ⁵⁹ a'suatuerran Jesús corsochoť all rromuen. Allempoñapa' eřatse'ch shetamtso ñeñt e'ñe cohuen emarr. Allempoñapa' aneñ allcha' pampueña'. ⁶⁰ All e'ñe errete' eñatene' mapuetpon ñeñtpa' e'ñe pamo'tsna'tarneshacpañ allca'yeña nenana'ña Jesús. Allempoñapa' attome'terrñañ mapue' añecmuen allo yottamřesner ñeñt puepampuer řach. O'ña yottamřesuanerpa' Joséñapa' ahuerr. ⁶¹ Allñapa' allo'tsen María Magdalena ñaña po'psheñeñ María. Ñetñapa' alla anorrçha'toset allame'tets all pampueñet.

Atto guardianesha'pa' cohuanřpeñet all pampuet Jesús

⁶² Met añ yeter allempo çhocmach añño'terreterr ñeñt tsapatēcop allempocma amesen judionesha'. Tsapatñapa' ñeñt pa'mřha'tareternesha' pen judionesha' po'cornaneshar ñaña fariseonesha' ñetñapa' e'ñe alla shontenet parro all Pilatesho. ⁶³ Ñeñtpa' atet otoset:

—Nomporcha' yapa' o'ca'ye yeyerpuera añ acheñer ñeñt atarr ashcañpa' allempo corre'tpa' atetca'ye otye't: “Napa' ama't puema'pamtañopa' netanterrachca'ye rromot.” ⁶⁴ Te'pa' pemñaye'chñaca'ye ñeñtcha' nanac cohuanřsose' puepampro e'ñe puema'pamtañohua, te't huapa pueyochresha'pa' çhate'ca'ye e'ñe a'nahua ereta'. Allempoña ñetpa' çhate' ochet acheñenesha' Jesúspa' o'ca'ye tanterra rromot. Ellote'ña ñet allempopa' nanacte' shecare'teret acheñenesha'. Ellote' metanerret ñeñt atto shecare'tyesete't ahuaña acheñenesha'.

⁶⁵ Pilatoñapa' atet otapanet:

—Añca'yeña guardianesha', te'pa' orras parro, ñetpa' o'ch cohuanřsoset, e'ñech echarr seřamřsosñañ puepampuer, errotench'a' e'ñe pocte' sent sa.

⁶⁶ Ñetñapa' ahuanmuet puepampro. Mapue' allo yottamřpeñetpa' e'ñe cohuen yomrraranřsoset attochña eñoteret ñerra'm esesha'ch toramřperre'. O'ña e'ñe cohuen řamřpesuetpa' allempoñapa' na'neret guardia all ñeñtcha' cohuanřřse'.

28*Atto tanterra Jesús**(Mr. 16.1-8; Lc. 24.1-12; Jn. 20.1-10)*

¹ O'ña huañ yeñnats allempocma amesenet allempoña taya puetaren temenc allempo motta'muena yeñnatspa' Maríaña Magdalena ñaña po'psheñeñ María ñetñapa' ahuatecma ahuanma'muenet o'ch enta'mueñet Jesús puepampro. ² Allempoña machayotepa'tcha' pella pats huomenc; añ sohuatsa Yompor po'millañořeñer entot. O' sohuapa' a'rrote'tosan mapue' a'yenet ñeñtña mapue'pa' allña anorros. ³ Ñañapa' atarr nanac popotosa e'ñe atet orrtosa ñerra'mrrate' meratste'.

Pa'shtamñapa' atarr nanac huallama't. ⁴ Guardianesha'ñapa' ñeñña atarr yore'tose'. Puenchañotetpa' cha yonshema'tyeset cha ota'yestet e'ñe atet ñerra'm cho rromuenet. ⁵ Allempoña mellaño'teñpa' atet otapan coyanesha'chno:

—Amach cha seyorenatsto. Napa' neñotenes añca'ye semnen o'ch senta'mueñ Jesús ñeñ corso'tam̄pset. ⁶ Amaca' arro'tsenaro arr, ñapa' atet otase'tpa' te'ñapa' o'ca'ye tanterra. Sonca'ye secueña' all panet amaca' eñalle. ⁷ Secua'huepa' orrerres sema'yoreñ o'ch soterrñaña' pueyochresha': "O'ca'ye tanterraña Jesús rromot. Ñapa' ñanomcha' otatsa o'ch ahuen Galileo. Sapa' allcha'ña sentuer."

⁸ Allempoñapa' puema'yoreñ ahuanerret puepamprot. Ama't yorenetañpa' pocsheñesha' matrra'terret o'ch oteññañeta' pueyochresha'. ⁹ Mata'chetsetpa' Jesúsñapa' ahuepa'tcha' poctanet, huom'cha'tapanet. Ñetñapa' allenta ponem̄yet, rromoset pa'r̄r̄pot concorposñañet. ¹⁰ Allempoña Jesúsapa' atet otanet:

—Amach sem'cha'tatsetno. Orrerres sotennana' nemo'nasheñesha'chno ahuanmuetepa' Galileo, allcha'ña e'ñe enternnet.

Atto solltarnesha'pa' serrpare'tatyesan allohuen cornaneshachno ñeñ atet entet ñet

¹¹ Ahuanmatsetpa' puesheña'tetsña guardiapa' ahuanmuet ñamet anetso. Allñapa' serrpare'tatoset cornaneshas' pa'm'cha'tare'ternesha' allohuen atet o' entuet. ¹² Ñetña allempo ap'chenet epuet ñeñ pompornesha' pen judionesha' ñetñapa' cotape'chatanna'tet. O'ña cotape'chatanna'tuetpa' allempoñapa' apet solltarnesha' shonte' quelle. ¹³ Ñeñtpa' atet ochet solltarnesha':

—Te'pa' atetcha' sot: "Yaña tsapopa' muetsye'tpa' pueyochresha'ñapa' ahuo't huapuet a'nahua't ereta'ña arromñañ."

¹⁴ Ellopa' alla oterranerr solltarnesha':

—Ñerra'm am'cha'taret cha e'mare'te' yapa' ya'poctatonascha' e'ñe cohuen ñesho attochña sapa' amach erro't paseto.

¹⁵ Ñetña allempo agaphuet quellepa' atet otare'ttetpa' atet'cho' pet. Ñeñto'marña ñet pueserrparñetpa' e'ñe allempoteñ epa'hua judioneshesho'mar.

Atto Jesúsapa' otnerran pueyochreshachno ñetpa' atetcha' pa'yerret (Mr. 16.14-18; Lc. 24.36-49; Jn. 20.19-23)

¹⁶ Ñeñ'charra' puechena paterr pueyochresha'pa' ñetñapa' ahuanerret Galileo. Arr ahuanmuet all aspeno all otanet Jesús allcha' tet. ¹⁷ Allempo entosetpa' ñetñapa' cha concorpa'rretyesoset. Puesheña'tetsñapa' cha echarrtanet pueyochro. ¹⁸ Allempoña Jesúsapa' ponmanet atet otapanet:

—Napa' apare'ten allohuen llesens añe patsrecop ñaña Yompor pue'ntañecop. ¹⁹ Ñeñto'marña te'pa' orras o'ch sey'chatyes ora allohuen pa'namen acheñ attoch neyochresha' neperranet. O'ch sapatanet Yompor Parets pa'so'chño ñaña Yompor Puechemer pa'so'chño ñaña e'ñe Yompor Puecamquēñ pa'so'chño allochñapa' attochña e'ñe pueyochresha' perranet Yompor Parets. ²⁰ Ñaña' chocmach o'ch e'ñe sey'chatyesanet allochñapa' attoch e'ñe cohuen ame'ñernanet e'ñe ora ñeñ allpon o' notuas. Ñaña señoche'pa'ch napa' e'ñe pate'tets yet chocmach allo'tseney parro attoch chocma nebensare'tam̄penes

ama't tarremphuach esempohuañen allempoch mellapoterra. Ñeñtpa'
attetepa'ch Nompore. Allohua.

COHUEN ÑOÑETS ÑEÑT̃ QUELLCA' SAN MARCOS

Allempo orrta Juan ñeñt̃ serrpare'tosets all amayo
(Mt. 3.1-12; Lc. 3.1-9, 15-17; Jn. 1.19-28)

¹⁻² Te' arr napa' o'ch nequellconas ñeñt̃ e'ñe cohuen ñoñets alloch yequeshperra e'ñe yame'ñeñoſa Jesucristo ñeñt̃ Puechemer pen Yompor. Ñehua, ñeñt̃ ñanom orrtatsa ñeñt̃pa' e'ñe atet o' perra e'ñe atet quellquë't Isaías ñeñt̃ a'mtaye't ahuat Yompor po'ñoñ. Isaíaspa' ñapa' añca'ye quellquë't ñeñt̃ atet Yomporpa' otan Puechemer ñeñt̃ara Cristo, ñeñt̃pa' atet och:

Te'pa' peñoche'pa'ch napa' nemñernna'pcha' puesheñarr ñeñt̃cha' potam'perraya. E'ñe ña pueserrpare'teñoſpa' añño'ternna'pcha' allcha' poñimos paña esempo.

³ Ñapa' e'morrterrach po'ñoñ all amayo allcha'ña serrpare'taterranña acheñenesha'. Puerranarotpa' añcha' toma'ntaterranet toñ, ñeñt̃pa' atetcha' oterranet: "Te'pa' o'ch sa'cohuenetyes toñ allcha' oñmos Partsesha', o'ch e'ñe sa'pacharretyesoñ pa'te'p." Arrpa' allohua ñeñt̃ atet quellquë't Isaías.

⁴ E'ñe atet anuaret ahuatoteñpa' ñeñt̃ña' e'ñe'cho' atet perra allempo orrtosa Juan ñeñt̃ apatose' acheñenesha' Yomporecop. Ñapa' alla orrta amayo allña serrpare'tatosanña acheñenesha'. Ñeñt̃pa' atet otosanet:

—Te'pa' o'ch soctape'cherr ello cohuen Yomporecop allochñapa' e'ñech cohuen sapataretterra e'ñe same'ñeñoſ Yompor. Attochña Yomporpa' o'ch peretna'huernnas so'chñar.

⁵ Ñeñt̃o'marña shonte' acheñenesha' chocma hua'cha'tyenet ñesho o'ch e'mñoteñeta'. Allohuen ñeñt̃ judeo'marnesha' ñaña allohuen ñeñt̃ jerusaléño'marnesha' chocma hua'cha'tyenet ñesho. Allña ñetpa' a'meta'yesoset po'chñaret, Juanñapa' apatyasapanet Yomporecop. Ñeñt̃ña oñ all apatyasapanet añ pa'so'cheñ Jordanas.

⁶ Ñeñt̃ña Juanpa' camello pue'ch apomotaret ñeñt̃ pa'shtam pen. Allo chanena ñeñt̃pa' pa'rrom. Allñapa' rra'yesane't ahuañchenclla* ñeñt̃a puerrar pe't epuet pets po'moñ. ⁷ Juanñapa' atet serrpare'tatanet:

—Cristoña ñeñt̃cha' huapatsa chenta'pa' ñapa' atarrca'ye ahua'mencatesha', nañapa' ama tama ahua'mencateyayno. Ñapa' ñeñt̃ña atarr sherbets, nañapa' ama es nesherbeno attoch nemo'ca pa'rrpo't ama't po'sapatre'chapa' o'ch nepyoñ.† ⁸ Ñaña napa' ama't napatensoñ Yomporecoppa' e'ñeca'ye oñochaya napatyenes. Tarraña Cristoñapa' añcha'ca'ye chorratossa Parets Puecamquëñ.

Allempo apataretta Jesús Yomporecop
(Mt. 3.13-17; Lc. 3.21-22)

⁹ Allempoña huapa Jesús Nazaretot allara Galileo. Chap Juanesho allñapa' apata' Juan oño Jordanaso. ¹⁰ E'ñe apatue'pa' o'cha'nerrña Jesús oñoſpa' allenta entan enet atoraret. Allotña e'ñe sohua'nmaña Parets

* 1:6 Ñeñt̃ ahuañchencllapa' arrapo' enteñ palestino'marnesha'. † 1:7 Ñeñt̃ atet po'taruas pe't esclavos o'ch pueyam'psan pamo'mte' po'sapatre'ch.

Puecamquëñ e'ñe atet entañ ñerra'mrrate' yeþ o' sohua'nma entot. E'ñe arr çhap Jesúsesho. ¹¹ Allempoñapa' çha e'morrtatsa ñaña ñoñets entot atet eñorena Yompor. Ñeñña ñoñetspa' atet oten:

—Papa' ñeñteþ Nechemereþ ñeñteþ atarr nemorrentena, þa atarr nocshatene'.

Allempo oneñeþpa' topatenan Jesús, mueneñ o'ch atet þatan Jesús ñeññ ama pocteye' enteno Yompor

(Mt. 4.1-11; Lc. 4.1-13)

¹² Allempoña Parets Puecamquëñpa' allenta anman Jesús all amayo. ¹³ Pa'tatsoch çharramat allo'tsena amayo; allña' allo'tsa'yen pa'namen berroçhno. Attoña allpa' o' huapoña oneñeñ mueneñ o'ch atet þatyese ñeññ ama pocteye' enteno Pompor Parets. O'ña topatuhueña'pa' allempoñapa' huaçha'toña ñaña Yompor po'mllañoñeñnashar; ñetña sherþosetña Jesús all.

Allempo e'ñe ñenmã torrena Jesús Partsocop all Galileo

(Mt. 4.12-17; Lc. 4.14-15)

¹⁴⁻¹⁵ Allempoña yottamþset Juan allcha' mueroçhtachet, Jesúsñapa' allenta ahuerr Galileo. O'ña çherr all ñaña'pa' serrpare'tatuerranet ñeññ e'ñe cohuen ñoñets ñeññ huetsa Yomporeshot alloch yequeshperra. Ñeñña'pa' atet otuerranet:

—Te'ñapa' o' etsoterra yeññats, o' çherrmoch allempoch atarr ayochreshatterra Yompor. Socoppa' añ poctetsa o'ch soctape'çherr ello cohuen Yomporecop ñaña o'ch same'ñerra ñeññ e'ñe cohuen ñoñets allochca'yeña sequeshperra.

Atto Jesúsapa' çhore'tosan pa'tatssheña ñeññ e'ñe caca torrenet rromuet

(Mt. 4.18-22; Lc. 5.1-11)

¹⁶ Allempo Jesúsapa' chopeñe'chyen all sa'patopño'mar; ñeñña sa'ppa' añ pa'so'cheñ Galileas. Allña'pa' entnoman Simón epuet pa'mo'nasheñ Andrés. Ñetña'pa' all terrayenet e'ñe all sa'po tarro'mar ñetpa' ñeññ po'taruas penet. ¹⁷ Jesúsñapa' atet otosanet:

—Te'ñapa' o'ch notas: Soçta'n na attoch neyochresha' neperres. Ñeññ atet sepena ahuatoteñ e'ne' cac te'ñapa' o'ch neyçhaterres attoch se'nerr ñaña acheñ ñeñña' same'ñaterra.

¹⁸ Ñetña'pa' allorocma na'nmuet po'terrayapa' o' cotet Jesús.

¹⁹ O'ña metorrer a'yenteye'pa' allña'pa' entuerranerr ñaña Jacobo[‡] epuet pa'mo'nasheñ Juan; ñeñña'pa' Zebedeo puechemeresha'. Ñetña'pa' po'ñoño'tsa'yenet all cohuenetyenet po'terraya. ²⁰ Jesúsñapa' çhore'tuerranetrrpa' atet otuerraneterr ñamet:

—Te'pa' o'ch soçta'n saña.

Ñetña'pa' allenta sa'nmet pomporet Zebedeo all po'ñoño epuet ñaña pa'taruasañret. Ñetpa'çho'ña cotet Jesús attoch pueyochresha' perranet ñamet.

Allempo Jesúsapa' entañ puesheñarr yacma ñeññ chorrena oneñeñ

(Lc. 4.31-37)

²¹ Atteña'pa' ahuanmuet ñaña anetso Capernaumo. O'ña çhap añ yeññatsro allempocma amesen judionesha', allña Jesúsapa' be'tosos judionesha' po'prahuo, all yeçhatyesosanet. ²² Allempo serrpare'tatuanet

[‡] 1:19 Jacobopa' ñeññara ñeññ sochenet Santiago.

Jesús, acheñenesha'ñapa' epaye' cohuanrrorteñet ñeñt atet yečhatenanet ña. Tarro'mar ñapa' atarr cohuen yečhatenanet atet ñerra'mrrate' ñeñt allsensarettetsa Partseshot. Judionesha' pa'mcha'tareternesha' ñeñt atarr etsotayene' ñoñets ñeñt atet anaret, ñetñapa' ama e'ñeye' atteye' yečhateneto. ²³ Puesheñarrña yacma ñeñt allo'tsen puerahuo, ñeñtñapa' añ chorrenaya oneñet. Ñaña rranare'tapa' atet otapan Jesús:

²⁴ —Eso'mare'tcha'ña errot peposey Jesús, pa ñeñteñ nazareto'marneshañ. ¿Añecopfe' pehuena o'ch pa'chencaterrey? Napa' o' neñotapañ. Papa' atarr Partsoñ añ pellsensene' Pompore' Pampore' añ nanac Parets.

²⁵ Tarraña Jesúsapa' ama muenache o'ch eñorana'cha. Ñañaapa' atet och: —Pemma, te'pa' choñaña quechpa'nerre'ña añ acheñer.

²⁶ Oneñetñapa' cha atanman yacmapa' alla o'shshe'ma. Oneñetñapa' cha rranare'tnoma allempo quechpa'nerran acheñ. ²⁷ Acheñenesha'ñapa' cha atarr torats panet pueyočhret. Ñetñapa' atet otanna'tyeset:

—Ta'mca'ye, errotente'ca'yeña Jesús po'ñoñ; po'poñontepa'tca'ye yečhatyen. Ñeñtpa' errotente'ca'ye. E'ñe atet pena po'ñoñ atet ñerra'mrrate' ñeñt allsensarettetsa Yomporeshot. ¡Ama't oneñet errot otenpa' atetcho' pateñ, e'ñech ame'ñateña!

²⁸ E'ñe mamecmapa' o' e'ñe serrpare'tuahuet allampaño'mar Galileo atet pa'yena Jesús.

Allempo a'crratosan Jesús Simón Pedro pa'so'mue
(Mt. 8.14-15; Lc. 4.38-39)

²⁹ Allempoña cha'nmačherret puerahuotpa' arr ahuanmuet all yečhena Simón ñaña pa'mo'nasheñ Andrés. Allñapa' añ cota'nmue' Jacobo ñaña Juan. ³⁰ Allña Simón pa'so'muepa' cha atsna'ten, cha huoraten, alla panena po'mayo. Otapet Jesús:

—Simón pa'so'muepa' cha atsna'ten.

³¹ Allempoña Jesúsapa' ponmosana atsnañetpa' rremota'tos pototpa' cha echantose' cha metuerretsña atto huoraten. Allempoña o' metua po'urateñapa' allenta tanta o' agapapanet e'ñe cohuen o' yema'tapanet.

Allempo Jesúsapa' a'crraterran shonte' pa'namen atsnañetechno
(Mt. 8.16-17; Lc. 4.40-41)

³² Ñeñte yetrocma allempo ellerren o' emuena atsretpa' acheñenesha'ña huapatyesnenet Jesúsesho allohuen ñeñt atsna'tyets ñaña ñeñt chorra'yena oneñet. ³³ Huacha'tyesoña allohuen anetso'marnesha', ñetñapa' alla shontoset allotecma be'tenet pocollo.

³⁴ Jesúsña allempopa' e'ñe a'crratyesuapanet, ama't shonte' pa'namen atsnañtsochno ñeñt osyenahuet. Ama't ñaña shonte' acheñenesha' ñeñt chorra'yena oneñet ñeñtpa'cho'ña e'ñe quechpatyesuapanet oneñet ñeñt chorra'yenahuet. Jesúsñapa' ama muenatano oneñet attoch eñorana'tnomet, tarro'mar ñetpa' e'ñe eñoteñet ñapa' ñeñtca'ye Cristotets.

Allempo Jesúsapa' serrpare'tatyesnoman acheñenesha' erraparen Galileo'mar
(Lc. 4.42-44)

³⁵ Tsapaña e'ñe ahua'tecma tanta'muena Jesús, ama e'ñe orretuena' cha'nma'muen ñeñte anetsrot ahua'muen all ama acheñempaño'yaye allcha' ma'yocha'muena. ³⁶ E'ñe o'chtatsapa' ahua'muen ñaña Simón

ñaña po'psheññechno ñeñt epuet ta'muena. Ñetpa' o'ch e'nereta' Jesús.
³⁷ Allempoña entosetpa' atet otoset:

—Papa' allohuen acheñenesha' chocmaca'ye e'nenpet.

³⁸ Ñaña' otapanet:

—Te'pa' o'ch ahuey po'poñ anetso ñeñtara allampaño'mar allpa'cho'ña o'ch neserrpare'tatyesnomanet tarro'mar napa' ñeñtecopca'yeña no-huapa.

³⁹ Allempoñapa' chopeñe'chyes Jesús errañaren Galileo'mar, serrpare'tatyesanet e'ñe ñet po'prahueto. Ñaña ñeñt chorra'yena oneñt, ñaña' e'ñe quechpatyesuerranet.

Atto Jesús a'crraterran puesheñarr yacma ñeñt aptsarñat
 (Mt. 8.1-4; Lc. 5.12-16)

⁴⁰ Allempoñapa' huapoña ñaña puesheñarr yacma ñeñt osen puet-sarñats ñeñt otenet lepra. Chap Jesúseshopa' concorpana'tosana Jesúsapa' atet otos:

—Ñerra'm pa muenatspa' pa ñeñtep atarr ahuamencateshap pa'crrataye'cherren allochñapa' attoch e'ñe cohuen entuerren acheñenesha'.

⁴¹ Jesúsñapa' e'ñe cohuen muerapya ñeñto'marña anretapa' allenta a'pille', atet och:

—Napa' nemneñca'ye, metuerrepa'ña peptsarña allochñapa' attoch e'ñe cohuen entuerrepa' allohuen acheñenesha'.

⁴² Yacmañapa' allorocmuepa'tcha' metuerña pueptsarña cha cohuenterrtsa. ⁴³⁻⁴⁴ Jesúsñapa' alla otererr:

—Te' atto o' na'crraterreppa' po'ño'ch ama't e'ñe puesheñarrapa' amach potap'sa'tatsche ama't mamesha. Corneshachña pegatena' all peptsarse't. Ate't nane't Moisés ñoñets añ acheñrecop ñeñtcha' a'crratetterrtsapa' te'ñapa' o'ch es panom ñeñtcha' p'apos all ñeñt Yomporecop. Allochñapa' attoch e'ñe cohuen entuerrepa' allohuen acheñenesha'.

Attotca'yeña Jesúsapa' mueñe o'ch ahuo' corneshesho.

⁴⁵ Ñaña' allempo ahua'pa' e'ñe serrpare'tatyesuanman allohuen acheñenesha' ñeñto'marña e'ñe ña pa'metare'teño'tpa' o' erracmañen eñotuet ñeñt atet pa'yena Jesús. Ñeñto'marña Jesúsapa' ama eshcaye' seno anetso all shontena acheñenesha'. Ñapa' alla chopeñe'chyen a'yo'mar all ama acheñempaño'yaye. Tarraña ama't atet penañ acheñenesha'ñapa' allenñateñ hua'cha'teññañet ñeñt shontenoya ama't all.

2

Atto Jesús a'crraterran ñaña ñeñt echarrtaña
 (Mt. 9.1-8; Lc. 5.17-26)

¹ O'ña met allponmat Jesúsñapa' o' alla cherrerr anetso Capernaumo. Acheñenesha'ñapa' e'mare'chet o' alla cherrerr pocollo. ² Allempoñapa' o' alla shonterrñañerr acheñenesha'. Atteñapa' o'huañ epuet o'pono pocollo. Ama't allot be'tenet pocollopa' o'huañ epuet. Jesúsña allpa' serrpare'tatapan acheñenesha' Yompor po'ñoñ. ³ Atteñapa' huapatam'psoñet ñaña echarrtaña ñeñtñapa' pa'tatsheña ñeñt anmam'pene' puechec-na'pot. ⁴ Ñetpa' añ muenenetañ o'ch be'tososet o'ch e'ñe noset Jesúsesho,

tarraña shonte' acheñenesha' ñeñto'marña ama eshcaye' abe'tosetoña at-snañe't attoch chapachet e'ñe Jesúsesho. Atteña a'tapatoset eno't pocollato, ñeñña pocollpa' patsopo'. Ñetñapa' rrorosetña ñeñt pocollatar enot e'ñe ñeñteoptaro'tsen Jesús all patsot. Allo'tña a'suatañpsosetña echarraña e'ñe puechcnape'na. Attoña chapachet e'ñe rrocho allo'tsen Jesús.⁵ Jesúsñapa' eñotapanet ñetpa' atarr nanac yemteñet. Allempoña ñapa' otapan echarraña:

—Te'ña neyochre, pa' po'chñarpa' o' ap'retna'huare'tterra.

⁶ Nehua, allñapa' allo'tsa'yen ñaña puesheña'tets ñeñt atarr etsotayenayen ñoñets ñeñt atet anaret judioneshacop. All anorrcha'tyenet ñetñapa' atet otatse'tyeset pueyo'chreto: ⁷ “Eso'mare'tña atet eñenña añ acheñer. Ñeñt atet otenpa' ñapa' chaca'ye achm'are'tenanña Yompor tarro'mar arr patsropa' ama't e'ñe puesheñarra ama eñalleña ñeñt peretnene' ochñarets ñaptaña Yompor peretnene' ochñarets.” ⁸ Jesúsña pueyo'chropa' eñotanet ñeñt atet otyenet ñet pueyo'chreto ñocop. Allempoña Jesúsapa' atet otanet:

—Sapa' eso'mare'tcha'ña atet soctape'chatse'tyesña seyo'chro. ⁹ Sapa' chate' soten ñeñt atet o' notue echarraña po'chñar o' ap'retna'huare'tta, ñeñtpa' ama torrapahuoyaye. Sapa' añña atarr torrapo' senten attoch na'crrater, choncha'ña ote': “Petantena, pechta'nen pemue'pa' o'ch pechope'chnen.” ¹⁰ Nehua, napa' o'ch neñotatas na Ñeñfen Acheñetsotses, napa' ñeñfen apareten llesens attoch nach peretnerre' ochñarets añ patsro.

Ñeñto'marña Jesús allempopa' atet otan echarraña:

¹¹ —Te'ña napa' o'ch notaþ: Petantena, pechta'nen pemue'pa' o'ch pechope'chnen, ahuenep' pepaclo.

¹² E'ñe otue' atetpa' echarrañañapa' cha tantetsa e'ñe allorocma, o' cheta'nenan po'mue'pa' cha'nen allot. Allohuenña acheñenesha' e'ñe entueñet; ñetñapa' cha atarr cohuanrrortapueñet. Ñeñto'marña ñet allempopa' atarr cohuentatyenñañet Yompor. Ñetñapa' atet otyenet:

—Yapa' ama't ahuatapa' ama yentareña atet ñeñt atarr cohuen.

Allempo Jesúsapa' hua'ña'nman Leví attoch pueyochresha' per (Mt. 9.9-13; Lc. 5.27-32)

¹³ Jesúsñapa' alla ahuererr sa'patopño. Allohuen acheñenesha'pa' alla hua'cherrñañeterr, ñañapa' ye'chatyesapanet. ¹⁴ O'ña yechatuanetpa' o' meterrerr Jesús allot, allña oñenpa' entnoman ñaña Leví* ñeñt Alfeo puechemer. Ñañapa' alla anen allecma cobra'yenan acheñenesha' quelle ñeñt gobiernocop. Jesúsñapa' atet otosan Leví:

—Te'pa' o'ch pocta'n attoch neyochresha' nepperreþ.

E'ñe otue' Jesús atetpa' Levíñapa' cha tantnomtsapa' allenta cotan Jesús.

¹⁵ Allempoña chap ñaña allempo Jesúsapa' alla rrallme'chen Leví pa'paclo. All rrallme'chapreteñ shonte' acheñenesha' ñeñt po'taruas pa'yenet ñamet o'ch cobra'yenan acheñenesha' quelle ñeñt gobiernocop. Ñetpa' atarr ashcañnesha' entenanet acheñenesha'. Ñaña allo'tsa'yen shonte' po'potantañe'chno ñeñt atarr ochñañenesha' entyen acheñenesha'. Ñetñapa' all anorrcha'tyenet all anen Jesús epuet pueyochresha'. Tarro'mar shonte' acheñenesha' ñeñt co'ta'huanene' Jesús.

* 2:14 Levípa' ñeñtara ñeñt sochenet Mateo.

16 Añña fariseonesha' ñeñt allo'tsa'yen ñaña ñeñt etsotayenayeñ ñoñets ñeñt atet anaret ñeñtareta judioneshet, ñetña allempo enteñet Jesús all rrallme'chapretenan ñeñt atarr ochñañenesha' ñetña'pa' allenta otoñet pueyochresha':

—Eso'mare'tña ñeñt semaestror sepenpa' rrallme'chapretenañña añ acheñeneshar ñeñt pueshquëño'e'na cobra'yene' acheñenesha' ñaña epuet acheñenesha' ñeñt atarr ochñañenesha'chno.

17 Atet e'manet Jesús, ñaña'pa' atet toma'ntatanet:

—Ñeñt e'ñe huomech entetsapa' ñetpa' ama e'neñetoña apartañ. Añña ñeñt atsna'tetspa' ñetña'pa' chocma e'nenet ñeñt'cha' a'crraterrahuet. Napa' ama añecpaye' nohuapo attoch neçhore'tos ñeñt e'ñe atet entetsañ ñetpa' e'ño' cohuen es pa'yenet. Napa' añecopña nohuapa attoch neçhore'tos ñeñt atarr ochñañ entyetsa. Allochña'pa' attoch o'ch cotape'cherret ello e'ñe cohuen Yomporecop.

Allempo Jesús'pa' eñotatanet atetcha' tore'tet Yomporecop ñeñt po'ño'ch sherbets

(Mt. 9.14-17; Lc. 5.33-39)

18 Parrochña allempo tore'tyena† Juan pueyochresha' Yomporecop ñaña fariseonesha' pueyochresha', puesheña'tetsña acheña'pa' hua'cha'tet Jesúsesho, ñetña'pa' atet otoset Jesús:

—Juan pueyochresha'pa' tore'tetset Yomporecop; fariseonesha' pueyochresha'pa' cho'ña tore'tetset ñamet Yomporecop. Paña peyochresha'pa' eso'mare'tña amaña tore'teneto.

19 Jesúsña'pa' atet toma'ntatanetpa' ñeñt'pa' atet otanet:

—Ñeñt ahua'ñarefe'chno all rrallme'chapreteñet ñeñt e'ñe errete' sena'tetsa, ama pocteyaye o'ch yotamet “amach es serra'yestatsto” tarro'mar ñeñt'pa' atet coshapreteñet ñeñt sena'tetsa. Amachña cha tore'teno allempo allo'tsenmeñ parro ñeñt errete' sena'tetsa.

20 Tarraña ñerra'm esempo machayota sa'nerranet ñeñt sena'tetsa, ñeñtña parro yemuetyenapa' allempoña ñetpa' e'ñe puellquëño'et queçhpa'huerretcha' puerrar, amach arrenaye' enterreto. Ñeñt'pa' attochña tore'terret allempo Yomporecop e'ñe po'ño'ch. Arrpa' allohua huañ ñeñt atet Jesús toma'ntata ña sena'tostsa.

21 Elloña'pa' o' alla toma'ntaterraneterr ñeñt atet ye'chen judionesha' arr patsro ñeñto'marña atet otanet:

—Yapa' ñerra'm mellashañ yeshtampa' amach yelltatsche emarr lletamtso. Tarro'mar ama't atet ye'patsechpa' ñeñt'pa' e'ñech orrena yellteñ tarro'mar ñeñt emarr lletamuetspa' ñerra'm esempo yatsama'tampespa' çhach chellama'ta çhach martse'tatanña shetamt-soshe'm. Ñeñtña yelltenpa' allo'nach sen rrarrtse'tats nanac.

Ñeñt'pa' attoña Jesús'pa' eñotatanet ña pocta'ña e'ñe etserra.

22 Jesúsña'pa' alla toma'ntaterraneterr po'poñ ñeñt atet ye'chen judionesha' o'ch ye'chcatenet pa'rrom orro't. Ñeñto'marña atet otanet:

—Ama't puesheñarrofeyapa' amach yeshatstoña vinos emasa mellasha'mañ orro'to ñeñt aye'chcataret pa'rrom. Tarro'mar ñerra'm atet ye'pe'pa' o'ch chasa'ña vinospa' çhach a'p'tsan orro't, vinosña'pa' çhate'

† 2:18 Añ tore'teñetspa' añecop o'ch yetorra Yomporecop. Amach añecpayaye atomat, ñeñt'pa' añecpa mameshacop o'ch yequeçhpa' yerrar.

e'ñe shebhua, ñeñtña orrotpa' ama't mameshapa' amach es sherberro. Añña ñerra'm emasa vinos arrcha' yeshe' emerra orroto ñeñt ayečhatare't pa'rrom.

Ñeñtpa'cho'ña attoña Jesús'pa' eñotatanet ña poctapña e'ñe etserra.

Allempo Jesús' pueyochresha' taso'tam̄pesyesnomuet trigo añe yetro allempocma amesen judionesha'

(Mt. 12.1-8; Lc. 6.1-5)

²³ Allempoña čherrer pamtarr allempo čhocma amesen judionesha'. Allempoña Jesús'pa' arr oñem chetso'mar epuet pueyochresha'čno. Allempo oñenet chetso'mar pueyochresha'ñapa' taso'tam̄pesyesnomuet puechm̄a'tets trigo. ²⁴ Fariseonesha'ñapa' ñeñt entahuet ñetñapa' allenta otyeset Jesús':

—Pecue' eso'mare'tña peyochresha'ñapa' atet penet ñeñt ama pocteyaye o'ch atet ye'pa tarro'mar te'pa' añe yetropa' ñeñt atet anaret ahuatoteñ allempocmach yamesen.

²⁵ Jesús'ñapa' atet otanet:

—Sapa' ama'trra selleyareña ñeñt atet pa' ahuat David allempo pallta'psa ñeñtcha' rret allempo cheporra'nma epuet ña'ma allohuen ñeñt cotene'. ²⁶ Ña allempopa' be'tosos Yompor pa'paclo, allñapa' rrosan pan ñeñt atma'ntatare't atet ñerra'mrrate' ñeñt nenet all Partsocop. Ñehua, ñeñt panpa' ama pocteyayñe o'ch esesha' rre'. Ñeñtpa' añach ñapuet rrene' cornaneshachno, ñeñtpa' e'ñe atet anaret judioneshacop. Ñeñtña panpa' o' rros David, rratosan ña'ma allohuen ñeñt epuet. Ñehua, ñeñtpa' tarrempo atet pe't David allempo judionesha' po'cornanesharpa' añ pa'mcha'tareter pete't Abiatar.

²⁷ Jesús'ña alla oterraneterr:

—Añ yetro allempo yamesen ñeñtpa' añecop anaret acheñeneshacpay ñeñtcha' yesherbene'. Amaña añecpaye' anareteña yetñats ñeñtcha' yesherbene ya. ²⁸ Ñeñto'mar na Ñeñten Acheñetosets, ñeñten allsen-sareten, naca'yeña atet otets este' poctetsaña ñeñtcha' atet ye'pa añe yetro allempocma yamesen.

3

Allempo Jesús'pa' a'crraterran ñeñt chelletsapot

(Mt. 12.9-14; Lc. 6.6-11)

¹ Po'pocheñoña Jesús'pa' alla be'tosuener judionesha' po'prahuo. Allñapa' allo'tsen puesheñarr yacma ñeñt čha chellena pot.

² Fariseonesha'ña allpa' Jesús'a atarr cohuanat'yetnet atoch eñchet ñato'rraña a'crratanerrcha' acheñ añe yetro allempocma amesen. Ñerra'm o'ch a'crratananerr ama't puesheñarra añe yetro allempo amesenet, allempoñapa' esheccha' a'metam̄peñeta' añcha'taretesho.

³ Allempoña Jesús'pa' otan ñeñt chelletsapot:

—Apon, pa'tomos arrma.

⁴ Jesús'ñapa' atet otanet:

—¿Erro'tena'tña ñeñt e'ñe pocte' senten ñeñtcha' atet ye'pa añ yetro allempo yamesen? Ñato' o'ch atet yepe' e'ñe cohuen po'psheñeñ, amapa' ñato' o'ch atet ye'poñ ñeñt ama cohuenayaye. ¿Ñato' añte' pocte' senten

o'ch ya'crrach acheñ amapa' aññe' pocte' senten amach ya'crratatsche
 čhachña yemtsatach?

Ñetñapa' ama't puesheñarrořetapa' ama eseshaye' anapaye.
 5 Allempoña Jesús^{pa}' cohua'yesanet, ama't mamesha ama pocteye'
 entenaneto, atarr llecateñet tarro'mar ñetpa' ama mueneneto o'ch
 čhapanet cohuen pueyočhreto. Allempoña Jesús^{pa}' otan yacma ñeñ
 chelletsa pot:

—Te'pa' o'ch notař, petapuerř pot.

E'ñe otue'pa' ñañapa' allentepa'tcha' tapuerranña pot, o'
 e'ñe cohuenterra pot. 6 Fariseonesha'ña čha'nmačherretpa'
 cotape'chatanna'tet epuet Herodes pueyočhresha', ñetñapa' Jesús^a atarr
 o'patenet attoch muetsatachet.

Shonte' acheñenesha' ñeññ huacha'tatsa sa'patopño all enteñeta' Jesús

7-8 Allempoña Jesús^{pa}' ahuerř sa'patopño'mar pueyočhresha'na.
 Shonte acheñ galileo'marnesha'pa' cota'huanmet ñamet. Ñaña shonte'
 po'potañečhno acheñenesha' ñetña allempo e'mare'teñet Jesús ñapa'
 atarr cohuen orrtatyen ñetpa'čho'ña allenta huacha'tyesoñet ñamet.
 Allenateñ anetsot huacha'tyeset Judeot, Jerusaléñoř, Idumeot, Jordanas
 yonita'noř, ñaña allo'marnesha' ñeññ huetsa Tiroř ñaña Sidónoř. Ñetpa'
 añ atarr muenenet o'ch enteñeta' Jesús. 9 Shonte' nanac acheñenesha'.
 Attoch ama atarr quečhcare'teñe Jesús acheñenesha' ñeññ shontetsa,
 ñañapa' otan pueyočhresha':

—Chocmach sehuapaton noñ.

10 Allempo Jesús^{pa}' a'crratyesan shonte' atsnañečhno ñeñto'marña
 allohuen ñeññ atsna'tyets ñetña allempo'pa' atarr emchorreñet Jesús,
 añ atarr muenenet o'ch a'płloset Jesús. 11 Añña oneñečhno ñeññ
 chorra'yenaya acheñ ñeñpa'čho'ña allempo entoset Jesús^{pa}' allepa'tcha'
 rromañposyet pa'rřpoř, rranare'tyesosetpa' atet otoset:

—¡Pepa'tña Parets Puechemereř!

12 Jesúsñapa' ama muenatano oneñečhno o'ch oteñet ñapa' po'ñočh
 Parets Puechemer.

*Allempo Jesús^{pa}' acran čharrasheña ñeññ puechetsa epsheña ñeñtcha'
 llesensa'*

(Mt. 10.1-4; Lc. 6.12-16)

13 Allempoña Jesús^{pa}' ahuo' aspenřo. Allotña agotatosan ñeññ e'ñe
 cohuen enten ña ñeñtcha' pueyočhresha' pa'. Ñeññ agotatenpa' ñetña
 allenta ahuanmuet ñesho. O'ña čhača'tuetpa' 14 ñañapa' napanet ñeñtet
 čharrasheñet ñeññ puechetsa epsheña, ñetñapa' ñeñtcha' e'ñe parro
 chopeñe'chyen ñaña ñeñtcha' llesensen attoch serrpare'tyerret Yompor
 po'cohuenña. 15 Ñaña o'ch apuerranet llesens attoch quečhpatyeret
 oneñečhno acheñenesha'. 16 Ñeññ llesensa' ñeñtpa' añ pa'so'chñečhno:
 Simón ñeñtara o' sochererr Pedro, 17 allotpa' ñaña Jacobo ñaña
 pa'mo'nasheñ Juan ñeññ Zebedeo puechemeresha'; ñetñapa' o' socher-
 raneterr Boanerges ñeññ yoten yeñoño Tecorena'tar. 18 Allotpa' ñaña
 Andrés, ñaña Felipe, ñaña Bartolomé, ñaña Mateo, ñaña Tomás, ñaña
 Jacobo ñeññ Alfeo puechemer; ñaña Tadeo, ñaña ñeññ po'psheñeñ Simón
 ñeññ cananistanesha' ñeññ atarr torratse't pa'netsrecop. 19 Allotpa' ñaña
 Judas Iscariote ñeñtcha' pomuerre' tsapatonet Jesús.

Atto puesheña'tets oteñet Jesús ñapa' oneñeto' po'huamencot quechpatenanña po'potantañ oneñečhno acheñenesha'

(Mt. 12.22-32; Lc. 11.14-23; 12.10)

Allempoña Jesúsapa' o' alla čherrer pocollo pueyochresha'na. ²⁰ Allñapa' o' alla shonerrñañerr allohuen acheñenesha', ñeñto'marña allempopa' ama eshcaje' rreneto. ²¹ Allempo e'mare'ch Jesús pamo'tsesha' atet pa'yenapa' ñetñapa' huačha'tet o'ch ereta' Jesús tarro'mar ñetpa' otenapuetañ ñato' čhote' o' mospaña Jesús.

²² Puesheña'tetsña ñeñt atarr etsotayenayeñ ñoñets ñeñt atet anareñ ñetpa' Jerusalénoť huačha'tet. Ñetñapa' atet otyesoset Jesúsocop:

—Añ yacmarpa' añaca'ye chorrenaya Beelzebú ñeñt pompor pen allohuen oneñečhno; ñeñtca'yeña ahuamencat pene' attoť quechpatenanña oneñečhno acheñenesha'.

²³ Allempoña Jesúsapa' čhore'tan acheñenesha', allempoñapa' atet ota-panet:

—O'ch notas, po'ñočh oneñetpa' amaca'ye huapore'tanneno. ²⁴ Atet ñerra'm paterr añcha'tareť ñerra'm čho elloptannena pueyochresha' ñeñtña atto añcha'tarettena čhach huañerrets amach allo'na huomencatneno. ²⁵ Attecmach pañnera ñaña ñeñt e'ñe pamo'tsna'tarecmuet pañnenet ñerra'm čho elloptannenet e'ñe ñagattsetapa' ñeñtña atto huomencatenetpa' ñetpa'čho'ña čhachca'ye huañerrets.

²⁶ Attecmach pañnera ñaña oneñet pueyochreshačhno, ñerra'm oneñečhno e'mone'tannenet, ñerra'm tantanna'ta oneñečhno'pa' ñeñtña atto huomencatenetpa' ñetpa'čho'ña čhachca'ye huañerrets amach allo'na huomencatneneto. Ñeñto'marña po'ñočh oneñetpa' amate' errotenot huapore'tanna'teto e'ñe ñagattseta.

²⁷ Ñehua, yapa' yeñoteñ ñeñt atarr ahuamencattetsa atto atarr ahuamencattena oneñet, ñaña'pa' e'ñe po'huamencot cohuam'pesyanen allohuen e'ñe cohuen ñeñt pa'paquell pa'yen. Tarraña ñerra'm esempo o'ch huapoña ñeñt atarr ahuamencatesha' ñeñtča' metanose'ña po'huamenc atet ñerra'm na Nompor, ñeñtča'ña rromose' o'ch huan-cos, allochñapa' o'ch be'tosos all ñeñt pa'paquell pa'yen o'ch e'ñe puer-ratam'psos ñeñt allpon o'patyena ña.

²⁸ Jesúsapa' alla oterraneterr:

—Napa' o'ch notas, po'ñočh allohuen pa'namen sosya'tsañečhno ñeñt ama pocteye' enteno Yompor ama't ñaña achm'are'tanna'teñets ñeñt'pa' a'pretna'po' nenteñ. ²⁹ Tarraña ñerra'm esesha' añ achm'are'teññañet Parets Puecamquēñ ñeñtñapa' amaca'ye a'pretna'pahuoye' nenteñe. Ñeñtña po'chñaretpa' amachca'ye a'pretna'pahuoterro e'ñe tayoteñ erponohuañen.

³⁰ Ñehua, ñeñt'pa' atet otanet Jesús tarro'mar ñetpa' atet otyeñet Jesús, ñapa' año' chorrenaya oneñet ñeñto'ña ahuamencat pene'.

Allempo huapoña Jesús pachor ñaña pa'mo'nasheñnesha'
(Mt. 12.46-50; Lc. 8.19-21)

³¹ Allempoñapa' huapa Jesús pachor epuet ñaña pa'mo'nasheñnesha'. Chapuet allpa' ñetñapa' alla tomčha'toset a'yot, allotña agotatoset Jesús.

³² Ñeñt anorrčha'tyets epuet Jesús ñeñt arrotam'penaya, ñetñapa' atet ochet:

—O'ca'ye huapa p̄achor ñāma pemo'nasheñnesha'. Ñetpa' a'yote'tsa'yenet, p̄aca'ye e'nenet.

³³ Jesúsñapa' atet otanet:

—Ama't señoiteñe ñeñt e'ñe po'ñoçh nachor nepen ñāma ñeñt e'ñe po'ñoçh nemo'nasheñ nepen.

³⁴ Allempoñapa' cohua'yesan acheñenesha' ñeñt arrotam̄penaya all anorrchenet. Allempoñapa' atet oterraneterr:

—Napa' ānca'yeña ñeñt po'ñoçh nachor nepen ñāma ñeñt po'ñoçh nemo'nasheñnesha' nepen. ³⁵ Ñehua, ama't erra'tsena ñeñt e'ñe atet p̄ohuene' ñeñt atet muenen Nomp̄or ñeñt pue'ntañ'o'tsen ñeñtca'yeña e'ñe po'ñoçh nemo'nasheñ nepen ñeñtña noch nepen ñeñtña nachor nepen.

4

All toma'ntatanet Jesús ñeñt a'parre'tene' puerets

(Mt. 13.1-9; Lc. 8.4-8)

¹ Jesúsñapa' alla yeçhaterranerr acheñenesha' e'ñe alla sa'patop̄ño. Allña emchorra'huererr shonte' acheñenesha'. Ñeñto'marña Jesús'pa' a'tap noñtopa' ahuañpes mame' allpononet allñapa' anorros noñto e'ñe all sa'po. Acheñenesha'ña allohuenetpa' e'ñe sa'patop̄ño'tsa'yenet all masto. ² Allñapa' esocmañen serrpare'tatenan acheñenesha' pa'namen toma'nteñtsoçhno. All yeçhatyenanetpa' atet otanet:

³ —Se'mñoton añ ñeñt atet notenes: Ñeñtña a'parrene' puerets ñañapa' ahua' allcha' a'parre'tyenana' puepue. ⁴ All a'parre'tyeñ patanta'tetsñapa' alla çhapyes toño'mar. Allñapa' huaçha'tyesa ot e'ñe ānyallme'chuenana' puerets. ⁵ Po'poñeçhnoñapa' alla çhapyes mapuetro'meso'mar all ama tama eñalle pats. Ama nanac o'pono'tseno patso ñeñto'marña mametollapa' cheparesuañ. ⁶ O'ña enome'ta'muen atsret̄pa' alla a'uyatuer. Ama erçha'tena' ñeñto'marña alla hueya'huerra. ⁷ Po'potantañña pueretspa' alla çhapyes allcha' chepares aj. Allpa'çho' mameshapa' cheparesuañpa' ajñapa' mameshapa' atesha'tua alla ca'matuerranña narmets alla a'çllatuer, ñeñto'marña ama ellon̄re'to. ⁸ Po'potantañeçhno ñeñtñapa' arr çhapyes all e'ñe cohuen patso. Ñeñtñapa' e'ñe cohuen chepares. Allempoña atesha'tuapa' o' ellon̄re'tyes. Atarr atonapa'tets ellon̄re'tyes—puecha'tetspa' ma'poch çharra' pue'llomer, po'pchañeçhnoñapa' pechapoch çharra' pue'llomer, po'pchañeçhnoñapa' çharroch çharra' pue'llomer.

⁹ Allempoña Jesús'pa' alla oterraneterr:

—Ñeñtes po'ñoçh ne'mñotene', çhaponasepa'ch seyoçhro ñeñt atet netma'ntatensa añ ñoñets.

Atet otanet Jesús ñeñtecop atet toma'ntatyenanet

(Mt. 13.10-17; Lc. 8.9-10)

¹⁰ Allempoña patmuerra acheñpa' o' ñap̄tañña Jesús epuet ñāma pueyochresha' ñāma puesheña'tets po'potantañ ñeñt allo'tsa'yen, ñetñapa' atet ochet Jesús:

—Ta'm çes̄e'ña petma'ntatenyaña ñorra'?

¹¹ Jesúsñapa' atet oterraneterr:

—Sa te'pa' Yomporña semnatene' attoch señoiterr ñeñt ama eñotpahuoyaye ama't ahuatoteñ atet penaña Yompor po'cohuenña

atto ayochreshattena ña. Tarraña po'potantañechno ñeñt' atta es puecha'yetsa, ñocueta' ama eñoteñeto ñeñt' atet atma'ntataret' ñoñets. ¹² Attoña ama't enteñetañ ñetña'pa' amach erroteno' es chapahueto pueyo'chreto. Ama't e'mueñetañ amach chenaneñoña pueyo'chreto ñeñt' atet yehateney Yompopor po'cohuenña. Attoña amach co'ape'cherreto ello cohuen Yomporecop attoch ñach peretnerrahuet po'chñaret.

Arrpa' all eñotatanet Jesús ñeñt' toma'ntatenanet ñeñt' a'parre'tene' puerets

(Mt. 13.18-23; Lc. 8.11-15)

¹³ Jesúsña'pa' alla oterraneterr:

—Sapa' ama't mameshapa' are't seño'noña ñeñt' o' netma'ntatuasa ñorra'. Ñerra'm ama chennaso seyo'chro ñeñt' o' netma'ntatuasa ñorra'pa' errotenotuachñaca'yeña chaponasaña seyo'chro allohuen po'poñechno ñeñt'cha' netma'ntaterrser tsapatonet.

¹⁴ Allempoña Jesús'pa' eñotatanet ñeñt' atet o' toma'ntatuanet ñoñets ñocueta, ñeñt'pa' atet otanet:

—Ñeñt' a'parre'tyene' puerets, ñeñt'ña puerets'pa' añca'ye notenes Yompopor po'ñoñ allempo serrpare'teñet. ¹⁵ Añ puerets ñeñt' chapyets toño'mar ñeñt'pa' añ notenes acheñenesha' ñeñt' e'mñotenayeñ Yompopor po'ñoñ. Allempo e'mñotueta'p' allorocmach huapa oneñet o'ch alla puer-ratan'perranet Yompopor po'ñoñ ama't allpon ñeñt' eñotetañ pueyo'chreto. ¹⁶⁻¹⁷ Ñaña ñeñt' chapyesets mapuetro'meso'mar ñeñt'pa' añ notenes acheñenesha' ñerra'm esempo e'mñoteññañet Yompopor po'ñoñ e'ñech allorocma pocsheñesha' aguëññañetañ Yompopor po'ñoñ. E'ñech cohuen ame'ñeretañ tarraña ñeñt'pa' mamecpach atet penet. Tarro'mar ñetpa' e'ñe atet penet ñerra'mrrate' narmets ñeñt' chepuets mapyo amach eñalle puerech. Tsapatonetña ñerra'm o'ch huapanet topateñets ñeñt'cha' muero'chtatahuet tarro'mar ñetpa' o' ame'ñeretañ Yompopor po'ñoñ, ñetña'pa' allorocmach alla que'chpuerrñañet Yompopor po'ñoñ. ¹⁸ Ñaña po'poñechno puerets ñeñt' chapyets ajmo'mar ñeñt'pa' añ netma'ntatena po'potantañ acheñenesha' ñeñt' e'mñotenayeñ Yompopor po'ñoñ. ¹⁹ Ama'tcha' chapanetañ pueyo'chreto tarraña ñetpa' allo'nach senet e'ñech aña atarr co'ape'chenet ñeñt' lleca'yenet arr patso ñeñt' e'ñe ñocueta. Añach muenenet o'ch esocmañen es echenet tarraña ñeñt'pa' 'chaca'ye shequënanet. Attach pa'namen ye'chatse'tyenet. Attoña huenanet topateñets ñeñto'marña ñetpa' amach erroteno' orrtatoñetoña ñeñt' e'ñe cohuen enten Yompopor. Ñetpa' e'ñe atteta ñerra'm narmets ñeñt' cha ca'mateñ ajma' ñeñto'marña amach erroteno' me'teneto o'ch ellom're'tyaset. ²⁰ Ñaña añ puerets ñeñt' chapyesets e'ñe cohuen patso ñeñt' e'ñe cohuen cheparsats'pa' ñeñt'ña toma'ntenaya po'potantañ acheñenesha' ñeñt' e'mñotene' Yompopor po'ñoñ. Ñoñetsña'pa' e'ñech cohuen chenaneñ pueyo'chreto. Ñetña'pa' ñeñtet po'ño'ch orrtatanet ñeñt' atarr sherbets Yomporecop. Attoña ñetpa' e'ñe atet penet ñerra'm narmets ñeñt' atarr me'tets —pate'tets ma'poch 'charra' pue'llomer, po'poñpa' pechapoch 'charra' pue'llomer, po'poñpa' 'charroch 'charra' pue'llomer.

Arrpa' all toma'ntatanet lampareñ atto choyo'tan'peney

(Lc. 8.16-18)

²¹ Jesúsña'pa' alla toma'ntaterraneterr, ñeñt'pa' atet oterraneterr:

—Ñerra'm esempo ya'llchaten lampareñ, ñeñtpa' ama añecpaye' yehuapateñe o'ch alla ye'rramanñpsos coyño. Ñaña ama añecpaye' ya'huortatenoña lampareñ o'ch yene' o'ponot yemayeñnacho. Añecopña ya'huortatenoña lampareñ o'ch yene' enonet attoch çoyo'tamñpesuan allohuen ñeñt allo'tsa'yen. ²² Tarro'mar allohuen pa'namen ñeñt ama eñotpahuoyaye ama't ahuatoteñ, te'ñapa' o'ch e'ñe orrtataretterra attochña o'ch e'ñe eñotatarefetuerret e'ñe poctacma. ²³ Ñeñtes po'ñoçh ne'mñotene' çhaponasepa'ch seyoçhro ñeñt atet netma'ntatensa añ ñoñets.

²⁴ Jesúsapa' alla oterraneterr:

—Sapa' señotenate' e'ñete' po'ñoçh cohuen se'mñoteññañ Yompor po'ñoñ ñato'pa' amate'. Tarro'mar ñerra'm errot sepoñ po'psheñeñ ñeñt ama cohuenayaye Yomporñapa' attec mach perres saña. Ñaña ñerra'm e'ñe cohuen sepenanet, Yomporñapa' e'ñech cohuen perres saña ama't ellonet o'ch apuerres ñeñt e'ñe cohuen. ²⁵ Tarro'mar esesha'te' çhena pueyoçhro ama't e'ñe allpona Yompor po'ñoñ, elloña Yomporpa' allo'nach eñotatnenanet nanac shonte'. Tarraña esesha'ña ñerra'm ama çhenaneto pueyoçhreto tarro'mar ñetpa' ama po'ñoçhaye' aguëññañeto Yompor po'ñoñ, ama't allpon eñotyenetañ pueyoçhro ñeñtñapa' çhach puerratañperranet Yompor.

All toma'ntatanet puerets ñeñt e'ñe cohuen chepyets

²⁶ Jesúsapa' alla toma'ntaterraneterr, ñeñtpa' atet oterraneterr:

—Yompor po'cohuenña ñeñt atto ayochreshattena ña, ñeñtpa' atet pena ñerra'mrrate' pueheñarr acheñ ñeñt nare'tene' puepuer. O'chña nare'tuepa' o'ch ahuerr pa'paclo. ²⁷ Allach allponmaterra' o'ch tsapuenpa' allach muene't, yeñoñapa' çhocmach tanta'muene't, puepuerñapa' atteñapa' o'ch chepua o'ch atesha'ta. Pamo'mte'ñapa' amach e'ñeye' eñoteñe errotentte'ña chepyen. ²⁸ Ñehua, yeñoteñ patspa' ñeñtca'ye a'çhpatene' yepuer e'ñe ñoña. Choch ñanom çho'pe'chyes allempoñapa' o'ch atarrchet çhoch potsets attoch ellonre'tyes, attotachçho' e'ñe po'nuen. ²⁹ E'ñe errte' po'netspa' e'ñech allorocma mueñan ñeñtcha' tsorrenaya'. O'ca' çhen allempoch apçhenetña ñeñt narmetser.

Atto Jesúsapa' toma'ntaterranet atet pena pue'llomer ñeñt otenet mostazllom

(Mt. 13.31-32; Lc. 13.18-19)

³⁰ Jesúsña ellonetpa' atet oterraneterr:

—Añ Yompor po'cohuenña ñeñt atto ayochreshattena ña—ñanompa' e'ñech pueheña'ttsa ame'ña'yetsa, allempoteñña' allo'nach sen atonetnomtsa ñeñtcha' ame'ñerrtsa, attochña e'ñe epa'huerra erracmañen Yompor po'cohuenña. Ñeñña te'pa' o'ch netma'ntatasa ñeñt atet pena ña. ³¹ Ñeñtpa' atet pena ñerra'mrrate' añ pue'llomer ñeñt atarr añeñolleshallmerr ñeñt otenet mostazllom. Ñeñña pue'llomretollpa' o'ch nare'chet patso. Ñehua, e'ñe yeñoteñ mostazllom ñeñtpa' atarrca'ye nanac añeñolleshallmerr. ³² Tarraña ñerra'm o'ch nare'chetpa' allempoña choppa' allo'nach sen rrorranmats cohuen, atarrchetnomuets, elloch metana'tuan po'pchañ narmetsoçhno. Puetacre'nach ateshatacrrrtatsa. Allña'pa' o'ch huaçha'toña oteçhno o'ch rema'rartosa puetacro'mar po'mañero.

*Jesús*pa' ora allpon ñeñt atet ye'chatyenan acheñenesha' ñeñtpa' atto pa'namen es toma'ntatyenanet

(Mt. 13.34-35)

³³ Shonte' po'poñechno ñeñt alla toma'ntaterraneterr atto serrpare'tatenanet Yompor po'ñoñ. Attoña e'ñe allpona serrpare'tatanet ñeñtñapa' e'ñe cohuen eñotatanet pueyo'chreto. ³⁴ Ama serrpare'tatenaneto atfa, añña 'chocma serrpare'tatenanet toma'nteñtso. Ellonetpa' 'chocma e'ñe eñoto'chen serrpare'tatenan pueyo'chresha'.

Allempo a'mchecherran Jesús huomenquësha' ñaña sa'p ñeñt emo'yarertetsa

(Mt. 8.23-27; Lc. 8.22-25)

³⁵ Ñeñte yetrocma e'ñe ellerronet Jesúsñapa' otan pueyo'chresha':

—Te'pa' o'ch ahuañpsey yomta'n.

³⁶ Pueyo'chresha'na sohanmet acheñenesha'. Ñeñtara noñto allo'tsen Jesús'pa' alloña anmampeñet Jesús o'ch ahuañpset yomta'n. Allñapa' cota'luanmanet po'pnañechno noñtechno. ³⁷ Allempo ahuañpset allñapa' machayotepa'tcha' huomenquëshatañpesnomuet. Emo'yare'ña 'cha esha'tena noñto atteña oññapa' chorramoch noñto. ³⁸ Jesúsñapa' alla muen puepopato alla ñotena. Pueyo'chresha'ña opueretpa' atet ochet:

—¡Maestro, amahuaca'ye pellquënyote' o'rramche' yocla'huamocha!

³⁹ Jesúsña tanterrapa' e'ñe po'ñoñoña a'mtsoññetuerran huomenquësha'. Ñaña po'ñoñoña a'mtsoññeterran sa'p ñeñt emo'yartetsa, ñeñtpa' atet ot:

—¡Muechecherrepa', muetsoññeterrapa'!

E'ñe otue'pa' 'cha muechecherrtsaña huomenquësha'. Attoña ñetpa' o' alla mueche'ttamperret e'ñe cohuen. ⁴⁰ Allempoña Jesús'pa' atet otanet:

—Sapa' eso'mare'tña 'cha atarr seyoren. Eso'mare'tña ama e'ñeye' seyemtenno.

⁴¹ Ñetñapa' 'cha atarr nanac yorenent, atet otanna'tyeset:

—Ta'mca'ye añ acheñerpa' esona'tarte'ca'ye. Atarrepa't es a'mchechaten, ama't po'ñoñoñotapa' a'mchechaterran huomenquësha' ama't ñaña emo'yare' oñ.

5

Atto gadaro'marnesha' ñeñt chorrena oneñtapa' huapa Jesúsesho

(Mt. 8.28-34; Lc. 8.26-39)

¹ Allempoñapa' o' etsotaset yomta'n all sechenet. Allñapa' añ pa'ney pene' gadaro'marnesha'. ² Jesúsñapa' sehuosa all noñtot, allñapa' huapoña puesheñarr yacma tarraña ñapa' añ chorrenaya oneñet. Ñeñtpa' arrot huapa allecma pampa'yeñet arromña'etchno. ³⁻⁴ Ñehua, ñapa' alla ye'chena all pampueñet arromña'etchno. Ama't puesheñarrapa' ama eseshaye' errot penaye attoch a'mchecheret. Ama't 'chocma huanquëñetañ asrere'cho pa'tcot ñaña potot, ñaña'pa' 'chach tsepe'tuerranña asrere'ch allo huanquëñet potot ñaña pa'tcot 'chach rrollapecheñ o'ch e'ñe tsepe'tatue. Ñeñto'marña ama't e'ñe eseshapa' ama eshcaye' a'mchecheñeto. ⁵ Allñapa' ellapene'tcha' ñaña arepene'tcha' chopeñe'chyesets apampaño'mar ñaña aspentarero'mar. Allñapa' allecma atarr ama'to'chtana, tsotse'tyena mapyo e'ñe ñañaña. ⁶ Tarraña allempo entapan Jesús a'yoteñ allentepa'tcha' matosa

concorpana'tosana Jesús. ⁷⁻⁸ Allempoña Jesúsapa' atet otosan oneñeñ ñeñ chorrenaya ñeñ yacmar, atet otos:

—O'ch oneñete notosep te'ñapa' ipequechpa'ner añ acheñer!

Ñeñto'marña ñeñ chorrena oneñeñpa' rranosa huomencpa' atet otapan Jesús:

—Eso'maruachca'ye Jesúsocha' patsrre'mochtana'tosna, papa' ñeñtep Ñeñ nanac Parets Puechemerep. Te'pa' o'ch notapap e'ñe Parets pa'so'chño, amach cha pecoñchatatstosno.

⁹ Jesúsñapa' alla otterrannerr ñeñ chorrena oneñeñ:

—Papa' ¿eso'tña peso'cheñ?

Ñañaapa' atet otterrannerr Jesús:

—Napa' añ neso'cheñ Legión tarro'mar yapa' nanac patonrey.

¹⁰ Allempoña ñeñ chorrena oneñeñpa' ñañaapa' atet otare'tapan Jesús:

—Amach pemño'tatsterrye allapar bachayo.

¹¹ Ñehua, allpa' a'yente'tsa'yen shonte' chañchohno ñeñ rratse'tyets aspentonet. ¹² Ñeñto'marña oneñeñechnopa' atet otare'tapet Jesús:

—Ñerra'm choch muene' erroten peposeypa' arrña pemñaye'chosey chañchesho allochñapa' o'ch yechorra'yererr ñaña chañchohno.

¹³ Jesúsñapa' allenta otanet:

—Ama'tca'yepa' orrasca'ye.

Allempoña oneñeñechnopa' quechpa'neret acheñ o' chorrereter ñaña chañchohno. Chañchoña allempo chorrosya oneñeñechnopa' chepa'tcha' matrra'tua ñegoneñ, shorcha'tuos allotpa' e'ñe ño'shrra'tuosa oño. Ñeñña chañchohno' allo'tsente' epoch mil.

¹⁴ Acheñenesha'ña ñeñ cohuanpene' chañcho, ñetñapa' allenta matrra'tet ñamet po'yorño' ahuanmuet anetso. Allñapa' serrpare'tyesoset ñaña ora allohuen allampaño'mar. Acheñenesha'ñapa' allenta ahuanmuet ahuo'ch enteñeta'. ¹⁵ O' cha'cha'tet Jesúseshopa' allñapa' entoset yacma ñeñ chorre't oneñeñechno alla anen ashtamañ, o' eñoterra, o' cohuenterra. Ñetñapa' cha atarr mecha'na'toset. ¹⁶ Añña ñeñ entene' Jesús atto quechpaterran oneñeñ acheñ, o' alla mueñererr chañchesho, ñetñapa' allenta serrpare'tatiesapet ñeñ huacha'ttsa anetsot. ¹⁷ Allempoña acheñenesha' ñeñ yechetsa allpa' atet ochet Jesús:

—Te'pa' ahuerrep arrot yenyot.

¹⁸ Allempoña Jesúsapa' a'terr noñto o'ch ahuer, yacmaña ñeñ chorre't oneñeñ ñañaapa' allenta otan Jesús:

—Napa' nemneñca'ye te'pa' o'ch nocterrep.

¹⁹ Tarraña Jesúsñapa' ama muenache atet och:

—Allapach, te'pa' o'ch ahuerrep pepaclo pamo'tsesho'mar o'ch peserrpare'tatuerranet ora allohuen atto Yomporpa' atarr yenposep ñaña atto atarr muerospa.

²⁰ Ñañaapa' atet otue Jesúsapa' atetcho' pa. Allenta ahuer serrpare'tyesnerrets ora anetso'mar ama't all oteñet Decapoliso atto Jesúsapa' atarr nanac yenpos. Allohuenña acheñenesha'pa' atta atarr cohuanrrorteñet.

Atto Jesúsapa' tantaterran Jairo po'señ ñaña all a'crratnoman puesheñarr coyanesha' ñeñ a'plla'nmue' pa'shtam
(Mt. 9.18-26; Lc. 8.40-56)

²¹ Allempoñapa' ahuanñperrerr Jesús noñto, o' alla çherrerr añeñta'n allot ta ahuaña. Allñapa' o' alla emchorra'huererr shonte' acheñenesha' e'ñe all sa'patopño. ²² Allñapa' huapoña puesheñarr añcha'taret ñeñtpa' añ pa'so'cheñ Jairo. Ñapa' ñeñt puesheñarr ñeñt añcha'tarettetsa judionesha' po'prahuo. Allempo entosan Jesúsapa' ñañapa' alla rromosa Jesús pa'rrpõt. ²³ Allñapa' atet otos:

—Nesñetollañacho' o' çha a'po'ntsena. Ñeñto'marña napa' nohuenapa' o'ch potterren nepaclo. Ama't pototapa' o'ch pa'pñleña' attoch pa'crrater o'ch alla huomçherra.

²⁴ Jesúsñapa' allenta cota'ner, allenta cota'huanemñ ñaña shonte' acheñenesha' çha emchorratse'tnomet, çha to'mama'tneñet. ²⁵ Allñapa' cota'nmanet ñaña puesheñarr coyanesha' ñeñt atsna'tets. Charra' puechena epa char ñeñt atto çhocma yella'yena. ²⁶ Epaye' mueroçhtateñ shonte' apartañeçhno ñeñt partenayeñ. Ama't o' a'gasta'huahuan ora allpon quelle echen atto partatena ñañapa' attera ama't mameshapa' ama çhoye' pasateñe. Elloña allo'na sen a'po'ntsa'nmatsa. ²⁷ Ñeñt coyanesha'pa' o' e'mare'tan Jesús ñeñt atto çhocma a'crratyenan atsnañeçhno. Ñeñto'marña allempo cota'huanemñ Jesús acheñenesha'pa' ñapa'çho'ña allenta cota'nman Jesús chenta' pa'che'ñoç. Attoña allpa' a'pñla'nmoñ pa'shtam. ²⁸ Tarro'mar ñapa' atet cotape'chen pueyoçhro: "Ama't pa'shtama na'pñloñpa' ñeñtachca' na'crraterre'." ²⁹ E'ñe a'pñla'hue' pa'shtampa' allorocmuepa'tcha' maserrña po'rras. Ñapa' e'ñe eñotena po'chtso o' metueña ñeñt mueroçhtatene'. ³⁰ Jesúsñapa' eñotnoñ e'ñe ña po'huamencotpa' o' a'crratnoman puesheñarr atsnañeñ. Ñañapa' allenta puerrapperra alla acheñeneseshonet ñeñt cota'huanene', allñapa' atet otanet:

—¿Esesha'tña o' a'pñla'nmuena neshtamot?

³¹ Pueyoçhresha'ñapa' atet ochet:

—Pentente' shonte' acheñenesha' ñeñt allotemeña peto'mama'tnene'. Eso'mare'tña pñotenna esesha'te' pa'pñlene' peshtamot.

³² Jesúsñapa' alla cohua'yesanet o'ch entan ñeñt a'pñlene' pa'shtamot. ³³ Ñeñtña coyanesha'pa' ñapa' o' eñotnoma Jesúsca'yeña o' a'crratnoñ. Ñañapa' çha pa'shmuena po'yorñoç allempoñapa' concorposa Jesús pa'rrpõt. Allñapa' e'ñe a'meta'nman ora allpon ñeñt po'ñoç atet cotape'chen. ³⁴ Jesúsñapa' atet otapan coyanesha':

—Papa' nesñeshacha' atto atarr peyemtenna na, attoña te'pa' o' e'ñe na'crratnomuep. Te'ñapa' o'ch ahuerreñ peñmañesha', tarro'mar amach alla mueroçhtaterrperro atsnañets.

³⁵ Allempo eñorena atetpa' allñapa' huacha'ta ñeñt huetsa añcha'taret Jairo pa'pacloç. Ñetña huapuetpa' atet otoset Jairo:

—Peseñpa' o'ca'ye rroma. Te'ñapa' amach allo'na pñatsrre'moçhtana tatsche Maestro o'ch coterreñ pepaclo.

³⁶ Jesúsña ama't e'man atet otoset Jairopa' ñañapa' atet otan Jairo ñeñt añcha'tarettetsa judionesha' po'prahuo:

—Papa' amach çha pe'charrtatatsto peyoçher, nachña e'ñe peyemta.

³⁷ Jesúsñapa' aña muenat Pedro ñaña Jacobo ñaña pa'mo'nasheñ Juan. Ñeñtach cota'nmue'. ³⁸ Allempoñapa' ahuanmuet añcha'taret Jairo pa'paclo. O'ña çhacha'tet allpa', allñapa' entoset shonte' acheñenesha'

ñeñt' ano'tatsetets, all yahuanrrortenet, atarr ya'na'teñet arromñañ.
³⁹ Jesúsña'pa' be'tosos pocollo, ñaña'pa' atet otosanet:

—Sapa' eso'mare'tña atarr sano'tatsen, cha atarr seyahuanrrortena.
 Añ shopshesha'pa' amaca'ye choye' rromueno, chaca'ye muen.

⁴⁰ Ñetña pachmare'teño'tetpa' atta che'tatsetyesapet tarro'mar
 ñetpa' e'ñeca'ye eñotenet choca'ye rromuen. Allempoña Jesús'pa'
 cha'nma'cha'tatosan allohuen acheñenesha' pocolot. Ñaña'pa' be'tosos
 o'pono allo'tsen shopshesha' ñeñt' rromuets. Ñapa' aña muenatos
 arromñañ puepapar ñaña pachor ñaña ñeñt' co'ta'huanene', ñeññaña
 epuet be'toscha'toset allo'tsen arromñañ. ⁴¹ Allempoña Jesús'pa'
 rromota'tosan shopsheshañ pototpa' atet otos e'ñe ña po'ñoño:

—Talita cumi—ñeñt' yoten ya yeñoño: O'ch nesñetolle notosep te'pa'
 cho'pa tanterrtsa.

⁴² E'ñe otue' atetpa' allentepa'tcha' tanterra, cha chope'cherrets.
 Ñehua, ñeñt' shopshesharpa' charra' puechena epa po'charña. Allo-
 huenetña'pa' cha atarr cohuanrrortene't. ⁴³ Allempoña Jesús'pa' atet
 otanet:

—Po'ño'ch te'pa' amach esesha' seño'tatatsto ama't e'ñe puesheñarra.

Alla oterraneterr:

—Te'pa' serratallme'cherñaca'ye.

6

Allempo serrpare'tatan Jesús'acheñenesha' all Nazareto

(Mt. 13.53-58; Lc. 4.16-30)

¹ Jesúsña ahuerrerr allotpa' o' alla cherrerr pa'nyo all Nazareto. Puey-
 ochresha'ñapa' alla co'ta'huanererr. ² Allña'pa' allempo cherr yet allempo-
 pocma amesenet, ñaña'pa' arr ye'chatuerraneterr judionesha' po'prahuo.
 Shonte' acheñenesha' ñeñt' e'mñotapuerre' atet serrpare'tatuerranet all,
 ñetña'pa' nanac cohuanrrortapueret, allempoña'pa' atet otyeset ñocop:

—Ñapa' errahuañaca'yeña eñotanña ora allohuen ñeñt' atet pa'yena.
 Esesha'huañaca'yeña eñotatene'ña attot orrtatenan partsoteñets. Er-
 rotuaca'yeña huenaña ñeñt' eñoteñtsor ñeñt' orrtatyen ña. ³ Ñapa'
 añaca'ye ñeñt' po'taruas pene' o'ch torrenana tsach attoch es ye'chcatyen
 pa'namen. Ñapa' añaca'ye María puechoyor. Pa'mo'nasheña'cho'ña
 añaca'ye Jacobo, José, Judas, ñaña Simón. Ñaña po'chanesha'pa' e'ñeca'ye
 yechme'tenanet, parro'marneshayarramche'.

Ñeñto'marña all e'ñe ña pa'nyopa' ama eseshaye' acua'penaye ente-
 naye. ⁴ Allempoña Jesús'pa' atet otanet:

—Ñeñt' a'mtene' Yompor po'ñoña'pa' chocmaca'ye am'cha'na'tpo'
 entyeñña allohuen acheñenesha'; arrña pa'nyo allo'tsen e'ñe ña
 pamo'tsna'tarnesha' ñeñt' e'ñe pamo'tsna'tar penpa' ñetña'pa' ama
 acua'penaye' enteñeto. Ama't ñaña ñeñt' parro ye'chenet pa'paclette,
 ñetpa'cho'ña ama acua'penaye' enteñeto.

⁵ Ama ame'ñeñeto ñeñto'marña allpa' ama atonocheye' orrtataneto
 po'partsoña. Allpa' aña orrtatyen attoch a'plla'yenan puesheña'tets
 atснаñet allpa' attoca'yeña a'crratenanet. ⁶ Ñeñto'marña Jesús atarr
 cotape'chateñ pamo'tsesha' atto ñetpa' ama acua'penaye' enteñeto, ñapa'
 cha muene' llecateñet. Allempoña Jesús'pa' alla chopeñe'chyerrerr
 ye'chatyerrtserr allemeñ anetso'mar.

Allempo Jesúsapa' llesensan pueyochresha' o'ch ahuanemyeset allcha' serrpare'tyeneta'

(Mt. 10.5-15; Lc. 9.1-6)

⁷ Allempo čhapa'muen allempo Jesús agota'mueanan pueyochresha' čharrasheña ñeñt' puechetsa epsheña. E'ñe apčha'huet ñeshopa' ñañaapa' ap Janet llesens attoch quečhpateset oneñe'fečno atto chorra'yenana acheñeneshačno. Attoña llesensanet ñetpa' o'ch ahuanemyeset e'ñe epsheña'ttso cmuet. ⁸⁻⁹ Ñaña atet otapanet:

—Ñerra'm o'ch sahanmapa' amach es sanmatsto ama't coñe'ta allcha' sechopeñe'chyes —ama't sebolsa, ama't ñeñt'cha' serra'y esnom, ama't sečllayora. Ama't e'ñe epma seshtampa' amach sanmatsche. Añach sanem secarr, sena'nomcha' ñaña sesapat.

¹⁰ Alla ot erraneterr:

—Ama't errach pocollo sečhap allach sommosa allponmat esempohuach ahuerreserr po'poñ anetso. ¹¹ Ñerra'm erra anetsro ñeñt' allo'marnesha'ña ama cohuenaye' agapaseto ñerra'm amach mueneto o'ch e'mñnotapasetpa' o'ch sem'terrerr ñaña allot. Ñerra'm allempo sem'terrerr ñaña allot, ñeñt'ña setco'tsa'yen pañe'te' patspa' čhoch sepa'shetca'tyesnomña setac. Attochña allo'marnesha'pa' o'ch señotatnomanet ñetpa' amaca'ye pocteye' entenaneñoña Yompor. Po'ñoč o'ch notas: Esemphuañen allempoch acareteterra allohuen acheñenesha', añña anetso'marnesha' ñeñt' ama sagapaye ñetñapa' atarrcha' a'coñchataref'terret. Elloch metana'tueret ñeñt' atto a'coñchataref'terra sodomo'marnesha' ñaña gomorro'marnesha'.

¹² E'ñe ñeñt'a otaretetuetpa' ñetñapa' allenta ahuanmuet o'ch chopeñe'chyeset erracmañen anetso'mar. Allñapa' serrpare'tyesnomuet ñeñt' poctetsa allohuenacop o'ch cotape'cherret ello cohuen Yomporecop. ¹³ Ñaña all chopeñe'chyeset erracmañenpa' ñetpa' allña quečhpateset shonte' oneñe'fečno atto chorra'yenana acheñeneshačno. Ñaña shonte' po'potantañečno acheñenesha' ñeñt' atsna'tyets all, ñetñapa' a'yana'tyesoset atsnañe'fečno olivoso'yo* e'ñe a'crratyesoset.

Allempo e'ñe cohuen es orrtatyes Jesús, Herodesñapa' čha otapañ Juanañte' o' tanterra ñeñt' apataye't acheñ Yomporecop

(Mt. 14.1-12; Lc. 9.7-9)

¹⁴ Allempoña añcha'taret Herodes ñañaapa' atet e'mare'tenan Jesús ñeñt' atet pa'yena, tarro'mar Jesús allohuen acheñenesha'pa' e'ñe e'mare'tueñet ñeñt' atet pa'yena. Ñañaapa' atet ot:

—Añepa'tca'yeña Juanañ ñeñt' apataye't acheñ Partsocop. Ta'mca'ye čhate' tanterraña rromot. Ñeñfo'marepa'tca'yeña te'pa' orrtaterraña partsoteñets.

¹⁵ Po'potantaññaapa' atet otyenet:

—Añepa'tca'yeña Elías ñeñt' a'mtaye't Yompor po'ñoñ ahuat.

Po'potantaññaapa' ñetpa'čho'ña atet otyenet:

—Añepa'tca'yeña ñeñt' a'mtene' Yompor po'ñoñ, e'ñeca'ye atet ñerra'm ñeñt' a'mtaye't Yompor po'ñoñ ahuat.

¹⁶ Herodesña allempo e'mare'ch ñañaapa' atet ot:

* **6:13** Olivo ñeñt' tsach allot yoreñet puerets pue'merot.

—Añepa'tca'yeña Juanañ ñeñt nepechat ahuañmo'cha, čhepa'trramche' tanterraña rromot.

¹⁷ Ñehua, allempo Herodespa' ahuañmo'chacma rromatenana' Juanañ o' huancachpa' allña yottam̄psach attoch coshatan Herodías ñeñt pa'mo'nasheñ Felipe puetapor. Tarro'mar allempo Herodespa' o'ca'ye puerraterran pa'mo'nasheñ puetapor. ¹⁸ Juanañpa' ñaca'ye otaye't Herodes:

—Amaca'ye pocteyaye o'ch peyoram̄pes pemo'nasheñ puetapor.

¹⁹ Ñeñto'marña allempo Herodíaspa' atarr e'moñe'tane't Juan, atarr mueneñe't o'ch muetsatacheñ tarraña ama erro't pe. ²⁰ Tarro'mar Herodespa' mecha'na'tane't Juan, eñoch'e't ñapa' e'ñe pocte' es pa'yese't. Eñoch'e't ñapa' añecpa'na atarr torrena Partsocop. Ñeñto'mare'naña e'ñe cohuen cohuan̄psache't allochñapa' amach muetseto. Allempo e'mñotenan Juan atto serrpare'te't atarr cohuen enteñeñ, tarraña ama e'ñeye' eñotenanoña ñeñt atet cotape'chateñ Juan e'ñe cohuen. ²¹ Atteñapa' čhapa'muen pamtarr allempoch Herodías eñoteñ attotcha' muetsaterran Juan. Ñeñtpa' tarrempo atet pa' allempo čhapa'muen Herodes pue'ñalletño ñeñt puerrollar pen Herodías. Allempoña Herodespa' hua'ñatyesan acheñenesha' ñeñtcha' rrallme'chapretenaya'. Añ hua'ñatyes ñeñt am̄cha'taretečno ñaña ñeñt solltar po'captanrenesha' ñaña ñeñt atarr ečllayoretenesha' ñeñt galileo'marnesha'. ²² Allempo rrallme'chetpa' allña be'tososña ñaña shopshesha' ñeñt Herodías puechoyor. Ñaña' allña tancsare'tosa. Herodesña' ñeñta atarr cohuen ent ama't ñaña ñeñt ahua'ñaretečno. Ñeñto'marña am̄cha'taret Herodespa' atet otan shopshesha':

—Ama't erra'tsena penamuenenpa' napa' napa'čha'.

²³ Elloñapa' e'ñe Yompor pa'so'chño nan po'ñoñ, allempoñapa' alla otererr:

—Po'ñočca'ye napa' ama't es penamuen napa' napa'čha' ama't puehmet nepatseñ all na'm̄cha'tare'tena.

²⁴ Allempoña shopshesha'pa' čha'nerr ahuer pachoresho, atet otosan pachor:

—Ta'm čescha' nenan̄ña am̄cha'taret?

Pachorñapa' atet och:

—Añcha' penam̄ Juan poñ ñeñt apataye't ahuaña ačeñ.

²⁵ Allempoña shopshesha'pa' materra alla am̄cha'taret Herodesesho atet otuerran am̄cha'taret:

—Napa' añ nemnen o'ch pepechennana' Juan poñ ñeñt apataye't ačeñenesha' o'ch penon platopa' o'ch paphuerren e'ñe arma.

²⁶ Allempo enamhue shopshesha' Juan poñpa' am̄cha'taretñapa' čha lleca. Tarraña ama't llecañpa' o' nohuanña po'ñoñ huomenc e'ñe Yompor pa'so'chño ñaña allo'tsa'yen ñeñt hua'ñen ñeñt e'muene' atet oten ñeñto'marña čhocmach a'pocatan po'ñoñ atet otuan ñorra' shopshesha'. ²⁷ Allempoñapa' allenta otan po'solltarer:

—Te'pa' o'ch pepecheññaña' Juan poñ all neyottam̄psateñ; poññapa' pehuapater arma.

²⁸ Solltarñapa' allenta ahua' pechenana' Juan poñ, o' huapater plato, aphuerran shopshesha'. Shopshesha'ñapa' apuenana' ñaña pachor.

²⁹ Allempoña Juan pueyochresha'pa' o' e'mare'chet o' pecheret pa'yochreshateret Juanañ, allempoña ñet ahuanmuet all pecheret Juanañ allempoña ñetpa' ereta' apecharet o'ch pampueñeta'.

Allempo Jesús'pa' rratenan shonte' acheñenesha'; ñeñña acheñenesha'pa' allo'tsen amnaroch mil

(Mt. 14.13-21; Lc. 9.10-17; Jn. 6.1-14)

³⁰ Attotañapa' o' cha'cherr ñeññ llesensen Jesús. Ñetñapa' serrpare'tatueret Jesús allohuen ñeññ atet pa'yeset. Serrpare'tatueret ñaña atet ye'chatyeset acheñenesha' Yompor po'ñoñ. ³¹ Jesúsñapa' atet oterranerr pueyochresha':

—Te'pa' o'ch ahuey e'ñe yaptoche' all ama acheñempaño'yaye; sapa' allcha'ña samesuerr allponmat.

Ñeññ allempopa' atet otan Jesús pueyochresha' tarro'mar allempo shonte' acheñenesha' ñeññ huacha'tyetsa ñaña ñeññ chocma ahuanemyetsa ñeñño'mar ama't mameshapa' ama eshcaye' rreneto.

³² Allempoñapa' e'ñe ñap'ochayet ahuanmam'pset noñño, o'ch ahuanmuet all ama acheñempaño'yaye all otenanet Jesús. ³³ Allempoña shonte' acheñenesha'pa' alla enterraneterr all oñmam'penet. Allempoña achme'tarettapuetpa' acheñenesha'ñapa' o' alla matrra'terrerr allohuen ñeññe anetso't. Ñetñapa' patso'mara oñma'cha'tet ñanmacmueta cha'cha'tet all sechena Jesús pueyochreshohuen. ³⁴ Allempoña sehuosa Jesús allpa' alla entuerraneterr o' alla shonta'huerrerr acheñenesha'. Atarr nanac muera'huerraneterr Jesús, tarro'mar ñetpa' e'ñe atet entuerraneterr ñerra'mrrate' carrnero ñeññ ama acuan'p'saret'yaye. Allempoña Jesús'pa' alla ye'chatuerraneterr pa'namen esocmañen ñeññ Yompor po'cohuenña.

³⁵ Atteñapa' ellerren pueyochresha'ñapa' oteñeta' Jesús:

—Te'pa' arro'tseney all ama acheñempaño'yaye ñaña o'ca'ye ellerren.

³⁶ Te'pa' o'ch p'och acheñenesha' ahuanemyerretetpa' anetso'mar allcha' rañña'yesuerret puerraret ñeññcha' rra'yesuerret tarro'mar arropa' ama es eñalle.

³⁷ Tarraña Jesúsñapa' otan pueyochresha':

—Sachca'ye apa'yesahuet ñeññcha' rret.

Ñetñapa' atet ochet:

—¿Añe't pemnen o'ch ahuey o'ch yepomuena' shonte' quelle ñeññ doscientos denario† alloch yerañfena' pan ñeññcha' yerratuerranet allohuenet?

³⁸ Jesúsñapa' atet oterraneterr:

—Ñehua, secua' pan, ¿errron'te' sechen?

Ñetña cohuet panpa' atet otereterr:

—E'ñeca'ye amnara pan eñall ñaña epatoll cac.

³⁹ Allempoña Jesús'pa' atet otan acheñenesha':

—Te'pa' o'ch sanorr'cha'tyes e'ñe sopa'ttsocma e'ñe all cohuen emmo'ratyen pasetma'.

⁴⁰ Ñetñapa' atet'cho' pet. Anorr'cha'tyeset e'ñe ñopa'ttsocmuet —charrasheña'ttsocma charrapa'tets ñaña amnarshheña'ttsocma charrapa'tets ñeññ anorr'cha'tyesets. ⁴¹ Allempoña Jesús'pa' agapan ñeññ amnar pan ñaña epatoll cac, cohua' enone't parasyoso'tam'psan pan. Allempoñapa' shota'tan panpa' apanatyesan pueyochresha', ñetñapa'

† 6:37 Denariopa' quelle ñeññ allpon tsa'tenet pamtarr ñeññ taruaset all pa'nyo.

epatyaset allohuen acheñenesha' ñeñt' anorr'cha'tyets all, e'ñe epa'huet. Ñaña shetse'tan cac attoch epatyesanet allohuenet. ⁴² Allempoñapa' o' rrallme'chet allohuenet e'ñepa'tcha' yetrra'tuahuet. ⁴³ E'ñe yetuahuetpa' elloña' cha' a'pchatyaset cac ñaña pan ñeñt' ashota'tyesaret. Ñeñña a'yapa'cherretpa' chepa'tcha' chorrerrets'charra' puechena epa cañer. ⁴⁴ Ñeñña rrallme'chats atarr shonte' acheñenesha' allo'tsen amnaroch mil ñeñt' e'ñe yacmaneshoche'.

Allempo Jesúsapa' e'ñe cohuen chope'chnen enot oño
(Mt. 14.22-27; Jn. 6.16-21)

⁴⁵ Allempoña Jesúsapa' otan pueyochresha':

—Te'pa' o'ch sa'tacha't noñto o'ch sota sanom o'ch se'pchaterra yot o'ch se'cherr anetso ñeñt' pa'so'cheñ Betsaida.

Allempoña Jesúsapa' o' so'tnoman acheñenesha'. ⁴⁶ So'tuanmanetpa' ñaña'p' ahuo' aspeno, allcha' ma'yochosa. ⁴⁷ Atteña'p' o' tsapuen, ñapa' allo'tsenara e'ñe ñapue't aspeno. Noñtpa'cho'ña ñeñta rro'chaso'tsenara sa'po. ⁴⁸ Allotña' entenan pueyochresha' ñeñt' noñto'tsa'yen. Ñetña'p' e'ñe po'muero'chenño'eta echotnenet oñ tarro'mar orrño'p' cha' a'puerrame'tam'penanet. Atteña' allempoña puetarenmochpa' huananet Jesús' cha' chope'chnen enot oño. Ahuo'ch metanenanetañ, ⁴⁹ allempoña pueyochresha'pa' entapueñet cha' chope'chnen enot oño. Ñetña'p' cha' otenapuetañ choyeshe'matste' huapanet. Cha rran'artet puen'chañof. ⁵⁰ Allohuenetpa' e'ñe entuapet nanac yore'tosanet. Jesús'apa' eñorana'tuenanet, atet otuenanet:

—Choñaca'ye socshapuenna, naca'ye o' nohuapa, amach atta sem'cha'tatstapno.

⁵¹ Allempoña Jesúsapa' a'tapos noñto allo'tsa'yen pueyochresha'. Huomenqu'eshañapa' chepa'tcha' muetsoñeñterrtsa. Ñetña'p' cha' atarr cohuanrrortapueñet. ⁵² Ama' chenaneo pueyo'chreto ama't atto Jesúsapa' atontatan pan, amaca'ye es'chenahueto pueyo'chreto.

Allempo Jesúsapa' a'crratyesosan pa'namen atснаñe'echno all Genesareto
(Mt. 14.34-36)

⁵³ Allempoña pechatam'psetpa' arr etsotaset all oteñet Genesareto. ⁵⁴ Allempo sohua'cha'toset noñto't, añña' acheñenesha' ñeñt' allo'tsa'yen, ñetña'p' cheme'tapet Jesúsapa' ⁵⁵ allenta matrra'tyaset ora erracmañen all ye'cha'yena acheñenesha'. Atto'ca'yeña huapatam'pesyesoñetña' atснаñe'echno allen'ateñ. Ama't erra e'mare'teñet o' chap all, allcha'cho' anmoñetña' patsnañe'ter puechecnape'na. ⁵⁶ Ama't erra chapyen all shontena acheñenesha' ñaña'ñerra'm arr'chen all ama'tama eñalle'acheñ, ama't allecma oñen'acheñenesha' ñetña'p' allcha'cho' na'yeneta' patsnañe'teret allcha' enamapet ama't poso'mota o'ch a'p'lapoñet pa'shtam. Allpon ñeñt' a'p'lla'yepue' Jesús' pa'shtampa' allpon'cho' e'ñe corra'yesser'tsa.

7

Atto Jesúsapa' eñotatenanet ama' añeye' ya'sosyatenaye Partsocop ñeñt' yerra'yen yenamot
(Mt. 15.1-20)

¹ Allempoña allpa' huača'toña fariseonesha' epuet ñaña puesheña'tets ñeñt' huačhetsa Jerusalénoñ ñeñt' atarr etsotayenayeñ ñoñets ñeñt' atet anaret' judioneshacop. ² Ñetña allpa' entosñañet Jesús pueyochresha' atfa rra'yenet ama e'pota'tyeneto pot' Partsocop allempoch rralme'chet. ³ (Ñehua, allohuen fariseonesha' ama't ñaña allohuen judionesha' ñetpa' atet yechenet amach rreneta'pa' o'ch e'pota'tyeset Partsocop. Tarraña ñeñt'pa' pa'tañneshaña yechatnomahuet. ⁴ Ñaña po'poñ ellonetpa' atet yechatanete't pa'tañneshañ. Ama't ñeñt' porret' pa'yenet ñaña po'pajochnetpa' chochna e'ñe e'pame'tyeñetañ Partsocop, e'parro'tyenetañ ama't ñaña pa'srerrogachno Partsocop. Ama't ñaña all panrame'tyenete'ñech e'pata'tueñetañ Partsocop.) ⁵ Aña fariseonesha' ñaña ñeñt' atarr etsotayenayeñ ñoñets ñeñt' atet anaret' judioneshacop ñetña allempo entosñañet Jesús pueyochresha' atfa rra'yenet ama e'pota'teneto Partsocop ñeñto'marña ñetpa' atet otoset Jesús:

—Pueyochreshachnoñapa' eso'mare'tña ama esesha' yechenayeña ñeñt' atet yeche't yatañneshañ. Ñetpa' atfa rra'yenet ama e'pota'teneto Partsocop allempo rrenet.

⁶ Jesúsña'papa' atet otanet:

—Sapa' atarruaca'ye ommoñañeshaste' tarro'mar atarr seshcare'ten, amaña Yomporeye' sesherbena. Isaíaspa' e'ñe cohuen a'mtane't Yompor po'ñoñ, saña te'ñapa' e'ñe atet sepena atet ote't allempo atet ot Yompor: Ñeñt' acheñenesharpa' e'ñe puenamota cohuentatennanetañ; pueyochretoñapa' ama chenane'to ñeñt' cohuen nenten na.

⁷ E'ñe orrena ma'yochennet, ñeñt' atet yechatannenetpa' ñeñt'pa' e'ñe acheña naye't ahuat poctapña.

⁸ Jesúsapa' alla otarraneterr:

—Sapa' chaca'ye sequechpuenña ñeñt' atet otene'y Yompor ñeñt'cha' atet ye'pa'yen cohuen; sapa' añaca'yeña atarr setsotayen ñeñt' atet yechatyesnomues sa'tañneshañ; ñeñta atet se'pa'yen orrotechno e'pame'tyese' ñaña sepajochno. Ñaña po'poñechno pa'namen sepatse'tyeneñ ñeñt' soten Partsocapaño'.

⁹ Jesúsapa' alla otarraneterr:

—Sapa' añaca'ye atarr señoten attoch sehuapore'toñ Yompor po'ñoñ ñeñt' atet otene'y ña ñeñt'cha' atet ye'pa cohuen; ñeñto'marña sapa' e'ñe aña setsotayen ñeñt' yechatyesnomues satañneshañ. ¹⁰ Ñehua, Moisésapa' atet'ca'ye ote't: “Semorrenteño'tpa' sem'cha'na'chcha' sompor ñaña sachor.” Elloña ñaña po'poñone'tpa' atet ote't Moisés: “Ñerra'm esesha' sasare'tene' pompor ñaña pachor ñeñt'pa' muetsetepa'.” ¹¹ Tarraña sañapa' atet sotyen ñerra'm esesha' atet otene' pompor ñaña pachor: “Ñeñt' nechen o'ch napapeña' tarraña amach napape te'pa' o'ch nene' Yomporecop ñeñt' otene't Corbán”, ¹² ñeñt'ña acheñerpa' sañapa' atet'cha' soteñ: “Pocoppa' ama pallteno o'ch es pap' pamo'mte'.” Attoña sapa' ama semnateñe ñeñt' acheñer e'ñe ña pueorrenteño'tpa' o'ch es apuen pompor ñaña pachor. ¹³ Atto'ca'yeña sehuapore'teññañña Yompor po'ñoñ allochñapa' e'ñech aña setsoten ñeñt' e'ñe sa seycheña.

Ama't ellonetpa'cho'ña shonte' po'poñečno ñeñt atet sepatse'tyena pa'nadena'ttsocma.

¹⁴ Allempoña Jesús'pa' chore'tan acheñenesha' ñeñt shontetsa, ñetñapa' atet otanet:

—Sañapa' po'ño'ch allohuenes e'ñepa'chña cohuen se'mñoten allochñapa' attoch e'ñe cohuen chaponasa seyo'chro. ¹⁵ Ama añeye' ya'sosyatenaye Partsocop ñeñt yerra'yen. Añca'yeña ya'sosyatene' e'ñe ya yoctape'chatse'teño't ñeñt'pa' yeyo'chrotca'ye huena. ¹⁶ Ñeñtes po'ño'ch ne'mñotene' chaponasepa'ch seyo'chro ñeñt atet netma'ntatensa añ ñoñets.

¹⁷ Allempoña Jesús'pa' sa'nerran acheñenesha'pa' ñañapa' be'tosuerrerr pocollo allña pueyochresha'pa' atet otoset:

—¿Eso'tña petma'ntatyenyña ñorra'?

¹⁸ Jesús'ñapa' atet otanet:

—Sapa'cho'ña e'ñe'tña atfecmas samña, ama es sechenoyo seyo'chro. Sapa'ama't señotenoña ñeñt yerra'yen yenamot ñeñt'pa' amate' errotenot a'sosyateña Partsocop. ¹⁹ Tarro'mar ñeñt yerra'yenpa' amaca'ye yeyo'chroye' cheno, ya'taca'ye chen. Ñeñt'pa' chocmachca'ye yener a'yo.

Ñehua, ñeñt'pa' atet eñotateney Jesús allohuen rreñto'chnopa' e'ñeca'ye cohuenacma e'ñe arrapahuocma. ²⁰ Jesús'ñapa' alla otterratererr:

—Añña ñeñt cha'nets yenamot ñeñt atto yeñosatse'tyen ñeñt'pa' e'ñe yeyo'chrot huena ñeñtña chocma ya'sosyatene'ña Partsocop. ²¹ E'ñe yeyo'chrot huena cotapñats ñeñt ama't mameshapa' ama cohuenayaye, ñeñt'pa' añ: chetapretanna'teñets taporets, cañoresha'teñets, muet-sanna'teñets, ²² etatsre'tyeñets, ye'chapretanna'teñets, atrre'mueñets, shecare'tanna'teñets, ottatse'teñets, moparrñats, sasare'teñets, ommo'cheñets, otatse'teñets. ²³ Ñeñt allohuen sosya'tsañečno ñeñt'pa' yeyo'chrotca'yeña huena, ñeñtca'yeña ya'sosyatene'ña Partsocop.

Atto puesheñarr coyanesha' ñeñt ama judioneshayaye ñapa' atarr yem-tapana Jesús

(Mt. 15.21-28)

²⁴ Allempoñapa' ahuererr Jesús allotpa' alla chap allampaño anets Tiro ñaña Sidón. Allempo chap all pocollopa' ñapa' mueneñeñ e'ño'ch a'nahua chapañ. Tarraña ama errotenot chapo a'nahua, ²⁵ tarro'mar e'ñe allempo chap cha e'mare'te' puesheñarr coyanesha' ñeñt achoy-ore't. Puechyorñapa' penochor ñeñtñapa' cha chorreña oneñe't. Ñeñtña coyanesha' huapapa' rromosa Jesús pa'rrpōt. ²⁶ Ñeñtña coyanesarpa' ama judioneshayaye, ñapa' po'poñ acheñ ñeñt sirofenicio'marnesha'. All rromosa Jesús pa'rrpōtpa' atet otos:

—Nepapare, peque'chpatataye'chapon nechoyor oneñe't.

²⁷ Jesús'ñapa' atet toma'ntatana acheñenesha' ñeñt ama judioneshayaye ñeñto'marña atet och:

—Ñanomcha' ya yacñe'tar ya'yeta' tarro'mar ama pocteyaye o'ch yeprrratam'pes yacñe'tar puerrar o'ch yehuapore'tam'pes allo'tsen ochec o'ch rre' ñaña ochec.

²⁸ Coyanesha'ñapa' atet otererr:

—Ama't atteñ nepapareshacha' tarraña ama't ochecpa'cho'ña rra'yenan cheshanesh'a' puerrar ñeñt a'shore'tatyenet po'mesa'pna'cho.

²⁹ Allempoña Jesús'pa' atet otererr:

—E'ñe pocte' atet pe'ñorena; e'ñepa't pame'ñenna. Ñeñto'mar te'pa' o'ch ahuerreḡ e'ñe peñmañesha', te'ña oneñetpa' o' quechpa'nerrnaḡ pechoyor.

³⁰ Allempoña coyanesha'pa' ahuer pa'paclo, o' çherra'p' alla entueran puechoyor alla ãanena e'ñe cohuen po'mayo, oneñetñapa' o' quechpa'ner.

Allempo Jesús'pa' a'crraterran paquet ñeñt' opanatets

³¹ Allempo puerrerra allot ñeñt' allampañoḡ Tiroḡ, arr oñemhuanom anetso Sidón allot ñaña po'poñ anetso Decapolis'o'mar. Attoña o' alla ahuer sa'ponet all Galileyaso. ³² O' çherr allpa' huapaterrñañeterr puesheñarr yacma ñeñt'ñapa' paquet ñaña ama e'ñeye' cohuenaye' eñeno. Ñeñt'ña huapate'pa' atet otosan Jesús:

—Añecopca' nehuapateñ o'ch pa'p'le' potot attoch correrra.

³³ Jesúsñapa' allenta aneñ ñapuēt a'yenet, allñapa' esho'tosan potaḡ paquet pueto; ñaña o' senmare'pa' o' alla a'p'llerñañer ñaña pueñeñ.

³⁴ Allempoña Jesús cohua' enonetpa' enara. Allempoñapa' atet ot e'ñe ña po'ñoño:

—Efata —ñeñt' yoten yeñoño: Pota'nerrepa' pet allochñapa' o'ch pe'muerra e'ñe cohuen.

³⁵ E'ñe otue'pa' çha pota'nerrets puetpa' e'ñe cohuen e'muerra. Ama't ñeñt' echarrtatene' pueñeñpa' o' a'rroyer çha eñorerrtsa e'ñe cohuen.

³⁶ Jesúsñapa' atet otanet:

—Te'pa' amach esesha' sotaḡsa'tatsto ama't e'ñe puesheñarra.

Ama't atet otanetañ elloña ñetpa' a'metare'teñet. ³⁷ Allñapa' atarr nanac cohuanrrorteñet, atet otyenet:

—Jesús'pa' atarro'trra cohuenña ñeñt' allohuen atet es pa'yen. Ama't paquetnesha'pa' çhocma e'ñe cohuen e'matuenanet. Ama't ñaña opanane-shaçhnopa' çhocma e'ñe cohuen eñoratyenanet.

8

Allempo Jesús'pa' rratenan shonte' acheñenesha' ñeñt'ña acheñenesha'pa' allo'tsen pa'tatsoch mil

(Mt. 15.32-39)

¹ Allempoña po'pocheño shonterrerr acheñenesha' Jesúsesho. Allempo'pa'çho'ña ama eñalle ñeñt'cha' rret. Ñeñto'mar Jesús'pa' agotan pueyochresha'pa' atet otapanet:

² —Napa' çha atarr nemuereña allohuen acheñenesha' ñeñt' shontetsa arr. O' ma'pamtoset nesho ama eñallmeñeto ñeñt'cha' rret. ³ Ama pocteye' nenteñe o'ch ahuanerret e'ñe pa'çhporrñesha' te't ama a'ñshe'mterreto toño tarro'mar patanta'tetspa' atarr baçhayot huapyenet.

⁴ Pueyochresha'ñapa' atet ochet:

—Errahuachca'ye yentña rreñets'te' ñeñt'cha' yerrach shonte' acheñ arppa' amayaca'ye.

⁵ Jesúsñapa' atet oterraneterr:

—Sapa' çerrpona't sechenña pan?

Ñetñapa' atet otereterr:

—E'ñeca'ye cançhrra yechen.

⁶ Allempoñapa' otan acheñenesha':

—Te'pa' sanorrçha'tyes patso.

Allñapa' agapan ñeñt cancherr pan. Agaphuepa' o' parasyoso'tenanerr Pompor allotñapa' o' shota'tan pan, apantyesan pueyochresha'. Ñetñapa' o' epatyeset ñamet allohuen acheñenesha' e'ñe epa'huet. 7 Apuanet panpa' eñall ñaña pate'tets cacatollesha'. Jesúsñapa' alla parasyoso'tañperranerr ñaña cacatollesha' allempoñapa' oterranerr pueyochresha':

—Sepatyerraneterr ñaña cacatollesha'.

8 Allempoñapa' o' rrallme'chet allohuenet, e'ñe yetrra'tuahuet. O' e'ñe yetuahuetpa' cha a'pchatyeset ñeñtñapa' a'yapa'cheret. Ñeñtña a'yapa'cherretpa' chepa'tcha' chorrats cancherr cañter e'ñe tamo'yare'. 9 Ñeñt rrallme'chats atarr aton acheñenesha' ñato' allo'tsenté' pa'tatsoch mil acheñenesha'. Allempoña Jesúsapa' so'tnerran acheñenesha'pa' ahuerr; 10 a'tapos noñto pueyochreshohuen ahuanñpset o'ch ahuanmuet anetso ñeñt pa'so'cheñ Dalmanuta.

Atto fariseonesha' enamaset Jesús gatapanetepa'to' po'partsoña
(Mt. 16.1-4; Lc. 12.54-56)

11 Allempoña Jesúsapa' hua'cherrñañerr ñaña fariseonesha' ahuo'ch otnare'chet Jesús. Ñetñapa' cha mueneñet o'ch topachet Jesús. Ñeñto'marña atet otoset:

—Yapa' aña'ye yemnen o'ch pegatapuey pepartsoña entot allochñapa' attoch yeñotosep po'ño'ch p'apa' Parets Puechemerep.

12 Jesúsñapa' allenta enara cha muene' po'poñ entanet pueyo'chro ñeñto'marña atet otanet:

—Eso'marte'ca'ye acheñenesha' ñeñt corra'yetsa te' ñetñapa' aña atarr e'nenet o'ch norrtatanet nepartsoña entot. Po'ño'chca'ye na te'pa' o'ch notas, ama't coñe'ta amach es negataneto.

13 Allempoña Jesús sohuanerranetpa' a'taphuerr noñtopa' ahuanñpes, pechaterra yom'ta'n.

Atto Jesús toma'ntaterraneterr ñeñt po'chaser pen fariseonesha'
(Mt. 16.5-12)

14 Pueyochresha'ñapa' cha puesnomuet o'ch anmuet pocrrañ, noñtopa' ama es eñalle ñeñtcha' rret, e'ñe patrra pan eñall. 15 Jesúsñapa' alla toma'ntaterraneterr, ñeñtñapa' atet otanet:

—E'ñech señota ñato't semeñe'teña'ña fariseonesha' ama't ñaña Herodes po'chaser allo tsetenet pan.

16 Ñetña cotape'chyesetpa' atet otanna'tyeset:

—Amaca'ye yechenoña pan ñeñto'marte'ca'yeña oteney año'ch yemeñe'tatscheña fariseonesha' po'chaser.

17 Jesúsña allempo eñotanet atet cotape'chyenet ñaña'apa' atet oterraneterr:

—Eso'mare't sellquëñesha' sotanna'tyena año' eñalle ñeñtcha' serra'. ¿Ama't señoteñe? ¿Ama't chennasoña seyo'chro? Teme'ttsena't se'charratanña seyo'cher. 18 Sapa' ama't aclo'yeteseña' chaca'ye sottena ñerra'mrrate' ama senteno. Ama't etateseña' chaca'ye sottena ñerra'mrrate' ama se'mueno. Ama't mameshapa' are'tña es seyerpueno. 19 Ñehua, ahuaña allempo neshota't amnar pan e'ñeca'ye epa'hua amnaroch mil yacmanesha'. Ellopa' ¿errpona'tña sap'cha'huerrña ñeñt ashota'tyesaret allempo e'ñe seyetua? ¿Errpona'tña cañter se'chorrerr?

Ñetñapa' atet ochet:

—Charra'ca'ye puechena epa cañter.

²⁰ —Ñaña allempo neshota't cancherr pan pa'tatsoch mil acheñ ñeñ rre' ¿errpona'tña sapcherrerrña ñeñ ashota'tyesare't allempo e'ñe seyetuerrerr? ¿Errpona'tña cañter se'chorrerrerr?

Ñetña atet ochet:

—Cancherrca'ye cañter ye'chorrerrerrña allempo.

²¹ Jesúsñapa' alla oterraneterr:

—Te'ñapa' ¿ama'tña o' chaponasoña seyo'chro? Ñeñ neñotatenes ñeñtpa' ama serrarecpaye' notenso.

Allempo Jesúsapa' a'crraterran aporo'yet all Betsaido

²² Allempoña cha'cha'tet anetso Betsaido, allñapa' huapaterrñañeterr aporo'yet, ñeñtpa' atet otoset Jesús:

—Añecopa'ye yehuapateña o'ch pa'p'llacle'chap' attoch pecuater.

²³ Allempoña Jesúsapa' echa'nman aporo'yet pototpa' anem' a'yenet all ama eñalle pocoll. Allñapa' a'yacle'chos pa'snemo, attoña a'p'llacle'chos, allñapa' atet och:

—¿Ama't coñe'tapa' ama't o' pento?

²⁴ Aporo'yetña cohua'yestsapa' allenta otan Jesús:

—O'ca'ye nent acheñ alla chopeñen tarraña e'ñe atet nentyenanet ñerra'mrrate' tsach tom'cha'tyets.

²⁵ Jesúsñapa' alla a'p'llacle'chererr; aporo'yetñapa' cohua'yerrtserrpa' chepa'tcha' e'ñe cohuenterrtsaña pa'clle'. E'ñe cohuen es entyeshuahuerr allohuen. ²⁶ Allempoña Jesúsapa' atet och:

—Te'ña ñerra'm o'ch ahuerre'p' pepacllopa' tarraña amach pofimatsterroña anetso'mar, allochñapa' amach esesha' potap'sa'tatsetnerro ama't e'ñe puesheñarra.

Atto Pedropa' otan Jesús, p'apa' p'aña Yompor Puechemere'p' ñeñte'p' Cristotosets

(Mt. 16.13-20; Lc. 9.18-21)

²⁷ Allempoña ahuererr Jesús pueyochreshohuen. Arr sechenet all oteñet Cesarea ñeñtara Filipo allcha' chopeñe'chyeneta' all anetso'mar. Allña toñopa' a'p'to'tnoman pueyochresha' ñeñtpa' atet otnomanet:

—¿Errofena't otyenenña allohuen acheñenesha', napa' eseshante'?

²⁸ Ñetñapa' atet otyeset:

—Patantarr acheñenesha'pa' atetca'ye otyenpet p'apa' Juanañpo'te' ñeñte'po' apatañtase't Yomporecop. Po'potantaññapa' atet otyenpet p'apa' Elíasopo'te'; po'potantaññapa' atet otyenpet p'apa' añe'po'te' po'psheñeñ ñeñ a'ñitaye't Yompor po'ñoñ ahuat.

²⁹ Allempoñapa' alla a'p'to'terraneterr:

—Sañapa' ¿errofena'tña sotenenña sa?

Pedroña eñoratsapa' atet och:

—Papa' ñeñte'p'ca'ye Cristotosets.

³⁰ Allempoñapa' otan pueyochresha':

—Amach esesha' sota'p'sa'tatsto ama't puesheñarra napa' na ñeñten Cristotets.

Atto Jesúsapa' eñotatan pueyochresha' ñapa' amtsaretterrach

(Mt. 16.21-28; Lc. 9.22-27)

³¹ Jesúsña e'ñe allempo'teñpa' motetnom' eñotatyesnomue' pueyochresha' ñeñ atet anare't ñocop, ñeñtpa' atet otanet:

—Na Ñeñten Acheñetosetspa' atet anaret nocop, nanaccha' na'muerochtataretterra. Amach esesha' pocteye' nenterraye—ama't ñeñt pompornesha' pen judionesha', ama't ñeñt pa'mcha'tareter pen judionesha' po'cornaneshar, ama't ñaña ñeñt etsotayenayeñ ñoñets ñeñt atet anaret judioneshacop—ama't ñetpa' amach eseshaye' neyenterraye. Attochña napa' muetsaterrnetcha'. Tarraña poma'pamtañocho'ch alla netanterra.

³² Ñeñtpa' e'ñe eñotochen otnomanet ñapa' atetcha' a'paretterra. Pedroñapa' allenta anemñ a'yenetpa' allñapa' atet otos:

—Arepach Partseshacha' atteye' perrpeto ama't errponaña.

³³ Jesúsñapa' alla puerraperra cohuos pueyochresheshonet allñapa' atet otan Pedro:

—Orrañ a'yo neshot oneñete; papa' amaca'ye Yomporeye' atet poctape'chatenaye; ñeñtpa' acheñarramche' pocta'ña.

³⁴ Allempaña Jesúsapa' agotan acheñenesha' ñaña pueyochresha' ñeñtpa' atet otanet:

—Ñerra'm esesha' muenene' o'ch coterrnet na e'ñe po'ñocho' attoch neyochresha' neperranet añ poctetsa sohuanmuetepa'ña ñeñt atet muenenet e'ñe ñocpueta ama't e'ñe pocreñoñhuenet. Attochña ñetpa' o'ch e'ñe toma'nteret ñeñt chechnene' po'corsoch allcha' muerochtet ñamet. Attochña coterrnet e'ñe po'ñocho'. ³⁵ Tarro'mar ñerra'm esesha' e'ñe añña muenenet o'ch correnet atomat attoch e'ñe coshenet arr patsro, ñetñapa' chach a'chencatet ñañeñeta. Tarraña ñerra'm esesha' e'ñe pocte' entene' o'ch es sohuanerret e'ñe pocreñoñhuenet nocop attoch epatuerret cohuen ñoñets ñeñtpa' alloch sequeshperra, ñeñtña acheñerpa' ñaña' corret-sach e'ñe cohuen tayoteñ errponañohuen. ³⁶ Ama't errponenaparen esocmañen es yeyoratsetyes ora allpon ñeñt yentyen añe patsro, tarraña ñerra'm ñeñtach e'ñe ya'chencaterre' yecamquëñohuen, ñeñtñapa' ama't coñetapa' amach es sherberrye. Tarro'mar ama eñalle po'poñ ñeñt atarr sherbets, añña atarr nanac sherbets ñeñtcha' a'queshpaterre' yecamquëñ. ³⁷ Tarro'mar yocoppa' ama es eñalle ñeñtcha' yepomuerr alloch alla yerañferra yecamquëñ. ³⁸ Tarraña ñerra'm erra'tsencha' nepenquënaya na te', neñoñpa'cho'ña cha apencothen entennanet, napa'cho'ña nepenca'huerranetcha' esempoch nohuerra. Shonte' acheñenesha' ñeñt corra'yetsa te' arr patsro ñetñapa' atarr ochñañeneshet tarro'mar ñetpa' po'poña po'yomporer pa'yenet. Tarraña ñerra'm esesha'ch puepenquëñotetan na amach a'metenneto all, ñeñtña acheñerpa' napa'cho'ña chach nepenca'huera ñerra'm esempoch nohuerra. Po'ñocho' napa' Ñeñten Acheñetosetspa' nohuerrach e'ñe Nompore po'cohuenño' epan ñaña po'millaño'etñaneshar ñeñt e'ñe torra'yetsa Partsocop.

9

¹ Allempaña Jesúsapa' alla oterraneterr:

—Po'ñocho'ca'ye te'pa' o'ch notas, patanta'ttsos ñeñtes arro'tsa'yenes te'ña ama't ama serrromhuena'pa' o'ch senterrñañ Yompor po'cohuenña atto atarrcha' ayochreshatterra ña e'ñe po'huamencot.

Allempo Jesúsapa' po'poñetañpsana pueyochresha'
(Mt. 17.1-13; Lc. 9.28-36)

² Allempo pechapmaterrerr; Jesúsñapa' ahuanerranerr pueyochresha'; añ anem Pedro ñaña Jacobo ñaña Juan. Ñetpa' arr anmanet atarr aspenfo e'ñe ñaptochayet all aspenfo. Allña Jesúsapa' machayotepa'tcha' e'ñe po'poñetañpsosanet. ³ Pa'shtampa' cha popta atarr nanac huallama't. Arr patsropa' ama eñalle alloch ya'huallama'ttat yeshtam atet ñerra'm ña pa'shtam atarr huallama'to poptena. ⁴ Allñapa' machayotepa'tcha' orrtanet Elías ñaña Moisés. Ñetñapa' alla serrpare'toset epuet Jesús. ⁵ Pedroña eñoratsapa' atet otan Jesús:

—Atarruaca'ye Maestrocha' cohueno'tseneyte' arr. Ama't pocte' penteñe yapa' o'ch ya'tomatonas ma'ppahua querpachet, puepahuarrpa' p'ocopcha' po'ppahueña' Moisésocopcha', po'ppahueña' Elíasocopcha'.

⁶ Ñehua, Pedroña pueyorñot atta muene' otatset, ama eñocherotencha' ot. ⁷ Allempo eñorena Pedropa' cha orrtosahuet os ñeñt atarr cohuen poptetsa chepa'tcha' a'pomañpsosanet. Cha e'morrtostsa ñoñets osot; ñeñña ñoñetspa' Yompor otosahuet; ñeñtpa' atet ot:

—Añmapa' ñeñt no Nechemer ñeñt atarr nemuerena, ñeñtcha'ña e'ñe cohuen se'mñoterr.

⁸ Allempoña o' cohua'yerretpa' arepa'tcha' eseshaye' enterreto, ñapña enteret Jesús.

⁹ Allempo ona'cherret aspenfo Jesúsñapa' atet otnerranet:

—Te'pa' amach esesha' sota'psa'tatsto ama't e'ñe puesheñarra ñeñt atet o' sentua. Tarremphuach allempoch netanterra na rromot na Ñeñten Acheñetosets, allempochña seserrpare'taterña allohuen acheñenesha'. ¹⁰ Ñetña atet otanet Jesúsapa' atetcho' pet, ama a'meñeññañeto po'ñoñ. Tarraña ñetñapa' atta a'pto'tanna'tyesnerret:

—Ta'm ¿es'te'ña oteneyña Jesús o'ch tanterra rromot?

¹¹ Allempoña pueyochresha' atet otnerret:

—¿Eso'mare'tña otenña ñeñt atarr etsotene' ñoñets ñeñt atet anaret, Elíaso'ch ñanom huerrtsa?

¹² Ñañapa' atet otnerraneterr:

—Elías po'ño'chpa' ñachca'yeña huerrtsa ñanom, ñapa' e'ñechca'ye a'cohuentatuer ora allohuen. Tarraña sapa' ama't señotenoña ñaña ñeñt atet anaret quellco e'ñe nocop. Ñeñt allpa' atetca' oten na Ñeñten Acheñetosets atarrcha' na'muero'chtataretterra, atarrcha' tsena'terrnet. ¹³ Tarraña napa' o'ch notas, Elíasapa' o'ca'ye huaphuerrañ arr, ñeñtapa' chaña erro'tuanen p'apueret ñeñt atet muena'yenet ñet. Attoca'yeña etsoterraña ñaña ñeñt atet anaret quellco ñocop.

Atto Jesúsapa' a'crraterran cheshachor ñeñt otaten oneñt
(Mt. 17.14-21; Lc. 9.37-43)

¹⁴ Allempoña cha'cherret allo'tsa'yen pueyochresha' allñapa' alla entuereterr shonte' acheñenesha' ñeñt emchorrenaya po'potantañ pueyochresha'. Ñeñña etsotayenayeyñ ñoñets ñeñt atet anaretpa' alla entueraneterr all es otnare'teññañet pueyochresha'. ¹⁵ Allempoña entapuer allohuen acheñenesha'pa' cha atarr cohuanrrortapueret, matrra'tet ñeshopa' huom'cha'tapueret. ¹⁶ Jesúsñapa' allenta otuerranet:

—Sapa' ¿erro'tena'tña sotanna'tyena?

¹⁷ Puesheñarrña ñeñt allo'tsenpa' ñañapa' atet ota'p:

—Maestrocha' napa' o'ca'ye nohuapatonapeñña nechemer, chaca'ye chorreña oneñet cha opanatateñ. ¹⁸ Ñerra'm erroteno rremueña' chachca'ye ata'tateñ patso, chach amtan pa'po'pa' o'ch rraso'tan pa's, o'ch e'ñe echarra. O' notuosnañña peyochresha' o'ch quechpateret oneñet ñesho'pa' tarraña ñetpa' amaca'ye eshcaye' quechpateñeto.

¹⁹ Jesúsñapa' atet otanet:

—Sa ñeñtes acheñres ama't mameshapa' ama ayemtenaye' sentpenno. O' allponmatuanen allo'tsenen arr patsro, napa' atta atarr na'uantennas, atta necuenes ñato' attotpa' o'ch same'ñerna.

Allempoñapa' atet otanet:

—Ama'tpa' sanmonca'ye chesha' arr.

²⁰ Allempoña anmoñet chesha'pa' oneñetñapa' entosan Jesús'pa' chepa'tcha' otatosanña chesha'pa' alla ata patso, cha pomero'ta, amtan ñaña pa'po'. ²¹ Jesúsñapa' allenta otoñ pompor:

—¿Esempoteñe'tña atet perra?

Ñaña'pa' atet och:

—Cheshoteñca'ye atet perra. ²² O'te' epaye' ata'tater ama't tso ama't ñaña oño attoch muetsereñ. Paña te'pa' ñerra'm errotenotpa' e'ñe pemuereñot pebensañpsaye'cherrnan nechemer allochñapa' attoch metuer atto muerochtena.

²³ Jesúsñapa' atet och:

—Ñerra'm na peyemtena amaca'ye eñalleña ñeñt torrapo' añecop ñeñt e'ñe neyemtenaya na.

²⁴ Allempoña ñeñt pompor pen chesha'pa' rranapa' atet otererr:

—Napa' neyemtenpañca'ye, te'ñapa' peyenpa'n Ayochreshate attoch neyemterrpa e'ñe poctacma.

²⁵ Allempoña Jesús'pa' entapan shonte' acheñenesha' ñeñt matachetsa ñeshoneñ, ñaña'pa' allenta otan oneñet:

—Pa oneñete, opanatatañeñ, a'paquetatañeñ, te'ñapa' o'ch notañ: Pequechpa'ner cheshachor e'ñe tayecma, ama't errponaña amach alla pechorrere'te.

²⁶ E'ñe otue' atet oneñetñapa' chepa'tcha' rrana'nmata, alla otatnerranerr cheshachorpa' cho quechpa'nmue' o' ahuer.

Cheshachorpa' ama pelleno cha otta ñerra'mrrate' o' rroma. Acheñenesha'ñapa' atet otyes:

—Po'ño'ch te'pa' o'ca'ye rroma.

²⁷ Jesúsñapa' allenta chete' pototpa' o' tantach, chesha'ñapa' cha terrets e'ñe cohuen.

²⁸ Allempoña Jesús'pa' ahuer pueyochreshohuen, o' be'toscha'tuerret pocollo, allpa' e'ñe ñañochayet, pueyochresha'ñapa' allenta otueret Jesús:

—Yapa' ¿eso'mare'tña ama eshcaye' yequechpatatereña oneñet?

²⁹ Ñaña'pa' atet otanet:

—Ñeñt atet oneñetpa' amach errotenot yequechpatatereña e'ñe atta. Chochña yema'yochena ñaña yema'yochreñot ama't yerrarpa' o'ch yequechpue' mame'. Attotcha'ña yequechpatatereña oneñet ñeñt atet.

*Jesús'pa' eñotaterraneterr puepocheño ñapa' chocmach muetseret
(Mt. 17.22-23; Lc. 9.43-45)*

³⁰ Ahuanerretterr allotpa' arr oñemhuanerret Galileo'mar. Jesúsñapa' mueneñ a'nahuoto'ch metañ ³¹ tarro'mar ñapa' mueneñ o'ch yechatnoman pueyochresha'. Ñeñipa' atet otnomanet:

—Na Ñeñten Acheñetosetspa' pomataterrnetcha' attochña erroñuanencha' perrnet. Atteñapa' o'ch muetsataterrnet tarraña poma'pamtañoñapa' o'ch alla netanterra.

³² Ñeñña ñoñets ñetñapa' ama't puesheñarroñetapa' ama eseshaye' eñotenaye' enteñeto ñeñto'marña ama a'p̄to'tenaye' enteñeto.

All eñotateney ñeñt acheñer e'ñe po'ñoçh atarr asherben enteñ Yompor (Mt. 18.1-5; Lc. 9.46-48)

³³ Allempoña çhaçha'tet ñaña Capernaumo. Allempoña çhapuet pocollo Jesúsñapa' otanet:

—Sapa', ¿eso't sotanna'tyesnenaña ñorra' toño?

³⁴ Ñetñapa' ama eseshaye' anapuenaye' entaye tarro'mar ñetpa' aña'ye otanna'tyesnenetña toño:

—Yapa' erra'tsenoteyte'ñaca'yeña ñeñfey atarr sherbets, ñeñfey atarr añcha'taretoyen enteney acheñenesha'.

³⁵ Jesúsñapa' all anorrospa' allenta çhore'tan allohuen pueyochreshaçhnopa' atet otanet:

—Ñerra'm erra'tsenotes ñeñfes atarr añcha'taretoyen entetsañ, ñeñfes acheñres socoppa' añ poctetsa o'ch atet senterra ñerra'm ama es-oshe'mayayso ñeñt atet pena ñeñt atta atarr taruaset po'potantañecop, ama't ñaña allohuenacop.

³⁶ Jesúsñapa' cheshatolla çhore'tpa' tomach e'ñe alla, allenta enachpa' atet otanet:

³⁷ —Erra'tsenotes sa ñerra'm e'ñe cohuen saguëñ ama't ñeñt ama asherbenaye' entyeneto atet ñerra'm añ cheshatoll tarro'mar sapa' na same'ñena, na'ña e'ñe cohuen saguën. Elloña ñaña erra'tsenotes sa ñeñfes naguëne' na, ama e'ñe naptocheye' saguëno, aña'ña saguënnan Nompor ñeñt nellensene'.

Atto eñotateney ñeñt ama çhoye' yepatare'tenaye ñeñña po'ñoçhpa' e'ñe parrocmayeyenpanna

(Lc. 9.49-50; Mt. 10.42)

³⁸ Allempoña pueyochresha' ñeñt Juanpa' atet otan Jesús:

—Maestro, ya ahuañapa' atet yeñch puesheñarr yacma ñeñt queçhpatene' oneñeñ. E'ñe pueçhore'teñoñep̄ pa peso'chñopa' queçhpatan oneñeñ. Yañapa' ama pocteye' yeñche tarro'mar ñapa' ama parroye'yeyemteno. Ñeñto'marña yapa' atet yoch:

—Amach atet pepatsto.

³⁹ Jesúsñapa' atet ot:

—Sapa' amachca'ye sepatare'tatsche tarro'mar ñerra'm erra'tsencha' orrtate' partsoteñets e'ñe na neso'chño, ñeñña acheñer tsapatonetpa' amachca'ye muenere alla o'ch achm̄are'terren. ⁴⁰ Ñaña ñerra'm ama çho epatare'tenye yaña, ñeñña po'ñoçhpa' e'ñeca'ye parrocmayeyenpanna. ⁴¹ Po'ñoçhca'ye notenes: Ama't erra'tsena acheñer ñeñcha' sapue' ama't coñe'ta oñ tarro'mar sapa' e'ñe na neyochresha' nepenes, ñeñña acheñerpa' çhocmach atsa'tare'tterra ñeñcha' atarr coshaterre' ña.

*Atto chocmach huaponaya ñeñtcha' yetpatyene' o'ch atet patyeseý ñeñt
ama pocteye' enteno Yompor*
(Mt. 18.6-9; Lc. 17.1-2)

⁴² 'Ama't erra'tsena ñeñt ama pommo'cheñoŕeýe' ame'ñenno atet ñerra'm chesha'toll ñeñt ama eñotenana' o'ch ommo'chena, tarraña ñerra'm esesha'ña po'psheñeñ o'ch atet patach ñeñt ama pocteye' enteno Yompor, ñeñtña acheñerpa' atarrcha' yoroçheno'tsen tarro'mar ñapa' aña o'patenaya coñcheñets ñeñt atarr huomenc. Ama't ñocoppa' ama tama yoroçhenayayñe ñerra'm ama atet patenana' po'psheñeñ, e'ñech allorocma çharachetañ mapue' añecmuen pa'çhnoŕo allpon ñerra'm puetse'tamets o'ch huapore'chet oño epo allcha' ño'shach mapue'.
⁴³⁻⁴⁸ Ñaña o'ch noterrser: Ñerra'm sechets patyenes ñeñt ama pocteye' enteno Yompor atet ñerra'm sot, setac, seclle', añ poctetsa o'ch sequeçhpurr ñeñt chocma atet patse'tatyenes sechets. Ñeñtpa' e'ñe atet ñerra'mrate' e'ñe allorocma o' sepecherr sot, setac, o' serroterr seclle', o'ch sehuapore'ter. Añ cohuen socop ama't e'ñe sepo'yotateñoŕ corretsasach tayoteñ errponohuañen. Añña ama cohuenayaye socop esempohuañenpa' e'ñech ora epo'mar sotpa' o'ch seçherr coñcha'puetso all parraren tso' ñeñt ama emaya'pahuoyaye. Allpa' ama't pueñmochapa' ama rromueno; tso'pa'çho'ña ñeñt allo'tsenpa' ama amayaño ama't errponaña. Ñaña añ cohuen socop ama't e'ñe setco'tpa' sepsheñtatquëñoŕ corretsasach tayoteñ errponohuañen. Añña ama cohuenayaye socop esempohuañenpa' e'ñech ora epo'mar setacpa' o'ch huapore'terrset coñcha'puetso all parraren tso' ñeñt ama emaya'pahuoyaye. Allpa' ama't pueñmochapa' ama rromueno; tso'pa'çho'ña ñeñt allo'tsenpa' ama amayaño ama't errponaña. Ñaña añ cohuen socop ama't seclloyot sepsheñtaçllo'yeñoŕ o'ch seçherr all añcha'tarettena Yompor. Añña ama cohuenayaye socop esempohuañenpa' e'ñech ora epo'mar seclle'pa' o'ch huapore'terrset coñcha'puetso all parraren tso'. Allpa' ama't pueñmochapa' ama rromueno; tso'pa'çho'ña ñeñt allo'tsenpa' ama amayaño ama't errponaña.

⁴⁹ Ñeñtña Jesúsapa' atet toma'ntaterraneterr:

—Allohuen ñeñtcha' cohuenterrtsapa' añcha'ca'ye a'cohuentatene' tso'; ñaña allohuen ayarraçhno ñeñt amsarettetsa Yomporecoppa' añca'yeña a'cohuentatene' pos. ⁵⁰ Ñehua, yapa' yeñoteñ pospa' atarr cohuen sherbeney. Tarraña ñerra'm posña po'poserrteña huañerretspa' yapa' ama'te' erro't yepe o'ch alla ya'poserrtater attoch alla sherberrey. Sapa' e'ñepa'çhña cohuen sesherbannena e'ñech attes ñerra'm pospa' atarrcha' sherbeney. Attochña e'ñe cohuen sentannena e'ñech mueçhet seyçha'yena.

10

Atto Jesúsapa' yeçhatosanet ama asanna'tpahuoyaye
(Mt. 19.1-12; Lc. 16.18)

¹ Allempoña Jesúsapa' err Capernaumotpa' ahuerr anetso Judeo ñaña arre'na sen Jordanas yom'ta'n. Allñaapa' alla shonerrñañerr acheñenesha', ñañaapa' yeçhaterraneterr Yompor po'ñoñ ñeñt chocma attecma penanet.

² Allñaapa' o' alla huaçherrñañerr ñaña fariseonesha'. Ñetñaapa' aña atarr

e'nenet e'ñe pueshquẽñoŕet po'ñoñoŕetpa' o'ch eñorachet ñeñĩ ama cohue-
nayaye. Ñeñĩ'o'marña ñetpa' atet otoset:

—Ta'm ¿pocete'te' o'ch yeser yetapor?

³ Ñaña'pa' atet otapanet:

—Sapa' ¿ama't señotenoña Moisés po'ñoñ ñeñĩ atet nonase't?

⁴ Ñetña'pa' atet ochet:

—Moisés po'ñoñpa' atetca'ye oten, ðoch yequellcoñ yetapor papell
ñeñĩcha' yaŕ allempochña yeser.

⁵ Jesúsña'pa' atet otanet:

—Tarraña sa seyoçhropa' ðhocmaca'ye po'poñ sentuena
ñeñĩ'o'marca'yeña Moisés'pa' atet quellconase't attoch sese' setapor.

⁶ Ama't atet muenataseña'pa' tarraña Yomporpa' e'ñe ahuatoteñ
allempoteñ es yeçhcatyes “allempo yeçhcatan ñaña asheñorr, yeçhcatan
ñaña peno.”

⁷ Allempo Yomporpa' atet ot: “Ñeñĩ'o'marña yacmapa'
ñerra'm esempoch sena'ta, coyanesha'pa' o'ch echan puerrollar, añ
pocete' o'huañcha' tama yemteñet pamo'mte' allochña'pa' yacmapa'
attochña e'ñe parrocmat epuet puetapor.”

⁸ Attoña epsheño'maretpa'
e'ñech patrna po'chets penet.” Attochña'ña o'huañcha' puesheña'tetstet,
allochña'pa' o'ch e'ñe puesheñarratet.

⁹ Ñeñĩ atto Parets e'ñe patrnatatan
yacma epuet puetapor amach ðha ellopa' alla sannerreto.

¹⁰ Allempo ðhaçherret pocollo, allña pueyochresha'pa' atet otueret:

—¿Eroŕente'ña ñeñĩ atet p̄oten ñorra' año' asanna'tpahuo?

¹¹ Ñaña'pa' otterraneterr:

—Ñerra'm esesha' serre' puetapor o'ch alla yorerran
po'psheñeñ ñeñĩcha' puetapor perr; ñeñĩña yacmarpa' çhachca'ye
ochña'tam̄perrana puetaporeshe'mañ. Ñeñĩpa' ama pocteye' enteñe
Yompor.

¹² Ñaña coyanesha' ñerra'm serran puerrollar o'ch yorer
po'psheñeñ yacma ñeñĩcha' puerrollar perr; ñeñĩña coyanesharpa'
çhachca'ye ochña'tam̄perrana ñaña puerrollareshe'mañ. Ñeñĩpa'çho'ña
ama't mameshapa' ama pocteye' enteñe Yompor.

*Atto Jesús'pa' bensare'tam̄psapan cheshanesh'a' ñeñĩ huapatoñet
(Mt. 19.13-15; Lc. 18.15-17)*

¹³ Allempoña'pa' huaçha'tachet ñaña shonte' cheshatollesha' Jesúsesho.
Ñetpa' añecopña huaçha'tachet o'ch a'p̄lla'yesapanet Jesús. Jesúsña
pueyochresha' allempo entapan ñeñĩ huaçha'tate' cheshaneshachno
ñetña'pa' ama pocteye' eñchet o'ch anmoset cheshatollesha' Jesúsesho
ñeñĩ'o'marña ama amnataretapueto.

¹⁴ Tarraña Jesúsña allempo entan
pueyochresha' ðha epatare'tapan cheshatollesha', ñaña'pa' ama't mame-
shapa' ama pocteye' entaneto. Ñaña'pa' atet otanet:

—Pocete'ñaçho' semnachñaca'yeña cheshanesh'a' onosetepa' e'ñe nesho.
Amachca'ye ðha sepatare'tatstapaneto tarro'mar allohuen ñeñĩ atarr
neyemtenaya na atet ñerra'mrrate' cheshatoll, ñetcha' o'patenetña
Yompor po'cohuenña ñeñĩ atto ayochreshattena ña.

¹⁵ Po'ñoçhpa'
o'ch notas, ñerra'm esesha' ama e'ñeye' pueyemteñoŕeye' aguẽññañeto
Yompor po'cohuenña amach atet perreto ñerra'm cheshatoll e'ñech
yemtenana ñeñĩ cohuañpene', ñetña'pa' amach o'patenetña Yompor
po'cohuenña atto atarr ayochreshattena ña.

16 Allempoña Jesúsapa' a'chono'tyesapan cheshanesha'pa' allña a'plla'yesapanetña e'ñe ña potot attoña bensare'tam̄psapanet.

Atto puesheñarr ñeñt huepueshameñ ñeñt atarr ec̄llayoret ñañapa' eñorana'tosana Jesús

(Mt. 19.16-30; Lc. 18.18-30)

17 Allempoña Jesúsapa' o'ch ahuenñerr allenet sechena. Allentepa'tcha' huapa'muena puesheñarr yacma e'ñe matenacma huapa. Alla concorpana'tosana Jesúsapa' atet otos:

—Maestro, pápa' atarr cohuen acheñreḡ, te'pa' o'ch p̄otapuen zerotēna'tcha' nepaña na ñeñt e'ñe cohuen attochña napa' corretsanach e'ñe tayoteñ ama't errponañohuen?

18 Jesúsñapa' atet otaḡ:

Eso'mare't p̄otenenna napa' atarro' cohuen acheñren. Arr arromñatenesha' ama't e'ñe puesheñarrapa' ama eñalleña ñeñt e'ñe cohuen acheñer. Ñap̄aña Yompor ñeñt e'ñe po'ñoç cohuen. 19 Pápa' e'ñe peñotuen Yompor po'ñoñ all oteneñ ñeñt'cha' atet yepena e'ñe cohuen, ñeñt atet oteneñ: “Amach yechtapretyesatsto taporets, amach yemt-sanna'tatsto, amach yetyesatsto, amach yetoma'tam̄psatsche yamo'ts e'ñe atta, yeshquēñōtpa' amach es yeprratam̄psatsche po'psheñeñ, ñaña yemorreneteñōtpa' yem'cha'na'chcha' yompor ñaña yachor.”

20 Ñeñña a'p̄to'tene'pa' atet otererr:

—Maestrocha' napa' e'ñeca'ye cheshoteñ ora añechnopa' e'ñeca'ye net-sotueñ.

21 Jesúsña e'ñe puemorreneteñō cohue'pa' atet otererr:

—Eñallmeñca'ye paterr ñeñt pepalltena ñeñt ama atteye' pepeno. Te'pa' añcha'ña atet peḡa o'ch ahuerreḡ o'ch pepomhuerr ora allpon ñeñt pechyen o'ch pápa'yera' huocchañneshaçhno ñeñt atarr es pallta'yetsa, attochña pápa' pecherrcha' ñeñt atarr nanac sherbets Yompor pue'ntaño. Allempochña pehuerrapa' o'ch p̄octerren attoch e'ñe neyochresha' neperreḡ e'ñe poctacma.

22 O'ña e'mhuan ñeñt atet och Jesúsapa' ñañapa' çha atarr nanac lleca tarro'mar ñapa' shonte' esocmañen echyen. Ñeñto'marña e'ñe puel-quēñesha' ahuer.

23 Allempoña Jesúsapa' cohua'yesanetpa' atet otan pueyochresha':

—Ñeñt atarr ec̄llayoretpa' atarrca'ye nanac echarr attoch agapoñet Yompor po'cohuenña ñeñt atto ayochreshattena ña.

24 Pueyochresha'ñapa' çha muene' yore'tanet ñeñt atet otenanet. Jesúsñapa' alla otterranneterr:

—Nchemerneshacha' o'ch notas: Añ acheñer ñeñt añach e'ñe yemtena ñeñt allpon echyen arr patsro ñeñña acheñerpa' atarrca'ye nanac echarr o'ch agapoñet Yompor po'cohuenña ñeñt atto ayochreshattena ña. 25 Ñehua, ñeñt'pa' atet'cha' netma'ntacha. Po'ñoç yapa' yeñoteñ berr añecmuen allpon ñerra'm huaquēsh* atarrca'ye torrapo' o'ch esho'tosa añeñollpona'tollo atet ñerra'mrrate' acosh pueta'tollo. Ñeñt'pa' atetca'ye penaña acheñ ñeñt ec̄llayoret, ello atarr torrapo' o'ch agapan ñaña Yompor po'cohuenña ñeñt atto ayochreshattena ña (tarro'mar ñetpa'

* 10:25 Ñehua, Jesús añ toma'ntatanet camello ñeñt payara penet all pa'nyo, ñeñt e'ñe allpon ñerra'mrrate' huaquēsh.

ama mueneñeto o'ch sehuanmuet ñeñt atarr morrentenet ñet attoch pueyochresha' perranetañ Yompor).

²⁶ Pueyochresha'ña allempo e'met Jesús atet oten, ñetñapa' cha muene' lleca'rrtetpa' atet otanna'tyeset:

—Tarraña ñerra'm atette'pa' amate' esesha' a'queshpataretterrtso ama't puesheñarra tarro'mar yapa' yeñoteñca'ye huaquëshpa' amaca' esho'tenoña acshequeto.

²⁷ Allempoña Jesús'pa' atta cohua'yesanetpa' atet oterraneterr:

—Sa arromñañeneshaspa' amach es errotenaye' apen senteno. Tarraña Yomporpa' ama eñalleña ñocop ñeñt atarr torrapo' enten.

²⁸ Allempoña Pedropa' atet och:

—Partseshacha' po'ñoçh yapa' o' e'ñe yesuanom ora allohuen attoch e'ñe yocterreḗ.

²⁹ Jesúsñapa' alla oterraneterr:

—Allohuen erra'tsencha' acheñer ñeñtcha' e'ñe sehuanmue' allohuen ama't pa'paclohuen, ama't pa'mo'nasheñesha' ñato' po'chanesha' ñato' pompor, pachor ñato' puetapor, ñato' pacñeñar ñato' po'patseñ attochña napa' e'ñech cohuen sherberrnet pueserrpare'teñoñet cohuen ñoñets alloch a'queshpataretterra acheñesha', ³⁰ elloña ñetpa' o'ch alla aguërret shonte' esocmañen ñeñt atarr cohuen. Ama't allponapa'tets sehuanomyesnomuet, elloña çharroch çharra'ch alla agapyerret, ama't e'ñe tayoteñ allempo correnet arr patsro —ama't ñeñtcha' pa'pacllaçhno perret ñaña ñeñtcha' pa'mo'nasheñeshaçhno perret, ñaña ñeñtcha' po'chaneshaçhno perret, ñaña ñeñtcha' pachorneshaçhno perret ñaña ñeñtcha' pacñeñareçhno perret, ñaña ñeñtcha' po'patseñ perret. Tarraña ama'tcha' atet aparetterretaña' çhocmach amue-roçhtataretterret pame'ñeñoñetan na. Elloña tsapatonetña ñetñapa' aguërretcha' ñeñt alloch corretsetach beñecpuen pocsheñeshocmañen. ³¹ Te'pa' señoçhepa'ch eñall shonte' acheñ ñeñt ama asherbenaye' senteno sa te' tarraña ñetña allempopa' atarrcha' asherben enterranet Yompor. Ñaña eñall shonte' acheñ ñeñt atarr asherben sentyen sa te', tarraña ñetña allempopa' amach asherbenaye' enterraneto Yompor.

Allempo Jesús'pa' alla eñotaterraneterr ñapa' çhocmach amtsaretterra (Mt. 20.17-19; Lc. 18.31-34)

³² Allempo ahuaneneterr ñaña Jerusaléñoneñ, all oñenet toño'mar Jesúsñapa' ña otetsa. Pueyochresha'ñapa' cha toratsetyesnenet pueyoçhret, e'ñe pueñcha'nañoña coteñ. Pueyochresha' ñeñt çharra' puechena epsheña ñeñtñapa' ahuanem Jesús ellonet, allñapa' eñotaterraneterr ñeñtcha' huapoya ñocop. ³³ Ñeñt'pa' atet otanet:

—Te'ña po'ñoçhpa' o'ca'ye ahueney Jerusaléño. Allcha' pomataterret na Ñeñten Acheñetosets. Añcha' nerrmuerre' ñeñt pa'mñcha'tareñesha' pen allohuen judionesha' po'cornaneshar ñaña ñeñt atarr etsotayenayeñ ñoñets ñeñt atet anareñ. Ñetñapa' atetcha' otyesnet na'mtsaretterrepa'to' o'ch pomuerrnet po'poñ acheñesho ñeñt ama judioneshayaye. ³⁴ Ñetña pueche'tatseteñoñetanpa' allcha'ña achmāre'ternnet, ashternetcha', a'coshare'ternetcha' attoçha'ña o'ch corso'tamḗperrnet, tarraña poma'pamtañoçh alla netanterra.

Atto Jacobo ñaña Juan ñetpa' enamueñet Jesús attoch anorrcha'tyesuerret ñesho
(Mt. 20.20-28)

³⁵ Allempoñapa' atet oteña' Jacobo ñaña Juan ñeñt Zebedeo puechmeresha' ñeñtpa' atet otoset:

—Maestrocha' yapa' aña'ye yemnen o'ch atet pepa'y ñeñtcha' yotaþ.

³⁶ Ñaña' atet otanet:

—Sapa' ¿errofena'tña semnen atetcha' neþas?

³⁷ Ñetñapa' atet otereterr:

—Yapa' aña'ye yemnen te'pa' o'ch pemnatey o'ch yanorruerr pesho pecohuenño, puesheñarrotēypa' pecohuenrotcha' yanorryesuerr, po'psheñeñpa' pe'chcoterotcha' anorruerr allcha' yecohuentapreterrpa.

³⁸ Jesúsñapa' atet otanet:

—Sapa' amaca'ye señoñe ñeñt po'ñoñ senamuenen. Aña'yeña senamuenen attoch semueroçhtapreterrna samña. Ta'm ¿e'ñeñe' po'ñoñ pocte' senteñ o'ch semueroçhterra samña tarro'mar napa' çhocmach na'mueroçhtatare'tterra?

Ñeñt mueroçhteñetspa' Jesús'pa' atet toma'ntatanet ñerra'mrrate' atarr pesherr es yorren orranitso ñaña atto yapatare'ttena e'ñe atet ñerra'mrrate' çho' ya'mtsare'tterra Yomporecop.

³⁹ Ñetñapa' atet ochet:

—Yapa'çho'ña atetcha'ca'ye yeþa.

Ñaña'pa' alla oterraneterr:

—Ñehua, po'ñoñhpa' sa'mueroçhtatare'tterrach samña attescha' ñerra'm na, sa'mtsare'tterrach samña. ⁴⁰ Tarraña añña attoch sanorryesuerr nesho necohuenrot ñaña ne'chcoterot allcha' secohuentapreterrna ñeñtpa' amaca'ye naye' semnatenaye. Añcha'ña anorryesuerrrets all ñeñt e'ñe o'patatenna Nompör.

⁴¹ Añña po'potantañ pueyochresha' ñeñt çharrasheña allempo e'met ñeñt atet enamuen Jacobo epuet pa'mo'nasheñ Juan, ñetñapa' ama pocteye' eñcheti çha muene' e'moñe'chet. ⁴² Allempoña Jesús'pa' alla çhore'terranet allohuenet ñesho ñeñtpa' atet otanet:

—Sapa' señoñeñe' ñeñt atet pena po'poñ acheñenesha' ñeñt ama judioneshayaye. Ñet ñeñt pa'mcha'tareter penet e'ñech pa'mcha'noçhteñocmañen pomnaren þa'yenan allohuen pueyochreshaçhno. ⁴³ Sapa' arepa'chña atteye' seþanna'tatsto e'ñe sommo'cheñoñ. Socoppa' añña poctetsa. Ñerra'm erra'tsenotes atarr amcha'taretoyen entetsañ ñeñtes acheñres socoppa' añ poctetsa o'ch atet senterra ñerra'm ama esoshe'mayayso ñeñt atet pena ñeñt atta atarr taruaset po'potantañecop. ⁴⁴ Ñaña ñerra'm erra'tsenotes ñeñtes muenene' o'ch atarr asherben entenset ñeñtesña acheñrespa' añ poctetsa o'ch atet senterra ñerra'm ama esoyayso allochñapa' attochña e'ñech cohuen se'torrrena po'potantañecop ama't ñaña allohuenacop atet ñerra'mrrate' acheñ ñeñt atarr taruaset e'ñe atta. ⁴⁵ Atet ñerra'm na Neñten Acheñetosets, napa' ama añecpaye' nehuapo añe patsro allochñapa' sapa' o'ch atta atarr sesherbapuen na atet ñerra'mrrate' napa' atarr amcha'taret sentenen. Napa' añecopña nehuapa allochñapa' nachña sesherböseña sa, ñeñto'marña napa' naña pomostsa nañeña o'ch nerromos socop attochña netsa'tuernasa so'chñar ñeñtes

shontes pa'namen acheñres. Attochña sapa' amach sañña rromatso so'chñarecop.

Allempo Jesúsapa' a'crraterran puešeñarr aporo'yet ñeñtpa' añ pa'so'cheñ Bartimeo

(Mt. 20.29-34; Lc. 18.35-43)

⁴⁶ Allempoñapa' o' cha'cha'tet Jericó. Allempo meterrerr Jericó epuet pueyochresha' ñaña shonte' acheñenesha' e'ñe allpona serreter-rpa' allña e'ñe toñetopñopa' ahuepa't anorros puešeñarr aporo'yet ñeñt chocma enamare'tets quelle. Ñeñtpa' añ pa'so'cheñ Bartimeo ñeñtpa' Timeo puechemer. ⁴⁷ Ñaña' eñotatoset añ huetsa Jesús ñeñt nazareto'marnesha'. Ñeñña aporo'yetpa' allenta rranare'ch atet otapan Jesús:

—¡Pemueraye'chnomna Jesúsocha' namña! Papa' ñeñteḡ Davidna'tareḡ.

⁴⁸ Acheñenesha'ñapa' cha muene' che'ptare'tnometña aporo'yetpa' atet otoset:

—O'hua pemma.

Aporo'yetñapa' ello alla rranare'terrerr atet otererr:

—¡Pemueraye'chnomnañaca'ye Ayochreshate! Papa' ñeñteḡ Davidna'tareḡ.

⁴⁹ Jesúsñapa' alla tomos atet otosan acheñenesha':

—Seçhore'chñaca'ye onepa' arr.

Ñetña chore'chet aporo'yetpa' atet ochet:

—Te'pa' choḡa cosherrtsa, ñapa' o'ca'ye agotoseḡ. Petantnoma e'ñe tayecma.

⁵⁰ E'ñe atet otuetpa' cha tantatsa cha a'meyanmue' allo ca'maḡna'tenapa' allenta ahuo' Jesúsesho. ⁵¹ Jesúsñapa' atet otaḡ:

—Papa' ¿eso'tña pemnen ñeñtcha' atet neḡoseḡ?

Aporo'yetñapa' atet och:

—Añca'ye Maestro nemnen o'ch pecuatnomuen attoch o'ch cohuen nenterrapa.

⁵² Jesúsñapa' alla otererr:

—Te'pa' ahuerreḡ e'ñe peñmañesha' tarro'mar atto atarr peyemtapna na ñeñtca'yeña o' e'ñe a'crraterreḡ.

E'ñepa'tcha' allorocma e'ñe cohuen enterra. E'ñe cohuerrtsapa' cha cota'nmue' ñaña Jesús allenet sen.

11

Allempo chap Jesús Jerusaléño

(Mt. 21.1-11; Lc. 19.28-40; Jn. 12.12-19)

¹ Atteñapa' o' cha'cha'tet allame'tets Jerusaléño. Chapuet aspeno ñeñt pa'so'cheñ Olivopen. Allña' allo'tsen anets ñeñtpa' añ pa'so'cheñ Betfagé, po'poñpa'cho' allo'tsen anets ñeñtpa' añ pa'so'cheñ Betania. O'ña chapmochet all anetso, ² Jesúsñapa' atet otnoman epsheña pueyochresha':

—Sapa' o'ch sota o'ch seḡhap a'yenteye' e'ñe allara anetso. Allña' allcha' sentos ashen rre'ptor all huanquēñet; ñeñtpa' ama't puešeñarra acheñ amaca'ye monteña'. Ñeñña ashenpa' o'ch sepyamḡsospa' o'ch sanerrnan. ³ Ñerra'm esesha' sotapue': “¿Eso'mare't sepyamḡpenña

ashen?" sañapa' atetcha' sotosanet: "Yepartsesharca'ye muenene'ña añ ashen. Mameshapa' o'ch alla apuerrsa'."

⁴ Allempoña ñetpa' allenta ahuanmuet. O'ña chapuet anetsopa' all entoset ashen ehuanca'ret e'ñe opellrronita'note'tsen all ten e'ñe ñoñoí. Ñetñapa' pueyañp̄somet.

⁵ Allempoña puesheña'tets ñeñt̄ tom'cha'tyets allpa' atet otapanet:

—¿Eso't sottenña arr? ¿Eso'mare'tcha' sepyañp̄sosña ashen?

⁶ Ñetña atet otapanet Jesús'pa' atet'cho' otoset. Allempoñapa' atet otaretet:

—Ñeñtepñapa' sanerca'ye.

⁷ Allempoñapa' allenta anerretña ashen Jesúsesho. Nohuerret pa'shtam ashnache'ño'pa' Jesúsñapa' allenta monta'nmana ashen. ⁸ Shonte' acheñenesha' ñetñapa' totma'tyesoñet pa'shtam ñoño allcha' oñem Jesús. Po'potantañechnoñapa' tsorrmo're'tyeset tsach pue'mo'rer allo topaneyet ñoñ.

⁹ Allohuen acheñenesha' ñeñt̄ ota'chetsa ñaña ñeñt̄ co'a'huanene' chenta' ñetñapa' puerrannarteño'etpa' atet atarr cohuentatyesneññañetpa' atet otenet:

—¡Acsherrapo'ch allohuene'y! ¡Aye'cho'chtaterrapo'ch Jesús ñeñt̄ llesensen Yompor!
 10 ¡Aye'cho'chtaterrapo'ch Jesús ñeñt̄'cha' añ'cha'taretterrtsa! Te'pa' o'ca' huerraña yatañ David pa'm'cha'tare'tteña. ¡Aye'cho'chtaterrapo'ch ñaña Yompor Parets ñeñt̄ pue'ntaño'tsen!

¹¹ Atteñapa' chap Jesús Jerusaléño'pa' allenta ahuos Parets pa'paclo, all be'tosos, cohua'yesosan ora allohuen ñeñt̄ allo'tsa'yen. Cohua'yeseña'pa' o' cha'nerrpa' ahuo' anetso Betanio allohuen pueyochreshohuen ñeñt̄ charra' puechena epsheña tarro'mar allempopa' o'ca'ye ellerren.

Allempo Jesús'pa' eñora higohecop amach eñalletatsto pue'mer

(Mt. 21.18-19)

¹² Tsapat allempo onacha'ta'muenet Betanio't, Jesúsñapa' cheporra'nma. ¹³ All oñenet Jesúsñapa' a'yoteñ entosan higoch ñeñt̄ taya o' asopanre'terr. Ñaña'pa' allenta ponem'ya o'ch enteña' ñato' e'merette'. O'ña chap allame'tetspa' pasopanrepa'tcha' entosñañ tarro'mar ama chena' allempo me'ten. ¹⁴ Jesúsña' chepa'tcha' eñorosta higohecop, ñeñt̄pa' atet otos:

—Ama't errponañapa' amuepa'ch esesha' tsumuerraye añ higoch pue'mer.

Pueyochresha'ñapa' e'ñe e'mueñet atet eños higohecop.

Atto Jesús'pa' a'cohuentatosan Parets pa'paquëll

(Mt. 21.12-17; Lc. 19.45-48; Jn. 2.13-22)

¹⁵ Allempo entuanman Jesús higoch allempoñapa' o' alla cha'cheneterr Jerusaléño. Jesúsñapa' be'tosuener Parets pa'paclo, allñapa' allentepa'tcha' muevo'ntuosan allohuen ñeñt̄ pomatsre'tetsa all ñaña allohuen ñeñt̄ raña'yetsa. E'ñe cha'nma'cha'tatosanet allot, a'coye'tam̄psosanet po'mesachno allecma canyatyenet po'çllayoret, a'coye'tuosan ñaña allecma anorryen ñeñt̄ pomuene' yepechno.

¹⁶ Allempo Jesús'pa' ama't puesheñarroña ama muenaterraneto o'ch

es oñmatet all Parets pa'paclo'mar. ¹⁷ Allempoña yečhatosanetpa' ñapa' atet otosanet:

—Yompor po'ñoñ ñeñ atet anuaret ahuatoteñ allña'pa' atetca'ye oten Yompor: “Añ ñeñ nepaquell nepenpa' añecpacayeña sherben allecmach ma'yochennet ama't allohuen pa'namen acheñenesha'.” Tarraña saña'pa' e'ñe atet sepeññañña Yompor pa'paquell ñerra'mrrate' eñeñ ñeñ e'potyetsa mapuetpono.

¹⁸ Añña ñeñ pa'mcha'tareternesha' pen allohuen judionesha' po'cornaneshar ñaña añ ñeñ atarr etsotayenayeñ ñoñets ñeñ atet anaret, ñetña'pa' allempo atet e'mare'tetpa' Jesúsepa'tcha' atarr o'patet o'ch muetsatachet. Tarraña allempopa' ama erro't peto čha mecha'na'chet tarro'mar allohuen acheñenesha'pa' atarrca'ye cosheññañet ñeñ atet yečhatenanet, nanac cohuen enteñet. ¹⁹ Allempoña o' ellerrenpa' onačheneterr Jerusaléño'tpa' ahuaneneterr Betanio.

Arrpa' atto entuerret higoch o' e'ñe hueya'hua
(Mt. 21.20-22)

²⁰ Tsapaña ahuatecma alla oñma'mueneterr allo'tsen higoch. Entueneterrpa' o' e'ñe hueya'huenaña higoch e'ñe puerčohuen. ²¹ Allempoña Pedro allenta yerpana atet eños ellerro Jesús higočecop, ñaña'pa' allenta otosan Jesús:

—Maestro, pecua' añ higoch ñeñ potnom ellerro ama't esesha'pa' amach tsomuerrñañeto pue'mer, te'ña'pa' o' hueya'hua.

²² Jesúsña'pa' atet otnomanet:

—Sapa'čho'ña e'ñeñaca'yeña seyemteraña Yompor. ²³ Po'ñočca' na te'pa' o'ch notas: Ñerra'm ama čoye' se'charrtateno seyočher, ñerra'm po'ñočh e'ñe seyemteña Yompor, ñachca'yeña atet peneña ñerra'm erro'ten es soten. Añe'nachña e'ñe setsoten ñeñ ello atarr torrapo' senten. O'ch netma'ntacha atet ñerra'mrrate' añ aspenet. Ñerra'm eseshascha' otets aspentecop “Añ aspenetpa' rrote'tepa'ch arro't, arrepachña esha'toso sa'po allcha' chencosa”, aspenetña'pa' atetča'cho' pónasa. ²⁴ Ama't allohuen erra'tsencha' es senam sema'yocheño't, ñerra'm čho senam e'ñe seyemteño'cmañen, ñeñña'pa' saga'pcha'. ²⁵ Ñaña te'pa' o'ch notnomues: Ñerra'm sema'yocheño't čho safen ñerra'm čho se'moñe'teñ po'pšeñeñ čhosach peretnerre' seyočhro allorocma, allochña'pa' Sompor ñeñ ento'tsen peretnerrnascha' saña ñeñ atet sepatse'tyen ñeñ ama pocteye' enteno ña. ²⁶ Tarro'mar ñerra'm ama sepretnannenopa' Somporpa'čho'ña ñeñ ento'tsen amach peretnerrnaso saña ñeñ atet sepatse'tyen ñeñ ama pocteye' enteno ña.

Atto allsensarettena Jesús
(Mt. 21.23-27; Lc. 20.1-8)

²⁷ Allempoña'pa' alla čhačha'ta'mueneterr Jerusaléño. Jesúsña'pa' all chopeñe'chen Parets pa'paclo. Allña'pa' huacha'toña ñaña shonte' amcha'tareternesha' ñeñ pa'mcha'tareternesha' pen allohuen judionesha' po'cornaneshar ñaña ñeñ atarr etsotayenayeñ ñoñets ñeñ atet anaret ñaña po'potantañ ñeñ pompornesha' pa'yen allohuen judionesha'. ²⁸ Ñetña'pa' atet otoset Jesús:

—Ñehua, yapa' añecop yehuena yemneñ o'ch p̄otey ¿errote't apuennetña llesens? ¿Esesha'tña p̄apuene'ña llesens atto't p̄orrtatyenña ñeñt̄ chocma attecma nepa'yena?

²⁹ Jesúsñapa' atet otapanet:

—Ñehua, napa'cho'ña nemneñ o'ch na'p̄to'tapas sam̄a ama't patrra ñoñets. Ñerra'm sanaposencha'pa' napa'cho'ña attochña notapas nam̄a allot apuennetña llesens ñeñto'marña atet nepena. ³⁰ Sapa'cho'ña o'ch sotosen ñeñt̄ atet soctape'chen sa, ahuañmo'cha allempo apate't̄ Juanañ Yomporecop, ñapa' ¿eseshatña llesense' ñato' Yompor amapa' acheñaate' apue'ña llesens? Nemnen o'ch sotosen ñeñt̄ atet soctape'chen sa.

³¹ Ñetñapa' e'ñe a'nahua otanna'tyeset:

—Ta'm erro'tcha'ca'ye yochte'. Ñerra'm cha yoch Yomporeshotca'ye apetña llesens, ñapa' chate'ca'ye otey: “Ñehua, sañapa' eso'mare'tña ama se'mñocheña ahuaña allempo serrpare'tatosan acheñenesha'.” ³² Elloña amach yotatsche acheñesho'ta apet llesens.

Ñehua, acheñenesha'ñapa' chate' e'moñe'chet añcha'tareñnesha' tarro'mar acheñenesha'pa' e'ñe cohuen eñchete't̄ Juanañ ñeñto'marña chocma otyeñet ñapa' ñeñt̄ca'yeña po'ño'ch a'mtose' Yompor po'ñoñ. ³³ Ñeñto'marña añcha'tareñnesha'pa' atet ochet Jesús:

—Ta'm yapa' amaca'yeña yeñoteñe; erro'tte' huapaña Juanañ, erro'tte' apetña ñaña llesens.

Allempoña Jesús'pa' atet oterraneterr:

—Napa'cho'ña te'pa' amach notaso sam̄a allot apareten nam̄a atto't atet nepa'yena.

12

Atet atma'ntatarettena ñeñt̄ ataruasañe'chnopa' ama cohuenayaye
(Mt. 21.33-46; Lc. 20.9-19)

¹ Allempoña Jesús'pa' alla serrpare'taterranerr acheñenesha' toma'nteñtso, ñeñt̄pa' atet otanet:

—Eñall puesheñarr acheñ ñeñt̄ nare'tanatatnomue' shonte' uvach; pa'muerñapa' e'ñe ora uvachmatatue. E'ñe concha'tam̄pesue allotñapa' eñan ñaña allcha' a'pecho'toñet uva po'ñer. Allñapa' tomatatnoman tor-repo' allotcha' cohuan̄p̄soñet pa'muer. Tomatuepa' na'nman ñeñt̄cha' taruasatats ñeñt̄cha' coyerrahuet allpon ñerra'm esempoch toteñet.

O'ña nare'tanatatuepa' o' ahuo' po'poñ anetso ñachayo. ² Chap allempo yen uvachllom̄pa' ñaña'pa' mueñerran po'psheñeñ pa'taruasañer o'ch enamuer' uvachllom̄ po'psheñeñ pa'taruasañereshesho ñeñt̄ cohuan̄pen' uvachma'. ³ Allempoña chen allpa' enamosan ñeñt̄ allpon o'patena ña, arepa'tcha'ña es apapuyenayaña uvachllom̄, elloña ñeñt̄apa' cha rremapueññañet pa'taruasañerpa' o' nalle'tapueñet, o' alla muevo'teret e'ñe atta. ⁴ Allempoña ñeñt̄ pamo'mte' pen uvachma'pa' o' alla mueñerranerr po'psheñeñ pa'taruasañer. Allempo chenerr ñaña allpa' ñapa'cho'ña cha rrolle'tapetpa' o' atserrp̄apueñet poñopa' cha es otnatapueñet. ⁵ Allempo o' alla mueñerranerr po'psheñeñ pa'taruasañer. Ñeñt̄pa'cho'ña allempo chenerr ñaña allpa' ñaña'pa' chepa'tcha' muet-sapueñet. E'ñe attecma pa'yeset po'potantañe'chno —patanta'tetspa' nalle'tapueñet, po'potantañe'chnoñapa' cha amtsanatarettapuenet.

⁶ 'Ñeñt pamo'mte' penetpa' eñallmeñ ñaña puesheñarr ñeñt e'ñe ño puechemer ñeñt atarr morrentena. Allempoñapa' atet ot: "Te'pa' o'ch nemñe all ñeñt e'ñe na nechemer. Ñato'rraña ñeñtpa' mecha'na'tapetcha'." ⁷ Ñeñtpa'cho'ña ama't mameshapa' arepa'tcha'ña mecha'na'tapeto. Allempo entapoñet puechemer ñetñapa' atet otanna'tyeset: "Añmapa' ñeñtca'yeña puechemer ñeñtcha' o'paterraya pompor puenareñ esempo. Ñapa'cho'ña te'pa' o'chca'ye yemtsaḡ allochñapa' yachca'yeña e'ñe o'paterrayaña pompor puenareñ. Te'pa' o'ch ahuey o'ch yemtsaḡ ñaña." ⁸ Allempoña o' rremapoñet ñaña puechemerpa' o'cho' muetsapet, huapore'teret allot uvachmot. Arrpa' allohua atet toma'ntata Jesús e'ñe ñañeña.

⁹ Jesúsñapa' atet oterranerr acheñenesha':

—Ñehua, te'pa' o'ch notas, ñeñt pamo'mte' pen ataruasañechnopa' ama't señoñeña sa atetcha' pōhuerranet. Ñerra'm esepoch hueranet, pamo'mtayetpa' a'clatuerranetcha', narmetsma'ñapa' o'ch apueran po'potantañ.

¹⁰ Allempoña Jesúsapa' atet oterraneterr:

—Sapa' ama't ahuatapa' ama'tña selleyareña ñeñt atet anuaret Yompor po'ñoñ ahuatoteñ. Tarro'mar ñeñtpa' atet oten nocop, all atma'ntatareten mapue'. Ñeñtpa' atet oten:

Añ mapue' ñeñt ama pocteye' entyeno ñeñt tomatyene' pocoll, ñeñtña te'pa' o' anaretterra ñeñtcha' ello atarr cohuen sherberrets e'ñe atet ñerra'm quellpach allo e'ñe cohuen echarr orratenet pocoll.

¹¹ Ñeñtpa' Yomporca'yeña atet p̄atene' ñeñto'marña yapa' e'ñe cohuen yenteñ.

¹² Ñeñt e'moñe'tene' Jesús ñetñapa' eñoteñet ñeñtpa' ñetca'ye atma'ntatarettenet, ñeñtpa' ñocpuetca'ye atet eñoreña Jesús. Allempoña ñetpa' atarr mueneñetañ o'ch rromuet Jesús e'ñe allorocma tarraña ama esesha' rromaye tarro'mar ñetpa' cha mecha'teñet acheñenesha'. Ñehua, acheñenesha' e'ñeca'ye cohuen enteñet Jesús. Ñeñto'marña ñetñapa' quechpa'huaneret Jesúsapa' ahuanerret.

Atto a'pto'chet Jesús, pocte'te' o'ch tsa'tet impuesto

(Mt. 22.15-22; Lc. 20.20-26)

¹³ Atteñapa' chap allempo po'pocheño e'ñe a'nahua mueñeññañet puesheña'tets fariseonesha' ñesho ñaña puesheña'tets Herodes puey-ochresha', tarraña ñetpa' añecpa amñareñtenet attoch e'ñe puehquëñoñet po'ñoñotetpa' o'ch eñoratoset ñeñt ama cohuenayaye. Allochñapa' attotcha'ña otteñe'chet. ¹⁴ Ñeñto'marña ñetpa' allempo chapuet ñeshopa' atet otoset:

—Maestrocha' yapa' yeñoteneḡ p̄apa' ama peshquëno ama't mamesha ñaña ñeñt atto peychaten Yompor poctaḡña ñeñtpa'cho'ña e'ñe cohuenacma, ama shequëñtsoyaye ama't mamesha. Papa' allohuen acheñpa' e'ñe cohuen pentueñ; ama añña ñapueḡ pemorrenteno ñeñt atarr añcha'na'tpo' entyen allohuen acheñenesha'. Ñeñto'marña te'pa' yapa' yemneñ o'ch peñotatapuey erra'tsente'ña e'ñe po'ñoñ cohuentetsa. ¿Pocte'te' penteñña p̄a o'ch yetsa'ta impuestos añecop ñeñt añcha'tarettetsa all anetso Romo ñeñt ama judioneshayaye?

Ñato' amate' pocteyayeña yocop ñeñtey judioneshay o'ch yetsa'cha am'cha'taret romo'marnesha' ñeñt ama judioneshayaye.

¹⁵ Jesúsñapa' eñotapanet ñetpa' 'chaca'ye shecare'teñet, ñañapa' atet ota-panet:

—Sapa' eso'mare'tña semneña o'ch seshcare'tosen. Ñehua, ama't atet setpatennoñpa' sorratatca'yeña puetallarr quelle o'ch necue'.

¹⁶ Ñetña apetpa' ñañapa' atet oterraneterr:

—Ñehua, sapa' o'ch soten, ¿eseshat' sentenña ñeñt atma'ntatarettetsaña all? ¿eseshat' pa'so'cheñ aquellcarettetsa all?

Ñetñapa' atet ochet:

—Am'cha'taretca'ye atma'ntarettetsaña all, ñoca'yeña pa'so'cheñ ñeñt aquellcarettetsa all.

¹⁷ Jesúsñapa' alla oterraneterr:

—Ñeñtepnapa' añ poctetsa o'ch yaþ am'cha'taret ñeñt ño ñeñt atet poctetsa gobiernocop, tarraña ellonetña ñeñt Yomporo o'ch yaþ ñaña ñeñt atet poctetsa ñocop.

Ñeñtña shequëneyeñ atta cohuanrrorteñet tarro'mar Jesúsapa' atar-rca'ye cohuen anapuenanet.

Atto a'þto'chet Jesús, ñerra'm po'ñochte' atanterrapo' rromot, ta'm, allempopa' errotenchá'ña yeperra

(Mt. 22.23-33; Lc. 20.27-40)

¹⁸ Allempoñapa' huacha'toña ñaña patantarr ñeñt saduceoneshatets. Ñehua, ñeñt saduceoneshatets ñetñapa' ellonet echenet poctapña ñeñto'mar atet otenet amate' errotenoñ yetanterroña rromot ama't errponaña. Ñetñapa' atet otoset Jesús:

¹⁹ —Maestrocha' ahuañ Moisésapa' atet quellconay ñoñets ñeñt poctetsa ñeñtcha' atet yeþa. Ñeñtþa' atet otenña Moisés po'ñoñ: Ñerra'm esempo rroma yacma o'ch sa'nman puetapor tarraña ama chemere'tnomopa', añ poctetsa pa'mo'nasheñcha' alla yorerreña po'norrar allochñapa' attoch eñalletteraña ñeñtcha' puechemer perr pa'mo'nasheñeñ. Ñeñtþa' atetca'ye quellca'nmonayña Moisés ahuañ. ²⁰ Ñehua, te'pa' eñall cancherrsheña ñeñt e'ñe poctacma pa'mo'nasheñecmuet. Ñeñt puesheñarr popo'naretpa' o' yoran coyanesha' ñeñt puetapor þa'. E'ñe allponmatatsapa' o' rromaña, yacma ama chemere'tnomo. ²¹ Allempoña ñeñt po'rrocho'merpa' o' yorerran pa'mo'nasheñeñ puetapor. E'ñe allponmatatsapa' ñapa'cho'ña o' rromuerrerr ñaña, ñeñtþa'cho'ña ama chemere'tnomo. Allempoña po'psheñeñ pa'mo'nasheñpa' o' alla yorerranerr ñaña po'norrar. E'ñe allponmaterrtsapa' ñapa'cho'ña o' rromuerrerr ñaña ñeñtþa'cho'ña ama chemere'tnerrero o' atta rromuerrerr. ²² E'ñe attecma þohuet cancherrsheño'maretpa' e'ñe pueyoruarochet ñeñfara puesheñarr coyanesha'. E'ñe allohuenetpa' e'ñe attecma pet rromayestset ama't puesheñarrofetapa' ama chemere'tnomueto. O' rromapesuaña cancherrsheño'mar puerrollaresha'pa' cho rromatsña ñaña coyanesha'.

²³ Te'ña ñerra'm po'ñochte' yetantena rromotþa' añña coyanesha' allempoñapa' ¿eseshat'cha'ña puetapor perre' tarro'mar allohuenet cancherrsheño'maretpa' e'ñe pueyoruarochet?

²⁴ Allempoña Jesúsapa' atet oterraneterr:

—Sapa' ñeñto'marca'yeña cha atarr sepanteñ tarro'mar amaca'ye chennasoña seyoçhro ñeñt e'ñe po'ñoçh atet yeçhateney Yompor po'ñoñ ñeñt atet anuaret ahuatoteñ. Ñaña aña sepantatene' tarro'mar sapa' ama sepocteññañe Yompor po'huamenc. ²⁵ Tarro'mar esempohuañen allempoçh tanterret po'pocheño, allempopa' ama't puesheñarrofeta amach sena'terreto, ama't coyanesha'pa'çho' amach eseshaye' apueraye ñeñtcha' yorerrahuet. Tarro'mar allempopa' e'ñech atet ñerra'm Yompor po'ñllañoñeñnaneshar ñeñt pue'ntaño'tsa'yen. ²⁶ Sapa' ama'tña selleyareña ñeñt atet quellquë't ahua't Moisés attoch señoçh ama't ñeñt o' colla'huapa' ñetñapa' corretseta. Ñehua, all aquellcare't tsachmo'r ñeñt e'ñe ñoña huortets. Allotñaca'yeña Yomporpa' eñorana'tanaña Moisés; ñeñtapa' atetca' otña Yompor allempo: “Napa' ñeñten Po'yomporer pen Abraham ñaña Isaac, ñaña Jacob.”

²⁷ Jesúsñapa' alla oterraneterr:

—Ñehua, yapa' yeñoteñ Yomporpa' ama añeye' Po'yomporer penaye ñeñt rromuets e'ñe poctacma, ñapa' aña'yeña Po'yomporer pene' acheñ ñeñt corretsach. Attoña Yomporpa' e'ñe allame'ttsa entenanet allohuenet ñetñapa' bettetseta. Ñeñto'marca'yeña sapa' atarr sepanteñ.

Añmapa' ñeñt ñoñets ñeñt atarr sherbets, e'ñe metana'tuenan allohuen po'poñeçhno ñoñets

(Mt. 22.34-40)

²⁸ Allempoña huapoña ñaña puesheñarr ñeñt etsotene' ñoñets ñeñt atet anaret, ñaña'pa' e'mosan ñeñt atet a'p'to'tare'teñet Jesús. Ñaña'pa' e'mosan Jesús e'ñe cohuen anapuenanet. Ñeñto'marña ñapa'çho'ña alenta a'p'to'tos, ñeñtapa' atet otos:

—¿Erra'tsena't ñoñtsor ñeñt atet anaret ñeñt atarr sherbets, ñeñt ello metana'tuene' ora allohuen po'poñeçhno ñoñets ñeñt e'ñe parro atecma anuaret ahuatoteñ?

²⁹ Jesúsñapa' atet otap:

—Ñeñt ñoñtsor ñeñt atarr sherbets ñeñt ello metana'tuene' po'poñeçhno ñoñetspa' ñeñtapa' atet oten: “Se'mñot israelneshacha' attoch señoçh: Ñeñt Yeyomporer yepenpa' ñapa' e'ñeca'ye patrra ñeñt Yepartseshar yepen. ³⁰ Ñeñto'marña atarrepachña yemorrenteña Yeyomporer ñeñt Yepartseshar yepen e'ñe ora yeyoçhrocmañen. Ñaña e'ñe yecamquëño't yemorreñchach, ñaña yoctapñohuen, ama't ñaña e'ñe ora yehuamencohuen.” ³¹ Allotpa' po'poñ ñoñets ñeñt atarr sherbets ñeñtapa' atet oten: “Atarrcha' yemorrenteña yamo'ts e'ñe atet atarr yemorrentena yañeña.” Añ epo'mar ñoñetspa' ñeñtca'yeña atarr sherbets, ñeñtña ello metana'tuene'ña po'poñeçhno ñoñets ñeñt atet anaret.

³² Allempoña ñeñt etsotene' ñoñets ñeñt atet anaret, ñaña'pa' atet oterranerr Jesús:

—Maestrocha' p'apa' e'ñeca'ye po'ñoçh atet p'oten. Po'ñoçh Yomporpa' e'ñeca'ye patrra ama eñalleña po'poñ Yeyomporer patrraca'ye. ³³ Ñerra'm çoch yemorrenteña Yompor e'ñe yeyoçhrocmañen e'ñe yeñoteñohuen, ñaña e'ñe yecamquëño't yemorreñchach e'ñe yehuamencohuen ñaña ñerra'm atarr yemorrenteña ñaña yamo'ts e'ñe atet atarr yemorrentena yañeña, ñeñtca'yeña atarr nanac sherbets. Elloca'yeña metana'tuenan

allohuen po'poñechno ama't ayarrachno ñeñt̃ yemtsayen Yomporecop, ama't ñaña allohuen ñeñt̃ yachamuen allo yesherbeñ Yompor.

³⁴ Jesúsñapa' atet̃ eñch ñapa' atarr eñnoten ñeñt̃ atarr sherbets Yomporecop, ñeñto'marña atet̃ otererr:

—Papa' amaca'ye atarr atonaye' pepallteno attoch e'ñe ñagaphuerrñañ Yompor po'cohuenña atto ayochreshattena ña.

Allempoñapa' ama't puesheñarrofetapa' ama eseshaye' a'p̃to'tenaye' enterrayeña Jesús.

Atto Cristo ñeñt̃ Po'partseshar pe't̃ David, elloñapa' o' alla po'mreneñ per (Mt. 22.41-46; Lc. 20.41-44)

³⁵ Allempoña Jesúsapa' alla yechaterraneterr all Parets pa'paclo. Ñeñt̃pa' atet̃ oterraneterr:

—Ñeñt̃ atarr etsotayenayeñ ñoñets ñeñt̃ atet̃ anaret̃, ñetpa' eso'marte'ña otyenet ñeñt̃cha' Cristotosets ñapa' aña po'mreneñ pene' David tarro'mar ñeñt̃cha' Cristoterrets ama aña po'mreneñ pene' David tarro'mar ñapa' Po'partseshare'ñaña pe't̃ David. ³⁶ Tarro'mar ama't Davidpa' allempo eñorache't̃ Parets Puecamquëñ, allempopa' atetca'ye eñose't̃ña añecop ñeñt̃cha' Cristoterrets:

Yompor Parets atet̃ otennan ñeñt̃ Nepartseshar nepen na (ñeñt̃ara ñeñt̃cha' Cristoterrets): “Te'pa' o'ch ñanorruerr arr necohuenro't̃ allcha' pecohuentapreterra. Attochña ama't ñeñt̃ pe'moñe'tene' napa' o'ch name'ñatuerranet allochñapa' o'ch atet̃ perret̃ ñeñt̃ pemnen ña.”

³⁷ Ñeñt̃pa' atetca'ye ote't̃ña David, ñeñt̃cha' Cristoterretspa' ñeñt̃ca'yeña Po'partseshar pe't̃ña ama't allempoteñ. Ñehua, ama't señoñeña Cristo ñeñt̃ Po'partseshar pe't̃ Davidpa' ñeñt̃ña te'pa' o' alla po'mrenñ per ñaña.

Ñeñto'marña Jesús allempo yechatenan shonte' acheñenesha' ñetpa' e'ñe pocsheñesha' e'mñoteñet.

Atto Jesúsapa' a'metare'tenan ñeñt̃ etsotayenayeñ ñoñets ñeñt̃ atet̃ anaret̃, ñeñt̃ atet̃ yechenet ñetpa' ñeñt̃pa' ama cohuenaye' entapretenaneto Yompor (Mt. 23.1-36; Lc. 11.37-54; 20.45-47)

³⁸ All yechaterraneterr ñeñt̃pa' atet̃ oterraneterr:

—Amach semeñe'tapretatsche ommoñañenesha' pocta'p̃ña ñeñt̃areta ñeñt̃et atarr etsotayenayeñ ñoñets ñeñt̃ atet̃ anaret̃. Tarro'mar ñetpa' añe'ñaña atarr cohuen entenet o'ch chorrenet atarrom shetamuets o'ch atta yorma'tatse'tenet pa'shtam. Ñaña pommo'cheño'tetpa' atarrcha' mueneñet o'ch e'ñe puen'cha'na'teño't̃ e'ñech cohuen huom'cha'tenanet acheñenesha' all chopeñe'chyenet. ³⁹ Ñaña ñetpa' añe'nach atarr muenenet o'ch anorr'cha'tyenet judionesha' po'prahuo allecma anor-ryen ñeñt̃ atarr añcha'na'tpo' entyen allohuen acheñenesha' ñaña e'ñe attecma penet ñaña all rrallme'chapretenet. ⁴⁰ Tarraña ñetñapa' rretorranesha'ñaña puerratañpesyenetña pa'paquëll. Elloña e'ñe pommo'cheño'tetpa' aña atarr muenenet o'ch atet̃ penet ñerra'mrrate' ñetpa' atarr cohuen acheñret ñeñto'marña arr ma'yochoyenet all shon-tena acheñenesha'pa' amach tematenayaya ma'yocheneto. Ñeñto'marña te' napa' o'ch notas ñeñt̃ atet̃ petsa pommo'cheño't̃ elloña atarrcha' a'coñcha'tare'tterret.

Atto rretorrnanesha' ñeñt atarr huocchañetets ñapa'cho'ña nosan quelle ñeñt Yomporecop

(Lc. 21.1-4)

⁴¹ Allempo Jesús pa' alla anen a'yente' allecma na'yenet quelle Parets pa'paclo. Allña pa' shonte' entenan acheñenesha' ñeñt na'yene' quelle Partsocop, shonte' eçllayoretenesha' ñeñt na'yene' shonte' po'çllayor Partsocop. ⁴² Jesúsña allpa' atta cohuenanet, huapa ñaña puesheñarr rretorrnanesha' ñeñt atarr huocchañetets. Ñapa'cho'ña nosan eptallatoll quellayetoll ñeñt cobretall, ñeñt quellayerpa' ama tsa'teno, ama es sherbeno. ⁴³ Allempoña Jesús pa' agotan pueyochresha' pa' atet otanet:

—Te'pa' o'ch notas, añ rretorrnanesha' ama't atarr huocchañpa' ñapa' po'ñoçca'ye atarr aton nosan quelle, ello metana'tuosan allohuen po'potañeçhno allpon quelle ñeñt na'yenet ñet. ⁴⁴ Tarro'mar allohuenet ñeñt na'yenet quellepa' añaca'ye na'yenet ñeñt a'pcha'tyenet, ñaña pa' ama't atarr huocchañpa' e'ñe pomhuahuospan allohuen ñeñt echyen ñeñt muenatenaneñ attoch yoran alloch correna arr patsro.

13

Atto Jesús pa' eñotatanet e'ñech a'mata'taretetuerra Partsopo'

(Mt. 24.1-2; Lc. 21.5-6)

¹ Allempo cha'nerrerr Jesús Parets pa'paclo't puesheñarrña pueyochresha' pa' atet och:

—Maestro, pecuaye'ch, atarruaca' coñnesha'te' mapyet ñeñt allo oratyenet Partsopo', atarr coñneshachnote' Parets pa'pacleçhno.

² Jesúsña pa' atet och:

—Ama't sentyeñ te' ñeñt atarr coñneshare' pocolleçhno tarraña esempopa' çherra' allempoch e'ñe a'mata'taretetuerra. Ama't e'ñe puenñarra mapyetpa' amach a'puerroña all allo orratenet Partsopo'.

Atto Jesús pa' eñotatanet shonte'ch entyerret pa'namen ñeñtcha' eñotaterahuet o' çherrmoch allempoch mellapoterra

(Mt. 24.3-28; Lc. 21.7-24; 17.22-24)

³ Allempoña ahuenerr Olivopnopa' anorruenerr all, e'ñe alla yot Parets pa'paclo't. Allempo anen all e'ñe ñap'çochayet allpa' aña epuet Pedro ñaña Jacobo ñaña Juan ñaña Andrés. Ñetña pa' atet oteñet:

⁴ —Te'pa' yemneñ o'ch potey, çesempot'cha'ña atet perra? Ñaña allempopa' çeso't'cha'ña yentyerr ñeñtcha' yeñotaterre' po'ñoçhpa' o'ch çherrmoch allempoch e'ñe etsotuerra ñeñt atet poteney te'?

⁵ Jesúsña pa' atet otanet:

—E'ñech señoterra allochña pa' amach esesha' seshquërraye. ⁶ Tarro'mar shonte'ch orrterrtsa ñeñtcha' ay'cha'nataterre' neso'cheñ, ñeñtcha' otyerrets: “Napa' ñeñtencia'yeña Cristotets.” Ñetña pa' shonte'ch shequëret acheñenesha'.

⁷ Ñaña allempoña sapa' se'mare'tyerrcha' o' quellareñtsotyerr allampaño'mar, ñaña se'mare'tyerrcha' o' quellareñtsotyerra ora erraparen anetso'mar. Saña allempopa' amach cha seyorenatsto ama't e'ñe mamesha. Ñeñt pa' atetcha'ca'ye e'ñe po'ñoçh perra. Tarraña allempopa' amach çhena' allempoch e'ñe mellapoterra. ⁸ Pa'namen acheñ ñeñt e'ñe po'poñe'ttsocma mereñtsoret pa' ñet pa' quellaranna'terretcha'.

Ñaña pa'namen anetsof añcha'taretechnopa' quellaraterrancha' pueyochreneshačno. Pella'yerrach pats ora erraþaren. Orrterrach allemeñ muecheñets o'ch e'ñe chaporrñatsotyerr erraþaren. Orrterrach ñaña atpare'teñtsočno attochña atarrcha' ama'toçhtatanna'terret. Ñeñt atet o' notuas te'pa' ñeñña allempopa' ñeñtcha'ña ñanom muerochtaterahuetña allempo.

⁹ 'Sapa' seño'tach allempoch atet perrset. Sanmare'terrach añcha'taretsho allcha' otteñe'cherrset. Sashtare'terrach all judionesha' po'prahuo'mar. E'ñe same'ñeñoten na sapa' çapaterrsetcha' añcha'taretneshesho'mar ñaña allo'tsa'yen ñeñt nanac añcha'taretnesha'; sapa' allcha' sa'metosnanña neñoñ. ¹⁰ Ñaña allempoch ama mellapoterra'pa' añ cohuen ñoñets alloch sequeshperra ñeñtcha' ñanom serrpare'tatyeretña allohuen pa'namen acheñenesha' ora erraþaren allohuanen aña patsro. ¹¹ Ñaña allempoch sanmare'tetyesa allcha' otteñe'cherrset ama't mameshapa' amach cha sellca'psatsto, amach sotapsa'tatsto errotuachca'ye notoste' añcha'taretsho allempoch a'þto'tare'tapuen. Allempopa' añcha'ña se'ñoratosé' Parets Puecamquëñ. Attochña amach e'ñe sotaye' se'ñoroso, añcha'ña se'ñoratosé' Parets Puecamquëñ. ¹² Allempoch atet perrsetpa' ñeñt e'ñe semo'nasheñ sepen ñato' ñeñtacha'ye sepomuere' attoch muetsaterres tarro'mar ñapa' amaca'ye ame'ñenno. Amapa' ñato' pomporpa' o'ch pomuerran ñaña puechemer. Ama't ñaña puechemerpa' ñato' paþparño'pa' o'paterranach pamo'mte' attoch muetsatater. ¹³ Shonte'ch acheñenesha' ñeñtcha' se'moñe'terre' tarro'mar sapa' naca'ye e'ñe same'ñena. Ama'tcha' atarr muerochtaterretpa' tarraña esesha'ch e'ñe ahuanta'huanmue' e'ñe pueyemteño'ten na, ñeñtcha'ña a'queshþatare'ttertsa.

¹⁴ 'Ñehua, ahua't Daniel ñeñt a'mtaye't Yompor po'ñoñ, ña po'quellcopa' atet ote't: "Cherrcha' allempo ama't ñeñt ama masosyaye' enteno Yomporpa' ñeñtña'pa' çherrcha' all ama't ñeñt e'ñe Partsocpa anareteñ. Ñeñtpa' ñeñtacha'yeña e'ñe a'chencatuerrahuet." Ñehua, ñeñtcha' lleyerre' añ ñoñetspa' ñetña'pa' eñoteretepa'ch. Ñeñto'marña ñerra'm esempoch senter o' çherr all ñeñt ama pocteyaye allempoña ñeñt allpon Judeo'tsa'yen ñetña'pa' allorocmuepa'ch yettra'terret, ahuanerretepa'ña aspentarerone't. ¹⁵ Atet ñerra'mrate' puesheña'tets ñato' ñetña allempopa' eno'tsa'yenetcha' pa'paclato, ñetña'pa' sohuete'pa'chña tecma tarraña amachña be'tosatsetnomuetoña po'ponreto attoch yoratsre'tnomuet. ¹⁶ Ñaña puesheña'tets ñeñt pa'mro'tsenpa' allempoña ñetpa' amachña onatsterreto attoch erreta' pa'shtamuet. ¹⁷ Allempopa' atarrcha' llequëñets añecop ñeñt a'chomenare' coyanesha' ñaña ñeñt allohuen emaretetolleshačno. (Tarro'mar ñocpue'tpa' atarr torrapo' attoch yettra'tet ñamet.) ¹⁸ Ñaña Yomporcha'ña sema'yocha allochña'pa' amach cha huapoto allempoch seyeta. ¹⁹ Allempopa' orrterrach muerochteteñets ñeñtcha' atarr muerochtaterre' allohuen acheñenesha'. Ñeñt ama't ahuatapa' ama puemuerochtaretare't atet atarr nanac huomenc, ama't allempoteñ e'ñe er'te' yeçhcatyene' Yompor allohuen pa'namen ñeñt yentyen arr patsro. Allempoña ello'pa' amach atet alla muerochteterrete'te ama't errponaña. ²⁰ Allempoch atarr amuerochtatare'tterret. Tarraña allempoña Yomporpa' ñach oterrets "te'pa' allohuach." Ñerra'm amach

oto allohuachpa' allempoña ama't puesheñarrapa' amach esesha' queshperrtto. Tarraña ñeñña ame'ñenaya ña ñeñt acrenpa' ñocpuetña' otercha' "te'pa' allohuach."

²¹ 'Ñehua, allempoch orameñ muerochteñetspa' ñerra'm esesha' sote': "Secueña', arro'tsenca'yeña Cristo", amapa' o'ch otaset: "Secueña' tarro'tsenca'ye Cristo", sañapa' amach same'ñatstaneto. ²² Orreyerrachca'ye ñeñcha' otyerrets ñapa' ño'ña Cristotets. Tarraña ñeñtpa' attachca'ye shecare'tyerranña acheñenesha'. Orreyerrach ñaña ñeñcha' otyerrets ñapa' ño'ña a'mtene'ña Yompor po'ñoñ, tarraña ñeñtpa'cho'ña e'ñech attecma shecare'tyerran acheñenesha', amachña Yomporeye'ña po'ñoñ a'mteno. Ñeñcha' atet shecare'tyerrets, ñetñapa' orrtatyerretcha' ñeñt ama't ahuata acheñenesha'pa' ama puentare, attochña cohuanrrortateretña acheñenesha'. Ama't ñeñt Yompor pa'carnesharpa' mueneñetañcha' ñeñte'nachña shequërret. ²³ Señoche'pa'ch ama't ama' chena' muerochteñetsopopa' na allohuenpa' o' e'ñe notuas.

Atetcha' perra allempoch huerra Cristo ñeñt Acheñetsosets
(Mt. 24.29-35, 42-44; Lc. 21.25-36)

²⁴ 'O'chña huañerr ñeñt muerochteñetspa' allempoñapa' choch mayerrets ñaña atsne'. Arrorrrpa'cho'ña o'huañcha' atsnom. ²⁵ Rantochnopa'cho'ña shorcha'terrcha' entoñ. Ñaña ñeñt huomenc orra'yetsa ento te' allempoña ama't ñeñtpa' pella'yerrach. ²⁶ Allempoñapa' entapuerrnetcha' na Ñeñten Acheñetsosets o'ch nesuam'perra osot e'ñe nepartsoteño'huen e'ñe necohuenteñesha'. ²⁷ Nemñercha' nemillaño'feñnaneshar, ñetñapa' a'yapa'cha'hueretcha' allenmateñ ñeñt acren Nompor nocop e'ñech pa'tatsshent'o'marohuen allotecma orrnotena. E'ñech allenmateñpa' a'yapa'cha'hueretcha' e'ñe allohuanen añ patsrot.

²⁸ 'Ñaña te'pa' señoche'pa'ch ñeñt atet pena higoch. Ñehua, esempoch senteñ higoch o'ch emcachyen puetacretollesha' allotcha' o'ch alla tapna'tyerrerr pasopaner, sañapa' ñeññaña señoatate'ña o'chenmoch allempoch huorateterrerr. ²⁹ Attecmach perra ñerra'm esempoch sentyerr ñaña ñeñt allpono' notuas, sapa' ñeñtcha'ña señoataterre' po'ño'ch o'ca'ye cherrmoch allempoch e'ñe etsotuerria, o'ca'ye e'ñe alame'ttsamerra. ³⁰ Napa' po'ño'ch o'ch notas, acheñenesha' ñeñt e'ñe corretsa te' ñetña amach e'ñe rromhueneta'pa' allempocmach e'ñech etsoterra allohuen añe'chno. ³¹ Esemphuañen añ enet ñeñt senten te'pa' e'ñech chenca'huerra; patspa'cho'ña attecmach perra e'ñech chenca'huerra. Tarraña ñaña neñoñpa' amach chenquerro ama't e'ñe ahuata.

³² 'Tarraña ñeñt yetroch nohuerrapa' ñeñtñapa' ama eseshaye' eñotenaye. Ama't erro'tsente' atsne' ama't erro'tsen tsapro ñeñtpa' ama't mellaño'feñnesha' ñeñt pue'ntaño'tsa'yen ñetpa'cho'ña ama't puesheñarrofetapa' amaña eseshaye'ña eñotenaye allempoch nohuerrerr po'pocheño. Ama't na ñeñten Yompor Puechemereren napa'cho'ña te'pa' ama neñoteñe, ñapñaña Nompor Parets eñotene'.

³³ 'Sapa' seño'tach ñaña chocmach seño'sertenna ñaña chocmach sema'yochena tarro'mar sapa' amaña seño'teñe esempoch cherr ñeñteñpo allempoch nohuerra. ³⁴ Ñeñtpa' e'ñe atet ñerra'mrrate'

puesheñarr yacma ñerra'm esempo ta bačhayopa' o'ch na'nman pa'taruasañrečno pa'paclo ñeñtcha' apa'yesnom taruas e'ñe puesheña'ttsochmuet. Ñaña po'poñ pa'taruasañer ñeñtcha' cohuets yetarroť ñapa' atetcha' otnom pamo'mte': "Papa' čhocmach peñose'retna." ³⁵ Ñeñto'marña te'pa' o'ch notas: Chocmuepa'ch seño'sertenna na ñeñten Samo'mte' sepen ñeñten sena'nmue' na nepaclo tarro'mar sapa'čo'ña ama seño'tenno esempo'ch nohuerra. Ñato' ellerronetcha' nohuena, ñato' rročh tsapo, ñato' puetaenmoch allempo eñen atollop, amapa' ñato' aromtañach nohuena. ³⁶ O'ch alla noterserr: Chocmuepa'ch seño'sertenna, ñerra'm machayota nohuerrapa' ñato'rraña alla nentuerres sapa' čha atarr semanrren. ³⁷ Ñeñt atet notenes sa ñeñtpa' allohuenacpasca'ye, ñeñto'marña o'ch alla noterserr: Chocmuepa'ch seño'sertenna allohuenes.

14

Atto atarr o'pateñet Jesús o'ch muetsatateret
(Mt. 26.1-5; Lc. 22.1-2; Jn. 11.45-53)

¹ Epomtameñ palltena o'ch alla čherrerr pascuapo allempoch rrerranerr judionesha' pan ñeñt ama anareteyaye chase'. Ñeñtña pa'mtcha'tareternesha' pen allohuen judionesha' po'cornaneshar epuet ñaña ñeñt etsotayenayeñ ñoñets ñeñt atet anaret, ñetñapa' aña atarr e'nenet attoch shequēt Jesús e'ñe a'nahua esheccha' rremuetpa' o'ch muetsatachet. ² Ñetñapa' otanna'tyenet:

—Tarraña te' pascuapo allempo shontena acheñesha'pa' amachca'ye yerrmatsche allañaca'yeña čha ya'tsrre'močhtateñ acheñenesha'.

Atto puesheñarr coyanesha'pa' shosan eñmosať Jesús poño
(Mt. 26.6-13; Jn. 12.1-8)

³ Pamtarrña Jesús'pa' Betanio'tsen all Simón pa'paclo, ñeñtña Simónpa' ñeñt ose't puetsarñats. Jesúsñapa' all anen all rrallme'chen. Allñapa' huapoña puesheñarr coyanesha', huapatan eñmosať ñeñtpa' e'ñe ñeñtoche' ñeñt otenet nardo puese' ñeñt ama matsa'to. Huapatampes puetellmo ñeñtña puetellm'pa' añ socheñet alabastro. Allempoña ñeñt coyanesharpa' potam'psosan eñmosať; ñeñtña eñmosaťpa' alla she' Jesús poño all rrallme'chen. ⁴ Puesheña'tetsñapa' ñeñtña čha atrre'matanet, atet otanna'tyeset:

—Eso'mare'tña atta a'pertatosañña eñmosať. ⁵ Ñeñt eñmosaťerpa' amaca'ye matsa'to. Chochñacho' pomoseñpa' ganañcha' shonte' quelle čhachca'ye metananeñña ñeñt trescientos denario. Allempoñapa' apa'yesaneñcha' ñaña allohuen huocchañnesha'čno.

Ñeñtpa' atet sasare'chet coyanesha'.

⁶ Allempoña Jesús'pa' atet otanet:

—Semnachñaca'yeña coyanesha' ñeñt atet penen. Eso'mare'tcha' čha muene' satsrre'močhtana'tapa. Ñapa' atarrca'ye cohuen posesen. ⁷ Tarraña ama'tcha' čho pomosaneñ eñmosať alloch es apa'yesaneñ huocchañnesha'čno, tarraña čhocmachca'ye eñallña huocchañnesha'čno arr patsro. Ñerra'm esempo semneñ o'ch e'ñe cohuen sorrtatyesanet ñocpuet čhocmach atet sepanet. Tarraña nañapa' po'ñočpa' amachca'ye allo'na sentenno arr patsro. ⁸ Añ coyanesharpa' aña'ye apuenen ñeñt allpon

echyen. Ñeñt atto shosnan te' eñmosať nechtso, ñeñt'pa' añeĉpa'naca'ye sherben tarremphua allempoch a'yana'terrnaneterr ñeñt'cha' epuet pampa'pesnet. ⁹ Po'ñoĉca'ye notenes: Ora erracmañen añ patsro errach serrpare'tatyenet añ cohuen ñoñets allempopa' serrpare'ĉetcha' ñaña atet penen te' añ coyanesha', attoĉña ña'nach yerpuenet.

Atto Judaspa' pomuerran Jesús
(Mt. 26.14-16; Lc. 22.3-6)

¹⁰ Allempoña pueyochresha' ñeñt ĉarra' puechetsa epsheña, puešeñarrña ñeñt pa'so'cheñ Judas Iscariote, ñaña'pa' allenta ahuo' allo'tsa'yen ñeñt pa'mĉa'tareťernesha' p'a'yen allohuen judionesha' po'cornaneshar. Ñaña'pa' añeĉpa sen attoĉ pomatateran Jesús. ¹¹ Ñeñtña atarr coshatenahuet. Ñetña'pa' allempocma a'pocťachet ĉoĉca'ye tsa'ĉetña Judas allpon quelle. Allempoña ñapa' aña e'ñe coťape'ĉyen errotenotĉa' pomuerranña Jesús.

Atto Jesús'pa' rrallme'ĉatnenan pueyochresha' attoĉ ĉocmach yerpueret ñeñt yoten te' Santa Cena

(Mt. 26.17-29; Lc. 22.7-23; Jn. 13.21-30; 1Co. 11.23-26)

¹² Allempoña ĉapa'muen ñeñt yeťñatsro allempoch rrerretterr pan ñeñt ama anareťeyaye chase' allempoch muetserretterr ñaña carrnero; ñeñt'pa' pascuapo. ĉapa'muen ñeñt yeterpa' pueyochresha'ñapa' atet ota'mueñet Jesús:

—Te'pa' ĉerra't pemneñ allĉa' yeta'muena allĉa' ya'potonať ñeñt'ĉa' perra' pascuapo?

¹³ Allempoña ñeñt epsheña pueyochresha' ñeñt'ĉa' mueña, Jesúsñapa' atet otapanet:

—Te'pa' o'ĉ ahua'muenes anetso allĉa' sepoĉte' puešeñarr yacma ñeñt anmanĉpene' oñ porrtto. Ñeñtña aĉeñerpa' o'ĉ soĉta'ner. ¹⁴ Allĉa' be'tosuerr allĉa'ña sebe'tosos saña. Allña'pa' atetĉa' sotos ñeñt apaĉlletesha': "Yemaestrorpa' atet oteney atetĉa' yotoseť: 'ĉErro'tsena'tña pecuarto allĉa' nerrallme'ĉos pascuapo epan neyochresha'?" " ¹⁵ Ñeñt apaĉlletesha'pa' gatapasĉa' eno po'cuarto ñeñt atarr a'yohuen e'ñe cohuen aĉaret. Allĉa'ña sañño'tosña ñeñt'ĉa' yerra' pascuapo.

¹⁶ Allempo atet otuanet Jesús'pa' pueyochresha'ñapa' atetĉo' pet, ĉa ahuanmatset. O'ña ĉaĉĉa'tet anetso, e'ñe atet otapanetpa' ñetña'pa' e'ñeĉho' atet entoset. Allña añño'tosñañetña rreñets allĉa' rrallme'ĉet ñeñte pascuapo.

¹⁷ Allempoña o' puenaso'tenpa' o' ĉap ñaña Jesús all epuet pueyochresha' ñeñt ĉarrasheña pueĉena epsheña. ¹⁸ All anorrĉenet all rrallme'ĉoset, Jesúsñapa' atet otanet:

—Po'ñoĉca' notenes: Puešeñarroťes sa ñeñtesĉa'ca'ye nepomuerr'. E'ñe puešeñarr ñeñt e'ñe parro nerren ñeñt'ĉa'ca'yeña nepomuerr'.

¹⁹ Ñetña'pa' ĉa atarr lleca'rrtet. A'pťo'tyeset e'ñe puešeña'ttset:

—Ta'm amate' na nepomuerrmochape.

²⁰ Ñaña'pa' atet otarraneterr:

—E'ñe puešeñarroťes ñeñtes ĉarrasheñas sepĉena epsheña ñeñtña netsapeĉapretene' nerrar, ñeñt'ĉa'ca'ye nepomataterre'.

²¹ Po'ñoĉca'ye te'pa' allo'na sen etsotnomtsa ñeñt atet anuaret Yompör

po'ñoñ nocop na Ñeñten Acheñetosets; atto'tcha' muetsaterrnet. Tarraña nocoppa' e'ñe pocte'; añña po'ñoñ acheñer ñeñtcha' nepomuerre' ñocopñapa' atarr llequëñets. Añ acheñrecoppa' e'ñeca'ye pocteñ amachña'cho' eñalletatstañe.

²² All rrallme'chenet, Jesúsñapa' chetan pan parasyoso'tan Yompor. Parasyoso'tuepa' shota'tan panpa' apa'yesan pueyochresha'. Ñeñtpa' atet otanet:

—Sagapyes, añmapa' ñeñtcha'ña nechets sepen.

²³ Alloñapa' chetan ñaña orramets parasyoso'tuerrerrpa' apa'yerraneterr. Ñetña allohuenetpa' e'ñe orryesuahuet. ²⁴ Jesúsñapa' atet oterraneterr:

—Añpa' nerrasca'ye sepeñ ñeñtcha' ashatarettatsa shonte' acheñenesha'op. Añ nerraspa' alloch e'ñe etserra a'pocataerra acheñenesha' Apuesho. ²⁵ Na te'pa' o'ch notas: Amach alla norrerre'te añ narmetsos tayoteñ tarremphuach allempoch alla ello yorrerrerr parro allempoch añcha'taretetuerra Yompor.

Atto Jesúsapa' eñotatan Pedro ñapa' chocmach a'nasocha

(Mt. 26.30-35; Lc. 22.31-34; Jn. 13.36-38)

²⁶ Allempoña o' morrechuanmuet Yomporecoppa' ahuaneneterr Olivoño. ²⁷ Allñapa' atet otosanet Jesús:

—Añ tsaprocmach sa allohuenespa' sa'ypo'ña'huanmuencha' tarro'mar Yompor po'ñoñopa' atetca'ye anuaret, ñeñtpa' atet ote't Yompor nocop: “O'ch nemtsater ñeñt cohuañpene' carrnero, po'carrnerorñapa' chach matra'tyesa allemeñ.”

²⁸ Jesúsñapa' atet oterraneterr:

—Tarraña esempoch alla netanterra napa' nanomcha' oterrtsa Galileo.

²⁹ Allempoña Pedropa' atet och:

—Ama't allohuenet ñerra'm a'ypo'ña'huerrpetcha'pa' naña ama't ahua'tapa' amach na'ypo'ñerrepe.

³⁰ Jesúsñapa' atet otererr:

—Po'ñoñca'ye o'ch notañ, añe tsaprocmach ama't e'ñe epocha amach eñena' atollop pañapa' o'ch ma'poch pa'nasotenna.

³¹ Pedroñapa' alla otererr:

—Ama'tcha' yerromhuanen parropa' naña po'ñoñcha' ama't parrocha amach na'nasotaño.

Allohuen pueyochresha'pa' ñetpa'cho'ña e'ñe attecma otyenetañ ñamet.

Atto Jesúsapa' ma'yochuena all oteñet Getsemani

(Mt. 26.36-46; Lc. 22.39-46)

³² Alloñapa' chap Jesús pueyochreshohuen all narmetsño, ñeñtpa' añ pa'so'cheñ Getsemani. Allñapa' otosanet:

—Te' sapa' allach sanorrcha'tos arma, napa' o'ch nema'yochena'.

³³ Allñapa' añña anmos Pedro ñaña Jacobo ñaña Juan. Jesúsñapa' ama't mameshapa' ama eñmateno pueyochro, cha nanac allpatena.

³⁴ Allempoñapa' atet otosanet:

—Napa' cha chepochenen nellquëña neyo'chro, cha muene' nerromuen nellquëño't. Sapa' allasa'tach arr secuapretosno'tach.

³⁵⁻³⁶ Ñaña' ahuo' a'yenteye' all rremosa patso atet ma'yochosa:

—Apa, ꝑocoppa' ama eñalle ñeñt ama erroten apen penteno; ñeñto'mar te'pa' noteneꝑ amach pemnatatsche o'ch çhapona ñeñt atarr amueroçhtatañ* nenten na. Tarraña ñerra'm ꝑach muenatspa' añepa'chña atet peꝑaton ñeñt pemnen ꝑa, amachña añeyaye ñeñt nemnen na.

³⁷ O'ña atet ma'yochuapa' o' ahuerr allo'tsa'yen pueyochresha' ma'psheña. O' çherr allpa' alla entuerranet ñetñapa' çha atarr manrrenet. Allempoñapa' otuerran Pedro:

—Cha't Simóna atarr pemos. Ama't mamesha are'tña acuenaye' penteno. ³⁸ E'ñe seños'e'rteñoïpa' çhoña sema'yochosa allochñapa' attoch amach sañeña a'puerrataterro topateñets ñeñt'cha' sehuapoya atarr huomenc. Ñeñt'pa' ama't atarr semneñeñ tarraña sechetsñapa' amaca'ye ahuamencateye' penso, ñeñto'marña notenes çhocmach sema'yochena.

³⁹ Jesúsñapa' alla ahuerrerr puepocheño o'ch ma'yocherrerr, ñeñtara atet otuerrerr. ⁴⁰ O'ña alla ma'yochuerra'pa' allempoñapa' huerrerr, alla entuerranerr pueyochresha' ñetñapa' o' alla manrretererr, çha nanac atserr moñe'tenet. Ama eñoteñeto errotencha'ña otapuerete't. ⁴¹ Jesúsñapa' alla ahuerrerr ma'yochatsa. O'ña ma'yochuerra'pa' allempoñapa' alla huerrerr poma'pocheño'hua, atet otuerranerr pueyochresha':

—Ama't teme'ttsenpa' alla't semanrren; ama'tpa' alla sames. Te'pa' ñeñt'epa'ta, señoche'pa'ch o' çhap allempoch pomataterret na Ñeñten Acheñetosets attotcha' errotuanen perren ñeñt atarr ochña'fenesha'. ⁴² Te'ñapa' setanterra o'ch ahuey o'ch yepocte'. Secue'ca'ye ñeñt'cha' nepomue' ñeñt'pa' alla'tsena.

Allempo rromoset Jesús

(Mt. 26.47-56; Lc. 22.47-53; Jn. 18.2-11)

⁴³ All atet eñorena Jesús'pa' çha huapatsa puesheñarr ñeñt pueyochresha' peneñ ñeñt a'pchenahuet epsheña, ñeñtñapa' añ Judas. Ñaña'pa' huach'a'tatan shonte' acheñenesha' occhelletareret ñaña et-sachperetareret. Ñehua, añ ñeñt huach'a'ttsapa' añ mueñenahuet ñeñt pa'm'cha'tare'ternesha' pen allohuen judionesha' po'cornaneshar ñaña ñeñt etsotayenayeñ ñoñets ñeñt atet anaret ñaña ñeñt pompornesha' pen allohuen judionesha'. Ñetca'yeña mueñene'ña ñeñt'cha' rromuenaya' Jesús. ⁴⁴ Ñehua, Judas ñeñt'cha' pomuerre' Jesús'pa' ñaña'pa' atet otnoman acheñenesha' ñeñt anom attoch cheme'toset Jesús. Ñeñt'pa' atet otnomanet:

—Erra'tsencha' nehuom'cha'tos e'ñe netso'ttsapa'teñoïpa' ñeñt'ca'yeña Jesús. Sañapa' ñeñt'cha'ña serrmospa' o'ch sanem' e'ñe sehuamencocma.

⁴⁵ Allempoña huapapa' çha ponmosaya Jesús huom'cha'tos e'ñe puetso'ttsapa'teñesha', atet otos:

—Tsapo, Maestrocha'.

⁴⁶ Allempoña acheñenesha'pa' ponmosyet Jesús'pa' rromoset e'ñe po'huamencocma.

⁴⁷ Allempoña puesheñarr ñeñt Jesús pueyochresha' ñaña'pa' po'cchella cheta'pa' o'ch çhonto'tapanen' cornesha' pueñaña puetepa'tcha' tsorroñ.

* 14:35-36 Ñeñt amueroçhtatañ ñeñt'pa' po'ñoçh ñeñt'pa' añ atma'ntataret ñerra'mrrate' ñeñt atarr pesherr yorren orranñtsot.

Ñeñt'pa' año pueñaña ñeñt' pa'mcha'tareter pen allohuen judionesha' po'cornaneshar. ⁴⁸ Allempoña Jesús'pa' atet otan acheñenesha':

—Eso'mare't sehuacha'tennanaña e'ñe ochelletareroches ñaña et-sachperetareroches attoch serrma'n. Napa' ¿e'ñe't atet sentenen ñerra'mrrate' eñeñen? ⁴⁹ O' allponmatuanen allo'tsenen Parets pa'paclo e'ñe parro sesho, eso'mare'tña amaña allempocmaña serrma'ne'te. Ama'tpa' attepa'ca'ye perra allochñapa' attoch e'ñe etsuerra ñeñt' allpon quellca'yese't nocop ñeñt' a'mta'yese't Yompor po'ñoñ.

⁵⁰ Allempoña allohuen pueyochresha'pa' allorocma a'ypo'ña'huanmet, ñetñapa' yetrra'tuet.

Atto a'yetachet puesheñarr huepuesha' allempo muene' rromuetañ ñaña

⁵¹ Ñehua, allempopa' allo'tsen ñaña puesheñarr huepueshachor ñeñt' epuet ta Jesús. Ñaña'pa' cha muelle'mquèn atta e'pamco'tnoma. Ñapa'cho'ña ahuo'ch rremuetañpa' ⁵² aña a'meyampereta' allo e'pamco'tena, huepueshachorñapa' muelle'mcota a'yetachet.

Allempo chapata'mueñet Jesús all ap'cha'muena allohuen judionesha' pa'mcha'tareternesha' ñeñt' a'pocatyene' ñoñets

(Mt. 26.57-68; Lc. 22.54-55, 63-71; Jn. 18.12-14, 19-24)

⁵³ Acheñenesha'ña ñeñt' rromose' Jesús'pa' ñetñapa' arr anmet allo'tsen ñeñt' pa'mcha'tareter pen allohuen judionesha' po'cornaneshar. Allñapa' all ap'cha ñaña ama't allohuen cornaneshachno ñeñt' pa'mcha'tareternesha' pen judionesha' po'cornaneshar ñaña ñeñt' pompornesha' pen allohuen judionesha' ñaña allohuen ñeñt' atarr etsotayenayeñ ñoñets ñeñt' atet anaret judioneshacop. Ñetña allohuenet e'ñe all ap'chenet. ⁵⁴ Pedropa' ñapa'cho'ña cote' tarraña ñapa' chenta' en a'yo't. Cornesha' po'pampopa' allñapa' anorros epuet ñeñt' guardianesha' all a'torenet tso' all shotoset parro.

⁵⁵⁻⁵⁶ Cornaneshana'ña pa'mcha'tareternesha' ñaña allohuen ñeñt' chocma a'pocatyene' allohuen ñoñets ñeñt' judioneshacop, ñetñapa' aña atarr e'nenet ñeñt'cha' a'metare'tam'psose' Jesús allochñapa' attoch muetsatachet. Ama't shonte' huapatsañ ñeñt'cha' toma'tam'psosayeñpa' am'cha'taretnesha'ña ama't puesheñarro'tetapa' ama eseshaye' entayeña attoch muetsatateret tarro'mar allohuenet ñeñt' toma'tam'psosayeñpa' ama e'ñe attecma'ye' otosetoña Jesúsocop. ⁵⁷ Allempoña tom'cha'tos ñaña po'potantañ; ñetpa'cho'ña toma'tam'psoset Jesús; ñetñapa' atet otoset:

⁵⁸ —Ya ahuañapa' ye'me'tca'yeña Jesús atetca'ye ote't: “Napa' o'chca'ye na'materrñañ añ Parets pa'paquell ñeñt'pa' acheñaca'ye pueyethcatar; tarraña poma'pamtañoñapa' napa' o'chca'ye alla natomater po'poñ ñeñt'pa' amachca'ye añeyaye ñeñt' ye'chcaten acheñ.”

⁵⁹ Tarraña ama't atet toma'tam'pesyesosetañpa' ama e'ñe attecma'ye' otoseto.

⁶⁰ Allempoña cornesha' ñeñt' nanac am'cha'taret allen'ta tom'pa' atet otan Jesús:

—Pañapa' ¿ama'tcha'ña panapaneto? ¿Erro'tenote'tña otteñe'chenpet?

⁶¹ Jesúsñapa' ama eñoreno, ama anapuenaneto. Allempoña cornesha'pa' alla otererr:

—Te'pa' o'ch notañ, nemneñ o'ch pōten p̄apa' ¿p̄a'tña ñeñtepte' Cristotsets? ¿Ñeñtepte' Parets Puechemerep̄, ñeñt Parets čocma ya'ye'chočhtateññañ?

⁶² Jesúsñapa' atet och:

—Napa' ñeñtenca'ye. Elloña napa' o'chca'ye notas, senterrencha' na Ñeñten Acheñetosets o'chca'ye alla nanorruerr Parets po'cohuenroť. Ñaña po'pocheño o'ch sentapuerren o'ch nesuanperra osoť Yompor pue'ntañot.

⁶³ Cornesha'ñapa' ñeñta e'mpa' allenta rrrare'tan pa'shtam e'ñe patrrre'mueñoť, ñeñtpa' atet ot:

—Te'pa' amachca'ye ye'natsche po'psheñeñ ñeñtcha' a'metam̄p̄pose'.

⁶⁴ Te' ama't sapa' o'ca'ye se'm̄ atet achm̄are'tenan Yompor. ¿Erroťena't senteñña sa?

Ñetña allohuenetpa' atet otyeset:

—Ña po'ñočhpa' atarrca'ye nanac achm̄are'tenan Yompor, pocte'ñächo'te'pa' o'ch semtsatach.

⁶⁵ Allempoñapa' a'coshare'tyeset, huancacle'chet pa'clloyotpa' čhota'tyeset. Pachm̄are'teñoťet atet otyeñet:

—Te'ña eñoratenperrepa' Parets allochñapa' attoch pōtey esesha'te'ña pečhota'tyene'.

Ama't guardianesha' ñetpa'čho'ña o' čhota'chet.

Atto Pedropa' a'nasotana Jesús

(Mt. 26.69-75; Lc. 22.56-62; Jn. 18.15-18, 25-29)

⁶⁶ Pedroña allempopa' patsoť'tsen pampaťollo. Allempoña allpa' huapa puesheñarr coyanesha' ñeñt sherbene' cornesha'. ⁶⁷ Ñañaapa' entosan Pedro all shotenana tso'. Cohuana'tospa' atet och:

—Paca'ye e'ñe cotaye'tña Jesús ñeñt nazareto'marnesha'.

⁶⁸ Pedroña anapue'pa' čha a'nasochapa' atet och:

—Napa' amaca'ye nentareña, ama't napa' amaca'ye neñoteñeña ñeñt atet pōtenen.

Allempoña Pedropa' ahuerr, čherr allotecma be'tenet o'ch čhapuet o'pono pampo. Allempoña allenta eñen atollop. ⁶⁹ Allñapa' entuererr coyanesha' ñeñt cornesha' pueñañra. Ñañaapa' atet oterranerr ñeñt parro allo'tsa'yenet:

—Añ acheñerpa' ñeñtca'ye e'ñe parro yemtenet ahuaña.

⁷⁰ Pedroñapa' alla a'nasotererr. O'ña o'chterrerra' ñeñt tomčha'tyets all, ñetpa'čho'ña atet otereterr:

—Po'ñočhca'ye p̄apa'čho'ña e'ñeca'ye parro seyemtena tarro'mar p̄apa'čho'ña galileo'marnesha'p̄ca'ye ñeñto'mar e'ñe atet peñen ñerra'm ña.

⁷¹ Allempoña Pedropa' e'ñe puehquẽñoťanetpa' atta otatse'tyerraneterr, ñeñtpa' atet otanet:

—Napa' e'ñe Yompor pa'so'chño notenes, ñerra'm amate' po'ñočhoye' notensopa' te'pa' nerromuepa'. Napa' po'ñočhca'ye ama nentareña añ yacmar.

⁷² O'ña atet otuanetpa' e'ñepa'tcha' allempocma puepocheño eñeñña atollop. Allempoña Pedropa' alla yerpuerrana ñeñt atet oteñ Jesús: "Ama't e'ñe epocha amach eñena' atollop p̄añaapa' o'ch ma'poch p̄a'nasotenna." Allempoña Pedropa' allenta atarr yahuena huomenc.

15

Allempo chapata'mueñet Jesús allo'tsen amcha'taret Pilato
(Mt. 27.1-2, 11-14; Lc. 23.1-5; Jn. 18.28-38)

¹ Tsapat o' taya puetarenpa' ñeñña pa'mcha'tareternesha' pen allohuen judionesha' po'cornaneshar ñetñaapa' apcha'mueneterr parro epuet ñeñt pompornesha' pen allohuen judionesha' ñama añ ñeñt atarr etsotayenayeñ ñoñets ñeñt atet anaret epuet ñama po'potantañ ñeñt po'taruas pene' o'ch a'pocatan ñoñets judioneshacop. Ñetñaapa' cotape'chatannetset, attoña o' e'ñe a'pocata'mueñet atetcha' pa'mueñet Jesús. Jesúsñaapa' o' huancota'tuet allempoñapa' anma'mueñet allo'tsen amcha'taret Pilato (ñeñt nen gobierno' Romot ñeñt amcha'tarettetsa allo'marneshacop). ² Pilatoña a'pto'tapan Jesúsapa' atet och:

—Papa' ¿pa'tña amcha'tarettetsaña judioneshacop?

Jesúsñaapa' atet och:

—Napa' ñeñtenca'ye atet poten.

³ Ñeñt pa'mcha'tareternesha' pen allohuen judionesha' po'cornaneshar, ñetña allpa' shonte' pa'namenot otteñe'cha'mueñet Jesús. ⁴ Pilatoñaapa' atet otererr:

—Papa' ¿are'tcha'ña panapaneto? ¿Ama't pe'muenanetoña ñetpa' pa'namenot a'metare'tampenpet?

⁵ Jesúsñaapa' ama't e'ñe parrocha ama anapuenaneto. Ñeñto'marña Pilatopa' cha atarr cohua'tapan Jesús.

Atto amcha'taret Pilatopa' otanet, ama'tpa' chosa muetse'ña Jesús
(Mt. 27.15-31; Lc. 23.13-25; Jn. 18.38–19.16)

⁶ Ñehua, ñetpa' atetca'ye yechenet. E'ñe pate'tets char allempoch cherrerr pascuapo, ñeñña amcha'taret ñeñt nen gobierno' Romotpa' ñañaapa' chocmach a'rroyerran puesheñarr judioneshacop ñeñt ayottam̄psarettetsa allempo, ñeññara ñeñt pamo'ts penet ñet. O'ch apanet erra'tsencho' enamuenet ñeñt muenenet ñet. Ñeñtpa' añecop a'rroyenanetña puesheñarr pamo'tset attoch e'ñe cohuen coshatenan allohuen judionesha'. ⁷ Ñama e'ñe allempopa' allo'tsen puesheñarr judionesha' ñeñt ayottam̄psarettetsa ñeñtpa' añ pa'so'cheñ Barrabás. Ñehua, ñeñt Barrabás ahuañmo'choteñ yottam̄peñet epuet po'potantañ tarro'mar ñetpa' ñetca'ye yechatenetña acheñenesha' atpare'chetepa'to' amcha'taret ñeñt nen gobierno' Romot. E'ñe patpare'teñofoet o' muetset ñama acheñ. ⁸ Allempoña acheñenesha'pa' cha'cha'tet Pilateshopa' ñetñaapa' atet otoset:

—Te'pa' o'ch pa'rroyerrnay puesheñarr ñeñt atet chocma pepernaye't.

⁹ Pilatoñaapa' atet otapanet:

—Sapa' ¿añe'tña semnen o'ch na'rroyerrnas ñeñt amcha'tarettetsa judioneshacop?

¹⁰ Ñehua, Pilatopa' atet otapan acheñenesha' tarro'mar ñapa' eñnoten cornaneshachno pa'mcha'tareternesha'pa' ñetpa' e'ñeca'ye pue'moñe'tateñme'chatsa pomueñetña Jesús. ¹¹ Tarraña ñeñt pa'mcha'tareternesha' pen judionesha' po'cornaneshar ñetñaapa' añ atarr cotape'chatenet acheñenesha' attoch ñetpa' allohuenetpa' o'ch

ochet Pilato: “Añcha’ p̄a’rroyernay Barrabás.” ¹² Allempoña Pilatopa’ alla oterraneterr:

—Ñehua, añ ñeñt̄ soten judionesha’ pa’m̄cha’tareter, ñapa’ ¿errof̄e’tcha’ña nepe’?

¹³ Ñetña puerranare’t̄eñoŋetpa’ at̄et otyeset:

—Ñapa’ ¡pecorso’tam̄psachñaca’ye!

¹⁴ Pilatoñapa’ at̄et oterraneterr:

—Ñapa’ ¿eso’tña pen ñeñt̄ ama’t mameshapa’ ama pocteye’ sentapreteñe’?

Ñetñapa’ alla rrannarterreterr huomencpa’ at̄et oterreterr:

—Ñapa’ ¡chopañaca’yeña corso’tam̄psate’!

¹⁵ Pilatoñapa’ añ atarr muenen o’ch coshatan acheñenesha’ ñeñt̄o’maña a’rroyerranet Barrabás ñeñt̄ enamueñet. Allempoña ashtatan ñaña Jesús allostñapa’ otan po’solltarneshar:

—Te’pa’ o’ch secorso’tam̄peña’.

¹⁶ Ñehua, solltarnesha’ña ama aneñeta’ allcha’ corso’tam̄psoset arrña ñanom anmetña Jesús am̄cha’taretepahuo. Allña agotachet allohuen po’potantañ solltarnesha’ ñeñt̄ allo’tsa’yen o’ch e’ñe ap̄chet Jesúsesho. ¹⁷ Allñapa’ pa’llocchame’t̄eñoŋet Jesús chorrachet shetamuets tsamamueno’ quelluemamtena ñeñt̄ pa’shtam pen ñeñt̄ po’ñoçh am̄cha’tarettetsa. Pellta’toñet ñaña choyo’mets agreçhpa’ ñeñt̄ña choyo’m̄tachet ñeñt̄ at̄et choyo’m̄tena ñeñt̄ po’ñoçh am̄cha’tarettetsa. ¹⁸ Pachm̄are’t̄eñoŋetpa’ at̄et oteñet:

—¡Puetare’ am̄cha’taretecha’ atarruaca’ cohuenep̄te’! p̄a ñeñt̄ep̄ judionesha’ pa’m̄cha’taretereḡ.

¹⁹ Pueche’tatseteñoŋet asto’tame’t̄eñet tsach̄po poño, a’coshare’t̄eñet, allempoña concorpana’t̄eñet, ottenetañ ñerra’m̄rrate’ çho’ muechatse’t̄eñet. ²⁰ O’ña achm̄are’tuahuetpa’ allempoñapa’ rrotam̄peret shetamuets tsamamuen chorrateret e’ñe ña pa’shtam. Allempoñapa’ anmet a’yo allcha’ corso’tam̄peña’.

Atto corso’tam̄psoset Jesús

(Mt. 27.32-44; Lc. 23.26-43; Jn. 19.17-27)

²¹ E’ñe ahuanmatsetpa’ allña oñenetpa’ o’ poctet puesheñarr yacma ñeñt̄ cireneo’marnesha’ ñeñt̄pa’ añ pa’so’cheñ Simón ñeñt̄ errte’ huertrsa a’yoḡ. Ñañaapa’ allenta chechatnomet po’corsoch. Ñeñt̄ña Simónpa’ ñeñt̄pa’ añ pompor pen Alejandro ñaña Rufo.

²² Chapachet all socheñet Gólgota ñeñt̄ yoten yeñoño Poñetalleḡno. ²³ O’ çhapachet allpa’ Jesúsapa’ aposetañ vinos ñeñt̄pa’ añ atsetaret pueretso ñeñt̄ atarr pesherr ñeñt̄ otenet mirra tarraña Jesúsapa’ ama mueno o’ch orr. ²⁴ Allempoña o’ corso’tam̄pesuetpa’ solltarnesha’ñapa’ allenta yellsheñe’chatoñet pa’shtam po’suert̄oḡ attoch orrtet e’ñe puesheña’tsetpa’ o’ch yorayesñañet pa’shtam poema’tets.

²⁵ O’ña enome’ta’ muen atsne’ allempoca’ye corso’tam̄psa’mueñetña Jesús. ²⁶ Ñehua, poñoḡpa’ all corsocho all noñet tsachtall aquellcareḡ attochña eñoteñet ñeñt̄ecop corso’tam̄peñet. Ñeñt̄ña quelllecpa’ at̄et oten: “Añpa’ ñeñt̄ca’yeña judionesha’ pa’m̄cha’tareter.” ²⁷ Allña corso’tam̄ps̄et epuet ñaña epsheña eñeḡ, puesheñarrpa’ nosñañet po’cohuenrot, po’psheñeññapa’ nosñañet pue’chcoterot. ²⁸ Attoca’yeña

etsoterraña Yompor po'ñoñ ñeñt atet anuaret ahuatoteñ Cristocop; ñeñtpa' atetca'ye oten: “Ñapa'cho'ña e'ñech attecma enteret ñerra'mrrate' ñeñt atet patse'tyene' ñeñt ama pocteyaye.”

²⁹ Ñeñtña oñmachets allpa' ñetpa'cho'ña chocma achmāre'tneñet. Pachmārnōtetpa' coño'coñtana'tyesneñet, ñeñtpa' atet otyesneñet:

—Pa ñeñteḡ pōmmo'cheñōtpa' pōtatse'te't pō'ch a'materrayeyñ Parets pa'paquell, poma'pamtañocmo'ch alla pōtomatereñ, ³⁰ te'ñapa' pā'qushpaterrañaca'ye e'ñe pāñeña, pesuerrañaca'yeña tayecma corsochoḡ.

³¹ E'ñe attecma achmāre'teñ ñaña ñeñt pa'mcha'tareternesha' pen judionesha' po'cornaneshar ñaña ñeñt etsotayenayeyñ ñoñets ñeñt atet anaret. Ñetñapa' e'ñe parrocmā pachmāre'teñōtpa' atet otatse'tyeñet:

—Te'ña pāpa' o' pā'qushpātyes po'potantañ, pāñapa' eso'mare'tcha'ña te'pa' ama errotentō pā'qushpāterroña e'ñe pāñeña.

³² E'ñe pachmāre'teñōtetpa' atet otyereter:

—Papa' ñeñteḡca'ye Cristototsañ, ñeñteḡca'ye israelnesha' pa'mcha'tareterpeñ, pesuerrañaca'ye corsochoḡ allochñapa' attoch yame'ñapa yaña.

E'ñe attecma pe' ñaña eñet ñeñt epuet corso'tamḡpeñet, ñetpa'cho'ña atarr es otnare'chet allot po'corsochoḡ.

Atto rroma Jesús all po'corsocho

(Mt. 27.45-56; Lc. 23.44-49; Jn. 19.28-30; Heb. 9.11-14)

³³ O'ña chap poctopa' o'huañ atsnom o' e'ñe checmetua ora errañaren añe patsro, o'ña ellerrotenmochapa' o' alla puetarerr. ³⁴ Allempoña ellerrotnenmochapa' Jesúsñapa' rrana huomenc, ñeñtpa' atet ot e'ñe ña po'ñoño:

—Eloi, Eloi, lama sabactani. Ñeñtña ñoñtsorpa' atet oten: Eso'maruachñaca'ye Neyompor-recha' pā'ypo'ñerren.

³⁵ Puesheña'tetsña ñeñt tomchets all ñeñt e'mue' atet oten Jesús, ñetñapa' amaca'ye e'mueññañeto po'ñoñ ñeñt atet oten, ñeñto'marña ñetpa' cha otyeset:

—Se'mueñe't o' cha chore'tante' Elías ñeñt a'ñtaye't ahuat Parets po'ñoñ.

³⁶ Allempoñapa' mata puesheñarr ñeñt allo'tsen, e'chomosan chella'so ñeñt atsotso'tpo' o' ne' tsachpōpa' alloñña tsotso'tatosañña Jesús. Ñañapa' atet otanet:

—Te'pa' o'ch yecue' Elías ñato'rraña o'ch huapapa' ñach a'suatose'.

³⁷ Allempoña Jesúspa' o' alla rranerrerr huomencpa' rroma.

³⁸ Allempoña besom allo yottamḡpeññañet Parets pa'paquell o'ponopa' ahuepa't rrrarra'nom e'ñe poctacma, ellopa'tetsta enoteñ e'ñe sotatsohua.

³⁹ Capitánña ñeñt romo'marnesha'pa' ñeñt tets allame'tets ñañapa' e'ñe entenan Jesús atto rroma, allempoña ñapa' atet ot:

—Po'ñochuaca'ye añ achenḡpa' Partsepa'tca'ye Puechemer.

⁴⁰⁻⁴¹ Allo'tsa'yen ñaña shonte' coyanesha'chno, ñetñapa' a'yota cohuanrrortenet. Ñetpa' ñetca'yeña cota'huanmue'ña Jesús Galileoteñ ñeñt sherba'yese't. Ñeñtpa' María Magdalena ñaña po'psheñeñ María ñeñt Jacobo pachor ñaña José. Ñehua, ñeñt Jacobopa' puechoyomer peñ José. Allo'tsa'yen ñaña shonte' po'potantañ coyanesha'chno ñeñt cota'yese't Jesús Jerusaléño.

*Atto pampuet Jesús**(Mt. 27.57-61; Lc. 23.50-56; Jn. 19.38-42)*

⁴² Atteñapa' o' ellerren. Ñehua, ñeñt yetñatsropa' allempoca'ye čhocma añño'tena judionesha' ñeñt tsapačecop allempoch ameserretter.
⁴³ Ñeñto'marña allempopa' Joséña ñeñt arimateo'marnesha'pa' ñaña'pa' ama puenča'ñočeye' ahuoso Pilatesho o'ch oteña' poctech eñch ñach a'suatose' Jesús ñeñt rromuets corsocho. Ñehua, ñeñt Josépa' atarr cohuen acheñ, atarr añcha'na'tpo' enteñ allohuen ñeñt parro a'pocatenet ñeñt llequëna allohuen judionesha'. Ñapa'čo'ña ñeñt atarr cohuen'e Yompor esempohuañencha' o'ch atarr ayochreshatterra.
⁴⁴ Allempo atet enamosan Pilato, Pilatoñapa' atet ot:

—Ta'm ¿po'ñočhte' o' rromaña e'ñe mamecma?

Allempoñapa' agotan solltar po'cañanerpa' a'p'to'ch:

—¿Po'ñoča't o' rromaña Jesús?

⁴⁵ Capitánñapa' atet otos:

—Po'ñočha'ye o'ca'ye rroma.

Pilatoñapa' atet otan José:

—Ñeñtepñapa' pa'suater corsocho'tpa' pañerca'ye.

⁴⁶ Joséñapa' allenta rañtosana emarr shetamuets, čherr corsochopa' a'suaterranña Jesús corsocho't all rromuen. Epatse'ch shetamtso ñeñt e'ñe cohuen. Allempoñapa' aneñ allcha' pampueña'. All eñatenan mapuetpon allca'yeña nenana'ña Jesús. Allempoñapa' attome'tuerrñañ mapue' allo yottam'pesner ñeñt puepampuer pa'ch. ⁴⁷ All cohueñ María Magdalena ñaña po'psheñeñ María, José pachor. Ñetñapa' e'ñe enteñet all na'neret Jesús.

16*Atto tanterra Jesús**(Mt. 28.1-10; Lc. 24.1-12; Jn. 20.1-10)*

¹ O'ña huañ yet allempo amesenet, María Magdalena ñaña Salomé ñaña po'psheñeñ María ñeñt Jacobo pachor, ñetñapa' rañña'yesnenet eñmosa't ñeñcha' anma'muenet tsapa't Jesús puepampro alloch a'yana'tereta' ama't rromo'ta. ² Tsapa't allempo motta'muena yetñats temenc ñetñapa' e'ñe ahuatecma ahuanma'muenet Jesús puepampro. O' taya huapa'muena atsne'pa' allempo ahuanma'muenet. ³ Ñetñapa' otanna'tyesnomuet:

—Ta', esesha'ch a'rrote'te'ña mapue' añecmuen ñeñt allo yottam'peñet attoch yebe'tos all puepampro esheccha' ya'yana'tera' eñmosa'to.

⁴ Ñetña'čapatseta all, cohuostseta entoset mapue' o' a'rrote'tarettena a'yenet, ama't ñeñt mapue'pa' añecmuen. ⁵ Ñetña' allempo be'tososet puepampro allñapa' all entoset puešheñarr huepuesha' all anen po'cohuenrot. Pa'shtamñapa' atarr huallama't, čha torats pañet pueyočhret. ⁶ Ñeñña' mellañočeñerpa' atet otapanet:

—Amach čha seyorenatsto. Napa' neñotenes añca'ye semnen o'ch sentamueñ Jesús ñeñt otenet nazareto'marnesha' ñeñt o' corso'tamperret. Tarraña ña te' o'ca'ye tanterra, ama arro'tsenaro. Secueña'ca'ye all neretañ, amaca'ye eñalle.

⁷ Allempoña mellañočeñña'pa' alla otterraneterr:

—Te'pa' o'ch ahuerres o'ch sotuer Pedro ñaña po'potantañ pueyochresha', Jesús oten o'ch ota o'ch ahuer Galileo. Choscha'ña ahuanmatsa saña allochña'pa' allcha' senter ñeñt atet otase't ahuaña.

⁸ Allempoña coyaneshačno atet otarettet all Jesús puepampro, ñetña čha'nmačherretpa' matenacma ahuanerret po'yorñofetpa' čha yonshema'tyesnerret. Poñchañofet ama't e'ñe eseshapa' ama errotenaye' otenaye' entnerreto.

Allempo tanterra Jesús'pa' añ ñanom orrterra María Magdalena
(Jn. 20.11-18)

⁹ Nehua, ahuačecma tanterra Jesús añe yetro allempo mo'tta'muenerr yetñats temenc. Allempo tanterrapa' añ ñanom orrterra María Magdalena. Ñeñña Mariapa' cančherrsheña oneñeñ ñeñt chorraye't Jesúsña'pa' e'ñe quečpatam'psatuer. ¹⁰ Mariña'pa' allenta ahuo' o'ch otenana' ñeñt epuet yemte't Jesús all puellqueñofet atarr yahuanrrortenet. ¹¹ Ñetña allempo e'mare'chet o' tanterra Jesús, Mariapa' o'ca'ye enter, ñetña'pa' arepa'tcha' ame'ñyeto.

Allempo Jesús'pa' orrterrana ñaña epsheña pueyochresha'
(Lc. 24.13-35)

¹² Po'pocheño Jesús'pa' e'ñe po'poño' orrterrana epsheña pueyochresha' allempo chopeñe'chnechet allampaño'mar. ¹³ Ñetña'pa' allenta puerretet o'ch otueret po'potantañ, arepa'tcha'ña ame'ñare'tapuerreto ñeñt atet enteret ñamet Jesús.

Atto Jesús'pa' otnerran pueyochreshačno ñetpa' atet'cha' pa'yerret
(Mt. 28.16-20; Lc. 24.36-49; Jn. 20.19-23)

¹⁴ Po'pocheño Jesús'pa' alla orrterrannerr pueyochresha' čharrasheña ñeñt puechetsa paterr all rrallme'chenet. Ñaña'pa' atet cotape'chatuanetpa' atet otuananet:

—Sapa' eso'mare'tña ama same'ñeñoña po'potantañ ñeñt sotene' napa' o'ca'ye netanterra tarro'mar ñetpa' čhoca'ye enterrnet. Tarraña sapa' amaca'ye es sechenoyo seyočhro.

¹⁵ Allempoña Jesús'pa' atet oterraneterr:

—Te'pa' o'ch auyeses ora erra'paren allohuanen añ patser, seserrpare'tach allohuen acheñenesha' añ cohuen ñoñets alloch a'queshpataretterret. ¹⁶ Allohuen ama't erra'tsena ñeñt'cha' ame'ñerraya añ cohuen ñoñets ñaña ñeñt pame'ñeño'etpa' apataretterret'cha' ñetña'pa' a'queshpataretterret'cha'. Tarraña ñeñt'cha' ama ame'ñerrtso, ñetña'pa' amñare'terrach coñcheñtso. ¹⁷ Ñeñt'cha' name'ñerraya ñocpuetpa' norrtaterranet'cha' nepartsoña. E'ñe na neso'chñoch quečpatysetcha' oneñe'ččno, ñaña eñosysetcha' po'poñe'ttso'cma ñoñtso. ¹⁸ Ñaña ñerra'm e'ñe pototet chetetcha' sheche'p, tarraña amach erro't paneto; ñaña ama'tcha' añ orret ñeñt amtsañtetsa tarraña amach erro't paneto. Ñaña ñerra'm esempoch a'plla'yeñet atnañe't, atnañe'tña'pa' acrrerroche'ch.

Allempo a'terr Jesús pue'ntaño
(Lc. 24.50-53)

¹⁹ O'ña atet otuanerranet Partsesha' Jesús'pa' allenta a'tapater Pompor pue'ntaño, allña'pa' anorrnen e'ñe Pompor po'cohuenrot, all partsotapretuera. ²⁰ Pueyochresha'ña'pa' ahuanomyeset,

serrpare'tyesnomuet erraḡaren. Partsesha' Jesús pa' čhocma torrapretenanet, orrtatenanet po'partsoña attoch acheñenesha' e'ñech eñnotenanet ñeñĩ atet serrpare'tyenet, ñeñĩpa' e'ñe po'ñoč Parets po'ñoñ. Ñeñĩpa' attetepa'ch Nompore. Allohua.

COHUEN ÑOÑETS ÑEÑT QUELLCA' SAN LUCAS

Ñehua, aña' ñeñica'yeña e'ñe pa'moter penña serrparñats

¹⁻⁴ Masheñe Teófilo, p̄apa' peñoteñ ahuañmo'chapa' pa'namen esocmañen ñeñt atet etsotayese't Jesús acheñenesesho ñeñt e'ñe ñanom ame'ñaya ña, ama't teme'ttsen yocpa'naña ñeñtey o' yame'ñera yaña. Ñaña allempoteñ Jesús'pa' orrtana pa'namen acheñenesha' ñeñt entyesaye't e'ñe allame'tets. Ñetñapa' e'ñe entuoñete't allohuen ñeñt atet p̄a'yese't. Ñetñapa' serrpare'tyesete't atet oten Yompor po'ñoñ. Attoña eñotatteryetña yaña. Ñeñt atet eñotatyenet ñetpa' shonte' acheñenesha' quellca'yese'tañ ñeñt atet p̄osa Cristo allempo huapa. Ñeño'marña napa'cho'ña e'ñe pocte' nenteñ o'ch nequellconap e'ñe ora allpon ñeñt atet orrtatos Jesús, tarro'mar napa' ahuañmo'chofeñ atarr noctape'cheñ o'ch e'ñe neñoche erro'tente'ña ñeñt e'ñe po'ñoche atet p̄a'yesosa Jesús. Ñeño'marña te' arrpa' o'ch e'ñe neñotatap̄ ora allpon ñeñt o' etsotua allochñapa' attoch e'ñe peñotuer p̄ama ñeñt allpon yethatenpetpa' ñeñtpa' e'ñe po'ñoche atet. Ñehua, arrpa' atet o' etsotua.

Ñehua, te'pa' o'ch neserrpare'tatap̄ atto mellaño'eñpa' eñotatanet o'ch eñalleta Juan ñeñtcha' apatañtatsa Yomporecop

⁵ Ahuat allempo añ añcha'tarettatse't Herodes all anetso Judeo, eñall ñaña pueheñarr ñeñt judionesha' po'corneshar. Ñeñtpa' añ pa'so'cheñ Zacarías ñeñt cho'ma yemtenana po'potantañ cornaneshachno ñeñt otenet Abíasona'tar ñeñt torratse't Yompor pa'paclo. Zacarías puetapor añ pa'so'cheñ Elisabet; ñapa'cho'ña corneshap̄nor ñeñt po'mreneñ pen Aarón ñeñt corneshatatse't ahua't. ⁶ Ñetña epsheño'maretpa' Yomporñapa' e'ñe pocte' entenanet ñeñt atet penet ñet, e'ñe cohuen etsotueññañet ora po'ñoñ ñeñt atet anaret ahuatoteñ acheñeneshacop ñeñtcha' atet p̄ohuenet. Ñeño'marña ama't pueheñarrapa' amach erro'teno't otaretteto, "ama pocteyaye ñeñt atet sepena." ⁷ Ñetpa' ama eñalleto ama't pueheñarra pacñe'ter tarro'mar Elisabetpa' ama achoyore'tañeyaye. Ama't ñaña puerrollar epsheño'maret o' atpa po'nme'tuenet.

⁸⁻⁹ Atteñapa' chap allempo torrena allohuen cornaneshachno ñeñt epuet parro yemtana Zacarías atto corneshatenet Yomporecop. Ñehua, allempopa' allohuen ñeñt corneshatatse't Yomporecop, ñetñapa' añ yethete't ahuo'ch yellsheñe'chenet allohuenet attoch eñochet po'suertot erra'tsencha' pueheñarrer ñeñtcha' be'tosets Yompor pa'paclo allcha' a'crratan ñeñtcha' eñmosañtatsa Yomporecop. Allempoña pamtarrpa' añ orrtatsa Zacarías ñeñtcha' be'tosets Yompor pa'paclo allcha' a'crratan ñeñtcha' eñmosañtatsa Yomporecop. ¹⁰ Ñehua, allempo chap allempoche be'tos pueheñarr Yompor pa'paclo shonte' acheñenesha' ñetñapa' allach tomcha'tet a'yot allcha' ma'yochrra'toset. Ama't allempo be'tosos Zacarías'pa' atterach ma'yochrra'tet a'yot. ¹¹ Ñehua, Zacarías allempo sherbenan Yompor o'pono, allñapa' machayotepa'tcha' orrtoña

Yompor po'mllañoñeñer. Arr tomos altar po'cohuenrot, ñeñt' altarpa' allecma a'crratenet ñeñt' eñmosatetsa Yomporecop, ñeñt'pa' atto sherbete't Yompor. ¹² Allempo orroña mellañoñeñ, Zacaríasña'pa' atarr yoren, atarr nanac mecha'ch. ¹³ Mellañoñeñña'pa' atet otosan Zacarías:

—Zacarías, amach peyorenatsto tarro'mar Yomporpa' e'muennañ ñeñt' atet penamueñ pema'yocheñoñ. Ñeñto'marña te' petapor Elisabetpa' eñalletaterrancha' paterr asheñorr ñeñt' e'ñe po' pechemer, ñeñt'ña'pa' pesochna' Juan. ¹⁴ Papa' atarrcha' p'ocshena nanac. Shonte'ch acheñenesha' ñeñt'cha' nanac p'ocshapretaya atto o' eñalleta pechemer. ¹⁵ Ñapa' atarrcha' asherben enteñ Yompor. Ñapa' amach orrañateyaye, ama't vinosapa' amach orreñe. Ama't ñaña pa'namen ñeñt' aposa'tpotetsapa' amach orreñe ama't mamesha. Ñapa' e'ñech añña chorraya Parets Puecamquëñ. Ama't allempoteñ pachor pa'to'tsen ñapa' e'ñech chorreña Parets Puecamquëñ.

¹⁶ Allempoña mellañoñeñña'pa' alla otererr:

—Ñapa' cohuencha' cotape'chaterran shonte' israelena'tarnesha' allochña'pa' attoch cotape'cherret e'ñe cohuen Yomporecop ñeñt'cha' Po'partseshar perret. ¹⁷ Ñeñt'ña Juanpa' ñeñt'cha'ña ñanom orrtatsa Yomporecop. Ñapa' añcha' ahuamencat pene' Yompor Puecamquëñ atet pe't ahuat Elías ñeñt' a'ñtaye't Yompor po'ñoñ. Allochña'pa' attoch e'ñe cohuen amo'tstaterrana achemerete'chno puechemereshá'. Allochña'pa' ama't ñeñt' atpare'tetsapa' o'ch ame'ñaterranet ñeñt' e'ñe pocte' es pets. Attochña' cotape'chaterranet cohuen, allochña'pa' attoch agapueret Part-sesha' ñerra'm esempoch orrta.

¹⁸ Zacaríasña'pa' ahuo' a'p'to'tan mellañoñeñ, ahuo' och:

—Ta', ¿erroñenochña neñoch e'ñeñe' po'ñoñ o'ch eñalleta cheshatoll? Tarro'mar napa' o' nepo'nme'ten; netaporpa'cho'ña e'ñe attecmay o' atarr yepo'nme'tuen.

¹⁹ Mellañoñeñña'pa' alla otererr:

—Napa' ñeñten Gabriele'tets ñeñten sherbene' Yompor. Napa' ñña nellensene' attoch ne'ñorana'tapa' o'ch ne'ñotatañ añ cohuen ñoñets. ²⁰ Tarraña papa' ama pame'ñenno ñeñt' atet noteneñ, ñeñto'marña te' papa' o'ch p'opanat, amach eshec pe'ñorerro tayoteñ tarremphuach allempoch eñalleta pechemer, allempochña pe'ñorerra. Tarro'mar po'ñoñ etsoterrach ñeñt' atet o' notuañ o'ch chap allempo onañchare't. Arrpa' allohua ñeñt' atet ot mellañoñeñ.

²¹ Atto' ellapes Zacarías o'ponopa' acheñenesha'ña'pa' cohueñet a'yo't ama'cha'nerro. Atto' cohueñetpa' otanna'tet:

—¿Eso'marte' amo' cha'nerroña Yompor pa'pacllot?

²² Allempoña cha'nerrpa' ama eshcaye' eñorana'tuerraneto. Ñetña'pa' otyenet pueyo'chreto, ñato'cho'te' es orrtoya Yomporecop ñeñto'marte'ña atarr ellapes o'pono Yompor pa'paclo. Ñaña'pa' ama eshcaye' eñorana'tuerraneto, potota eñotatuerranet ñeñt' atet ent Yompor pa'paclo.

²³ Allempoña o' chap allponmat ñeñt' atto sherbenet Yompor pa'paclo, Zacaríasña'pa' o' ahuer pa'paclo. ²⁴ E'ñe allponmatatsapa' o' a'chomenta puetapor. Allempoteñña Elisabetpa' ama mueno o'ch orrterra acheñeneshesho. Ama't o' amnarña arorrpa' ñaña'pa' ama orrteno. Ñaña'pa' atet oten:

25 —Te'ñapa' atarr cohuen muera'na Yepapar, allochñapa' o'huañcha' allo'na pencna'ntatnennet tarro'mar napa' otyennet mueçhopeno'.

Atto mellañoñepa' eñotatanet o'ch eñalleta Jesús

26 Allempoña o' pechapña arrorr açhomenta Elisabet, Yomporñaapa' o' alla mueñerranerr po'mllañoñer ñeñtara Gabriel. Arr mueñe anetso Nazareto ñeñtara Galilea. 27 Allempoña çhap Nazareto, allñaapa' ortosana puesheñarr shopshesha' ñeñt ama a'plaretayaye. Ñehua, ñeñt shopshesha'pa' añ o'patenaya yacma ñeñtpa' añ pa'so'cheñ José, ño'ch yore'. Ñeñña shopshesha' arroñ eñalletña David po'mrenñoñ; ñeñtpa' añ pa'so'cheñ María. 28 Mellañoñeña allempo çhap e'ñe ñeshopa' atet otos:

—O'ch noçha nehuomcha'tosep. Yompor e'ñe puemuereñoñepa' papa' atarrcha' coshaterrep, ñapa' e'ñe pesho'tsen. Yomporpa' atarr bensare'tamñepene. Ello penñtana'tueñ allohuen pacmanesha' atto bensare'tamñepanet ñet.

29 Allempo e'man atet och mellañoñeñ, ñañaapa' çha moñne'tacha, çha cotape'ch pueyoçhro:

—Ta', ¿este' otenenña ñeñt atet huomcha'tenen?

30 Mellañoñeññaapa' alla otererr:

—María, amach penñcha'tatsto, Yomporpa' atarr o' morrenterrpa. 31 Te'pa' paçhomentach, pechyore'tcha' ñeñtpa' asheñorrcha'. Ñeññaapa' pesochcha' JESÚS. 32 Ñeñña' nanac amcha'tarettata. Otyesetcha' ñapa' ña Ñeñt Nanac Parets Puechemer. Pomporña ñeñtara Paretspa' ñachña ne' amcha'taret atet amcha'taretteta' pa'tañ David. 33 Atteña ñapa' amcha'tarettach Jacob po'mrenñecop ñeñtara israelnesha'. Ama't errponañapa' amach huañerro ñeñt atto amcha'tarettena ña.

34 Maríañapa' atet otapan mellañoñeñ:

—Ta'm ¿erroñeñtcha'ña nechyore'tña? Napa' ama't puesheñarra encanesh'a amarramtso yorenn'a'.

35 Mellañoñeññaapa' alla otererr:

—Paretscha'ca'ye Puecamquëñ pechapoya. Ñeñt Nanac Parets po'huamencpa' a'pomamñpsosepa' atet ñerra'mrrate' os pa'pomamñpene'. Ñeñto'marña cheshatoll ñeñtcha' pe'ñalletatpa' ñapa' añach e'ñe ma'yoçhrosa ñeñt atet muenen Parets. Otyesetcha' ñapa' ña e'ñe Yompor Puechemer. 36 Ñaña Elisabetña ñeñt pamo'ts pepen, ñapa'çho'ña o' totana asheñorroñoll, ama't o' po'nme'ten. Ñaña ama't oteñet mueçho'pa' te'ñapa' o' pechapña arrorr o' açhomenta. 37 Tarro'mar Yomporpa' ama eñalle ñocop ñeñt atarr torrapo' enten.

38 Allempoña Mariapa' alla oterranerr mellañoñeñ:

—Ñehua, napa' e'ñe pocte' nenteñ o'ch nesherber Yepapar ñeñt Nepart-seshar nepen. Ñeñtpa' attetepa'ch nocop ñeñt atet potenen.

Allempoña mellañoñeñpa' o' ahuerr.

Atto Mariapa' emo'tenana' Elisabet ñeñt e'ñe pamo'ts pen

39-40 Maríañapa' allenta ahuo' poma'yorñecma o'ch emo'tenana' Elisabet. All yeçhenapa' all shonte' aspentarer allara Judeo. Allempoña çhap anetso all sechenapa' be'tosos Zacarías pa'paclo, huomcha'tosan Elisabet. 41 Ñañaapa' allempo e'mapan María ñeñt atet huomcha'tospa' pue'maretollña ñeñt pa'to'tsenpa' allentepa'tcha' pella. Pachorñaapa' e'ñe

chorreña Parets Puecamquëñ. ⁴² Ñeñña eñoratene', pocsheñeshocmañen eñorena huomencpa' atet otapan María:

—Papa' o' atarr coshaterreþ Yepapar. Papa' o' e'ñe penñtana'tue ora allohuen yacmaneshaçhno atto coshatenanet ñet Yepapar. Ñaña Yepaparpa' atarrcha' bensare'tamþennaþ pechoyoretoll. ⁴³ Ama't na Yepaparpa' atarr coshatenen atto pemo'tenen ama't ñeñteþ pachor pen ñeñcha' Yepartseshar yeperr. ⁴⁴ Tarro'mar e'ñe allempocma ne'maponañ peñoñ atet pehuoncha'tosen, ne'maretollpa' e'ñe pocsheñeshoþpa' allentepa'tcha' pella nato. ⁴⁵ Paña te'pa' atarr cosheñtso'tseneþ tarro'mar þapa' e'ñe þame'ña'huoña ñeñ atet otuenþa' Yepapar. Ñeñto'marña ñeñþa' e'ñech atet etsoterra þocop.

⁴⁶ Maríañapa' alla otererr:

—Te'ñapa' e'ñech neyoçhrocmañen na'ye'choçhtatoñ Yepapar.

⁴⁷ Necamquëñoñohuen atarr nocsheña Yepapar ñeñt Ya'quesþatañer yepen.

⁴⁸ Yepapar e'ñe puemuereñoñen ñapa' entenen ama esoyayno, añana ñeñten torretsa ñocop. Tarraña te'pa' allohuen acheñenesha' ñeñcha' mererrtsa arr patsro ñetñapa' atarrcha' coshapreterrnet atto Yepaparpa' o' atarr coshaterren na.

⁴⁹ Tarro'mar ñapa' ñeñt atarr ahuamencattetsa attoña o' orrtaton ñeñt nanac sherbets, ñeñtara Yepapar ñeñt otenet Ñeñt atarr nanac Parets.

⁵⁰ Allohuen ñeñt añcha'na'tpo' entene' Yepapar, ñañañapa' çhocmach atarr muererranet ama't tayoteñ errponañohuen ama't allpon allohuen acheñenesha' ñeñcha' mererrtsa arr patsro.

⁵¹ Ñaña ñapa' e'ñe etsotuenan ama't ñeñt atarr nanac echarr entyenet, ñaña allpon allohuen acheñ ñeñt atarr asherben entyetsa, ñañañapa' e'ñech pomnaren þohuerranet.

⁵² Ñaña ñeñt atarr ahuamencat entyetsa ñañañapa' e'ñech a'suatanrrortatuerranet allot añcha'tarettenet. Tarraña ñeñt ama esoshe'maye' entyetsopa' ñetñapa' Yepaparcha' nohuerrahuet attotcha' añcha'na'tpo' enter allohuen acheñenesha'.

⁵³ Ñaña ñeñt nanac es pallta'yetsa, ñetñapa' Yepaparcha' esocmañen aphuerrahuet. Tarraña ñeñt atarr esocmanen es echyets, ñetñapa' Yepaparcha' puerratanþesuerrahuet, amach es anerreto ama't coñe'ta. ⁵⁴⁻⁵⁵ Yepaparpa' añach çhocma yenpuen israelena'tar ñeñt pueyochresha' pen ña. Amach pueserrano ñeñt atet otane't ahuat yamo'mtayñeneshañ ñeñcha' atet perranet ñaña allohuen ñeñcha' po'mreneñ perret. E'ñe atet otane't ahuat Abraham po'mrenñecop. Attoch çhocma muerenanet ama't errponohuañen. Arrpa' allohua ñeñt atet açhotan María Yompor.

⁵⁶ Allempoña' ñato' ma'þñate' arrorr alla a'pa Elisabetesho. Allotña Maríapa' ahurr pa'paclo.

Arrpa' atto eñalleta Juan ñeñt apatañtatse't Yomporecop

⁵⁷ Allempoña çhap allempoch emare'ten Elisabet. Ñeñña pue'marpa' asheñorrofoñ. ⁵⁸ Allohuen acheñenesha' ñeñt yeçhetsa all ñesho ñaña allohuen pamo'tsesha' ñetñapa' e'ñe coshaprechet. Tarro'mar eñoteñet

Yomporpa' o' orrtatoñ atto ñapa' atarr muereña. ⁵⁹ Allempoña o' posocmata'muen ñeñña asheñorroñollpa' o' tsorratolle'ta'mueñet tarro'mar ñetpa' atetca'ye yeçhenet ñeñtet judioneshet.* Allempopa' añ soçhetañ Zacarías o'ch anmatoñetañ pompor pa'so'cheñ. ⁶⁰ Tarraña pachorpa' otanet:

—Napa' ama nemno o'ch sesochon ne'mar Zacarías. Napa' añcha' nesoch Juan.

⁶¹ Allempoña acheñenesha'pa' atet ochet:

—¿Eso'mare't pemneñña o'ch pesoch Juan tarro'mar ama't puesheñarra pamo'tspa' ama eñalle ñeñt soçheta Juan?

⁶² Allempoña acheñenesha'pa' e'ñe pototeta a'pto'toñet ematoll pompor escha' sochanña puechemeretoll. ⁶³ Ñapa'cho'ña potofa eñotatan acheñenesha' o'ch apet quellcatets allcha' quellcan ñeñtcha' sochan puechemeretoll. Allempoñapa' apet quellcatets, allñapa' atet quellca': "Añcha' yesoch Juan." Acheñenesha'ñapa' atta cohuanrrorchet. ⁶⁴ E'ñe allempocma Zacaríasñapa' allenta eñorerra. Allorocma aye'choçhtaterran Yompor. ⁶⁵ Acheñenesha'ña ñeñt yeçheta allpa' allohuenet atarr mecha'na'teñet Yompor. Ñetñapa' serrpare'tatanna'tyeset all aspentarero Judeo. ⁶⁶ Ñaña ama't allohuen ñeñt e'mare'tyese' ñetñapa' coçape'chyeset pueyoçhreto, atet otyenet:

—Añ cheshatollpa' po'ñoçhcha' atarr sherberran Yompor tsapatonet. Tarro'mar Yomporpa' atarr muereña.

Atto Zacarías atarr açhotenan Yompor Parets

⁶⁷ Cheshatollña pompor ñeñt Zacaríaspa' añ chorrenaya Parets Puecamquëñ ñeñña eñoraterre' Yomporecop ñeñtcha' atet perra ama't esempo. Ñeñtpa' atet ot Zacarías:

⁶⁸ —Aye'choçhtaterrapo'ch Yompor, ñeñtara ñeñt Po'partseshar pen allohuen israelnesha', tarro'mar te'ñapa' o' orrtaterrnay puemuereña ñeñtcha' ya'queshpaterre' ñeñtey puechemer pen.

⁶⁹ Ñapa' o' orrtatonay ñeñtcha' a'queshpatañterrtsa ñeñt atarr ahuamencatesha' ñeñtara ñeñtcha' eñalletatsa David po'nrenñoç, ñeñtara David ñeñt atarr sherbayer' ahuat Yompor.

⁷⁰ Ñeñtpa' ahuatoteñ atet eñoratyesane't ñeñt a'mta'yesaye't po'ñoñ, ama't allohuen ñeñt e'ñe ma'yoçhra'yestse't Partsocop.

⁷¹ Ama't ñaña allohuen allpon ñeñt ye'moñe'tene' ñeñt añcha'noçhetyetsa yocop, ñachña ya'rroyataterre'.

⁷² Attoçhña etsotaterrnay ñeñt atet otane't ahuat yatañneshañ ñeñtcha' atto çocma muererrya. Atteña ñapa' amach pueserrano ñeñt atet a'pocata ahuatoteñ yocop tarro'mar ñeñtpa' e'ñe Partseshot a'pocataretta.

⁷³ Ñehua, añpa' atet pa' allempo Yomporpa' ahuat otan yatañ Abraham ñeñtcha' atet perriy e'ñe po'ñoçh.

* **1:59** Añ ñoñets "atsorret", añ ñeñt otets atet yeche't judionesha'. Ñeñtpa' atet: Ñerra'm allempo eñalletena asheñorroñollesha' ñeñt e'ñe judionesha'pa' añña pomporpa' o'ch tsorrateñet po'çhtso. Ñehua, ñeñt tsorratenetpa' ematollach o'ch çhapa'muen po'psocmatño. Ñehua, po'çhtso allcha' tsorret asheñorroñollpa' all e'ñeçh poteretollo e'ñe po'ñoçh parmatollo.

- 74 Ñeñtapa' atet ote't Yompor yocop ama't ñeñt allpon ñeñt ye'moñe'tene' ñeñt añcha'nochen yentyen ya, ñañaapa' ñach ya'rroyataterre'. Allochña yapa' o'huañcha' yemcha'nañot yesherber Yompor.
- 75 Attoch yetsotoñ ñeñt e'ñe pocte' enten Parets allochñaapa' attochña pocte' enteney ñaña acheñenesha' atto e'ñe cohuen es yepa'yen e'ñech tarremphua esempohuach yocrrena arr patsro.
- 76 Te'pa' o'ch nechemeretolle notap: Papa' otterpetcha' ñeñtepo' ñeñtcha' eñorana'tena ñeñt nanac Parets. Tarro'mar papa' panomcha' orrtatsa attoch pa'cohuentatyesoñ allcha' oñmos Part-sesha'.
- 77 Ñeñtapa' attoch poctape'chater acheñenesha' e'ñe cohuen allochña ñetpa' esheccha' apretnaretterret po'chñaret attoch a'queshpataretterret.
- 78 Te'pa' chapcha' allempoch Yompor e'ñe puemuereñoñey chapaterrnaycha' ñeñt huetsa entoñ ñeñtcha' yoctape'chaterre' e'ñe cohuen, ñeñtña cotapñatserpa' ñeñtcha' ya'puetarsamperre'.
- 79 Attochña a'puetarsampsaretterra allohuen acheñenesha' ñeñt checmeto'tsa'yeneta, ñeñt ama eñotenaye Yompor, ñetñapa' aña o'patenahuet rromueñets ñeñtara coñcheñets. Ñeñt atto a'puetarsampsaretey ñeñtcha'ña yeñotatene' attoch e'ñe cohuen yocsheñeshocmañen yeychena arr patsro. Arrpa' allohua huañ atto Zacaríaspa' a'chotenan Yompor e'ñe pocsheñeshocmañen.
- 80 Añña cheshatoll Juanpa' allo'na sen atarretnomtsa. Puecamquëño'tpa' atarr ahuamencatetnena. Ñañaapa' alla yechena allapar amayo tarremphua allempo orrta israelena'tarneshesho.

2

Atto eñalleta Jesús

(Mt. 1.18-25)

¹ Allempopa' añ añcha'tarettatset' romo'marnesha' ñeñtapa' añ pa'so'cheñ Augusto. Ñañaapa' nenan po'ñoñ ñeñtapa' atet oten: Allohuen acheñenesha' erraparen añe patsropa' quellcatyasetepa' pa'so'cheñ. ² Ñehua, allempo ñanom quellcatyaset pa'so'cheñpa', arrña anets Siriapa' añ añcha'tarettatsa ñeñtapa' añ pa'so'cheñ Cirenio ñeñt pa'mcha'tareter pen allohuen judionesha'. ³ Ñehua, allohuenet ahuanerret pa'tañnesha' pa'netsro allochñaapa' allcha' quellcatyerreta' pa'so'cheñ. ⁴ Ñeño'marña Josépa' on Nazaretot allara anets Galileo, o'ch ahua' all pa'netser pe't pa'tañneshañ, ñeñtña anetserpa' añ pa'so'cheñ Beléñ, allara Judeo, tarro'mar Beléño eñalleta ahua't pa'tañ David. Tarro'mar Josépa' Davidna'tarca'ye. ⁵ Allempoña Josépa' ahua' epuet María o'ch quellcateneta' pa'so'cheñ. Maríapa' José o'patenaya ño'ch yore'. Allempoña Maríapa' a'chomenepa'to'. ⁶ Allempoña allo'tsa'yenet Beléño, Maríañapa' ahuepa't chen allempoch emare'ten. ⁷ Alla emare't, ñeñtña pue'maretollpa' asheñorrofoll ñeñt e'ñe po'moter pa'. Epe' po'ño'mopa' alla panatolle'ch huacshepahua allotecma apueñet huaquësh puerrar. Ñehua, tarro'mar alla emare'tos huacshepahuaña' muetsopahuopa' ama esesha' epatso e'ñe poctacma eshepena acheñ ñeñt manrra'tosets all.

Atto Yompor po'mllañoieñerpa' orrtana ñeñt cohuanipene' po'carrneror

8 Allempo emare'ten María all Beléño ñeñte tsaprocma allampaño'tsen ñaña ñeñt cohuañpene' po'carrneror pastemo. 9 Allñapa' machayotepa'tcha' orrtanet Yompor po'mllañoñeñer, cha poptana'tosanet. Ñeñtpa' Yompor po'cohuenña ñeñt cha a'puetarsañpsosahuet. Ñetñapa' atarr nanac mecha'trra'tapet. 10 Mellañoñeñña'pa' otosanet:

—Amach semcha'tatsetno choña se'mñnoten na, o'ch neñotatoses ñeñtcha' atarr socshaterre' sa ama't ñaña allohuen errañparen acheñeneshap. 11 Te'pa' socop o' eñalleta ñeñtcha' Sa'queshpatañer sepper ñeñtpa' ñeñtcha' Cristotats ñeñt Yepartseshar yepen. Ñeñña cheshatollpa' arr eñalleta David pa'netsro allara Beléño. 12 Te'pa' o'ch noterserr attoch señoçh ñeñt cheshatoller. Ñeñtcha' sentos cheshatoll eparet po'ño'mo all panatolle'teñet huacshepahuo, ñeñtca'yeña Yompor Puechemer.

13 Allempoñapa' machayotepa'tcha' orrterrerr po'potantañ shonte' mellañoñeñnesha' ñeñt o' sohuacherrerr entot. Ñeñña mellañoñeñnesha'pa' atarr aye'chochtatosñañet Yompor. 14 Atet otoset: ¡Aye'chochtaterrapo'ch Yeyomporer ñeñt pue'ntaño'tsen! Ama't ñaña acheñenesha' ñeñt añe patsro'tsen cosha'rrtetepa' ñamet ñeñt coshaten Yompor.

15 Allempoña mellañoñeñnesha'pa' sohuaneret ñeñt cohuañpene' po'carrneror; ñetñapa' o' ahuanerret pue'ntaño. Allempoña ñeñt cohue' po'carrnerorpa' allenta otanna'tyeset:

—Errotenuaca'yeña ñeñt otenya' Yompor. O'ch ahuey Beléño o'ch yenteña' ñeñt atet otenyeta'.

16 Allempoñapa' poma'yorñecma ahuanmuet, o'ña chapuet Beléño'pa' all entoset María ñaña José ñaña cheshatoll all panatolle'tena huacshepahuo. 17-18 Allempo entoset ñetñapa' serrpare'toset ñeñt atet o' otue-naneta' mellañoñeñ cheshatollecop. Allohuen ñeñt e'muene'pa' nanac cohuanrroreyeset, otanna'tyeset:

—Ta'm errotenotte'ñaca' o' serrpare'tosña atet.

19 Maríañapa' e'ñe ñeñta nen pueyoçhro e'ñe ñeñta cotape'chen ñeñt allpon o' entua ahuañoñeñ. 20 Allempoña ñeñt cohue' po'carrnerorpa' o' ahuanerret. Atet otenaneta' mellañoñeñnesha'pa' ñetñapa' e'ñe po'ñoçh entoset. Allpon ñeñt atet e'muet, ama't ñaña ñeñt atet entet, ñeñto'marña ñetpa' e'ñe pa'ye'chochtateñeshet ahuanerret, attoña ñetpa' atarr cohuentatnerrñañet Yompor.

Atto anmet cheshatoll Jesús Parets pa'pacillo attoch a'poc Tateñeta' ñeñt Partsocop

21 Ñehua, allempoña o' posocmata'muen, ñeñt asheñorroçhollpa' o' tsor-ratatolle'chet, ñeñtpa' atet yeçhenaña allohuen judionesha'. Allempo ñeñña cheshatollpa' o' sochet JESÚS. Ñehua, ñeñt so'chñets ñeñtpa' atet otenana' mellañoñeñ María ama't ahuañmo'choteñ allempo ama achomentena'.

22-24 Allempoña chap allempoch a'poc tchet ñeñt atet nane't Moisés po'ñoñ ñeñtcha' atet yeçha' judionesha'. Ñehua, ñeñña ñoñetspa' atet oten: “Ñerra'm esempoch cheyore'ten coyanesha', ñerra'm asheñorr pue'maretoll ñeñt e'ñe po'motepa' neñetepa' Partsocop.” Ñaña po'poñ Moisés po'ñoñ ñeñt atet ne't, ñeñtpa' atet oten: “Muetsatenetepa' eprña

arot amapa' epña yepecho'ye' ñeñtcha' net Yomporecop." Ñeñto'marña allempo chap allempoch a'pochtatet Yomporecop ñeñt atet anaret po'ñoñ, ñeñña cheshatollpa' allenta anmet Jerusaléño, allcha' a'pochtachet Yomporecop.

²⁵⁻²⁷ Allempoña chapuet Jerusaléño'pa' o' be'tosotet Parets pa'paclo attoch a'pochtateneta' ñeñt atet yethenet ñeñt atet oten ñoñets ñeñt anaret ahuatoteñ. Allñapa' huapa puesheñarr yacma añ pa'so'cheñ Simeón ñeñtpa' jerusaléño'marnesha'. Tarro'marña ñapa' allempocma huapaña' ñapa' añ eñotate' Parets Puecamquëñ. Tarro'mar ñeñt acheñerpa' atarr cohuen ñeñt atarr ma'yochrenaya ñeñt cohuentetsa Yomporecop. Ñapa' ñeñt atarr cohuen e' esempoch huapa ñeñtcha' a'rroyataterre' israelena'tarnesha' allochñapa' o'ch alla atarr cosherret. Atto chapoña Parets Puecamquëñ ñeñtña eñotatene' ñapa' amach rromuena'pa' enterrancha' Yompor Puechemer ñeñt Cristo ñeñtcha' llesenserr esempo. ²⁸ Huaptsapa' allenta enatatolle'tosan cheshatoll, atarr aye'chochtatosan Yompor. Ñeñtpa' atet otos: ²⁹⁻³⁰ Te'ña po'ñoch Nompore ama'tcha' nerromapa' e'ñech nosheñeshocmañen nerroma tarro'mar te'pa' po'ñoch o' nenterrnañ ñeñt o' pemñerrnay ñeñtcha' ya'qeshpaterre' e'ñe atet potne't ahuañmo'chofeñ na ñeñten atarr pesherbene'.

³¹ Ñeñtña o' pörrtaterrnay allohuenacpay ñeñtey pa'nameney acheñeneshacpay añe patsro.

³² Ñapa' ñach sherberrets atet ñerra'mrrate' puetare' ñeñtcha' a'puetarsamperre' allohuen acheñenesha' ama't ñeñt ama israelena'tareyaye attoch ñetpa'cho'ña o'ch eñoteret ñeñtcha' a'qeshpatañterrtsa e'ñe po'ñoch. Allochñapa' attotcha' e'ñe cohuen aye'chochtaterrnañ ñaña peyochreshachno ñeñtara israelena'tarnesha'.

³³ Ñeñtña pamo'mte' pen cheshatollpa' ñetñapa' atta cohuanateñet Simeón atet eñorana'tenanet pue'maretollet. ³⁴ O' eñorana'tuanet pue'maretolletpa' allempoñapa' enamatanet ñamet ñocpuet Yompor pa'nateña. Allempoñapa' otoñ pachor María, ñeñtpa' atet och:

—Peñoche'ch añ cheshatoll ñeñtpa' ñeñtña onañche't ahuat Yompor. Ñocoppa' shonte'ch israelena'tarnesha' ñeñtcha' ama ame'ñerrayo ñeñtcha' chenquërrtsa. Tarraña eñall ñaña shonte' po'potantañ ñeñtcha' ame'ñerraya ñeñtcha' cohueno'tsenterrtsa. Tarro'mar Pomporpa' añecopña mueñer allochñapa' ñach eñotaterrahuet ñapa' Pomporshot huapa. Tarraña shonte'ch acheñ ñeñtcha' achmare'terre'. ³⁵ Papa' ñeñtcha'ña atarr pellcaterre'ña pa. Atarrcha' atserr pe'muerr pellquëña e'ñech atet pe'muerr puellquëña atet ñerra'mrrate' cochllo patenpet peyochro. Elloña puesheña'tetspa' eñotaterranetcha' errotente' ñeñt atet cotape'chyenet peyochreto.

³⁶ Allñapa' allo'tsen ñaña puesheñarr coyanesha' ñeñtpa' añ pa'so'cheñ Ana ñeñtecma a'mtene' Yompor po'ñoñ. Ñapa' año' po'señ ñeñt sochetsa Fanuel, ñeñtpa' Aserna'tar.* Ñeñtña Anapa' o' atarr nanac po'nme'ten. Ñehua, allempo shopshena'pa' some'ta, e'ñe cancherr charohua ye'chañ epuet puerrollarpa' o' rromapes. ³⁷ Ñeñtña rretorrnanesha'pa' atta

* 2:36 Ñeñtña Aserpa' Jacob puechemer.

correna ñapuef. O' poscoch çharra' puechena pa'tats char allponmat correna atfa. Ñapa' e'ñe ellapene't sherbe' Yompor ama't ñaña tsapome'tets. All Yompor pa'paclo'tpa' amach çha'nenno. All atarr ma'yochenana Yompor. Erroteno e'ñe puema'yocheño't Yomporpa' amach rreno ama't coñe'ta. ³⁸ Ñapa'çho'ña allempocma huapa all o' çhapachet cheshatoll Jesús. Ñaña'pa' ma'yochosa, atarr parasyoso'tenan Yompor cheshatollecop. Ñeñto'marña ñapa' atarr serrpare'tatosan acheñenesha' ñeñt cheshatollecop tarro'mar o' huapa ñeñt atarr cohuen allohuen acheñenesha' ñeñtcha' a'queshtëatose' israelnesha' ñeñt pa'netser pene' Jerusaléñ.

Allempo alla puererret anetso Nazareto

³⁹ Allempoña o' a'pocstatuet ora allpon ñeñt atet anaret Yompor po'ñoño ñeñtcha' e'ñe yeçha' judionesha' ñetñapa' ahuanerret pa'nyeto Nazareto allara Galileo. ⁴⁰ Cheshatollña'pa' allo'na sen rrorranmats, allo'na sen huomencatnomuets, nanac eñotnenan ñeñt atarr cohuen enten Pompor Parets, ñeñto'marña Yomporpa' atarr muereña.

Allempo alla a'pa cheshachor Jesús Parets pa'paclo

⁴¹ Ñehua, ñeñt cheshachor pamo'mte' ñetpa' atet yeçhenet pate'tets char pascuapopa' çhocmach senet Jerusaléño o'ch coshapreteneta' pasqua ñeñt atet yeçhena judionesha'. ⁴² Allempo çhap Jesús po'charña çharra' puechena epa ahuanerretter Jerusaléño, ñetpa' atetca'ye yeçhenet. ⁴³ O'ña huañ pascuapa' ñetñapa' o' ahuanerret. Ñeñña cheshachor Jesús'pa' alla't a'pa Jerusaléño. Pomporña ñaña pachorpa' ama eñoteñeto o'te' alla a'pa. ⁴⁴ Cha otapuetañ añte' cota'nen po'potantañ ñeñt parro onaçhenet. O'ña chope'cherret pamtarra' allempoñapa' o' yerpueret, e'name'tyereta' pamo'tseshesho'mar. E'name'tyereta' allo'tsen ñeñt e'ñe chemetyen pompor ñaña pachor. ⁴⁵ O'ña e'name'tuet ama es enterayepa' o' alla ahuerret Jerusaléño. Allpa'çho' e'name'tueretter.

⁴⁶ Poma'pamtañoña'pa' alla entereta' Parets pa'paclo. All anen e'ñe parro maestronesha' ñeñt atarr eñotyene' Yompor po'ñoño ñeñt atet anaret. Jesús'ña'pa' all e'mñotyenanet ñeñt atet serrpare'tyenetpa' o'çcho' a'p'to'tyerranet. ⁴⁷ Ñeñto'marña allohuen ñeñt e'muene'pa' çha atarr cohuanrrorteñet, otyenet:

—Errotenotuañaca'yeña atarr es eñoten ñeñto'mar atarr cohuen es anapen.

⁴⁸ Allempo enter pompor ñaña pachorpa' atfa cohua'ntoset. Pachorña'pa' atet otos:

—¿Eso'marte'ña ne'mare o' atarr pellcatya? ¿Ama't peñoteñe atarr yellquëñesha' ye'nameneþ?

⁴⁹ Ñaña'pa' otapanet:

—Eso'mare'tña se'name'tenen. Ama't señotennoña napa' ñeñt pocetsa nocop o'ch netorreññaña ñeñt pocetsa Nomporecop.

⁵⁰ Ñetñapa' ama es eñotaye ñeñt atet otanet.

⁵¹ Allempoña'pa' o' coterran pamo'mte' o' çhaçherret Nazareto, ñapa' e'ñe cohuen ame'ñenana pompor ñaña pachor. Pachorña'pa' allohuen ñoñetspa' e'ñe eñotueñ pueyoçhro. ⁵² Jesús'ña'pa' allo'na sen rrorranmats atarretnomtsa. Allo'na nanac eñotañetnena. Pomporña Parets'pa' atarr cohuen enteñ, ñaña acheñenesha'pa' atarr cohuen enteñet.

3

Allempo orrta Juan ñeñt serrpare'tosets all amayo
(Mt. 3.1-12; Mr. 1.1-8; Jn. 1.19-28)

¹ Ñehua, allempo chap allempoch añcha'taretta ñaña ñeñt pa'so'cheñ Tiberio all Romo. Allempo chap o' añcha'taretta charra' puechena amnar char allempoña Judeopa' añ añcha'tarettatsa ñaña Poncio Pilato. Galileoñapa' añ añcha'tarettatsa Herodes. Pa'mo'nasheñña Felipepa' ñapa' epa anetsocop añcha'taretta, ñeñtpa' arr añcha'taretta Iturea ñaña Traconite. Lisanasñapa' arr añcha'taretta Abilinio. ² Ñehua, allempopa' judionesha' añ po'corneshar penet Anás ñaña Caifás, ñeñt po'corneshar pen ora allohuen cornaneshaçhno. E'ñe ñeñte chararocma añcha'taretetyenet allemeñ anetsomar e'ñe allempocma Yomporpa' eñorana'tana ñaña Juan ñeñt Zacarías puechemer ñeñt amayo'tsen. ³ Ñeñto'marña Juan allempopa' o' chopeñe'chyes erracmañen Jordanaso'mar, all serrpare'tyesnom. Ñeñtpa' atet otyesnomanet:

—Te'pa' o'ch soctape'cherr e'ñe ello cohuen Yomporecop attoch Yomporpa' o'ch peretnerrnas allohuen so'chñar, allochñapa' o'ch sapataretterra Yomporecop.

⁴ Ñeñtpa' añ serrpare'tatosanet attoch etsoterra ñoñets ñeñt anaret ñeñt atet eñose't ahuat Isaías ñeñt a'ñtaye't Yompor po'ñoñ. Ñeñt Isaías po'ñoñ ñeñtpa' atet oten:

E'morrterrach puesheñarr po'ñoñ all amayo allcha'ña serrpare'taterranña acheñenesha'. Puerranarotpa' añcha' toma'ntaterranet toñ, ñeñtpa' atetcha' o'terranet: “Te'pa' o'ch sa'cohuenetyes toñ allcha' oñmos Partsesha', o'ch e'ñe sa'paçharretyesoñ pa'teþ.

⁵ All rrapatse'tyen patspa' o'ch e'ñe sa'muepñetyes, all pocmo'yaretyenapa' o'ch e'ñe sa'muepñetuahue, all terepe'parretyenapa' o'ch e'ñe sa'paçharretyes, all arrotetyena toñpa' o'ch e'ñe sepampa'huahue.

⁶ Allempoña allohuen acheñenesha'pa' enteretcha' ñeñt o' mueñernay Yompor ñeñtcha' ya'qeshpaterre'.” Arrpa' allohua ñeñt atet aquellcare't ahuatoteñ Cristocop.

⁷ Allempoñapa' shonte' acheñenesha' huaçha'tet Juanesho. Ñetpa' tarro'mar huaçhenet añ muenenet o'ch apatapanet Juan Yomporecop. Juanña serrpare'tatapanetpa' otapanet:

—Sapa' ama cohuenayayso atarr ashcarñañes, çha sottena ñerra'mrrate' shechpa sompor sepen. Po'ñoçhca' ama eseshaye' sotenaye e'ñech sapataretteñoña o'ch sequeshperra allochñapa' amach coñchatuerrso Yompor allempoch yoroçhtatuer tsapatonet. ⁸ Napa' añcha'ña notapas o'ch sorratyses ñeñt e'ñe cohuen enten Yompor ñeñt atet pena ñeñt po'ñoçh o' cotape'cherran ello cohuen Yomporecop. Sapa' çha soteneñ seyoçhro año' es sepallteno sapa' año' e'ñe seyemtena satañ Abraham. Tarraña napa' o'ch notas amach atet soctape'chatsto tarro'mar ñeñtpa' ama esoye' enteñe Yompor. Tarro'mar o'ch notas ñerra'm Yompor muenetseñ ama't añ mapue' ñeñt senten arr o'ch a'pnasereñ Abraham po'mreneñ. ⁹ Ñeñto'marña napa' o'ch notas ñerra'm amach soctape'chero cohuen Yomporecop o' mameshaña o'ch çhaponasa attoch coñchatterres Yompor. O'ch netma'ntatasa atet

ñerra'mrrate' allempo o'ch a'matamochet tsach. O' e'ñe onañchachet gach allcha' tet e'ñe allohua huañen puepallactar. Ñeñt' allohuen tsachečno ñeñt' ama cohuenaye' me'tetsopa' a'mata'tueretcha' saprrochetcha' all huorten tso' allcha' e'ñe a'poyatatueret.

¹⁰ Allempoña acheñenesha'pa' a'p'to'tyeset Juan, ochet:

—Ñehua, ¿eso'tña poctetsaña yocop attoch e'ñe yorrtatyes ñeñt' cohuentetsa Yomporecop?

¹¹ Ñaña'pa' anapanetpa' otanet:

—Ñerra'm eseshas echene' epma seshtam o'ch saḡ ñeñt' ama echenaye ñeñt'cha' chorrena. Ñaña ñerra'm eseshas echene' serrar o'ch saḡ ñeñt' ama echenaye ñeñt'cha' rrenet.

¹² Allempoña huacha'ta ñaña acheñenesha' ñeñt' po'taruas pene' atto cobrenan acheñenesha' quelle ñeñt' gobiernocop. Ñetpa'cho'ña añecop huenet Juanesho o'ch apatarettet Yomporecop. Ñetpa'cho'ña o' a'p'to'toset Juan, atet otoset:

—Yocop Nompocha' ¿eso'tña poctetsa attoch yorrtatyes yaña ñeñt' cohuentetsa Yomporecop?

¹³ Ñaña'pa' anapanetpa' atet otanet:

—Ñeñt' allpon quelle ñeñt' e'ñe allpona enamuen gobiernopa' e'ñech allpona secobreña acheñenesha', amachña allo'na atarr aton secobra'neñe acheñenesha' quelle ñeñt' e'ñech socpa'na.

¹⁴ Allempoña patantarr guardianesha' ñeñt' allo'tsa'yenpa' a'p'to'toset ñamet, ñetpa' atet otet:

—Yocoppa'cho'ña ¿eso'tña poctetsa ñeñt'cha' attoch yorrtatyes yaña ñeñt' cohuentetsa Yomporecop?

Ñaña anapanetpa' atet otanet:

—Sapa' amach es seprratamḡsatsche acheñenesha' e'ñe se'mueñocma ñaña sa'metamḡpeñoñ e'ñe seshquëñoñpa'cho'ña amach es seprratamḡsatsto e'ñe attota. Ñaña ñeñt' allpon tsa'tenset gobierneshotpa' e'ñepa'chña ñeñt' cohuen socshena.

¹⁵ Acheñenesha'ñapa' atfa cohueñet, pueyoçhretoñapa' atfa cotape'chyenet cha otenapuetañ Juanpa' ñeñt'ña Cristotets ñeñt' cohuenet ahuatoteñ ñeñt'cha' mueñerranet Yompor. ¹⁶ Juanñapa' atet otanet:

—Napa' ama añeyayno ñeñt' Cristotets, tarro'mar napa' ama't napatensoñ Yomporecop e'ñe oñochaya napatenes. Tarraña Cristo ñeñt'cha' huapatsa chenta'pa' ñapa' añcha'ña chorratossa Parets Puecamquëñ ñeñt' atet ñerra'm tso'. Ñapa' ñeñt' atarr ahuamencatesha', nañapa' ama tama ahuamencateyayno. Ñapa' ñeñt'ña atarr sherbets, nañapa' ama es nesherbeno attoch ama't po'sapatrechapa' o'ch nepyoñ.* ¹⁷ Ñapa' atarr ahuamencat, ñapa' ñach acerre' allohuen acheñenesha'. Ñapa' añ toma'ntena ñeñt' orrene' puehoshnat alloch shoshnan po'trigo o'ch e'ñe pue'llomḡrochayaña. Ñeñt'ña pue'llomerpa' o'ch a'yapa'che' o'ch añño'ch allecma añño'teñ e'ñe cohuen. Pue'she'marñapa' o'ch huapore'ch tso allcha' e'ñe poyhua. Ñeñt'ña tso'pa' ama emaya'pahuo ama't errponaña.

* **3:16** Ñeñt' atet po'taruas pe't ahuat esclavos o'ch pueyan pamo'mte' po'sapatrech.

¹⁸ Juanña allpa' atet serrpare'tatyenanet cohuen ñoñets ñeñt huetsa Yomporeshot alloch yequeshperra. Elloneññapa' shonte' pa'namen serrpare'tatan acheñenesha' ñeñt ama pocteye' enteno Yompor.

Allempo apataretta Jesús Yomporecop

(Mt. 3.13-17; Mr. 1.9-11)

¹⁹⁻²² Allempoña o' atarr apataretta shonte' acheñenesha' Yomporecoppa' cho apatarettatsa ñaña Jesús. E'ñe apataretetuatsapa' o' ma'yocha. Allempoña ma'yochenapa' enetñapa' ahuepa't atorarettá. Aloñña e'ñe sohua'nma Paret's Puecamquëñ e'ñe atet entapet ñerra'mrrate' yep' o' sohua'nma entof. E'ñe arr chap Jesúsesho. Cha e'morrtatsa ñoñets entof atet eñorena Yompor. Ñeññña ñoñetspa' atet oten:

—Papa' ñeñteþ Nechemereþ ñeñteþ atarr nemorrentena, þa atarr nanac nocshatene'.

Allempoña añcha'taret Herodespa' o' yottañþsatan Juan tarro'mar Juanpa' eñotach ama pocteye' enteñe ñeñt atet þatse'tyena. Ama't pa'mo'nasheñ Felipe puetaporpa' o' yorañþer. Ama't shonte' pa'namen ñeñt atet þatse'tyena Herodespa' elloñapa' o'cho' yottañþsateranerr ñaña Juan.

Arrpa' all aquellcaret allohuen pa'so'chñechno ñeñt pa'tañneshañ pen Jesús

(Mt. 1.1-17)

²³ Ñehua, Jesúsapa' allempo orrta o' torra'mochana ñeñt po'taruas pen Pomporecop, allempoña po'charñapa' ñato' o'te' chap ma'poch charra' char. Acheñenesha'ñapa' añña pompor þateñet ñeñt José. Ñehua, Josépa' Elí puechemer, ²⁴ Elípa' Matat puechemer, Matatpa' Leví puechemer, Levípa' Melqui puechemer, Melquipa' Jana puechemer, Janapa' José puechemer, ²⁵ Josépa' Matatías puechemer, Matatíaspa' Amós puechemer, Amóspa' Nahum puechemer, Nahumpa' Esli puechemer, Eslipa' Nagai puechemer, ²⁶ Nagaipa' Maat puechemer, Maatpa' Matatías puechemer, Matatíaspa' Semei puechemer, Semeipa' José puechemer, Josépa' Judá puechemer. ²⁷ Judápa' Joana puechemer, Joanapa' Resa puechemer, Resapa' Zorobabel puechemer, Zorobabelpa' Salatiel puechemer, Salatielpa' Neri puechemer, ²⁸ Neripa' Melqui puechemer, Melquipa' Adi puechemer, Adipa' Cosam puechemer, Cosampa' Elmodam puechemer, Elmodampa' Er puechemer, ²⁹ Erpa' Josué puechemer, Josuépa' Eliezer puechemer, Eliezerpa' Jorim puechemer, Jorimpa' Matat puechemer, ³⁰ Matatpa' Leví puechemer, Levípa' Simeón puechemer, Simeónpa' Judá puechemer, Judápa' José puechemer, Josépa' Jonán puechemer, Jonánpa' Eliaquim puechemer, ³¹ Eliaquimpa' Melea puechemer, Meleapa' Mainán puechemer, Mainánpa' Matata puechemer, Matatapa' Natán puechemer, ³² Natánpa' David puechemer, Davidpa' Isaí puechemer, Isaípa' Obed puechemer, Obedpa' Booz puechemer, Boozpa' Salmón puechemer, Salmónpa' Naasón puechemer, ³³ Naasónpa' Aminadab puechemer, Aminadabpa' Aram puechemer, Arampa' Esrom puechemer, Esrompa' Fares puechemer, Farespa' Judá puechemer, ³⁴ Judápa' Jacob puechemer, Jacobpa' Isaac puechemer, Isaacpa' Abraham puechemer, Abrahampa' Taré puechemer, Tarépa' Nacor puechemer, ³⁵ Nacorpa' Serug puechemer, Serugpa' Ragau puechemer, Ragaupa' Peleg puechemer, Pelegpa' Heber puechemer,

Heberpa' Sala puechemer, ³⁶ Salapa' Cainán puechemer, Cainánpa' Arfaxad puechemer, Arfaxadpa' Sem puechemer, Sempa' Noé puechemer, Noépa' Lamec puechemer, ³⁷ Lamecpa' Matusalén puechemer, Matusalénpa' Enoc puechemer, Enocpa' Jared puechemer, Jaredpa' Mahalaleel puechemer, Mahalaleelpa' Cainán puechemer, ³⁸ Cainánpa' Enós puechemer, Enóspa' Set puechemer, Setpa' Adán puechemer, Adánpa' Yompor puechemer.

4

Allempo oneñeĩpa' topatenan Jesús, mueneñ o'ch atet p̄atan Jesús ñeñĩ ama pocteye' enteno Yompor

(Mt. 4.1-11; Mr. 1.12-13)

¹ Allempoña Jesúspa' o' err Jordanasot. Ñañapa' añ e'ñe chorrenaya Parets Puecamquẽñ ñeñĩña anmue'ña all amayo. ² Attoña allpa' o' huapoña oneñeĩ, mueneñ o'ch atet p̄atyes ñeñĩ ama pocteye' enteno Pompor. Allñapa' ama rreno e'ñe aña torrena attoch etsotuan ora allohuen ñeñĩ cohuentetsa Pomporecop. Ñeñĩo'marña ama't o' pa'tatsoch çharramatpa' ama't coñe'çapa' ama es rreno. O'ña pa'tatsoch çharramatuapa' çho cheporratsa.

³ Allempoña oneñeĩ atto topatosan Jesúspa' atet otos:

—Pa ñerra'm po'ñoçhte' Parets Puechemerep̄pa' o'ch p̄ot: Añ mapue' puenasepa' pan.

⁴ Jesúsñapa' atet otap̄:

—Napa' ama nemno o'ch atet nepa' tarro'mar Yompor po'ñoñ ñeñĩ anuaret ahuatoteñ ñeñĩpa' atet oteney: “Allohueney acheñenesohoueneypa' ama e'ñe rreñtsa ñapue'ç yoccranĩ yepeno. Añe'naña yoccranĩ yepen yecamquẽñecop ñeñĩ allohuen allpon oteney Yompor.”

⁵ Allempoña oneñeĩpa' o' anemĩ all atarr aspeno e'ñe a'noso. Allotña gatyuesuererr allohuen ñeñĩ allpon all añcha'taretetyena pa'namen acheñenesha' ñeñĩ yeçha'yetsa errap̄aren añe patsro. Allotña ama't mamesha cohuospa' e'ñe orre'tuena erracmañen. ⁶⁻⁷ Oneñeĩñapa' alla oterranerr Jesús:

—Ora allohuen ñeñĩ o' pentyesua ñeñĩpa' e'ñe nocma tarro'mar ñeñĩpa' na aparet. Ñerra'm esesha' nemnen o'ch naçpa' napa' naçcha'ca'ye. Ñeñĩo'mar te'pa' o'ch notap̄, ñerra'm na pema'yocheñoen o'ch peconcorpana'tna, napa' napaçcha' ora all añcha'taretetyenet all atarr cohuentatyenet, e'ñe ora allohuen ñeñĩpa' e'ñech p̄ocma.

⁸ Jesúsñapa' alla otererr:

—Te'pa' o'ch orrerreç oneñeĩe. Napa' ama nemno o'ch atet nepa' tarro'mar Yompor po'ñoñ ñeñĩ anuaret ñeñĩpa' atet oteney: “Añach ñapue'ç yema'yochena Yeyomporer ñeñĩ Yepartseshar yepen, e'ñech ñap̄a yesherbe'.”

⁹ Allempoña oneñeĩpa' o' anerranerr Jesús Jerusaléño. Allñapa' a'tapatos nanac eno allohuanen Parets pa'paquẽll. Allñapa' otuererr:

—Papa' ñerra'm po'ñoçhte' Parets Puechemereç te'pa' p̄omacha arroç tarro'mar amach p̄a'tserrp̄o ¹⁰ tarro'mar Parets po'ñoñ ñeñĩ anuaret ñeñĩpa' ama'tña atet oten:

Yomporpa' o'ch mueñonap̄ po'mllañoçteñrenesha' ñeñĩcha' pecuanĩpsapue'.

11 Ñetcha' pagapapuet o'ch enatapapet attoch amach pa'tserrpatca'toso mapyo.

12 Allempoña Jesúsapa' alla otererr:

—Añpa'cho'ña anuaret Yompor po'ñoño, ñeñtpa' atet oten: “Amach ya'llocchame'tatsche Yeyomporer ñeñt Yepartseshar yepen.”

13 Allempoña oneñt topatuahuan Jesús pa'namenotpa' o' ahuerr o' cachpa'ner allponmat tarro'mar oneñt chocma topach.

Allempo e'ñe ñenmãt torrena Jesús Partsocop all Galileo
(Mt. 4.12-17; Mr. 1.14-15)

14 Allempoña Jesúsapa' o' alla ahuerr Galileo. Ñapa' añ atarr ahuamencat pene' Parets Puecamquẽñ. Erraþaren Galileo'mar o' e'ñe e'mare'tuet ñeñt atet pa'yena Jesús. 15 All apcha'yena judionesha' po'prahuetopa' ñaña'pa' all yechatyenanet. Attoña allohuen acheñenesha'pa' atarr cohuen enteñet.

Allempo serrpare'tatan Jesús acheñenesha' all Nazareto
(Mt. 13.53-58; Mr. 6.1-6)

16 Atteñapa' o' alla cherr Nazareto all yeçhache't pompor allempo cheshena'. Pamtarrña allempo chap yet allempo chocma amesen judionesha', Jesúsñapa' o' ahua' judionesha' po'prahuo, ñapa'cho' atet yeçhena. O' chap puerahuopa' allñapa' tomos allcha' lleyatan acheñenesha' Yompor po'ñoñ. 17 Allñapa' añ apet libro ñeñt allo'tsen Isaías po'ñoñ ñeñt a'mtaye't Yompor po'ñoñ ahua't. Ñaña'pa' toran libropa' all entan ñoñets ñeñt atet aquellcare't ñocop, ñeñtñapa' atet oten:

18 Napa' añ nechorrenaya Nompor Puecamquẽñ tarro'mar ña nellense' nach serrpare'taterre' ora allohuen acheñenesha' ñeñt atarr es palltetsa. Napa' añcha' neñotaterranet cohuen ñoñets ñeñtpa' alloch qeshperret. Ñaña añecopña llesenserren attoch nach a'crratyerre' allohuen ñeñt mueroçhetyetsa puellquẽño't pueyoçhreto. Nach eñotaterre' ñaña ñeñt ayottamþsaretetyetsa allochñapa' o'ch atoramþsaretterret. Nach eñotaterre' ñaña ñeñt ama entetso allochñapa' o'ch enterret. Ñaña ñeñt amuroçhtataretetyetsa nachña a'rroyataterrahuet.

19 Ñaña napa' añecopña llesenserren nach eñotaterrahuet te'pa' o' chap allempo pocte' enteñ Yompor o'ch atarr orrtaterranet puemuereña. Ñehua, arrpa' allohua ñeñt allpon lleyatanet Isaías po'ñoñ.

20 O' lleyatuanetpa' o' alla e'tamþerran libro apuerran ñeñt sherbets all puerahuo. Allempoñapa' o' alla anorruerr. Allohuenña acheñenesha' ñeñt puerahuo'tsa'yen ñetñapa' atarr cohuanrrorteñet Jesús. 21 Ñaña'pa' atet otanet:

—Atto' o' se'mhua añ ñoñetspa' te'ñapa' o' e'ñe cherr attoch e'ñe etoterra ñeñt atet aquellcare't ahua'toteñ.

22 Allohuenña acheñenesha'pa' e'ñe cohuen eñora'yenet Jesúsocop. Atarr coçhnesha' enteññañet po'ñoñ ñeñt atet serrpare'tatyenanet. Ñetñapa' atet otanna'tyenet:

—Erroteno'tuañaca'yeha atarr coçhnesha' serrpare'tatyeney. Ñapa' añaca'ye José puechemer.

23 Jesúsñapa' atet oterraneterr:

—Sapa' ñeñt atet o' se'mare'ton ñeñt atet norrtatyena' ahuaña Capernaumo te'ña sapa' cha semneñ o'ch soten añ ñoñets ñeñtecma muene' yotannena ama't ahuañoteñ: “Pa ñeñteḗ a'crratañtetsa te'pa' o'ch pa'crrata e'ñe pañeña”, tarro'mar sapa' añte' semnen o'ch atet norrtat ñaña arr cohuen e'ñe ya ya'netsro atet norrtatena' ahuaña Capernaumo.

²⁴ Tarraña napa' po'ñoçh o'ch notas:

—Ñeñt a'ñtene' Yompor po'ñoñ ama't puesheñarra ama eñalleña ñeñt e'ñe cohuen enten allohuen pamo'tsesha' ñeñt parro yeçhenet all e'ñe ñet pa'netsreto. ²⁵⁻²⁶ Napa' po'ñoçh te'pa' añcha' neyerpatasa ñeñt atet pe't Elías ñeñt a'ñtaye't Yompor po'ñoñ ahuañ. Ñehua, allempopa' o' ma'pa char ñaña po'poñ pueshmet charpa' nanac chares ama't mame-shapa' ama huateno ñeñto'marña orra muecheñets erracmañen all anetso ñeñt Israel all yeche't Elías. Ñaña ama't shonteñ israelena'tar ñeñt rretornaneshatyets allempo, tarraña Yomporñapa' ama alleye' mueñanoña Elías attoch yenposan ama't puesheñarra rretornaneshat' ñeñt e'ñe pamo'ts pen ña. Arra mueñe po'poñ anetso ñeñt pa'so'cheñ Sarepta ñeñt allara Sidón allo'tsen puesheñarr rretornaneshat', ñañaapa' ñeñta yenpos. ²⁷ Elloña o'ch alla neyerpaterrser po'poñ ñeñt atet pe't ñaña Eliseo, ñapa'cho'ña ñeñt a'ñtaye't Yompor po'ñoñ ahuañ. Ñehua, allempopa' shonte' israelena'tarnesha' ñeñt osyen puetsarñats ñeñt otenet lepra all anetso Israel all yeche't Eliseo. Tarraña ama't atteñ ama't puesheñarroçapa' ama a'crratereña Eliseo e'ñe all Israelo. Ñapa' aña a'crraterr ñeñt po'poñena'tar acheñ ñeñtpa' añ pa'so'cheñ Naamán ñeñtpa' po'poñ anetso'marnesha'; ñeñt pa'netser penpa' añ pa'so'cheñ Siria.

²⁸ Acheñenesha'ña allempo e'met ñeñt atet yerpatanet Jesúsapa' ñeñña atarr atsre'matahuet allohuenet ñeñt puerahuo'tsa'yen. ²⁹ Ñetña tantra'tetpa' o' mueño'teret allot pa'netsreto't. Cheta'neret, allotpa' arr anmet allohua huañen pocoll allot e'ñe atserettena allcha' huapore'chet attoch muetsatachet. ³⁰ Tarraña ama't huapore'chetañ, Jesúsñapa' o' chope'chnerr ama't all shontena acheñenesha'. Ñañaapa' all cheta'tnerra rroçhopa' o' ahuer.

*Allempo Jesúsapa' entaḗ puesheñarr yacma ñeñt chorrena oneñeñ
(Mr. 1.21-28)*

³¹ Allempoñapa' o' alla ahuererr anetso Capernaumo allara Galilea. Pamarrña allempo çhap yeñats allempo amesen judionesha' ñañaapa' o' ahuo' po'prahuet. Allñapa' yeçhatyessosan acheñenesha'. ³² Ñeñt atet yeçhatenanet, acheñenesha'ñapa' atta cohuanrrorteñet. Tarro'mar ñapa' atet yeçhatenanet ñerra'mrrate' ñeñt allsensarettetsa Partseshot.

³³ Puesheñarrña yacma ñeñt allo'tsen puerahuo, ñeñña' añ chorrena naya oneñeñ. Ñaña rranare'tapa' atet otapan Jesús:

³⁴ —¿Eso'mare'tcha'ña erro't peḗosey Jesús, pa' ñeñteḗ nazareto'marneshaḗ? Añecop'te' pehuapa o'ch pa'chencaterrey. Napa' o' neñotapaḗ. Papa' atarr Partsoḗ añ pellsensene' Pompore' ñeñt atarr nanac Parets.

³⁵ Tarraña Jesúsapa' ama muenache o'ch eñorana'cha. Ñañaapa' atet och:

—Pemma, te'pa' çhoḗaña caçhpa'nerre'ña añ acheñer.

Oneñeññapa' čha atanman yacmapa' alla o'shshe'ma e'ñe all shontena allohuen acheñenesha'. Allempoñapa' o' cachpa'ner e'ñe atfa, ama erroť pa'nme. ³⁶ Acheñenesha'ñapa' čha atarr toratspanet pueyočhret. Ñetñapa' atet otanna'tyeset:

—Ta'mca'ye, erroťente'ca'yeña Jesús po'ñoñ, atarrepa't huomenc po'ñoñ pen. E'ñe atet ñerra'mrrate' ñeñť allsensarettetsa ñeñť atarr ahua-mencatesha'. Ama't oneñeť erroť otenpa' atetčho' p̄ateñ. Po'ñočhca'ye te'pa' o' čha'nerr oneñeť.

³⁷ Allempoñapa' erracmañen allampaño'mar serrpare'tyeset ñeñť atet pena Jesús.

Allempo a'crratosan Jesús Simón Pedro pa'so'mue

(Mt. 8.14-15; Mr. 1.29-31)

³⁸ Allempoña Jesúsapa' čha'nerr puerahuoť o' ahuo' ñaña Simón pa'paclo. Allña Simón pa'so'muepa' čha atsna'ten, čha atarr nanac hueraten. Otapet Jesús:

—Te' yapa' yemneñ o'ch p̄a'crratos atsnañeť.

³⁹ Allempoña Jesúsapa' o' ponmosana atsnañeťpa' čha a'huañam̄p̄ose'ña po'urateña. Allempoña o' metua po'urateñapa' allenta tanta o' agapa-panet e'ñe cohuen o' yema'tapanet.

Allempo Jesúsapa' a'crraterran shonte' pa'namen atsnañeťečhno

(Mt. 8.16-17; Mr. 1.32-34)

⁴⁰ Ñeñte yetrocma allempo o' emuena atsne'pa' acheñenesha'ña al-lohuenet ñeñť atsna'tyets pamo'tsesha' ñetñapa' o' huapatyesnenet atsnañeť e'ñe Jesúsesho. Ñañaapa' na'yesianet pot ñesheto puesheña'ttset, attoña a'crratyesapanet allohuenet. ⁴¹ Ñaña shonte' acheñenesha' cachpatatyesapanet oneñeť ñeñť puerranaroť otnomue' Jesús:

—Papa' ñeñteř e'ñe po'ñočh Parets Puechemereř.

Tarraña Jesúsapa' a'mtsoñeñtanet, ama muenataneto o'ch eñorana'tnomet, tarro'mar ñetpa' e'ñe eñotnomet ñapa' ñeñť Cristotets.

Allempo Jesúsapa' serrpare'tatyesnoman acheñenesha' errařaren Galileo'mar

(Mr. 1.35-39)

⁴² Tsapatña o' puetarenpa' Jesúsñapa' ahua'muen a'yo all ama acheñempañooyaye. Acheñenesha'ñapa' e'name'ta'mueñet. Atteñapa' o' čhapa'muenet allo'tsen Jesús. Ñetñapa' ama mueneñeto o'ch erra sa'nmanet. ⁴³ Ñañaapa' atet otapanet:

—Napa' añ poctetsa nocop o'ch ahuen po'poñ anetso'mar, allpa'čho'ña o'ch neserrpare'tatyesnomanet ñeñť cohuen ñoñets, o'ch neñotatyesosanet Yompor po'cohuenña ñeñť attoch ayochreshattena ña, tarro'mar napa' ñeñtecopña llesenserren Nompor.

⁴⁴ Atteñapa' o' serrpare'tatyesnoman acheñenesha' errařaren Galileo'mar all apčha'yenet po'prahueto.

5

Atto Jesús rromatosanet shonte' cac

(Mt. 4.18-22; Mr. 1.16-20)

¹ Allempoña po'pocheño Jesúsñapa' e'ñe sa'patopño ten, ñeñña sa'ppa' añ pa'so'cheñ Genesaretas. Allñapa' huacha'toña shonte' acheñenesha'

o' čha echta'tatse'tanna'toset. Attoña ama't Jesús'pa' o'čha echta'toset. Ñetpa' añ muenenet o'ch e'mñotosñañet Yompor po'ñoñ. ² Jesúsña'pa' all entosan epna noñt e'ñe all sohua'puetso. Ñeñña po'taruas pene' ñeñt rremuene' cacpa' ñetña'pa' ama po'noñto'tsa'yeneto. Ñetpa' o' ahuanmuet a'yenet allcha' tsama'teneta' po'terraya. ³ Jesúsña' allpa' a'tapos puenarr noñto, ñeñt Simón po'noñt. A'tapospa' otan Simón:

—Pechtañpsen mame' rročha'sonet.

Jesúsña' anorros noñtopa' allotña yečhatosan allohuen acheñenesha'. ⁴ Allempoña serrpare'tatuanet, o' alla otterranerr Simón:

—Te'pa' o'ch ahuep rročha'sonet epopa' o'ch alla peterrayererr, te'pa' perrma'ch shonte' cac.

⁵ Simónña'pa' atet och:

—Yapa' o' Maestrocha' e'ñe yarepen torratsa terrayats e'ñe orrena ama't parra cac ama yerrmueñe. Te'ña paca' notene' o'ch alla neterrayererr ama'tpa' atetcha' nepa' o'ch alla neterrayererr.

⁶ Allempoña'pa' atetcho'pet, o' alla terrayerreterr. Terrayaña'pa' shonte' rroman cac nanac aton, čha muene' rrarre'tatan terraya. ⁷ Atteña'pa' agochet po'potantañ pamo'tset ñeñt po'noñto'tsa'yen o'ch huapuet ñeñtča' rromapretahuet cac. O'ña čhapuet o' esha'tanatet cac noñto e'ñe epno'mar chorreres cac noñto, čha muene' esha'tatan noñt. ⁸ Allempoña atet eñch Simón Pedro ñaña'pa' poma'yorñecma ponmana Jesús, concorposa pa'rrpōt, all otos:

—Amach Parteshacha' allo'na peyemtatsenno tarro'mar napa' ñeñten atarr ochñaen.

⁹ Atet otan Jesús pueyorñoť tarro'mar eñoteñ ñeñt atto rreman shonte' cacpa' Parets atet pātene'. Ama't allohuen ñaña ñeñt epuet taru- asenetpa' atarr nanac yorenet. ¹⁰ Ama't ñaña Jacobo ñaña Juan ñeñt Zebedeo puechemerasha' ñeñt parro taruasen Simón, atarr nanac yorenet. Allempoña Jesús'pa' atet otterranerr Simón:

—Amach čha peyorenatsto. Ñeñt atet pepena ahuatoteñ e'ne' cac te'ña'pa' atetcha' peperra e'nerre' ñaña acheñ ñeñtča' pame'ñaterra.

¹¹ Allempoña'pa' ahuanperret o'ch etsotuerret allecma etsotenet. Ñetña'pa' allempocma sohuanmuet allohuen ñeñt allpon echyenet. Allempoña'pa' coteret Jesús attoch pueyochresha' perranet.

Atto Jesús a'crraterran puesheñarr yacma ñeñt aptsarñať
(Mt. 8.1-4; Mr. 1.40-45)

¹² Allempo po'pocheño Jesúsña'pa' alla čherrerr po'poñ anetso. Allña'pa' huapoña puesheñarr yacma ñeñt osen puetsarñats ñeñt otenet lepra, atarr apočhtateñ. Entosan Jesús'pa' alla rromampsosya. Allña rromue- napa' allotña enamosan Jesús, atet otos:

—Ayochreshate ñerra'm pa muenatspa' pa ñeñtep atarr ahuamen- catesha' pa'crrataye'cherren allochña'pa' attoch e'ñe cohuen entuerren acheñenesha'.

¹³ Jesúsña' anretapa' allenta a'pñle', atet och:

—Napa' nemneñca'ye, metuerrepa'ña peptsarña attoch e'ñe cohuen enterrep allohuen acheñenesha'.

Yacmaña'pa' allorocma metuer pueptsarña. ¹⁴ Jesúsña'pa' alla otererr:

—Te' atto o' na'crraterep'pa' ama't e'ñe puesheñarrapa' amach pōtapsa'tatsche. Corneshachña pegatena' all peptsarseť. Atet naneť

Moisés ñoñets añ acheñrecop ñeñcha' a'crratare'terrtsapa' te'ñapa' o'ch es ñanom ñeñcha' ñapos all ñeñ Yomporecop. Allochñapa' attoch e'ñe cohuen enterreñ allohuen acheñenesha'.

¹⁵ Elloña atarr nanac serrpare'tyeñet, o' erracmañen epa'hua atto' pena Jesús. Ñeñto'marña shonte' acheñenesha' hua'cha'toñet attoch e'mñotoñet po'ñoñ ña'ña attoch a'crratyesanet allohuen pa'tsnañe'feret. ¹⁶ Tarraña ñapa' errotenopa' o'ch ahuerri a'yo all ama acheñempaño'yaye allcha' ma'yochena.

*Atto Jesús a'crraterran ña'ña ñeñt echarraña
(Mt. 9.1-8; Mr. 2.1-12)*

¹⁷ Po'pocheño allempo Jesús'pa' all ye'chaterranerr shonte' acheñenesha', allña allpononetpa' all anorr'cha'tyen ña'ña patantarr fariseonesha' ña'ña ñeñt atarr etsotayenayeñ ñoñets ñeñt atet anare't judioneshapoc. Ñetpa' pa'namen anetsot hua'cha'tyenet—Galileot ña'ña Judeot ña'ña Jerusaléno'. Jesúsñapa' atarr ahua'mencat peñ Pompor, attoña a'crratyesan shonte' ñeñt atsna'tyets. ¹⁸ Atteña o' huapatoñet ña'ña echarraña, huapata'mpset puechecna'pot. Ñetpa' añ muenenetañ o'ch be'toset o'ch e'ñe noset Jesúsesho. ¹⁹ Tarraña shonte' acheñenesha' ñeñto'marña ama eshcaye' abe'tosetofña atsnañe't attoch çhapachet e'ñe Jesúsesho. Atteñapa' a'tapatoset enot pocollato. Allñapa' o' a'rrote'toset pate'prarr echet allotña a'suata'mpset echarraña puechecnape'na. Attoña çhapachet e'ñe rro'cho allo'tsen Jesús. ²⁰ Jesúsñapa' eñotapanet ñetpa' atarr nanac yemteñet, ñeñto'marña atet otapan echarraña:

—Masheñcha' te'ña ña' ño'chñarpa' o' a'pretna'huare'tta.

²¹ Otue' atetpa' añña fariseonesha' ña'ña ñeñt atarr etsotayenayeñ ñoñets ñeñt atet anare't judioneshapoc, ñetñapa' otatse'tet ñañeñeta:

—Esesha' huañaca'ye o' achm'are'tanña Yompor. Arr patsropa' ama't puesheñarra ama eñalleña ñeñt peretnene' ochñarets, ñaptaña Yompor peretnene' ochñarets.

²² Jesúsñapa' eñotanet ñeñt atet otenet ñocop, ña'ñapa' atet otanet:

—Sapa' eso'mare'tcha'ña atet soctape'chatse'tyesña seyo'chro.

²³ Ñehua, sapa' çha soten ñeñt atet o' notue echarraña po'chñarpa' o' a'pretna'huare'tta, ñeñtpa' ama torrapahuoyaye. Sapa' añña atarr torrapo' senten attoch na'crrater çhoncha'ña ote': "Petantena, pechope'chnen." ²⁴ Ñehua, napa' o'ch neñotatas na' Ñeñten Acheñetosets, napa' apare'ten llesens attoch nach peretnerre' ochñarets añ patsro.

Ñeñto'marña Jesús allempopa' atet otan echarraña:

—Te'ña napa' o'ch notap: Petantena, peçhta'nen pemue' o'ch pechope'chnen, ahuenep' pepac'llo.

²⁵ E'ñe otue' atetpa' echarrañañapa' çha tantetsa e'ñe allorocma. Allohuenña acheñenesha' e'ñe entueñet. O' cheta'nenan po'mue' pa'ye'choçhtateñesha' Yompor o' ahuen pa'pac'llo. ²⁶ Allohuenña acheñenesha'pa' çha atarr cohuanrrortapueñet. Attoña ñetpa'çho'ña atarr cohuentayeññañet Yompor. Allohuenetñapa' atarr nanac yorennet, atet otyenet:

—Te'pa' o' yenterr ñeñt ama't ahua'tapa' ama yentareña ya ñeñt atarr cohuen.

*Allempo Jesúsapa' hua'ña'nman Leví attoch pueyochresha' per
(Mt. 9.9-13; Mr. 2.13-17)*

27 Allempoñapa' o' ahuerrerr Jesús. All oñempa' all entnoman puešeñarr ñeñt po'taruas pene' o'ch cobrenan acheñenesha' quelle ñeñt gobiernocop. Ñeñtñapa' añ pa'so'cheñ Leví*. Alla anen allecma apchenet quelle ñeñt gobiernocop. Jesúsñapa' otosan Leví:

—Te'pa' p̄octa'n attoch neyochresha' neperreḡ.

28 E'ñe otue' atet Levíñapa' cha tantnomtsa o' cotan Jesús. Attoña ñapa' e'ñe sohanman ñeñt allohuen pa'namen.

29 Allempoñapa' chapa'muen ñaña pamtarr allempo Leví pa'paclopa' yečcatatan shonte' rreñets attoch coshame'tam̄pesyet Jesús. All rrallme'chapreteñ shonte' acheñenesha'. Allo'tsa'yen ñaña ñeñt parro yemtena Leví. Ñetpa'cho'ña ñeñtaretta ñeñt po'taruas penet o'ch cobra'yenet acheñenesha' quelle ñeñt gobiernocop, tarraña ñetpa' puehquēñoḡe'na cobreñet acheñenesha' aton. Ñeñt rrallme'chapretene' Jesús. 30 Fariseonesha' ñaña ñeñt atarr etsotayenayeñ ñoñets ñeñt atet anareḡ, ñetñapa' sasare'teññañet Jesús pueyochresha'. Atteñapa' otarettet:

—Ta'm, eso'marte'ña serrallme'chapreteñña añ acheñeneshar ñeñt puehquēñoḡe'na cobra'yene' acheñenesha' aton quelle ñaña epas acheñenesha' ñeñt atarr ochñañenesha'chno.

31 Atet e'manet Jesús, ñañaapa' atet toma'ntatanet:

—Ñeñt e'ñe huomech entetsapa' ñetpa' ama e'neñetoña apartañ. Añña ñeñt atsna'tetspa' ñetñapa' chocma añ e'nenet ñeñtcha' a'rraterrahuet.

32 Napa' ama añecpaye' nohuapo attoch neçhore'tos ñeñt e'ñe atet entetsañ ñetpa' e'ño' cohuen es p̄ayenet. Napa' añecopña nohuapa attoch neçhore'tos ñeñt atarr ochñañ entyetsa. Allochñapa' attoch o'ch cotape'cherret ello e'ñe cohuen Yomporecop.

*Allempo Jesúsapa' eñotatanet atetcha' tore'tet Yomporecop ñeñt e'ñe
po'ñoçh sherbets*

(Mt. 9.14-17; Mr. 2.18-22)

33 Ñetñapa' alla otereterr Jesús:

—Ñeñt Juan pueyochresha'pa' chocma tore'tenet Yomporecop,† chocma ma'yochenet. Ñaña fariseonesha' pueyochresha'pa'cho'ña attecma penet. Tarraña p̄aña peyochresha'pa' eso'mare'tña ama atteye' peneto. Ñetpa' atta es rratse'tyenet, atta es orryenet.

34 Jesúsñapa' alla toma'ntaterraneterrpa' atet otanet:

—Ñeñt ahua'ñaretechno all rrallme'chapreteñet ñeñt e'ñe errete' sena'tetsa, ama pocteyaye o'ch yotanet “amach es serra'yestatsto”, tarro'mar ñeñt̄pa' atet coshapreteñet ñeñt sena'tetsa. 35 Tarraña ñerra'm esempo machayota sa'nerranet ñeñt sena'tetsa, ñeñtña parro yemuetyena allempoña ñetpa' e'ñe puellquēñoḡet caçhpa'huerretcha' puerrar, amach arrenaye' enterreto. Ñeñt̄pa' attochña tore'terret allempo Yomporecop e'ñe po'ñoçh. Arrpa' allohua huañ ñeñt atet Jesús toma'ntata ña sena'tostsa.

* 5:27 Levípa' ñeñtara ñeñt sochenet Mateo. † 5:33 Añ tore'teñetspa' añecop o'ch yetorra Yomporecop. Amach añecpaye atomat, ñeñt̄pa' añecpa mameshacop o'ch yequeçhpa' yerrar.

³⁶ Elloñapa' o' alla toma'ntaterraneterr ñeñt atet yeçhen judionesha' arr patsro ñeñto'marña atet otanet:

—Ñehua, ñerra'm yeçhen epma yeshtam, pa'terr emarr ñaña po'poñ mellashaña' amach yerrarratstoña emarr yeshtam alloch yellta' yeshtam mellashañ all rrrarra'nen. Tarro'mar ama't atet ye'patsechpa' ñeñtpa' e'ñech orrena. Ama't yeshtam emarrpa' o'huañcha' cohuenta all yerrarreñ. Ñaña yeshtam mellashañ ama't o' yelltereñ emarropa' amach alla cohuento tarro'mar ñeñt allo o' yellterpa' ama mellashañecmayaye, ñeñto'marña amach ñeñtatere.

Ñeñtpa' attoña Jesúsapa' eñotatanet ña poçta'ña e'ñe etserra. ³⁷ Jesúsñapa' alla toma'ntaterraneterr po'poñ ñeñt atet yeçhena judionesha' o'ch yeçcatenet pa'rrom orrot. Ñeñto'marña atet otanet:

—Ama't pueseñarrofeyapa' amach yeshatstoña vinos emasa mel-lasha'ñañ orroto ñeñt ayeçhcataret pa'rrom. Tarro'mar ñerra'm atet yepe'pa' o'ch chasa'ña vinospa' çhach a'ptsan orrot, vinosñapa' e'ñech shebhua, ñeñtña orrotpa' ama't mamesha'pa' amach es sherberro. ³⁸ Añña ñerra'm emasa vinos, arrcha'ña yeshe' emerra orroto ñeñt ayeçhcataret pa'rrom. Allochñapa' ama'tcha' chasa' vinospa' amach çha potsa'psoña vinos ñeñtpa' allach yeçhen epo'mar.

Ñeñtpa'çho'ña attoña Jesúsapa' eñotatanet ña poçta'ña e'ñe etserra. ³⁹ Po'poñonetpa' alla toma'ntaterraneterr Jesús, ñeñtpa' atet oterraneterr:

—Ñeñt e'ñe yeçhenaya o'ch orran co'nes ñeñt atarr chase'pa' ñapa' ama mueno o'ch orran co'nes emasa, tarro'mar ñapa' atet oten ñeñt atet yeçhena ahuatoteñpa' ñeñña e'ñe cohuen enten.

6

Allempo Jesús pueyochresha' taso'tañpesyesnomuet trigo añe yetro allempocma amesen judionesha'

(Mt. 12.1-8; Mr. 2.23-28)

¹ Allempoña çherrerr allempo çhocma amesen judionesha'. Allempoña Jesúsapa' arr oñem chetso'mar epuet pueyochresha'çhno. Allempo oñenet chetso'mar pueyochresha'ñapa' taso'tañpesyesnomuet puechmña'tets trigo a'she'challme'chyesnomet attot rrocllome'chachet o' rra'yesnomet. ² Ñeñtña patanta'tets fariseonesha'pa' che'ptare'tanet, atet otarettet:

—Eso'mare'ña atet sepene ñeñt ama poçteyaye o'ch atet ye'pa tarro'mar te'pa' añe yetro ñeñt atet anaret ahuatoteñ allempocmach yamesen.

³ Jesúsñapa' otanet:

—Sapa' ama'trra selleyareña añ ñoñets all oten ñeñt atet pa' ahuat David allempo cheporra'nma epuet ñaña allohuen ñeñt co'tene'. ⁴ Ña allempopa' be'tosos Yompor pa'paclo, allñapa' chetosan pan ñeñt atma'ntataret atet ñerra'mrrate' ñeñt nenet all Partsocop. Ñehua, ñeñt panpa' ama poçteyayñe o'ch esesha' rre'. Ñeñtpa' añach ñapueñ rrene' cor-naneshachno; ñeñtpa' e'ñe atet anuaret judioneshacop. Ñeñtña panpa' o' chetos David, rros, rratosan ñaña allohuen ñeñt epuet.

⁵ Allempoña alla oterraneterr Jesús, ñeñtpa' atet otanet:

—Ñeñto'marña te'pa' o'ch notas, na Ñeñten Acheñetosets ñeñten allsen-sareten, naca'ye atet otets este' poctetsaña ñeñtcha' atet ye'pa añe yetro allempocma yamesen.

Allempo Jesús'pa' a'crraterran ñeñt chelletsa pot
(Mt. 12.9-14; Mr. 3.1-6)

⁶ Allempoñapa' çherrerr po'pocheño ñeñt yetñatsro allempocma amesenet. Jesúsñapa' be'tosuener judionesha' po'prahuo. Allñapa' yeçhatyesuenanerr acheñenesha'. Allñapa' allo'tsen ñaña puesheñarr yacma ñeñt çha chellena pot po'cohuenrot. ⁷ Acheñenesha'ña ñeñt atarr etsotayenayeñ ñoñets ñeñt atet anaret epuet ñaña fariseonesha' ñetña allpa' Jesús'a atarr cohuana'tyenet attoch enteñeterr ñato'rraña o'ch a'crratenanerr acheñ añe yetro allempocma amesenet. Ñerra'm o'ch a'crratenanerr ama't puesheñarra acheñ añe yetro allempo amesenet, allempoñapa' esheccha' a'metanpeñeta' añtcha'taretsho. ⁸ Jesúsñapa' eñotanet ñeñt atet cotape'chatse'tyenet pueyoçhreto. Ñaña'pa' atet otan yacma ñeñt chelletsa pot:

—Apon pa'tomos arrma.

Yacmaña huapapa' o' tomos all rroçho. ⁹ Jesúsñapa' atet otanet:

—Ñehua, napa' o'ch na'p'to'tas: ¿Erra'tsena'tña ñeñt e'ñe pocte' senten ñeñtcha' atet ye'pa añ yetro allempo yamesen? Ñato' o'ch atet ye'pe' e'ñe cohuen po'psheñeñ, amapa' ñato' o'ch atet yepoñ ñeñt ama pocteyaye. Ñato' añte' pocte' senten o'ch ya'crrach acheñ amapa' añte' pocte' senten amach ya'crratatsche çhachña yemtsatach.

Ñetñapa' ama't puesheñarroçetapa' ama eseshaye' anapuenaye entaye.

¹⁰ Ñaña'pa' cohua'yesan allohuen ñeñt anorrçhets all, allempoñapa' otan ñeñt chelletsa pot:

—Te'pa' o'ch nota'p: Petapuerr p'ot.

E'ñe otue'pa' ñaña'pa' allentepa'tcha' tapuerran pot, o' e'ñe cohuenterra pot. ¹¹ Fariseonesha'ñapa' ñeñtña atarr atsrre'matahuet. Allempoñapa' cotape'chatanna'tet, atarr o'pachet Jesús.

Allempo Jesús'pa' acran çharrasheña ñeñt puechetsa epsheña ñeñtcha' llesensa'

(Mt. 10.1-4; Mr. 3.13-19)

¹² Allempoña Jesús'pa' o' alla ahuererr a'yo aspeno allcha' ma'yochena'. Allñapa' arepen ma'yochaya Pompor. ¹³ Tsapa'tña puetarenpa' agota'muenan allohuen ñeñt pueyochresha'çhno pen. Allempo çha'cha'tet ñeshopa' ñaña'pa' o' acrapan ñeñt çharrasheña ñeñt puechetsa epsheña ñeñtcha' llesensa' ñeñtcha' serrpare'tyetsa' allemeñ anetso'mar. ¹⁴ Ñeñt llesensa' ñeñt'pa' añe'çhno: Simón ñeñt soherr Pedro, allotpa' ñaña pa'mo'nasheñ Andrés, allotpa' Jacobo* ñaña pa'mo'nasheñ Juan, allotpa' Felipe, ñaña Bartolomé, ¹⁵ ñaña Mateo ñaña Tomás ñaña Jacobo ñeñt Alfeo puechemer, ñaña ñeñt po'psheñeñ Simón ñeñt cananistanesha' ñeñt atarr torratse't pa'netsrecop, ¹⁶ allotpa' ñaña Judas† ñeñt Jacobo pa'mo'nasheñ, allotpa' ñaña po'psheñeñ Judas Iscariote ñeñtcha' pomuerre' tsapa'tonet Jesús.

* 6:14 Jacobopa' ñeñtara ñeñt sochenet Santiago. † 6:16 Judaspa' ñeñtara sochenet Tadeo.

Allempo Jesús pa' ye'chatenan shonte' acheñenesha'

(Mt. 4.23-25)

¹⁷ Allempoña huerra Jesús aspentot epuet pueyochresha', tom'cha'tuerret all aspenet pacñe'tpener poño po'mopñero. Allñapa' o' thacha't shonte' po'potantañ acheñenesha' ñeñt' pueyochresha' pen. Ñaña allo'tsa'yen shonte' acheñenesha' ñeñt' huachetsa allemeñ anetso't—Judeot ñaña Jerusaléno't, ñaña sa'patopño'marnesha' ñeñt' huetsa Tiro't ñaña Sidóno't. Ñetpa' añecopña huachenet o'ch e'mñoteret ñamet Jesús ñeñt' atet serrpare'ten ñaña añecpa'naña huachenet attoch a'crratyesapanet Jesús patsnañeferet. ¹⁸ Ama't ñaña allohuen ñeñt' muerochtatyen oneñe't ñaña pa' e'ñe a'crratyesuapanet. ¹⁹ Allohuenña acheñenesha' pa' atarr mueneñet o'ch a'p'lloset Jesús tarro'mar ñapa' ña atarr ahua mencatesha', e'ñe ña po'huamencot a'crratyen an allohuen acheñenesha'.

Atto atarr cosheñtso'tsa'yen patantarr ñaña atarr llequëñtso'tsa'yen po'potantañ

(Mt. 5.1-12)

²⁰ Allempoña Jesús pa' cohua'yesan ñeñt' pueyochresha' pen, ñaña pa' atet otanet:

—Ñeñtes atarr huocchañnesha' entetsa ñeñtescha'ña atarrcha' cosheñtso'tsa'yenes tarro'mar sapa' o'pataterrrsach Yompor po'cohuenña atto atarr ayochreshattena ña.

²¹ 'Ñaña sapa' ñeñtes cheporrare'tyetsa te' ñeñtescha'ña atarrcha' cosheñtso'tsa'yenes tarro'mar Yomporcha'ña e'ñe señmataterre'.

'Ñaña sapa' ñeñtes yahuetsa te' e'ñe sellquëño't ñeñtescha'ña atarrcha' cosheñtso'tsa'yenes tarro'mar Yomporcha'ña e'ñe seche'taterre' socsheño't.

²² 'Ñaña sapa' atarr cosheñtso'tsa'yenes ñerra'm esempo e'moñe'tenset no'mar ñerra'm esempo mueño'tenset, ñerra'm esempo pueasare'teño'tetas sochatse'tenset tarro'mar sapa' na same'ñena Ñeñten Acheñetosets. ²³ Allempo atet penset ñeñt' ama cohuenayaye, sañapa' socshepa'ch nanac ñaña señoche pa'ch shonte' ñeñt' o'patatensa Yompor pue'ntaño ñeñt'cha'ña atarr socshaterre'. Ñehua, ñetpa' pa'tañneshañ pa' attecma muerochtatyese'te' ñaña ñeñt' a'mta'yese'te' Yompor po'ñoñ ahua't.

²⁴ 'Tarraña te'pa' o'ch notas sa ñeñtes atarr e'cllayoretas ñeñtes echene' ora allpon ñeñt' e'ñe socpa. Sapa' ñeñtescha'ña atarr llequëñtso'tsa'yenes tarro'mar esempopa' huañerrcha' ñeñt' socshatene'.

²⁵ 'Ñaña atarr llequëñtso'tsa'yenes ñeñtes atarr esocmañen es echyets allo e'ñe señmatena seyeteño't. Cherrcha' allempoch atarr sepallterra ñeñt'cha' serrar seperr.

'Ñaña atarr llequëñtso'tsa'yenes sa ñeñtes te'pa' e'ñe socsheñnesha' seche'tatsetyena. Cherrcha'ña allempoch seyahuerria sellquëño't.

²⁶ 'Ñaña atarr llequëñtso'tsa'yenes ñerra'm esempo allohuen acheñenesha' e'ñech cohuen entapretenset, e'ñe cohuen eñosyenet socop. Tarro'mar ñetpa' atet pete't pa'tañneshañ ahua't, e'ñe cohuen eñosyese'te' añ acheñreneshacop ñeñt' ama't ama Yomporeye' po'ñoñ a'mta'yese'te'.

Atto Jesús pa' ye'chatosanet amorrentpo'ch yeñch ñeñt' ye'moñe'tyene'
(Mt. 5.38-48; 7.12)

27 'Sa ñeñtes ne'mñotene' o'ch notas ñeñtcha' atet sepa e'ñe cohuen, semueryach ama't ñeñt se'moñe'tene'. O'ch atet sepe' e'ñe cohuen. 28 Ñaña ama't erra'tsen ñeñt sarrnomare'tenaya sañapa' o'ch senamaterrñañ Yompor pa'nateña. Ñaña ñeñt sesasare'tene' sañapa' o'ch sema'yocham'penanet. 29 Nehua, atet ñerra'm esempo esesha' pue'moñe'teño'fetas o'ch taclaset setsa'po, sañapa' poctepa'chña señch taclerserrepap' ñaña po'pshen'taño'. Ñaña ñerra'm esempo esesha' seprratam'pse' seshtam, sañapa' poctepa'chña señch puerrratam'psasetepa' seshtam ñeñt muenenet ama't ñaña po'pmañ seshtam allo sepmatena. 30 Ñerra'm esesha' es senamuene' sañapa' sapepa'ch ama't esesha. Ñaña ñerra'm esesha' seyoratsre'tam'pse' sañapa' amach alla senamatstere apuerrsetepa' alla. 31 Ñehua, ñerra'm erra'tsente' e'ñe cohuen senten ñeñt semnen sa ñeñtcha' atet ponas po'psheñeñ, sapa'cho'ña e'ñech attecma sepanet saña.

32 Ñaña sa ñerra'm aña semorrentena ñeñt atarr semorrentenaya saña, ñeñtpa' amach e'ñeye' sorratenoña ñeñt e'ñe po'ño'ch cohuentetsa, tarro'mar ñeñt ama ame'ñenayo Yompor ñetpa aña morrentenet ñeñt e'ñe morrentenahuet ñamet. Añña atarr cohuentetsa ama't ñeñt ama yemorrentenayepa' o'ch yemorreñcha e'ñe cohuen. 33 Ñaña ñerra'm aña e'ñe cohuen seyepa'yen ñeñt seyepa'yene' saña, ñeñtpa' ama e'ñeye' sorratenoña ñeñt e'ñe po'ño'ch cohuentetsa, tarro'mar ñeñt ama ame'ñenayo Yompor ñetpa' aña yepa'yenet ñeñt yepa'yenahuet ñamet. 34 Ñaña ñerra'm añecpa es sartanna'tyena attoch ellopa' o'ch alla apuerrset saña, ñeñt atet sepenapa' ama e'ñeye' sorratenoña ñeñt e'ñe po'ño'ch cohuentetsa; añcha'ña es saretyena po'psheñeñ ama't ñetpa' ama'tcha' ama apuerrseto ama't coñe'ta, tarro'mar atet pena ñeñt ama ame'ñenayo Yompor ñerra'm eñoteñet o'ch alla aparetterret ñamet esheccha'ña archet po'psheñeñ. 35 Tarraña napa' o'ch notas, sapa' añe'nachña semorrentena ama't ñeñt se'moñe'tene'. Ñaña sapa' añe'nachña seyepuen ama't ñeñt ama seyepuenaye. Ñaña sapa' añe'nachña es saretyena ama't ñeñtcha' ama sapuerraye. Ñerra'm atetcha' sepa Yomporñapa' apuerrescha' ello ñeñtcha' atarr socshatuerre'. Ñapa' allempoch e'ñe puechemer perres, ñeñtara Yompor Ñeñt Nanac Parets. Tarro'mar ñapa' añe'naña muerena ama't ñeñtcha' ama coshaterraye ña, ñeñtara ñeñt ama cohuenaye' es petso. 36 Sapa'cho'ña atarrepachña semueranna'ta e'ñe atet pena ñeñt Yeyomporer yepen atarr muerenya yaña.

E'ñe attotapa' amach yotteñe'channa'tatsto

(Mt. 7.1-5)

37 'Sapa' amach sotatsche po'psheñeñ "ama pocteyaye ñeñt atet sepa'yena", allochñapa' amach otuerrso saña Yompor ama pocteyaye ñeñt atet sepa'yena saña. Ñaña e'ñe attotapa' amach sottene'chatsche po'psheñeñ allochñapa' Yomporpa'cho'ña amach otteñe'chuerrso saña, chochña e'ñe cohuen sepretnannena allochñapa' Yomporpa'cho'ña e'ñech cohuen peretna'huerres saña. 38 Ñaña sapa' e'ñech cohuen es sapanna'tyena allochñapa' Yomporpa'cho'ña e'ñech cohuen es apuerres saña. Shontech nanac es apuerres, atet ñerra'mrrate' cho es e'chorratenset soshaco atet ñerra'm chop e'charet. O'ch chorrapa' o'ch

a'rrapuet esheccha' esha'tereter terr po'poñ, ñerra'm o'ch chorrerrrrpa' o'ch pa'shmuet attoch e'ñe a'tamo'yonaset. Ñeñtpa' añ toma'ntena atto es apueney Yompor nanac aton. Ñaña errponcha' saþ po'psheñeñ, sapa'cho'ña e'ñech allpon apuerres saña Yompor.

³⁹ Allempoña Jesús pa' atet toma'ntaterraneter, ñeñtpa' atet otanet:

—Ñeñt aporo'yetpa' ñapa' amach errotentot echa'nmano po'psheñeñ ñeñt parro aporo'yetecmuet. Tarro'mar ñerra'm atet penet, ñerra'm arrorotonta echa'nmana'tnomuetpa' epsheño'maret chach shora'nmuet arroroto. Arrpa' allohua ñeñt atet toma'ntatanet atet ñerra'm ya allempo ama yocape'cherra' ñeñt cohuentetsa Yomporecop amach errotentot yocape'chache po'psheñeñ ñeñt ama eñotenaye ñeñt cohuen enten Yompor.

⁴⁰ 'Ñeñt ay'chatarettetsapa' ama't puesheñarra amach errotentot metanetoña ñeñt allpon eñoten ñeñt yechatene'. Ama't allempo e'ñe ay'chatarettapa' e'ñech allpona ye'cha' ñeñt allpon eñoten ñaña ñeñt yechate'. ⁴¹⁻⁴² Amach atet sentatsche po'potantañ ñerra'm ñetpa' ama cohuenaye' es peneto ama't sapa' ama sentenoña ñeñt atet seþa'yena sa; ñeñtpa' ello señtaneña po'potantañ ñeñt atet es þa'yenet ñet. Ñerra'm ama cohuenaye' es sepeno saña pa' amach sotatscheña po'potantañ: "Masheñcha' napa' o'ch noctape'chatterreþ e'ñe cohuen." Tarro'mar ñerra'm atet sepenapa' cha sommo'chena. Ñanomcha'ña añ sehuapore'terr ñeñt ama cohuenaye' sepeno sa, allochñapa' attoch seño ch cotape'chate' samo'ts e'ñe cohuen. Ñeñtpa' añ toma'ntena o'ch senten po'psheñeñ pa'clloyot'sen puepachña ama't sa seclloyopa' allo'tsen tsach; ñeññapa' ama senteñe. Ñerra'm atetpa' amach errotentot socheña po'psheñeñ: "Masheñcha' napa' o'ch nechterrnaþ pecloyot pepachña." Tarro'mar añ tsach ñeñt seclloyot'senpa' cha a'npuennasña attoch e'ñe cohuen es sentyen. Ñanomcha'ña añ sehuapore'terr tsach seclloyot allochñapa' attoch e'ñe cohuen es sentyen. Attochña e'ñe cohuen sechtterrñañ po'psheñeñ puepachña pa'clloyot.

Allohuen acheñ ñeñt e'ñe po'ño ch cohuen acheñer, ñetñapa' añcha' orrtatyenet ñeñt e'ñe cohuenare'

(Mt. 7.17-20; 12.34-35)

⁴³ 'Tarro'mar allohuen acheñ ñeñt e'ñe po'ño ch cohuen acheñer, ñetñapa' añcha' orrtatyenet ñeñt e'ñe cohuenare'. Tarraña po'potantañ acheñenesha' ñeñt po'ño ch ama cohuenayaye ñetñapa' añach orrtatyenet ñeñt ama cohuenayaye. Ñeñtpa' atetcha' netma'ntaterrsa: Ora allohuen ñeñt e'ñe cohuen narmetsoch, pue'merpa'cho'ña e'ñech cohuenare'. Añña po'pchañechno narmetsoch ñeñt ama cohuenayayepa' pue'merpa'cho'ña amach e'ñe cohuenayaye. ⁴⁴ Ñeñto'marña attoña yeñoten erra'tsente' ñeñt e'ñe cohuenare' narmetsoch ñaña ñeñt ama cohuenayaye, pue'merotña e'ñe yechme'teñ. Ñaña yapa' e'ñe yeñoteñ ama arro'teye' yetoquënoña llo'm ajchot. Ñaña ama arro'teye' yetoquënoña ap rrenagachot.† ⁴⁵ Ama't erra'tsena acheñer ñeñt e'ñe po'ño ch cohuen, ñapa' añcha'ña orrtaten ñeñt e'ñe cohuenare' cotape'chen pueyo'chro tarro'mar pueyo'chro allña shonte' cotape'chenan ñeñt cohuentetsa.

† **6:44** Ñehua, Jesús añ toma'ntatanet uva ñaña higo ñeñt puenareñ penet all pa'nyo.

Tarraña po'poñ acheñer ñeñt po'ñoçh ama cohuenayaye, ñapa'cho'ña añach orrtaten ñeñt atet cotape'chen pueyoçhro ñeñt ama cohuenayaye tarro'mar pueyoçhro allña shonte' pa'namen cotape'chenan sosya'tsañ. Tarro'mar ñerra'm shonte' yoctape'chen yeyoçhro ñeñt cohuentetsa, ñeñtpa' e'ñech ñeñña cohuen yeserrpare'ten. Tarraña ñerra'm shonte' yoctape'chen ñaña yeyoçhro ñeñt ama cohuenayayepa' ñeñtpa'cho'ña e'ñech ñeñña yemnen o'ch yeserrpare'teñ.

Atto Jesús toma'ntatana acheñ ñeñt e'ñe eñotene' ñeñt po'ñoçh sherbets ñaña ñeñt ama eñotenaye ñeñt sherbets
(Mt. 7.24-27)

⁴⁶ 'Sapa' eso'maruañaca'yeña sotenen napa' Sa'yochreshatero' sepe-nen, sapa' amaca' çhoye' same'ñenno ñeñt atet o' notuas. ⁴⁷ Allohuen erra'tsencha' huapatsa nesho ñeñtcha' name'ñenaya na ñaña ñerra'm e'mñotennanet neñoñ ñeñt atet cohuen neyçhatenanet ñerra'm atet e'ñe penet, ñetñapa' atarrcha' eñotenet ñeñt e'ñe po'ñoçh sherbets. ⁴⁸ Ñeñt acheñer ñeñt atet petsa o'ch netma'ntacha atet ñerra'mrrate' puesheñarr yacma ñeñt atarr es eñotets ñeñt tomatene' pocoll ñeñt e'ñech echarr penan pa'paquëll. Ñañapa' atarrcha' o'pono eñan pats attoch e'ñe echarr ñan po'quellpach. Atteñapa' o' çhap allempo apellchena oñ, pocollñapa' ama a'mato apellche' tarro'mar quellpachpa' atarr huomenc atomataret. ⁴⁹ Tarraña po'potantañ ñeñt e'muene' neñoñ ñetña ñerra'm ama atteye' peneto ñeñt atet notenanet, ñetñapa' e'ñech attet ñerra'mrrate' puesheñarr yacma ñeñt ama es eñoto. Ñapa'cho'ña o' tomataneñ pa'paquëll tarraña ñañapa' ama atarr o'ponoye' eñanoña pats attoch e'ñe echarr ñan po'quellpach. Allempoñapa' apellcha oñ apellche'ñapa' çhepa'tcha' a'matamposos pa'paquëll. Pocollñapa' e'ñe poc-tacma muello'tstosa.

7

Atto Jesúsapa' a'crraterran capitán pa'taruasañer; ñeñt capitánpa' romo'marnesha'
(Mt. 8.5-13)

¹ Allempoña Jesúsapa' serrpare'tatuerranerr allohuen acheñenesha' ñeñt e'mñotene', ñañapa' ahurrer; o' çhurrer Capernaumo. ² Allñapa' allo'tsen puesheñarr yacma ñeñt solltar po'cap'taner, ñeñtpa' romo'marnesha', ama judioneshayaye. Ñeñtña capitánpa' echenan puesheñarr pa'taruasañer çha atsna'ten atarr pa'nattena, ñañapa' atarr morrentenana pa'taruasañer. ³ Ñeñtña capitánpa' allempo e'mare'tan Jesús o' alla çherr Capernaumo, ñañapa' o' mueñan patantarr acheñ ñeñt pompornesha' pen judionesha', o'ch oteñeta' Jesús atto agotateñ capitán o'ch a'crraterrñaña' pa'taruasañer. ⁴⁻⁵ Allempoña çhapuet Jesúseshopa' ñetñapa' atet otoset:

—Ñeñt capitánpa' ñapa' atarr cohuen acheñ, ñapa' atarr morrentenya ya ñeñtey israelena'tarey, ama't yeprahuapa' o' tomatatuosnay. Ñeñto'marña ama't yapa' e'ñe pocte' yenteñ o'ch peyenpueña' ñaña, ñapa' ama't ama judioneshayaye. Attoña atarr enamueñet Jesús attoch yenpuenana' capitán.

⁶ Allempoñapa' cota'nerranet Jesús. Chapmochet capitán pa'paclo, capitánña'p' mueñerranerr po'potantañ acheñ ñeñ parro yemtena ñeñcha' otapue' Jesús atet oten capitán:

—Yapa' atet otapuey capitán atto'ch yotapañ: “Amach Ayochreshate atsrre'mo'chen nentatatstapape tarro'mar napa' ama cohuenayayno attoch pebe'tosapo'tariñpesna nepaclo. ⁷ Napa' ama cohuenayayno ñeñto'marña aña nemñen po'psheñeñ ñeñcha' nepoctatapañ, ñeñcha' p'otap correrrepa' na'taruasañer, ñaña'p' acrrerroche'ch. ⁸ Tarro'mar napa' ñeñten ñeñ atet petsa ñeñ atet otenen ñeñ neyechenaya. Ñaña napa'cho'ña eñall ñeñ neyechena namñ ñeñ nesolltarer nepen. Ñerra'm puesheñarr solltar noteñ: Papa' o'ch ahuep' a'yo, ñaña'p' o'chcho' ahuo'. Ñaña po'psheñeñ solltar ñerra'm o'ch noch: Papa' apon arr, ñaña'p' o'chcho' huapa. Ñaña po'psheñeñ na'taruasañer ñerra'm o'ch noch: Papa' arrcha' petaruasa'muen, ñaña'p' allcha'cho' taruasa'muen. Ñeñto'marña napa' neñoteneñ ñerra'm erroten p'otenpa' e'ñechca'ye atet pena.”

⁹ Allempo e'man Jesús ñeñ atet oten capitán, ñaña'p' alla cohua'yesan allohuen acheñenesha' ñeñ cota'nene'. Ñaña'p' atet otanet:

—Errotenotuañaca'yeña atarr yemtena, ñaña'p' amaca'ye judioneshayaye. Napa' o'ch notas, ama't ahua'p'apa' ama nentareña acheñ ñeñ e'ñe atet neyemtenaya, ama't allohuen israelena'tarnesha'p' ama't puesheñarra ama nentareña ñeñ atet atarr neyemtenaya. Ama'tpa' correrrepa' pa'taruasañer.

¹⁰ Allempoña ñeñ pocte' Jesús o' ahuanerret capitán pa'paclo. Ñetña'p' entuerrñañet capitán pa'taruasañer o' e'ñe correrra.

Atto Jesús'pa' tantaterran arromñañ ñeñ rretorranesha' puechoyor

¹¹ Allempo allponmaterrerr; Jesúsña'p' ahuererr po'poñ anetso, ñeñ añets añ pa'so'cheñ Naín. Alla cota'huanererr pueyochresha' ñaña shonte' po'potantañ acheñenesha'. ¹² O' chapmochet all allotecma be'tenet attoch chapuet anetso. Allotña'p' cha'nma'cha'tos ñeñ anene' arromñañ, o'ch pampueñeta'. Arromñañña'p' asheñorr ñeñ e'ñe po'p'atrorr pen pachor. Pachorña'p' rretorranesha'. Shonte' acheñ ñeñ allo'marnesha' ñeñ llecapretnenaya rretorranesha' all cota'neñet. ¹³ Partsesha'ña Jesús allempo entapan rretorranesha' puellcapreteño'pa' atarr muerosya. Ñaña'p' atet otapan rretorranesha':

—Amach no'cha peyahuatsto.

¹⁴ Allempoña ponmapana arromñañ, a'plata'tosñañ po'cajon. Ñeñña anene'pa' alla tom'cha'toset. Jesúsña'p' otan huepuesha' ñeñ rromuets:

—Napa' o'ch notañ: ¡Te'pa' o'ch petanterra!

¹⁵ E'ñe otue'pa' ñeñña arromñañpa' allenta tanterra cha eñorerrrtsa. Jesúsña'p' o' alla apuerrñañ pachor. ¹⁶ Acheñenesha'ña'p' atarr nanac yorennet. Po'yorño'etpa' atarr aye'cho'chtateññañet Yompor. Ñetña'p' atet otyenet:

—Te'pa' o' orrtonaya puesheñarr ñeñ atarr sherbets ñeñ a'm'tene' Yompor po'ñoñ. Yomporpa' o' yerpuerrya ñeñtey e'ñe pueyochreshay peney.

17 Attoña acheñenesha'ñapa' epaye' serrpare'tyesuerret ñeñt atet pa'yena Jesús. O' e'ñe epa'hua ora Judeo'mar ñaña ora erracmañen allampaño'mar.

Juan ñeñt apatañtase'tpa' mueñan pueyochresha' Jesúsesho (Mt. 11.2-19)

18 Añña Juan ñeñt ayottam̄psaret, ñaña'ña' chocma serrpare'tateñ pueyochresha' ñeñt atet pa'yena Jesús. 19 Atteña Juanñapa' agotatan epsheña ñeñt pueyochresha' pen ñeñtcha' mueña Jesúsesho ñeñtcha' a'p̄to'tenaya' Jesús po'ñoçhte' ñapa' ñeñt Cristotets ñeñt atarr cohuenet ahuatoteñ, ñato' amate' ñeñteyayepa' añcha' cohuet po'psheñeñ ñeñtcha' huapatsa. 20-21 Allempoña ñetpa' ahuanmuet. Allempo chapuet allo'tsen Jesús, Jesúsñapa' añ torra'yena a'crratanatyese' shonte' acheñenesha' ñeñt atsna'tyets ñeñt pa'namen mueroçhtatyenuet. Ñaña ñeñt chorra'yena oneñeñ ñapa' o' e'ñe caçhpatatuerranet oneñeñ. Ñaña shonte' aporo'yeteçhno ñaña'ña' o' alla e'ñe cohuatyesuerranet. Ñeñtña Juan pueyochresha'pa' a'p̄to'toset Jesús, atet otoset:

—Juan ñeñt apatañtase't Yomporecop yapa' ñeñtña yemñene' o'ch yotenpa', ñato' p̄ate'ña ñeñtepte' e'ñe po'ñoçh Cristotets ñeñt atarr yecuen ahuatoteñ o'ch huapa; ñerra'm amate' ñeñteyayepa' o'ch e'ñe p̄otey allochñapa' añcha' yecua' po'psheñeñ ñeñtcha' huapatsa ñeñt e'ñe Cristo.

22 Jesúsñapa' otapanet:

—Te'pa' o'ch ahuerres seserrpare'tatuercha' Juan ora allpon ñeñt atet sentyesuennana' arr ñaña ora allpon ñeñt atet se'myesuennana' arr. O'ch e'ñe seserrpare'tatuer ora ama't atto aporo'yeteçhno'pa' te'ñapa' o' e'ñe necuatyesuerranet, ñaña ñeñt checa'repayetspa' te'pa' o' e'ñe chope'chyuesuerret, ñaña ñeñt osyen puetsarñats, te'pa' o' e'ñe a'cohuentataretuerret ñamet, ñaña paquetneshaçhno'pa' ama't ñetpa' te'ñapa' o' e'ñe e'myesuerret cohuen, ama't ñaña ñeñt rromayets te'ñapa' o' alla atatataretetuerret, ñaña ama't ñeñt huocchañneshaçhno te'ñapa' o' e'ñe neserrpare'tatuerranet añ cohuen ñoñets alloch qeshperret ñamet.

23 Jesúsñapa' alla oterranerr Juan pueyochresha':

—Ñaña ellonetpa' o'ch sotuer Juan ñeñt atet notenes: Atarr cosheñtso'tsen ama't allohuen ñeñt atarr neyemtenaya na, ñeñt ama e'nenaye po'psheñeñ ñeñtcha' coshaterrahuet.

24 Allempoña Juan pueyochresha'pa' o' ahuanerret. Jesúsñapa' alla serrpare'taterranerr acheñenesha' ñeñt atet pe't ahuaña Juan, ñeñt'pa' atet otanet:

—Ahuaña allempo sete't amayo all serrpare'ten Juan, sapa' amaca' añeçpaye' sete'teña all o'ch sentena' amuesma' atet a'yma'tateñ m̄orr. 25 Ñaña amaca' añeçpaye' sete'teña all o'ch sentena' ñeñt atarr coçhnesha'tetsa pa'shtam all, tarro'mar yeñoteñ amayopa' amaca'ye eñalleña all ñeñt atarr coçhnesha'tetsa pa'shtam. Yapa' yeñoteñ arrña yentenña ñeñt atarr coçhnesha' chorra'yenaya shetamuets añcha'taretepahuo. 26 Sapa' añeçpoca'yeña sete'tña amayo o'ch sentena' all ñeñt po'ñoçh a'mtene' Yompor po'ñoñ. Napa' o'ch notas, Juanpa' atto atarr sherbenan Yomporpa' ello metana'tuenan allohuen ñeñt atto a'mitenet Yompor po'ñoñ. 27 Tarro'mar Juanpa' ñocop eñose't Yompor

ahuat. Ñehua, allempopa' atet otne't na ñeñt atet'cha' p'osa Juan nocop esempoch huapa, ñeñt'pa' atet anaret' ñoñets ahuatoteñ:

Papa' peñoche'pa'ch napa' o'ch nemñonañ p'uesheñarr ñeñt'cha' ñanom otatsa ñeñt'cha' p'a'cohuentatyese' p'ocop allcha' p'oñmos.

²⁸ Ñeñto'marña na te'pa' atet notenes: Allohuen allpon acheñenesha' ñeñt eñalletetsa arr patsro ama't p'uesheñarra ama eñalleña ñeñt atarr sherbets atet ñerra'mrrate' Juan ñeñt apatyese' t' ahuaña acheñenesha' Yomporcop. Tarraña ñeñt ama esoshe'maye' enteneto ama't mamesha, tarraña ñerra'm pueyochresha' peñ Yompor atto te'pa' o' ayochreshattena, ñeñtña acheñerpa' atarrca'ye sherben, ello metanenan atto atarr sherben Juan.

²⁹ Allohuen acheñenesha' ama't ñaña ñeñt ashcañetyestse't atto atarr cobra'yese'te' quelle ñeñt gobiernocop ñeñt apatyese Juan, ñetñapa' atto e'mñnotenetpa' otyeset: "E'ñe pocte' atet oteney Yompor." ³⁰ Tarraña fariseonesha' epuet ñaña ñeñt atarr etsotayenayeñ ñoñets ñeñt atet anaret' judioneshacop, ñetñapa' ama't e'ñe mamesha ama pocteye' enteñeto ñeñt atet muenen Yompor ñocpuet, ñeñto'marña ñetpa' ama apataneto Juan Yomporcop allempo.

Partsesha'ñapa' atet oterraneterr:

³¹⁻³⁵ —Ñehua, napa' o'ch neñotatas ñeñt atet pena patantarr acheñenesha' ñeñt yentyen te' ñeñt ama't errotena ama acshatpoteneto. Ñeñt'pa' fariseonesha' atet petsa. Tarro'mar ama't allempo orrta Juan ñeñt apatañtate't ñapa' ama rrane'te ñeñt yocrrañ yepen allohueney, ama orrane'te ñeñtecma yorren allohueney. Ñeñto'marña ñapa' cha sotyese't chote' chorreña oneñe't, ama't e'ñe mameshapa' ama pocteye' señche'te. Te'ñapa' o' norrterra ñaña Ñeñten Acheñetosets. Napa' pa'namen nerra'yen ñaña norryen. Saña te'pa' atta sesochatse'tyenen ñaña atarro' arratsñaten ñaña atarro' orrarñaten napa' año'chña e'ñe neyemuetyena ñeñt atarr ochñatenesha' ñaña ashcarñatechno ñeñt atarr cobra'yene' acheñenesha' quelle. Tarraña ama't atet sepennoñpa' Nomporña e'ñe eñotene' ñeñt po'ñoçh atarr sherbets ñocop. Ñaña allohueney ñeñtey e'ñe puechemerasha' p'ohueney ñeñtey cotene' ña pocta'ña yapa'cho'ña e'ñe yeñotuenña ñeñt po'ñoçh atarr sherbets. Ñeñto'marña yorrtatyeññañ ñeñt cohuen enten ña. Sañapa' ama't e'ñe mamesha ama acshatpahuoyayso, e'ñe attes ñerra'mrrate' cheshenesha' ñeñt chocmach po'poñ entanna'tuenet amach mueno o'ch yemtana all yellsheñen po'potantañ pacmachoresha' all plazo all shontena acheñenesha'. Ñetñapa' amach mueneñeto o'ch coshaprechet pacmachoresha'. Ñeñto'marña ñetpa' atto yellsheñenetpa' atet oteñet po'potantañ pacmachoresha': "Yapa' ama't o' yerequërca'hua allo yocshame'tenapa' sañapa' amaña seshe'rarampenye; allo'tpa' ama't o' yepoctorare'tua ñeñt ya'chpeñtsorecho allo yellcanrrortenapa' sañapa' amaña sellcapretenyo."

Allempo Jesús'pa' rrallme'chos fariseo pa'paclo ñeñt sochetsa Simón

³⁶ Allempoña Jesús'pa' o' huapoña ñaña p'uesheñarr fariseo o'ch otenana' Jesús rrallme'chapreteñepa' pa'paclo. Jesús'ñapa' allenta coterran fariseo. Allempoña ch'apach pa'paclo anorr'cha'toset parro allcha' rrallme'chapretos. ³⁷ P'uesheñarrña coyanesha' ñeñt allo'marnesha'

ñeñt atarr ecañoreshaŧ, ñañaŧa' o' e'mare'ch o' chap Jesús fariseo pa'paclo all rrallme'chen. Ñañaŧa' huapa, huapatan ñeñt atarr eñmosaŧ ñeñt nanac tsa'te'; huapatamŧpes puetellmŧo ñeñt otenet al-abastro. ³⁸ Allñaŧa' pueya'chpeñsha' huapa, ponmosana Jesús pa'tco. All atarr yahuosa, puese'ñaŧa' cha tsopsa'tos Jesús pa'tco. Allempoña chetosanña pue'chpa' alloña alla a'porrarra'tquèr, tso'tsteca'tosan pa'tac, she'tatca'tos eñmosaŧo. ³⁹ Añña fariseo ñeñt hua'ñene' Jesús, ñañaŧa' eñchpa' atet ot pueyoŧhro: Tarraña añ yacma ñerra'm po'ñoŧh ñeñt a'mtenayenŧ Yompor po'ñoŧpa' eñotapaneñcha'ña añ coyanesha' ñeñt a'pŧllene'pa' atarr ecañoreshaŧ, amach muenacheñe o'ch a'pŧllosñañ ama't pa'tca. ⁴⁰ Jesúsñaŧa' atet otan fariseo:

—Napa' nemneñ o'ch masheñe Simóna notapŧ allpon ñoñets.

Fariseoñaŧa' atet och:

—E'ñe pocte' nenteñ Maestrocha' o'ch pŧoten.

⁴¹ Jesúsñaŧa' alla toma'ntacha, atet och:

—Napa' o'ch not, allo'tsen puesheñarr acheñ ñeñt artetsa quelle. Ñañaŧa' artana puesheñarr acheñ nanac shonte' quelle ñeñt otenet quinientos denario*; po'psheñeññaŧa' archa po'poñ quelle ñeñt ama tama atonayaye ñeñt otenet cincuenta denario. ⁴² Attoña epsheño'maretpa' ama eshcaye' tsa'tuerreto ñeñt allpon teba'yenet tarro'mar ama echeneto alloch tsa'terret. Ñañaŧa' e'ñe atŧa peretna'huerranet epsheño'maret, e'ñe attecma ama eseshaye' tsa'terretso. Te'ña masheñe Simóna o'ch na'pŧto'tapŧ, añ epsheño'mar ñeñt amorrentaretŧ attoch peretnerranet allpon tebenet ¿erra'tsena'tpentenña pa' ñeñt atarr morrentenaya ñeñt peretnene', ñato' añte' acheñer ñeñt tebene' quinientos denario amapa' añte' ñeñt e'ñe cincuenta denario tebene'?

⁴³ Simónñaŧa' alla anapuerranerr Jesús, atet otererr:

—Ñehua, añte'ca'ye atarr morrentenaya ñeñt ap shonte' quelle, tarro'mar ñapa' shonte' o' atŧa a'pŧretnare'tterra ñeñt allpon shonte' teben. Jesúsñaŧa' alla otererr:

—Atetca'ye masheñe.

⁴⁴ Allempoña Jesúsŧa' cohua' allente'tsen coyanesha' allotñaŧa' alla oterranerr Simón:

—Pecue' añ coyanesha' ñeñt atet pŧosen. Allempo nechap pepaclopa' pañaŧa' ama es pŧapapno ama't oñaŧa' ama pŧapapno alloch ne'patca'tosa. Tarraña añña coyanesha'pa' ñaña ne'patca'tose' e'ñe ña puese'yo allempoñaŧa' alla a'porrarra'tquèrren e'ñe ña pue'cho. ⁴⁵ Ñaña allempo nechap pepaclopa' pañaŧa' ama't pehuomŧcha'teñoŧapa' ama petso'ttsa'pa'tapno. Tarraña añ coyanesha' e'ñe allempo nechap pepaclo ama atŧa caŧhposno allorocma tso'tsteca'tosen attoña orrtatosan pueomorrenteña nocop. ⁴⁶ Papa' ama't coñe'tapa' ama es peshapono noño ama't olivoso'ya ñeñt ama tsa'teyaye. Tarraña ñañaŧa' eñmosaŧo she'tatca'tosen ñeñt atarr tsa'te'. ⁴⁷ Attoña te'pa' atarr orrtatosnan ñeñt atto morrentosna. Napa' neñoteññañ ama't shonte' po'chñar te'ñaŧa' o' e'ñe a'pŧretna'huare'tta. Tarraña po'psheñeñ ama't ama tama ochñaŧeyaye attoña a'pŧretna'huare'tta po'chñarŧa' ñañaŧa' ama e'ñeye' morrentapanoña ñeñt o' peretnerrñañ po'chñar.

* 7:41 Denariopa' quelle ñeñt allpon tsa'tenet pamtarr ñeñt taruasetts all pa'nyo.

48 Allempoña Jesúsapa' otan coyanesha':

—Te'ña po'ñoçpa' o' e'ñe a'pretna'huareterra'po'chñar.

49 Allempoñapa' ñeñt' parro rrallme'chenet, ñetñapa' otanna'tyeset:

—Esesha'huañaca'yeña añ yacmar atto peretnerranña ochñarets.

50 Jesúsñapa' alla oterranerr coyanesha':

—Papa' atto atarr peyemtenna ñeñt'ña o' a'queshpaterreþ. Te'ñapa' o'ch ahuerreþ e'ñe peñmañesha'.

8

Atto coyaneshaçhnopa' es apa'yesete't Jesús ñeñt' allpon echyenet

1 Allempoñapa' chopeñe'cherrerr Jesús errañaren ser-
rpare'tyesnomue' cohuen ñoñets attoch çhap allempo ayochreshattena
Yompor. Erracmañen chopeñe'chyen, ora allemeñ anetso'mar all
shonta'yena acheñenesha' ñaña all ama tama shonteyaye acheñ.
Allñapa' cota'huanererr pueyochresha' çharrasheña ñeñt' puechetsa
epsheña. 2 Allñapa' cota'huanem' ñaña patantarr coyaneshaçhno ñeñt'
a'çrratyesua Jesús ahuañmo'cha, puesheña'tetspa' ñeñt' caçhpatatyerr
oneñe't ñeñt' chorrahuete't, po'psheññeçhnopa' ñeñt' a'çrratyes ñeñt'
pa'namen atsnañtsor muerochtatyesahuete't. Puesheñarr coyanesha'
ñeñt'pa' añ pa'so'cheñ María Magdalena. Ñeñt' Maríarpa' Jesúsñapa'
puecaçhpatataroñ cançherr oneñe't. 3 Ñehua, po'psheñeñ coyanesha' añ
pa'so'cheñ Juana. Puerrollarñapa' añ pa'so'cheñ Chuza añ po'taruas pen
atto sherbenan añcha'taret Herodes. Allo'tña po'psheñeñ coyanesha'
ñeñt' cota'nene' Jesús ñeñt'pa' añ pa'so'cheñ Susana. Ellopa' shonte'
po'potantañ coyaneshaçhno ñeñt' es apa'yesaye't Jesús ñeñt' allpon
echyenet ñet.

All toma'ntatanet Jesús ñeñt' a'parre'tene' puerets

(Mt. 13.1-9; Mr. 4.1-9)

4 Allema'teñ anetso't huacha'tyena acheñenesha' ñeñt' çhathets
Jesúsesho. Allempoñapa' o' çha shontoset nanac, Jesúsñapa'
serrpare'tatapanet, atet toma'ntatapanet:

5 —Ñeñt'ña a'parrene' puerets ñañapa' ahuo' allcha' a'parre'tyenana'
puepuer. All a'parre'tyeñ patanta'tetsñapa' alla çhapyes toño'mar,
ñeñt'ñapa' atta atmama'tyes acheñenesha'. Allñapa' huacha'tyena ñaña
ot e'ñe añyallme'chuenana' puerets. 6 Po'poñeçhnoñapa' alla çhapyes
mapuetro'meso'mar. Ñeñt'ñapa' mameshapa' cheparesuañ, tarraña
mameshapa' alla hueya'huerra tarro'mar all mapuetro'mesopa' ama
eñalle ama't coñe'ta oñ ñeñt'cha' a'yamosam'pse' narmets ñeñt' o' che-
paresua all. 7 Po'potantañña pueretspa' alla çhapyes allcha' chepares
aj. Allpa'çho' mameshapa' cheparesuañpa' ajñapa' mameshapa' ate-
sha'tua alla ca'matuerranña narmets alla a'çlatuer. 8 Po'potantañeçhno
ñeñt'ñapa' arr çhapyes all e'ñe cohuen patso. Ñeñt'ñapa' e'ñe cohuen che-
pares. Allempoña atesha'tuapa' atarr aton ellom're'tyes. Puecha'tetspa'
çharroch çharra' pue'llomer.

Allempoña serrpare'tatapanet atetpa' o' alla oterraneterr. E'ñe
huomencocma eñorana'tanet, atet otanet:

—Ñeñtes po'ñoçh ne'mñotene', çhaponasepa'ch seyoçhro ñeñt' atet
netma'ntatensa añ ñoñets.

Atet otanet Jesús ñeñtecop atet toma'ntatyenanet

(Mt. 13.10-17; Mr. 4.10-12)

⁹ Allempoña pueyochresha'pa' ochet Jesús:

—Ta'm ¿este'ña petma'ntatenya? Yañapa' ama yeñoteñe.

¹⁰ Jesúsñapa' alla oterraneterr:

—Sa te'pa' Yomporña o' muenaterres attoch señoterr ñeñt ama eñotpahuoyaye ama't ahuatoteñ atet penaña Yompor po'cohuenña atto atarr ayochreshatena ña. Tarraña po'potantañechnoña ñeñt atta es puecha'yetsa, ñocpuetpa' ama eñoteñeto ñeñt atet atma'ntataret ñoñets. Attoña ama't enteñetañ ñetñapa' amach es chenahueto pueyoçhreto. Ama't e'mueñetañ amaña chenaneñoña pueyoçhreto ñeñt atet yeçhateney Yompor po'cohuenña.

Arrpa' all eñotatanet Jesús ñeñt toma'ntatenanet ñeñt a'parre'tene' puerets

(Mt. 13.18-23; Mr. 4.13-20)

¹¹ Ñehua, ñeñt atet netma'ntatasa ñorra'pa' ñeñtpa' atet notenes: Ñeñt a'parre'tyene' puerets, ñeñt pueretspa' añ notenes Yompor po'ñoñ allempo serrpare'teñet. ¹² Añ puerets ñeñt çhapyesets toño'mar ñeñtpa' añ notenes acheñenesha' ñeñt e'mñotenayeñ Yompor po'ñoñ. Allempo e'mñotueta'pa' allorocmach huapa oneñet o'ch alla puerratanperranet Yompor po'ñoñ pueyoçhreto. Attoña amach mueneñeto o'ch ame'ñenet, attochña ñetpa' amach a'queshpataretterreto. ¹³ Ñaña ñeñt çhapyesets mapuetro'meso'marpa' ñeñtpa' añ notenes acheñenesha' ñerra'm esempo e'mñoteññañet Yompor po'ñoñ e'ñech pocsheñesha' aguerrñañetañ Yompor po'ñoñ. E'ñech cohuen ame'ñeretañ tarraña ñetpa' mamecpach atet pet. Tarro'mar ñetpa' atet penet ñerra'mrrate' narmets ñeñt chepuets mapyo amach eñalle puereçh. Tsapaonetña ñerra'm o'ch huapanet topateñets, ñetñapa' o'ch alla caçhpuerrñañet Yompor po'ñoñ. ¹⁴ Ñaña puerets ñeñt çhapyesets ajmo'mar, ñeñtpa' añ netma'ntatena po'potantañ acheñenesha' ñeñt e'mñotenayeñ Yompor po'ñoñ. Ama'tcha' çhapanetañ mame' pueyoçhreto, tarraña ñetpa' allo'nach senet aña atarr cotape'chenet ñeñt lleca'yenet arr patsro ñeñt e'ñe ñocpueta. Añach muenenet o'ch esocmañen es eçhyenet attoch allo e'ñe cosha'yenet. Attoña ñetpa' amach errotenot orrtatoñeto ñeñt atarr sherbets Yomporecop. Ñetpa' e'ñe atteta ñerra'm narmets ñeñt cha ca'matuerr ajma' amach errotenot ellomre'tyeseto. ¹⁵ Ñaña añ puerets ñeñt çhapyesets e'ñe cohuen patso ñeñt e'ñe cohuen cheparsatspa' ñeñtña toma'ntenaya po'potantañ acheñenesha' ñeñt e'mñotene' Yompor po'ñoñ. Ñetñapa' atto ame'ñeññañet Yompor po'ñoñ amach pusereto çhoch eñochet pueyoçhreto attoch e'ñe cohuen ma'yoçhroñet Yompor po'ñoñ. Chocmach orrtatyenet ñeñt atarr sherbets Yomporecop amachña cha caçhpueñeto. Attoña ñetpa' e'ñe atet penet ñerra'm narmets ñeñt atarr aton ellomre'tyets.

Arrpa' all toma'ntatanet lampareñ atto çhoyo'tampeney

(Mr. 4.21-25)

¹⁶ Jesúsapa' alla toma'ntaterraneterr po'poñoneñ; ñeñtpa' atet otanet:

—Ñerra'm esempo ya'llchaten lampareñ ñeñtpa' ama añecpaye' ya'huortateñe o'ch alla ye'rramamper coyño. Ñaña ama añecpayaye

o'ch alla yener o'ponot yemayepnacho. Añecopña ya'huortatenña lampareñ o'ch yene' enonet attoch choyo'tam̄pesuan allohuen achenñ ñeñt be'toschets o'pono pocollo. ¹⁷ Tarro'mar allohuen ñeñt ama eñotpahuoyaye ama't ahuatoteñ, te'ñapa' o'ch e'ñe orrtataretterra attoch e'ñech eñotataretterret e'ñe poctacma.

¹⁸ Ñeñto'marña sapa' señotena'e' e'ñe'e' po'ño'ch cohuen se'mñoteññañ Yompor po'ñoñ ñato'pa' amate'. Eshsha'te' chena pueyo'chro ama't e'ñe allpona Yompor po'ñoñ, elloña Yomporpa' allo'nach eñotatnenanet nanac shonte'. Tarraña esesha'ña ñerra'm ama' chenaneto pueyo'chro tarro'mar ñetpa' ama po'ño'chaye' aguëññañeto Yompor po'ñoñ ama't allpon eñotenetañ pueyo'chro ñeñtñapa' chach puerratañperranet Yompor.

Allempo huapoña Jesús pachor ñaña pa'mo'nasheñnesha'

(Mt. 12.46-50; Mr. 3.31-35)

¹⁹ Allempoñapa' huapa Jesús pachor epuet ñaña pa'mo'nasheñnesha'. Chapuet allpa' shonte' achenenesha' ñeñt emchorrenaya Jesús. Ñeñto'marña ñetpa' ama eshcaye' entosetona Jesús allame'tets.

²⁰ Allempoña achenenesha' ochet Jesús:

—O'ca'ye huapaña p̄pachor ñaña pemo'nasheñnesha'. Ñetpa' a'yote'tsa'yenet, mueneñet o'ch entenpeta'.

²¹ Ñaña'pa' atet otanet:

—Allohuen ñeñt e'mñotene' Nomp̄or po'ñoñ ñetña ñerra'm atet p̄ohuenet ñeñt atet otene'y, ñeñtña e'ñe po'ño'ch nachor nepen ñaña ñeñtña e'ñe nemo'nasheñ nepen.

Allempo a'mchecherran Jesús huomenquësha' ñaña sa'p ñeñt emo'yarertetsa

(Mt. 8.23-27; Mr. 4.35-41)

²² Allempo cherrerr pamtarr Jesúsñapa' a'tapos noñto epuet ñaña pueyochresha'. Ñaña'pa' atet otanet:

—Te'pa' o'ch ahuañp̄sey yon̄ita'n.

Allempoñapa' ahuañp̄set noñto. ²³ Allempo ahuañp̄set Jesúsñapa' alla ma' noñto. All muenpa' machayota huomenquëshatañpesnomuet. Emo'yare'ñapa' cha esha'tena noñto, atteñapa' choramoch oñ noñto cha muene' esha'tatan noñt. ²⁴ Atteña pueyochresha'ñapa' ponem̄yet Jesús all muenpa' opueret, atet ochet:

—Maestro, po'ño'chuachca'ye yoclla'huerrate'.

Jesúsña tanterrapa' e'ñe po'ño'ñoña a'mtsoññetueran huomenquësha' ama't ñaña emo'yare'pa' o' e'ñe a'mtsoññetuer. Attoña ñetpa' o' alla e'ñe cohuen muechetam̄perret. ²⁵ Allempoña Jesús'pa' otanet:

—Eso'mare'tña sapa' ama e'ñeye' seyemtenno.

Ñetñapa' cha atarr nanac yoren̄et. Atta cohuanrrorteñet ñetñapa' atet otanna'tyeset:

—Ta'mca'ye añ achen̄erpa' esona'tarte'ca'ye. Atarrep̄a't es a'mchechaten, ama't po'ño'ñoñapa' a'mchechaterran huomenquësha' ama't ñaña emo'yare' oñ.

Atto gadaro'marnesha' ñeñt chorrena oneñe'pa' huapa Jesúsesho

(Mt. 8.28-34; Mr. 5.1-20)

²⁶ Allempoñapa' o' etsotosey yon̄ita'n all senet. Allpa' añ pa'ney pene' gadaro'marnesha' alla yot Galileot. ²⁷⁻²⁹ Allña sohuosa Jesús noñtotpa'

allñapa' huapoña puesheñarr yacma ñeñt' allo'marnesha', tarraña ñapa' añ chorrenaya oneñet' patoner. Ñeñt'ñapa' ahuatoteñ atta chopeñe'chyen muelle'mcoť, ama shetamteno. Ñapa' alla yečhena all pampueñet' arromñatečno ama pocolloye' yečheno. Ñehua, oneñet'pa' allempo rromuenan yacmapa' epaye' ottatse'tache't' allempoťeñ. Pamo'tsesha'ñapa' ahuo'ch rromuetpa' o'ch huanquētañ attoch cohuanpeñet. Ñaña'pa' čhach tsepe'tuanman allo huanquēññañet' pot' ñaña' pa'tac oneñet'ñapa' ahuo'chčo' matach a'yo amayo. Allempoña entapan Jesús'pa' rrana'nma huomenc, mata Jesúsesho, rromosñaña allame'tets. Allempoña Jesús'pa' otosan oneñet' ñeñt' chorrenaya yacma:

—Te'pa' o'ch pecachpa'ner añ acheñer.

Ñeñña chorrena oneñet'pa' ñaña'pa' atet otapan Jesús:

—Eso'maruachca'ye Jesús'pa' tsrre'močhtana'tosen, papa' ñeñet'p' Ñeñt' Nanac Parets Puechemerep'. Te'pa' notapa'pcha' amach pecoñchatatstosno.

³⁰ Jesús'ñapa' alla oterraner ñeñt' chorrena oneñet':

—Papa' ¿eso'tña pesočhena?

Ñaña'pa' atet oterraner Jesús:

—Napa' añ neso'cheñ Legión.

Ñehua, añ so'chñets ñeñt' otenet' shonte' nanac, tarro'mar ñeñt' nanac patoner oneñet' ñeñt' chorrenaya. ³¹ Ñehua, oneñet'čnoñapa' atet otare'tapet Jesús:

—Amach arra pemñatstosye o'pono coñcha'puetso.

³² Ñehua, allpa' a'yente'tsa'yen shonte' chañchočno ñeñt' rratse'tyets aspentonet'. Ñeñto'marña oneñet'čno'pa' atet otare'tapet Jesús:

—Ñerra'm čhoch muene' erroten peposeypa' arrña pemñaye'chosey chañchesho allochñapa' o'ch yechorra'yerr ñaña' chañchočno.

Jesús'ñapa' allenta otanet:

—Ama'tca'ye orrasca'ye.

³³ Allempoña oneñet'čno'pa' cačhpa'huaneret yacmapa', alla chorrereterr ñaña' chañchočno. Chañchoñapa' allempo chorrosya oneñet'čno'pa' čhepa'tcha' matrra'tua allohuen ñegonet' shorča'tuos alloťpa' e'ñe ño'shrra'tuosa oño.

³⁴ Acheñenesha'ña ñeñt' cohuanpene' chañcho allempo eñchet atet pa' chañcho o' shorča'tua oño, ñet'ñapa' allenta matrra'tet ñamet pueyorñoť ahuanmuet anetso. Allñapa' serrpare'tyesoset ñaña' ora allohuen allampaño'mar. ³⁵ Acheñenesha'ñapa' allenta ahuanmuet ahuo'ch enteñeta'. O' čačha'tet Jesúseshopa' allñapa' entoset yacma ñeñt' chorre't' oneñet'. Alla anen allame'tets Jesús'pa'tcoť ashtamat. O' eñoterra o' cohuenterra. Ñet'ñapa' čha atarr mecha'na'toset. ³⁶ Añña ñeñt' entene' Jesús'atto cačhpatatenan oneñet' acheñ, ñet'ñapa' allenta serrpare'tatapet ñeñt' huačha'ttsa anetsoť. ³⁷ Allempoña allohuen acheñenesha' ñeñt' yečha'yetsa all ñeñt' gadaro'marnesha' ñet'ñapa' pueyorñoťet atet otoset Jesús:

—Te'pa' o'ch ahuerrep' arroť.

Allempoña Jesús'pa' a'terr noñto o'ch ahuer. ³⁸ Yacmaña ñeñt' chorre't' oneñet' ñaña'pa' allenta otan Jesús:

—Napa' nemneñca'ye te'pa' o'ch nocterrep'.

Tarraña Jesúsñapa' ama muenache, atet och:

³⁹ —Allaṣach, te'pa' o'ch ahuerreṣ pepadllo ṣamo'tsesho'mar o'ch peserrpare'tatuerranet ora allohuen atto Yompor atarr yenposeṣ.

Ñaña'pa' atet otue Jesús'pa' atet'cho' ṣa. Allenta ahuer serrpare'tyesnerrets ora anetso'mar atto Jesús'pa' atarr nanac yempos.

Atto Jesús'pa' tantaterran Jairo po'señ ñaña all'a'crratnoman puesheñarr coyanesha' ñeñt a'ṣlla'nmue' pa'shtam

(Mt. 9.18-26; Mr. 5.21-43)

⁴⁰ Allempoña alla ḥerr Jesús añeñta'n allot ta ahuaña. Acheñenesha'ña allpa' e'ñe pocsheñesha' agapapueñet tarro'mar o' atarr cohueret o'ch huerra. ⁴¹ Allempoña allpa' huapoña puesheñarr añcha'taret añ pa'so'cheñ Jairo. Ñapa' ñeñt puesheñarr ñeñt añcha'tarettetsa judionesha' po'prahuo. Ñaña'pa' alla rromosa Jesús pa'tcoṣpa' atet otosan Jesús:

—Napa' nemneñ o'ch ṣocterren nepacllo, ⁴² tarro'mar neseñ ñeñt nepatrrorpa' ḥa atsna'ten o' a'po'ntsa'mocha.

Ñehua, ñeñt po'señpa' allponte' echenan po'charña ḥarra' puechena epa char.

⁴³ Allempo coṣa'ner Jesús coṣa'huaner ñaña shonte' acheñenesha' ḥa emchorratse'tnomet, ḥa to'mama'tneñet. Allña'pa' coṣa'nmanet ñaña puesheñarr coyanesha' ñeñt atsna'tets. Charra' puechena epa char ñeñt atto ḥocma yella'yena. Ama't epaye' partata o' a'gasta'huahuan po'ḥllayor atto parteñet amaña eseshaye' a'crraterraye. ⁴⁴ Ñaña'pa' all coṣa'nenan Jesús pa'che'ñoḥ, allña'pa' a'ṣllerrñaña' pa'shtam pa'rrpe'mot. E'ñe a'ṣlla'hue' pa'shtampa' allorocma maserrña po'rras, o' metuer ñeñt atto mueroḥtana.

⁴⁵ Jesúsñapa' atet otanet:

—¿Esesha'tña o' a'ṣlla'nmuenña neshtamot?

Ama eseshaye' eñoratso. Pedroña ñaña ñeñt epuet yemtena, ñetñapa' atet ochet Jesús:

—Maestrocha ṣapa' penteñte' shonte' acheñenesha' ñeñt allotemeña peto'mama'tnene'. ¿Eso'mare'tña ṣotenña esesha'te' ṣa'ṣllene' peshtamot?

⁴⁶ Tarraña Jesús'pa' atet oterraneterr:

—Napa' neñoteñ po'ñoḥ puesheñarr acheñ e'ñe puemnenñoḥ a'ṣllenen neshtamot tarro'mar napa' neñotena napa' o' na'crrach e'ñe na nehuamencoṣ atto a'ṣllenen.

⁴⁷ Coyanesha'ña allempo ñapa' eñotena amach errotenoḥ a'nasoto. Ñapa' ḥa pa'shmuena pueyorñoḥ concorposa Jesús pa'rrṣot. Allña'pa' e'ñe a'meta'huosan ñapa' añecopña a'ṣllenan Jesús pa'shtam attoch correrra e'ñe cohuen. Allña'pa' atet otan allohuen acheñenesha':

—Na allempo na'ṣlloñ Ayochreshat pa'shtampa' ñeñtña na'crraterre' allorocma.

⁴⁸ Jesúsñapa' atet otan coyanesha':

—Papa' nesñeshacha' atto atarr puyemtena na attoña te'pa' o' e'ñe na'crratnomueṣ. Te'ñapa' o'ch ahuerreṣ e'ñe peñmañesha'.

⁴⁹ Allempo eñorena ateṣpa' allña'pa' huacha'ta ñeñt huetsa añcha'taret Jairo pa'pacclot. Ñetña huapuetpa' atet otoset Jairo:

—Peseñpa' o'ca'ye rroma. Te'ñapa' amach allo'na ṣa'tsrre'moḥtana'tatsche Maestro o'ch coterreṣ pepadllo.

50 Jesúsña ama't e'man atet otoset Jairopa' ñaña'pa' atet otan Jairo:
—Papa' amach čha pe'charrtatatsto peyočher, nachña e'ñe peyemta attoch correrña pesēñ.

51-53 Allempoña' ahuanmuet Jairopahuo. Chapuet pocollo allña'pa' allo'tsa'yen shonte' acheñenesha' all yahuanrrortenet, ya'na'teñet arromñañ. Jesúsña'pa' otosanet:

—Amach atarr seyahuatsto. Añ shopshesha'pa' amaca'ye čhoje' rromueno čhaca'ye muen.

Ñetña pachmāre'teñočetpa' atta che'tatsetyesapet tarro'mar ñetpa' e'ñeca'ye eñoteñet čhoca'ye rromuen. Allempoña Jesúsña'pa' ama muenatano allohuen acheñenesha' o'ch be'toset allo'tsen arromñañ. Ñapa' añ muenat Pedro ñaña Juan, ñaña Jacobo ñaña arromñañ puepapar ñaña pachor ñeñña epuet be'tosčha'toset allo'tsen arromñañ. 54 Allempoña Jesús'pa' rremota'tosan shopsheshañ pototpa' po'huamencocma otos:

—O'ch nesñe notosep, te'pa' čhoča tanterrtsa.

55 E'ñe otue' atetpa' allentepa'tcha' o'rrerrerra čha tanterrtsa. Jesúsña'pa' otanet:

—Te'pa' o'ch serratallme'cher.

56 Puepaparña ñaña pachorpa' ñetña'pa' atta cohuanrrorteñet. Jesúsña'pa' atet otanet:

—Amach esesha' sotačsa'tatsto ama't puesheñarra ñeñč atet o' nor-tatennasa' sepaclo.

9

Allempo Jesús'pa' llesensan pueyochresha' čharrasheña ñeñč puechetsa epsheña

(Mt. 10.5-15; Mr. 6.7-13)

1 Allempo čhapa'muen allempo Jesús agota'mueanan pueyochresha' čharrasheña ñeñč puechetsa epsheña. E'ñe apčha'huet ñeshopa' ñaña'pa' atarr ahuanencat pa'yasanet, attoña apañet ñaña llesens attoch cachpatayeret oneñet acheñenesha' ama't erra'tsena ñeñč atarr mueročhtayenahuet. Ñaña ahuanencat pañet attoch a'crratyeset acheñenesha' ama't erra'tsena ñeñč osyenuahuet. 2 Attoña llesensanet attoch ahuanemyeset pa'namen anetso'mar serrpare'tyesnomuet Yompor po'cohuenña atto atarr ayochreshattena ña. Ñaña añecpa'ñaña llesensenanet attoch a'crratyesoset acheñenesha'. 3 Ñaña atet otapanet:

—Amach es sanmatsto ama't coñe'ta allcha' sechopeñe'chyes—ama't secarra, ama't sebolsa, ama't ñeñčha' serra'yenom ama't sečllayora ama't e'ñe epma seshtampa' amach sanmatsche sechope'chpayo. 4 Alla oterraneterr:

—Ama't errach pocollro sečhap allach sommosa allponmat esempohuach ahuerreserr po'poñ anetso. 5 Ñerra'm erra anetsro ñeñč allo'marnesha'ña ama cohuenaye' agapasetopa' o'ch semterrrer ñaña allot. Ñerra'm allempo semterrrerña ñaña allot ñeñčña setco'tsa'yen pañe'te' patspa' čhočh sepa'shetca'tyesnomña setac. Attochña allo'marnesha'pa' o'ch señotatnomanet ñetpa' amaca'ye pocteye' entenanetoña Yompor.

6 E'ñe ñeñča otaretetuetpa' ñetña'pa' allentā ahuanmuet o'ch chopeñe'chyeset erracmañen anetso'mar. Allña'pa' añ

serrpare'tyesnomuet cohuen ñoñets alloch yequeshperra. Ñaña all chopeñe'chyaset erracmañenpa' allña a'crratyesnomet ñeñt' atсна'tyets.

Allempo e'ñe cohuen es orrtatyes Jesús, Herodesñapa' cha otapañ Juanañe' o' tanterra ñeñt' apataye't acheñ Yomporecop

(Mt. 14.1-12; Mr. 6.14-29)

⁷ Añcha'tareña Herodespa' ñañaapa' atet e'mare'tenan Jesús ora ñeñt' allpon atet pa'yena. Ñañaapa' cha atarr llequëna tarro'mar patanta'tets acheñenesha'pa' atet otyenet te'pa' o' orrterra Juanañ, o' tanterra rromot. (Herodespa' añña atarr llecatene' tarro'mar ñapa' ña pechate' Juan ahuaña.) Ñeñto'marña ñapa' ñeñta nen pueyo'chro atto acheñenesha' otenet ahuo' tanterra Juan rromot. ⁸ Po'potantaññaapa' atet otyenet:

—Elíasoñca'ye o' orrterra.

Po'potantaññaapa' ñetpa'cho'ña atet otyenet:

—Añpa' ñeñca'ye a'ntaye't Yompor po'ñoñ ahuañ, te'ñapa' o' tanterra rromot.

⁹ Añcha'tareña Herodespa' atet ot:

—Napa' neñotena naca'ye pechate'ña Juan ahuaña. Esha'huañaca'yeña ñeñt' orrtatene' ñeñt' ama't ahuatapa' ama yentare ñeñt' atet atarr ne'mare'ten.

Ñeñto'marña ñapa' atarr mueneñ o'ch entan ñeñt' Jesúsotets ñeñt' orrtatylene' ñeñt' ama puentare acheñenesha'.

Allempo Jesúsapa' rratenan shonte' acheñenesha'; ñeñt'ña acheñenesha'pa' allo'tsen amnaroch mil

(Mt. 14.13-21; Mr. 6.30-44; Jn. 6.1-14)

¹⁰ Allempo huacherra Jesús pueyochresha' ñeñt' llesensa'yes ahuaña. Ñetñapa' o' cha'cherret Jesúsesho, serrpare'tatyesueret Jesús allohuen allpon atet pa'yaset allemeñ anetso'mar. Allempoña Jesúsapa' ahuanman pueyochresha' e'ñe ñapto'chayet, chapuet all ama acheñempaño'yaye all allame'tets anetso, ñeñt' anetspa' añ pa'so'cheñ Betsaida. ¹¹ Tarraña acheñenesha'ñapa' allempo e'mare'chet o' ahuanmuet all, ñetpa'cho'ña allenta ahuanmuet ñamet. Cha'cha'tet Jesúsesho ñañaapa' e'ñe cohuen agapanet. Allñaapa' serrpare'tatyesapuerraneterr atet penaña Yompor po'cohuenña atto atarr ayochreshattena ña. Ñaña allpa' a'crratyesapuerranerr ñeñt' atсна'tyets.

¹² Atteñapa' o' ellerren. Añña pueyochresha' charrasheña ñeñt' puechetsa epsheña ñetñapa' oteñeta' Jesús:

—Te'pa' o'ch pemueñhuer acheñenesha' ahuanemyerretepa' anetso'mar allampaño allcha' mayesuerret allcha' entyesuerret puerrar ñeñt'cha' rra'yuesuerret. Tarro'mar te'pa' arro'tseney all ama acheñempaño'yaye.

¹³ Tarraña Jesúsñapa' otan pueyochresha':

—Sachca'ye apa'yehahuet ñeñt'cha' rret.

Ñetñapa' atet ochet:

—Ya arpa' amaca'ye es yecheno ama't coñe'ta. Yapa' e'ñe amnara pan yechen ñaña epatoll cac. Ñato'yapa' o'ch ahuey anetso allcha' yerañfena' rreñets ñeñt'cha' yerrach allohuen shonte' acheñenesha'.

¹⁴ Ñehua, allo'tsen shonte' acheñenesha' amnarochte' mil yacmanesha'. Allempoña Jesúsapa' atet otan pueyochresha':

—Te'pa' o'ch soch acheñenesha' anorrcha'tyesetepa' e'ñe ñopa'ttsocmuet, e'ñech amnaroche'ttsocma çharrapa'tets anorrcha'tyeset.

¹⁵ Pueyochresha'ñapa' atetçho' pet, anorrcha'tatieset acheñenesha' al-lohuenet. ¹⁶ Allempoña Jesús'pa' agapan ñeñt amnar pan ñaña epatoll cac, cohua' enonet parasyoso'tam'psan pan. Allempoñapa' shota'tan pan, shetse'tan ñaña cac. Apanatyesan pueyochresha', ñetñapa' epatyeset allohuen acheñenesha' ñeñt anorrcha'tyets all. ¹⁷ O'ña epa'huet allempoña o' rrallme'chet allohuenet, e'ñe yetrra'tuahuet. O'ña yetuahuetpa' cha a'pchatyeset ñeñtñapa' a'yapaçheret. Ñeñtña a'yapaçherretpa' çhepa'tcha' chorrats çharra' puechena epa cañter e'ñe tamo'yare'.

Atto Pedropa' otan Jesús p'apa' p'aña Yompor Puechemerep' ñeñtep' Cristotsets

(Mt. 16.13-19; Mr. 8.27-29)

¹⁸ Allempoña pamtarra' allo'tsen Jesús all ma'yochena e'ñe ñap'ochayet pueyochresha' epuet allo'tsen. Allñapa' atet otan pueyochresha':

—¿Errofena't otyenenña allohuen acheñenesha' napa' eseshante'?

¹⁹ Ñetñapa' atet otyeset:

—Patantarr acheñenesha'pa' atetca'ye otyenpet p'apa' Juanañpo'te' ñeñtepo' apatañtats'e't Yomporcop. Po'potantaññapa' atet otyenpet, p'apa' Elíaso'po'te'. Po'potantaññapa' atet otyenpet p'apa' ñeñtepo' ñeñt a'mtaye't Yompor po'ñoñ ahuat. Te'ñapa' ahua' alla petanterra per-romñot.

²⁰ Allempoñapa' alla a'pto'terraneterr:

—Sañapa' çerrofena't sotenenña sa?

Pedroñapa' eñoratsapa' atet och:

—Papa' ñeñtep'ca'ye Parets Puechemerep' ñeñtep' Cristotsets.

Atto Jesús'pa' eñotatan pueyochresha' ñapa' amtsaretterrach

(Mt. 16.20-28; Mr. 8.30-9.1)

²¹ Jesúsñapa' alla oterraneterr:

—Ama't puesheñarroña amach esesha' sota'psa'tatsto napa' ñeñten Yompor Puechemeren ñeñten Cristotets. E'ñe po'ñoçh notenes amach esesha' sota'psa'tatsto.

²² Elloñapa' alla oterraneterr:

—Napa' Ñeñten Acheñetsets, atet anaret nocop, nanaccha' na'mueroçhtataretterra. Amach esesha' pocteye' nenterraye — ama't ñeñt pompornesha' pen allohuen judionesha', ama't ñeñt pa'micha'tareternesha' pen allohuen judionesha' po'cornaneshar, ama't ñaña ñeñt etsotayenayeñ ñoñets ñeñt atet anaret judioneshacop. Ama't ñetpa' amach eseshaye' neyemterraye. Attachña napa' muetsataterretcha'. Tarraña poma'pamtañopa' o'ch alla tantaterren Nompur.

²³ Elloñapa' alla oterraneterr allohuenet:

—Ñerra'm esesha' muenene' o'ch coterrnet na e'ñe po'ñoçh attoch neyochresha' neperranet, añ poctetsa sehuanmuetepa'ña ñeñt atet muenenet e'ñe ñocueta. Attochña ñetpa' o'ch e'ñe tomanteret ñeñt chechnene' po'corsoch ama't pate'tets yet allcha' mueroçhtet ñamet. Attochña coterrnet e'ñe poctacma. ²⁴ Tarro'mar ñerra'm esesha' e'ñe

aña muenenet o'ch correna atomat attoch e'ñe coshenet arr patsro, ñetñapa' chach a'chencatet ñañeñeta. Tarraña ñerra'm esesha' e'ñe pocte' entene' o'ch sohanmuet ñeñt' atet muenenet ñeñt' e'ñe ñocpueta arr patsro attochña ñetpa' añach ma'yochret ñeñt' cohuentetsa nocop, ñeñtña acheñerpa' corretsach pocsheñeshocmañen tayoteñ e'ñe errponañohuen. ²⁵ Ama't errponenañaren esocmañen es yeyoratsetyes ora allpon ñeñt' yentyen aña patsro, tarraña ñerra'm ñeñt'ach e'ñe ya'chencaterre' yecamquëñohuen ñeñtñapa' ama't coñe'tapa' amach es sherberrye. ²⁶ Tarraña ñerra'm erra'tsencha' nepenquëñaya na te' neñoñpa'cho'ña cha apencochen entennanet, napa'cho'ña nepenca'huerranetcha' esempoch nohuerra. Po'ñoch napa' Ñeñten Acheñetosets nohuerrach e'ñe na necohuenñot, ñeñtara Nomp por po'cohuenña epan ñaña po'millañoñeñnashar ñeñt' e'ñe torra'yetsa Partsocop. ²⁷ Po'ñochca' te'pa' o'ch notas: Patanta'ttsos ñeñtes arro'tsa'yenes te'ña ama't ama serromhuena'pa' o'ch senterrñañ Yomp or po'cohuenña atto atarr ayochreshaterra ña.

Allempo Jesús'pa' po'poñetañpana pueyochresha'
(Mt. 17.1-8; Mr. 9.2-8)

²⁸ Allempo met allponmat ñato' po'psocmatño Jesús'pa' ahuanman pueyochresha'; añ anem Pedro ñaña Juan ñaña Jacobo. Arr anmanet aspentó allcha' ma'yochena' Jesús. ²⁹ Allña ma'yochosapa' machayotepa'tcha' po'poñetañpsosanet. Pa'clloyotpa' cha po'poñ ortosanet. Pa'shtamohuen atarr huallama'to poptosa. ³⁰⁻³¹ Allñapa' machayotepa'tcha' orrtanet Moisés ñaña Elías. Ñetpa'cho'ña atarr cohuen orreyenet. Allñapa' serrpare'toset epuet Jesús. Ñetpa' añ serrpare'tenet atto o' chapmoch attoch rroma Jesús o'ch ahuer pue'ntaña. Ñetpa' atet otyenet, arrcha' atet peret Jerusaléño. ³² Nehua, Pedro ñaña ñeñt' epuet allo'tsen, ñetñapa' ama't atarr moñe'tenetañpa' alla e'ñe achñesuerret, attoña entoñet Jesús po'cohuenña ama't ñeñt' parro tomchen. ³³ O' ma'natermocha Moisés ñaña Elías attoch sa'neret Jesús. Pedroñapa' allenta eñora, atet otan Jesús:

—¡Atarruaca'ye Maestrocha' cohueno'tseneyte' arr! Ama't pocte' penteñe o'ch yatomatonas ma'ppahua quërpachet, puepahuarrpa' pöcopcha', po'ppahueñpa' Moisésocopcha', po'ppahueñpa' Elíasocopcha'.

Pedropa' pueyorñot atta muene' otatse't, ama eñocherrottencha' ot. ³⁴ Allempo eñorena Pedropa' cha orrtosahuet os chepa'tcha' a'pomañpsosanet. Atto a'pomañpsosanet ospa' ñetñapa' atarr nanac yorenet. ³⁵ Cha e'morrtostsa ñoñets osot; ñeñtña ñoñetspa' Yomp or otosahuet; ñeñt'pa' atet ot:

—Añmapa' ñeñt' no Nechemer ñeñt' atarr nemuerena ñeñt'cha' e'ñe cohuen se'mñoterr.

³⁶ Allempo o'huañ e'morrrta ñoñetspa' o' e'ñe ñap'amerra Jesús. Pueyochresha'ña allempopa' atta a'nasoteñet. Ama't puesheñarrofetapa' ama otuerreto ñeñt' atet o' entuahuet.

Atto Jesús'pa' a'crraterran cheshachor ñeñt' otaten oneñt'
(Mt. 17.14-21; Mr. 9.14-29)

³⁷ Tsapañña allempo huachenet aspentotpa' allñapa' shonte' acheñesha' ñeñt' huacha'tsa ñeñt' pöcterrahuet. ³⁸ Allo'tsen puesheñarr yacma ñaña'pa' atet otosan Jesús:

—Maestro, napa' atarr nemneñ o'ch pentennana' nacñe'ter. Napa' e'ñe ñeñtetollapa nepatror. ³⁹Ñapa' ñerra'm esempo rromueñ oneñe'tpa' çhach rranare'ta o'ch otachpa' o'ch ata'tach patso çhach amtan pa'po'. Attoña atarr atserrpatse'tateñ. Ama mueno o'ch a'rroyer. ⁴⁰Napa' o' notuosna'ña peyochresha' o'ch caçhpatateret oneñe't tarraña ñetñapa' ama erro't peto attoch caçhpatateret oneñe't ñeñ't atarr mueroçhtatene'.

⁴¹Jesúsñapa' atet ot:

—Sapa' ñeñtes acheñres ama't mameshapa' ama ayemtenaye' sentpenno, çhach po'poñ sentuena seyochro nocop. O' allponmatuanen allo'tsenen arr patsro napa' atta atarr na'huantennas, atta necuenes ñato' attotpa' o'ch same'ñerra.

Allempoñapa' atet otan yacma ñeñ't otene' o'ch a'crratoñ puechemer:

—Te'pa' o'ch ñanmon pechemer arr.

⁴²Allempo aneñ Jesúseshopa' oneñe'tñapa' alla rromuerranerr cheshachor o' alla otatererr alla ata'tatererr patso. Jesúsñapa' atet otapan oneñe't:

—Te'pa' po'ñoçh o'ch notañ, pecaçhpa'nerñaca'yeña añ cheshachor.

Allempo a'crrater Jesús o' alla apuerrñañ pomp. ⁴³Allohuen acheñenesha'pa' atta cohuanrrorteñet. Ñetpa' e'ñe eñoteñet Yompor po'partsoña orrtetsa.

Arrpa' atto Jesúsapa' eñotaterraneterr puepocheño ñapa' çhocmach muetseret

(Mt. 17.22-23; Mr. 9.30-32)

Atta epaye' cohuanrrorteñet atarr cohuen enteññañet po'partsoña, tarraña Jesúsñapa' alla yerpatteranerr pueyochresha', ñeñ'tpa' atet otanet:

⁴⁴—Te'pa' se'mñnoten e'ñe cohuen, amach sepsatsterrnano neñoñ ñeñ't atet notenes te'. Na Ñeñfen Acheñetosetspa' pomataterrnetcha' attoçhña erro'tuanencha' perrnet.

⁴⁵Ñeñña ñoñetspa' ñetñapa' ama't pueheñarro'tetapa' ama eshcaye' eñotenaye' enteñeto tarro'mar ama çhena' allempoch çapanet pueyochreto. Ñetña pueyorño'tetpa' ama eseshaye' a'p'to'tenaye este' otenanetña atto eñorana'tenanet.

All eñotateney ñeñ't acheñer e'ñe po'ñoçh atarr asherben enten Yompor

(Mt. 18.1-5; Mr. 9.33-37)

⁴⁶Po'pocheñoña pueyochresha'pa' e'ñe ñagattseta otanna'tyeset:

—Ta'mca'ye erra'tsenoteyte'ñaca'ye ñeñ'tey atarr sherbets ñeñ'tey atarr añcha'taretoyen enteney acheñenesha'.

⁴⁷Jesúsñapa' e'ñe eñotenanet ñeñ't atet cotape'chatse'tyenet ñet pueyochreto atto e'ñe cohuen entyenet e'ñe ñañeñeta. Ñaña'pa' cheshatolla çhore'tpa' tomach e'ñe ñesho, ⁴⁸allempoñapa' atet otanet:

—Erra'tsenotes sa ñerra'm e'ñe cohuen saguëñ ama't ñeñ't ama asherbenaye' enteneto atet ñerra'm añ cheshatoll tarro'mar sapa' na same'ñena, na'ñaña e'ñe cohuen saguën. Elloña ñaña erra'tsenotes sa ñeñtes naguëne' na, ama e'ñe naptocheye' saguëno, añe'ñaña saguënnan Nomp. ñeñ't nellensene'. Tarro'mar ñerra'm erra'tsencha' pocte' entene' o'ch yenpuenan ama't ñeñ't ama esoye' enteneto, ñetñapa' atarrcha' po'ñoçh asherben entenanet Yompor.

Atto eñotateney ñeñĩ ama çhoye' yepatare'tenaye ñeñĩña po'ñoçhpa' e'ñe parrocmayeyenpannena

(Mr. 9.38-40)

⁴⁹ Allempoña pueyochresha' ñeñĩ Juanpa' atet otan Jesús:

—Maestro, ya ahuañapa' atet yeñch puesheñarr yacma ñeñĩ cachpatatene' oneñeĩ acheñ. E'ñe pueçhore'teñoçeþ þa peso'chñopa' oneñeĩpa' cachpa'nerran acheñ. Yañapa' ama pocteye' yeñche țarro'mar ñapa' ama parroye' yeyemteno. Ñeñĩo'marña yapa' yoch:

—Amach atet peþatsto.

⁵⁰ Jesúsñapa' atet otanet:

—Amachca'ye sepatare'tatsche țarro'mar ñerra'm ama çho epatare'tenye yaña ñeñĩña po'ñoçhpa' e'ñeca'ye parrocmayeyenpannena.

Allempo Jesússpa' cotape'chaterran cohuen pueyochresha' epsheña, ñeñĩpa' Jacobo ñaña Juan

⁵¹ Chapmoch allempoch o'ch alla ahuerri Jesús pue'ntañopa' ñañaapa' atarr sechena o'ch ahuerri Jerusaléño. Ñeñĩo'marña mueñan pueyochresha' ñeñĩcha' otrra'tatsa ⁵² o'ch ahuet samario'marnesha' pa'netsro o'ch e'noset muets allcha' çhap ñaña Jesús allcha' amesnom epuet pueyochresha'. ⁵³ Tarraña samario'marnesha'ñapa' ama mueneto o'ch agaparettet all pa'netsreto, țarro'mar ñetpa' eñoteñet arr sechenet o'ch ahuet Jerusaléño.* ⁵⁴ Ñeñĩo'marña Jacobo ñaña Juan ñetñapa' atet ochet Jesús:

—Parteshacha' çama't pocte' penteñe yapa' o'ch yenam huapuepa' tso' entof? allochñapa' ñeñĩcha' a'poyatuerrahuet ñeñĩcha' e'ñe a'chencatuerrahuet ñeñĩ atet pe't Elías ñeñĩ a'ñtaye't Yompor po'ñoñ ahuat.

⁵⁵ Jesúsñapa' atta cohuanetpa' atet otanet:

—Ñeñĩ atet soctape'chatse'tyenpa' ama't mameshapa' ama pocteyaye. Ama't señoñeña Yomporpa' ama atteye' cotape'chatenyeña Puecamquëñoñ. Ñeñĩ semnen sapa' po'poña cotapñats. ⁵⁶ Na Ñeñĩten e'ñe Acheñetosetspa' amaca'yeña añecop nohuapo o'ch na'chencatos acheñenesha'. Napa' añecopca'yeña nohuapa o'ch na'qeshþatos allohuen acheñenesha'.

Allempoñapa' o' metaçha'tet allotpa' ahuanmuet po'poñ anetso.

Allempo Jesússpa' yeçhatan ñeñĩ muenene' o'ch coter

(Mt. 8.19-22)

⁵⁷ Po'pocheñoña allempo oñemyenet toño'mar allñapa' poctanet puesheñarr yacmapa' ñañaapa' atet otapan Jesús:

—Na te'pa' nemneñ o'ch noctare'tyeseþ ama't errohuanencha' peçhopeñe'chyes.

⁵⁸ Jesúsñapa' atet och:

—Te'pa' napa' peñotencha' ama't nepacllapa' ama necheñe all neyçhenañ. Ro'quëþpa' çhocma eñall pa'pon allecma yeçhena.† Oteçhnopa'çho'ña çhocma eñall pa'ma' allecma yeçha'yenet. Tarraña naña Ñeñĩten Acheñetosetspa' ama eñalle ñeñĩ e'ñe nepaquëll nepen allcha' neþanena.

⁵⁹ Po'pocheñoña Jesússpa' atet oterranerr po'psheñeñ acheñ:

* 9:53 Ñehua, yapa' yeñoñeñ samario'marnesha'pa' ama mueno o'ch amo'tstana jerusaléño'marnesha' ñeñĩtara judionesha'. † 9:58 Ñehua, Jesús añ toma'ntacha zorra ñeñĩ berrotets all pa'nyo.

—Te'pa' o'ch p̄octa'n attoch po'ño'ch neyochresha' neperreḡ.

Tarraña ñeñña' acheñerpa' atet otan Jesús:

—Te'pa' arrcha'ña ñanom pemnaterren o'ch ahuerren apuesho, o'chña nepampa'huera' apañpa' allempochña nohuerrapa' o'ch noctaḡ.

⁶⁰ Tarraña Jesús'pa' atet och:

—Acheñenesha' ñeññ' ama yerpa'penaye Yompor, ñetñapa' pampanna'tetepa' parro aromñatecmuet. Tarraña p̄ocoppa' ñeññep̄ o' peyerpuera Yompor añ p̄octetsa o'ch auyeseḡ serrpare'tyese' Yompor po'cohuenña ñeññ' atto atarr ayochreshattena ña.

⁶¹ Po'pocheño allempo serrpare'ten Jesús epuet ñeññ' ame'ñenaya, ñeññña' acheñerpa' atet otan Jesús:

—Napa' Ayochreshate po'ño'chcha'ca'ye noctaḡ. Te'pa' ato't nasuerra' nepacillo attoch neso'tera' namo'tsesha'; allempochña alla nohuerrerrpa' o'ch noctaḡ.

⁶² Jesúsñapa' atet och:

—Ñeññ' ama e'ñeye' ma'yo'chrenaye attoch torrenet e'ñe cohuen Yomporecop, ñeññña' acheñerpa' amach e'ñe cohuenaye' sherbeno attoch e'ñe epatuan Yompor po'cohuenña ñeññ' atto atarr ayochreshattena ña. Ñeññ' acheñerpa' atetcha' netma'ntacha: Ñerra'm esesha' orrene' etamapets attoch etaman pats e'ñe cohuen pa'charr pa'mro, ñerra'm pa'che'ñonña' cohua'nom ama't mameshapa' amach etsotanoña etamapets attoch e'ñe pa'charr etaman pats allcha' nare'tatset' pa'mro.

10

Atto Jesús'pa' mueñan pueyochresha' ñeññ' can'chroch 'charrasheña ñeññ'cha' otatsa

¹ Allempochña Partsesha'pa' alla llesenserranerr po'potantañ pueyochresha' can'chroch 'charrasheña ñeññ'cha' otra'tatsa o'ch serrpare'tyesnomuet. Ñetpa' atetcha' pa'nmuet e'ñech epsheña'tsocma tet. Arrcha' ta'yeset ora allohuen anetso'mar ñaña ama't allampaño'mar; allochñapa' allcha' oñem ñaña tsapatonet Jesús. ² Ama ahuaneneta' Jesúsñapa' atet otanet:

—Shonte' narmets ñeññ' nanac ellonñre'tets ñeññ'cha' a'yapa'chetañ. Tarraña ataruasañña ñeññ'cha' a'yapa'che'pa' ama atarr atonayaye. Te'pa' añcha'ña sanamoñ pamo'mte' mueñanepañña ñeññ'cha' a'yapa'cherrets pa'mro. Ñeññ'pa' atet toma'ntatanet Jesús atto atarr shonte' acheñenesha' ñeññ'cha' ame'ñerrtsañ tarraña ñeññ'cha' ame'ñaterrahuetpa' ama atarr atonayaye. Añcha'ña yenam Yompor ñeññ' Yamo'mte' yepen mueñanepañña pa'taruasañer ñeññ'cha' torra'yerrtsa ñocop allemeñ anetso'mar. ³ Ñaña sapa' ñerra'm o'ch ahues te'pa' seño'chcha' po'ño'ch 'chocmach eñall ñeññ'cha' se'moñe'te' ama't sapa' amach 'cho erroḡ sepenanetañe ñet. Ñeñño'marña notenes te'pa' o'ch nemñas e'ñech attes ñerra'm carrnero o'ch ahuo' allo'tsen ma'yarro'chno. ⁴ Ñaña amach sanmatsto quelle, ama't sebolsa, ama't po'ptaña sesapatpa' amach sanmatsche. O'ch ahues sema'yorñecma. Ama't esesha'ch sehuon'cha'tyesnom toño'marpa' amach alla so'chtatsto. ⁵ Allempoch se'chap ama't erra'tsena anetsro all sesen, ama't erra'tsena pocoll allcha' se'chappa' ñanomcha' atet se'posa. E'ñe sehuon'cha'teñoḡ ñeññ' apacllatesha'pa' o'ch senamatosñañ Yompor

pa'nateña. Ñerra'm ñetña po'ñoçh e'neññañet Yompor pa'nateña, Yomporñapa' a'natenanetcha'. ⁶ Tarraña ñerra'm ñetña ama e'neññañeto Yompor pa'nateñapa' Yomporñapa' o'ch alla apuerres sa pa'nateña. ⁷ Ñeñte pocollro allcha' e'ñe cohuen agapaset allach sa'posa. Ñeñt rrenet ñet ñeñtcha' rratapaset, ñeñtch serros saña. Tarro'mar ñeñtes torretsa e'ñe pocte' atetcha' tsa'tenset. Amach sommare'tyesatsto allemey pocollo'mar; allach e'ñe sommosa puepahuarro. ⁸ Ama't erra'tsena anetsro allcha' seçherrerr allcha' e'ñe cohuen aguërrseterr, ama't errotena rreñets apasetpa' ñeñtch serros. ⁹ Allñapa' sa'crratyesoscha' ñaña ñeñt atsna'tyets. Allcha' seserrpare'tatyesosanet, atetcha' sotos: "Te'pa' o' yeçhapatonas Yompor po'cohuenña ñeñt atto ayochreshattena ña. Aña palltetsa o'ch same'ñera attoch e'ñe çhaponasa seyoçhro." ¹⁰ Tarraña ñerra'm erra anetsro allcha' seçhap ñeñt allo'marnesha'ña ama cohuenaye' agapaseto, allña toño allecma chopeñe'chyenet ñet o'ch señotatnomanet. Ñeñt'pa' atetcha' sotnomanet: ¹¹ "Ama't pats ñeñt o' cheta yetco arr sa'netsro, te'ñapa' o'ch yepa'shetca'tyesnoma attoch señoçh sapa' ama't mameshapa' ama pocteye' entenso Yompor. Tarraña ama't atteñpa' te'pa' o'ch neñotatnomues Yompor po'cohuenña autsa çhaponasañ ñeñt atto ayochreshattena ña."

¹² Allempoña Jesús'pa' alla oterranerr pueyochresha' allempo ama seneta':

—Po'ñoçh te'pa' o'ch notas, esempohuañen allempoch a'crare'tetuerra allohuen acheñenesha'pa' añ anetso'marnesha' ñeñt ama cohuenaye' sagapaye te', nanaccha' yoroçheno'tsenterret allempo. Ama't sodomo'marnesha'pa' amach tama yoroçheno'tsenterreto atet ñerra'm ñeñt anetso'marnesha' ñeñt ama cohuenaye' sagapaye te'.

*Atto Jesús'pa' eños epo'mar anetsocop all ama ame'nyeto
(Mt. 11.20-24)*

¹³ Allempoña Jesús'pa' alla oterrerr:

—Nanaccha' llequëntso'tsa'yenes coraziño'marneshacha'; nanaccha' llequëntso'tsa'yenes saña betsaido'marneshacha'. Tarro'mar ama't atarr norrtatyennaseñ nepartsoña sesho, sañapa' amaña soctape'chuerroña ello cohuen Yomporecop. Ñerra'm arrcha'ña norrtatañ nepartsoña tiro'marneshesho ñaña sidóno'marneshesho, ñetñapa' ahuatoteñte' cotape'cherretañ e'ñe cohuen Yomporecop. Ñetpa' attochña e'ñe orrtetañ cha llecatenanet po'chñar, cotnashe'mach chorra'yetsañ, tsapñach epachshema'tyenetañ all anorrcha'tyenet puellquëno'tet. ¹⁴ Ñeñto'marña te'pa' notenes, esempohuañen allempoch a'crare'tetuerra allohuen acheñenesha'pa' tiro'marnesha' ñaña sidóno'marnesha' ñetñapa' amach tama a'coñchatare'tterreto allempo. Coraziño'marneshacha' ñaña betsaido'marneshacha' saña allempopa' atarrcha' coñchaterrset. ¹⁵ Ñaña sa capernaumo'marneshacha' çhate' sotenapañ atto e'ñe cohuen sentyena sañeña, Yomporñapa' allentach a'tapaterres pue'ntaño. Ñeñt'pa' amachca'ye atteye' perrsoña Yompor; allachca'ye huapore'terres o'pono coñcha'puetso.

¹⁶ Jesús'ña allempo ama sena' pueyochresha' o'ch serrpare'tyenet a' anetso'mar ñaña'pa' alla oterraneterr:

—Ñerra'm esesha'ch se'mñotapue' sa, na'naña e'mñotenet. Tarraña ñerra'm esesha'ch ama sagapaye sa, na'naña ama aguëneto. Ñaña ñerra'm

essha' ama mueno o'ch agapnet na, Nompore'naña ama mueneñeto o'ch agapet tarro'mar ñapa' ña nellsensene'.

Arrpa' allohua ñeñt atet otan pueyochresha'chno ñeñt cançhroch çharrasheña. Allempoñapa' mueñanet allcha' serrpare'tatyesnomuet.

Atto huaçherra Jesús pueyochresha' ñeñt cançhroch çharrasheña

17 E'ñe allponmatatsapa' o' alla huaçherra pueyochresha' ñeñt cançhroch çharrasheña. Ñetñapa' e'ñe pocsheñeshocmañen huachenet Jesúsesho. Atet serrpare'tatueñet:

—Parteshacha' ama't oneñeñechnopa' e'ñe yeçha'nmaçha'tatue e'ñe yeçhore'teño' pã peso'chño.

18 Ña'ñapa' otapuenanet:

—Napa' neñchca'ye oneñeñt allempo aprratamñsaretta po'huamenc. E'ñe affema't ñerra'm ñapa' o' çha'nmachet entot atet pena meratste' huetsa entot o'ch çhap aña patsro. 19 Po'ñoçhca'ye napa' atarr ahuamencat ne'pa'yesapas. Ama't allohuen ñeñt se'moñe'tyene' sañapa' ñeñtecopña nellsensa'yesas allochñapa' attoch e'ñe sa'mchechatyesuena' allohuen pa'namen, ama't shechpeçhno ñaña yellasoçhno, e'ñe satmama'teño'tpa' e'ñe sa'peptse'tatse'tueña'. Allochñapa' amach eñallettere'te ñeñtcha' semueroçhtate' ama't patrra. 20 Ama't atarr ahuamencateseñ atto o' sa'mchechatyesuahue oneñeñechno, amachña ñeña atarr socshatsto. Añcha'ña e'ñe socshena atto aquellca'yesaret seso'cheñ Yomporesho ñeñt pue'ntaño'tsen.

Atto Jesúsapa' atarr pocsheñesha' ma'yochena

(Mt. 11.25-27; 13.16-17)

21 E'ñe allempoña Jesúsapa' atarr coshateñ Parets Puecamquëñ. Ñeñto'marña ñapa' e'ñe pocsheñesho' ma'yochenana Pompor, ñeñtpa' atet oten:

—Na Apacha' o'ch na'ye'choçhtatonap, pãpa' pã ñeñte'p atarr ayochreshattetsa pe'ntaño ama't ñaña arr patsro. Na'ye'choçhtatonap tarro'mar ora añeçhno ñeñt pecohuenña pepen, ñeñtpa' ama arr-eye' peçhapateñe pueyoçhro ñeñt atarr eñotañ entyetsa. Papa' aña peçhapaten pueyoçhreto ñeñt ama eñotañeye' entetso. Tarro'mar Apa e'ñe pemuereño' ñeñtpa' atetña e'ñe pocte' penten pã. Arrpa' allohua ñeñt atet ma'yochenana Pompor.

22 'Nompore' allohuen po'cohuenña e'ñe eñotatuenen. Na ñeñten Puechemerenpa' ama po'ñoçh eseshaye' neñotenaye, ñapñaña Nompore' eñotenen. Nompore'pa'çho'ña ama po'noçh eseshaye' eñotenaye, napñaña na ñeñten Puechemeren e'ñe neñoteñ Nompore', ñaña erra'tsencha' ñeñt e'ñe pocte' nenten na ñeñten Puechemeren ñeñtñapa' o'ch neñotater Nompore'.

23 Allempoñapa' alla cohueranerr pueyochresha'pa' atet otanet e'ñe ñocpueta:

—Atarr cosheñtso'tsa'yenes sa tarro'mar e'ñe sa secloyotpa' o' senterrñañ Yompor po'cohuenña. 24 Po'ñoçhca'ye notenes e'ñe ahuatoteñpa' shonte' ñeñt a'mta'yesaye't Yompor po'ñoñ ama't ñaña ñeñt añcha'tareñtate't allempo, ñetñapa' atarr muenetañe't o'ch enterrñañetañ Yompor po'cohuenña ñeñt o' senterr sa te'. Tarraña allempo ñetpa' amaña eseshaye'ña enterrapaye Yompor

po'cohuenña. Ama't atarr muenetañe't o'ch e'mñnoterrñañet Yompor po'ñoñ ñeñt o' se'muerr sa te'tarraña allempo ñetpa' amaña eseshaye'ña e'muerrapayeña Yompor po'ñoñ.

Atto atarr cohuen orrtatos puesheñarr samario'marnesha'

²⁵ Allempoña puesheñarr ñeñt atarr etsotene' ñoñets ñeñt atet anaret judioneshacop, ñaña tantapa' atet otan Jesús attoch eñoch erro'tente' ye'chaten ña, ñeñtpa' atet och:

—Maestrocha' ta', ¿errofena'tcha' nepaña na e'ñe cohuen attoch napa' corretsach e'ñe tayoteñ ama't errponañohuen?

²⁶ Jesúsña ana'pa' atet och:

—¿Errofena't otenña ñoñets ñeñt atet anaret ahuatoteñ? ¿Eso'tña ñoñtsor pelleyenña pa' ñeñt anaret all?

²⁷ Ñaña'pa' atet och:

—Ñeñt ñoñetspa' atet oten: “Atarrcha' yemorrenteña Yeyomporer ñeñt Yepartseshar yepen e'ñe yeyochrocmañen. Ñaña e'ñe yecamquëño't yemorrenchach e'ñe yehuamencohuen, ama't ñaña ora yocta'ñohuen.” Ellonet po'poñpa' atet oten: “Atarrcha' yemorrenteña yamo'ts e'ñe atet atarr yemorrentena yañeña.”

²⁸ Jesúsña'pa' atet och:

—Atetca'ye e'ñe atet p'oten. Ñerra'm atetcha' e'ñe pepohuapa' pañapa' corretsa'pach e'ñe tayoteñ ama't errponañohuen.

²⁹ Ñeñtña acheñerpa' aña atarr muenen o'ch e'ñe cohuen enteñ Jesús ñaña allohuen acheñenesha'. Ñeñto'marña alla a'p'to'terranerr Jesús:

—Ñehua, te'pa' o'ch p'oten ¿eseshatña ñeñt e'ñe po'ño'ch namo'ts nepen?

³⁰ Attoch eñotach ñeñt e'ñe po'ño'ch amotso't entetsa ñeñt e'ñe pamo'ts p'annena, Jesúsña'pa' atet toma'ntacha, ñeñtpa' atet serrpare'tach:

—Eñall puesheñarr judionesha' ñeñt huetsa Jerusaléno't, ñapa' arr sen Jericó. Toñoñapa' alla rroma'p eñet e'ñe puerrata'ñpsatsre'tuet ama't pa'shtam. Atarr atserrpet. Autsa muetsapuetañ allempoña ñeñt atserrpapue'pa' ahuanerret. ³¹ Allempoña tematenpa' puesheñarr judionesha' ñeñt cornesha' ñapa'cho'ña all oñem. Ñaña'pa' ama't entospa' atta oñmatse'tam'pesya a'yo'marpa' o' metane. ³² Allempoña tematenpa' huapa ñaña po'psheñeñ judionesha' ñeñt levitaneshatets. Ñapa'cho'ña ama't entospa' atta oñmatse'tam'pesya a'yo'mar o' metane ñaña. ³³ Allempoña tematererr o' huapa ñaña puesheñarr ñeñt ama judioneshayaye ñeñtpa' samario'marnesha'. Ñapa' ñeñt pamo'tsesha' pen ama amo'tstenano judionesha'. Tarraña ñapa' allempo entosan puesheñarr judionesha' ñeñt atserrpenetpa' atarr muerosya. ³⁴ Allenta ponmosya, shosñañ olivose* ñaña vino allo partosñañ all atserrpeñet.

Allempoñapa' huanquërrñañ all atserrpeñet. Tantaterpa' montacha pashanoropa' anem allcha' mos. Allña'pa' all cohua'ñpsos. ³⁵ Tsapa'ñapa' cheta'muenan epa denario apa'muenan apaclatesha' atet ota'mueñ: “Te'pa' pecua'ñpescha', errponcha' pa'gasta' ello pe'cllayor, napa' netsa'tuerrpach esempoch nehuerra.”

³⁶ Jesúsña'pa' alla o'terranerr ñeñt acheñer:

* **10:34** Olivo ñeñt tsach allot yoreñet puerets pue'merot.

—Ma'psheño'maretpa' p̄apa' ¿erra'tsena'tña pentenña ñeñt atarr amo'tsoť entetsa ñeñt e'ñe pamo'ts pene' ñeñt rroma' eñeť?

³⁷ Ñeñtña acheñerpa' atet oterranerr Jesús:

—Añca'ye e'ñe pamo'ts pene' ñeñt e'ñe puemuereñoť partatse'terre'. Jesúsñapa' atet och:

—Te'pa' atetcha' peperra p̄aña. O'ch ahuerreppa' atarrcha' pemor-
rentera ora allohuen acheñenesha'.

*Allempo Jesúsapa' čhap pocollo all yečhena Marta epuet pa'mo'nerr
María*

³⁸ All oñen Jesúsapa' o' čhap paterr anetso. Allña puesheñarr coyanesha' añ pa'so'cheñ Marta, ñañaapa' e'ñe cohuen agapapan Jesús pa'paclo.

³⁹ Ñeñtña Martapa' eñall ñaña pa'mo'nerr ñeñtpa' añ pa'so'cheñ María. Maríañapa' all anen Partsesha' Jesús pa'rrp̄oť allot e'mñoteññañ ñeñt atet serrpare'tatenanet. ⁴⁰ Pa'mo'nerrña Martapa' aña e'ñe ma'yočhrena a'toranp̄se' all puetare'tallme'chen. Ñañaapa' ponmana Jesúsapa' atet otos:

—Ayochreshate, amate' pocte' penteñe nap̄ta neptare'tallme'chen; nemo'nerrñapa' ama yenpuenno. Te'pa' o'ch p̄och a'toranp̄sapretnepa' naťar.

⁴¹ Jesúsñapa' atet och:

—Nočha Marta, shonte' pa'namen ñeñt petorra'yena, p̄apa' ñeñtña atarr pellcatene'. ⁴² Tarraña e'ñe patrraña ñeñt atarr sherbets; ñeñtpa' atto e'ñe cohuen socshennana neñoñ. Pemo'nerr Mariapa' ñapa' ñeñtña atarr e'nen. Ñeñtpa' ama't e'ñe esesha amach errotenoť puer-ratamp̄ereto.

11

*Atto Jesúsapa' yečhatan pueyochresha' atetcha' ma'yochet
(Mt. 6.9-15; 7.7-11)*

¹ Po'pocheño Jesúsapa' alla ma'yočherrerr. O' ma'yočuapa' puesheñarrña pueyochresha'pa' atet och:

—Partseshacha' te'pa' o'ch peyčhatey ma'yočatsa atet pe't Juanañ, ñapa' čhocma yečhatane't ña pueyochresha' atetcha' ma'yochet.

² Jesúsñapa' atet otanet:

—Ñehua, ñerra'm esempoch sema'yočhena atetcha' sot:

Yompore Partso ñeñep̄ pe'ntaño'tsen, yentapepa'ch p̄a atarr Partsoř. Chapuepa'ch Nompore allempoch atarr pa'yočhreshatterra arr patsro. Yetsonapepa'ch arr patsro ñeñt atet pemnen p̄a Nompore atet penet ñaña pe'ntaño.

³ Chocmuepa'ch Nompore p̄apueney ñaña yoccranñ ñeñt allpon yepallta'yena pate'tets yeť.

⁴ Peřretna'huonayepa'ch Nompore allohuen yo'chñar ñeñt ama poct-eye' pentapretenye, atto Nompore yapa'čo'ña yeřretnannena ñerra'm esempo errot yeřannena. Ñaña amach Nompore pem-natatsche sosya'tañ o'ch atarr topateney. Añcha'ña čhoch Nompore p̄a'ypo'ñataterrey allohuen sosya'tsañečhno.

⁵ Elloñapa' alla yečhaterraneterr ñeñt atto e'ñe yenamueñoť Yompore apueycha'. Ñeñtpa' atet serrpare'taterraneterr toma'nteñtso.

—Ñerra'm eñall puesheñarr ñeñt e'ñe cohuen yeyemtenaya, ama't rročh tsapo o'ch ahuey pa'paclo yečhore'teñoťpa' atetcha'

yotos: “Napa’ masheñcha’ añecop nohuena o’ch p̄apuen ama’t coñe’ta rreñets, ⁶ tarro’mar o’ chap p̄uesheñarr namo’ts ñeñt huetsa ñachayot, napa’ ama es necheno ama’t coñe’ta alloch neyema’cha.” ⁷ Tarraña ñapa’ po’ponrotpa’ ñato’ chach otapuey: “Amach p̄a’tsrre’moçhtana’tatstosno tarro’mar o’ e’ñe echarr neyottam̄pesuena, allohuen nacñeñaretolleshohuenpa’ o’ yemanrra’tuen. Ñeñto’marña ama eshcaye’ atantenno o’ch necha’nmonaþa attoch es napaþ.” ⁸ Tarraña napa’ o’ch notas, ama’t ñeñt atarr yeyemtenaña’ ñerra’m ama cha’nmaponayopa’ yañapa’ ñerra’m alla yenamuere’tpa’ cha’nmaponayach attoch apapuey ama’t erra’tsena ñeñt atarr yenamueñ attoch amach alla ya’tsrre’moçhtana’tneñe es enamare’tē. ⁹ Ñeñto’marña napa’ o’ch notas: E’ñe senamueñoṭ, Yomporñapa’ apascha’. Se’name’tēnoṭpa’ señchcha’, seçhore’tēnoṭ, Yomporñapa’ e’ñe pue’mñnoteñoṭespa’ e’ñech cohuen toram̄psapas. ¹⁰ Tarro’mar ñeñt es enamare’tetspa’ ñetña es aguētset; ñaña erra’tsen ñeñt es e’nyetspa’ ñetñapa’ enteretcha’, ñaña erra’tsen ñeñt çhore’tyene’ ñetñapa’ e’ñech e’mñotenanet Yompor.

¹¹⁻¹³ Yompor ñeñt pue’ntaño’tsen çhocmach e’ñe cohuenare’ es apa’yeney ñerra’m esempo es yenamueñ. Ñapa’ amach aña apuenye ñeñt ama cohuenaye’ yenteno ya. Ama’t sa ñeñtes arromñañes atet sepeñ saña sechemer, e’ñech cohuen es sapueñ ñerra’m esempo es enamuenes. Atet ñerra’m allempo pa’chporrñoṭ es enamuenes, o’ch enamas mam* ñeñtcha’ rra’, sapa’ ama’t p̄uesheñarroṭesapa’ amach aña sapueñeña sechemer mapue’ ñeñt ama arrapahuoyaye. Amapa’ ñerra’m cac enamuenes sañapa’ ama’t p̄uesheñarroṭesapa’ ama aña sapueñeña sechemer shecheþ ñeñt atarr amueroçhtatañ. Amapa’ ñerra’m pa’mē enamuenes sañapa’ ama’t p̄uesheñarroṭesapa’ ama aña sapueñeña sechemer yellas. Ñeñto’marña sa ama’t arromñañes ama’t ñaña atrre’mñañes sapa’ e’ñe señoṭeñ apa’yese’ sechemerasha’ e’ñe cohuenare’. Añña ñeñt Seyomporer sepen saña ñeñt pue’ntaño’tsen elloña ñapa’ e’ñe eñoteñ atto e’ñe cohuenare’ es apa’yenes saña. Ama’t Puecamquēñ ñeñt e’ñe cohuen Parets attoña e’ñe cohuen chorratensa allohuenes ñeñtes enamyene’ ña.

Atto p̄uesheña’tets oteñet Jesús ñapa’ oneñeto’ po’huamencot cächpatenanña po’potantañ oneñeteçhno acheñenesha’

(Mt. 12.22-30; Mr. 3.19-27)

¹⁴ Po’pocheño allo’tsen p̄uesheñarr acheñ ñeñt chorrena oneñeñ, cha opanatañ. Allempoña Jesúsapa’ cächpatosan oneñeñ atto chorrenana acheñ. Atto cächpa’ner oneñeñ ñeñtña opanpa’ o’ alla eñorerra. Acheñenesha’ña allpa’ atta cohuanrrorteñet, atarr cohuen enteñet. ¹⁵ Tarraña po’potantañeçhnoña acheñenesha’pa’ ama’t mameshapa’ ama pocteye’ eñchet. Ñetñapa’ atet otyeñet:

—Atto cächpatatanan oneñeñ acheñpa’ añaca’ye ahuamencat pene’ Beelzebú ñeñt pompor pen allohuen oneñeteçhno.

¹⁶ Po’potantañ acheñenesha’ ñetñapa’ cha mueneñet o’ch topachet Jesús. Ñetpa’ atet ochet:

—Yapa’ añ yemnen o’ch pegatey pepartsoña entot allochñapa’ attoch yeñoṭaþ po’ñoçh p̄apa’ Parets Puechemereþ.

* **11:11-13** Ñehua, Jesús añ toma’ntatanet pan ñeñt puerrar penet all pa’nyo.

17 Jesúsñapa' eñotanet ñeñt atet cotape'chatse'tyenet pueyoçhreto ñocop ñeñt atto otyeñet ñapa' oneñeña pompor po'huamencot caçhpatenaneña oneñeñeçhno. Ñeñto'marña ñapa' atet otanet:

—Ñerra'm puesheñarr amcha'taret elloptannena pa'cheñer e'ñe ñagattsetapa' e'ñech poctacma a'cclatanna'tuerret. Attecmach ñannerra ama't ñeñt e'ñe pamo'tsna'tarecmuet ñerra'm elloptannerret e'ñe ñagattsetpa' e'ñech a'cclatanna'tuerret. 18 Attecmach ñannerra ñaña oneñeñ pueyochreshaçhno ñerra'm oneñeñeçhno e'moñe'tannenet e'ñe ñagattseta, ñetña atto huomencatenetpa' çhach huañerrets amach allo'na huomencateneto. Ñeñtpa' atet o' notuas tarro'mar sapa' çha sotenen napa' Beelzebo' po'huamencot necaçhpatateñña e'ñe ña pueyochresha' ñeñt pompor pen allohuen oneñeñeçhno. Po'ñoçh oneñeñtpa' amaca'ye huapore'tanneno. 19 Sapa' atet sotenen napa' Beelzebo' po'huamencot necaçhpatateñña e'ñe ña pueyochresha', ñehua, te'pa' o'ch notas: Ñeñt seyochresha' sepen sa ñeñt eñotene' ñamet o'ch caçhpatachet oneñeñ acheñenesha' ñetpa'çho'ña amaña Beezebú po'huamencoteye' caçhpatateñetoña oneñeñ acheñenesha'. Ñetpa'çho'ña Yomporoña po'huamencot caçhpatatenetña oneñeñ. Ñeñtña o' eñotatas ñeñt atet sotenoñ ñeñtpa' amaca'ye po'ñoçh atteyaye. 20 Po'ñoçhca'ye Yompor po'huamencot necaçhpatateñña oneñeñeçhno acheñenesha' ñeñtcha'ña señotate' te'pa' o' neçhapatonas Yompor po'cohuenña ñeñt atto po'ñoçh atarr ayochreshattena ña.

21 'Ñeñtpa' o' e'ñe notuas atet tarro'mar yeñoteñ ñeñt atarr ahuamencattetsa atto atarr ahuamencattena oneñeñ, ñaña' e'ñe po'huamencot cohuanpseyenan allohuen e'ñe cohuen ñeñt pa'paquell pa'yen. Ñapa' po'huamencocmañen na'yenan ñeñtcha' e'ñe cohuanpene' all amcha'tarettena ña. 22 Tarraña ñerra'm esempo o'ch huapoña ñeñt atarr ahuamencatesha' ñeñtcha' ello metanose'ña po'huamenc atet ñerra'm na Nompor, ñeñtcha'ña e'ñe a'mchechatose'. Attoña e'ñe puerratamþsosña ñeñt allpon moñenaya ñeñt atarr yemuetyena ña. Alloçhñapa' o'ch be'tosos all ñeñt pa'paquell pa'yen o'ch e'ñe puerratamþeshuos ñeñt allpon o'patyena ña.

23 'Ñeñto'marña te'pa' o'ch notas allohuenes: Ñerra'm eseshas ñeñtes ama netorrapretenaye ñeñtña acheñerpa' çhaca'ye epatare'tennan ñeñt atet netorra'yena na. Ñeñtpa' o'ch netma'ntatasa atet: Ñerra'm esesha' ama na'yapaçhapterenaye ñeñt na'yapaçhen na, ñeñtña' çha a'parratse'tamþenen a'yenet.

Atto Jesús'pa' eñotatanet ñato' oneñeñtpa' o'ch alla chorrerranerr acheñ allot çha'nom ahuaña

(Mt. 12.43-45)

24 'Ellone'tpa' o'ch alla neñotatersserr po'poñoneñ: Oneñeñ ñerra'm esempo çha'nom acheñesho't, ñeñtña oneñeñtpa' o'ch ayes erraþaren ama't amayo'mar e'nyese' po'psheñeñ allcha' yeçherrerr allcha' e'ñe amesuerrerr cohuen. Tarraña ñerra'm amach erra eñche'pa' atteñapa' o'ch ot: "Napa' o'ch alla ahuerren nepacollo allot neçha'nom ahuaña." 25 Atetcha'çho' pa. O'ch alla ahuerren allot çha'nom ahuaña. Allña o'ch çherrpa' e'ñech cohuen entuerran pa'paquell, e'ñech cohuen atar-rapo'tuaret, e'ñech cohuen añño'tyesaret. 26 Allempoñapa' o'ch alla

ahuerr allo'tsa'yen pamo'tsesha'pa' o'ch enana' po'poñ cancherrsheña oneñeñechno ñeññ nanac sosyare', ñeññ ello metana'tuene' ñeññ atet sosyaten ñeññ hua'ñene' o'ch ye'chagrecha. Allohuenetñapa' o'ch chorreñet ñeññ acheñer. Allempoña tsapa'one'tpa' allo'nach sen ñeññ acheñer sosyatnomuets huomenc. Elloch metanerran ñeññ atet patse'tyese't ñenmañ.

²⁷ Jesús allempo atet serrpare'tatenan acheñenesha'pa' puesheñarrña coyanesha'pa' machayotepa'tcha' rrana, ñeññpa' atet ot:

—Ama't ñeññ p̄achor pepen p̄apa' atarr cosheñtso'tsen tarro'mar ñapa' ñeññ pe'ñalletate' p̄a ñeññep̄ atarr cohuen es peye'chcaten ñaña ñapa' e'ñe cohuen cohuan̄psap̄ allempo cheshatollenp̄a'.

²⁸ Jesúsñapa' atet och:

—Elloña allohuenetpa' atarr cosheñtso'tsa'yenet ñeññ pue'mñoteñofet Yompor po'ñoñ e'ñe atet p̄ohuenet.

Atto Jesús'pa' otan acheñenesha' ñeññ ama cohuenaye' cotape'chetso ñetñapa' chocma e'nenet partsoteñets

(Mt. 12.38-42; Mr. 8.12)

²⁹ Allempoña acheñenesha' emchorreñet Jesús, ñañapa' atet otanet:

—Acheñenesha' ñeññ corra'yetsa te' ñetñapa' ama cohuenaye' cotape'chyeneto. Tarro'mar ñetpa' ñaña e'nenet ahuo'ch norrtatanet nepartsoteña atto'chña eñotnet napa' po'ñocho'te' Parets Puechemeren ñeññeno'te' Cristotosets. Tarraña amach es norrtataneto. Napa' añach paterr neñotatanet atet eñotatane't Jonás ahuat nínivo'marnesha' allempo a'mtane't Yompor po'ñoñ. ³⁰ Tarro'mar atto eñotatane't Jonás nínivo'marnesha' ahuat ñapa' Yomporeshot huena, napa'cho'ña te'pa' atet'cha' neñotach naña acheñenesha' ñeññ corretsa te' napa'cho'ña Yomporeshot nohuena. ³¹⁻³² Tarro'mar ahuat allempo serrpare'tatane't Jonás nínivo'marnesha' ñetñapa' allempocma cotape'cherret ello e'ñe cohuen Yomporecop. Te'ña arr seshopa' allo'tsenen na ñeññen ello metanene' ñeññ atet serrpare'tate't Jonás. Tarraña sañapa' amaña soctape'chenoña ello cohuen Yomporecop. Ñeñño'marña esempohuañen allempoch a'crare'tetuerra allohuen acheñenesha', ñeññña nínivo'marnesha' ñeññ e'ñe cohuen cotape'cherrets Yomporecop ahuat, ñetpa'cho'ña orrterretcha', ñeññcha'ña señotaterre'ña sapa' ama't mamesha ama pocteyayeña ñeññ atet sepa'yese't tarro'mar sapa' ama soctape'cherro ello cohuen Yomporecop. Ñaña te'pa' o'ch neyerpatasa ñeññ atet p̄a ahuat puesheñarr coyanesha' ñeññ am̄cha'tarettatse't atarr ñachayo allohuanen pats sa'ponet. Ñeññña coyanesha'pa' allotēñ on o'ch e'mñotenana' Salomón pueserrpareñ ñeññ atet atarr eñotañte't. Te'ña arr e'ñe seshopa' allo'tsenen ñeññen puesheñarrana ñeññen atarr es neñoten naña, ello nem̄taneñ atto eñotañte't Salomón. Tarraña sañapa' amaña es sotapoteno. Ñeñño'marña esempohuañen allempoch a'crare'tetuerra allohuen acheñenesha', ñeññña coyanesha' ñeññ e'ñe cohuen e'mñotatse't ñapa'cho'ña orrterrach, ñeññcha'ña señotaterre' sapa' ama pocteyayeña ñeññ atet sepa'yese't tarro'mar sapa' ama es sotapote'te ama't e'ñe mamesha.

Atto yeclle'pa' añ toma'ntena ñeññ po'lampareñ pen allohuen yechets
(Mt. 5.15; 6.22-23)

³³ Jesús'pa' alla serrpare'taterraneterr, ñeñtpa' atet oterraneterr:

—Ñerra'm esempo ya'llchaten lampareñ, ñeñtpa' ama tarrecpaye' ya'huortateñe o'ch yene' o'pono e'ñe a'nareto. Ñaña ama añecpaye' ya'llchateñe o'ch ye'rramamipes coymño. Ñeñtpa' añecopña ya'huortatenña lampareñ o'ch yene' enonet attochña e'ñech čoyo'tamipesuan allohuen acheñenesha' ñeñt be'tosčhets all pocollo. ³⁴⁻³⁵ Yecle'pa' añ toma'ntena atet ñerra'm ñeñt po'lampareñ pen allohuen yechets. Ñerra'm e'ñe cohuen huomech yecle'pa' e'ñech cohuen entatene yuetare' allochñapa' attoch e'ñe cohuen torratyenana allemeñ yechets tarro'mar e'ñe cohuen a'puetarsamipsarettenet. Tarraña yecle'ña ñerra'm ama e'ñe cohuen huomčheyayepa' amach e'ñe cohuenaye' entatene yuetare' attochña amach eshcaye' torratyenano allemeñ yechets tarro'mar čha ottena ñerra'mrrate' checmeto'tsa'yeneta. Attecma pena ñaña yeyočer. Ñerra'm e'ñe cohuen yoctape'chyen yeyočropa' attoña čhennayaña yeyočro e'ñe ora allohuen Yompor poctapña ñeñt po'cohuenña pen. Attoña ora yoctapñapa' e'ñech a'puetarsamipsarettena Yomproshot. Tarraña o'ch yeñota e'ñe yañeña tarro'mar ñerra'm ama cohuenaye' yoctape'cheno yeyočro, ñeñtpa' amach errotenoť a'puetarsamipenyena ñeñt yoctapña yepen. Ñeñtña yoctapña yepenpa' čhach a'chechmetamipennay yeyočer. ³⁶ Tarraña ñerra'm po'ñoč e'ñe cohuen yoctape'chen yeyočro, attoña čhennayaña yeyočro e'ñe ora allohuen Yompor poctapña attochña yeñoteñ orrtatyese' ñeñt e'ñe cohuen enten ña. Attoña e'ñech cohuen es yepa'yen atet ñerra'mrrate' lampareñ e'ñe cohuen čoyo'tamipeney attoch e'ñe cohuen es yentyen. Allempopa' o'huañcha' allo'na yechecmetamipesen.

Atto Jesús'pa' a'metare'tenan fariseonesha' ñeñt atet yečhenet ñetpa' ñeñtpa' ama cohuenaye' entapretenaneto Yompor

(Mt. 23.1-36; Mr. 12.38-40; Lc. 20.45-47)

³⁷ O' serrpare'tatuanet Jesús'pa' puesheñarrña fariseonesha'pa' hua'ña'nerran Jesús o'ch rrallme'chapreteña' pa'paclo. Allempo čhap Jesús allpa' be'tosos anorros allcha' rrallme'chapretosan ñeñt hua'ñene'. ³⁸ Ñeñtña fariseopa' entenan Jesús atto ñapa' ama e'pota'to ñeñt atet yečhena judionesha'. Ñehua, ñetpa' atet yečhenet, amach rrallme'cheneta'pa' o'ch e'pota'tyeset Partsocop. Ñeñto'marña fariseopa' atet cotape'ch Jesúsocop:

—Ta'm, eso'marte'ca'ye amaña e'pota'tenoña ñeñt atet poctetsa Partsocop.

³⁹ Partsesha'ña Jesús'pa' atet toma'ntatana ñeñt atet pena allohuen fariseonesha', ñeñtpa' atet otan ñeñt hua'ñene':

—Ñeñtes fariseoneshas sapa' e'ñe se'pame'teneñña setaza enoťpa' o'ponoťñapa' ama se'parro'teñe. Seplatopa'čho'ña enoťa e'ñe se'pata'teñ o'ponoťñapa' ama se'pata'teñe. E'ñe atet sepena samña. E'ñe sa'cohuentatena ñeñt eno'mar ñeñt atet seyčhena sa allochñapa' attoch entenes allohuen acheñenesha' sapa' e'ño' cohuenes, tarraña o'ponoť seyočropa' ama sa'cohuentateñe, allñapa' e'ñe chorren shonte' sosya'tsañečno ñeñt atto e'ñe seshquėñoť čhocma es seprratamipesyen, seshonten pa'namen ñeñt ama pocteye' entapretenso Yompor. ⁴⁰ Čha sottena ñerra'm erra'tsen puesheñarr ačeñ ñeñt ama es eñoteno. Ama't

señoteñeña Yomporña ñeñt̃ yečhcatyene' allohuen ñeñt̃ allpon yentyen arr patsro, ñeñt̃ a'yote'tsa'yen yeshot̃ ñeñt̃ara Yompor ñeñt̃ yečhcate' ñaña yeyočher alloch e'ñe cohuen yoctape'chen o'pono yeyočhro.
 41 Ñerra'm o'ch po'ñočh soctape'cherr cohuen seyočhro Yomporecop attochña e'ñe cohuen seyočhrocmañen es sapa'yen attoch seyempa'yeñ po'potantañ. Ñerra'm atetcha' seperrapa' Yomporñapa' e'ñech cohuenare' enterres.

42 'Atarr llequēñtso'tsenes sa ñeñtes fariseoneshas tarro'mar ama atteye' sepeno ñeñt̃ atet o' notuas. Ora allohuen ñeñt̃ senarem̃ sepen ama't̃hocma sapueñeñ Yompor allpon ñeñt̃ poctetsa ñocop—mentapan ñaña rudapan. Tarraña añña ñeñt̃ nanac sherbets Yomporecop e'ñech pocte' es yepeññañ po'psheñeñ ñaña e'ñech cohuen yemorrenteña Yompor. Ñeñt̃ atetpa' sañapa' ama soctape'cheñe ama't̃ mamesha. Sapa' ñeñt̃ña sepalltena o'ch e'ñe atet sephua. Tarraña ñeñt̃ atto čhocma es sapa'yen Yomporecop ñeñt̃pa'cho'ña amach secačhpatsche.

43 'Atarr llequēñtso'tsa'yenes sa ñeñtes fariseoneshas tarro'mar sapa' e'ñe sommo'cheñot̃ atarr semneñ allohuen acheñenesha'pa' o'ch e'ñe cohuen entenset. Ñeñto'marña sapa' añña atarr semnen o'ch sanorrčha'tyen judionesha' po'prahuo allecma anorryen ñeñt̃ atarr añcha'na'tpo' enten allohuen acheñenesha'. Ñaña sapa' añña atarr semnen allohuen acheñenesha'pa' o'ch huomčha'tenset pueričha'nañot̃ ñerra'm esempo sechopeñe'chen toño'mar allecma chopeñe'chyen allohuen acheñenesha'.

44 'Atarr llequēñets socop, tarro'mar sapa' e'ñe attes ñerra'mrate' apampaña ñeñt̃ amach orrteno enot̃ all apamparettena arromñaat̃ o'pono patso. Ñeñto'marña acheñenesha'pa' allach chopeñe'chyenet all ama esesha' eñotenaye o'ponopa' allo'tsa'yen arromñaat̃ap all e'ñe chorren sosya'tsañ.

45 Allempoña puesheñarr ñeñt̃ atarr etsotenayeñ ñoñets ñeñt̃ atet anaret judioneshacop, ñañaapa' atet otan Jesús:

—Maestro, ñeñt̃ atet p̃oten ya'naña čha muene' pepencaten.

46 Jesúsñapa' atet och:

—Sapa' ñeñtes atarr etsotenayeñ ñoñets ñeñt̃ atet anaret judioneshacop, sapa'cho'ña atarr llequēñets socop, tarro'mar sapa' atarr es sena'yeyññañ acheñenesha' ñeñt̃ atarr echarrare' entyenet ñet, po'ñočhpa' amach errotenot̃ e'ñe atet p̃ohueto. Sapa' ama't̃ mameshapa' ama ayenpuenaye' sentpenaneto.

47 'Llequēñtsa ñaña socop tarro'mar sa te'pa' satomaten enot̃ ñeñt̃ atarr cohuen senten sa all pampa'yesete't̃ ñeñt̃ a'mta'yesaye't̃ Yompor po'ñoñ ahuat̃ ñeñt̃ muetsanatyese't̃ ñeñt̃ satañneshañ sepe't̃. 48 Sapa' e'ñe señoñteññañ sa'tañneshañ atto ñetpa' muetsanachete't̃ ñeñt̃ a'mta'yesaye't̃ Yompor po'ñoñ tarraña sapa'cho'ña ñeñt̃ña e'ñe pocte' senten samña ñeñto'mar te'pa' e'ñe sa'cohuentañpenanet all apamparettenet.

49 'Ama't̃ Yompor ahuat̃, e'ñe pueñoteñot̃pa' atet ote't̃: “Napa' o'ch nemñe acheñeneshesho ñeñt̃cha' a'mtene' neñoñ ñaña ñeñt̃ nellensar-nesha' nepa'yen. Tarraña patantarrña acheñenesha'ñapa' čha muet-sanatanet, po'potantaññapa' čha cotare'tyeset.” 50 Attoña e'ñe allem-poteñ ayečhcataretta añ pats, ora allohuen ñeñt̃ a'mta'yesaye't̃ Yompor po'ñoñ allpon ñeñt̃ amtsanatyarettatse't̃ ashataretetyesete't̃ po'r-ras, sañapa' allem-poteñ e'ñe sa'yohuarettena teme'ttsen sa ñeñtes corretsa

te'. ⁵¹ E'ñe allempoteñ muetseret Abel tarremphua allempo muetseret ñaña Zacarías ñeñtpa' alla semtser Parets po'ponro puecha'petarot' allo'tsen altar allotecma sherbete't Yompor. Po'ñoçha'ye notenes añenesha' ñeñt corretsa te' atarr ayohuarettenet.

⁵² 'Llequëntsa socop ñeñtescha' e'ñe etsotenayeñ ñoñets ñeñt atet anaret judioneshacop tarro'mar sapa' cha seprratampeñ acheñenesha' ñeñt alloch enteret ñeñt e'ñe po'ñoçh alloch queshperret. Tarro'mar ama't sapa' amaca'ye senteññañeña Yompor po'cohuenña, ellonetpa'cho'ña çhocma sepatare'teñña po'potantañ ñeñt e'nene' Yompor po'cohuenña.

⁵³ Allempoña ñetpa' e'ñe pa'tsrre'mueño't atarr es a'p'to'tare'tyeset Jesús. ⁵⁴ Ñetpa' añ atarr e'nenet attoch otatse'tachet allochñapa' ñato' po'tatse'tateño'tetpa' attoch otteñe'cheñet.

12

Atto Jesús pa' yeçhatan pueyochresha' amach eñotatstoñeto fariseonesha' pommo'cheña

¹ Shonte' acheñenesha' ñeñt huaçhenoya Jesús, shonte' nanac pationer. Cha che'muechoset Jesúsesho atfa atmatca'tanna'tyesoset. Jesúsña ñanompa' alla serrpare'taterranerr pueyochresha', ñeñtpa' atet otanet:

—E'ñech señota ñato't semeñe'teña' fariseonesha' poctapña, tarraña ñeñt poctapña penet ñetpa' ñeñtpa' ommo'cheñtsa. Ñeñtpa' mametollapa' o'ch epa'hua erraparen e'ñe atet pena ñerra'mrrate' chase' mametollapa' o'ch e'ñe es a'chasa'hua. ² Tarro'mar yapa' yeñoteñ allohuen ñeñt allo e'ñe a'nahua shecare'tyenet te' esempohuañenñapa' a'metam̄psaretterretcha'. Ama't allohuen ñeñt e'ñe a'nasotyenet te'pa' esempohuañenñapa' e'ñech eñotatare'tetuerret. ³ Ñeñto'marña ama't erra'tsena seserrparen e'ñe a'nahua te' esempopa' señotatuercha' ora allohuen acheñenesha'. Ama't erra'tsena ñeñt atet seserrpare'tyen te' e'ñe a'nahua o'pono pocollo, esempopa' seserrpare'tatcha' allcha' e'ñe cohuen e'mhuerres allohuen acheñenesha' atet ñerra'mrrate' enot seserrpare'ten shelletot.

Atto amach yencha'tatsto ñeñtcha' muetse' yechets, añcha'ña yencha'na't Yompor

(Mt. 10.28-31)

⁴ Te'pa' o'ch notas masheñneshacha', amach añña señcha'tatsto ñeñtcha' semtse'. Tarro'mar añach muetsonaset sechets, secamquëññapa' amach errotenot muetsonaseto. ⁵ Añcha'ña señcha'na't Yompor tarro'mar ñerra'm ña muenats e'ñe ña po'huamenco'tpa' o'ch a'chencatonay ye'chets, yecamquëñpa'cho'ña o'ch mueñonay coñcheñtso all parraren tso'. E'ñe po'ñoçh notenes, Yomporcha'ña señcha'na'ten.

⁶⁻⁷ Elloña te'pa' napa' o'ch notas, çhocmach seyemcha Yompor, po'ñoçh ñapa' ñach secuam̄pene'. Ama't otetollesha'pa'cho'ña çhocma cohuañpeñ. Ñehua, ama't yapa' yeñoteñ otetollpa' ama tama sherbeno. Ama't yepomatset, amnar otetollesha'pa' ñeñtpa' ama tsa'teyaye, e'ñe eptallatolla centavo tsa'tena. Tarraña ama't atteñ Yomporña ama't patra otetollpa' ama pueseñe. Ñeñto'marña notenes, ama't mameshapa'

amach señcha'tatsto, Yomporcha'ña e'ñe seyemta. Atto atarr morrentenana otetollesha' elloña sapa' atarr nanac morrentensa. Ñehua, ama't allpon sechetollesha' allpon soño'tsen ñapa' e'ñe eñotennas.

Atto ama a' nasotpahuo Jesucristo acheñesho'mar

(Mt. 10.32-33; 12.32; 10.19-20)

⁸ Elloña napa' o'ch noterrser, allohuen ama't erra'tsencha' ñeñtcha' ama na' nasotenaye acheñeneshesho, napa'cho'ña Ñeñten Acheñetosetspa' amach na' nasotueraneto naña Nomporesho allo'tsa'yen epuet po'mllañoñeñnashar. ⁹ Tarraña ñerra'm esesha' na' nasotenaya na arr patsro acheñeneshesho, napa'cho'ña na' nasoterranetcha' Nomporesho allo'tsa'yen epuet po'mllañoñeñnashar.

¹⁰ 'Ñerra'm esesha' nesesene' na Ñeñten Acheñetosets ñeñtapa' apretna'po' nenteñ. Tarraña ñerra'm esesha' añ achmāre'tenet Parets Puecamquēñ ñeñtapa' ama apretna'pahuoye' nenteñe.

¹¹ Ñaña o'ch noterrser, ñerra'm esepoch anmaset judionesha' po'prahuo allcha' a'metare'tamāpsaset amcha'taretesho, sañapa' amach cha selca'psatsto, amach cha sotapsa'tatsto: Errotuachca'ye notoste' attoch cohuen nanapos, esuachca'ye notte'. ¹² Sapa' añcha'ña se'ñoratosē Parets Puecamquēñ e'ñe allempo a'p̄to'tare'tenset all.

Ñeñt e'ñe añ muenen o'ch esocmañen echyes, ñeñtapa' atarr yoroçheno'tsen

¹³ All che'muechen shonte' acheñenesha' Jesúsesho, puesheñarrñapa' atet otan Jesús:

—Maestro, te'pa' o'ch p̄oton nemo'nasheñ nepo'nar apuernepa'ñaca'yeña naña ñeñt allpon o'patatnomna nomporeñ.

¹⁴ Tarraña Jesúsñapa' atet och:

—Masheñcha' napa' ama eseshaye' nenaye ñeñtencha' a'pocstatene' ñoñets attoch soten o'ch napa'yesas allpon o'patatyenset.

¹⁵ Alla oterraneterr Jesús:

—E'ñech señota sañeña, ama't seyoçhrapa' amach es seye'chapretanna'tatsto ama't e'ñe coñe'ta tarro'mar atto yocrrena arr cohuen añe patsropa' ñeñtapa' ama añecpayaye alloch esocmañen es yechyerr ñeñtcha' atarr yochaterre' tsapatonet.

¹⁶ Ñeñtapa' atet otanet toma'nteñtso:

—Eñall puesheñarr acheñ atarr nanac eçllayoret. Allña po'patsñopa' shonte' nanac aton a'yechcaten. ¹⁷ Ñeñtña eçllayoretpa' atet cotape'chen pueyoçhropa' atet oten: “Errotuachca'ye nepa'ña, ñeñt atarr nanac aton netotaten amaca'ye eñalleña allcha' e'ñe nañño'tue.” ¹⁸ Allempo atet cotape'chenpa' alla oterrerr: “Te'pa' o'ca' neñoch atetcha'ca'ye nepa. O'chca'ye na'materrña pocollashe'm allecma nañño'te't coñe'ta'tets te'ñapa' o'ch alla natomaterr atarrpo' allcha' e'ñe nañño'tua allohuen ñeñt allpon netotaten ama't ñaña allohuen ñeñt allpon pa'namen esocmañen nechyen. ¹⁹ Allempoñapa' atetcha' not neyoçhro: Napa' ama es nepallteno ama't e'ñe mamesha. Ñeñt allpon shonte' o' nañño'tuapa' atarrcha' atomat char amach es nepallderre'te. Te'pa' o'ch names e'ñe pocactma. Nellapene'tcha' rrats, nellapene'tcha' orrare'tats; ñeñtcha'ña e'ñe nocshatene'ña na.” ²⁰ Tarraña ñeñt acheñerpa' Yomporpa' atet och: “Papa' atarr otatsñañe'p̄, ama es peñoteno ama't mamesha. Te'pa'

añe tsaprocmaçh o'ch perromuen. Ñeñña shonte' o' ãañno'tuapa' te'ñapa' esesha'huachñaca'ye o'paterraya.” ²¹ Ñeñto'mar yeñoteñ, ñeñt' añno'tene' shonte' esocmañen ñeñt' e'ñe ñocpa, ñeñña acheñer atetpa' ama echenanoña ñeñt' sherbets Yomporecop.

Atto Yomporpa' ñach e'ñe cohuen cohuanpene' ñeñt' puechemerasha' pen

(Mt. 6.25-34)

²² Allempoña Jesúsapa' alla otterrannerr pueyochresha':

—Ñeñto'marña te'pa' o'ch noterrerr, amach aña sellcatsto ñeñt' atto yeychena arr patsro. Ama't seyoçhra amach sotatsto, esuachca'ye yerrerrerrte' tsapatoneñ. Ñaña amach aña sellcatsto ñeñt' e'ñe sechtocpa, amach sotatsto, esuachca'ye yehorrate'. ²³ Tarro'mar Yomporpa' ña yapuene' yo'rrerrña allo yocrrena ñeñña atarr nanac sherbets. Ñeñto'marña yeñoteñ ña yapuene' ñaña yerrar, ñeñña ñocoppa' ama esoye' enteñe. Ñaña ña yeçhcatene' yechets ñeñt' atarr sherbets. Ñeñto'marña yeñoteñ ña yapuene' ñaña ama't ñeñt' yehorra'yena, ñeñña ñocop ama esoye' enteñe. ²⁴ Sentente' atto correna pa'namen otreshaçhno. Ñetpa' ama çhoye' nare'tatse'teneto ñaña ama çhoye' apçha'yeneto puerrrar ñeñt' rra'yenet. Ñetpa' ama es echenaye allcha' es añno'tyenet. Ama't atto correnetpa' Yomporña e'ñe yeçhcatyesuanet ñeñt' puerrrar ãa'yenet. Elloña sa Yomporpa' atarr morrentensa sa; ello semtaneñ ñeñt' atto atarr morrentenana otreshaçhno. ²⁵ Ñaña amach sellcatsto attoch amach serromo, tarro'mar ama't sellquëñañ attoch atarr atomat socrra arr patsro tarraña ama't e'ñe puesheñarrofesapa' amate' errotenoñ so'chtatoña socreña ama't e'ñe pamtarra. ²⁶ Ñehua, atto ama't e'ñe sellquëñoña sa ama erroñ es sepeno, ñeñt'epñapa' amach pa'namena es selca'yestatsto tarro'mar ñeñt'pa' e'ñech orrena es selca'yena.

²⁷ Ñaña sentente' atet yeçhquëna roreçhno. Ñetpa' ama çhoye' taruasa'yeneto ama't mamesha, ama çhoye' taneneto ñeñt' chorra'yenet atto e'ñe cohuen orretyenet. Tarraña napa' o'ch notas, ama't añcha'taret Salomón atto e'ñe a'cohuentate't ahuat, ama't ñapa' ama chorrane'teña ñeñt' atarr cohuen ñeñt' atet atarr cohuentena ror. ²⁸ Ñeñt' ror pue'chorpa' ñeñt'ara ta'te' ñeñt' chepyets allemeñ ñeñt' sentyen te' tarraña ñeñt'pa' mamecpa. Ama't cohuen chepyeneñ te'pa' tsapatoneñapa' o'ch etomamperetpa' e'ñech colla'huerra o'huañcha' cohuenta. Ñehua, Yompor atto cohuentatyenan ama't ñeñt' e'ñe mamecpa, elloña sapa' atarr chorratyensañ saña; sañapa' eso'marte'ña amaña e'ñeye' seyemteño. ²⁹ Amach e'ñe patrra se'neno ñeñt' atto serren ñaña ñeñt' atto es sorryen. Amach ñeññaña e'ñe paterr selca'yestatsto. ³⁰ Tarro'mar allohuen acheñenesha' arr patsro ñeñt' ama ame'ña'yeto, ñetpa' ñeññaña e'ñe paterr e'nenet. Ñehua, Somporña ñeñt' pue'ntañ'tsen ñapa' e'ñe entuenes ñeñt' allpon pa'namen sepallta'yena arr patsro. ³¹ Sapa' añcha'ña e'ñe ñanom sema'yoçhrena Yomporecop attoch atarr ayochreshatterra ña allochñapa' ñachña sapa'yene' ñeñt' allpon sepallta'yena saña.

Atto ñeñtcha' seshonterr ñeñt atarr sherbets arrcha'ca'ye seshonteñ all Yompor pue'ntaño

(Mt. 6.19-21)

³² 'Amach neyochreneshačhnocha' es sellcatsto ama't ama atarr shonteyayso, Yomporña atarr cohuen secuanmpene' atet ñerra'mrrate' e'ñe po'carrneror penes. E'ñe pocsheñesho'pa' apascha' attoch e'ñe cohuen socshapreterrñaña po'cohuenña attoch atarr ayochreshatterra. ³³ Te'pa' o'ch sepomyen ñeñt allpon sechyen allochñapa' o'ch sapa'yes ñaña ñeñt atarr es pallta'yetsa. Ñerra'm atet sepena allo'nach atarr aton seshonta'nen ñeñt e'ñe po'ñočh atarr sherbets Yomporecop. Ñeñt'pa' ama atteyaye ñerra'mrrate' ñeñt sečllayepo'rer sepen arr patsro, ñeñt'pa' atarr añllasha'tña. Tarraña ñeñt seshonta'nen ñeñt atarr sherbets ñeñt ama ahuañaño, ñeñt'pa' arr seshonteñ Yompor pue'ntaño. Allña ama't eñe'apa' amach čheno o'ch etatsre'tas ñaña ama't pom'papa' amach eñalle ñeñtcha' rrrerre' ñeñt seshonten all. ³⁴ Tarro'mar ñerra'm all pue'ntaño seshonta'nen ñeñt atarr cohuen senten, yeñoteñ e'ñe ñeñta paterr senen seyočhro ñeñtña atarr sherbets Yomporecop. Tarraña arr patsro ñerra'm aña seshonta'nen ñeñt atarr semorrentena, yeñoteñ e'ñe ñeñta paterr senen seyočhro ñeñtña' ama es sherbenoña Yomporecop.

Atto čhocmach yeñose'rteña Yepartseshar Cristo esempoch huerra

³⁵⁻³⁶ Te'pa' o'ch notas po'poñ: Chocmuepa'ch señosere'tna esempohuañenpa' o'ch alla nohuerra. Ñato' o'ch netma'ntatasa atet ñerra'mrrate' puesheñarr yacma ñeñt atarr ayochreshat. Ñapa' ahuo' allcha' rrallme'chapretenana' pacma ñeñt sena'tetsa. Pueyochresha'ñapa' alla cohuet pa'paclo esempoch huerra. Allempoña ñetpa' a'huortatyeset po'lampareñ allochñapa' attoch ñerra'm esempoch huerra ñeñt pamo'mte' penet ñerra'm o'ch čhore'tuenanetpa' ñetñapa' allorocmach toram'psapueñet attoch sherbapueñet. ³⁷ Atarr cosheñtso'tsa'yen pueyochresha' ñerra'm esempoch huerret pamo'mte' allñapa' entuenanet čho atarr eñose'rteñet. Po'ñočhpa' napa' o'ch notas, ñachca'yeña sherba'huene'ña ñeñt pueyochresha' pen ña. O'ch chana'huena ñaña'apa' o'ch anorrčha'tatuenanet allcha' rrallme'chatuenanet. ³⁸ Ñeñt'pa' atetcha' perranet ama't rročh tsapopa' o'ch huenanet amapa' o'ch puetarenmochpa' o'ch huenanet. Ñeñto'marña notenes, ñerra'm alla entuenanet čho atarr eñose'rteñet, ñeñtña atarr eñose'retyenayapa' atarrcha' cosheñtso'tsa'yenet. ³⁹ E'ñech machayo'ta nohuerra atet pena eñeñ allempo atta es sepčha'yena machayo'tach huaponasa o'ch yoratsre'tensa'. Tarraña sa ñeñtes apacllates ñerra'm señoteñeñ e'ñech esempo huaponasa eñeñ amach čha semanrra'teno attoch amach semnacheña o'ch toram'psas sepaclo o'ch be'tosam'psasa o'ch yoruennasa' ñeñt allpon semorrentyena. ⁴⁰ Ñeñto'mar notenes, sapa'čho'ña čhocmuepa'chña señoser'tenna tarro'mar ñerra'm allempo atta es sepčha'yenapa' allempochña nohuerra na Ñeñten Acheñetosets.

Atetcha' a'paretterra ataruasañ ñeñt e'ñe cohuen etsotene' atet yecheña pamo'mte' ñaña atetcha' a'paretterra po'poñ ataruasañ ñeñt ama etsotaye ñeñt atet yecheña pamo'mte'

(Mt. 24.45-51)

⁴¹ Allempoña Pedropa' atet a'p'to'ch:

—Partseshacha' ñeñt atet petma'ntatena te' ñeñtpa' zeseshacpa'tña, ñato' yocpate' ñeñtey peyochreshay pepeney amapa' ñato' allohuenacpa'nate'?

⁴² Partsesha'ñapa' alla toma'ntaterraneterr po'poñoneñ, atet oterraneterr:

—Allohuenespa' atetcha' sepa e'ñe cohuen atet ñerra'mrrate' puešheñarr yacma ñeñt yechena ñeñt pamo'mte' pen all pa'paclo. Ñeñtcha' po'taruas pene' čhocmach apa'yesan allohuen po'potantañ pamo'mte' pa'taruasañer puerraret allpon ñeñt poctetsa puešheña'ttso cop. Ñapa' attec mach pena čhocmach apuenanet ñerra'm esempoch čherrerr allempo atet anaret ñocop o'ch alla apa'yerraneterr po'pocheño. Ñapa' čhocmach atet pena amach cačpuere tarro'mar ñapa' eñoteñ attoch e'ñe coshatenan pamo'mte'. ⁴³ Ñeñtña ataruasañpa' atarrcha' coshatueñ pamo'mte'; ñerra'm esempoch huerrapa' alla entuenan pa'taruasañer ama čho cačpuenanano ñeñt po'taruas apa'neñ ahuañmo'choteñ. ⁴⁴ Po'ñočh o'ch notas, atarrcha' coshatueñ. Añcha' coshaterre' o'ch nohuer pamo'mte' añcha'taret ñeñtcha' cohuañpsaprete' ñeñt allpon ečhyen pamo'mte'. ⁴⁵ Tarraña ñeñt ataruasañer allempo ama huerra' pamo'mte' ñerra'm ñapa' atta oten pueyočhro, namo'mte'pa' amach ahuen huerro, allempoña ñapa' čhach ashtapechyenan ataruasañečno ñeñtcha' rratañ ama't ñaña coyaneshohuen. Ñaña'pa' attach allemeñ rrapretyen ñaña attach orrare'tapretyen allcha' atarr posa'tare'tyen. ⁴⁶ Ñeñtña ataruasañer ñerra'm ñapa' attach ottatse'tyena amach es pueča'yeno amach eñoteñe ñeñte yetaroch huerra pamo'mte' ama't erro'tsencha' yetro huena. Machayotachña huerra pamo'mte'pa' atarrcha' coñchatuer, allach mueñuer all ñeñt o'patenaya allohuen ñeñt ama es otapotetso ama't mamesha.

⁴⁷ 'Elloña napa' o'ch notas, ama't erra'tsena ataruasañer ñerra'm eñotenan ñeñt atet muenen pamo'mte' tarraña ñerra'm ama cohuen ame'ñenano pamo'mte' ñerra'm ama e'ñe cohuenaye' es pa'yeno attoch e'ñe cohuen aguërran pamo'mte' esempoch huerra, ama't erra'tsena ataruasañerpa' ñeñt atet petsapa' atarrcha' ashtaretterret. ⁴⁸ Tarraña erra'tsencha' ataruasañer ñeñt ama eñotano ñeñt atet muenen pamo'mte' ama't ñetpa'čo'ña aña atet pa'yenet ñeñt ama cohuenayaye ama't e'ñe poctet attec mach ashtaretterretañ ñamet, tarraña ñetpa' mamesha'ttsach ashtapecharetetyerret tarro'mar ñetpa' ama eñotenet ñeñt atet muenen pamo'mte'. Allohueney erra'tsenotey ñeñtey atarr aparetey attoch atarr yeñoterrñañ ñeñt atarr sherbets Yomporecop, ñeñteycha'ña atarrcha' cohueney Yompor o'ch e'ñe yesherbātuon shonte' allohuen ñeñt atarr eñotateney. Ñaña allohueney erra'tsenotey ñeñtey atarr yemtenya Yompor elloña allempopa' atarrcha' cohueney o'ch allo'na e'ñe cohuen yesherba'neñ.

Atto Jesús'pa' orrtatosan e'ñe ño'mar elloptanna'teñets
(Mt. 10.34-36)

⁴⁹ 'Te'pa' o'ch neñotaterserr po'poñ. Napa' atto nohuena arr patsro o'ch norrtatos elloptanna'teñets ñeñt atarr huomenc atet ñerra'm tso' atarr atserretsa. Pocte' nenteñ o'ch orrtet e'ñe tayecma. ⁵⁰ Ñaña nocoppa' e'ñe atet anaret na'mueročhtataretterrach e'ñe atarr huomenc

atet ñerra'mrrate' cho chorratennet ñeñtcha' atarr nemuerochtaterre'. Ñeñto'mar napa' ñeñña atarr nellcatene' te' atta atarr na'huanteñ esempo eñech etsotuerra. ⁵¹ Sapa' chate' sotenapañ añecopie' nohuapa o'ch eñe cohuen namo'tstanna'tatera acheñenesha' arr patsro. Ñeñtpa' ama atteyaye. Añecpa'naña nohuapa allochñapa' eñe no'marpa' acheñenesha'ñapa' o'ch atta elloptanna'tyeset. ⁵² Ñehua, ñeñt noten te' eñe tayoteñ ñato' all yeçhena amnarsheña puepahuarro pocollopa' ñato' ñetpa' o'ch ellopa'tetstatet poctapña. Ñato' allo'tsen ma'psheña ñeñtcha' name'ñerraya, ñato' epsheñañapa' amach mueno o'ch ame'ñerrnet. Amapa' ñato' epsheñach allo'tsen ñeñtcha' name'ñerraya, ma'psheñañapa' amach mueno o'ch ame'ñerrnet. ⁵³ Ñato' eñe no'marpa' o'ch ellopa'tetstatenet poctapña. Ñato' pompor o'ch epatare'tenan puechemer, amapa' ñato' puechemerñapa' o'ch epatare'tenan ñaña pompor, ñaña ñato' pachorpa' o'ch epatare'tenan puechoyor amapa' puechoyor o'ch epatare'tenan pachor, ñaña ñato' pa'so'mue o'ch epatare'tenan pa'to'ñen amapa' ñato' pa'to'ñenñapa' o'ch epatare'tenan pa'so'mue.

Atto Jesúsapa' orrtatosan ñeñtcha' eñotatahuet o' chap Janet Yompor po'cohuenña

(Mt. 16.1-4; Mr. 8.11-13)

⁵⁴ Allempoña Jesúsapa' atet yerpatana acheñenesha' ñeñt atet otyenet ñet pa'nyeto:

—Sapa' ñerra'm esempo senten arr chorren os all emuena atsne', sañapa' chocmach atet sotyen: “Te'pa' chach huatena.” Atetcha'cho' pa, o'chcho' huatena. ⁵⁵ Ñaña ñerra'm esempo senten huena mōrr topofof, ñeñtpa'cho'ña atetcha' sotyen: “Te'pa' o' charenmoch.” Atetcha'cho' pa, o'chcho' huorater huomenc. ⁵⁶ Sapa' atarr señoteneña ñeñt sentyen ento ñeñña señotatene'; ama't ñaña ñeñt atet sentyen ñaña arr patsro ñeñtpa' eñe señotueñeñ. Tarraña ñeñt atet norrtatyennas nepartsoteña, eso'marte'ña ñeñtñapa' amaña eñotatensoña ñeñt atet pennas Yompor te' o'ch orrtatonas po'cohuenña. Ñeñtpa' attate' seshqueñ.

Atto eñotatanet choyach amo'tsterraya eñe mamecma ñeñt ye'moñe'tene'

(Mt. 5.25-26)

⁵⁷ 'Elloña eñe soña señotepa'chña ñeñt pocte' enten Yompor socop ñeñtcha' atet sepañnena. ⁵⁸ Ñato' o'ch netma'ntatasa atet ñerra'mrrate' esesha' setmantene' ñeñtcha' sanmue' añcha'taretesho allcha' sa'poctaterr señoñ. Añ poctetsa allempo ama seçhena' añcha'taretesho o'ch poch ñeñt petmantene': “O'ch ya'poctaterr yeñoñ eñe cohuen tayecma tayepa'tña ama yeçhena' añcha'taretesho.” Tarro'mar ñeñt petmantene' ñerra'm o'ch chapatap añcha'taretesho, añcha'tareñapa' chate' pomañ policeyaneshesho, ñetñapa' chate' abe'tapet cárcelo allcha' muerochtaterrpet. ⁵⁹ O'ch notas, ñerra'm choch yottañsasetpa' allasach o'pono, alloñapa' amach ahuen cha'nmaterreto. Esemphuañencha' choch secha'nmaterret ñerra'm allempoch eñe setsa'tuerra ora allohuen ñeñt allpon quelle muenenet. Ama't eñe eptalla centavotollña ñerra'm ama setsa'tueña' amachca'ye cha'nmaterreto allot. Ñeñto'marña notenes o'ch eñe cohuen

samo'tstera ñeñt se'moñe'tene' tayepa'tñapa' ama čhennasa' ñeñt atarr yoročhen senten socop.

13

Añ poctetsa yocop o'ch yoctape'cherr ello cohuen Yomporecop

¹ Allempo huapa puesheña'tets acheñenesha' Jesúsesho, ñetñapa' serpare'tatoset Jesús atet entenet ñet; ñeñtpa' atet otoset:

—Allponsheña ñeñt galileo'marnesha' allo'tsa'yenet allecma muetsatenet berr ñeñt Yomporecop. Allempoñapa' huapanet ñeñt mueñen amcha'taret Pilato ñetñapa' čha muetsanatosanet e'ñe all allempo muetsatenet berr ñeñt Yomporecop. Attoña ñetpa' allña atsetatse'tatarettet ñet po'rtras epuet pueberreret po'rtras.

² Jesúsñapa' atet otanet:

—Sapa' čhate' sotenapañ ñeñt galileo'marnesha' allempo atet ařarettet ñato' ñetpa' atarrte' nanac ochña'et ellote' metana'tueñet allohuen po'potantañ galileo'marnesha' po'chñaret. Čhate' sotenapañ ñeñto'marte'ña atet ařarettet ñeñt atarr sosey apencočhen. ³ Tarraña napa' o'ch notas: Ama't allohuenes saña ñerra'm amach e'ñe cohuen soctape'cherro ello Yomporecop, sapa'čho'ña attecmač seperra sechenca'huerrach e'ñe poctacma. ⁴ Naña ñeñt čharra' ñeñt puechetsa posocsheña ñeñt colla'huatsa ahuaña ñeñt a'tpetse't pocoll torrepo' allempo mata'nerr Jerusaléño e'ñe all oteñet Siloé. Ñehua, sapa' čhate' sotenapañ ñeñt a'cllatter torrepa' ñetpa' atarrte' atparña'et ellote' metana'tueñet allohuen po'potantañ ñeñt atto atpare'tena jerusaléño'marnesha'. ⁵ Tarraña napa' o'ch notas: Ama't allohuenes saña ñerra'm amach e'ñe cohuen soctape'cherro ello Yomporecop, sapa'čho'ña attecmač seperra sechenca'huerrach e'ñe poctacma.

Arrpa' all toma'ntatanet Jesús atet pena partech ñeñt ama me'tetso

⁶ Allempoña Jesúsapa' alla toma'ntaterraneterr po'pocheño, ñeñtpa' atet oterranelerr:

—Puesheñarr acheñ all puenarenimopa' allñapa' ahuañmo'choteñ nare'tatenan ñaña puecharr partech.* Atteñapa' čhap allempo huapa e'nosñañ pue'mer. Tarraña ama't puenarrapa' ama entosñañe pue'mer. Partayechpa' ama me'teno. ⁷ Allempoñapa' atet otan ñeñt cohuanipene' puenarenima': "Te'pa' o' met ma'pa char čhocma nohuena e'nene' partech pue'mer. Teme'ttsen ama't puenarra pue'merpa' ama nenteñañe. Te'pa' o'ch pa'mater tarro'mar e'ñe orrena quečhcare'tennay yepatseñ atto ama yenare'teno po'poñ narmets all." ⁸ Tarraña ñeñt cohuanipene' narmetspa' atet otan pamo'mte': "Allach nomporcha' añ char ñeñt o' huerrerrpa' napa' o'ch na'mueñtsetaĩpes pats o'ch nenoñ amar. ⁹ Natorraña atet nepe'pa' o'ch cohuen me't tsapať charo. Tarraña ñerra'm ama me'topa' pocte'ñačo' allempopa' o'ch pa'matater."

Atto Jesúsapa' a'crraterran coyanesha' ñeñt atta mo'quętsa ama't añe yetro allempocma amesenet

¹⁰ Allempo čhapa'muenerr allempo amesenet, Jesúsñapa' yečhatenanet judionesha' po'prahueto. ¹¹ Allñapa' allo'tsen puesheñarr coyanesha' ñeñt čha mo'quęna, ama eshcaye' pačharrteno. Ñeñtpa'

* 13:6 Ñehua, Jesús añ toma'ntatanet higo ñeñt puenarenĩ penet all pa'nyo.

oneñeñ atet p̄atene'. Ahuatoteñ at̄ta pena o' çharren char puechena posoc at̄ta mo'quëna. ¹² Jesúsñapa' all eñchpa' o' çhore'tospa' atet och:

—Noçha te'pa' pasaterreṗcha' ñeññ̄ at̄to atarr pemueroçhtena.

¹³ Allempoñapa' a'ṗllamco'ch. A'ṗllamco'tue'pa' allorocma e'ñe cohuen paçharrterra. Ñaña'pa' atarr aye'choçhtaterran Yompor. ¹⁴ Allempoña ñeññ̄ am̄cha'tarettetsa all judionesha' po'prahuo, ñapa' allempo entan atet o' a'çrratan Jesús atsnañeñ, ñaña'pa' ñeñña atarr atsrre'mate'. Ama't mameshapa' ama pocteye' eñche o'ch a'çrratan acheñ ñeññe yetro allempo amesenet. Ñeñño'marña ñapa' atet otan acheñenesha':

—Eñall pechapmat yet allempo pocte' o'ch yetaruasen. Ñeññ̄pa' pocte' o'ch sehuapa allempo at̄toch sa'çrrater atsnañeñ. Tarraña añ yetro allempo yamesen amach sehuapatsto a'çrrate' atsnañeñ.

¹⁵ Partsesha'ñapa' atet och:

—Sapa' ñeññes e'ñe sommo'cheñoṗpa' atarr seshcare'ten. Sapa'çho'ña ama't añe yetro allempocma yamesen çhocma setaruasen sam̄a. Sepyam̄peñ sehuacsher, sashanor allecma serrateñ o'ch sanem̄ ñam̄a oño allcha' sonayeyñ oñ. ¹⁶ Añ coyanesha' ama't ñeññ̄ po'm̄reneñ pen yatañ Abraham ama't çharra' puechena posoc char ñeññ̄ allponmat o' huanquër oneñeñ, pocte'ca'ye o'ch ya'rroyatater ama't añe yetro allempo yamesen.

¹⁷ Acheñenesha' allohuen ñeññ̄ e'moñe'tene' ñetpa' ñeññña atarr pencatahuet. Po'potantañña acheñeneshaçhnopa' ñetñapa' atarr nanac coshenet. Atarr nanac cohuen entenent ñeññ̄ atet p̄a Jesús.

Atto Jesús'pa' toma'ntaterranet atet pena pue'llomer ñeññ̄ otenet mostazllom̄

(Mt. 13.31-32; Mr. 4.30-32)

¹⁸ Ñeñño'marña allempopa' alla oterraneterr:

—Añ Yompor po'cohuenña ñeññ̄ at̄to ayochreshattena ña, ñanompa' e'ñech puesheña'tsa ame'ña'yests̄a, allempoteññapa' allo'nach sen atonetnomtsa ñeññ̄cha' ame'ñerrtsa at̄tochña e'ñe epa'huerra erracmañen Yompor po'cohuenña. Ñeññña te'pa' o'ch netma'ntatasa ñeññ̄ atet pena ña. ¹⁹ Ñehua, ñeññ̄pa' atet pena ñerra'mrrate' pue'llomer ñeññ̄ atarr añeñolleshallmerr ñeññ̄ otenet mostazllom̄. Ñeññ̄ pue'llom̄retollpa' puesheñarrñapa' o' anem̄ pa'mro allcha' nare'teña'. E'ñe allponmatatsapa' o' chop, ñeññ̄pa' allo'na sen rrorranmats e'ñe cohuen atarrchetnom. Ñeññña narmetsocherpa' o'ch huaçha'toña oteçhno ñeññ̄cha' ama'tanatyesosets puetacro'mar.

Atto Jesús'pa' toma'ntaterranet ñeññ̄ atet pena chase'

(Mt. 13.33)

²⁰ Elloña alla oterraneterr:

—Po'poñoneñ o'ch netma'ntatasa ñeññ̄ atet pena Yompor po'cohuenña ñeññ̄ at̄to atarr ayochreshattena ña. Ñeññ̄pa' ama'tcha' añeñolla ñeññ̄cha' ñanom orrtatsa tarraña e'ñe ña po'huamencotpa' mameñollapa' o'ch e'ñe epa'hua ora erraṗaren.

²¹ Ñeññ̄pa' añ toma'ntaterraneterr atet pena chase':

—Ñeññ̄ chase'pa' allo tsetenan coyanesha' harina' ñeññ̄ oñetsetaten at̄toch a'chasatan harina' esheccha' e'ñe a'muesatue. Ñeññña chase'pa'

ama'tcha' añe'folla net, ama'tcha' aton harina' ñeñt ma'pa arroga, mame'tollapa' o'ch e'ñe a'muesatuanña ama't atarr aton harina'.

Atto Jesús^{pa} toma'ntaterraneterr ñerra'mrrate' yetarro'tollo yebe'ten esheccha' ye'chap Yomporesho

(Mt. 7.13-14, 21-23)

²² All oñemyen Jesús e'ñe ora asuahuanom allohuen anetso'mar all shonta'yena acheñenesha' ama't ñaña all ama tama eñalleyaye acheñenesha'. Allña e'ñe serrpare'tatyeshomanet. Allempo oñemyen allemeñ anetso'mar ñapa' arr sen Jerusaléño all sechena. ²³ All oñen toño'pa' allempoña pue'sheñarra' a'p'to'tnom, atet och:

—Ayochreshate, ñeñt'cha' allpon a'queshpataretterrtsapa' ta'm ñetpa' ¿pue'sheña'tsetate' ñato' amapa' atarr'cha' shonte'?

Jesúsñapa' atet och:

²⁴ —Sapa' añcha'ña e'ñe cohuen sema'yo'chrena ñeñt cohuen enten Yompor atto'chña sesuanom ñeñt ama cohuenaye' enteno ña. Ñeñt'pa' o'ch netma'ntacha atet ñerra'mrrate' allcha' yebe'tos esheccha' ye'chap ñesho ñeñt'pa' atarr añe'foll, atarr torrapo' o'ch yebe'tos all. Ñaña o'ch notas esempohuañen ama'tcha' shonte' acheñenesha' ñeñt'cha' atarr muenatseñ o'ch be'terretañ all attoch çherretañ Yomporesho tarraña allempopa' amach eshec be'terreto attoch çherret all tarro'mar allempopa' o'ch huañerr atto atarr cohueney Yompor. ²⁵ Ñeñt'pa' o'ch netma'ntacha atet ñerra'mrrate' esempo o'ch çhen ñeñt apaclatesha' ñaña'pa' o'ch tantuena o'ch e'ñe echarr yottam'pesuena. Allempopa' ama't e'ñe eseshapa' amach eshec be'tosoña all. Allempoña ama'tcha' shonteseñ o'ch sehua'cha'ta all peto'tach sechorros allot'cha' seçhore'tos apaclatesha'. Allña sapa' atet'cha' sotos: “Ayochreshate petorañ'psapuey.”

Ñapa' atet'cha' otapas: “Napa' ama nentarlo, erro'tte' sehuenaña sa.” ²⁶ Sañapa' atet'cha' sotererr: “Ama't parrocmá yerrallme'chyese'teña ahuañmo'cha ñaña ama't ya ya'netsro'mar allecma chopeñe'chyenet allca'yeña pey'chatyese't.” ²⁷ Tarraña ñapa' atet'cha' oterrserr: “Te'pa' o'ch notas, napa' amaca'ye po'ño'ch nentarlo, erro'tte' sehuenaña sa. Te'pa' orrerres arro't nesho't allohuenes ñeñtes ma'yo'chrenaya ñeñt ama pocte' enteno Yompor.” ²⁸ O'ch ahues all ñeñt o'patatenset sa. Allña'pa' allcha' seyhuanrrortosa, sanmueño't atserppa' serraso'tyeshoscha' sas. Allot'cha'ña sentosña satañnesha'çhno —Abraham ñaña Isaac ñaña Jacob ñaña allohuen ñeñt a'mta'yese't Yompor po'ño'ñ. Ñetñapa' e'ñe Yomporesho'tsa'yenet all añcha'tare'ttena ña. Sañapa' cha'petotaña huapore'tenset. ²⁹ Allña'pa' allemateñcha' hua'cha'ta shonte' ñeñt ama judioneshayaye ñeñt'cha' anorr'cha'tyeshosets all e'ñe Yomporesho all añcha'tare'ttena ña allcha' rrallme'choset all e'ñe cohuentena Yompor. ³⁰ Te'pa' seño'chcha' eñall acheñenesha' ñeñt ama asherbenaye' senteno sa te' tarraña allempoña ñetpa' atarr'cha' asherben enterranet Yompor. Ñaña eñall acheñenesha' ñeñt atarr asherben sentyen sa te', tarraña allempoña ñetpa' amach asherbenaye' enterraneto Yompor.

Atto Jesús^{pa} puellqueño'ian jerusaléño'marnesha' atarr ya'na'tenanet
(Mt. 23.37-39)

³¹ E'ñe ñeñte yetrocma allempo hua'cha'toña patantarr fariseonesha'. Ñetñapa' atet otoset Jesús:

—Te'pa' o'ch peyeta arrot' tarro'mar añcha'taret Herodespa' o'patenpa ahuo'ch muetsataþ.

³² Jesúsñapa' atet otapanet:

—O'ch ahuerrespa' atetcha' sotuer Herodes ñeñt' atarr eñotene' shequëñets: “Te'pa' o'ch peñoch, napa' atterach necachpatateññañ acheñenesha' po'neñefer ñaña atterach shonte' na'crratyes ñeñt' atsna'tyets. Atet nepena te', tsapatonetpa'cho'ña attemmach nepena, o'chña tsapatonterrrrpa' o'ch e'ñe netsotatue allohuen.” ³³ Nocoppa' añ poctetsa çhocmach nesen ama't te', ama't tsapatonetpa'cho'ña, ama't ñaña o'ch tsapatonterrrrpa' çhocmach nesen. Attotach neçherr Jerusaléño, tarro'mar allpa' allecma çhocma muetsayesete't ñeñt' a'ñta'yesyete't Yompor po'ñoñ.

³⁴ Allempoña Jesús e'ñe puellquëño' judionesha'pa' atet eñorena ñocpuet, ñeñto'marña atet otanet:

—Sa jerusaléño'marneshacha' ñeñtes muetsanatyesyete't ñeñt' a'ñta'yesyete't Yompor po'ñoñ, sa ñeñtes rrollapechyesaye't ñeñt' amñare't sesho. Atarr atonoche'tats nemneñeñ o'ch na'yapaçha'huerrsoñ allohuenes nesho attoch e'ñe cohuen necuanþensoñ. Nemneñeñ o'ch na'yapaçha'huerres atet ñerra'mrrate' atollop a'yapathene' puechoyoresha' o'ch e'ñe seto'tuanet. Tarraña sañapa' ama't e'ñe mameshapa' amaña semno. ³⁵ Te'ñapa' all seyçhena sa, Yomporñapa' o'ch a'ypo'ñerres. Tarro'mar te'pa' o'ch alla noterrrerr: Na po'pocheño'pa' amach alla senterro te'. Esemposhañenñapa' senterrencha' allempoñapa' atetcha' soterren: “Aye'choçhtatpahuëpa'ch Jesucristo ñeñt' huapatsa ñeñt' llesensen Yeyomporer.”

14

Atto Jesúsapa' a'crraterran puešeñarr yacma ñeñt' çha ananen

¹ Allempoña çherrerr pamtarr allempo amesenet. Jesúsñapa' ahuo' allcha' rrallme'chapretenana' puešeñarr fariseo ñeñt' atarr añcha'tarettetsa. Chap all pa'paclopa' po'potantañña fariseonesha' ñetñapa' atarr cohuana'tyesapet Jesús. ² Allñapa' allo'tsen puešeñarr yacma ñeñt' çha ananen. ³ Jesúsñapa' all serrpare'tos epuet fariseonesha' ñaña ñeñt' allo'tsa'yen ñeñt' atarr etsotene' ñoñets ñeñt' atet anaret' judioneshacop. Ñaña'pa' atta a'þto'tosanet e'ñe po'tomña, allochñapa' o'ch eñoch ñato' errottencha' anapet. Ñeñtpa' atet otosanet:

—¿Erroçena'tña sotenña sa, ta'm pocte'te' o'ch na'crratos atsnañe't añe yetro allempo yamesen? ¿Atte't otenña ñoñets ñeñt' atet anaret', ñato' amate'?

⁴ Fariseonesha'ñapa' ama eseshaye' anapuetso ama't puešeñarroña. Allempoña Jesúsapa' a'þllamco'tosan atsnañe't. E'ñe a'þllamco'tue'pa' çha corrrer'tsa allenta mueñer pa'paclo. ⁵ Allempoña Jesúsapa' alla oterranerr fariseonesha':

—Sapa' ñerra'm sashanor amapa' sehuacsher shora'nets arroroto all chorren oñ, ama'tçha'ña sechtereña allot e'ñe allorocma ama't añe yetro allempocma yamesen.

⁶ Ñetñapa' ama errotenaye' otenaye' enteñeto ama't e'ñe puešeñarroña.

Atto ahua'ñare'ttet o'ch rrallme'chapreteñeta' ñeñt' sena'tetsa

7 Allempoña ñeñt ahua'ñareñsha' ñetñapa' aña atarr muenenet o'ch anorryesoset allecma anen ñeñt atarr amcha'na'tpo' entyenet. Jesúsñapa' entapanet ñeñt atet muenenet ñet o'ch čha ommo'chyesoset. Allempoñapa' atet otapanet:

8 —Ñerra'm esempo ahua'ñareñes o'ch serrallme'chapreteña' ñeñt sena'tetsa, sommo'cheño'tpa' amach arra sanorratsetyesososo allecma anen ñeñt atarr amcha'na'tpo' entyenet. Ñetña chenta'pa' o'ch huapuet ñamet. ⁹ Ane'tañ ñeñt sehua'ñene' allohuenes ñaña'pa' o'ch huapa pesho o'ch otap: “Te'pa' o'ch petanterra arrot, all panen te'pa' o' huapaña ñeñt panorrpue' pene' all panen ñeñt atarr amcha'na'tpo' entyenet.” Paña allempopa' atarrcha' pepenquëño't petanterra o'ch ahuep allcha' panorros allecma anorryen ñeñt ama esoshe'maye' entyenet. ¹⁰ Sapa' atetcha'ña sepa ñerra'm esempo hua'ñenset. Allempo sečhap all hua'ñenset sapa' allach sanorros allecma anorrčha'tyen ñeñt ama esoshe'maye' entyenet. Allñapa' o'ch huapa ane'tañ, ñapa' atetča' otosep: “Masheñcha' papa' arrcha' panorros allecma anen ñeñt atarr amcha'na'tpo' entyenet.” Attochña allohuen ahua'ñareñsha'pa' o'ch entapet papa' atarr amcha'na'tpo' entyenet. ¹¹ Tarro'mar allohuen ñeñt e'ñe cohuen entetsa e'ñe pommo'cheño't ñetña tsapatone'tpa' amach esoshe'maye' entereto. Tarraña allohuen ñeñt ama esoshe'maye' entetso te', ñeñña tsapatone'tpa' atarrcha' cohuen enteret.

¹² Allempoñapa' atet otan ane'tañ ñeñt hua'ñene':

—Ñerra'm esempoch porrtaten rreñets ñeñtča' serra'muen aromtaña amapa' ellronet amach e'ñe aña pehua'ñatsto ñeñt e'ñe parro peyemtena ñaña ñeñt pemo'nasheñ pepen ñaña po'potantañ ñeñt e'ñe pamo'tsesha' pepen ama't ñaña allo'marnesha' ñeñt atarr ečllayoretet. Tarro'mar ñerra'm ñeñta pehua'ñenpa' ñetpa'čo'ña tsapatone't o'ch alla hua'ñerrpet paña. Attoch tsa'terrpet. ¹³ Tarraña ñerra'm esempoch porrtat rreñets aña'nachña pehua'ña'yes ñeñt atarr huocchañetyets ñaña achocrañachno ñaña ñeñt checa're'pačhno ñaña aporo'yetechno. ¹⁴ Attochña papa' atarrcha' cosheñtso'tsenep tarro'mar ñetpa' amach erotenot alla tsa'terrpeto. Papa' esempohuañencha'ña atsa'taretep allempoch atantataretterra allohuen ñeñt e'ñe pocte' es pa'yestse't.

Arrpa' all atma'ntatarettena ane'tañ ñeñt atarr aton yečcatatene' rreñets

¹⁵ Allempo e'mueñet Jesús atet serrpare'tatuanet, puesheñarrña ñeñt parro anorrčhenet ñeñt parro rrallme'chenet, ñaña'pa' atet otan Jesús:

—Atarrcha' cosheñtso'tseney allohueney ñeñteycha' rrallme'chapreterre' Yompor all amcha'tarettena pue'ntaño.

¹⁶ Jesúsñapa' toma'ntaterraneterr, ñeñtpa' atet oterraneterr:

—Eñall puesheñarr ane'tañ ñaña'pa' o'ch yečcatatan atarr shonte' aton rreñets. Allempoñapa' otyesan shonte' acheñenesha' ñeñtča' rrallme'chapretenaya' esempoch e'ñe a'potatuan rreñets. ¹⁷ O'ña čhap allempo e'ñe a'potatuan rreñetspa' ñaña'pa' mueñan pa'taruasañer ñeñtča' hua'ña'yenaya' allohuen acheñenesha' ñeñt otarettatsa ahuaña. Ñeñña pa'taruasañerpa' atet otosan acheñenesha':

—Te'pa' o'ca'ye e'ñe a'potaretetuaña rreñets sonačha't o'ch serrallme'chapretena'. ¹⁸ Tarraña ñeñt ahua'ñaretechnopa' ñetñapa'

ama esesha' tatso. Ñehua, ñeñt' ñanom puesheñarrpa' atet ot: "Napa' te'pa' o'ca'ye nerañña pats, o'chca'ye ahuen o'ch necua'yeña'. Potuercha' pamo'mte' peretnerrnepa', napa' amachca'ye neto." 19 Po'psheñeñpa'cho'ña atet ot: "Napa'cho'ña o'ca'ye nerañña çharrana toro po'yuntohuen e'ñe epna'ttsocma; o'chca'ye ahuen o'ch netpach tarusate'. Potuercha' pamo'mte' peretnerrnepa', napa' amachca'ye neto." 20 Po'psheñeñpa'cho'ña atet ot: "Napa' errtencia'ye sena'tetsa ñeñto'marña napa' amachca'ye eshec neto." 21 Ñeñña ataruasañer atet otyes acheñenesha'pa' ñaña'pa' ahuerr pamo'mtayesho, serrpare'tatuerran pamo'mte' atet otyeset ñeñt' hua'ña'yeseñ. Ane'tañña'pa' ñeñña atarr atsrre'mate'. Patsrre'mueño'pa' atet otterranerr pa'taruasañer: "Te'pa' o'ch ahuerrperr e'ñe tayecma ñaña all anetso allecma atarr chopeñe'chyen shonte' acheñenesha'. Allotcha'ña pehuapaterr huocchañnesha'chno ñaña achocrañachno ñaña aporo'yete'chno ñaña checa'repa'chno." 22 Pa'taruasañerñapa' atet'cho' perrerr. Allempo huerra atet otuerranerr pamo'mte': "Nomporcha' ñeñt' atet potenpa' te'pa' o' e'ñe atet ne'pohua. Tarraña allcha' anorr'cha'tyes ñeñt'cha' rrallme'chosetspa' orameñ." 23 Pamo'mte'ñapa' atet otererr: "Te'pa' o'ch alla ahuerrperr allampaño'mar all shonte' toñe'chno allecma chopeñe'chyen acheñenesha'. Allñapa' atarrcha' potare'tyes acheñenesha' onetepa' arr nepaclo attoch e'ñe chorra acheñenesha' arr nepaclo." 24 Po'ño'ch te' napa' o'ch notas, ñeñt' ñanom nehua'ñat'yeseñpa' ñetña te'ñapa' ama't e'ñe puesheñarro'fetapa' amach rrallme'chapreterrneto attoch cosherret nesho."

Añ poctetsa o'ch e'ñe yesuanem ñeñt' e'ñe yocpa attoch yocter Cristo e'ñe poctacma

25 All oñemyen Jesús'pa' shonte' acheñenesha' cota'huanene'. Ñaña'pa' cohua'nmanet allenet shontenetpa' atet otnomanet:

26 —Ñerra'm esesha' muene' o'ch coterrren e'ñe po'ño'ch, añ nenen o'ch atarr nanac morrentennet. Elloch metaneñet atto atarr morrenteñet pompor, ama't ñaña pachor, ama't ñaña puetapor ñaña puechemeresha', pa'mo'nasheñnesha', po'çhanesha'. Atto atarr morrentennet ello metaneñet atto atarr morrentenet ñañañeta ñeñt' atto correnet arr patsro. Ñerra'm erra'tsen ama atteye' nemorrentenayepa' nañapa' amach errotenot neyochresha' neperraneto. 27 Tarro'mar ñerra'm erra'tsen ama e'ñeye' sehuanmaye ñeñt' atet muenenet e'ñe ñocpueta attoch coterrnet e'ñe poctacma, nañapa' amach errotenot neyochresha' neperraneto. Ñeñt'pa' añ toma'tena atet ñerra'mrrate' cho sechechnen secorsoch allcha' semuero'çhta saña. 28 Ñeñto'marña ñerra'm erra'tsenotes muenene' o'ch neyochresha' neperrres, añ poctetsa choch ñanom soctape'ch, e'ñete' pocte' senteñ o'ch sesuanom ora allohuen ñeñt' atet notenes. Ñeñt'pa' atet'cha' netma'ntacha atet ñerra'mrrate' eseshas muenene' o'ch satomat sepaquell atarrpo'pa' añ sepalltena choch ñanom sanorr allcha' soctape'ch errponte' tsa'tena. Ñato' eñallte' allpon quelle attoch mameshapa' o'ch sa'pue'. 29 Ñerra'm ama atet ñanom soctape'chenopa' ñato' o'ch satomatañ ñanom alloch echarr sorrat sepaquell, ñerra'm cha sehuañapes quelle attoch sa'pañ sepaquellpa' attach seca'chpue'. Acheñenesha'ña ñeñt' sentene'pa' çhach che'tatsetaset; 30 ñetña'pa' atet'cha' otyeset: "Añ acheñerpa' o'

tomataneña atarrpo' pa'paquëll, alla huañapes quellepa' ama esoye' a'patano pa'paquëll.” ³¹ Ñeñtara cotañtaser o'ch alla netma'ntacha po'poñonet. Atet ñerra'mrrate' puesheñarr amcha'taret ñerra'm añ cotape'chen o'ch quellaratan po'solltarer epuet po'psheñeñ amcha'taret po'solltarer ðhoch ñanom anorr allcha' e'ñe cohuen cotape'ch. Allempopa' atetcha' ot: “Napa' e'ñeca' çharra' mila nechen nesolltarer; po'psheñeñña amcha'taretpa' echenan po'solltarer epoch çharra' mil. Ta'm, pocte'te' o'ch nemñe çharra' mil nesolltarer ñeñtcha' poctapue' epoch çharra' mil solltarnesha' ñeñtcha' yehuapoya. Ta'mca'ye a'mchechatuette'ca'ye—shonte'.” ³² Allempoña o'ch atet cotape'chuapa' ñerra'm ama erroñ apenaye' eñchepa' allempo ama aponmareñteta' ñañaapa' o'ch mueñan allponsheña ñeñtcha' atet otosahuet: “Yapa' añecop yen o'ch ya'pocstaterr ñoñets e'ñe cohuen e'ñe atta, amach yeçllaranna'tatsto.” ³³ Ñeñto'mar notenes, ñerra'm eseshas ama e'ñe pocteye' senteñe o'ch sesuanom ora ñeñt allpon sechen, nañapa' amach errotent neyochresha' neperrso.

Arrpa' all atma'ntatarettet atet ñerra'm pos o'ch huañ po'poserrteñapa' o'huañcha' sherba'

(Mt. 5.13; Mr. 9.50)

³⁴ 'Ñehua, yapa' yeñoteñ pospa' atarr cohuen sherbenan allohuen acheñenesha' arr patsro. (Allohuen ñeñt po'ñoçh neyochresha' nepen ñetñapa' atarr sherbenet attet ñerra'mrrate' pos atarr cohuen sherbeney.) Tarraña pospa' ñerra'm o'ch huañerr po'poserrteña amach errotent ellopa' ya'poserrtatere. ³⁵ Attoña amach es sherberro ama't e'ñe coñe'ta. Ama't attoch yetnarrataterr allo patspa' ama't ñeñtecpapa' amach sherberro; ñeñto'marña ama't ñeñtecpapa' amach yañño'tatsche. Ñeñto'marña o'ch yehuapore'ter a'yo. Ñerra'm eseshaste' ne'mñotene'pa' çhaponasepa'ch seyoçhro ñeñt atet neyçhatenes.

15

Acheñ ñeñt ama ame'ñetsopa' arrpa' all atma'ntatarettet atet ñerra'm carrnero ñeñt chenquëtsa

(Mt. 18.10-14)

¹ Shonte' ñeñt cobrets quelle gobiernocop ñeñtara ñeñt atarr shecare'tyets ñaña shonte' ochñañenesha', ñetñapa' huacha'tet Jesúsesho o'ch e'mñoteññañeta' ñeñt atet serrpare'tatenan allohuen acheñenesha'.

² Añña fariseonesha' ñaña ñeñt atarr etsotayenayeñ ñoñets ñeñt atet anaret judioneshacop, ñetñapa' ama't mameshapa' ama pocteye' enteñeto. Ñetñapa' atta sasare'teñet Jesúsapa' ñeñtpa' atet otanna'tyenet:

—Añ acheñer ama't ñeñt atarr ochñañenesha'pa' eso'marte'ña e'ñe cohuen agapyenanet, ñaña alla rrallme'chapreñet.

³ Ñeñto'mar Jesúsapa' alla toma'ntaterraneterr; ñeñtpa' atet oterraneterr:

⁴ —Sapa' ñerra'm eseshas echene' shonte' secarrneror, çharroch çharra' sechen tarraña ñerra'm pomocarrña machayoña sa'chencachpa' ama't atet sepeno. O'ch sesa'nom allohuen po'potantañ ñeñt o' noventa nuebama' all amayo ama't atarr a'yopa' o'ch ahues e'nerraya' pomocarr ñeñt chenquëtsa. Allcha' se'name'tyera'pa' atotach senter. ⁵ Allña senterpa' o'ch senatner, e'ñech socsheñeshocmañen saner. ⁶ O'chña

sechpater sepacllopa' allñapa' o'ch sechore'tuer samo'tsesha' o'ch onacha'tet. Allñapa' o'ch sotuerr: "Te'pa' o'ch socshapreterrna necar-rneror, te'pa' o' nenterrña ñeñt na'chencaten." ⁷ Ñeñto'marña te'pa' notenes: Yamo'mte' ñeñt pue'taño'tsen attecmach atarr nanac cosher-rana ama't puesheñarra acheñ ñeñt atarr ochñañ ñerra'm esempo'ch cotape'cherret ello e'ñe cohuen ñocop. Elloch metana'tuerran ñeñt atto coshenana po'potantañ ñeñt shonte' ñeñt e'ñe pocte' es pa'yenet ñocop ama't ñetpa' shontet atet ñerra'm noventa nueve carnero ñaña ñetpa' ama't ama pallteneto o'ch cotape'cherret ello cohuen.

Arrpa' all atma'ntatare'tena puetallarr quelle ñeñt a'chencaten pamo'mte'

⁸Ñeñtara cotapñats, te'pa' ñato' atetcha' netma'ntacha po'poñonef atet ñerra'm puesheñarr coyanesha' ñerra'm echenan charratilla po'çllayor ñeñt atarr morrentena. Ñerra'm cho a'chencach puetallarrpa' ama'tcha' a'llchitanoña po'lampareñ attoch tarrapo'tenan pa'paquell allcha' e'ne'm'tyerran puetallarr po'çllayor. Attocha'ña enter. ⁹O'chña enterpa' allempoña'pa' o'ch agotan pamo'tsesha' e'ñe pacmaneshoche', atetcha' otanet: "Te'pa' o'ch socshapreterrna ñeñt puetallarr neçllayor ñeñt na'chencat, te'pa' o' nenter." ¹⁰Te'pa' o'ch noterrser, elloña atarrcha' nanac coshateret Yompor po'mllaño'feñreneshohuen ñerra'm esempo ama't puesheñarra acheñ ñeñt atarr ochña'pa' o'ch cotape'cherret ello e'ñe cohuen Yomporcop.

Arrpa' all atma'ntatare'tena puesheñarr yacma puechemer ñeñt atarr ottatsña'

¹¹Elloña Jesús'pa' alla toma'ntaterraneterr, ñeñt'pa' atet oterraneterr: —Eñall puesheñarr acheñ echenan epsheña puechemer. ¹²Ñeñtña puechoyomer penpa' atet otan pompor: "Apacha' ñeñt ora allpon pechen te' napa' nemneñ o'ch papuen e'ñe tayecma ñeñt allpon po'patatenna." Allempoña pompor ora ñeñt allpon echyenpa' o' apa'yesan epsheño'mar puechemeresha' ñeñt allpon o'patatyenanet e'ñe puesheña'ttset. ¹³E'ñe allponmatatsa ñeñtña puechoyomer penpa' o' e'ñe pomhuahuanman ora allohuen ñeñt allpon aþ pompor allo agapan shonte' quelle attoch ta ba'chayo po'poñ anetso. Allempoña chap ba'chayopa' allñapa' sosya'tsañechna atet pa'yesos. Attoña ama't shonte' po'çllayor ñeñt anem o' e'ñe a'gasta'huahue e'ñe pottatse'teño'. ¹⁴O' e'ñe a'gasta'huan ora po'çllayorpa' allempoña allpa' o' orrra muecheñets all ñeñfe anetsro. Ñaña'pa' o'huañ erraye' entan puerrar ñeñtcha' rren. ¹⁵Allempoña ñapa' o' ahuo' allo'tsen ane'tañ all e'nyenan taruas. Ane'tañña'pa' aña aþ po'taruas o'ch auyesos a'yenet allcha' cohuanñpesyesoñ po'chañchor. ¹⁶Ña pa'chporrño'tpa' atarr mueneñ o'ch rrapretosan chañcho puerrar attoch yetosa. Ama't chañchopa' pa'talle'tsa puerrar pen ñapa'cho'ña ñeñtña atarr muenen o'ch rros tarraña ama't chañcho ama eseshaye' apuenaye puerrar ñeñtcha' rra'. ¹⁷Atteñapa' machayota chapoña pueyo'chro, atet ot: "Apa pa'taruasañer ama't shontetpa' echyenet puerrar, ello puechare'tyena. Naña arrpa' o' nerromuerrmoch nachporrño'. ¹⁸Te'pa' o'ch ahuerren apuesho; te' napa' atetcha' notuer: Apacha' napa' o' nepohua ñeñt ama cohue-nayaye Yomporcop ama't ñaña pocop. ¹⁹Napa' ama cohuenayayno

attoch pechemer peḡapuerren. Te' napa' aña poctetsa nocop ḡapa' ḡa'taruasañrach peḡapuerren." ²⁰ O'ña atet cotape'chua ello e'ñe cohuen Yomporecoppa' allempoñapa' ahuen pomproesho.

'Ama't atarr ellaḡarmeñ allempo entapueñ pompor e'ñe puemuereñoḡ mata poctapueñpa' a'chono'tapueñ, tso'tstsapa'tapueñ. Ñeñḡpa' atet huomicha'tapuanan puechemer atto e'ñe cohuen agapapueñ. ²¹ Puechemerñapa' atet otueñ: "Apacha' napa' o' nepohua ñeñḡ ama cohuenayaye Yomporecop ama't ñaḡa ḡocop. Na te'pa' ama cohuenayayno attoch pechemer peḡapuerren." ²² Tarraña pomporñapa' e'ñe allorocma otan pueñañresha'chno: "O'ch sena' e'ñe tayecma shetamuets ñeñḡ atarr cohuen co'chnesha', o'ch sechorratapuennana nechemer. O'ch senatapueñ ñaḡa anillo potaḡo, o'ch senatapueñ ñaḡa sapatets pa'tco. ²³ O'ch sennana' ñaḡa nehuacsher ñeñḡ atarr ne'soya'taten o'ch semtse o'ch yerrallme'ch o'ch yocshame'tamḡsapueña. ²⁴ Tarro'mar añ nechemer ama't o' rromhuañ, te'ñapa' o' alla tanterra. Ama't o' chenca'huañpa' te'ñapa' o' alla nenter." Allempoñapa' atarr nanac coshame'tamḡsapueñet.

²⁵ Ñehua, po'psheñeñ puechemer ñeñḡ popo'nar ñaḡapa' pa'mro'tsen allempo chen puechoyer. Allempoña err pa'mroḡ e'ñe ya'rroterrtsa pocollopa' o' e'mhuerran coshamñats all requerquēnet ñaḡa ashe'raañ. ²⁶ Allempoñapa' chore'tuerran cheshachorpa' a'ḡto'tuer: "¿Eso'mare'tña coshame'tenet? ¿Eso'tña atarr coshame'tamḡpenet?" ²⁷ Cheshachorñapa' atet otapuer: "O' huena pemo'nasheñ, ḡompurpa' o' muetsatan becer ñeñḡ se'soya'taten tarro'mar atarr coshapuennana puechemer. Ama choye' rromueno, e'ñe huomech agapapueñ." ²⁸ Ñaḡapa' ñeñḡa atarr atsrre'matuerre' ama mueno o'ch be'tosuerr all o' chen pa'mo'nasheñ. Atteñapa' cha'nom pomporpa' allach otere't: "Pebe'tosuerr." Ñaḡapa' ama mueno o'ch be'tosuerr. ²⁹ Ñaḡapa' atet otuerran pompor: "Napa' peñotenen o' shonte' char e'ñe cohuen name'ñenḡa; napa' ama't parrochapa' ama esempo natpare'tenpe. Tarraña ama't atet nepenpeñpa' nañapa' ama't esempapa' ama ḡapuennoña ama't patra cabra attoch nocshame'ta naña epan ñeñḡ parro neyemuetyena na. ³⁰ Te'ña o' huena ñeñḡ pechemerma't pepen ama't ora o' a'gasta'huonaḡ peçllayor e'ñe puecañoresha'teñoḡ, te'ña ḡapa' o' pemtsatapueñ becer ñeñḡ ye'soya'taten." ³¹ Pomporñapa' atet otererr: "Po'ño'ch nechemercha' ḡapa' chocma arro'tseney parro. Amahuaca'ye nechemercha' peñoteñe' ñeñḡ allpon nechepa' e'ñerramche' ḡocma. ³² Ñeñḡo'marña te'pa' añ poctetsa o'ch yocshame'tamḡsapueña pemo'nasheñ, o'ch atarr nanac yocshena tarro'mar ama't o' rromhuañ te'ñapa' o' alla tanterra; ama't o' chenca'huañ te'ñapa' o' alla yenter."

16

Atet atma'ntatarettena atet pena ñeñḡ cohutamḡsatsre'tene' pamo'mte'

¹ Elloña Jesúsapa' alla toma'ntaterranerr pueyochresha', ñeñḡpa' atet serrpare'taterraneterr:

—Eñall yacma puesheñarr ñeñḡ atarr eçllayore't. Ñapa' echenan pa'cheñer ñeñḡ po'taruas pene' o'ch cohutamḡsan ora allpon ñeñḡ echyen pamo'mte'. Ñaḡa ñach quellquēne' po'potantañ ñeñḡ allpon teba'yefñañet pamo'mte'. Atteña allempoña puesheña'tets

acheñenesha'pa' a'metampeñeta' pamo'mtayesho, atet otoñet pamo'mte': "O'ca'ye atfa a'chencatatsre'tapña ñeñt penen ñeñtcha' pecuam̄psatsre'tene'." ² Allempoña pamo'mte' atet e'mare'chpa' allenta agotach. Allempoña huapapa' atet otap̄: "Eso'maruañaca'yeña atet p̄a'chencatatsre'tenen. Te'pa' o'ch peñotatnomuen e'ñe ora allohuen ñeñt allpon petaruasen tarro'mar te'pa' ama nemno o'ch allo'na pecuam̄psatsre'tenen." O' atet otue pamo'mte', ñaña'pa' allenta ahuerr. ³ Allempoña pa'taruasañer ñap̄topa' atet cotape'chen: "Te'pa' amach allo'na netaruasa'nenamo'mtayesho; o'ca'ye mopa'tam̄perrenña allo neganena. Te'pa' errotenuachñaca'ye ne'pate'. Napa' ama necheno nehuamenc attoch namre't ñeñtcha' netaruas neperreñ, ñaña' ama nemno o'ch netaruas ne'pa' o'ch atfa nenamare'tyen quelle atet p̄a'yena po'psheññe'chno ñeñt po'taruas pene' o'ch enamare'tyeset quelle, tarro'mar na ñeñt'pa' atarr apenco'chen nenteñ." ⁴ Allempoña o' e'ñe cotape'chuepa' atet ot: "Te'ña po'ño'chpa' o'ca'ye ne'ño'ch atet'cha'ca'ye ne'pa' attoch acheñenesha'pa' e'ñech cohuen agapnet pa'paclo tsapatonet allempoch huañ ne'çllayor ñeñt allpon naguën te' netaruasot." ⁵ Allempoña atet cotape'chenpa' atet'cho' p̄a. Ñeñto'marña agotatan allohuen allponsheña ñeñt te'ba'yets pamo'mtayesho. E'ñe puesheña'ttsa ñanom a'p̄to'tyesap, atet otapanet: "Papa' çerrpona't petebeñña namo'mte'?" ⁶ Ñaña'pa' atet otos: "Napa' netebeñca'ye çarroch çarra' cilindro aceite'." Ñeñt patron pa'cheñerña'pa' ap̄ allo quellquëññañ ñeñt allpon teben ahuatoteñ. Allempoña'pa' atet otererr: "Te'pa' o'ch panorr tecmapa' o'ch pe'sherrña ñeñt çarroch çarra' cilindro o'ch pequellquërr amnaroch çarra' o'ca'ye allponañña ñeñt peteben." ⁷ Allempoña'pa' otterrannerr ñaña' po'psheññe': "Papa'cho'ña çerrpona't petebeñña namo'mte'?" Ñaña'pa' atet otos: "Napa' netebeñ çarroch çarra' arroga trigo." Ñeñt patron pa'cheñerña'pa' ap̄ ñaña' allo quellquëññañ ñeñt allpon teben ahuatoteñ allempoña ñapa'cho'ña atet otererr: "Papa'cho'ña panorr tecma o'ch pe'sherrña ñeñt çarroch çarra' arroga o'ch pequellquërr poscoch çarra'; te'pa' o'ca'ye allponañña ñeñt allpon petebeñ namo'mte'." ⁸ Allempo pamo'mte' eñotan ñeñt pa'taruasañer atfa shecare'teñ, ñaña'pa' atet oten: "Añ acheñer ama't puehquëño'tpa' e'ñe eñoteñ o'ch entan ñeñtcha' atarr sherberre' ñocop tsapatonet." Po'ño'ch acheñenesha' arr patsro ñeñt ama ame'ñetso ñetña'pa' atarr eñoteñet attoch e'ñech aña e'nenet ñeñtcha' atarr sherberrets ñocpuet tsapatonet. Tarraña ñeñtña' ame'ñetsapa' ama tama eñoteñeto, ama es cotape'cheneto o'ch e'nenet ñeñtcha' atarr sherberrahuet ñamet tsapatonet.

⁹Ñeñto'marña te'pa' o'ch notenes:

—Ñeñt allpon pa'namen sechyen se'çllayorohuen ñeñt'pa' añecpuepa'chña sherbenes alloch seyenpueñ po'potantañ allochña'pa' attochña e'ñech cohuen muererrset. Sapa' añecpuepa'chña setaruasatña sa se'çllayor ñeñt atarr sherbets Yomporecop ama't yeñoteñ quellepa' atarr a'gasta'po' ama't ñaña' añecop ñeñt ama pocteye' enteno Yompor. Allochña'pa' eñallcha' socop ñeñtcha' e'ñe cohuen sagüerre' e'ñe all Yomporepahuo esempoch se'cha'cherr all, allempopa' o'huañcha' allo'na sherbenes quelle ñeñt patso'marecpa. Attoch allohuenes e'ñech cohuen

socrra'huerra Yomporepahuo ñeñt'pa' ama ahuañaño.

¹⁰ 'Elloña o'ch notas:

—Ama't e'ñe coñe'ta yechen ñerra'm añecop yesherbateñ ñeñt' co-huen enten Yompor, ñaña'pa' eñoteny atet ñerra'm ama't atarr aton yechen atterach yesherbateñ ñocop. Tarraña ama't e'ñe coñe'ta yechen ñerra'm ama añecpaye' yesherbateñe ñocop, ñaña'pa' e'ñech eñoteny attoña ama't'cha' atarr aton yecheneña'pa' atterach amach es yesherbateñe ñocop. ¹¹ Ñaña ama't e'ñe allpona quelle yechen arr patsro ama't e'ñe patso'marecpa tarraña ñerra'm ama añecop yesherbateñe ñeñt' cohuen enten Yompor allempopa' amach errotenot alla apuerryerroña ñeñt' po'ño'ch atarr sherbets ñeñt' apueney ña. ¹² Ñaña ñerra'm ama es yesherbateññañe ñeñt' po'psheñño atet ñerra'm ñeñt' Yomporo, allempopa' amach errotenot apyeña ñaña ñeñt' e'ñe yocop ñeñt'cha' e'ñe co-huen yocshatene'.

¹³ 'Ñeñt'pa' atet'cha' netma'ntacha:

—Ama't puesheñarrofeyapa' amach errotenot e'ñe cohuen yetaruasña epsheño'mar yamo'mtayecop. Tarro'mar ñerra'm atet yepapa' puesheñar e'ñech cohuen yemorrenteño' yocsheñeshocmañen yesherbeñ, po'psheñeñña'pa' amach e'ñeye' yemorrenteño; çhach yottena ñerra'm çha yetsena'teñ. Ñeñto'mar atet'pa' amach cohuenaye' yesherbeñe. Ñerra'm aña e'ñe sema'yoçhrena ñeñt' e'ñe socpa attoch segana aton quelle, ñeñt' atet'pa' amach errotenot sema'yoçhrona ñaña añecop ñeñt' atarr sherbets Yomporecop.

¹⁴ Añña fariseonesha' ñeñt' e'muene' Jesús ñeñt' atet serrpare'tatenan acheñenesha', ñetñapa' aña atarr ye'chapretenet quelle. Ñeñto'marña ñet allempopa' puesasare'teño'et Jesús'pa' çha atarr che'tatseteñet.

¹⁵ Jesús'ña'pa' atet otanet:

—Sapa' çha sottenañ ñerra'mrrate' atarr cohuensoñ attoña acheñenesha'pa' e'ñe cohuen entyensetañ. Tarraña Yomporniapa' e'ñe eñotennas seyoçher ñeñt' atto sapa' atarr seshcare'tyeñ acheñenesha'. Tarraña ñeñt' e'ñe ñañeña atarr cohuen entyetset arr patsro, ñetñapa' atarr tsena'tenanet Yompor.

Moisés po'ñoñpa' ñeñt' atet anaret ñeñt'pa' ñeñt'ña e'ñe yemtete't tarremphua allempo orrterra Yompor po'cohuenña ñeñt' atto ayochreshattena ña

¹⁶ Allempoña Jesús'pa' atet serrpare'taterranerr acheñenesha' po'poñonet:

—Añña ñoñets Moisés po'ñoñ ñeñt' atet anaret ñaña añ ñoñets ñeñt' quellca'yese't ñeñt' a'mta'yese't Yompor po'ñoñ, ñetpa' ñeñt'a e'ñe serrpare'tete't tarremphua allempo orrtosa Juan. Allempoteñ serrpare'tatosanet Juanpa' ñapa' añ serrpare'tatosanet atet penaña Yompor po'cohuenña atto atarr ayochreshattena ña, ñeñt'ara cohuen ñoñets alloch sequeshperra. Ñaña allohuen acheñenesha' e'ñe pueyoçhrochmañenet ñeñt'a atarr muenenet.

¹⁷ 'Tarraña ama't atet'ña' ñeñt' atet anaret Yompor po'ñoñ ama't patrra quellec pueshempotollohuenpa' amach chenguéro. Tarro'mar Yompor po'ñoñpa' amach erroteno ya'huañatere ñeñt' atto sherbeney. Patsña epuet enet ñeñt'pa' huañerrcha'.

*Atto Jesúsapa' yečhatosanet ama asanna' tpahuoyaye
(Mt. 19.1-12; Mr. 10.1-12)*

¹⁸ 'Ama a'huañatpahuoyaye Yompor po'ñoñ ñeñt atet yotene' ama asa'pahuo yetapor tarro'mar ñerra'm esesha' serre' puetapor o'ch yorerran po'psheñeñ coyanesha' ñeñcha' puetapor perretpa' ñeñña'pa' čhach ochña'tamperrana puetaporeshe'mañ; ñeñtpa' ama cohuenaye' enteñe Yompor. Ñaña ñeñcha' yorerre' coyanesha' asaret, ñeñt yacmarpa' čhach chetapreten taporets; ñeñtpa'čo'ña ama cohuenaye' enteñe Yompor.

Atet ařaretta puesheñarr yacma ñeñt atarr ečllayoret; atet ařaretta ñaña po'psheñeñ yacma ñeñt atarr huocchañetets, ñeñtpa' añ pa'so'cheñ Lázaro

¹⁹ Elloña Jesúsapa' atet serrpare'tatanet:

—Eñall puesheñarr ñeñt atarr ečllayoret ñeñt chorrenaya sheta-muets atarr cočhneshare' ñeñt atarr cohuen apomotyesaret. Epaye' coshatse'tatyen ñeñt allpon echyen. E'ñe pocsheño'pa' e'ñe ellapene't rrallme'chats. ²⁰ Eñall ñaña puesheñarr ñeñt atarr huocchañetets ñeñña'pa' čha ora puetsaren, ñeñtpa' añ pa'so'cheñ Lázaro. Ñaña'pa' allach ellapene't a'yot yetarro't allotecma be'ten ečllayoret pa'pacillo. ²¹ Ñapa' añach atarr ye'chena o'ch rra'yesan ama't coñe'ta'tsa rreñets ñeñt a'shore'tatyen ečllayoret po'mesa'pnačo. Allña ochepa' o'ch huapoña o'ch tso'na'teñña' pueptsarña. ²² Atteña o' čhap pamtarr allempo rroma ñeñt huocchañeshar. O' rroma mellaño'feñnesha'ña huača'tapa' o' aneret e'ñe Abrahamuesho, allña'pa' o' čhapachet atarr cosheñso. Atteña'pa' čhap allempo rroma ñaña ñeñt atarr ečllayoret, ñeñña'pa' pampueñeta'. ²³ Ñaña'pa' alla čhap coñcha'puetso ñeñt o'patenaya ñeñt rromuets ñeñt ama ame'ñets. Allña'pa' atarr mueročhtosa all coñchosa. Atteña'pa' cohua' ononetpa' allotña entosan Abraham allaparo'tsen ento. Allña'pa' allo'tsen epuet Lázaro. ²⁴ Ñeñña ečllayoret allenta chore'tan Abraham, ñeñtpa' atet och: “Nompore Abrahamama pemueraye'chna, pemñaye'chon Lázaro o'ch huapa arr attoch esha'tosan potař oño, ama't potařotapa' o'ch onenapna' oñ attoch a'yamoserrapona' neñeñ o' e'ñe neporrarra'nmahuap. Atarr nanac o' nemueročhtosa arr tso.” ²⁵ Abrahamña'pa' atet och: “Nechemerñecha' te'pa' o'ch peyerposa ora allpon pa'namen ñeñt pechyses't ñeñt atarr cočhneshare' pentyses't allempo pocre't patso. Lázaroña'pa' ama es eche'te ama't coñe'ta ñeñt atarr cohuen enten ñaña. Te'ña ñapa' o' atarr acshatare'terra, pa'napa' o' atarr pa'coñchatare'terra. ²⁶ Elloña te'pa' ama't e'ñe eseshapa' amach erro'teno't čhapan'psapeto allo'tsenep' tarro'mar pa'pa' atsereto'tsenpa yonita'n. Sapa'čo'ña te'pa' ama't e'ñe puesheñarro'tesapa' amach erro'teno't sečhapan'pesyo yaña. Amate' erro't yepere'te ñeñtpa' atet anaret attoch yello'tsentatare'terra.” ²⁷ Allempoña ečllayoretpa' atet o'terranerr Abraham: “Tarraña ama't atteñ nomporepa' te'pa' o'ch no-tař o'ch pemñer Lázaro all patso nompor pa'pacillo. ²⁸ Tarro'mar all napa' nechen amnarsheña nemo'nasheñ. Ñeño'marña nemneñ o'ch ahuerer o'ch co'tape'chaterraneta' e'ñe cohuen te't ñetpa'čo'ña esempopa' alla čhapuet arr coñcha'puetso.” ²⁹ Abrahamña'pa' alla otererr: “Ñetpa' echenet Yompor po'ñoñ ñeñt quellqu'e't Moisés ñaña allohuen

ñeñt a'ntaye't Yompor po'ñoñ ahuat. Te'pa' e'mñoterrñañetepa' Yompor po'ñoñ ñeñt echenet." ³⁰ Ñaña'pa' atet oterranerr Abraham: "Ñato' amach e'mñoterrñañeto Yompor po'ñoñ, tarraña nompore Abraham a ñerra'm esesha' tanterrtsa rromot ñeñtcha' orrtarrahuet allempoña'pa' po'ñoñ ñeñtcha'ña cotape'chatarrahuet ello e'ñe cohuen Yomporecop."
³¹ Abrahamña'pa' alla otererr: "Ñerra'm amach e'mñoterrñañeto Yompor po'ñoñ ñeñt atet quellquë't Moisés ñaña allohuen ñeñt a'ntaye't Yompor po'ñoñ ahuat, te'ña ama't esesha'ch tanterrtsa rromotpa' amach eshec çapanetoña pueyoçhreto attoch cotape'cherret ello e'ñe cohuen Yomporecop."

17

Atto çhocmach huaponaya ñeñtcha' yetpatyene' o'ch atet ÷atyeseý ñeñt ama pocteye' enteno Yompor

(Mt. 18.6-7, 21-22; Mr. 9.42)

¹ Allempoña Jesús'pa' alla serrpare'taterranerr pueyoçhresha', ñeñt'pa' atet otanet:

—Chocmach huaponaya ñeñtcha' yetpatyene' o'ch atet ÷atey ñeñt ama pocteye' enteno Yompor. Tarraña napa' o'ch notas, atarrcha' yoroçheno'tsen ama't erra'tsena acheñer ñeñt orrtatene' ñeñtcha' topatyene' po'psheñeñ ñeñt name'ñenaya o'ch atet ÷atyenanet ñamet ñeñt ama't mamesha ama pocteye' enteno Yompor. ² Ama't ñeñt e'ñe errote' name'ñenaya ñerra'm esesha' o'ch orrtatanet attoch o'ch atet ÷atachet ñeñt ama pocteye' enteno Yompor, ñeñtña acheñerpa' atarrcha' yoroçheno'tsen tarro'mar ñapa' aña o'patenaya coñcheñets ñeñt atarr huomenc. Ama't ñocoppa' ama tama yoroçhenayayñe ñerra'm ama atet ÷atenana' po'psheñeñ, e'ñech allorocma çharachetañ mapue' añecmuen pa'çhnoço allpon ñerra'm puette'tamets o'ch huapore'chet oño epo allcha' ño'shach mapue'. ³ Ñeñto'marña sapa' e'ñech señota, amach sorrtatatsto attoch sa'shoratach po'psheñeñ ama't erra'tsena.

'Elloña napa' o'ch alla noterrser, ñerra'm esempo samo'ts erroç ponas sa ñeñt ama pocteye' enteno Yompor, socoppa' añ poctetsa o'ch soctape'chater e'ñe cohuen o'ch poter ñeñt atet o' pòhuona'ppa' ama't mameshapa' ama pocteye' enteñe Yompor. Allochña'pa' ñerra'm o'ch alla cotape'cherran cohuen Yomporecop, saña'pa' añ poctetsa o'ch alla e'ñe cohuen sepretner. ⁴ Ama'tcha' atonoche'tats atet penset, ama'tcha' pamtarrpa' cançhroche'tatscha' atet penset ñerra'm o'ch alla llequërrana ñeñt atet pennaset, ñerra'm ama't pamtarr cançhroche'tats o'ch alla otterret: "Napa' o' atet nepona' ñeñt ama pocteyaye tarraña te'ña ello'pa' amach alla atet neperre'te", socoppa'çho'ña aña e'ñe poctetsa o'ch alla e'ñe cohuen sepretner ñeñt atet sepene'.

E'ñe yeyemteñoç Jesús ñeñta ahuamencat yepene' attoch es yorrtatyen ñocop

⁵ Allempo atet otarettenet aña puellsensarnesha'ñapa' atet ochet Po'partsesharet Jesús:

—Elloña yapa' ahuamencatcha' pepa'y allochña'pa' e'ñech cohuen yeyemterpa'.

⁶ Partsesha'ñapa' alla oterraneterr:

—Ñerra'm po'ñoch e'ñe na seyemtenañ napa' e'ñeca'ye na'pocatenña neñoñ ñeñt' atet notenes, ama'tcha' allponatollota seyemtenña ñerra'mrrate' mostazllometoll, sañapa' ama't erra'tsena senamuenoñ ama't ñeñt' atarr echarr sentenpa' nañapa' atetcha' nepennaseñ. O'ch netma'ntatasa atet ñerra'm o'ch sot añ tsachecop sicómorech: “Bera'nmuepa'ch arrot all ten, arrepa'chña tomhuerrerr a'yo sa'po”, tsachñapa' atetcha'cho'ña pañ e'ñe atet soteñ.

Atto atma'ntatare'ttena ataruasañpa' añ pocetsa ñocop e'ñech etsotenan ñeñt' atet muenateñ pamo'mte'

⁷ Ellopa' alla toma'ntaterraneterr, ñeñt'pa' atet oterraneterr:

—Ñerra'm eseshas echene' sa'taruasañer, ñato' ñapa' ellapene'tcha' llampue' sechamuelleñ amapa' ñato' ellapene'tcha' cohuanpene' sayarachno ellerronetña allemPOCH huerra po'taruaso'tpa' sañapa' ama't puesheñarrofesapa' amach sotapuerña señañra: “Te'pa' o'ch pebe'tosuerr o'ch yerrallme'ch nen parro.” ⁸ Elloña ñeñt'apa' o'chcho' alla sotapuererr: “Te'ñapa' o'ch peptare'tuerren ñeñt'cha' nerra'nen, allotñapa' o'ch pa'cohuetuerr peshtam attoch e'ñe cohuen pesherb'a'huerrren cho'pcha'ña naphuerre' nerrar ñeñt'cha' nerra'nen. O'chña nerruanen napa' allemPOÑAPA' cho'pcha'ña rrallme'chnets paña.” ⁹ Ama'tña sapa' atetca'ye sepene. Ñaña sa'taruasañer ñerra'm esemPOCH e'nuañ ora po'taruas ñeñt' seyecheña, sañapa' ama't puesheñarrofesapa' amach sotereña: “Parasyos o' pe'nuon netaruas.” Ama't ama atarr socshateñe ñeñt'pa' e'ñe pocte' ñocop tarro'mar ñapa' allpona o' e'nua ñeñt' allpon seyecheña. ¹⁰ Sapa'cho'ña Yompor pa'taruasañer sepene'. Ñaña ama't allemPOCH setsotuen ora allohuen ñeñt' atet otenes Yompor atterepa'chña sentena ama atarr atonaye' sesherbena. Aña setsoten ñeñt' e'ñe pocetsa allohuen añecop ñeñt' pa'taruasañer pen Yompor.

Atto Jesús'pa' e'ñe po'ñoñoña a'crratyasapan aptsarñate'chno ñeñt' charrasheña

¹¹ AllemPO sechena Jesús Jerusaléño arr oñem allohua temuena Samaria epuet Galilea. ¹² AllemPOÑAPA' chap paterr anetso. Allñapa' hua'cha'toña charrasheña ñeñt' osyen puetsarñats ñeñt' otenet lepra. Ñeñt'ña aptsarñate'chno a'yota tom'cha'tyesoset. ¹³ Ñetñapa' allotña rranare'tyesosetpa' atet ochet Jesús:

—Maestro Jesús'ocha' pemueraye'chosya yaña.

¹⁴ Jesús'ñapa' allenta cohuananetpa' atet otosanet:

—Te'pa' o'ch ahues o'ch segatyena' sañeña judionesha' po'cornanesharesho attoch ñetpa' o'ch eñotaset te'pa' o' socrrerra.

Atet otanet Jesús, ñetña ahuanmatsetpa' e'ñe allorocma acra'yേശerrochet. ¹⁵ Puesheñarrña allemPO eñota o' correrrapa' alla puetallerrapa' o' alla ahuerr Jesúseshone't atarr nanac pocsheñesha' aye'cho'chtatnerran Yompor. ¹⁶ E'ñe pueparasyoso'teñesha' rromosa Jesús pa'rrpōt. Ñehua, ñeñt' atet patsapa' ñeñt'pa' ñeñt'ña samario'marnesha'. ¹⁷ AllemPOÑA Jesús'pa' atet otan acheñenesha' ñeñt' allo'tsa'yen:

—Ama't charrasheña ñeñt' o' na'crratyasua te'. ¿Po'potantañña esconsheñapa'?

Ñetñapa' ama es yerpa'pesnomayeña attoch

aye'chochtatoñet Yompor. ¹⁸ E'ñe puesheñarraña ñeñt' puerrerrtsa attoch atarr aye'chochtatan Yompor ama't' ñapa' ama judioneshayaye.

¹⁹ Allempoña Jesús'pa' atet otan ñeñt' a'crraterr:

—Te'ñapa' o'ch petanterra, e'ñech cohuen peserr tarro'mar ñapa' e'ñe peyemteñoñen na o' p'ocrrerra.

Atto fariseonesha'pa' a'p'to'chet Jesús: ¿Esem'po'tcha' orrtterraña Yompor po'cohuenña allempoch atarr añcha'taretterra ña?

(Mt. 24.23-28, 36-41)

²⁰ Parrochña fariseonesha'pa' a'p'to'chet Jesús:

—¿Esem'po'tcha' orrtterraña Yompor po'cohuenña allempoch atarr añcha'taretterra ña?

Jesúsñapa' atet otanet:

—Yompor po'cohuenña atto ayochreshattena ñapa' ñeñt'pa' ama atteyaye ñerra'mrrate' ñeñt' es yentyen yecloyot. ²¹ Ñeñto'marña amach erroñenot oteto: “Arrca'yeña añcha'tarettenaña Yompor”, amapa' “Tarroca'yeña añcha'tarettenaña Yompor.” Tarro'mar Yompor po'cohuenña ñeñt' atto ayochreshattena ñapa' ñeñt'pa' o'ca'ye moñetnoma orrttsa e'ñe sesho ama't' seyoçhro.

²² Elloña ñapa' atet otarranerr pueyochresha':

—Cherrcha' esempohuañen allempoch atarr se'nerren atarrcha' semnerren Ñeñten Acheñetostse't o'ch norrtternasa ama't' e'ñe pamtarra. Tarraña ama't' e'ñe allempa amach senterrno. ²³ Saña allempopa' atetcha' otasetañ: “Te'pa' o' orrtterraña Cristo allo'tsenca'ye”, amapa' “Tarro'tsenca'yeña Cristo.” Saña'pa' amach setatstoña all, amach soçtatscheña ñeñt' sets all. ²⁴ Tarro'mar ñerra'm esempo çherr allempoch nohuerra na Ñeñten Acheñetosets e'ñe allohuen acheñenesha'pa' e'ñech entuapuerrnet tarro'mar allempopa' atetcha' perra ñerra'mrrate' meratste', o'ch meratsta huomencpa' e'ñech a'puetaresuan ora enet errañaren. ²⁵ Ñehua, na te' ñeñt' atet anaret' nocop ñanompa' atarrcha' na'mueroçhtataretta, ama't' namo'tsesha' ñeñt' corretsa te'pa' amach eseshaye' naguñenaye. ²⁶ Tarraña allempoch nohuerra po'pocheño na Ñeñten Acheñetosets, allempopa' e'ñech atet perret e'ñe atet pete't' ahuat allempo corre't' Noé. ²⁷ Allempopa' ama es pueçha'yeneto aña e'ñe coñape'çhete't' atto atarr pa'namen muenenet ñeñt'cha' rra'yenet, orrare'tyesete't', sena'tanatyena yacmaneshaçhno, coyaneshaçhnopa'çho'ña apanatyese't' ñeñt' yoranatyesehuate't'. Ñetñapa' ñeñta e'ñe cohuen entete't'. Atteñapa' çhap allempo be'tosos Noé po'huarcopahuo. Allempoñapa' huata, choña oñ erracmañen, e'ñe a'clatuan allohuen acheñenesha' errañaren. ²⁸ Atteçma perreterr allempo corre't' Lot, aña e'ñe coñape'çhyerretter shonte' rralme'çhyese't' ñaña shonte' orrare'tyesete't', atarr es raña'yese't', ñaña pomatsre'tyesete't'. Shonte' esocmañen ñeñt' pa'namen nare'tyesete't', tomatyese't' ñaña shonte' pocollaçhno. Ñetñapa' e'ñe ñeñta cohuen entete't'. ²⁹ Atteñapa' çhap allempo çha'nom Lot ñeñt' anetsrot. E'ñe ñeñte yetrocma allempo çha'nom Lot allot, Yomporña pue'ntañof a'shoranet tso' ñeñt' shemashrepñeñeno' huorten, ñeñt'ña e'ñe a'clatuerrahueterrr allempo. ³⁰ Atteçmach perreterr allempoch norretuerra na Ñeñten Acheñetosets.

31 'Tarraña allempoch norrterra na sapa' arepa'chña aña soctape'cheno ñeñt patso'marecpa, atet ñerra'mrrate' puesheñarr ñato' a'yote'tsenach pa'pacllot arepa'chña be'tosatsterro ama't e'ñe mamesha pa'pacllot attoch yoratsre'tnoma. Amapa' ñerra'm puesheñarr pa'mro'tsenpa' arepa'chña onatsterro. 32 Seyerpuepa'chña atet pa'ahuat Lot puetapor ñeñt atarr morrentnomaya ñeñt patso'marecpa. 33 Ñaña ñerra'm esesha' e'ñe aña e'nenet o'ch correna atomat attoch e'ñe coshenet arr patsro, ñetñapa' a'chencaterretcha' ñañeñeta. Tarraña ñerra'm esesha' e'ñe pocte' entene' o'ch es sehuanmuet ñeñt atet muenenet ñeñt e'ñe ñocpueta arr patsro ñeñtña acheñerpa' corretsach pocsheñeshocmañen e'ñe tayoteñ errponañohuen.

34 'Po'ñoçca'ye o'ch notas atetcha'ca'ye perra allempoch nohuerra, puesheña'tetspa' anmaretterretcha'; ama't ñeñt e'ñe pamo'ts pene', ñeñtñapa' allach asa'nmaretterra. Atet ñerra'm tsapo all manrrenet epsheño'maret, puesheñarrpa' anmaretterrach, po'psheñeññapa' allach asa'nmaretterra. 35 Amapa' ñato' allempopa' allo'tsencha' epsheña coy-anesha' ñeñt parro puetse'tets mapyo ñeñt'pa'cho'ña puesheñarrpa' anmaretterrach ñaña po'psheñeññapa' allach asa'nmaretterra. 36 Amapa' ñato' allempopa' allo'tsencha' ñaña epsheña ñeñt e'ñe parro taru-aseten pa'mro. Puesheñarrñapa' anmaretterrach, po'psheñeññapa' allach asa'nmaretterra.

37 Allempoña pueyochresha'pa' a'p'to'chet, atet ochet:

—Partseshacha' ñeñt'pa' çerra'tcha'ña atet perra?

Jesúsñapa' atet otanet toma'nteñtso:

—Ñerra'm erro'tsencha' ñeñt rromue'pa' allcha'ña shontaña tse'm.

18

Atto atma'ntatarettena rretorrnanesha' ñeñt çhocma enamare'tene' juez attoch yempue'

1 Allempoña Jesús'pa' alla serrpare'taterraneterr toma'nteñtso attoch eñoçet ñeñt poctetsa yocop çhocmach yema'yochena amach yemuenme'chatsche ma'yochatsa. 2 Ñeñto'marña allempopa' atet otanet:

—Pater anetso allo'tsen puesheñarr juez ñeñt po'taruas pene' o'ch e'ñe cohuen a'poctatan ñoñets acheñeneshacop ñerra'm esempo e'moñe'tannenet. Tarraña ñeñtña juezpa' atarr atrre'mñañ. Ama't Yomporpa' ama amcha'na'tpahuoye' enteñe ama't e'ñe mamesha. Acheñeneshapa'cho'ña ama't puesheñarrapa' ama acua'penaye' entenaneto. 3 Ñeñtña anetsropa' all yeçhena ñaña puesheñarr rretorrnanesha'. Ñaña'pa' eñall po'psheñeñ ñeñt e'moñe'tene', çhocmach erro't peññañ ñeñt ama pocteyaye. Rretorrnanesha'ñapa' çhocmach sene't juezesho. Allcha' çhocma atet otare'tenan juez: "Te'pa' nemneñ o'ch e'ñe cohuen peyenpa'n attoch pa'poctaton cohuen ñoñets añecop ñeñt ne'moñe'tene'." 4 Juezñapa' ama't allponmat ama mueno o'ch yempue'. Tarraña rretorrnanesha' ñapa' çhocmach sen juezesho enamare'tene' attoch a'poctatoñ ñoñets añecop ñeñt e'moñe'tene'. Atteñapa' çhap allempo cotape'ch juezpa' atet ot: "Napa' po'ñoç ama't Parets ama nencha'teñe; acheñeneshapa'cho'ña ama't mameshapa' ama acua'penaye' nentaneto. 5 Tarraña añ rretorrnanesharpa' atarr atrre'moçhtana'tenen, epaye' huapame'tennana, o'ca'ye atarr

a'mñechatna. Ñeñto'marña te'pa' o'ch neyenpue' allochñapa' amach alla huerrnane'te."

⁶ Allempoña Jesús'pa' atet oterrerr:

—Ama't se'mueñaña ñeñt atet oten juez ñeñt atarr atsrre'mñañ. Te'pa' oten ahuo'ch a'pocatan rretornaneshacop ama't ñapa' ñeñt acheñer ñeñt atarr atsrre'mñañ. ⁷⁻⁸ Ñeñto'marña te'pa' o'ch noterrerr: Yomporpa' elloña nanaccha' cohuen a'pocatonay ñeñtey o' acrerrey ya ñeñteycha' e'ñe puechemer pen ñerra'm yapa' chocmach yethore'teñ ama't yeto ama't ñaña tsapo. Napa' po'ño'ch o'ch notas, Yomporñapa' amach atomato, chocch ye'mñote'; ñapa' e'ñechca'ye allorocma e'mñotey o'ch e'ñe cohuen a'pocatonay ñeñt yocop. Tarraña te'pa' o'ch notas, ñerra'm esempoch nehuerra Ñeñten Acheñetosets, errponsheña'te'ña nentuerrña arr patsro ñeñt e'ñe cohuen name'ñenaya.

Atet ma'yochena fariseonesa' ñeñt e'ñe cohuen entetsa, all ma'yocha ñaña po'psheñeñ e'ñe puellquëñesha' ñeñt atarr ochña't entetsa

⁹ Po'pocheñoña Jesús'pa' atet serrpare'tatan allpon acheñenesha' ñeñt e'ñe ñeta yemtetset tarro'mar ñetpa' e'ñe cohuen entyenet e'ñe ñañeñeta. Ñetñapa' ama't mameshapa' ama cohuenaye' enteñetoña po'potantañ acheñenesha'. Ñeñto'marña Jesús'pa' alla toma'ntatanet, ñeñtpa' atet otanet:

¹⁰—Eñall epsheña acheñ ñeñt sets Parets pa'paclo allcha' ma'yochoset. Puesheñarr ñeñtpa' fariseo ñeñt e'ñe ñañeña cohuen entetsa; po'psheñeñña' ñeñt puehquëño'te'na cobra'yenan acheñenesha' quelle ñeñt gobiernocop. ¹¹ Ñeñtña fariseopa' tomos all ma'yochosañ, ñeñtpa' atet otos: “Nompore, napa' o'ch neparasyoso'tosep tarro'mar napa' atarr cohuen acheñren, napa' ama atteyayno Nompore ñerra'm po'potantañ acheñenesha'. Ñetpa' atarr es puerratan'psanna'tyenet, ama pocteye' es panna'tyenet, atarrcha' cheta'yeñet coyaneshachno ñeñt ama puetaporeyaye. Napa' ama atteye' Nompore nepeno. Napa' ama neshcare'teno atet pena añ acheñer ñeñt puehquëño'te'na cobra'yene' acheñenesha' quelle gobiernocop. ¹² Napa' pate'tets semanapa' epochcha' netore'tena Nompore p'ocop, ñaña ama't ora ñeñt allpon naguën chocma napuenep allpon poctetsa p'ocop ama't nediezmo Nompore.” Allohua huañ atet ma'yochena fariseo. ¹³ Po'psheñeñña ñeñt cobrets quelle ñañapa' alla tomos a'yo't. Ñapa' eñotena atarr ochña't ñeñto'marña ñapa' ama cohuoso enonet Yomporeshonet. Ña puellquëño'tpa' nosan pot puesomapo. Ña puema'yocheno't atet otos: “Nompore, te'pa' o'ch pemorrenterrna attoch e'ñe pepretna'huerrnan allohuen no'chñar tarro'mar napa' atarrca'ye ochña'ten.”

¹⁴ Jesús'ñapa' atet oterranneterr:

—Napa' o'ch notas, ñeñtña atet a'metene' po'chñar ñeñtña acheñerpa' e'ñe pocte' enteñ Yompor. Ñeñto'marña allempo ma'yochuapa' o' ahuer pa'paclo e'ñe cohuen ap'retna'huaretterra po'chñar. Po'psheñeñña fariseo ñeñt ama a'metosaye po'chñar, Yomporñapa' arepa'tcha' pocteye' eñche. Tarro'mar allohuen ñeñt e'ñe cohuen entetsa e'ñe pommo'cheño't ñeñtña tsapatonetpa' amach esoshe'maye' entereto. Tarraña allohuen ñeñt ama esoshe'maye' entetso te', ñeñtña tsapatonetpa' atarrcha' cohuen enteret.

Atto Jesúsapa' bensare'tam̄psapan cheshaneshá' ñeñt̄ huapatoñet
(Mt. 19.13-15; Mr. 10.13-16)

¹⁵ Ñaña allempopa' shonte' huačha'tachet cheshatollesha' Jesúsesho. Ñetpa' añecopña huačha'tachet o'ch a'p̄lla'yésapanet Jesús attoch bensare'tam̄psapanet. Jesúsña pueyochresha' allempo entapan ñeñt̄ huačha'tate' cheshaneshachno, ñetñapa' ama pocteye' eñcheto o'ch anmoset cheshatollesha' Jesúsesho ñeñto'marña ama amnataretapueto. ¹⁶ Tarraña Jesúsñapa' allenta chore'tapanet, atet otapanet:

—Pocte'ñačho' semnachña'yeña cheshaneshá' onosetepa' e'ñe nesho. Amachca'ye čha sepatare'tatstapaneto tarro'mar allohuen ñeñt̄ atarr neyemtenaya na e'ñe attet ñerra'mrrate' cheshatoll, ñetcha' o'patenetña Yompor po'cohuenña ñeñt̄ atto ayochreshattena ña pue'ntañot. ¹⁷ Po'ñočhpa' o'ch notas, ñerra'm esesha' ama e'ñeye' pueyemteño'eye' aguëññañeto Yompor po'cohuenña amach atet perreto ñerra'm cheshatoll e'ñech yemtenana ñeñt̄ cohuan̄pene', ñetñapa' amach pueyochreshaye' perraneto Yompor atto atarr ayochreshattena ña.

Atto puesheñarr ñeñt̄ huepueshameñ ñeñt̄ atarr ečllayoret ñaña'apa' eñorana'tosana Jesús

(Mt. 19.16-30; Mr. 10.17-31)

¹⁸ Po'pocheñoña puesheñarr ñeñt̄ atarr añcha'tarettetsa a'p̄to'tosan Jesús, atet otos:

—Maestro, p̄apa' atarr cohuen acheñreṽ, te'pa' o'ch p̄otapuen ¿er-ro'tena'tcha' nepañna na e'ñe cohuen attochña napa' corretsanach e'ñe tayoteñ ama't errponañohuen?

¹⁹ Jesúsñapa' atet otaṽ:

—Eso'mare't p̄otenenña napa' atarro' cohuen acheñren. Arr arromñañenesha' ama't e'ñe puesheñarrapa' ama eñalleña ñeñt̄ e'ñe cohuen acheñer. Ñap̄taña Yompor ñeñt̄ e'ñe po'ñočh cohuen. ²⁰ Papa' e'ñe peñotuen Yompor po'ñoñ all oteneý ñeñt̄cha' atet yepena e'ñe cohuen; ñeñt̄pa' atet oteneý: “Amach yechtapretyesatsto taporets; amach yemt-sanna'tatsto; amach yetyesatsto; amach yetoma'tam̄psatsche yamo'ts e'ñe atfa; ñaña yemorrenteño'pa' yemčha'na'chcha' yompor ñaña yachor.”

²¹ Ñeñt̄ña a'p̄to'tene'pa' atet otererr:

—Napa' e'ñeca'ye cheshoteñ ora añečhno'pa' e'ñeca'ye netsotueñ.

²² O'ña atet otua Jesúsñapa' alla otererr:

—Eñallmeñca'ye paterr ñeñt̄ pepalltena ñeñt̄ ama atteye' pepena'. Te'pa' añcha'ña atet peṽa o'ch e'ñe pepomhuerr ora allpon ñeñt̄ pechyen o'ch p̄apa'yera' huocchañneshachno ñeñt̄ atarr es pallta'yetsa attochña p̄apa' pecherrcha' ñeñt̄ atarr nanac sherbets Yompor pue'ntaño. Allempochña pehuerrapa' o'ch p̄octerren attoch e'ñe neyochresha' neperreṽ e'ñe poctacma.

²³ O'ña e'mhuan ñeñt̄ atet och Jesúsapa' ñaña'apa' čha atarr lleca tarro'mar ñapa' atarr ečllayoret, shonte' pa'namen echyen. ²⁴ Jesúsña eñch ñeñt̄ atet atarr llecapa' ñaña'apa' puellcapreteño'pa' atet ot:

—Ñeñt̄ atarr ečllayoretpa' atarr nanac echarr attoch agapoñet Yompor po'cohuenña ñeñt̄ atto ayochreshattena ña. ²⁵ Ñehua, ñeñt̄pa' atetcha' netma'ntacha. Po'ñočh yapa' yeñoteñ berr añecmuen allpon ñerra'm

huaquësh* atarrca'ye torrapo' o'ch esho'tosa añefollponatollo atet ñerra'mrrate' acosh puetatollo. Ñeñtpa' atetca'ye penaña acheñ ñeñt ec'llayoret ello atarr torrapo' o'ch agapan ñaña Yompor po'cohuenña ñeñt atto ayochreshattena ña (tarro'mar ñetpa' ama mueneñeto o'ch sehuanmuet ñeñt atarr morrentenet ñet attoch pueyochresha' perranetañ Yompor).

²⁶ Ñeñña e'muene' atet oten Jesús ñetñapa' atet ochet:

—Tarraña ñerra'm atette'pa' amate' esesha' a'queshpataretterrtso ama't puesheñarra tarro'mar yapa' yeñoteñca'ye huaquëshpa' amaca'ye esho'tenoña acshequeto.

²⁷ Jesúsñapa' atet oterraneterr:

—Sa arromñaateneshaspa' amach es errotenaye' apen senteno. Tarraña Yomporpa' ama eñalle ñocop ñeñt atarr torrapo' enten.

²⁸ Pedroñapa' atet och:

—Parteshacha' po'ñoçh yapa' o' e'ñe yesuanom ora allohuen ama't yepaclohuen attoch e'ñe yocterreþ.

²⁹ Jesúsñapa' alla oterraneterr:

—Po'ñoçhpa' o'ch notas, allohuen erra'tsencha' acheñer ñeñtcha' e'ñe sehuanmue' allohuen ama't pa'paclohuen, ñato' pue'tapor, pa'mo'nasheñesha' ñato' pompor, pachor, ñato' ama't ñaña puechemeresh'a' attoch e'ñe cohuen sherbaterrñañet Yompor po'cohuenña atto ayochreshattena ña, ³⁰ ama't erra'tsencha' ñeñtcha' sohuanmue' allohuen, elloña ñetpa' o'ch alla aguërret shonte' esocmañen ñeñt atarr cohuen ama't te' allempo e'ñe correnet, elloña tsapatonetñapa' o'ch aguërret ñeñt alloch ñetpa' corretsetach beñecpuen.

Allempo Jesúsapa' alla eñotaterraneterr ñapa' çhocmach amtsaretterra (Mt. 20.17-19; Mr. 10.32-34)

³¹ Ñeñt pueyochresha' ñeñt çharra' puechena epsheña, Jesúsñapa' ahuanmanet ellonet, allñapa' atet otosanet:

—Te' po'ñoçhpa' o'ch ahueney Jerusaléno. All ora allpon quellca'yesone't ñeñt a'mta'yesaye't Yompor po'ñoñ ahuat ñeñtcha' atet na'paretterra na Ñeñtencha' Acheñetosets, te'ñapa' o'ch e'ñe etsotuerra ñeñt atet anaret nocop. ³² Tarro'mar te'pa' pomuerrnetcha' po'poñ acheñesho ñeñt ama judioneshayaye. Allohuen acheñenesha'pa' o'ch achmãare'terrnet, o'ch atserrpãtse'terrnet, pue'moñe'teñoñetanpa' o'ch a'coshare'terrnet. ³³ O'ch nashtaretterra, attotcha'ña muetserrnet. Tarraña poma'pamtañoñapa' o'ch alla netanterra.

³⁴ Ama't atet otuanet, ñetñapa' ama eseshaye' eñotaye ñeñt atet serrpare'tatanet. Ama't puesheñarroñetapa' ama't mameshapa' ama çchapanetoña pueyoçhreto ñeñt atet otenanet.

Atto Jesúsapa' cohuaterran puesheñarr aporo'yet ñeñt jericó'marnesha' (Mt. 20.29-34; Mr. 10.46-52)

³⁵ All oñenet o'ña çchamochet anetso Jericópa' allña e'ñe toñetoþñopa' all anen puesheñarr aporo'yet ñeñt çhocma enamuets quelle. ³⁶ Ñeñña aporo'yetpa' o' e'mapan shonte' acheñenesha' ñeñt metaçhets all toño, ñañapa' allenta a'þto'tanet:

—¿Eso'mare't shonte' metaçhenña acheñenesha'?

* **18:25** Ñehua, Jesús añ toma'ntatanet camello ñeñt payara penet all pa'nyo, ñeñt e'ñe allpon ñerra'mrrate' huaquësh.

³⁷ Ñetñapa' atet ochet:

—Añca'ye huetsa Jesús ñeñt nazareto'marnesha'.

³⁸ Ñaña'ye huetsa Jesús ñeñt nazareto'marnesha':

—Pemueraye'chnomna Jesúsocha' namña. Papa' ñeñteř Davidna'tareř.

³⁹ Acheñenesha' ñeñt otachetsa ñetñapa' cha muene' che'ptare'tnomet, atet otoset:

—O'hua pemma.

Aporo'yetñapa' elloña alla rranerrerr atet oterranerr Jesús:

—Ñeñteř Davidna'tareř, pemueraye'chnomnañaca'ye.

⁴⁰ Allempoña Jesús alla tomos otosan acheñenesha':

—Sanmon arr nesho.

O' huapapa' Jesúsñapa' atet otař:

⁴¹ —¿Eso'tña penmen ñeñfcha' atet neřoseř?

Ñaña'ye huetsa Jesús ñeñt nazareto'marnesha':

—Añca'ye Ayochreshate nemnen o'ch pecuatnomuen attoch o'ch cohuen nenterrapa.

⁴² Jesúsñapa' alla otererr:

—Pecuerrepa'ch, tarro'mar atto atarr peyemtapna na ñeñfca'yeña o'eñe a'crraterreř.

⁴³ E'ñepa'tcha' allorocma e'ñe cohuen enterra. E'ñe cohuerrtsapa' cha cota'nmue' ñaña Jesús, allenta atarr aye'chočtatnoman Yompor all cota'nenan Jesús. Atto' enteñ allohuen acheñenesha' ñetpa'cho'ña e'ñe cohuen aye'chočtatneññañet Yompor.

19

Atto Jesús epuet ñaña Zaqueo eñorana'tannenet

¹ Allempoña Jesúsapa' chap all anetso Jericó, all oñmos anetso'mar.

² Allña'ye huetsa Jesús ñeñt nazareto'marnesha':
² Allña'ye huetsa Jesús ñeñt nazareto'marnesha':
 pa'mcha'tareřer peñ allohuen ñeñt cobra'yene' acheñenesha' quelle gobiernocop. Ñaña'ye huetsa Jesús ñeñt nazareto'marnesha':
³ Zaqueoñapa' atarr mueneñ o'ch entapan ñeñt otenet Jesús. Ñehua, ñapa' amach errotenoř entapano Jesús tarro'mar shonte' acheñ ñeñt emchorra'nenaya all oñem ñaña Zaqueopa' allponmetolla. ⁴ Ñeñto'marña ñapa' mata allenetcha' oñem, a'tapos tsa-cho ñeñt pa'so'cheñ sicómo'rech allotcha' entapan Jesús tarro'mar allcha' oñem.

⁵ Allempoña chap Jesús e'ñe ñesho, cohuostsa enonetpa' alla entos, ñaña'ye huetsa Jesús ñeñt nazareto'marnesha':

—Zaqueo, pesuerra tecma. Te' napa' e'ñe poctennana o'ch nechap pepaclo.

⁶ Ñaña'ye huetsa Jesús ñeñt nazareto'marnesha':

⁷ Allempoña acheñenesha' atet eñchet, ñetñapa' ama't mameshapa' ama pocteye' es entaye. Ñetpa' atet otanna'tyeset:

—Eso'marcha'ca'yeña be'tososña Jesús allcha' mos añ acheñer pa'paclo ñeñt atarr nanac ochñať.

⁸ Zaqueoñapa' allenta tomhuerrpa' atet otapan Partsesha':

—Te'pa' o'ch pe'mñotosen Ayochreshate. Ñeñt ora allpon nechyen, te'ñapa' o'ch napa'yer pueshmet huocchañneshachno. Po'ñočh allempo es nepratanpesyese't puesheña'tetspa' te'ñapa' pa'tatsoche'tatscha' napuerranet.

⁹ Jesúsñapa' atet otos:

—Te'ñapa' o' çhapanet allohuenacop ñeñt yeçhetsa añ pocollro alloch a'queshp̄ataretterret. Ama't ñapa'çho'ña Abrahamca'ye po'm̄reneñ.
¹⁰ Na Ñeñten Acheñetosets ñeñto'marña nohuapa aña patsro o'ch ne'nyesos acheñenesha' ñeñt chenquëtsa ñeñtcha'ña na'queshp̄atyesos.

Arrpa' all atma'ntatarettena çharrasheña ñeñt aparettsa quelle e'ñe allponeshapa'ttsocma

¹¹ Acheñenesha' o' e'mñotenet shonte' ñeñt atet serrpare'tatanet Jesús ñeñt atet pena Yompor po'cohuenña, ñaña Jesúsapa' o' çhampoch Jerusaléno. Ñeñto'marña ñetñapa' çha otenapuetañ allempocmach etsota allempopa' ñach am̄cha'tarettsa Yomporeshot arr patsro. Ñeñto'marña elloña ñapa' toma'ntatanet po'poñ. ¹² Ñeñtpa' atet otanet:

—Eñall puesheñarr acheñ ñeñt e'ñe cohuen am̄cha'na'tpo' entyen allohuen acheñenesha' ama't e'ñe pamo'tseshohuen. Ñeñña acheñerpa' arr sechena ñachayo po'poñ anetso allotcha' apet llesens attoch esempoch huerrapa' o'ch am̄cha'taretetuerra all pa'nyo. ¹³ Allempo ama sena'pa' agotatnoman çharrasheña pa'taruasañer ñeñtcha' apa'yesnom allponeshapa'tets quelle e'ñe puesheña'ttsocmuet. Allempo apa'yesnomanetpa' atet otyesnomanet: “Añ quellepa' o'ch setaruasach nocop. Esemppoch nehuerrapa' allempochña e'ñe neñotuernas e'ñe puesheña'ttsos errponte' quelle segana'yesa ñeñt nocop.” ¹⁴ Tarraña patantarr acheñenesha' ñeñt pa'nyo'marnesha', ñetñapa' atarr e'moñeteñet. Ñeñto'mar allempo ta ñeñt anetsro, ñetñapa' mueñet allponsheña ñeñtcha' eñososets all sen o'ch oteñeta' allo'marnesha': “Yapa' ama yemno o'ch sene' añ acheñer o'ch am̄cha'taretta yocop.” ¹⁵ Tarraña ama't atet petañ ñocopñapa' çhocmach apet llesens attoch huerra o'ch am̄cha'taretetuerra all pa'nyo pamo'tseshacop. Allempoña çherrpa' agotatuerran pa'taruasañrenesha' ñeñt apa'yesnom quelle ahuaña. Ñapa' añecopña agotatyerranet o'ch eñotuerranet errponte' quelle ganatyesñañet po'çllayor e'ñe puesheña'ttset. ¹⁶ Attoña apçha'huerranet ñeshopa' ñeñt ñanom huapatsapa' atet otos: “Ayochreshate, ñeñt allpon p̄apa'nmuen ahuaña quelle, nañapa' ello neganaternaperr peçllayor çharroch.”

¹⁷ Pamo'mte'ñapa' atet otuer: “E'ñe pocte', p̄apa' atarr cohuen pesherbene. Ama't allponatolla napa'nmaḡ ahuaña, p̄añapa' atarr cohuen pesherbato. Ñeñto'marña te'pa' o'ch nenuerreḡ çharracop anets allcha' pa'm̄cha'taretterra p̄a.” ¹⁸ Allempoñapa' o' huapa ñaña po'psheñeñ pa'taruasañerpa' ñapa'çho'ña atet otos: “Ayochreshate, na ñeñt allpon p̄apa'nmuen ahuaña quelle, nañapa' ello neganaternaperr peçllayor anmaroch.” ¹⁹ Pamo'mte'ñapa' atet otuer: “E'ñe pocte', te'pa' o'ch nenuerreḡ p̄aña amnarecop anets allcha' p̄am̄cha'taretterra p̄aña.” ²⁰ Allempoñapa' huapa po'psheñeñ pa'taruasañer, ñapa'çho'ña atet otos: “Ayochreshate, arrpa' ñeñta allponara ñeñt e'ñe allpona p̄apa'nmuen ahuaña quelle. Napa' alla nañño'tennaḡ e'ñe cohuen nepennaḡ pañello. ²¹ Napa' çha nem̄cha'teneḡ tarro'mar neñoteneḡ p̄apa' amaca'ye matsrre'mñape. Papa' çhocmaca'ye pepratañpesyen ama't ñeñtpa' ama p̄oyaye, ñaña çhocmaca'ye petotatyenña ñeñt ama p̄aye' nare'tatyenaye.” ²² Pamo'mte'ñapa' atet otuer: “Paña po'ñoçhpa'

amaca'ye cohuenaye' pesherbanno ama't e'ñe mamesha. E'ñe atet pōtenen napa' atarro' atsrre'mñaten te'ñapa' po'ñočh atetcha'ca'ye natsrre'močhtana'tuerreřcha'. Ñerra'm po'ñočh peñotenoñ napa' atarr atsrre'mñateneñ, ñerra'm po'ñočh čhocma neprratam̄pesyeneñ ñeñt ama noyaye, ñaña napa' ñerra'm po'ñočh čhocma neťotatyeneñ ñeñt ama naye' nare'tatyenaye, ²³ ñerra'm po'ñočh atet pentenoñpa', eso'maruañaca'yeña ama bancoye' penennanoña nečllayor allochñapa' te'ña o' nehuerrapa' nagapuerreñcha' nečllayor allo atontateñet."²⁴ Allempoña pamo'mte'pa' atet otan ñeñt tomčha'tyets all: "Te'pa' o'ch seprratam̄pesuer quelle, o'ch sapuer ñeñt ganatene' čharroch nečllayor."²⁵ Ñetñapa' atet ochet: "Ayochreshate, ñapa' echenanca'yeña shonte' quelle ñeñt ganena čharroch."²⁶ Pamo'mte'ñapa' atet otterraneterr: "Tarraña ama't atteñpa' te'pa' o'ch notas, ñeñt es echets shonte' e'ñe puesherbateñotet pamo'mte' ñetña ellonetpa' o'ch alla aparetterret po'poñ aton. Tarraña ñeñt ama es echetsopa' ama't allponatolla ñeñt echyenetañ aprratam̄psaretterretcha'. ²⁷ Ñaña te'pa' añña ñeñt ne'moñe'tene' ñeñt ama muenenaye o'ch na'mičha'taretta ñocpuet, te'ña sapa' o'ch sehuapat Janet attoch semtsanatosanet e'ñe arr nesho."

Allempo čhap Jesús Jerusaléño

(Mt. 21.1-11; Mr. 11.1-11; Jn. 12.12-19)

²⁸ Allempoñapa' ahuerret Jesús Jerusaléñoneñ. ²⁹ Chapmochet aspeno ñeñt pa'so'cheñ Olivopen allo'tsen anets ñeñt Betfagé ñaña Betania. O' čhapmochet all Jesúsñapa' ³⁰ atet otosan epsheña pueyochresha':

—Sapa' o'ch sota o'ch sečhap a'yente'ye' e'ñe allara anetso. O'ch sečhap allpa' allcha' sentos ashen rre'ptor all huanquēñet; ñeñt'pa' ama't puešheñarra achen ama monteña'. Ñeñtña ashenpa' o'ch sepyam̄psospa' o'ch sanerrnan arr. ³¹ Ñerra'm esesha'ch sotapue': "¿Eso'mare't sepyam̄peñña ashen?" sañapa' atetcha' sotosanet: "Yepartsesharca'ye muenene'ña añ ashen."

³² Allempoña ñeñt mueñapa' ñetñapa' ahuanmuet all anetso. Allñapa' atetcho' entoset e'ñe atet otanet Jesús, allo'tsenca'ye ashen rre'ptor all huanquēñet. ³³ Allempo pueyam̄psosetpa' pamo'mte'ñapa' atet otapanet:

—¿Eso'mare'tcha'ña sepyam̄psosayña yashanor?

³⁴ Ñetñapa' atet otosñañetña ashen pamo'mte':

—Yepartsesharca'ye muenene'ña añ ashen.

³⁵ Allempoñapa' anerretña ashen Jesúsesho. Nohuerret pa'shtam ashnache'ñopa' montatueret Jesús. ³⁶ Allempo monta'nma Jesús allenet sen, achenesha'ñapa' totma'tyesoñet pa'shtam toño allcha' oñem. ³⁷ Atteñapa' o' čhapmochet Jerusaléño. Allempo a'nososet Olivopñot shonte' achenesha' ñeñt ame'ñenaya Jesús'pa' ñetñapa' allotēñ e'ñe cosharretoset. E'ñe pocsheñesha' ahuanenet, pano'tatse'teñesha' aye'chočhtatneññañet Yompor, tarro'mar atarr cohuen entnenet atto Jesús'pa' atarr orrtatenanet Pompor po'partsoña. ³⁸ Ñetñapa' atet otyesenet:

—¡Aye'chočhtaterrapo'ch Amičha'taret Jesús ñeñt llesensen Yompor! ¡Cosherrtetepa'ch ama't ñeñt pue'ntaño'tsen! ¡Aye'chočhtaterrapo'ch ñaña Yompor Parets ñeñt pue'ntaño'tsen!

39 Fariseonesha'ña puesheña'tets ñeñt allo'tsa'yen ñeñt ama ame'ñenaye Jesús, ñetña'pa' atet otapet Jesús:

—Maestro, peche'ptare'taye'chyesnomñaca'yeña peyochresha'chno attoch amach allo'na atta a'hotatsetnenpeto.

40 Tarraña Jesúsña'pa' atet otosanet:

—Napa' o'ch notas, ama'tcha' atet notatstanetaña' muema'rrtetaña'cha', mapye'chnoña'pa' puerranare'teño'tetpa' nachotenayach.

41 Allempo o' e'ñe 'chapmochet atto entosan anets Jerusalén, Jesúsña'pa' atarr ya'na'tosan jerusaléño'marnesha'. 42 Allpa' atet eñorosa ñocpuet:

—Atarr nemneñeñ ama't e'ñe tayecma po'ño'ch sapa'cho'ña o'te' señotereñ erro'tencha' seperra attoch Yomporpa' o'ch a'queshpaterrosoñ e'ñech socsheñesha' socrrerrañ. Tarraña saña teme'ttsen ñeñtña'pa' ama't mameshapa' ama 'chennaso seyo'chro. 43 Tarro'mar napa' o'ch notas, po'ño'ch o'ch 'chap allempoch ñeñt se'moñe'tene'pa' con'cha'tam'perrnasetcha' sa'netser attoch e'ñe rro'chtam'perrset allen'ateñ sa'epotpa' hua'cha'tonasetcha', attoch amach errene't seyeterro ama't e'ñe puesheñarro'tesa. 44 A'mata'tuerrnasetcha' ora allohuen sa'netser attoch sepacle'nachña e'ñe sa'tpetse'tuerre' allohuenes ama't sacñe'taretolleshohuen. Allo sorraten sepaquëll ama't patra mapue'pa' amach a'puerro, tarro'mar sapa' ama semno o'ch saguerrñañ Yompor puenueña allempo mueneñeñ o'ch yenpuerrsoñ saña.

*Atto Jesús'pa' a'cohuentatosan Parets pa'paquëll
(Mt. 21.12-17; Mr. 11.15-19; Jn. 2.13-22)*

45 Allempo 'chap Jerusaléño Jesúsña'pa' ahuos Parets pa'paclo. Be'tosospa' allotña'pa' 'cha'nma'cha'tatuosan ñeñt pomatsre'tyetsa all.

46 Allña'pa' atet otosan ñeñt pomatsre'tyetsa:

—Yompor po'ñoñ ñeñt atet anuaret ahuatoteñ, allña'pa' atet oten Yompor: “Añ ñeñt nepaquëll nepenpa' añe'cpaca'yeña sherben allecmach ma'yochennet”; tarraña saña'pa' atet sepeññañañña Yompor pa'paquëll atet ñerra'mrrate' eñe't ñeñt e'potyetsa mapuetpono'mar.

47 Pate'tets yet Jesús'pa' 'chocmach sene't Parets pa'paclo all ye'chatenanete't Yompor po'ñoñ. Aña ñeñt pa'm'cha'tare'ternesha' pen allohuen judionesha' po'cornaneshar ñaña añ ñeñt atarr etsotayenayeñ ñoñets ñeñt atet anaret ñaña po'potantañ ñeñt am'cha'taretetyetsa all anetso, ñetña'pa' Jesús'a atarr o'patyenet attoch muetsatachet.

48 Tarraña ñetpa' ama erro't peto tarro'mar allohuen acheñenesha'pa' atarr yemteññañet Jesús atto atarr cohuen serrpare'tatenanet Yompor po'ñoñ. Ñetpa' ñeñtña atarr cohuen entyenet.

20

*Atto allsensare'ttena Jesús
(Mt. 21.23-27; Mr. 11.27-33)*

1 Po'pocheño pam'tarr Jesúsña'pa' alla ye'chaterranerr acheñenesha' Parets pa'paclo. Allpa' añ serrpare'tatenanet cohuen ñoñets alloch yequeshperra. Atteña'pa' hua'cha'toña shonte' am'cha'taretnesha'—ñeñt pa'm'cha'tare'ternesha' pen allohuen judionesha' po'cornaneshar ñaña allponsheña ñeñt atarr etsotayenayeñ ñoñets ñeñt atet anaret ñaña

po'potantañ ñeñt pompornesha' p̄a'yen allohuen judionesha'. ² Ñetñapa' atet otoset Jesús:

—Ñehua, yapa' añecop yehuena yemneñ o'ch potey ¿errote't apuen-petña llesens? ¿Esesha'tña p̄apuene'ña llesens attot p̄orrattyenña ñeñt chocma attecma pepa'yena?

³ Jesúsñapa' atet otapanet:

—Ñehua, napa'cho'ña nemneñ o'ch na'p̄to'tapas saña ama't patrra ñoñets. Sapa'cho'ña o'ch sotosen, ⁴ ahuañmo'cha allempo apate't Juanañ Yomporecop ñeñtpa' ¿eseshatña llesense' ñato' Yompor amapa' acheñate' apue'ña llesens? Nemnen o'ch sotosen ñeñt atet soctape'chen sa.

⁵ Ñetñapa' e'ñe a'nahua otanna'tyeset:

—Ta'm errotcha'ca'ye yochte'. Ñerra'm cha yoch Yomporeshotca'ye apetña llesens, ñañapa' chate'ca'ye otey: “Ñehua, sañapa' eso'mare'tña ama se'mñocheña ahuaña allempo serrpare'tatosan acheñenesha'.” ⁶ Elloña ñerra'm cha yoch acheñesho'a apet llesenspa' acheñenesha'ñapa' chate' e'moñe'tyete. Pue'moñe'teñotetaypa' chate' rrollapechyet tarro'mar ñetpa' e'ñe cohuen eñchete't Juanañ, chocma otyenet ñapa' ñeñtca'yeña a'mtose' Yompor po'ñoñ.

⁷ Ñeño'marña ñetpa' atet ochet Jesús:

—Ta'm yapa' amaca'yeña yeñoteñe; errotte' huapaña Juan, errotte' apetña ñaña llesens.

⁸ Allempoña Jesúsapa' atet otarraneterr:

—Napa'cho'ña te'pa' amach notaso saña allot aparetenña naña llesens attot atet nepa'yena.

*Atet atma'ntatarettena ñeñt ataruasañechno ñeñt ama cohuenayaye
(Mt. 21.33-44; Mr. 12.1-11)*

⁹ Allempoña Jesúsapa' alla serrpare'taterranerr acheñenesha' toma'nteñtso, Ñeñtpa' atet otanet:

—Eñall puesheñarr acheñ ñeñtña nare'tanatatnomue' shonte' uvach, pa'muerñapa' e'ñe ora uvachmatatue. E'ñe allponmatatsapa' o' na'nman po'potantañ ñeñtcha' taruasatats uvachmo ñeñtcha' coyerrahuet allpon ñerra'm esempoch toteñet. Allempoña ñapa' ahuo' bachayo po'poñ anetso alla atomat. ¹⁰ Chap allempo yen uvachllon̄tpa' ñañapa' mueñerran po'psheñeñ pa'taruasañer o'ch enamuerra' uvachllon̄ po'psheñeñ pa'taruasañesho ñeñt cohuan̄pene' uvachma'. Allempoña chen allpa' enamhuenan ñeñt allpon o'patena pamo'mtayet arepa'tcha'ña es apapuenayeña uvachllon̄, elloña ñeñtapa' cha nalle'tapueñet, o' alla mueño'teret e'ñe atta. ¹¹ Allempoña ñeñt pamo'mte' pen uvachma'pa' o' alla mueñerranerr po'psheñeñ pa'taruasañer. Allempo chenerr allpa' ñapa'cho'ña cha es otnare'tapetpa' o'cho' nalle'tapet o' matateret e'ñe atta. ¹² Allempo poma'pocheño o' alla mueñerranerr po'psheñeñ pa'taruasañer. Ñeñtpa'cho'ña allempo chenerr ñaña allpa' ñañapa' cha atarr atserp̄atse'tapetpa' o'cho' alla matateret.

¹³ 'Allempoña ñeñt pamo'mte' penetpa' atet ot: “Te'pa' errotuachñaca'yeña nepe'te'. Te'pa' o'ch nemñe ñeñt e'ñe na nechemer ñeñt atarr nemorrentena. Ñato'rraña ñeñtpa' mecha'na'tapetcha'.” ¹⁴ Arepa'tcha'ña ama't mameshapa' mecha'na'tapeto. Allempo entapoñet puechemerpa' atet otanna'tyeset: “Añmapa' ñeñtca'yeña

puechemer ñeñtcha' o'paterraya pompor puenaremñ esempo. Ñapa'cho'ña te'pa' o'chca'ye yemtsaḡ allochñapa' yachca'yeña e'ñe o'paterrayaña pompor puenaremñ." ¹⁵ Allempoñapa' o' rromapet o' chetare'tnomet narmetsmo a'yoḡ, allña muetsapoñetña ña'ña puechemer. Arrpa' allohua atet toma'ntata Jesús e'ñe ña'ñeña.

Jesúsñapa' atet oterranerr acheñenesha':

—Ñehua, te'pa' o'ch notas, ñeñt pamo'mte' pen ataruasañechnopa' atetcha' ḡohuerranet. ¹⁶ Ñerra'm esempoch huerranet, pamo'mtayetpa' a'cllatuerranetcha', narmetsma'ña o'ch apuerran po'potantañ.

Acheñenesha'ñapa' allempo e'mueñet Jesús atet oten, ñetñapa' atet ochet:

—¡Ñeñt'pa' arepa'chña atteye' patsterro, Neyompor-re!

¹⁷ Jesúsña atta cohuanetpa' atet otanet:

—Ñerra'm ama atet pueperra'chepa' eso'mare'tña otenña Yompor po'ñoñ ñeñt anuaret ahuatoteñ, ñeñt'pa' e'ñechca'ye po'ñoñ atet perra. Tarro'mar ñeñt'pa' atet oten nocop, all atma'ntatareten mapue'. Ñeñt'pa' e'ñe atet anuaret Yompor po'ñoñ ahuatoteñ:

Añ mapue' ñeñt ama pocteye' entyeno ñeñt tomatyene' pocoll, ñeñtña te'pa' o' anaretterra ñeñtcha' ello atarr cohuen sherberrets e'ñe atet ñerra'm quellpach allo e'ñe cohuen echarr orratenet pocoll.

¹⁸ Elloñapa' atet otanet:

—Allohuen ñeñt epoto'tetsa añ mapyopa' atarrcha' atserppenamet, ña'ña añ mapue'pa' ñerra'm eseshesho mata'nompa' e'ñech a'tpetse'tuosanet.

*Atto a'ḡto'chet Jesús, pocte'te' o'ch tsa'tet impuesto
(Mt. 21.45-46; 22.15-22; Mr. 12.12-17)*

¹⁹ Añña ñeñt atarr etsotayenayeñ ñoñets ñeñt atet anaret ña'ña ñeñt pa'mcha'tareternesha' pen allohuen judionesha' po'cornaneshar, ñetña allempopa' o' eñochet ñetca'ye atma'ntatarettenet, ñeñt'pa' ñocpuetca'ye atet eñoreñaña Jesús. Allempoña ñetpa' atarr mueneñetañ o'ch rremuet Jesús e'ñe allorocma tarraña ama eseshaye' rromaye tarro'mar ñetpa' mecha'teñet acheñenesha'. Ñehua, acheñenesha' e'ñeca'ye cohuen enteñet Jesús. ²⁰ Tarraña ñetpa' añña atarr e'nenet attoch ama't parrochapa' o'ch eñorachet ñeñt ama pocteyaye ama't ña'ña gobiernocop, allochñapa' attoch rremuet o'ch pomueñeta' añcha'taretesho ñeñt nen gobierno' Romoḡ ñeñt añcha'tarettetsa allo'marecop. Atteña ñetñapa' e'ñe a'nahua mueñet allponsheña acheñ Jesúsesho ñeñt ottetsañ ñerra'mrrate' atarr cohuen acheñ, tarraña ñetpa' añecpa amñarettet attoch e'ñe pueshquëñoḡ po'ñoñotetpa' o'ch eñorachet ñeñt ama cohuenayaye. ²¹ Allempoña ḡhapuet ñeshopa' atet otoset:

—Maestrocha' yapa' yeñoteneḡ ñeñt atet peñen ña'ña atto peychatyen Yompor poctaḡña ñeñt'pa' e'ñe cohuenacma. Papa' allohuen acheñ e'ñe cohuen pentueñ; ama añña ñapueḡ pemorrenteno ñeñt atarr añcha'na'tpo' entyeno allohuen acheñenesha'. ²² Ñeñto'marña te'pa' yenneñ o'ch peñotatapuey erra'tsente'ña e'ñe po'ñoñch cohuentetsa. ¿Pocte'te' o'ch yetsa'ta impuestos añecop ñeñt añcha'tarettetsa Romo, ñeñt ama judioneshayaye? Ñato' amate' pocteyaye yocop ñeñtey

judioneshay o'ch yetsa'ta am'cha'taret romo'marnesha' ñeñt' ama judioneshayaye.

²³ Jesúsñapa' eñotanet ñeñt' atet shecare'teñetañ, ñaña'pa' atet otanet:

²⁴ —Ñehua, segaten puetallarr quelle.

Gatuetpa' atet otanet:

—Ñehua, sapa' o'ch soten, ¿eseshat' sentenña ñeñt' atma'ntatarettetsa all? ¿Eseshat' pa'so'cheñ ñeñt' aquellcarettetsaña all?

Ñetñapa' atet ochet:

—Am'cha'taretca'ye atma'ntatarettetsaña all ñaña ñoca'yeña pa'so'cheñ ñeñt' aquellcarettetsa all.

²⁵ Jesúsñapa' alla oterraneterr:

—Ñeñtepnapa' añ poctetsa o'ch yaḡ am'cha'taret ñeñt' ño ñeñt' atet poctetsa gobiernocop; tarraña ellonet ñeñt' Yomporo o'ch yaḡ ñaña ñeñt' atet poctetsa ñocop.

²⁶ Attoña ama't puehquëño'tet atet otyenetpa' ama erroteno't eñoracheto ñeñt' ama pocteyaye ama't ñaña gobiernocop tarro'mar allohuen acheñenesha' ñeñt' allo'tsa'yen e'ñe cohuen enteñet atet anapuenanet Jesús. Ñeñt'ña ashcañnesha'pa' atta cohuanrrorteñet tarro'mar atarr cohuen anapuenanet Jesús. Ñeñto'marña ñetpa' ama errotenaye' otenaye' entereterro.

Atto a'ḡto'chet Jesús, ñerra'm po'ñochte' atanterrapo' rromot, ta'm, allempopa' errotencha'ña yeperra

(Mt. 22.23-33; Mr. 12.18-27)

²⁷ Allempoñapa' huacha'toña ñaña patantarr ñeñt' saduceoneshatets. Ñehua, ñeñt' saduceoneshatets ñetñapa' ellonet echenet poctapña ñeñto'mar atet otenet amate' erroteno't yetanterroña rromot ama't errponaña.

²⁸ Ñetñapa' atet otoset Jesús:

—Maestrocha' ahuat Moisés'pa' atet quellconay ñoñets ñeñt' poctetsa ñeñt'cha' atet yepa. Ñeñt'pa' atet otenña Moisés po'ñoñ: Ñerra'm esempo rroma yacma o'ch sa'nman puetapor tarraña ama chemere'tnomopa' añ poctetsa pa'mo'nasheñcha' alla yorerre'ña po'norrar allochñapa' attoch eñalleterraña ñeñt'cha' puechemer perr pa'mo'nasheñeñ. Ñeñt'pa' atetca'ye quellca'nmonayña Moisés ahuat. ²⁹ Ñehua, te'pa' eñall can'herrsheña ñeñt' e'ñe poctacma pa'mo'nasheñecmuet. Ñeñt' puesheñarr popo'naretpa' o' yoran coyanesha' ñeñt' puetapor pa'. E'ñe allponmatatsapa' o' rromaña, yacma ama chemere'tnomo. ³⁰ Allempoña ñeñt' po'rrocho'merpa' o' yorerran pa'mo'nasheñeñ puetapor. E'ñe allponmatatsapa' ñapa'cho'ña o' rromuerrerr ñaña, ñeñt'pa'cho'ña ama chemere'tnomo. ³¹ Allempoña po'psheñeñ pa'mo'nasheñpa' o' alla yorerranerr ñaña po'norrar. E'ñe allponmaterrtsapa' ñapa'cho'ña o' rromuerrerr ñaña, ñeñt'pa'cho'ña ama chemere'tnerrero o' atta rromuerrerr. E'ñe attecma pohuet can'herrsheño'maretpa' e'ñe pueyoruarochet ñeñt'ara puesheñarr coyanesha'. E'ñe allohuenetpa' e'ñe attecma pet colla'huet ama't puesheñarrofetapa' ama chemere'tnomueto. ³² Allempoña o' rromaña ñaña coyanesha'. ³³ Te'ña ñerra'm po'ñochte' yetantena yerromño'tpa'

añña coyanesha' allempopa' ¿eseshat'cha'ña puetapor perre' tarro'mar allohuenet cancherrsheño'maretpa' e'ñe pueyuarochet?

³⁴ Allempoña Jesús otanet:

—Ñehua, atet ye'chen acheñenesha' arr patsro, chocmach sena'tenet, coyanesha'pa'cho'ña apueñet ñeñt'cha' puerrollar pa'. ³⁵ Tarraña esempohuañen allempoch tanterret po'pocheño allohuen ñeñt'cha' e'ñe pocte' entuerr Yompor allochñapa' attoch o'ch alla correrret po'pocheño, ñetña allempopa' ama't puesheñarrofeta amach sena'terreto, ama't coyanesha'pa'cho' amach eseshaye' apuerraye ñeñt'cha' yorerrahuuet. ³⁶ Tarro'mar allempopa' amach arromña'terreto ama't ahuata attoch e'ñech atet perret ñerra'm mellaño'teñnanesha'. Yomporñapa' o'ch e'ñe puechemer perranet e'ñe poctacma tarro'mar allempopa' o' tanterret rromotpa' o'huañcha' arromña'terret ama't errponaña. ³⁷ Elloña ama't Moisés atet eñotatane't acheñenesha' po'ño'ch ñeñt' colla'huatsa allempo, ñetñapa' corretseta. Ñehua, all aquellcare't tsachmo'r ñeñt' e'ñe ñoña huortets. Alotñaca'yeña Yomporpa' eñorana'tanaña Moisés; ñeñt'pa' atetca' otña Yompor allempo: “Napa' ñeñten Po'yomporer pen Abraham ñaña Isaac, ñaña Jacob.”

³⁸ Jesúsñapa' alla oterraneterr:

—Ñehua, yapa' yeñoteñ Yomporpa' ama aye'e' Po'yomporer penaye ñeñt' rromuets e'ñe poctacma ñapa' aña'yeña Po'yomporer pene' acheñ ñeñt' corretsach. Yomporñapa' e'ñe entenanet allohuenetpa' e'ñe corretseta.

³⁹ Añña puesheña'tets ñeñt' atarr etsotene' ñoñets ñeñt' atet anaret, ñetñapa' atet ochet:

—E'ñe Maestrocha' e'ñe po'ño'ch atet p'oten.

⁴⁰ Ñeñño'mar allempoteñpa' ama't puesheñarrofeta'pa' ama eseshaye' a'p'to'tenaye' enterraye.

Atto Cristo ñeñt' Po'partseshar pe't David, elloñapa' o' alla po'm'reneñ per (Mt. 22.41-46; Mr. 12.35-37)

⁴¹ Allempoña Jesús'pa' atet otan ñeñt' atarr etsotayenayeñ ñoñets ñeñt' atet anaret:

—Eso'mare'tña otyenet ñeñt'cha' Cristotosets ñapa' aña po'm'reneñ pene' David tarro'mar ñeñt'cha' Cristoterrets ama aña po'm'reneñ peñe David tarro'mar ñapa' Po'partseshare'naña pe't David. ⁴² Tarro'mar ama't Davidpa' allempo quellquë't all libro Salmo allempopa' atetca'ye eñose'tña añecop ñeñt'cha' Cristoterrets:

Yompor Paretspa' atet otennan ñeñt' Nepartseshar nepen na (ñeñt'ara ñeñt'cha' Cristoterrets): “Te'pa' o'ch panorruerr arr necohuenro't allcha' pecohuentapreterra.

⁴³ Attochña ama't ñeñt' pe'moñe'tene' napa' o'ch name'ñatuerranet allochñapa' o'ch atet perret ñeñt' pemnen pa.”

⁴⁴ Ñeñt'pa' atetca'ye ote'tña David ñeñt'cha' Cristoterretspa' ñeñt'ca'yeña Po'partseshar pe'tña ama't allempoteñ. Ñehua, ama't señoteñeña Cristo ñeñt' Po'partseshar pe't David ñeñt'ña te'pa' o' alla po'm'reneñ per ñaña.

Atto Jesús'pa' a'metare'tenan ñeñt' etsotayenayeñ ñoñets ñeñt' atet anaret, ñeñt' atet ye'chenet ñetpa' ñeñt'pa' ama cohuenaye' entapretenaneto Yompor (Mt. 23.1-36; Mr. 12.38-40; Lc. 11.37-54)

⁴⁵ Elloña shonte' acheñenesha' ñeñt e'mño'tene' allempo atet otenan Jesús pueyochresha':

⁴⁶—Amach semeñe'tapretatsche ommoñañenesha' poctaḡña ñeñtareta ñeñfet atarr etsotayenayeñ ñoñets ñeñt atet anaret. Tarro'mar ñetpa' aña'ñaña atarr cohuen entenet o'ch chorrenet atarrom shetamuets o'ch atta yorma'tatse'tenet pa'shtam. Ñaña pommo'cheñoñetpa' atarrcha' mueneñet o'ch e'ñe pueñcha'na'teñoñ e'ñech cohuen huomñcha'tenanet acheñenesha' all chopeñe'chyenet. Ñaña ñetpa' aña'nach atarr muenenet o'ch anorrcha'tyenet judionesha' po'prahuo allecma anorryen ñeñt atarr amñcha'na'tpo' entyen allohuen acheñenesha' ñaña e'ñe attecma penet ñaña all rrallme'chapretenet. ⁴⁷ Tarraña ñetñapa' rretorrñanesha'ñaña puerratañpesyenetña pa'paquëll. Elloña e'ñe pommo'cheñoñetpa' aña atarr muenenet o'ch atet penet ñerra'mrrate' ñetpa' atarro' cohuen acheñret ñeñto'marña arrcha' ma'yochenet all shontena acheñenesha', amach tematenayaya ma'yocheneto. Ñeñto'marña te' napa' o'ch notas, ñeñt atet petsa pommo'cheñoñpa' elloña atarrcha' a'coñcha'taretterret.

21

Atto rretorrñanesha' ñeñt atarr huocchañetets ñapa'cho'ña nosan quelle ñeñt Yomporecop
(Mr. 12.41-44)

¹ Allempo allo'tsen Jesús Parets pa'pacillo, ñaña'apa' arrenet cohuen allecma nenet quelle Partsocop. Allña'apa' entenan eçllayoreñenesha' ñeñt na'yene' shonte' po'çllayor Partsocop. ² Jesúsña allpa' atta cohuenanet, huapa ñaña puesheñarr rretorrñanesha' ñeñt atarr huocchañetets. Ñapa'cho'ña nosan eptallatoll quellayetoll ñeñt cobretall. ³ Jesúsña'apa' atet ot:

—Te'pa' o'ch notas, añ rretorrñanesha' ama't atarr huocchañ ñapa' po'ñoçha'ye atarr aton nosan quelle, ello metana'tuosan allohuen po'potantañeçhno allpon quelle ñeñt na'yenet ñet. ⁴ Tarro'mar allohuenet ñeñt na'yenet quelle, añaca'ye na'yenet ñeñt a'pchatyenet, ñaña'apa' ama't atarr huocchañpa' e'ñe pomhuahuospan allohuen ñeñt eçhychen ñeñt muenatenaneñ allo'ch yoran attoch correna arr patsro.

Atto Jesús'apa' eñotatanet e'ñech a'mata'taretetuerra Partsopo'
(Mt. 24.1-2; Mr. 13.1-2)

⁵ Allempoña puesheña'ttets ñetñapa' aña atarr serrpare'tyenet atto Parets pa'paquëllpa' atarr a'cohuentateñ. Mapyet ñeñt allo orratenet Partsopo' ñeñtpa' atarr coçhñeshare' aḡa'yese'et. Shonte' coçhñeshare' ñaña allo'tsa'yen ñeñt pomyen acheñenesha' all Partsocop. Jesúsña'apa' atet otanet:

⁶—Ora ñeñt allpon e'ñe coçhñeshare' sentyen te' çherrcha' allempoch e'ñe a'mata'taretetuerra. Ama't pueñarra mapyetpa' amach a'puerroña all allo orratenet Partsopo'.

Atto Jesús'apa' eñotatanet shonte'ch entyerret pa'namen ñeñtcha' eñotaterahuet o' çherrmoch allempoch mellapoterra
(Mt. 24.3-28; Mr. 13.3-23)

⁷ Pueyochresha'ña'apa' a'ḡto'chet:

—Maestro, ñeñtpa' ¿esempo'tcha'ña atet perra? Ñaña allempopa' ¿eso'tcha'ña yentyerr ñeñtcha' yeñotaterre' po'ñoçhpa' o'ch çherrmoch allempoch e'ñe etsotuerra ñeñt atet poteney te'?

⁸ Jesúsña'pa' otanet:

—E'ñech señoterra, allochña'pa' amach esesha' seshquërraye. Tarro'mar shonte'ch orrterrsa ñeñtcha' aycha'nataterre' neso'cheñ, ñeñtcha' otyerrets: “Napa' ñeñenca'yeña Cristotets; te'pa' o'ca'ye çherr allempoch norrtierra na ñeñfen Cristotets.” Tarraña saña'pa' ñato'tña se'mñotenaneta'.
⁹ Ñaña allempopa' o'ch se'mare'tyerr o' quellareñtsotyerr allemeñ aneto'mar ñaña o'ch se'mare'tyerr o' orrtierra ñaña atparñats errañaren, saña allempopa' amach cha seyorenatsto ama't e'ñe mamesha. Ñeñtpa' atetcha'ca'ye e'ñe po'ñoçh perra. Tarraña allempopa' amach çhena' allempoch e'ñe mellapoterra.

¹⁰ Jesúsña'pa' alla oterraneterr:

—Pa'namen acheñ ñeñt e'ñe po'poñe'ttsoçma mereñtsoret ñetpa' quellaranna'terretcha'. Ñaña pa'namen anetsot ancha'tareteçhnopa' quellaraterrancha' pueyochreneshaçhno. ¹¹ Pella'yerrach pats huomenc ora errañaren, ñaña orrterrach allemeñ muecheñets o'ch e'ñe çaporñatsotyerr errañaren. Orrterrach ñaña pa'namen atsnañtsoçhno ñeñt atarr apatanna'tpo'. Allempopa' atarrcha' ancha'noçhterra entot. Orrterrach ento ñeñt ama't ahuatapa' ama puentareto ñeñtcha'ña eñotaterrahuet o' e'ñe çherrmoch allempoch mellapoterra.

¹² Ñehua, allempoch ama orrtena' atetpa' saña allempopa' rremanaterrsetcha' attoch mueroçhtaterrset, sanmare'tterrach judionesha' po'prahuo allcha'ña e'ñe otteñe'cherrset, attochña abe'terrset cárcelo allcha' coñchaterrset. E'ñe same'ñeñoten na sapa' sanmare'tterrach ancha'taretneshesho'mar ñaña allo'tsa'yen ñeñt nanac ancha'taretnesha'. ¹³ Tarraña allempopa' atarrcha' cohuen attoch sa'metosnanña neñoñ. ¹⁴ Ñeñto'marña allempo sanmare'tetyesa allcha' otteñe'cherrset ama't mameshapa' amach selca'psatsto, amach sota'psa'tatsto, errotuachca'ye notoste' ancha'taretesho allempoch a'p'to'tare'tapuen. ¹⁵ Tarro'mar allempopa' nachca'yeña se'ñoratos'e'ña all attoch e'ñe cohuen seño'tyesña atetcha' sanapyesosanet. Allochña'pa' ñeñt se'moñe'tene'pa' amach erro'tenaye' otenaye' entenseto. Ñaña amach erro'teno't otaseto ñeñt atet soten sapa' ñeñtpa' amaca' po'ñoçhaye' atet soteno. ¹⁶ Elloña allempoch atet perrsetpa' ñeñt e'ñe sompor sepen ñaña sachor ñato' ñeñtacha'ye sepomuerr'e' tarro'mar ñapa' amaca'ye ame'ñenno, amapa' ñato' semo'nasheñ, amapa' ñato' po'potantañ samo'tsesha', amapa' ñato' ñeñt e'ñe parro seyemtena ñeñtacha'ye sepomuerr'e' tarro'mar ñetpa' ama parrocmaye' attecma soçtape'cheno. Ñaña patanta'ttospa' muetsatyerrsetcha'. ¹⁷ Shonte'ch acheñenesha' ñeñtcha' se'moñe'terre' tarro'mar sapa' naca'ye e'ñe same'ñena. ¹⁸ Napa' atarrcha' necuanñpenes attoch amach erro'teno't sechenquërro ama't e'ñe ahuata. Attoña ama't e'ñe pueñarra sechpa' ñeñtpa'çho'ña amach na'chencaterrnaso. ¹⁹ Tarraña ama'tcha' atarr mueroçhtaterrset çhocmachña e'ñe seyemteñoten napa' e'ñech sa'huanta'huomña allohuen mueroçhteñets. Attochña sapa' corretsasach e'ñe po'ñoçh.

²⁰ Ñerra'm esempoch senterr añ anets'er Jerusalé'ña'pa' o'ch e'ñe rroçhtañpera solltarnesha' allempoña sapa' señoche'pa'ch o' çherrmoch

attoch e'ñe a'mata'tarefetueterra ñeñt anetser Jerusaléñ. ²¹ Allempoña ñeñt allpon Judeo'tsa'yenpa' ñetñapa' allorocmuepa'ch yetrra'tuerret ahuanerretepa'ña aspentareronet. Ñaña ñeñt allpon anetso'tsa'yen Jerusaléño, ñetpa'cho'ña ahuanemyesetepa'ch ñamet allot. Ñaña ñeñt allpon allampaño'tsa'yen all arepa'chña tatsterretoña all Jerusaléño. ²² Tarro'mar allempopa' Yomporcha'ña tsa'taterrayaña allohuen israelena'tarnesha', tarro'mar allempopa' o'ch e'ñe etsoterra ora allpon ñeñt atet anuarettatset' atetcha' perra allempo. ²³ Allempopa' atarrcha' llequëñets añecop ñeñt achomenare' coyanesha' ñaña ñeñt allohuen emaretetolleshachno. (Tarro'mar ñocpuetpa' atarr torrapo' attoch yetrra'tet ñamet.) Tarro'mar allempopa' o'ch orrterra ñeñtcha' atarr muerochtaterrahuet arr patsro. Atarrcha' a'coñchataretterra allohuen acheñenesha' allempo. ²⁴ Ñaña allempo shonte' acheñpa' e'ñech muetsanatuerranet ñeñtcha' quellarerrahuet. Po'potantañña' rremanatuerranetcha' ñeñt quellarenahuet o'ch anmaretterret po'poñ anetso bachayo all yecha'yena pa'namen acheñ. Acheñenesha' ñeñt ama judioneshayayepa' ñeñtcha'ña e'ñe a'mtsoññietuerre'ña jerusaléño'marnesha', attoch e'ñe atmama'tueretña ñeñt anetser Jerusaléñ. Atetcha'ca'ye perra ñeñt allponmat onañharef ñeñt ama judioneshayaye o'ch añcha'nochterret all Jerusaléño.

Atetcha' perra allempoch huerra Cristo Ñeñt Acheñetosets
(Mt. 24.29-35, 42-44; Mr. 13.24-37)

²⁵ 'Allempopa' orrterrach ento ñeñt ama't ahuatapa' ama sentare ñeñtcha'ña señotaterre', ñeñtpa' e'ñech atsnesho, orrterra ñaña arrorresho ñaña rantochnesho. Ñaña arr patsro ora allpon pa'namen acheñenesha' pueyorñoetpa' atarrcha' nanac lleca'rterret. Añcha' atarr yore'tame'terrahuet atto ñeñt añecmuen sa'ppa' o'ch emo'yarterra, atarrcha' huomenc ma'moreterr allempo. ²⁶ Acheñenesha' e'ñe ponchañoetpa' chach muene' otanatyerret tarro'mar allempopa' o'ch eñoterret atarrcha' muerochterret allohuenet arr patsro. Ñaña ñeñt huomenc orra'yetsa ento te', allempoña ama't ñeñtpa' pella'yerrach. ²⁷ Allempoñapa' entapuerrnetcha' na Ñeñten Acheñetosets o'ch nesuanmperra oso e'ñe nepartsoteñohuen e'ñe necohuentefesha'. ²⁸ Ñerra'm esempoch senterr o' motetnerra orreyestsas ñeñt allpon o' notuas, allempoña sapa' e'ñech socsheñesha' secuanrrorterr enonet tarro'mar allempo o'ch cherrmoch allempoch sa'queshpataretterra e'ñe poctacma.

²⁹ Allempoña Jesúsapa' alla serrpare'taterraneterr toma'nteñtso, ñeñtpa' atet otterraneterr:

—Señotenté' atet pena tsach, higoch. ³⁰ O'ch senteñ allempo tapna'tyen pasopanerpa' sañapa' ñeññaña señotatene'ña o' chenmoch allempoch huorateterrerr. ³¹ Attecmach perra ñerra'm esempoch sentyerr ñaña allpon ñeñt o' notuas sapa' ñeñtcha'ña señotaterre' po'ñoch o'ca'ye cherrmoch allempoch e'ñe etsoterra allempoch añcha'taretterra Yompor.

³² 'Napa' po'ñoch o'ch notas, acheñenesha' ñeñt corretsa te' ñetpa' amach e'ñe rromhueneta'pa' allempocmach e'ñech etsoterra allohuen añechno. ³³ Esemppopa' añ enet ñeñt sentenpa' e'ñech chenca'huerra; patspa'cho'ña attecmach perra e'ñech chenca'huerra. Tarraña ñaña neñoñpa' amach chenquerro ama't e'ñe errponaña.

³⁴ 'Tarraña te'pa' o'ch notas, sapa' chocmachña e'ñe seño tnoma attoch sapa' amach ña soctape'chatsto ñeñt sosya'tsañechno, posa'tare'teñets, ñaña atto e'ñe cohuen socrena añ patsro. Tarro'mar ñerra'm ñeña e'ñe soctape'chenpa' machayotach huaponasa añ yeter ³⁵ atet ñerra'mrrate' tamell e'ñech machayota rreman ñeñfecop amencaret. Ñeñte yetarocmach cherrana ora allohuen ñeñt ye'cha'yetsa añe patsro erraparen. ³⁶ Añcha'ña sapa' chocmachña seño se'rena ñaña añcha'ña senamuen Yompör attoch sa'huanta'huanom allohuen ñeñt'cha' sehuapoya pa'namen mueröchteñtsochno allochñapa' sañapa' e'ñech señañesha' satomhuerr nesho na Ñeñten Acheñetsets.

³⁷ Chocma atet pe't Jesús, ellapene'tcha' ye'chatats Parets pa'paclo, ellerroneñapa' o'ch ahuer Olivopno ñapa' allca'ye e'ñe a'pue't. ³⁸ Tsapat puetaren ahuatecmach huapa'muene't ñaña shonte' acheñesha' ñeñt e'mñotyesaye't all serrpare'tatanete't Yompör po'ñoñ all Parets pa'paclo.

22

Atto atarr o'pateñet Jesús o'ch muetsatateret

(Mt. 26.1-5, 14-16; Mr. 14.1-2, 10-11; Jn. 11.45-53)

¹ Allempoña chapmoch allempoch cherrerr pascuapo, allempoch rrreranerr judionesha' pan ñeñt ama anareteyaye chase'. ² Tarraña allohuen ñeñt pa'mcha'tareñesha' pen allohuen judionesha' po'cornaneshar ñaña allohuen ñeñt atarr etsotayenayeñ ñoñets ñeñt atet anaretet ñocpuet, ñetñapa' Jesús a atarr o'patenet o'ch muetsatatchet tarraña ñetpa' ña mecha'na'tenet acheñesha'.

³ Allempoña oneñetpa' chorrenana Judas ñeñtara ñeñt sochetsa Iscariote. Ñehua, añ ñeñt Judaspa' Jesús pueyochresha' ñeñt parro yemtena po'potantañ ñeñt llesensen Jesús ñeñt allohuenet charrasheñet puechenet epsheña. ⁴ Ñeñtña Judaspa' ahuo' allo'tsa'yen ñeñt pa'mcha'tareñesha' pen allohuen judionesha' po'cornaneshar ñaña allo'tsa'yen judionesha' po'guardiarnesha' ñeñt cohuanpene' Parets pa'paquell. Allempo chap allpa' Judasñapa' serrpare'tos epuet ñeñt añcha'tareñesha'. Attoña eñotatosanet ñapa' mueneñca'ye o'ch poman Jesús attoch rromuet. Allempo ñetñapa' otanna'tyeset:

—Te'pa' errotuachñaca'ye yepe'te' attoch yermue'.

⁵ Allempoña ñeñt atarr añcha'tareñesha'pa' atarr coshenet, ñetñapa' a'pochtachet chochca'ye tsa'chetña Judas allpon quelle. ⁶ Ñapa' e'ñe pocte' eñch. Allempoña ñapa' ña atarr e'nen errotenotcha' pomanña Jesús e'ñe a'nahua attoch amach eñche allohuen acheñesha'.

Atto Jesús pa' rrallme'chatnenan pueyochresha' attoch chocmach yerpueret ñeñt yoten te' Santa Cena

(Mt. 26.17-29; Mr. 14.12-25; Jn. 13.21-30; 1Co. 11.23-26)

⁷ Allempoña chapa'muen ñeñt yetñatsro allempoch rrrerterr pan ñeñt ama anareteyaye chase' allempoch muetserreterr ñaña carnero; ñeñtapa' pascuapo. ⁸ Chapa'muen ñeñt yeterpa' Jesúsñapa' atet ota'muanan pueyochresha' epsheña Pedro ñaña Juan:

—Sa te'pa' o'ch ahues allcha' sa'potos rreñets ñeñt'cha' yerra' pascuapo.

⁹ Ñetñapa' atet ochet:

—¿Erra'tña pocollro pemneña allcha' ya'pota'ña rreñets?

¹⁰ Ñaña'pa' atet otarraneterr:

—Te'pa' o'ch ahua'muenes anetso allcha' sepocte' puesheñarr yacma ñeññ anmam̄pene' oñ porrto. Ñeññña acheñerpa' o'ch socta'ner; allcha' be'tosuerr pocollopa' allcha'ña sebe'tosos sam̄a. ¹¹ Allñapa' atetcha' sotos ñeññ apacllatesha': "Yemaestrorpa' atet oteneý atetcha' yotosep̄: '¿Erro'tsena'tña pecuarto allcha' nerrallme'chos pascuapo epan neyochresha'?" " ¹² Ñeññ apacllatesha'pa' gatapascha' eno po'cuarto ñeññ atarr a'yohuen e'ñe cohuen aḗareḗ. Allcha'ña sañño'tosña ñeññcha' yerra' pascuapo.

¹³ Allempo atet otuanet Jesúsapa' pueyochresha'ñapa' atet'cho' pet, čha ahuanmatset. E'ñe atet otapanet, ñetñapa' e'ñe'cho' atet entoset. Allcha' añño'tosñañetña rreñets allcha' rrallme'chenet ñeññe pascuapo.

¹⁴ O'ña čhap allempoch rrallme'chet. Jesúsñapa' allña anorros epuet allohuen pueyochresha'. ¹⁵ Allñapa' atet otosan pueyochresha':

—Napa' atarr cohuen nenteñ o'ch yerrallme'chen parro añ pascuapo tayepa'tñapa' ama čhena' allempoch muetsataterret. ¹⁶ Tarro'mar napa' o'ch notas, napa' po'pocheño amach alla nerrallme'cherre'te pascuapo. Esemphuañencha' etsoterra ñeññ po'ñočh toma'ntenaya pascuapo e'ñech allempocma añcha'taretetuerra Yompor. Allempoñapa' e'ñech parrocca o'ch alla yocsherrerr.

¹⁷ Jesúsña allempopa' chetan orramets, parasyoso'tan pompor, allempoñapa' atet otanet:

—Añ orrpapo'pa' o'ch sagaḗpa' o'ch sepatanna'ta sa allohuenes. ¹⁸ Te'pa' o'ch notas, tayoteñ napa' amach alla norrerre'te añ orrpapo' ñeññ narmetsos tarremphuach allempoch ello norrererr esempohuañencha' añcha'taretetuerra Yompor.

¹⁹ Allempoñapa' cheterranerr ñaña pan, parasyoso'terranerr pompor. Chetan panpa' shota'ch. Shotatuepa' apa'yesan pueyochresha' ñeññpa' atet otanet:

—Añpa' ñeññcha' nechets sepen ñeññcha' e'ñe nepom attoch e'ñe nerroma socop. Ñerra'm esempoch serren añ pan e'ñech seyerpueñoten na o'ch serreñ.

²⁰ Allempoña rrohuet o' chetan ñaña orramets, ñeññpa'čho'ña atet oterraneterr Jesús:

—Añpa'čho'ña ñeññcha' nerras sepen ñeññcha' ashatarettatsa socop. Ñeññpa' alloch na'pocatonas e'ñe cohuen etserra Nomporešo.

²¹ Te'pa' o'ch señočh ñaña ñeññcha' nepomuerre'pa' e'ñeca'ye parro yerrallme'chen. ²² Po'ñočhca'ye te'pa' allo'na sen etsotnomtsa ñeññ atet onañchareḗ nocop, na Ñeññen Acheñetosets, attočha' muetsataterret. Tarraña nocoppa' e'ñe pocte'; añña po'ñočh acheñer ñeññcha' nepomuerre' ñocoppa' atarr llequēñets.

²³ Allempoña atet otua Jesús, pueyochresha'ñapa' allenta otanna'tyeset e'ñe ñañeñeta:

—Ta'm, eseshaycha'ca'ye pomuerre'ña Ya'yochreshater.

Atto pommo'cheñoḗetpa' otanna'tyenet erra'tsenoteyte'ña ñeññey atarr asherben enten allohuen acheñenesha'

²⁴ Allempoña pueyochresha' e'ñe pommo'cheñoḗetpa' atet otanna'tyenet e'ñe ñagattseta:

—Erra'tsenoteyte'ña ñeññey atarr asherben enten allohuen acheñenesha' ñato'na, ñato'pa.

²⁵ Allempoña Jesúsapa' atet otanet:

—Sapa' señoñe' ñeñt atet pena po'poñ acheñenesha' ñeñt ama judioneshayaye. Ñet ñeñt pa'mcha'tareter penet e'ñech pa'mcha'nochteñocmañen pomnaren pa'yenan allohuen pueyochreshachno. Tarraña ama't atet penetañ pommo'cheño'tpa' añach atarr muenen allohuen acheñenesha'pa' e'ñech mecha'na'tuenanet ñaña ñetpa' mueneñet acheñenesha'pa' o'ch entenanet, atarro' sherba'yenanet. ²⁶ Sapa' arepa'chña atteye' sepanna'tatsto e'ñe sommo'cheño't. Ñerra'm erra'tsenotes ñeñtes atarr amcha'taretoyen entetsa, ñeñtes acheñespa' socoppa' añ poctetsa o'ch atet senterra ñerra'm ama esoshe'mayayso atet ñerra'm ñeñt atarr hupuesha'. Ñaña ñerra'm erra'tsenotes ñeñtes muenene' o'ch atarr asherben entenset, ñeñtesña acheñespa' añ poctetsa o'ch atet senterra ñerra'm ama esoyayso, allochñapa' attoch e'ñe cohuen setorrena po'potantañecop. ²⁷ Ñehua, yeñoteñ acheñenesha' arr patsro añca'ye atarr amcha'na'tpo' entenet ñeñt e'ñe cohueno anorrcha'tyets all rrallme'chenet, amaña añeye'ña amcha'na'tpoye' enteneto ñeñt puesherbeño't epatyene' rreñets ñeñt anorrchets ñeñt rrallme'chets. Tarraña napa' o'ch notas: Ñeñtecopca'yeña nohuapaña sesho attoch nema'yochrena torraya ñeñtcha' po'ño'ch atarr sherberrets socop.

²⁸ 'Tarraña sañapa' ñeñtes atarr nellcapretenaya ñeñt atarr llequñets nenten na. ²⁹ Ñeñto'marña te'pa' o'ch nena'nerres sa ñeñtescha'ña napuerr attoch sa'mcha'tarettapreterra e'ñe atet pena Nompör o' na'n namña ñeñtencha' amcha'tarettapreterra. ³⁰ Allcha' sanorrcha'tyesuerr e'ñe sa seconaño allcha' e'ñe sa'mcha'tarettayesuerra. E'ñe pueseña'tsos añecopcha'ña sa'mcha'tarettayesuerra ñeñt mereñtsorecop israelena'tar ñeñt çharra' mereñtsor ñeñt puechetsa epsheña. Attoña allpa' o'ch na'mcha'tareterra e'ñe necohuenño e'ñech cohuen yeparrocmatuerr; allñapa' e'ñech yocsheñeshocmañen yerrallme'chuerr e'ñe parro.

Atto Jesúsapa' eñotatan Pedro ñapa' çhocmach a'nasocha
(Mt. 26.31-35; Mr. 14.27-31; Jn. 13.36-38)

³¹ 'Simón, po'ño'ch te'pa' o'ch notañ, oneñetpa' atarrca'ye enamuenen na socop, añ muenen o'ch topatenes o'ch atet patenes ñeñt atet cotape'chen ña ñeñt ama pocteye' enteno Yompor. O'ch atarr huomenc topatenes atet ñerra'm ñeñt shoshnene' po'trigror e'ñech huomenc pa'shmuenan puehoshnat. ³² Tarraña Simón o'ch notañ, te'pa' napa' o' nema'yochua pocop attoch amach e'ñe poctacma a'huañamñsonapeña pa' atto atarr peyemtenna. Tarraña ama'tcha' huaponañañ topateñets ñeñt atarr huomenc, paña allempopa' o'ch alla poctape'cherr cohuen Yomporecop. Allempoñapa' o'ch alla e'ñe cohuen peyenpuer pemo'nasheñnesha' attoch ñetpa'cho'ña o'ch alla huomenc perret pueyoçher Yomporecop.

³³ Pedroñapa' atet och:

—Parteshacha' napa' amach na'ypo'ñape, çhocmach noctañ ama't errach anmapet; ñerra'm cárceloch anmapet allcha' mueroçhtatapet, napa'cho'ña nemnen allcha' yemueroçhta parro. Ama'tcha' çho muetsapetpa' yerromueta' parro.

³⁴ Jesúsña' atet otererr:

—Pedro, o'ch notaḡ, e'ñech añe tsaprocma amach eñena' atollop, ḡañapa' o'ch ma'poch ḡa'nasotenna. Ñeñṡpa' atetcha' ḡoten, napa' año' pentárno.

Atto ḡhapmoch allempoch atarr atserrḡaretterra Jesús ñeñṡ atarr topateñets enten

³⁵ Elloña Jesúsḡpa' yerpaterrana pueyochresha'; ñeñṡpa' atet oterraneterr:

—Ñehua, ahuaña allempo nemñas atet notapas amach es sanmatsto ama't coñe'ta, ama't sebolsa, ama't seḡllayor ama't ñaña sesapat. Ñehua allempopa' ḡeñalle'tña ñeñṡ sepalltena?

Ñetñapa' atet ochet:

—Allempopa' amaca'ye ḡho es yepallto ama't e'ñe mamesha.

³⁶ Jesúsñapa' alla oterraneterr:

—Tarraña te'pa' o'ch notas po'poñ, ñerra'm eseshaste' ñeñṡes echene' seḡllayor te'pa' o'chca'ye sanem all seḡhopeñe'chyen ama't ñaña sebolsa. Ñaña ñerra'm ama seḡheno socchellpa' pocte'ca'ye o'ch sepom seshtam alloch seyora socchell. ³⁷ Tarro'mar te'pa' o'ch alla noterrerr: Te'pa' o'chca'ye e'ñe etsoterra ñeñṡ atet anuaret Yompor po'ñoñ nocop. Allca'yeña oten napa' erroṡuanencha' perrnet atet ñerra'mrrate' napa' ñeñṡen amtsañen. Te'pa' ñeñṡca'ye o' etsotmocha ñeñṡ e'ñe atet anaret nocop.

³⁸ Allempoña ñetñapa' atet otereterr:

—Parteshacha' yapa' yechenca'yeña eḡmeta cochell.

Jesúsñapa' atet otanet:

—Ñeñṡachca'ye.

Atto Jesúsḡpa' ma'yochuena all oteñet Getsemani

(Mt. 26.36-46; Mr. 14.32-42)

³⁹ Allempoña o' rralme'chuanenet ñeñṡe pascuapo, Jesúsñapa' ḡha'nerrpa' ahuenerr Olivopño; ñapa' attecma pena ḡhocmach sen all. Pueyochresha'ñapa' coṡa'huaneñet. ⁴⁰ Allempoña ḡhenet allpa' Jesúsñapa' atet otuanan pueyochresha':

—Te'pa' arrcha' sema'yochuena attoch e'ñe sa'huanta' ñeñṡcha' sehuapoya te' ñeñṡcha' atarr huomenc setpate'.

⁴¹ Allempoña ñapa' ahuo' mame' a'yenteye'. Ñañaḡpa' all concorpa'huena o' ma'yochuena.

⁴² Puema'yocheñoṡ atet otuen:

—Apa, ñerra'm ḡach pocte' ente' arepa'chña pemnatatsche o'ch ḡhapona ñeñṡ atarr amuerocḡtatañ nenten.* Tarraña ñerra'm ḡach muenats añcha'ña atet peḡaton ñeñṡ pemnen ḡa, amachña añeyaye ñeñṡ nemnen na.

⁴³ Allempoñaḡpa' huapoña mellañoṡeñ Yompor pue'ntañoṡ ñeñṡña ahuaḡmencat ḡose' attoch ahuantan puellquēña. ⁴⁴ Ñapa' atarr nanac puellquēñesha' ma'yochena; puema'yocheñoṡpa' atarr nanac ñorra'ten. Po'ñoṡrñapa' ḡha huatena atet ñerra'mrrate' errasats tsopsa'tets patso.

⁴⁵ Allempoña ma'yochuapa' tanterra, ahuer pueyochreshesho. All entuerranet ñetñapa' ḡha atarr manrrenet ama't e'ñe puellquēñeshet.

⁴⁶ Ñañaḡpa' atet otuerranet:

* 22:42 Ñeñṡ amuerocḡtatañ ñeñṡpa' po'ñoḡ arr atma'ntataret ñerra'mrrate' ñeñṡ atarr pesherr yorren orranṡso.

—Sapa' eso'mare'tña čha atarr semanrra'ten. Te'pa' o'ch setanterrapa' čhoña sema'yochrra'ta attoch sa'huanta' ñeñt'cha' sehuapoya topateñets atarr huomenc.

Allempo rromoset Jesús

(Mt. 26.47-56; Mr. 14.43-50; Jn. 18.2-11)

⁴⁷ All atet otyenan pueyochresha'pa' allempoñapa' huačha'toña shonte' acheñenesha'. Ñeñt' huačha'tatahuet ñeñt'pa' ñeñt' sochetsa Judas ñeñtara ñeñt' pueyochresha' peneñ ñeñt' čharrasheña ñeñt' a'pchenahuet epsheña. Ñaña'pa' čha ponmosaya Jesús, puetso'tsapa'teñoť huomčha'tos. ⁴⁸ Jesúsña'pa' atet otař:

—E'ñe'tcha' petso'tsapa'teñoťen pepomuerrren na Ñeñten Acheñetosets.

⁴⁹ Añña' ñeñt' yemtenaya Jesús allempo atet eñchet o'ch rromoset Jesús, ñetña'pa' atet ochet:

—Ayochreshate ¿amaťe' pocto o'ch yemoñsařa yocchello?

⁵⁰ Puesheñarrña pueyochresha' allenta chetan po'cchell ahuo'ch čhonto'tapan cornesha' pa'cheñer puetepa'tcha' tsorroñ po'cohuenrot. Ñeñt'pa' año pa'cheñer ñeñt' pa'mčha'tareter pen allohuen judionesha' po'cornaneshar. ⁵¹ Jesúsña' allempo entan pueyochresha' atet řapa' ñaña'pa' otanet:

—Ñeñt'epa'ta, amach atet seřatsto.

Allempoña ñeñt' tsorrqueta'tetpa' alla a'řllerrñañ puet o' alla or-rater o' e'ñe correrra. ⁵² Ñeñt' huačha'toya ñeñt'cha' rremose' Jesús'pa' ñeñt'pa' añca'ye ñeñt' pa'mčha'tareternesha' řa'yen allohuen judione-sha' po'cornaneshar, ñaña' ñeñt' judionesha' po'guardianeshar ñeñt' co-huanřpene' Parets pa'paquell ñaña' ñeñt' pompornesha' pen allohuen judionesha'. Allempo huačha'toñetpa' Jesúsña'pa' atet otapanet:

—Eso'mare't sehuacha'tennanaña e'ñe occhelletareroches ñaña et-sachperetareroches attoch serrma'n. Napa' ¿e'ñe't atet sentenen ñerra'mrrate' eñeten? ⁵³ Napa' allponmatuanen allo'tsenen Parets pa'paclo e'ñe parro sesho, eso'mare'tña amaña allempocmaye'ña ser-ma'ne'te. Tarro'mar te' o' čhap allempo ñeñt' poctetsa socop ñeñto'mar te' o' čhap allempoch oneñetpa' o'ch orrtatennas po'huamenc, ñeñt'pa' e'ñe atet ñerra'm checmete'.

Atto Pedropa' a'nasotana Jesús

(Mt. 26.57-58, 69-75; Mr. 14.53-54, 66-72; Jn. 18.12-18, 25-27)

⁵⁴ Allempoñapa' rremoset Jesús'pa' arr aneret amčha'taret pa'paclo ñeñt' pa'mčha'tareter pen allohuen judionesha' po'cornaneshar. Pedroñapa' ñapa'čho'ña coťe' tarraña ñapa' chenta' en a'yot. ⁵⁵ Petotña rročh pampopa' all a'toren tso' all anorrčha'tyen acheñenesha' ñeñt' shotetsa. Pedroñapa' all anorros ñaña all shotosa. ⁵⁶ Allempoña huapa coyanesha' ñeñt' amčha'taret pueñañra. Entosan Pedro all shotenapa' alla cohuos, atet otos:

—Añpa'čho'ña encanesharpa' ñeñt'ramtso yemtaye'tña Jesús.

⁵⁷ Tarraña Pedroña čha a'nasochapa' atet otanña coyanesha':

—Napa' amaca'ye nentare.

⁵⁸ E'ñe o'čtapa' huapa ñaña po'psheñeñ entuererrpa' ñapa'čho'ña atet otuererr:

—Papa'čho'ña parroca'ye e'ñe peyemtena.

Pedroñapa' atet otan ñeñt' yacmar:

—Napa' amarramche' erra neyemtenoña na epan ña.

⁵⁹ O' tama o'chtterrerrpa' o' alla huerrerr po'psheñeñ, ñapa'cho'ña atet otuererr:

—Po'ñoçhca'ye añmapa' ñeñtca'ye e'ñe yemtenaya tarro'mar ñapa'cho'ña galileo'marnesha'ca'ye atet ñerra'm Jesús.

⁶⁰ Pedroñapa' alla oterranerr ñeñt' yacmar:

—Amarramche' neñoteñeña este'ña atarr pötenen.

E'ñe allempo atet eñorena Pedro, e'ñepa'tcha' allempocma eñeña atollop. ⁶¹ Allempoña Partsesha' Jesús pa' cohua' allente'tsen Pedro. Pedroñapa' allenta yerpuerrana atet oteñ Partsesha': "Amach eñena' atollop ñeñte tsaprocma ñañapa' o'ch ma'poch ña' nasotenna." ⁶² Allempoña Pedropa' ahua' a'yo all e'ñe puellquëñesha' yahuosa huomenc.

Atto atarr achmare'teñet Jesús

(Mt. 26.67-68; Mr. 14.65)

⁶³ All yottam̄psateñet Jesús añcha'taret pa'paclo añña solltarnesha' ñeñt' cohuan̄psachet ñetñapa' atarr achmare'teñet Jesús all cohuan̄peñet. Atarr çhota'teñet. ⁶⁴ Huancacalle'cheñet, pachmare'teñoñetpa' atet oteñet:

—Ñehua, te'ña eñoratenperrepa' Parets allochñapa' attoch pötey esesha'te'ña peçhota'tyene'.

⁶⁵ Elloña pachmare'teñoñetpa' pa'namen esocmañen otyeñet, sochatse'tyeñet.

Allempo çhapata'mueñet Jesús all apçha'muena allohuen judionesha' pa'mcha'tareternesha' ñeñt' a'pöcattyene' ñoñets

(Mt. 26.59-66; Mr. 14.55-64; Jn. 18.19-24)

⁶⁶ Tsapatña allempo puetarenpa' apçha'muena allohuen ñeñt' pompornesha' pen judionesha' epuet ñaña ñeñt' pa'mcha'tareternesha' pen allohuen judionesha' po'cornaneshar epuet ñaña ñeñt' atarr etsotayenayeñ ñoñets ñeñt' atet anaret. All apçha'muena allohuen judionesha' pa'mcha'tareternesha' ñeñt' a'pöcattyene' ñoñets, all anma'mueñetña Jesús. Allñapa' a'pö'tare'tapet, atet otapet:

⁶⁷ —Yapa' te'pa' yemneñ o'ch pötosey ñerra'm po'ñoçhte' ña ñeñtep Cristotets.

Jesúsñapa' atet otosanet:

—Ama't notatstas na po'ñoçh ñeñten Cristotets sañapa' amachca'ye pöcteye' sentno attoch same'ña'na. ⁶⁸ Ñaña napa'cho'ña ama't o'ch es na'pö'tas saña sañapa' amachca'ye sanapñoña ñaña. Tarro'mar sapa' amachca'ye semno sa'rroyerren. ⁶⁹ Tarraña te'pa' ama'tcha' atet sepa'noñ te'ñapa' o' e'ñe çhap allempoch o'ch alla nanorruerr Nompör po'cohuenroñ ñeñt' atarr ahuañencattetsa, ama't na Ñeñten Acheñetosets.

⁷⁰ Allempoña allohuenet atet oteñet:

—Ñeñtepnapa' çpa'trraña Puechemer penña Yompor?

Jesúsñapa' atet oterraneterr:

—E'ñeca'ye po'ñoçh ñeñt' atet sotenen sa.

⁷¹ Allempoña ñetpa' atet otanna'tyeset:

—Te' yapa' ama yemneñe po'potantañ ñeñt'cha' a'metare'tam̄psose' tarro'mar te' yapa' allohueney e'ñe ye'mhuen ñeñt' atet otana añ acheñer,

ñapa' Yomporo' Puechemer. Ñapa' čhaca'ye atarr achm̄are'tenan Yompor.

23

Allempoña chapata'mueñet Jesús allo'tsen am̄cha'taret Pilato
(Mt. 27.1-2, 11-14; Mr. 15.1-5; Jn. 18.28-38)

¹ Allempoña allohuenet tanrra'tuet, e'ñe parrocmā anmet Jesús allo'tsen am̄cha'taret Pilato (ñeñt̄ nen gobierno Romot ñeñt̄ am̄cha'tarettetsa allo'marneshacop). ² Allñapa' atarr otteñe'choset, toma'tam̄pesyesoset, ñeñt̄pa' atet otyesoset:

—Ya añ acheñer čhocma yenteñ yečhatyenan yamo'tseshachno judionesha' ñeñt̄ ama't mameshapa' ama cohuenayaye, ñaña atet̄ oteney año'ch yetsa'tatsto impuesto ñeñt̄ romo'marneshacop ñeñt̄ nen am̄cha'taret Romot. Ama't ñapa' atet̄ otena ñapa' ño' Cristotets ño' atarr am̄cha'tarettetsa arr.

³ Allempoña am̄cha'taret Pilatopa' a'p̄to'tapan Jesús:

—Papa' ¿p̄a'tña judionesha' pa'm̄cha'taretereṗ?

Jesúsñapa' atet̄ och:

—Atetca'ye atet̄ ṗotenen.

⁴ Añña ñeñt̄ pa'm̄cha'tareternesha' pen allohuen judionesha' po'cornaneshar ñaña acheñenesachno, ñetñapa' atet̄ otanet Pilato:

—Ñehua, napa' amaca'yeña nentoñeña ñeñt̄ atto ama pocteye' es penoña añ acheñer.

⁵ Judionesha'ña pa'm̄cha'tareternesha'pa' alla otereterr Pilato:

—Tarraña yañapa' čhocmaña yenteñ ñeñt̄ atet̄ yečhatyenan acheñenesha' attoch atpare'tatenanet gobierno. E'ñe Galileoteñ atet̄ pena, ama't te'pa' o' chap ñaña arr Judeo e'ñe attecma o' yečhatuerrerr ñeñt̄ ama cohuenaye'yenteno ya.

Allempoña chapata'mueñet Jesús allo'tsen ñaña am̄cha'taret Herodes

⁶ Atto' e'm̄ñotenan judionesha' atet̄ otyenet e'ñe Galileoteñ yečhaten, allempoña Pilatopa' atet̄ a'p̄to'tanet:

—Jesúsapa' ñapa' ¿galileo'marnesha'tña?

⁷ Allempoña eñotachet ñapa' po'ñočca'ye galileo'marnesha' allempoña Pilatopa' atet̄ cotape'ch ñeñt̄pa' Herodesopaca'ye tarro'mar ñapa' ñeñt̄ am̄cha'tarettetsa galileo'marneshacop. Ñeñto'marña ñapa' mueñan Jesús Herodesesho tarro'mar Herodespa' allempo chap Jerusaléño all emo'ten.

⁸ Herodesñapa' e'ñe pocsheñesha' agapaneñ Jesús tarro'mar ahuatoteñ atarr mueneñ o'ch eñch tarro'mar ñapa' atet̄ e'mare'tenan Jesús ñeñt̄ atet̄ p̄a'yena. Ñapa' añecopña atarr mueneñ o'ch orrtatoñ ñaña ñeñt̄ atet̄ p̄a'yena orrtatyese' ñeñt̄ ama puentareto. ⁹ Atarr es a'p̄to'tare'tapanēña Jesús tarraña ñapa' ama anapanoña Herodes ama't e'ñe parrocha.

¹⁰ All tomčha'toset ñaña allohuen am̄cha'taretnesha' ñeñt̄ pa'm̄cha'tareternesha' pen allohuen judionesha' po'cornaneshar ñaña allo'tsen ñeñt̄ atarr etsotayenayeñ ñoñets, ñetña allpa' otteñe'chuereterr Jesús all Herodesesho, pa'namen otyesuerreterr.

¹¹ Allempo Herodes ñaña allohuen po'sollarneshar ñetpa'čo'ña puerraṗsoñet ñamet. Achm̄are'chet all che'tatseteñet. Pueche'tatseteñoñet chorrachet am̄cha'taret̄ pa'shtam ñeñt̄ atarr cohuen. Allempoña Herodespa' o' alla mueño'ter Pilatesho.

¹² Ñeñto'marña Herodes epuet Pilatopa'

e'ñe allempocma amo'tstannerret tarro'mar ahuañmo'chapa' cha e'moñe'tannenet.

*Atto amcha'taret Pilatopa' otanet ama'tpa' chosa muetse' Jesús
(Mt. 27.15-26; Mr. 15.6-15; Jn. 18.39-19.16)*

¹³ Allempoña Pilatopa' alla apchaterran ora allohuen judionesha' pa'mcha'tareternesha' ñeñt po'cornaneshar pa'mcha'tareternesha' ñaña po'potantañ judionesha' pa'mcha'tareternesha' ama't ñaña allohuen acheñenesha'. ¹⁴ Pilatoñaapa' alla otapuerraneterr:

—Añ acheñer ñeñt sehuapatennan ñeñt soten sa ahuo' yechatyesan acheñenesha' ñeñt ama cohuenaye' senteno sa, te'ña napa' o' na'p̄to'tare'tue ama't allempo allo'tsa'yenes tarraña nañapa' ama't parrochapa' ama nentoñeña ñeñt atet sotyen atto' pena ñeñt ama cohuenayaye. ¹⁵ Ama't ñaña Herodespa' ama entoñeña ñeñt ama pocteye' ye'chcateno, ñeñto'marña o' alla mueñer nesho. Po'ño'chpa' amaca'ye eñalleña ñeñt atet pen ñeñt ama cohuenaye' yenteno allohueney attotcha' yemtsatach. ¹⁶ Ñeñto'marña na te'pa' attachca'ye necoñchach mame'pa' o'ch alla na'rroyer.

¹⁷⁻¹⁹ Tarraña allohuen judionesha' puerrannarteño'fet atet ochet Pilato:

—Pemtsatachñaca'ye, añcha'ña pa'rroyerrnay Barrabás.

Ñehua, ñeñt Barrabás ahuañmo'choteñ yottampeñet tarro'mar ña ye'chatene' acheñenesha' atpare'chetepa' amcha'taret ñeñt nen gobierno' Romot. E'ñe patpare'teño'f o' muetsan acheñ. Ñehua, ñetpa' atet ye'chenet. Pate'tets pascuapo ñeñt amcha'taret ñeñt nen gobierno' Romotpa' o'ch a'rroyerrñañet judionesha' puesheñarr pamo'ts ñeñt ayottam̄psarettetsa ñerra'm erra'tsen muenenet ñet, ñeñtpa' añecop a'rroyenanet attoch coshatenan judionesha'. ²⁰ Ñeñto'marña Pilatopa' atarr mueneñeñ o'ch a'rroyerranet Jesús, ñeñto'marña alla a'p̄to'terranerr allohuen acheñenesha'. ²¹ Tarraña ñetñapa' ama't mameshapa' amaña pocteye' enteñeto. Elloña ñeñtapa' rrannartet allohuenet, atet oterete't:

—¡Pecorso'tam̄psach! ¡Pecorso'tam̄psachñaca'ye!

²² Poma'pocheño Pilatopa' alla oterraneterr:

—¿Eso'mare'tña semneñña o'ch necorso'tam̄psach? Napa' amaca'ye nenteññañeña ñeñt atto ama pocteye' es peno attoch yemtsatach. Ñeñto'marña napa' attachca'ye, necoñchach mame' allempopa' o'ch alla na'rroyer.

²³ Tarraña ñetpa' ama ca'chpueñeto otare'tet. Elloña ñetpa' e'ñe puerrannarteño'fet atarr enamueñet attoch corso'tam̄psach. ²⁴ Ñeñto'marña Pilatopa' ame'ñachet. Attoña ñapa' atet eñora:

—Te'pa' o'ch atet ne'ponas ñeñt atet atarr semnen sa. ²⁵ Ñeñto'mar allempo a'rroyanet Barrabás ñeñt enamueñet ama't ñeñt patparño'f yottam̄peñet ñaña puemtseño'f acheñ. Tarraña Jesúsñapa' o' apanet attoch muetset ñeñt atarr muenenet ñet.

*Atto corso'tam̄psoset Jesús
(Mt. 27.32-44; Mr. 15.21-32; Jn. 19.17-27)*

²⁶ Allempo anmet Jesús a'yo allcha' corso'tam̄psoset. Allña oñenetpa' allñapa' poctet puesheñarr yacma ñeñt cireneo'marnesha' ñeñtpa' añ

pa'so'cheñ Simón ñeñt' errte' huertrsa a'yot. Ñeñña rremapetpa' o' chechatnomet Jesús po'corsoch ñeñña anmue'ña chenta'.

²⁷ Allñapa' cota'huanem' shonte' acheñenesha', shonte' coyaneshačno ñeñt' atarr ya'na'tnene' Jesús chenta', atarr gogaretyesnet puellquëñoftet. ²⁸ Tarraña Jesús'pa' allenta cohua'nmanet, atet otnomanet:

—Noçhanesha ñeñtes jerusaléno'marneshas, amach atarr seya'na'tatsteno na. E'ñe socpa atarr seyahuena sacñe'aretolleshohuen.

²⁹ Tarro'mar esempopa' çhocmach huaponasa ñeñtcha' atarr sellcaterre'. Allempoña coyanesha' ñeñt' ama achoyore'tñepa' ñocpuetñapa' e'ñech cohuen entaretterret allempo tarro'mar ñetpa' ama eñallete puechoyoreshet ñeñtcha' atarr mueroçhterrtsa.

Ñeñto'marña allempopa' otyerrcha' allohuen acheñenesha': “O' atarr cosheñtso'tsenterra mueçhoñnesha', ama't allohuen ñeñt' ama achoyore'tñe, ama't allohuen ñeñt' ama es moma'yeneto.”

³⁰ Tarro'mar allempo puemueroçhteñoftet e'ñe puellquëñoftetpa' atarrcha' ya'ñameterret. Pueya'ñameteñoftetpa' e'ñech pocte' entyerret ñegatañperretepa'to' attoch pampueranet e'ñe poctacma. Allochñapa' o'huañcha' allo'na atarr nanac mueroçhtenet.

³¹ Tarro'mar te'pa' atto mueroçhtatennet na ama't napa' e'ñe cohuen es norrtatyeneñ, e'ñe atteneñ ñerra'm tsach e'ñe cohuen emmo'rate'.

Ñeñto'mar te' napa' neñoftet elloña atarrcha' amueroçhtataretterra ñeñt' ama cohuenaye' es orrtateno; ñeñtñapa' e'ñe atet pena ñerra'm tsach rromuech. Arrpa' allohua atet otnomanet Jesús allempo aneñet allcha' corso'tamñsuset.

³² All aneñet ñaña epsheña ñeñt' amtsañ ñeñtcha' epuet corso'tamñsuset.

³³ Allempoña çhapachet all oteñet Poñetalleño, allña corso'tamñsusetña epuet ñaña epsheña ñeñt' amtsañ, puesheñarr nosñañet po'cohuenrot, po'psheñeññapa' nosñañet pue'chcoterot.

³⁴ E'ñe allempo corso'tamñsusetpa' Jesúsñapa' atet ma'yochamñsosana ñeñt' e'moñe'tene', ñeñt'pa' atet ot:

—Nompocha' te'pa' pepretanetepa'ch tarro'mar ñetpa' po'ñoçhpa' ama eñoteneto ñeñt' atet yeçcatenet, ñeñt' ama pocteyaye.

Allempoña solltarnesha'pa' yellsheñe'chatoñet pa'shtam po'suertot attoch orrta puesheña'tets ñeñtcha' yorayese' puema'tets.

³⁵ Acheñenesha'ñapa' atta cohuanrrorteñet all tomçhenet a'yenet. Pa'mcha'tareterneshet ñetñapa' atarr es otnare'teñet, atet otatse'tyeñet.

—Te'ña p'apa' o' p'a'qeshp'atyes po'potantañ, te'ñapa' p'a'qeshp'aterra e'ñe pañeña ñerra'm po'ñoçhte' ñeñt'ep' acren Yompor ñeñtcha' Cristotsets.

³⁶ Solltarnesha'pa'çho'ña atarr achm'are'teñet, che'tatseteñet. Pueche'tatseteñoftetpa' ponem'yetpa' aposet vinos ñeñt' atarr chella'se'.

³⁷ Pachm'are'teñoftetpa' atet otyeñet:

—Ñerra'm p'a po'ñoçhte' ñeñt'ep' pa'mcha'tareter pen judionesha', te'ñapa' p'a'qeshp'aterra pañeña.

³⁸ Ñehua, poñoft' all corsocho all noñet tsachtall aquellcaret' ñeñtña quellecpa' atet oten: “Añpa' ñeñtca'ye judionesha' Pa'mcha'tareter.” Ñeñtña quellecpa' ñeñt' anaret ma'po'mar ñoñets—griegach, latinaçh ñaña hebreyach, e'ñe attecma oten.

³⁹ Puesheñarrña amtsañ ñeñt' parro corso'tamñpeñet, ñapa'çho'ña achm'are'ch. Potnare'teñoft'pa' atet oteñ:

—Ñerra'm po'ñochte' Cristoŕpa' Ƥa'quesħƤatterra Ƥañeña, yapa'cho'ña o'ch Ƥa'quesħƤaterrey.

⁴⁰ Po'psheneñ amtsañpa' che'ptare'ch. Pueche'ptare'teñoŕpa' atet och: Papa' eso'mare'tña ama peñcha'na'teñeña Yompor, ama't parro amue-rochtatarety. ⁴¹ Tarraña yocoppa' e'ñeca'ye pocte' yemueoçhtena tarro'mar ñeñŕpa' añ tsa'tatenyet ñeñŕ allpon yeyeçcatyen ñeñŕ ama cohuenayaye ama't e'ñe mamesha. Tarraña añ acheñer ñeñŕ parro mueoçhtatenyet ñapa' ama es yeçcateno ama't mamesha ñeñŕ ama pocteyaye.

⁴² Allempoña ñapa' atet otan Jesús:

—Napa' peyerpa'huerrno'tach allcha' Ƥa'mcha'taretetuerra.

⁴³ Jesúsñapa' atet och:

—Napa' po'ñoçca'ye notaŕ, e'ñe ŕayecma parro'tseneycha' cosheñŕso.

Atto rroma Jesús all po'corsocho

(Mt. 27.45-56; Mr. 15.33-41; Jn. 19.28-30; Heb. 9.11-14)

⁴⁴⁻⁴⁵ Allempoña çhap pocto atsne'pa' o'huañ atsnom, o' e'ñe checmetua erraŕaren añe patsro. O'ña ellerrotnenmochapa' o' alla puetarerr. Allempoña ñeñŕ besom allo yottañpeññañet Parets Ƥa'Ƥaquell po'ponro ahuepa't rrrarra'nom e'ñe poctacma, o' e'ñe ellopa'tetsta. ⁴⁶ Allempoña JesúsƤa' rrana. PuerranarotƤa' atet ot:

—Nompurcha' te'pa' o' nepomuerra e'ñe Ƥocop e'ñe necamquëñoñuen. E'ñe ñeñña otuapa' o' rroma.

⁴⁷ Solltar po'caŕtáner ñeñŕ romo'marnesha' ñeñŕ corso'tamŕse', allempo atet ent atet o' Ƥa, ñañapa' allenta aye'choçhtatan Yomporpa' ñapa' atet ot:

—Añ yacmarpa' po'ñoçhuaca'ye e'ñe attota o' yemtsatater, amaca'yeña eñalleña attoch yemtsataterëñ.

⁴⁸ Ñaña allohuen acheñenesha' ñeñŕ allo'tsa'yen ñeñŕ ente' ñeñŕ atet o' Ƥach o' yoroçhtach, ñetñapa' puellquëñesha' na'yesnerret pot puesomapo ahuanerret. ⁴⁹ Allohuen ñeñŕ atarr yemtaye't Jesús ahuañoŕeñ ñaña allohuen coyaneshaçhno ñeñŕ cota'huanmue' Galileot ahuañoŕeñ, ñetñapa' alla tomçha'tyenet a'yenet allot atta cohuanrrorteñet ñamet.

Atto pampuet Jesús

(Mt. 27.57-61; Mr. 15.42-47; Jn. 19.38-42)

⁵⁰ Eñall puesheñarr yacma ñeñŕara judionesha' ñeñŕ e'ñe cohuen acheñ e'ñe pocte' es Ƥa'yen, ñeñŕpa' añ Ƥa'so'cheñ José ñeñŕ arimateo'marnesha'. Ñapa'cho'ña puesheñarr ñeñŕ Ƥa'mcha'tareter pen allohuen judionesha' ñeñŕ parrocmach çhocmach apçhenet epuet po'potantañ añcha'taretnesha' attoch a'poctatenet ñeñŕ llequëna allohuen judionesha'. ⁵¹ Ñehua, ña ahuaña allempo apçhenet parro po'potantañ añcha'taretnesha' atto o'pateñet Jesús o'ch muetsatachet, ñañapa' ama't mameshapa' ama pocteye' eñche. Tarro'mar ñapa' ñeñŕ atarr cohueñe' Yompor esempohuañencha' o'ch atarr ayochreshatterra. ⁵² Ñeñŕña Josépa' o' ahuo' Pilatesho o'ch oteña' pocte'ch eñch ñach a'suatose' Jesús ñeñŕ rromuets corsocho. ⁵³ Pilatoñapa' e'ñe pocte' eñch, ñeñŕo'marña ñapa' a'suater corsochof allempoñapa' epats'eçh shetamtso ñeñŕ e'ñe cohuen, allempoñapa' anem allcha' pampueña'. All eñareñ mapuetpon all ama apamparettena' po'poñ arromñaç, allca'yeña nenana'ña Jesús.

⁵⁴ Ñehua, allempo pampuet Jesús^{pa} ñeñt^{pa} añe yetro allempo chocma añño'tena judionesha' ñeñt tsapat^{ecop} allempoch ameserreterr. Ñehua, allempo pampa'huet Jesús^{pa} o' ellerren, ñeñto'mar judionesha'pa' o' mottan ñeñt tsapat^{ecop} allempoch amesa'muenet e'ñe poctacma.

⁵⁵ Ñeñña coyaneshachno ñeñt atarr yemtenaya Jesús ñeñt cota'huanmue' ahuaño^{teñ} Galileot, ñetña^{pa} cota'huanmet all pampueñeta' attoch eñchet allcha' neret Jesús. ⁵⁶ Allempoña ñet onacherret allo^{tpa} o' chacherret pocollo, ñetña^{pa} allohuenet^{pa} yorayesuerret ñeñt atarr eñmosatechno alloch a'yana'tereta' Jesús ora po'chtsohuen attoch e'ñe cohuen eñmosa'ttereta'. Ñeñt^{pa} e'ñeca'ye atet ye'chenaña judionesha'. Ñet^{pa} alla añño'tuaneñetña eñmosatechno tarro'mar tsapat^{pa} amach serreto puepampro tarro'mar tsapat^{cha} chapa'muen ñeñte yetro allempo chocma amesen judionesha' ñeñt atet anarettenet ñocpuet.

24

Atto tanterra Jesús

(Mt. 28.1-10; Mr. 16.1-8; Jn. 20.1-10)

¹ Allempo o' huañ yetñats allempo amesenet, allempo motta'muena yetñats temenc coyaneshachnoñapa' e'ñe ahuatecma ahuanma'muenet all pampueñet Jesús. Anma'mueññañet eñmosatechno ñeñt o'patateñet alloch a'yana'toset. Allña^{pa} cota'nma'muenanet po'potantañ coyaneshachno. ² O'ña chacha'ta'muenet allpa' mapueña ñeñt allo mopam̄pset Jesús ñeñt puepampuer p̄chet ama atteraye' entoseto ñeñt atet p̄am̄pset po'poñ ellerro. Entoset mapue' o' a'rrote'tarettena a'yenet. ³ Allempoña ñet^{pa} esho'trra'toset mapuetpono ñeñt puepampuer p̄chet amaña esesha' entosayña arromñañ all net. ⁴ Ñetña^{pa} cha muene' yoruoset ama eñoteñeto erro'tcha'ña p̄oset. E'ñe allempo atet co'tape'chyenet ahuepa'tcha' orrtapanet epsheña yacma alla tom'cha'toset e'ñe allo'tsa'yenet, atarr cohuen popuetyenet pa'shtamuet. ⁵ Ñetña pueyorñotet^{pa} atta mo'crra'tyeset patso. Pon'chañofet ama eshcaye' cohua'pseto allenet ten. Ñeñña yacma epsheñapa' atet otosañet:

—Ñeñt ama arromñañeshayaye, eso'mare'tña se'name'teñña arr allecma nannena arromñañenesha'. ⁶ Te' ñapa' amaca'ye allo'tsenarayaye arr, o'ca'ye tanterra. Ama't seyerpueñoña ñeñt atet otase't ama't ahuañmo'choteñ allempo Galileo'tsenmeñ. ⁷ Ñeñt^{pa} atetca'ye otase't ñapa' ña Ñeñt Acheñetosets chocmach pomueret attoch erro'tuanen per po'poñ acheñ ñeñt atarr ochñañenesha' attoch corso'tam̄peret, tarraña poma'pamtañoñapa' chocmach tanterra.

⁸ Allempoña ñet^{pa}cho'ña allenta yerpueret atet otanete't ahuañmo'choteñ Jesús. ⁹ Allempoña coyaneshachnopa' onacherret puepampro, chacherret pocollo^{pa} serrpare'tatueret Jesús puellsensarnesha' ñeñt charrasheña ñeñt puesheñarraña o' puecherra ñaña po'potantañechno ñeñt pueyochresha' pen. Coyaneshachnoñapa' serrpare'tueret allohuen ñeñt atet enta'muenet Jesús puepampro. ¹⁰ Ñeñt serrpare'tatenaya' Jesús puellsensarnesha' ñeñt^{pa} añ María Magdalena ñaña Juana ñaña po'psheñeñ María ñeñt Jacobo pachor

ñaña po'poñechno coyaneshačno. ¹¹ Tarraña Jesús puellsensarnesha' allempo serrpare'tatosanet coyaneshačno ñeñt atet entua'muenet, ñetña'pa' ama't mameshapa' ama ame'ñyetoña coyaneshačno, cha otenapuetañ attate' otatse'tyen coyaneshačno.

¹² Tarraña Pedroña'pa' allenta ta e'ñe matenacma. O'ña chap ñaña puepampropa' mo'cosa, cohuos o'pononet all net. Ñapa'cho'ña ama entose, shetamtsa entos allo epatse'chet alla o'shshe'ma'yena a'yenet. Ñapa'cho'ña ahuerri pocollo ama eñoteñe ñato' erro'tsente'.

Atto Jesús'pa' rremuerrana' epsheña pueyochresha' toño allempo senet Emaúso

(Mr. 16.12-13)

¹³ Ñeñte yetrocma epsheña pueyochresha' ñetña'pa' arr senet anetso ñeñt pa'so'cheñ Emaús. Ñehua, ñeñt pa'so'cheñ anets Emaúspa' Jerusaléñoñeña' allo'tsente' charra' puechena paterr kilómetro choycha' chapats anets Emaúso. ¹⁴ Ñetña'pa' e'ñe puseserrparñesha' senet, añ serrpare'tyesnenet ñeñt allpon atet o' pohua. ¹⁵ All senet e'ñe puseserrpare'teñeshetpa' anapanna'tyesnenet Jesúsña'pa' alla rremuerraneta'. Allempoña' chope'chnomuet e'ñe parro o' ahuanmuet anetsonet. ¹⁶ Tarraña ama't entapetañña Jesús'pa' ñetña'pa' cha ottenet ñerra'mrrate' ama amnataretteneto attoch cheme'tapet, ama esesha' cheme'taye. ¹⁷ Jesúsña'pa' atet otosan pueyochresha':

—¿Eso'tña seserrpare'tyesnen? ¿Eso'mare'tña cha atarr sellca'nena?

¹⁸ Puesheñarrña ñeñt sohetsa Cleofas, ñaña'pa' och:

—¿Ama't peñoteñeña allohuen ñeñt Jerusaléño'tsen ahuañoñeñ o' e'ñe e'mare'tuet ñeñt atet o' metua all? Papa' ¿papatate'ña ñeñteñ taya chapats all Jerusaléño ñeñteñ ama eñotosaye ñeñt atet o' pohuerret Jerusaléño?

¹⁹ Ñaña'pa' atet otnomanet:

—¿Eso'tña ñeñt atet o' pohuerretña all?

Ñetña'pa' alla otnereterr:

—Añca'ye yeserrpare'tnen Jesús ñeñt nazareto'marnesha' ñeñt a'mtene' Yompor po'ñoñ ahuaña. Po'huanencoñ orrtatennay po'partsoña ñeñt ama't ahuaata yapa' ama yentare. Ñaña atet yechatyese't ñeñt'pa' atarr cohuen. Ñeñt'pa' e'ñe pocte' entapreteñ Yompor; acheñenesha'pa'cho'ña e'ñe pocte' enteñet. ²⁰ Tarraña ya'mcha'tareternesha' ñaña ñeñt pa'mcha'tareternesha' pen allohuen judionesha' po'cornaneshar; ñetña'pa' o' pomueret Jesús attotca'yeña o' muetsatateret, ñeño'marña o' corso'tamperet. ²¹ Tarraña yapa' ñeñtca'yeña atarr yemneneñ ñato' ñach ya'rroyatatosayeña allohueney ñeñtey israelena'tarey (atto añcha'nochtana'tenya romo'marnesha' ya ya'netsro). Tarraña te'ña'pa' chaña o' muetseret. Te'pa' o'ca'ye ma'pamta'muen. ²²⁻²³ Ñaña te'ña coyaneshačnoña ñeñt parro yeyemtena, ñetña'pa' ahuañecma ahuanma'muenet o'ch enta'mueñet puepampro ñetña'pa' año' eseshaye' entosayeña puepampro all neretañ. Allempoña huaçherret puepampro' atet serrpare'tatuerryet, allña'pa' año' orrtahuet mellañoñeñ ñeño'ña otahuet Jesús'pa' o'ca'ye tanterra o' alla betterra. Ñeño'marña yapa' ñeñtña atarr yeyore'tene'. ²⁴ Allempoña ñaña allponsheña ñeñt parro yeyemtena, ñetpa'cho'ña allenta

ahuanmuet ñamet puepampro. E'ñe atet otuerrey coyaneshachno, ñetpa'cho'ña ama eseshaye' entosaye.

²⁵ Jesúsñapa' alla otnerraneterr:

—Sapa' ama es sechenoyoña seyoçhro, atarr se'charrtaten seyoçher attoch e'ñe same'ña'huaña ora ñeñt' atet eñosyese't Cristocop allohuen ñeñt' a'mta'yesaye't Yompor po'ñoñ ahuatoteñ. ²⁶ Ama't seño'teñaña ñeñt'cha' Cristotatspa' atetca'ye anareña ñocop ñapa' atarrcha'ca'ye amuerochtaretetuanena çhoch rromats. Elloñapa' o'ch alla çherr esempo allempochña e'ñe cohuen a'cohuentataretterra.

²⁷ Allempoña Jesúsapa' o' yerpatnerraneterr ora allohuen ñeñt' atet anaret añecop ñeñt'cha' Cristotats. E'ñe Moisés po'ñoño'eñ yerpatnomanet ñaña po'potantañeçhno po'ñoñ ñeñt' eñosyestse't Cristocop, ñeñtara ñeñt' a'mta'yesaye't Yompor po'ñoñ ahuat.

²⁸ Allempoñapa' çhampochet anetso all sechenet. Jesúsñapa' çha otenena ñerra'm ñapa' amtoche'ch. ²⁹ Ñetña alla puepateño'etpa' atet ochet: —Allahca'ye yethap arr parro o'ca'ye tsapuenmoch.

Allempoña Jesúsapa' be'tosos allcha' çhapuet. ³⁰ Allempoña anorrçha'toset allcha' rrallme'choset. Jesúsñapa' chetosan pan, parasyoso'tañpsosan pan, shota'tospa' apa'yesosanet. ³¹ Allempo atet ðosa, pueyochresha'ña epsheñapa' çha e'ñe cheme'toset aña' ñeñt'epa'tca'yeña Jesús. E'ñe allorocma ñetpa' o' amnataretterret attoch e'ñe cheme'teret. E'ñe cheme'teretpa' allepa'tcha' ma'natañperranet. ³² Allempoña ñetpa' atet otanna'tyeset:

—Ñeño'marepa'tca'yeña atarr nanac coshatosey ñorra' ama't çha yelquëna yeyoçhro allempo serrpare'tatnomuey toño all yerpatnomya Yompor po'ñoñ ñeñt' atet ana'yesaret e'ñe ñocop.

³³ Ñetña e'ñe allorocma tantrra'teretpa' o' alla ahuanerret Jerusaléno. Allñapa' o' çherret allo'tsa'yen po'potantañ puellsensarnesha' ñeñt' o' çharrasheñaña puechena puesheñarr. Allo'tsen ñaña po'potantañeçhno.

³⁴ Allña ñetpa' atet otueret po'potantañ:

—Po'ñoçhca'ye o' tanterraña Yepartseshar. Elloneñña' orrterrana ñaña Simón.

³⁵ Allempoña ñetpa' serrpare'tueret ñeñt' atet enteret toño ñaña all shota'tosan pan, attoña ñetpa' allña e'ñe cheme'tosetña Jesús.

Atto Jesúsapa' orrterrana allohuen pueyochresha'
(Mt. 28.16-20; Mr. 16.14-18; Jn. 20.19-23)

³⁶ Ñeña atarr otatsetyenetpa' Jesúsñapa' çhepa'tcha' tomhuets e'ñe all chorren allohuen pueyochreshachno. Alla huom'cha'tuenanet, puehuom'cha'tueño'fanetpa' atet otuenanet:

—Te'pa' çhosaña e'ñe cosherrtsa seyoçhro.

³⁷ Tarraña ñetña' çha atarr yore'tuenanet, çha atarr mecha'trra'tet, çha otenapuetañ choyeshe'matste' orrterrannet. ³⁸ Jesúsñapa' atet otuenanet:

—Eso'mare'tña sañapa' çhaña seyoren. Eso'mare'tña sañapa' çhaña atarr se'charrtatenña seyoçher. ³⁹ Te'pa' o'ch secuapuennan not ama't ñaña netac attoch e'ñe seño'tapuerran naca'ye. Sa'p'lapuennan nechets, secua'yesapuennan nechets allochña' o'ch e'ñe seño'tapuenen. Napa' ñeñten echtsofen, choyeshe'matspa' amaca'yeña echtso'teyayeto ñaña

amaca'ye anpateyaye atet o' sentapuenen napa' echtsofenca'ye ñaña anpatenca'ye.

⁴⁰ Allempoñapa' gatuenanet pot ñaña pa'tac. ⁴¹ Ñetñapa' atta cohuanrortapueñet. Ama't atarr coshapueñetañpa' amaña e'ñeye' ame'ñapueñeto ñato' po'ñochte' Jesús. Atta echartatenet pueyoçher tarraña Jesúsñapa' atet oterraneterr:

—¿Arrpa' ama't secheno ama't coñe'ta rreñets?

⁴² Ñetñapa' aña apapueñet pasheparr cac achmare't ñaña pets pocoyeñ all nenan po'moñ. ⁴³ Ñeñta agaphuenpa' o' rrohueñ all chorrenet atfoña ñetpa' entapueñet. ⁴⁴ Allempoñapa' atet oterraneterr:

—Ñeñt atet notase't allempo orameñ allo'tseney e'ñe parro, ora allohuen ñeñt atet anaret ahuatoteñ Yompor po'ñoño nocop, ñeñña te'pa' o' e'ñe etsuerra—e'ñe Moisésoteñ po'ñoñ ñeñt atet anaret ama't ñaña ora allohuen ñeñt quellca'yesone't ñeñt a'mta'yesaye't Yompor po'ñoñ, ama't ñaña ñeñt aquellcarettatse't libro Salmos, te'pa' ñeñña o' e'ñe etsuerra ñeñt atet ana'yesaret nocop ahuatoteñ.

⁴⁵ Allempoñapa' o' çhapat Janet pueyoçhreto allohuen ñoñtsoçhno ñeñt aquellca'yesaret ñocop. ⁴⁶ Jesúsñapa' alla oterraneterr:

—Po'ñoçhpa' allohuen ñoñets ñeñt aquellca'yesaret atetca'ye oten ñeñcha' Cristotosetspa' çhocmach po'ñoçh romos, tarraña poma'pamtañoñapa' o'ch alla tanterra. ⁴⁷ Attoçhña serrpare'teret Cristo e'ñe Jerusalénofeñ erraparen ora allemeñ allohuanen acheñenesheso'mar. Attotcha'ña acheñenesha'pa' o'ch cotape'cherret ello e'ñe cohuen Yomporecop allochñapa' attoçhña o'ch e'ñe apretna'huare'tterret allohuenet po'chñaret. ⁴⁸ Jesúsñapa' atet oterraneterr:

—Te'ña sapa' o'ch sa'poterrnan ora ñeñt allpon atet sentyesne't ama't teme'ttsen. ⁴⁹ Ñaña sa te'pa' ellonet o'ch atet notnerres, po'ñoçhca'ye napa' nemñohuerrnascha' Yompor Puecamquëñ ento't ñeñtcha' e'ñe sechorra'yesaya e'ñe puesheña'ttsos ñeñt atet oten Yompor ñeñtcha' e'ñe apa'yerres. Tarraña sañapa' allasach anetso Jerusaléno, esempohuach chorratasa Parets Puecamquëñ ñeñtcha'ña ahua menca't sepa'yesose' ñeñtcha' apuerres Yompor pue'ntañot.

Allempo a'terr Jesús pue'ntañot

(Mr. 16.19-20)

⁵⁰ Allempoña Jesús err Jerusaléno't, ahuanerran pueyoçhreshaçhno a'yo anetso Betanio. Allñapa' echantosan potpa' bensare'tam'pesyesosanet. ⁵¹ E'ñe puebensare'tam'peñoñanetpa' allñapa' a'tenoché' pue'ntañot o' sohuanenanña pueyoçhreshaçhno.

⁵² Ñetña allempo atet entapueret Jesús ahuer pue'ntañopa' pa'ye'choçhtateñesha' ma'yochnerretpa' ahuanerret Jerusaléno e'ñe pocsheñeshocmañenet. ⁵³ Ñetña allempopa' ellapenete't Parets pa'paclo all atarr aye'choçhtateñañet Yompor. Ñeñtpa' attetepa'ch Nompore. Allohua.

COHUEN ÑOÑETS ÑEÑT' QUELLCA' SAN JUAN

Ñeñt' Po'ñoñ pen Parets ñeñtña acheñetosets ñeñtara ñeñt' Cristoterrets

¹ Ahuatoteñ e'ñe ñanom pa'motroteñ Cristoñapa' eñalla epuet Pompore Parets. Ñañaapa' ñeñtara ñeñtcha' Po'ñoñ pa' Parets tarro'mar ñach eñotaterre' acheñenesha' atet oteñ Yompore Parets. Tarraña ñapa'cho'ña e'ñe attecma partsoten atet partsoten Pompore ñeñt' atarr nanac Parets. ² Allempo errte' ayeçhcataretta pats, ñañaapa' e'ñe parro allo'tsen epuet Pompore Parets. ³ Ñeñto'marña allohuen esocmañen ñeñt' eñall, ñapa' ña e'ñe yeçhcatue' ñeñt' atet muenet epuet Pompore. Ñeñt' allpon eñallpa' ama eñalle ñeñt' ama yeçhcato ña, ama't esotolla, ñocma pueyeçhcatar. ⁴ Ñañaapa' añepa't ñeñt' alloch e'ñe yocrena. Ñeñtña alloch e'ñe yocrenapa' ñeñtcha' yeñotaterre' allohuen ñeñt' cohuen enten Pompore Parets. Ñeñto'mar ñapa' atet pena ñerra'mrrate' puetare' tarro'mar ñapa' ñach a'puetarsañperre' allohuen yocpaña. ⁵ Ama't atet pena sosya'tsañeçhno añe patsro ñerra'mrrate' checmete', ñañaapa' e'ñe a'puetaresuos. Checmete'ñapa' ama't ahuatapa' amach errotenot a'chechmetañperrano ñeñt' puetarñatsar ñeñt' Yompore po'cohuenña.

⁶ Ama't allempo ama orrtena' Cristo ñeñtcha' puetarñatsotosets arr patsro, ñanempa' añ orrtatsa puesheñarr yacma ñeñtpa' añ pa'so'cheñ Juan; ñapa' Yompore llesense'. ⁷ Ñapa' añecop huapa ñach a'potose' attoch huapa Cristo arr patsro ñeñtcha' a'puetarsañperre' allohuen yocpaña. Attoña ña po'ñoñoñpa' ame'ñatosana acheñenesha'. ⁸ Tarraña Juanpa' ama añeyaye ñeñtcha' puetarñatsotosets arr patsro; ñapa' añecpa huapa attoch a'potosan ñeñtcha' a'puetarsañpsañtostsa. ⁹ Allempoña çhap añe patsro ñeñt' puetarñatsotosets tarro'mar añ puetarñatsar ñeñt' e'ñe po'ñoñ ñeñtcha' a'puetarsañpsose' allohuen acheñenesha' pocpaña, ñeñtpa' alltsa, o'ch orrtosa añe patsro.

¹⁰ Ama't añ patspa' ño pueyeçhcatareñ, acheñenesha'ña arr patsropa' arepa'tcha' cohuenaye' agapapeto tarro'mar ama eseshaye' eñotapaye. ¹¹ Ama't arr çhapañ e'ñe ña pamo'tsesheso, pamo'tsesha'ñapa' arepa'tcha' cohuenaye' agapapeto. ¹² Tarraña puesheña'tets ñeñt' e'ñe cohuen agapyesapue', ama't allohuen ñeñtcha' ame'ñerraya ña, ñetñapa' apuerranet llesens attoch e'ñe puechemer perranet Yompore Parets. ¹³ Ñeñt' atto puechemer perrey Yompore ñeñtpa' ama atteyaye atet ye'ñalletena ya ñeñt'ey arromñañey. Tarro'mar ñeñt' atto ye'ñalletena arr patsropa' ñeñtpa' atet anaretey ya ñeñt'ey arromñañey. Ñaña atto puechemer o' perrey Yompore, ñeñtpa' ama añoñeyaye ñeñt' atet cotape'chateney po'psheñeñ acheñ pocpaña. Yapa' añoñña o' puechemer perrey Yompore atto o' muenaterrey e'ñe ña pocpaña.

¹⁴ Cristoña ñeñt' Po'ñoñ pen Yompore o' acheñetos arr patsro, o' yeychañ e'ñe parro mame' añe patsro. Ñapa' atarr amuerañtosa. Ñaña atto yeçhatosey Yompore po'ñoñ ñeñtña ñoñetspa' e'ñe po'ñoñ

ateŧ, ama shequëntsoyaye ama't mamesha. Ñaña yapa' chocma yentoñe't po'cohuenña. Ñeñña po'cohuenña' ateŧ ñerra'm Pompore ñeñ po'patrrore pene' ña. ¹⁵ Allempoña Juan puerranarotpa' a'potan Cristo, ñeñpa' ateŧ eñora ñocop:

—Añmapa' ñeñca'yeña notase't ahuaña, ñeñcha' huapatsa chenta' ñapa' atarr ahuaencatesha', nañapa' ama tama ahuaencateyayno, tarro'mar ñapa' ahuatoteñ eñalla. Ama't allempo ne'ñalleta na, ñaña'pa' eñalla. Ñeñpa' allohua ateŧ ot Juan ñenmañ Cristocop.

¹⁶ Ñapa' atarr amuerañtosa ñeñto'marña allohueneypa' atarr bensare'tampeney. Allo'na sen yebensare'tampesnene'. ¹⁷ Ñoñets ñeñ ateŧ anareŧ ahuatoteña' ñeñ quellconay Moisés ahuaŧ. Tarraña Jesucristopa' ñaña orrtatose'ña muereñets ñaña ñapa' añ orrtatonay ñoñets ñeñ e'ñe po'ñoçh Yompor po'ñoñ alloch yequeshperra. ¹⁸ Yompor Paretspa' ama't ahuaŧapa' ama eseshaye' puentare. Po'patrroreña ñeñ Cristosets ñeñpa'cho'ña Parets ñeñ e'ñe parro attecmet; ñapa' ña yeñotaterre'ña ateŧ penaña Pompore Parets.

Juan ñeñ apatañtetsa Yomporecop, ñapa' atarr cohuentatosan Jesucristo

(Mt. 3.11-12; Mr. 1.7-8; Lc. 3.15-17)

¹⁹ Allempo judionesha' pa'mcha'tareternesha' ñetña'pa' mueñet acheñ Jerusalénoŧ ñeñcha' ahuanmatsa Juanesho. Añ mueñet judionesha' po'cornaneshar ñaña levitanesha' ñeñ po'taruas pene' o'ch torrenet Parets pa'paclo. Ñetpa' añecop amñareŧtet ñetcha' a'p'to'toset Juan ñapa' esesha'te'ña. O'ña çhapuet ñeshopa' ateŧ otoset:

—Papa' çeseshape'tña, ama't añeyaype ñeñtepa' Cristoterrets?

²⁰ Juanña'pa' ama a'nasoto; atto a'metapa' ñapa' ateŧ otapanet:

—Napa' amaca'ye añeyayno ñeñcha' Cristoterrets.

²¹ Ñetña'pa' alla otereterr:

—Ñeñtepa' çeseshape'tña, ama't añeyaype Elías ñeñ a'mtaye't ahuaŧ Yompor po'ñoñ?

Ñaña'pa' ateŧ oterraneterr:

—Amaca'ye ñeñeyayno.

Ñetña'pa' alla a'p'to'tereterr:

—Amapa' ñato' çañepte' ñeñtepa' a'mterre' Yompor po'ñoñ ñeñ yecuen?

Ñaña'pa' alla oterraneterr:

—Amaca'ye ñeñeyayno.

²² Ñetña'pa' alla otereterr:

—Ñeñtepa' çeseshape'tña pa? Yapa' yemneñca'ye o'ch potey allochña'pa' o'ch yotera' ñeñ yemñene'. Çerrofena'tcha'ña poteyña pocop?

²³ Ñaña'pa' ateŧ oterraneterr:

—Napa' nocopca'ye eñose'tña Isaías ñeñ a'mtaye't Yompor po'ñoñ ahuaŧ. Allempopa' atetca' ote't:

E'morrterrach puesheñarr po'ñoñ all amayo allcha' serrpare'taterranña achenesha'. Puerranarotpa' añcha' toma'ntaterranet toñ ñapa' atetca'ca'ye oterranet: “Sa'cohuenetyes toñ allcha' oñmos Partsesha' o'ch e'ñe sa'paçharretyesoñ pa'tep.”

²⁴ Ñehua, ñeñt amñareñtatsa Juanesho, ñetpa' añca'ye mueñenahuet ñeñt fariseonesha' ñeñtara judionesha' pa'mñcha'tareñernesha'. ²⁵ Ñetñapa' alla otereterr Juan:

—Arepa't Cristoyaypepa' eso'maruañaca'yeña p̄apatenña Yomporecop, arepa't Elíasoyape, arepa't añeyape ñeñtcha' a'mterre' Yompor po'ñoñ.

²⁶ Juanñapa' atet oterraneterr:

—Napa' ama't napatyen Yomporecoppa' e'ñeca'ye oñochaya napatyenanet. Tarraña o' chap sesho po'psheñeñ ñeñt ello atarr sherbets, tarraña sapa' amaca'ye señoñeña sa. ²⁷ Ñapa' ama'tcha' chenta huapapa' ñapa' ñeñtca'yeña ello atarr sherbets; nañapa' ama es nesherbena attoch ama't po'sapatreçhapa' o'ch nepyanpes.

²⁸ Ñehua, allpa' atetca'ye penet all oteñet Betábara allara Jordanaso yonñta'n tarro'mar Juanpa' allca'ye apatyenanña acheñenesha' Yomporecop.

Jesusp̄a' ñeñt atma'ntataret carrnero ñeñt amtsarettatse't ochñartsocop

²⁹ Tsapañña Juan allempo entapan Jesús ñeshoneñ en, ñañaapa' atet otan acheñenesha':

—Añca'yeña ñeñt o' llesenserr Yompor ñeñtcha' Po'carrneror pen, ñach yahuanmanperre' yo'chñar allohueney ñeñtey añe patsro'tsa'yeney, tarro'mar ñach rromuerrets yo'chñarecop atetcha' perra atet amtsarettena carrnero ochñartsocop. ³⁰ Añmapa' ñeñtca'yeña notase't ahuaña: “Ñeñtcha' huapatsa chenta'pa' ñapa' atarr ahuamencatesha', nañapa' ama tama ahuamencateyayno, tarro'mar ñapa' ahuatoteñ eñalla. Ama't allempo ne'ñalleta na, ñañaapa' eñalla.” ³¹ Ama't na ahuañmo'chapa' ama neñoteñe esesha'te'ña ñeñtcha' huapatsa chenta' ñeñtcha' Cristoterrets. Tarraña napa' añeçpaña nohuena nach apatyenomue' acheñenesha' oño, attochña norrtaterrñañ israelena'tarneshacop ñeñt po'ñoñch Puechemer pen Yompor.

³² Allempoña Juanpa' eñotatan acheñenesha' ñapa' atet otanet:

—Na ahuaña allempo napatañ Jesús̄pa' Yomporña Puecamquëñ e'ñe atet nentañ ñerra'mrate' yeñ o' sohua'nma entoñ, chap e'ñe Jesúsesho. ³³ Ama't allempo napa' ama neñoteñe ñeñte'ña Yompor Puechemer tarraña Yompor ñeñt o' llesenserren attoch napatyes acheñenesha' oño, ñapa' atetca'ye otenen: “Esempoch pent o' sohua'nma Necamquëñ o'ch chap e'ñe ñesho ñeñtcha' chorrosaya, ñapa' ñeñtcha'ca'yeña chorraterahuetña Parets Puecamquëñ.” ³⁴ Na po'ñoçhpa' o'ca'ye neñch ñeñto'mar te'pa' neñotatenes ñeñtca'yeña Yompor Puechemer.

Ñeñt ñanom pueyochresha' p̄a' Jesús

³⁵ Tsapañña' po'pocheño all ten Juan epuet epsheña pueyochresha'. ³⁶ Coñuan Jesús all chopeñe'chen a'yeneñ, alla oterraneterr:

—Añca'yeña ñeñt Po'carrneror pen Yompor.

³⁷ Ñeñña epsheña pueyochresha' allempo e'met atet oteñ Juan, ñetñapa' allenta co'ta'nmet Jesús. ³⁸ Puetallesnomtsaña Jesús̄pa' entapanet co'ta'neñet chenta' ñañaapa' atet otapanet:

—¿Eso'tña semnen?

Ñetñapa' atet ochet:

—Maestro, ¿erra'tña peçhap?

³⁹ Ñaña'pa' atet otanet:

—Socterrenca'ye o'ch senteña'.

Ñetña'pa' allenta co'ta'neret Jesús o'ch enteñeta' all a'posa. Alla a'poset ñamet ñeñte yetro tarro'mar allempopa' o' mañamena o'ch ellerren.

⁴⁰ Ñehua, ñeñña epsheño'maret ñeñt e'mue' atet oten Juan ñeñt cote' Jesús, puesheñarr ñeñpa' Andrés ñeñt Simón Pedro pa'mo'nasheñ. ⁴¹ Andrésña'pa' allorocma ahuer e'nerraya' Simón; o'ña entera'pa' atet otuerr:

—Yapa' o'ca'ye yenter Mesías. (Ñehua, ñeñña ñoñets Mesías aña'ye otenet ñeñtcha' Cristoterrets.)

⁴² Andrésña'pa' allenta anerran pa'mo'nasheñ Simón Jesúsesho. Jesúsña'pa' cohuapue'pa' atet otaþ:

—Pa'tña Simón, ñeñteþ puechemer pen Jonás. Te'pa' nesocherreþcha' Cefas (ñeñtara so'chñets ñeñt otenet griegacho Pedro).

Atto Jesús'pa' chore'tan Felipe ñaña Natanael atoch pueyochresha' per-ranet

⁴³ Tsapatña Jesús'pa' sechena o'ch ahuer Galileo. Allña entuenan Felipe ñaña'pa' atet otueñ:

—Ama't pemno o'ch poctenen.

⁴⁴ Ñehua, Felipe'pa'cho'ña galileo'marnesha', ña pa'netserpa' añ pa'so'cheñ Betsaida ñeñtara ñaña Andrés pa'netser ñaña Pedro.

⁴⁵ Felipeña'pa' entuenan Natanaelpa' atet otueñ:

—Yapa' o'ca'ye yenter ñeñt ñocop quellquë't Moisés all orrtatan ñoñets ñeñt atet anaret, ñaña ñocop quellquë't ñeñt a'nta'yesaye't Yompor po'ñoñ. Añepa'tca'ye Jesús ñeñt huetsa Nazaretot ñeñt José puechemer.

⁴⁶ Natanaelña'pa' atet otapan Felipe:

—Nazaretotpa' ama't ahuatapa' amaca'ye huenoña ñeñt e'ñe cohuen acheñ.

Felipeña'pa' atet otererr:

—Po'ño'ch orraca'ye o'ch penteña'.

⁴⁷ Natanaelpa' allenta ahuo' o'ch entenana' Jesús. Jesúsña'pa' entapan Natanaelpa' ñaña'pa' atet eñora ñocop:

—Aña'yeña po'ño'ch puesheñarr israelnesha' ñapa' amaca'ye shequëno ama't mamesha.

⁴⁸ Natanaelña'pa' atet otosan Jesús:

—Napa' ¿erroténoté'tña peñotenen? Amaca'ye pentarno.

Jesúsña'pa' atet otererr:

—Allempo ama a'sechenþa' Felipe nesho, allempo þapa' alla þanen mañto higocho ñaña'pa' nenteneþca'ye.

⁴⁹ Natanaelña'pa' atet otererr:

—Maestrocha' pepa'tña Yompor Puechemereþ. Pepa'tña Ancha'taret ñeñt atarr cohuen allohuen israelnesha'.

⁵⁰ Jesúsña'pa' otererr:

—Napa' o' notap napa' nenteneþ allempo þanen mañto higocho, ñeñto marte'ña o' þame'ña'na. Te'ña'pa' o'ch notas, elloña te'pa' nanaccha' senterrnan nepartsoña ñeñt ama tama sentennana'.

⁵¹ Jesúsña'pa' alla otererr:

—Po'ño'chca' notenes, senterrcha' enet atoraret ñaña Yompor po'mllaño'eñrenesha' a'tachenet ñaña sohuachenet e'ñe nesho, na Ñeñten Acheñetosets.

2

Allempo sena'ta puesheñarr yacma all anetso añ pa'so'cheñ Caná allara Galileo

¹ O'ña ma'pamuetuerr allempo çherr Jesús Galileo, allña anetso Caná atarr coshaprechet puesheñarr yacma ñeññ sena'tetsa. Jesúsña pachorpa' allo'tsen. ² Jesúsña epuet pueyochresha'pa' ñetpa'çho'ña ahua'ñareñtet allcha' rrallme'chapreteneta'. ³ Allñapa' çha huañañset vinos. Jesúsña'pa' atet och pachor:

—Te'pa' ama eñalle vinos, o'çha huañañset.

⁴ Jesúsña'pa' atet otan pachor:

—Achocha' eso'mare'tña atet ÷otenenña na. Nocoppa' amaca'ye çhena' allempoch es norrtatyes.

⁵ Tarraña ama't atet otaña' pachorña'pa' atet otan ñeññ sherbets all:

—Ñerra'm errotencha' otas nechoyorpa' saña'pa' e'ñech atet seña.

⁶ Ñehua, allpa' allo'tsen pechapña orrot mapyem. Ñeñña orrotechnopa' tama ateshamerr, puerña'ttso orrotpa' ñato' sente' oñ epa galon amapa' ma'pate' galon sets oñ attoch chorraesua. Ñeññ orrotechnopa' allecma nenet oñ alloña a'cohuentatena judionesha' Partso-cop ñeññ atet anarettenet ñocpuet. ⁷ Allñapa' atet otan Jesús ñeññ sherbets all:

—Te'pa' o'ch se'chorrayes oñ orroto.

Ñetña'pa' atetçho' pet e'ñe e'chorraesuahuet oñ. ⁸ Allempoña o' e'chorraesuetpa' Jesúsña'pa' atet oterraneter:

—Te'ña'pa' o'ch seshe' coñe'tpa' o'ch sanem allo'tsen ane'tañ.

Ñetña'pa' atetçho' pet. ⁹ Allempoña ane'taña'pa' allenta amllan oñ ñeññ a'pnasaret vinos ñaña'pa' ama eñoche errofte' o' huapatetña vinos. Aña eñotene' ñeññ sherbenahuet all ñeññ etasote' oñ. Allempoña amlla'huan vinospa' ñaña'pa' allenta agotan ñeññ sena'tetsa. ¹⁰ Ñeñña'pa' atet och:

—Ñerra'm çho yorrrpa' añcha'ña ñanom yorrtat ñeññ e'ñe cohuen vinos. O'chña yonuahue ahua'ñareñ e'ñe cohuen vinospa' allempochña yapanet ñaña ñeññ ama e'ñe cohuenayaye. Tarraña paña'pa' amaña atteye' pepeno. Ñeñña'pa' çha'tña paña'tuaña vinos ñeññ e'ñe cohuen tayaño' ÷orrtach. (Ane'tañña'pa' atet otan ñeññ sena'tetsa tarro'mar ñapa' ama eñoteñe.)

¹¹ All ñanom entatanet Jesús po'partsoña'pa' ñeñña'pa' arr Cano allara Galileo. Attoca'yeña orrtatanetña Jesús po'partsoteña. Allempoña pueyochresha'pa' o' eñochet po'ñoçhepa't ñapa' Parets attoña e'ñe ame'nyet.

¹² Allempoña Jesús'pa' ahuo' Capernaumo pachore'na ñaña pa'mo'nasheñeçho, ñaña allohuen pueyochresha'. Allñapa' alla allponmateneta'.

Atto Jesús'pa' a'cohuentatosan Parets pa'paquëll
(Mt. 21.12-13; Mr. 11.15-18; Lc. 19.45-46)

¹³ Allempoña çharmoch pascuapo allempoch alla cosherrerr judionesha'. Jesúsña'pa' ahuer Jerusalem. ¹⁴ Allña Parets pa'paclopa' entue-nan ñeññ pomuene' po'huacsher, ñaña carrnero, ñaña yep; ñaña ñeññ camya'yenahuet po'çllayoret'pa' ñetpa'çho'ña alla anorrçhenet. ¹⁵ Allñapa' pella'tosan apeçh pashtareçh. E'ñe matatuosan allohuen ñeññ pomatsre'tyetsa Parets pa'paclo, e'ñe ahuanerret po'huacsher

ñaña po'carrneroret. Ñaña ñeñt camya'yenahuet po'çllayoretpa' e'ñe yo'patsetamipesuosanet po'çllayoret patso. E'ñe a'coye'tamipesuosanet all na'yenet po'çllayoret. ¹⁶Allpa' atet otosan ñeñt pomuene' yeḡ:

—Te'pa' sahanerr añ arrot. Amach atet seḡatstono Nompör pa'paquëll atet ñerra'mrrate' ñeñt e'ñe pocollenochaya allecma pomatsre'tyenet.

¹⁷Allempoña pueyochresha'pa' allenta yerpuet ñoñets ñeñt anareḡ ahuatoteñ ñocop, ñeñtpa' atet oten: “Napa' atarrcha' nempa'tonaḡ pepaquëll ama'tcha' ñeñto'mare'na muetserrnetañ.”

¹⁸Allempoña judionesha' pa'ncha'tareternesha'pa' atet ochet:

—Añña ḡorrtatosnay pepartsoña allochñapa' attochña yeñotaḡ po'ñoçhpa' papa' allsensareteḡte', te'ñapa' atto' peḡosnayte' añeçhno.

¹⁹Jesúsñapa' atet oterraneterr:

—Sapa' ama'tcha' sa'matoñ añ Parets pa'paquëllpa' poma'pamtañoña napa' o'ch alla naḡomater.

²⁰Judionesha'ñapa' alla otereterr:

—Añ atto e'nuoñet Parets pa'paquëllpa' atarr atomat atorrareḡta e'ñe pa'tatsoch çharrohua char puechena pechap. Ta', ḡaña'pa' çpo'ñoçhcha' e'ñeçh poma'pamtañoçma yeḡpa' o'ch alla ḡatomatuer?

²¹Ñehua, Jesús'pa' añeḡa't otanet ña po'chets ñeñteḡa't pa'paquëll pen Parets. ²²Ñehua, çhap allempo muetseret Jesús allempoña tanterrapa' pueyochreshaçhnoñapa' allenta yerpuerret ñeñt atet ote't Jesús allempo. Ñeñto'marña allempo Jesús pueyochreshaçhnopa' atarr yemterrñañet Yompör po'ñoñ ñeñt anuaret ahuatoteñ, ama't ñaña Jesús po'ñoñ atarr ame'ñeret.

Jesús'pa' e'ñe eñotueney allohueney ñeñt atet yoctape'chyen yeyoçhro

²³Allempoña allo'tsen Jesús Jerusaléño, all coshapretenet pascuapo shonte' acheñenesha' enteññañet ñeñt atto orrtatenanet po'partsoña all, ñeñto'marña allpa' shonte' ame'ñaya. ²⁴Tarraña Jesús'pa' ama yemtanete'te ñet, tarro'mar ñapa' eñotanete't atet allohueney acheñey çhocma yoctape'chyen ñeñt yemnen ya. ²⁵Ñapa' ama e'nenano ama't puesheñarra ñeñtcha' ote' ñeñt atet yoctape'chyen allohueney acheñey. Tarro'mar ñapa' çhocma eñoteney atet yoctape'chyen allohueney acheñey.

3

Allempo Nicodemopa' huapa Jesúsesho

¹Allempopa' eñall puesheñarr yacma ñeñt fariseo ñeñt soçhetsa Nicodemo. Ñeñtñapa' puesheñarr ñeñt añcha'tarettetsa judioneshacop. ²Ñaña'pa' huapa Jesúsesho tsapopa' atet otos:

—Maestrocha' yeñoteneḡ ḡapa' añ pellsensene' Yompör attoch peçhatosey cohuen tarro'mar yapa' yeñoteñ añach orrtatyene' partsoteñets ñeñt ahuamencat pen Yompör.

³Jesúsñapa' atet otaḡ:

—E'ñe po'ñoçh notaḡ, esesha'ch ama eñalleterrtso ello ñetñapa' amach errotenot pueyochresha' perraneto Yompör.

⁴Nicodemoñapa' atet otererr:

—Amate' errotenot ye'ñalletterroña po'pocheñoña' o'ca'ye yepo'nme'ten. Errotenotuate'ñaca' yecherrerrña yachor pa'to attotcha' ye'ñalletterr po'pocheño.

⁵ Jesúsñapa' atet otererr:

—E'ñe po'ñoçh noteneþ, erra'tsencha' ama eñallettertso oñoñ ñaña Yompor Puecamquëñoñ, amate' errotenot pueyochresha' perraneto Yompor ñeñño'marña amach eshec o'patapreteretoña Yompor po'cohuenña ñeññ atto ayochreshattena ña. ⁶ Ñeññ atto eñalletena arromñañatesha'pa' ñeññpa' arromñaña. Tarraña ñeññcha' eñallettertsa Parets Puecamquëñoñ, ñeññpa' ñeññña camuecñetsotets ñeñññapa' ama arromñañeshayaye. ⁷ Ñeññ atet noteneþ, “allohuenespa' añ sepalltena o'ch se'ñalletterr ello”, þapa' amach ÷ha pe'charrtatsto peyoçhro, amach ÷ha þotatsto año'te' errotenot pe'ñalletterroña ello po'pocheño. ⁸ Ñeññpa' e'ñe atet pena ñerra'mrrate' mör. Morrpa' erra muene'pa' allcha' mörren. Pe'muente' atet ma'moreten, ama peñoteñe errotte'ña huena ñaña errate'ña sen. Atetcha' perra ñaña allohuen erra'tsencha' eñallettertsa Yompor Puecamquëñoñ.

⁹ Nicodemoñapa' alla a'þto'tererr:

—Ñeññpa' ¿errofena'tña añ?

¹⁰ Jesúsñapa' atet otererr:

—Papa' ama't aþepeñ israelnesha' po'maestror, ama't peñotenña añ. ¹¹ E'ñe po'ñoçh noteneþ: Allohueney ya ñeññ yeñotenpa' ñeññcha'ña yeserrpare'ten ñaña ñeññ yentyenpa' ñeññcha'ña ya'poten tarraña sapa' ama ÷hennasoña seyoçhro añ ñeññ ya'poten. ¹² Ñerra'm ñaña notenes ñeññ atet yeyçhena añe patsro, saña ñerra'm ama same'ñennopa' errotenotuate'ñaca'ye notasña ñaña ento'mar ñeññ Yomporecop.

¹³ Ama eñalle ama't puesheñarra ñeññcha' a'tapueets ento ñaña ñeññcha' sohuerrtsa ñeññfara entot. Napña na Ñeññen Acheñetosets ñeññen sohuatsa entot, napña nentar Nompor pue'ntaño tarro'mar napa' ñeññ na'netser nepen. ¹⁴ Ñehua, ahuaþ Moiséspa' yeçhcatan ñeññ atma'ntatareþ shecheþ all amayo, ñeñññapa' huanquë'tsachopa' o'echantamþes enonet. Atto Moisés echantamþsan shecheþ all amayopa', napa'çho'ña ñeññ poctetsa nocop atetcha' perrnet namã, corsoçhotcha' echantamþsareten. ¹⁵ Allochñapa' allohuen ama't erra'tsena ñeññcha' name'ñerraya na, ñetñapa' amach chenquërreto, e'ñech corretseta pocsheñeshocmañen e'ñe tayoteñ errponañohuen.

Atto atarr morrentenya Yompor allohueney acheñeneshay

¹⁶ 'Atto atarr morrentenya Yompor allohueney acheñeneshay arr patsro ñeñño'marña apuey Puechemer ñeññ po'patror pen, allochñapa' allohuen ñerra'm esesha' ame'ñerraya ña amach chenquërreto, ñetñapa' corretsetach pocsheñeshocmañen e'ñe tayoteñ errponañohuen. ¹⁷ Yomporpa' amaca'ye añecpaye' mueñanoña Puechemer arr patsro attoch mueñosan acheñeneshay coñcheñtso. Ñapa' añecopña mueñe attoch ñach a'queshpatose'ña acheñeneshay arr patsro.

¹⁸ 'Erra'tsencha' ame'ñerraya ña ñetñapa' amach amñare'tterreto coñcheñtso. Tarraña ñeññcha' ama ame'ñerrayo ñocpueññapa' anare'ttet attoch amñare'tterret coñcheñtso tarro'mar ñetpa' ama ame'ñoñeto Yompor Puechemer ñeññ po'patror pen. ¹⁹ Ñaña'pa' o' huapa arr

patsro attoch yečhatosey ñeñt e'ñe cohuen enten Yompor, attoña a'puetarsam̄psosnay yocpañña. Tarraña shonte' acheñenesha' ñetñapa' ama mueneto o'ch a'puetarsam̄psarettet pocpaññet. Ñetpa' aña muenenet checmete' tarro'mar amaca'ye masosyaye' cotape'chyeneto. Ñeñto'marña ñetpa' attotcha'ña amñare'terret coñcheñtso. ²⁰ Allohuen ñeñt ama masosyaye' cotape'chyeneto ñetpa' ama cohuenaye' enteñetoña Cristo ñeñt a'puetarsam̄pene' allohuene'y yocpañña. Ñeñto'marña ama eneto allo'tsen ñeñt a'puetarsam̄psañtetsa taye'to'te' orrtatare'ttet pocpaññet ñeñt ama masosyo. ²¹ Añña ñeñt e'ñe atet pene' ñeñt po'ñoč cohuen enten Yompor, ñetpa' e'ñe pocte' enteñet o'ch onet allo'tsen ñeñt a'puetarsam̄psañtetsa tarro'mar ñetpa' añ muenenet o'ch eñotateret po'potantañ ñetpa' Yompor ahuamencat penahuet ñeñto'marña ñetpa' añ orrtatyenet ñeñt cohuen enten Yompor.

Allempo Juan ñeñt apatañtetsa Yomporecop, ñapa' alla cohuentaterran-err Jesús

²² Allempoña Jesúsapa' ahuerrerr Judeo epuet pueyochresha'. Allñapa' alla allponmat epuet pueyochresha'. Allña Jesúsapa' apatyesan acheñenesha' Yomporecop. ²³ Ñaña allempo Juanpa'cho'ña arr apatyenan acheñenesha' all oteñet Enón e'ñe alla allame'tets Salimo, tarro'mar allpa' shonte' oñečno. Acheñenesha'pa'cho'ña shonte' huacha'tyeset attoch apatare'tetyeset Yomporecop. ²⁴ Ñehua, allempopa' ama yottañpeñeta' Juan.

²⁵ Allempoña Juan pueyochresha'pa' serrpare'tet epuet judionesha'. Allpa' añ serrpare'tatanna'tet este' pocetsaña attoch ya'cohuentatare'tta Partsocop, añte' ñeñt atto apatyen Juan amapa' ñato' añte' atto apatyen Jesús. ²⁶ Ñeñto'marña ahuanmuet Juaneshopa' ñetñapa' atet otoset:

—Maestrocha' ñeñt epaḡ ahuaña yom̄ta'n Jordanaso, ñeñt peserrpare'tatosey, ñapa'cho'ña ñepa'tca'yeña apatyets ñaña. Ñeñto'marña allohuenetpa' o'ca'ye ahuanmuet ñesho.

²⁷ Juanñapa' atet otapanet:

—Ama't puesheñarroḡeyapa' ama ahuamencateyayye ñerra'm ama Yompor ahuamencat yeḡaye. ²⁸ Sapa' ama't señoḡeñe ñeñt atet notuanmas ahuaña, napa' ama añeyayno ñeñtencha' Cristoterrets. Napa' atta mueñan nanom attoch nota. ²⁹ Jesúsapa' e'ñech atet netma'ntacha atet ñerra'mrate' yacma ñeñt sena'tetsa. Ñehua, ñeñt sena'tetsa ñeñtñaca'yeña aguēne'ña coyanesha' ñeñtcha' puetapor ḡa'. Tarraña ñeñtña pueyempa' ñeñt parro epuet ten ñerra'm añ e'm pueyem po'ñoñ ñeñt sena'tetsapa' ñañapa' atarrcha' coshapretana pueyem. Ñeñto'marña na te'pa' atarr nocshapreteña Jesús. ³⁰ Jesúsapa' e'ñe pocte' allo'nepa'ñaca'yeña enteñet po'ñočpa' ñaca'yeña atarr sherbets. Nañapa' e'ñe pocte' allo'nepa'ña entennet napa' ama e'ñeye' nesherbeno. Arrpa' allohua atet ot Juan Cristocop.

Atto yeñoteñ ñeñt huetsa entot Yomporeshot ñeñtca'yeña atarr sherbets

³¹ Ñehua, yeñoteñ ñeñt huetsa entot Yomporeshot eñchetepa' ñapa' atarrca'ye añcha'tare't. Tarraña ñeñt patso'marnesha' ñeñtḡpa' alla eñorena patso'mar. Ñeñt huetsa entot Yomporeshot eñchetepa' ñapa' atarrca'ye añcha'tare't. ³² Tarro'mar allohuen ñeñt entyen Pomporeshot ñaña

ñeñt allpon e'myen all, ñapa' ñeñtca'yeña serrpare'tateney, tarraña ama't puesheñarrofapa' ama eseshaye' chapahuetoña pueyoçhreto ñeñt atet otenanet. ³³ Ñeñt çhapa pueyoçhro ñeñt atet serrpare'tatenanet ñeñt huapatsa Yomporeshot ñetñapa' atet otet: Yomporpa' e'ñete' po'ñoçh atet oten Puechemerecop. ³⁴ Tarro'mar ñeñt llesensa' Yomporpa' Yomporo po'ñoño eñorena tarro'mar Yomporpa' ama atparetayaya chor-ratenanetoña Puecamqueñ. ³⁵ Yomporpa' atarrca'ye nanac muere-nanaña Puechemer. Ñeño'marña aphuahueñ allohuen allpon eñall allochñapa' ñach pomnaren penahuet. ³⁶ Eseshach ame'ñenaya Yompor Puechemer ñetpa' corretsetach pocsheñeshocmañen tayoteñ ama't er-ponañohuen. Añña ñeñt atpare'tene' Yompor Puechemer ñetpa' amach enterreto ñeñt correñtsor. Ñetñapa' çhachca'ye coñchaterranet Yompor.

4

Allempo Jesúsapa' serrpare't epuet coyanesha' samario'marnesha'

¹⁻³ Allempoña Jesúsapa' atarr ayochreshatta nanac, ello metanenan atto yochresha'ten Juan. Ñaña atarr apatyenan acheñenesha' Yomporcop. Ñehua, ama ñaye' apatenahueto, aña apatenahuet pueyoçhresha'. Ñeño'marña allempo e'mare'ch fariseonesha' ñeñfara judionesha' pa'mcha'tareternesha'. Jesúsña allempo eñoçh atto fariseonesha' o' eñoçhet ña atarr nanac ayochreshatta, ñañaapa' allenta queçhpa'nerran Judea, o' alla ahuerr Galileo.

⁴ Toññaapa' e'ñe arr oñen Samario'mar, ñeño'marña all oñerrña Jesús. ⁵ O'ña çhap Samariopa' allotñapa' o' ahuen paterr anetso ñeñtpa' añ pa'so'cheñ Sicar. Añña anets Sicarpa' allame'ttso'tsena Jacob po'patseñ ñeñt apa'nman puechemer José ahuat. ⁶ Allñapa' all poten oñ ñeñt po'ñeñ pe't Jacob. Jesúsñaapa' nanac tsanom puechope'cheñoñ ñeño'marña anorros e'ñe allame'tets apco'sato. Allempopa' e'ñe pocto'tsen atsne'. ⁷⁻⁸ Allñapa' machayota huapa puesheñarr coyanesha' ñeñt samario'marnesha' ñeñtcha' etenaya' oñ. Jesúsñaapa' atet otaþ:

—Napa' nemneñ o'ch þaposen oñ.

Ñehua, allempopa' pueyoçhrenesha'ñapa' o' ahuanmuet anetso o'ch rañteneta' ñeñtcha' rret.

⁹ Coyanesha'ña samario'marnesha'pa' atet otos:

—Papa' judioneshappa' eso'mare'tcha'ña penamapuenña oñ o'ch napaþ. Papa' peñotenen napa' ñeñten samario'marneshan.

(Ñeño'marña atet otos tarro'mar judionesha'pa' ama amo'tstanneneto epuet samario'marnesha'.) ¹⁰ Jesúsñaapa' atet otererr:

—Ñerra'm peñoteñeñ ñeñt e'ñe atta apueney Yompor, ñaña ñerra'm peñotenoñ na ñeñten potene' þapuen oñ, þapa' o'ch penamuennoñ na nañapa' o'ch napaspeñ oñ cohuen alloch e'ñe þocrañ.

Ñeñt oteñ o'ch ap cohuen oñ, añ oteñ Yompor po'cohuenña, tarraña coyanesha'ñapa' ama eñoche, ¹¹ ñeño'marña atet otererr:

—Ama Ayochreshate pecheno alloch pet oñ. Oñpa' nanacramtso o'pono'tsen. Errotuamtsoch peyoraña oñ ñeñt e'ñe cohuen alloch e'ñe yocra. ¹² Ahuat yatañ Jacoboñ ñeñt yapa'nmue' añ oñ ñapa' ñeñt orre't ñaña puechemerneshañ ñaña po'huacsherneshañ.

Papa' añeḡhuate'ca'ye ñeñteḡ ello metanene' yatañ Jacoboñ atto añcha'tarette'ña.

¹³ Jesúsñapa' atet otererr:

—Allohuen ñeñt orrene' añ oñpa' elloch alla oñpa'terreter. ¹⁴ Tarraña ñerra'm esesha' orre' oñ ñeñtcha' napanet na ama't ahuatapa' amach oñpa'terreto. Ñeñtcha' napanet na oñ, e'ñe pueyočhretopa' puenasanetcha' atet ñerra'mrrate' allot' poten oñ, amach huañerro ama't ahuata. Attochña ñetpa' corretsetach tayoteñ ama't errponañohuen.

¹⁵ Coyanesha'ñapa' alla otererr:

—Ñeñteḡñapa' Ayochreshate ḡapuen ñeñt oñer allochñapa' amach alla no'ñpa'tererro allochñapa' amach alla nohuerre'te eterrayerr arr oñ.

¹⁶ Jesúsñapa' atet otererr:

—Te'pa' orrerreḡ, o'ch pečhore'tera' perrollar, allempochña alla pehuerra arr.

¹⁷ Coyanesha'ñapa' atet otererr:

—Napa' amarramtso arrollareteno.

Jesúsñapa' atet otererr:

—E'ñe po'ñočh atet ḡoten año' arrollareteyape. ¹⁸ Tarro'mar amnarsheña perrollareshe'mañ ñeñt pueyoruareḡ. Ñaña ñeñt peyorene' te'pa'čho'ña ama perrollareyape. Ñeñt'pa' e'ñe po'ñočh atet ḡoten.

¹⁹ Allempoña e'man atet oteña' coyanesha'ñapa' atet otererr:

—Ayochreshate, te'ña po'ñočhpa' o' neñotaḡ ḡapa' añepeta't ñeñteḡ a'mtene' Yepapar po'ñoñ. ²⁰ Yatañneshañ samario'marnesha'pa' ñetpa' concorpuete'ñ ma'yochatset arr añ aspentero. Tarraña sa ñeñtes judioneshaspa' sapa' čha soten año paterr poctetsa Jerusaléño'chña yeconcorpuena' allohueneŷ.

²¹ Jesúsñapa' alla otererr:

—Nočheshacha' ḡame'ñona ñeñt atet noteneḡ tarro'mar te'pa' o' čhap ñerra'm esempoch sema'yocheña Yompor, ama sepallteno o'ch seconcorpuena Apa añ aspentero ama't ñaña Jerusaléño. ²² Saña ñeñtes samario'marneshas año semchatse'tyen ñeñt ama señoteno. Yaña ñeñteŷ judioneshay añ yeconcorpana'tena ñeñt e'ñe po'ñočh yeñoten, tarro'mar judionesha'pa' ñetpa' o' orrtateret ñeñtcha' a'quesḡpatañterrtsa. ²³ Tarro'mar te'pa' o' čhap ñeñtcha' e'ñe po'ñočh aye'chočhtaterre' Yompor, arrcha'ca'ye aye'chočhtatoñet e'ñe ñet pueyočhreto. Ñeñtcha' atet aye'chočhtaterrñañet ñeñtña e'ñe po'ñočh atet muenen Yompor. ²⁴ Yompor Paretspa' ñapa' ña camuecñetsotets amaca'ye entpahuoyaye. Ñeñto'marña ñeñtcha' e'ñe po'ñočh aye'chočhtaterre' ña, arrcha'ca'ye aye'chočhtatoñet e'ñe ñet pueyočhreto, ñeñt'pa'čho'ña amaca'ye entpahuoyaye. Tarro'mar ñeñtcha' atet aye'chočhtaterrñañet ñeñtña po'ñočh atet muenen Yompor.

²⁵ Coyanesha'ñapa' alla otererr:

—Napa' neñoteñ añ Mesíaspa' huapach ñeñtara ñeñt yoten Cristo. Ñerra'm ña huapatsapa' e'ñech serrpare'tatuerrey ora allohuen ñeñt esocmañen eñall.

²⁶ Jesúsñapa' alla otererr:

—Napa' naca'ye ñeñten peserrpare'tatene'.

²⁷ E'ñe allempo atet otenpa' pueyočhresha'ñapa' huačherret. Ñetñapa' atta cohuanrroretueret all serrpare'tatenan coyanesha'. Tarraña ñetpa'

ama't puesheñarrofapa' ama eseshaye' otuerraye ¿eso'tña pemnen? Ama't puesheñarrofetapa' ama otuereto ¿eso'mare't peserrparenña epaḡ coyanesha'? ²⁸ Coyanesha'ñapa' alla na'nerran porretpa' o' ahuer allapa'netsro. Allñapa' otuerran pamo'tsesha':

²⁹ —Te'pa' socterren o'ch senteña' puesheñarr encanesha' ñeñt' o' serrpare'tatuosen ora allpon ñeñt' atet neḡa'yesara. N'ato' ñeñt'e'ña Cristotets ñeñt' atarr yecuen o'ch huapa.

³⁰ N'etñapa' allenta ona'cha'tet anetsotpa' o' ahuanmuet Jesúsesho.

³¹ Allempo ama ḡa'cheneta' ñesho pueyochresha'ñapa' atet otyeñet:

—Maestro ma'mate'tach rreñets.

³² Tarraña ñapa' atet otanet:

—Napa' nechencay'e ñeñt' nerrar nepen ñeñt'ña sapa' amaca'ye seño'teñe.

³³ Pueyochresha'ñapa' atet otanna'tyeset:

—Amate' esesha' huapatoyeña puerrar.

³⁴ Jesúsñapa' alla oterraneterr:

—Añca'yeña nerrar nepen o'ch neḡa' atet muenen Nompore' ñeñt' nellensene', tarro'mar ñeñt'pa' attochña e'ñe netsotuoñ po'taruas.

³⁵ Ama't sotoñoña sa: “Palltenmeñ pa'tatsña arorr o'ch e'ñe ya'yapa'cha'hua yenareñ.” Te'ñapa' o'ch notas: Te'pa' secue'ca'ye a'yo o'ch sentap shonte' acheñ ñeñt' ona'chets, o'ca'ye ḡhap allempoch ame'ñerrnet. Te' ñetpa' e'ñeca'ye atet nentenatet ñerra'm yenareñpa' o' pomella'huen o'ca'ye ḡhap allempoch yap'cha'hue. ³⁶ N'eñt' ap'chets nocop ñeñt'pa' atsa'tarettetcha' ñeñt'cha'ña atarr coshaterrahuet. N'aña allohuen ñeñt' ame'ñatenet ñetñapa' napanetcha' alloch e'ñe correrret tayoteñ ama't errponaño'huen. N'eñto'marña añ ñeñt' nare'tets ñaña ñeñt' ap'chets nocoppa' e'ñech parrocmā coshapretannenet, ama't ñeñt' ñanom epatue' neñoñ ñaña ñeñt'cha' torratta chenta' ñeñt' nocop. ³⁷ Tarro'mar ñeñt'pa' e'ñe po'ño'ch atet yepena ñeñt' atet oten añ ñoñets ñeñt' ḡhocma yotanna'tyena ya: “Puesheñarrpa' o'ch nare'tatse'tyes, po'psheñeññapa' ñeñt'cha' ap'cha'yesets.” ³⁸ N'aña sapa'ḡho'ña o'ch nemñas samā o'ch same'ñatera acheñenesha' ama't ama sanmaye' ñanom torratto all nocop, po'psheñeñña ñeñt' ñanom torrattse't all. Tarraña te'pa' sach ame'ñaterrahuet attoch setorrapterera ñeñt' ñanom torrattse't all nocop. Te'pa' sach ap'cherrets all ama't ama saye' nare'tatse'ttse'te all. Ama't po'psheñeñ nare'tatse'ttse't, te'ñapa' sach taruasapreterahuet all.

³⁹ Coyanesha'pa' e'ñe po'ñoñoña ame'ñatana pamo'tsesha' samario'marnesha' allempo serrpare'tatuerranet atto Jesúsapa' o' serrpare'tatos ora allpon ñeñt' atet pueḡa'yesara. ⁴⁰ N'eñto'marña samario'marnesha' allempo hua'cha'tet ñeshopa' atarr nanac a'patare'tapet Jesús a'posanetepa'to' all pa'netsreto. N'aña'apa' e'ñe epomta a'posa all. ⁴¹ Po'potantañechnopa' shonte' ñeñt' ame'ñapaya atto serrpare'tatosanet Jesús all pa'netsreto. ⁴² N'etñapa' atet oteñet coyanesha':

—Te'ñapa' ama e'ñe ḡa' peñoño'fey'e'yame'ñeno. Te'pa' e'ñe ya e'muene' yaña allohueney. N'eñto'marña te' yapa' o' yeño'ch po'ño'ch ñapa' ñach ya'queshpaterre' allohueney ñeñt'e'y añe patsro'tsney.

Puesheñarr yacma ñeñt sherbene' amcha'taret ñeñña puechemer a'crraterrña Jesús

⁴³ Allempoña epomta'muen Samario Jesúsñapa' o' alla ahuen Galileo all pa'ney peñ ña. ⁴⁴ Tarro'mar e'ñe po'ñoçh atet eñorena Jesús ñocop, ñeñtpa' atet ot: Ñeñña a'mtene' Yompor po'ñoñ pa'nyo'marnesha'ñapa' ama't mateshapa' ama mecha'na'teñeto. ⁴⁵ Allempoña çherrerr Jesús Galileo allohuenña galileo'marnesha'pa' e'ñe cohuen agapapueñet tarro'mar ñetpa' e'ñe entuoñet allohuen ñeñt atet pa'yesos Jerusaléno allempo entapreteneta' pascua all. Ñetpa'çho'ña allempopa' all ahuanmuet ñamet o'ch entapreteneta' pascua.

⁴⁶ Jesúsñapa' alla ahuerterr po'pocheño Cano e'ñe allara Galileo all e'ñe ñanam a'pnasenana' oñ vinos. Allñapa' allo'tsen puesheñarr ñeñt sherbene' amcha'taret. Ñaña puechemerpa' çha atsna'ten all anetso Capernaumo. ⁴⁷ Allempoña e'mare'tan Jesús o' huapa Judeot o' çhenerr Galileo, ñañaapa' allenta ahuo' o'ch enteña' attoch oteña' coterepa' pa'paclo attoch a'crraterrñaña puechemer, o' rromamoch. ⁴⁸ Jesúsñapa' atet och:

—Ñerra'm ama nentatasñe nepartsoña ñaña ñeñt ama sentarepa' amate' same'ñennañe.

⁴⁹ Ñeñña sherbene' amcha'taretpa' o' alla otererr:

—O'ch Ayochreshate pöcterren tayepa'tñapa' ama rromuena' nacñe'ter.

⁵⁰ Jesúsñapa' atet otererr:

—Te'pa' ahuerreþ, pechemerpa' o'ca'ye alla correrra.

Yacmañapa' e'ñe ame'ñana Jesús po'ñoñ ñeñt atet och, ñañaapa' allenta ahuer. ⁵¹ Allempoña ahuen toñoñapa' poctenan pueñañresha'. Ñetñapa' atet otapueñet:

—Pacñe'terpa' o'ca'ye correna.

⁵² Ñañaapa' allenta otapanet:

—¿Esempo'tña pasateñ?

Ñetñapa' atet otereterr:

—Ellerro allempo coyatse'ten atsne' mame'pa' allempoca'yeña metueñña po'urateña.

⁵³ Allempoña pomporpa' o' yerepya ñañaapa' atet ot:

—Ellerropa' allponca'yeña atsne' otenña Jesús nechemerpa' o'ca'ye correrra.

Ñapa' ñeñña ame'ñate' ama't ñaña allohuen pamo'tsesha' ñeñt parro pa'paclo'tsa'yenet e'ñe ame'ña'huet ñamet.

⁵⁴ Arrpa' atto puepocheño Jesúsapa' entatanet po'partsoña allempo huapa Judeot o' alla çherrerr Galileo.

5

Atto Jesúsapa' a'crraterran puesheñarr atsnañe't all Betesdaso

¹ Allempoña o' alla çherrerr allempoch alla cosherrerr allohuen judionesha' ñeñt atet anaretet ñocpuet. Jesúsñapa' alla ahuerterr ñaña Jerusaléno. ² All Jerusaléno e'ñe allame'tets allotecma a'be'teñet carnero allñapa' allo'tsen oñ apco'sattataret ñeñt sochen hebreonesha' po'ñoño Betesda. Ñeññaapa' eñall amnar puecha'petar. ³ Allña puecha'petarotpa' shonte' atsnañeñesha' ñeñt pena'rartetsa all —ñeñt aporo'yeteçhno ñaña ñeñt che'ca'repaçhno ñaña ñeñt echarretyetsa.

Ñetñapa' añ cohuenet ñerra'm esempoch pelle'llchena oñ. ⁴ Tarro'mar ñerra'm esempoch pelle'llchena ñeñt' oñerpa' mellaño'eño'ch sohuetsa all o'ch pelle'llchatosan oñ. Ñerra'm esesha' ñanom esha'tostsa all oño allempo pelle'llchena ñeñtña atснаñeterpa' acrrerroyo'ch, ama't erra'tsena atснаñtsor rromuenahuet. ⁵ Allñapa' allo'tsen puesheñarr yacma ñeñt' ma'poch çharra' puechena posoc char atсна'ten. ⁶ Allempoña entos Jesús alla ñanena ñañapa' eñotos shonte' char atсна'ten ñeñto'marña atet otos:

—¿Ama't pemno o'ch ñocrrerra?

⁷ Atснаñeñña' atet otan Jesús:

—Amaca'ye Ayochreshate eñalle ñeñtcha' neshate' oño allempo pelle'llchena. Napa' o'ch taya ahuen po'psheñeñña' ahuo'tcha' esha'tosa ñanom.

⁸ Jesúsñapa' atet otererr:

—Te'pa' o'ch notosep: Petantena, pechta'nen allo pemuen, pechope'chen tayecma.

⁹ Yacmañapa' allorocmuepa'tcha' correna, ñañapa' allenta chetenan allo muenpa' allenta chope'chnen. Ñehua, ñeñtña yetropa' allempo amesen judionesha'. ¹⁰ Ñeñto'marña judionesha'pa' atet ochet ñeñt' o' corrrera:

—Te' añe yetro allempocma yamesen. Amaca'ye pocteyaye o'ch ñanen pemue'.

¹¹ Tarraña ñapa' atet otanet:

—Ñeñt' o' a'crratosenpa' atetca' otosen: “Pechta'nen pemue'pa' pechope'chnen.”

¹² Ñetñapa' allenta a'pto'chet:

—¿Esesha'tña potose'ña, “O'ch pechta'nen pemue'pa' o'ch pechope'chen”?

¹³ Tarraña ñeñt' a'crrataretterrtsapa' ama eñoteñe esesha'te'ña a'crraterre' tarro'mar Jesúsapa' ama allo'tsenaro, ñapa' o' ahuer a'nahua, tarro'mar all shontosa acheñenesha' ñeñtcha' entenaya'. ¹⁴ O'ña atarr o'chetpa' Jesúsñapa' alla enterran ñeñt' a'crraterr ñorra' e'ñe alla Parets pa'pacillo. Allñapa' atet oter:

—Te'pa' o' ñocrrerra. Te'ñapa' amach alla ño'chña'tatsterrero ñato'rraña alla nanac pemueroçhterrerr.

¹⁵ Yacmañapa' o' ahuer, atet otuerran judionesha':

—Jesúsepa'tca'yeña ñeñt' na'crraterre'.

¹⁶ Atet pena Jesús añe yetro allempo amesen judionesha' ñeñto'marña ñetpa' o'pateñet Jesús. ¹⁷ Jesúsñapa' atet otanet:

—Nompör e'ñe teme'ttsen atarr torrena ñeñto'marña napa'çho'ña atarr nemneñ o'ch netorra nanña.

¹⁸ Ñeñto'marña judionesha'pa'mcha'tareternesha'pa' ello atarr nanac o'pateñet o'ch muetset, tarro'mar ñetpa' atet otyeset:

—Ñapa' ama ñapñaye' añe yeter o' puesuerro allempocma yamesen, ñapa' añe'naña oten e'ño' Pompör penan Parets, ñapa' ataca'ye mueneñ o'ch Partsocoptartena.

Atto atarr ahuaencattena Jesús ñeñt' Yompor Puechemer

¹⁹ Jesúsñapa' atet otarraneterr:

—E'ñe po'ñoçh notenes, na ñeññen Puechemer pen Yompor amate' errotenoñ es neñoña e'ñe nota. Napa' añña atet neña'yen atet nenteññañ Apa, tarro'mar ñeññ atet pen Apapa' napa'cho'ña ñeññen Puechemerenpa' atetcha' es neña'yen naña. ²⁰ Apapa' atarr muerenna tarro'mar napa' e'ñeca'ye po'ñoçh Puechemeren, ñeñño'marña gatyenen ora allohuen ñeññ atet pa'yen ña. Elloña ñapa' añ gatyenen ñeññ nanac torrapotyets ñeññ atet etsotayen ña; ñeññpa' añecop atet pennan attoña sapa' atarrcha' secuanrrortenen. ²¹ Ñehua, yeñoteñ Apapa' tantaterran arromñañenesha'pa' apuerranet allochña ñetpa' corretsetach. Napa'cho'ña e'ñeca'ye atet nepenaña naña ñeññen Puechemeren. Ñerra'm erra'tsencha' nemna' na o'ch napanet allochña ñetpa' corretsetach atetcha'ca'ye napuerranet. ²² Apapa' ama't puesheñarrapa' amach a'metanñperraneto errotench'a' entyesuerranet. Naña apuen llesens ñeññen Puechemeren nachña a'metanñperrahuat errotench'a' nentyesuerranet e'ñe puesheña'ttset. ²³ Allochña'pa' attochña allohuenet mecha'na'tennetcha' naña ñeññen Puechemeren e'ñe atet mecha'na'tennanet Nompor Parets. Ñerra'm esesha' ama nemcha'na'tenaye na ñeññen Puechemeren, Nompore'naca'yeña ama mecha'na'teneto ñeññ nellensene'.

²⁴ 'Napa' e'ñe po'ñoçh atet notenes: Ñerra'm esesha' e'mñote' neñoñ ñaña ñerra'm yemterrnanet Nompor ñeññ nellensene' ñetñapa' corretsetach pocsheñeshocmañen tayoteñ errponañohuen. Amach a'coñchatareñtereto ama't errponaña. Tarro'marña ñetpa' o' metanerretña ñeññ e'ñe po'ñoçh rromueñets, o' çherret allña ñetpa' corretsetach tayoten errponañohuen. ²⁵ E'ñe po'ñoçh o'ch noterrser: O' çherrmoch allempoch atet perra, ñeññ arromñañenesha'pa' ñetñapa' e'muerrnanetcha' neñoñ ñeññen Yompor Puechemeren. Ñeññcha' e'mñoterre' na neñoñ ñetñapa' corretsetach. ²⁶ Ñehua, Apapa' e'ñe ñoña correna, ña napuene'ña attoch napa'cho'ña corretsanach naña ñeññen Puechemeren. ²⁷ Ñaña ña napuene'ña llesens attoch nemñe patanta'tets acheñenesha' coñcheñtso, po'potantañña'pa' amach nemñerraneto coñcheñtso. Atetca'ye allsensaretenña na Ñeññen e'ñe Acheñetosets. ²⁸ Ñeññ atet o' notuaspa' amach cha semoññe'tatsche tarro'mar esempopa' çherrcha' ama't ñeññ puepampro'tsa'yenpa' e'muerrnanetcha' neñoñ. ²⁹ Cha'nmaçherretcha' allot apamparettete't. Ñeññ atet pa'yeyas'e't e'ñe cohuen ñeññ poctetsa ñetñapa' añecopcha' tanterret attoch ello alla correrret. Ñeññña pa'yeyas'e't ñeññ ama pocteyaye ñetñapa' añecpach tanterret attoch ello alla amñareñterret coñcheñtso.

Atto Jesús eñotatanet ñapa' Yomporeshot aparetta llesens

³⁰ 'Amate' errotenoñ es neña'yesoña e'ñe nota. Atet eñotatenen Nomporpora' attochña nemñe patanta'tets acheñenesha' coñcheñtso, po'potantañña'pa' amach. Ñaña errotench'a' nentyesuerranetpa' ñeññpa' e'ñe pocte' tarro'mar ama e'ñe na nemnenñofey'e' es neña'yeno. Nomporna' puemnenñof es neña'yen tarro'mar ña nellensene'. ³¹ Ñerra'm e'ñe nañeña a'potetsa, ñeññ atto na'potenapa' amate' es sherbeno. ³² Eñallña po'psheñeñ ñeññ e'ñe no Nompor ñeññña na'potene'ña na. Ñaña neñoteñ ñerra'm ña na'pote'pa' ñeññ atto

a'potenen ñeñña e'ñe po'ñoçh sherbets. ³³ Ñaña sa ahuañmo'chapa' semñe acheñ Juanesho ñeñt a'p'to'tose' nocop. Juanña atto a'potanpa' ñeñña e'ñe po'ñoçh atet. ³⁴ Napa' ama e'ñe nocpa ne'nen ñeñt na'pote'; añecpa'ñaña notenes sa ñato' sapa' same'ñoñate' Juan po'ñoñ atto a'potan na, allochñapa' attoch sequeshperra same'ñoñoten. ³⁵ Juanpa' e'ñe atet pe't ñerra'mrrate' lampareñ corretsa, attoña çhoyo'te't. Sañapa' sa muenatse't o'ch socshame'ta mame' all a'puetarsañpsas. ³⁶ Tarraña atet na'poten napa' ñeñña nanac sherbets. Ello metanenan ñeñt atet a'potan na Juan. Allohuen es nepa'yen ñeñt atet yehenna Apa o'ch e'ñe netsotoñ, añ netsotateñpa' ñeñña o' eñotatanet napa' Apa nellsensene'. ³⁷ Ñaña Apa ñeñt nellsensene' ñapa'cho'ña ñaca'yeña na'potene'. Sapa' ama't ahuatapa' ama se'maroneña po'ñoñ atet e'morrtena, ñaña ama sentareña atet orrtena ña. ³⁸ Sapa' ama't po'ñoñapa' ama çhennasoña seyoçhro tarro'mar na ñeñten llesensen Apa, sañapa' ama same'ñenno. ³⁹ Sapa' añcha' setorra'yesa Yompor po'ñoñ ñeñt atet anuaret ahuatoteñ tarro'mar sapa' çhate' sotenapañ e'ñe ñoñtsochayo'fapa' sapa' corretsasate' errponohuañen. Tarraña Yompor po'ñoñ ñeñt anuaret ahuatoteñ ñeñtpa' naca'yeña a'pote't. ⁴⁰ Sañapa' amaña semnoña o'ch same'ñerrna attochña e'ñe socrrerañ.

⁴¹ 'Tarraña napa' ama añeye' ne'nenno attoch aye'choçhtatennan acheñenesha'. ⁴² Tarro'mar napa' neñotenes sapa' ama't mameshapa' ama semorrenteño Yompor ama't seyoçhra. ⁴³ Napa' atto nohuapa Nomporña nellsensene' tarraña sapa' amaña same'ñenno. Ñerra'm esesha'chña huapatsañ ñeñt e'ñe ñoña huena saña ñeñtpa' atarrte' same'ñyañ. ⁴⁴ Sapa' tarro'marña ama same'ñenno sapa' añaca'ye se'nen o'ch e'ñe sañeña aye'choçhtatannetsa, amaca'yeña añeye'ña se'nenno attoch e'ñe cohuen entas ñapue't Yompor. ⁴⁵ Amach soctape'chatsche ñato' nach sottene'cherre' esempohuañen Apuesho. Tarraña eñallca'yeña po'psheñeñ ñeñtcha' sottene'cherre' ñeñtpa' añaca'ye Moisés, sañapa' ñeññaña atarr nanac seyemtena. ⁴⁶ Ñerra'm po'ñoçh same'ñeñañ Moiséspa' napa'cho'ña same'ñennañcha' tarro'mar ñapa' nocopca'ye quellconas. ⁴⁷ Tarraña ñerra'm ama same'ñeñaña ñeñt atet quellconase't ña, ñeñto'marña napa'cho'ña amach errotent same'ñonoña naña neñoñ.

6

Allempo Jesúsapa' rratenan shonte' acheñenesha'; ñeñña acheñenesha'pa' allo'tsen amnaroch mil

(Mt. 14.13-21; Mr. 6.30-44; Lc. 9.10-17)

¹ Allempoña Jesúsapa' ahuo' yom'ta'n sa'p Galileaso, ñeñfara sa'p otenet Tiberias. ² Allñapa' co'ta'neñ shonte' acheñenesha' tarro'mar ñetpa' o' entuoñet po'partsoña atto a'crratyerran allohuen ñeñt atsna'tyets. ³ O'ña çhap yom'ta'n Jesúsña' ahuos aspen'to, allña anorros epuet pueyochresha'. ⁴ Allempopa' o' çhappoch pascuapo allempoch alla cosherrerr judionesha'. ⁵ Jesúsña cohuatsa a'yopa' entapan shonte' acheñenesha' ñeñt onaçhets ñeshone't. Allempoñapa' atet otan Felipe:

—Errahuachca' yeraññaña pante' ñeñtcha' rros acheñenesha' ñeñt o' huach'a'ta.

⁶ Ñehua, Jesúsapa' e'ñe po'tomña atet ot tarro'mar ñapa' eñoteñ atet'cha' pa. ⁷ Felipeña' atet och:

—Ama't epoch čharroch čharra' denario* alloch yeraña panpa' ama't puehmetatollapa' amate' rra'yeseto.

⁸ Pueyochresha' ña Andrés ñeñt pa'mo' nasheñ Simóm Pedropa' ñaña'pa' atet och:

⁹ —Arr pueheñarr huepuehachorpa' echenanca'ye amnar pan ñeñt cebada ñaña epa cac. Attapa' amate' yepataneto, acheñpa' shonte'ca'ye.

¹⁰ Jesúsñapa' atet otanet:

—Te'pa' sotanet anorrcha'tetepa'.

Ñehua, allpa' e'ñe cohuen emmo'raten pasetma'. Ñetñapa' anorrcha'tet. Yacmanesha'pa' ñato' amnarochte' mil eñall. ¹¹ Jesúsñapa' chetan panpa' parasyoso'tam̄pes, allempoñapa' apan pueyochresha'. Pueyochresha'ñapa' epatyaset allohuen acheñenesha' ñeñt anorrchets all. Attecma pa' allempo apa'yesanet ñaña cac. Allohuenetpa' e'ñe agaphuahuet ñeñt allpon muena'yeset. ¹² Allempoña o' rrallme'chuetpa' allohuenetpa' e'ñepa'tcha' yetrra'tuahuet. E'ñe yetuahuetpa' Jesúsñapa' atet oterranerr pueyochresha':

—Te'pa' o'ch sa'yapa'cherr ñeñt shotna'tyets ñeñt sa'pchatyes allochñapa' amach es pertatso.

¹³ Allempoña a'yapa'cherret ñeñt shota'tatyaset čhepa'tcha' chorrats čharra' puechena epa cañter ñeñt a'pchatet all rratanet amnar pan cebada. ¹⁴ Atto orrtatanet po'partsoña acheñenesha'ñapa' atet otyeset:

—Añña po'ño'chpa' ñeñtca'ye a'mtene' Yompor po'ñoñ ñeñt atarr yecuen o'ch huapa a'ne patsro.

¹⁵ Jesúsñapa' eñotanet ñetpa' añ muenenet o'ch huapoñetpa' o'ch rromoset o'ch noset ñeñtcha' pa'mcha'tareter pet. Ñeñto'marña Jesús'pa' a'nahua ahuer all aspenfo e'ñe ñapueñ.

Atto Jesús'pa' e'ñe cohuen chope'chnen enot oño

(Mt. 14.22-27; Mr. 6.45-52)

¹⁶ Allempoña ellerren pueyochrenesha'ñapa' ahuanerret sa'patopño. ¹⁷ A'tacha'tuerret po'noñtopa' o'ch ahuan̄perret yon̄ta'n, Capernaumonet. Allñapa' alla checmetam̄pset. Jesúsñapa' ama huerra' all allo'tsa'yenet. ¹⁸ Allñapa' orrnotam̄pesnomuet, sa'pñapa' čha emoyarerta. ¹⁹ Ñetñapa' echotnomuet sa'p amnar amapa' pechapte' kilómetro allñapa' machayotepa'tcha' entapet Jesús chope'chnen enot oño. O' allame'tsam̄a pan noñt. Ñetñapa' čhepa'tcha' mecha'tapet. ²⁰ Tarraña ñapa' atet otosanet:

—Naca'ye o' nohuapa, amach atta sen̄cha'tatstapno.

²¹ Ñetñapa' mueneñetañ o'ch agapapet noñtot, eñotostsetpa' o' čhapña noñt yon̄ta'n all sechenet.

Allempo acheñenesha'pa' e'nereta' Jesús

²² Tsapatña acheñenesha' ñeñt alla a'patsa yon̄ta'n ñetpa' eñoteñet e'ñe patrra noñt allo a'tacha't Jesús pueyochresha' ñaña Jesús'pa' enteñet amaca' a'tapo noñto epuet pueyochresha' e'ñe ñap̄tochayeta ahuanmuet. ²³ Tarraña noñte'chnoñapa' chocma huachena Tiberiasot, o' čhapuet allame'tets all rret ellerro pan ñeñt parasyoso'tam̄pes Partsesha' Jesús. ²⁴ Allempoña acheñenesha' ñeñt allo'tsen ñetñapa' o'huañ

* 6:7 Denariopa' quelle ñeñt allpon tsa'tenet pamtarr ñeñt taruaset all pa'nyo.

eñchet Jesús pueyochreshohuen. Ñetpa'cho'ña allenta a'tacha'tet ñamet noñto, ahuam̄pset Capernaumonet, o'ch e'nereta' Jesús.

Jesúspa' ña yocrram̄ yepen yecamquëñecop alloch e'ñe yocrrena

²⁵ Allempoña entoset yom̄ta'npa' atet otoset:

—Maestro, ¿esempo'tña peçherrña ða arrma?

²⁶ Jesúsñapa' atet otapanet:

—Na po'ñoçhpa' o'ch notapas, sapa' amaca'ye añecpaye' se'nenno atto o' norrtatonas nepartsoña. Sapa' añecpaca'yeña se'nenen atto o' nerratuas pan o' e'ñe seyetua. ²⁷ Te'pa' o'ch notas, sapa' amach aña sema'yoçhratsto yocrram̄ ñeñt e'nuapo'. Añcha'ña sema'yoçhra socrram̄ ñeñt ama e'nuapahuoyaye; ñeñtña alloch sapa' corretsasach socsheñeshocmañen e'ñe tayoteñ ama't errponañohuen. Ñeñtña socrram̄pa' nach sapuerre' Ñeñten Acheñetosets tarro'mar Apapa' o' llesenserren na Ñeñten Acheñetosets arr patsro.

²⁸ Acheñenesha'ñapa' atet otereterr:

—Errotenuachca' yeþaña ñeñt cohuen enten Yompor.

²⁹ Jesúsñapa' atet oterraneterr:

—Ñeñt cohuen enten Yomporpa' o'ch same'ña'na na ñeñten llesensen.

³⁰ Ñetñapa' atet otereterr:

—Errotenuachca' pegateyña pepartsoña ñeñtcha' yentpa' attotcha' yame'ñaþa. Papa' esuañaca' petsoten. ³¹ Ya yatañneshañpa' rra'yesete't ñeñt maná all amayo atetca'ye anuaret Yompor po'ñoñ ahuatoteñ: “Rratyesanete't pan ñeñt apanete't Yompor pue'ntañot.”

³² Jesúsñapa' alla oterraneterr:

—E'ñe po'ñoçh o'ch notas: Ama Moisésoye' apahuete'teña pan ñeñt huetsa entot. Naca'ye Nompor sapuene'ña ñeñt e'ñe po'ñoçh socrram̄ sepen. Añ socrram̄pa' entotña huena. ³³ Naña socrram̄ sepen ñeñten o' apuerres Nompor, napa'cho'ña entot nohuapa Yomporeshot allochñapa' acheñenesha'ña arr patsropa' ñetñapa' corretsetach.

³⁴ Ñetñapa' atet otereterr:

—Aychreshate yapa'cho'ña çhocmach þapuey ñeñt corramets.

³⁵ Jesúsñapa' alla oterraneterr:

—Napa' na corram̄tsotets alloch e'ñe socrra. Esha'ch huapatsa nesho ñetña ama't ahuatapa' amach alla cheporrerrete'te. Esha'ch name'ñerraya na ñetña ama't ahuatapa' amach alla oñpa'terrete'te. Ñehua, ñeñtpa' añ notenes, esha'ch name'ñerraya na ñetñapa' çhocmach e'ñe cosherret pueyoçhreto, ama't ahuatapa' amach alla es e'nerrete'te. ³⁶ Tarraña napa' o' notuas: Sapa' o' sentnoñ amaña same'ñenno. ³⁷ Allohuen acheñenesha' ñeñt o'patatenna Apapa' ñetñapa' ame'ñernetcha'. Esha'ch name'ñerraya ñetñapa' amach alla nehuapore'terraneto. ³⁸ Tarro'mar napa' ama añecpaye' nohuapoña entot attoch o'ch aña atet neþos ñeñt nemnen na. Napa' añecopña nohuapa o'ch atet neperr ñeñt atet muenen Nompor ñeñt nellsenserre'. ³⁹ Ñeñtpa' atet muenen Nompor ñeñt nellsenserre': Amachña çha na'chencatereña acheñenesha' ñeñt ora allpon o'patatenna na, çhocña ello netantaterrñañ esempohuañen. ⁴⁰ Añmapa' ñeñtña muenen Nompor: Erra'tsencha' neñoterre' ñerra'm ame'ñernetcha' na ñeñten Yompor

Puechemeren, ñetñapa' corretsetach pocsheñeshocmañen tayoteñ ama't errponañohuen. Ñetñapa' chocmach netantaterranet esempohuañen.

⁴¹ Atto Jesúsapa' otenanet, "Napa' na corrañtsotets ñeñten huapatsa entot", judionesha'ñapa' pocuana'teñotet otatse'tyeñet. ⁴² Ñeñtpa' atet otyeset:

—Añmapa' añaca'ye Jesús, José puechemer, ñeñt pompor ñaña pachor e'ñeca'ye yechme'teñ. Te'ñapa' eso'mare'tña oten ñapa' entoto' huapa.

⁴³ Jesúsñapa' atet otanet:

—Sapa' amach atta sotatse'tanna'tyesatsto. ⁴⁴ Ama't eseshapa' amach errotenot ame'ñerrneto ñerra'm Nompompor ñeñt nellensene' ñerra'm ña ama cotape'chaterrahueto cohuen. Ñetñapa' netantaterranetcha' esempohuañen. ⁴⁵ Atet quellquë't ñeñt a'mtaye't Yompompor po'ñoñ ahuat, po'quellcopa' atet anuaret: "Allohuenetpa' Yompomporcha'ña eñotaterrahuet." Allohuen ñeñtcha' e'mñoterre' Nompompor attoch cohuen cotape'chaterranet, ñetñapa' nachña ame'ñerret.

⁴⁶ Ama't eseshapa' ama puentareto Apa. Naptaña na ñeñten huapatsa Yompomporshot nentarca'yeña Apa. ⁴⁷ E'ñe po'ñoñ notenes: Esha'ch name'ñerraya ñetñapa' corretsetach pocsheñeshocmañen tayoteñ e'ñe errponañohuen. ⁴⁸ Napa' na corrañtsotets alloch e'ñe socrra. ⁴⁹ Satañneshañapa' ama't rra'yesete't ñeñt maná all amayo, ñetñapa' o' colla'huenet. ⁵⁰ Tarraña ñeñten sotene'te' ñeñtña e'ñe po'ñoñ socrrañ ñeñten huapatsa entot allochñapa' esesha'ch rre'pa' ñetñapa' corretsetach tayoteñ e'ñe errponañohuen. ⁵¹ E'ñe po'ñoñ napa' na ñeñten corrañtsotets alloch e'ñe socrra ñeñten huapatsa entot. Ñerra'm esesha' rre' añ corrametspa' ñetñapa' corretsetach tayoteñ e'ñe errponañohuen. Añ corramets ñeñtcha' nepomuerr na acheñenesha'cop arr patsro alloch e'ñe correnet, ñeñtpa' añca'ye nechets.

⁵² Judionesha'ñapa' ñeñto'mara'cho' es otanna'tyeset. Ñetñapa' atet otyeset:

—Errotenotuachñaca' apueyña e'ñe ña po'chets ñeñtcha' yerra'.

⁵³ Jesúsñapa' alla oterraneterr:

—Po'ñoñ o'ch notas, ñerra'm ama serrerrnano nechets Ñeñten Acheñetosets, ñerra'm ama sorrerrnano ñaña nerras, sapa' amate' errotenot socrraña sa. ⁵⁴ Ñerra'm esesha' rrene' nechets ñaña ñerra'm orrennanet nerras, ñetñapa' corretsetach tayoten e'ñe errponañohuen, tarro'mar ñaña' netantaterranetcha' esempohuañen. ⁵⁵ Tarro'mar nechets ñeñt e'ñe po'ñoñ corrañtsotets; ñerraspa'cho'ña ñeñt e'ñe po'ñoñ orrpapo'. ⁵⁶ Ñeñtcha' rrene' nechets ñaña ñerra'm orrennanet nerras ñetñapa' e'ñech parrocmatennet na, napa'cho'ña e'ñech neparrocmatenanet ñet. ⁵⁷ Apa ñeñt nellensene' ñapa' ama arromñafeshayaye, ñaca'yeña napuene'ña atto napa'cho'ña corretsanach. Atet nepena ñaña, allohuen ñeñt pocrrañ nepene' napa'cho'ña añ napuenanet attoch ñetpa'cho'ña corretsetach ñamet. ⁵⁸ Na ñeñten socrrañ sepen ñeñten huapatsa entot. Ama atteyayno ñerra'mrrate' pan ñeñt rre't satañneshañ ahuat. Ñetpa' o' colla'huenet. Esha'ch e'ñe pocrrañ nepene' ñetñapa' corretsetach tayoteñ e'ñe errponañohuen.

⁵⁹ Arrpa' allohua ñeñt atet ye'chatenan acheñenesha' judionesha' po'prahuo all Capernaumo.

Jesús po'ñoñ ñeñtpa' alloch yocrrena tayoteñ errponañohuen

⁶⁰ Allempoña atet e'mueñet atet oten, shonte' pueyochreshachnopa' atet otyeset:

—Añ ñoñetspa' amaca'ye e'ñeye' pocteyaye, amate' esesha' ame'ñayo.

⁶¹ Jesúsapa' e'ñe pueyoçhro eñotanet ÷ha otatse'tyen pueyochreshachno, ñeñto'marña atet otterranneterr:

—Ñeñt atet notenespa' are't pocteye' senteñe. ⁶² Ta'm, ¿errofena'tcha' sotña ñerra'm po'ñoçh sentennoñ na Ñeñten Acheñetsosets o'ch alla na'terreñ ento allot nohuapa ahuat? ⁶³ Yecamquëñ alloña e'ñe po'ñoçh yocrrena. Yechetspa' ama't coñe'tapa' ama sherbeno. Neñoñ ñeñt neser-rpare'tatenespa' e'ñe po'ñoçh secamquëñecop ñeñtña po'ñoçh alloch e'ñe socrra. ⁶⁴ Tarraña pantanta'ttsospa' amaña same'ñenno.

Ñehua, Jesúsapa' e'ñe allempoteñ eñotenan ñeñtcha' ama ame'ñerrtso. E'ñe eñotenan ñaña ñeñtcha' pomuerre'. ⁶⁵ Jesúsapa' alla otterranneterr:

—Ñeñto'marña napa' notase't, amach esesha' name'ñerrayo ñerra'm ama Apa co'tape'chaterrahueto attoch coterrnet.

⁶⁶ Allempoteñña shonte' Jesús pueyochreshachno puerraçherret ñesho'tpa' o'huañ chopeñe'chenet parro. ⁶⁷ Allempoña Jesúsapa' atet otan pueyochresha' ñeñt çharrasheña puechena epa:

—Sapa'çho' ¿semneñe't o'ch sepuerterra saña?

⁶⁸ Simón Pedroñaapa' atet och:

—Parteshacha', esesha'huate'ñaca'ye yocta'. Paptaca'ye pechenña ñoñets attochña yapa' corretsayach tayoteñ errponañohuen. ⁶⁹ Yapa' o'ca'ye yame'ñaña. Yapa' yeñoteneñ papa' pepa'tca'ye Cristotets, ñeñteñ Yompör Puechemereñ.

⁷⁰ Jesúsña atet otanet:

—Napa' naca'yeña sa'crerre'ña sa, çharrasheñas sepchena epa. Ñeñtña pueheñarrrpa' ñeñtapa' oneñeñena'tar.

⁷¹ Ñehua, Judasocop atet eñora. Ñeñt Judaspa' ñeñt Simón Iscariote puechemer. Ama't ñeñt a'pchenahuetañ epa pueyochresha', pueheñarrrpa' ñeñtcha' pomuerre'.

7

Ama't ñeñt pa'mo'nasheñnesha' pen Jesúsapa' ñetpa' ama eseshaye' ame'ñenayo

¹ Allempoña Jesúsapa' alla chopeñe'chyen e'ñe alla Galileo'mar. Ama mueno o'ch chopeñe'chen ñaña all Judeo'mar tarro'mar judionesha'pa' ÷ha o'pateñet o'ch muetset. ² Allempopa' o' çherrmocherr allem-poch cosherrerr judionesha'; ñeñtcha' cosherreterr añ pa'so'cheñ Man-atpuetsopo', ñeñt atet yeçhenet ñet. ³ Allempoña Jesúsapa' atet och pa'mo'nasheñnesha':

—Te'pa' orrerreñ arro't, ahuerreñ alla Judeo allochñaapa' peyochreshachno ñeñt allo'tsa'yen o'ch porrtatuerranet ñamet pepartsoña ñeñt atet peña'yena te' arrma. ⁴ Ñehua, ñerra'm yemneñ o'ch yorrrta allo-huenacoppa' ama't pueheñarro'teyapa' amachña a'nahua es yeña'yeno. Ñerra'm po'ñoçh porrtatyen pepartsoña arrrpa' porrtachñaca'ye ñaña allohuen acheñeneshacop añ patsro.

⁵ Ama't pa'mo'nasheñnesha'pa'çho'ña tarro'mar atet ochet ñetpa'çho'ña amaca'ye ame'ñeñeto. ⁶ Jesúsñaapa' atet otanet:

—Allempo ñeñt̄ p̄octetsa nocop o'ch norrta allohuenacoppa' amaca'ye e'ñeye' čhena'. Tarraña socoppa' e'ñeca'ye pocte' čhocmaca'ye eñall. 7 Tarro'mar acheñenesha'ña añ patsropa' amachca'ye errotenoť e'moñe'tasoña sa, tarraña napa' čhocma e'moñe'tyennet tarro'mar napa' aña'ye neñotatyenanet ñeñt̄ atet̄ p̄atse'tyenet ñeñt̄ ama p̄octeyaye. 8 Sapa' orras socshapretena'. Napa' e'ñe tayecmapa' amachca'ye neto coshapretatsa. Tarro'mar nocoppa' ama e'ñeye' čhena' allempoch e'ñe p̄octa'huona.

⁹ Atet̄ otuanetpa' ñapa' alla a'pa mame' Galileo.

Allempo Jesús coshapretena' ñeñt̄ otenet Manatpuetsopo'

¹⁰ Allempoña pa'mo'nasheñechnopa' ñetñapa' ahuanmuet coshapretaset. O'ña tama o'chetpa' ahuo' ñaña, tarraña ñapa' ama orrtenaneto, a'nahua cota'nenanet chenta'. ¹¹ Judionesha'ña all coshenetpa' ñetñapa' e'neñet atet̄ otyenet:

—Ta'mca'ye ¿erro'tsente'ña Jesús?

¹² Allña acheñenesha'pa' shonte' eñosyenet ñocop. Patanta'tetspa' atet̄ otyenet: “Ñapa' e'ñe cohuen acheñer”; po'potantañechnopa' atet̄ otyenet: “Amaca'ye cohuenayaye, ataca'ye shecare'tyenan acheñenesha'.”

¹³ Ñetpa' atarr mecha'teñet judionesha' ñeñto'marña a'nahua atet̄ otanna'tyenet.

¹⁴ O'ña patma'nma atto coshenet Jesúsñapa' be'tosos Parets pa'paccio, yečhatosanet all. ¹⁵ Allña'pa' epaye' cohuanrrorech judionesha'. Ñetñapa' atet̄ otyeset:

—Ta', errotente'ca'yeña añ, ama't ama ayčhatarete quellecpa' atarrep'a't es eñotyen.

¹⁶ Jesúsñapa' otanet:

—Ñeñt̄ atto neyčhatyenes ñeñt̄pa' amaca'ye noyaye noctapña, ñeñt̄pa' Yomporoña p̄octapña ñeñt̄ nellensene'. ¹⁷ Ñerra'm esesha'ña muene' o'ch atet̄ pet̄ ñeñt̄ muenen Yompor ñetñapa' eñochetcha' neyčhateña' Yomporo amaca'ye notaye' neñeno. ¹⁸ Ñerra'm esesha' e'ñe ñoťoťa eñenpa' ñetñapa' añach e'nenet o'ch cohuentateññañ acheñenesha' e'ñe ñocop. Añña ñerra'm esesha' e'nene' o'ch cohuentatenan ñeñt̄ llesensene' ñapa' ñeñña eñetsña ñoñtso e'ñe po'ñočh ama shequñtsoyaye.

¹⁹ 'Ama't apasoña Moisés ñoñets ñeñt̄ atet̄ anareť. Tarraña ama't apaseñ, sañapa' ama't e'ñe puesheñarroťesapa' ama sepohuenoña ñeñt̄ atet̄ oten añ ñoñets, ñeñt̄epñapa' eso'mare'tña te'pa' semneña o'ch semtsan.

²⁰ Acheñenesha'ñapa' atet̄ otereterr:

—Papa' čhate' chorrenpa' oneñeť. Amarramche' esesha' p̄o'patenayeña o'ch muetsapet.

²¹ Jesúsñapa' alla oterraneterr:

—Napa' ama't parrocha norrtatonas nepartsoña añ yetro allempo yamesen saña allempopa' atarr secuanrroreťnoñ tarraña sañapa' ama p̄octeye' senteñe. ²² Moiséspa' apa'nmas ñeñt̄cha' seyčha' attoch setsorrannena. Ñehua, po'ñočh ñeñt̄pa' ama ñanom Moisésoye' sapaye, ñeñt̄pa' satañnesha'ñañe'ñañe seyčhatnomue' ahuatoteñ. Ñeñto'marña sapa' čhocmach setsorrateñ asheñorroťoll ñerra'm o'ch posomata'muen ama't añ yetro allempocma yamesen čhocmaña setsorrateñña asheñorroťoll. ²³ Atto sapa' setsorrateñ asheñorroťoll ama't añ yetro

allem pocma yamesen attoch amach satpueno ñoñets ñeñt atet anaret Moisésot, ñeñtepñapa' eso'maruañaca'yeña se'moñe'tenenña na allem po e'ñe na'crraten puesheñarr acheñ añ yetro allem pocma yamesen. ²⁴ Ñerra'm esempo senteñ po'psheñeñ ñeñt atet penpa' amachña ñeñto'ta sotteñe'chatsche año' cohuenaye' es yeçcateno. Chochña ñanom señoç errotente'ña ñeñt po'ñoç atet pena.

Atto Jesús pa' eñotatanet ñapa' Yomporeshot huapa

²⁵ Patanta'tets jerusaléño'marnesha'pa' atet otyenet:

—Ta'm amate' añeyayeña ñeñt o'patenet o'ch muetset. ²⁶ Ñapa'cho'ña allo'tsenepa't arr, atta ama es pueçheno eñosets, amaña erroteye'ña oteñeto. Ñato' tarro'marte'ña ama't am'cha'tareñnesha'pa' o'ca'ye eñotuet po'ñoç ñapa' ñeñtca'ye Cristotets. ²⁷ Tarraña añpa' yeñoteñca'ye allot huena. Tarraña esepoch huapa ñeñtcha' e'ñe po'ñoç Cristotats ñapa' amach eseshaye' eñotapaye erro'tcha' huapa.

²⁸ Jesúsña allem po yeçhaten Parets pa'paclo, ñapa' puerranarot atet otanet:

—Sapa' sechme'tennoñte', seño'tennoñte'ña na erro'tte' nohuapa. Tarraña napa' ama notaye' nohuapo, eñallña ñeñt nellense'; ñapa' e'ñe po'ñoç ñerra'm erro't ot, ama puenesho po'ñoñ. Ñeñtña sapa' ama seño'teñeña sa. ²⁹ Nañapa' e'ñe neñoteñ, ñesho'ca'ye nohuapa. Ñapa' ñeñtca'yeña nellenserre'.

³⁰ Allem pocma atarr mueneñet o'ch rromuetañ tarraña ama esesha' rromaye. Tarro'mar ama çhena' allem po ñeñt poctetsa ñocop attoch rromuet. ³¹ Shonte' acheñenesha' ñeñt ame'ñaya. Ñetñapa' atet otyenet:

—Añe'ca'yeña po'ñoç Cristo ñeñt yecuen o'ch huapa. Yapa' o'ca'ye orrtatosnay po'partsoña, amate' erro'tenot huapo po'psheñeñ ñeñtcha' ello metanose' po'partsoteña ñeñt atet entatyeney añ yacmar.

Allem po fariseonesha'pa' mueñet guardianesha' ñeñtcha' rromuenayañ Jesús

³² Fariseonesha'ñapa' e'mare'teñet shonte' acheñenesha'pa' e'ñe cohuen eñosyenet Jesúsocop. Ñeñto'mar ñet ñaña ñeñt pa'm'cha'tareñnesha' pen allohuen judionesha' po'cornaneshar, ñetñapa' mueñet guardianesha' ñeñtcha' rromuenayañ Jesús. ³³ Jesúsñapa' alla o'terraneterr:

—O' mameshaña e'ñe parro'tseney. O'chña mamerrerrpa' o'ch alla ahuerren allo'tsen ñeñt nellensene'. ³⁴ Allem poña ama'tcha' se'name'terrenpa' amach senterrno. Allcha' neserr napa' sañapa' amate' erro'tenot seçhapo.

³⁵ Judionesha'ñapa' atet otanna'tyeset:

—Ta', çerrach taña añma ñeñto'mar amach yentere? Ñato' arrcha' ta griegoneshesho all parratse'tyen yamo'tsesha' o'ch yeçhatenana' griegonesha' all. ³⁶ Ta', çest'e'ña añma ñeñto'mar atet oten: “Ama'tcha' se'nerrna'pa' amach senterrno; allcha' neserr napa' sañapa' amach erro'tenot seçhapo”?

Allohuen ñeñt ame'ñenaya Jesús, Parets Puecamquëño'pa' e'ñe pueñmateño'tet pueyoçhreto atet penet ñerra'mrrate' allot poten oñ ñeñt atarr cohuen

³⁷ O' e'ñe हुआमoch all coshena judionesha'. Añe yetro allem po nanac coshenet, Jesúsñapa' tomos all, puerranarot atet otosanet:

—Erra'tsente' acheñer oñpa'tets e'ñe pueyočhreto, onetepa' nesho or-retepa'.³⁸ Ñeñt' name'ñenaya na e'ñe pueñmateño'et pueyočhretopa' atet pena ñerra'mrrate' allot' poten oñ aton ñeñt' atarr cohuen, tarro'mar ñeñt'pa' atet oten Yompor po'ñoñ ñeñt' anuaret' ahuatoteñ.

³⁹ Nehua, añ ñoñetspa' añecop serrpare'ten Yompor Puecamquëñecop ñeñt'cha' chorrerraya allohuen ñeñt'cha' ame'ñerraya ña. Tarraña allem-popa' ama aparetteneta' Yompor Puecamquëñ, tarro'mar Jesús'pa' ama čhena' allem-poch alla ahuer Yompor pue'ntaño allcha' e'ñe cohuen-taterrñañet.

Allempo acheñenesha'pa' ellopa'tetstatenet pocta'ña Jesúsocop

⁴⁰ Allempo e'mhuet ñeñt' atet oten Jesús, patantarrña acheñenesha'pa' atet otyeset:

—Po'ñočh añmapa' ñeñt'e'ca'ye a'mtene'ña Yompor po'ñoñ ñeñt' čhocma yecuen.

⁴¹ Po'potantañpa' atet otyeset:

—Añmapa' ñeñt'e'ca'yeña Cristotets ñeñt' čhocma yecuen.

Po'potantañpa' atet otyenet:

—Ñeñt'cha' Cristoterretspa' amate' arrota huapo Galileot.⁴² Ama't otenoña Yompor po'ñoñ ñeñt' anuaret', Davidcha' po'mrenno'č huapaña ñeñt'cha' Cristoterrets; arrotcha' huapa anetsot' ñeñt' Beléñ ñeñt' pa'netser pe't David.

⁴³ Ñeñto'marña allohuen acheñenesha'pa' ellopa'tetstatenet pocta'ña Jesúsocop.⁴⁴ Patanta'tetsñapa' atarr mueneñet o'ch rromuet, tarraña ama esesha' rromaye.

Atto judionesha'pa'mcha'tareternesha' ama ame'ñeñeto Jesús

⁴⁵ Guardianesha'ñapa' puerracherret allo'tsen ñeñt' pa'mcha'tareternesha' pen allohuen judionesha' po'cornaneshar epuet ñaña fariseonesha'. Ñetñapa' atet otarettapuerret:

—Eso'maruañaca'yeña amaña sehuapatere.

⁴⁶ Guardianesha'ñapa' atet otuerret:

—Ama't eseshapa' ama pueñosaroña atarr cohuen atet eñen ña.

⁴⁷ Fariseonesha'ñapa' atet oterraneterr:

—Tarro'marte' ama sehuapatere sapa'čo'ña čhote'ca'ye shecapas saña.⁴⁸ Ama't ñaña patantarr amcha'taretnesha'pa' ama't o' čha ame'ñyeto ñamet. Ama't ñaña patantarr fariseonesha'pa'čo'ña o'te'ca'ye čha ame'ñyet.⁴⁹ Tarraña ñeñt' acheñeneshar ñeñt' ama eñotenaye ñoñets ñeñt' atet anaret' ñetñapa' a'cmaretet.

⁵⁰ Ñeñt'ña puesheñarr fariseo ñeñt' Nicodemo ñeñt' tatsa ahuaña Jesúsesho, ñaña'pa' atet otan pamo'tsesha' fariseonesha':

⁵¹ —Ñoñets ñeñt' atet anaret' yocoppa' atet oteneý, amach erro'tenot' yecoñchache ama't puesheñarra acheñ e'ñe attota. Chochña ñanom ye'mñoč attoch yeñoč este' otatse'tyen ñeñt' atarr sosey yenten esheccha'ña yecoñchach.

⁵² Ñetñapa' atet ochet:

—Eso'maruachca' pemoñesyaña galileo'marnesha', ñato' p'apa' galileo'marnesha'pte'. Papa' amarramche' galileo'marneshayaype. Te'pa' pelleya'yes Yompor po'ñoñ allochñapa' o'ch peñoč Galileotpa' ama't puesheñarrapa' amach huapoña ñeñt'cha' a'mtene' Yompor po'ñoñ.

Allempo puesheñarr coyanesha' huapachet Jesúsesho ñeñt chetapretene' pacma puerrollar

⁵³ Allempoña allohuenet ahuanemyerret pa'pacleto.

8

¹ Jesúsñapa' ahuerri Olivoño. ² Tsapaña po'pocheño e'ñe ahuatecma alla chenerr Parets pa'paclo. Shonte' acheñenesha' alla huacheneterr ñesho. Ñaña' anorros allña yechatenaterr. ³ Ñeñña etsotayenayen ñoñets ñeñt atet anaret judioneshacop ñama fariseonesha' ñetñapa' huapatoñet puesheñarr coyanesha' ñeñt rromuet all eñchet chetapretenan po'psheñen pacma puerrollar. Nosñañet e'ñe rrocho. ⁴ Allñapa' atet otoset:

—Maestro, añ coyanesha'pa' o' yentaprech e'ñe all chetapretenan pacma puerrollar. ⁵ Moisés po'ñoñ ñeñt atet anaret ñeñtpa' atet otene, aña' choch yarroлле'ch. Te'ña papa' ¿errofe'tcha'ña poteyña pa?

⁶ Ñeñtpa' tarro'mara atet otoset ñato'rraña eñorachet ñeñt ama pocteyaye allochñapa' attoch a'metanpeñeta'. Jesúsñapa' allenta mo'capa' o' quellcan pats potaño. ⁷ Ñetñapa' alla a'pto'tereter. Jesúsña echanterrtsapa' atet otanet:

—Ñerra'm erra'tsenoteste' ama eñalle so'chñarpa' sarrolle'chca'ye sanom.

⁸ Alla mo'quërrer o' alla quellquërranerr pats potaño. ⁹ Ñetñapa' o' e'met atet otanet Jesús'pa' e'ñe acopoteñ ahuanemhuerret e'ñe puesheña'ttset. Añ ñanom ahuanerrtsa po'nmeneshachno, attotapa' o' ñapñaña Jesús epuet coyanesha'. ¹⁰ Jesúsña echanterrrerpa' atet otan coyanesha':

—Nocheshacha' ¿erro'tsa'yeneta'tña? Ama't puesheñarroteta ñetpa' are'tcha'ña coñchatape.

¹¹ Ñaña'pa' atet otan Jesús:

—Ama Ayochreshate eseshaye' necoñchataye.

Jesúsñapa' alla otererr:

—Napa'cho'ña amach necoñchatape. Te'ña ñerra'm ahuerreppa' amach allo'na atet pepa'nen o' ñeñt ama't mamesha ama pocteyaye.

Jesús'pa' ña a'puetarsañpene' acheñenesha' poctañña añe patsro

¹² Jesúsña po'pocheño'pa' serrpare'taterranerr acheñenesha', ñeñtpa' atet oterraneterr:

—Napa' na ñeñten a'puetarsañpene' acheñenesha' poctañña añe patsro. Eshesha'ch nocterre' o'huañcha' allo'na cotape'chatnenanet poctañña ñeñt atarr sosya'tsañ; ñeñtpa' checmeta chopeñe'chyenet. Ñetñapa' Yomporcha' po'cohuenño correrret ñeñtara ñeñt puetares.

¹³ Fariseonesha'ñapa' atet ochet:

—Papa' pañeña a'potetsa ñeñto'marña atto pa'potenapa' ama sherbeno.

¹⁴ Jesúsñapa' oterraneterr:

—Tarraña ama't nañeña a'potetsapa' atto na'potenapa' e'ñe sherben. Tarro'mar napa' neñoteñ allot nohuapa ñama neñoteñ allcha' neserr. Sañapa' ama señothenno allot nohuapa ñeñto'marña ama señoñeñe allcha' neserr. ¹⁵ Sa sotatseña'pa' e'ñe orrena atet sepena, arromñateneshasa atet petsa. Napa' ama't puesheñarrapa' ama notatse'tenaneto e'ñe atta. ¹⁶ Tarraña ñerra'm esempo na'metanet ñeñt atet nentapretyenanet ñeñtpa' e'ñe po'ño'ch atet tarro'mar napa' ama napteye' es nepa'yeno,

napa' chocmaña epan Apa ñeñt nellsensene'. ¹⁷ Ñoñets ñeñt atet anareñ ñeñt sechen sa, ñeñt'pa' atet oten: Ñerra'm epsheña a'potene' e'ñe attecma ñeñt'pa' e'ñeca'ye po'ñoçh otenet. ¹⁸ Napa' ñeñt atet na'potena na, Apaña ñeñt nellsensene' ñaca'yeña na'potene'ña nocop.

¹⁹ Ñetñapa' atet otereterr:

—¿Erro'tsena'tña p̄a Pompor?

Jesúsñapa' atet oterraneterr:

—Ama't napa' ama señothenno, Apapa'cho' ama señotheñe. Ñerra'm señothennoñ na Nompore'nate' señotheñe.

²⁰ Allempopa' atet otanet Jesús all allecma añño'tenet quelle ñeñt Yomporecop allempo yeçhatanet allara Parets pa'paclo. Tarraña ama't puesheñarra ama eseshaye' rromaye tarro'mar ama çhena' allempoch ñeñt poptetsa ñocop o'ch rromuet.

Allempo Jesús otanet allcha' serr ñapa' acheñenesha'ñapa' amach er-rotenot çhapueto e'ñe allempocma

²¹ Allempoña Jesús'pa' atet oterraneterr:

—Napa' o'ch ahuerren, sapa' se'nerrencha'. Sapa' orach ochñaretes serromhua. Allcha' neserrpa' sañapa' amach seçhapo.

²² Judionesha'ñapa' atet otanna'tyeset:

—Ta'm ñapa' o'ch muetsa ñañeña, ¿ñeñto'marte' atet oten allcha' ser-
rpa' yañapa' año'ch yeçhapo?

²³ Ñañapa' alla oterraneterr:

—Sapa' alla ayeçhcañas arr patsro. Nañapa' ento'marneshan. Sapa' patso'marneshasa, nañapa' ama patso'marneshayayno. ²⁴ Napa' o' notas sapa' orach ochñaretes serromhua tarro'mar ñerra'm amach same'ñerrno na ñeñten peretnene' ochñarets, po'ñoçh sapa' orach ochñaretes serromhua.

²⁵ Ñetñapa' atet otereterr:

—Papa' po'ñoçh ¿eseshape'tña?

Jesúsñapa' alla oterraneterr:

—Napa' ñeñtenca'ye po'ñoçh chocma sotene'. ²⁶ Atarr nanac palltena çhocmach notenes atet sepena sa, shonte'ch neños añecop atet nentyen. Tarraña ñeñt nellsensene' ñapa' e'ñe po'ñoçh atet oten ña. Napa' añca'yeña ne'ñoreññaña acheñenesha' arr patsro ñeñt atet ne'mueññañ Apa.

²⁷ Ñetñapa' ama esesha' çhapahueto pueyoçhreto ñeñt atet otenanet Pomporcop ñeñt atarr Parets. ²⁸ Jesúsñapa' alla oterraneterr:

—Ñerra'm esempoch sapa' sechantam̄psen eno corsocho na Ñeñten Acheñetosetspa' allempochña çhaponasa seyoçhro napa' ñeñten e'ñe po'ñoçh chocma sotene'. Chaponasach ñaña napa' ama es nepeno e'ñe nota, añña ne'ñorena atet yeçhatenen Apa. ²⁹ Ñeñt nellsensene' ñapa' e'ñe parro'tsenen. Ama a'montsenno, tarro'mar napa' e'ñe chocma atet nepena ñeñt muenen ña.

³⁰ Allempo atet serrpare'tatenanet allempopa' shonte' ame'ñaya all.

Atto ñeñt puechemer pen Yomp̄or ñetñapa' atarr cohueno'tsa'yenet; ñeñña ama puechemer peno Yomp̄or; ñetñapa' po'chñara taruasatenahuet e'ñe atta

³¹ Allempoña Jesús'pa' atet otan judionesha' ñeñt ame'ñenaya ña:

—Ñerra'm chocma soctape'chon neñoñ po'ñoçhpa' neyochresha'ch nepenes. ³² Allempopa' señoterrcha' ñoñets ñeñt e'ñe po'ñoçh Yompor po'ñoñ. Ñeñtña ñoñets po'ñoçhpa' toramperrescha' e'ñech cohueno'tsenes.

³³ Ñetñapa' atet otereterr:

—Yapa' Abrahamca'ye po'mrenñey. Ama't ahuata yapa' ama't puesheñarrofeyapa' ama ehuancareteye attoch esesha' yetaruasate' e'ñe atta. Eso'marte' pañapa' poteneña atorampsareteyo'ch.

³⁴ Jesúsñapa' alla oterraneterr:

—Po'ñoçhca'ye notenes: Allohuen ñeñt ochña'tare'tetspa' po'chñara huanquénahuet, ñetñapa' po'chñara taruasatenahuet e'ñe atta. ³⁵ Ñeñt ataruasataret e'ñe atta amach chocmaye' yeçherro e'ñe parro epuet pamo'mte'. Tarraña na ñeñten Puechemeren chocma e'ñe neyçhena epan Namomte' errponañohuen. ³⁶ Ñeñto'marña na ñeñten Puechemeren ñerra'm na setoramperre' sapa' atorampsarettescha' e'ñe po'ñoçh, amach alla taruasaterrse'te so'chñar. ³⁷ Na po'ñoçhpa' neñotenes sapa' po'mrenñeseñ Abrahamca' tarraña sapa' aña semnen o'ch semtsan. Tarro'mar neñoñpa' ama't mameshapa' ama çhennaso sa seyoçhro. ³⁸ Napa' añ neñeñ ñeñt atet nentapreteñ Apa. Sapa'cho'ña aña atet sepen ñeñt atet se'mapreteñ ñeñt sompor sepen.

³⁹ Alla otereterr:

—Ya yatañpa' Abrahamca'ye.

Jesúsñapa' atet oterraneterr:

—Sapa' ñerra'm po'ñoçh Abraham po'mrenñeseñ soctape'cheneñte' atet e'ñe cohuen cotape'che't Abraham. ⁴⁰ Tarraña sa te'pa' çha so'patenna o'ch semtsan na ñeñten seserrpare'tatene' ñoñets ñeñt e'ñe po'ñoçh ñeñt atet ne'mueññañ Yompor. Abrahamca' amaca' atteye' pe'te. ⁴¹ Sapa' e'ñe aña soctape'chen atet pena sompor.

Ñetñapa' alla otereterr:

—Yapa' amaca'ye ellapnaneshoteye' ye'ñallete. E'ñe ñapña Yompor yepeñ ñeñtara Parets.

⁴² Jesúsñapa' alla oterraneterr:

—Ñerra'm po'ñoçh Sompor sepeñeñ Parets atarrte' semorrentennañ na tarro'mar napa' Partseshotca'ye nohuapa o' neçhap arr. Napa' amaca'ye notaye' nohuapo, napa' Yomporña nellense'. ⁴³ Eso'mare'tña sapa' ama çhennasoña seyoçhro ñeñt notenes. Ñato' tarro'marte'ña ama semno o'ch se'mñoten ñeñt atet notenes. ⁴⁴ Sapa' oneñeçaca'ye ñeñt sompor sepen. Ñeñto'marña sapa' aña semnen o'ch sepa ñeñt muenen sompor. Ñapa' ahuatoteñ e'ñe pa'motroteñ amtsañta. Ñapa' ama't mameshapa' ama eñora'penoña Yompor po'ñoñ ñeñt e'ñe po'ñoçh tarro'mar ñoñets ñeñt e'ñe po'ñoçhpa' amaca'ye atanenoña ña pueyoçhro. Ñerra'm cho eñorenapa', shequëntsach eñorena tarro'mar ñapa' e'ñe shequëntsa eñoten. Po'ñoçh sequëntsapa' pomporca' penañña oneñe'. ⁴⁵ Tarro'mar napa' añ notenes ñeñt e'ñe po'ñoçh sañapa' amaña same'ñenno. ⁴⁶ Ama't puesheñarrofesa sa, napa' amach errotentot sotno napa' eñallo' no'chñar. Atto napa' añ notenes ñeñt e'ñe po'ñoçh eso'mare'tña sañapa' ama same'ñenno. ⁴⁷ Erra'tsente' Yomporena'tarpa' ñetñapa' choçhca'ye

e'mñoteññañet Yompor po'ñoñ. Ñeñto'marña sapa' ama se'mñoteññañe po'ñoñ, amaca'ye Yomporena'tareyaso.

Allempo Cristopa' atet otanet: Allempo ama eñalletena' Abraham, nañapa' eñallana

⁴⁸ Judionesha'ñapa' atet otereterr:

—E'ñe po'ñoçh atet yoteneþ, þapa' samario'marneshaþ, oneñeña pechorrenaya.

⁴⁹ Jesúsñapa' oterraneterr:

—Napa' ama çhoye' chorrenno oneñeñ. Napa' atarr nanac nemcha'na'teñ Nompor Parets. Sañapa' ama semcha'na'tenno na. ⁵⁰ Napa' ama añeye' ne'neno attoch necohuentata nañeña. Eñallña ñeññ necohuentatene' na. Ña eñoretsa atet es entyen arr patsro. ⁵¹ Po'ñoçhca' notenes: Ñerra'm esesha' e'ñe cotape'cherre' neñoñpa' ñetña ama't ahuatapa' amach e'ñe poctacma rromuerreto.

⁵² Judionesha'ñapa' alla otereterr:

—Te'ña po'ñoçh yapa' o' yeñotaþ þapa' çha chorrenþa oneñeñ. Ama't Abrahampa' o' rromuen ña'ma ñeññ a'mta'yesaye't Yompor po'ñoñ ñeñtpa'çho'ña o' colla'huenet. Te'ña þapa' atet þoteneý esesho'ch cotape'cherre' peñoñpa' ama't ahuatapa' aña'ch rromuerreto. ⁵³ Papa' çhate' þotenapañ ellote' pemtaneñ atto ancha'tarette't Abraham ama't ñapa' o'ca'ye rromuen. Ñeññ a'mta'yesaye't Yompor po'ñoñpa' ñetpa'çho'ña o' colla'huenet. Papa' çhate' þotenapañ amate' arromñateshayaype.

⁵⁴ Jesúsapa' atet oterraneterr:

—Ñerra'm na cohuentatetsa nañeña, necohuentateña e'ñe napa' amate' es sherbeno. Nomporpa' ña necohuentatene' ñeñtara ñeññ soteneñ Seyompor-ro' sepeñ saña. ⁵⁵ Sapa' amaca'ye señoteñe tarraña napa' neñoteñca'ye. Ñerra'm na otetseñ ama neñoteñe napa'çho'ña atteneñte' ñerra'm sa, çhate' neshcare'tensoñ. Napa' e'ñe po'ñoçh neñoteñ ñeñto'mar çhocma noctape'cheññañ po'ñoñ. ⁵⁶ Abraham ñeññ sa satañpa' atarr nanac cosha allempo eñoch o' çhap allempo ñeññ poctetsa nocop o'ch nohuapa arr patsro. Allempoña eñoch napa' o' neçhap arr patsro atarr nanac cosha.

⁵⁷ Judionesha'ñapa' alla otereterr:

—Papa' ama pechena' amnaroch çharra' pecharña þañapa' eso'mare'tña þoteneýña þapa' pentero' Abraham, ñeñtpa' ahuatramche' corre't.

⁵⁸ Jesúsñapa' alla oterraneterr:

—Po'ñoçhca' napa' o'ch notas: Ama eñalletena'ña Abraham, nañapa' eñallana.

⁵⁹ Netñapa' allenta chetet mapue'pa' o'ch rolle'chetañ tarraña Jesúsña a'nahua çha'nerr Parets pa'paçlotpa' o' ahuerr o' sohuannerranet.

9

Allempo Jesúsapa' a'crraterran puesheñarr aporo'yet ñeññ atta eñalletña

¹ All oñen Jesúsapa' allña entnoman puesheñarr yacma aporo'yet. Ñeñña aporo'yetpa' atta eñalletña. ² Pueyochresha'ñapa' allenta a'pto'chet:

—Maestro, ¿essha'tña ochña'tats ñato' ña amapa' pamo'mte'te' ñeñto'mar eñalletaña atet aporo'yet?

³ Jesúsña'pa' atet otanet:

—Amaca'ye po'chñarofeyaye ama't ñaña pamo'mte'; ñeñtpa' añecopña allochña'pa' o'ch norrtatoñ Yompor po'partsoña ñesho. ⁴ Ñeñt poctetsa o'ch norrtatoñ po'partsoña ñeñt nellsense' tayepa'tña'pa' puetarmeñ. Ñerra'm o'ch checmetenpa' amach eshcaye' yetaruaso. ⁵ Tayepa'tña añe patsro'tsenmeñenpa' na ñeñten a'puetarsam'pene' acheñenesha' pocta'pña añe patsro.

⁶ Allempoña atet otuapa' allenta a'chonon pa'snom patso o' a'cha'cha'tach. Ñeñtña cha'cha'te'pa' alloña a'yac'le'chanña aporo'yet.

⁷ O'ña a'yac'le'chuepa' atet och:

—Te'pa' orra'p oño all apco'sattatareto ñeñtpa' añ pa'so'cheñ Siloés. Allcha' pe'pac'le'cha. (Ñehua, aña'ye otenetña Siloés ñeñt oñ ahua'ñare't.)

Ñaña'pa' allenta ahuo' oño allcha' e'pac'le'chena'. E'pac'le'chuatsapa' e'ñe errtsapa' allentepa'tcha' cohuenterraña pa'clle' e'ñe cohuen enterra.

⁸ Pamo'tsesha'ña ñaña po'poñe'chno acheñ ñeñt e'ñe cheme'tene' all allempo enamaren quelle, ñetña'pa' atet otyeset:

—Aña'pa' ¿ama't añeyayeña ñeñt anorrtse't ñeñt enamare'tatse't quelle?

⁹ Patantarr acheñenesha'pa' atet otyenet:

—Ñeñca'ye.

Po'potantañe'chnopa' atet otyenet:

—Amaca'ye ñeñteyaye, ataca' ñeñfema'ttena.

Aporo'yetña'pa' atet otanet:

—Napa' ñeñtenca'ye.

¹⁰ Ñetña'pa' atet otyeset:

—¿Erro'tenote'tña o' pecuerr?

¹¹ Ñaña'pa' atet oterraneterr:

—Añ yacmar ñeñt otenet Jesús ñaca'ye a'cha'cha'te'ña pa'snomo patspa' alloca'yeña a'yac'le'chen. Allempoña'pa' oten nepac'le'chenepa'to' oño Siloéso. Naña'pa' allña ne'pac'le'chena'. E'ñe e'pac'le'chuatsanpa' al-lentepa'tcha' necuerr.

¹² Ñetña'pa' alla otereterr:

—¿Erro'tsena'tña ñeñt yacmar?

Ñaña'pa' ot:

—Ta'm, amaca'ye neñoteñe.

Atto fariseonesha'pa' a'p'to'tare'tenan aporo'yet ñeñt a'crraterr Jesús

¹³ Allempoña ñeñt poro'ye'chatse'tpa' anmet allo'tsen fariseonesha'.

¹⁴ Ñehua, allempo a'cha'cha'tan Jesús pa'snomo pats allo a'yac'le'chan aporo'yet ñeñt cohuaterre' allempopa' añ yetro allempo amesenet.

¹⁵ Fariseonesha'ña'pa' ello alla otereterr:

—¿Erro'tenote'tña o' cohuaterrpet?

Ñaña'pa' atet otosanet:

—Año'ca'ye a'yac'le'cherrnet senmatso ñeñt a'cha'cha'taret epuet pats o'ña ne'pac'le'cherrapa' allenta necuerr.

¹⁶ Patantarrña fariseonesha'pa' atet otyeset:

—Ñeñt yacmarpa' amate'ca'ye Partseshoteye' huapo ñeñto'mar ama esoye' entenanña ñeñt anare't paterr yet allempocma yamesen.

Po'potantaññapa' atet otyeset:

—Ta', elloña ñerra'm ochñañ acheñ amate' errotenoť orrtatonayeña partsoteñets.

Attoña e'ñe all ellopa'tetstatet poctaṗña ñocop. ¹⁷ Ellopa' alla otereterr ñeñĩ poro'ye'chatse't:

—¿Errofena't ṗotenña ṗa añecop ñeñĩ o' cohuaterreṗ?

Ñañaapa' atet ot:

—Ñapa' ñeñca'ye a'mtene' Yompor po'ñoñ.

¹⁸ Judionesha'ñapa' atet otyeset:

—Ñapa' amaca'ye po'ñočh aporo'yetyeaye, e'ñeca'ye cohuen entena.

Allempoñapa' chore'toñet pamo'mte' ñeñĩ o' cohuer. ¹⁹ Ñetñapa' atet otapoñet pamo'mte':

—Añpa' ¿añe'tña sacñe'ter ñeñĩ sotyese't ahuo' eñalletaña sacñe'ter aporo'yet? Te'ñapa' ¿errofenote'tña o' cohuer?

²⁰ Pamo'mte'ñapa' atet otosanet:

—Po'ñočh añca'yeña yacñe'ter ñeñĩ atta eñalletatsa aporo'yet. ²¹ Atto o' cohuerpa' yapa' amaca'yeña yeñoteñe. Ta', esesha'te' o' cohuater, yapa' ama yeñoteñe. Sa'ṗto'ch e'ñe ña, ñapa' o'ca'ye atta po'napen, ñoñachca'ye eñora.

Judionesha'ña allempopa' atet otyeset:

—Po'ñočhepa'tca'ye aporo'yet o' cohuer.

²² Ñehua, pamo'mte' atet otanet tarro'mar ñetpa' mecha'teñet judionesha'. Ñehua, judionesha' ñetpa' atet a'pocatenet ñerra'm esesha' otets: Jesúsṗa' ñeñca'ye Cristotets, ñeñña atet otetspa' o'ch mueño'chet ñet po'prahuoť. ²³ Ñeñto'marña pamo'mte'pa' atet otanet:

—Ñapa' o'ca'ye atta po'napen, ñoñachca'ye eñora.

²⁴ Puepocheñopa' alla chore'tereterr ñeñĩ poro'ye'chatse't atet otapet:

—Te' ṗapa' o'ch pecohuentaterrñañ Yompor. Yapa' yeñoteñ añ yacmapa' atarrca'ye ochñañ.

²⁵ Ñañaapa' atet oterraneterr:

—Ta', ñato' ochñañeñe' napa' ama neñoteñe. Napa' añaca'ye neñoten napa' aporo'yeten te'ñapa' o' cohuen necuerr.

²⁶ Ñetñapa' alla otereterr:

—¿Erroťe'tña perreṗ? ¿Erroťenote'tña o' cohuaterreṗ?

²⁷ Ñañaapa' oterraneterr:

—Ama'tña napa' o'ca'ye notuas sañapa' are'tña señoteñe. ¿Eso'mare'tña semneñ o'ch alla noterrser? Ñato' ¿añecopťe' semneñ o'ch yochresha'tasa saña?

²⁸ Ñetña allenta otnare'chetpa' atet otereterr:

—Papa' pueyochresha' penepñ ñeñĩ yacmar, yañapa' Moisésca'ye pueyochreshay. ²⁹ Yapa' yeñoteñ Paretsṗa' eñorana'tana Moisés, tarraña ñeñĩ yacmarpa' ama yeñoteñe erroťe'ña huapa.

³⁰ Ñeñĩ poro'ye'chatse'tpa' atet oterraneterr:

—Erroťenotuca'ye ama señoteñe'tña erroťe' huapaña ama't napa' o'ca'ye e'ñe cohuen cohuaterren. ³¹ Yapa' yeñoteñ ñeñĩ ochñañ acheñpa' amaca'ye e'mñoteñe Yompor, tarraña ñerra'm ya yemcha'na'teñoť Yompor atet yepena ñeñĩ muenen ñapa' chocmach e'mñoteney. ³² Ya ama't ahuatapa' ama ye'mareña esesha'pa' o' cohuaterranña ñeñĩ atta

eñalletña aporo'yef. ³³Ñerra'm ñapa' ama Yomporeshot huapañe amate' errotenot cohuaterrnoñe.

³⁴Ñetñapa' alla otereterr:

—Papa' pe'ñalleta e'ñe ochñartsoñ. Te'ñapa' cha pemneñ o'ch peychatey ya.

Allenta mueño'chet e'ñe ñet po'prahuot.

Ñeñt ama ame'ñetso Jesúsñapa' atef entenanet ñerra'm aporo'yef

³⁵Jesúsñapa' o' e'mare'ch ñeñt aporo'yettatsetpa' o' mueño'chet. Allempoña enter Jesúsapa' atef oter:

—¿Pame'ñeña't ñeñt Yompor Puechemer?

³⁶Ñañapa' atef och:

—Ayochreshate, ¿eseshatña ñeñt Yompor Puechemer ñeñtcha' name'ña?

³⁷Jesúsñapa' atef otererr:

—Ñeñt pecuen, ñeñten atef potene', naca'ye.

³⁸Ñañapa' allenta concorpa ñeshopa' atef otererr:

—Name'ñerrpach Partseshacha'.

³⁹Jesúsñapa' alla otererr:

—Napa' añecopña nohuapa arr patsro allochñapa' attoch acrareterra acheñenesha' errotench'a nentyesanet, allochñapa' ñeñt ama entetsopa' o'ch e'ñe cohuen enterra. Ñeñtña entetsañpa' o'ch alla aporo'yetterra.

Ñeñtpa' añ toma'ntata, ñeñt atarr ochñañ entetsa ñerra'm ame'ñerrana Jesús, ñetpa' cherranetcha' Yompor po'cohuenna pueyoçhreto. Ñeñtña ama ochñañeye' entetsañe ñeñto'marña ñetpa' amach ame'ñereto Jesús, ñetñapa' amach cherraneto Yompor po'cohuenna pueyoçhreto.

⁴⁰Patanta'tetsña fariseonesha' ñeñt allame'ttso'tsa'yenet ñesho, ñetñapa' e'mueñet ñeñt atef oten Jesús. Ñetpa' atef ochet:

—Ta'm yapa' ¿amate' aporo'yeteye' pentenye?

⁴¹Jesúsñapa' atef otanet:

—Ñerra'm po'ñoçh sa aporo'yef sentenañ amate' eñallmeñeña so'chñar. Tarraña sapa' atef soten, sapa' año' aporo'yeteyayso, e'ño' cohuen secuen, ñeñto'marña te'pa' o'ch notas, so'chñarpa' chocma eñall.

10

Atto Jesúsapa' añ toma'ntatanet all yottampeñet carrnero

¹Allempoña Jesúsapa' alla yeçhaterraneterr, ñeñtpa' atef toma'ntaterraneterr:

—Po'ñoçhca' notenes: All yottampeñet carrnero ñerra'm esesha' ama be'tetso allotecma be'tenet ñerra'm po'pshemñtañoña a'tenet, ñeñtña po'ñoçhpa' eñeñca'ye ñeñt aprratamñpsañtetsa. ²Tarraña ñerra'm esesha' be'tets e'ñe allotecma be'tenet ñeñtña po'ñoçhpa' ñeñt cohuamñepene' carrnero. ³Ñeñt cohuamñepene' yetarrpa' ñerra'm esempo huacherra ñeñt cohuamñepene' carrnero ñapa' chocmach toramñspuerranet. Carrneropa' e'ñe eñoteññañet pamo'mte' po'ñoñ. Ñañapa' o'ch chore'tyesan po'carrneror pa'so'chñopa' o'ch cha'nmaçha'tatan po'carrneror. ⁴Allempoña cha'nmatue allohuen a'yotpa' ñañapa' o'ch ota. Po'carrnerorñapa' allentach co'ta'huanemñ chenta'. Ñetñapa' e'ñe

cheme'teññañet pamo'mte' po'ñoñ. ⁵ Tarraña ahupña' ama coteñe, çhach matañpesya tarro'mar ama eñotenano ahupña po'ñoñ.

⁶ Ñeñpa' atet oterranerr fariseonesha' toma'nteñtso tarraña ñetña' ama eñotoñeto ñeñt otenanet.

Atto Jesús'pa' añ toma'ntena ñeñt e'ñe cohuen cohuanpene' po'carrneror

⁷ Allotña'pa' alla oterraneterr Jesús:

—Po'ñoçha' notenes: Napa' na yetarrotets allotcha' be'ten carrnero. ⁸ Allohuen ashcañnesha' ñeñt huapyestse't allempo ama nohuena' na, ñetpa' eñeñaret ñeñt aprratamñsañtetsa, tarraña ñetpa' ama e'mñotenanetoña carrnero. ⁹ Napa' na yetarrotets. Ñerra'm esesha'ch be'tets nesho ñeñpa' queshperrach, be'terretcha' ñaña çha'nerretcha' enterretcha' e'ñe cohuen puerrar.

Ñehua, ñeñtpa' añ otenanet: Ñerra'm esesha'ch ame'ñaya ña ñetña' queshperrretcha'. Ñachña cohuanperrahuet e'ñe cohuen amach es pallterretó.

¹⁰ Jesúsña'pa' alla oterraneterr:

—Eñetpa' amaca'ye huenoña e'ñe atta, añecopña huena o'ch etyes, o'ch es muetsa, o'ch es a'chencatua. Tarraña napa' añecopña nohuapa attochña sapa' corretsasach socsheñeshocmañen e'ñe tayoteñ erponañohuen. ¹¹ Napa' na ñeñten cohuen cohuanpene' carrnero. Ñeñt e'ñe cohuen cohuanpene' carrnero ñapa' e'ñe ñañeña a'rroyeritsa o'ch rroma po'carrnerorecop. ¹² Tarraña po'psheñeñ ñeñt atsa'tarettatsa attoch cohuanpenan carrnero ñeñtpa' ama pamo'mtayeyaye; ñañapa' ñerra'm entapan ma'yarrpa' çhach mata o'ch sa'nmanña carrnero. Ma'yarrña'pa' o'ch rroma'yesosan carrnero, patantarrña carrneropa' o'ch atta a'parratse'tach. ¹³ Ñeñt atta atsa'tarettatsapa' po'ñoçpa' ama lleca'penanoña carrnero ama't mamesha. Ñeñto'marña çhach sa'nmanña carrnero.

¹⁴ 'Napa' na ñeñten cohuen cohuanpene' carrnero. Napa' e'ñe nechme'teñ ñeñt necarrneror. Ñeñña nopa' e'ñe cheme'tenen naña. ¹⁵ Atet pena Apa e'ñe eñotenen, nañapa' e'ñe neñoteñ naña Apa. Napa' e'ñe nañeña o'ch na'rroyerra attoch nerroma necarrnerorecop. ¹⁶ Eñall po'poñeçhño ñeñtcha' necarrneror neperr; ñetpa' ama parrocmateneto arr allo'tsen ñeñt necarrneror nepen te'. Añ poctetsa o'ch nerraneta' attoch e'mñoterrnanet neñoñ, allochña'pa' o'ch e'ñe parrocmaterret. Puesheñarrana ñeñtencha' cohuanperrahuet.

¹⁷ 'Apapa' ello atarr morrentenna tarro'mar napa' na'rroyena nañeña o'ch nerroma acheñeneshapoc, elloña'pa' o'ch alla netanterra. ¹⁸ Ama't eseshapa' amach puerratanpesnoña nocreña, napa' na ñeñten a'rroyetsa e'ñe nañeña. Napa' anareten attoch na'rroya o'ch nerroma; anareten ñaña attoch ellopa' o'ch alla netanterra. Ñeñtpa' Apaña notene' atetcha' neña. Arrpa' allohua atet toma'ntatenanet allohuen ñeñtcha' ame'ñerraya ñeñña po'carrneror pen ñeñtcha' atarr cohuen cohuanpen.

¹⁹ Ñeñt atto serrpare'tatenanet Jesús, allña judionesha'pa' ellopa'tetstatenet pocta'ña Jesúsocop. ²⁰ Shonte' acheñenesha' ñeñt atet otyéssets:

—Añmapa' çhaca'ye chorreña oneñeñ, çhaca'ye mospuena. Eso'mare'tña se'mñoteñ.

²¹ Po'potantañeçhnoña'pa' ñetpa' atet otyenet:

Ñerra'm cho chorreña oneñeipa' amate' errotenot eñosoña atet e'ñe cohuen. Oneñeipa' amate' errotenot cohuaterranoña aporo'yef.

Allempo judionesha'pa' achmare'teñet Jesús

²² Allempoñapa' cherrerr allempo alla cosherrerr judionesha' Jerusaléño allempoch yerpuerret ñeñt atto nete't ahuat Parets pa'paquell ñocop. Allempo alla cosherreterra' allempopa' huapo. ²³ Jesúsñapa' alla chopeñen Parets pa'paclo all oteñet Salomón puecha'petaro. ²⁴ Allñapa' arrotampesya judionesha'pa' atet ochet:

—Esempohuachñaca'ye pe'nuaña ñeñt atto pemoñne'tatenya. Ñerra'm po'ñochte' pa Cristotetspa' poteyñaca'ye e'ñe po'ñoçh.

²⁵ Jesúsñapa' atet otanet:

—Ama't notatstas sapa' amachca' same'ña'no. Napa' e'ñe neyemteño't Apa atet es nepa'yen. Ñeñt norrtatyenpa' ñeñtcha'ña señotate' napa' ñeñten Cristotets. ²⁶ Tarraña sapa' ama same'ñenno tarro'mar sapa' ama necarrneroreyayso ñeñt atet o' notuas. ²⁷ Ñeñt po'ñoçh necarrnerorpa' e'mñotennanet neñoñ, nañapa' neñotenanet. Ñetñapa' cotennet. ²⁸ Nañapa' napuerranetcha' attochña ñetpa' corretsetach tayoteñ erponañohuen, ñetñapa' ama't ahuatapa' amach chenguërreto. Ama't eseshapa' amach puerraterrnetoña e'ñe na notot. ²⁹ Nomporpora' ña napuene'ña ñeñt name'ñenaya. Ñapa' atarr ahuaamencatesha'. Ña po'huamencpa' ama eseshaye' metanenaye. Ama't eseshapa' amate' errotenot puerratam̄psetoña Nompopor e'ñe ña potot. ³⁰ Napa' e'ñe parro attecman epan ña.

³¹ Ñeño'marña allempo judionesha' ñetpa' chetet mapue' allo'ch rolle'chet. ³² Jesúsñapa' atet oterraneterr:

—Shonte' cochnesha' norrtatyesonas Nompopor po'huamenco't. ¿Era'tsenote'tña añ ñeñt e'ñe cochnesharot sapa' semneñ o'ch sarrolla'n?

³³ Judionesha'ñapa' atet otereterr:

—Ama porrtateño'te'ye' cochnesha' yemneñe o'ch yarrolle'taḡ. Yapa' añecopña yemneñ o'ch yarrolle'taḡ atto pa'pa' atarr pa'chmare'teñ Parets. PAPA' acheño'aca'ye pemneñ o'ch pepartsocoptarta.

³⁴ Jesúsñapa' alla oterraneterr:

—Ñoñets ñeñt atet anaret ahuatoteñ socop allpa' atetca'ye anua'ret añecop ñeñt e'ñe ñenma't a'pote' Yompopor po'ñoñ, ñeñtapa' atet otanete't Yompopor: “Sapa' atetcha' entenes acheñenesha' ñerra'mrrate' yompores.” ³⁵ Yompopor po'ñoñ ñeñt anua'ret ahuatoteñ ama puenesho. Ate't otanete't ñetpa' yomporo'ch entenanet acheñenesha', ³⁶ naña ñeñten o' nerren Yompopor ñeñten o' mueñerren arr patsro, sapa' achma'ña'ñatach sepenen tarro'marotña napa' noten Yompopor Puechemeren. ³⁷ Ñerra'm amate' aye' norrtateno Yompopor po'partsoña ñeñtepa' amach same'ñatsetno. ³⁸ Tarraña atto po'ñoçh norrtateññañ po'partsoña ama't ñeñtapa' same'ña, ama't napa' ama ame'ño'eyen sentenno. Attochña po'ñoçh çhaponasa seyoçhro atto Apapa' e'ñe parrocmatenna, napa'cho'ña neparrocmaten epan Apa.

³⁹ Ellopa' mueneñetañ o'ch rromuet tarraña ñet allempopa' cha a'queshpachet.

⁴⁰ Allempoña Jesúspa' ahuerri yomta'n Jordanaso all e'ñe ñenmañ apatyese't Juan Yomporecop. Allñapa' alla a'pa. ⁴¹ Shonte' hua'cha'tyestsa ñeshopa' ñetñapa' atet otyesoset:

—Juanpa' ama't coñe'ta ama orrtatano partsoteñets, tarraña allohuen allpon otyesy'e't Juan añecop ñeñ'cha' Cristoterrets ñeñña te'pa' e'ñe po'ño'ch atet pena.

⁴² Allñapa' shonte' acheñenesha' ñeñ' ame'ñaya Jesús.

11

Allempo rroma Lázaro

¹ Allempo atsna'ten puesheñarr yacma ñeñ'pa' añ pa'so'cheñ Lázaro ñeñ' ye'chetsa anetso Betania epuet epsheño'mar po'ch, puesheñarrpa' María, po'psheñ'pa' Marta. ² Ñehua, ñeñña Mariapa' ña a'yatcate'ña Partsessa' eñmosa'to pa'tco allempoña e'ñe ña pue'chopa' alloña a'porrarrat'quër, ña po'se Lázaropa' cha atsna'ten. ³ Po'chanesha'ñapa' allenta mueñet acheñ Jesúsesho, ñetñapa' atet otoset Jesús:

—Partseshacha', ñeñ' atarr pemorrentenapa' cha atsna'ten.

⁴ Jesúsña e'mare'chpa' ñapa' atet otapanet:

—Ña amaca'ye añecpaye' atsna'teno o'ch rroma, tarrecpa atet pena allcha' norrtatoñ Yompor po'partsoña, allochñapa' o'ch cohuentatenanet na ñeñ'fen Yompor Puechemeren.

⁵ Jesúspa' ama't atarr morrentenanañ Marta ñaña pa'mo'nerr ñaña Lázaro, ⁶ tarraña allempoña e'mare'tan Lázaropa' cha atsna'ten, ñapa' amaña allorocmaye'to, ñapa' alla epomterr e'ñe all allo'tsen. ⁷ Allempoña epomta'muenpa' atet ota'muenan pueyochresha':

—Te'pa' o'ch ahuerrey alla Judeo allo'tsen Lázaro.

⁸ Pueyochresha'ñapa' atet ochet:

—Maestrocha' allpa' chaca'ye o'patenpa judionesha' o'ch rrolle'tapet attoch muetsapet. Ta'm, ¿paña te'pa' o'ch alla pesechenerr o'ch alla ahuerpperr?

⁹ Jesúsñapa' atet otan pueyochresha':

—Ama'tña yetpa' o'ca'ye ellapen puetarsats. Ñerra'm yechope'ch yeto amach yepoto'teno tarro'mar e'ñe yenten puetare' añe patsro.

¹⁰ Aña ñerra'm yechope'ch tsapo yepoto'tena tarro'mar ama a'puetarsamñpsareteye. (Atto Jesúspa' e'ñe eñotatenanet allponmatmeñ ñocop attoch e'ñe etsotuan Yompor po'taruas tarro'mar ama chena' allempo ñeñ' poctetsa ñocop attoch muetsat.)

¹¹ Allempo otua atetpa' o' alla oterranerr pueyochresha':

—Lázaro ñeñ'tey e'ñe parrocmata' atarr yemorrentannena ña te'pa' chaca'ye muen, ñeñ'to'marña te' napa' o'ch ahuen o'ch alla nopuera'.

¹² Allempoña pueyochresha' ñetñapa' atet otereterr:

—Ñerra'm Partseshacha' chate' e'ñe cohuen muenpa' ñeñ'tepñapa' corrrach.

¹³ Ñehua, Jesúspa' añ otenanet atto Lázaroñpa' choca'ye rromuen; ñetñapa' cha otenapuetañ añte' otenanet ñeñ' atto chocma e'ñe yemuen betnatotey. ¹⁴ Allempoña Jesúspa' alla oterraneterr attoch e'ñe eño'chet:

—Te'pa' po'ño'chca'ye o' rroma Lázaroñ. ¹⁵ Napa' te'pa' atarr nocshena tarro'mar ama allo'tsenno all. Atarr cohuen nenteñ socop allochñapa'

attoch e'ñe cohuen same'ñerrna. Ama'tpa' te'pa' o'ch ahuey Lázaroñesho, o'ch yenteña'.

¹⁶ Tomásña ñeñt otenet Epanesha' ñapa' atet otan po'potantañ ñeñt parro yochreshatsocmuet:

—Ama'tpa' ahuanmapo'ch yerromuepa' yañia epay Jesús.

Allempo Jesús eñotatanet ñapa' ña atantatañtetsa alloch e'ñe yocrrena

¹⁷ Allempoña chap Jesús all, ñapa' eñotos o'ca'ye pa'tatsmat pampa' huet. ¹⁸ Nehua, Betania allame'ttsañia Jerusalén —o' ma'pañia kilómetro attoch ye'chap Jerusaléno. ¹⁹ Allñapa' shonte' judionesha' ñeñt huachetsa allo'tsen Marta epuet pa'mo'nerr María ñeñtcha' emya'tenahuet atto ya'na'teñet po'sayañet Lázaroñ ñeñt o' rromuerr. ²⁰ Allempoña Martapa' e'mare'tan Jesús o' huena ñañapa' allenta ahuo' o'ch poctenan Jesús. Maríañapa' allo'tsena pocollo all anen. ²¹ Martaña allempo poctenan Jesús atet otapueñ:

—Ñerra'm Partseshacha' arro'tsenpeñcha' amate' rromuerrñeña ne-sayañ. ²² Ama't te'pa' napa' neñoteneñ ñerra'm erra'tsencha' penam Yepapar, ñapa' chocmach atet ñonap.

²³ Jesúsñapa' atet och:

—Po'ño'chpa' tanterrach pesayañ.

²⁴ Martañapa' atet otererr:

—Po'ño'ch napa' neñoteñ tanterrach esempohuañen allempoch atantaretey allohueny.

²⁵ Jesúsñapa' atet otererr:

—Napa' na ñeñfen e'ñe po'ño'ch atantatañen, napa' ñeñfen alloch e'ñe socrrena. Erra'tsencha' name'ñenaya na ama'tcha' rromuetaña' ñetpa' ellochña alla correrret. ²⁶ Ama't ñaña allohuen ñeñt corra'yetsa te' erra'tsencha' name'ñerraya na ñetñapa' corretsetach tayoteñ e'ñe erponañohuen. Papa' ¿pame'ñenna't ñeñt atet noteneñ?

²⁷ Martañapa' atet otererr:

—Partseshacha' napa' neñoteneñ e'ñe po'ño'ch p'apa' ñeñteñ Cristo-tosets, p'apa' Yepapar Puechemereñ, p'a atarr yecuen ahuatoteñ o'ch p'ehuapa arr patsro.

Allempo Jesús yahuosa Lázaroñ puepampro

²⁸ Allempo atet otuepa' ñapa' allenta ahuer pocollo, atet otuerran pa'mo'nerr María, ñeñtpa' atet och a'nahua:

—Te'pa' o' huena Maestro, o' agotatueneñ.

²⁹ Maríaña e'mare'te'pa' atantoche' allenta ahuo' ñaña o'ch poctenan Jesús. ³⁰ Nehua, Jesús'pa' ama' chena' anetso, allo'tsenara all pocten Marta. ³¹ Judionesha'ña ñeñt allo'tsa'yen pocollo ñeñt emya'tene' ñetñapa' enteñet atantoche' María puema'yoreñ cha'nem ñetñapa' allenta cota'huanmet. Ñetpa' cha' otenapuetañ arrcha' ta po'sayañ puepampro o'ch ya'na'teña'.

³² Allempoña chap María allo'tsen Jesús, all entospa' concorposa pa'rrp'ot. Napa'cho'ña atet otos:

—Ñerra'm Partseshacha' arro'tsenpeñcha'pa' amate' rromuerrñeña ne-sayañ.

³³ Allempo entosan Jesús all atarr yahuena María ñaña judionesha' ñeñt cotose' ñetpa'cho'ña e'ñe parro attecma yahuanrrortenet, ñañapa'

pueyočhropa' atarr llecapretosanet ñeñto'marña čha enarosa. ³⁴Ñaña'apa' atet otapanet:

—¿Erra'tña sepampuer?

Ñetña'apa' atet ochet:

—Ñehua, Ayochreshate o'ch ahuey o'ch penteña'.

³⁵Allempoña Jesús'pa' yahuosa ñaña. ³⁶Judionesha'ña'pa' otyeset:

—Ñapa'cho' atarropa'tca'ye morrenteña.

³⁷Puesheña'tetsña'apa' atet otyeset:

—Añmapa' ñeñca'ye cohua'terre'ña aporo'yet. Ñerra'm arro'tseneñcha'pa' amachca'ye muenacheñe o'ch rromuerreña Lázaroñ.

Allempo Jesús tantaterran Lázaroñ

³⁸Jesúsña e'ñe puellquëño'tpa' enarerrerr. Allempoña'apa' čhap puepampro all mapuetpono e'ñe all yottañpeñet mapyo. ³⁹Allña'apa' atet otosanet Jesús:

—Te'pa' sa'rrote't mapue' a'yenet.

Martaña ñeñt arromña't po'čhpa' atet oterranerr Jesús:

—Partseshacha' o'te' čha pomaña' o' pa'tatsmat pampa'huet.

⁴⁰Jesúsña'apa' otererr:

—Ama'tña napa' o'ca'ye notuosep ñerra'm pame'ña'nachpa' pentoñcha' Yompor po'partsoña.

⁴¹Allempoña'apa' a'rrote'tet mapue' a'yenet, Jesúsña'apa' cohua' enonet atet ot:

—Apa, neparasyoso'tap tarro'mar te' papa' pe'mñnoten ñeñt atet nenamuenep. ⁴²Ñehua, napa' neñoteñ čhocma pe'mñnoten. Añña acheñenesha' ñeñt tomčha'tets arr ñocpuet neparasyoso'tene'p allochña'apa' attoch eñotenpet pa' ñeñte'p nellsensene'.

⁴³Ñeña'otuapa' allempoña'apa' rrana huomencpa' atet ot:

—¡Lázaroñe, te'pa' o'ch notap petantena, pecha'nen!

⁴⁴Allempoña'apa' čhepa'tcha' čha'netsña Lázaro ñeñt o' rromhua, e'pota'taret poto ñaña pa'rropot, ñaña pa'clloyotpa' e'tacclle'charet pañello. Jesúsña'apa' atet otteraneterr:

—Te'pa' čhosañaca'ye torañperre' esheccha' chope'chnerr o'ch ahuerr.

Atto atarr o'pateñet Jesús o'ch muetsatateret

(Mt. 26.1-5; Mr. 14.1-2; Lc. 22.1-2)

⁴⁵Allempoña shonte' judionesha' ñeñt cotose' María ñeñt ente' Jesús atto orrtatosanet po'partsoña ñetpa'cho'ña e'ñe allempocma ame'ñeret ñamet Jesús. ⁴⁶Tarraña po'potantañečhnoña'apa' ahuanmuet fariseoneshesho ñetña'apa' serrpare'tatoset fariseonesha' ñeñt atet o' pohua Jesús. ⁴⁷Allempoña fariseonesha' ñaña ñeñt pa'mčha'tareťnesha' pen allohuen judionesha' po'cornaneshar, ñetña'apa' apčhachet allohuen ñeñt a'pocstatene' ñoñets judioneshacop.

Ñetña allempopa' atet otyeset:

—Errotuachñaca' yepe'ña, ñeñt yacmarpa' čhocmaca'ye orrtatyenanet partsoteñets. ⁴⁸Ñerra'm atta yequečhpue' allohuenña acheñenesha'pa' čhate' ame'ñyet ña, allempoña po'ñočhpa' čhate' huapa añcha'tareťnesha' romo'marnesha' čhate' puerratanpsoyset Parets pa'paquell ama't ñeñt anaret Partsocop, ama't e'ñe ya ya'netserpa' čhate' puerratanpsoyset.

49 Puesheñarrñapa' ñeñt sochetsa Caifás allempopa' ñeñt pa'mñcha'tareter pen allohuen judionesha' po'cornaneshar ñañapa' atet otanet:

—Sapa' ama es señoteno, ama't coñe'ta. ⁵⁰ Ama't pocte' senteñeña ñerra'm puesheñarr yacmapa' o'ch rroma allohuen acheñeneshacop, allochñapa' allohuen yamo'tsna'tarpa' amach chenca'huerreto.

⁵¹ Ñapa' ama ñofaye' eñosoña atet. Ña allempopa' ñeñt pa'mñcha'tareter pen allohuen judionesha' po'cornaneshar ñeñto'marña ñapa' Parets eñosate'. Ñapa' añ a'potanet atto Jesús'pa' ñach rromuerrets allohuen pamo'tsna'tarneshacop. ⁵² Amach e'ñe ñapfa pamo'tsna'tarecpayaya rromofña Jesús, añecpa'nachña rroma allohuenacop ama't erra'tsencha' puechemer perr Yompor arr patsro, ñachña parrocmataterrahuet. ⁵³ E'ñe allempoteñña atarr o'pateñet Jesús o'ch muetsatachet.

⁵⁴ Ñeñto'marña Jesús'pa' o'huañ chopeñe'ch allo'tsa'yen judionesha' all Judeo. O' ahuo' amayarero'mar, chap paterr anetso ñeñt pa'so'cheñ Efraín. Allñapa' alla a'posa epuet pueyochresha'.

⁵⁵ Allempoña o' cherrmocherr pascuapo allempoch alla cosherrerr judionesha'. Allampaño'marnesha' ñeñt allo'tsa'yenet shontet ahuanmuet Jerusaléno. Ama chena' pascuapo ñetpa' añecopña ahuanmuet attoch a'cohuentatoset e'ñe ñetañeña Partsocop. ⁵⁶ Ñetñapa' Jesús'a e'noset, a'pfo'tanna'tyesoset allempo tomcha'toset Parets pa'paclo; allñapa' otanna'tyenet:

—¿Errofena't sotenña sa, ta'm huapachña Jesús, ñato' amach huapoña arr?

⁵⁷ Ñehua, ñeñt pa'mñcha'tareternesha' pen allohuen judionesha' po'cornaneshar ñaña fariseonesha' ñetpa' atet otyeset acheñenesha':

—Ñerra'm eseshascha' eñote' erro'tsente'ña Jesús'pa' o'ch sotey ya allochñapa' o'ch yermach.

12

Atto puesheñarr coyanesha'pa' a'yatca'tosan Jesús eñmosaño
(Mt. 26.6-13; Mr. 14.3-9)

¹ O' pechapmatamña o'ch chapa'muen pascuapo, Jesús'pa' alla cherr Betanio. Allñapa' allo'tsen Lázaro ñeñt rromats ahuaña ñeñt alla tantaterr Jesús. ² Allñapa' all rrallme'chatneñet. Martañapa' ña nenahuet rreñets. Lázaroñapa' ña rrets epuet Jesús ñaña po'potantañechno. ³ Allña Mariapa' chetan pueñarr eñmosa' ñeñt otenet nardo puese' e'ñe ñeñtoche' ñeñtñapa' atarr tsa'te'. Ñañapa' alloña a'yatca'tan Jesús. E'ñe ña pue'chopa' alloña a'porrarra'tquër. Ñeñtñapa' ora eñmosa'tatan pocollohuen. ⁴ Judas Iscariote ñeñt Simón puechemer ñeñtara pueyochreshar ñeñtcha' pomuerre' ñañapa' atet ot:

⁵ —Esó'marte'ña añ eñmosa'pa' ama choye'ña yepome, chochñacho' yepomeña' yeganañcha' shonte' quelle ñeñt trescientos denario allempopa' yapa'yeseñcha' huocchañneshachno ñeñt atarr es pallta'yetsa.

⁶ Ñapa' ama puellquëñofoye' huocchañneshachnocop atet oto. Ñapa' tarro'mara atet ot, ñapa' atarrca'ye eñe'. Ñapa' e'ñe ñacma anmamipene' quellayepo'r ñeñt allohuenacop, ñapa' allotña etenña quelle ñeñt esha'tenet all. ⁷ Tarraña Jesúsñapa' atet otanet:

—Semnachñaca'yeña coyanesha' ñeñt atet penen. Ñapa' añecop añno'tennan ahuatoteñ eñmosať tarremphua allempoch a'yana'terrneterr ñeñtcha' epuet pampa'pesnet. ⁸ Tarraña ama'tcha' čho pomosaneñ eñmosať alloch es apa'yesaneñ huocchañneshačhno, tarraña čhocmachca'ye eñallña huocchañneshačhno arr patsro. Tarraña nañapa' po'ñočpa' amachca'ye allo'na sentenno arr patsro.

Allempo o'pateñet Lázaro o'ch alla muetseret

⁹ Shonte' judionesha' allempo e'mare'chet o' alla čherr Jesús all Betanio, ñetñapa' huačha'tet. Ama e'ñe ñapťecpa Jesúsocop huačha'teto o'ch enteñeta', añecpa'naña huačha'tet o'ch enteñeta' ñaña Lázaro ñeñt rromats ahuaña ñeñt tantaterr Jesús. ¹⁰ Ñeñtña pa'mčha'tareternesha' pen allohuen judionesha' po'cornaneshar ñetñapa' aňe'na o'patenet Lázaro ña'nach muetset. ¹¹ Tarro'mar allempo tanterra Lázaro shonte' judionesha' ñeñt ame'ñaya Jesús ñeñto'marña ñetpa' o' quečpa'hueretña ñet po'cornaneshar.

Allempo čhap Jesús Jerusaléno

(Mt. 21.1-11; Mr. 11.1-11; Lc. 19.28-40)

¹² Tsapatña shonte' acheñenesha' ñeñt shontetsa pascuacop Jerusaléno, ñetñapa' e'mare'teñet Jesús o' čhapmoch ñaña Jerusaléno. ¹³ Ñetñapa' tsorro'tyesnomuet shequėpan ñeñt anemyeset allo topanetyesnomuet toñ allcha' oñmos Jesús. Ñetñapa' puerranarešet ahuanmuet o'ch poctet Jesús ñeñtpa' atet otyesnomuet:

—¡Acsherrapo'ch allohueney! ¡Aye'chočtaterrapo'ch Jesús ñeñt llesensen Yompor! ¡Aye'chočtaterrapo'ch Jesús ñeñtcha' Pa'mčha'tareter perr israelnesha'!

¹⁴ Ñehua, Jesúsñapa' all entnoman paterr ashnatollpa' allenta monta'nma allo. Ñeñtpa' añecop atet pa ñeñt atet anuaret ahuatoteñ e'ñe ñocop, ñeñtñapa' atet oten:

¹⁵ Amach čha semčha'tatsto sióno'marneshacha' ñeñtarasa jerusaléno'marneshas. Secue'tach te'čca'yeña huaponasaña ñeñtcha' Sa'mčha'tareter seperr. Ñapa' añaca'ye monta'na ashen rre'ptorechor.

¹⁶ Ñehua, ñeñt ñoñets allempoña pueyochresha'pa' ama čhapaneto pueyochreto. Tarraña tsapatoneñña allempo rroma Jesús, o' alla tanterra alla ahuer pue'ntaño all atarr cohuentatapuer Pompor, ñetñapa' allempañña čherranetña pueyochreto te'ña po'ñočpa' o'ca'ye etsoterra e'ñe atet anuaret ñocop ama't ahuototeñ.

¹⁷ Acheñenesha' ñeñt allo'tsa'yen allempo čhore'tenan Lázaroñ puepamproť atto tantater, ñetñapa' ñeñta a'potayeset.

¹⁸ Ñeñto'mare'naña ahuanmaña shonte' acheñenesha' o'ch poctet tarro'mar ñetpa' o' e'mare'chet ñamet ñapa' orrtatenanet po'partsoña.

¹⁹ Allempoña fariseonesha'pa' atet otanna'tyeset:

—Señčte'ca'ye'm yapa' amate' erroť es yeño ama't coñe'ta. Secue' shonte'ca'ye ñaña acheñenesha' erraparenot o' e'ñe coťa'huanmet.

Allempo griegonesha'pa' mueneñet o'ch eñchet Jesús

²⁰ Patanta'tets griegonesha'pa' ahuanmuet ñamet o'ch coshapreteneta' pascua; ñetpa' añecop ahuanmuet o'ch concorposet all. ²¹ Ñetñapa'

ponmosyet Felipe ñeñf betsaido'marnesha' ñeñfara galileo'marnesha'. Ñeññapa' atet otoset:

—Nomporka' yapa' añca'ye yemnen o'ch yeserrpare'tos epay Jesús.

²² Felipeñapa' allenta otenana' Andrés. Ñetña e'ñe epsheño'maretpa' ahuanmuet o'ch oteñeta' Jesús. ²³ Jesúsñapa' atet otapanet:

—Te'ña po'ñoçpa' o' etsoterra allempoch na Ñeñten Acheñetosetspa' o'ch alla cohuentaterran Nompork. ²⁴ Ñeñtpa' e'ñech po'ñoç atet netma'ntatasa atet pena puerets. Ama't erra'tsena puertsor ama çho pampallme'cho patso allcha' puetsohua pa'tall ñeñfach pa'rara pue'llomer. Tarraña ñerra'm çho pampallme'cha patso allcha' puetsa' pa'tall atochña chop. Ama't puellñarra pampallme'chatsa atarrcha' aton ellomre'terr. Ñeñtpa' añ notenes e'ñe pocte' o'ch nerrroma na ñeñten puesheñarrana atochña shonterra ñeñcha' name'ñerraya. ²⁵ Ñeñto'mañ notenes: Ñeñt atarr morrentenaya atto coshena arr patsro, ama pocteye' entenano o'ch es sohuanom Yomporecop, ñeñña pocreña atarr morrentena, ñeñt atet petsapa' çhach a'çhencatena e'ñe ñañeña. Tarraña ñeñt ama morrentenaye atto coshena arr patsro, e'ñe pocte' enteñ o'ch es sohuanom Yomporecop ama't pocreño'huen, ñeñt atet petsa ñetñapa' corretsetach pocsheñeshocmañen tayoteñ e'ñe errponañohuen. ²⁶ Ñerra'm esesha' muenats o'ch torrenet nocop, co'ta'netepa' atochña e'ñe neyochresha' neperranet. Tarro'mar ñerra'm erro'tsenencha' na ñeñt torretsa nocop ñetpa'çho'ña allo'tsenetcha' ñamet. E'ñe allohuen erra'tsencha' torrerrtsa nocop, Nomporkapa' atarrcha' cohuentaterranet.

Allempo Jesús eñotatanet ñapa' çhoch muetseret

²⁷ 'Te' na neyoçhropa' çha atarr nellquëna. Tarraña ama't atteña' Nomporka' napa' amach çha notatsche amach muenatano o'ch huapona ñeñt atarr amuroçhtatañ nenten. Ñeñt atetpa' amach notatsche tarro'mañ napa' ñeñfecopca'yeña nohuapa nach amuroçhtatare'terrtsa. Añcha'ña noch Nompork:

²⁸ —Te'pa' pepa'chña Apa aye'choçhtatare'terrtsa.

Allempoñapa' çha e'morrtatsa ñoñets ento't, Yomporkapa' atet ot:

—Napa' o' necohuentatua, elloña o'ch alla necohuentaterrerr ñañeña.

²⁹ Shonte' acheñenesha' ñeñt tomçhets all, ñetña atet e'mueñetpa' atet otyeset:

—Chote'ca'ye tecorena.

Po'potantañña' atet otyeset:

—Añca'ye eñorana'tenaya Yompork po'mllaño'teñer.

³⁰ Jesúsñapa' atet oterraneterr:

—Ama nocpaye' huenoña añ ñoñets. Ñeñtpa' e'ñe socop huena.

³¹ Te'pa' o' anare'tta allohuen acheñenesha' arr patsro ñeñt ama name'ñenaye ñetpa' amñare'tterretcha' coñcheñtso. Ñaña oneñeñ ñeñt pa'mcha'tare'ter pen acheñenesha' arr patsro, te' ñocoppa' o' anare'tta ahupore'tare'terrach esempohuañen. ³² Na ñerra'm esempoch echantampernert corsocho allempoña napa' neçhore'tercha' allohuen pa'namen acheñ attoch ame'ñerrnet.

³³ Ñapa' añecopña eñorana'tenanet attoch eñotatanet ñapa' corsochoch romuerr. ³⁴ Acheñenesha'ñapa' atet otyeset:

—Yapa' yeñoteñ añ ñoñets ñeñt atet anaret ahuatoteñ, ñeñtpa' atet oten ñeñtcha' Cristoterrets ñapa' ama arromñañeshayaye ama't erponaña. Ta', ¿eso'marte' pañapa' poten ñeñte'p o' Acheñetosetspa' echantamñsaretepo'ch corsocho allcha' perromuerr? Ta', ¿eseshate'ña ñeñt po'ñoch Acheñetosets? amapa' ¿ñeñtarate' ñeñtcha' Cristoterrets?

³⁵ Jesúsñapa' atet oterranerr:

—Mameshaña palltena arro'tsenmeñen na ñeñten a'puetarsamñsañtetsa. Soctape'cherrnan e'ñe tayecma neñoñ tayepa'tña arro'tsenmeñen ñeñtencha' a'puetarsamñperre' soctapña allochñapa' attoch amach cha sechenca'huerro. Po'ñoch ñeñt ama ame'ñetso ñetpa' ama eñoteñeto attoch chenca'huerret. Ñeño'marña ñetpa' e'ñe atet penet ñerra'mrrate' checmeta chope'chenet ama eñoteñeto errenetcha' tet. ³⁶ Na ñeñten sa'puetarsamñpene' soctapña' te'pa' arro'tsenmeñen. Soctape'cherrnan neñoñ tayepa'tña' arro'tsenmeñen. Allochñapa' o'ch seye'chquerra sa acheñres ñeñtescha' atarr cohuen orrtatyerre' ñeñt cohuen enten Yompor tarro'mar sapa' e'ñech puetaro socrena.

Otua Jesús atetpa' ahuer a'nahua; acheñenesha'ñapa' ama eñocheto errate' ahuer.

Atto judionesha'pa' ama ame'ñyeto Jesús ñeñtpa' añ etsoterrtsa ñoñets ñeñt anaretet ñocpuet

³⁷ Jesúsapa' ama't shonte' orrtatyenanet po'partsoña tarraña amaña eseshaye' ame'ñenayoña ña. ³⁸ Ñeñtpa' attoca'yeña etsotaña Isaías po'ñoñ ñeñt a'mtaye't ahuat Yompor po'ñoñ. Ñeñtpa' atet ote't ñocop: Amach Nomporcha' eseshaye' yame'ñayo ñeñtcha' atet yeserrpare't.

Ama Nomporcha' eseshaye' poctenaye pa' pehuamenc.

³⁹ Ñeño'marña amate' errotent' ame'ñeto. Tarro'mar ellonet Isaíaspa' atet ote't:

⁴⁰ E'ñe patpare'teño'tet Yomporña' muenatanet o'ch echarret pueyo'chret. Attochña ñetpa' chach ottenet ñerra'm aporo'yetet ñeñt ama es enteno. Ñeño'marña ama muenatenaneto o'ch es entet taye'to'te' chapamet pueyo'chreto. Ñeño'marña ama't mameshapa' amach es co'tape'cheneto nocop attoch na'queshpateranetañ.

⁴¹ Isaíaspa' tarro'mar atet ote't ñapa' e'ñe entane't Cristo po'cohuenña ñeño'marña eñose'tña ñocop.

⁴² Tarraña shonte' acheñenesha' ñeñt ame'ñaya Jesús ama't ñaña añcha'tarete'chno. Tarraña ñetpa' mecha'chete't fariseonesha' ñeño'marña ama a'metete'te. Añ mecha'tenet taye'to'te' mueño'tanet judionesha' po'prahuot. ⁴³ Tarro'mar ñeñt ame'ñetsañ ñetpa' añe'na muenenet o'ch e'ñe cohuen entenanet acheñenesha'. Ama añeye'ña muenenet o'ch e'ñe cohuen entanet Parets.

Atto Jesús po'ñoñ ñeñtcha'ña otteñe'cherre' acheñenesha' esempohuañen

⁴⁴ Jesúsña rranapa' atet oterrrer:

—Ñerra'm esesha' name'ñenaya na, ama naptaye' ame'ñenneto. Añe'naña ame'ñenet Nompor ñeñt nellensene'. ⁴⁵ Esesha' nentene' napa' añe'naña entenet ñaña Nompor ñeñt nellensene'. ⁴⁶ Napa' añecopña nohuapa arr patsor nach a'puetarsamñpene' acheñenesha' poctapña, allochñapa' ñerra'm esesha'ch name'ñaya na amach allo'tsenareto checmeto. Ñeñt checmeto'tsena ñetpa' ama eñoteñeto ñeñt cohuen

enten Yompor. ⁴⁷ Ñerra'm esesha' e'mue' neñoñ tarraña ama't ama'eñerrnaneto neñoñ, napa' amach naye' mueñenahueto coñcheñtso. Tarro'mar napa' ama añecpaye' nohuapo arr patsro attoch nemñios acheñenesha' coñcheñtso. Napa' añecopña nohuapa o'ch na'queshpatos acheñenesha' arr patsro. ⁴⁸ Esesha'chña nachmene' ñeñtcha' ama ame'ñerraye neñoñ, ñocpuetñapa' eñall attoch amñareñterret coñcheñtso. Ñeñfara añ ñoñets ñeñt neñen na te'pa' ñeñtcha'ña mueñaterrahuetña coñcheñtso esempohuañen. ⁴⁹ Tarro'mar napa' ama e'ñe notaye' neñeno. Apaña ñeñt nellensene' ñapa' ñaña notene' atetcha' notas ñaña atetcha' ne'ñorana'tasa. ⁵⁰ Napa' neñoteñ ñeñt atet oteneñ ña ñeñt'pa' ñeñtcha'ña allochña sapa' corretsasach socsheñeshocmañen tayoteñ e'ñe errponañohuen. Ñeñt atet neñen napa' añca'ye neñen ñeñt atet oteneñ Apa.

13

Allempo Jesús'pa' e'patca'tyesan pueyochresha'

¹ Ama't ama' chena' pascuapo allempoch cosherrerr judionesha', Jesúsñapa' eñoteñ e'ñech ñeñteshaña allo'tsen arr patsro o'ch ahuerr Pomprosho. Ñapa' chocma atarr morrentenana allohuen ñeñt pueyochresha' pen arr patsro. Ñeñto'marña allempopa' e'ñe poctacma morrentuenanet.

²⁻⁴ Ñehua, Judas Iscariote ñeñt Simón puechemer, oneñeñña' ahuepa't cotape'chach pueyo'chro o'ch pomuerran Jesús. Jesúsñapa' e'ñe eñoteñ ñapa' tarro'mar llesenserña Pompor allohuenacop. Tarro'mar ñapa' e'ñe eñoteñ Yomproshotca'ye huapa, elloñapa' o'ch alla ahuerr ñesho. Ñeñto'marña allempo rrallme'chneñt Jesúsña o' tompa' rrotana paterr pa'shtam ñeñt nen enot o' chetan paterr e'shmoco'tametspa' o' chana allo. ⁵ Allotñapa' o' shan oñ huantejo alloña e'patca'tyesañña pueyochresha'. E'shmoco'tamitsoñapa' alloña a'porrarra'tcayerranet ñeñt allo chanena.

⁶ Atteñapa' ponmana Simón Pedro, ñaña'pa' atet och:

—Partseshacha' amaca'ye pocteyaye o'ch pe'patca'tonña netac. Tarro'mar p'apa' pa atarr sherbets, napa' amaca'ye esoyayno.

⁷ Jesúsñapa' atet och:

—Ñeñt atet nepenes te' sapa' amach señoche. Esemppopa' chaponasach seyo'chro.

⁸ Pedroñapa' atet otererr:

—Ama't ahuata napa' amach nemnatape o'ch pe'patca'tenña na tarro'mar napa' amaca'ye nemno o'ch nepencna'ntatap.

Jesúsñapa' atet otererr:

—Ñerra'm amach ne'patca'tapepa' amach errotenot e'ñeye' peyemtenno.

⁹ Simónña Pedropa' atet otererr:

—Ñerra'm po'ñochte' atet Partseshacha' amachña ñapña netac pe'patca'tono nota'nachña e'ñe ora noñohuen.

¹⁰ Jesúsñapa' atet otererr:

—Ñeñt o' apuapa' amaca'ye es pallteneto, añaca'yeña palltenet o'ch e'patca'chet. Atet sepena sa a'cohuentatuaretes sa socta'pñoñ. Sapa'

e'ñe cohuen a'cohuentatuaretesen tarraña ama allohuenacmaye' a'cohuentatuareteso.

¹¹ Ñehua, Jesússpa' e'ñe eñotenan ñeñtcha' pomuerre' ñeñto'marña atet otanet: "Ama allohuenacmaye' a'cohuentatuareteso."

¹² Allempoña e'patca'tuanet pa'tacpa' cheterran pa'shtampa' o' alla anerr. Allempoñapa' atet oterraneterr:

—Te'pa' o'ch neñotatas ñeñt neychatenes ñeñt atto ne'patca'tenes.

¹³ Ñehua, sapa' sotenen Maestro, ñaña sotenen Partsesha'. E'ñe pocte' po'ñoçh sotenen tarro'mar po'ñoçhpa' ñeñtenca'ye. ¹⁴ Atto na ne'patca'tas sa, ama't na ñeñten Separtseshar sepen ñaña Semaestror sepenen, sapa'cho'ña ñeñt e'ñe poctetsa socop se'patca'tanna'tepa'ch saña. Ñehua, ñeñt po'ñoçh notenes, ñeñtpa' atet: Amach sañeña atarr cohuen entetso, attochña e'ñe cohuen sesherbannena. ¹⁵ O' neñotatas atetcha' sepa saña. Sapa'cho'ña attepa'ch sepa atet o' nepohuas sa. ¹⁶ Po'ñoçhca'ye o'ch notas: Ñeñt ayochresha' ñerra'm ama esoye' enteno ñañeña ama't e'ñe mamesha, ñeñtña pueyochresha'chno pen e'ñepa'ch attecmet amach esoye' enteneto e'ñe ñañeñeta. Ama't na ñeñten allsensareten ama esoye' nenteno ama't mamesha, ñeñtcha' nellensa'yes nañapa' amuepa'chña esoye' enteneto e'ñe ñañeñeta. ¹⁷ Ñerra'm ñeñtña sechapoya seyoçhropa' ñeñt atet neychatenes, sañapa' atarrcha' cosheñto'senes ñerra'm e'ñe po'ñoçh atet sephua.

¹⁸ 'Ama allohuenacpayaysoye' neñeno. Napa' neñotenes e'ñe pueheña'tsospa' atet soctape'chyen seyoçhro. Ama't neñotensoñ atteseña' tarraña e'ñe atta na'cerrerres allochñapa' attoch etsoterra Yompor po'ñoñ ñeñt atet anuaret nocop ahuatoteñ, ñeñtpa' atet oten: "Ñeñt parro yerrallme'chenpa' ñepa'tcha'ña tanterrtsa nocop."

¹⁹ E'ñe tayoteña' atet notenes ama't ama etsotena' allochñapa' esempoch etsoterra, sapa' same'ñach napa' ñeñten po'ñoçh Cristotets.

²⁰ Po'ñoçhca'ye o'ch notas: Ñerra'm esesha' e'ñe cohuen aguëne' ñeñt nellensen na ñetpa' na'naca'yeña aguënet e'ñe cohuen. Ñaña ñeñt e'ñe cohuen naguëne' na, ñetpa' Nompore'naca'yeña aguënet ñeñt nellensene' na.

Allempo Jesússpa' eñotatanet Judaspa' ñach pomuerre'

(Mt. 26.20-25; Mr. 14.17-21; Lc. 22.21-23)

²¹ Jesúsña allempo atet otuapa' pueyoçhroñapa' cha lleca'huenta. Allempoñapa' atet otanet:

—Po'ñoçh te'pa' o'ch notas, pueheñarrofes sapa' ñeñtescha' nepomuerre'.

²² Pueyochresha'ñapa' allenta cohuanna'tyeset. Amaña esesha' eñotaye erra'tsenacopte'ña eñen. ²³ Pueheñarrña pueyochresha' ñeñt atarr muerena Jesús, ñañapa' e'ñe epuet Jesús anen all rrallme'chenet parro. ²⁴ Ñeñto'marña Simón Pedropa' agotan ñeñt anets epuet Jesús, ñeñtpa' atet och:

—Ñehua, pa'p'to'ch yemaestror erra'tsenacopte'ña eñorena ñeñtcha' pomuerre'.

²⁵ Ñañapa' e'ñe allame'ttsa atet otan Jesús:

—Partseshacha' ¿erra'tsenacpa'tña pe'ñorena ñeñtcha' pepomuerre'?

²⁶ Jesúsñaapa' atet och:

—Ñeñtcha' nap añ pan ñeñtcha' ne'choma' ñeñtcha'ca'yeña nepo-
muerre'.

Allempoña e'choman panpa' apan Judas Iscariote ñeñt Simón
puechemer. ²⁷ Allempoña aphue panpa' allempocmuepa't chorrya
oneñeñ. Jesúsñapa' atet och:

—Errotente' pepa'chpa' e'ñeñaca'yeña tayecma atet pepe'.

²⁸ Pueyochresha'ñapa' ama't puesheñarra ñeñtet allo'tsa'yenet,
ñetñapa' ama eseshaye' eñotaye esocopte' atet otenan Judas.
²⁹ Puesheña'ttsetpa' cha otapuetañ Jesúsapa' ñato' añte' oteñ o'ch
rañenana' ñeñt muenenet allcha' coshapretet, tarro'mar Judaspa'
ñaca'ye anmape'cham'pene'ña quellayepo'r. Amapa' ñato' añte' oteñ
o'ch es apa'yesan huocchañneshachno. ³⁰ Allempoña Judaspa' agapuan
panpa' allenta cha'nerr. Allempopa' o' tsapuen.

Atetcha' yeña ñeñt e'ñe etserra, yemueranna'tepa'ch

³¹ Allempoña Jesús cha'nompa' atet oterraneterr:

—Te'ña po'ño'chpa' e'ñe chapmoch allempoch cohuentaterrnan Parets
na Ñeñten Acheñetosets. Attochña napa'cho'ña necohuentaterrñañcha'
Nomp por Parets. ³² Atto napa' necohuentaterrñañ Nomp por Parets,
ñapa'cho'ña cohuentaterrnancha' na, ñeñtpa' e'ñech mame'tolla o'ch e'ñe
cohuentaterrnan.

³³ Jesúsñapa' alla oterraneterr:

—Na'cñeñarneshacha' o' e'ñe coñe'tañña pallta allo'tsenmeñencha' na
e'ñe arr parro. Napa' o'ch ahuerren. Allempoña sapa' se'nerrna'ch. Atet
noteñ ahuaña judionesha', allcha' neserr napa' sañapa' amach errotent
se'chapo, te'pa'cho' sapa' e'ñe atet notenes. ³⁴ Ñaña o'ch notas atetcha'
sepañenna ñeñt e'ñe etserra: Semueranna'tepa'ch. Atet nepenes sa atarr
nemuerenna, sapa'cho'ña atarropa'chña semuerannena. ³⁵ Allochñapa'
e'ñe semorrentanna'teño'tpa' eñotasetcha' sapa' sa e'ñe po'ño'ch neyochre-
shas.

Atto Jesúsapa' eñotatan Pedro ñapa' chocmach a'nasocha

(Mt. 26.31-35; Mr. 14.27-31; Lc. 22.31-34)

³⁶ Simónña Pedropa' atet och:

—Partseshacha' p'apa' ¿erra'tcha'ña peserr?

Jesúsñapa' atet och:

—Allcha' neserr napa' p'apa' amach errotent p'octa'noña na te'. Esem-
poña po'ño'chpa' ama't chenta seserrcha' saña.

³⁷ Pedroñapa' atet otererr:

—Partseshacha' ¿eso'mare'tcha'ña ama tayecma nocterrpe? Napa' e'ñe
pocte' nenteñ yerrmuepa' e'ñe parro.

³⁸ Jesúsñapa' atet otererr:

—¿Po'ño'cha't e'ñe pocte' penteñ o'ch yerroma parro? Po'ño'chca'ye
te' napa' o'ch notañ: Amach eñena' atollop pañapa' o'ch ma'poch
pa'nasotenna.

14

Jesúsapa' ña toñetets alloch ye'cherr Yomporesho

¹ Jesúsapa' alla oterraneterr:

—Seyo'chropa' amach cha sellcatsto. Atto seyemteña Yomp
napa'cho'ña choña seyemterrna. ² Nomp por pa'netsro all pue'ntañño allpa'

shonte' pocoll allcha' seycha'huerra. Ñerra'm ama atfeñepa' napa' amate' notasñe. Ñeñto'marña napa' o'ch ahuerren attoch nañño'tuernas allcha' seycha'huerra. ³Ñerra'm o'ch ahuerren napa' nañño'tuerrnascha' allcha' seycha'huerra. Ellochña nohuerrerrpa' allempochña e'ñe nahuerrsa' nesho allochñapa' allo'tseneycha' e'ñe parro. ⁴Sapa' e'ñe señoñeñ allcha' neserr ñaña e'ñe señoñeñ attoch secherr sama all.

⁵Tomásñapa' atet och:

—Ayochreshate yapa' amaca'ye yeñotenpe errachña peserr. Er-rotenofuachca'ye yeñochte' attoch ye'cherr yama.

⁶Jesúsñapa' atet och:

—Napa' na toñetets ñeñten alloch secherr Yomporesho, napa' na ñeñten sotene' ñeñt e'ñe po'ño'ch Yompor po'ñoñ, napa' na ñeñten alloch e'ñe socrena. Amach esesha' chertso Yomporesho ñerra'm ama nanom ame'nerreto. ⁷Ñerra'm o' señoñerñoñ na, Nompore'nate'ña señoñerñe. Tayoteñña e'ñe po'ño'chpa' o'ch señoñer tarro'mar te'pa' o' senter.

⁸Felipeñapa' atet och:

—Partseshacha' pegatey ñeñt Apa, yapa' o' ñeññaña yepallta o'ch yeñoch.

⁹Jesúsñapa' atet och:

—Felipe, ahuatoteñ napa' allo'tseney parro. Pañapa' ¿ama't peñotenno? Ñeñt puentaren napa' Apa'naca'yeña o' enterret. Eso'mare'tña pōtenen o'ch negatap̄ Apa. ¹⁰Papa' ama'tña pame'ñenno napa' e'ñe neparrocmaten epan Apa, Apapa'cho'ña e'ñe parrocmatenna. Ñeñt atet notenespa' ama notaye' atet notenso. Apaña ñeñt neparrocmaten, ñapa' e'ñe etsotatennan ñeñt atet ne'pa'yen. ¹¹Same'ña'na ñeñt notenes, napa' e'ñe neparrocmaten epan Apa, Apapa'cho'ña e'ñe parrocmatenna. Ama't napa' ama ame'ña'poye' sentenno tarraña atto po'ño'ch norrtatyeññañ Nompor po'partsoña ama't ñeñtapa' same'ñyañaca'ye. ¹²Po'ño'chca'ye o'ch notas, ñerra'm esesha' name'ñerraya ñetpa'cho'ña elloch atarr cohuen orrtatyerret ñeñt atet norrtatyen te'. Tarro'mar na te'pa' o'ch ahuerren Apuresho. ¹³Ñerra'm escha' senamuen e'ñe na neso'chño e'ñe seyemteñoñen na, napa' e'ñech atet nepennas. Attochña na ñeñten Yompor Puechemerenpa' necohuentateññañcha' Apa. ¹⁴Ñerra'm es senamuen e'ñe neso'chño e'ñe seyemteñoñen na, napa' e'ñech atet nepennas.

Atto Jesúsapa' otnerranet o'ch mueñuerranet Parets Puecamquēñ

¹⁵Ñerra'm sa po'ño'ch semorrentennate'pa' o'ch same'ñernana neñoñ ñeñt atet notenes. ¹⁶Napa' nenamonascha' Apa ñapa' apascha' po'psheñeñ ñeñtcha' soctape'chatterre' ñeñtcha'ña sechorrerraya er-rponañohuen. ¹⁷Ñeñtña Yompor Puecamquēñ ñeñtcha'ña señoñaterre' ñeñt e'ñe po'ño'ch Yompor poctap̄ña. Ñeñtña ama ame'ñetso arr pat-sropa' ñetpa' amach errotenof chorrerranetoña Yompor Puecamquēñ tarro'mar ñetpa' ama enteñeto ñaña amach eñoteñeto. Tarraña sapa' o' señoñer tarro'mar ñapa' allo'tsenes parro epas allcha' chorrerrsa. ¹⁸Napa' amach cha nehuocchapotatnerrso. Ellochña alla nohuerrerr sesho. ¹⁹O' mameshamerra palltenmeñ ñeñtña ama ame'ñetso arr patsro ñetñapa' amach eseshaye' nenterraye, tarraña sapa' cho'mach senterren. Tarro'mar napa' corretsana, ñeñto'marña sapa'cho'ña corretsasach. ²⁰Allempoch chorrerrsa Yompor Puecamquēñ allempochña

señoter napa' e'ñe po'ñoçh neparrocmaten epan Apa, sañapa' sepa-
rrocmaternach, nañapa' neparrocmatennasach. ²¹ Ñerra'm esesha'
e'mñoterre' neñoñ ñaña e'ñech atet perret ñeñt atet notenanet ñetñapa'
ñeñtet e'ñe po'ñoçh nemorrentenaya. Ñeñña nemorrentenaya napa'
ñetñapa' Apach atarr morrentenahuet. Napa'çho'ña atarr nemorrente-
nanet, nañapa' neñotaterranetcha' e'ñe po'ñoçh ñeñt atet nepena na.

²² Allempoña po'psheñeñ Judas ñeñt ama añeyaye Iscariote, ñaña' atet
och:

—Partseshacha' yapa' ¿eso'mare'tcha'ña te'pa' o'ch peñotatay ya ñeñt
atet pepena amachña añeye'ña peñotato ñeñt ama ame'ñetso arr patsro?

²³ Jesúsñapa' atet otterraneterr:

—Ñerra'm esesha'ch nemorrentaya na e'ñechña atet perret ñeñt atet
notenanet. Apañapa' atarrcha' morrentenanet. Ñeshetoñapa' yeçhapcha'
attoch yeyçherra ñet pueyoçhreto. ²⁴ Ñeñto'marña ñerra'm esesha' ama
nemorrentayo amach atet perreto ñeñt notenanet. Añ ñoñets ñeñt atet
se'muennan ñeñtpa' ama noyaye neñoñ, ñeñtpa' Apoña po'ñoñ ñeñt
nellsensene'.

²⁵ Añmapa' tarro'mar atet notenes tayepa'tñapa' allo'tsenmeñen na arr
e'ñe sesho. ²⁶ Tarraña Parets Puecamquëñ ñeñtcha' soctape'chaterre',
Apapa' mueñernnascha' e'ñe na neso'chño e'ñe seyemteñoñen na. Ñapa'
ñeñtcha' señotaterre'ña seyoçhro ora allohuen ñeñt çhocma neyçhatenes
te'. Ñaña ñeñtcha' seyerpaterraya allohuen ñeñt atet notyesase't.

²⁷ Nocshateña nena'nernnascha' alloch e'ñe socsherra seyoçhro, napa'
çhochña atarr nocshaterres seyoçhro. Ñeñt atet nocshatenes na
seyoçhro ñeñtpa' ama atteyaye ñerra'mrrate' añ patso'mar cosheñets.
Ñeñto'marña seyoçhropa' amach cha sellca'peno ama't mamesha,
amach cha es semcha'teno. ²⁸ Te'pa' o' se'mhue atet o' notuas, na
o'ch ahuerren, ellochña alla nohuerrerr sesho. Ñerra'm po'ñoçh se-
morrentennañ o'te' socshañ tarro'mar napa' o'ch ahuerren Apuesho.
Tarro'mar ñapa' nanac ahuamencatesha', ello metanenen na. ²⁹ Te'pa'
ama't ama etsotena', napa' o' notuas, allochñapa' ñerra'm esempoch
etsoterra, sañapa' same'ñerach.

³⁰ 'Te' e'ñe parro'tseneypa' o'huañcha' allo'na neñosnen shonte'
tarro'mar o' huapmocha oneñet ñeñt pa'mcha'tareter pen acheñenesha'
arr patsro. Tarraña ama't o' huapañpa' e'ñe ñoñapa' amach erro't posno.
³¹ Napa' añcha'ña atet neña ñeñt atet otenen Apa. Attochña acheñenesha'
arr patsropa' eñoçhetcha' na po'ñoçhpa' e'ñe nemorrenteña Apa. Te'pa'
satomcha't o'ch ahuey arro't.

15

Jesúsapa' toma'ntata ñapa' ña uvachreçhmo'retets

¹ Jesúsñapa' alla yeçhaterraneterr ñapa' añ toma'ntata ña
uvachreçhmo'retets. Ñeñto'marña atet otanet:

—Napa' na atten ñerra'mrrate' ñeñten uvachreçhmo'retets ñeñt
e'ñe po'ñoçh cohuen sherbets. Nomporñapa' ña amre'tene' ñeñt
uvachreçhmo'r. ² Sa ñeñtes neyemtenaya na sapa' attes ñerra'mrrate'
uvachmo'r puetaquër. Allohuen puetaquër erra'tsen ñeñt ama me'tetso,
Nomporñapa' çhochña pecham'psoñ puetaquër. Ñaña allohuen ñeñt
me'tetspa' çhochña pechtacre'tyeset mamesha'tets attoch e'ñe cohuen

e'shtacre'chet allochñapa' attoch atarrcha' nanac me'ten. ³ Ñeñt atet neserrpare'tatenes ñeñt neñoña' alloña o' sa'cohuentataretetua atet ñerra'mrrate' uvach o' e'ñe e'shtacre'tuet e'ñe cohuen. ⁴ Te'pa' attoña separrocmatenna attoña napa'cho'ña neparrocmatennasa. Atet pena tsachtaquër ñerra'm ama parrocmatenno pue'choro' amach me'to e'ñe ñoña, sapa'cho'ña ñerra'm ama separrocmatenno amach erroteno' seme'toña samña e'ñe sota.

⁵ 'Napa' na atten ñerra'mrrate' uvachrechmo'r pue'chor, sapa' sa puetacres. Eshsha' neparrocma'terre' ñaña napa' e'ñech neparrocma'tenanet, ñeñtcha'ña nanac me'tats. Ñerra'm a'yo'tsensa nesho' amate' erroteno' sorratyesoña ñeñt cohuen enten Yompor. ⁶ Eshsha'ch ama neparrocma'terraye ahupore'tare'tcha' atet ñerra'mrrate' tsachtaquër ñeñt ama me'tetso chochña pecha'tañpsetña puetaquër o'ch e'ñe porrarque'chua allempochña a'yapachetpa' o'ch chamuet tso allcha' poyua.

⁷ 'Ñerra'm separrocma'terrna ñerra'm chocma soctape'chennan neñoñ escha' senamuen napa' napascha'. ⁸ Atto nanac cohuen seme'tenpa' ñeñtpa' allochña secohuentateññañ Nomp por tarro'mar sapa' añcha' sorratyen ñeñt cohuen enten ña. Ñaña sapa' attochña eñoterres acheñenesha' po'ño'ch ñeñtes neyochreshas. ⁹ Atto Apapa' atarr nanac muerenna na, napa'cho'ña atarr nanac nemuerensa samña. Chocmuepa'ch seyemtennana ñeñt atto napa' chocma nemorrentensa. ¹⁰ Ñerra'm same'ñennana neñoñ ñeñt atet notenes e'ñech señotenen napa' atarr nemorrentensa. Atet nepena na e'ñe name'ñeññaña Nomp por po'ñoñ ñeñt atet otenen, ñeñto'marña napa' e'ñe neñoteñ ñapa' atarr morrentenna namña.

¹¹ 'Añmapa' tarro'mar atet notenes allochñapa' ñeñt nocsheña napa' coshaterrescha' samña. Allochñapa' sapa' o'ch e'ñe socsherra e'ñe poc-tacma. ¹² Añña ñeñt notenes: Atarropa'ch semorrentannena allo-huenes atet nepena namña atarr nemorrentensa samña. ¹³ Añmapa' ñeñña e'ñe po'ño'ch morrenteñets, o'ch ya'rroya yañeña o'ch yerroma añecop ñeñt atarr yemorrentyena. ¹⁴ Ñerra'm e'ñe atet se'pohuen ñeñt atet notenes sañapa' ñeñtes e'ñe neyemtena. ¹⁵ Te'pa' o'huañ atteye' nentenes ñerra'mrrate' ñeñt ya'taruasañer yepen, tarro'mar ñeñt ya'taruasañer yepen ñapa' ama eñotenanoña ñeñt atet cotape'chen pamo'mte'. Tarraña na te'pa' e'ñe neyem nepenes ñeñt atet ne'mueññañ Apapa' sapa'cho'ña o' neñotaterres. ¹⁶ Sapa' ama saye' na'crreraye, napa' naña sa'crrerña sa. Attoña o' napuerresña llesens attoch seta me'tarsats attoch e'ñe cohuen es sorratyen ñeñt cohuen enten Yompor. Ñeñtpa' ñeñtcha' se'mer seperr ñeñña se'merpa' amach ahuañañat'erro ama't ahua'ta. Allochñapa' ama't erra'tsena senamueñ Apa e'ñe na neso'chño e'ñe seyemteño'en na, ñapa' apascha'. ¹⁷ Añca'yena notenes: Chocmuepa'ch atarr cohuen semorrentannena.

Allempo Jesúsapa' eñotatan pueyochresha' chocmach e'moñe'tenanet acheñenesha' arr patsro

¹⁸ Jesúsñapa' alla otterraneterr:

—Ñerra'm acheñenesha' añ patsro e'moñe'tenset sapa' señoche'pa'ch na e'ñe nanom e'moñe'tenet. ¹⁹ Ñerra'm sa e'ñe parro attecma'señ ñeñt ama ame'ñetso arr patsro, ñeñña' e'ñe' cohuen muerensetañ tarro'mar e'ñeca'ye ñeñfena'tarecma's. Tarraña sapa' ama e'ñe attecma'ye'

separro'marneshacmateno atet pena allohuen acheñenesha' ñeñt ama ame'ñetso arr patsro. Sañapa' o' na'crreres ellonet nocop. Ñeñto'marña acheñenesha' añ patsropa' o' e'moñe'taset saña. ²⁰ Seyerpach añ ñoñtsor ñeñt o' notuas: "Allohuen ñeñt yochreshats errotench'a perrñañet ñeñt yochresha'tenahuet, ñetpa'cho'ña e'ñech attecma a'paretterret ñamet." Atto napa' cotare'tennet pue'moñe'teño'teta, sapa'cho'ña pue'moñe'teño'tetaspa' cotare'tasetcha' saña. Atto napa' ama ame'ñerrnaneto neñoñ, sapa'cho'ña amach ame'ñerrnaseto saña señoñ. ²¹ Ñeñtpa' atetcha' perrset tarro'mar sapa' naca'ye same'ñena tarro'mar ama eseshaye' eñotenaye Yompor ñeñt nellensene'.

²² Ñerra'm ama nohuapañe amach neserrpare'tatosanetañe, amate' eñallñeña attoch neyohua'yesanet po'chñaoret. Ñeñto'mar te'pa' ama eñalle attoch a'nasotet po'chñaoret. ²³ Ñeñto'marña ñerra'm esesha' ne'moñe'tene' na, Nompore'naña e'moñe'tennanet. ²⁴ Ñerra'm amach norrtatanetañe cohuenñats ñeñt ama't ahuata po'psheññechnopa' ama orrtatanete'te e'ñe attotapa' amate' eñallñeña attoch neyohua'yesanet po'chñaoret. Tarraña te'ña ñetpa' ama't e'ñe entennetañpa' chaña e'moñe'tennet ñaña Nompore'na e'moñe'tennanet. ²⁵ Tarraña ñeñtpa' tarro'mara atet penet allochñapa' attoch etsoterra ñoñets ñeñt e'ñe atet anuaret ahuatoteñ, ñeñtpa' atet oten nocop: "E'ñech attota e'moñe'terrnet."

²⁶ Ñeñtcha' soctape'chaterre' e'ñe cohuen seyo'chro ñeñtcha' nemñoahuernas Apueshot. Ñeñtpa' ñeñtña Apa Puecamquëñ ñeñtcha'ña seño'taterre'ña ñeñt e'ñe po'ño'ch Yompor poctapña tarro'mar ñeñtpa' Apueshot huena. Ñerra'm esempoch chaponasa ñachña na'potose'. ²⁷ Sapa'cho'ña sa'potancha' tarro'mar e'ñe allempoteñ netorrosa, sapa' e'ñe allempoteñ parro'tseney.

16

¹ Ñeñtpa' tarro'marña o' atet notuas allochñapa' amach alla ello sepurrerro. ² Tarro'mar esempopa' chapcha' allempoch huapore'tas judionesha' po'prahuot. Po'ño'ch chapcha' allempoch esesha'pa' ñato' o'ch muetsaset chach otenapuetañ ñetpa' allote' sherbeñeñña Yompor. ³ Ñeñtpa' tarro'marcha' atet paset ñetpa' ama eseshaye' eñotenaye Apa ama't napa' ama eñotenneto. ⁴ Añechnopa' o' notuas allochñapa' ñerra'm esempoch chap, sapa' seyerpuerrnanach ñeñt atet notase't.

Atto Parets Puecamquëñ ñach yoctape'chatyese' e'ñe cohuen

'Ahuañmo'cha añechnopa' ama notase'te tarro'mar allempoteñpa' e'ñe parrocmá allo'tseney. ⁵ Na te'pa' o'ch ahuerren allo'tsen ñeñt nellense'. Saña ama't puesheñarrotesapa' amaña sa'pto'tenno, errachña neserr. ⁶ Te'ña ñeñt atet notenes saña seyo'chropa' chaña atarr sellquëna. ⁷ Te'pa' añ notenes ñeñt e'ñe po'ño'ch. Socoppa' aña nanac poctetsa napa' o'ch ahuerren. Tarro'mar ñerra'm amach neserro amate' errotent huaponasoña Yompor Puecamquëñ ñeñtcha' soctape'chaterre' cohuen. Tarraña ñerra'm neserrcha' napa' añaña nemñahuernas Yompor Puecamquëñ ñeñtcha' soctape'chaterre' cohuen seyo'chro. ⁸ Ñerra'm esempoch huapa Yompor Puecamquëñ acheñenesha'ña arr patsropa' ñachña chapatahuetña pueyo'chreto attoch eñochet ñet po'ño'che'pa't

eñallet po'chñaret. Ñaña añcha'ña chapatanet pueyoçhreto ñeñ e'ñe pocte' entyen Yompor. Ñaña añcha'ña chapatanet pueyoçhreto attoch ñetpa' eñoteretcha' po'ñoçhpa' coñcheñtsach amñareñterret ñeñ ama name'ñenayo na ñeñten Yompor Puechemeren. ⁹ Yompor Puecamquëñpa' eñotaterrancha' acheñenesha' po'ñoçh ñetpa' ama pocteye' entenaneto Yompor tarro'mar ama ame'ñenneto na ñeñten Yompor Puechemeren. ¹⁰ Ñaña ñach eñotaterrahuet ñeñ e'ñe pocte' entyen Yompor tarro'mar napa' amach allo'tsenarano sesho. Napa' o'ch ahuerren Apuesho amach alla senterrne'te. ¹¹ Paretsña Puecamquëñpa' ñachña eñotaterrahuet po'ñoçhpa' coñcheñtsach amñareñterret ñeñ ama ame'ñetso tarro'mar oneñeñ ñeñ pa'mcha'tareter pen shonte' acheñenesha' arr patsro, ñocoppa' e'ñe po'ñoçh anuareñ amñareñterrach coñcheñtso.

¹² 'Shontemeñ ñeñcha' notaseñ tarraña te' sapa' amate' errotent çhaponaso seyoçhro. ¹³ Tarraña ñerra'm esempoch huaponasa Parets Puecamquëñ, ñeñcha'ña señotaterre' ñeñ e'ñe po'ñoçh Yompor po'ñoñ tarro'mar ñapa' ñachca'ye señotatene' ñeñ e'ñe po'ñoçh Yompor po'ñoñ ñeñ ama shequëñtsoyaye. Ñapa' amaca'ye e'ñe ñoña eñeno. Añca'yeña eñen ñeñ atet e'muen Partsesho. Ñapa' añcha' serrpare'tatas ñeñcha' atet perra tsapatonet. ¹⁴ Ñapa' nachca'ye cohuentaterre'; e'ñe eñotennan ñeñ atet nepena na, ñapa' ñeñcha'ña eñotatyerres. ¹⁵ Ora allohuen ñeñ atet pena Apapa' napa'cho'ña e'ñe atet nepena ñaña. Ñeñto'marña napa' notenes eñotennan ñeñ atet nepena na, ñapa' ñeñcha' señotatyerre'ña saña.

Ñeñña sellquëñapa' puenaserrach socsheña

¹⁶ Jesúsñapa' atet oterraneterr:

—Te'pa' mameshaña o'huañcha' allo'na sentnemen tarro'mar napa' o'ch ahuerren Apuesho. Tarraña sapa' e'ñe mameshapa' o'ch alla yentannerra.

¹⁷ Pueyoçhresha'ñapa' atet otanna'tyeset:

—¿Errotente'ña añ ñeñto'mar atet oteneý, mameshañapa' o'huaño'ch allo'na yentneñ tarraña mameshapa' ahuo'ch alla yentannerra? ¿Errotente'ña añ ñeñto'mar ñapa' atet oteneý, ñapa' ahuo'ch ahuerren Pomporesho?

¹⁸ Alla otanna'tyenet:

—¿Eso'marte'ña atet oteneý, mameshañapa' o'huañcha' allo'na yentneñ? Amaca'yeña yeñoteñe este'ña oteneý.

¹⁹ Jesúsña eñotanet ñetpa' cho mueneñetañ o'ch a'p'to'chet. Ñañaapa' otanet:

—¿Ñeñte'ña sotannena ñeñ atet notenes, o' mameshaña o'huañcha' allo'na sentnemen, tarraña mameshapa' o'ch alla yentannerra?

²⁰ Po'ñoçhca'ye o'ch notas: Sapa' sellquëño'tpa' seyahuerach. Acheñenesha'ña arr patsro ñeñ ama ame'ñetso ñetñapa' çhach atarr coshet. Sapa' sellquërrach tarraña sellquëña sapa' puenaserrnasach socsheña. ²¹ Ñeñtpa' o'ch netma'ntatasa ñerra'mrate' coyanesha' allempo cheññaña allempoch emare'ten, çhach leca tarro'mar o' çhapoña allempoch atsoenana puechoyoretoll. Tarraña allempochña eñalletatuepa' o'ch alla atarr cosherra o'ch pueherranña atto atarr llecach

pue'maretoll, elloñapa' atarrcha' cosherra tarro'mar o' eñalletatuan pue'maretoll arr patsro.

²² Jesúsña alla oterranerr pueyochresha':

—Te'ña sapa' nanac llequëñtso'tsenes, tarraña elloñapa' o'ch alla yentannerra. Allempoña sapa' o'ch alla atarr socsherra seyoçhro. Ñeñña socsheñapa' ama't e'ñe puesheñarra amach errotentot puer-ratam'perrseto.

²³ 'Allempopa' amach sepallteno o'ch alla es sa'p'to'ternerr. E'ñe po'ñoçh te'pa' o'ch notas: Ñerra'm es senamueñ Apa e'ñe na neso'chño e'ñe seyemteñoñen na ñaña' apascha' ñeñt senamueñ. ²⁴ Sa teme'ttsenpa' ama es senamueno e'ñe seyemteñoñen na e'ñe neso'chño. Te'ña ñerra'm senampa' saga'p'cha' allochñapa' o'ch socsha e'ñe poctacma.

Atto Jesucristo a'mchechatuerran allohuen ñeñt e'moñe'tene' Yompor arr patsro

²⁵ 'Ñeñt allpon neserrpare'tatiesase't ñeñtpa' e'ñe toma'nteñtsoçhno notyesase't. Tarraña çhapcha' esempo allempopa' amach alla neserrpare'taterrserro toma'nteñtso. Allempopa' aña' neserrpare'tatas Apacop ñeñtpa' amach toma'nteñtsoyaye, allochñapa' e'ñech seño'tue. ²⁶ Allempopa' senamueñcha' Apa e'ñe seyemteñoñen na e'ñe neso'chño. Allempopa' amach pallteno o'ch nema'yocham'pensa Apuesho. ²⁷ Apañapa' atarrcha' morrentensa atto sapa' semorrentenna, e'ñe seyemtenna atto napa' Apuesho' nohuapa. ²⁸ Po'ñoçh napa' Apuesho' nohuapa, o' neçhap aña patsro. Elloñapa' o'ch alla nesa'nerr añ pats, o'ch alla ahuerren Apuesho.

²⁹ Pueyochresha'ñapa' atet ochet:

—Te'ñapa' ama toma'nteñtsoye' peñeno ñeñto'marña yapa' e'ñech yeño'tue. ³⁰ Te'pa' yeñotene'p' papa' ñeñte'p' eñotuene' ora allohuen esoc-mañen. Ñeñto'marña yapa' amaca'ye pallteno o'ch alla ya'p'to'terrperr po'po'ñoñe. Tarro'mar te'pa' yeñotene'p' papa' Partsesho' pehuapa.

³¹ Jesúsñapa' atet oterraneterr:

—Sapa' taya'tña o' same'ña'na. ³² Te'pa' o' e'ñe çhapmoch sa ama't puesheña'ttospa' o' çhaponasañ çhach sematrra'tyesa allemeñ. Chach sahanomyesa allcha' semna'yesa sa. Nañapa' sa'ypo'ña'huanmuencha'. Tarraña napa' ama e'ñe napteyaye, epanña Apa. ³³ Ora allohuen añeçhnopa' o' e'ñe notuas allochñapa' e'ñe seyemteñoñen napa' çhocmach socshena seyoçhro. Po'ñoçh añ patsropa' çhocmach semueroçhtena. Tarraña e'ñe seyoçhro sapa' çhocmuepa'chña socshena tarro'mar napa' o' na'mchechatue allohuen ñeñt e'moñe'tene' Yompor aña patsro't.

17

Allempo Jesúsapa' ma'yocham'penana pueyochresha'çhno

¹ Allempoña atet otuanet añeçhno Jesúsapa' allenta cohua' enonetpa', ñeñtpa' atet otan Pompor poema'yocheño't:

—Apacha' te'pa' o' çhaponan allempoch etsota ñeñt nocop. Te'pa' pecohuentatonepa'ch na tarro'mar Pechemer pepenen allochña napa'çho'ña necohuentatona'p'cha' paña. ² Atto papuen llesenspa' alloña pomnaren nepeñña allohuen acheñenesha'. Allochñapa' allohuen acheñ ñeñt po'patatenna, naña ñetpa' napuenanetcha' alloch ñetpa' corretsetach

pocsheñeshocmañen tayoteñ e'ñe errponañohuen. ³ Añmapa' ñeñña alloch ñetpa' corretsetach tayoteñ e'ñe errponañohuen ñerra'm esempo eñotterpet pa ñeñteḡ papuet e'ñe po'ñoçh Yomporetets ñaña ñerra'm eñoternnet na ñeñten Jesucristo pa pellsensaren.

⁴ 'Napa' o' e'ñe necohuentatuonaḡ arr patsro. O' e'ñe netsotuonaḡ ñaña petaruas ñeñt atet ḡoten. ⁵ Te'ña Apacha', pecohuentaternanepa'ch e'ñe alla pesho e'ñe atet allempo atarr a'cohuentatarefen pesho ahuat allempo ama eñalletena' añ pats.

⁶ 'Allohuen acheñ ñeñt neyochresha' peḡatenen nañapa' añ neñotatenanet ñeñt atet pepena pa tarro'mar ñetpa' ñeñtet e'ñe allpona ḡo'patatna arr patsro. Ñetñapa' pepa'tña o'patenahuet ñeñtcha' neyochresha' peḡaten naña. Te'ña ñetpa' e'ñe ame'ñernapet peñoñ. ⁷ Ñaña ñetpa' e'ñe eñotueñet allohuen ñeñt atet ne'ñorenanet ñaña ñeñt es norrtatyenanetpa' ñeñtpa' e'ñe ora peshotecma huena. ⁸ Napa' añña ne'ñorenanet ñeñt atet ḡotenen pa. Te'ña ñetpa' e'ñe cohuen ame'ñennet. Ñaña e'ñe po'ñoçh eñoteñet napa' e'ñe peshot nohuapa, pa ñeñteḡ nellenserre'.

⁹ 'Te'ña napa' o'ch nema'yochañpesnomanet ñet. Ama allohuenacpaye' acheñenesha' arr patsro nema'yochenḡo, e'ñe añecpa nema'yochenḡa ñeñt neyochresha' peḡatenen tarro'mar ñetpa' ñeñtareta peyochresha' pepen paña. ¹⁰ Tarro'mar allohuen ñeñt e'ñe nocmapa' ḡapa'cho'ña e'ñe ḡocma. Ñeñña e'ñe ḡocmapa' napa'cho'ña e'ñe nocma. Ñetña te'pa' e'ñe cohuentatapretennet.

¹¹ 'Te'ña nocoppa' o' çherrmoch e'ñech ñeñtेशाña añe patsro'tsenen tarro'mar napa' o'ch alla ahuerren pesho. Tarraña ñetpa' allo'tsenaretach arr patsro. Pa Apa Partso, pecuañḡsepa'ch allohuen ñeñt neyochresha' peḡatenen. Pehuamencotcha'ña pecuañḡsanet. Allochña ñetpa' o'ch e'ñe parrocmatet e'ñe atet yepena yaña. ¹² Allempoteñ e'ñe parro'tseney ḡoña pehuamencot necuañḡsanete't. Napa' chocma nemoñenanet. Ñeñto'marña ama't puesheñarroçeta ñetpa' ama na'chencataneto, ñapña chenca añ ñeñt o'patena chenquëñets. Ñeñtpa' attochña Apa etsoterra peñoñ ñeñt anuaḡeḡ ahuatoteñ.

¹³ 'Tarraña te' napa' o'ch ahuerren pesho. Napa' añecopña neñen añeçhno añ patsro attoch ñetpa' atarrcha' cosherret pueyoçhreto e'ñe atet nocshena na. ¹⁴ Napa' añ ne'ñorana'tenanet ñeñt e'ñe ḡo peñoñ. Acheñenesha'ña ñeñt ama ame'ñetso añ patsro, ñetñapa' cha e'moñe'tenanet tarro'mar ñetpa' ama allo'na parro'marneshateneto ñeñt ama ame'ñetso, atet nepena naña ama neparro'marneshatenaneto. ¹⁵ Ama añeye' nenamuenpe attoch ḡahuenaneta' añ patsroç, añña nenamuenḡ o'ch pecuañḡsanet. Amach pemnatatsche oneñet o'ch alla a'puerrataterranet. ¹⁶ Ñetpa' ama allo'na parro'marneshateñeto ñeñt ama ame'ñetso arr patsro atet nepena naña ama neparro'marneshatenaneto. ¹⁷ Pame'ñeñotet pa peñoñ pa'cohuentamḡsanetepa'ch e'ñe ḡocop. Pa peñoña' ñeñña e'ñe po'ñoçh ama shequëñtsoyaye. ¹⁸ Atto pa pemñan na arr patsro, te'ña napa' o'ch nemñanet ñamet attoch serrpare'tatyestet acheñenesha' arr patsro. ¹⁹ Ñeñto'marña ñocpuet nañapa' o' na'rroyerra ḡocop, attochña

ñetpa'cho'ña a'cohuentaretterretcha' Partsocop. Ñeñtpa' e'ñe po'ñoch atet p̄oteny p̄a peñoñoť ama shequēñtsoyaye.

²⁰ 'Tarraña amach e'ñe añeçpa nema'yocho ñeñť e'ñe neyochresha' nepen te', añeçpa'nachña nema'yocham̄pesnoma allohuen ñeñťcha' name'ñerraya tsapaťonet e'ñe neyochresha' po'ñoñoť. ²¹ Allochña allohuetpa' parrocmatetcha' atet pepena p̄a Apa e'ñe peparrocmatenana ñaña napa' e'ñe neparrocmatenna p̄a. Allochña ñetpa' o'ch e'ñe parrocmaterryet e'ñe parro epay. Attochña acheñenesha'ña arr patsropa' ñetñapa' eñoteretcha' p̄a ñeñťe p̄ nellsenserre'. ²² Atet pepena p̄a pecohuentapretenna napa'cho'ña e'ñe necohuentapretenanet ñet, attoťcha'ña ñetpa' e'ñech parrocmatet atet yepena yam̄a e'ñe yeparrocmaten. ²³ Napa' neparrocmatenanet, p̄añaapa' peparrocmatenna. Allochña allohuetpa' e'ñech parrocmatuenet e'ñe poctacma. Attoch acheñenesha' arr patsro ñetpa' eñoteretcha' p̄apa' p̄a nellsenserre'. Ñaña eñoteretepa'ch p̄apa' atarr pemorrentenanet e'ñe atet atarr pemorrentenna na.

²⁴ 'Apacha' allohuen ñeñť peyochresha'tatenna na, napa' añ nemnen erro'tsenencha' ñetpa'cho'ña allo'tsenacmayepa'chña e'ñe parro. Allochñaapa' attoch enterrnanet necohuenña allo o' alla pecohuentaterren na, tarro'mar p̄apa' pemorrentenna allempoteñ ama ayeçhcatarettena' añ patser. ²⁵ Apa, p̄a ñeñťe p̄ e'ñe pocte' es pets, acheñenesha' ñeñť ama ame'ñetso arr patsro ñetpa' ama eñotenpeto. Nañapa' e'ñe po'ñoch neñotene p̄. Añña ñeñť e'ñe neyemtenaya ñetñapa' eñotenpet p̄apa' p̄a nellsensene'. ²⁶ Napa' naña e'ñe eñotatenahuet ñet ñeñť atet pepena p̄a. Ellopa' allach neñotaterraneterr. Allochñaapa' ñetpa'cho'ña e'ñech morrentanna'terret e'ñe atet pepena p̄a atarr pemorrentenna na. Attochña napa' e'ñech neparrocmatenanet ñet. Ñeñtpa' allohuach nema'yocha p̄a Nompore.

18

Allempo rromoset Jesús

(Mt. 26.47-56; Mr. 14.43-50; Lc. 22.47-53)

¹ Jesúsña allempo ma'yochuanmapa' allenta ahuanman pueyochresha' o'ch ahuanmuet yom̄ta'n amañesre'to. Ñeñť amañesre'te'pa' añ pa'so'cheñ Cedrón. Allña yom̄ta'npa' allo'tsen narmetsma', all çhapña Jesús epuet pueyochresha'. ² Ñehua, Judas ñeñťcha' pomuerre' Jesús ñapa' e'ñe puentarña all, tarro'mar ahuañmo'choťeñ Jesús pa' allecma apçhatenan pueyochresha'. ³ Judasñaapa' allenta anman solltarnesha' ñaña guardianesha' ñeñť mueñen fariseonesha' ñaña ñeñť pa'm̄cha'tareťernesha' pen allohuen judionesha' po'cornaneshar. Ñetñapa' çhaçha'tet all elamparñeťareret. Orra'yesnenet ñaña po'urare. Orra'yesnenet ñaña alloch quellaret. ⁴ Jesúsñaapa' e'ñe eñoteñ ora ñeñťcha' çhapoya allempo. Ñaña poctanetpa' atet otapanet:

—Sapa' ¿eseshatña se'nen?

⁵ Ñetñapa' atet otoset:

—Añca'ye ye'nen Jesús ñeñť nazareto'marnesha'.

Ñañaapa' alla oterraneterr:

—Napa' añenca'ye.

Judas ñeñt pomue'pa' ñapa'cho'ña allo'tsen. ⁶ Allempo otenanet Jesús: "Napa' añenca'ye", ñetñapa' o' cheterret pa'che'ñone'pa' allepa'tcha' a'trra'tet. ⁷ Elloñapa' alla oterraneterr:

—¿Esesha'tña se'nen?

Ñetñapa' alla otereterr:

—Yapa' añ ye'nen Jesús ñeñt nazareto'marnesha'.

⁸ Jesúsñapa' alla oterraneterr:

—Napa' o'ca'ye notuapas napa' añen. Ñerra'm nate' se'nenpa' neyochresha'ñapa' semnatanet ñetpa' o'ch ahuanerret.

⁹ Ñeñt'pa' tarro'mar atet ot allochñapa' attoch etsota Jesús po'ñoñ atet o' otuanom: "Ñeñt allpon neyochresha' pe'patenen napa' ama't puešeñarrapa' amach na'chencache." ¹⁰ Allempoña Simón Pedro ñeñt occhelletpa' ñañapa' po'cchella cheta'pa' o'ch chonto'tapanen cornesha' pueñañra puetepa'tcha' tsorroñ. Ñeñt'pa' añ pa'so'cheñ Malco, ñeñt'pa' año pueñañra ñeñt pa'm'cha'tareter pen allohuen judionesha' po'cornaneshar. ¹¹ Tarraña Jesús'pa' atet otan Pedro:

—Pesha'terr p'occhell allecma peneñ. Pocte'ca'ye o'ch chapona ñeñt amuerochtatañ* tarro'mar ñeñt'pa' atet muenatenen Nompur.

Allempo anmet Jesús allo'tsen ñeñt pa'm'cha'tareter pen allohuen judionesha' po'cornaneshar

(Mt. 26.57-58; Mr. 14.53-54; Lc. 22.54)

¹² Allempoña solltarnesha' epuet po'ca'ptáner ñaña judionesha' po'guardianeshar ñetñapa' rromoset Jesús'pa' o' huanquét. ¹³ Ñanompa' arr anmet allo'tsen Anás, tarro'mar ñapa' ñeñt Caifás pa'go'. Ñeñtña Caifás'pa' ña pa'm'cha'tareter pen allohuen judionesha' po'cornaneshar allempo ñeñte chararo. ¹⁴ Caifás'pa' ñapa' ñeñtña cotape'chataye't judionesha' allempoteñ o'pateñet Jesús, ñeñt'pa' atet otanete't: Añ poctetsa puešeñarr ñeñt acheñerpa' o'ch rroma allohuen acheñeneshacop.

Atto Pedropa' a'nasotana Jesús

(Mt. 26.69-70; Mr. 14.66-68; Lc. 22.55-57)

¹⁵ Simón Pedro ñaña po'psheñeñ pueyochresha' ñetñapa' cota'nmet ñamet Jesús chenta'. Ñeñtña puešeñarrpa' e'ñe cheme'teñ cornesha' ñeñt nanac am'cha'tarettetsa allempo. Ñapa'cho'ña o' be'tososet epuet Jesús all acon'cha'tam'psare'ttena cornesha' po'pamp. ¹⁶ Pedroñapa' alla tomos a'yot allot be'tenet. Po'psheñeñña pueyochresha' ñeñt e'ñe cheme'ten cornesha' ñeñt nanac am'cha'tare't, ñañapa' cha'nerr a'yot, allñapa' eñosuerr epuet coyanesha' ñeñt cohuene' yetarr. Allempoñapa' errana' ñaña Pedro. ¹⁷ Coyanesha'ña ñeñt cohuene' yetarrpa' atet otapan Pedro:

—¿Ama't p'apa'cho'ña pueyochresha'te'ca' penepña añ encaneshar?

Ñañapa' atet otos:

—Napa' amaca'ye pueyochreshayayno.

¹⁸ Ñeñtña taruaset all epuet guardianesha' ñetñapa' all tsoma'tenet quellmesha, a'huortatenet tarro'mar allpa' nanac senteten. Allña tom'chenet all shotenet. Pedropa'cho'ña allo'tsen all shotena ñaña.

* **18:11** Ñeñt amuerochtatañ ñeñt'pa' po'ñoñ ñeñt'pa' añ atma'ntataret ñerra'mrrate' ñeñt atarr pesherr yorren orranitso.

Allempo Jesúsapa' a'pto'tare'teñ cornesha' ñeñt nanac amcha'tarettetsa
(Mt. 26.59-66; Mr. 14.55-64; Lc. 22.66-71)

¹⁹ Cornesha'ña ñeñt nanac amcha'tarettetsa, ñapa' allenta a'pto'tapan Jesús pueyochreshacop ñaña añecop ñeñt atet ye'chatyen. ²⁰ Jesúsñapa' atet otos:

—Napa' ama a'nahuayaya neserrpare'tateñe acheñenesha' arr pat-sro. Chocma ney'chatyen judionesha' po'prahuo'mar ñaña Parets pa'paclo allecma shontena judionesha'. Ama't parrochapa' ama esempo neñosoña a'nahua. ²¹ Eso'mare'tña nañeña pa'pto'ten. Añcha'ña pa'pto'tyes ñeñt ne'maye't erro'tente' neserrpare'tatyesanete't. Ñetpa' eñoteñette'ña ñeñt atet notyesanete't.

²² Allempoña atet otuanet Jesúsapa' puesheñarrña guardia ñeñt alame'ttso'tsenapa' ñaña'ña' allenta tacle', atet och:

—Amarramch' atteye' yanapueñeña cornesha' ñeñt nanac amcha'tare't.

²³ Jesúsñapa' atet och:

—Ñerra'm añe'te' neñen ñeñt ama cohuenayayepa' poten all ama cohue-naye' neñeno. Ñerra'm cohuenta' neñenpa' eso'marte'ña petacllenen.

²⁴ Allempoña Anásapa' allenta mueñe e'ñe ehucaret pa'ñachoresho Caifásesho. Ñeñtña Caifásapa' ñeñt e'ñe pa'mcha'tare'ter pen allohuen judionesha' po'cornaneshar.

Allempo Pedropa' alla a'nasoterranerr Jesús
(Mt. 26.71-75; Mr. 14.69-72; Lc. 22.58-62)

²⁵ Simón Pedroñapa' alla ten all shotena. Ñetñapa' atet ochet:

—Papa'cho'ña ¿ama't pueyochresha' penpe?

Ñaña'ña' cha a'nasochapa' atet ot:

—Napa' amaca'ye.

²⁶ Cornesha'ña ñeñt nanac amcha'tare't puesheñarrña ñeñt pa'taruasañer ñeñt pamo'ts tsorrqueta't Simón Pedro, ñaña'ña' atet och:

—Napa' ¿ama't pa' nentoña narmetsmo? Papa' allo'tsenepca'ye.

²⁷ Pedroñapa' alla a'nasotererr. E'ñe allempocmaña eñen atollop.

Allempo chapata'mueñet Jesús allo'tsen amcha'tare't Pilato
(Mt. 27.1-2, 11-14; Mr. 15.1-5; Lc. 23.1-5)

²⁸ Allempoña Jesúsapa' anereterr Caifásesho't. E'ñe ahuatecma anma'mueñet amcha'tare't po'palaciopahuo. Ñeñtña amcha'tare'tpa' ñeñt nen gobierno' Romo't ñeñt amcha'tarettetsa allo'marneshacop. Allohuen judionesha' ñetñapa' ama be'tososeto amcha'tare't pa'paclo tarro'mar ñeñt amcha'tare'tpa' romo'marnesha' ama judioneshayaye allochña ñetpa' año'ch cha a'sosyateto ñañeñeta Partsocop esheccha' e'ñe cohuen rrallme'chet pascuapo. ²⁹ Ñeñfo'marña Pilatopa' cha'nmanet a'yo't allo'tsa'yenet, atet otapanet:

—¿Erro'tenote'tña sottene'cheñña añ acheñer?

³⁰ Ñetñapa' atet otyesoset:

—Ñerra'm ama añ pa'yeno ñeñt ama pocteyayepa' amate' erro'tenot o'yehuapacheñeña pesho.

³¹ Pilatoñapa' atet otterratererr:

—Chosa sañeña anmue' sachña ente' erro'tente' ñeñt atet pena ñeñt atet anare't ñoñets socop atotcha' sottene'ch.

Judionesha'ñapa' atet otyeset:

—Yocop ñeñtey judioneshaypa' ama pocteyaye o'ch yemtsach acheñ ama't puesheñarra.

³² Ñeñto'marña ñetpa' atet otyeset allochñapa' attoch etsota Jesús po'ñoñ atet otuanet ahuaña allempo ñanom eñotatanet ñapa' corsochoch rroma. ³³ Allempoña Pilatopa' alla be'terrerr pocollo. Ñaña' agotatan Jesús'pa' atet och:

—Papa' ¿pa't añcha'tarettetsaña judioneshacop?

³⁴ Jesúsñapa' atet och:

—Añpa' ¿e'ñe't pōta pōtenña atet, ñato' esesha'te' pōtene'ña añ nocop?

³⁵ Pilatoñapa' atet otererr:

—Napa' amaca'ye judioneshayayno, ama es neñotenoña socop. Paña pamo'tsna'tar ñaña ñeñt pa'mcha'tareternesha' pen judionesha' po'cornaneshar ñetña te'pa' o' pomuerrpet nesho. ¿Eso'tña pepen ñeñt ama't mameshapa' ama pocteye' entapretenpeto?

³⁶ Jesúsñapa' atet otererr:

—Atto na'mcha'tarettena napa' ama añe patsroyaye. Ñerra'm añe patsrach na'mcha'tarettenañapa' allempoña neyochresha'chnopa' moñsa'netañcha', allempopa' amach pomnoñeña judionesha'. Tarraña atto na'mcha'tarettena napa' ama arro'marecpayaye.

³⁷ Pilatoñapa' atet otererr:

—Ñeñtepñapa' pepa'tca'yeña añcha'taret.

Jesúsñapa' atet otererr:

—Na po'ño'chpa' añcha'taretenca'ye e'ñe atet pōtenen p̄a. Napa' ñeñto'marña ne'ñalletosa añe patsro attoch nach a'potose' ñeñt e'ñe po'ño'ch Yompor pocta'p̄ña. Allohuen ñeñt muenene' ñeñt e'ñe po'ño'ch Yompor pocta'p̄ña, ñetñapa' e'mñotennet.

³⁸ Pilatoñapa' alla otererr:

—¿Erra'tsena'tña ñoñets ñeñt e'ñe po'ño'ch?

Atto añcha'taret Pilatopa' otanet ama'tpa' chosa muetse'ña Jesús (Mt. 27.15-31; Mr. 15.6-20; Lc. 23.13-25)

Ñeña otuapa' o' alla cha'nerrerr allo'tsa'yen judionesha'. Allñapa' atet otuerranerr judionesha':

—Napa' amaca'ye nenteññañeña ñeñt atto ama pocteye' es peno attoch yemtsatach. ³⁹ Tarraña atet seychenpa' e'ñe pate'tets char allemPOCH çherrerr pascuapo nañapa' çhocmach na'rroyernas puesheñarr socop ñeñt ayottam̄psarettetsa allempo, ñeñtara ñeñt samo'ts sepen. Te'pa' ¿añe't semnen o'ch na'rroyernas ñeñt Sa'mcha'tareter sepen sa ñeñtes judioneshas?

⁴⁰ Allempoña ñetpa' puerrannarteño'tetpa' atet otyeset:

—Tarraña Jesús'pa' amach p̄a'rroyatsche, añcha'ña p̄a'rroyernay Barrabás.

Ñeñña Barrabás'pa' ñeñt atarr aprratam̄psañtetsa.

19

¹ Allempoña Pilatopa' atet otan po'solltar-renesha':

—Te'pa' o'ch sanem̄ Jesús allcha' sashte'.

² Solltarnesha'ña pa'llocchame'teño'fet Jesús'pa' pellta'toñet choyo'mets agrech ñeñña choyo'mtachet ñeñt atet choyo'mtena ñeñt po'ño'ch añcha'tarettetsa. Chorrachet ñaña shetamuets ñeñt quelluemamueno

tsamamtena ñeñt pa'shtam pen ñeñt po'ñoçh amcha'tarettetsa. ³ Pa'llocchame'teñoftetpa' e'ñe atet p̄achet ñerra'mrrate' ñeñt po'ñoçh amcha'tarettetsa. Allña ponemyetpa' pachm̄are'teñoftetpa' atet oteñet:

—Puetare' amcha'taretecha', atarruaca' cohuenep̄te' p̄a ñeñep̄ judionesha' pa'm̄cha'taretereḡ.

Allña'pa' tacllapecheñet.

⁴ Pilatoñapa' alla cha'nerrerr allo'tsa'yen judionesha'. Allña'pa' atet oterraneterr:

—Secue', te'pa' o'ca'ye alla nehuapaterrnaserr Jesús allochña'pa' o'ch señoch napa' amaca'ye nenteññañeña ñeñt atto ama pocteye' es peno attoch yemtsatach.

⁵ Allempoña cha'nom ñaña Jesús achoyo'm̄tataret agrech ñeñt apellta'taret, achorratareta ñaña shetamuets ñeñt quelluemamueno tsamamtena. Pilatoñapa' atet oterraneterr:

—Secue' añca'yeña ñeñt yacmar.

⁶ Ñeñña pa'm̄cha'tareternesha' pen allohuen judionesha' po'cornaneshar ñaña guardianesha' allempoña ñetña eñchetpa' puerranarotetpa' atet otyeset:

—Ñapa' ¡pecorso'tam̄psachñaca'ye!

Alla oterete't:

¡Pecorso'tam̄psachñaca'ye!

Pilatoñapa' oterraneterr:

—Añca'ye seña', sañeña corso'tam̄pse' tarro'mar napa' amaca'ye nenteññañeña ñeñt atto ama pocteye' es peno attoch yemtsatach.

⁷ Judionesha'ñapa' atet otereterr:

—Yapa' yechenca'ye paterr ñoñets ñeñt atet anaret. Ñeñña ñoñetspa' atet oteney añ poctetsa ñapa' chocmach rroma tarro'mar ñapa' pachm̄are'teñoft oten ñapa' ño' Parets Puechemer.

⁸ Allempoña Pilato e'man atet ñoñetspa' cha yoruen. ⁹ Alla be'terrerr pocollo atet otuerranerr Jesús:

—Papa' ¿erro'marneshape'tña p̄a?

Jesúsñapa' ama anape.

¹⁰ Pilatoñapa' alla otererr:

—Amahuachñaca'yeña p̄anapnote'. ¿Ama't peñoteñeña napa' allsensareten attoch na'rroyerrep̄, allsensareten ñaña attoch necorso'tam̄perrep̄?

¹¹ Jesúsñapa' atet otererr:

—Amach errotent̄oḡ peḡa'noñeña ñerra'm ama Yompor p̄apayñe llesens atet. Ñeñfo'marña ñeñt nepomue' peshopa' ñetpa' ello metanennapet p̄o'chñar.

¹² Elloña Pilato atarr mueneñeñ o'ch a'rroyerran Jesús tarraña judionesha'ñapa' puerranarotetpa' atet otyerreterr:

—Ñerra'm añ p̄a'rroyerrpa' p̄apa' ama pemno o'ch p̄a'm̄cha'tareter pepe' ñeñt atarr amcha'tarettetsa Romo. Tarro'mar allohuen ñeñt ñañañeña netsa amcha'taretpa' chocma mueneñ o'ch atpare'teñet ñeñt atarr amcha'tarettetsa Romo.

¹³ Pilatoña allempo e'man ñeñt atet otenet allenta cha'nmaterran Jesús a'yoñ ñaña'pa' anorruerr all po'conaño allecma a'pocatenan ñoñets, ñeñt otenet Mapyetaten. Hebreyaçhopa' oteñet Gabata. ¹⁴ Allempopa' añe

yetro allempo año'tena judionesha' ñeñt attecma penet pascuapo. O'ña chap poptopa', Pilatoñaapa' atet oterranerr judionesha':

—Secue'ñaca'yeña añ ñeñt sa'mcha'tareter sepen.

¹⁵ Ñetñapa' alla rrannarterreterrrpa' atet otyerreterr:

—¡Ñapa' chepa' rromats! ¡Pecorso'tamñpsachñaca'ye allcha' rroma!

Pilatoñaapa' atet oterraneterr:

—Sapa' ¿atfe't semnen o'ch necorso'tamñpsonas sa'mcha'tareter?

Ñeñña pa'mcha'tareternesha' pen allohuen judionesha' po'cornaneshar ñetñapa' atet otyeset:

—Yapa' amaca'ye eñalleña po'poñ ya'mcha'tareter, ñapñaña ya'mcha'tarete yepeni ñeñt atarr amcha'tarettetsa Romo.

¹⁶ Allempoña Pilatopa' apamet Jesús attoch corso'tamñset. Ñetñapa' anmet allcha' corso'tamñpeñeta'.

Atto corso'tamñsomet Jesús

(Mt. 27.32-44; Mr. 15.21-32; Lc. 23.26-43)

¹⁷ Atto sen Jesús allpa' anenan po'corsoch. Chapachet all oteñet Poñetalleño, ñeñt otenet hebreyacho Gólgota. ¹⁸ Allña corso'tamñsomet epuet ñaña epsheña acheñ. All corso'tamñsetpa' rrochtamñsatoset epsheña. ¹⁹ Pilatoñaapa' quellcatan ñoñets ñeñtpa' atet ot: “Añmapa' Jesús ñeñt nazareto'marnesha' ñeñt Pa'mcha'tareter pen judionesha'.” Ñeñña ñoñetspa' e'ñe corsocho ne'. ²⁰ Shonte' judionesha' ñeñt lleya'yese' ñeñt quelled tarro'mar all corso'tamñsetpa' e'ñe allame'ttsa anetso. Ñeñña quelledpa' e'ñe mapo'mar ñoñets aquellcaretta —hebreyach, griegach ñaña latinaçh, e'ñe attecma oten. ²¹ Ñeñña pa'mcha'tareternesha' pen allohuen judionesha' po'cornaneshar ñetñapa' atet ochet Pilato:

—Amachca' pequellcatstoña atet. Añcha'ña pequellca' ñocop, “ñapa' ñañeñaca'ye otetsa judionesho' Pa'mcha'tareter.”

²² Pilatoñaapa' atet otanet:

—Ñeñt o' nequellcatuapa' o'ca'ye aquellca'huarettta.

²³ Allempoña corso'tamñsesuet Jesúsapa' solltarnesha'ñapa' yoroñet ñeñt chorrena. Apanna'tyeset puema'tets pa'tatssheño'maret. Ñeñña pa'shtampa' ama eñalle all sepchena, ora apomotaret e'ñe patrra sheta-muets e'ñe poñe'moteñ. ²⁴ Ateñ otanna'tyeset:

—Amachca'ye yerrarratsche, ðhochña yeyellsheñe'chatoñ pa'shtam yesuertot attoch orrta erra'tsenoteycha' yore'.

Ñeñtpa' tarro'mar atet pohuet allochñapa' attoch etsoterra Yompor po'ñoñ ñeñt atet anuaret ahuatoteñ, ñeñtpa' atet oten: “Ñetpa' apanna'tyerretcha' ñeñt nechorrena. Neshtamñapa' yellsheñe'chatonetcha' po'suertot attoch orrta ñeñtcha' yore'.” Ñeñtpa' atet o' e'ñe perra solltarnesha'.

²⁵ Allña e'ñe allame'tets Jesús po'corsochopa' all tomchen coyanesha'. Allo'tsen pachor, ñaña pachor pa'mo'nerr, ñaña po'psheñeñ María ñeñt Cleofas puetapor, ñaña María Magdalena. ²⁶ Jesúsña entan pachor ñaña pueyochresha' ñeñt nanac morrentena all tomchenet allame'tets. Allñapa' atet otan pachor:

—Achocha' añca'yeña pechoyor.

²⁷ Allempoñaapa' atet otan ñeñt pueyochresha':

—Añca'ye ñeñtcha' p'achor pepa'.

Allempoña ñapa' anerran Jesús pachor e'ñe ña pa'paclo allcha' co-huan̄pes.

Atto rroma Jesús all po'corsocho

(Mt. 27.45-56; Mr. 15.33-41; Lc. 23.44-49)

²⁸ Allempoña Jesúsapa' o' eñoch o' etsotua ora allohuen ñeñt̄ ñocop, ñañaapa' atet̄ ot:

—Cha no'ñpa'ten.

Ñeñt̄pa' tarro'mar atet̄ ot allochñapa' attoch etsoterra Yompor po'ñoñ ñeñt̄ atet̄ anuaret̄ ahuatoteñ.

²⁹ Allñapa' allo'tsen pajo' all chorre' chase'. Allña e'chomuetña ñeñt̄ atstot'p̄o'. O'ña tsotso'tatuet ñeñt̄ñapa' net tsach̄po ñeñt̄ otenet hisopochep̄ alloña chapachet Jesús puenamo. ³⁰ Allempoña Jesúsapa' agapan chase' ñañaapa' atet̄ oterrerr:

—Te'ñapa' o' e'ñe etsotuerra allohuen ñeñt̄ atet̄ anaret̄ nocop.

Allempoña o' epapa' cha rromats.

Allempo puesheñarr solltarpa' enos po'panmeto puep̄otot̄

³¹ Allempopa' o' chap allempoch añño'terrerr judionesha' tsapatecop allempocma amesenet. Ñeñto'marña ñetpa' ama pocteye' eñcheto o'ch alla ellapen ñeñt̄cha' rromanatats corsocho añ yetro allempo amesenet. Ñeñt̄ña yetro allempo amesenet o'ch alla atarr cosherreterr ñaña pascua. Ñeñto'marña Pilatopa' enamueñeta' attoch cheno'tatoñet pa'tap o'ch rromuet e'ñe mamecma allochñapa' o'ch anmaretterret corsochot. ³² Allempoña ponem̄ya solltarpa' cheno'tosan pa'tap ñeñt̄ parro corso'tam̄peñet e'ñe epsheño'mar. ³³ Allempoña ponem̄yet ñaña Jesúsapa' ñañaapa' entoset o' rroma. Ñeñto'marña ñapa' ama chenan̄pseto pa'tap.

³⁴ Tarraña puesheñarrña solltarpa' chocma enos po'panmeto puep̄otot̄. Allot̄ña atarr cha'nom po'rras ama't ñaña oñsasen. ³⁵ Ñeñt̄ña ente'pa' ñapa' serrpare'tatanet atet̄ ent. Ñapa' e'ñe eñoteñ e'ñe po'ñoçh ñeñt̄ atet̄ oten. Ñeñto'marña yapa' yeñoteñ ñeñt̄ atet̄ serrpare'tenpa' e'ñe po'ñoçh. Attochña sapa'cho'ña same'ñerach ñeñt̄ atet̄ oten ña. ³⁶ Ñeñt̄pa' atet̄ pa attoch etsoterra Yompor po'ñoñ ñeñt̄ anuaret̄ ahuatoteñ, ñeñt̄pa' atet̄ oten: “Ña ama't patr̄ra puenep̄pa' amach chenan̄pereto.” ³⁷ Ama't ñaña Yompor po'ñoñ ellonet̄pa' atet̄ ote't̄ ahuat̄: “Ñetpa' enteretcha' ñeñt̄cha' enerret.”

Atto pampuet Jesús

(Mt. 27.57-61; Mr. 15.42-47; Lc. 23.50-56)

³⁸ Allempoña José ñeñt̄ arimateo'marnesha'pa' ñañaapa' ahuos Pilatesho o'ch oteña' pocte'ch eñch ñach a'suatose' Jesús ñeñt̄ rromuets corsocho. Ñehua, ñeñt̄ Josépa' cotenan ñaña Jesús tarraña e'ñe a'nahua, tarro'mar ñapa' mecha'tenan judionesha'. Allempo atet̄ enamosan Pilato, Pilatoñapa' e'ñe pocte' eñch, ñeñto'marña alla ahuerr corsocho, cherr allpa' a'suatosan Jesús corsochot all rromuen. ³⁹ Allñapa' huapa ñaña Nicodemo ñapa' añ huapatoñ eñmosa't̄, atsetaret̄ ñeñt̄ otenet mirra epuet ñaña áloe. Allo'tsent̄e' ma'poch charra' kilo. Ñehua, ñeñt̄ Nicodemopa' ñeñt̄ara ñeñt̄ huapatsa ñanom Jesúsesho tsapo. ⁴⁰ Ñet̄ña anerret̄ña Jesús rromue'. Allñapa' ep̄atse'tueret shetamtsotomo epuet ñaña eñmosa't̄. Ñeñt̄pa' atet̄ yeçhena judionesha' ñerra'm cho pampueñet arromña't̄.

41 E'ñe allame'tets all corso'tam̄pset allña'pa' allo'tsen narmetsma'. Allña narmetsmopa' allo'tsen mapuetpon allña pampa'neretña Jesús allempo rroma. Ñeñt̄ mapuetponpa' e'ñe etserra eñareñ, tarraña allpa' ama pampueñeta' ama't patrra arromñañ. 42 Allempopa' tarro'mara alla na'neret allame'tets tarro'mar allempopa' añ yetro allempoch añña'tena judionesha' tsapatecop allempocma amesenet.

20

Atto tanterra Jesús

(Mt. 28.1-10; Mr. 16.1-8; Lc. 24.1-12)

1 Allempo motta'muenerr yetsñats temenc, Maríaña Magdalenapa' ahuatecma ahua'muen puepampro, allempopa' ama e'ñe puetaresuena'. Allña'pa' amuepa'tcha' atteraye' entosanofña mapue' allo yottam̄pset. Ama allo'tsenarayaye, atta apmesaret a'yenet mame'. 2 Ñeñña pa'che'ñera alla materra o' ahuer all'o'tsen Simón Pedro ñaña po'psheñeñ pueyochresha' ñeñt̄ atarr morrentena Jesús. Maríañapa' atet̄ otuerranet:

—O' anerrnayette' Yepartseshareñ puepamprot. Ama yeñoteñe, errate'ña neret.

3 Allempoña Pedro epuet po'psheñeñ pueyochresha' ñetñapa' allenta ahuanmuet ñamet puepampro o'ch enteñeta'. 4 Epsheño'maretpa' matrra'tet all. Po'psheñeñña pueyochresha'pa' ñaña'pa' ota, metanan Pedro. Ñaña'pa' ñanmacma chap puepampro. 5 Epostsaña o'pononet o'ch cohuos all net Jesús ama entose, añña entosñañ allo epet alla o'yerrmuena. Tarraña ama be'toso. 6 Allempoña chap ñaña Simón Pedro ñeñt̄ onets chenta'. Ñaña'pa' allenta be'tosos puepampro ñapa'cho' añña entosñañ allo epet Jesús alla o'yerrmuena. 7 Añña allo huancoñet poñpa' ama parrocmaye' allo'tseno epuet allo epet. Ñeñt̄ñapa' ñapueñ a'tpuetena a'yenet. 8 Allempoñapa' be'tosos ñaña po'poñ pueyochresha' ñeñt̄ ñanom chapats puepampro. Ñapa'cho'ña entos ama eñalle Jesús. Allempaña ame'ñya po'ñoche'pa't o' tanterraña Jesús rromot. 9 Tarro'mar ñet allempopa' ama chenanoña ñeñt̄ atet̄ anuaret ahua'toteñ Jesúsocop all oten Jesús'pa' chocmach tanterra po'rromñoñ. 10 Allempoña pueyochresha'pa' ahuanerret pa'paclo.

Allempo tanterra Jesús'pa' añ ñanom orrterra María Magdalena

(Mr. 16.9-11)

11 Maríañapa' allo'tsenara a'yot allame'tets puepampro all nanac yahuenapa' o' epa, o' cohua' o'pononet puepampro all net Jesús. 12 Allña'pa' añña ent epsheña mellañoñeñ, pa'shtamuet atarr huallama'tareret. E'ñe ñopa'tets anorryenet puesheñarrpa' poñoñ anen, po'psheñeñña'pa' pa'rropot anen all panet ahuaña Jesús. 13 Ñetñapa' atet̄ ochet María:

—¿Eso'mare't nochesha nanac peyahuena?

Ñaña'pa' atet̄ otanet:

—Ahuo't anerrnanette' Nepartseshareñ ama neñoteñe errate'ña o' net.

14 Ñeñña otuapa' puetallerra pa'che'ñoneñ allentepa'tcha' enterran ñaña Jesús e'ñe all. Tarraña ñapa' ama cheme'che. 15 Jesúsñapa' atet̄ och:

—¿Eso'mare't nochesha atarr peyahuena? ¿Esesha'tña pe'nen?

Ñaña'pa' čha otenapañ añte' ñeñt' cohuanpene' narmetsma' all. Ñeñto'marña ñapa' atet och:

—Ayochreshate ñerra'm p'ate' anmue'pa' pegaterren errate' peneña', ñachña erraya'.

¹⁶ Jesús'pa' atet otererr:

—¡María!

Ñaña puetallerrtserrpa' čha e'ñe cheme'terre' ñeñto'marña atet ot po'ñoño hebreyacho:

—¡Rabonil! —ñeñt' atet otenet ñet Maestro.

¹⁷ Jesús'pa' atet otererr:

—Amach čha perrmatsetno, napa' ama na'tena' Apuesho. Arrña orraḡ masheñneshesho o'ch p'otenaneta' napa' o'ch na'terr Nomporesho ñeñt' Neyomporer nepen ñeñt'ara ñeñt' Seyomporer sepen saña.

¹⁸ Maríaña Magdalenapa' ahuer serrpare'tatuerrñañ pueyochresha' ñeñt'pa' atet otuerranet:

—Napa' o'rramtso nenta'mueñña Yepartseshar.

Serrpare'tatuerranet ñeñt' atet och Jesús.

Atto Jesús'pa' orrterrana allohuen pueyochresha'
(Mt. 28.16-20; Mr. 16.14-18; Lc. 24.36-49)

¹⁹ Ñeñte yetrocma allempo mo'tta muena yetñats temenc, ellerronetña pueyochresha'chnopa' ap'cha'nenet. Ñetpa' čha yore'tenanet judioneshá' ñeñto'marña ñetpa' e'ñe echarr yottañpenet. Ama't atet yottañpenetañpa' Jesús'ñapa' čhepa'tcha' be'tosuet. E'ñe rro'cho tomhuen allempoñapa' atet otuenanet:

—Te'ña po'ño'chpa' čhosa cosherrtsa seyo'chro.

²⁰ Allempoña atet otuenanetpa' gatyeseuanet pot ñaña all enare't pueḡoto. Pueyochresha'ña atarr nanac coshapueñet allempo entapueñet Po'partsesharet. ²¹ Allempoña Jesús'pa' otuerraneterr alla:

—Te'ña po'ño'chpa' čhosa e'ñe cosherrtsa seyo'chro. Atto na mueñan Apa, napa'čho'ña te'pa' o'ch nemñas saña.

²² Allempoña otuenanet atetpa' allenta a'torahuenanet atet oterraneterr:

—Te'ñapa' chorrasepa'ch Parets Puecamquëñ. ²³ Ñerra'm esesha' seḡretnataten po'chñarpa' Yomporpa'čho'ña o' peretner. Ñerra'm esesha'ña ama seḡretnataten po'chñarpa' Yomporpa'čho'ña ama peretneñe.

Allempo Tomás'pa' entapueñan ñaña Jesús o' tanterra

²⁴ Pueyochresha'ña Tomás ñeñt' otenet Epanesha' ñaña'pa' ama allo'tsenayaye all ap'chenet allempo huena Jesús. ²⁵ Ñapa' ataña serrpare'tater po'potantañ ñeñt' parro yochreshatsocmuet, ñeñt'pa' atet ochet:

—Yapa' o'ca'ye yenterña Yepartseshar.

Ñaña'pa' čha otanet:

—Napa' ñerra'm amach nentoñe pot all patet clavo, ñerra'm amach čho na'p'ñoñe e'ñe na notot all patet, amach čho neno not pueḡotot all enetpa' amate' erro'tenot name'ñaso.

²⁶ Allempoña posocmaterrpa' pueyochresha'ñapa' alla ap'cherretterr o'pono. Allempopa' allo'tsen ñaña Tomás. Ama't yetarrpa' e'ñe echarr

ayotetuaret Jesúsñapa' all be'tosuenerr tomhuenerr e'ñe allpa' alla otue-naneterr:

—Te'ña po'ñoçhpa' çhosa cosherrtsa seyoçhro.

²⁷ Allempoñapa' atet otueanan Tomás:

—Pecuon not all pata'net, pa'pille'ca'ye. Pa'pilla'n ñaña nepotot all enanet. Amachña çha pe'charrtatatsto peyoçher çhoña pame'ña.

²⁸ Allempoña Tomásapa' atet och:

—¡Nepartseshare, te'ña po'ñoçhpa' Neyomporer nepeneþ!

²⁹ Jesúsñapa' alla otererr:

—Papa' çho e'ñe penterren ñeñto'maraña te'pa' pame'ñenna. Tarraña elloña añ atarr cosheñtso'tsen ñeñt ama't ama çho entennopa' ame'ñennet.

Añ libropa' añecop anaret ñeñtcha' yame'ñatene'

³⁰ Po'ñoçh shonte' po'poñeçhno ñeñt atet gatyasan Jesús pueyochresha' po'partsoña. Ñeñtpa' ama aquellcareteyaye añ libro. ³¹ Allpon ñeñt aquellcarettatsa arr libro ñeñtpa' añecop anaret ñeñtcha' same'ñate' po'ñoçh Jesúsapa' ñeñt Cristotets, ña po'ñoçh Yompore Puechemer. Tarro'mar e'ñe same'ñeñoça Cristo sañapa' corretsasach tayoteñ e'ñe errponañohuen.

21

Allempo Jesúsapa' orrterrana cançherrsheña pueyochresha'

¹ Allempoña Jesúsapa' orrterrannerr pueyochresha' e'ñe sa'patopño Tiberiaso. Allpa' atet orrterrannet: ² Ñehua, allempo shontenet allpa' allo'tsen Simón Pedro ñaña Tomás ñeñt otenet Epanesha' ñaña Natanael ñeñt cano'marnesha' e'ñe allara Galileo. Ñaña allo'tsen Zebedeo puechemerasha' ñaña allo'tsen po'poñ epsheña pueyochresha'. ³ Simónña Pedropa' atet otanet:

—Napa' o'ch neterrayena'.

Po'potantañeçhnopa'çho'ña atet ochet:

—Yapa'çho'ña o'ch yoçtaþ.

Allempoñapa' ahuanmuet a'taça'toset noñto. Tarraña ama't arepenetañ terrayatsetpa' amaña es rromueneto. ⁴ Allempoña o' puetarenmoch Jesúsñapa' tomhuen pueme'taro. Tarraña pueyochresha'çhnoñapa' ama esesha' cheme'tapaye. ⁵ Jesúsñapa' atet otosanet:

—Neyochreneshacha' çama't eñalleña secacar ñeñtcha' serra'muen?

—Ñetñapa' atet ochet:

—Amaca'ye eñalle.

⁶ Ñañaapa' atet oterranneterr:

—Sehuapore't seterraya noñt po'cohuenrot allpa' serrmue'chca'ye.

Atet otanetpa' atetçho'pet. Arepa'tcha' eshcaye' cheterreto po'terraya o' rromuet nanac aton cac — shonte'. ⁷ Allempoña pueyochresha' ñeñt atarr morrentena Jesúsapa' ñañaapa' atet otan Pedro:

—¡Yepartsesharepa'tca'ye!

Simónña Pedropa' allempo eñotan Partseshapa't huetsa ñañaapa' puema'yoreñ chorrerrana pa'shtam tarro'mar ñapa' muelle'mcoça terrayen. Ñañaapa' puema'yorñecma omacha oñopa' ahuo' Jesúsesho. ⁸ Po'potantañeçhnoña pueyochresha'pa' chenta' onaçherret noñto. Ñato' cien metrote' allo'tsen attoch çherret topña'so. Chetare'tnerret

po'terraya e'ñe chorre' cac. ⁹ Allempo sohua'rretuerret patsopa' all entuerret quellmesh all huorten all achmare'ttena cac; allo'tsen ñaña pan. ¹⁰ Jesúsñapa' atet oterraneterr:

—Sacra' patantarr cac ñeñt serrmuen e'ñe erрте'.

¹¹ Allempoña Simón Pedropa' alla a'terr noñto, chetan terraya noñto o' ne' masto, e'ñe chorre' atesha' caca'chno — allo'tsen ciento cincuenta tres ñeñt allpon rromuet cac. Tarraña ama't shonte' rromuet cacpa' ama rrarratano terraya. ¹² Jesúsñapa' alla oterraneterr:

—Te'pa' sona'cherr o'ch serra'muen.

Puen'cha'na'teño'tet ama't puesheñarro'feta ama esesha' otenaye: ¿Eshape'tña pa? tarro'mar eñoteñet po'ño'chpa' Partsesha'ca'ye. ¹³ Allempoña huapanet Jesús allame'tets, chetosan pan apa'yesosanet. Apa'yesosanet ñaña cac.

¹⁴ Ñeñtpa' allempo poma'pocheño'hua orrterrana pueyochresha' allempo tanterra rromot.

Allempo Jesús'pa' otenan Simón Pedro atarrte' morrenteña

¹⁵ Allempoña rrohua'muenet Jesúsñapa' atet otan Simón Pedro:

—Simón, Jonás puechemere, pa'pa' ¿atarrte' pemorrentenna, ellote' pemtana'tueñ añenesha'?

Ñaña'pa' atet otan Jesús:

—Po'ño'chca'ye Partseshacha' peñotenen napa' nemorrentenpa.

Jesúsñapa' atet otererr:

—Ñeñtepñapa' e'ñech cohuen peserrpare'tatyes allohuen ñeñt name'ñenaya; ñetpa' e'ñe atet nentenanet ñerra'mrrate' necarrneroretollesha'.

¹⁶ Puepocheño'ñapa' alla otererr:

—Simón, Jonás puechemere, ¿po'ño'cha't atarr pemorrentenna?

Ñaña'pa' alla otererr:

—Po'ño'ch Partseshacha' e'ñe peñotenen napa' nemorrentenpa.

Ñaña'pa' alla otererr:

—Ñeñtepñapa' e'ñech cohuen pecuañpson allohuen ñeñt name'ñenaya; ñet po'ño'chpa' e'ñe atet nentenanet ñerra'mrrate' necarrnerore'chno.

¹⁷ Poma'pocheño'ñapa' alla otererr:

—Simón, Jonás puechemere, ¿ama't e'ñe mamecpa pemorrentenno?

Pedroñapa' llequënana atto alla poma'pocheño otererr e'ñe ñeñtara, ¿pemorrentenna't?, ñeñto'marña ñapa' otererr:

—Partseshacha' allohuenpa' e'ñepa't peñotueñ. E'ñe peñotenen napa' nemorrentenpa.

Jesúsñapa' alla otererr:

—Ñeñtepñapa' e'ñech cohuen pecuañpson necarrnerore'chno.

¹⁸ Po'ño'chca'ye te'pa' o'ch notap, pa' allempo huepueshenpa' pechorre't e'ñe pōta, all peseche'tpa' all pechopeñe'chyese't. Tarraña esempoch pepo'nme'tenpa' pañapa' o'ch attaña peyopen peque' attochña o'ch po'psheññaña pechorratenaya allempopa' anerrpetcha' all ama pesecheno.

¹⁹ Ñeñtpa' tarrecop atet eñorana'tenanet allochñapa' attoch eñochet errotentōcha' rromuerr Pedro attōtcha' cohuentaterran Yompor. Ñeñta otuepa' alla oterran Pedro:

—Papa' chocmuepa'ch e'ñe pōctenen.

Atto Jesús eños Juanacop ñeñt pueyochreshar atarr muerena

²⁰ Pedroñapa' puetallerrtsa entapan o' cota'neñ po'psheñeñ pueyochresha' ñeñt atarr morrentena Jesús, ñeñt e'ñe anorttse't epuet ahuañmo'cha allempo rrallme'chete't ñeñtara pueyochresha' ñeñt otaye't ahuaña: "Partseshacha' ¿erra'tsenacpa'tña pe'ñorena ñeñtcha' pepomuerre'?" ²¹ Allempoña enta' Pedro, ñañapa' allenta otan Jesús:

—Partseshacha' ñocoppa' ¿ama't eñalleña ñeñtcha' huapoya ña?

²² Jesúsñapa' atet otererr:

—Ñerra'm na muenate' ñapa' allach a'pa esempohuañenña nohuerrapa' ñeñtpa' e'ñe pocte' ñocop, ñeñtpa' ama pocpayaye. Pocoppa' añ poctetsa chocmuepa'ch poctenen.

²³ Ñeñto'marña epa'hua añ ñoñets erra'paren allo'tsa'yen masheñnesha', ñeñto'marña ñetpa' atet otanna'tyenet, ñeñt pueyochresha'pa' año'ch rromuerro ama't errponaña. Tarraña Jesús'pa' ama atteye' oteno amach rromuerro. Ñapa' aña oteñ: "Ñerra'm na muenate' ñapa' allach a'pa esempohuañenña nohuerrapa' ñeñtpa' e'ñe pocte' ñocop, amaña po'psheññecpayaye."

²⁴ Napa' ñeñten pueyochreshan ñeñten atet eñotatets atet ñeñtaraan quellquë' añ. Te'ña ya allohueney yeñoteñ ñeñt atet na'potapa' ñeñtpa' e'ñe po'ño'ch atet.

²⁵ Shonteñ po'ño'ne'chno ñeñt atet pa'yesa Jesús. Ñerra'm e'ñech yequellca'hueñ ora allohuen ñeñt atet pa'yese't Jesús eñalleñte' shonte' nanac libros. Napa' noten shonteñte' nanac libros'pa' e'ñech epa'huañ ora erra'paren aña patsro ñerra'm allponcha' yequellcañ libros. Ñeñtpa' attetepa'ch Nompore. Allohua.

ATET PA'YESA JESÚS PUEYOCHRESHA' LOS HECHOS

Atet otnerranet Jesús huapanetcha' Parets Puecamquëñ

¹ Te'pa' masheñe Teófilo, nequellcotpa' o'ch neserrpare'taterrperr po'pocheño. Ahuaña ñeñt nequellconap̄ all neñotatap̄ ora allpon atet pe't Jesús allempo añe patsro'tsenmeñ. Ñaña ora allpon yeçhate't Jesús, ñeñtpa'cho' o' notuap̄ nequellcot. ² Tarraña allempoteñ a'terr pue'ntañopa' palltena o'ch notap̄ ñaña. Te' añ nequellcotpa' o'ch notap̄. Tarraña ama't allempo ama a'terra' Jesúsapa' añña ñeñt pueyochresha'pa' o' otuanet atetcha' pet. E'ñe Parets Puecamquëño'tpa' o' llesensa' huanerran pueyochresha' ñeñt acra' ña. ³ Ama't pomue-roçhteño't o' rromua ahuaña, allempoñapa' o' orrterrana pueyochresha' e'ñe betnatot. Ñeñto'marña ñetpa' eñoçet e'ñe po'ñoçh añpa' ñeñtara Jesús ñeñt rromats ahuaña. Tarro'mar pa'tatsoch çharramatnerr atto orrtame'tnerranet mamesha'tets. Ñaña çhocma eñçete't allame'tets. Allempoña ñapa' a'potanet atet penaña Parets po'cohuenña atto ayochreshattena ña.

⁴ Allempo allo'tsenet e'ñe parro epuet pueyochresha'pa' atet otanet:

—Amach erra setatsto arro't, allasach arrma Jerusaléño. O'ch secueñ esempoch çhaponasa ñeñt Parets Puecamquëñ. Tarro'mar Paretsapa' o' otuas o'ch mueñonas Puecamquëñ. Ñeñto'mar napa' o' na'potuonas Parets po'ñoñ ahuaña. ⁵ Allempopa' añña ñeñt notuas: Juanañpa' añoñña apate't oño, tarraña na tsapatonetpa' añcha'ña nechorrasa Parets Puecamquëñ. Añpa' allohua atet ot Jesús.

⁶ Po'pocheño all apçhenet aspento pa'so'cheñ Olivopen. Pueyochresha'ñapa' atet a'p̄to'çhet Jesús:

—Te'pa' Partseshacha' ñato' poçte' penteñ o'ch p̄paterrey ñeñtey israelneshay yepatseñ. Allochñapa' amach esesha' poñeña yeyore'tame'tenaye.

⁷ Jesúsñapa' atet otanet:

—Ñeñt socoppa' ama poçteyaye o'ch señoçh. Añña Yompor po'partsoteño't e'ñe eñotueñ. Ñapa' o' ne' allempoch etsotuerra ora allohuen añeçhno.

⁸ Jesúsapa' alla otnerraneterr:

—Añña poçte' o'ch señoçh, ñerra'm esempoch huaponasa Parets Puecamquëñ sesho, ñach ahuamencat sepose'. Allempopa' sa'potoncha' neñoñ erraparen—Jerusaléño, ñaña ora Judeo, ñaña Samario, ñaña ora allohuanen pats.

Arrpa' atet perra Jesús allempo a'terr pue'ntañ

⁹ Ñeñta otuanenatetpa' allempoñapa' a'tenochayo' enonet. Añña pueyochresha' pocuanrrorteño'tetpa' o' ma'natena oso. O'huañ orrta, ama't mamesha. ¹⁰ Ama't allempo o'huañ orrta Jesús, ñetpa' allo' cohuanrrortet enonet allenet o' chenca'huanena Jesús. Allempoñapa' cohuer-rtset patsonetpa' alla entet epsheña yacma o' tomçha'toset e'ñe parro. Pa'shtamuetpa' nanaco' huallama'tareret. ¹¹ Ñetñapa' atet otosanet:

—Esuañaca' galileo'marneshacha' secuanrrortenña enonet. Añ Jesús ñeñt' o' a'terr entopa' huerrerrcha' po'pocheño atet senteñ o' ahuerrento.

¹² Allempoña o' a'ten Jesús pa' añña pueyochresha' pa' o' ahuanerret alla Jerusaléño. O' onacherret Olivoḡnot allot a'terr Jesús. Tarro'mar ñeñt' aspenet Olivopenpa' allame'ttso'tsena Jerusaléñoḡ, Olivoḡnotpa' ñato' allo'tsente' paterr kilómetro attoch yeḡchap Jerusaléño. ¹³ O'ña ḡhaḡherret anetso Jerusaléño all pocollo allecma a'puenetpa' o' be'tosḡha'tuerret, a'tapuet eno all tama a'yohuen ḡaḡ. Allñapa' apḡchet allohuenet. Ñeñt' apḡchatsa ñeñt'pa' añeḡchno: Pedro, ñaḡña Jacobo*, ñaḡña Juan, ñaḡña Andrés, ñaḡña Felipe, ñaḡña Tomás, ñaḡña Bartolomé, ñaḡña Mateo, ñaḡña Jacobo ñeñt' Alfeo puechemer, ñaḡña Simón ñeñt' cananistanesha' ñeñt' atarr torratse't pa' netsrecop, ñaḡña allo'tsen Judas ñeñt' Jacobo pa'mo'nasheñ. ¹⁴ Allña apḡchenetpa' e'ñe ñeñt'na nete't pueyoḡhro cohuen ñoñets. Allotpa' e'ñe poma'yochreñoḡet cohuenpa' ḡhocma ma'yochete't. Allo'tsen ñaḡña coyanesaḡchno, ama't Jesús pachor María, ñaḡña pa'mo'nasheñnesha' allo'tsenet ñamet.

Atet ḡa Jesús puellsensarnesha' allempo net Matías ñeñt'cha' epuet a'poḡoñet Yompor po'ñoñ

¹⁵ Parroḡña Pedropa' o' tomos o'ch serrpare'tatanet. Allempopa' ñato' allo'tsente' ciento veinte acheñenesha'. Allempoñapa' otanet:

¹⁶ —O'ch masheñeshacha' notas: Po'ñoḡh o' etsotua Yompor po'ñoñ ñeñt' anaret ahuaḡoḡeñ. Tarro'mar Parets Puecamḡḡeñoḡ eñose't David. Ama't ahuaḡpa' ote't David atetcha' ḡa Judasoñ ñeñt' anmue' ñeñt' rromue' Jesús. Ñehua, pocte'ñācho' o'ch etsota Yompor po'ñoñ. ¹⁷ Judasoñpa' ahuaña allempo allo'tseney e'ñe parro ñapa'ḡho'ña acreñña Jesús o'ch pueyochresha' pe'. ¹⁸⁻¹⁹ Ñehua, Judasoñpa' tsa'chet allpon quelle atto poman Jesús. Tarraña ñeñt' quellepa' allo rañtet pats. Tarraña allempo shora'nom Judasoñ ḡhap patsopa' potsa'nmos pa't, o' yo'pahua ora. Allempoña e'mare'ch allohuen jerusaléño'marnesha' atto Judasoñpa' o'rroma. Añña pats ñeñt' rañtet Judasoñ po'ḡllayoroḡpa' o' sochet Acéldama. Añ ñoñets ñeñt' otenet Acéldama ya yeñoño yoteñ Errasatsotnanen. ²⁰ Añña ñeñt' quellḡḡe't ahuaḡ David ñeñt'pa' anuaretta añ libro Salmos. Añña ñeñt' atet oteney:

All yethena, puenasepa'ch amaraḡ, all amach eseshaye' yeḡchatstatso.

Ñeñt' po'taruas ḡa' attoch sherḡbaneñ Yomporpa' tarraña ñeñt'pa' apanepa'ch po'psheñeñ. Atet oten añ libro Salmos.

²¹⁻²² Alla oterraneterr Pedro:

—Ñeñto'mar te'pa' añ poctetsa o'ch ye'ñ po'psheñeñ ñeñt'cha' parro ya'pota atto Jesús pa' o' tanerra. O'ch ye'ner puesheñarr ñeñt' ḡhocma parro yechopeñe'che't ahuaña allempo arro'tsenmeñ Yepartseshar Jesús. O'ch ye'ner puesheñarr ñeñt' ḡhocma yocḡtaye't ama't allempoteñ Juanañpa' apatapan Jesús tarremphua allempo a'terr Jesús.

²³ Allempoñapa' o' neñet epsheña, puesheñarr añ pa'so'cheñ José Justo, ñeñt'ara José oteñet ñaḡña Barsabás. Po'psheñeñpa' añ pa'so'cheñ Matías.

²⁴ Allempoñapa' o' ma'yochet. Puema'yochenoḡetpa' atet otet:

—Yompore, ñeñteḡ entene' allohueney yeyoḡher. Te'pa' o'ch peñotatay erra'tsente' pemnen ḡa ñeñt'cha' ello alla sherḡberrets ḡocop atet ñerra'm

* **1:13** Jacobopa' ñeñt'ara ñeñt' sochenet Santiago.

pellensar. ²⁵ Judasoña' o' sa'nmuey o' ahuo' all ñeñt' o' patatarettena ña e' ñe ña po' chñaroť.

²⁶ Allempoña'pa' yellsheñe'chet e' ñe ñet po'suertot attoch eñochet erra'tsenté' muenenña Yompor ñeñt'cha' alla sherberrayerr. Allempoña yellsheñe'chenet aña orrtatsa Matías ñeñt'epa't muenenña Yompor. Allempoteñ Matías'pa' ahuo' aguēñ po'poñečno ñeñt' çharrasheña puechetsa paterr ñeñt' puellsensar Jesús.

2

Allempo çhapanet Parets Puecamquēñ

¹ Allempoña'pa' o' meterrerr allponmat amnaroch çharramat, o' çhap allempo coshena judionesha' ñeñt' otenet Pentecostepo. Allempoña ñetpa' alla apçherreterr e' ñe parro ñeñt'et ame'ñetset. ² Allempoña' machayoťa e'mapuet atet ñerra'm huomenquēsha' ma'more'tos entot. Allohuenet ñeñt' allo'tsa'yen pocollo e' ñe e'mhuet. ³ Añña ñeñt'et apçhetsetpa' o' huapanet atet ñerra'm tso'. Huapapa' çha çhapa'rrtosa po'huorter ñesheto. Chapyesanet e' ñe puesheña'ttsocmuet atet ñerra'm huorte'. Añña huorte'pa' alla a'prra'ta ñesheto. ⁴ Añña ñeñt' çhapyesahuet e' ñe puesheña'ttsocmuetpa' añepa't Parets Puecamquēñ ñeñt'cha' chorrahuet. Allempoña'pa' allorocma eñosyeset po'poñ ñoñtso ñeñt' ama eñosete'te ahuaña. Añña Parets Puecamquēñ'pa' ahuo' eñoratyesanet po'poñe'ttsocma attoch serrpare'tachet pa'namen acheñ e' ñe ñet po'ñoñeto.

⁵ Allempo Jerusaléñopa' allo'tsa'yen shonte' judionesha' ñeñt' huaçhetsa pa'namen anetsot. Ñetpa' cohuen cotape'chete't Partsocop. ⁶ Allempoña e'marettet çha ano'tenetpa' o' matrra'tosa shonte' pa'namen acheñenesha' o'ch enteñeta' ñeñt' ano'tatsets. Chapuet all ano'tatsenetpa' o' entoset ñeñt' ame'ñetsapa' año eñosyenet e' ñe ñet po'ñoñeto. Allempoña'pa' atta cohuanrrortoset. ⁷ Puemoññe'teñoťetpa' atet otyeset:

—Ta', erroťenote'ca' e'myennayetña yeñoñ. Yapa' yeñotenanet ñetpa' galileo'marnesheta. ⁸ Ama't po'poñ ñeñt' yenyoma' ñoñetspa' e'mueñet. Allohueneypa' o' e' ñe ye'myes atet eñosyenet e' ñe cohuen yeñoño.

⁹ Allempopa' alla otanna'tyerreterr:

—Yapa' yeñen po'poñe'ttsocma ñoñets tarro'mar yapa' pa'namen anetsot yehuena. Allot anetsrot yehuapyena ñeñt'pa' pa'namen pa'so'chñečno —ama't Partioť ñaña Medioť ñaña Elamoť ñaña Mesopotamioť, Judeoť, Capadocioť, Pontoť, Asioť, ¹⁰ Frigioť, Panfilioť, Egiptoť ñaña Africo'marot, alla allame'tets Cireneo. Ñaña ñeñt' huetsa Romoť ñeñt' çhocma a'puetsa arr. ¹¹ Ama't ñaña judionesha' shonte', ñaña ama't ñeñt' ame'ñaten judionesha'. Ñaña ñeñt' huetsa Cretot ñaña Arabioť. Ya te'pa' o' e' ñe ye'myes e' ñe yocma yeñoño atet aye'choçhtateññañet Parets po'cohuenña e' ñe yeñoño.

¹² Otanna'tyerreterr alla:

—Ta'm, ñetpa' erroťenette'ca'yete'. Yapa' ama't ahuatapa' ama yentareña galileo'marnesha'pa' o'ch eñosyesña e' ñe cohuen yeñoño. Ta', esocope'.

¹³ Añña po'potantañ acheñenesha'pa' o' achñare'tanet atet otarettet:

—Tarro'mar ottenetña' çhoca'ye posa'tyenet.

Atto Pedropa' serrpare'tatan acheñenesha'

¹⁴ Añña Pedropa' tanta o'tom e'ñe alla epuet po'poñečno yochreshats. Eñora huomenc, otanet:

—Masheñe judioneshacha' ñaña allohuenes ñeñtes arro'tsenes Jerusaléño, te' o'ch notas: Se'mñioten o'ch neñotatas attoť atet yepena ya. ¹⁵ Yapa' ama yeposañoŕeŕe' o' yo'notaŕsa'mueno atet soteneŕ sa, tarro'mar ama čhoŕe' o' yarepeno orrats. ¹⁶ Añña ñeñť sentyen te' ñeñťpa' añ o' etsota ñeñť atet oteť Joel ñeñť a'mťayeť Yompor po'ñoñ ahuat. Añña ñeñť quellquēť ahuat Joel:

¹⁷ Añ atet oteneŕ Yompor: Allempoch mellapoterrmocha, atetča' perra, o'ch nenanet Necamquēñ pueyočhreto, allohuen arromñaŕenesha' o'ch nechorratanet Necamquēñ. Añña penřreneña' ñetča' a'poterret neñoñ ñeñťča' neñotatuanet, ama't ñaña coŕaneshachno a'poterrnancha' neñoñ. Añña ñeñť huepuešhare' čhocmach es norrtatyesanet ñeñťča' entyesonet neshot. Añña ñeñť po'nmeneshare'pa' es norrtatyesanetča' puečhopoñeto.

¹⁸ Ama't allohuen ñeñť nesherbene', ñaña ama't coŕaneshachno nenuanetča' Necamquēñ pueyočhreto attoch a'poťonet neñoñ.

¹⁹ Allempoña enopa' o'ch nentatyesanet ñeñť ama't ahuatapa' ama puentareto. Patsopa'čho'ña o'ch norrtatyesanet ñeñťča' eñotatterahuat. Quellareñťsoťpa' norrtatča' errasats. Puetomamřsanna'teñoťet pa'netserpa' orrterrach tso' erracmañen, chepoterrcha' amos ñaña erraparen.

²⁰ Ama't ñeñť yečhoŕo'tamřpene'te' allempopa' puenaserrach checmete'. Arrorřpa'čho'ña allempopa' tsama'tterrach atet ñerra'mrrate' errasats. Atetča' yoročhterra allempoch huerrmocha Yompor.

²¹ Allempopa' ama't erra'tsena čhoŕe'te' Yompor pueyočhocmañen attoch a'queshřachpa', Yomporñapa' a'queshřatanetča'. Arrpa' allohua atet quellquēť ahuat Joel.

²² Añpa' ñeñťara alla oterraneterr Pedro:

—O'ch masheñe judioneshacha' noterrserř: Sapa' señoťeñ ahuañapa' orrteť Jesús ñeñť nazareto'marnesha'. Ñapa' čhocma orrtatonaseť po'partsoteña, ñaña čhocma orrtatyesonaseť ñeñť ama sentare ñeñťča' señoťate' ñapa'čho'ña nanac Parets. Pompor apuene'ña po'partsoña attoch señoťoñ Puechemer ña nanac Parets. ²³ Añña ñeñťara Jesús sañapa' o' seŕomhuer attoch corso'tamřřset. Sañapa' o' sař po'poñ acheñenesha' ñeñť atpare'tene' Yompor attoch ñetpa' o'ch muetset. Atet o' seřohua, Yomporpa' ahuatoteñ eñotuaseť atetča' seřa, tarro'mar atet mueneť ña. ²⁴ Tarraña ama't rromuapa' Pomporpa' o' alla tantater. Tarro'mar amate' erroťeno te'pa' alla a'po rromue'. ²⁵ Ama't atet oteť David ahuat, atet ñerra'm Jesús eñorarseť. Atet oteť:

Napa' neñoťeñ Nompor čhocma allo'tsenen parro epan. Ñach nanac ahuamencať nepe' attoch amach neñťča'to.

²⁶ Ñeñťo'marña nanac nocshena neyočhro, nocsheñeshocma neñen. Ama't nerromapa' neñoťeñ amach alla na'po rromue'.

²⁷ Napa' neñoťeñ amach a'ypo'ñoño necamquēñ alla o'pono. Nomporpa' amach mueno o'ch puetsohua alla nechets tarro'mar ñapa' enten e'ñe cohuenare' es nepen ñocop.

28 Añcha'ña o'ch entaterren attoch yocrrerra e'ñe cohuen. Poparroc-mateño' epan ñapa' ñach nocshattere' nanac. Allohua atet ote't David ahuat atet ñerra'm Jesús eñostse't.

29 Allempopa' alla oterraneterr Pedro:

—O'ch masheñeshacha' noterrser, añ poctetsa e'ñe eñotochen o'ch notas: Yatañ David ahuatpa' rroma. Rromapa' pampuet. All pampuetpa' yenteñ ama't teme'ttsen. Ñeñto'mar yeñoteñ ahuat allempo ote't añ ñoñetspa' ama añecpaye' serrpare'te'te e'ñe ñocop, añecopña serrpare'te't Jesúsocop. ³⁰⁻³¹ Tarro'mar David ñapa' ña a'mtaye't ahuat Yompor po'ñoñ. Ñapa' e'ñe eñotue't atetcha' pa ñeñtcha' Cristotats allempoch chap añe patsro. Ñeñto'mar ama't ahuatoteñpa' eñose't atetcha' tanterra ñeñtcha' Cristotats. Pomporpora' amach a'ypo'ñano Puechemer o'pono. Amach muenatoñe o'ch puetsohua po'chets. Yomporpa' ama't ahuatpa' atet otan David o'ch noñ puesheñarr po'mrenño' ñeñtcha' añcha'tarettatsa esempo. Davidpa' eñotane't Yompor ñapa' ama pueno po'ñoñ. ³² Te'ña yapa' o' yeñch Yomporpa' o' tantaterran Puechemer Jesús. ³³ Te'ña ñapa' e'ñe allo'tsen epuet Pompore Paretts all partsoten ento. Pomporpora' o' e'ñe aphue Puecamquëñ. Te'ña' añ ñeñfara Puecamquëñ o' chorratya yamña atet otnerrey ahuaña. Ñeñto'marña o' orrtonaya atet sentyes ñorra', ñamña atet se'myes cohuen ñoñets e'ñe sa señoño. ³⁴ Ñeñto'marña yeñoteñ ama añecpaye' serrpare'te'te David e'ñe ñocop, tarro'mar ñapa' rromapa' ama tanterro allo'tpa' ama a'terro ento atet ñerra'm Jesús. Ñamña po'pocheño ahuatpa' eñose't David, atto' ote't:

Yompor Paretspa' atet otennan ñeñt e'ñe Nepartseshar nepen na (ñeñfara ñeñtcha' Cristoterrets): “Te'pa' o'ch panorruerr arr neco-huenrot allcha' pecohuentapreterna.

35 Attochña ama't ñeñt pe'moñe'tene' napa' o'ch e'ñe name'ñatuerranet allochñapa' o'ch atet perret ñeñt pemnen pa.” Añpa' allohua atet ote't David ahuat.

36 Allempoñapa' alla oterraneterr Pedro:

—Sapa' israelena'tares. Ñeñto'marña señoche'pa'ch e'ñe eñotochen atto Yompor Paretts o' nan Puechemer Jesús. Ñapa' ña Partseshatets, ñeñfara Cristotats. Añ ñeñt Jesús sañapa' o' secorso'tamñpsach. Añpa' ñeñfara allohua serrpare'tatanet Pedro.

³⁷ Allempoñapa' ñeñt matrra'tatsa allpa' o' chapamet pueyo'chro añ ñoñets. Nanac llecanrrortet. Atet ochet Pedro ñamña po'potantañe'chno Jesús puellsensar. E'ñe puellquëño'et atet otet:

—Masheñeshacha', errotenuachca'ye yeperraña te'.

38 Pedroñapa' atet otanet:

—Te'pa' añ poctetsa ñeñtcha' seperra allohuenes. Te' sellquëño' o'ch soctape'cherr ello cohuen Yomporecop. Allochñapa' Yomporpa' peretna'huernascha' so'chñar. E'ñe same'ñeño' Jesucristo añ pocte'te' o'ch sapataretterra Partsocop. Allochñapa' Paretspa' chorraterrach Puecamquëñ. ³⁹ Ñeñt'pa' pocte't atetcha' sepa, tarro'mar atet otnerrey Jesús o'ch chorratuerrya e'ñe puesheña'ttsoy Puecamquëñ, allohueney ñeñtey o' hua'ñerrey Yeyomperer Paretts o'ch yame'ñera. Ñamña allohuen chorratuonasa ama't sa sechemerresha' Puecamquëñ, ñamña allohuen ama't ñeñt ella'paro'tsa'yenet.

⁴⁰ Allempoñapa' o' alla serrpare'taterraneterr attoch otanet pa'namen ñoñets. Attoch cotape'chatanetpa' atet otanet:

—Amach soctape'chatsto atet cotape'chen po'poñ acheñenesha' ñeññ ama ame'ñetso. Attotcha' sequeshperrach.

⁴¹ Allempoña allohuen ñeññ ame'ñaya Pedro atet otanetpa' o' apataretet. Allempopa' ñato' allpon ame'ñatsa ma'pa mil acheñenesha'. Cha shontena ñeññ ame'ñatsa. ⁴² Allempoteñ ñeññ ame'ñatsapa' e'ñe ma'yochrenet atet ye'chatanete't Jesús puellsensar. Nanac cohuen entanna'tete't allecma ap'chete't parro. Pueyerpueño'tet Jesús o' toma'ntatet pan atet ñerra'm Jesús po'chets. Nanac ma'yochete't e'ñe parro.

Atet corre't ahuat ñeññ ame'ñatse't

⁴³ Ñeññ Jesús puellsensarpa' orrtatanete't shonte' pa'namen ñeññ ama puentareto, orrtatanete't partsoteñets attoch eñochet añmapa' Partsepa't. Ñeñño'marña allohuen acheñenesha'pa' nanac mecha'na'tete't. ⁴⁴ Ñeññ ame'ñatsapa' chocma ap'chete't parro, pocsheño't apanna'tyesete't ñeññ es palltatse't. ⁴⁵ O'ch venda'yesete't ñeññ e'chyenet ñaña allpon ñeññ o'patyesete't ñeññpa'cho'ña venda'yesete't. Allpon gana'yesete'tpa' o'ch apanna'tyesete't ñerra'm esesha' es palltatse't. ⁴⁶ Pate'tets yetpa' o'ch ahuanenet e'ñe parro Parets pa'paclo. Errotenopa' pueyerpueño'tet Jesús o'ch toma'ntachete't pan atet ñerra'm Jesús po'chets. Ñaña chocmach rrallme'chapretanna'tete't pa'paclo. E'ñe pocsheñeshet pueyo'chretopa' chocmach rrallme'chete't. Allempopa' nanac amuerañterret. ⁴⁷ Ñaña chocmach aye'cho'chtatoñete't Yompor. Allohuen acheñenesha'pa' e'ñe cohuen entapretanete't ñeññ atet pete't. Pate'tets yet Yomporotpa' chocmach ame'ñachete't po'poñe'chno acheñenesha'. Atteñapa' o' cha shonta ñeññcha' a'queshpatarettatsa.

3

Atto Pedropa' a'crraterran ñeññ echarrtetsa

¹ Pamtarrpa' chap allempocma ma'yochenet Parets pa'paclo, atet ñerra'm allempopa' ñato' o' ellerrenmoch. Pedroñapa' ahuo' Parets pa'paclo epuet Juan, o'ch ma'yochoset all. ² O'ña chapuet allpa' a'taposet Parets pa'paclo. Allempoña a'tapmochet allpa', allempocma huapachet ñaña puesheñarr ñeññ echarrtetsa pa'tcot, ama eshcaye' chope'cheno. Allempoteñ eñalleta ama chope'cheno. Chocmach pamo'tsesha'pa' o'ch aneñet allecma be'tenet Parets pa'paclo. O'ch na'nmet allotecma be'tosete't ñeññ otete't Ama Macohueno. Allñapa' allcha' enamare'tyenan quelle ñeññ be'tostse't Parets pa'paclo. ³ Ñeññña echarrtetsapa' entapan Pedro epuet Juan. Ñetpa'cho'ña be'tosmochet Parets pa'paclo. Ñaña'pa' enamapanet quelle. ⁴ Pedroñapa' alla o'chet cohue' epuet Juan. Allempoña Pedropa' atet otan ñeññ ama chope'chetso:

—Ñehua, pecua'y alla.

⁵ Ñeññña echarrtetsapa' alla e'ñe cohuanet, ñapa' otapañte' o'ch apatet quelle. ⁶ Tarraña Pedroñapa' atet och:

—Napa' ama necheno quelle, tarraña ñeññ nechenpa' ñeññcha'ña napap. O'ch notap, e'ñe po'partsoteño't Jesucristo ñeññ nazareto'marnesha' o'ch notap, pechope'cherrepa'.

7 Pedroñapa' chete' potot po'cohuenrotpa' o' echañch. Allempocma corra'huenta pa'tcot, ama't all meya'nen yetacpa' o' corra'huenta pocacma. 8 Corra'huetsa pa'tcotpa' pocsheñoipa' omacha enonet, o' ten e'ñe cohuen. Allempoñapa' chopeñe'chen. Ama't all chopeñe'chen omachme'tetsa all aye'chochtatenan Yompor. Atteñapa' be'tos Parets pa'paclo epuet Pedro ñaña Juan. 9 Allohuen acheñenesha' ñeññ allo'tsa'yen, ñetpa'cho' enteñet atto pa'ye'chochtateñesha' Yompor all chopeñe'chen. 10 Ñetpa' cheme'teñet añmapa' ñeññara ñeññ anorrtse't allotecma be'tosete't Parets pa'paclo, ñeññ otenet Ama Macohueno, allecma enamare'te't quelle. Ñetñapa' atta cohuanrrortene't.

Atto Pedropa' serrpare'tatan acheñenesha' Parets pa'paclo

11 Añña ñeññ corrrertsapa' ama a'rroyen enterrano Pedro ñaña Juan. Allempoña all tomchenet all oteñet Salomón Popellrraro. Acheñenesha' po'yorñoetpa' matrra'tet allo'tsen Pedro ñaña Juan ñaña ñeññ a'crraterr Pedro. 12 Allempoña cha'cha'tet all tomchenetpa', añña Pedropa' otapanet, atet ot:

O'ch masheñe israelneshacha' notas, eso'marte' secuanrrortene'y. Chate' sotenapañ e'ñe'e' ya yehuamencot yechope'chater, amapa' chate' sotenapañ e'ñe'e' ya, ya'cohuentateño' yechope'chater. Añmapa' ama atteyaye. 13 Añña'ña o'ch notas: Añmapa' Yompor orrtatene' ñeññ o' sentua. Añña Yomporpa' ñeññara Po'yomporer pe't ama't Abraham ñaña Isaac ñaña Jacob, ñaña allohuen yatañneshañ. Yomporpa' e'ñe pocte' eñch o'ch cohuentatan Puechemer Jesús. Ñeñño'marña o' orrtatonas ñeññ o' sentua. Tarraña sa ñeññara Jesúsapa' o' sepomhue. Ama't allempo Pilatopa' pocte' enteñeñ o'ch a'rroyereñ, tarraña sañapa' cha sa'nasotañpesya allohuenes. 14 Ama't ñeññ nanac Parets, ñaña ama't ñeññ e'ñe pocte' es pets, sañapa' cha sa'nasotañpesya. Allempo Pilatopa' ama't mueneñ o'ch a'rroyer, sañapa' aña sanamñ ñeññ amtsañ ñeññcha' a'rroyonaset. 15 Ñaña'ña cha'ña semtsach ñeññ alloch e'ñe yocrra. Tarraña ama't muetsetañpa' añña Pomporpa' o' alla tantater. Tarro'mar yapa' yeñoteñ yapa' yenter ama't allempo tantuerra. 16 Ya yeyemteño' e'ñe Jesús o' corrrera ñeññ ama chope'chetso ñorra'. Ama't sapa' seño'teñ atto ahuañapa' ama chope'che'te. Tarraña te'pa' o' senter o' chopeñe'cherr. Yapa' o' yame'ñera Jesús ñeññ o' a'crrataterran ñeññ echarrtatse't ahuaña. Te'ña ama't sapa' o' sentuer allohuenes.

17 Te'ña masheñneshacha' napa' neñotenes ahuaña sapa' ama es se'chapoyo seyo'chro allempo semtsach Jesús. Ama't ñeññ sa'mcha'tareñnesha' ama es chapahueto pueyo'chreto ñamet. 18 Tarraña ñeññ atet se'pohua te'pa' o' etsoterra Yompor po'ñoñ. Tarro'mar allohuen ñeññ a'mtaye't Yompor po'ñoñpa' attecma otete't, ñeññcha' Cristotats Partsocoppa' muerochtatchetcha' esempo. Ñeñño'marña te'pa' o' etsota Yompor po'ñoñ ñeññ aquellcare't. 19 Ñeñño'marña te'pa' añ poctetsa e'ñe sa sellquëñoipa' o'ch soctape'cherr ello cohuen Yomporcop. O'ch sesuanom ñeññ ahuatoteñ soctapña. Attotcha' Yomporpa' e'shohuerrnascha' so'chñar. 20 Attochña separrocmateño' epas Yomporpa' socsherrach seyo'chro. Ñaña Yomporpa' o'ch alla mueñernaserr Cristo Jesús ñeññ anarettatsa ñaña socop. 21 Tarraña te'pa' e'ñe pocte' allach pue'ntaño tarremphua

esempohuañencha' a'pocataretetua ora allohuen ñeñt atet eñose't Yompor ahuat. Ama't ahuat Yomporpa' eñorana'tane't acheñ ñeñt e'ñe pocte' ente't Parets ñeñtcha' a'mte' po'ñoñ, ñeñtcha' etsoterrtsa esempohuañen. ²² Añmapa' ñeñt atet ote't ahuat Moisés: "Yompor Paretspa' orrtatonascha' ñeñtcha' a'pote' po'ñoñ, ñeñfara sa samo'tsna'taro'tpa' orrtatonascha', atet ñerra'm na, Yomporpa' o' orrtaterren na namo'tsna'tarneshacop. Tarraña socoppa' añ poctetsa čhocmach se'mñoter erro'tencha' oterres. ²³ Tarraña ñerra'm esesha' amach e'mñoterraye ñeñtcha' orrterrtsa, ñeñña acheñerpa' ahuo'ch a'chencataretterrach. Pamo'tsesha'ña israelnesha'pa' amach allo'na entneñeto." Añpa' allohua atet ote't Moisés ahuat.

²⁴ Alla oterrerr Pedro:

—Ama't allohuen ñeñt a'mtaye't Yompor po'ñoñ ahuatpa', eñose't ñeñt o' etsotuerra te'. Ama't Samuel ñeñt a'mtaye't Yompor po'ñoñ ahuat, ñaña allohuen ñeñt allempoteñ a'mtaye't Yompor po'ñoñ, añña eñose't ñeñt o' etsotuerra te'. ²⁵ Añña ñeñt a'mtaye't Yompor po'ñoñ ahuatpa' ñeñfara samo'tsna'tar sepe't ama't sa. Atet Yompor a'pocatan ñoñets ahuat satañeshacoppa' añ ñeñfara ñoñets attecma a'pocataretta ñaña socop. Atet ñerra'm ahuat atet otan Yompor sato' Abraham: "Ñeñt puesheñarrof penrenño'tpa' norrtatanetcha' ñeñtcha' ama't allohuen pa'namen acheñenesha'pa' coshaprechetcha'." ²⁶ Yomporpa' o' orrtatonay Puechemer o' mueñonay ñeñfey judioneshay yanom. Allochñapa' ña o'ch coshaterrey nanac atet ñerra'm allempo o' co'tape'chaterrey e'ñe cohuen, ñaña allempoteñ o' yeque'chpa'huerr ñeñt ama pocteyaye Yomporcop.

4

Allempo anmet Pedro ñaña Juan allo'tsa'yen a'mcha'taretnesha'

¹ Allempoña serrpare'tatenanet Pedro epuet Juanpa' machayo'ta hua'cha'toña a'mcha'taretnesha'. O' huapa cornanesha', huapa ñaña guardia pa'mcha'tareter ñeñt cohuanpene' Parets pa'paquëll. O' huapoña ñaña saduceonesha' ñeñt otets e'ñe ñet pocta'pño'tpa' amach erro'tenot yetanterro. ² O' hua'cha'tetpa' čha e'moñe'toset, tarro'mar Pedro ñaña Juanpa' añ serrpare'tatenan acheñenesha' atto ñerra'm e'ñe yame'ñera Cristo ama't yerroma, yame'ñeño'tpa' yetanerrach. ³ Pa'tsrre'mueño'tetpa' o' armarettet epsheño'maret, abe'tarettet cárcelo. Allempopa' o' ellerren ñeñto'marña tsapatach a'p'to'tyesarettet erro'tenotte' serrpare'tenet atet. ⁴ Tarraña ama't atet a'parettetpa' añña ñeñt e'mue' atet serrpare'tatanetpa' shonte' ame'nyet. Allempoña ñeñt ame'ñetsa ahuaño'huenpa' o' čhap allempo amnaroch mil ñeñt ame'ñatsa.

⁵ Tsapañapa' o' ap'cha amcha'taretnesha' ama't ñaña ñeñt pompornesha' penet ama't ñaña ñeñt etsotene' ñoñets ñeñt atet anaret. Ñeñtpa' arr ap'chet e'ñe alla Jerusaléño. ⁶ Allempopa' allo'tsen ñaña cornesha' ñeñt nanac amcha'taret ñeñt pa'so'cheñ Anás. Allo'tsen ñaña Caifás, ñaña Juan, ñaña Alejandro ñaña po'poñe'chno amcha'taretnesha' ñeñt e'ñe pamo'tsna'tarecma cornesha' ñeñt nanac amcha'taret. ⁷ Allempoña e'ñe ap'cha'huetpa' huapachet Pedro ñaña Juan e'ñe all ap'chena amcha'taretnesha'. Allempoñapa' a'p'to'tarettet epsheño'maret. Atet otanet amcha'taret:

—Sapa' ¿esesho'tña po'huamencot o' sa'crraterña acheñ? ¿Esesho'tña sapuene'ña llesens atfo't atet sepena?

⁸ Allempoña Pedro e'ñe ahuamencat puepeño' Paret's Puecamquëña' atet otanet:

—Amcha'taret'neshacha' ñaña ñeñ'es pompornesha' penet, te'pa' o'ch notas: ⁹ Sapa' atto sa'p'to'teney errotene'tte' o' ye'pa ya cohuen añecop ñeñ't muero'chtetsa, ñaña atto sa'p'to'teney errotene'tte' o' ya'crrater; ¹⁰ ñehua, te'pa' o'ch se'mñoten atfo'ch neñotatas sa ama't ñaña allohuen israelnesho'. E'ñe añ Jesucristo ñeñ't nazareto'marnesha', ñeñ'tña ña po'huamencot te'pa' arr ten e'ñe huomech, ñeñ't ahuaña'cha echarrtena. Añ ñeñ'tara Jesús sañapa' chaña secorso'tam'pes atfo'ch rroma. Tarraña Pomporpa' o' tantater ama't rroma. ¹¹ Sapa' cha sottena atet ñerra'm acheñ ñeñ't tomatene' pocoll. Ñeñ'tña acheñ ñeñ't tomatene' pocollpa' cha huapore'tan mapue' ñeñ't nanac sherbets, tarro'mar ama es chapahueto pueyo'chro. Tarraña Jesús'pa' ama't atteñ ñerra'm mapue' ñeñ't ahua-pore'taret ñeñ'tara Jesús ñeñ'tña nanac sherbets atet ñerra'm mapue' alloch orratet pocoll nanac echarr. ¹² Po'psheñeña' ama eñalle alloch yequeshperra, tarro'mar ama eñalle po'psheñeñ ñeñ't anaret ñeñ'tcha' ye'chore't atfo'ch o'ch a'quesh'patey. Ama't ora erracmañen añe patsro ama eñalle atfo'ch yequeshperra, ñapñaña Jesús. Ñeñ'tpa' allohua atet otanet Pedro.

¹³ Añña Pedro ñaña Juanpa' ama puen'cha'nañoteye' eñoseto. Ama't mameshapa' ama mecha'teneto. Allempoña amcha'tare'te'chnopa' o' eñochet ama puen'cha'nañoteye' eñenetopa' ñetpa' atet otet:

—Errotenuaca'ye eñenetña atet. Yapa' yeñotenanet ñetpa' ama ay'chataretteto atfo'ch eñotet quelled huomenc. Ñetpa' atteta ñerra'm po'potantañ acheñenesha' ñeñ't ama tama es eñotetso. Errotenuañaca'ye eñenetña atet ñerra'm ay'chatarettet.

Allempoñapa' o' chapanet pueyo'chro atto Pedro ñaña Juanpa' ahuaña' chocma chopeñe'che't epuet Jesús. ¹⁴ Añña ñeñ't corrrer'sapa' ñapa'cho' e'ñe alla ten allame'tets. Ñeñ'to'marña amcha'taret'nesho'pa' ama errotene't che'ptare'taneto. ¹⁵ Allempoñapa' mueñerranet a'yenet. Allempoña amcha'taret'nesho'pa' serrpare'tatanna'tet e'ñe ñañeñeta. ¹⁶ Atet otanna'tyeset:

—Errotenuachñaca' ye'panetña te'te'. Ama't arr ora Jerusaléño'pa' o' e'ñe eñotuare'ttet atto ñetpa' orrtatet ñeñ't ama't yapa' ama yentare. Ñeñ'to'marña te' yapa' amach erroteno ya'nasochoña', e'ñe po'ño'ch atet. ¹⁷ Tarraña ama'tcha' ama erro't ye'panetopa' te'pa' añ poctetsa o'ch yeche'ptare'tyesanet o'ch yotanet amach allo'na serrpare'tnenetña ñeñ't atet pena Jesús. Tarro'mar yapa' ama yemno allohuen acheñenesha' o'ch e'mare'taretetuet ñeñ't atet penet te' ñet arr. O'ch yotanet ama't pueheñarra acheñ amach serrpare'tatatscheto.

¹⁸ Allempoñapa' alla agotare'tterret. Atet otare'ttapuerret e'ñe eche'charro, atet otet:

—Te'pa' amach seserrpare'tatatsto ñeñ't atet pena Jesús, ama't e'ñe mamesha. Ñaña amach sey'chatatsto ama't mamesha atet ye'chate't Jesús ahuaña.

¹⁹ Allempoña Pedro ñaña Juanpa' atet otanet:

—Ñehua, te'pa' o'ch soctape'ch sa, allotpa' o'ch sotey, erra'tsente' pocte' enten Yompor, ñato' o'ch yame'ñasa sa amapa' o'ch yame'ñya Yompor. ²⁰ Yapa' amach errotenot yemmo. Añña pocte' čhocmach ya'pota ñeñt' o' yentua ñaña ñeñt' o' ye'mua.

²¹ Allempoña' atfa che'ptare'tuapuenanet po'pocheño, allotña'pa' a'rroyare'ttenet. Amiča'taretnesha'pa' ama't mueneñetañ o'ch castiganetañpa' tarraña ama erroteno, tarro'mar allohuen acheñenesha'pa' e'ñe pocte' enteñet. Acheñenesha'pa' nanac aye'chočhtatoñet Yompor añecop ñeñt' o' entuet atfo Yompor orrtatanet po'partsoña. ²² Tarro'mar añ yacma ñeñt' o' correrrapa' ñapa' o' pa'tatsoch čharra' po'charña.

Ñeñt' ame'ñetsapa' atet pet allempo enamet Yompor po'huamenc

²³ Allempoña a'rroyeret Pedro ñaña Juanpa' ahuamuet allo'tsen ñeñt' parro ame'ñenet. Allempoña čhapuet allpa' serrpare'tatosanet atet atanet ñeñt' pa'miča'taretnesha' pen allohuen judionesha' po'cornaneshar ñaña ñeñt' pompornesha' penet. ²⁴ Allempoña serrpare'tatuosetpa' ñetña allohuenet parropa' o' ma'yocheret Yompor. Puema'yochetpa' atet otet:

—Yompore, ñeñte'p nanac Partso'p, p'a ñeñte'p ye'čcatue' enet ñaña ama't añ pats, ñaña ora erracmañen sa'p p'a ye'čcatue', ñaña ama't ora esocmañen ñeñt' yentyen e'ñe alla e'ñe p'ocma peye'čcatuar. ²⁵ Ahuat yatañ Davidpa' nanac sher'ba'pe't. E'ñe Pecamquēno' pe'ñorache't, ñeñto'mar atet ote't ña ahuat:

Errotenote' atsrre'muenaña po'poñ acheñenesha' ñeñt' ama ame'ñetso. Errotenote' o'pateñetña ama't Parets, ñeñtpa' e'ñe orrena atet penet.

²⁶ Ñeñt' amiča'tarettetsa arr patsro ñetpa' ap'čhet attoch o'pachet Yompor, o'pachet ñaña ñeñt' llesensa' ñeñt'ara Cristo. Añpa' allohua atet ote't David ahuat.

²⁷⁻²⁸ Alla ma'yochereterr Yompor, atet oterretterr:

—Ñeñto'marña te'pa' po'ñoč o' etsota atfo arr Jerusalēno o' ap'čhet attoch o'patonapet Pechemer Jesús ama't ñeñt' e'ñe cohuen Parets penten p'a, ñeñt'ña Jesús ñeñt' e'ñe cohuen pesherbaye't ñeñt' e'ñe p'o pellsensar. Atet ahuatoteñ e'ñe peñotuanete't ñetpa' o'ch etsotaternapet peñoñ atet ñerra'm Herodes, ñaña Poncio Pilato, ñaña po'poñe'čno acheñ ñeñt' ama ame'ñetso, ama't ñaña israelnesha'. Tarraña ñeñt' atet o'pachetpa' te'pa' o' etsotuerra peñoñ. ²⁹ Ama't te'pa' Yompore peñoteney ñetpa' nanac mueneñet o'ch yore'tame'tyet yaña. Te'pa' o'ch yenama'p ahuamencat pe'pa'yepa'ch ñeñtey torretsa p'ocop attoch amach yeniča'tatsto. E'ñepa'ch huomencocma yeserrpare'tona'p peñoñ. ³⁰ Porrtatonayepa'ch pehuamenc attoch corra'huerra ñeñt' atsna'tyets. E'ñe ye'čhore'teño' Jesús porrtatonayepa'ch departsoña, ñaña ñeñt' ama yentare porrtatanetcha' attoch e'ñochet p'apa' ñeñte'p nanac Partso'p— e'ñe ye'čhore'teño' Pechemer Jesús, ñeñt' e'ñe cohuen Parets penten p'a, ñeñt' e'ñe cohuen pesherbene'. Añpa' allohua atet ma'yochet.

³¹ Allempoña ma'yochuetpa' allña ap'čhenetpa' o' pella ora all anorr'čhenet. Allempocma allohuenetpa' o' chorraret Parets Puecamquēñ, attoch e'ñe huomencocma o'ch serrpare'toñet Yompor po'ñoñ.

Atto es apanna'tyesete't pame'ñeño'iet Yompor

³² Allempoteñña ñet ñeñtet ame'ñatsete'tpa' o' parrocmatuet e'ñe cohuen. E'ñe parra cotapñats anmuete't pueyoçhreto ñeñt amuerañtetsa. Ama eseshaye' otatsete ñeñt'pa' ñap'tetach es o'patet, añña çhocma apanna'tyesete't ñerra'm esesha' es palltatsete't. ³³ Jesús puellsensarnesha'pa' e'ñe po'huamencmañen a'potoñete't atto tanterra Yeparteshar Jesús. Yomporpa' nanac mueranete't, ñaña nanac ahuamencat panete't. ³⁴ E'ñe ñeshetopa' ama esesha' es palltatsete't. Añña ñeñt allpon echyesete't po'patseñ, amapa' pa'paquellpa' o'ch venda'yesete't. Ñeñtña allpon gana'yesete'tpa' o'ch huapachet ³⁵ allo'tsen allsensaret. Allo'tñapa' o'ch aposet ñeñt allsensaret. Allsensaretñapa' o'ch apa'yesan ñeñt es palltatsete't. ³⁶ Añpa' ñeñt atet pe't puesheñarr añ pa'so'cheñ José, ñeñt chipro'marnesha' ñaña ñeñtara levitana'tar. Añña ñeñt allsensaretnesha'pa' o' socheret José Bernabé. Añña so'chñets Bernabépa' ñeñt otets yeñoño amuerañana'tar. ³⁷ Ñaña'pa' echane't allpon pats. Allempoñapa' venda'huepa' o' huapatan allpon quelle ñeñt ganapa' o' aposan ñeñt allsensaretnesha'.

5

Atet pa Ananías epuet puetapor Safira

¹ Tarraña eñall po'psheñ ñeñt atet patsete't po'poñ, ñeñt'pa' añ pa'so'cheñ Ananías epuet puetapor ñeñt pa'so'cheñ Safira. Añña Ananíaspa' o' vendan allpon po'patseñpa' ² o' huapatan quelle, aposan ñeñt allsensaret. Tarraña ama oraye' huapatuano quelle çchach shequënet. Tarro'mar ñet epuet puetaporpa' atet a'pochtachet o'ch yoret allpon quelle e'ñe ñocpuet. ³ Allempoña aposan allsensaret ñeñt o' allponaña quellepa', Pedroñapa' atet och:

—Eso'mare't pemneñ oneñet o'ch cotape'chatap po'poñ peyoçhro. Papa' pemneñ o'ch peshquëñ ama't Parets Puecamquëñ atto papa' ahuo't peyorañ allpon quelle. ⁴ Ñeñt pepatseñpa' e'ñe po'ñoçh ñeñt'pa' po. Tarraña ñerra'm ama pa muenatsñe o'ch pevendeñpa' ñeñt'pa' e'ñe poctet. Ñaña ama'tcha' pevendeñpa' ñerra'm ama pa muenatsñe o'ch papyeñ ora allpon quelle ñeñt pagappa', ñeñt e'ñe poctet ñaña. ¿Errotenote'ña poctape'chña atet peyoçhro? Ama yapteye' pemnenñe o'ch peshca'yeñ, Yompore'naña pemneñeñ o'ch peshquëñ ñaña.

⁵ Allempoña Ananíaspa' ñeñta e'muapa' atacoroche' e'ñe allpa' o' rroma. Añña po'potantañ acheñenesha' allempo e'mare'chetpa' nanac yorenet huomenc. ⁶ Añña yacmanesha' ñeñt po'nare'pa' o' huapuetpa' ñeñt'pa' epatsete'chet ñeñt rromats o' anmet a'yo all pampueñeta'.

⁷ Tematenpa' o' huapa ñaña puetapor ñeñt rromats. Ñapa' ama eñoteñe o'te' rroma puerrollar. ⁸ Allempo huapa Pedroñapa' o' a'pto'tap:

—Ñehua, p'toten, çpo'ñoçhte' allpona quelle sagap allempo sevenda'hua sepatsen?

Puetaporñapa' atet och:

—Allponaca'ye quelle ñeñt yagap.

⁹ Pedroñapa' atet otererr:

—Tarraña sapa' ahuo't sa'pochtach epap perrollareñ atetcha' sepa. Cha't sotapañ ñato' o'ch seshquëñ ñaña ama't Parets Puecamquëñ. Pecue' o' be'toscha'tuerrmoch ñeñt o' pampa'huenna'pa' errete' perrollareñ. Papa'cho' attecmapa' anmapetcha' a'yo.

¹⁰ E'ñe allempocma puetaporpa'cho'ña o' t'aco'ra ña'ña e'ñe alla Pedresho, o' rroma ña'ña. Allempo be'toscha'tuerr ñeñt' anmue' puerrollareñ, allñapa' entuerrñañet puetaporpa'cho'ña o' rroma. Ñapa'cho'ña anmetpa' o' pampueñeta' a'yo epuet puerrollareñ. ¹¹ Atarr mecha'na'tet allohuenet ñeñt' pame'ñeñot' ap'chetsa, ama't allohuen ñeñt' e'mare'te'pa' cha yorenat nanac. Añpa' ñeñña allohua atet' pa Ananíasoñ.

Atto Jesús puellsensarnesha'pa' orrtatete't Yompor po'partsoña

¹² Añña ñeñt' Jesús puellsensarpa' nanac orrtatete't Yompor po'partsoña, ama't ñeñt' acheñenesha'pa' ama puentare attoch eñochet añmapa' Partsepa't. Añña ñeñt' parro ame'ñenetpa' arr ap'chenet all ochete't Salomón Popellrraro. ¹³ Po'potantañ acheñenesha' ama't e'ñe pocte' eñchete't ñeñt' ame'ñetsapa', allempoña ñet puen'chañotetpa' ama ap'cherreto parro. ¹⁴ Allempoñapa' allo'na atonetnena po'poñechno acheñenesha' ñeñt' o' ame'ña. Shonte' o' ame'ñana Yompor, ama't coyanesha'chno ña'ña yacmanesha'chno. ¹⁵ Añña ñeñt' atsna'tyetsapa' o' anmet a'yenet allecma chopeñe'chenet. Allñapa' o' ñanrra'tyesoset topantso, ña'ña puesheña'tetspa' ñato' ora po'maye'na. Tarro'mar anmare'tetyeset allecma chopeñe'chenet allochñapa' ñerra'm mache' huena Pedropa' esheccha' ama't pa'choyeshe'ma po'poma'mteñapa' chapcha' ñesheto, ñato' attotpa' o'ch correrret. ¹⁶ Ña'ña ama't allampaño't Jerusaléño'tpa' huapatoñ acheñenesha' atsnañe'f'chno ña'ña ama't ñeñt' chorrena oneñe'f'. Allochñapa' allohuenetpa' o'ch corra'huerret.

Allempo Pedro ña'ña Juanpa' abe'tarettet cárcelo

¹⁷ Allempoñapa' ñeñt' cornesha' ñeñt' nanac añcha'taretpa' e'moñe'tan allohuen ñeñt' ame'ñetsa. Ña'ña allohuen ñeñt' parro e'ñe attecmet cotape'chenet ñeñt' otenet saduceonesha'pa' o' e'moñe'chet ñeñt' ame'ñetsa. Tarro'mar sope'chapretenetña', acheñenesha'pa' e'ñe cohuen enteñet ñeñt' ame'ñetsa. ¹⁸ Allempoña allsensaretnesha'pa' rromueñetpa' o' abe'tarettet cárcelo e'ñe allecma abe'teñet acheñenesha'. ¹⁹ Tarraña ama't abe'tarettetpa' tsapoñapa' o' huapanet Yompor po'millaño'teñer ñeñt' huetsa pue'ntaño't o' toram'perranet, o' chapaterranet a'yenetpa' atet' otanet:

²⁰ —Añ poctetsa o'ch ahues Parets pa'paclopa' o'ch satomos all o'ch seserrpare'tach allohuen acheñenesha' ora atet' yocrrena etserra cohuen Partsocop.

²¹ Allempoña ñeñña e'mhuetpa' e'ñe ahua'tecma ahua'muenet Parets pa'paclo, o' be'toscha'toset, allña ye'chata'muenet.

Añña ñeñt' cornesha' ñeñt' nanac añcha'taretpa' o' chapam'uen ña'ña ellonet allotcha' agotatan añcha'taretnesha'. O'ch chapam'uen ña'ña allohuen ñeñt' cotene'. Allotcha' agotatan allohuen añcha'taretnesha' ñeñt' chocma a'pocatyene' ñoñets ñeñt' pompornesha' penet israelena'tarnesha'. O'ña cha'cha'tuetpa' o' serrpare'tatanna'tet attoch a'pocachet atetcha' pet. Allempoñapa' o' agotachet ñeñt' abe'tatenet cárcelo. ²² Tarraña allempoña chap' cárcelo ñeñt' mueñenetpa' ama es entosetoña cárcelo. O' puerrretpa' atet' otueret añcha'taretnesha':

²³ —Yapa' allempo ye'chap cárcelopa' o' yentos cárcel e'ñe poctacma echarr ayotam'psaret, ña'ña ñeñt' cohua'm'pene'pa' alla tom'chenet allot' be'tenet. Tarraña allempoña toretpa', o'ponoñapa' ama esesha' eñalle ama't puesheñarra.

²⁴ Allempoña ñeñña e'mua añcha'taretnesha' ñeññ po'cap'táner penet ñeññ colhuam'pene' Parets pa'paquëll ñaña ñeññ pa'm'cha'tareternesha' pen allohuen judionesha' po'cornanesharpa' ñetñapa' atet otet:

—Esocopte'ca'ye o' cha'nmaçhenette'. Te'pa' errotuanencha' pette' tsapatonet.

²⁵ Allempoñapa' huapa puesheñarr atet otosanet:

—Añña ñeññ sabe'tat ellerro cárcelopa' te'ñapa' alla tomçhenet Parets pa'paclo yeçhatetset all.

²⁶ Allempoña añña capitán ñaña ñeññcha' yempue'pa' o' ahuanmuet allo'tsen allsensaretnesha'. O'ña çhapuetpa' o' ahuenaneta' e'ñe cohue-nacma. Tarraña ama errot paneto tarro'mar capitánpa' çha mecha'tenan acheñenesha'. Ñato' çho'te' rrolle'chet. ²⁷ O'ña çhapaterranetpa' nosanet e'ñe allo'tsa'yen ñeññ çhocma a'pocatyene' ñoñets. Añña cornesha' ñeññ nanac añcha'taretpa' atet otanet:

²⁸ —Ahuañapa' ama't e'ñe eche'çharro yotuas amach seserrpare'taterrerro ñeññ pocap'ña Jesús. Tarraña sapa' ahuo't alla seserrpare'tatuerrerr ñeññ so socap'ña. Ama't allohuen ñeññ yeçhetsa arr Jerusaléno o' alla seserrpare'tatuererr. Te'ñapa' allo' seyohuerryerr ahuo' yemtsach añ Jesús.

²⁹ Allempoñapa' otanet Pedro ñaña ñeññ epuet, ñetñapa' atet ochet:

—Añña e'ñe pocte' amach acheña yame'ño, añña Yomporcha'ña yame'ña. ³⁰ Sapa' o' sepata'pes Jesús tsacho attoña o' semtsatach. Tarraña Pomporpa' ña tantaterre'. Añpa' ñeññara Yompor ñeññ Po'yomporer pete't ñaña ahuat yatañneshañ. ³¹ Te'ña Pomporpa' o' nanac ahuamencat pe', e'ñe po'cohuenrotpa' all partsoten. Allochñapa' attoch cotape'chaterran israelena'tarnesha' ñaña attoch cotape'cherret cohuen e'ñe etserra attoch peretnerranet po'chñar. Ñeñño'marña Yomporpa' nan Jesús ñeññcha' Ya'queshpatañer yepen. ³² Ñeñño'marña te'ña yapa' ya'poteññañ atet pena Yompor. Yompor Puecamquëñpa'çho'ña ñeññ eñotatets. Ñeññara Puecamquëñ ñeññ nennay yeyoçhro, allohueney ñeññey ame'ñenaya ña. Añpa' allohua atet otanet Pedro.

³³ Allempoña ñeñña e'mhuet ñeññ atet ot Pedropa' añña añcha'taretnesha' nanac atsrre'matanet, atarr mueneñetañ ahuo'ch muetsuet ñeññ allsensaretnesha'. ³⁴ Allempoñapa' añña puesheñarr fariseo ñeññ e'ñe parro a'pocatyene' ñoñetspa' o' tomos attoch eños. Ñeññ tomosetspa' añ pa'so'cheñ Gamaliel, ñapa' ña ñeññ yeçhatets ñoñets ñeññ atet anaret, tarro'mar ñeññ po'taruas pen. Ña allohuen acheñenesha'pa' e'ñe cohuen enteñet. Gamalielñapa' o' mueñatuerran allsensaretnesha' mame' a'yenet. ³⁵ Ñeññ epuet cotape'chatannenetpa' atet otanet:

—Masheñe israelneshacha' o'ch notas: E'ñeç cohuenacma ya'pocatch ñeññ atetcha' yeñanet. ³⁶ Sapa' ama't seyerpueñoña atto ahuaña o' orrta puesheñarr ñeññ pa'so'cheñ Teudas. Ñapa' atarr muene't o'ch ayochreshatta. Shonto' acheñenesha' ñato' allo'tseno'te' cuatrocientos ñeññ ame'ñata. Allempoñapa' allponmaterrerrpa' o' muetsset. Ñeññña pueyochresha'pa' o' ahuanomyerret ñopa'ttsoçmuet. Allempoñapa' o'huañ es cotape'chet. ³⁷ Allempoña allponmaterrerrpa' orrta ñaña po'psheñeñ ñeññ pa'so'cheñ Judas ñeññ galileo'marnesha'. Ñapa' tarrempo orrta allempo quellcatyenet pa'so'chñeçhno añcha'taretesho.

Ñapa'cho'ña tama yochresha'tana allpon acheñenesha'. Allponmater-
rerrpa' ñapa'cho'ña o' chenca. Añña ñeñt' pueyochresha'pa' o' par-
ratse'tuerret. ³⁸ Ñeñto'marña te'pa' o'ch notas, o'ch sa'rroyer ñeñt' ser-
rpare'tene' ñeñt' atet pena Jesús. Amach errot sepatstaneto, tarro'mar
ñerra'm e'ñe ño'oteta poctapño' atet penetpa' ñeñt'pa' mameshapa'
o'ch huañerr. ³⁹ Tarraña ñerra'm poctapñetpa' Yomporeshot huenapa'
amach errotent' sehuapore'tache. Ñato' sapa' cha se'moñe'teññañ ama't
Yompor poctapña. Añpa' ñeñt' atet otan Gamaliel amcha'taretnesha'.

⁴⁰ Atet cotape'chatanet Gamalielpa' e'ñe pocte' eñchet. Allempoñapa' alla agotaterran allsensaretnesha'. Allempoña huacherretpa' o' nalle'tatanet amcha'taretnesha'. O' nalle'tatuanet amcha'taretnesha'pa' allotñapa' otarettet ñaña e'ñe eche'charro:

—Te'pa' amach seserrpare'tatsterrero ñeñt' atet pena Jesús. Allempoñapa' a'rroyarettenet. ⁴¹ Allempoñapa' o' ahuanenet, o' sa'neñet ñeñt' chocma a'poctatyene' ñoñets. E'ñe pocsheñeshocmañen ahuanenet tarro'mar Yompor e'ñe pocte' entanet ñeñto'mar muenatanet o'ch muerochtet ñocop. ⁴² Allempoteñ pate'tets yetpa' chocmach ye'chatete't Parets pa'paclo ama't ñaña e'ñe alla pa'pacleto. Nanac serrpare'tete't atto Jesús pa' ña Cristotats.

6

Arrpa' allempo net cancherrsheña ñeñt'cha' epatyeshahuet rreñets

¹ Allempoteñña' allo'na sen atonetnomtsa ñeñt' ame'ñetsa. Tarraña e'ñe allempopa' o' sope'channa'tet. Ñehua, tarro'mar allempopa' atet pete't. Pate'tets yet Jesús pueyochresha'pa' o'ch apa'yesan allohuen rretornanesha' rreñets ñeñt' pallta'yesatse't rreñets. Ñeñt' e'muene' griega'chpa' ñetpa' atet otyeset:

—Ñeñt' yamo'ts rretornanesha'pa' ñetpa' ama allponeshacmaye' rreñets agapueto allpon agapyes ñeñt' e'muene' hebreyach. Yamo'ts rretornanesha'pa' coñe'ta agapyeset. Ñeñt'ña rretornanesha' ñeñt' e'muene' hebreyachpa' shonte' rreñets agapyeset. Attoña sope'channa'tet. ² Allempoñapa' ñeñt' charrasheña puechena epa ñeñt'ara Jesús puellsensarpa' ñetñapa' agotatueto allohuen ñeñt' ame'ñetsa. O'ña apcha'huetpa' atet otarettapuet:

—Yapa' ama tama pocteye' yenteñe ama't mameshapa' o'ch ya'rroya serrpare'te' Yompor po'ñoñ. Shonte' yet ya'pertaten attoch yapa'yes allohuen rretornanesha' rreñets. ³ Añña pocte' masheñeshacha', o'ch se'ñ cancherrsheña ñeñt'ara ñeñt'ey ame'ñetsa arr parro —erra'tsente' cohuen acheñ senten ñaña ñeñt' chorrena Parets Puecamquëñ ñaña ñeñt' atarr eñotene' ñeñt' cohuentetsa Yomporcop. Añ ñeñt'ara cancherrsheña ñeñt'cha' po'taruas pet attoch epatyese't ñeñt' pallta'yetsa rreñets. ⁴ Allochñapa' yapa' añach yema'yo'chra ma'yochatsa ñaña o'ch ya'potoñ Yompor po'ñoñ. Ñeñt'ach paterr yetorrena. Atet otanet Jesús pueyochresha'.

⁵ Allempoña acheñenesha'pa' e'ñe pocte' eñchet allohuenet. Allempoñapa' o' neñet Esteban ñeñt' nanac ame'ñetsa ñeñt' e'ñe chorrena Parets Puecamquëñ. Allotpa' neñet ñaña Felipe, ñaña Prócoro ñaña Nicanor ñaña Timón ñaña Parmenas ñaña Nicolás ñeñt' antioquio'marnesha'

ñeñt ahuatoteñ ame'ñate't judionesha'. ⁶ Añña ñeñt cancherrsheña acheñpa' o' ahuapatarette't allo'tsen Jesús puellsensarnesha'. Añña allsensaretnesha'pa' allenta ma'yocham'pesyet, o' net pot ñesheto, atet otarette't ñeñt'cha' po'taruas pet.

⁷ Allempoñapa' o' e'ñe epa'hua Yompor po'ñoñ ora. Allempoñapa' allo'na sen shonta'nmatsa ñeñt ame'ñetsa all Jerusaléño. Allempopa' shonte' judionesha' po'cornaneshar ame'ñatsa.

Allempo rromuet Esteban

⁸ Añña Estebanpa' Yompor pomuereño'tpa' nanac amuerañta. E'ñe Parets po'huamenco'tpa' orrtatanet ñeñt ama puentareto atto eñochet añmapa' po'ñoñ Parets po'huamenco't orrtena. ⁹ Allempoñapa' puesheña'tets judionesha' o' achmeñet Esteban po'ñoñ. Añña judionesha' ñeñtara oteñet libertinanesha'. Ñetñapa' alla apchenet po'prahuo. Ñaña po'potantañ judionesha' ñeñt huetsa Cireneo't ñaña Alejandrío't ñaña Cilicio't ñaña Asio'tpa'—ora allohuenetpa' e'ñe parrocmachm'are'toñet Esteban po'ñoñ. ¹⁰ Tarraña Estebanpa' nanac es eñot atto serrpare'ten. Ñetpa' ama erro'teno't anapeto. Estebanpa' añ chorraye't Parets Puecamquëñ, ñeñto'marña ama erro'teno't anapete'te. ¹¹ Allempoñapa' tsa'chet po'potantañ acheñ añecop attoch toma'tatoñet Esteban po'ñoñ. Ñeñt atsa'tare'tpa' atet otet:

—Yapa' o' ye'm Esteban añ achm'are'ten Moisés po'ñoñ ama't ñaña Yomporpa' achmeñ. Atet toma'tatoñet Esteban po'ñoñ.

¹² Allempoña acheñenesha' atet e'muetpa' o' e'moñe'chet Esteban. O' huapa ñeñt pompornesha' pen judionesha', huapa ñaña ñeñt et-sotene' Moisés po'ñoñ. Huapapa' o' rromueñeta' Esteban o' anmet am'cha'tare'tneshesho allecma a'poc'tatenet ñoñets. ¹³ Chapuet allpa' alla toma'tatuerrñañeterr Esteban po'ñoñ, atet otoset:

—Añ Estebanpa' chocma achm'are'tenan Parets pa'paquëll ñaña chocma achm'are'tenan Moisés po'ñoñ.

¹⁴ Alla oterre'terr ñeñt atsa'taret:

—Yapa' o' ye'm Esteban atet oten añ Jesús ñeñt nazareto'marnesha'pa' o'ch a'matan'psey Parets pa'paquëllpa' o'ch huapore'tatonay atet ye'chatye't Moisés.

¹⁵ Allempoñapa' allohuenet ñeñt allo'tsa'yen o' cohuanrrorchet Esteban. Tarraña o' eñchet e'ñe cohuen orrtena pa'clloyot atet orrtena ñerra'mrrate' Yompor po'mllaño'feñer ñeñt huetsa entot.

7

Atto Estebanpa' serrpare'tatan am'cha'tare'tnesha'

¹ Allempoñapa' añña cornesha' ñeñt nanac am'cha'tare'tpa' a'p'to'tan Esteban, atet och:

—¿Po'ño'cha't atet?

² Estebanñapa' atet och:

—Ñehua, masheñeshacha' allohuenes nomporneshacha' o'ch se'mñoten, o'ch notas ñeñt atet pa'yese't ahuat yatañneshañ. Ahuatpa' Yompor ñeñt nanac Paretspa' orrtane't yatañ Abraham all anetso Mesopotamia. Allempopa' ama chena' Haráno allcha' ye'cherra.

³ Allempo orrtana Abrahampa' atet och ñeñt'cha' atet pa: “Te'pa' o'ch ahuep' arro't o'ch pesa'nom añ peney, o'ch pesa'ne'm ñaña

řamo'tsesha', o'ch ahueř allcha' notař." Ateř och Yompor, atetřo' řa yatañ Abraham. ⁴ Allempoñapa' a'ypo'ña'nman all yeche't all yečhanate't ñaña caldeo'marnesha' atto čhap allo'tsen anets Harán all yečherra. Allempo o' rroma pomporeña'pa' Yomporpa' o' alla anererr arma Canaáno all yeyčhena ya te'. ⁵ Tarraña allempo čhap arr ahuatpa' Yomporpa' ama apueña' añ pats, ama't coñe'ta. Tarraña Yomporpa' ahuo't och esempohuañen o'ch ař añ pats, e'ñe ñocop, ama't puechemerecop, ñaña po'mrenñecop. Tarraña allempopa' yatañ Abrahampa' ama chemere'tena'. ⁶ Allempocma Yomporpa' o' eñotatan Abraham attoch esempo po'mreneña'pa' ahuanmuetcha' arroř, čhapuetcha' po'poñ anetso Egipto all ama pa'nyempañooyaye, allcha' yeča'huerret, allña'pa' mueročhtatapanelcha' allo'marnesha' aheñ. Ñaña añ eñotatan Abraham attoch ataruasatarettach e'ñe atta po'mreneñ, e'ñe cuatrocientos char amueročhtatarettet. ⁷ Tarraña Yomporpa' o' eñotatan Abraham ñaña po'poñ. Ahuo't och Yompor: "Tarraña napa' netsa'taterach ñeñča' mueročhtate' pemreneñ. Allempoñapa' huačherretcha' alla arr Canaáno allcha' ma'yocherrnet." ⁸ Ñaña allempo Yomporpa' ahuo't otan Abraham po'poñ ñeñča' atet yeča' judionesha' allempoteñ errponohuañen, attoch eñochet Yomporpa' ama pueno po'ñoñ. Añmapa' ñeñč atet otan Abraham: "Añ pocte' o'ch setorre allohuen asheñorrořollesha'." Ñeñto'mar allempo chemere't Abrahampa' puechemeretoll ñeñč soch Isaacpa' ahuo't tsorreñ. Po'psocmatño'pa' o' tsorre. Isaacña'pa' allempo o' po'npa' o' chemere'tana Jacob. Jacobña'pa' chemere'tana čharrasheña puechena epa ñeñčara yatañneshañ yepen ya ñeñčey israelena'tarey.

⁹ Tarraña allempopa' añña ñeñč yatañneshañ yepenpa' o' sope'cheñet pa'mo'nasheñ José. Ñeñto'marña o' pomet pa'mo'nasheñ. Ñeñčña agapue'pa' o' aneñ řačhayo all anets Egipto. ¹⁰ Tarraña Yompor ña a'nataya. Yomporpa' o' a'pocatuoñ ora allohuen atto mueročhtachete't. Añña ñeñč añča'tarettatse't Egiptopa' e'ñe cohuen entane't José. Añ ñeñč añča'tarettatse't Egipto ñeñčpa' oteñet Faraón. Faraónpa' eñotan José ñapa' nanac es eñoten. Ñeñto'mar añča'tareř Faraónpa' o' nan José ñeñčča' añča'tarettapretaya all Egipto. Ñaña ora allpon ñeñč taruaset Faraón pa'paclo'marpa' o' nan José ñeñčča' yečenahuet.

¹¹ Allempoñapa' orra muečheñets. Ora allohuen egipto'marnesha' nanac cheporrare'tet. Ñaña ora allohuen canaáno'marnesha'pa'čo'ña nanac cheporrare'tet. Pa'chporrñořetpa' nanac mueročhtete't. Yatañneshañpa' ama echete'te pocrramet ama't coñe'ta. ¹² Allempoñapa' yatañ Jacobpa' o' e'mare'tan orameñ rreñets Egipto. Ñeñto'marña mueñan puechemeresha' ñeñčara yatañneshañ yepen ya. Ñetpa' o' ahuanmuet Egipto o'ch rañčeneta' rreñets. ¹³ Rañča'hueneta' rreñetspa' o' puerračherret. Atomatpa' o' huañaperret pocrrañpa' o' alla ahuanerretterr Egipto. Allempoña čhačherretterr Egipto pa'mo'nasheñet Josépa' atet otanet ñapa' ñaña pa'mo'nasheñ penet. Allempoñapa' o' cheme'chet pa'mo'nasheñ José. Pa'mo'nasheñña'pa' o' anmanet añča'taretesho attoch cheme'tatanet. ¹⁴ Cheme'tatuanetpa' allempoña Josépa' o' mueñerranet pa'nyeto añecop attoch ereta' pompor Jacob ñaña allohuen pamo'tsesha', atet ot José: "Onetepa' allohuenet Egipto." Ñeñto'marña allohuen cančhroř čhara' puechena amnaršheña

pamo'tsesha' ñetñapa' ahuanmuet Egipto allo'tsen José. ¹⁵ Allempoñapa' čhača'tet Egipto. O' met allpon charpa' o' rroma yatañ Jacoboñ all Egipto. Meterrerr allpon charpa' o' colla'hua ñaña puechemerashañ ñeñtara yatañeshañ yepen. Colla'huetpa' alla apamparetter all Egipto. ¹⁶ Ñehua, meterrerr allpon charpa' o' ahuanmaretterret puenpa'ts anetso Sicmo allcha' apamparetterret ello puenpa'ts. All apamparetterretpa' ñeñtpa' ñeñtara pats ñeñt o' rañta'hua Abrahamañ ahuat. Añña patspa' ñeñto' vendoñ Hamor puechemerashañ ahuat all Sicmo.

¹⁷ Alla otterraneterr Esteban, atet ot:

—Allponerrerr charpa' čhappoch allempo o'ch etsota atet Yomporpa' otane't ahuat Abraham allempo huomenc nane't po'ñoñ. Ñetpa' allempo nanac merete't all Egipto. ¹⁸ Atteñapa' o' met shonte' charpa' o' or-rta po'poñ añcha'taret Egipto ñeñt ama puentarano José, tarro'mar Josépa' ahuatoteñ o' rroma. ¹⁹ Añña añcha'taretpa' nanac muerochtatyesonay yatañeshañ. O' nanet ñoñets attoch pamo'mtayetpa' o'ch a'ypo'ñet puechemeretoll a'yo. Añecpo'ch atet peñet attoch muetsatatchet puechemeretoll. Allochñapa' amach nanac mereto. ²⁰ E'ñe allempopa' o' eñalleta Moisés tarraña Yomporpa' e'ñe cohuen entane't Moisés. Pamo'mte'pa' e'ñe a'nahua cohue' ma'pñia arrorr all pa'paclo. ²¹ Allempoñapa' o' čhap allempo amach erroteno cohueñeto pa'paclo a'nahua. Allempopa' a'ypo'ñet a'yenet. Añña añcha'taret Faraón po'señpa' ahuo' huapa' all ñeñet ahuo' entos, nanac amuerochen eñch, allenta aner attoch ñañrecha. Atteñapa' o' atarrtach pa'paclo atet ñerra'm puechoyer e'ñe ño. ²² Ñeñto'marña Moiséspa' ayčhataretta ora allpon ñeñt atet eñotyese't egipto'marnesha'. Nanac eñotañte't ñerra'm allempo eñose't, nanac eñotañte't ñerra'm allempo es pa'yese't.

²³ Allempo čhap pa'tatsoch čharra' po'charña Moiséspa' nanac yepane't pamo'tsesha' ñeñtara israelena'tarnesha'. Atarr seche't o'ch abchenaneta'. Allempoña parrochpa' o' ahuo' allo'tsa'yen pamo'tsesha'. ²⁴ O'ña čhap allpa' all entosan puešeñarr egipto'marnesha' nanac coñchatenan puešeñarr israelena'tar. Ñañaapa' o' moñsosana pamo'ts. O' čhote huomencpa' čha rroma. Atto chemnatanaña pamo'ts. ²⁵ Añña Moiséspa' otapañ pamo'tsesha'pa' e'ñech cohuen entapet. Otapañ o'te' eñochet Yompor mueñe' attoch a'queshpatan pamo'tsesha'. Tarraña ñetpa' ama eseshaye' pocte' entaye. ²⁶ Tarro'mar tsapatñapa' alla ahuenerr, allempopa' o' entuenanerr epsheña pamo'tsesha' čho' orrotenet e'ñe ñañeñeta. Ñañaapa' mueneñ o'ch amo'tstaterranet, atet otanet: “Esuañaca' masheñeshacha' sottenña arr. Añña pocte' e'ñech semo'nasheñ sepannena.” ²⁷ Ñeñt chetene' pamo'tspa' o' a'mchech Moiséspa' ñañaapa' atet ot: “Esesha'huañaca' penene'ña pa' añcha'taret arr yocop. Esesha'huañaca' potene' o'ch pa'tsre'močta arr. ²⁸ Ñato' añte' pemnen o'ch pemtsan naña atet pepe' muetse' egipto'marnesha' ellerro.” ²⁹ Allempoña o' e'man añ ñoñets Moisésñapa' o' yeta pueñchañot. O' ahuo' a'yo allo'tsen pats pa'so'cheñ Madián. O' yeča'huerra allapa'. Allñaapa' all sena'tapa' o' chemere't epsheña.

³⁰ O' alla otterraneterr Esteban, atet ot:

—Allempoñapa' o' meterrerr pa'tatsoch čharra' char. Parrochpa' amarato'tsen Moisés allame'tets aspeno Sinaíño. Allñaapa' entosan tsachmatoll all ñoña huorten. E'ñe huortot tso'pa' allo't orrtoña Parets

po'mllañoñeñer. ³¹ Ñeñt entos Moiséspa' atet ot: "¿Esté' huortetsña tarro?" E'ñe çhapatsa allame'tets o'ch enteña'pa' o' e'man ñoñets. Partsepa't eñets, atet och: ³² "Napa' ñeñten Po'yomporer pen ama't patañneshañ ñeñfara Abraham ñaña Isaac ñaña Jacob." Moiséspa' çha yoren. Puenchañoïpa' ama cohuanu huorte'. ³³ Yomporñapa' atet otererr: "Pencha'na'teñoïpa' perrote't pesapat tarro'mar all pãtenpa' ñeñtpa'cho' nanac Parets tarro'mar allo'tsenen na." ³⁴ O' alla otererr Yompor: "Napa' nenteñ atto mueroçhtatennanet ñeñt nechemerasha' nepen ñeñfara israelena'tar. Napa' ne'muenanet atet yahuanrrortenet. Ñeñto'marña te'pa' o' nohuapa o'ch na'queshpãtanet. Te'ñapa' o'ch nemñaþ þa Egipto." Añpa' ñeñfa atet otan Yompor Moisés.

³⁵ 'Añña Yompor po'mllañoñeñer ñeñt orrtetsa all huorten tsachmopa' ñeñña eñotate' Moisés atet muenen Yompor. Ñeñto'mar yeñoteñ Yomporpa' ahuo't llesensan Moisés o' alla mueñer pamo'tseshesho ñeñtcha' añcha'tarettatsa ñocpuet ñaña ñeñtcha' a'queshpãtahuuet allo't amueroçhtatarettete't. Añ ñeñfara Moisés ñeñt ama pocteye' ento ahuaña pamo'ts ñeñt otet ahuaña: "Esesha'huañaca' penene' þa añcha'tare't arr yocop. Esesha'huañaca' þotene' o'ch þa'tsrre'moçhta arr." ³⁶ Añ ñeñfara Moisés ñeñt anerrahuet Egipto. Ñeñfara Moiséspa' orrtatanet ñeñt ama puentareto all Egipto. Ñaña sa'pot ñeñt Tsasasen all orrtatanet ñeñt ama puentareto, atto eñotatanet añmapa' ñeñt atet pena Parets. Ñaña all chopeñe'chen amarato'mar pa'tatsoch çharra' char Moiséspa' all orrtatyesanet ñeñt ama puentareto. Añpa' ñeñt eñotatanet atet penaña Parets. ³⁷ Añ ñeñfara Moisés ahuatpa' o' otan israelnesh'a' atet: "Yomporpa' orrtaterrnascha' puesheñarr ñeñtcha' a'mterre' Parets po'ñoñ, ñeñfara ñeñt e'ñe samo'ts sepen e'ñech attecma orrtaterr e'ñe atet orrtatenen naña. Ñeñtcha'ña çhocma se'mñoterrña sa." ³⁸ Ama't allempo yatañneshañ chopeñe'çhete't amaratareropa' añña Moisés allo'tseneta parro ama't allpa' çhocmach apçhete't Yomporcop. Ñapa' allo'tsena aspeno Sinaíþno allempo orrtoña Yompor po'mllañoñeñer ñeñt eñorana'taya ñaña o' yeçhach ñoñets alloch e'ñe yocrra Partsocop. Ñeñña ñoñets allempo puerrerra Moisés aspentotpa' o' yeçhatuerran ñaña pamo'tsesha'.

³⁹ 'Tarraña ama't atet pe't Moiséspa' yatañneshañpa' ama muenete'te o'ch ame'ñyet Moisés. Ama eseshaye' pocteye' entaye'te. E'ñe pueyoçhretopa' atarro' muenete't o'ch alla puerrerrret Egipto. ⁴⁰ Ama't allempo aspeno'tsen Moiséspa' yatañneshañpa' atet otoñet pa'mo'nasheñ Aarón: "Te'pa' o'ch peyeçcatonay ñeñtcha' yeyoser yeperr ñeñtcha' yanerre' alla Egipto. Añ Moisés ñeñt yanmue' Egiptotpa' yapa' ama yeñoteñe, ta', çerrate' o' ahuo'?" ⁴¹ Allempoñapa' o' yeçcatanet ñeñt atet ñerra'mrrate' añ ayeçcataret oro. O' muetset carrnero o' neññañeta' e'ñe ñesho. Nanac cohuen entet ñeñt yeçcatet e'ñe potot. ⁴² Allempoña Yomporpa' o' a'ypo'ña'nmanet, o' muenatanet attoch muechatset ñeñt yeçhoyo'tamþene' ama't arrorr ñaña ranto. O' pet atet quellquë't ñeñt a'mtaye't Yompor po'ñoñ ahua't. Añmapa' ñeñt quellquë't ahua't, atet ñerra'm Yompor otets:

Napa' o'ch notas israelena'tarneshacha', ama't o' semtsa carrnero, amapa' huaquësh, tarraña ama nocpaye' semtso, ñeñtpa' ama

neshoje' sehuapache. Ama't ora añ pa'tatsoch çharra' char all sechopeñe'chen amaratarero atet es sepa'yen.

⁴³ Añ seyomporer sepen po'poñ, ñeñt ayeçcataret ñeñt soten allo' yeçhena seyoser ñeñt sesochen Moloc. Amapa' atet ñerra'm ayeçcataret rantoma't ñeñt soten añmapa' seyosro' ñeñt sesochen ñaña Refán. Shonte' ayeçcatareteçhno ñeñt seconcorpana'tena. Ñeñto'marña te'pa' o'ch nemñas nanac allapar, all Babilonio. Añpa' allohua ñeñt atet quellquë't ahuat ñeñt a'ntaye't Yompor po'ñoñ.

⁴⁴ O' alla oterraneterr Esteban, atet ot:

—Ahuat yatañneshañpa' allempo chopeñe'chete't amaratareropa' anmuete't pocoll shetamtsopo' allecma apçhete't Yomporecop. O'ponopa' all nete't mapuettall allo' aquellcare't ñoñets ñeñt poctetsa Yomporecop. Añ pocoll shetamtsopo' Moiséspa' ña yeçcataye't e'ñe atet oche't Yompor po'millañoñeñer e'ñe atet gache't Yompor. ⁴⁵ Allempo rromanom Moisés puechope'chpayopa' o' na'nmet Josué ñeñtcha' anmue' yatañneshañ. Apa'nmet ñaña shetamtsopo' ñeñtñapa' çhapachet allo'tseno' pats ñeñt otanete't Yompor ahuatoteñ o'ch apanet. Po'poñ acheñneshas' ñeñt yeçhetsa allpa' Yomporpa' o' muevo'tuerranet attoch yatañneshañpa' o'ch yeçha'huerret all. Allempopa' o' çhapatet all shetamtsopo' allecma apçhenet Yomporecop. Shetamtsopahuopa' allecma apçhete't tarremphua allempo orra David. ⁴⁶ Allempo orra Davidpa' ñapa' e'ñe cohuen enteñ Yompor. Ñañapa' o' enaman Yompor pocte'te' enteñ o'ch yeçcatoñ pa'paquëll ñeñt e'ñe cohuen echarr. Mueneñ o'ch yeçcatan Yompor pa'paquëll, ñeñtara Po'yomporer pe't ñaña pa'tañ Jacoboñ. ⁴⁷ Tarraña ama't mueneñeñ ñapa' Yomporpa' ama mueno. Añña muenatoñ puechemer Salomón, ñach tomate' pa'paquëll. ⁴⁸ Tarraña Ñeñt nanac Paretspa' ama yeçheno pocollo ñeñt yeyeçcaten ya, arromñañey. Ama't atet ote't ñeñt a'ntaye't Yompor po'ñoñ, atet ñerra'm Yompor eñets, atet oten:

⁴⁹ Napa' nanac Partson. Napa' nenten enet atet ñerra'm neconañ, patsñapa' nenteñ atet ñerra'm allcha' nenen netac. Errotenohuachñaca' seyeçcatonña pocoll allcha' neyçha. Ama nepallteno allcha' neyçha, atet oten Yompor.

⁵⁰ Napa' nehuamenco't neyeçcatua ora allohuen ñeñt sentyen. Añpa' allohua atet ot Yompor.

⁵¹ Alla oterraneterr Esteban:

—Sapa' nanac se'charrtena, seyoçhropa' ama soçtape'cheno atet ñerra'm Yomporena'tares. Ama semno o'ch se'mñotoñ Yompor po'ñoñ. Chocma satpare'teññañ Parets Puecamquëñ. Atet pe't satañneshañ ahuat te'pa' atetçho' sepena saña. ⁵² Ama't allohuen ñeñt a'ntaye't Yompor po'ñoñ ahuat satañneshaññapa' çha mueroçhtatyesanete't. Ama't ahuat allempo ama orrtena' Jesúsapa' ñeñt a'potaye't atto esempohuañen o'ch huapa Cristo ñeñt e'ñe pocte' es pets, ñeñtpa'çho'ña satañneshañpa' çha muetse. Te'pa'çho'ña añ Cristo ñeñt e'ñe pocte' es petspa' ahuo' seponñ saña attoch semtsach.

⁵³ Alla oterraneterr Esteban:

—Ama't Parets po'millañoñeñer ñeñt señotate' ñeñt poctetsa Yomporecop sañapa' satpare'toñ Yompor po'ñoñ. Añmapa' allohua ñeñt atet serrpare'tatanet Esteban.

Allempo muetset Esteban

⁵⁴ Allempoña ñeñña e'mhuet atet ot Estebanpa' nanac atsrre'matanet. Pa'tsrre'mueñoŕetpa' čha rraso'tyeset pa's. ⁵⁵ Allempo Estebanpa' e'ñe chorreña Parets Puecamquēñ. Ñaña'pa' o' cohua' ononet, allña'pa' all entan Yompor po'cohuenña. Entan Jesús e'ñe po'partsoteñoŕ all ten Pompor po'cohuenroŕ. ⁵⁶ Allempoña'pa' otterrerr Esteban:

—Napa' o' nent enet atorareŕ. O' nent ña'ña allo'tsen Ñeññ Acheñetosets, po'partsoteñoŕpa' all ten Parets po'cohuenroŕ.

⁵⁷ Acheñenesha'ña pa'tsrre'mueñoŕetpa' rranare'tet. Puer-ranare'teñoŕetpa' mopaqueta'tyeset, o' matra'tet ñesho attoch o'ch rromuet. ⁵⁸ O' rromuetpa' o' anmet a'yenet all ama eñalle pocoll allcha' rrolle'chet. Ñeññcha' rrolle'te'pa' o' rrottra'tyeset pa'shtam, o' na'yestet e'ñe allo'tsen puesheñarr yacma ñeññ huepueshameñ ñeññ pa'so'cheñ Saulo. ⁵⁹ Allempoña'pa' rrolle'chet. Rrolle'chetpa' Estebanña'pa' o' ma'yochapa', atet ot:

—Nepartseshare Jesús, pagaponcha' necamquēñ.

⁶⁰ Allempoña'pa' concorpa. Concorpapa' eñora huomenc, atet ot:

—Amach Nepartseshare petsa'tatatstaneto.

Allempoña'pa' ñeñña otuapa' o' muechecha, o' rroma.

8

Allempo Saulopa' nanac mueneñ ahuo'ch a'cclatuan ñeññ ame'ñetsa

¹⁻² Allempopa' añña Saulopa'* e'ñe pocte' eñch muetsetepa' Esteban.

Añña puesheña'tets ñeññ nanac ame'ñenaya Yomporpa' puel-lquēñeshetpa' o' huapuet, o'ch eñeta' arromñat attoch pampueñeta'. Nanac ya'na'teñet Estebanañ. Allempoteñ nanac mueročhtachete't ñeññ pame'ñeñoŕet Cristopa' apčhete't Jerusaléño. Ñeñño'marña shonte' acheñenesha' ñeññ yetrra'tatsa po'poñ añetso'mar. O' parratse'tuet allemeña—Judeo'mar ña'ña Samario'mar. Tarraña añña Jesús puellsensarnesha'pa' ama esesha' yetatso ama't puesheñarra. ³ Sauloña'pa' nanac mueneñ o'ch a'cclatuan allohuen ñeññ ame'ñetsa. O'ch be'tosamñsanet pa'pacletopa' o'ch rromanet, o'chčho' chetare'tnerranet. O'chčho' be'tosuerrerr ña'ña po'ppauño'pa' o'chčho' rroma'huerraneterr, o'chčho' chetare'tnerraneterr, o'ch anmanet cárcelo allcha' abe'tatuanet. Ama't coyanesha'chno e'ñe abe'tatuanete't cárcelo.

Atto Felipepa' serrpare'tatanete't Samario

⁴ Añña ñeññ yetrra'tatsa Jerusaléño'pa' all čhapyeset, erra ta'yenetpa' allcha' serrpare'teññañet Yompor po'ñoñ. ⁵ Atet ñerra'm Felipe. Ñapa' o' ahuo', o' čhap anetso ñeññ pa'so'cheñ Samaria. Allña'pa' all serrpare'tatosanet añepa't Cristotats ñeññara Jesús. ⁶ Felipepa' orrtatanet ñeññ ama puentareto. Atet eñchetpa' o' eñochet añpa' po'ñoč Parets po'huamenc orrtaten. Ñeñño'marña allohuen acheñenesha'pa' e'mñoteñet e'ñe cohuen atet otanet. ⁷ Shonte' acheñ ñeññ chorra'yese't oneñet allempopa' e'ñe quečhpatyesueretña oneñet atto chorrenana acheñ. Allempo quečhpatyesueret oneñetña'pa' o'ch rranare'tnoma. Ña'ña shonte' acheñ ñeññ echarretyestse'tpa' o' corra'huerrret. Ama't ñeññ checare'payestse'tpa' o' a'crratyesuaherranet Felipe. ⁸ Ñeñño'marña nanac coshyete't Samario.

* 8:1-2 Saulopa' ñeññara Pablo.

⁹ Allempopa' allo'tsen puesheñarr ñeñt' achyotañ ahuaña ñeñtpa' añ pa'so'cheñ Simón. Allohuenet samario'marnesha' ama't ahuatoteña' cohuanrrortoñete't atet orrtate't ñeñt' ama puentareto. Ñapa' o'ch shequënanet. Ñetñapa' cha otenapuetañ ñapa' nanacte' po'ño'ch ahuamencat, atet oten ña. ¹⁰ Allohuen acheñpa' e'mñochete't atet ote't ahuaña—ama't ñeñt' añcha'tarettetsa ñaña ñeñt' ama esoshe'mayaye acheñ. Ochete't:

—Po'ño'ch añ acheñpa' ñeñt' Partsocoptartetsa.

¹¹ Ñeñto'marña acheñenesha'pa' nanac ame'ñyete't. Ama't ahuatoteñ cohuanrrortoñete't atet orrtate't ñeñt' ama puentareto. ¹² Tarraña allempo serrpare'tatanet Felipe cohuen ñoñets o' ame'ñatanet allohuen —yacmanesha'chno ñaña allohuenet coyaneshohuen. Serrpare'tatanet atet penaña Yompor po'cohuenña ñeñt' atto atarr ayochreshattena ña, ñaña atet pena Jesús ñeñt' Cristotats. O' ame'ñatuanet allempoñapa' apatarettet Yomporecop. ¹³ Ama't achyotañ ñeñt' sochetsa Simónpa' o' ame'ñerra ñaña. Ñapa'cho'ña apataretta Yomporecop. Apataretetuapa' allempoteñña' yemterrana Felipe errohuanen chopeñe'chen. All ortatanet Felipe ñeñt' ama puentareto attoch eñochet añmapa' ñeñt' po'ño'ch huetsa Partseshot. Simónña'pa' o'ch entan atetpa' atetcha' ot:

—Errotenotuañaca' atet penate'.

¹⁴ Allempoña Jesús puellsensarnesha'pa' e'mare'chet Jerusaléñoñ shonte' samario'marnesha' ame'ñeññañet Yompor po'ñoñpa' o' mueñet Pedro ñaña Juan all Samario. ¹⁵ Allempo chap Pedro ñaña Juan Samariopa' ma'yochamñpsosyet samario'marnesha' ñeñt' ame'ñetsa. Enamet Yompor chorratanetepa' Parets Puecamquëñ. ¹⁶ Tarro'mar allempopa' ama chorrenaneta' Parets Puecamquëñ. O'ña apataretetuet pame'ñeño'tet Yepartseshar Jesús. ¹⁷ Allempoña Pedro ñaña Juanpa' o' net pot ñesheto ñeñt' ame'ñetsa. Nohuet pot ñeshetopa' Yomporña Puecamquëñpa' ahuepa't chorraret.

¹⁸⁻¹⁹ Añña Simón ñeñt' achyotañtetsa ahuaña o' chapoña pueyo'chropa' atet ot:

—Añecpuepa't nenet pot attoch chorraret Parets Puecamquëñ.

Allempoñapa' atet otanet Simón:

—Llesenscha' nomporneshacha' o'ch nenanet naña not attoch chorraret Parets Puecamquëñ. O'ch napas quelle attoch sapuen llesens.

²⁰ Pedroña'pa' atet och:

—Peçllayorpa' chenquëpa' alla, allo'tpa' pechenquëpa' paña tarro'mar pa'pa' potenapañ o'ch perañoña Parets Puecamquëñ. Ñeñtpa' amach errotenot petsa'cho. Añña Yomporpa' o'ch apuey e'ñe atta. ²¹ Ama pocteyaye o'ch pagap pa llesens tarro'mar Yomporpa' ama pocteye' entennape peyo'cher. ²² Te'pa' añña poctetsa o'ch poctape'cherr ello cohuen, o'ch peque'chpuerr añ sosya'tsañ o'ch penamuer Yompor peretneñets. Ñato' Yomporpa' o'ch peretnerña'atto poctape'chen sosya'tsañ.

²³ Pedropa' alla otererr:

—Napa' neñotene'p nanac sosey poctape'chen peyo'chro, cha pottena atet ñerra'm po'chñarpa' huanquëne'p.

²⁴ Simónña'pa' alla otererr:

—O'ch sanamon Yompor nocop attoch amach es netantoyo atet soten. Añpa' allohua atet pena Simón.

²⁵ Pedro ñaña Juanpa' nanac a'potoñet Yompor po'ñoñ all Samario. Serrpare'tueneta'pa' alla ahuanerret Jerusaléño. All oñenet samario'marpa' ñeñt' yeçhetsa toño'marpa' e'ñe acoṑoteñ serrpare'tatyesuaneret.

Allempo Felipepa' ame'ñatana etiopo'marnesha'

²⁶ Allempoña añ Felipepa' orrtoña Yompor po'millañoñeñer atet otos:

—O'ch çhapmoch poctopa' o'ch ahueṑ a'yo, o'ch peçhap amarato allo'tsen toñ ñeñt' sets Jerusaléñoñ attoch yeçhap anetso añ pa'so'cheñ Gaza.

²⁷ Ñaña'pa' atet och Yompor po'millañoñeñerpa' atetçho' pa. Allempoña'pa' o' ahuo'. O' çhap all toño ñeñt' sets Gazopa' o' entosan puesheñarr etiopo'marnesha'. Añ etiopo'marnesha' ñeñt'pa' ñeñt' añcha'taret' añ pa'taruas pen o'ch cohuanpenan ora allpon quelle ñeñt' gobiernocop alla pa'nyo. Pa'neyya' añ pa'so'cheñ Etiopía. Ñeñt' nanac añcha'tarettetsa all pa'nyopa' añ pa'so'cheñ Candace ñeñt'pa' coyanesha'. Añ yacma ñeñt' entos Felipepa' ñeñt'pa' acaparet' acheñ. Añña etiopo'marnesha'pa' errte' asuena' Jerusaléño allempo entos Felipe. Tarro'mar ta all o'ch ma'yochenana' Yompor. ²⁸ Allempoña o' alla puerrerra pa'nyo. Ñapa' alla anen po'carro. Ñeñt'ña carropa' cahualla matatene'. All anenpa' all lleyen Yompor po'ñoñ ñeñt'ara ñoñets lleyen ñeñt' quellquë't' ahuat' Isaiás ñeñt' a'mtaye't' Yompor po'ñoñ. ²⁹ Añña Parets Puecamquëñpa' eñotatan Felipe, ñeñt'ña ote':

—O'ch penteña' ñeñt' anets tarro e'ñe all carro.

³⁰ Felipeña'pa' o' mata. Matapa' çhap allame'tetspa' o' e'mosan çho' lleyen añ Yompor po'ñoñ ñeñt'ara ñoñets ñeñt' quellquë't' Isaiás ñeñt' a'mtaye't' Yompor po'ñoñ ahuat'. E'mos Felipepa' atet otos:

—¿Eñotoçhena't' penteñ ñeñt' atet oten ñeñt' pelleyen?

³¹ Ñaña'pa' atet och:

—Errotenohuate'ca'ye neñoçhña' amaca'ye eñalle ñeñt'cha' neñotate'. Ñato' o'ch pa'taṑ pa' o'ch yanorr parro.

³² O' a'tap Felipepa' o' cohuos all lleyen. Añ lleyen Yompor po'ñoñ ñeñt'pa' añ ñoñets ñeñt' quellquë't' Isaiás:

Atetcha' pa' ña atet ñerra'm carrnero. Ñehua, carrneropa' o'ch yanemñ allcha' yemtsepa' amach ama'toçhto. Amapa' ñerra'm yetsorroñ pue'çhpa' amach ama'toçhto. Atetcha' pa' ña, amach es oto.

³³ Nanac mueroçhtachet, ama pocteye' ñeñt' atet ṑoñet. Ama erroteno o'ch yotua ora allohuen ñeñt' atet sosey pa'y es pamo'tsna'tarnesha'. O' muetsetpa', o'huañ corra añe patsro. Añpa' allohua atet quellquë't' Isaiás.

³⁴ Allempoña ñeñt' etiopo'marnesha'pa' o' a'ṑto'ch Felipe:

—Ñehua, ṑoten, ¿eseshocpa'tña eñen arr Isaiás, ñato' ñocpa'te' amapa' po'psheññecop'te'?

³⁵ Allempoña Felipepa' o' serrpare'tach cohuen ñoñets atet pena Jesús. Eñotach añ ñeñt'ara Isaiás po'ñoñpa' eñen Jesúsocop. Allempoña'pa' o' eñotach ñaña po'poñ Yompor po'ñoñ ñeñt'ara ñeñt' atet pena Jesús.

³⁶ Allña allenet matampenetpa' o' entoset oñ, atet ot etiopo'marnesha':

—Ta'm, ¿poctete'te' te' o'ch napataretta Partsocop?

³⁷ Felipeña'pa' atet och:

—Ñehua, ñerra'm po'ñoçh ðame'ñena peyoçhrocmañenpa' e'ñe pocte' o'ch ðapataretta Partsocop.

Etiopo'marnesha'ñapa' atet ot:

—Napa' po'ñoçh name'ñena. Te'pa' neñoteñ Jesucristo ñeñtpa' ñeñt Yompor Puechemer.

³⁸ Allempoñapa' o' tomatoset po'carro sohua'rrtosetpa' o' ahuanmuet oño. Allña apatos Felipe. ³⁹ O' cha'nerret oñoïpa' Yompor Puecamquëñña' o' anman Felipe a'yo. Allña' machayoña ma'nata alla. Ñeñt etiopo'marnesha'pa' ama enterrano Felipe. Allempopa' o' ahuerret etiopo'marnesha' e'ñe pocsheñesha'. Añpa' allohua ñeñt atet ða etiopo'marnesha'. ⁴⁰ All anetso Azotopa' all orrtierraña Felipe. Allña'pa' serrpare'tatosanet cohuen ñoñets alloch yequeshpä. Allempoñapa' o' ahuo' ñaña anetso Cesareo, nanac serrpare'tyesnom ora anetso'mar all oñomyes.

9

Allempo Saulopa' cotape'cherr ello cohuen Yomporecop
(Hch. 22.6-16; 26.12-18)

¹ Allempoña Saulopa' nanac e'moñe'tenan ñeñt ame'ñenaya Yepartse-shar Jesús. Pa'tsrre'mueñoïpa' atet ot:

—Napa' o'ch na'cclatueña' ñeñt ame'ñenaya Jesús.

Ñeño'marña o' ahuo' allo'tsen ñeñt nanac añcha'taret cornesha' e'ñe all Jerusaléño. ² Chap allo'tsenpa' o' enamos orden attoch a'cclatuan ñeñt ame'ñetsa. O' enam orden ñeñtcha' anom a'yo anetso Damasco allecma apçhenet judionesha' po'prahuo. O'ch çhap allpa' o'ch aposan ñeñt añcha'tarettsa puerahuo. Attoch apet all llesens attoch rromanatan acheñ ñeñt cotene' Jesús poctapña. Ama't coyaneshachno ñaña yacmaneshachno o'ch rromanatanet o'ch huancatanet o'ch anmare'tterret Jerusaléño. Atet cotape'chña Saulo. ³ Allempoña agapuan orden allempoñapa' o' ahuo'. O' çhap allame'tets Damascopa' machayoña ñeñt nanac poptetsa entoïpa' o' çchoyo'tamïpes e'ñe ñesho. ⁴ O' çchoyo'tamïpespa' ñaña'pa' alla rromopra patso. Chap patsopa' e'man ñoñets ñeñt atet oten:

—Esomare't Saule pemueroçhtatennanña ñeñt name'ñenaya.

⁵ Sauloñapa' atet ot:

—¿Eshape't Ayochreshate eñets?

Ñeñt eñetspa' alla otererr:

—Napa' ñeñten Jesúsen, ñeñtara ñeñten pemueroçhtaten. Añpa' ðañeña mueroçhtatetsa. Tarro'mar çha ðottena ñerra'mrrate' ashen ñeñt e'ñe ðäpare'teñoï ñañeñachña atserrpätetsa.

⁶ Sauloñapa' po'yorñoïpa' çha pa'shmuena allempoñapa' atet ot:

—Partseshacha' te'pa' çerrofena't penmen ñeñtcha' atet nepena?

Partsesha'ña Jesúsapa' atet otererr:

—Te'ñapa' o'ch petanta, ahuep Damasco. Allcha'ña otapet ñeñtcha' atet peþa.

⁷ Ñeñt parro epuet sen Saulo ñetñapa' atta cohuanrrortenet. Pocuarrorteñoïetpa' ama erroï oteto. Ñetpa'çho'ña e'muet ñeñt e'morrtatsa tarraña ama es enteto. ⁸ Allempoña Saulopa' o' tanta. Tantapa' o'ch cohua'yespa' ama ento. Ñeño'marña atta echa'nmet pototpa' o' anmet

Damasco. ⁹ O' çhap Damascopa' ma'pamuet Sauloñapa' ama enteno, ñaña ama es rreno, ñaña ama es orreno, ama't coñe'ta.

¹⁰ Damascoñapa' allo'tsen puesheñarr ñeñt nanac ame'ñenaya Yepartseshar Jesús. Ñañaapa' añ pa'so'cheñ Ananías. Añña Ananíaspa' Yepartseshar Jesús orroña atet ñerra'm pueçhopoñot o' çhore'çhpa' atet och:

—¡Ananías!

Ananíasña anaçpa', atet ot:

—Napa' Nepartseshare añen.

¹¹ Yepartsesharñapa' alla otererr:

—O'ch notaç atetcha' peça. O'ch ahueç allo'tsen toñ ñeñt nanac paçharr allcha' pentos Judas pa'paquell. Peçhap all pa'paclopa' o'ch pa'p'to'tos erro'tsente'ña ñeñt Saulo ñeñt tarso'marnesha'.

Alla otererr Yepartseshar:

—O'ch notaç ñaña, añ ñeñtara Saulo e'ñe te'pa' allo'tsen ma'yochetsa.

¹² Napa' o' norrtatuoñ ñeñt o' entua neshot. O' entuan atet ñerra'mrate' acheñ añ pa'so'cheñ Ananías huapatsa. O' huapa ñeshopa' o' nosan pot ñesho o'ch alla cohuerr.

¹³ Ananíasñapa' alla anapuererr:

—Partseshacha' napa' o' ne'mare'ch atet o' pa' añ ñeñtara Saulo. Shonte' acheñ o' e'mare'tatnet atto ñapa' nanac mueroçhtatenan ñeñt pame'ñenaya Jerusaléno. ¹⁴ Te'pa' ñapa' echenan orden o'ch huan-catyese y allohueney ñeñtey pame'ñenaya, o'ch anmatey cárcelo. Ñeñt pa'm'cha'tarefernesha' pen allohuen judionesha' po'cornanesharpa' o' apet Saulo añ orden.

¹⁵ Yepartsesharñapa' alla otererr:

—Tarraña ama't atet te'pa' o'ch ahueç all, ñeñt atet o' notuaç. Te'pa' o' nene' Saulo ñeñtcha' na'potene' neñoñ añcha'taretreshesho. Ama't po'poñeçhno acheñeneshopa' ñapa' a'potoncha' neñoñ. Ñaña ama't israe-lena'tarneshopa' o'ch a'poton neñoñ. ¹⁶ Ñaña o'ch neñotach Saulo ñapa' o'ch mueroçhta nanac nocop, tarro'mar te'pa' o'ch ame'ña'na na. Añpa' allohua ñeñt atet serrpare't Yepartseshar epuet Ananías.

¹⁷ Allempoñapa' o' ahuo' Ananías o'ch entenana' Saulo. Chap allpa' o' be'tosos pocollo allo'tsen Saulo. O' ponmosyapa' o' nosan pot e'ñe ñesho. Nohuan pot e'ñe ñeshopa' otosan Saulo, atet och:

—Masheñe Saule, Yepartseshar Jesús ñeñtca'ye porrtoya allempo poñen toño. Te'pa' añ ñeñtara Yepartseshar Jesús o' mueñan na o'ch non attoch alla pecuerr; ñaña attoch chorraça Parets Puecamquëñ.

¹⁸ Ñeñta otuapa' allorocma rrata'nom pa'clloyot ñeñt atet ñerra'mrate' es pa'tall, o' alla cohuerr e'ñe cohuen. Alla cohuerr e'ñe cohuenpa' allempoñapa' apataretta Yomporecop. ¹⁹ O' apataretetuapa' o' rrallme'cherr. O' alla çherr po'huamenc. Allempoñapa' allponmaterrerr alla Damascopa' o' serrpare't epuet ñeñt ame'ñetsa.

Allempo Saulopa' e'ñe ñenmañ serrpare'terr all Damasco

²⁰ Ñaña Saulopa' çhocma sen judionesha' po'prahuo allcha' serrpare'tatenanet atet pena Jesús. Otanet añ Jesúsapa' po'ñoçh ñeñtapa' ñeñtña Parets Puechemer. ²¹ Allohuenet ñeñt e'muene'pa' otyeset:

—Ta', errotenuañaca'yeña te' ñeñt yacmar. Añmapa' ñeñtca'ye mueroçhtataye't ahuaña ñeñt ame'ñenaya Jesús all Jerusaléno. Ñeño'marña te'pa' huena arr, mueneñ o'ch rromanatenana' ñeñt ame'ñetsa o'ch

anmarettet cornaneshesho ñeñt pa'mcha'tareternesha' pen allohuen judionesha' po'cornaneshar.

²² Saulopa' allo'na sen huomenc pa'nmue' pueyoçher attoch serrpare'tan Yompor po'ñoñ. Nanac serrpare'tatanet atto po'ñoçh Jesús pa' ñeñtara Cristotats. Ama't judionesha' ñeñt yeçhetsa Damascopa' ama erroteno anapeto.

Allempo Saulopa' a'yetater judionesha'

²³ Atteña o' allponmatpa' añña judionesha'pa' o'pachet o'ch muetset. ²⁴ Saulopa' e'mare'ch o' o'pachet, o'ch cohuet attoch o'ch muetset. Arr cohuet allotecma be'tenet all aconcha'tamñsaret ora anets. Ellapenete't cohame'tet ñaña arepenete't. ²⁵ Tarraña ñeñt pueyochresha' Saulopa' o' anmet tsapo allo'tsen pocoll e'ñe all aconcha'tamñsaret anets, allña pa' eñall ventana allot a'suatañperet atarret cañtro't.

Allempo Saulopa' puerterra alla Jerusaléno

²⁶ Allempoñapa' ahuerr Jerusaléno. Cherr Jerusaléno'pa' atarr mueneñ o'ch entenana' ñeñt ame'ñetsa. Ñeñña ame'ñetsapa' ama mueneto o'ch entenaneta' tarro'mar nanac mecha'teñet, otenapuetañ atto'te' shequënanet o' ame'ña.

²⁷ Añña puesheñarr ñeñt pa'so'cheñ Bernabépa' ñaña pa' o' aneñ allo'tsen Jesús puellsensarnesha', o' otosanet:

—Añ Saulopa' o' entan Yepartseshar Jesús allempo sen Damasconet. Yepartsesharepa't epuet serrpare't. Ñaña pa' ama mecha'to ñeño'mar atarr serrpare't Damasco atet pena Jesús.

²⁸ Allempoteñña pa' e'ñe pocte' eñchet, allempoñapa' o' e'ñe parrocmatuet. Ñapa' ama mecha'teno ama't mamesha. Atarr nanac serrpare'tan Jesús po'ñoñ. ²⁹ Chocmach serrpare'ten epuet judionesha' ñeñt e'muene' griegaçhpa' tarraña amach pocteye' enteñeto. Allempoñapa' o'pachet ñaña all o'ch muetset. ³⁰ Allempoña ñeñt parro ame'ñenetpa' anmet Saulo po'poñ anetso Cesareo. Allo'tpa' o' mueñet ñaña anetso Tarso.

Atto Pedropa' orrtatan Yompor po'partsoña all oteñet Lido

³¹ Atteñapa' o' muetsoñeñtuerra ñeñt amueroçhtatañ. All Judeo ñaña Galileo ñaña Samariopa' o'huañ amueroçhtatarettet atet pete't ahuaña. Allohuen ñeñt ame'ñetsa allo'na senet huomenc pa'nmuet pueyoçhret. Atteñapa' o' shonta'nma ñeñt ame'ñetsa. Pame'ñeñotetpa' allo'na senet mecha'na'tnomuet Yompor. Ñaña allo'na Parets Puecamquëñpa' nanac coshatenanet. ³² Atteña Pedropa' çhocmach ta'yena emo'tyese' ñeñt ame'ñetsa. Parrochpa' o' çhap allo'tsen ñeñt ame'ñetsa all anetso pa'so'cheñ Lida. ³³ Allña pa' entosan puesheñarr yacma añ pa'so'cheñ Eneas. Ñapa' ahuatoteñ echarrtena alla ñanena o' posoc char. ³⁴ O' entos Pedropa' atet otos:

—O'ch Eneaso notaþ, Jesucristopa' o'ch a'crraterreþ. Te'ñapa' o'ch petanta o'ch pañño'ten pemue'.

Allorocma correna, o' tantena. ³⁵ Allohuen ñeñt yeçhetsa Lido ñaña Sarónopa' allempoña eñchetpa' cha puesuerret ñeñt ahuat poctaþñet o' ame'ñerrñañet Yompor po'ñoñ.

Allempo Pedropa' tantaterran Tabita allempo rroma

³⁶ Eñall puesheñarr coyanesha' ñeñt ame'ñetsa añ pa'so'cheñ Tabita, añ ñeñtara so'chñets Tabita ñeñt otenet griegaçho Dorcas. Ñapa' arr yeçhena anetso ñeñt pa'so'cheñ Jope e'ñe alla allame'tets Lido. Ñaña' nanac amueraña, çhocmach yenpuenan ñeñt huocchañetyets. ³⁷ Allempopa' o' atsna't. Atsna'tpa' atteñapa' o' rroma. Rromapa' pamo'tsesha'ñapa' o' apach atet yeçhenet ñet. Apatueta' o' panet enonet all tama a'yohuen ñat. ³⁸ Allempoña ñeñt ame'ñetsa allpa' o' e'mare'chet Pedro allame'ttso'tsena all anets Lido. O' e'mare'chetpa' o' mueñet epsheña yacma attoch oteñeta' onepa' all allorocma.

Allempoña çhapuet Pedreshopa' ³⁹ Pedroña' o' coterranet. Chap allpa' o' anmet all cuarto eno allo'tsen arromña't. All tomçhen shonte' rre'torrnanesha' ñeñt llecanrortetsa. Allña' all gatanna'tyenet ñeñt chorra'yenet ñeñt sepeçhesanet ahuaña Tabitañ. ⁴⁰ Pedroña' mueñuanet allohuenet a'yenet. O' mueñuanet a'yenetpa' o' concorposa, o' ma'yocha. Ma'yochuapa' o' puetallsa arromña'teshonetpa' atet och:

—O'ch Tabita notaþ, petanterra.

Allempoña' acuerroche'. O' enterran Pedropa' çha anerrets. ⁴¹ Pedroña' cheter pototpa' echanter attoch terr. Allempoña' o' çhore'terran ñeñt ame'ñetsa ñaña rre'torrnanesha'çhno. O' be'tosçha'terretpa' o' gaterranet o' tanterra ñeñt rromats. ⁴² Allohuenet ñeñt yeçhetsa all Jopopa' o' e'mare'chet atet pena Pedro. Ñeño'marña shonte' acheñ o' ame'ñeret Yepartseshar Jesús. ⁴³ Pedroña' alla a'pa atomat alla Jopo. O' a'pa all Simón pa'paclo. Ñeñt Simónpa' añ po'taruas pen o'ch a'cohuenetyesan pa'rrom.

10

Atet þa capitán Cornelio epuet Pedro

¹ Eñall puesheñarr capitán, añ soche't Cornelio. Ñaña' allo'tsen anetso añ pa'so'cheñ Cesarea. Allña' ña mueñanatene' çharroch çharra' guardianesha' ñeñt oteñet Guardia Italiana. ² Aña Cornelioña' nanac cohuen cotape'che't Partsocop, ñaña nanac mecha'na'teñ. Ama't ñeñt yeçhetsa e'ñe parro ñetpa'çho'ña cotape'chete't cohuen Partsocop. Ñapa' nanac amueraña, shonte' es apa'yesane't ñeñt es palltatse't. Ñaña çhocmach ma'yochenana Parets. ³ Atta yeçhena ama't ahua'toteñ. Parrochpa' o' coya'nen atsne'pa' orrtoña ñeñt Yompor po'mllaño'teñer. Orrtoña atet ñerra'm pueçhopoño't, tarraña ama çhoye' çhopo'teñe. Tarraña o' orrtoña' e'ñe cohuen eñch. O' huapapa' atet otos:

—¡Cornelio!

⁴ Ñaña' puençha'naño'tpa' atta cohue', allotña'pa' atet otaþ:

—¿Eso'tña Partseshacha' pemnen?

Mellaño'teñña' alla otererr:

—Pema'yocheño't te'pa' o' yerpaþa Yompor. E'ñe pocte' entennaþ atto es papa'yeñ ñeñt es palltetsa. ⁵ Te'ña'pa' añ pocte' o'ch pemñe acheñ Jopo o'ch þagotach puesheñarr añ pa'so'cheñ Simón, ñeñtara oteñet Pedro. ⁶ Ñapa' all a'puena po'psheñeñ Simón pa'paclo. Te'pa' ñachña poterre' ñeñtcha' atet peperra. Ñehua, ñeñt Simón all a'puena Pedro ñeñtça'ye a'cohuenetyene'ña pa'rrom. Pa'paquellpa' ontapo'tsen. Aña' allohua atet ot Yompor po'mllaño'teñer.

7 Ñeñta otuapa' o' ahuerr. Ahuerrpa' Cornelioñapa' chore'tan epsheña ñeñt taruassets e'ñe alla pocollo, chore'tan ñaña puesheñarr po'solltarer ñeñtpa' aña po'taruas penet attoch cohuanipeñet po'cap'tánret. Añpa' ñeñt cohuen cotape'chets Partsocop ñaña. 8 Allo'tpa' o' serrpare'tatanet ora atto orroña Yompor po'millañoñeñer. Ñeñta serrpare'tatuaneltpa' o' mueñanet Jopo. Allempoñapa' ahuanmuet. 9 Tsapatñapa' o' chapmochet Jopo. O' chapmochetpa' Pedroña e'ñe alla pocollopa' o' a'tap eno allcha' ma'yochosa. Allempopa' chapmoch pocto. 10 O' chapmoch poctopa' cheporra Pedro. Atarro' mueneñeñ o'ch rra'pa' tarraña ama potenaña rreñets. Alla cohuenpa' o' huapoña ñeñt atet ñerra'm cho' es chopo'ten. 11 Entoñapa' o' entan ñeñt atet ñerra'm atarr shetamuets. Enotpa' cha sohuanpesnena, acharampsaret pa'tats po'topñe'marot. Añña ñeñt acharampsaretpa' sohua'netsa patsonet e'ñe ñeshonef. 12 Allña shetamtso e'ñe o'ponopa' allo'tsa'yen shonte' pa'namen berrochno, ama't po'poñ berrochno ñeñt ama arrapoye' eñche'te judionesha'. Ñaña allo'tsa'yen pa'namen shechpechno ñaña pa'namen otechno. 13 O' chap allame'tets ñesho, Pedroñapa' e'man ñoñets, atet oten:

—Pedro o'ch pemtsa añ berr o'ch perre'.

14 Pedroñapa' atet ot:

—Ama Nomporka', nerreñe. Napa' ama't ahuatapa' ama nerrare ñeñt ama arrapahuoyaye atet yeychena ya ñeñtey judioneshay.

15 Allempoñapa' o' alla oterrerr ñeñt eñets, atet ot:

—Ñeñt o' a'cohuentatua Yomporpa' p'apa' amach potatsto añmapa' ama cohuenayaye.

16 Añpa' e'ñe ma'pocha e'mpa' allempoñapa' o' alla a'terr enonet, o' alla chenuerra. 17 Allempoñapa' Pedropa' nanac moññe'tacha, o' cotape'chpa' atet ot:

—Esuañaca' otenenña ñeñt o' nentua.

Ñeñt nanac moññe'tenapa' allempocma chap ñaña ñeñt mueñen Cornelio. Ñetpa' o' a'p'to'tnomuet errate' yeçhenaña Simón. Allempoña entoñet Simón pa'paquellpa', o' chapuet allot be'tenetpa' 18 o' chore'toset atet otoset:

—¿Arre't a'puenaña ñeñt sochetsa Simón ñeñtara ñeñt otenet Pedro?

19 Pedroñapa' e'ñe alla enopa' ama't orameñ moññe'tenana ñeñt o' entuapa' añña Parets Puecamquëñpa' atet och:

—O' chap ma'psheña acheñ ñeñt pe'nene'. 20 Te'pa' o'ch pesuerra tayecma o'ch pocterranet. Amach pemcha'tatsto. Napa' na mueñenahuet atto huapuet arr. Añpa' atet ot Parets Puecamquëñ.

21 Ñeñta otuepa' Pedroñapa' asuerroche' patso. O' chap allo'tsen añ ma'psheña atet otapanet:

—Napa' naña ñeñten se'nen. ¿Esocpa'tña sehuena?

22 Ñetñapa' atet ochet:

—Yapa' añ yemñene' capitán Cornelio. Capitánpa' oten ponepa'to'. Ñapa' orroña Parets po'millañoñeñer atet och: “Pagotach Pedro onepa'. Ñaña pocte' o'ch pe'mñoñ ñeñtcha' atet otañ.” Atet och Parets po'millañoñeñer. Ñeñto'marña yapa' o' yehuapa. Tarro'mar capitán Cornelio'pa' ñapa' e'ñe cohuen cotape'chen Partsocop ñaña nanac mecha'na'teñ. E'ñe cohuen enteñ allohuen judionesha'.

23 Allempoña Pedropa' atet otapanet:

—Ñehua, sebe'tos allach sa'pa, tsapa'tachña ahuey parro.

Allñapa' alla moset, tsapa'tñapa' ahuanenet. Po'potantañpa'cho'ña ñeñt ame'ñetsa e'ñe alla Jopopa' o' co'ta'huanmuet ñamet.

²⁴ Tsapa'tñapa' o' chapuet Cesareo. Cornelioñapa' alla cohuenan Pedro o'ch huapa. Ñapa' o' hua'ña'huan pamo'tsesha' ñaña po'potantañ ñeñt epuet yemtena. Ñetñapa' all cohueñet e'ñe parro. ²⁵ O' huapa Pedro. O' huapapa' Cornelioñapa' o' tantnoma attoch o'ch poctaþ. O' concorposñaña o'ch ma'yochaþya. ²⁶ Tarraña Pedroñapa' o' cheterpa' atet och:

—Petanterra, amach pema'yochatsetno. Napa'cho'ña aromña'fena.

²⁷ O' tanterrapa' serrpare'tatanna'tet mame'pa' allo'tñapa' o' be'toscha'tet pocollo. Allñapa' o' entosan shonte' acheñ ñeñt o' cha'cha't.

²⁸ Allempoñapa' otanet Pedro:

—Sapa' seño'teñ ya judioneshaypa' ama pocteye' yenteñe o'ch yeyemcha po'poñ acheñ ñeñt ama judioneshayaye. Tarro'mar yapa' atet yey'chena amach yeya'rrotatsche acheñ ñeñt ama judioneshayaye. Tarraña te' Yomporpa' o' ye'chatuan amach yentatsche po'psheñeñ atet ñerra'mrate' ñeñt ama cohuenayaye. ²⁹ Ñeñto'marña te'pa' o' nohuapa arr tayecma allempo agotatenet. Te'ñapa' o'ch na'þto'taþ ¿esocopte' þagotatenen?

³⁰ Allempoñapa' Cornelioñapa' atet ot:

—Ahuaña o' taya pa'tatsmat met, napa' alla nema'yochena, ñaña nema'yochenoñ o' neque'chpa' nerrar mame'. Ñeñt attecma nepena allempocma nema'yochena nepaclo atet ñerra'm te' coya'nen atsne'. Allempopa' machayota orrtona puesheñarr yacma e'ñe allame'tets. Pa'shtampa' añ chorrena ñeñt nanac cohuen poptetsa. ³¹ Ñaña'pa' otosen: “Cornelio, pema'yochenoñ te'pa' e'mueneþ Yompor. E'ñe pocte' antennañ atto es þapa'yeñ ñeñt es palltetsa. Ñeñto'marña te'pa' o' yerpaþa. ³² Te'ñapa' o'ch pemñe acheñ Jopo o'ch þagotach puesheñarr ñeñt pa'so'cheñ Simón ñeñtara ñeñt otenet Pedro. Ñapa' alla a'puena po'psheñeñ Simón pa'paclo. Ñach huapatsapa' ñapa' serrpare'tatoseþcha'. Ñehua, ñeñt Simón all a'puena Pedro ñeñtca'ye a'cohuenetyene'ña pa'rrom. Pa'paquëllpa' ontapo'tsen.” Añpa' allohua atet oten ñeñt norrtoya. ³³ Ñeñto'marña nagotatenepþ. Te'pa' e'ñe pocte' o' pehuapa. Te'pa' Yompor eñoteney ñeñtey arro'tsa'yeney yemneñ o'ch ye'mño'taþ o'ch peserrpare'tatey errponte' Yompor ye'chateneþ.

Allempo Pedropa' serrpare'tatosanet Cornelio pa'paclo

³⁴ Pedroñapa' alla oterrerr:

—Po'ño'ch te'pa' o' neño'ch tarro'mar o' chapona neyo'chro, ama ñapa'ña judionesha' morrentenoña Yompor. ³⁵ Añña ama't erra'tsen pa'namen acheñ, eñallcha'ña puesheña'tets ñeñtcha' mecha'na'tene' Yompor ñaña ñeñtcha' e'ñe cohuen es pets Yomporecop. Ñeñtþa' e'ñech pocte' enteñ Yompor, ama't erra'tsena acheñer.

³⁶⁻³⁷ Alla oterrerr Pedro:

—Sapa' seño'teñe'tña Yomporpa' o' mueño'nay Puechemer Jesucristo, ñeñtey judioneshacpay. Añ ñeñtara Jesús'pa' o' a'pocatuonay e'ñe cohuen Partsocop attoch cosheñtso'tseneycha'. Te'ñapa' ñach Yepartseshar yeper allohueny. Añ cohuen ñoñetspa' o' serrpare'tuet erracmañen Judeo'mar. Ñanompa' serrpare'chete't Galileo allempo apate't Juanañ.

³⁸ Alla otterraneterr Pedro:

—Señoteñfe' Yomporpa' o' nan Puechemer Jesús ñeññ nazareto'marnesha'. O' chorracha Parets Puecamquëñ ñaña nanac ahuamencat pe'. Allotpa' all chopeñe'chyese'tpa' nanac amuerañte't. A'crratyesane't allohuen ñeññ muerochtatyese't oneñe't, tarro'mar Pomporpa' nanac yenpue't.

³⁹ Alla otterraneterr Pedro:

—Yapa' o' yentuoñ ora allpon atet pa'yese't all ye'chena judionesha' ñaña all Jerusaléño. Yapa' o' yentue ñeñto'marña te'pa' o' ya'potoñ ñeññ atet pa'yese't. Alloñapa' o' corso'tam̄pset tsacho, atto muetset. ⁴⁰Tarraña poma'pamtañopa' tantater Pompor. Allempoña Pomporpa' orrtaterrnay e'ñe ya yocop. ⁴¹Tarraña ama allohuenacpaye' orrterro, e'ñe yañeñacpa ñeñtey na' Yompor o'ch ya'potoñ ñeññ atet pe't Jesús. Allempoña tanterrapa' yapa' yerrallme'chapretuer ñaña yorruerr coñe'ta'tets parro.

⁴² Alla otterrerr Pedro:

—Ñapa' o' otey o'ch yeserrpare'tach acheñenesha', o'ch ya'potoñ atto yeñoch Yomporpa' o' nan Puechemer Jesús ñach acre' allohuen acheñenesha'—errotentcha' corret puesheña'ttset. Acrancha' allohuen acheñenesha' ama't ñeññ corretsa ñaña ama't ñeññ o' colla'huen.

⁴³ Alla otterrerr Pedro:

—Ñeññ ama't ahuat ñeññ a'mtaye't Yompor po'ñoñpa' ñeññtara Jesús a'põtete't. Ama't ahuat ñetpa' otete't ñerra'm yame'ñera ña Pomporpa' e'ñech peretna'huerrnay yo'chñar.

Allempo ñanom chorraret Parets Puecamquëñ ñeññ ama judioneshayaye

⁴⁴ Ama't allempo serrpare'ten Pedropa' añña Parets Puecamquëñpa' ahuepa't chorraret allohuenet ñeññtet e'ññote'. ⁴⁵ Añña judionesha' ñeññ ame'ñetsa ñeññ parro huapa Pedro, ñetñapa' atta cohuanrrortenet, o' otet:

—Errotenotuaf'e'ca'ye chorraret ñamet Parets Puecamquëñ e'ñe attota, ñetpa' amaca'ye judioneshayayeto. Atet otet ñet.

⁴⁶ Tarraña po'ño'chpa' ahuepa't chorraret ñamet Parets Puecamquëñ tarro'mar ñetpa'cho'ña ahuepa't eñosyaset po'poñ ñoñtso. E'ñe po'poñ ñoñtso aye'chochtachet Yompor. Atto e'manet judionesha'. Allempoña' atet ot Pedro:

⁴⁷ —Ama't pocte' senteñe o'ch apatarettet Partsocop. Tarro'mar o' chorraret Parets Puecamquëñ e'ñe atet ñerra'm ya.

⁴⁸ Allempoñapa' otanet Pedro:

—Te'pa' e'ñe pocte' same'ñeñoñ Jesucristo o'ch sapataretta.

Allempoña apatarettetuetpa' atet ochet Pedro a'puepa'to' alla allponmat.

11

Allempo Pedropa' serrpare'tatuerranet Jerusaléño

¹ O' allponmat Jesúsña puellsensarnesha' o' e'mare'chet atto po'poñ acheñ ñeññ ama judioneshayaye o' ame'ñerrñañet ñamet Yompor po'ñoñ. Atto e'mare'ch Jesús puellsensarnesha' ñaña po'poñe'chno acheñ ñeññ ame'ñetsa all Judeo. ² Allempoña ahuerr Pedro. Allempo cherr Jerusaléñopa' judionesha' ñeññ ame'ñetsa allpa' o' che'ptare'tapueret Pedro. ³ O' che'ptare'chet Pedro, atet ochet:

—Eso'mare'tña petaña allo'tsen ñeñt ama judioneshayaye, ama't allpa' o'te' cha perrallme'chapretos—anet.

⁴ Allempoña Pedropa' o' serrpare'tatuerranet ñeñt e'ñe atet pa; ⁵ atet otanet:

—Napa' allo'tsenen Jopo. Allempo nema'yochena huapona ñeñt atet ñerra'm cho' es ye'chopo'ten. Entoñapa' o' nent ñeñt atet ñerra'mrrate' shetamuets. Enotpa' cha sohua'nena a'charam'psaret e'ñe pa'tats po'topñe'marot. Añña ñeñt a'charam'psaretpa' sohua'netsa patsonet e'ñe neshonet. ⁶ Napa' o' necue'pa' allña o'ponopa' nent pa'namen berro'chno ñaña ñeñt puetsato'mar, ama't po'poñ berro'chno ñeñt ama arrapahuoye' yenteno ya ñeñfey judioneshay. Nent ñaña pa'namen shechpe'chno, ama't ñaña pa'namen o'te'chno. ⁷ Allempoñapa' ne'm ñoñets, atet oten: “Pedro o'ch pemtsa añ berr o'ch perre'.” ⁸ Tarraña napa' not: “Ama Nompocha' nerreñe. Napa' ama't ahua'tapa' ama nerrare ñeñt ama arrapahuoyaye atet yey'chena ya judioneshay.” ⁹ Allempoñapa' alla oterrerr ñeñt eñets ento't, atet ot: “Ñeñt o' a'cohuentatua Yomporpa' p'apa' amach potatsto añmapa' ama cohuenayaye.” ¹⁰ Añpa' e'ñe ma'pocha ne'n'pa' allempoñapa' o' alla a'terr enonet o' alla chenu'erra—ora. ¹¹ Allempocma o' chap ñaña ma'psheña acheñ. Chapuon all pocollo all nommuena. Añ ma'psheña acheñpa' arrot mueñonet Cesareot. ¹² Añña Yompor Puecamqu'ñña' oten o'ch nocterranet. Oten amach nem'cha'tatsto. Añ pechapsheña ñeñt arro'tsen te' o' yahuanma parro. Allempoñapa' ye'chap pa'paclo ñeñt nagotatene'. ¹³ Allempoña o' ye'chap pa'paclopa' ñaña'pa' o' serrpare'tatapuey atto' orrtoña Yompor po'millaño'eñer. Orrtoña'pa' atet otos: “Añ pocte' o'ch pemñe acheñ Jopo o'ch pagotach puesheñarr añ pa'so'cheñ Simón ñeñtara ñeñt otenet Pedro. ¹⁴ Añña Pedropa' ñeñt'cha' peñotate' attoch pequeshperra ñaña allohuen p'amo'tsesha'.” Atet oten Yompor po'millaño'eñer. ¹⁵ Nañapa' o' neserrpare'tosñañ Yompor po'ñoñ. Allempo neserrpare'tenpa' añña Parets Puecamqu'ñña' ahuepa't chorr Janet. O' chorr Janet e'ñe attecma chorra'ya ahuaña yaña. ¹⁶ Allempoñapa' o' neyerepya atet otey ahuaña Yepartseshar Jesús: “Juanaña' e'ñe oñochaya apate't tarraña na añcha'ña nechorratasa Parets Puecamqu'ñña.” ¹⁷ Ñehua, Yomporpa' e'ñe pocte' enteñ o'ch chorr Janet ñet e'ñe attecma atet chorra'ya ya allempo yame'ñya Yepartseshar Jesucristo. Ñehua, ñerra'm e'ñe pocte' enteñ Yomporpa' nañapa' errotenuate'ca'ye neche'ptare'chña Yompor.

¹⁸ Ñeñña otuapa' allempoñapa' alla moma'huet allohuenet. Allempoñapa' o' aye'cho'chtatoñet Yompor, atet otet:

—Ama't po'poñ acheñ ñeñt ama judioneshayaye Yomporpa' mueneñ o'ch cotape'cherret ello cohuen alloch ñetpa'cho'ña corretsetach pocsheñeshocmañen e'ñe tayoteñ errponañohuen. Allohua ñeñt atet pa Pedro ñaña Cornelio.

Atto epa'hua Yompor po'ñoñ erraparen

¹⁹ Allempo muetset Estebanpa' allempoteñña orrta muero'chteñets. Nanac muero'chtachete't ñeñt ame'ñetsa. Ñeñto'marña yetrra'tyeset allemeña, parratse'tyeset po'poñ anetso'mar. Puesheña'tetspa' ahuanmuet Fenicio'mar, po'potantañña' ahuanmuet Chipro, po'potantañpa' ahuanomyeset Antioquío. All chopeñe'chyesnomuetpa' all serrpare'tyesnomuet Yompor po'ñoñ, tarraña añña serrpare'tatnomuet

ñapueť judionesha'. ²⁰ Tarraña puesheña'tets chipro'marnesha' ñaña cireneo'marnesha' ñeñť ame'ñetsapa' o' čhapuet Antioquío. Allñapa' aña serrpare'tatoset ñeñť griegonesha'. Añ serrpare'tet ñeñť atet pena Yepartseshar Jesús. ²¹ Yomporpa' nanac ahuamencat panet. Ñeñťo'marña shonte' acheñ ame'ñachet Yepartseshar Jesús, o' a'ypo'ña'huerret ñeñť ahuat poctapñet. ²² Añña ñeñť ame'ñetsa Jerusaléñopa' o' e'mare'chet atto shonte' ame'ñetsa Antioquío. Ñeñťo'marña mueñet Bernabé Antioquío, o'ch yenpuenaneta'. ²³ Allempo chap Bernabé allpa' entosan po'ñočh o' orrta Yompor pemuereña all. Ñeñťo'marña nanac coshosa. O' cotape'chatosanet, atet otanet:

—Amach sequečhpastere Yompor po'ñoñ. Huomenccha' sepa' seyočher.

²⁴ Añña Bernabépa' ñapa' nanac amueraña, nanac chorreña Parets Puecamquëñ. Atarr ame'ñena. Ñeñťo'marña shonte' ame'ñatana acheñenesha' attoch coteret Yepartseshar.

²⁵ Allempoña ahua' Bernabé. O' chap Tarso allcha' e'nerrana' Saulo. Allña entospa' a'secher o'ch aner Antioquío. ²⁶ Epsheño'maret alla a'puet paterr char Antioquío. Allñapa' nanac yečhacheteť ñeñť a'pčhatseť all pame'ñeñotet Yompor. Shonte' acheñ ame'ñatsa all. All Antioquíopa' añ asocharettet ñeñť ame'ñetsa "Cristona'tarnesha'." Ñanom arr Antioquío asocharettet atet.

²⁷ Allempoña Jerusaléñopa' allo'tsen puesheña'tets ñeñť a'mtene' Yompor po'ñoñ. Parrochpa' onačha'tet. Chapuet Antioquíopa' ²⁸ añña ñeñť pa'so'cheñ Agabopa' o' tomospa' serrpare'tatosanet, atet otanet:

—Orrtach muecheñets esempo erraparen patso. Añpa' allohua ñeñť atet ot Agabo.

Añ eñotate' Yompor Puecamquëñ, ama't allempopa' ama orrtena' muecheñets. Allempo añcha'tareťta Claudiopa' allempo'ña orrta muecheñets. ²⁹ Ñeñťo'marña allohuen ñeñť ame'ñetsa Antioquíopa' o' a'poctachet o'ch mueñet ñeñťcha' yenpue' pa'mo'nasheñnesha' ñeñť yečhetsa Judeo. ³⁰ Allpon echyenetpa' allpon apa'yeset. Atet a'poctachetpa' atetčho' pet. O' apueñet Bernabé ñaña Saulo, ñetñapa' anmet Jerusaléño, allñapa' aposet ñeñť pompornesha' pen ñeñť ame'ñetsa Jerusaléño.

12

Allempo añcha'taret Herodes muetsaterran Jacobo, yottamñsatan ñaña Pedro

¹ Allempopa' añña añcha'taret Herodespa' rromatan puesheña'tets ñeñť ame'ñetsa attoch mueročhtachet. ² Rromuet Jacobo o' muetsset. Añ Jacoboñpa' ñeñťara ñeñť Juan pa'mo'nasheñ. Atto muetssetpa' čho pechoñet poñ. ³ Ñeñťña muetse'pa' nanac coshatan judionesha' ñeñť ama ame'ñetso. Allempoña añcha'tareťpa' nanac mueneñ o'ch alla coshateranerr judionesha'. Ñeñťo'marña pascuapopa' allempoch rreterterr pan ñeñť ama a'chasareteyayepa' o' alla rromaterranerr ñaña Pedro. ⁴ Rromuet Pedropa' o' abe'tet cárcelo. Net čharra' puechena pechap solltarnesha' ñeñťcha' cohuanñpse'. Ñanompa' o'ch neñet pa'tatssheña solltarnesha' ñeñťcha' cohuanñpene'. Alloťpa' o'chña muenme'cheñetpa' o'ch

huena po'potantañ pa'tatssheña ñeñtcha' cohuanmpene' ñaña. Ñeñtña çharra' puechena pechap solltarpa' attach penet, çhach çmıyannenet. Añ cotape'chña Herodes o'ch metua pascuapopa' o'ch orrtayan Pedro allo'tsa'yen acheñenesha'. ⁵ Atteñapa' nanac huomenc cohueñet Pedro cárcelo. Tarraña ñeñt ame'ñetsapa' atarr ma'yochampeñet Pedro.

Atto Yompor po'millañoñeñerpa' çha'nmaterran Pedro cárcelo

⁶ Atteñapa' allponmat o' çhap allempoch tsapatcha' Herodespa' o'ch orrtata'muenan Pedro allo'tsa'yen acheñenesha'. Tsapoña Pedropa' all muenpa' all rroçhtampeñ epsheña guardia all rromanpeñet allo ehuan-careñ cadeno epo'mar pueçot. Ñaña a'yotpa' all cohuanmpañ po'potantañ solltar e'ñe allot be'tenet. ⁷ Atteñapa' machayota puetaresua e'ñe alla o'pono. Orrtoña Yompor po'millañoñeñer. Añña mellañoñeñpa' o' a'płlan Pedro puepototpa' o' opuepa' atet och:

—Petanta tecma.

Añña cadena allo' huanquēñetpa' çha pueya'nets e'ñe ñoña. ⁸ Añña mellañoñeñpa' atet och:

—Pechana'pena peshtam, o'ch penen ñaña pesapat.

Atet och mellañoñeñpa' atto'çho' pa. Allempoñapa' alla otererr:

—Te'pa' pechorrena ñaña peshtam ñeñt penen enot. Allempoñapa' o'ch pçotenen.

⁹ Allempoñapa' o' çha'nen cota'nenan mellañoñeñ. Pedroñapa' çha otenapañ atate' çhopo'teñ, tarraña ama çhoye' çhopo'teñe. Allempoñapa' o' ahuanenet. ¹⁰ Ahuanenetpa' o' metenet all cohuen puesheñarr guardia. Ahuerretterr allponpa' o' meterretterr all cohuen po'psheññ guardia. Allempoñapa' o' çhenet allot e'ñe çha'nenet allecma chopeñe'çen acheñenesha'. Chenet yetarropa' ñeñtña yetarrpa' asret nanac echarr. O' çhenet e'ñe allpa' añña yetarrpa' o' tora'nom e'ñe ñoña. Toranepa' ñetñapa' o' çha'nenet. Chenet a'yotpa' allñapa' all chope'chnomuet e'ñe parro mame'pa' allotñapa' o' ahuerrña Yompor po'millañoñeñer allotñapa' o' ñapñamena Pedro. ¹¹ Allempoñapa' çhapoña Pedro pueyoçhro, atet ot:

—Po'ñoçhepa't ama çhoye' neçhopo'teñe. Yomporepa't mueñene' po'millañoñeñer attoch a'queshpaten. Te'pa' Herodespa' amach errot pa'no. Judionesha'pa'çho'ña e'ñe orrena o'patenna.

¹² O' çhapoña pueyoçhro tematenñapa' o' çhap allo'tsen María pa'paquëll. Añña Mariapa' ñeñt pachor Juan Marcos. Chap all pa'pacłlopa' allñapa' allo'tsa'yen shonte' acheñ all ma'yochenet o'pono.

¹³ O' çhap allot be'tenetpa' çhore'tosanet. O'ponoñapa' çha'nom puesheñarr shopshesha' añ pa'so'cheñ Rode. ¹⁴ Huapapa' o' cheme'tan Pedro po'ñoñ. Pocsheñesha' materra o'pono o'ch oterrana' acheñenesha' ñeñt o'pono'tsa'yen. Tarraña ama torampsano Pedro. Cherr o'ponopa' atet otanet:

—Pedrepa't o' huena, allo'tsena a'yot.

¹⁵ Ñetñapa' çha otet:

—Amate'ca'ye ñeñteyaye, atta pçotyen çhate' pemospuena.

Ñañapa' alla otererr:

—Po'ñoçhca'ye Pedro.

Ñetñapa' oterretterr:

—Amate' Pedroyaye. Ñato' añte' Yompor po'millañoñeñer ñeñtcha' cohuanmpse' Pedro.

¹⁶ Atteñapa' Pedroñapa' alla chöre'terraneterr yetarrot. Allempoñapa' torañpset. Torañpsetpa' añepa't Pedro. Allempoñapa' atta cohuanrrotet. ¹⁷ Pedroñapa' o' echantan pot attoch o'ch muetsoñeñtet allochñapa' o'ch serrpare'tatuenanet. Allempoña o' muetsoñeñtueta' atet otanet atto Yomporpa' o' cha'nmater cárceloñ. Otanet ñaña:

—O'ch soteña' Jacobo ñaña po'potantañ masheñnesha' atto cha'nmaterren Yompor po'mllañoñeñer.

Allempoñapa' alla ahuerr Pedro.

¹⁸ Atteñapa' o' puetaren. Arrña cárcelo solltarnesha'ñapa' puenñchañoñetpa' otanna'tyeset:

—Errotenotuañaca'ye cha'nenña Pedro. Errahuañaca'ye o' ahuen.

¹⁹ Atteñapa' o' e'nater Herodespa' ama esesha' entaye. O' alla a'p'to'tare'tereter solltarnesha' ñeñt cohueñe' cárcel ama esesha' entaye errotenote' o' ahuen. Allempoña Herodesñapa' o' mueño'tuan solltarnesha' a'yo allcha' muetsanatuanet. O' allponmat Herodesñapa' o'cho' ahuo' Judeoñ o'ch ahuo' Cesareo allñapa' allach allponmatena'.

²⁰ Allempoña Herodesñapa' nanac e'moñe'tenan tiro'marnesha' ñaña sidóno'marnesha'. Ñeño'marña o'huañ apañet rreñets ñeñt nanac palltenet pa'nyeto. Ñeño'marña ñetpa' mueneñet o'ch alla amo'tsteret Herodes attoch o'ch alla apueranet ñeñt palltenet. Ñeño'marña hua'cha'ta shonte' tiro'marnesha' ñaña sidóno'marnesha' o'ch enteñeta' Herodes. Añña Herodes pa'taruasañer añ pa'so'cheñ Blastopa' e'ñe cohuen entapanet. Ñaña'pa' o' a'p'octatanet attoch ñetpa' serrpare'tet epuet añcha'taret. ²¹ Chap allempo'ch serrpare'tet epuet añcha'taretpa' Herodesñapa' o' chorrana nanac co'chnesha' pa'shtampa' anorros po'conañopa' eñosos. O' eños atet ñerra'm ñeñt añcha'taret nanac. ²² O'ña eñosua acheñenesha'ñapa' o' rrannartetpa' atet otyeset:

—Ama acheñenocheye' eñetso, Partsepa't eñets.

²³ E'ñepa'tcha' allempocma huapoña Yompor po'mllañoñeñer o' atsna'tatosan Herodes. O' atsna'tpa' e'ñe rrohue pueñpa' o' rroma. Tarro'mar Herodespa' mueneñ o'ch Partsocoptarta. Acheñenesha'ñapa' o' aye'cho'chtatoñet atet ñerra'm Parets. Amaña choye' otaneto eñallña paterr Yompor. Añpa' allohua atet pe't Herodesoñ.

²⁴ Allempoñapa' o' epa'hua Yompor po'ñoñ erracmañen. Allo'na ame'ña'huanena shonte' acheñenesha'.

²⁵ Añña Bernabé epuet Saulopa' o' asueneta' Jerusaléño, pomhueneta' quelle. Pomhueneta' quellepa' o' puerratherret Jerusaléñoñ. Añña Juan Marcospa' o' coterranet.

13

Allempo Pablo ñaña Bernabépa' ahuo't serrpare'tatoset anetso Chipro

¹ Ñeñt pame'ñeñoñet ap'chatse't Antioquíopa' allo'tsen puesheña'tets acheñ ñeñt a'm'tene' Parets po'ñoñ, ñaña allo'tsen ñeñt nanac cohuen ye'chatatse't Yompor po'ñoñ ñeñt atet ñerra'm añ: Bernabé, ñaña Simón, ñeñt Simónpa' oteñet ñaña Negro, ñaña allo'tsen Lucio ñeñt cireneo'marnesha' ñaña allo'tsen Manaén ñeñt parro cheshat Herodes ñeñt añcha'taret'tetsa' all Galileo, ñaña allo'tsen Saulo. ² Allempo chocma

cohuentatoñete't Yompor, ñaña errotenopa' čhoch tore'tete't.* Atteña añña Parets Puecamquëñpa' eñotatanet, atet otanet:

—Añ pocte' o'ch sene' Bernabé ñaña Saulo ñetpa' o'ch senanet nocop. Napa' o'ch napanet ñeñtcha' po'taruas pet nocop.

³ E'ñe allempopa' tore'tetset. Allempoñapa' ma'yochet. Ma'yochuetpa' o' net pot ñeshetopa' allsensarettet allcha' torroñet Yompor po'taruas.

⁴ Allsensarettet e'ñe Parets Puecamquëñoťpa' ahuanmuet Seleucio. Seleucioťñapa' ahuanm̄set boto, o' čhapuet Chipro. ⁵ Allña pueblo all čhapuetpa' añ pa'so'cheñ Salamina. Chapuet Salaminopa' o' ahuanmuet judionesha' po'prahuo allcha' serrpare'tosñañet Yompor po'ñoñ. Ñaña cotenanet Juan Marcos ñeñtcha' yenpahuet. ⁶ Atteñapa' o' ahuanmuet serrpare'tats erracmañen all oteñet Chipre. Chapuet po'poñ anetso añ pa'so'cheñ Pafos. Allñapa' entoset puesheñarr judionesha' ñeñtpa' achyo'tañ añ pa'so'cheñ Barjesús. Ñaña' nanac serrpare'taten, tarraña ama Yomporeye' po'ñoñ a'mteno. ⁷ Ñaña' čhocma yemtenana ñeñt añcha'tarettsa atet ñerra'm gobierno' ñeñt allo'tsen. Añña añcha'tareťpa' añ pa'so'cheñ Sergio Paulo, ñeñtpa' nanac es eñot. Añña añcha'tareťpa' o' agotatan Bernabé ñaña Saulo. Ñapa' mueneñ o'ch e'man Yompor po'ñoñ atet serrpare'tenet. ⁸ Tarraña ñeñt achyo'tañpa' ama muenatano añcha'tareť o'ch ame'ña. Ñaña' mueneñ o'ch a'mcheťtanet attoch amach ame'ñacheto añcha'tareť. Añ ñeñt achyo'tañpa' ñeñtara oteñet ñaña Elimas. ⁹ Allempoña Saulopa' o' huomenc cohuanan ñeñt achyo'tañ. Ñehua, Saulopa' ñeñtara oteñet ñaña Pablo. Ñaña' e'ñe chorreña Parets Puecamquëñ. ¹⁰ O' cohuan achyo'tañpa' atet och:

—Papa' nanac peshquëñ acheñ, nanac peyečcaten ñeñt ama cohuenayaye. Aña pōmpor pepen oneñet. Nanac pe'moñe'teñ ñeñt poctetsa Yomporecop. Esemphuachñaca' peuna'ña atto pōten ama cohuenaye Yompor po'ñoñ. Añpa' ñeñtña po'ñočh ñeñt cohuentetsa. ¹¹ Te'ña Yomporpa' o'ch tsa'tatařa. Te'pa' amach pecuerro. Allponmatcha' amach penterro puetare'.

Allempocma o' checmetmara enta. All chopeñe'chenpa' attach otyenanet:

—Sanmuen, o'ch secha'nmuen.

¹² O' entan añcha'tareť atetpa' o' ame'ña. Atarr huomenc entan Yompor po'ñoñ. Allohua atet pete't all Pafoso.

Allempo ñanom asena' Pablo Asio

¹³ Allempoña Pablo ñaña ñeñt cotene'pa' o' ahuanm̄set boto o' čhapuet Pergo ñeñt allara Panfilio. Chapuet Pergopa' Juanña Marcospa' o' sa'nerranet. O' alla ahuer Jerusalem. ¹⁴ Allempoña Pablo ñaña Bernabépa' ahuanerretter, o' čhapuet anetso ñeñt pa'so'cheñ ñaña Antioquía ñeñt allara Pisidie. Allempopa' o' čhapa'muen allempo amesen judionesha' Pabloña ñaña Bernabépa' o' ahuanmuet judionesha' po'prahuo. Allñapa' anorrčha'toset ñamet. ¹⁵ Allña judionesha' po'prahuopa' o' lleyoñet Moisés po'ñoñ ñaña po'poñ ñeñt a'mtaye't ahuat Yompor po'ñoñ. Allempoña o' lleya'huetpa' añña ñeñt añcha'tarettsa puerahuopa' atet otanet:

* **13:2** Añ tore'teñetspa' añecop o'ch yetorra Yomporecop. Amach añecpayaye atomat, ñeñtapa' añecpa mameshacop o'ch yequečpa' yerrar.

—Eshaste' masheñneshare echene' ñoñets attoch soctape'chateypa' ñato' o'ch seserrpare'tatey.

¹⁶ Allempoña Pablopa' o' tomospa' echantan pot attoch muetsoñeñtuet atet otanet:

—Masheñnasha judioneshacha' ñaña allohuenes ñeñtes mecha'na'tene' Yompor, se'mñoten, o'ch notas: ¹⁷ Yapa' israelena'tarey ahuať Yomporpa' e'ñe pocte' entane't yatañneshañ. Nanac a'mratanet allempo a'puete't Egipto. E'ñe Yompor po'huamencoťpa' o' ahuanerranet Egiptoť. ¹⁸ Ama't atomat char allempo chopeñe'chete't amaratareropa' chocma cohuanñpsanet e'ñe cohuen, ñato' pa'tatsoch čharra' charte' cohuanñpsanet. ¹⁹ Allempoña čačherret alla Canaáno Yomporpa' o' huapore'tatuerran cančherr po'poñe'ttsocma acheñ ñeñť yečha'yestse't all attoch apa'yerran yatañneshañ po'patseñ, e'ñe ñocpuet ama't ñaña puechemereshacpuet. ²⁰ Allempoteñ ñato' cuatrocientos cincuenta charte' o' nanet ñeñťcha' añcha'tarettatsa ñocpuet. Atteñapa' o' čhap allempo orrta ñeñť a'mťaye't Yompor po'ñoñ ahuať, añ pa'so'cheñ Samuel. ²¹ Allempoña acheñeneshapa' enamet Yompor o'ch apanet puešeñarr rey ñeñťcha' nanac añcha'tarettatsa. O' nanet añ pa'so'cheñ Saúl ñeñť Cis puechemer ñeñťara pamo'tsna'tar Benjamín. Añña Saúlpa' o' añcha'tareťta pa'tatsoch čharra' char. ²² Allempoña Yomporpa' o' puerratanñper attoch o'huañ añcha'tareťta Saúlpa' o' alla nerran po'psheñeñ ñeñť pa'so'cheñ David ñeñťara Isaí† puechemer. Añ Davidpa' e'ñe pocte' eñch Yompor ñeñťo'marña atet ot ñocop: “Davidpa' e'ñe attecma cotape'chen atet noctape'chen na neyočhro. Ñeñťo'mar neñoteñ ñapa' o'ch ame'ña'na na e'ñe poctacma.”

²³ Alla oterraneterr Pablo:

—Ñeñť puešeñarr David po'mrenñoť Yomporpa' o' orrtatonay yocop ñeñťey israelena'tarey ñeñťcha' ya'queshpaterre'. Añ pa'so'cheñ Jesús. Te'pa' o' etsota atet otye't Yompor ahuať. ²⁴ Tarraña ama čhena' allem-poch serrpare'tos Jesúsapa' añ ñanom orrtatsa Juanañ. Ñapa' serrpare'te't atet oche't, añ pocte' o'ch yoctape'cherr ello cohuen etserra allempoñapa' o'ch yapatareťta Partsocop. Atet serrpare'tatey allohueneý ñeñťey israelena'tarey. ²⁵ O' e'nuamochan ñeñť po'taruas pa'pa' Juanaññapa' atet otanet: “Napa' ama añeyayno ñeñť soten ñeñťcha' Cristotats. Ñapa' te'pa' ñeñťña nocta'nene' chenta'. Napa' ama esoshe'mano attoch ama't po'sapatrečhapa' o'ch nepyoñ.”

²⁶ Alla oterraneterr Pablo:

—Sapa'tho'ña masheñneshacha' pamo'tsna'tarecmas penes Abraham. Ñaña arro'tsa'yen puešeña'tets acheñ ñeñť mecha'na'tene' Yompor. O'ch notas allohuenes, Yompor o' mueñonay cohuen ñoñets alloch yequeshperra allohueneý. ²⁷ Ama't o' čhap ñeñť Cristotatspa' añña ñeñť jerusaléño'marnesha', ñaña ñeñť pa'm'cha'tareťernesha' penet, ñetñapa' ama esesha' eñotaye. Ama čhapaneto pueyočhreto atet ote't ahuať ñeñť a'mťaye't Yompor po'ñoñ ñeñť chocma lleyenet añ yetro allem-pocma amesenet. Ñeñťo'mar te'ñapa' o' etsotatoñet Yompor po'ñoñ. Te'ñapa' o' pomet Jesús attoch muetset. ²⁸ Ñapa' ama't ama eñalle po'chñar atta otteñe'chet attoch muetsachet. E'ñe attota enamet Pilato

† 13:22 Isaípa' ñeñťara ñeñť sochenet Jesé.

muetsachepa'to'. ²⁹ Allempoña o' etsotatuoñet ora allpon atet aquellcayet ahuatoteñ ñocoppa' o' a'suachet corsocho'tpa' o' net mapuetpono. ³⁰ Tarraña Yomporpa' o' tantater ama't o' rromua. ³¹ Allempoña tantaterpa' allponmat orrtame'tnerrana ñeñt ñanom cota'nmue' Galileot allempon on Jerusaléño. Te'pa' ñetpa' o' a'potoñet atto tanterra Jesús, o' a'potoñet allohuen acheñenesesho.

³² Yapa'cho'ña te'pa' o'ch yeserrpare'tatas samã añ ñeñtara cohuen ñoñets. Ama't ahuat Yomporpa' otane't yatañneshañ atet'cha' ña esempo ³³ te'ñapa' o'cho' etsota yocop ñeñtey yatañneshañ po'mñenñey. O' etsota po'ñoñ allempo tantateran Puechemer Jesús, tarro'mar atet oteney ñeñt Salmos 2, atet Yompor otan Puechemer: "Papa' Nechemerep, te'ñapa' o'ch neñotach acheñenesha' po'ñoñch ñapa' Nechemer nepeneñ." ³⁴ Ama't ahuat Yomporpa' ote't o'ch tantaterpa' amach alla rromuerre'te. Ñeñt'pa' atet oteney añ ñoñets ñeñt ahuatoteñ aquellcayet: "Po'ñoñch o'ch na'nataña ñaña atet na'nacha David." ³⁵ Ñaña po'poñ capítulo Salmos all oten atet: "Yomporpa' amach muenatano Puechemer ñeñt nanac Parets o'ch puetsohua po'chets." ³⁶ Añ ñoñetspa' yeñoteñ ama añecpayaye David tarro'mar yeñoteñ David allempo e'nuan allpon atet muenach Yompor pamo'tsna'tarecoppa' allempoñapa' o' rroma. Allempo rromapa' o' pampuet allo'tsen pa'tañneshañ, po'chetspa' o' puetsohua epuet. ³⁷ Tarraña Jesús po'chetspa' ama puetso ama't coñeta tarro'mar Pomporpa' o' tantater. ³⁸ Ñeñto'marña añ poctetsa o'ch masheñneshacha' señoñ añ Jesús ñeñt atet pena. Ñach yepretnerre' yo'chñar. Ñeñto'mar te'pa' o' neserrpare'tatas. ³⁹ Añ Moisés po'ñoñ ñeñt anaret ahuatoteñpa' amach errotenot yepretnaterro allo yo'chñar. Tarraña te'pa' añña yame'ñeñot Jesús'pa' añepa't alloch e'ñe apretna'huaretterra yo'chñar.

⁴⁰ Alla oterrerr Pablo:

—Te'pa' secuach, o'ch soctape'ch cohuen te't huaponasa ñeñt atet ote't ñeñt a'ñtaye't ahuat Yompor po'ñoñ. Atet otete't ahuat:

⁴¹ Se'mñot ñeñtes achmãre'tets, te't secuanrrorteñoña sechenca'huerra. Te'pa' allempo ora socrrenmeñpa' napa' o'ch norrtatonas ñeñt ama sentare. Tarraña ñato' sapa' amach same'ñyo ama'tcha' serrpare'tataset. Añpa' allohua huañ atet serrpare'tatanet Pablo.

⁴² Allempoña cha'nmaçherret acheñenesha'ñapa' atet ochet Pablo huapuepa'to' po'poñ semana o'ch serrpare'taterraneterr po'pocheño añ yetro allempocma amesenet. ⁴³ Allempo ahuanerretpa' shonte' judionesha' o' cota'huaneret Pablo ñaña Bernabé. Ñaña o' cota'huaner shonte' ñeñt ama judioneshayaye tarraña ñetpa' o' ame'ñatanet judionesha' ahuañacma. Añña Pablo ñaña Bernabé serrpare'tatanet o' cotape'chatanet attoch chocma o'ch cotape'choñet Yompor pomuereña.

⁴⁴ Po'poñ semana o' çherrerr allempo amesenet. Huaçhenerr shonte' acheñenesha' o'ch e'mñoteneterr Yompor po'ñoñ. Autsa ora allohuen acheñenesha' ñeñt yeçhetsa all e'ñe huaçha'tuet. ⁴⁵ Allempoña judionesha' ñeñt ama ame'ñetsopa' o' eñchet shonte' acheñ huaçha'tatsapa', puesope'cheño'tetpa' o' cohuanachet Pablo. Ñeñt atet oten Pablopa' ñetñapa' o'ch otenet ama atteyaye. Nanac achmãre'chet. ⁴⁶ Tarraña ama mecha'to Pablo ñaña Bernabé. O' serrpare'tet huomenc, atet otet:

—Añ poctetsa o'ch yeserrpare'tatas sanom Yompor po'ñoñ, tarro'mar sapa' judionesha. Tarraña ñerra'm sapa' ama semno, ñerra'm ama pocteye' señche attoch sapa' corretsasach e'ñe tayoteñ errponañohuen, amach errot yepaso. Te'pa' añach yeserrpare'tat ñeñt' ama judioneshayaye. ⁴⁷ Tarro'mar atet oteney Yompor po'ñoñot, arr oteney atet:

Napa' o'ch nenas sa atet ñerra'm puetare', sach a'puetarsam̄psats. O'ch sa'puetarsam̄psoñ po'poñ acheñ poctapña ñeñt' ama judioneshayaye. Ama't allohuen acheñenesha' ora allohuanen patspa' o'ch peñotatuanet attoch qeshperret.

⁴⁸ Allempoña ñeñta e'mhuet añ ñoñetspa' añña ñeñt' ama judioneshayaye atarr coshet, nanac cohuen eñchet Yompor po'ñoñ. Allempoñapa' o' ame'ñenet allohuen ñeñt' o' anaretta attoch ñetpa' corretsetach tayoteñ e'ñe errponañohuen. ⁴⁹ Atteñapa' o' epa'hua Yompor po'ñoñ erracmañen. ⁵⁰ Tarraña puesheña'tets judionesha' o' cotape'chachet acheñenesha' attoch o'ch huapore'tateret Pablo ñaña Bernabé. Añña ñeñt' atet cotape'ch coyanesha'chno ñeñt' cohuen entaprete' acheñenesha' tarro'mar añ coyanesha' e'ñe cohuen cotape'che't Partsocop. Ñaña ñeñt' añcha'tarettetsa all, judionesha'pa' o' e'moñe'tachet Pablo ñaña Bernabé. Ñeñto'marña orrtatet atsrre'mueñets o' huapore'tateret Pablo ñaña Bernabé. ⁵¹ Ahuanenetpa' o' pa'shetca'tnenet po'patser pa'tcoñ attoch eñoch judionesha' ama pocteye' entaretteto ñeñt' atet o' p̄ohuet, te'ñapa' amach alla huacherrete'te. Allempoñapa' ahuanmuet ñaña Iconio. ⁵² Tarraña ñeñt' o' ame'ña'hua all Antioquiopa', ñetñapa' nanac coshenet, ñaña o' chorraret Parets Puecamquëñ.

14

Allempo chapuet ñaña anetso pa'so'cheñ Iconio

¹ Allempoña chapuet Iconiopa' o' be'toscha'tet parro judionesha' po'prahuopa' o' serrpare'tatoset all. Nanac cohuen serrpare'tatet ñeñto'marña ame'ñachet shonte' acheñenesha'—ama't judionesha' ñaña ama't ñeñt' griegonesha'. ² Añña judionesha' ñeñt' atpare'tene' Yompor po'ñoñ ñetñapa' toma'tam̄pset Pablo ñaña Bernabé. Nanac sasare'teñet taye'to' acheñenesha' ñeñt' ama judioneshayayepa' cohuen enteññañet atto serrpare'ten. ³ Tarraña ama't e'moñe'tanet patantarr acheñenesha'pa' ñetñapa' ama mecha'teto. Alla atomatet serrpare'tet Yompor po'ñoñ. Orrtatet ñeñt' acheñenesha' ama puentareto ñeñtña eñotatahuet po'ño'ch atto serrpare'tenetpa' añmapa' Yompor pomuereñoñ huapanet añ ñoñets. Yomporpa' nanac ahuanencat panet. ⁴ Atteñapa' añña patantarr acheñenesha'pa' e'ñe cohuen enteñet atet serrpare'tatanet Pablo ñaña Bernabé. Tarraña po'potantañña' ama. Ñetñapa' añña ame'ñatahuet judionesha'. Ñeñto'marña ama patrraye' cotape'chenoña acheñenesha' all. ⁵ Atteñapa' o'pacha shonte' judionesha' ama't ñaña ñeñt' ama judioneshayaye ñaña ñeñt' añcha'taretechnopa' o'pacha o'ch rromuet huomencpa' o'ch rrolle'chet. ⁶ O' e'mare'chet cha o'patarettenetpa' añña Pablo ñaña Bernabépa' o' yeterretpa' ahuanmuet ñaña Listro. Chapuet Listropa' cha asuanmuetpa' o' metet ñaña Derbo. Añpa' ñeñtara anets all otenet Licaonia. Erracmañen chopeñe'chet allo'mar. ⁷ All chopeñe'chnenetpa' all serrpare'tnenet Yompor po'ñoñ.

Allempo chapuet ñaña anetso pa'so'cheñ Listra

⁸ Allempo Listro'tsenetpa' allñapa' allo'tsen puesheñarr acheñ, cha echarrtena pa'tac, ama eshcaye' chope'cheno, ama't ahuatoteñ ñapa' atta eñalletña. Ñaña'pa' alla anen. ⁹ Allña anenpa' alla e'mñotenan atet serrpare'ten Pablo. Pabloñapa' cohue' allapa' o' eñoch añ acheñpa' o' yemtana Yompor ñapa' o'ch a'crrater. ¹⁰ Ñeñto'marña Pablopa' atet och huomenc:

—O'ch notañ, o'ch p'aten.

Ahuepa'tcha' tanta allempocma allorocma cha chope'chnets. ¹¹ Allempo eñch allohuen acheñenesha'pa' cha rrannartet. Pocsheño'etpa' atet otet:

—¡Partsepa't! Ñeñt Parets yepen ñeñtepa't puenasetsa acheñ. Te'pa' o' chap e'ñe yesho. Añpa' atet otet po'ñoñeto ñeñt Licaona'ch.

¹² Añña Bernabépa' o' sochet, atet otet:

—Añepa't ñeñt yeyomporer Júpiter.

Pabloñapa' sochet ñapa' añ ñeñt po'yompor-ret Mercurio. Tarro'mar sochet atet ñapa' nanac serrpare'ten cohuen atet ñerra'm po'yompor-ret Mercurio. ¹³ Ñehua, acheñenesha' allpa' echenet po'prahua' allecmach ma'yochyete't po'yompor-ret ñeñt otenet Júpiter. Ñeñt'pa' e'ñe ñehuapof anaret allempopa' o'ch taya yerrota'nmos pa'netsreto. Ñeñt corneshatets puerahuopa' o' huapa. Huapatan huaquësh, huapatan ñaña shonte' ror. Mueneñ o'ch muetset huaquësh Pablocop ñaña Bernabé'cop tarro'mar chocma muetsete't huaquësh po'yompor-recop. Ñaña tarro'mar atet muenen acheñenesha'. Ñetpa' cha otenapuetañ Pablo ñaña Bernabépa' añte' ñeñt po'yomporer penet. ¹⁴ Allempoña eñoch Pablo ñaña Bernabé ñeñt atet pena acheñenesha'pa' nanac lleca'rrtet. Puellquëño'etpa' o' rrarre'tet pa'shtampa' o' matrra'tet allo'tsa'yen acheñenesha'. O' rrannaretnomuet, puerranarotetpa' ¹⁵ atet otet:

—Eso'marte'ca'ye masheñeshacha' atet sepene. Yapa'cho' arromña'eya attey ñerra'm sa. Ñeñto'marña o' yeserrpare'tatas cohuen ñoñets attotcha' seque'chpuerr ñeñt atet sepene ñeñt e'ñe orrena. Te'pa' añña pochtetsa o'ch same'ñera Yompor ñeñt ama arromña'eshayaye, ñeñtara Yompor ñeñt ye'chcate' enet ñaña pats ñaña ñeñt añecmuen sa'p. Ñaña ora allohuen ñeñt yentyen ento ñaña ñeñt yentyen patsopa' ña ye'chcatue' ñaña ñeñt sapo'tsen ña ye'chcatue'.

¹⁶ Alla oterraneterr Pablo:

—Ahuat Yomporpa' muenatan acheñenesha' o'ch pa'yeset ñeñt atet muena'yenet e'ñe ñañeñeta. ¹⁷ Tarraña ama a'ypo'ñano acheñenesha'. Chocma apanete't attoch eñochet po'ño'ch eñall Yompor. Chocma mueranete't ñeñto'marña chocma huatache't ñocpuet atto' ye'chcanete't puenarmet, atto eñalletete't puerraret atto coshete't. Añpa' ñeñta ñeñt atet otan Pablo allohuen acheñenesha'.

¹⁸ Tarraña ama't atet otan acheñenesha'pa' o' alla muenereterr o'ch muetset huaquësh ñocpuet atet pete't po'yompor-recop. Tarraña Pablo ñaña Bernabépa' ama muenataneto.

¹⁹ O' atomatpa' hua'cha'ta puesheña'tets judionesha' ñeñt huetsa Antioquío' ñaña Iconio'. Rotape'chatoset acheñenesha' po'poñ. E'moñe'tachet Pablo. Atteñapa' colle'chet Pablo. Rrolle'tuetpa' cha otapuetañ o'te' rroma. Chetare'tnomet pueblot a'yenet. ²⁰ Ñeñtña ame'ñatsapa' alla arrotanpeñet alla cohueñetpa' ñaña'pa' ahuepa'tcha' alla tanterra, o' alla

ahuerrerr pueblo. Tsapatñapa' Pablo ñaña Bernabépa' ahuanerret alla Derbo.

²¹ Chapuet Derbopa' serrpare'tuerreterr Yompor po'ñoñ ñaña all. Shonte' acheñ ñeñt' allo'tsen ame'ñenet ñamet. Allempoñapa' ahuanerretterr Listro, ñaña asuerreta' Iconio ñaña Antioquíu. ²² Ora allohuanen ta'yeset yenpuet ñeñt' ame'ñetsa attotcha' huomenc pet pueyoçher. O' cotape'chatanet ñaña attoch chocma yemchet Yompor ama't esempo huapanet mueroçhteñets. Tarro'mar e'ñe yemueroçhteñoç yeçhapcha' all añcha'tarettena Yompor. ²³ O' na'yeset puesheña'tets acheñ ñeñt'cha' pompor pa'yes ñeñt' pame'ñeñoç apcha'yetsa. Puetore'teñoçetpa' o' ma'yocham̄pesyet ñeñt'cha' pompornesha' pa'yeset, atet ochet:

—Yomporepa'ch seyempue', ñeñt'ara Yompor ñeñt' o' same'ña'huerra. Atet pa'yeset ora allohuen anetso all ame'ña'yesa acheñenesha'.

Allempo çhaçherret alla Antioquíu allot ahuanmuet ahuaña

²⁴ Allempoñapa' asuanerret Pisidio'mar allotpa' ahuanerret Panfilio. Cherret anetso ñeñt' pa'so'cheñ Perge. ²⁵ Serrpare'tuerreterr Yompor po'ñoñ all Pergo, allempoñapa' ahuanmuet ñaña Atalio. ²⁶ Chapuet Ataliopa' allotñapa' ahuan̄pset boto, o' alla çhaçherret Antioquíu ñeñt'ara anets allot ahuaña ñeñt' ame'ñetsa all ma'yocham̄psapanet attoch yenpanet Yompor esheccha' etsotoñet po'taruas. Te'ñapa' o' e'nuet. ²⁷ O' çhaçherret allpa' apçhachet allohuen ñeñt' ame'ñetsapa' serrpare'tatueret ora allohuen atto Yomporpa' yenpanet. O' serrpare'tatanet atto Yompor a'pocatanet, añe'na serrpare'tatet ñeñt' ama judioneshayaye, añecop attoch ame'ñerret ñamet. ²⁸ Alla atomatet parropuet ñeñt' ame'ñetsa.

15

Allempo a'pocachet Jerusaléño ñeñt'cha' atet pet

¹ Atteñapa' çhap ñaña acheñ ñeñt' huetsa Judeot. Chapuetpa' o' yeçhatoset ñeñt' ame'ñetsa all, atet otosanet:

—Te'pa' aña sepalltena attoch sequeshperra o'ch setsorranna'ta ñeñtes asheñorres atet yeyçhena ya allempoteñ atet yeçhaterrey Moisés.

² Añña Pablo ñaña Bernabépa' ama pocteye' eñcheto atet. Ñetpa' atet otet:

—Ama po'ñoçhaye' añ palltetso o'ch yetsorranna'ta ñeñtey asheñorrey.

Ñetñapa' alla nanac es otanna'tet. Ama a'pocacheto. Ñeñto'marña allempopa' o' net Pablo ñaña Bernabé ñaña po'poñeçhno acheñ attoch ñetpa' o'ch ahuanmuet Jerusaléño o'ch enteñeta' Jesús puellsensarnesha' ñaña ñeñt' pompornesha' pen ñeñt' ame'ñetsa all. Añecop tet attoch o'ch a'p̄to'teneta' erra'tsenté' pocte' ñeñt'cha' atet pet.

³ O' so'tuanma ñeñt' ame'ñetsapa' ahuanmuet. Arr oñmuet Fencio'mar allotñapa' ahuanmuet Samario'mar. Allña oñemuanmuetpa' all serrpare'tyesnomuet. Añ serrpare'tyesnomuet atto o' ame'ña ñeñt' ama judioneshayaye. Pame'ñeñoçetpa' o' a'ypo'ña'huerret ñeñt' ahuaç poçtap̄ñet. Ñeñt'ña nanac coshate'ña allohuen ñeñt' ame'ñetsa.

⁴ O' çhapuet Jerusaléñopa' e'ñe cohuen agapanet Jesús puellsensarnesha' ñaña ñeñt' pompornesha' pen ñeñt' ame'ñetsa all. Ñaña allohuen ñeñt' ame'ñetsa allpa' o' agapanet e'ñe cohuen. Allempoñapa'

serrpare'tatoset ora allohuen atet yenpanet Yompor. ⁵ Tarraña patantarr fariseonesha' ñeñt ame'ñetsapa' o' tantapa' atet ot:

—Acheñ ñeñt ama't ama judioneshayaye, añ palltetsa o'ch atsorrareta allohuen asheñorrnesha', ñaña allohuenetpa' otarettetepa' añ palltetsa o'ch ame'ñeñañet ñaña Moisés po'ñoñ ñeñt atet anaret ahuatoteñ.

⁶ Ñeñto'marña Jesús puellsensarnesha', ñaña ñeñt pompornesha' pen ñeñt ame'ñetsa allpa' o' apçhet attoch a'pochtchet este' poctetsa ñeñtcha' atet pet. ⁷ Ñeñto'marña alla nanac es otanna'tyeset. Allempoñapa' o' tanta Pedro. Tantapa' atet otanet:

—Sapa' señoñe'tña masheñneshacha' ahuaña Yomporpa' o' na'n na. Añecop na'n o'ch neserrpare'tach ama't ñeñt ama judioneshayaye. O'ch neserrpare'tatanet Yompor po'ñoñ attoch ame'ñerret ñamet. ⁸ Ñehua, Yomporpa' entennay yeyoçher. Ñapa' eñoñeñ ama't añ ñeñt ama judioneshayaye o' ame'ñyet pueyoçhreto. Ñeñto'marña o' chorratanet Puecamquëñ attecma atet chorrenya yaña. Attoña eñotatey e'ñe pocte' entenanet ñamet. ⁹ Ñeñto'mar yeñoñeñ ama yaptayaya morrentenyo Yompor. Añña ama't ñetpa' morrentenanet ama't ñeñt ama judioneshayaye. Pame'ñeñoñetpa' ahuo't e'shohuerranet po'chñar ñeñt pueyoçhro'tsa'yenet. ¹⁰ Te'ñapa' eso'mare'tña ama pocteye' senteñe ñeñt atet o' pòhua Yompor. Añecop ñeñt ame'ñetsapa' eso'mare'tña semneñ o'ch senanet ñeñt nanac torrapo' entenet. Ama't ya judioneshayapa' amach erroteno o'ch yetsotua allohuen ñeñt atet anaret. Ama't yatañneshañpa'cho'ña ama etsotete'te. ¹¹ Añcha'ña yeñot e'ñe Yeparteshar Jesús pomuereñoñpa' o'ch yequeshpa, attecma qeshpet ñamet.

¹² Ñeña e'm allohuen ñeñt apçhatsa allpa' alla moma'rrtet. Atto e'mñoçhet. Bernabé ñaña Pablopa' ña nanac serrpare'tatahuet. Añ serrpare'tatanet atto Yomporpa' nanac ahuañenat panet ahuaña allempo serrpare'teneta' allo'tsa'yen ñeñt ama judioneshayaye. Ñeñto'marña orrtatanet ñeñt ama puentareto ñeñtcha' eñotatahuet añmapa' po'ñoçh Yomporeshot huena. ¹³ O' serrpare'tuetpa' allempoñapa' atet ot ñaña Jacobo.

—O'ch masheñneshacha' se'mñoten naña. ¹⁴ Simón Pedropa' o' serrpare'tatuas atet Yompor te'pa' o' orrtatan pomuereña añecop ñeñt ama't ama judioneshayaye. Ñaña ahuo't orrtatan pomuereña añecop ñeñtcha' ame'ñatahuet attoch aye'choçhtatoñet Yompor pa'so'cheñ ñamet. ¹⁵ Po'ñoçh te'pa' o' etsota ñeñt atet oteney ñeñt a'mtaye't Yompor po'ñoñ ahuañ. Añpa' ñeñt atet quellquë't ahuañ atet ñerra'm Yompor otatse't:

¹⁶ Allempo o'ch meten shonte' charpa' napa' o'ch alla norrtater puesheñarr ñeñt David po'nrenñoñ ñeñtcha' ahuañenattatsa atet ahuañenatte't ahuañ pa'tañ David. Tarro'mar shonte' char ama't puesheñarrapa' ama orrteno David po'nrenñoñ ñeñt nanac ahuañenat.

¹⁷ Añecopcha' norrtater allochñapa' ama't po'poñeçhno acheñenesha' ama't ñeñt ama judioneshayaye o'ch ame'ña'hueret ñamet Yompor, ñaña allohuen erra'tsencha' muenats.

¹⁸ Atet ot Yompor ñeñtara ñeñt eñotatey ahuatoteñ ñeñtcha' atet pa. Añpa' allohua ot ñeñt a'mtaye't Yompor po'ñoñ ahuañ.

¹⁹ Alla oterrerr Jacobo:

—Te'pa' añña e'ñe pocte' nenten na amach ya'mñechatatsche ñeñt' ama judioneshayaye ñeñt' o' puesuerran ñeñt' ahuat poctapña attoch ame'neret Yompor. ²⁰ Te'pa' añña pocte' o'ch yequellcanet ñeñt'cha' ama patsteto ñeñt'pa' añ: Amach rratsteto po'chets ñeñt' muetsenet ayečcataretecop ñeñt' po'yomporer pen ñeñt' ama judioneshayaye ñeñt'ara ñeñt' ama ame'ñetso. Ñaña o'ch yot Janet amach chetapretatsteto taporets. Ñaña o'ch yot Janet amach rratsteto ñeñt' muetsenet ñeñt' atta a'pañaret, ñaña amach rratsteto ñeñt' ño'shetsa oño. Ñaña amach es rratsteto es po'rras.

²¹ Alla otterr Jacobo:

—Añpa' ñeñt'ach atet yequellcanet. Tarro'mar ahuatoteñ o' serrpare'tuoñet Moisés po'ñoñ ora allohuen anetso'mar. Ñaña pate'tets semana añ judioneshap'a' čhocma lleyeññañet Moisés po'ñoñ all po'prahueto. Añpa' allohua atet ot Janet Jacobo.

²² Allempoñapa' o' a'pochtachet o'ch net puesheña'tets ñeñt' e'ñe allo'marnesha' ñeñt'cha' mueñet Antioquío, o'ch coteret Pablo ñaña Bernabé. Atetpa' e'ñe pocte' eñch allohuen—Jesús puellsensarnesha' ñaña ñeñt' pompornesha' penet, ama't ñaña allohuen ñeñt' ame'ñetsa all. Añ net Judas Barsabás ñaña Silas. Añña epsheña acheñpa' e'ñe cohuen eñch allohuen ñeñt' ame'ñetsa. ²³ Ñetpa' o' anmuet, ñeñt' atet oten carta:

“Masheñeshacha' ñeñtes yečhetsa anetso Antioquío ñaña Sirio ñaña Cilicio: Allohueny ñeñtey ame'ñetsa o'ch yehuom'cha'tas sa añ yecartot—ñeñtey Jesús puellsensarneshay ñaña ñeñtey pompornesha' pen ñeñt' ame'ñetsa arr. O'ch yehuom'cha'tas sa ñeñtes ame'ñetsa sam'a ñaña ama't ñeñtes ama judioneshayaso. ²⁴ O'ch yotas, yapa' o' ye'mare'ch o' čhap sesho puesheña'tets acheñ arroť ñeñt' muenets o'ch a'mñechatasa. Ñetñapa' o' nanac moññe'tatasa soctapña. Tarraña te'ñapa' o'ch yotas, añ acheñpa' ama yaye' mueñenaye. ²⁵ Ñeñto'mar pocte' yenteñ allohueny o'ch yene' epsheña acheñ ñeñt'cha' yemñonas epuet Bernabé ñaña Pablo ñeñt' nanac yemuereña. ²⁶ Tarro'mar nanac yemorrenenanet ahuañapa' all serrpare'teneta' autsañ muene' amtsanataretetuet all. Tarro'mar e'ñe puemorrenetñoťet Yepartseshar Jesucristo atet a'parettet. ²⁷ Añ yemñonas Judas ñaña Silas. Ñetpa' o'ch serrpare'tatenseta' ora atet yoten ya arr. ²⁸ Parets Puecamquēñpa' o' eñtotatey ñeñt' e'ñe pocte' yenten ñeñt'cha' yenonas. Amach añña yenonaso ñeñt' nanac torrapo'. Te'pa' añ palltetsa ñeñt'cha' atet sepa. ²⁹ Amach serratsto po'chets ñeñt' muetsenet ayečcataretecop ñeñt' po'yomporer penet. Ñaña amach serratsto ñeñt' muetsenet ñeñt' atta a'pañaret. Ñaña amach serratsto es po'rras. Ñaña amach sechtapretatsto taporets. Ñerra'm amach atet sepo ñeñt'pa' e'ñech pocte'. Añpa' ñeñt'ach yotas. Yomporepa'ch sa'nataya.” Añpa' allohua huañ ñeñt' atet oten carta.

³⁰ Allempoñapa' o' mueñet Judas ñaña Silas epuet Pablo ñaña Bernabé. O' ahuanerret Antioquío. Čačherret Antioquío'pa' o' apčhatuet allohuen acheñenesha'pa' o' aposanet añ carta. ³¹ Ñeñt' apčhatsapa' o' lleyet añ carta. Lleya'huetpa' nanac coshatanet ñeñt' atet actape'chatarettet cartot. ³² Añña Judas ñaña Silas, ñetpa'čho'ña nanac a'potoñet Yompor po'ñoñ ñamet. Ñetpa'čho'ña a'ñitenet Yompor po'ñoñ. Nanac serrpare'tatet. O' cotape'chachet e'ñe cohuen ñeñt' ame'ñetsa allochñapa'

huomenccha' pet pueyo'cher. ³³ O' allponmatet allpa' allempoñapa' secherret allo' amñare'ttet ahuaña. Ñeñt' ame'ñatsa Antioquíopa' o' so'tneret e'ñe cohuen, otanet:

—Yomporepa'chña ya'nataya parro allohueney.

³⁴ Tarraña Silaspa' mueneñ o'ch a'pa all, Judaspa' o'ch ahuer. ³⁵ Añña Pablo ñaña Bernabé allponmaterret Antioquí. Ye'chatapretereta' epuet po'poñe'chno ñeñt' ye'chatets all. Serrpare'tapretereta' Yompor poñoñ epuet po'poñe'chno.

Allempo puepocheño ahuererr Pablo serrpare'tats allemeñ anetso'mar

³⁶ Atteñapa' o' atomat Pabloñapa' otan Bernabé:

—O'ch ahuerrey, o'ch ya'chera' ñeñt' ame'ñetsa ora allohuen anetso all yeserrpare'toñ Yompor po'ñoñ ahuaña attoch ye'noch errotene'te'ña te'.

³⁷ Bernabéñapa' aña e'ñe pocte' ent o'ch cota'ner Juan Marcos. ³⁸ Tarraña Pablopa' ama pocteye' eñche tarro'mar ahuaña allempo chapuet Panfilio, Juan Marcospa' cha sa'nerranet, o' puerrerra. Ama allo'na yenpuenaneto all serrpare'tyeset. ³⁹ Ama erroteno a'pochtacheto, cha sa'nannerret. Bernabépa' aña aner Marcos. O' ahuan'pset boto, cha'cherret Chipro. ⁴⁰ Pabloñapa' aña e'ñe pocte' ent o'ch anerran Silas. Ñeñt' ame'ñetsa allpa' o' so'tneret, e'ñe cohuen otneret:

—Yompor e'ñe pomuereño'tpa' a'natyepa'ch.

Allempoñapa' ahuanenet. ⁴¹ Asuena'ta' Sirio'mar ñaña Cilicio'mar. Allo'tñapa' yenpuet allohuen ñeñt' pame'ñeño't ap'chetsa parro. O' yenpuet añecop attoch huomenccha' pet pueyo'cher.

16

Allempo Timoteopa' cota'nerran Pablo ñaña Silas

¹ Pablo ñaña Silaspa' asuerreta' anetso añ pa'so'cheñ Derbe. Allo'tñapa' ahuanerret alla Listro. Allñapa' allo'tsen puesheñarr aheñ ñeñt' ame'ñetsa añ pa'so'cheñ Timoteo. Ñeñt' Timoteopa' añ pachor pen judionesha' ñeñt' ame'ñetsa. Pomporñapa' ama judioneshayaye aña griegonesha'. ² Ñeñt' ame'ñetsa Listro ñaña Iconiopa' nanac cohuen enteñet Timoteo. ³ Ñeñto'marña e'ñe pocte' eñch Pablo o'ch cota'nerranet Timoteo. Tarraña ato'tña anemhueta' allcha' tsorreñet atet ye'chena joreyonesha', tarro'mar allcha' tetpa' shonte' judionesha'. (Ñehua, Pablopa' ama mueno o'ch atsrre'mach judionesha'.) Allohuenetpa' o' eñotuet ñeñt' Timoteo pomporpa' ñeñt' ama judioneshayaye aña griegonesha'. ⁴ All oñomyeset allemeñ añetsopa' otuosanet añ ñoñets atet a'pocstat Jesús puellsensarnesha' ñaña ñeñt' pompornesha' penet Jerusaléño. Añ eñotatuosanet ñeñt'cha' atet pet. ⁵ Atteñapa' allohuen ñeñt' ame'ñetsapa' e'ñe pame'ñeño'tet allo'na senet huomenc pa'nmuet pueyo'cher. Pate'tets yetpa' allo'na sen atonetnomtsa ñeñt' ame'ñetsa.

Allempo Pablopa' entan macedonio'marnesha' atet ñerra'm cho chopo'teñ

⁶ Allempoñapa' arr asuerreta' ñaña Frigio'mar ñaña Galacio'mar tarro'mar Parets Puecamquëñpa' ama muenataneto o'ch serrpare'toñet Yompor po'ñoñ all Asio'mar. ⁷ Allempoñapa' ahuanmuet ñaña tenonet, chapmochet Misio ñaña arr sechet Bitinio'mar, tarraña Jesús

Puecamquëñpa' ama muenataneto. ⁸ Atteñapa' metuet Misio'mar o' čhača'tet Troaso. ⁹ Čhača'tet Troaso tsapoñapa' añña Pablopa' orrtoña atet ñerra'm čho es yečhopo'ten. Atet ñerra'm puečhopoñotpa' o' entan puešeñarr acheñ macedonio'marnesha' alla ten, atet otare'ch: "O'ch sonača't arr Macedonio, o'ch seyenpuenya'." ¹⁰ Allempoña erрте' orretuoña macedonio'marnesha'pa' yañapa'* o' yesecha o'ch ahuey Macedonio, tarro'mar yoten po'ñochte' čhore'teney Yompor allochñapa' o'ch yeserrpare'teññaña' po'ñoñ all Macedonio.

Allempo čhap Pablo ñaña Silas Filiposo

¹¹ Allempoña Troasotpa' año ahuañpsey boto. E'ñe pačharra yepe' o'ch yečhap anetso añ pa'so'cheñ Samotracia. Allñapa' all yetsotnoma. Yahuanerrerr allotpa' tsapatñapa' o' yečhap ñaña anetso Neápolis. Allñapa' all yetsoturrer. ¹² Yahuanerrerr allotpa' o' yečhap ñaña anetso añ pa'so'cheñ Filipos allpa'čho' all yetsotosa. Añ anets Filipospa' nanac atarr anets. Po'poñečhno anets alla Macedonio'marpa' ama atarroyaye. Allñapa' allo'tsa'yen shonte' solltarnesha' ñeñt romo'marnesha'. Yapa' alla ya'llponmatos all. ¹³ Allempoña čhap allempo amesen judionesha'pa' yañapa' yahuanma anetsot a'yo. O' yečhap ontapo all ye'nen ñato' allcha' ma'yochet. Yaña allpa' yentos puešeña'tets coyaneshačhno all anorrčhenet. Yañapa' o'čho' yanorrčha'tos yaña. Allempoña yapa' yeserrpare'tatanet Yompor po'ñoñ. ¹⁴ Puešeñarr coyanesha' ñeñt allo'tsen añ pa'so'cheñ Lidia ñeñt huetsa anetsot añ pa'so'cheñ Tiatira. Ñañaapa' añña po'taruas pen atto vendenan shetamuets yetsñorromamuen. Ñañaapa' ame'ñenana Parets. Allempoña e'mñnotan Pablo ñeñt atet serrpare'ten añña Yomporpa' o' čhapatoñ pueyočhro ñeñt atet serrpare'ten Pablo. ¹⁵ Lidiaña pame'ñeñotpa' allenta apataretta, ñaña o' apataretta ñeñt parro yečhenet pocollo. Ñañaapa' o'čho' hua'ña nerrey pa'paclo, atet ot:

—Ñerra'm e'ñe pocte' sentenen atto name'ñera Yepapar, o'ch sehuapa nepaclo ñato' allcha' sommosa.

Ñañaapa' otare'tey yonepa'to' ñeñto'marña yapa' o' ahuey.

¹⁶ Parrochñapa' allempo yeta ontapo allecma ma'yochenet toñoñapa' yentnom puešeñarr shopshesha' ñeñt chorrena oneñeť. Añña oneñeťpa' ñach eñoratene' shopshesha' ñeñto'marña ñerra'm erroten otanetpa' atto'ččho' pa. Amach pueno po'ñoñ ama't mamesha. Añña shopshe-sha'pa' eñall ñeñt pamo'mte' pen po'poñečhno acheñ. Ñetñapa' nanaccha' ganatenanet quelle atto eñotañtena. ¹⁷ Ñañaapa' chocmach cota'nomye't epay Pablo. O'ch cota'nmueypa' o'ch rranare'tnoma chenta'pa' atetcha' ot:

—Añ encaneshachnopa' añ sherbenet Yepapar Ñeñt Nanac Parets. Arrpa' añecop huenet atfoch o'ch serrpare'tataset atfoch sequeshperra.

¹⁸ Atteñapa' ama't atomatpa' attecma pena. Atteñapa' o' a'mñechatana Pablo. Pabloñapa' allenta puetallsapa' o' otan oneñeť:

—Te'pa' e'ñe po'huamencot Jesucristopa' o'ch notap, pequečhpa'ner shopshesha'.

Allempocmuepa'tcha' quečhpa'nerran shopshesha'.

¹⁹ Añña pamo'mtaynesha'pa' cotape'chetpa' otet:

—Te'pa' llequëñtsa, o' huañerr allo yeganena quelle.

* **16:10** Ñehua, e'ñe allempocmapa' o' cota'nmanet ñaña Lucas, ñeñtara ñeñt quellquë' añ ñoñets.

Allempoña pa'tsrre'mueñoŕetpa' o' rromuet Pablo ñaña Silaspa' anmarettet e'ñe po'huamencocma, o' ačhapatarettet allo'tsa'yen anča'taretnesha' allecam a'pocŕateneŕet ñeñets. ²⁰ Allempoña ačhapatarettet allo'tsa'yen guardia pa'mča'taretnesha'pa' o' otoset:

—Añmapa' ñeñŕet judionesha'. Nanac atrsrre'moçhteneŕet arr ya'netsro. ²¹ Ñetpa' yeçhatenyet atet yeçhenet ñet ñeñŕetpa' ama pocŕeŕe' yenteñe ya. Yapa' romo'marneshaypa' ama cohuen yenteñe o'ch atet yeŕa.

²² Allohuen ačeñenesha'pa' nanac atrsrre'mateñet. Ñeñŕet guardia pa'mča'taretnesha'pa' atet otan pueyochreŕa':

—Te'pa' o'ch serrotanetpa' o'ch senallanet.

²³ Allempoña'pa' o' nallet Pablo ñaña Silas nanac huomenc. Allempoña o' anallaretuetpa' o' abe'tarettet ñaña cárcel; atet ochet ñeñŕet cohuañpene' cárcel:

—O'ch secuañpsanet e'ñe huomenc.

²⁴ Allempoña atet otaretuetpa' añña ñeñŕet cohuañpene' cárcelpa' o' abe'tanet nanac o'pono. Allña'pa' nanac echarr pañpsanet ñaña o' arrmatañpsarettet pa'tcoŕ tablat e'ñe echarr.

²⁵⁻²⁶ Atteña'pa' o' ma'yocha Pablo ñaña Silas. Ñaña o' morrechet, pueorrecheñoŕetpa' nanac aye'choçhtateññañet Yompor. Añña po'poñeçhno ačeñ ñeñŕet abe'tareŕet ñaña allpa' ñetña'pa' o' e'mñotanet. Allempoña çhap rroçh tsappa' machayoŕetpa'tcha' pella pats nanac huomenc, ama't allo' tomatanet echarr cárcelepopa' çha pa'shma huomenc. Puepelleñoŕet pats huomencpa' o' torna'tua ora allpon all ayottañpsarettet. Ñaña ora allpon allo huanqueñet ačeñpa' o' pueyna'tuen. ²⁷ Allempoña ahuo't e'mansa ñeñŕet cohuañpene' cárcelepopa' ahuo't entan o' torna'tuen allo ayottañpsarettetpa' o' çhetan po'çhell o'ch muetsa ñañeña. Ñapa' cho' otapañ ñeñŕet ayottañpsarettetpa' o'te' yetuena. ²⁸ Añña Pablo'pa' o' çhore'ch huomencpa' atet och:

—Amach erroŕ peŕatsto ama't mamesha. Yapa' allo'tsa'yenya allo-hueney.

²⁹ Allempoña'pa' añña enamnom lampareña'pa' mata allo'tsen Pablo ñaña Silas. Pueñchañoŕetpa' çha pa'shmuena ñaña e'ñe pueñcha'na'teñoŕetpa' o' concorposa e'ñe ñesheto. ³⁰ O' çha'nmaçha'tatanetpa' atet otanet:

—Nomporneshacha' ¿eŕe'ña pocŕe' te' ñeñŕetpa' atet neŕa attoch nequeshperra naña?

³¹ Ñetña'pa' atet ochet:

—Añ pocŕe' o'ch pa'me'ñera Yepartseshar Jesucristo, allochña'pa' attoch pequeshperra. Ñaña attoch queshperra ñeñŕet parro peyçhena pepaclo.

³² Allempoña ñeñŕet cohuañpene' cárcelepopa' o' a'seçhrranet pa'paclo, allña'pa' serrpare'tachet Yompor po'ñon, ñaña allohuen ñeñŕet pa'paclo'tsen o' e'mñotet ñamet. ³³ Allempocma ñeñŕet tsaprocma o' e'pana'tyerranet all atserrparettet. Allempoña'pa' o' apatareŕta ña, ñaña allohuen ñeñŕet pa'paclo'tsa'yenpa'cho'ña o' apatareŕtet ñamet. ³⁴ A'tapatanet pa'paclo'pa' rrananet. Pame'ñeñoŕet Yompor atarr nanac cosha. Ñaña allohuen ñeñŕet pa'paclo'tsenpa' atarr coshet ñamet.

³⁵ Tsapat puetarenpa' añña guardia pa'mča'taretnesha' o' mueñet pueŕheñarr guardia, ñeñŕetpa' otosets:

—O'ch sa'rroyer Pablo ñaña Silas.

³⁶ Ñeñt' cohuanñpene' cárcelpa' atet otan Pablo:
—Oten añcha'taret secha'nerrepa'to'. Te'ñapa' orrerres,
Yompore'pach sa'nataya.

³⁷ Tarraña Pabloñapa' atet otanet:

—Yapa' romanona'tarey yañá. Ñeñt' ñoñets anaret Romotpa' oten ama pocteyaye o'ch yecoñchach acheñ ñerra'm ama yeñoteña' po'ñoçhte' eñall atto otteñe'cheñet acheñ. Tarraña añña añcha'taretñesha' ama e'nano ñeñt' e'ñe po'ñoçh atet yepena. Atta nallatyet allo'tsa'yen shonte' acheñenesha' allo'tñapa' o'cho' atfa yottamñpsatyet arr cárcelo. Te'ña ñetpa' mueneñet o'ch cha'nmaterryet e'ñe a'nahua. Ñeñtpa' ama pocteyaye atet. Te'pa' o'ch sotuer añcha'taret huapuetepa' arr cha'nmaterryetepa' e'ñe ñet.

³⁸ Añña guardiapa' otuerran pa'mícha'tareternesha' atet oten Pablo. Ñetñapa' cha'yorenet allempo e'mare'chet ñetpa'cho'ña romanona'taret ñamet. ³⁹ Allempoña huacha'tetpa' enamaretterret peretneñets. Allempoña cha'nmatenanetpa' atet otanet:

—Te'pa' orrerres, sahuannerra ñachayo.

⁴⁰ Allempoña cha'nenet cárcelo'pa' ahuanerret o'ch alla a'chereta' Lidia. Allempoñapa' serrpare'tuerret parro ñeñt' ame'ñetsa, cotape'chatuanerret cohuen, allempoñapa' ahuanerret allot.

17

Allempo chap Pablo ñaña Silas Tesalónico

¹ Allempoña ahuanerret allotpa' ahuanmuet anetso Anfípoliso, allotñapa' ahuanmuet ñaña anetso Apolonio. Allotñapa' o' chapuet ñaña anetso ñeñt' pa'so'cheñ Tesalónica. Allñapa' allo'tsen judionesha' po'prahua'. ² Pabloñapa' o' be'tosos ñeñt' attecma pena. Allñapa' serrpare'tatanet Yompor po'ñoñ. Allñapa' ma'panerr semana. Allempoña çhen yet allempo amesenetpa' o'chcho' serrpare'tatanet Yompor po'ñoñ ñeñt' atet aquellcaret. ³ Allpa' añ yethatanet atet anaretta ñeñtcha' Cristotats ñerra'm esempoch huapa añ patsropa' nanaccha' mueroçhtachet. Tarraña o'ch mueroçhtatuetpa' elloch alla tanterra ama'tcha' rroma. Atet otanet:

—Te'ñapa' o'ch notas, añ Jesús ñeñfara ñeñt' o' neserrpare'tatuaspa' ñeñtña Cristotets.

⁴ Puesheña'tetspa' pocte' eñchet o' ame'nyet Jesús ñeñto'mar ñetpa' yemteñet Pablo ñaña Silas. Ñaña shonte' griegonesha' ñeñt' ahuatoteñ cohuen cotape'chets Partsocoppa' o' ame'ñeñet Jesús. Ñaña shonte' coyaneshaçhno ñeñt' e'ñe cohuen entyen acheñenesha' ñetpa'cho'ña o' ame'ñerret ñamet. ⁵ Judionesha'ña ñeñt' ama ame'ñetsopa' ama pocteye' enteñeto attoch acheñenesha'pa' o'ch yemchet Pablo, ñeñto'marña puesope'cheño'tetpa' o' e'moñe'chet. Ñeñto'marña a'sechet puesheña'tets acheñ ñeñt' ama tama es sherbetso ñeñt' atfa ellapetset anorrets all shontena acheñenesha'. A'sechet o'ch apçhachet shonte' acheñ attoch e'moñe'tachet Pablo. Ñetña pa'tsrre'mueño'tetpa' ahuanmuet Jasón pa'paclo all a'posa Pablo ñaña Silas. O'pachet errotenotpa' o'te' cha'nmachatet a'yot attoch acheñenesha'pa' o'ch rromuet. ⁶ Allempoña cha'cha'tet Jasón pa'paclopa' tarraña ama entaretto. Ñapta rromuet Jasón ñaña po'poñeçhno acheñenesha' ñeñt' ame'ñetsa.

Ñetaña anmarettatset añcha'taretsho. Pa'tsrre'mueñoŕetpa' nanac ama'toçhetnomuet attotaçho' çhapuet allo'tsen añcha'taretnesha'. Allña'pa' atet otoset:

—O' çhap acheñ ñeñ muenene' o'ch a'po'poñeterrnay yocapña. Atto' pohanmuet ama't po'poñ anetso'mar, te'pa' o' çhapuet ñaña arr.

O' alla oterreterr:

—Añ Jasónpa' o' agapanet e'ñe cohuen te'pa' ñaña pa'paclo a'puenet. 7 Ñetpa' ama pocteye' enteñeto atto añcha'taret o'ch nan ñoñets all anetso Romo. Ñetpa' añña otenet eñallo' po'poñ añcha'taret ñeñ nanac ahuamencat ñeñtpa' año' pa'so'cheñ Jesús.

8 Acheñenesha'ñapa' ñeñña e'muetpa' nanac atsrre'muet ñaña ama't añcha'taretnesha'. 9 Allempoña Jasón ñaña po'poñeçhno acheñpa' o' ayorampsarettet allpon po'çllayoret. Allo'tpa' otarettet:

—Añ quellepa' allach yapuerres ato't ahuerra' Pablo ñaña Silas.

Allempoñapa' a'rroyeret Jasón ñaña po'poñeçhno acheñ.

Allempo çhap Pablo ñaña Silas anetso Bereo

10 Allempoña acheñenesha' ñeñ ame'ñetsapa' o' mueñeret Pablo ñaña Silas Bereo. Tsapocma amñareñtenet a'nahua. O' çhapuet Bereopa' be'tosçha'toset judionesha' po'prahuo.

11 Añña judionesha' ñeñ Bereo'tsa'yenpa' ñetñapa' e'ñe cohuen cotape'chenet ama atteyayeto atet ñerra'm judionesha' ñeñ Tesalónico'tsa'yen. E'ñe pocsheñesha' e'mñotoñet Yompor po'ñoñ, allotña ñetpa' o' e'nyeset Yompor po'ñoño all aquellcayet ahuatoteñ. Tarro'mar ñetpa' mueneñet o'ch eñoçet ñato' po'ñoçhte' atet serrpare'ten Pablo ñaña Silas. Pate'tets yetpa' attecma pete't. 12 Ñeño'marña shonte' acheñenesha' ñeñ ame'ñatsa. Shonte' ñaña coyaneshaçhno ñeñ griegonesha' ñeñ nanac sherbetspa' o' ame'ñenet ñamet. Ñaña po'potantañ shonte' yacmanesha' o' ame'ñenet. 13 Añña judionesha' ñeñ yeçhetsa Tesalónicopa' o' e'mare'çhet Pablo o' alla serrpare'tuerranerr Yompor po'ñoñ ñaña Bereo. Ñeño'marña huacha'tet ñamet all attoch atsrre'mataçhet acheñenesha' o'ch e'moñe'taçhet Pablo. 14 Añña acheñenesha' ñeñ o' ame'ñapa' o' mueñet Pablo tepa'to' ontapo allo'tsen sa'p atarr. Añña Silas ñaña Timoteopa' alla a'pa Bereo. 15 Puesheña'tets acheñpa' o' cota'nmet Pablo. Ñetpa' alla neñeta' Pablo anetso ñeñ pa'so'cheñ Atenas. Allña so'tanna'tuet Pabloñapa' atet otanet:

—O'ch sotuer Silas ñaña Timoteo onetepa' ñamet e'ñe tayecma.

Allempo çhap Pablo ñaña Silas Atenso

16 Pabloñapa' alla cohuanet Atenso. Allña cohuanetpa' shonte' entosan ayeçhcatareteçhno all Atenso, ñeñ po'yomporer pa'yen acheñenesha'. Ñaña'pa' nanac llecachet. 17 Pabloñapa' mueneñ o'ch be'tos judionesha' po'prahuo attoch serrpare't epuet parro judionesha' ñaña po'poñeçhno acheñ ñeñ cohuen cotape'çhets Partsocop. Pate'tets yetpa' o'chçho' ahuo' all shontena acheñenesha' pueblo allña'pa' o'chçho' serrpare'tet parro ñeñ allo'tsa'yen. 18 Parroçhpa' añña huapatsa ñeñ ame'ñenaya Epicuro poçapña, allotpa' o' huapa ñaña ñeñ ame'ñenaya po'poñ cotapñats ñeñ otenet estoico. Ñetñapa' atet otet:

—¿Esté'ca'ye cotape'chenña añ acheñ ñeñ atta nanac eñets?

Po'potantañña'pa' atet otet:

—Ñato' ańte' muenen o'ch ye'chatey po'poñ po'yomporer ñeñt' ama yentare ya.

Tarro'mar Pablopa' añ serrpare'tatenanet atet' pena Jesús ñaña ama't atto tanterra Jesús. ¹⁹ Ñetñapa' o' anmet Pablo all oteñet Areópago allecma ap'chena eñotañnesha'. Allñapa' otoset:

—Ñehua, te'pa' o'ch p'otey este'ña p'octape'chen pa. Yapa' te'pa' yemneñ o'ch yeñoch. ²⁰ Tarro'mar ñeñt' peserrpare'tenpa' ama ye'mare. Yapa' yemneñ o'ch yeñoch este' nanac p'oten.

²¹ Ñehua, allohuen atenso'marnesha' ñerra'm añ serrpare'tats ñeñt' ama puentaretopa' ellapenetcha' e'mñotet. Ñeñt'ach paterr ma'yochret. Ñaña ñeñt' ye'cha'huerra Atensopa' ñeñt' huapyetsa po'poñ anetso'tpa' te'pa' atfa penet ñamet.

²² Allempoña Pablopa' tomos rro'cho all oteñet Areópagopa' atet otanet:

—Atenso'marneshacha' napa' neñotenes sapa' aña atarr sema'yochrena ñeñt' seyomporer se'pa'yen. ²³ All nasuanempa' shonte' nentyesnom ñeñt' sema'yochyena ñeñt' seyomporer sepen. Paterr allecma sema'yochenapa' napa' nent all oten añ ñoñets: “Añpa' añecop Yompor ñeñt' ama yeñotena'.” Ñeñt' sema'yochena ñeñt' ama señotena'pa' ñeñt'ara Yompor te'pa' ñeñt'cha'ña neserrpare'tatas.

²⁴ ‘Añ ñeñt'ara Yompor ñeñt' ye'chcate' añ pats. Ñaña ye'chcatan allohuen ñeñt' yentyen aña patsro. Ña Pamo'mte' pen enet ñaña pats. Ñeñto'marña ya ñeñt'ey arromñateypa' ama pallteno o'ch yeye'chcatoñ allcha' ye'cha. ²⁵ Ñaña ama pallteno o'ch es ya'p. Ñocop ama es pallteto. Elloña ñaña yapuene' allohueney atto yocrrena, apuene' ñaña atto yo'rrerrena. Ñapa' apuene' ora esocmañen.

²⁶ ‘Ora allpon pa'namen acheñ ñeñt' ye'cha'yetsa aña patsro Yomporpa' ña ye'chcatue' e'ñe pue'sheñarroña acheñ. Ñapa' o' nohuanet e'ñech allem-pohua corra'yaset. Ñaña o' na'yeanet e'ñech erra ye'cha'yaset aña patsro. ²⁷ Tarro'mar Yomporpa' ye'chcatan pa'namen acheñ tarro'mar añ cotape'ch allochñapa' allohuen acheñpa' ñerra'm e'ñe aco'pa e'neretpa' po'ño'chpa' enteretcha'. Ñapa' allame'ttso'tsenate' yeshot. ²⁸ Tarro'mar e'ñe ñeshof te'pa' yocrrena ñaña e'ñe ñeshofpa' ye'chope'chen, ñaña e'ñe ñeshofpa' ye'ñalleta. Ama't atet quellquë't' ahuat pue'sheñarr samo'ts sa ñeñt' etsotaye't' ñoñets. Añmapa' ñeñt' quellquë't' samo'ts ahuat: “Te'ña po'ño'ch Yomporpa' pue'chemeresha' peney.”

²⁹ Alla otererr Pablo:

—Ñehua, ñerra'm po'ño'ch Yompor pue'chemeresha' peney ya, ama p'octeyaye o'ch yoch Yomporpa' arrot aye'chcataret' orot, amapa' arrot aye'chcataret' asreto't, amapa' arrot aye'chcataret' mapyot. Añmapa' ñeñt' aye'chcataret'pa' e'ñe ya yoc'tapñota aye'chcataret', atet es yetma'ntatena ya. ³⁰ Ahuat acheñpa' ama't ama eñotenano ñeñt' cohuentetsa Yomporcop, Yomporpa' amach errot p'aneto. Tarraña te'ñapa' otene' yoc'tape'cherrepa' ello cohuen Yomporcop, allohueney acheñey ñeñt'ey corra'yetsa aña patsro. ³¹ Yomporpa' tarro'mar mueneñ o'ch yoc'tape'cherret' etserra tarro'mar ñapa' o' ne' esempoch allohueneypa' yorrterrach ñesho. Te'pa' o' nan Jesús ñach acerre' allohuen acheñ ñeñt' e'ñe po'ño'ch atet pete't. Acrancha' ñeñt' cohuen acheñ ñaña ama't ñeñt' ama cohueno acheñ. Ñeñto'marña te'pa' o'

eñotatuay Jesúsapa' ñach acrerrets tarro'mar Pomporpa' o' tantater ama't o' rromua ñaña Jesúsapa' e'ñe pocte' es pen. Te'pa' o' eñotatuay allohueny acheñey.

³² Allempoña serrpare'tan Pablo attoch yetanterra ellopa' añña puesheña'tets acheñpa' o' achm̄are'chet. Tarraña po'potantaññapa' atet otet:

—Ñehua, ñato' esempochña ye'mñoterrperr po'pocheño.

³³ Allempoñapa' ahuerr Pablo. ³⁴ Tarraña puesheña'tetspa' yemchet Pablo ñaña o' ame'ñet. Añña puesheñarr ñeñt ame'ñatsa añ pa'so'cheñ Dionisio ñeñtara ñeñt am̄cha'tarettetsa ñeñt a'pocstatene' ñoñets all oteñet Areópago. Ñapa' o' ame'ña, ñaña po'psheñey coyanesha' ñeñt pa'so'cheñ Dámaris. Ñaña po'poñechno acheñ o' ame'ñet ñamet.

18

Allempo chap Pablo Corinto

¹ Allempo ahuo' ñaña anetso all oteñet Corinto. ² Chap Corintopa' entosan puesheñarr judionesha' añ pa'so'cheñ Aquila. Ñapa' errte' huetsa Italiot epuet puetapor ñeñt pa'so'cheñ Priscila. Año'mar huenet Italiot tarro'mar am̄cha'taret Claudiopa' o' nan paterr ñoñets all Italio. Ñeñtpa' atet ot: Allohuen judionesha'pa' ahuanerretepa'to' Romot. Aquilapa' arr eñalletña Ponto. Pabloñapa' ahuo' o'ch entenana' Aquila epuet puetapor. ³ Ñetpa' ñeñña po'taruas penet atto ye'chcatenet shetamtso'po'. Pabloñapa' alla a'pa epuet attoch taruaset parro. ⁴ Pate'tets semana allempo then yet allempo amesenet Pabloñapa' o'ch'cho' ahuo' judionesha' po'prahuo. Allñapa' allcha' serrpare't epuet judionesha' ñaña ñeñt ama judioneshayaye. Ñapa' atarr mueneñ o'ch ame'ñatanet.

⁵ Allempoñapa' huapa ñaña Silas epuet Timoteo. Taya huapuet Macedonio't. Allempopa' añ nanac torrena Pablo serrpare'te'. Ñapa' añ eñotatenan judionesha' Jesúsapa' ñeñtaraca'ye Cristoterrets ñeñt atarr cohuenet ahuatoteñ. ⁶ Judionesha'ñapa' nanac e'moñe'chet Pablo, o' achm̄are'chet. Allempoña Pablopa' o' pa'shman pa'shtam attoch eñochet nanac atpare'tenet. Allempoñapa' atet otanet:

—Sapa' sañeñach a'chencatuerrtsa. Tarraña napa' amach es seyohua'no. Te'pa' tayoteñ añach neserrpare'tat ñeñt ama judioneshayaye.

⁷ Allempoñapa' ahuerr. Chap añ ñeñt pa'so'cheñ Justo pa'paclo ñeñt ame'ñenaya Yomp. Pa'paquellpa' allame'ttso'tsen allo'tsen judionesha' po'prahua'. ⁸ Ñeñt am̄cha'tarettetsa judionesha' po'prahuo ñeñtpa' añ pa'so'cheñ Crispo. Crispopa' o' ame'ñerrana Yepartseshar Cristo ñaña allohuen ñeñt pa'paclo'tsen. Shonte' corinto'marnesha' e'mñotoñet Yomp por po'ñoñ, o' ame'ñerret ñaña o' apatarettet Yomporecop. ⁹ Atteñapa' orrtoña Pablo atet ñerra'm cho es ye'chopo'ten. Yomp porpa' ahuo't otan Pablo:

—Amach pem̄cha'tatsto, chocmach peserrpare't, amach atta pemamtetatsto. ¹⁰ Napa' o'ch necuan̄pene'p attoch amach esesha' erro't es pepaye. Tarro'mar napa' nechen shonte' acheñ añ anetsrot ñeñtcha' name'ñaya.

¹¹ Allñapa' allena alla paterr char ñaña metererrr pechapm̄a arorr. Allpa' nanac ye'chatanet Yomp por po'ñoñ.

¹² Allempoña añcha'taretta Galión e'ñe alla Acayopa' judionesha'ña o' apçhetpa', o'pachet Pablo. Allempoña o' rromuetpa' anmet añcha'taretsho allecma a'pocstatenet ñoñets. ¹³ Chapuet allpa' atet otoset:

—Añ acheñpa' aña yeçhatenan acheñenesha' atto'ch ame'nyet Yompor; tarraña ñeñtpa' ama atteyaye atet oteneý Moisés po'ñoñ ñeñt atet anaret.

¹⁴ Ahuo'ch eñoseñ Pablopa' Galiónñapa' atet otanet:

—O'ch notas ñeñfes judioneshas, ñerra'm añ acheñ añte' o' pohua ñeñt ama cohuenopa' amapa' atet ñerra'm çho muetsenan acheñ, ñehua, pocte' napa' o'ch ne'mñotas atto sottene'cheñ. ¹⁵ Tarraña ñerra'm amate' atteyaye, aña' e'ñe socpa—atet seyçhaten sa ñeñfes judioneshas, amapa' esesha'te' same'ñena, amapa' ñeñt atet oten ñoñets ñeñt atet anaret socop. Ñeñto'marña napa' notenes ñeñtpa' socpa. Ñeñto'marña napa' amach neñoso añecop ñeñt e'ñe socpa.

¹⁶ Allempoñapa' o' çha'nmaçha'taterranet. ¹⁷ Allempoña acheñenesha' aña rromuet Sóstenes. Sóstenespa' ñeñt añcha'tarettsa judionesha' po'prahuo. O' rromuetpa' o' nalle'chet e'ñe alla allame'tets añcha'taretsho. Añcha'taret Galiónpa' ama cohua'psaneto.

Allempo çherrerr Pablo Antioquíu

¹⁸ O' atomaterrerr Pablo alla Corinto allempoñapa' o' so'tnerran ñeñt ame'ñetsa. Aña co'terre' Priscila ñaña Aquila. Allo'tpa' año ahuañpset boto, arrcha' tet Sirio'mar. Arr asuanmuet anets Cencrea. Allñapa' o' shopena'tatosa Pablo. Añecop shopena'tata attoch eñochet o' etsotuan po'ñoñ ña ñeñt atet otan ahuaña Yompor ñeñtcha' atet pa Yomporecop. ¹⁹ Allempoña çhapuet Efesopa' allñapa' o' sa'nerran Aquila ñaña Priscila. Ñaña'apa' o' ahuo' judionesha' po'prahuo allcha' serrpare'tet parro judionesha'. ²⁰ Allñapa' otare'chet Pablo a'puepa'to' alla atomat, tarraña Pablopa' amo' mueno. ²¹ Allempoña so'tnerranetpa' atet otanet:

—Napa' o'ch alla ahuerren Jerusaléño allcha' nocshapretuerra añ yeter ñeñt anaret Partsocop allempoch alla cosherrerr judionesha'. Ñerra'm Yomporcha' muenatspa' ñato' o'ch nohuerrerr esempo.

Allempoñapa' ahuañperrerr boto. ²² Allempoñapa' arr etsotañp'sosa Cesareo. Cesareoñapa' asuanom Jerusaléño allcha' abechnoman ñeñt ame'ñetsa all. Allempoñapa' o' alla ahuer Antioquíu.

Allempo poma'pocheño ahuererr Pablo serrpare'tats allemeñ anetso'mar

²³ Antioquíopa' alla allponmatnerr, allo'tñapa' o' ahuererr. Arr asuanerr Galacio'mar allo'tpa' ahuer Frigio'mar. Ñeñt ame'ña'yetsa allpa' o' yenpanet attoch huomenc perret pueyoçher.

Allempo Apolos atarr cohuen serrpare'tatosanet all anetso Efeso

²⁴ Ñehua, allempopa' eñall puesheñarr judionesha' añ pa'so'cheñ Apolos ñeñt huetsa Alejandriot. Ñaña'apa' o' çhap Efeso. Atarr cohuen serrpare'tenan Yompor po'ñoñ, atarr etsotenan Yompor po'ñoñ ñeñt atet aquellcayet ahuatoteñ. ²⁵ Ñapa' ayçhataret ñeñt atetcha' perra Yepartseshar ñeñtara ñeñt Cristotats. Ñapa' e'ñe po'ñoçh serrpare't huomenc, yeçhatanet ñeñtcha' atet perra Jesús. Añaña ama e'ñe eñotueno ora atet pena Jesús. Aña eñoten atet yeçhate't Juanañ ñaña atet apate't

Juanañ. ²⁶ Ñapa' serrpare'te't huomenc judionesha' po'prahuo. Allempoña e'm Priscila ñaña Aquila, ñetñapa' anmet ellonet allcha' eñotachet e'ñe ora ñeñ atet pa Yompor ñeññaña palltena o'ch eñoch e'ñe poc-tacma. ²⁷ Allempoñapa' secha Apolos Acayo. Añña ñeñt ame'ñetsapa' o' yenpuet. Ñetpa' o' quellquët carta añecop ñeñt ame'ñetsa all Acayo atoch ñetpa' o'ch agapet Apolos e'ñe cohuen. Allempoña o' chap all Acayopa' nanac yenpan ñeñt ame'ñenaya cohuen ñoñets all. ²⁸ O' eñotatanet po'ñoçh Jesúsapa' ñeñtca'yeña Cristoterrets ñeñt atarr cohuenet ahuatoteñ. Yompor po'ñoñoñ ñeñt aquellcayet ahuatoteñ o' gatyesanet atto Jesús o' etsotatuan ñeñt aquellcayet ahuatoteñ. Ñeñt allo'tsa'yen allohuen acheñpa' e'ñe po'huamencocma yeçhatanet. Allempoña ama't puesheñarra judionesha'pa' ama errot otenaye' enteto.

19

Allempo çherrerr Pablo Efeso

¹ Allempo Corinto'tsenmeñ Apolos, Pabloñapa' alla chopeñe'chen apentareru. Atteñapa' o' alla çherr Efeso. Allñapa' all entosan allponsheña ñeñt ame'ñetsa. Tarraña ñetpa' allpon eñotenet allpon serrpare'tate't Juanañ. ² Pabloñapa' a'p'to'tan ñeñt ame'ñetsa, atet otanet:

—Sapa' allempoteñ same'ña, ¿ahuo't chorrasaña Parets Puecamquëñ?

Ñetñapa' o' anapuet:

—Yapa' ama ye'mareña ñato' eñall'e' Parets Puecamquëñ.

³ Pabloñapa' alla oterrer:

—¿Erroñnote'tña sapatareta?

Ñetñapa' atet otet:

—Yapa' yame'ñoñoñ atet otye't Juanañ attoña yapatareta.

⁴ Pabloñapa' alla oterrer:

—Añoña apaten Juanañ atto o' cotape'cherret ello cohuen Yomporcop allotñapa' o'ch apatarettet atoch ame'ñeret ñeñtca' huapatsa chenta'. Añña ñeñt huapatsa chenta'pa' añepa't Jesús.

⁵ E'muet atetpa' apatarettetret pame'ñoñoñet Yepartseshar Jesús.

⁶ Allempoña Pablopa' o' a'p'llanet potot. Allempoñapa' ahuepa't chorranet Parets Puecamquëñ. Allempoñapa' o' eñosyeset po'poñ ñoñtso, o' a'poñoñet atto eñorana'tanet Yompor. ⁷ Ñeñt eñosyesets po'poñ ñoñtsopa' allo'tsen ñato' çharrasheña puechena epsheña.

⁸ Pablopa' nanac serrpare'tate't all Efeso. Pate'tets semana o'chçho' be'tosos judionesha' po'prahuo o'chçho' serrpare'tatanet atet pena Yompor po'cohuenña ñeñt atto atarr ayochreshattena ña. Ama mecha'te'te ama't mamesha. O'chçho' yeçhatanet allochñapa' o'ch ame'ñatanet. Atteñapa' o' ma'pña arrorr. ⁹ Tarraña puesheña'tets acheñpa' nanac atpare'çhete't ama ame'ñyeto atet serrpare'tatanet Pablo. Patpare'teñoñetpa' ama't all shontena acheñenesha'pa' o' sasare'toñet Jesús poctapña. Allempoñapa' ahuer Pablo. Ñeñtña ame'ñetsapa' o' coferet. O' ahuanmuet allo'tsen Tiranno pue'scuela. Allñapa' pate'tets yetpa' añña Pablopa' o'chçho' serrpare'tatanet pue'scuelapahuo. ¹⁰ Atteñapa' o' met epa char. Allohuen asio'marnesha' o' e'mare'toñet Yompor po'ñoñ —allohuen judionesha' ama't ñaña allohuen ñeñt ama judioneshayaye. ¹¹ Yomporpa' nanac ahuamencat

pan Pablo. Ñeñto'marña nanac orrtatanet Yompor po'partsoña ñeñt ama puentareto. ¹² Atteñapa' añña acheñenesha'pa' o'ch'cho' anerret ñeñt es a'plla'yen Pablo, atet ñerra'm es pañell amapa' pañoshe'm. O'ch'cho' anmet allo'tsen ñeñt atsna'tets. O'ch çhapachet allpa' o'ch'cho' corrreraña atsnañeñ. Ama't po'neñferetpa' o'ch'cho' queçhpa'nerranet.

¹³⁻¹⁴ E'ñe allempopa' allo'tsen puesheña'tets judionesha' ñeñt achyo'tañnesha' ñeñt çhocma chopeñe'chets erracmañen. Ñehua, ñetpa' añ puechemereshanet ñeñt puesheñarr judionesha' ñeñtara ñeñt cornesha' nanac amcha'taret añ pa'so'cheñ Esceva. Allo'tsen cançherrsheña puechemereshá'. Ñetpa'çho'ña o' topachet ahuo'ch queçhpatachet ñamet acheñenesha' po'neñfer e'ñe pa'so'chño Yepartseshar Jesús. Ahuo'ch pet atet pena Pablo. Puesheñarrña ñeñt chorrena oneñetpa' otoñet po'neñfer:

—Napa' o'ch notaþ, e'ñe pa'so'chño Jesús ñeñt serrpare'ten Pablo o'ch pequeçhpa'ner añ acheñer.

¹⁵ Allempoña atet ochet oneñetpa' ahuepa'tcha' eñoraña, oneñetpa' atet ot:

—Jesús pa' neñoteññañ po'huamenc, Pablopa'çho'ña neñoteññañ atet po'huamenc echen. Tarraña sapa' eseshasuañaca'ye. Ama neñotennaso sehuamenc.

¹⁶ Allempoña acheñ ñeñt chorrena oneñetpa' omachana'tanet, orrotet parro epuet achyo'tañnesha'. Oneñetpa' nanac atserrpätse'tanet allohuenet. Muelle'mco't atserrpätse'tuanet o' matrra'tuet pocollot. ¹⁷ Añña allohuen efeso'marnesha'pa' o' e'mare'chet atet o' pet—allohuen judionesha' ñaña ñeñt ama judioneshayaye. Atarr yore'tanet. Allempoñapa' amcha'na'tpo' enteñet Yepartseshar Jesús.

¹⁸ Shonte' acheñ ñeñt ame'ñetset allempoñapa' huapyeset, o' a'meta'yesoset atto achyo'tyesete't. ¹⁹ Patantarrpa' o' huapatyeset po'libro ñeñt allo eñotet achyo'tatset. E'ñe all shontena acheñenesha' o' chama'tuet po'libro. Allempoñapa' o' somuerret errponte' tsa'tena allpon libropa' o' sala amnaroch çharra' mil poçllayoret. Ñeñt allpon tsa'tena allohuen libro. ²⁰ Ñeñto'marña atarr amcha'na'tpo' entoñet Yompor po'ñoñ. Atarr ame'ñet.

²¹ Allempoña e'ñe Yompor Puecamquëño'pa' o' secherrerr Pablo o'ch ahurrerr Macedonio ñaña Acayo, allotña o'ch asuanerrpa' o'ch ahurr ñaña Jerusaléño. Allotñapa' atet ot Pablo:

—Te'pa' aña palltetsa o'ch ahuen ñaña Romo.

²² O' mueñan epsheña acheñ ñeñt yenpuene' ñeñtcha' ñanom tatsa Macedonio. Añña ñeñt epsheñapa' añ pa'so'cheñ Timoteo ñaña Erasto. Pabloñapa' o' a'pohuerra allponmat Asio.

Allempo nanac ama'toçhtena acheñenesha' all Efeso

²³ Allempopa' o' atsrre'ma puesheña'tets acheñ. Añ atsrre'matahuet atto' pena ñeñt ame'ñetsa. ²⁴ Allo'tsen puesheñarr añ pa'so'cheñ Demetrio ñeñt ñanom e'moñe'te' ñeñt ame'ñetsa. Ñapa' añ po'taruas pen o'ch yeçhcatyesan pocollatollesha' añ toma'ntatena pocoll ñeñt allecma muechatse'tenet ñeñt po'yachorer penet ñeñt otenet yachor Diana. Añ pocollatollesha'pa' arro'to' ayeçhcataretta asertallot. Shonte' acheñ ñeñtara po'taruas penet, Demetrio ña apahuete't po'taruas atet. Shonte' quelle ganete't po'taruasot. ²⁵ Atteñapa' Demetriopa' o' apçhatuan

allohuen pa'taruasañer ñaña po'psheññechno, ñetpa'cho'ña ñeñfara po'taruas penet. Apçhatuanetpa' atet otanet:

—Masheñneshacha' sapa' señoteñ añ yetaruas ñeñtpa' alloch yegana shonte' quelle. ²⁶ Te'pa' señoteñ ñaña añ ñeñt otenet Pablopa' ahuo't otuan acheñenesha' añ ñeñt yeyoser ñeñt yeyeçcaten yapa' ñapa' oten amo' Partsoyaye. Ñapa' o' co'tape'chatuan shonte' acheñenesha', te'pa' shonte' o' ame'ñatua. Ñetpa' o' huapore'tuerret shonte' ñeñt yapuenanet ñeñfcha' ma'yochet. Sapa' o' sentue atet penet arr Efeso ñaña o' se'mare'ch atet pa'yenet ora erra'paren Asio'mar.

²⁷ Alla oterraneterr Demetrio:

—Ñeñto'mar te'pa' o'ch notas, ñato' o'ch huañerr yetaruas alloch yeganerra quelle. Tarraña ñeñtpa' ama pocteyaye. Ñato' ellopa' o'ch a'ypo'ña'hueret ñaña yachor Diana ñeñt puerahuo'tsen. Ñato' allem-popa' ama't yachor Dianapa' o'huañcha' amcha'na'tpo' eñchet, ama't ñaña ora allohuen asio'marnesha' ñeñt po'yachorer pene'.

²⁸ Ñeñfa e'm allohuen acheñenesha'pa' nanac atsrre'matanet. Pa'tsrre'mueño'feta' o' rranare'tyeset, alla oterrete't:

—¡Paretsña'cho' yachor Diana!

²⁹ Shonte' acheñ nanac ama'toçhtenet allohuenet. O' rromuet Gayo ñaña Aristarco ñeñt macedonio'marnesha' ñeñt parro chopeñe'chen Pablo. O' matrra'tet allo'tsen pocoll atarrpo' allecma apçhena acheñenesha'. ³⁰ Pabloñapa' mueneñeñ o'ch be'tos ñaña all ama'toçhtenetpa' tarraña añña ñeñt ame'ñetsapa' ama muenacheto.

³¹ Ñaña puesheña'tets ñeñt amcha'tarettetsa all Asio ñeñt muerenaya Pablopa' o' mueño'feta' ñoñets attoch amach tatsto all apçhenet te't muetseñet. ³² Allña apçhenetpa' atta rranare'tyenet. Puesheña'tetspa' atet otyeset atet co'tape'chyenet ñet, po'potantañña'pa' atet otyeset po'poñ ñeñt atet co'tape'chyenet ñamet. Allohuenet ama't ama eñotueñeto esocopte'ña apçhenet, tarraña atña nanac ama'toçhtenet.

³³ Puesheña'tets judionesha' o' cheta'nmet Alejandro o' huapachet attoch eñosachet. Ñaña'pa' o' echantosan pot attoch o'ch muetsoñeñtet añecop attoch o'ch a'poctatan ñoñets judioneshacop. ³⁴ Tarraña allempo acheñenesha' ñeñt ama judioneshayaye o' eñchet Alejandro ñapa' judionesha' ñetña'pa' alla rranare'terretter. Atarr tematen rrannartenet. O'ch'cho' alla oterret allohuenet parro:

—¡Paretsña'cho' yachor Diana! ¡Paretsña'cho' yachor Diana!

³⁵ Allempoñapa' puesheñarr amcha'tare't ñeñt taruasetsets gobiernocoppa' o' emma'huanet, atet otanet:

—Masheñneshacha', o'ch notas ñeñtes yeçhetsa arr Efeso. Ama't allohuen acheñenesha' erra'paren e'ñe eñotueñet efeso'marneshaypa' yapa' ñeñtey cohuanepene' yachor Diana ñeñt puerahuo'tsen, ñeñfara yachor Diana ñeñt nanac Parets, ñeñt sohuatsa ento't. ³⁶ Ñeñtpa' yeñotueñ allohueney acheñey. Amate' errotenot yoto ama atteyaye. Ñeñto'marña e'ñe pocte' o'ch semtsoñeñta. Amachña çha sama'toçhtatsto.

³⁷ O' alla oterraneterr amcha'tare't, atet otanet:

—Secua' ahuo't sehuapach arr añ epsheña acheñ. Tarraña ñetpa' ama es yoreneto yachor po'prahuot ñaña ama achm'are'teñeto yachor. ³⁸ Ñeñto'marña te'pa' o'ch notas, ñerra'm mueneñ Demetrio

ñaña pa'taruasañrečno o'ch otteñe'chatanetpa'te'pa'e'ñe pocte'teman-tanetepa'. Tarro'mar te'pa' atoraret allcha'a'pocatatet ñoñets. Ñeñtcha'a'pocotate' ñoñetspa' allo'tsena. ³⁹ Tarraña ñerra'm este' semnen o'ch sa'pocatat po'poñpa' ñeñtpa' añ pocte' o'ch sa'pocatach allecma apçhena ñeñt nanac añcha'taretečno. ⁴⁰ Ñato' temanta'yeta' tarro'mar yapa'e'ñe attota yama'toçhtena.

⁴¹ Ñeñta otuanetpa' o' mueñhuerranet. Allempoñapa' ahuanomhuerrēt.

20

Allempo çherrerr Pablo alla Macedonio

¹ Allempoña o' muetsoñeñtuerret Pabloña'pa' agotatuan ñeñt ame'ñetsa. O' cotape'chatnenanet e'ñe cohuen. Allempoña e'ñe puemorrenteñoñanet e'ñe cohuen so'tuanenanetpa' o' ahuen, o'ch ahuer Macedonio. ²⁻³ All oñerr Macedonio'marpa' nanac serrpare'tatnerranet Yompor po'ñoñ. Atteñapa' o' çherr Grecio ñeñtara all oteñet Acayo. Allpa' alla a'pohuerra ma'pñia arorr. Autsaño' tampsatsañ ñaña Sirio botopa' tarraña o' e'mare'ch allpa' cha o'pateña judionesha' o'ch rromapet. Ñeñto'marña alla secherra Macedonio (tarro'mar allpa' patso'marach chope'chnerr). ⁴ Allempoña ahuer Macedoniopa' allpon acheñ o' coteret. Ñeñtpa' ñeñtara añečno: Sópater ñeñt bereo'marnesha', allotpa' ñaña Aristarco ñaña Segundo ñeñt tesalónico'marnesha', allotpa' ñaña Gayo ñeñt derbo'marnesha', allotpa' ñaña Timoteo, ñaña allo'tsen Tíquico ñaña Trófimo ñeñt asio'marnesha'. Allpon acheñ coterre'. ⁵⁻⁶ Arr çhaçha'tet Filiposo. Allempoña ñetpa' ahuanmuet o'ch otet, arrcha' cohuosyet Troaso. Yapa' alla ya'pa Filiposo epan Pablo allponmat.* Allempoña o' huañ allempo coshenet allempo rrenet pan ñeñt ama achasareteyaye allempoñapa' o' yahuanma yaña. Allempo ahuanpsey botopa' pa'mnarmatñoñapa' o' yeçhap yaña Troaso. Allña'pa' allo'tsa'yen ñeñt otatsa ahuaña. Allña'pa' alla ya'posa cançherrmat.

Allempo Pablopa' emo'tnom anetso Troaso

⁷ Allempoña çhap allempo motta'muena yeññats temencpa' yapçha alohueney ñeñtey ame'ñetsa. Yeyerpueñoñ Yepartseshar Jesús'pa' o' yerra' pan ñeñt ashota'taret ñeñt atet anaret Yomporecop. Allempoña Pablopa' nanac serrpare'tatanet. Ñapa' otanet:

—O'ch ahuenen tsapat.

Ñeñto'marña ama't o' rroçh tsapuenpa' alla serrpare'tatenanet. ⁸ Allña yapçhena pocollo enopa' nanac a'yohuen ßat. Allpa' shonte' lampareñ ñeñt corra'yetsa. ⁹ Allña'pa' allo'tsen puesheñarr huepuesha' añ pa'so'cheñ Eutico. Ñaña'pa' alla anen ventanot. Atto nanac serrpare'ten Pablopa' Euticoña'pa' ahuo't alla ma' anatot. Ahuo't alla ma'pa' machayoña shora'nom patso. Ma'pa piso allot shora'nom. Allempoña echantasetpa' o' rroma. ¹⁰ Allempoña sohuerra ñaña Pablo. O' huapa o' mo'capa' a'çhono'tos allempoñapa' otanet:

—Amach sellcatsto, Yomporpa' o'ch alla tantater.

¹¹⁻¹² Añña huepuesha'ña ñeñt o' shora'nemuapa' o' alla aneret e'ñe huomech. Allempoña allohuenetpa' atarrepata' tcha' coshet. Allempoñapa'

* **20:5-6** Lucas ñeñt quellquë' añ ñoñets ñapa' cota'nman ñaña Pablo.

o' alla a'terr Pablo. Allñapa' o' rrallme'chet. O'ña rrallme'chuetpa' o'huañ tematen all serrpare'tatannenet. Atteñapa' o' puetarespenet. O'ña puetaresuenpa' o' ahuen Pablo.

Allempo ahuanerret Troasot arr cha'cha'tet anetso Mileto

¹³ Allempoña yapa' o' yahuanma o'ch yota o'ch yerrma' añecmuen noñt ñeñt otenet bote o'ch ahuañpsey Asóno allcha' yecuos Pablo. Tarro'mar otey Pablopa' ñapa' arro'ch oñom patso'mar o'ch chap Asóno. Allotñapa' o'ch a'tap ña'ña boto, tarro'mar atet o' ya'poclat epay Pablo ahuañacma. ¹⁴ Atteñapa' o' ye'chap Asóno. Allñapa' all yentanna'ta epay Pablo. Allotñapa' a'tap ña'ña boto, allotñapa' ahuañpsey parro. Atteñapa' o' ye'chap Mitileneo. ¹⁵ Mitileneotñapa' o' alla ahuañperryerr boto. Tsapa'tñapa' a'yo'mara yoñem Quío. Allotña tsapa'tenerrpa' alla yetsotosa Samsó. Yem'terrerr Samsotpa' alla yamesuerrerr Trogilio. Allotña tsapa'tenerrpa' alla yetsotuerrerr Mileto. ¹⁶ Allñapa' ot Pablo amach yetatsto Efeso tarro'mar ñapa' ama mueno o'ch alla yatoma'tare'tnom Asio'mar. Ñapa' aña mueneñ o'ch ye'chap tecma Jerusaléño añecop o'ch yentapreterra' Pentecostepo.

Allempo e'ñe ñeñteshaña serrpare'tatnerranet Pablo Efeso

¹⁷ Ñeño'marña allempo Mileto'tseneypa' Pabloñapa' agotatan ñeñt pompornesha' pen ñeñt ame'ñetsa Efeso, onetepa' Mileto all o' ye'chap ya. ¹⁸ Allempoña o' hua'cha'tet Pabloñapa' o' serrpare'tatanet, atet otanet:

—Sapa' seño'tenen atet o' ne'pohuanma sesho, ama't ahuatoteñ allempo ñanom ne'chap Asio all sey'chena. ¹⁹ Sapa' seño'tenen añecop netorrena Yomporecop ama añecpaye' netorreno attoch acheñenesha'pa' o'ch entenen e'ñe cohuen ñeñt e'ñe orrena. Napa' ama't neya'chpeñesha' netorrena Yomporecop tarraña judionesha'pa' nanac o'patennet. Ama't pa'namen nehuapoya e'ñe nemuero'chteño'tpa' chocma netorrena Yomporecop. ²⁰ Seño'tenen ña'ña napa' o' neserrpare'tatuas ora allohuen ñeñt pocletsa socop. Ama es na'nasotamñpsaso ama't coñe'ta. Napa' o' ney'chatuas allohuenes parro allempo sap'chena ña'ña o' ney'chatyesnomues e'ñe sepacllo'mar. ²¹ O' neserrpare'tatuas añ pocte' o'ch soctape'cherr ello cohuen Yomporecop ña'ña añ pocte' o'ch same'ñera Yepartseshar Jesucristo. Ñeñtpa' atet o' notuas allohuenes ñeñtes judioneshas ña'ña ama't ñeñtes griegoneshas. ²² Te'pa' o'ch ahuerren Jerusaléño, tarro'mar o' sechaterren Yompor Puecamquëñ. Tarraña o'ch ne'cherr Jerusaléño'pa' ama neñoteña' ñeñt'cha' allohuen nehuapoya all. ²³ Aña neñoten o' eñotaten Parets Puecamquëñ ñeñt'cha' atet pa'net o'ch yottamñpesnetpa' o'ch muero'chtatnet. Ora allpon anetso attec'mach pa'net. ²⁴ Tarraña ama't atetpa' napa' ama nem'cha'teno. Ama't'cha' nerromapa' pocte' nenteñ o'ch nerroma. Te'pa' añ palltetsa o'ch ne'nua netaruas. O'ch netsotatuoñ ora allohuen ñeñt atet llesensa'n Yepartseshar Jesús. Ñeñt atet llesensa'n Yepartseshar Jesús'pa' ñeñtpa' attoch neserrpare'tach acheñenesha' ñeñt cohuen ñoñets atto Yompor pomuereño'tpa' a'queshpaterreycha'.

²⁵ O' alla oterraneterr Pablo:

—Te'pa' neñoteñ sapa' amach senterrno po'pocheño, ama't allohuenes allo' nechopeñe'chuanom serrpare'tnomue' Yompor po'cohuenña. Aña neñoten amach senterrno. ²⁶ Ñeño'marña te'pa' o'ch neñotatas ñerra'm eseshas chenquërrtsapa' tarraña napa' ama es na'chencatamñpsase'te

tarro'mar napa' chocma neserrpare'tatase't attoch amach sechenquërro. ²⁷ O' neserrpare'tatuas ora allohuen atet cotape'chateney Yompor. Ama es na'nasotam̄psaso ama't coñe'ta.

²⁸ Allempoñapa' alla oterraneterr ñeñt' pompornesha' penet:

—Te'pa' seño'ta'tach. Te'pa' añ pocte' o'ch secuan̄peñ cohuen allohuen ñeñt' ame'ñenaya Yompor. Atetcha' sepa' atet ñerra'm ñeñt' cohuan̄pene' po'carrneror. Sapa'cho'ña atetcha' sepa' sam̄a o'ch secuan̄peñ ñeñt' ame'ñetsa. Ñeñt'cha' setaruas sepa' atet llesensenes Parets Puecamquëño't. Tarro'mar Yepartseshar Jesús'pa' o' rroma ñocpuet ñamet. ²⁹ Napa' neñoteñ allempoch ama allo'tsennopa' o'ch huaponasa ñeñt'cha' seshquë', ñapa' mueneñcha' o'ch a'psatas Yompor po'ñoñ. Atetcha' huapuet atet ñerra'm ma'yarrpa' ñerra'm huapapa' o'ch a'chencatuan allohuen carrnero. ³⁰ Ama't e'ñe sagattsapa' orrtetcha' ñeñt'cha' seshquë', ñeñt' ama Yomporeyaye po'ñoñpa' ñeñt'pa' serrpare'tatase'tcha'. Tarro'mar ñetpa' mueneñt'cha' o'ch ame'ñatuaset e'ñe ñet pocta'ña.

³¹ O' alla oterraneterr Pablo:

—Te'pa' seño'ta'tach. Chocmach seyerpa'na tarro'mar sapa' seño'teñ o' ma'pa char chocma noctape'chatas cohuen—ama't yeto, ama't ña'ña tsapo. Ama't neya'chpeñesha' chocma noctape'chatase't.

³² 'Te' Yomporpa' cohuan̄psasepa'ch. Yomporepa'chña po'ñoñ seño'tate' puemuereña. Yomporepa'chña po'ñoñ sey'chate' attoch huomenc sepa' seyo'cher. Yomporepa'chña po'ñoñ sa'quesh'paterre' atet ñerra'm ñeñt' allohuen ñeñt' pame'ñeño'tet o' a'cohuentatuare'tterret.

³³ Ña'ña napa' ama neye'chapreto po'psheñeñ po'çllayor, amapa' pa'shtam ama neye'chapreto. ³⁴ Sapa' seño'tenen ñeñt' allpon nepalltenapa' e'ñe notot' netaruasa' atto nechen ñeñt' nepallta'yena. Ña'ña e'ñe na netaruaso'tpa' es napa'yeñ ña'ña ñeñt' noctene'. ³⁵ E'ñe na netaruaso'tpa' chocma neñotatenes ñeñt' poctetsa o'ch yetaruasa' attoch es yechyes alloch yeyenpue' ña'ña po'psheñeñ ñeñt' es palltetsa. Añ pocte' o'ch yeyerpueña atet otye't Yepartseshar Jesús. Ñapa' atet ote't: “Nanac yocshena ñerra'm esempo es yapa'yeñ po'psheñeñcho, añña ama tama yocsheno ñerra'm esempo po'psheñeñpa' o'ch es apueney ya.”

³⁶ Ñeñta' otuapa' o' concorpa o' ma'yochatnenanet. ³⁷ Añña acheñenesha'pa' pomorrenteño'tet Pablopa' o' yahuanrrortet. A'chono'chetpa' o' tso'ttsapa'chet. ³⁸ Atarr llequët nanac. Atet o' otanet Pablo ñeñt'ña nanac llecatahuet tarro'mar ñapa' otanet “amach senterrno arr patsro.” Allempoñapa' o' co'ta'neñet Pablo arrohua allo'tsen bote.

21

Allempo o'ch alla çherrerr Pablo Jerusaléño

¹ Allempoña o' yesa'nenanetpa' o' ahuan̄perryerr boto. Allo'tña'pa' pa'charra yepe'pa' o' yechap Coso. Tsapa'tña'pa' arr yechap Rodaso. Al-lo'tña'pa' arr yetstosa Pátaro. ² Pátaroña'pa' o' yentos po'poñ bote ñeñt'cha' tatsa Fenicio. Yañapa' o'cho' ya'tapos allo'tña'pa' ahuan̄perryerr boto. ³ Allempoña yetam̄pena sa'popa' yentnom coñe't pats ñeñt' pa'so'cheñ Chipre, e'ñe arrot yentnom yechcoterot. Atteña'pa' o'cho' yemtam̄pes boto, arr yesechena Sirio. Allempoñapa' arr yetstosa all oteñet Tiro, tarro'mar allpa' o'ch a'suatatsre'tet botot. ⁴ Yañapa' o' yesua attoch

yentnomñ ñeññt ame'ñetsa all. Allñapa' alla ya'posa cançherrmat. Ñeññña ame'ñetsa allpa', ñetñapa' ochet Pablo:

—Amach petatsto Jerusaléño.

Tarro'mar Parets Puecamquëñpa' ahuo't eñotatanet atetcha' pet Pablo all Jerusaléño. ⁵ Tarraña allempoña o' met cançherrmatpa' o' alla yahuanerrerr. Allempoña allohuen yacmanesha'pa' cota'nemyet pueblot a'yenet, ñaña puetaporeshohuenet ñaña puechemerneshet. Allñapa' all yeconcorposa ontapopa' o' yema'yochosa all. ⁶ Allempoña o' yema'yochuapa' o' yeso'tenanet. Allempoña yapa' o' ya'tenerr boto, ñetñapa' o' ahuanerret pa'paclo.

⁷ Allempoña o' yenerr Tirotpa' arr yetsotuenerr Tolemaido. Allñapa' all yehuomñcha'tnomñ ñeññt ame'ñetsa. Allñapa' all yepatrranom yet. ⁸ Tsapatñapa' o' yahuanenerr, allempoñapa' arr yeçhap Cesareo. Allñapa' o' yebe'tosos Felipe pa'paclo, allpa' allcha' yommosa. Añ Felipepa' ñeññt serrpare'tene' cohuen ñoñets. Ñaña ñeññtara Felipe ñeññt net ahuaña ñach epatyeshahuet rreñets epuet po'psheññeçhno pechapsheña. ⁹ Añ ñeññtara Felipepa' echenan pa'tatssheña po'sñesha'. Ñetpa' ama arrollareteto. Ñetñapa' nanac a'poteññañet ñamet Yompor po'ñoñ. ¹⁰ Allempoña ya'llponmatos allpa' o' huapa ñeññt a'mtene' Yompor po'ñoñ añ pa'so'cheñ Agabo. Ñapa' Judeot huapa. ¹¹ Allempo huapapa' o' pueyosan Pablo po'chanar. Añña chanaretspa' Agabo ñañeña huan-catatsa e'ñe potot ñaña pa'tcot. O' huanca'huapa' atet otan Pablo:

—Ñeññtapa' atet oten Parets Puecamquëñ, ñeññteþ echene' añ chanaretspa' judionesha' ñeññt Jerusaléño'tsa'yenpa' atetcha' huancapet atet nehuanca te' ñañeña. Ehuancaretcha' o'ch pomapet allo'tsen acheñenesha' ñeññt ama judioneshayayeto.

¹² Ñeññña atet ye'mpa' yotare'ch Pablo:

—Amach petatsterro Jerusaléño.

Ñaña ñeññt acheñenesha' ñeññt allo'tsa'yenpa' atet otare'chet Pablo ñamet. ¹³ Allempoña Pablopa' otanet:

—Eso'mare'tña nanac seyahuena, te'pa' o'ch sellcaten. Napa' e'ñe pocte' nenteñ huanca'netepa'. Ñaña e'ñe pocte' nenteñ nerromuepa' Jerusaléño, attoch nerroma e'ñe neserrpare'teñot Yepartseshar Jesús po'ñoñ.

¹⁴ Pabloñapa' ama e'mñotyete. Allempoña ama erro't yepepa' o'huañ erro't yoch, añña yoter:

—Ñehua, ñerra'm atette' muenen Yomporpa' ama'tpa' attepa'ch.

¹⁵ Allempoñapa' o' yañño'tatsre'tena. Allempoña o' yañño'tatsre'tuapa' yahuanenerr Jerusaléño. ¹⁶ Añña puesheña'tets cesareo'marnesha' ñeññt ame'ñetsapa' allenta cota'nenyet, arr nehuerryeta' all yeçhena Mnasón ñeññtara ñeññt chipro'marnesha'. Ñaña'pa' ahuatoteñ ame'ña'hua. Pa'pacloñapa' all ya'posa.

Allempo Pablopa' emo'tuerr Jacobo ñeññt Jesús pa'mo'nasheñ

¹⁷ Allempoña o' yeçherr Jerusaléño'pa' añña ñeññt ame'ñetsa allpa' e'ñe pocsheñesha' agapyet. ¹⁸ Tsapatñapa' puetarenpa' yahuanma parrocma Pablo o'ch yenteña' Jacobo. Añña allohuen ñeññt pompornesha' pen acheñenesha' ñetpa'çho'ña alla yentosanet, allo'tsa'yenet ñamet.

¹⁹ Pabloñapa' o' huomñcha'tosanet allohuenet. Huomñcha'tuanetpa' allempoñapa' serrpare'tatuerranet e'ñe ora allpon Yompor po'huamencot o' etsotuoñ e'ñe ñocop. Serrpare'tatuerranet atto acheñenesha' ama't ñeññ ama judioneshayetopa' o' ame'ñatuanet ñamet.

²⁰ Ñeñña e'mhuyetpa' nanac aye'choçtatoñet Yompor. Tarraña allempoñapa' atet ochet:

—Tarraña masheñe, ahuo't peñoçh te'pa' shonte' mil judionesha' o' ame'ñenet ñamet. Ñetpa' e'ñe huomenco otenet añ palltetsa allohueney ñeñfey judioneshay o'ch yeḡohua atet otye't Moisés. ²¹ Ñetpa' o' e'mare'tonapet peñoñ añe'no' peychaten judionesha' ñeññ yecha'yetsa po'poñ anetso all yecha'yena ñeññ ama judioneshayaye atto año' pocte' o'ch puesuerret Moisés po'ñoñ. Ñaña o' e'mare'tapet ahuo' potuanet amach tsorratsteto puechemeretollesha', ñaña amo'ch patsteto atet yeyçhena ahuatoteñ.

²² Allempoñapa' alla otereterr Pablo:

—Ñehua, te'pa' ¿errote'tcha'ña yeḡaña te' tarro'mar po'ñoçhpa' o'ch e'mare'tapet o' peçherr arr? ²³ Ñehua, te'pa' o'ch pe'mñotey o'ch yotaḡ ñeñtcha' atet peḡa. Ñehua, arrpa' arro'tsen pa'tatssheña ñeññ netset ñetañeña ñeñtcha' atet pet Yomporecop, ñeññ atet yeyçhena ya ñeñfey judioneshay. ²⁴ Te'pa' aña pocte' ñeñtcha' atet peḡa. O'ch panemñ añ pa'tatssheña e'ñe epaspa' o'ch sa'cohuentatena' ñeññ atet anaret Yomporecop ñeññ atet yeyçhena ya ñeñfey judioneshay. Ñaña añ pa'tatssheñapa' o'ch petsa'tanet attoch shopena'tatet, ñaña ora ñeññ palltetsapa' o'ch petsa'tanet. Allochñapa' allohuen judionesha' o'ch eñoçhet po'ñoçhpa' ama atteyaye ñeññ atet e'mare'tet pocop, tarro'mar allempopa' o'ch eñotapet ḡapa'çho'ña o' peḡohua ñeññ atet oteney Moisés po'ñoñot. ²⁵ Tarraña añecop ñeññ ama judioneshayaye ñeññ o' ame'ñapa' yapa' o' yemñanet carta, o' yotuanet cartot ñeññ pocte' yenten ñocpuet ñeñtcha' atet pet. Ñeñtpa' añeçhno: Amach rratsteto po'çhets ñeññ muetsenet ayechcatarefecop ñeññ po'yomporer penet. Ñaña o' yotuanet amach rratsteto es po'rras, ñaña amach rratsteto ñeññ muetsenet ñeññ atta a'pañaret. Ñaña o' yotuanet amach chetapretatsteto taporets. Ñeñña yotanut yecartot.

Allempo rromapueret Pablo all Parets pa'paclo

²⁶ Allempoña Pablopa' o' anman añ pa'tatssheña. Tsapañapa' o' a'cohuentatet e'ñe parro, ñeññ atet yeçhena judionesha'. Allempoñapa' ahuanmuet Parets pa'paclo o'ch eñotatenaneta' esempoch o'ch met allponmat e'ñe allempoch o'ch a'cohuentatuet. Allempochña Pablopa' o'ch muetsatanet Partocop carrnero puesheña'tsocmuet, ñeñtpa' atet pena judionesha' Yomporecop.

²⁷ Tarraña o' taya çhappoch cançherrmat allempoch o'ch a'cohuentatuetpa' añña judionesha' ñeññ huetsa Asiotpa' o' eñchet Pablo all Parets pa'paclo. Ñetñapa' o' atsrre'mataçhet acheñenesha' attoch o'ch e'moñe'çhet Pablo. Allempoñapa' o'ch rromuet Pablo. ²⁸ Pa'tsrre'mueñoçetpa' o' rranare'tyeset, otyeset:

—Masheñesha judioneshacha' o'ch seyenpa'y. Te'pa' o' yenter añ acheñ ñeññ ye'moñe'tene' ñeñfey judioneshay ñeñfara ñeññ o' puesuer-ran Moisés po'ñoñ ñaña ñeññ o' a'sosyatuan Parets pa'paquell. Te'pa' o'

erracmañen atet o' ye'chatyesuan acheñenesha'. Elloña te'pa' o' abe'tatan ñaña acheñ ñeñt ama judioneshayaye arr Parets pa'paclo. Allochñapa' ahuo'ch a'sosyatuan Parets pa'paquëll.

²⁹ Tarro'mar atet otet o' eñchet Pablo epuet Tróximo all chopeñe'chen epuet Jerusaléño. Tróximo ñeñt'pa' efeso'marnesha', ama judioneshayaye. Ñetpa' cho' otenapuetañ ñato' Pablopa' o'te' abe'tatan Tróximo all Parets pa'paclo ñeñt ama pocteye' enteno judionesha'.

³⁰ Allempoñapa' allohuen acheñenesha'pa' o' atsrre'muetpa' matrra'tet allo'tsen Pablo o' rromuetpa' o' cheta'nmet a'yenet Parets pa'paclo. Allorocma yotetuet Parets pa'paclo. ³¹ O' muetsamochet Pablopa' añña ñeñt solltarnesha' pa'mcha'tareterpa' o' e'manet atet nanac ama'tochtena allohuen acheñenesha' all Jerusaléño. ³² Ñaña'pa' o' anman allpon solltarnesha' ñaña allpon capitánnesha'pa' o' matrra'tet allo'tsa'yen acheñenesha'. Allempoña acheñenesha'pa' o' entapan solltarnesha' epuet pa'mcha'tareterpa' o' huañ chota'chet Pablo. ³³ Allempoña chap añcha'taretpa' o' rromatan Pablopa' o' huanquët epa cadeno. Allempoñapa' a'p'to'tanet:

—¿Eso'tña pa'so'cheñ añ acheñer?

Ñaña o' a'p'to'tanet:

—¿Esté'ña o' pohua ña?

³⁴ O' anapyeset po'poñe'ttsocma. Puesheña'tets acheñpa' otyeset atet cotape'chet ñet, po'potantañña' atet otet po'poñ ñeñt atet cotape'chenet ñamet. Nanac ama'tochtenet ñeñto'marña ama eñocheto e'ñe po'ño'ch ñeñt atet o' pohua Pablo. Ñeñto'marña añcha'taretpa' anmatan Pablo pocollo all shontena solltarnesha'. ³⁵ Allempoña o' chapuet allot a'tenet pocollopa' añña solltarnesha'pa' o' enatnomet Pablo eno, tarro'mar taye'to' acheñenesha' pa'tsrre'mueño'pa' muetseñet. ³⁶ Tarro'mar acheñenesha'pa' o' co'a'huanmet. Puerranare'teño't otyesnomuet:

—¡Semtseñaca'ye!

Allempo Pablopa' e'ñe cohuen eños ñocop allo'tsa'yen ñeñt e'moñe'tene'

³⁷ A'tapachet pocollopa' Pabloñapa' otosan solltarnesha' pa'mcha'tareter, eños griega'cho, ot:

—Te' napa' nemneñ o'ch notap paterr ñoñets.

Añcha'tareñña' och:

—¿Po'ño'cha't pe'muen griega'ch?

³⁸ Alla otererr añcha'taret:

—Papa' ¿ama't añeyaype egipto'marnesha' ñeñt atsrre'mate' ahuaña acheñenesha' atto ñetpa' atpare'chet gobierno', ñeñfara ñeñt ahuanmue' pa'tatsoch mil amtsañnesha' a'yo amarato?

³⁹ Pabloñapa' alla otererr:

—Napa' amaca'ye ñeñfeyayno, napa' judioneshan ñeñten tarso'marneshan, ñeñfara anets nanac atarr ñeñt allara Cilicia. Napa' o'ch notare'tap attoch pemnaten o'ch neños acheñenesha'cop.

⁴⁰ Allempoñapa' o' muenatan Pablo o'ch eños. Pabloñapa' alla tomos allotecma a'tenetpa' echantosan pot attoch muetsoñeñtua acheñenesha'. Allempoña o' muetsoñeñtuetpa' Pabloñapa' o' eños hebrea'cho, atet otanet:

22

1—Masheñeshacha' ñaña nomporneshacha', o'ch se'mñoten ñeñtcha' atet neños e'ñe nocop.

2 Allempoña e'mhuet atto o' serrpare'tatanet e'ñe ñet po'ñoñetopa', allempoñapa' o' e'ñe muetsoñeñtuet poctacma. Pabloñapa' alla oterraneterr:

3—Napa' judioneshan, arr ne'ñalleta Tarso e'ñe alla Cilicia. Tarraña arrña e'ñe eñotñan Jerusaléño. Ñeñt neychate' napa' ñeñtpa' Gamaliel. E'ñe ña pueychateñoñenpa' netsotuoñ e'ñe poctacma ñeñt Moisés po'ñoñ ñeñt atet anaret ñeñtcha' atet pa yatañneshañ. Nanac nema'yoçhra ñeñt Yomporecop ñeñt atet sepena te' sa. 4 Napa'cho'ña ahuañmo'chapa' nanac nemueroçhtache't ñeñt cotene' Jesús poctapña. Napa' o'ch nerrmanatanet, allotñapa' o'chcho' nehuancatanet, ñaña o'chcho' nabe'tatanet ñaña cárcelo. Ñaña nemtsatatue't—yacmanesha' ama't ñaña coyaneshachno. 5 Ama't cornesha' ñeñt nanac añcha'taretpa' eñotuane't ñeñt atet nepe't. Ñaña allohuen ñeñt pompornesha' penetpa' e'ñe eñotuennet ñamet ñeñt atet nepe't. Ñet allempopa' ahuo't apnet orden ñeñtcha' napueña' yamo'ts judionesha' ñeñt Damasco'tsa'yen. Añ orden ñeñtpa' alloch mueñanet attoch o'ch nerrmanatue' ñeñt ame'ñaye't Jesús. Ehuancaretetpa' o'ch nahuanmanet Jerusaléño allcha' yecoñchatuanet.

Allempo Pablopa' serrpare'tatanet atto ello cotape'cherran cohuen Yomporecop

(Hch. 9.1-19; 26.12-18)

6 'Atteñapa' o'cho' ahuen Damasco. Allempoña neçhappmoch Damascopa' allempo o' çhappmoch pocto. Ñeñtña nanac poptetsa entotpa' machayo'tepa'tcha' çhoyo'tamñsapuen. 7 Allempoña çhoyo'tamñsen e'ñe neshopa' nañapa' alla nerrmopra patso. Allempoña neçhap patsopa' ne'm ñoñets ñeñt atet oten: “¿Eso'mare't Saule, pemueroçhtatennanña ñeñt name'ñenaya?” 8 Nañapa' o' not: “¿Eshesha'e't Ayochreshate eñets?” Ñeñt eñetspa' alla oterrerr. “Napa' ñeñten Jesús en ñeñten nazareto'marneshan, narramche'ña atarr pemueroçhtaten.” 9 Ñeñtña allo'tsenen e'ñe parropa' ñetpa'cho'ña entetca'yeña ñeñt neçhoyo'te' ñeñtñapa' cha yore'tanet tarraña ñetñapa' ama eñochetoña ñeñt atet notare'tta. 10 Nañapa' o' alla noterrerr: “¿Es'te' Partseshacha' poctetsa ñeñtcha' atet nepa'?” Partsesha'ña Jesúsapa' alla oterrerr: “Te'ñapa' o'ch petanta o'ch ahuep Damasco. Allcha'ña otapet allohuen ñeñt anaret ñeñtcha' atet pepa.” 11 Allempoñapa' o'huañ nenta tarro'mar o'rrechaten ñeñt po'ptetsa ñeñt neçhoyo'tamñse'. Ñeñtña noctene' ñetñapa' echa'nomnet notot. Attoña çhapatnet Damasco.

12-13 'Yeçhap Damascopa' allempoñapa' huapa puesheñarr añ pa'so'cheñ Ananías. Añña Ananíaspa' nanac ame'ñenana ora allohuen ñoñets ñeñt atet anaret yocop ñeñtey judioneshacpay ñeñtcha' atet ye'pa. Añña judionesha' ñeñt ye'cha'yetsa Damascopa' nanac cohuen enteñet Ananías. Nañapa' huapa neshopa' allenta ponmosnapa' otosen: “Te'pa' masheñe Saule pecuerrepa'ch.” Nañapa' allorocmuepa'tcha' necuerr; allempoñapa' neñch Ananías. 14 O' alla oterrerr Ananías: “Añ Yompore ñeñt Po'yomporer pe't yatañneshañ, ñaca'yeña pa'cerre'ña pa' ama't ahuatoteñ añecop o'ch peñotuerrñañ atet muenen ña. O' muenatap ñaña

o'ch penterrñañ p̄añña Puechemer ñeñt e'ñe pocte' es pets. Ñaña o' muenataḡ o'ch pe'mñotoñ e'ñe ña po'ñoñ ñeñt atet o' otuaḡ. ¹⁵ Te'pa' ñeñtpa' atetcha' peḡa, o'ch p̄a'potoñ Jesús po'ñoñ erracmañen ñeñt atet o' pentua ñaña ñeñt atet o' pe'mua. ¹⁶ Te'pa' añ palltetsa o'ch petanta, e'ñe p̄ame'ñeñoḡ Yepartseshar Jesúsḡa' o'ch p̄apatare'terra, attochña e'shohuaretterra p̄o'chñar." Neñtpa' allohua atet oten Ananías.

Atto Pablop̄a' eñotatanet ñapa' ña serrpare'tatene' ñeñt ama judioneshayaye

¹⁷ O' alla o'terraneterr Pablo:

—Allempoña o' met allponmatpa' o' nohuerrerr arr Jerusaléño. Parrochña allempo nema'yochena Parets pa'paclopa' allñapa' orrtona atet ñerra'm cho es ye'chopo'ten. ¹⁸ Allempoña o' orrtona Yepartsesharpa' atet oten: "Tayecma o'ch ahuerreḡ arrot Jerusaléñoḡ, tarro'mar arrpa' amach esesha' pe'mñotaye allempoch p̄a'poton neñoñ." ¹⁹ Nañapa' alla notererr: "Partseshacha' ama't atetpa' allohuen acheñenesha'pa' e'ñe eñotuennet atet o' neḡohua. Eñotuennet atto napa' nebe'tose't judionesha' po'prahuo atto nenalle'tache't ñeñt p̄ame'ñenaya, ñaña atto nabe'tatanete't cárcelo. ²⁰ Ama't allempo muetset Estebanañ ñeñt p̄a'potaye't peñoñpa' napa'cho'ña allempopa' e'ñe pocte' neñch muetsetepa'. Napa' allña necuam̄psanet pa'shtam ñeñt rrolle'te'. All necuapretpa' napa'cho'ña e'ñe pocte' neñch attepa'ña pet." ²¹ O' alla o'terrnerr Yepartseshar: "Ama't atetpa' te'pa' o'ch ahueḡ o'ch nemñap̄ allap̄ar allo'tsa'yen acheñenesha' ñeñt ama judioneshayayeto."

Allempo solltarnesha' pa'm̄cha'tareterpa' abe'tatan Pablo o'pono

²² Ñeñta otua Pablop̄a' añña acheñenesha' ñeñta e'muetpa' o'huañ e'mñochet. O' alla rrannarterreterr, atet otet:

—¡Semtseñaca'ye! Ama pocteyaye o'ch corra ñeñt atet acheñ arr patsro.

²³ Pa'tsre'mueñoḡetpa' alla rrannarterreterrrpa', o' gogo'tyeset pa'shtam enonet, allotpa' a'rrotsetyeset ñaña patspa' o' huapore'tyeset enonet. ²⁴ Allempoñapa' añña ñeñt solltarnesha' pa'm̄cha'tareterpa' o' abe'tatan Pablo o'pono. O'ch ashtet attotcha' a'meta'huan ñeñt atet o' ḡohua. Ñapa' mueneñ o'ch eñoch esocopte' nanac ama'toçhtenet ñocop. ²⁵ Allempoñapa' o' huanquēt Pablo attoch ashtet. Huanca'huet Pabloñapa' otan capitán ñeñt tets allame'tets:

—Ta', ¿pocte't senteñ o'ch sashte' acheñ ñeñt romanona'tar, ñaña ama señoḡteña' ñeñt atet pena? Ñoñets ñeñt atet anare't Romoḡpa' ta', ¿pocte'te'?

²⁶ Ñeñta e'm capitánpa' o' ahuo' allo'tsen pa'm̄cha'tareterpa' atet otos:

—¿Erroḡena't ḡoctape'cheññañ añ acheñer? Añpa' romanona'tarca'ye.

²⁷ Añña ñeñt solltarnesha' pa'm̄cha'tareterpa' o' huapapa' atet otosan Pablo:

—¿Po'ñoçha't romanona'tareḡ?

Pabloñapa' o' anaḡ:

—Napa' ñeñtenca'ye.

²⁸ Ñeñña am̄cha'taretpa' alla o'terranerr Pablo:

—Napa' o' netsa'ta shonte' quelle attoch a'punta'net attoch napa' romanona'tar pennet.

Pabloñapa' alla otererr:

—Napa' attot ne'ñalleta, tarro'mar na nompörpa' romanona'tar.

29 Añña solltarnesha' ñeñt autsa ashtayen Pablopa', allorocmo' alla cheta'yerret a'yenet. Ñeñt pa'mcha'tareterpa' ñapa'cho'ña cha yoren, tarro'mar o' chapoña pueyo'chro o' huanca'huet achen ñeñt romanona'tar.

Allempo eños Pablo allo'tsa'yen ñeñt chocma a'pocatyene' ñoñets

30 Tsapaña puetarenpa' añña amcha'taretpa' o' agotatan cornaneshash' ñeñt pa'mcha'tareternesha' pen allohuen judionesha' po'cornaneshash', ñaña o' agotatan ñeñt chocma a'pocatyene' ñoñets judioneshacop. Allempoña apchetpa' o' pueyamperet Pablo allo huanquëtpa' o' anmet allo'tsa'yen amcha'taretnesha'. O' chapachetpa' o' tomatoset e'ñe allame'tets. Añña amcha'taret romanonesha'pa' mueneñ o'ch eñoch e'ñe po'ño'ch esocopte' otteñe'chen judionesha'.

23

1 Pabloñapa' o' cohua'yesan allohuen ñeñt chocma a'pocatyene' ñoñets. Allempoñapa' atet otanet:

—Masheñneshacha', napa' chocma nocrrena cohuen Yomporecop, ama't ahuatoteñ ama't ñaña teme'ttsen. Yomporpa' entennante' e'ñe cohuen neyo'cher.

2 Añña cornesha' Ananías ñeñtara ñeñt nanac amcha'taretpa' atet otan ñeñt tets e'ñe allame'tets Pableshe, atet otanet:

—Chosañaca'ye asnama'te'.

3 Allempoña Pablopa' otan amcha'taret, atet och:

—Yomporpa' tsa'tatuerrpepa'ch, tarro'mar ama't porrtenañ e'ñe cohuenpa' peyo'chropa' ama masosyape. Ñaña ñeñto'marña anaretep pa arr attoch papa' peñotaten ñato' chate' nepena ñeñt ama pocteyaye ñeñt atet otaney ñoñets ñeñt atet anaret. Tarraña pañapa' o' atta pasnama'taten. Tarraña ñeñtpa' ama pocteyaye ñeñt atet otaney ñoñets ñeñt atet anaret.

4 Añña ñeñt tomcha'tets allame'tetspa' o' che'ptare'chet Pablopa' atet ochet:

—Papa' atarro't cohuen penteña o'ch pesochatse'ch cornesha' ñeñt nanac amcha'taret ñeñt nen Yompor.

5 Pabloñapa' anapanetpa' atet otanet:

—Napa' ama masheñneshacha' neñoteñe añmapa' ñeñte' cornesha' ñeñt nanac amcha'taret. Ñerra'm neñoteñeña' amach nochñe atet, tarro'mar anaret Yompor po'ñoño atet: “Ama asochatse'pahuo achen ñeñt amcha'tarettetsa socop.”

6 Allempoñapa' o' cotape'ch Pablo. Añña ñeñt chocma a'pocatyene' ñoñets patantarrñapa' saduceonesha', po'potantañña' fariseonesha'. Allempoña Pablopa' o' eñoch atetpa' allempoñapa' o' eños huomencpa', atet otanet:

—Masheñneshacha', napa'cho'ña fariseoneshan. Natañneshañpa'cho'ña fariseoneshet. Ñeñto'marña te'pa' otteñe'chennet tarro'mar napa' name'ñena atto ñerra'm yerroma, Yomporpa' tantatterreycha' esempohuañen.

7 Neña otua Pablopa' allempoñapa' ama patrraye' cotape'cheto ñeñt actape'chatañnesha'. Añña ñeñt fariseonesha' ñetpa'cho'ña cotape'chet pater, po'potantañña ñeñt saduceonesha'pa', ñetpa'cho'ña o' cotape'chet po'poñ. Amaña patrraye' cotape'cheto. 8 Ama patrraye'

cotape'cheto tarro'mar saduceonesha' ñetpa' cotape'chenet ñerra'm yerromapa' amach yetanterro. Ñaña ñetpa' otenet ama eñalle Yompor po'mllañoñeñer ñeñt huetsa entoť, ñaña ñetpa' otenet ama eñalle yecamquëñ. Tarraña fariseonesha' ñetpa' cotape'cheñet po'ñočh ñerra'm yerromapa' yetanterrach. Ñaña ñetpa' otenet po'ñočh eñall Yompor po'mllañoñeñer ñeñt huetsa entoť, ñaña po'ñočh eñall yecamquëñ.⁹ Allempoñapa' ñetañeño' nanac ama'toçhtet. Atteñapa' puesheña'tets fariseonesha' ñeñt nanac etsotene' ñoñets ñeñt atet anareť o' tomosetpa' eñososet Pablocop, atet otet:

—Añ acheñer yapa' ama yenteññañe erra'tsentē'ña po'chñar. Po'ñočhpa' ñato' orrtoña Yompor po'mllañoñeñer ñeñt huetsa entoť amapa' ñato' es ñeñt camquëñets ñato' ñeñt orrtenoya. Ñeño'marña yapa' amachña čha yepatare'tatsche Yompor ñerra'm ñafe' atet muenatene'.

¹⁰ Allempo nanac ama'toçhtenetpa' añña solltarnesha' pa'mcha'tareťerpa' o' cotape'ch, atet ot:

—Ñato' o'ch rraquët Pablo.

Ñeño'mar o' chore'tan po'poñ solltarnesha' o'ch huapuet o'ch chetereta' Pablo alloťpa' o'ch aneret pocollo all shontena solltarnesha'.

¹¹ Tsapañña tsapopa' o' alla orrteññañerr Pablo Yepartseshar, atet otos:

—Amach pellcatsto, tarro'mar Romopa'cho'ña all palltena o'ch pa'potoñ neñoñ atet o' pa'potuon arr Jerusaléño.

Allempo judionesha'pa' atarr o'pachet Pablo o'ch muetset

¹² Tsapañña puetarenpa' añña judionesha'pa' atarr o'pachet Pablo ahuo'ch muetset. Ñetpa' o' a'pochtachet, atet otet:

—Yapa' amach yerroña' ñerra'm amach o' yemtso Pablo ñaña amach es yorrerro. Atteña ñerra'm amach atťetopa' ama'tpa' esepa' yetantoya.

¹³ Ñeñña o'patenayapa' ñato' metente' pa'tatsot čharrasheña.

¹⁴ Allempoña o' a'pochtatuťpa' ahuanmuet ñaña allo'tsa'yen cornanesha' ñeñt pa'mcha'tareťernesha' pen allohuen judionesha' po'cornaneshar ñaña allo'tsa'yen ñeñt pompornesha' penet. O' chapuet allpa' atet otoset:

—Yapa' o' ya'pochtatuť atet: Yapa' yoten ñerra'm amach o' yemtso Pablopa' amach yerro. O' ya'pochtat ñaña atet: Atteña ñerra'm amach atťetopa' ama'tpa' esepa' yetantoya.

¹⁵ Alla oterreťer:

—Ñehua, te'pa' o'ch yotas ñeñtcha' atet sepa. O'ch soteña' ñaña ñeñt čhocma a'pochtatyene' ñoñets alloťpa' e'ñe parrocmapa' o'ch semña ñoñets allo'tsen solltarnesha' pa'mcha'tareťer, o'ch soch huapachetepa' Pablo sesho atťoch o'ch señoťoñ este' o' pōhua. Tarraña ama'tcha' atet seshcanetpa' yañapa' allo'tsa'yeneycha' toño atťoch yapa' o'ch yerrmař.

¹⁶ Añña Pablo pa'ñachorpa' o' e'mare'ch čha o'pateññañet pa'go'pa' o' ahuo' solltarnesha' pa'pacłlopa' o' otenana' pa'go' Pablo. ¹⁷ Alloťña Pablopa' o' chore'tan puesheñarr capitán, atet och:

—Añ huepuesha'pa' o'ch panem' allo'tsen pa'mcha'tareťer tarro'mar ñapa' atarr mueneñ o'ch es a'metena'.

¹⁸ Capitánñapa' o'cho'ña anman huepuesha' allo'tsen pa'mcha'tareťer. Allempoña čhappa' atet otosan pa'mcha'tareťer:

—Añ Pablo ñeñt ehuancaretpa' ahuo't chore'ten allotpa' oten ahuo'ch nanemñ añ huepuesha' pesho tarro'mar ñapa' nanac mueneñ o'ch es a'metena' pesho.

¹⁹ Añña añcha'taretpa' o' echa'nman huepuesha' pototpa' o' anemñ a'yene'tpa' atet otos:

—Ñehua, o'ch pōten este' pemnen o'ch pōten.

²⁰ Huepuesha' ñapa' atet och:

—Añña judionesha'pa' o' a'pōctachet attoch o'ch enamapet o'ch pemñe Pablo tsapa't allo'tsa'yen ñeñt chocma a'pōctatyene' ñoñets. Ñaña o'ch otapet añepo'ch pemñe atto'ch eñochet e'ñe po'ño'ch este' o' pōhua. ²¹ Tarraña amach pame'ñatstaneto errotencha' otospet tarro'mar metente' pa'tatso't charrasheña judionesha' ñeñtcha' camroya toño ñeñtcha' rromapue' go'. Ñetpa' o' a'pōctachet amach rrerreto ñaña amach es orreto ñerra'm amo'ch muetseto go'. Ñaña o' a'pōctachet ñerra'm amo'ch attetopa' ama'tpa' esepa'to' tantahuet. Te'pa' aña pall-tetsa ñeñtcha' atet pōtanet.

²² Añcha'tare'tña'pa' atet otan huepuesha':

—Tarraña amach esesha' pōtatsto pāpa' o' pōtuenna'.

Ñeñta otuepa' allempoñapa' o' mueñer.

Allempo chapachet Pablo allo'tsen gobernador Félix

²³⁻²⁴ Allempoña añcha'taretpa' agotatan epsheña po'cap'taner. Allempoña o' chapuetpa' atet otapanet:

—Cherra'ch a las nueve tsappa' o'ch secamrat doscientos solltarnesha' ñaña setenta ñeñt montenaya cahuall, allotpa' ñaña doscientos ñeñt orrene' muetsamets alloch quellaret. Allotpa' o'ch sanem paterr cahuall amapa' epa alloch monta'nma Pablo. Allotñapa' o'ch sahanma Cesareo attoch se'chapach cohuen Pablo allo'tsen gobernador Félix.

²⁵ Allotpa' quellcan ñaña carta ñeñt'pa' atet ot: ²⁶ “Gobernador Félix ñeñte'p nanac cohuenep' añcha'tare't, na Claudio Lisiaspa' o'ch nehuom'cha'ta'p añ necarto't. ²⁷ Añ yacmapa' ahuo't rromue' judionesha' o'ch muetsetañpa' nañapa' o' neño'ch ñapa' romanona'tar. Nañapa' nehuapa epan nesolltarnesharpa' o' na'rroyatatos. ²⁸ Napa' nemneñ o'ch neño'ch esocopte' nanac otteñe'cheñet, ñeñto'marña napa' o' nanemñ allo'tsa'yen ñeñt chocma a'pōctatyene' ñoñets ñeñt atet ye'chenet ñet. ²⁹ Tarraña napa' neñotoñ ñeñte'cop otteñe'cheñet, tarro'mar ñetpa' otenet ama atteye' peno atet anare'tet ñocpuet. Ñeñte'cpaña otteñe'cheñet tarraña ama añecpayaye attoch o'ch yemtsach amapa' o'ch yeyot-tam'psach. ³⁰ Allempoña napa' o' ne'mare'ch judionesha'pa' cha o'pateña o'ch muetset. Ñeñto'mar te'pa' o'ch nemñe pesho tayecma. Ñaña o' notueña ñeñt otteñe'chene' arrpa', te'pa' a'meteñetepa' pesho esocopte' otteñe'cheñet. Te'pa' ñeñtach nota'p.” Allohua huañ po'carta.

³¹ Allempo atet otanet pa'm'cha'tare'terpa' añña solltarnesha'pa' e'ñe a'nahua anmet Pablo tsapocma. Allotñapa' o' chapuet all anetso pa'so'cheñ Antípatris. ³² Tsapatña añña solltarnesha' ñeñt chop'e'chets pa'tocpa' allotpa' puerra'cherret Antípatriso't. Allotpa' aña anmue'ña Pablo Cesareohua ñeñt montetsa cahuallo. ³³ Allempoña chapuet Cesareopa' o' aposet gobernador carta. Ñaña o' chapachet Pablo e'ñe ñesho. ³⁴ Allempoña gobernadorpa' o' lleya'huan cartapa' a'pō'tan Pablo:

—¿Erra'tsena'tña anetsrot pehuapa?

Ñaña'pa' atet och:

—Arrot nehuapa Ciliciot.

Allempoña gobernadorpa' o' eñoch allot huapa ³⁵ allempoñapa' otan Pablo:

—Te'pa' allach ya'pochtachña' ato't huačha'ta' ñeñt' potteñe'chene'.

Allempoñapa' o' mueñan po'solltarneshar cohuan'psetepa' Pablo alara am'cha'taret Herodes po'palaciopahuo.

24

Allempo judionesha'pa' otteñe'choset Pablo allo'tsen am'cha'taret Félix

¹ Pa'mnarmatñoñapa' huapa ñeñt' pa'm'cha'tareter pen allohuen judionesha' po'cornaneshar, ñeñt'pa' añ pa'so'cheñ Ananías. O' huapa ñaña allponsheña ñeñt' pompornesha' penet. Allotpa' huapa ñaña puesheñarr ñeñt' pa'so'cheñ Tértulo ñeñt'pa' ñeñt'cha' eñosapretahuet. Allempoña huapuetpa' o' ahuanmuet allo'tsen gobernador attoch otteñe'choset Pablo. ² Allempoñapa' huapachet ñaña Pablo'pa' o' chore'chet ñanom Tértulo attoch eños ñanom. Ñaña'pa' añe'c'pa eños attoch otteñe'chet Pablo. Ñanompa' o' eños e'ñe cohuen gobernadorocop ñeñt' Félix, atet ot:

³ —Pa gobernadoro, nanac cohuen yentene'p tarro'mar e'ñe potot yocrrena e'ne cohuen ama eñalle attoch yečllaranna'ta. Ñaña pa'pa' o' pa'pochtatonay e'ñe cohuen ñeñt' yepalltena arr yenyo. Ñeñto'mar ya te'pa' yemneñ o'ch yeparasyoso't pocop attoch čhocma peyenpueny cohuen. ⁴ Te'pa' attoch amachyoset eñosetspa' napa' nemneñ e'ñe pemorrenteño'pa' o'ch pe'm'ñoten mame' ñeñt'cha' notap. ⁵ Yapa' yeñoteñ añ yacmapa' nanac atsrre'močhtena, nanac moñne'tatyenana ora allohuen judionesha' atto te'pa' ama patrraye' cotape'cheneto. Ñaña añmapa' ñeñt' pompor pen allohuen ñeñt' cotene' poctapña ñeñt' huapatsa Nazaretot. ⁶ Elloña te'pa' mueneñeñ o'ch a'sosyatuanen ñaña Parets pa'paquell, tarraña yañapa' o' yerrmue'. Ñaña yapa' yemneñeñ o'ch ya'pochtacheñ atet anaret yocoppa' ⁷ tarraña o' huapa am'cha'taret Lisias epuet po'solltarnesharpa' e'ñe po'huamencocma o' puerrata'mpenyeta'. ⁸ Allotñapa' atet otey ñeñt'ey otteñe'chene' yehuapuepa'to' pesho. Te'pa' pachña a'p'to'tare'te' attoch peño'ch pa'ma ora allohuen attot yotteñe'cheñ. Añpa' allohua atet eños Tértulo ñeñt' eñosapretahuet.

⁹ Judionesha'pa'cho'ña atet otet:

—Po'ño'chca'ye atet.

¹⁰ Allempoña gobernadorpa' o' yochan Pablo attoch eños ñaña. Allempoña Pablo'pa' atet ot:

—Napa' e'ñe nocsheñesha' o'ch neños pesho e'ñe nocop, tarro'mar napa' neñotene'p o' shonte' char atto pa'm'cha'tarettena arr yenyo. ¹¹ E'ñe taya o' met čharramat puechena epomuet atto o' nema'yochuena' Parets pa'pacillo all Jerusaléno. Ama't esesha' pa'p'to'tpa' atet'cha' otapet. ¹² Tarraña allempo ñetpa' ama entneto o' esesha' notnare't, ñaña ama na'tsrre'močhtana'che'acheñenesha'. Ñaña ama na'tsrre'močhto ama't Parets pa'pacillo, ama't ñaña judionesha' po'prahuo, ñaña ama't all chopeñe'chyen'acheñenesha'. ¹³ Ñeñto'marña te'pa' amate' erroten eñotatapeto añmapa' ñeñt' e'ñe po'ño'ch attota otteñe'chennet. ¹⁴ Napa'

te'pa' añach na'me'ta' pesho, napa' name'ñena ñeñt e'ñe alloch yequeshperra. Po'ño'ch napa' añ name'ñena ñeñtara Yompor ñeñt Po'yomporer pe't yatañneshañ. Ña'ma añ name'ñena ora allohuen ñoñets ñeñt atet anaret judioneshacop. Ña'ma añ name'ñena ñeñt atet quellquë't ahuat ñeñt a'mtaye't Yompor po'ñoñ. ¹⁵ Ña'ma napa' añ name'ñena ñeñt attoch esempohuañen Yomporpa' tantaterrancha' allohuen acheñ—ñeñt e'ñe cohuen acheñ ña'ma ama't ñeñt ama cohuenayaye acheñ. Ñetpa'cho'ña ñeñtara ame'ñenet. ¹⁶ Ñeñto'marña napa' chocma nema'yochrena attoch Yomporpa' enten e'ñe cohuen, ña'ma attoch acheñenesha'pa'cho'ña o'ch entnnet e'ñe cohuen ñamet.

¹⁷ 'Napa' shonte' char chocma nechopeñen erra'paren anetso'mar. Te'pa' o' taya nohuerra arr attoch napa' yesuer namo'tsesha' quelle ñeñt huocchañnesha'chno. Añ quellepa' ñeñtara apa'yesen ñeñt ame'ñenaya Yompor. Napa'cho'ña eñalleñ ñeñtcha' nepomañ Yomporecop. ¹⁸ O' taya chapmochañ allempoch o'ch na'cohuentatuañ Yomporecoppa' judionesha'ñapa' o' entnet all Parets pa'paclo. Tarraña allempopa' ama tama shonteyaye acheñ ñeñto'mar ama tama esesha' ama'tochteto. ¹⁹ Tarraña e'ñe allempopa' o' cha'cha't ña'ma judionesha' ñeñt huachetsa Asio't. Ta', te'ñapa' eso'marte'ña ama ñetaye'ña huapatseto arr attoch ñerra'm po'ño'ch mueneñet o'ch otteñe'chnet na. ²⁰ Tarraña te'pa' ama huapuetto ñetpa' ñehua, te'pa' otetepa' ñeñt huacha'tatsa te'. A'metetepa' ñerra'm po'ño'chte' este' nepanta' allempo natomos allo'tsa'yen ñeñt chocma a'pocatyene' ñoñets. ²¹ Allempopa' aña neños paterr huomenc atto notanet. Añecop napa' otteñe'chennet tarro'mar napa' name'ñena atto ñerra'm yerromapa' yetanerrach esempo. Ñehua, ñato' ñeñtecpate' otteñe'chennetña te'.

²² Ñeñta otua Pablopa' añña Félixpa' ama mueno o'ch alla serrpare'terretter, tarro'mar ñapa' o' eñotmoch atet ame'ñena ñeñt cotene' Cristo. Ñeñto'marña atet otanet:

—Ñehua, te'pa' ñeñtach yot. EsemPOCHña huapa ña'ma añcha'taret Lisiaspa' allempochña ya'pocatat ñoñets.

²³ Allempoña atet o'terran po'cap'táner:

—Te'pa' allach secua'mpererr Pablo. Amach tama sa'montsatsche. Ña'ma chocmach semnach ñeñt yemtenaya o'ch es a'p ñeñt palltena.

²⁴ Allponmaterrerrpa' o' huerra Félix Cesareo epuet puetapor ñeñt pa'so'cheñ Drusila, ñeñtpa' judionesha'. O'ña cherr Félix o' agotatuenan Pablo tarro'mar ñetpa' mueneñet o'ch serrpare'tatanet ñamet Pablo errotente' ame'ñenana Jesucristo.

²⁵ Allempoña chap Pablopa' o' serrpare'tatanet cohuen ñeñt atet yepena ya ñeñtey ame'ñetsa. Ña'ma atet otanet añcha' yema'yochra attoch e'ñe pocte' es yepa'yen, ña'ma amach ye'patsto ñeñt ama cohuenayaye tarro'mar Yomporpa' tsa'tatuerryach allempoch acerran allohuen acheñenesha'. Ñeñta otua Pablopa' añña Félixpa' cha yoren. Allempopa' alla oter:

—Te'pa' orrerre'p, esempochña e'ñe pocta'huerrnanerrpa' o'ch alla ne'chore'taterrperr.

²⁶ Félixñapa' atta cohuenan Pablo ñato' o'ch a'p quelle añecop attoch a'rroyer. Ñeñto'mar errotenopa' o'chcho'ña agotach attoch serrpare'tet epuet. ²⁷ Atteñapa' o' met epa charpa' o' cam'yerra gobernador, huapa

po'psheñeñ ańcha'taret añ pa'so'cheñ Porcio Festo. Ñaña'apa' nanac mueneñ o'ch coshatan judionesha' ñeñto'marña ama a'rroyerrano Pablo, atet ot:

—Allepa' preso.

25

Allempo chapachet Pablo allo'tsen ańcha'taret Festo

¹ Allempoña ańcha'taretta Festo all Cesareopa' poma'pamtañoña'apa' o' ahuo' Jerusaléno. ² O' chap Jerusaléno'apa' añña cornanasha' ñeñ nanac ańcha'tarettesha' ñaña epuet ñeñ nanac sherbets judioneshacoppa', o' serrpare'tatapet Festo atto otteñe'cheñet Pablo. ³ Ñetpa' atet ochet Festo agotatanepa'to' Pablo attoch huapa Jerusaléno, tarro'mar ñetpa' ahuañacma a'pocstatuet o'ch cohuet Pablo toño attoch muetsapueret all. ⁴ Festoña'apa' atet otanet:

—Pablo'apa' allo'tsena all yottañpeñet Cesareo. Napa' o' nesecherra o'ch ahuerren Cesareo. Ñato' e'ñech na'llponmatena o'ch ahuerren. ⁵ Te'pa' ñeñ nanac ańcha'tarettetsa socoppa' cota'nerrnetepa' allochña'apa' otteñe'cheñetepa' Pablo all, ñerra'm po'ñochte' eñall alloch otteñe'chet.

⁶ Festoña'apa' alla a'pa Jerusaléno allponmat. Ñato' po'psocmatño amapa' po'charramatño'apa' o' ahuerren Cesareo. Cherr Cesareopa' tsapaña e'ñe ahuatecmapa' o' anorros allecma a'pocstatenet ñoñets. Alloña agotatan Pablo. ⁷ Allempoña huapachet Pablo'apa', añña judionesha' ñeñ huacha'tatsa allpa' cha arrotañpesyet. Allempoña'apa' otteñe'choset. Shonte' esocmañen nanac sosey toma'tañpesyesoset Pablo, tarraña ama erroteno' eñotacheto ańcha'taret Festo attoch otoset e'ñe po'ñoche. ⁸ Pabloña'apa' o' eños ñaña ñocop atet ot:

—Napa' ama cho nachmare'teno ñoñets ñeñ atet anaret judioneshacop. Ñaña napa' ama cho na'sosyateñaña Parets pa'paquell. Ñaña napa' ama cho natpare'teno ñoñets ñeñ nen ańcha'taret Romo't.

⁹ Tarraña Festopa' nanac mueneñ o'ch coshatan judionesha', ñeñto'marña otan Pablo:

—¿Pocte't penteñ o'ch ahuep Jerusaléno allña'apa' allcha' nentona'p atto po'ñochte' alloch otteñe'chapet?

¹⁰⁻¹¹ Pabloña'apa' alla anapuerren, atet ot:

—Napa' añña pocte' nenten o'ch a'pocstaton ańcha'taret ñoñets ñeñ romo'marnasha', tarro'mar amate' erroteno' neto Jerusaléno, tarro'mar ama erro' nepeñaña judionesha', ama't papa' peñotueñ. Ñeñto'mar añña pocte' nenten o'ch a'pocstaton ańcha'taret ñoñets ñeñ romo'marnasha'. Te'pa' arro'tsenen pesho ñeñep eñets epañ ańcha'taret romo'marnasha' ñeñ pocte' nenten na, ñach a'pocstate'ña ñoñets nocop. Tarraña ñerra'm po'ñochte' añ o' nepohua ñeñ ama pocteyaye amapa' atet ñerra'm alloch muetsanet ñeñtpa' e'ñe pocte' muetsanetepa'. Tarro'mar ama nemno o'ch na'queshpata nañeña. Tarraña ñerra'm e'ñe attotapa' ama pocteyaye o'ch pepomuen judioneshesho. Ñeñto'mar napa' nemneñ o'ch a'pocstaton ańcha'taret ñoñets ñeñ romo'marnasha' e'ñe ñapue't.

¹² Allempoña Festopa' o' serrpare'tet epuet ñeñ parro cotape'chatannenet. Allempoña'apa' atet otan Pablo:

—Te'pa' nanac am̄cha'tarefesho pesechenapa' ama'tpa' allcha'ca'ye peta.

Atto eños Pablo allempo huapa am̄cha'taret Agripa

¹³ O' allponmaterrerrpa' huapa am̄cha'taret Agripa epuet po'ch Berenice. O' chapuet Cesareo all emo'teñeta' am̄cha'taret Festo. ¹⁴ O' allponmatosetpa' allempoña Festopa' serrpare'tatanet atto otteñe'cheñet Pablo, atet otanet: Arrpa' allo'tsen puesheñarr yacma ñeñt na'nom Félix ahuaña all yottanpeñet. ¹⁵ Allempoña napa' Jerusaléño'tsenenpa', añña cornaneshá' ñeñt pa'm̄cha'tarefernesha' pen allohuen judionesha' po'cornaneshar, ñaña po'potantañ ñeñt pompornesha' penet, ñetñapa' o' serrpare'tatnet atot otteñe'cheñet Pablo, ñaña otnet napa' nemtsachepa'to' Pablo. ¹⁶ Nañapa' atet notanet: “Ñeñt ñoñets anaret Romo'tpa' ama pocteyaye o'ch yemtsach acheñ ñerra'm ama eñorena' e'ñe ñocop attoch eñotatanet atot otteñe'cheñet.” ¹⁷ Ñeñto'marña allempo hua'cha'ta judionesha' nesho, allempoña na tsapatñapa' o' nanorros allecma ya'pocpaten ñoñets. Allempoña napa' o' nagotach Pablo. ¹⁸ Añña ñeñt hua'cha'tatsapa' allenta tom'cha'toset attoch o'ch alla otteñe'chueñeterr Pablo, tarraña amaña añeye' a'meta'yeseto atto ñeñt poctetsa o'ch yemtsach acheñ. ¹⁹ Aña a'meta'yeset ñeñt e'ñe ñocpueta atet yechenet ñet judioneshet. Ñaña aña a'meta'yeset ñeñt poctapña puesheñarr ñeñt pa'so'cheñ Jesús, tarraña ñeñtpa' o' rroma, tarraña Pablopa' cha oten ñeñtpa' o' tanterra. ²⁰ Ñeñto'marña napa' ama tama neñoche attoch na'pocpat ñoñets ñocpuet. Ñeñto'marña atet noch Pablo po'tomña: “¿Pocte'te' penteñ o'ch ahuep Jerusaléño allcha' ya'pocpatena' ñoñets?” ²¹ Tarraña Pablopa' ama mueno. Ñapa' aña muena' allach arr, allotcha'ña esempopa' entateñetepa'to' am̄cha'taret Augusto all Romo. Ñeñto'marña napa' not: “Te'pa' allepa' arrma, esempochña napa' o'ch nemñe am̄cha'tarefesho Romo.”

²² Allempoña am̄cha'taret Agripapa' atet otan Festo:

—Napa' atarr nemneñ o'ch ne'm̄ namña erro'tente' serrpare'ten Pablo.

Allempoña Festopa' atet och:

—Tsapat'cha'ña pe'm̄ñota'mueñ.

²³ Tsapatñapa' huapa'muena am̄cha'taret Agripa epuet ñaña po'ch Berenice. Ñetñapa' cha cohuenetyesoset. Allempoñapa' be'tos'cha'toset allecma serrpare'tatannena am̄cha'tarefnesha'. O' be'tos'cha'tet epuet ñaña solltarnesha' pa'm̄cha'tarefernesha' ñaña po'poñe'chno acheñenesha' ñeñt nanac sherbets all anetso. Allempoña Festopa' o' agotatenanerr Pablo. ²⁴ Allempoña huapa Pablopa' Festoñapa' eñoratsapa' atet ot:

—Am̄cha'tarete Agripa, ñaña allohuenes ñeñtes arro'tsa'yenes: Te'pa' o' sentue añ yacma ñeñt nanac e'moñe'ten allohuen judionesha'. Ñetpa' o' otteñe'chuet e'ñe nesho allempo Jerusaléño'tsenen ñaña arpa' o' otteñe'chueñeta' allempo ne'cherr ñaña arr. Ama't arpa' o' che'chame'tueñeta', atet otyeset: “Chosa muetse', tarro'mar añ acheñerpa' ama pocteyaye o'ch alla corra.” ²⁵ Tarraña allempoña napa' na'p'to'tare'chpa' ama nentoñeña ñeñt atto pocte' o'ch nemtsach. Ñaña e'ñe ña muenats o'ch entateñeta' am̄cha'taret Augusto all Romo ñeñto'marña napa' pocte' nenteñ o'ch nemñe all. ²⁶ Tarraña napa' ama neñoteñe ñeñt'cha' atet nequellcoñ ya'm̄cha'tarefer ñocop tarro'mar ama

eñalle errotenotcha' yotteñe'cheñ. Ñeñto'marña te'pa' o' nechore'tach arr all seshontena te'.

Alloña Festopa' atet otan añcha'taref Agripa:

—Te'pa' pach ñanom a'pto'tare'te' attoch napa' o'ch neñoche errotench'a nequellca' carta añcha'tarefecop. ²⁷ Napa' noctape'cheñ ama pocteyaye o'ch yemñe acheñ ehuanca'ref ñerra'm ama eñalle errotenot o'ch yotteñe'cheñ.

26

¹ Allempoña añcha'taref Agripapa' atet otan Pablo:

—Ñehua, te'pa' pocte' nenteñ o'ch peños ñaña ñocop.

Allempoña Pablo e'ñe puehuomñcha'teño'pa' o' echantan pot, allempoñapa' eños ñocop, atet ot:

² —Te'pa' nocshena añcha'tarete Agripa tarro'mar eñall attotcha' neños pesho nocop, añecop tarro'mar cha otteñe'chenen judionesha'. ³ Napa' nocshena tarro'mar te'pa' o' peñoche ñaña atet yeychena ya ñeñey judioneshay. Ñaña o' peñoche attot ama patrraye' yoctape'chyeno. Ñeñto'marña te'pa' o'ch nenamañ attoch pe'mñoten cohuen.

Atet atarr cotape'che't Pablo allempo ama ame'ñerra'

⁴ 'Allohuen judionesha'pa' eñotuennet atet nocre't ahuat, ama't allempoteñ ne'ñalleta nenyoy, ñaña ama't allempo cheshenna' allempo yeyche't Jerusaléño epan namo'tsna'tarnesha'. ⁵ Ama't ahuatoteñpa' eñotuanete't napa' fariseoneshan ñeñfara ñeñ nanac etsotene' cotapñats nanac echarr allo yoctape'chen Partsocop. Ñeñ atet entnete't atet nocre'tpa', atetcha'ñacho' a'meta'netañ. ⁶ Ñeñto'mar te'pa' arro'tsenen attoch sa'pto'tare'ten, atto napa' name'ñena ñerra'm yerromapa' Yomporpa' tantaterreycha' esempohuañen. Añmapa' ñeñfara atet otane't ahuat Yompor yatañneshañ. ⁷ Ama't charrasheña puechena epa ñeñfara ñeñ yatañneshañ yepen ñeñ chemere'tyesahuetpa', ñeñña po'mñenñetpa' e'ñe ame'ña'huenet ñeñ atet o' notuas. Ñeñto'marña ñet te'pa' nanac ma'yoçhrenet Yomporecop —yeto ama't ñaña tsapo. Tarraña ama't atet penetañ allohuen judionesha'pa' te'ñapa' e'moñe'tennet ama't napa' ñeñfara name'ñena atet ame'ñenet ñamet. Attoña añcha'tarete Agripa otteñe'chennetña te'. ⁸ ¿Eso'marte' sapa' soten amach errotenot tantater-rano Yompor arromñañesha'?

Atto Pablopa' atarr mueroçhtatane't ñeñ ame'ñenaya Cristo

⁹ 'Napa'cho'ña ahuañmo'chapa' notenapañ ñato' ñeñte' poctetsa o'ch yemueroçhtach ñeñ co'tene' Jesús poctapña ñeñfara Jesús ñeñ nazareto'marnesha'. ¹⁰ Ñeñto'marña napa' nanac nemueroçhtatyese't acheñ Jerusaléño ñeñ ame'ñaye't Jesús poctapña. Shonte' acheñ ñeñ nabe'tate't cárcelo, tarro'mar cornanesha' ñeñ pa'mñcha'tareternesha' pen allohuen judionesha' po'cornanesha', ñetñapa' o' apnet orden ñeñfecop. Ñaña allempo otyese't añcha'tareñesha' ahuo'ch muetsachet ñeñ ame'ñenaya Jesús poctapñapa', napa'cho'ña o'chcho' not, pocte'ñacho' muetsetepa'. ¹¹ Chocma nemueroçhtatanete't ama't judionesha' po'prahuo'mar, ñaña nanaccha' nemne't o'ch nachmare'tach ñeñ ame'ñatse't. Nanac natsrre'mueño'pa' noctare'tanete't erracmañen anetso'mar.

Allempo Pablopa' ello serrpare'taterraneterr atto ello cotape'cherran cohuen Yomporecop

(Hch. 9.1-19; 22.6-16)

¹² Alla oterraneterr Pablo:

—Atteñapa' o'cho' ahuen ñaña Damasco. Allempopa' napa' nechen orden ñeñt' apuen ñeñt' pa'micha'taretnesha' pen allohuen judionesha' po'cornaneshar. ¹³ Ñaña amicha'tarete te'pa' o'ch notap' ñeñt' atet norrtoya allempo. Allempoña o' yechapmoch Damasco allempopa' o' chap pocto. Ñeñtña nanac poptetsa ento'tpa' machayo'tepa'tcha' choyo'tam'psapuen ama't ñeñt' epan nesen. Atet poptenapa' metanenan atsne'. ¹⁴ Allempoña yapa' alla yerrmopra'yesa patso. Allempoña alla yerrmopra'yena patsopa', nañapa' o' ne'm ñoñets hebreyacho ñeñt'pa' atet oten: “Eso'mare't Saule pemueroçhtatennanña ñeñt' name'ñenaya. Añpa' pañeña mueroçhtatetsa. Tarro'mar cha pottena ñerra'mrate' ashen ñeñt' e'ñe patpare'teño't ñañeñachña atserrpatetsa.” Añpa' atet oten ñeñt' norrtoya. ¹⁵ Nañapa' not: “¿Eshape'tña Ayochreshate eñets?” Ñañapa' alla otrerrerr: “Napa' ñeñten Jesús en ñeñtara pemueroçhtaten. ¹⁶ Te'pa' petanterra alla, ñeñto'mar te'pa' o' norrta pesho attoch o'ch nena'p' pa, pach torratsa nocop, ñaña pach a'pote' ñeñt' o' pentua te' ñaña ñeñt'cha' neñotap' allempoch norrterrerr pesho. ¹⁷ Te'pa' o'ch nemña'p' allo'tsa'yen ñeñt' ama judioneshayayeto, tarraña napa' chomach necuañpsa'p' ñerra'm esempo o'pata'pa judionesha' ñaña ama't ñeñt' ama judioneshayaye. ¹⁸ Tarro'marcha' nemña'p' allo'tsa'yen ñeñt' ama judioneshayayeña' allochñapa' attoch peserrpare'tatuanet attoch çhapanet pueyoçhro, attoch o'huañcha' chope'chet checmeto. Añcha'ña o'ch alla chope'cherret puetaro. Ñaña attoch o'huañcha' ahua'ncat panet oneñe't, añcha'ña ahua'ncat penahuet Yompor. Allochñapa' o'ch ame'ña'huerrnet na, allempoñapa' ne'pretna'huerranetcha' po'chñar, attoch o'ch parrocmatuerret e'ñe attecma atet ñerra'm ñeñt' o' na'cohuentatua.”

Atto Pablopa' ama atpare'tenano ñeñt' atet gateñ Partsesha' Jesús

¹⁹ Alla oterraneterr Pablo:

—Ñeñto'marña amicha'tarete Agripa te' napa' ama natpare'teñe Jesús ñeñtara ñeñt' norrtoya ento't. ²⁰ Ñanompa' o' neserrpare'tatanet Damasco attoch cotape'cherret ello cohuen Yomporecop. Allochñapa' o'ch pa'yenet ñeñt' cohuentetsa Yomporecop, attoch yeño'ch po'ño'ch o' cotape'cherret etserra. Attecma neserrpare'tatanet ama't Jerusaléño, ñaña ora erracmañen Judeo'mar, ama't ñaña allo'tsa'yen ñeñt' ama judioneshayaye. ²¹ Atto'tña judionesha'pa' o' rroma'net Parets pa'paclo o'ch muetsanetañ. ²² Tarraña Yomporpa' ahuo't a'natna nanac atto teme'ttsen nocrrena, attoch neserrpare'tach allohuen acheñenesha'—ama't ñeñt' ama esoshe'mayaye, ñaña ama't ñeñt' amicha'taretnesha'. Tarraña ama añeye' neyçhatenaneto ñeñt' ama cohuenayaye. Añña attecma neyçhatenanet atet serrpare'te't ama't ñeñt' a'ñtaye't Yompor po'ñoñ ahuat. Ñeñt'pa' ama't Moisés'pa' atet ote't ñeñt'cha' atet perra esempo. ²³ Ñeñtara serrpare'tatanete't ahuo'ch huapa Cristo añ patsropa' nanaco'ch mueroçhtachet, allo'tpa' ahuo'ch rroma, tarraña ñapa' tanterrach. Atto'chña tanterra ñanompa' o'ch a'puetarsam'psanet pueyoçher allohuen judionesha', ñaña ama't po'poñeçhno acheñ.

Allempo Pablopa' atarr mueneñ o'ch ame'ñatana amcha'taret Agripa

²⁴ Allempoña atet eñen Pablo ñocoppa', Festoñaapa' atet och e'ñe huomenco:

—Chate' Pablo pemospuena tarro'mar nanac es p̄octape'chenpa' ñato' ñeñte' o' mospaterreḡ.

²⁵ Pabloñaapa' atet och:

—Ama Ayochreshate Festo čoye' nemospueno. Añña neserrpare'tatenes ñeñt e'ñe po'ñočh. ²⁶ Ama't amcha'taret Agripapa' e'ñe eñotueñ atet noten. Ñeñto'marña te'pa' o' neyemcha ña tarro'mar napa' neñoteñ, ñapa' o' entuon ñeñt atet nepena, ñaña tarro'mar ama a'nahua es neḡa'yeno. ²⁷ Amcha'tarete Agripa, ḡapa' ¿ḡame'ñeña't ñeñt a'mtaye't ahuat Yompor po'ñoñ? Napa' neñoteneḡ ḡapa' ḡame'ñeña.

²⁸ Allempoña Agripapa' atet otan Pablo:

—Cha't p̄otenapañ tayecmapa' o'ch ḡame'ñatna Cristo.

²⁹ Pabloñaapa' alla otererr: Ama't tayecma amapa' tsapatonetpa' napa' atarr nemneñ Yomporpa' o'ch ame'ñaterrpa, ñaña ama't allohuenes ñeñtes ne'ññotene' te'. Atarr nemneñ o'ch same'ñerra allohuenes atet ñerra'm na, tarraña ama'tcha' atteseñ ñerra'm na, sapa' amuepa'chña ehuancaḡeteyaso.

³⁰ Allempoñaapa' o' tomča'terret allohuenet —amcha'taret Agripa, ñaña gobernador Festo, ñaña Berenice ñaña allohuen ñeñt allo'tsa'yen.

³¹ Allempoña ahuanerretpa' atet otanna'tyeset:

—Añ yacmapa' ama es peno attoch o'ch yemtsach amapa' attoch yemñe cárceło.

³² Allempoña amcha'taret Agripa otan Festo:

—Amach ña muenetsñe o'ch a'p̄octatenana' ñoñets amcha'taretesho Romopa' yapa' o'te' ya'rroyereñ e'ñe tayecma.

27

Allempo anmet Pablo Romo

¹ Allempoña o' a'p̄octatuet o'ch mueñet Pablo anetso Romo allara Italiapa' o' anmet allo'tsen capitán ñeñt pa'so'cheñ Julio, ñeñt po'caḡtaner penet ñeñt emchorrenaya amcha'taret Augusto. Ñaña o' anmet po'poñečhno ñeñt ayottam̄psaretečhno o' apueñeta' Julio, allñaapa' ñach cohuan̄pesnomahuet. ² Allempopa' allo'tsen ñaña Aristarco ñeñt macedonio'marnesha' ñeñt huetsa Tesalónicoḡ. Ñeñtcha' parro yocḡa'neñ Pablo.* Allempoñaapa' o'cho' yebe'toscha't boto ñeñt huetsa anetsoḡ Adramitiot, ñeñtña botepa' o'ch etsotyenosoma allemeña sohua'puetso'mar ora Asio'mar. Allempoñaapa' o'cho' ahuan̄psey boto. ³ Tsapatñaapa' arr yetsotosa all oteñet Sidóno. Allña capitán Juliopa' morrentnomana Pablo ñeñto'mar o' muenach o'ch emo'tnoman pamo'tsesha', ñeñt yečha'yetsa all Sidóno, attoch ñetpa' o'ch apapet Pablo ñeñt palltena. ⁴ Allempoña ahuan̄perryerrpa' nanac yorrrnotam̄pesnoma. Morrpa' ama muenaty e' o'ch yemet attoch o'ch ahuey e'ñe pačharr all oñenet, ñeñto'marña yepotesam̄pesuanma coñe't pats ñeñt pa'so'cheñ Chipre. Tarro'mar yepotesuanma attoch ñeñt patspa' o'ch a'n̄pam̄psey m̄orr. ⁵ Allempoñaapa' arr yoñemuanom

* 27:2 Lucas ñeñt quellquē' añ ñoñets ñapa' cota'nman ñaña Pablo.

allame'tets Cilicio'mar, ñaña allame'tets Panfilio'mar. Allempoñapa' yečhap ñaña Miro all yetsotosa, allara ñeñt pa'netser Licia.

⁶ Allña capitán Juliopa' entosan po'poñ bote ñeñt huetsa Alejandriot ñeñtcha' tatsa Italio. Ñaña allempopa' otey ahuo'ch ya'tačha't all. ⁷ Allempoña o' allponmat ahuañpsey e'ñe acořapa' e'ñe yemuerochenñoa yemet ñaña Gnidot. Allotpa'čho'ña ama muenaterryerro mōrr o'ch ahuaryerr e'ñe pačharr, ñeñto'marña yepotesañpesuanerrerr coñe't pats ñeñt pa'so'cheñ Creta attoch ñeñt patspa' o'ch a'npañpsey mōrr. Allñapa' allpono'mar yoñom allecma etsotenet ñeñt pa'so'cheñ Salmón. ⁸ Yemuerochenñoa yemetua ñaña allot e'ñe acořa. Atteñapa' yečhap ñaña all oteñet Cohuen Sohua'puetso. Allotpa' e'ñe allame'ttsa anetso Lasea.

⁹ Yemuerochtame'teño'pa' o' ya'llponmatnom ñeñto'mar allempopa' o' čhen allempo nanac añcha'nočhtena o'ch ahuañpsey sapo'mar. Ñaña o' met allempo anaret judioneshacop allempocma ahuantenet pa'chporrña Yomporecop, ñeñto'marña yapa' o' yeñoč o' čhen allempo nanac orrnotena sapo'mar. Ñeñto'marña Pablopa' o' yerpatanet, ¹⁰ atet otanet:

—Masheñeshacha', napa' noctape'chen arepoña es yehuapoya toño allempoch ahuañperryerr. Napa' noctape'cheñ ñato' o'ch yechencatsre'tnoma, ama't ñaña yebotepa' čhach chenca; ama't yapa'čho'ña arepoña čha yechenca.

¹¹ Tarraña capitánñapa' o' ame'ñenana atet otanet ñeñt maneja'nene' bote ñaña ñeñt atet otanet ñeñt pamo'mte' pen bote. Ama ame'nyeto atet otanet Pablo. ¹² Ñaña all Sohua'puetso Cohuenpa', ama tama cohuenayaye o'ch allaya allempo čhen orrnoteñtsopo. Ñaña allohuenetpa' o' e'ñe pocte' entuet o'ch ahuañperryerr allot. Arro'chña yečhap sohua'puetso all oteñet Fenice, tarraña allara anetso Creta. O' sechet Sohua'puetso Feniceo tarro'mar allpa' ama tama orrnoteno. Allñapa' allach ya'posa tarrempohua o'ch metuen orrnoteñtsopo.

Allempo huomenquëshatañpesnomuet sapo'mar

¹³ Allempoñapa' o' huapa mōrr po'pshemñtañoč, tarraña ñeñt'pa' mame-sha mōrraren. Allempoñapa' otyeset:

—Te'pa' pocte' o'ch ahuaryerr.

Allempoñapa' o'čho' cheterret ñeñt rremuene' botepa' o'čho' ahuañperryerr. Allotñapa' e'ñe to'pñ'a'so'mara yoñmañpes allara anetso Creta. ¹⁴ Tarraña e'ñe o'čtapa' ahuepa'tcha' huapa ñaña mōrr onnatot allente'tsen anets Creta. Allempoñapa' o'čho' yorrnotañpesnoma nanac huomenc. ¹⁵ Botepa' ama eshcaye' to allenet anmanñpenyet allempoña ama erroč yepapa' o' anmanñpsey orrno a'yenet. ¹⁶ Orrnoñapa' o' čhapatey po'pshemñtañoč allot'sen coñe't rročpe'chañ añ pa'so'cheñ Clauda. O' čhapatey allotemñta'n ama tama hueno mōrr. Allña e'ñe yemuerochenñoa yechant noñt ñeñt cheta'nen atarr bote. Allotpa' yesha'ch atarr boto. ¹⁷ Allempoña o' yesha'tua noñt'pa' ñetñapa' huancatset atarr bote attoch amach tare'che orrno. Ñaña ñetpa' añ mecha'tet ñato' botepa' o'ch čhap muelle'sato allot'sen mueñ ñeñt ama echarroyaye ñeñt otenet Sirte. Ñeñto'marña o' pueyhuet enot shetamuets ñeñt chope'chatene' bote attoch botepa' amach erreneč to. ¹⁸ Allempoñapa' ahuepa'tcha' yorrnotañpes nanac huomenc.

Tsapatñapa' chetanatet cargapa' saprrochet sa'po. ¹⁹ Poma' pamtañoñapa' o' saprronet ñaña ñeñt allpon echyen bote. ²⁰ Allempopa' allponmat ama orrterro atsne' ama't ñaña rantočno, ama't mamesha. Nanac yorrnotamñsa. Ateñapa' yot:

—Te'pa' amach erroteno yequeshperro.

²¹ Ñaña allponmat ama es yerro. Allempoña Pablopa' tompa' ot:

—Ñerra'm amach masheñeshacha' satpa'noñe atet notaseñ, amach yonñe Cretot, te'pa' amate' es yeyore'tenayñe ñaña allempopa' amate' yechencatsre'tañe. ²² Tarraña te'pa' o'ch notas, amach sellcatsto tarro'mar yapa' yequeshpach allohuene. Añachña chencatsre'tatsa bote. ²³ Napa' neñoteñ tarro'mar tsapopa' orrtona mellañoñeñ ñeñt huetsa Yomporeshot ñeñtara Yompor ñeñt puechemer nepene', ñaña ñeñtara ñocop netorrena. ²⁴ Ñeñt norrttoyapa' atet oten: "Amach Pablo pellcatsto tarro'mar pechapcha' allo'tsen añcha'taret all Romo. E'ñe potpa' Yomporpa' o'ch a'natana allohuen ñeñt epañ sechope'chanpen boto." ²⁵ Ñeñto'mañña notenes amach sellcatsto. Tarro'mar napa' neyemteña Yompor, ñerra'm erroten otenpa' atetcha' pa. ²⁶ Tarraña ama't atetpa' chocmach yepotamñsa allempo o'ch yechapmoch patso. Añpa' allohua atet otanet Pablo.

²⁷ Allempoña o' met çharramat puechena pa'tatsmat, atta yetamñpena sa'po ñeñt otenet Adria. Allempopa'cho'ña yorrnotamñpesnoma. Allempo çhap rroch tsapopa' añña ñeñt taruasets botopa' atet otet:

—Ñato' o' yechapmoch allo'tsen pats.

²⁸ Allempoñapa' o' topaso'tet sa'p. Allempoñapa' ahuo't eñochet allo'tsen ma'poch çharra' puechena pechap metro. Allempoñapa' o'cho' ahuaryerr allpononetpa' allpa'cho'ña o'cho' topaso'tuereterr. Allñapa' otet allo'tsen epoch çharra' puechena cançherr metro. Allempoñapa' añ mecha'tet taye'to' yeto'mamñsa mapyo. ²⁹ Allempoñapa' o'cho' a'shore'tet pueque'nare'tot pa'tatsmaga ñeñcha' rremue' bote. Allempoña a'shore'tuetpa' o' cohuet ato't puetarena'. ³⁰ Añña ñeñt taruasets botopa' a'suaterret e'ñe a'nahua noñt tarro'mar ñetpa' añ muenenet o'ch cachpa'nmueta alla bote. Ama't ahuepa't a'suaterret noñtpa' ñetpa' cha ottenet ñerra'mrate' po'poñ a'shore'tenet ñeñcha' rromue' bote poñe'magot. ³¹ Allempoña Pablopa' eñotanet atet cotape'chen ñeñt taruasets botopa' atet otan capitán ñaña po'poñečno solltarnesha' atet otanet:

—Ñerra'm ama alla a'pueto botopa' sapa' amate' errotenot sequeshperro ama't puesheñarofesa.

³² Allempoña solltarnesha'pa' o' tsorramñset noñt pochar attoch ahuo' a'yenet. ³³ E'ñe puetaresuanetsapa' añña Pablopa' atet otanet allohuenet:

—Te'pa' o'ch serra'muen tarro'mar o' çharramat puechena pa'tatsmat sema'yochreño't po'poñpa' ama semueno, ama es serreno. ³⁴ Ñeñto'mañña o' nota'muenes serra'muen attoch çherr sehuamenc, tarro'mar amach eseshas chencatso, ama't puesheñarofesa.

³⁵ Ñeñta otuanet o' chetan panpa' o' ma'yocha e'ñe alla all shontena acheñenesha'. Allotpa' shotan panpa' o' rre'. ³⁶ Allempoñapa' o' ye'chatanetpa' o' rret ñamet. ³⁷ Ñeñtey boto'tseney allohueneypa' allo'tsen doscientos setenta seis acheñenesha'. ³⁸ Allempoña ocha'huanet

puerrarpa' alla saprroteneterr trigopo'r oño attoch o'huañcha' tama eñerrta bote.

Allempo taram̄psanet sa'p po'bote

³⁹ Allempoña e'ñe puetaresuenpa' o' entet pats, tarraña ama puentareto ñeñt pats, tarraña allempo o' entet ñaña a'yohuen mueyapo's allña'pa' a'yohuen ñaña pueme'tar. Allempoñapa' cotape'chetpa' otet:

—Ñato' ye'chapcha' all allochñapa' allcha' yetsotosa cohuen.

⁴⁰ Allotñapa' tsorro'tet ñaña ñeñt rromuene' botepa' o' a'ypo'ña'nmet alla sa'po. Allempoñapa' o' pueyam̄peret allo huanquét ahuaña bote puepopa'p. Allempoñapa' echantet ñaña poñe'ñago' shetamuets attoch morra'pa' o'ch matatan bote. Allempoñapa' o'cho' ahuañpsey pueme'taronet. ⁴¹ Allempoñapa' o' chap bote all epchacra'stena sa'p all nanac epopa' rrochoñapa' cha muelle'sattena. Chap all botepa' cha a'chtosa poñe'ñago', ama erro'f yepere. Arro'ña puequë'nare'to'f nanac emo'yarentena sa'p. Po'huamencpa' o' taram̄psey yebote. ⁴² Allempoña solltarnesha'pa' mueneñ o'ch muetsanatuan ñeñt ayottam̄psaret taye'to' ñerra'm patetpa' ahuo'te' yetet. ⁴³ Tarraña capitánpa' nanac mueneñ o'ch a'qeshp̄atan Pablo ñeñto'marña ama muenataneto o'ch muetsanachet. Atet otanet:

—Ñerra'm esesha'te' eñotene' patatsapa' o'ch sepa'ta sanom attoch se'p̄chata yom̄ta'n. ⁴⁴ Allotñapa' saña ñeñtes ama eñotenaye patatsapa' ñato' o'ch sanemyes tabla amapa' po'poñe'chno ñeñt echyen bote, allochñapa' attoch se'p̄chata saña.

Allempoñapa' o'cho' pechatuet allohuenet.

28

Allempo chapuet coñe't pats pa'so'cheñ Malta

¹ Allempoña o' yeqeshpa'hua allohueneypa' allempoñapa' otyet añ coñe't patspa' año' pa'so'cheñ Malta. ² Añña acheñenesha' ñeñt ye'chetsa allpa' nanac muerapyet ñeñto'marña a'toronayet tso' allcha' yeshotosa, tarro'mar allempopa' cha huatena o' yesnate't. Tarraña e'ñe cohuen agapapuey allohuen acheñenesha'. ³ Pabloñapa' allenta tsella'tpechospa' o' a'tamo'ye' tso. Allempoñapa' machayo'ta cha'nom sheche'p̄ e'ñe tso't. Ahuo't atserr e'man tso'pa' o' cha'nomp̄a', cha a'chan Pablo pototpa' alla a'sope'ch. ⁴ Acheñenesha' ñeñt ye'chetsa allpa' eñchet Pablo cha a'sope'cheñ sheche'p̄ pototpa' atet otanna'tyeset:

—Añ acheñpa' amtsañte'ca'ye ñeñto'mar te'pa' ama't o' qeshp̄a'hua sa'po'tpa' te'ña Yomporpa' o'ch tsa'tacha.

⁵ Tarraña Pablopa' pa'shque'cherra sheche'p̄ñapa' o' shora'nerr tso, amaña erro'teye' pe ama't mamesha. ⁶ Allempoña acheñenesha'pa' atfa cohueñet Pablo ñato' machayo'tach añecmuenta potpa' o'ch taco'ra rromue'. Allempoñapa' o' cohua'huet o'chet ama es atsoto, allempoñapa' o' cotape'cherret po'poñ, atet otet:

—Añpa' po'ño'ch Paretste'.

⁷ Ñeñña ane'tañtetsa allpa' añ pa'so'cheñ Publio. All ye'chap yapa' allotpa' allame'tsa all ye'chena Publio, allpa' allo'tsen po'patseñ. Ñapa' o' agapapuey e'ñe cohuen ñeñto'mar allpa' yema'pamuetnom pa'paclo. ⁸ E'ñe allempopa' añña Publio pomporpa' cha atsa'ten, nanac huoraten ñaña cha chemotse'ten, ama achñeno. Allempoña Pablopa' o'

ahuo' o'ch enteña'. Allempoña chap Pablopa' ñaña'pa' ma'yocham̄psosya. Allempoña Pablopa' o' a'p̄llana'chpa' añña ñeñt̄ atsna'tetspa' allenta correna. ⁹ Allempoña e'mare'ch allohuen acheñenesha' atet o' p̄osa Pablopa' huapyesa acheñenesha' ñeñt̄ atsna'tyets. Ñetpa'cho'ña e'ñe a'crratyesuanet Pablo. ¹⁰ Ñeñto'marña acheñenesha'pa' shonte' regala'yesyet pa'namen. Ñaña allempo ahuan̄perryerr botopa' nonayet allpon ñeñt̄ yepalltena.

¹¹ Allempoña o' met ma'p̄ña arrorrrpa' o' alla ahuan̄perryerr po'pnañ boto. Ñeñt̄ña botepa' ñeñt̄ cohuene' o'ch metuen allempo ornoteñt̄sopoten. Añ botepa' ñeñt̄ huapatsa ahuaña Alejandriot. Ñaña añ botepa' echenan poñe'm̄agoť acheñma't̄ ñeñt̄ epuesha' ñeñt̄ toma'ntatenet po'yosret; ñeñt̄pa' añ pa'so'cheñ Cástor; po'psheñeñpa' añ pa'so'cheñ Pólux. ¹² Allempopa' arr yetsonoma all oteñet Siracusa. Allñapa' alla yema'pamuetnom. ¹³ Alloťpa' allampaño'mara yoc̄tatopñe'ch pats, atteñapa' yechap all oteñet Regio. Allpa'cho' all yetsonoma. Tsapatñapa' o' m̄orrarenerr mamesha'tets. Morrrpa' arroť huena yecha'ñeñta'not. Allempoñapa' o'cho' alla ahuan̄penyerr. Alloťñapa' e'ñe puepomtañocma yechap all oteñet Puteoli. Allpa' all yetсотosa. ¹⁴ Allñapa' yentos ñeñt̄ ame'ñetsa. Ñetpa' a'patapyet all yechenet, ñeñto'marña yapa' alla yecan̄cherrmatnom ñesheto. Attoťapa' o'cho' yeya'rrota ñaña Romo. ¹⁵ Añña ñeñt̄ ame'ñetsa all Romopa' ahuo't e'mare'tyets o' yechap allampaño'pa' allenta't onacha'tet o'ch poctapyet. Puesheña'tetspa' o' chapuet all oteñet Foro ñeñfara Apio. Po'potantañña'p̄ alla't chapyeset rrocho all oteñet Ma'ppahua Pocoll. Allñapa' all pocta'yets. Allñapa' all entosanet Pablopa' nanac parasyoso'tan Yompor tarro'mar allempopa' nanac coshatapet Pablo. ¹⁶ Allempoña o' yechap Romopa' atet otapet Pablo yechoosepa'to' ellonet, tarraña chocma net solltar ñeñt̄cha' cohuan̄pse'.

Allempo Pablopa' serrpare'tatosanet allempo chap anetso Romo

¹⁷ Poma'pamtañoñapa' añña ñeñt̄ añcha'tarettetsa judioneshacop allpa' Pabloñapa' agotatanet allohuenet. Allempoña o' e'ñe ap̄cha'huetpa' Pabloñapa' atet otanet:

—Masheñneshacha', ama't napa' ama erroť nepeñeña judionesha' ñaña ama cho nehuapore'tateno ñeñt̄ atet yeche't̄ yatañneshañpa' te'ña judionesha'pa' o' at̄ta roma'net all Jerusaléno, o' pomnet allo'tsen romanonesha'. ¹⁸ Ñetpa' a'p̄to'tare'tnet, tarraña amaña entonet atto alloch muetsatnet, ñeñto'mar ñetpa' mueneñetañ o'ch a'rroyerrnetañ. ¹⁹ Tarraña judionesha'pa' ama pocteye' eñcheto o'ch a'rroyerrnet. Ñeñto'marña napa' nesecha o'ch entatenneta' añcha'tareť arr Romo. Tarraña napa' ama cho notteñe'cheñe namo'tsna'tar. ²⁰ Ñeñto'marña te'pa' o' nagotatuas allochñapa' o'ch neserrpare'tatuas ñeñt̄ atet pennet. Ñaña napa' name'ñena atto ñerra'm yerrromapa' Yomporpa' o'ch tantaterrey esempohuañen. Ñeñto'marña te'pa' o' sentuan napa' ehuancareten, tarraña ama't allohuen judionesha'pa' attecma ame'ñenetañ.

²¹ Ñetñapa' atet ochet Pablo:

—Tarraña yapa' ama yaguëna' carta Judeot̄ ñeñt̄ atet otenet p̄ocop. Ñaña ñeñt̄ ame'ñetsa ama't huapyenet arrpa' ama esesha' erroť otetso p̄ocop ñeñt̄ ama cohuenayaye. ²² Yapa' aña yeñoten po'ñočh chocma

e'moñe'teñet erracmañen ñeñt' co'tene' Jesús pocta'pña. Ñeñto'marña yapa'cho'ña yemneñ te'pa' o'ch ye'mñota'p yaña erro'tente' poctape'chen pa.

²³ Allempoñapa' a'poctachet allempoch hua'cha'tet allo'tsen Pablo allempo'ch serrpare'tatanet. Allempoña o' chap allempoch hua'cha'tetpa' allempopa' shonte' acheñ hua'cha'tatsa Pables'ho. Allempoña Pablopa' e'ñe ellapen serrpare'tatahuet; a'potanet atet pena Yompor po'cohuenña ñeñt' atto ayochreshattena ña. Ñaña lleyatyesanet Moisés po'ñoñ all oten atet'cha' pa ñeñt'cha' Cristotats. Ñaña lleyatyesanet po'ñoñ ñeñt' a'mtaye't ahuat' Yompor po'ñoñ all oten ñaña atet'cha' pa ñeñt'cha' Cristotats. Ñapa' nanac mueneñ o'ch ame'ñatanet atto Jesús'pa' po'ño'ch ñeñt' Cristotats. ²⁴ E'ñe allempopa' ame'ña'yesyet puesheña'tets, tarraña po'potanta'ña' ama es ame'ñatso. ²⁵ Atteñapa' ñañeñeta achm'are'tanna'tyeset. Allempo ahuanerrmochetpa' allempoña Pablopa' otanet:

—E'ñe po'ño'ch atet ote't' Isaiás ahuat' allempo Parets Puecamquẽño'tpa' otan satañneshañ:

²⁶ O'ch soteña' judionesha' añ ñoñets: Ama'tcha' chocma e'mñotenetpa' ama't ahuatapa' amach chapaneto pueyo'chreto. Ñaña ama'tcha' cho es entuetpa' amach chapaneto pueyo'chreto.

²⁷ Allo'tpa' o'ch sotenaneta', te'pa' pueyo'chretopa' nanac echarretenet attoch amach es chapahueto pueyo'chreto. Te'pa' amach mueneto o'ch es e'mñotet taye'to' chapanet pueyo'chreto. Te'pa' amach mueneto o'ch es entet taye'to' chapanet pueyo'chreto. Attetach amach es co'tape'cherreto nocop ama't mamesha attoch na'qeshpaterranet. Añpa' allohua atet ote't' Isaiás ñeñt' a'mtaye't Yompor po'ñoñ ahuat'.

²⁸ Allempopa' alla o'terraneter Pablo:

—Te'pa' o'ch neñotatas añ, tayoteñ Yompor po'ñoñpa' o'ch yeserrpare'tach po'poñ acheñ ñeñt' ama judioneshayaye. Tarro'mar ñetpa' ñerra'm e'moñet Yompor po'ñoñpa' o'ch ame'ñet. E'ñe pame'ñeño'tetpa' qeshperretcha'.

²⁹ Ñeñta otuanet Pablopa' añña judionesha'pa' e'ñe pachm'are'tanna'teño'tetpa' o' ahuanerret.

³⁰ E'ñe epa char all ye'cha Pablo Romo. Allpon palla'teyese'tpa' e'ñe tsa'tuauye't. Ñaña e'ñe cohuen agapyesane't ñeñt' huapyestse't. ³¹ Ñaña e'ñe cohuen serrpare'tanete't atet pena Yompor po'cohuenña atto ayochreshattena ña, ñaña yethatanete't atet pena Yepartseshar Jesucristo. Tarro'mar allpa' ama esesha' epatare'taye'te. Allohua.

AÑ SAN PABLO PO' CARTA ÑEÑÑ QUELLCAN ROMO'MARNESHA' ROMANOS

Atto Pablopa' quellcanet carta añecop ñeññ ame'ñetsa netso Romo

¹ Masheñneshacha' ñaña nočhaneshacha' ñeññes allohuenes yečheta anetso ñeññ añ pa'so'cheñ Roma ñeññes Yomporpa' ahuo't nanac muererrsa, attoña o' hua'ñerres attoch sapa'čo'ña o'ch e'ñe poctacma pueyochresha' perres. Na Pablon sequellquêne'ña añ carta, ñeññen nanac torretsa Jesucristocop tarro'mar ñeññecopña llesenserrenña Yompor, nach ma'yočhrerraya serrpare'tyene' añ cohuen ñoñets ñeññ huetsa Yomporeshot alloch po'ñočh yequeshperra.

² Añ cohuen ñoñetspa' ñeññara ñoñtsor ñeññ ama't ahua't Yomporpa' e'ñe eñotatuane't ñeññ a'mta'yesaye't po'ñoñ ñeññcha' atet perrnay te' añeñpo. Ñeñño'marña ñetpa' quellca'yesete't ñeññ atet otanete't Parets. ³ Ñaña añ cohuen ñoñets alloch yequeshperra, ñeññpa' añ serrpare'ten Jesucristo ñeññ Puechemer pen Yompor. Tarraña allempo acheñetos arr patsropa' ñapa' e'ñe David po'mñrenñoť eñalleta, ñeññara David ñeññ añcha'tarettatse't ahua't. ⁴ Tarraña Parets Puecamquẽñoťpa' nanac ahuamencattache't añecop ñeññ cohuenetyetsa Partsocop. Ñaña chemerrña allempo Pomporpa' ahuo't tantater po'rromñoťpa' allempoña e'ñe eñotuare'ta ñapa' po'ñočh Yompor Puechemer ñeññara Jesucristo ñeññ Yepartseshar yepen. ⁵ Ñaña yame'ñeñoť ñeññara Jesucristo, Pomporña e'ñe puemuereñoťeypa' ahuo't apuey llesens, allochñapa' yach ame'ñatyenahuet ama't errañparen allohuen anetso'mar. Attochña e'ñe cosha'yeññañet Yompor Puechemer. ⁶ Atet ñerra'm sa ñeññes yečheta Romo, sapa'čo'ña ahuo't sa'hua'ñare'tterra attoch socter Jesucristo.

⁷ Te'pa' e'ñe nehuomñcha'teñoťes sa, napa' o'ch notas: Yomporepa'chña sebensare'tam̄pene' ñeññ nanac Parets epuet Puechemer Jesucristo ñeññ Yepartseshar yepen. Ñetepa'chña socshatene' e'ñe sa seyočhro allohuenes.

Atto Pablopa' mueneñ o'ch emo'tenana' romo'marnesha'

⁸ Ñehua, e'ñe ñanompa' añcha' notas, e'ñe neyemteñoť Jesucristopa' čhocma neparasyoso'teñ Yompor allohuenacpas, tarro'mar ora allemeñ anetso'marpa' čhocma serrpare'tyenet atto sapa' ahuo' e'ñe cohuen same'ñena. ⁹ Yomporpa' e'ñe eñotenen, napa' čhocma nema'yočhena socop. Ñaña añ Yomporpa' ñeññña nanac neshherben, e'ñe neyočhrocmañen neserrpare'tateñoť po'ñoñ, ñeññ atet perrnay Jesucristo ñeññara ñeññ Puechemer pen ña. ¹⁰ Napa' čhocma nenamueñ Yompor attoch ama't esempopa' o'ch nabchensa' ñerra'm ñach muenats. ¹¹ Napa' atarr nemneñ o'ch nabchensa', o'ch neyčhatensa' attoch Parets Puecamquẽñoťpa' allote' sesen huomenctatsa ñocop. ¹² Ñehua, añ noten, e'ñe yame'ñeñoť parropa' e'ñe pocte' o'ch yeyčhatanna'ta ñeññ cohuentetsa Yomporecop attoch yeyenpanna e'ñe yame'ñeñoť Yompor.

¹³ Ñaña te'pa' o'ch masheñneshacha' ñaña no'chaneshacha' notas, ama't ahuañmo'cho'teñ nesechenañ o'ch na'chensa'tarraña teme'ttsenpa' ama errot nepeñe. Napa' añecop nesechena ñaña attoch seshopa'cho'ña o'te' name'ñateña' acheñenesha' atet ne'pa'yena po'poñ anetso'mar. ¹⁴ Tarro'mar ñeñt' pocetsa nocoppa' o'ch neñotach allohuen acheñenesha' añ cohuen ñoñets attoch yequeshperra, ama't griegonesha' ñeñt' nanac ay'chatarettetsa amapa' ñaña acheñenesha' ñeñt' ama ay'chatareteyaye, ama't ñaña acheñenesha' ñeñt' nanac es eñotenet amapa' ñaña ñeñt' ama es eñotetso. ¹⁵ Ñeñto'marña e'ñe nocsheñeshocmañen nemneñ o'ch neserrpare'tatas samña añ cohuen ñoñets alloch yequeshperra ñeñes ye'chetsa anetso Romo.

E'ñe añ yame'ñeñot' ñeñt' cohuen ñoñets, ñeñt'pa' allochña Yomporpa' a'queshpaterrey

¹⁶ Tarro'mar napa' ama apenca'pahuoye' nenteno añ cohuen ñoñets atto Jesucristo rroma yocop alloch yequeshperra, tarro'mar ñerra'm esha' ame'ñenaya añ cohuen ñoñets, ñeñt'pa' ñeñt'ña Yompor po'huamenc alloch a'queshpaterrey allohueney ñeñt'ey ame'ñenaya ña, ñeñt'ey judioneshay e'ñe yanom allotpa' ñaña ñeñt' ama judioneshayaye. ¹⁷ Ñaña añ ñeñt'ara cohuen ñoñetspa' eñotateney, e'ñe yeyemteñoña Jesucristopa' Pomporñapa' e'ñech pocte' enteney, allochñapa' allo'nach yesen e'ñe yemtenaya ña. Tarro'mar añpa' ñeñt'ara anuaret' ahua'toteñ e'ñe Yompor po'ñoño allohuenacpay, ñeñt' otets atet: Ñeñt'ey ame'ñenaya Yomporpa' e'ñech pocte' entueney ñaña e'ñe yeyemteñoñ ñapa' yañapa' corretsayach, ama't tayoten errponohuañen.

Atto allohuen acheñenesha' atpare'chete't Yompor

¹⁸ Tarro'mar yapa' yeñoteñ Yompor ñeñt' pue'ntaño'tsen e'ñe po'yoro'chenño'tsa'yena allohuen acheñenesha' ñeñt' ama pocteye' es peneto ñocop, ñeñt' sosya'tsañach eñotyenet. Ñaña e'ñe atet pue'patse'teño'tetpa' ñeñt'ña ama muenatenahueto o'ch orrtanet Yompor po'cohuenña ñeñt' e'ñe po'ño'ch. ¹⁹ Ñehua, ama't sosya'tsañach eñotyenetpa' tarraña ñetpa' e'ñe eñotueñet ñaña atet penaña Yompor, tarro'mar ñapa' ñaña eñotatenahueto e'ñe pueyo'chreto ñeñt' atet penaña ña. ²⁰ Ama't yeñoteñ Yomporpa' ama entpahuoyaye tarraña yenteññañ pueyechcatarot po'partsoña ñaña allotña yenteññañña po'huomenc atarr. Ama't ahua'toteñ allempo e'ñe erre't ye'chcatene' pats, allotña yenteññañña po'ño'ch po'partsoteña ñeñt'ña' errponohuañen. Ñeñto'marña acheñenesha' ñeñt' ye'chene' sosya'tsañpa' amate' errotent' oteto amo' eñoteñetoña ñeñt' atet penaña Yompor po'partsoteña. ²¹ Ñaña ama't eñoteñetañ ñeñt' atet penaña Yomporpa' tarraña ama mecha'na'teñetoña Parets, ñaña ama coshateñeto ñeñt' ora añecop. Attoña o'huañcha' co'tape'chenet ñeñt' sherbets Partsocop. Ñeñto'marña pueyo'chretopa' o'huañcha' eñoteñet ñeñt' cohuentetsa Yomporcop; atet ñerra'm pueyo'chretpa' nanac a'checmetañpsaret. ²² Ama't otenetañ atarro' es eñotenet, tarraña po'ño'ch ñetpa' ahuo'tatta allo'na otatsña'etnenet. ²³ O'huañcha' cosheñet ñeñt' po'ño'ch Parets ñeñt' ama arromña'feshayaye. Añachña e'ñe coshenet ñeñt' ye'chcatyenet ñet. Tarraña ñetpa' e'ñe arromña'fo'ta atet es ye'chcatyenet atet ñerra'm

acheñma't ñaña otma't, ñaña po'yallopma't ñaña es berrma't. Ñetñapa' ñeñfach e'ñe ma'yochyenet ñeñto'ña e'ñe po'yomporer penet.

Atto acheñeneshá' allo'na senet muenatse'tyese' ñeññ nanac sosey enten Yompor

²⁴⁻²⁵ Attoña o'huañcha' ame'ñeñet ñeññ po'ñoçh Parets, añachña ame'ñenet ñeññ ama po'ñoçhoyaye. O'huañcha' ma'yocheñet ñeññ e'ñe Yompora', añachña ma'yocheññañet ñeññ e'ñe ña pueyechcatuar. Ñaña o'huañcha' sherbeñet ñeññ e'ñe Yompora', añachña sherbeññañet ñeññ e'ñe ña pueyechcatar. Tarraña Yomporepa'chña ñapueñ aye'chochtatarettatsa tayoteñ ama't errponohuañen. Ñeñtpa' attetepa'ch. Tarraña atto a'ypo'ñeñet Yomporpa' ñapa'cho'ña e'ñe pa'ypo'ñeñoñanet ñañapa' ahuo't muenatyesanet o'ch allo'na senet muenatse'tyaset ñeññ nanac sosey enten Yompor. Ñeññ atto muenatse'tyenet atto o'ch agapannenet, ñeñto'pa' nanaccha' apencoçhen yeçhenet.

²⁶ Ñeñto'marña Yompor e'ñe pa'ypo'ñeñoñanetpa' ahuo't muenatanet o'ch allo'na senet muenatse'tyestset ñeññ nanac apencoçhen enten ña. Attoña ama't coyanesha'pa' o'huañcha' aguënan puerrollar atto ñeññ e'ñe pocte' atet anareteyeñ. Ñagattsetach muenannetset o'ch agapanna'tyenet ñeññ e'ñe parro pacmacmuet. Ama't ñeñtpa' ama atteye' anareteye. ²⁷ Ñaña ama't yacmapa' attecmaçh penet. O'huañcha' aguënan puetapor atto ñeññ e'ñe pocte' atet anareteyeñ. Añachña atarr muenen o'ch aguënan pacma e'ñe ñagattsa pacmacma, ama't ñeñtpa' ama atteye' anareteye. Ñeññ atet pannenet yacma parro yacmacmapa' ñeñtpa' nanac apencoçhen enteñ Yompor. Ñañeñetach coñchatetset ñeññ atet pãtse'tyenet.

²⁸ Attoña ama't mamesha o'huañcha' mueneñet o'ch yerpa'pesyet Yompor. Ñeñto'marña Yomporña'pa' pa'ypo'ñeñoñanetpa' ahuo't muenatanet o'ch coñape'chatse'tyaset ñeññ ama pocteye' enteno ña. Añachña pãtse'tyenet ñeññ ama apapahuoyaye. ²⁹ Añachña nenet pueyoçhreto ñeññ esocmañen ñeññ ama't mameshapa' ama pocteyaye ñeññara pa'namen sosya'tsañeçhno. Ñeñtpa' añeçhno: agapanneñets ñeññ ama puerrollareyaye ñaña ñeññ ama puetaporeyaye, ñaña coñape'chatse'tyeñets ñeññ ama cohuenayaye, ñaña ye'chatse'tyeñets, ñaña ye'moñe'tanneño'pa' o'ch erro' yepoñ po'psheñeñ, ñaña yeye'chapreteño'pa' o'ch ye'moñe'ch po'psheñeñ, ñaña muetsanna'teñets, eñoseñe'cheñets, ñaña shecanna'teñets, ñaña atsrre'moçhen entanna'tueñets, ñaña a'metamãpsare'tanna'teñets, ³⁰ ñaña sasare'tanna'teñets, ama't Yomporpa' ello e'moñe'teñet, ñaña ama't po'psheñeñpa' amach mecha'na'teñeto ama't mamesha, attachña e'ñe ñañeñapa' cohuen entetset, ellopa' ommo'chenetcha'. Añach e'nyenet ñeññ ama cohuenayaye, attotcha'ña ama ame'ñeñeto ama't pomporet ama't ñaña pachoret. ³¹ Amach çhenaneto pueyoçhreto ñeññ cohuentetsa Yomporecop, amach a'pocñateneto po'ñoñ ñeññ atet otenet. Amach es amorrentenaye' enteneto ama't mamesha, amach es aprenenaye' enteneto ama't mamesha, ñaña amach es amuerenaye' enteneto ama't memesha. ³² Ñeññ pãtse'tyetsa atetpa' ama't eñoteñetañ e'ñe Yomporesho' anaretetua ama't coñcheñets añecop ñeññ pãtse'tyetsa

atetpa' tarraña ñetña'pa' ñeñfarach atet ðatse'tyesnenet. Ama't pamo'tseshetpa' ñerra'm e'ñe attecma ðohuenet ñametpa' chemerrña allempopa' ñeñfach erronaye' coshapretannenet.

2

Atto ama't judionesha'pa'cho'ña atpare'toñete't Yompor po'ñoñ

¹ Ñeño'mar te'pa' o'ch notas allohuenes ñeñtes judioneshas, ñato' sapa' çate' sotenapañ sapa'cho'ña año'te' atteye' seyçheno sosya'tsañ atet pena po'potantañ. Tarraña amate' errotenot soto atet tarro'mar allohueneypa' e'ñe attecma yepena. Ñerra'm çha yoten po'psheñeña' ama cohuenayaye, tarraña atetpa' yañeña atet otetsa ama't erra'tsenoteya ñeñfey atet otets. ² Tarraña ama't atetpa' yeñoteñ Yomporpa' çhocmach tsa'taterrana allohuen ñeñt atet es ðatse'tyets, errotench'a' e'ñe pocte' ent ña. ³ Sapa' çate' sotenapañ saptate' atarr morrentensa Yompor, amachña tsa'taterrso sa, ama't sapa'cho'ña attecma seðatse'tyen sosya'tsañ ñeñt atet pena po'potantañ, tarraña sapa' çha sotenanet ñetpa' amo' cohuenayayeto. ⁴ Amapa' sapa' çate' sotenapañ Yompor pueuereño' nanacpa' amach tsa'taterrso tarro'mar teme'ttsen ama errot penso, atta cohuenes. Ama't seño'teñe añecopña teme'ttsen muerensa Yompor attoch ellopa' o'ch e'ñe soctape'chuerr cohuen allohuenes. ⁵ Tarraña ñerra'm atta se'charrtena seyoçhro, amachña soctape'chuerro cohuen, allempochña allo'nach sesen atontatnomue' attoch tsa'tatuerrsa Yompor esempohuañencha' tsa'tatuerrya allohueney errotench'a' e'ñe pocte' entyesuerrey e'ñe puesheña'ttsoy. Allempoña allohuen acheñenesha'pa' o'ch e'ñe eñotueret ñeñtcha' e'ñe atet tsa'tatuerrya e'ñe puesheña'ttsoy, ñeñtpa' e'ñech pocte'. ⁶ Ñaña tsa'tuerryach allohueney ñeñfey corra'yetsa arr patsro errotente' yeþa'yena e'ñe ñocop. ⁷ Ñerra'm çhocma yoctape'chen e'ñe cohuen Yomporcop, ñaña ñerra'm çhocma yocteññañ po'cohuenña, ñaña ñerra'm añ ye'nen attoch ñapa' e'ñech cohuen entuerrey, ñaña attoch aphuerreycha' ñeñt alloch yocrrerra errponohuañen, allempoña po'ñoçhpa' aphuerreycha' attoch yapa' corretsayach yocsheñeshocmañen tayoten e'ñe errponañohuen. ⁸ Tarraña ñerra'm yapa' añ cohuen yenten ñeñt yemnen ya, Yomporña po'ñoñña'pa' ñerra'm çha yatpare'teñ, añ yocten ñeñt ama cohuenayaye Yomporcoppa' ñaña po'yoroçhenño' po'ñoçhpa' çhocmach tsa'tatuerrya. ⁹ A'coñchataretterrach allohuen ñeñt cotene' ñeñt ama cohuenayaye arr patsro, amuroçhtataretterretcha' allohuenet ñeñt atet petsset, ama't ñanom atet ñerra'm judionesha' allotpa' ñaña ñeñt ama judioneshayaye. ¹⁰ Tarraña allohuen ñeñt cotene' ñeñt cohuentetsa Yomporcop arr patsropa' Yomporña'pa' cohuencha' enterranet, aphuerranetch'a' alloch e'ñe cohuentapreteret, aphuerranetch'a' ñaña attoch cosha'huerret e'ñe cohuen pueyoçhreto. Atetch'a' perran allohuen ñeñt e'ñe cohuen corra'yetsa, ama't ñanom atet ñerra'm judionesha' allotpa' ñaña ñeñt ama judioneshayaye.

¹¹ Tarro'mar Yomporpa' ama ñapfa judionesha' morrenteno, añña ñaña allohuen acheñenesha'pa' e'ñe morrentueña. Ñaña attecma Yomporpa' ama ñapfa coñchatenano ñeñt ama judioneshayaye, ñapa' ama't judionesha'pa' e'ñech coñchatuer. ¹² Ama't atet ñerra'm ñeñt ama judioneshayaye ñeñt ama echenaye Moisés po'ñoñ, ñerra'm añ

cotenet ñeñt ama cohuenayayepa' elloña ñetpa' chenca'huerretcha', tarraña ñetpa' amach añeye' a'chencaterrahueto Moisés po'ñoñ. Tarraña judionesha'ñapa' ama't echeññañetañ Moisés po'ñoñ, tarraña ñerra'm attera, añach cotape'chyenet ñeñt ama cohuenayaye, ñetpa' añachña a'chencaterrahueto ñeññara Moisés po'ñoñ. ¹³ Tarro'mar Yomporpa' ama pocteye' entenano ñeñt atfa e'muene' orrena po'ñoñ all serrpare'teññañet. Añña pocte' enten Yompor, o'ch atet penet ñeñt e'ñe atet oten po'ñoñ. ¹⁴ Ñehua, o'ch yoctape'ch ñeñt atet pena acheñnesha' ñeñt ama judioneshayaye, añenesha' ñeñt ama echenaye Yompor po'ñoñ. Ñetpa' ama't ama echeneto Yompor po'ñoñpa' errotetopa' e'ñe pueyoçhretot poctape'cheñotetpa' ahuo'tcha' atet pa'yenet ñeñt e'ñe cohuentetsa Yomporecop, ñeñt e'ñe atet o' anuaretetua Yompor po'ñoño ñeñt atet poctetsa ñocop. Ama't ama echeneto Yompor po'ñoñ ñeñt atet aquellcaretpa' tarraña pueyoçhretoñapa' e'ñe eñoteñet erra'tsente' ñeñt cohuentetsa. ¹⁵ Ñeñt atet pa'yene' ñeñt cohuentetsa, yapa' yeñoteñ pueyoçhretoña eñoteñet ñeñt atet cohuentetsa, ñeññara ñeñt atet oten Yompor po'ñoñ ñeñt o' anaretetua. Ñehua, o'ch yetma'ntacha atet ñerra'mrrate' Yompor po'ñoñpa' e'ñech pueyoçhreto aquellcarenna. Tarro'mar e'ñe ñet pueyoçhretotpa' eñotenet ñerra'm esempopa' o'ch pohuerret ñeñt ama cohuenayaye, ñaña eñotenet ñerra'm esempopa' o'ch atet penet ñaña ñeñt e'ñe cohuen. ¹⁶ Tarro'mar yeñoteñ esempohuañen Yomporpa' eñotatuerreycha' ñeñt ora allpon ya'nasotena te'. Yompor Puechemerña ñeñt Jesucristo ñach otats attoch tsa'tatya. Ñeñtpa' e'ñe atet ñeñt o' notuas ñeññara noten allempo neserrpare'ten añ cohuen ñoñets alloch yequeshperra.

Atto judionesha' ama't echenetañ Yompor po'ñoñ patpare'teñotetpa' nanac ayohuarettenet

¹⁷ Te'pa' o'ch alla neserrpare'taterrerr ñeñtes judioneshas. Ñehua, sapa' cha soten sapa' judioneshaso' ñaña añña atarr seyemtena ñeñt nonase't Moisés, ñaña atarr sommo'chena tarro'mar sapa' soteneñ e'ño' puechemer penes Yompor. ¹⁸ Ñaña soteneñ e'ño' señotueñ ñeñt atet muenen ña. Ñaña po'ñoñ ñeñt atet anaretpa' ñeñto'ña seyçhatene' ñeñt atarr cohuentetsa Yomporecop. ¹⁹ Ñeñto'marña sapa' soteneñ, po'ñoçh atarro' es señoten, attoch seyçhateñ po'potantañ ñeñt ama es eñoteneto. Cha sottena ñerra'm ñeñteso' echa'nene' ñeñt ama entetso, amapa' ñerra'm ñeñteso' çhoyo'tañpene' ñeñt chopeñe'chets checmeto. ²⁰ Ñaña sapa' çhate' sotenapañ po'ñoçh atarrte' cohuen seyçhateñ po'potantañ ñeñt ama eñotenaye ñeñt cohuentetsa, ñeñt atet petsa ñerra'mrrate' cheshatollesha' ñeñt ama eñotenana' ñeñt cohuentetsa. Ñaña sapa' soteneñ po'ñoçho' esocmañeno' señotuahuen, ora ama't allpon ñeñt po'ñoçhotets, tarro'mar sapa' secheññaño' Yompor po'ñoñ ñeñto'ña esocmañen señotatene'. ²¹ Ñehua, te'pa' o'ch notas, sapa' ama't o' atarr seyçhateñ po'potantañpa' tarraña amaña seyçhatenoña e'ñe sañeña ñeñt cohuentetsa Yomporecop. Ñaña sapa' ama't o' atarr seserrpare'ten atto ama etanna'tpahuo, tarraña sañapa' çhocma setanna'tyena. ²² Ñaña sapa' ama't seserrpareñen atto amo' achtapretpahuo taporets, tarraña

elloña sapa' chocma sapretannena setapor. Ñaña sapa' ama't set-sena'teneñ ñeñt ayečcataret, tarraña saña'p' ahuo't seyorayesña puer-ahuo't ñeñt atarr cočnesh'a' ñeñt allo arca'tam'penet ñeñt po'yoser penet. Ñeñt atet etetspa' ñeñtpa'cho'ña attecma enteñ Yomp'or ama ařapahuoyaye atet. ²³ Ñaña sapa' nanac sommo'chena tarro'mar sapa' secheññaño' Yomp'or po'ñoñ ñeñt atet anaret ama't ahuatoteñ. Tarraña ama't atteñpa' amaña atteye'ña sepeno ñeñt atet otene'y añ ñoñets ñeñticha' atet sepa. Yomp'orñapa' cha sottatateñ ñerra'mrrate' ñapa' ama es eñotpeno ama't mamesha. ²⁴ Ama't atet oten Yomp'or po'ñoñ ñeñt atet anuaret ahuatoteñ, ñeñtpa' atet oten: "Ama't ñeñt ama judioneshayayepa' achm'are'teñet Yomp'or e'ñe sesharrmorot, e'ñe seřatse'tyeñoť ñeñt ama't mameshapa' ama pocteye' enteneto ama't ñame'ttseta."

Atto ñeñt po'ñočh puechemer pen Yomp'or

²⁵ Po'ñočhña ñerra'm añ semnen o'ch setsoteññañ Moisés po'ñoñ ñeñt atet anuaretpa' añ poctetsañ o'ch setsorrannena, tarro'mar ñeñtpa' sherbeneñ. Tarraña ñerra'm elloña satpare'teññañ po'poñ Moisés po'ñoñ ñeñt atet otene'y ñeñticha' atet yeřapa' ama't atto o' sa'tsorrareřetuapa' ñeñtpa' e'ñe orrena, attecma ñerra'm ama atsorrareřeyayye. ²⁶ Ñeñto'marña yeñoteñ ñaña, ama't ñeñt ama atsorrareřeyayepa' ñerra'm añ atet penet ñeñt atet otene'y Yomp'or po'ñoñoťpa' ama't ama atsorrareřeyayye, Yomp'orñapa' atet'cha' entene'y ñerra'm e'ñe puechemer peney po'ñočh. Attec'mach entene'y ñerra'mrrate' ñeñt atsorrareř, tarraña e'ñech puechemer perrey po'ñočh. ²⁷ Ñeñto'marña yeñoteñ ama't ñeñt atta corretsa atet eñalleta, ama atsorrareřeyaye, ñerra'm añ atet penet po'ñočh ñeñt atet otene'y Yomp'or po'ñoñoťpa' ñetñapa' pencaterrsetcha', tarro'mar ñetpa' ello metanennaset ñeñt allpon cohuen o' seřohua Yomp'orecop. Tarro'mar sapa' satpare'teññañ po'ñoñ ñeñt atet anaret. Metanenset sa, ama't sapa' secheññañeñ Yomp'or po'ñoñ ahuatoteñ, ñaña ama't sapa' e'ñe atsorruareteseñ. ²⁸⁻²⁹ Ñeñt e'ñe po'ñočh puechemer pen Yomp'orpa' ama ñapřayaye ñeñt eñalletetsa judionesheshot. Añña po'ñočh e'ñe puechemer pen ñeñt e'ñech cohuen cotape'chenet pueyočhreto ñocop. Ñaña tsorraneñets e'ñe atta yechtsopa' ama esoyaye Yomp'orecop. Añña sherbets Yomp'orecop atto cohuen es yotape'chen e'ñe yeyočhrot. Ñaña ñeñtpa' huena e'ñe Parets Puecamquëñoť, ama añořeye' hueno o'ch e'ñe yeřa'yesua ñeñt aquellca'yeseřet esheccha'ña puechemer perrey Yomp'or. Ñerra'm atet'cha' yotape'cherr cohuen yeyočhro Yomp'orecoppa' attochña Yomp'orpa' e'ñech pocte' entuerrey, ama't'cha' acheñenesha'pa' ama pocteye' entenyeto.

3

¹ Te'ña sapa' čhate' sotenapañ judionesha'pa' amate' atarr sherbeno amapa' čhate' sotenapañ ñeñt atto tsorrannenetpa' amate' es sherbeno. Tarraña ñeñtpa' ama atteyaye. Po'ñočhca'ye atarr sherba'yen judionesha'. ² Ñehua, o'ch yot ñanom ñeñt atto sherbenet. Ñetña apareřet Yomp'or po'ñoñ ñanom atto ñet'cha' a'potenet ñeñtara ñoñets. ³⁻⁴ Tarraña ama allohuenacmaye' ame'ñeneto ñeñt atet otene'y Yomp'or po'ñoñoť. Tarraña

ama't atet p̄ohuanenetpa' amate' errotent̄ a'psateretoña Yompor ñeñ̄ atet oteneŷ po'ñoñōt̄, ama't mamesha. Ñapa' čhocmach a'pocatuonay po'ñoñ̄ ñeñ̄ atet o' otueneŷ. Ama't allohuen erra'tsen acheñerpa' ama'tcha' ama a'pocatueneŷto ñeñ̄ atet eñorenetpa' tarraña señocheŷa'ch, Yompora e'ñe ñap̄a, ama puenesho po'ñoñ̄. Ama't atet oteneŷ Yompor po'ñoñ̄ ñeñ̄ atet aquellca'huaret ahuatoteñ̄, ñeñ̄tpa' all atet oteneŷ:

Allohuen acheñenesha'pa' eñotetepa'ña atto Yomporpa' ama puenesho po'ñoñ̄, ñaña ñerra'm esesha' at̄ta otatse'tyets atto Yomporpa' año' pocteye' es peno, tarraña eñochetepa'ña Yomporña e'ñe pocte' es pets.

⁵ Ñeñ̄to'mar napa' o'ch notas, e'ñe ya yepeñōt̄ ñeñ̄ ama cohue-nayaye, attoña yorrtateñ̄ñañ̄ Yompor ñapa' ñaña e'ñe cohuenare' es p̄a'yets. Ñehua, ñerra'm yo'chñarōt̄ atet yeyenpapeŷeñ̄ Yompor orrtate' po'cohuenñ̄apa' sañapa' čhate' sotenapañ̄, Yomporpa' amate' pocteyayeña o'ch tsa'taterrya yo'chñaro'mar. Ñehua, añpa' at̄ta notenes atet tarro'mar ñeñ̄tpa' atet eñosatse'tyen acheñenesha'. ⁶ Po'ñōch yeñoteñ̄ e'ñe pocte' atetcha' tsa'taterrya Yompor. Tarro'mar ñerra'm ama pocteyaye ñeñ̄ atet pena Yomporpa' ñeñ̄epñ̄apa' amate'cho' erroteno eñoteñe ñaña atetcha' entyesuerrey allohueney esempohuañen.

⁷ Ñaña yaña ñerra'm esempo yeñosatse'tyen es ñeñ̄ ama at̄teyayepa' attoña yorrtateñ̄ñañ̄ Yompor ñapa' ñaña e'ñe po'ñōchare' ñeñ̄ atet es otyen. Ama't e'ñe yeñosatse'teñōtpa' nanaccha' yecohuentateñ̄ñañ̄ Yompor. Ñehua, ñato' sapa' čhate' atet soten, ñerra'm atet yeyenpapeŷeñ̄ orrtate' Yompor po'cohuenña, amate' pocteyayeña o'ch at̄tera enteneŷ Yompor ñerra'm ñeñ̄ey atarr sosey es p̄a'yets. ⁸ Sapa' aña sotatse'tyen, ama'tpa' aŷapo'ch ñeñ̄ ama cohuentetsoña allochñapa' e'ñe at̄toŷpa' o'ch yorrtaten ñeñ̄ cohuentetsa. Puesheña'tets acheñ e'ñe pueyllat̄atse'teñme'chatset neñoñ̄pa' otyenet, ñeñ̄ñ̄a'cho' atarr otenña Pablo. Tarraña Yomporcha'ña tsa'taterrahuet ñeñ̄ atet otatse'tyenet. Ñaña ñeñ̄tpa' e'ñe pocte' at̄sa'tataretterreŷepa'chña.

Atto allohueney ñeñ̄ey acheñey čhocma ochñatecmay

⁹ Ñehua, sapa' čhate' sotenapañ̄ yapa' po'ñōchte' Yomporpa' enteneŷ ñeñ̄ey judioneshay e'ñe cohuenare' es yeŷa'yen. Ñaña čhate' sotenapañ̄ po'potantañ̄ ñeñ̄ ama judioneshayayepa' ñetñ̄apa' amo' at̄teye' ente-naneto Yompor. Tarraña ama't mameshapa' ama at̄teyaye. Tarro'mar napa' o' neñotatunmas atto ama't allohueney ñeñ̄ey acheñey čhocma ochñatecmay ama't ñeñ̄ey judioneshay. Ama't ñaña ñeñ̄ ama judione-shayayepa' e'ñe at̄tecmay ochñatecmay. ¹⁰ Ama't Yompor po'ñoñ̄ ñeñ̄ atet aquellca'huaret ahuatoteñ̄pa' e'ñe at̄tecmay oteneŷ, ñeñ̄tpa' atet oten: Ama't puesheñ̄arroŷeyapa' ama eñallyeña ñeñ̄ey e'ñe pocte' pene' ñeñ̄ poctetsa Yomporecop.

¹¹ Ñaña ama't puesheñ̄arroŷeya ama čhennayo yeyōchro at̄toch yeñotoñ̄ Yompor po'cohuenña. Amachña añeye' ye'nen̄o ñeñ̄ atet muenen Yompor, ama't puesheñ̄arroŷeya.

¹² Ama't allohueney ahuo't yesa'neñ̄ Yompor, ama't mamesha o'huañ̄ yesherba' ñocop, ama't allohueney. Ama't puesheñ̄arroŷeya ama eñallyeña ñeñ̄ey e'ñe cohuen es pets Yomporecop.

- 13 Atto e'ñe ya yeñosatse'teñoŝ sosya'tsañechno yeñyaŝñapa' čha ottena ñerra'mrrate' apampaña ñeñŝ atoramŝsaret. Atto yeñen yen-amotpa' nanaccha' yeshcannena. Atto yeshquëñ yamo'ts yen-amotpa' čhach yottena ñerra'mrrate' shecheŝ amtsañeŝ atserr yepene' puenamot.
- 14 Ñaña ñetpa' añach eñotenet parrnomarña, ñaña čhach chemama'tannenet.
- 15 Ñaña pa'tsrre'mueñoŝetpa' machayoŝtach muetseñet acheñ.
- 16 Pottatse'teñoŝetpa' čhach nanac mueročhtatyëñet acheñenesha', nanaccha' llecatyëñet.
- 17 Ama't ahuatoteñpa' ama añeye' yečheneto attoch e'ñe muetsoññenoŝpa' cohuen yemtannenet.
- 18 Ñaña ama't mameshapa' amach añcha'na'tpahuoye' enteñeto Yompor. Arrpa' allohua ñeñŝ notenes e'ñe Yompor po'ñoñot ñeñŝ atet aquellca'huaret ahuatoteñ.
- 19 Ñaña yapa' yeñoteñ ñeñŝ atet otyen Yompor po'ñoñ ñeñŝ aquellca'huaret ahuatoteñpa' añecopña oten ñeñŝ echene' po'ñoñ, amaña añecpayaye ñeñŝ ama echaye'te po'ñoñ allempo. (Atet ñerra'm judioneshapa' ama't ahuatoteñ echeññañet Yompor po'ñoñ, ñeñŝara ñoñets ñeñŝ o' notuanmas ñorra' arr.) Ñeñŝo'marña ama't puesheñarofesa sa ama't ñeñŝ judioneshapa' amate' errotenot soto, sapa' e'ño' cohuen entenes Yompor. Attoña yeñoteñ ama't allohueney ñeñŝey corretsa añe patsropa' ama pocteye' enteney Yompor ñeñŝ atet yeŝa'yena. ²⁰ Tarro'mar yeñoteñ e'ñe yetsotateñoŝa añ ñoñets ñeñŝ atet anaret ahuatoteñpa' amach errotenot ama't puesheñarofeya e'ñe ya'pocdatoña yañeña attoch e'ñe pocte' enteney Yompor. Añecpaña sherbeney añ ñoñets ñeñŝ atet anaret, ñeñŝcha' yeñotatene' po'ñočh yapa' nanac ochñaŝ enteney Yompor.

Atto Yomporpa' e'ñech pocte' entueney, e'ñe yeyemteñoŝa Jesucristo

²¹ Tarraña te'ña Yomporpa' o' eñotatey atto ellonetpa' eñall po'poñ attoch pocte' entueney Yompor, ñeñŝpa' ama añeyaye o'ch yetsotaten ora ñoñets ñeñŝ atet anaret ahuatoteñ. Tarraña Yompor po'ñoñ ñeñŝ anaret ama't ahuatoteñpa' ñeñŝarecpa eñen añecop. ²² Attochña Yomporpa' e'ñech pocte' entenanet ama't allohuen erra'tsencha' yemtenaya Puechemer ñeñŝara Jesucristo. Ama't allohueney attec mach e'ñe pocte' entueney, e'ñe yeyemteñoŝa Jesucristo. ²³ Tarro'mar allohueney attec may e'ñe yo'chña'tuen. Ama yetsoteññañe Yompor po'cohuenña ñeñŝ e'ñe atet muenen ña. ²⁴ Ñeñŝ attoch e'ñe pocte' enteney Yomporpa' ñeñŝpa' atet: E'ñe puemuerenoŝey ahuo't apuey Puechemer ñeñŝ Cristo Jesús atto ñachña e'ñe yetsa'tuoya allohuen yo'chñar. Ñeñŝpa' e'ñe atta apuey Yompor, ama eso yetsa'teño ama't coñe'ta. ²⁵ Ñaña Yomporpa' ahuo't orrtatan Puechemer Cristo ñeñŝcha' rromosets añe patsro, o'ch ashatare'tta po'rراس e'ñe yocop. Allochñapa' e'ñech e'shohuaretterra yo'chñar ñerra'm yeyemterach ña. Ñaña ahuo't atet ŝa Yompor attoch yeñočh, ñapa' e'ñe pocte' atet pe't ahuat, tarro'mar acheñenesha' ñeñŝ corrate't ahuatpa' Yomporpa' atta ahuantenanet po'chñar, ama ahuenaye' atsa'tatare'ttuerrreto po'chñaret. (Tarro'mar ñapa' e'ñe eñoteñ, Cristochña tsa'tuerrahuet po'chñaret ñamet ñeñŝ allpon ame'ñaye't ña ahuat.) ²⁶ Ñaña

ahuo't atet pa Yompor allochña' attoch yeñoch ñapa' e'ñe pocte' atet pena; teme'ttsen attochña e'ñech pocte' enteney e'ñe yeyemteñoť Jesús.

Atto e'ñeyepa'yeñota'yañeña ñeñť cohuen yentenya, Yomporña' amach cohuenaye' entenye

²⁷ Ñehua, atto e'ñe yeyemteñoťa Cristo Yomporña' e'ñech pocte' enteney, ñeñťo'marña o'huañcha' eñalleta ñeñť allo yommo'chena e'ñe yañeña, ñeñť e'ñe yetsotateñoť. Tarro'mar e'ñe yepa'yeñota'yañeña ñeñť e'ñe cohuen yenten ya, Yomporña' amach pocteye' entenye. ²⁸ Ñeñťo'marña te'pa' e'ñe po'ñoťh yeñoteñ e'ñe yeyemteñoťa Cristopa' e'ñech pocte' enteney Yompor ama't ama yetsoteno ñoñets ñeñť atet anaret ahuatoteñ.

²⁹ Ñehua, o'ch noterrser masheñnesha judioneshacha', ñato' sapa' čate' sotenapañ Yomporpa' saptate' Seyomporer sepeñ ñeñtes judioneshas, amate'ña añecpa'nayaye ñeñť ama judioneshayaye. Tarraña napa' o'ch notas, ama't ñeñť ama judioneshayayepa' ñetpa'čho'ña Po'yomporer peñet. ³⁰ Tarro'mar e'ñe patrra Yompor. Ñaña ama't erra'tsena judionesha' ñeñťcha' ame'ñerraya Cristopa' Yomporña' e'ñech pocte' entenanet. Ñaña attecma ama't erra'tsena ñeñť ama judioneshayaye ñeñťcha' yemterrera Cristo, ñetpa'čho'ña e'ñech pocte' entenanet Yompor. ³¹ Ñato' sa te'pa' čate' sotenapañ yeyemteñoť Cristo, te'pa' Yompor po'ñoñ ñeñť atet anaret ahuatoteñpa' o'ch yehupore'ch, o'huañcha' sherba'y. Tarraña o'ch notas, elloña attoña e'ñe yeñoten, ñeñťo'marña Yompor po'ñoñpa' atarr sherbeney.

4

Atto Yompor ahuatpa' e'ñe pocte' entane't Abraham

¹⁻² Ñehua, te'pa' o'ch neyerpatasa ñeñť atet pe't ahuat yatañ Abraham. Ñapa' ama añoťeye' pocte' eñche'teña Yompor e'ñe ñañeña puetso-tateñoť ñeñť cohuen ente't ña. Ñeñťo'mar yatañ Abrahampa' ama eñalle ama't mamesha attoch ommo'chena ama't Yomporesho. ³ Tarro'mar yeñoteñ ñeñť atet oten Yompor po'ñoñ ñeñť aquellca'huaret ahuatoteñ. Ñeñťpa' atet oten: "Abrahampa' e'ñe atta yemtane't ñeñť atet oche't Yompor, ñeñťo'mar allempoteñña Yomporpa' e'ñe pocte' eñche't e'ñe atta." ⁴⁻⁵ Ñeñťo'marña yeñoteñ yapa'čho'ña ama añoťeye' e'ñe pocte' entenye Yompor e'ñe yetorreñoť ñeñť cohuen yenten yañeña. Añoťcha'ña e'ñech pocte' enteney Yompor e'ñe atta, ñerra'm esempo yapa' o'ch e'ñe yeyemtera ñeñť atet oteney; allochña' attoch e'ñech pocte' enteney ya ñeñťera ochñaťey. Tarro'mar e'ñe pocte' enteney e'ñe atta, ama es yetorreñoťeye' ñeñť cohuen yenten yañeña. Ñehua, ñato' o'ch yetma'ntacha atet. Ñerra'm esempo yetaruasen yepatronaresho, ñerra'm allempoch tsa'tyet yetaruasotpa' ama yoteno e'ñe atta apuenyet quelle, yetaruasotña tsa'tenyet. Tarraña attoch pocte' enterrey Yomporpa' ama atteyaye. Ñapa' e'ñe atta pocte' enteney, ama e'ñe ya yetorreñoťeye' ñeñť cohuen yenten ya attoch pocte' enteney Yompor. ⁶ Ñaña ama't yatañ Davidpa' ñeñťecpaña eñose't ahuat. Ñapa' atet ote't nanac cosheñťso'tseney ñeñťey e'ñe pocte' enteney Yompor e'ñe atta, ñeñťpa'

ama añoŕeyaye o'ch es cohuen yeŕa'yes e'ñe yañeña. ⁷ Ñeñŕpa' atet ote't David:

Nanac cosheñtso'tseney ñeñŕey o' aŕretna'huareŕterra yo'chñar, ñeñŕey amach allo'na yerpuerrnaye'te Yompor yo'chñar.

⁸ Ñaña nanac cosheñtso'tseney ñeñŕey Yomporpa' amach allo'na oteñe'chnenye yo'chñaro'mar. Arrpa' allohua ñeñŕ atet ot ahuat yatañ David.

⁹ Ñaña añ cosheñetspa' yeñoteñ ama ñapŕecpayaya ñeñŕ judionesha-cop ñeñŕara ñeñŕ atorrareñtesha'. Añeŕpa'ñaña ñeñŕ ama judioneshayaye ñeñŕ ama atorrareŕeyayeto. Ñehua, ñeñŕpa' attoña yeñoteñ. O' notuanmas atto Abrahampa' e'ñe atta yemtane't ñeñŕ atet oche't Yompor; ñeñŕo'marña Yomporpa' e'ñe pocte' eñche't e'ñe atta. ¹⁰ Ñehua, te'pa' o'ch yoctape'ch allempo Yomporpa' e'ñe pocte' entane't Abrahampa' allempo Abrahampa' ama atorrareŕtena', tarro'mar allempopa' ama orrtena' atteñats. ¹¹ Tarraña elloñapa' ahuo't tsorratena Abraham; ñeñŕpa' ñeñŕcha' eñotaterrahuet po'ñoçh Yomporpa' o' pocte' entenan Abraham e'ñe pueyemteñoŕa, ama't allempo ama atorrareŕtena'. Ñeñŕo'marña atet ŕa ahuat attoch pompor ŕohueret ama't ñaña allohuenet ñeñŕ ama atorrareŕeyaye; tarraña ama't ama atorrareŕeyayeto, e'ñe pueyemteñoŕeta Yomporpa' e'ñech pocte' entenanet e'ñe atta. ¹² Ñaña ñeñŕo'mar atet ŕa attoch pompor ŕohuer allohuen ñeñŕ atorrareŕ, tarraña añach ñapueŕ pompor perre' ñeñŕ po'ñoçh yemtenaya Yompor. Tarro'mar ama añeŕpaye' pompor peñeto atto atorrareŕtenet, añeŕpoña pompor peñet e'ñe pueyemteñoŕeta Yompor ñeñŕ e'ñe atet pete't pompor et Abraham, ama't allempo ama atorrareŕtena'.

¹³ Yapa' yeñoteñ ahuat Yomporpa' ahuo't otan Abraham o'ch apuer erracmañen pats allohuen puechemereshohuen esempohuañen. Ñaña atet otan Yompor Abrahampa' ama puetsoŕateñoŕeye' añ ñoñets ñeñŕ atet anaret ocheña Yompor. Añña e'ñe pueyemteñoŕa Yompor atet och, tarro'mar Yomporpa' e'ñe pocte' eñch. ¹⁴ Ñerra'm po'ñoçh yetsoŕateñoŕa añ ñoñets ñeñŕ atet anaret apuherryeñ añ patspa' yapa' e'ñeŕe' orrena yeyemteñañ Yompor; tarro'mar ñerra'm atteñpa' Yomporpa' amate' a'pocatanñeña po'ñoñ ñeñŕ atet otan ahuat Abraham. ¹⁵ Ñaña ñerra'm añ yoçten añ ñoñets ñeñŕ atet anareŕpa' nanaccha' a'coñchatareŕey ñerra'm ama yetsoŕueno ora allpon ñoñets. Ñaña ñerra'm ama eñallñe añ ñoñets ñeñŕ atet anareŕpa' amate' erroŕtenoŕ coñchatayeto tarro'mar amate' eñallñe ñoñets ñeñŕcha' ya'pote' ñeñŕ ochñartsotets.

Attoch a'naterrya Yomporpa' ñeñŕpa' e'ñech yeyemteñoŕa ña

¹⁶ Ñeñŕo'marña yeñoteñ attoch a'naterrya Yompor ñeñŕ atet otahuapa' ñeñŕ po'ñoçhpa' e'ñech yeyemteñoŕa ña attochña e'ñe pueuereñoŕey e'ñech a'naterrya allohueney. Amach ñapŕayaya judionesha' ñeñŕ cotene' añ ñoñŕsor ñeñŕ atet anaret, añeŕpa'ñaña allohueney ñeñŕeycha' yemterraya Yompor e'ñe atŕeptar atet pe't ahuat yatañ Abraham. Tarro'mar ñapa' po'ñoçh yatañ yepeñ allohueney. ¹⁷ Ama't Yompor po'ñoño ñeñŕ atet anaret ahuatoteñpa' all orrtena ñeñŕ atet Yomporpa' otan ahuat Abraham, ñeñŕpa' atet oche't: "Shonte' pa'namen acheñpa' ñetñapa' pomporcha' ŕohuerpet. Añpa' e'ñe na atet o' neponaŕ." Ñeñŕo'mar yeñoteñ Abraham e'ñe pueyemteñoŕ Yomporpa'

atet eñche't Yompor ñapa' pomporcha' per shonte' pa'namen acheñ. Ñeñña'pa' ñeñtara Yompor ñeñt nanac ahuamencat ñeñt eñotene' o'ch tantaterran ama't ñeñt rromuets, ñaña ñeñt eñotene' e'ñe po'ñoño'pa' o'ch orrtatan ama't ñeñt ama eñalle te'.

¹⁸⁻¹⁹ Allempo Yomporpa' atet otan Abraham "pesho'pa' merenach shonte' pa'namen acheñ ñeñt'cha' pòmporterraya" allempo Abrahampa' o' nanac po'nme'ten —charroch charra' charte' echen. Tarraña Abrahampa' ama't eñotena o' nanac po'nme'ten, o' meten allempo attoch chemere'ten, ñaña puetapor Sarapa'cho'ña o' nanac po'nme'ten, amate' erro'tenot cheyore'terro, tarraña Abrahampa' ama quechpuenano atto yemtenana ñeñt atet otue Yompor. E'ñe pueyemteño't Yomporpa' allo'na sen cohuene' Yompor o'ch a'p ama't patrra puechemer. ²⁰ Ama echarrteno pueyo'chro ama't mamesha añecop ñeñt atet o' otue Yompor. Allo'na sen yemuetnomaya Yompor ñeñt nanac ahuamencat pene'. E'ñe pueyemteño'fan Yompor, ñapa' chocmach ota'psa'tyesanete't Yomporpa' ñap'ña atarr ahuamencat. ²¹ Tarro'mar eñoch'e't e'ñe Yompor po'huamencot, po'ño'chpa' o'ch a'p ama't patrra puechemer ñeñt atet o' otue. ²² Ñeñto'marña Abraham e'ñe pueyemteño'fan Yompor Yomporña'pa' e'ñe pocte' eñche't.

²³ Tarraña añ ñoñetspa' ama ñap'tecpayaye Abrahamacop anarete. ²⁴⁻²⁵ Yocpa'naña anarette't allohuene' ñeñtey yemtenaya Yompor, atto ñapa' a'rroyonay Puechemer ñeñt Jesús ñeñt'cha' rromats e'ñe ya yo'chñarecop, ñeñtara Jesús ñeñt Yepartseshar yepen, ñaña atto Yomporpa' tantaterran Puechemer po'rromño't, attoch yeño'ch yo'chñarpa' o' e'ñe atsa'taretetua. Ñeñto'marña te'pa' e'ñe yeyemteño't Yompor ñeñt atto a'poc'atony, yapa'cho'ña e'ñech pocte' enteney yaña.

5

Atto e'ñe yeyemteño't Yompor, e'ñech pocte' enteney, atarrcha' cosheñtso'tseney

¹ Ñeñto'marña te'pa' yeñoteñ e'ñe yeyemteño'fa Jesucristo, Yomporña'pa' e'ñe pocte' enteney, o'huañcha' yoro'cheno'tseney Yomporeshot, tarro'mar Yepartseshar Jesucristopa' ahuo't a'poc'atuerrnay yo'chñar Yomporesho. ² E'ñe attotña Cristopa' chapaterrey Yompor puemuereño attoch chocma bensare'tañpene' y; ñeñt'pa' e'ñe yeyemteño't Cristo. Ñaña yapa' e'ñech yocsheñsha' yecueñ esempohuañencha' e'ñe poc'tacma yecohuentapretera Yompor. ³ Ñaña ama't yemuerochteño't o'ch yocshena tarro'mar yeñoteñ e'ñe yemuerochteño't'pa' allempoña yoc'tape'chen attoch ahuamencat pa'y Yompor attochña ya'huanten allohuen ñeñt echarr yentyen. ⁴ Ñaña attoña ya'huanten allohuen ñeñt echarr yentyenpa' yapa' yeñoteñ Yomporña'pa' e'ñech cohuen entuerrey. Ñaña ñerra'm yeñoteñ Yomporpa' e'ñe cohuen enterrey, yapa' e'ñe yeyemteño't o'ch yecuerr ñeñt o'patatenya Yompor. ⁵ Ñaña e'ñe yecueño't ñeñt o'patatenya Yompor ñapa' chocmach a'poc'atatenan po'ñoñ ñeñt atet oten yocop. Yapa' ama't esempapa' amach es ye'naterraye te po'poñ, tarro'mar Yomporpa' ahuo't apuey Puecamquēñ ñeñt'cha' ye'chetsa yeyo'chro ñeñt'cha'ña yeñotatene' atto Yomporpa' nanac morrentenya.

6 Yapa' yeñoteñ nanac morrentenya Yompor tarro'mar ahuatpa' ama es yoctape'chpeno ama't mamesha Yomporecop attoch yequesh-perrañ. Tarraña Yomporñapa' e'ñe allempocmapa' ahuo't mueñan Puechemer Cristo aña patsro ñeñicha' rromosets e'ñe yocop ñeñey ama es cotape'chetso cohuen ama't mamesha Yomporecop. 7 Ñehua, yapa' arromñaŕeypa' yeñoteñ atarr torrapo' attoch yerroma po'psheñŕecop, ama't añ acheñŕecop ñeñŕ atarr cohuen. Tarraña errotenopa' ama tama torrapahuoye' yenteno o'ch yerroma añ acheñŕecop ñeñŕ atarr amueraña. 8 Tarraña yapa' ama't allempo ora ye'patse'tyen sosya'tsañpa' e'ñe allempocmaña Cristopa' ahuo't rroma yocop. Attoña Yomporpa' eñotaterrey yapa' nanac morrentenya. 9 Ñeñto'marña te'pa' e'ñe pocte' enteney Yompor tarro'mar Cristopa' ahuo't rroma yocop. El-loña attotña a'queshpatey allochñapa' amach a'coñchatareŕeye ama't er-ronaña. 10 Ama't allempo ora ye'moñe'teñ Yomporpa' Puechemerña po'rromñoŕpa' ahuo't e'ñe yamo'tstannerra epay Pompor. Elloña te'pa' atto correna Cristopa' attoña yapa'cho'ña a'queshpaterreycha'. 11 Elloña te'pa' e'ñe yocsheña Yompor tarro'mar Puechemer ñeñŕara Yepartseshar Jesucristopa' ahuo't amo'tstatterya e'ñe ña Pompor.

Atto yamo'mte' Adánpa' ñapa' cha a'chencatey; Yamo'mte'ña Cristopa' ñaña ya'queshpaterre'

12 Ahuat puesheñarr yacma ñeñŕ pa'so'cheñ Adánpa' ahuo't orrtatan atpare'teñets aña patsro Yomporecop. Ñeñto'marña allempoteñ allohueney ñeñŕey acheñeypa' e'ñe attecma ye'pohua. Ñaña allempopa' ahuo't anaretta attoch yo'chñaroŕpa' o'ch yerroma. Ñeñto'marña allohueney ñeñŕey acheñeypa' o'patuaya rromueñets tarro'mar allohueneypa' ñeñŕa yeñot ñeñŕ atet pa ñanam yamo'mte' Adán. 13 Ñaña allempoteñ corre't Adán, acheñenesha' arr patsropa' ñeñŕa eñotet ñeñŕ atet atpare'tan Adán Yompor. Tarraña allempopa' ama eñalletena' ñoñets ñeñŕ atet anaret alloch a'coñchatareŕerret. 14 Tarraña attera o'patenanet rromueñets e'ñe allempoteñ corre't Adán ñeñŕa attera ñaña tarremphua allempo corre't ñaña Moisés ñeñŕ nahuet ñoñets. Ama't ama atpare'teññañeto Yompor po'ñoñ e'ñe atet atpare'te't Adán, tarraña attera o'patenanet rromueñets. (Ñeñto'mar yeñoteñ Adán po'chñaroŕpa' ahuo't anaretta attoch o'patuaya allohueney rromueñets.) Ñeñŕña yamo'mte' Adánpa' aña o'patatuaya ñeñŕ ama cohuenayaye, tarraña Yamo'mte'ña Cristopa' allempo huapapa' ñapa' añaña o'patatosya ñeñŕ e'ñe cohuenare'.

15 Tarro'mar e'ñe patparñesharmoroŕ Adánpa' ama atteyaye ñerra'm ñeñŕ atet atarr muerenya Cristo. Tarro'mar e'ñe puesheñarra po'chñaroŕ o'patya rromueñets allohueney pa'namen acheñey. Tarraña elloñapa' eñall po'psheñeñ, ñeñŕara Jesucristo ñeñŕ yemuererraya. Attoña Yomporpa' orrtatonay puemuereña yocop alloña nanac cohuen es apatueneŕ e'ñe atta allohueney pa'namen ñeñŕey acheñey. 16 Ñaña ñeñŕ atet muererraŕa Yompor, ñeñŕpa' ama atteyaye ñerra'm ñeñŕ atet o'patuaya ochñarets ama't e'ñe puesheñarroŕa. Tarro'mar ñeñŕ atet pa Adán ama't parrochapa' ñeñŕaña yo'patatuenaya coñcheñets. Tarraña ñeñŕ atet a'queshpaterrey Yomporpa' ñeñŕpa' atet pa. Ama't shonteñ yo'chñarpa' ñañaapa' e'ñech pocte' enteney e'ñe atta tarro'mar ñeñŕpa'

o' a'pocatuonay Cristo. ¹⁷ Ñaña atto e'ñe puesheñarroña po'chñaroñ o'pateny rromueñets, tarraña elloña nanac muererrya Yompor attoña a'rroyernay Puechemer ñeñtara Jesucristo ñeñt o' a'pocatuernay yo'chñar Yomporsho attochña yapa' corretsayach.

¹⁸ Ñeñto'marña yeñoteñ atto e'ñe puesheñarroña po'chñaroñ ahuo't o'patatyet coñcheñets, attecma ñaña puesheñarr ñeñt Jesucristopa' ahuo't pohua ñeñt e'ñe cohuen, alloña a'pocaterrey, attochña yapa' corretsayach yocsheñeshocmañen tayoteñ errponohuañen. ¹⁹ Atto e'ñe puesheñarra ñeñt Adán ñeñt atpare'tene' Yompor, ñeñto'marña ñesharmorot Yomporña' e'ñe ochñañeche' entueney ama't shonte' pa'namena'ttsocmay ñeñtey acheñey. Tarraña puesheñarr ñeñt Cristo ñeñt e'ñe cohuen ame'ñenaya Yompor, ñeñtña' alloch e'ñe pocte' enteny Yompor, ama't shontey pa'namena'ttsocmay ñeñtey acheñey.

²⁰ Ñaña allempo chap allempoch anaretta ñoñets ñeñtcha' eñotaterrahuet ñeñtcha' atet pet ñaña ñeñtcha' ama atet a'papahuo elloña allempopa' ñetpa' o' eñoterret atarr atparña'atretet. Tarraña ama't atto nanac yatpare'tena elloña Yomporpa' nanac muererrya. ²¹ Attoña e'ñe ye'patse'tyeñot ñeñt ama cohuenayayepa' ahuo't anaretta rromueñets ñeñtcha' yo'patenaya ñeñtña' coñcheñets. Tarraña elloña Jesucristo ñeñt Yepartseshar yepen ahuo't orrtatonay atto Yomporpa' nanac muererrya attoña a'pocatuernay yo'chñar. Attochña yapa' corretsayach yocsheñeshocmañen tayoteñ errponohuañen.

6

Atto ñeñt toma'ntena allempo yapataretta Cristocop

¹ Te'pa' e'ñe yeñoteñ ama't atet ye'patse'tyese't ñeñt ama cohuenayaye, Yomporpa' elloña nanac muererrya, atto peretna'huernay yo'chñar. Tarraña ama't atteñpa' amach yotapsa'tatsto "ñeñte'pñapa' o'ch allo'na ye'patse'tyesnena ñeñt sosya'tsañ tarro'mar Yomporpa' nanquëpa't muerenana ñeñt patse'tyene' ñeñt ama cohuenayaye ñaña ellopa' o'chcho' alla muererrya." ² Tarraña amach errotenot allo'na yeseno patse'tyesnomue' ñeñt ama cohuenayaye tarro'mar o' ya'ypo'ñerr yo'chñar allempoteñ o' yaguër Cristo. ³ Ama't seño'teñeña ñeñt toma'ntena allempo yapataretta Cristocop. Añ toma'ntena atto o' yeparrocmaterr epay Cristo, atet ñerra'mrrate' cho yerromapreteña Cristo allohueney ñeñtey apatarettetsa e'ñe yame'ñeñot Cristo Jesús. ⁴ Allempo yapatarettapa' e'ñe atet ñerra'mrrate' cho yerromapreteña Cristo ñaña atet ñerra'm cho yepampapreteña Cristo. Allempoña Yomporpa' ahuo't tantaterran Puechemer e'ñe po'huamencot ñeñt atarr cohuen, yapa'cho'ña ñeñtara po'huamencarotña e'ñe cohuen o' etserrataterrnay yocpaña, ñeñtcha' atet yocrrena.

⁵ Tarro'mar e'ñe yeparrocmateñot epay Cristo o' yerromaprecha. (Attochña ya'ypo'ñerr ñeñt ama cohuenaye' entapretenye Cristo.) Ñaña ñerra'm yerromapreteña Cristo yeñoteñ o' yetantapretera attochña yocrrera e'ñe cohuen ñocop. ⁶ Tarro'mar yeñoteñ ñeñtey acheñey ñeñt yeyochro'tsen ñeñt yoctape'chataye't sosya'tsañ ahuañ ñeñtña' o' a'mchechataretetuerra atet ñerra'mrrate' acorso'tamñsaretta epuet Cristo. Attochña o'huañcha' cotape'chatse'tatnened yo'chñarañeña. Amach allo'na taruasatnenye yo'chñar. ⁷ Ñato' o'ch yetma'ntacha atet

pena arromñañ. Ñehua, yapa' yeñoteñ ñerra'm esesha' rromatspa' amach errotenoť allo'na cotape'chyenenano sosya'tsañ. Yapa'cho'ña atetcha' yentena ñerra'mrrate' cho yerromuen, amach errotenoť allo'na yoctape'chyeneno ñeñť sosya'tsañ enten Yompor. ⁸ Ñaña atto o' yerromaprecha Cristo, yapa' yeñoteñ ñaña e'ñe yeparrocmateñoť Cristopa' alloña corretsayach, atet pena ñapa' e'ñe corretsa. ⁹ Tarro'mar yapa' yeñoteñ Cristopa' o' tanterra po'rromñoť, amach alla rromuerre'te. Amach errotenoť alla o'patere'te rromueñets. ¹⁰ Tarro'mar ñapa' atto rroma yo'chñarecoppa' ñeñťpa' e'ñe parrocha rroma ama't allohuenacop. Ñaña atto correna te' ñeñťpa' e'ñe ora Pomporecpa. ¹¹ Yapa'cho'ña attecmuropa'ch yentena yaña yañeña. E'ñe yerromapreteñoť Cristo Jesús'pa' o'ch ya'ypo'ñerr yo'chñar ñeñťo'marña amach errotenoť alla taruasaterryerro yo'chñar. Ñaña te'pa' e'ñe yeparrocmateñoť Yepartse-shar Cristopa' o'ch yocrraprecha e'ñe cohuen Yomporecop.

Attoch amach semnatatsche so'chñar o'ch alla taruasaterrnaserr sa'rromñaatechets

¹² Ñeñťo'marña te'pa' o'ch notas, amach semnatatsche so'chñarpa' o'ch alla taruasaterrnaserr sa'rromñaatechets. Allochñapa' amach allo'na sepatse'tyesneno ñeñť atet muenatse'tatyenes sechets. ¹³ Amach semnatatsche sechets o'ch ña torrena ñeñť ama cohuenaye' enteno Yompor. Añcha'ña o'ch saphuer Yompor sechets allochñapa' ñachña torratenaya añecop ñeñť e'ñe cohuen enten ña. Ñato' o'ch yetma'ntacha atet ñerra'mrrate' cho yerromuen tarraña te'pa' o'ch alla yocrrerra cohuen Yomporecop. ¹⁴ Tarro'mar te'pa' amach errotenoť allo'na taruasatnenye yo'chñar, tarro'mar te'pa' añ yeyemtena Yompor atto muerenyapa' ahuo't a'pocatonay yo'chñar. Ama añeye' yeyemteno ñoñets ñeñť atet anaret ñeñťcha' atet yepohua esheccha' cohuen enteney Yompor.

¹⁵ Te'pa' yeñoteñ ama añeye' yeyemteno ñoñets ñeñť atet anaret. Añña yeyemtena Yompor puemuereñoť e'ñe yenpueney. Tarraña ama't atteñpa' ama pocteyaye o'ch allo'na yesen patse'tyerrayerr ñeñť ama cohuenaye' enteno Yompor ama't mamesha. ¹⁶ Ñato' o'ch yetma'ntacha atet. Ñehua, yapa' yeñoteñ ñerra'm esesha' yemnen ñeñťcha' yetaruasatene' añe patsro, ñeñťpa' po'ñočh ñeñťcha' yepatronar yepen, ñaña e'ñe ch pauner yentatena attochña ñeñťach yame'ñena ñeñť yepatronar yepen. Ñaña attecmach yepena ñerra'm añ yemnen yo'chñarach yetaruasatene', tarraña ñerra'm añ yetaruasatene' yo'chñarpa' ñeñťpa' tsa'taterryach rromueñtso ñeñťara coñcheñtso. Tarraña ñerra'm añ yame'ñena Yompor ñeñť atet oteney po'ñoñoť, ñeñťpa' alloch yorrtatyen e'ñe cohuen ñeñť e'ñe atet muenen ña. ¹⁷ Ñaña sapa' ahuatpa' ña setaruasataye't so'chñar, tarraña te'ñapa' e'ñe seyočhrocmañen o' same'ñera ora ñeñť atet pena Yompor pa'poteñ ñeñťara ñeñť serrpare'tatasete't. Ñeñťo'marña te'pa' napa' atarr nocshena, atarr neparasyoso'teñ Yompor socop. ¹⁸ Ñaña te'pa' o'huañcha' taruasaterrnserr so'chñar. Añcha'ña setaruasaterre' Yompor erra'tsente' muenen ña. ¹⁹ Ñehua, Yompor poctapñoťpa' atet netma'ntatensa atto yocrrena acheñey arr patsro allochñapa' cohuencha' chaponasa seyočhro Yompor poctapña. Ñeñť notenes po'ñočhpa' ñeñťpa' atet sepe't ahuat e'ñe pocte' sente't e'ñe

ora sechtsohuen allo'na sete't p̄atse'tnomue' sosya'tsañ ñeñt ama cohuenaya' enteno Yompor. Te'pa'cho'ña attecmeupa'ch e'ñe pocte' senteñ ora sechtsohuen o'ch sepomuerra Yomporecop, allochñapa' attoch sa'cohuentataretterra e'ñe cohuen Partsocop ñeñt e'ñe atet muenen ña.

²⁰ Ñehua, ahuat allempo ña setaruasataye't so'chñarpa' ama añeye' soctape'che'te ñeñt e'ñe cohuen enten Yompor. ²¹ Tarraña ñeñt atet sepatse'tyese't sosya'tsañ ahuatpa' ama es sherbase'te ama't mamesha, ñeñtara ama't te'pa' pencna'ntatenes. Yapa' yeñoteñ ñeñt'pa' al-lach tsa'taterryañ rromueñtso, ñeñtara coñcheñtso. ²² Tarraña te'pa' o'huañcha' alla taruasaterryerr yo'chñar. Añcha'ña yeforratene' Yompor po'taruas attoch yesherbeñ. Allochñapa' ñach yetsa'tenaya alloch ya'cohuentataretterra e'ñe cohuen ñocop añe patsro. Allochñapa' attochña aphuerrey allochña yapa' corretsayach yocsheñeshocmañen tayoteñ errponañohuen. ²³ Tarro'mar yo'chñarpa' allach tsa'taterrya rromueñtso, ñeñtara coñcheñtso. Tarraña e'ñe yeparrocmateño't epay Yepartseshar Cristo Jesús'pa' Yomporñapa' aphuerreycha' e'ñe atta allochña yapa' corretsayach yocsheñeshocmañen tayoteñ errponañohuen.

7

Atto o'huañ amcha'nochtana'tenya añ ñoñets ñeñt atet anaret ahuat Moisésesho't

¹ Te'pa' o'ch masheñeshacha' ñaña nochaneshacha' netma'ntatasa po'poñ cotapñats. Ñehua, sapa' o' e'ñe seño'tueñ atet pena ñoñets ñeñt atet anaret arr patsro ñeñt'cha' atet yepena. Sapa' seño'ten añ ñoñetspa' sherben tarremphuach allempo yocrrena añe patsro. Tarraña ñerra'm esempo yerromapa' añ ñoñetspa' amach erroteno't allo'na yame'ña'neño. O'huañcha' yame'ñeña. ²⁻³ Atet ñerra'mrrate' ñeñt otene'y paterr ñoñets ñeñt atet anaret. Ñeñt'pa' atet otene'y: Coyanesh'a' arrollare'tañpa' amach satstano puerrollar allempo correna añe patsro. Ñaña ñerra'm allempo correna puerrollar, ñerra'm o'ch yorer po'psheñeñ ñeñt'cha' puerrollar perrpa' ñeñt'pa' ama pocteyaye tarro'mar ñeñt'pa' o'chña'tañpeñets enteñ Yompor. Tarraña ñerra'm esempoch rromapes puerrollarpa' allempoñapa' o'huañcha' ame'ñatacha añ ñoñets ñeñt atet anaret puerrollarecop. Ñaña ñerra'm allempo yorer po'psheñeñ ñeñt'cha' puerrollar perrpa' allempo ñeñt'pa' e'ñe pocte' tarro'mar allempo, ñeñt'pa' ama o'chña'tañpeñtsoye' enteñe Yompor.

⁴ Ñeño'tmarña o'ch masheñeshacha' ñaña nochaneshacha' notas, yapa'cho'ña o'huañcha' amcha'nochtana'tenya añ ñoñets ñeñt atet anaret ahuat Moisésesho't, tarro'mar ñeñt'ey o' yame'ñerrapa' o' yerromapretera Cristo. Ñeño'tmarña te'pa' e'ñe pocte' o'ch yo'patera po'psheñeñ. Ñaña ñeñt o' yo'patera te', ñeñt'pa' Cristo ñeñtara ñeñt tanterrtsa rromot. Allochñapa' attoch yorrtatyen ñeñt e'ñe cohuen atet muenen Yompor. ⁵ Tarro'mar ahuat allempo e'ñe yañeña yocapñia ora yocpenpa' ama't yeñoteneñ añ ñoñets ñeñt atet anaret'pa' attera muenateney o'ch allo'na taruasatnene'y yo'chñar. Attoña allach chapaterryeñ rromueñtso attoch e'ñe yechenca'huerrañ. ⁶ Tarraña te'pa' e'ñe yerromapretereño't Cristo añ ñoñets ñeñt atet anaret'pa' o'huañ amcha'nochtana'tenya atet ñerra'm ahuat. Ñeño'tmarña te'pa' e'ñe cohuen yocrrena Yomporecop. Te'pa' ama añecpayaye ñeñt atet yepe't ahuat attoch e'ñe ya'muerochtame'teño't

yetsotatuañ ñeñt atet otye't ñoñets ñeñt atet anaret. Añecopña yocrrena e'ñe cohuen Yomporecop tarro'mar te' Parets Puecamquëñpa' o' etser-rataterrnay yoctapña.

Atto yo'chñarpa' atarr mopa'teney; amach muenatenye o'ch atet yepohua ñeñt atet oteney ñoñets ñeñt atet anaret

⁷ Ñehua, ñato' sapa' çhate' sotenapañ napa' noteneste' Yompor po'ñoñ ñeñt atet anaretpa' ñeñtpa' amate' cohuenayaye. Tarraña ñeñtpa' ama atteye' notenso ama't mamesha. Atet napa' ñerra'm ama eñallñeña añ ñoñets ñeñt atet anaret, napa' amate' çhaponañeña neyoçhro ñeñt ama pocteye' enteno Yompor. Atet ñerra'm ama eñallñeña añ ñoñets ñeñt yotene' "amach yeye'chapretanna'tatsto", napa' amate' çhaponañeña neyoçhro ñeñt ama pocteye' enteno Yompor ñerra'm esempo es yeye'chapretannena. ⁸ Tarraña allempo çhapona neyoçhro po'ñoçh atet oteney ñoñets ñeñt atet anaret ama es aye'chapretanna'tpahu, no'chñar ñeñt neyoçhro'tsenpa' elloña nanaccha' es ye'chatse'tatylene. Ñerra'm ama neñotenñe añ ñoñets ñeñt yotene' ama es aye'chapretanna'tpahu, ñerra'mañpa' amate' neñotenñe ñeñt atet neye'chapreteña po'psheñeñ ñeñtpa' ñeñña po'ñoçh no'chñar entapretenen Yompor. ⁹ Ahuat napa' allempo ama neñotena' ñoñets ñeñt atet anaret, nañapa' nanac cosheñtso'tsennoñ allempo. Tarraña allempoña neñoter ñeñt atet oteney ñeñtcha' atet ye'pa cohuen ñaña ñeñt ama atet a'papahuopa' allempoteñña napa' neñotena po'ñoçhpa' shonte' no'chñar ñeñt neyoçhro'tsen. Allempoteñña napa' atarr nellquërra nanac. Neñoteñ añ no'patenaya rromueñets ñeñtara coñcheñets. ¹⁰ Ñaña añ ñeñtara ñoñets ñeñt atet anaret allo'ch yocrrenañ e'ñe cohuenpa' tarraña arepa't atteyaye, ñaña no'chñar allo natpare'ten ñoñets ñeñt atet anaret ñeñtach nanmayeñ rromueñto.

¹¹⁻¹² Tarro'mar allempoteñ neñoterr añ ñoñets ñeñt atet anaretpa' no'chñar ñeñt neyoçhro'tsenpa' elloña nanac cotape'chatse'tatenen sosey. Ama't nanac cohuenen Parets po'ñoñ ñeñt atet anareteñ, ñaña atet oteney Parets ñeñtcha' atet ye'pa' cohuen, ñaña ñeñtcha' ama atet a'papahuoyaye, ñeñtpa' e'ñe cohuen, poctey. Tarraña na no'chñarpa' ama muenatenno o'ch cohuen es ne'pa', ñeñtpa' attepa't sheca'ne't. Napa' ama erro't nepeno, neñoteñ añ no'patenaya rromueñets ñeñtara coñcheñets. ¹³ Te'ña sapa' çhate' sotenapañ añ ñoñets ñeñt e'ñe otets cohuenpa' ñeñtepa'tña yo'patatenaya rromueñets. Tarraña ñeñtpa' ama atteyaye. Añña ñeñt yo'patatenaya rromueñets, ñeñtpa' yo'chñar. Ñaña Yompor po'ñoñ ñeñt atet anaret ñeñt e'ñe cohuenpa' ñeñña o' a'poterrnay yo'chñar. Attochña yeñoterr yo'chñarpa' nanac sosey entapreteney Yompor.

Atto eñall epa ñeñt huomenc yepene' yeyoçhro

¹⁴ Yapa' yeñoteñ añ ñoñets ñeñt atet anaretpa' Partseshot e'ñe cohuen anareteñ, tarraña atet ñerra'm napa' arromña'otata atet nepena, çhocmach nepatse'tyen ñeñt ama cohuenaye' enteno Yompor. E'ñe atet nepena ñerra'mrrate' añ netaruasatene' no'chñar. ¹⁵ Ama neñoteñe eso'marte'ña atet nepena, tarro'mar ama't ñeñtcha' atet o' nepohuapa' ama't napa' amach e'ñe pocteye' nenteñe. Tarro'mar ama't nemeneñ añte' atet nepohua ñeñt e'ñe cohuen enten Yompor, tarraña

arepa'tña atteye' nepeno. Añepa't atet nepen ñeñt ama nemnenñe, ñeñt po'ñoçh ama cohuenaye' enteno Yompor. ¹⁶ Ñaña esempo o'ch neṗohua ñeñt ama cohuenayaye, ñeñt ama't napa' ama nemnenñe, nañapa' neñoteñ attotña o' natpare'tua ñoñets ñeñt atet anaret ñeñt e'ñe cohuen. ¹⁷ Ñeñto'marña neñoteñ ñerra'm esempo o' atet neṗohua ñeñt ama't napa' netsena'ten, ñeñtpa' neñoteñ ama e'ñe naye' atet petso. Añña atet neṗatene' no'chñar ñeñt allo'tsenara neyoçhro. ¹⁸ Napa' neñotena e'ñe atta eñalletñan, neyoçhroñapa' ama eñalle attoch cohuen enten Yompor, ama't coñe'ta. Ama't nemneñeñ o'ch atet neṗañ ñeñt e'ñe cohuen enten Yompor, ñarraña ama erroñ nepeñe atet ṗatsa ñeñt atet cohuentetsa. ¹⁹ Ñeñt atet nepenapa' ama't napa' ama pocteye' nenteñe. Tarro'mar ama't nemneñeñ o'te' atet neṗohua ñeñt e'ñe cohuen enten Yompor, ñarraña arepa'tña atteye' nepeno. Añach atet nepena ñeñt ama nemnenñe ñeñt po'ñoçhpa' ama cohuenaye' enteno Yompor. ²⁰ Ñeñto'marña neñoteñ, ñerra'm esempo o' atet neṗohua ñeñt ama't napa' ama nemnenñe, ñeñtpa' neñoteñ ama e'ñe naye' atet petso. Añña atet neṗatene' no'chñar ñeñt allo'tsenara neyoçhro. ²¹ Ñeñto'marña te'pa' neñotena ñerra'm esempo yemneñeñ o'te' atet yeṗañ ñeñt e'ñe cohuen enten Yompor, ñarraña yo'chñar ñeñt yeyoçhro'tsenpa' çhocmach cotape'chateney ñeñt ama cohuenaye' enteno Yompor. ²² Tarraña atto Yompor o' cotape'chaterrey cohuen yeyoçhropa' ñeñtpa' alloch e'ñe yocsheññaña po'ñoñ. ²³ Tarraña ama't atetpa'yapa' yeñotena eñall po'poñ ñeñt huomenc yepene' yeyoçhro ñeñt çhocmach e'moñe'tenan ñeñt atet yotape'chen cohuen Yomporcop. Ñaña yo'chñar ñeñt huomenc yepene' yeyoçhropa' ñeñtña nanac mopa'tene' yechets.

²⁴ ¡Ee-say! Nanac llequëñtso'tseney ya. Esha'huachca' ya'huañaṗerre'te' yo'chñar ñeñt nanac yemueroçhtatene' ñeñtcha' yanerre'te' rromueñtso. ²⁵ Nanac neparasyoso'teñ Yompor tarro'mar neñoteññañ Puechemer ñeñt Yepartseshar Jesucristo ñepa'tña e'ñe ya'huañaṗerre' yo'chñar. Ñeñto'marña e'ñe yeyoçhropa' yemneñeñ o'ch yotape'cherrñañeñ Yompor po'ñoñ, ñarraña yo'chñarñapa' ñeñtña çhocmach yetaruasatene' e'ñe yechtso.

8

Atto Parets Puecamquëñpa' ñeñtña huomenc yepene' yeyoçhro

¹ Ñeñto'marña te'pa' yeñoteñ amach a'coñchatareṗeye ama't puesheñarroṗeya ñeñtey o' yeparrocmaterra Cristo Jesús. Ñehua, ñeñtey o' yeparrocmaterra Cristo, ñeñtpa' añ, atto o' cotape'chaterrey Parets Puecamquëñ, amaña aṗeye' yotape'chatenaye yo'chñar ñeñt yeyoçhro'tsen. ² Tarro'mar te'pa' atet ñerra'm napa' e'ñe neparrocmateñoñ Cristopa' añña Parets Puecamquëñpa' ñeñtña huomenc nepene' neyoçhro, allochña napa' corretsanach tayoteñ ama't ñaña errponohuañen. Attotña o' a'huañaṗerren atto no'chñarpa' ñeñtña huomenc neṗaye't neyoçhro, ñeñtcha' nanmayeñ rromueñtso, ñeñtara coñcheñets. ³ Ñehua, añ ñoñets ñeñt atet anaret ñeñtcha' yetsoateneñpa' amach errotenoñ a'queshṗaterreye, tarro'mar ya arromñaṗey yo'chñarpa' ama muenateney o'ch atet yepohua ora ñeñt atet oteney añ ñoñets. Tarro'mar añ ñoñetspa' ama eñalle attoch huomenc ṗonay yeyoçher

esheccha' yetsotue ora allpon ñeñt atet oteneý ñeñtcha' atet yepohueneñ. Tarraña atto Yomporpa' ahuo't a'pocatuonay yo'chñar ñeñtpa' atet pa. Ñapa' ahuo't mueñonay e'ñe ña Puechemer ñeñtcha' eñalletostsa arr patsro e'ñe atet ñerra'm ya ñeñteý arromña'tey, ñeñteý ochña'tey. Allochña' ñach rromosets yo'chñarecop; allochña' attoch tsa'tuonaya yo'chñar. Attochña a'huaña'mperrey atto yo'chñara ñeñta huomenc yepene' yeyochro. ⁴ Atet o' p'onay Yompor attoch te' yapa' o'ch atet yepa cohuen ñeñt atet oteneý Yompor po'ñoñ, allohueneý ñeñteý atet petsa atet cotape'chateneý Parets Puecamquëñ, ñeñteý o'huañ atet yepatse'tyesa ñeñt atet cotape'chatse'tateneý yo'chñar ñeñt yeyochro'tsen.

⁵ Tarro'mar ñeñt atet petsa ñeñt atet cotape'chatenanet sosya'tsañ ñeñt pueyochro'tsenetpa' añachña e'nenet ñeñt atet muenatse'tatenanet po'chets. Tarraña ñeñt atet petsa ñeñt atet cotape'chatenanet Parets Puecamquëñpa' añachña e'mñnotenet ñeñt atet muenatenanet Parets Puecamquëñ. ⁶ Tarro'mar ñerra'm añach ye'nen ñeñt atet muenatse'tateneý yechetspa' ñeñtpa' ñeñtcha'ña yanerre' rromueñtso ñeñtara coñcheñtso. Tarraña ñerra'm añ ye'mñnoten ñeñt atet cotape'chateneý Parets Puecamquëñpa' ñeñtpa' ñeñtcha'ña allochña yapa' corretsayach e'ñe cohuen yocsheñeshocmañen.

Atto ñerra'm añach ye'nen ñeñt muenatse'tateneý yechetspa' amach errotentoyame'ñeroña Yompor

⁷⁻⁸ Tarro'mar ñerra'm añach ye'nen ñeñt atet muenatse'tateneý yechetspa' ñeñtpa' atet yepena ñerra'mrrate' cha ye'moñe'teñ Yompor, ñeñto'marña chach yatpare'teññañ po'ñoñ. Amach errotentoyame'ñeroña Yompor ñerra'm añach ye'nen ñeñt atet muenatse'tateneý yechets. Ñaña ñerra'm attach yepenapa' amach errotentoyocshacheña Yompor.

⁹ Tarraña sapa' ama añeye' soctape'chatenaye sechets; añña soctape'chatene' Parets Puecamquëñ ñerra'm po'ñoçh Puecamquëñpa' o' yeçherra seyoçhro. Tarraña ñerra'm eseshas ama echenaye Cristo Puecamquëñ seyoçhropa' ñeñtesña po'ñoçhpa' ama puechemereyayso Yompor. ¹⁰ Ñehua, ya arromña'teypa' çhocmach yerroma arr patsro ochñartso'marecop. Tarraña ñerra'm Cristo yeçhena yeyochro yecamquëño'tpa' çhocmach yocrrena tarro'mar Yomporpa' e'ñe pocte' enteneý. ¹¹ Yapa' yeñoteñ Yomporpa' ahuo't tantaterran Puechemer ñeñt Cristo Jesús po'rromñoñ. Ñaña ñerra'm Yompor Puecamquëñ yeçhena ya yeyochro, ama't arromña'teypa' yapa'çho'ña tantatuerreycha' yerromñoñ. Parets Puecamquëño'tña' yocrra'huerrach, ñeñtara Puecamquëñ ñeñt yeçheta te' yeyochro.

¹² Ñeñto'marña masheñesha ñaña noçhanesha, te'pa' añ e'ñe poctetsa o'ch e'ñe atet yepena ñeñt atet cotape'chateneý Parets Puecamquëñ, ama pocteyaye o'ch atet yepena ñeñt atet cotape'chateneý yechets. ¹³ Tarro'mar ñerra'm allo'na yocrra'nena ñeñt atet cotape'chateneý yechetspa' ñerra'm yerromapa' yeçhenca'huerrach yo'chñarot, tarraña ñerra'm Parets Puecamquëño't o'ch ya'ypo'ñerr ñeñt atet patse'tateneý yechetspa' yañapa' corretsayach.

Atto ñeñteý e'mñotene' ñeñt atet cotape'chateneý Parets Puecamquëñ, ñeñteýña'pa' o' po'ñoçh puechemer perrey Yompor

14 Tarro'mar allohueney ñeñtey e'mñotene' ñeñt atet cotape'chateney Parets Puecamquëñ, ñeñteyña' o' po'ñoçh puechemer perrey Yompor. 15 Ñeñto'marña amach alla yemcha'terrerro atet ñerra'mrrate' ñeñt ñañrets, atarrcha' mecha'tenan pamo'mte'. Tarro'mar yapa' allem-poteñ o' yaguërrñañ Yompor Puecamquëñ yañapa' o' puechemer perrey po'ñoçh. Ñeñto'marña amach yemcha'nañofoye' yema'yocheñoïpa' o'ch yëchore'ch, o'ch yoch: "Apa." 16 Tarro'mar ñeñtara Parets Puecamquëñ ñeñtña yeñotatene' yeyoçhro po'ñoçhpa' o' puechemer perrey Yompor. 17 Ñaña yapa' yeñoteñ atto o' puechemer perrey Yomporpa' yapa'cho'ña yagapapretercha' Cristo ora ñeñt allpon o'patatenya Yompor. Ñerra'm cho yemuroçhta Cristo'marecop'te', atet pe'tña atarr mueroçhte't ahuat aña patsro, esempohuañen yapa'cho'ña yecohuentapreterach.

Atto ama't yemuroçhetuanena aña patsro, ñeñtapa' ama esoye' yenteñe

18 Ama't yemuroçhetuanena aña patsro, ñeñtapa' ama esoye' nenteñe. Tarro'mar neñoteñ esempohuañenpa' elloçhña nanac yecohuentapretera Cristo. 19 Ama't ora allpon ñeñt yentyen arr patsro ñeñt yeçcatua Yomporpa' ñetpa'cho'ña elloña atarr cohueñet esempohuañencha' Yomporpa' orrtatuerreycha' ñeñtey o' puechemerasha' perrey, attoch allempochña o'ch yecohuentapretera Cristo. 20 Tarro'mar ahuat allempo atpare'te't Adán, Yomporña' ahuo't a'huañatan atto atarr sherbañ nanac ñeñt ora allpon pueyeçcatar. Allempoña' o'huañ tama sherba'. Tarraña pueyeçcatarpa' ama erro't po, tarro'mar atet muenen Yompor. Tarraña ama't atet panetaña' elloña te'pa' çhocma cohueñet attoch esempohuañen Yomporpa' o'ch alla a'cohuentatuerranet. 21 Tarro'mar ora allpon ñeñt yentyen aña patsropa' atet anaretet ñamet çhocmach mellasha'tuet, allempoña' o'huañcha' sherbet. Tarraña ñerra'm esempohuañencha', ñeñtey o' puechemer perrey Yompor o'ch yecohuentapretera Cristo, ñaña allempoña ora allpon Yompor pueyeçcatarpa' ñetpa'cho'ña o'ch alla a'cohuentataretetuerret ñamet. 22 Yapa' yeñoteñ ora allpon ñeñt yentyen aña patsropa' çhocma mueroçhe'tyenet ama't teme'tsen, tarro'mar ama a'cohuentataretterra'. Nanac llecanrroreyenet atet ñerra'mrrate' coyanesha' ñerra'm o' çhap allempoch cheyore'ten nanaccha' atsotenana pue'mar. Nanac llequëñtso'tsen tarremphuach allempoch eñalletatuan pue'mar. Allempoña' nanaccha' cosheñtso'tsen, tarro'mar o' eñalletatuan pue'maretoll. Atetcha' perraña ñaña Yompor pueyeçcatareçhno, nanaccha' cosha'rterret esempohuañencha' allempoch a'cohuentataretetuerret. 23 Ama ñapñayaya Yompor pueyeçcatar mueroçhtetso. Yapa'cho'ña çhocma yemuroçhetyena arr patsro, amach e'ñeye' yeñmateno yeyoçhro. Tarraña ama't atetpa' o' yechen Parets Puecamquëñ ñeñt yeçhetsa yeyoçhro ñeñt ñanom apueney Yompor, allotña' orameñ ñaña ñeñt o'patatenya pa'namen. Ñeñto'marña yeñoteñ esempohuañenpa' aphuerreycha' ora allpon ñeñt o'patatenya. Ñeñto'marña yecueñ esempohuañen Yomporpa' o'ch orrtatuerriyay ñaña atto yapa' o' puechemerasha' perrey. Allempoña ya yechetspa' apo'poñetuerriyaycha' attoçhña yecohuentapretera Cristo. 24 Allempoteñ o' yaguërrñañ Yompor Puechemer ñeñt Cristo yapa' yeyemteññaña ñeñt o'patatenya ñeñtcha' atet perrnay

esempohuañen. Ñeñto'marña allempoteñ o' ya'queshpataretterra
 čhocmach yecueñ esempohuañen allempoch a'po'poñetuernay yechets
 attochña yecohuentapretera Cristo. Po'ñočhpa' ama a'po'poñetuernaya'
 yechets, ñeñto'marña teme'ttsen yecueñ. Ñerra'm o' a'po'poñetuernayeñ
 yechetspa' allempoñapa' amate' palltenañe o'ch yeyemteññaña ñeñt atet
 muenateney ña. ²⁵ Tarraña ñerra'm čhocma yeyemteña Yompor ñeñt
 atet oteney yeñoteñ atetcha'ña perrnay esempohuañen. Ñehua, ama't
 ama orrtena', te'pa' yeyemteñoť ñapa' e'ñepa'chña yocsheñeshocmañen
 yecueñ. Amachña čha yemuenme'chatsche.

Atto enamuenay Parets Puecamquëñ Yomporshot

²⁶ Ñaña attecma Yompor Puecamquëñ ñach yeyenpuene' ñerra'm
 esempo ama erroť es apen yenteno. Ñehua, atet ñerra'mrrate' allempo
 yellquëñesha' yema'yochena ñato' ama yeñoteñe escha'ña yenamña
 Yompor ñeñt e'ñe pocte' enten ña. Allempoña Parets Puecamquëñpa'
 ñachña enamats yocop e'ñe puellcapreteñoťey ya, e'ñech pue'narña'teñoť,
 amach čhoye' eñoreno attoña enamatenay Yompor yocop. ²⁷ Tarraña
 Yomporpa' cohuenay allohueney ñeñt atet yoctape'chen yeyočro,
 ñeñto'marña ñapa' eñoteñ ñeñt atet enamuenay Puecamquëñ,
 tarro'mar Puecamquëñpa' añach enamuenay ñeñt e'ñe pocte' enten
 Yompor yocop ñeñtey o' pueyochresha' perrey Parets.

*Ñeñtey e'ñe eñotuaye't ahuat Yomporpa' ñapa' atarr cočhnesha'
 o'patatenya*

²⁸ Ñaña ama't es yehuapoya, yapa' yeñoteñ Yomporpa' ñach
 a'pocstatene' yocop, allohueney ñeñtey morrentenaya ña, ñeñtey
 acrareťey o'ch atet yepeññañ ñeñt atet muenen ña. ²⁹ Tarro'mar
 allohueney ñeñtey e'ñe eñotuaye't Yompor ahuat, ñeñteycha' ame'ñerraya
 esempo, ñaña'pa' cotape'che't ahuat yocop ñeñtcha' atet muenatey,
 allochñapa' yach cotape'cherrets cohuen attochña yeyečhquërra e'ñe
 ora atet ñerra'm Puechemer ñeñt Cristotets. Allochñapa' allohueney
 yepo'narcha' yepeñ Cristo ama't shontey ñeñtey ame'ñetsa. ³⁰ Ñehua,
 allohuen ñeñt atet cotape'che't Yompor yocop ahuatpa' allempoña
 ahuo't chap allempoch chore'terrey o'ch yame'ñera. Allochña
 ñeñtey ačhore'tareťeypa' ñaña'pa' oten yocop e'ño' pocte' enteney e'ñe
 yeyemteñoť Cristo. Allochñapa' allohueney ñeñtey e'ñe pocte' enteney,
 Yomporña'pa' oten yocop yecohuentapretero'ch Cristo esempohuañen.

³¹ Ñeñto'mar te'pa' o'ch notas, Yomporpa' atarr cohuen morrentenya.
 Ñaña yapa' yeñoteñ atto nanac morrentenya Yomporpa' ama't
 eseshapa' amach erroťenoť a'huañañperetoña atto morrentenya.
³² E'ñe puemorrenteñoťey ya ama't e'ñe ña Puechemerpa' ama
 mopa'tam̄pesye, elloña a'rroyonay Puechemer ñach rromosets yocop
 allohuenacpay. Atto atarr morrentenya attoña yapa' yeñoteñ elloña
 attecma esocmañencha' apa'yeney e'ñe allempoteñ apuerrey ñaña
 Puechemer Cristo. ³³ Ñeñtey acrerr Yompor ñeñteycha' puechemer
 perr, ama't esesha' muenenayeñ o'ch otteñe'chenyetañ, tarraña
 ñeñt'pa' ama esoye' yenteñe yocop, tarro'mar Yomporpa' oten e'ño'
 pocte' enteney. Amach erroťenoť esesha' yetsa'taterrayo yo'chñar,
³⁴ tarro'mar Cristo Jesús'pa' ña rromats yo'chñarecop, elloña ñaña

tanterrtsa po'rromñoĩ, ñaña te'pa' ña partsotapretenaya Pompopor
po'cohuenrot; alloteñña ñapa' eñorena yocop Pomporesho attoch es
e'ñe a'pocataennay. ³⁵ Atarr nanac morrentenya Cristo. Ama't eseshapa'
amach errotenot puerratañpesyetoña atto nanac morrentenya Cristo.
Ñaña ama't erroteno'tsenya amach huañerroña atto nanac morrentenya
Cristo. Ama'tcha' añ yeçhapoya mueroçhteñets, ama'tcha' nanac
llequëntso'tseney, ama'tcha' ñerra'm esempo pue'moñe'teñoçetay
cofare'tenyet, ama'tcha' ñerra'm esempo yepallta'yena ñeñtcha'
yerren, ama'tcha' ñerra'm esempo yepallta'yena ñeñtcha' yechorrena,
ama't ñerra'm esempo añcha'noçheno'tseney, ama'tcha' ñaña
allempoch muetsayet, amach errotenot puerratañpesyetoña atto nanac
morrentenya Cristo. ³⁶ Atetcha' perryetña ya esempo e'ñe atet anaret
Yompopor po'ñoño ñeñt aquellca'huaret ahuatoteñ. All anuaret ñeñt atto
puesheñarr ñeñt ame'ñatse'tpa' otane't Yompopor, ñeñt'pa' e'ñe atet ot:

E'ñe yame'ñeñoçep' papa' yellapene'tcha' e'ñe autsa yemtsanate' ñeñt
ye'moñe'tene'. Ñetpa' e'ñe amtsen entenyet e'ñe atet ñerra'm car-
rnero ñeñt çhocmach aneñet allcha' muetsanachet.

³⁷ Ama't yemueroçhetuahuapa' elloña nanaccha' ahuamencat
perrey Cristo ñeñt nanac amorrentña yenten. ³⁸ Ñeño'marña napa'
neñoçet, ñeñtey ame'ñenaya Cristo Jesús ñeñt Yepartseshar yepenpa'
ama't erroteno'tsenya amach errotenot huañerroña ñeñt atto nanac
morrentenya Yompopor. Ama't allempoch yerroma, ama't allempo
ñaña yocrenneñpa' çhocmachña morrentenya. Ama't Yompopor
po'mllañoçetñanashar ñeñt huetsa pue'ntañoçpa' amach errotenot
puerratañpesyetoña ñeñt atto morrentenya. Ama't ora allpon ñeñt
añcha'noçhetyetsa, ama't ñaña ora allpon ñeñt añcha'taretetyetsa
arr patsropa' ñetpa'çho'ña amach errotenot puerratañpesyetoña ñeñt
atto Yomporporpa' nanac morrentenya. Ama't ñeñtcha' yehuapoya te'
ama't ñaña ñeñtcha' yehuapoya tsapatonet, ñeñt'pa'çho'ña amach
errotenot a'huañañpesyetoña atto Yomporporpa' atarr morrentenya.
³⁹ Ama't errponenaparen yetuanena atarr eno, amapa' ñaña o'pono
patso ama't ñaña oño o'pono, allpa'çho'ña amach errotenot yesa'nmoña
atto Yomporporpa' nanac morrentenya. Ama't ora allpon ñeñt yeçcatua
Yompopor añe patsropa' ñetpa'çho'ña amach errotenot a'huañañpesyetoña
ñeñt atto nanac morrentenya Yompopor, allohueney ñeñtey ame'ñenaya
Puechemer ñeñt Cristo Jesús ñeñt Yepartseshar yepen.

9

*Atto Pablopa' atarr llequënana pamo'tsna'tarnesha' ñeñt israelnesha'
ñeñt acrañ Yompopor ñeñtcha' pueyochresha' pañ*

¹ Ñaña ñeñtcha' notas te'pa' ñeñt'pa' e'ñe po'ñoçh atet, ama çhoye'
neshquëno, tarro'mar napa' o' name'ñera Cristo. Ñaña Parets
Puecamquëñ ñeñt yeçhetsa neyoçhro, ñeñtña e'ñe eñotenen ñeñtcha'
atet notas ñeñt'pa' e'ñe po'ñoçh atet. ²⁻³ Napa' atarr nanac nellquëña
nemo'nasheñnesha' ñeñtara judionesha' tarro'mar ñetpa' shontetañpa'
ama ame'ñeñeto Cristo. Ñeñtana nenen neyoçhro atto atarr nellquënanet.
Ñerra'm errotenot na'queshpatanet o'te' na'queshpaterranetañ. Ama't
poçte' nenteñeñ o'ch na'cmarettañ nañeña attoch nechanquërra
allochñapa' amach nentere Cristo, ñerra'm atet neçapa' ñetpa' ñato'

o'te' na'queshp̄aterranetañ. Tarraña ama't atet neḡatstañpa' amach errotenot na'queshp̄aterraneto. ⁴ Ñaña namo'tsesha' judionesha' ñeñtara israelena'tarnesha' ñeñt̄ acrañ Yompor ahuat̄ ñeñt̄cha' puechemeresha' ḡañ, ñaña ñetpa' ḡocma entoñetañe't̄ Yompor po'partsoña ahuat̄. Ñaña ñet Yomporpa' ḡocma a'pocatanetañe't̄ ahuat̄ attoch ḡocmach a'natenanet. Ñaña ñetpa' apanetañe't̄ Yompor po'ñoñ ahuat̄, ñeñt̄ña eñotatahuete't̄ ñeñt̄ atet pocte' enten Yompor. Ñaña ñeñtara judionesha' ñeñt̄ eñotaye't̄ attoch nanac e'ñe coḡhnesho't̄ sherbeñetañ Yompor pa'paclo. Ñaña ñeñtara judionesha' Yompor ahuat̄pa' ahuo't̄ otanetañ ñeñt̄cha' atet apuerranet esempohuañen. ⁵ Ñaña ñeñt̄ ñanom yamo'mtayñeneshañ* yepe't̄ ñeñt̄ nanac sherbaye't̄ Yompor ahuat̄pa' ñetpa' ñeñtara judionesha' pamo'tsna'tarneshañ. Ñaña ama't̄ judiona'taresho't̄pa' ahuo't̄ eñalletosa Cristo arr patsro ñeñtara ñeñt̄ nanac Partso'tets ñeñt̄ pomnaren pene' allohuen esocmañen. Ya'ye'choḡhtatoñepa'ch tayoteñ ama't̄ errponohuañen. Ñeñt̄pa' attepa'ch Nompore.

⁶ Tarraña ama't̄ allohuen judionesha'ña ama't̄cha' ama ame'ñereto Cristopa' Yomporñapa' amach errotenot huañerroña po'ñoñ ñeñt̄ atet otanete't̄ ahuat̄; ñeñt̄pa' ḡocmach etsota ñeñt̄ atet otanet, tarro'mar ñapa' ama puenesho po'ñoñ. Ñaña allohuen ñeñt̄ israelena'tarpa' ama allohuenacmayer' Yomporena'tareyayeto. ⁷ Ñaña ora allpon po'ñrenña Abrahamapa' ama allohuenacmayer' po'noḡ Abraham puechemer entapreteñe Yompor. “Aña e'ñe puechemer entapreteñ Yompor ñeñt̄ Isaac po'ñrenña”, ñeñt̄ atet otan Yompor Abraham ahuat̄. ⁸ Ñeñto'marña yeñoteñ allohuen Abraham po'ñreneñpa' ama allohuenacmayer' po'ñoḡ puechemer penaneto Yompor. Añachña puechemer pen ñeñt̄ yemtenaya Yompor ñeñt̄ atet otenanet. ⁹ Ñehua, yapa' yeñoteñ atet ahuat̄ Yomporpa' otan Abraham ñeñt̄cha' aḡ, ñeñt̄pa' atet ot: “Tsapa't̄ charo atet ñerra'm te' añempo, o'ch nohuerra allempoñapa' pe'tapor Sarapa' cheyore't̄cha' ñeñt̄pa' asheñorrcha' ñeñt̄cha' Isaacatats.” Arrpa' allohua ñeñt̄ atet Yomporpa' otan Abraham.

¹⁰⁻¹³ Elloña te'pa' o'ch alla neyerpaterr̄serr atto yatañ Isaacpa' ahuo't̄ yoran Rebeca ñeñt̄cha' puetapor ḡa'. Ñaña allempo Rebecapa' totana Isaac puechemer ñeñt̄ epuesha' Yomporñapa' otan Rebeca, atet och: “Ñeñt̄cha' eñalletatsa ñanom pechoyorpa' añcha' pomnaren pene' ñeñt̄cha' eñalletatsa chenta'.” Arrpa' allohua ñeñt̄ atet Yomporpa' otan Rebeca. Ñaña allempo ama eñalletena' puechyoresha' Yomporñapa' ahuo't̄ ye'choña pa'terr puechoyor ñeñt̄ muenen ña, ama't̄ allempopa' ama es yeḡcateneta' ama't̄ ñeñt̄ cohuen enten Yompor amapa' ñeñt̄ ama cohuenayaye. E'ñe atta ahuo't̄ ye'chana puesheñarr ñeñt̄ muenen ña; cheshatollpa' ama pueyeḡcateñofeye' cohuen ye'chyoña Yompor; tarro'mar cheshatollesha'pa' ama es yeḡcateneta' ama't̄ coñe'ta. Attoña ahuo't̄ etsota Yompor po'ñoñ ñeñt̄ atet aquellca'huare't̄ ahuatoteñ, ñeñt̄pa' atet oten Yompor: “Jacobpa' atarr nemorrenteña, pa'mo'nasheñña Esaúpa' ama tama nemorrenteño.” Atet ḡa attoch yeñoch Paretspa' ña acrañtetsa ñapue't̄ añecop ñeñt̄ e'ñe ye'chena ña.

* 9:5 Pablo otatse't̄ yamo'mtayneshañ tarro'mar ñapa' judionesha'.

Atto Yomporpa' e'ñe pocte' entan o'ch puechemer ñan ñaña ñeñt ama judioneshayaye

¹⁴ Te'ña ñato' sapa' çhate' sotenapañ ñeñt atet ote't Yompor, ñeñtpa' amate' pocteyaye. Tarraña o'ch notas ñeñtpa' e'ñe pocte' atet ote't Yompor. ¹⁵ Tarro'mar yapa' yeñoteñ atet Yomporpa' otan ahuat Moisés, ñeñtpa' atet och: "Ñerra'm esesha' neye'cha na ñeñtcha'ña neyenpa'. Ñaña ñerra'm esesha' neye'cha na ñeñtcha'ña atarr nemorentena." ¹⁶ Ñeñto'marña yapa' yeñoteñ ñerra'm esesha' muenen Yompor ñeñtcha'ña a'natena, ñeñtpa' e'ñe pocte'. Ñeñtpa' ama añoŕeyaye ñeñt atet yemnen ya acheñey, ñaña ama ya'mueroçhtame'teñoŕa ye'chenyoña Yompor. E'ñechña puemuereñoŕa ye'chenana erra'tsen muenen ña. ¹⁷ Ñaña yeñoteñ ñeñt atet Yomporpa' otan ahuat ñeñt añcha'tarettatse't Egipto. Ñeñtpa' atet otan añcha'taret Faraón: "Na pene', ñeñteŕ añcha'tarettetsa, attoch peshoch norrtat nehuamenc acheñeneshesho. Attochña ñetpa' o'ch serrpare'tyesonet erracmañen atto na ñeñten nanac ahuamencattetsa." ¹⁸ Ñeñto'marña yapa' yeñoteñ ñerra'm esesha' muenen Yompor o'ch a'natanetpa' ñeñtcha'ña a'natena. Ñaña ñerra'm esesha' muenen Yompor o'ch echartenet pueyoçhreto, ñachña muenatenahuet.

¹⁹ Te'ña ñato' sapa' çhate' sotenapañ: "Ñerra'm Yompor ñach yemnatene' ñeñt e'ñe atet muenen ñapa', yapa' amach erroŕ yepe, ñeñto'marña amate' pocteyaye o'ch enteney yapa' amo' cohuenayaye, ñerra'm ña yemnatatene' o'ch es atet yeŕa." Ñato' sapa' atate' soçtape'çhatse'tyen seyochro. ²⁰⁻²¹ Tarraña masheñneshacha' ñaña noçhaneshacha', o'ch notas, Yomporpa' ama asasare'tpahuoyaye. Ñato' o'ch netma'ntatasa atet: Ñato' esesha'pa' o'ch yeçcatan coyemñ ñeñt patsrro'. Ñeñt e'ñe atet muenen ña, ñapa' ñeñtcha' atet yeçcat. Ñato' o'ch yeçcatan eprroga coyemñ, puerrogarrpa' atarrcha' cohuen, e'ñech cohuenoŕ sherbenan pamo'mte'. Alloñapa' ñeñt a'pchat patspa' o'ch alla yeçcaterranerr po'prroguẽñ puecoyemñ. Ñato' ñeñtpa' amach tama cohuenaye' pe, tarro'mar ñeñt yeçcate'pa' ama mueno o'ch orrtach acheñeneshesho. Tarraña coyemña' ñerra'm eñoreñaña' amach sasare'tanoña pamo'mte', amach oche: "Eso'marte' peyeçcaten atet, ama cohuenaye' peŕa'no." Tarro'mar ñerra'm pamo'mte' muenets atetcha' ñan puecoyemñ, coyemñapa' amach erroŕ es po. Ñeñto'marña yeñoteñ Yomporpa' ama't erroten muena' o'ch atet ñonay, ñeñtpa' e'ñe pocte' ñocop, tarro'mar Parets añecoppa' ña otets ñapueŕ. Ñaña yapa' amach yesasare'che, tarro'mar Paretspa' ama asasare'tpahuoyaye.

²² Ama't atteñpa' elloña Yompor ahuatpa' atarr ahuantane't atto nanac atpare'che't ñeñt o'pate't chenuẽnets. Ñerra'm ña muenatseñ e'ñe poctet attoch tsa'taterranetañ e'ñe allempocma po'yoroçhenñoŕ. Attochña entatanetañ po'huamenc tarraña ama atteye' ñaneto, atñañ ahuantanete't po'chñaret. ²³ Allochñapa' attoch esempopa' çhap o'ch orrtaterrnay allohueney po'cohuenña, ñeñtey o' muererrya yaña, ñeñtey ahuat Yomporpa' coçtape'chonaye't yecohuentapretero'ch esempohuañ. ²⁴ Ateñ ñerra'm ya ñeñtey judioneshay, ama't ñaña ñeñt ama judioneshayaye, tarro'mar ama judioneshayaya ñapueŕ çhore'tenoña Yompor ñeñtcha' ame'ñaya. Allohueneyña te'pa' o' çhore'terrey o'ch e'ñe

yame'ña'huera. ²⁵ Ama't atet ote'teña Yompor ahuat, allempo otan Oseas ñach serrpare'te' ñeñt atet och Yompor, ñeñtpa' atet ot Yompor:

Ama't ñeñt ama nechemereyaye te'pa' tsapatonetñapa' e'ñech nechemer nepohuerranet. Ama't po'poñ acheñ ñeñt ama nemorrenteno te'pa' tsapatonetñapa' e'ñech nemorrentuerranet ñamet.

²⁶ Ama't e'ñe all ahuat Yomporpa' otanete't: "Sapa' ama nechemereyaysa", te'ña allpa' o'ch eñotueret, te'ñapa' e'ño' puechemerasha' o' pohuerranet Yompor, ñeñt Yompor ñeñt ama arromñafeshayaye ama't ahuata.

²⁷ Elloña Isaías ñeñt a'mtaye't Yompor po'ñoñ ahuatpa' ñapa'cho'ña atet eñose't, ñeñtcha' atet perra israelena'tarnesha', ñeñtpa' atet ot: "Israelena'tarnesha'pa' merenach nanac shonte' atet ñerra'mrrate' atet yenteññañ ontap po'mñer nanac shonte'. Tarraña ama'tcha' shontetañpa' amachña allohuenacmaye' a'queshpataretterreto; patanta'ttsachña ñeñtcha' a'queshpataretterrtsa. ²⁸ Tarro'mar

Yomporpa' e'ñech tsa'tatuerrana shonte' acheñ arr patsro ñeñt atet otane't ñeñt e'maye't po'ñoñ. Amach allo'na ahuañta'nenaneto po'chñar." ²⁹ Ñeñtpa' e'ñech atet perra ñeñt atet ote't Isaías, ñeñtpa' atet ot:

Ñeñt nanac Paretspa' ahuo't a'queshpaterrey ama't puesheña'ttso'teya. Ñerra'm ama atet pa'yeñepa' allohueneypa' e'ñech yoclla'huerrañ e'ñe poctacma, atet panet ahuat allempo a'clatuare'tta allohuenet ñeñt ye'chatse't añetso Sodomo ñaña Gomorro.

Arrpa' atto Yomporpa' ama pocteye' entenano judionesha'

³⁰ Ñeñto'marña te'pa' yeñoteñ acheñenesha' ñeñt ama judioneshayaye ama't ama e'neñeto attoch e'ñe pocte' entanet Yomporpa' ñetñapa' ahuepa't enteret ñeñt e'ñe atto pocte' enteney Yompor allohueney ñeñtpa' ñeñtña atto yeyemteña ñeñt atet oteney Yompor. ³¹ Tarraña judionesha' ama't e'neñetañ attoch pocte' entenanet Yomporpa' tarraña ñetñapa' ama entereto, tarro'mar aña e'ñe yemtenet o'ch e'ñe etsotuetañ ora allpon ñoñets ñeñt atet anarettenet; tarraña ama es etsotuenaye ora allohuen. ³²⁻³³ Yeñoteñ ama enterreto attoch pocte' entenanet Yompor, tarro'mar ama yemteñeto Yompor ñeñt atet otenanet. Ñetpa' aña e'ñe yemtenet o'ch ye'chatyenet ñeñt e'ñe cohuen entenet ñet. Ñeñtpa' e'ñe atet pohuet ñeñt atet oten Yompor po'ñoñ, ñeñt anuaret ahuatoteñ, ñeñtpa' atet ot Yompor ahuat:

Napa' o'ch nemñanet puesheñarr ñeñtcha' atarr sherberrets all añetso ñeñt pa'so'cheñ Sión ñeñtara Jerusalén. Tarraña ñetpa' chach tsena'chet. Puetsena'teño'tetpa' o'huañ yemtenanet ñeñt atet noctape'chatanetañ. Tarraña ama't erra'tsena ñeñtcha' ame'ñerraya ñapa' ñetñapa' ellopa' amach alla es e'nerrete'te.

Ñeñtpa' atet toma'ntachet ahuat: Cristopa' ñach anarettatsa arr patso atet ñerra'mrrate' mapue' ñeñt atarrcha' sherben. Tarraña judionesha'ñapa' ama asherbenaye' eñcheto ama't mamesha, cha ottet ñerra'mrrate' atta epoto'tatse'tyeset ñesho ñeñt atma'ntataret mapue'.

10

¹ O'ch masheñeshacha' ñaña no'chaneshacha' notas, napa' neyo'chrocmañen nemneñ namo'tsesha' ñeñtara israelena'tarpa'

o'te' qushpa' huerret ñamet. Ñeñto'marña ñocueta' chocma nema'yochampananet Yompor. ² Napa' neñotenetañ e'ñe po'ño'ch mueneñetañ o'ch e'ñe sherberet Yompor, tarraña ama't atet muenenetañpa' po'ño'chpa' ama chenaneñoña pueyo'chreto ñeñt' po'ño'ch atet muenen Yompor. ³ Po'ño'chpa' ama chenaneñoña pueyo'chreto ñeñt' atet muenen Yompor atet'cha' ye'pa attoch pocte' enteney ama't e'ñe allohueney. Ñetpa' otenapuetañ e'ñe pueye'chcateño'et ñeñt' cohuen entenet ñetpa' Yomporñapa' pocte'te' entapretenanet. Elloña ñetpa' ama mueneñeto o'ch yemterrñañet ñeñt' atet oteney Yompor, ñeñt'cha' attoch e'ñe po'ño'ch pocte' enterrey ña. ⁴ Tarro'mar te'pa' o' huapa Cristo ñaña atet oteney Yompor ñerra'm yame'ñerrñaña Puechemer ñeñt' Cristotetspa' attochña e'ñech pocte' enterreyña, ama't erra'tsena ñeñt'cha' ame'ñerraya. Allochñapa' o'huañcha' aña yeyemtena o'ch atet yepohuen e'ñe cohuen ora allpon ñoñets ñeñt' atet anaret attochña pocte' enterryeñ Yompor.

Arrpa' attoch e'ñe pocte' enteney Yompor ama't eseshaya

⁵ Ama't Moisés'pa' atet ote't ahuat: "Ñerra'm yepohuenach e'ñe poctacma ñeñt' atet anaret'pa' esheccha'ña corretsayach errponohuañen." ⁶ Tarraña attoch po'ño'ch pocte' enteney Yompor ñeñt'pa' e'ñech yeyemteño' ña ñeñt' atet oteney: "Amach yoc'tape'chatsto yeyo'chro, ñato' este' yepalltena tarro'mar ama yepallteno o'ch ahuey ento attoch ya'suater Cristo arr patsro. ⁷ Amaña yepallteno o'ch ahuey ñaña arromñañeshesho ñeñt' o'pono'tsa'yen patso o'ch yetantatera' Cristo tarro'mar ñapa' ahuatoteñ o' tanterra, ama arromñañesho'tsenayaye." ⁸ Tarro'mar Yompor po'ño'ñpa' atet oten: "Añ cohuen ñoñets alloch yequshperra, ñeñt'pa' ama torrapahuoyaye attoch yenter, tarro'mar ñeñt'pa' e'ñe yesho'tsen. Ñaña ama echarroyaye attoch ye'ñoroña, tarro'mar ñeñt'pa' e'ñe yeyo'chro'tsen." Ñeñt'pa' ñeñt'ara ñoñets ñeñt' o' neserrpare'tatas atet añ poctetsa o'ch yame'ñera Cristo. ⁹ Tarro'mar ñerra'm cho ye'ñorena atto Jesús'pa' Yepartseshar yepeñ, ñaña ñerra'm e'ñe yeyo'chrocmañen yame'ñeña atto Yomporpa' ahuo't tantater po'rromño'tpa', allochñapa' yapa'cho'ña a'qushpataret'eycha'. ¹⁰ Tarro'mar ñerra'm yame'ñera Cristo yeyo'chrocmañen, Pomporñapa' e'ñech pocte' enteney, ñaña ñerra'm cho'chña ye'ñorena atto o' yame'ñera Cristo, attochña yapa' a'qushpataret'eycha'.

¹¹ Ñaña Yompor po'ño'ñ ñeñt' aquellca'huaret' ahuatoteñ, ñeñt'pa' atet oten: "Ama't erra'tsena ñeñt'cha' ame'ñerraya Yomporpa' ñetña ellopa' amach alla es e'nerrete'te." ¹² Tarro'mar ama judioneshayaya ñapuet' ame'ñenayoña Yompor. Ama't ñeñt' ama judioneshayaye, ñetpa'cho'ña attecma ame'ñeñet Yompor. Tarro'mar e'ñe patra Yepartseshar ñeñt' e'ñe allohuenacpay. Shonte'ch esocmañen apa'yesuay ama't eseshaycha' ñeñt'ey enamuene'. ¹³ Tarro'mar atet oten Yompor po'ño'ñ: "Allohuenoteypa' ama't erra'tsenoteta chore'te' Yompor pueyo'chrocmañen attoch a'qushpataret'terret'pa' Yomporñapa' a'qushpaterranetcha'." ¹⁴ Tarraña amach erro'tenot' yechore'cheña Cristo ñerra'm ama cho yeyemteño. Ñaña amate' erro'tenot' yeyemteroña ñerra'm ama es ye'mare'tperro Cristocop. Ñaña amach erro'tenot' ye'mare'che ñerra'm ama eñalle ñeñt'cha' a'pote' po'ño'ñ. ¹⁵ Ñaña amach

errotenoŧ a'poteññañetoña Yompor po'ñoñ, ñerra'm ama ña llesense-nahueto. "Nanac cosheñtso'tseney ñerra'm esempo huapa ñeñtcha' a'potose' cohuen ñoñets ñeñt huetsa Yomporeshoŧ alloch yocsherra e'ñe cohuen yeyoŧhro." Añpa' allohua ñeñt e'ñe atet aquellca'huaret Yompor po'ñoño ahuatoteñ.

16 Tarraña ama't ñeñt pue'maran Yompor po'ñoñ amaña allohuenac-maye' ame'ñereto añ cohuen ñoñets ñeñt huetsa Yomporeshot. Ama't atet ote't Isaiás ahuat, ñeñtpa' atet ot: "Ama Nompore eseshaye' ame'ñenayo ñeñt atet o' neserrpare'tatuanet." Arrpa' allohua ñeñt atet ote't Isaiás ahuat. 17 Tarraña ama't atteñpa' elloña napa' o'ch notas, e'ñe yeserrpare'teñoŧ Cristo po'ñoñ, acheñenesha'ñapa' o'ch e'mñoteñet. Allochñapa' e'ñe pue'mñoteñoŧetpa' o'ch ame'ñeret Cristo.

18 Ñato' sapa' çhate' sotenapañ judionesha'pa' ñato' amate' pue'mareto añ cohuen ñoñets ñeñt huetsa Yomporeshot. Tarraña napa' o'ch notas, po'ñoçhca'ye pue'maret tarro'mar atet oten Yompor po'ñoñ:

Ñeñt a'potene' Yompor po'ñoñpa' o' eñotatyeset erracmañen arr patsro, o' epa'huamocha Yompor po'ñoñ erraparen.

19 Te'ña sapa' ñato' çhate' sotenapañ judionesha' ñeñtara israelena'tarpa' ñato' amate' çhenaneto pueyoçhreto ñeñt atet cotape'chen Yompor. Tarraña napa' o'ch notas, po'ñoçhca'ye eñoteñetañ Yomporñapa' o'ch ame'ñaterrana ñaña po'poñ acheñ ñeñt ama judioneshayaye. Ñehua, ñanompa' o'ch neyerpaterrsa ñeñt atet ote't Moisés. Moisés ahuatpa' ahuo't quellcanet añ ñoñets ñeñt atet och Yompor, ñeñtpa' atet ot Yompor:

Napa' o'ch name'ñatera po'poñ acheñenesha' ñeñt sapa' atta senteñ atet ñerra'mrrate' ama nechemereye' nepenaneto ñaña atta senteñ ñerra'mrrate' ama es eñoteneto. Tarraña napa' o'ch name'ñaterranet ñetpa' sañapa' e'ñe sempa'teñoŧenpa' o'ch se'moñe'terranet, tarro'mar allempo ñetpa' o'ch nechemerasha' neperranet ñamet. Arrpa' allohua ñeñt Moisés po'ñoñ ñeñt atet och Yompor ahuat.

20 Alloŧpa' ñaña Isaiás ahuat ñañaapa' ama mecha'tenano judionesha'. Ñapa' ahuo't eñotatanet ñeñt atet och Yompor, ñeñtpa' atet ot Yompor:

Po'poñ acheñ ñeñt ama judioneshayaye ama't ñetpa' ama eseshaye' ne'nenaye, ñetñapa' o' enterrnet. Ama't ama eseshaye' na'pŧo'tenaye errotenente'ña na ñeñt atet nepena, tarraña nañapa' o'ch neñotaterranet ñeñt atet nepena.

21 Ñaña elloneŧ Isaiásapa' serrpare'te't atetcha' perra judionesha' ñeñt atet eñorena Yompor ñocpuet, ñeñtpa' atet ot Yompor: "Napa' nellapene'tcha' çhore'tame'tene' añ acheñeneshar attoch ñetpa' o'ch ame'ñerrnet. Tarraña amachña eseshaye' name'ñenayo, çhachña po'poñ entuennet allohuenet."

11

Atto judionesha'pa' a'ypo'ñareñtenetañ, tarraña ama poctacmaye' a'ypo'ñenanetoña Yompor

1 Tarraña ama't atteñ, napa' o'ch notas, po'ñoçh Yomporpa' ama e'ñe poctacmo' a'ypo'ña'huerrano pueyoçhreshaçhno, ñeñtareta ñeñt et israelena'tarnesha'. Atet ñerra'm na, napa'çho'ña israelena'taren

tarro'mar napa' po'mrenñen Abrahamañ ñeñtara Benjamíñeñ mereñtsoren. ² Yomporpa' ama a'ypo'ña'huerrano pueyochreshačhno. Ñetpa' e'ñe eñotuanete't ahuat ñeñtcha' pueyochreneshačhno p̄a'. Ñaña napa' neñoteñ amach a'ypo'ña'huerraneto, tarro'mar ñeñt̄pa' atet aquellca'huaret Yompor po'ñoño ama't ahuatoteñ. Sapa' ama't seyerpuenoña ñeñt̄ atet pe't Elías ahuat. Ñapa' ahuo't otteñe'chan israelnesha' e'ñe puema'yocheñof Yompor. ³ Ñeñt̄pa' atet otan Yompor ahuat: "Nompore, namo'tsesha' ñeñtara israelena'tarpa' epaye' muetsanatennapet ñeñt̄ p̄a'mtene' peñoñ. Ama't ñaña Nompore ñeñt̄ altar ñeñt̄ allot yeshervenpeñpa' o' e'ñe tore'tatuonapet. Ama't napa' o' e'ñe naptam̄a ñeñfen p̄ame'ñenaya. Ama't te' Nompore napa'čho'ña o'patennet ahuo'ch muetsanet nam̄a." Arrpa' allohua ñeñt̄ atet otteñe'chane't Elías pamo'tsesha' Yomporesho ahuat. ⁴ Arrñapa' atto eñorana'tana Yompor Elías ñeñt̄pa' atet och: "Amaca' p̄aptayaya ñeñt̄ep name'ñenaya, elloña eñallmeñ cančhroch mil israelena'tarnesha' ñeñt̄ name'ñenaya ñeñt̄ ama concorpana'tenana' ma'yochaya ñeñt̄ ayečhcataret ñeñt̄ sochenet Baal. Ñetñapa' nenenanet ellonet nocop." Arrpa' allohua ñeñt̄ atet neyerpatensa atet ote't ahuat Yompor allempo eñorana'tana Elías. ⁵ Ñaña atet ñerra'm te'pa' attecma pena Yompor. Ama allohuenacmaye' a'ypo'ñenanetoña Yompor. Ñaña'apa' ama't puesheña'ttsapa' ahuo't ye'cherranet allochñapa' attochña e'ñe puemuereño'fanetpa' o'ch a'queshp̄aterranet. ⁶ Tarraña e'ñe puemuereño'fanet ahuo't a'queshp̄atanet. Amaña añoteyaye atto cohuen es yečhcatyenet ñet. Tarro'mar ñeñt̄ cohuen yečhcatyenet ñerra'm allo a'queshp̄atenetañpa' Yomporña puemuereña'p̄a' amate' a'queshp̄atañeye' yenteñe.

⁷ Ñeñto'marña yeñoteñ, israelena'tarpa' ama allohuenacmaye' enterreto ñeñt̄ e'nenet. Ñehua, ñeñt̄ e'nenetpa' ñeñt̄pa' attoch e'ñe pocte' enterranet Yompor. Puesheña'ttsa enterre' ñeñt̄ ye'chena Yompor. Tarraña po'potantañña'p̄a' ama enterreto ñeñt̄ atet muenen Yompor ñeñt̄ attoch e'ñe pocte' entuerrey tarro'mar ñetpa' čhocma echarrtanet pueyočhreto o'ch pet ñeñt̄ atet muenen Yompor. ⁸ Ñetñapa' o' e'ñe atet p̄ohuet ñeñt̄ e'ñe atet anuaret Yompor po'ñoño ama't ahuatoteñ. Ñeñt̄pa' atet oten: "Yomporpa' ñach ama muenatahueto o'ch es čhaphuet pueyočhreto. Ama'tcha' čho es entenetañ ñeñt̄ atet pena Yomporpa' amach čhenaneto pueyočhreto ñeñt̄ atet muenen Yompor. Ñaña ama'tcha' e'mñoteññañetañ Yompor po'ñoñpa' amach čhapaneto pueyočhreto ama't ahua'ta ñeñt̄ atet muenen Yompor. Ama't teme'ttsenpa' attecma penet." Arrpa' allohua ñeñt̄ atet ote't Isaiás ñeñt̄cha' atet perra judionesha'. ⁹ Elloña Davidpa'čho'ña ñapa' atet ote't ahuat, ñeñt̄pa' atet ot:

Judionesha'p̄a' nanac a'nateña Yompor. Shonte' esocmañen echenet ñeñt̄ alloch rrallme'chapretannenet. Tarraña ñeñt̄pa' čha shequënanet tarro'mar ñetpa' otenapuetañ Yomporpa' e'ñe'fe' pocte' entenanet. Tarraña ñeñt̄pa' ama atteyaye. Ñeñt̄pa' ñeñt̄cha'ña a'chencaterrahuet. Attoch e'ñe tsa'tatuerranet.

¹⁰ Ellopa' alla otterrerr David ñocpuet, ñeñt̄pa' atet ot:

Arepa'ch es čhaphueto pueyočhreto ñeñt̄ atet muenen Yompor,

attetach ñerra'mrrate' aporo'yet ñeñt amach enteno. Chocmuepa'ch amuerochtatarettenet e'ñech attet ñerra'mrrate' eñerr a'mo'ca'nenahuet ñeñt nanac amuerochtatañ.

Atto Yomporpa' a'ypo'ñaneñ judionesha', ñeñtpa' añecop attoch a'queshpatterran ñaña ñeñt ama judioneshayaye

¹¹ Tarraña ama't atarr atpare'tena judionesha', napa' o'ch notas, amach e'ñe a'ypo'ña'huereto poctacma Yompor. Tarro'mar e'ñe patpare'teñoŕet ñetpa' attoña Yomporpa' ahuo't ame'ñaterrana po'poñ acheñ ñeñt ama judioneshayaye attoch a'queshpatterranet ñamet. Attochña judionesha'pa'cho'ña e'ñe puempa'teñoŕet Yomporpa' ñato' o'ch alla ame'ñeret Yompor e'ñe cohuen. ¹² Atto atpare'tenan judionesha' Yomporpa' po'poñechnoña acheñenesha' arr patsropa' ahuo't chap Janet attoch ame'ñeret ñamet Yompor. Ñehua, atto ama't patpare'teñoŕetpa' yenpueñet po'poñ acheñ ñeñt ama judioneshayaye, yapa' yeñoteñ esempohuañen allempoch alla ame'ña'hueret Yomporpa' elloña pame'ña'hueñoŕetpa' nanaccha' yenpueret po'poñ acheñ ñeñt ama judioneshayaye.

¹³ Ñeñtpa' atet notenes ñeñtes ama judioneshayayso tarro'mar napa' allsensareten nach serrpare'tene' Yompor po'ñoñ socop ñeñtes ama judioneshayayso. Ñeñto'marña napa' nocshena, atarr cohuen asherben nenteñ ñeñt atet llesensenen Yompor. ¹⁴ Tarro'mar allochñapa' attoch name'ñatera ñeñt ama't ama judioneshayaye. Attochña ñato' judionesha' ñeñt e'ñe namo'tsna'taranetpa' e'ñe puempa'teñoŕet Yomporpa' o'ch alla mueneret o'ch ame'ñerret ello atet sepena sa. Allochñapa' attochña a'queshpataretterret ñamet, ama't puesheña'ttsota. ¹⁵ Tarro'mar ñeñt atto Yomporpa' ahuo't a'ypo'ñan judionesha', ñeñtpa' añecop attoch amo'tsterrana po'poñechno acheñenesha' arr patsro ñeñt ama judioneshayaye. Ñaña yapa' yeñoteñ ñerra'm esempohuañen allempoch judionesha'pa' o'ch alla ame'ña'hueret Yompor, attochña o'ch alla aguërranet; ñetña allempopa' chach otterret ñerra'mrrate' rromot o' tantuerret. ¹⁶ Tarro'mar atto ñeñt ñanom judioneshatatset ahuaŕpa' ñetpa' anarettete't Partsocop, allochñapa' po'ñrenñenesha'pa'cho'ña ñetpa' acraretterretcha' ñamet e'ñe attecma. Ñato' o'ch yetma'ntacha atet pete't ahuaŕ pocrramñ ñeñt nete't Partsocop. Ñeñt ñenma't pocrrametpa' ahuo'ch yoreñet coñe't ñeñt nanac cohuen ñeñtcha' nenet Yomporecop. Ñaña atto ñeñt ñanom pocrramñ yorenet Partsocoppa' ñeñtpa' e'ñe cohuen, añña allot yoret pocrrametpa' ñeñtña pocrramet orapa' e'ñech cohuenare'. Ñaña ñato' o'ch yetma'ntacha po'poñ ñeñt atet pena tsachrech. Ñehua, ñerra'm erra'tsen tsach ñerra'm puerchochno e'ñe cohuenare' puetacrechnopa'cho'ña e'ñech cohuenare'.

¹⁷ Te'pa' ñeñtes ama judioneshayayso napa' o'ch notas, Yomporpa' ahuo't ellopa'tetstatan patantarr judionesha' ñeñt atpare'tene' ña. Allochñapa' attoch sapa' o'ch separrocmaterr epas ñeñt ame'ñenaya Yompor. Ñato' o'ch netma'ntacha atet pena tsach ñeñt otenet olivoch. Ñehua, judionesha'pa' ñetpa' attet ñerra'mrrate' olivoch ñeñt e'ñe cohuen narmets. Tarraña ñato' ñeñt allpon puetaquërpa' ahuo't pecha'tamŕset ahuo't huapore'chet. Allochñapa' attoch a'tapa'llateret epuet ñeñt puetsato'mar olivochtaquër ñeñt ama narmetsoyaye. Sa

ñeñtes ama judioneshayaysopa' sapa' aña puetaquër sepene' ñeñt puetsato'mar olivochtaquër. Te'ñapa' o' a'tapa'llataterret olivochtacro allot apecha'taret ñeñt ahuapore'taret. Allochñapa' attochña sapa'cho'ña o'ch separrocmaterr epas ñeñt ame'ñenaya Yompor, ña'ña attoch sagapapreter Yompor pa'ñateña ñeñt atet otane't Yompor judionesha' pa'tañeshañ ahuat. ¹⁸ Tarraña ama't atteñpa' sapa' amach sañeña nanac asherben sentatsterro. Ña'ña amach sotatsto o'huañte' sherbenña añ judionesha' ñeñt toma'ntenaya olivochtaquër ñeñt ahuapore'taret, tarro'mar sapa' señoche'ch allotca'yeña huenaña sa sehuamenc tsachre'hot ñeñt atma'ntataret judionesha' pa'tañeshañ ahuat. Ama atteyayso ñerra'm ñeñt e'ñe puetacres o'ch ahuamencat sepoñ puerech, tarro'mar ama atteyaye, puerechña e'ñe ahuamencat sepene'ña sa.

¹⁹ Ñeñtes ama judioneshayayso, sapa' çhate' sotenapañ so'te'ña nanac sherbets ñeñto'maro' Yomporpa' ahuo't pecha'tam'psan judionesha' olivochtacro't allochñapa' atto'ch sapa' o'ch e'ñe separrocmaterr. ²⁰ Tarraña napa' o'ch notas, ama't po'ño'ch o' a'ypo'ñare'tta judionesha' añecopña a'ypo'ñare'tterret e'ñe patpare'teño'fet Yompor. Ñehua, te'ña sapa' e'ñe seyemteño'fa Yompor o' separrocmaterr sa. Ñeñto'marña o'ch notas, amach sommo'chatsto, e'ñepa'chña sem'cha'na'teño'f same'ñeña Yompor. ²¹ Tarro'mar atto Yomporpa' ahuo't huapore'tan olivochtaquër ñeñt e'ñe puetacra ñeñt toma'ntenaya judionesha' ñeñt ama ame'ñenayo ña, sapa'cho'ña ñerra'm attach sepene san'apa' ahuapore'tarettescha' saña. ²² Señoche'ch po'ño'ch Yomporpa' atarr cohuen amueraña. Tarraña ama't amueraña'pa' ama allocchama'metsoyaye, tarro'mar ñapa' çhocmach tsat'aterrana ñeñt ama ame'ñenayo ña. Ñerra'm çhocmach seyemteña atto nanac muerensa ñaña'pa' e'ñech cohuen entenes. Ñerra'm amach atet se'papa' sapa'cho'ña ahuapore'tarettescha' atet ñerra'm tsachtaquër. ²³ Ña'ña ama't judionesha' ñeñt a'ypo'ñare'ttetsapa' ñerra'm o'ch alla ame'ña'hueret Yompor, ñaña'pa' o'ch alla parrocmaterranet po'pocheño. Tarro'mar Yomporpa' nanac ahuamencat, ña po'huamencotpa' o'ch alla parrocmaterranet po'pocheño. ²⁴ Tarro'mar sa ñeñtes ama judioneshayayso Yomporpa' e'ñe pocte' eñch o'ch parrocmataterres, ama't sapa' atet entenes ñerra'mrate' nanac allaparo'tsenes atet pena ñeñt puetsato'mar olivoch. Ña'ña sapa' apechta're'charet'es po'pchaño'f, ñaña'pa' ahuo't a'parrocmaterres olivochtacro ñeñt narmets olivoch ama't sapa' ama e'ñe puetacreyayso ñeñt narmets olivoch. Atto pocte' eñch Yompor ñeñt atet p'onas sa, elloña judionesha'pa' nanaccha' cohuen enterranet o'ch alla parrocmaterranet, o'ch alla puetaquër paterranet olivoch ñeñt e'ñe ño puetaquër.

Atto judionesha'pa' a'queshpataretterretcha' ñamet esempohuañen

²⁵ Te'pa' o'ch masheñeshacha' ña'ña noçhaneshacha' neñotatas ñeñt ahuatoteñ ama eñotpahuoyaye. Ñeñtes ama judioneshayayso napa' nemneñ o'ch e'ñe seño'ch allochñapa' attoch amach sotapsa'tatsto sapa' atarro' es señoten. Ñeñt atet atpare'tena patantarr israelena'tarpa' ñeñt'pa' mamecpa atet muenatenanet Yompor tarremphuach allempoch e'ñe etsotua attoch ame'ña'huerra allpon acheñenesha' ñeñt ama judioneshayaye. ²⁶ Allempochña allohuen israelena'tarnesha'pa'

a'qveshp̄atare'tterretcha' ñamet. O'ch etsoterra e'ñe atet aquellca'huaret' Yompor po'ñoñ ahuatoteñ, ñeñt̄pa' atet ote't̄ Yompor:

Ñeñt̄cha' a'qveshp̄aterrahuetpa' huapach. Arrotcha' huapa ñeñt̄ anet-serpa' añ pa'so'cheñ Sión. Ñeñto'marña pamo'tsna'tarcha' p̄osan israelena'tarnesha'. O'ch huapapa' a'huañañperrancha' Jacoboñ po'm̄reneñ* ñeñt̄ atto nanac atpare'teñet Yompor. ²⁷ Allempochña nahuanmanperranet po'chñaretpa' allempochña etsoterra ñeñt̄ atet notanete't̄ ahuat̄ ñeñt̄cha' atet neperranet esempo. Arrpa' allohua ñeñt̄ atet ot Yompor ahuat̄.

²⁸ Tarraña te' Yomporpa' atet entenanet ñerra'mrrate' ñeñt̄ e'moñe'tene' tarro'mar ñetpa' ama mueneto o'ch ame'ñeññañet po'ñoñ ñeñt̄ alloch po'ño'ch yequeshperra. Tarro'mar atet pena allochñapa' o'ch sa'qveshp̄atare'tterra samña ñeñtes ama judioneshayayso. Tarro'mar Yomporpa' ahuatoteñ acrane't̄ judionesha' ñeñt̄cha' atarr morrentena tarro'mar ñeñt̄ pa'tañeshañ pete't̄pa' ña a'crahuete't̄ ahuat̄ ñeñt̄cha' atarr morrentena. ²⁹ Tarro'mar Yomporpa' ama puenesho po'ñoñ. Atet otanete't̄ ahuat̄ ñeñt̄cha' o'pataterranetpa' e'ñech etsotuerra. Ñaña atet otanete't̄ ñeñt̄cha' atet t̄hore'terranet attoch e'ñe ame'ña'hueretpa' ñeñt̄pa'cho'ña e'ñech etsotuerra. ³⁰ Ahuat̄ sapa' atarr satpare'che't̄ Yompor, te'ñapa' judionesha' atet petsa atet satpare'te't̄ sa ahuat̄. Tarraña te'pa' allempo atpare'ta judionesha'pa' ñeñt̄pa' attoch Yomporpa' o'ch muererrsa samña. ³¹ Ñaña te'pa' atto judionesha' attecma atpare'teñet Yompor atet satpare'che't̄ samña ahuat̄, ñetpa'cho'ña muererranetcha' atet muerensa samña te'. ³² Tarro'mar atet penaña Yompor. Ñapa' muenatenan ora pa'namen acheñ o'ch atpare'tyeñet allochñapa' attochña ellopa' o'ch alla muererraneterr allohuenet.

Atto Yomporpa' ama eñot̄pahuoyaye ñeñt̄ e'ñe atet cotape'chen ña

³³ Yomporpa' puemorrenteño'tpa' esocmañen apa'yeney, ñeñt̄ara Parets ñeñt̄ atarr eñotañtetsa. Shonte' esocmañen eñoten pa'namen. Ya arromñafeypa' amate' errotenot̄ yeñotuoñeña ñeñt̄ atet penaña ña. Ñaña ama't mameshapa' amate' errotenot̄ t̄chaponayoña ya yeyo'chro ñeñt̄ ora allpon ñeñt̄ atet cotape'chyen ña. ³⁴ "Tarro'mar yapa' ama't puesheñarrofeya amate' errotenot̄ yeñotuoña ora ñeñt̄ atet cotape'chen Yompor. Ñaña yapa' ama't puesheñarrofeya amate' errotenot̄ yoctape'chacheña Parets. ³⁵ Ñaña yapa' ama't puesheñarrofeypa' amate' errotenot̄ yetsa'choña Yompor attoch aphuerrey ñeñt̄ yemnen ya." ³⁶ Tarro'mar ama't allohuen ñeñt̄ allpon es eñalletyetsa e'ñe Yomporeshotecma huena, e'ñe ña po'huamencot̄ eñalletena, ñaña e'ñe ñocop ye'chcatue. E'ñepa'ch ya'ye'chochtateññañ tayoteñ ama't errponañohuen. Ñeñt̄pa' atetepa'ch Nompore.

12

Atto añ poctetsa o'ch e'ñe yaphuer Yompor yechets

¹ Ñeñto'marña te'pa' o'ch masheñneshacha' ñaña no'chaneshacha' notas, atto Yomporpa' atarr muerenya, yapa' añ e'ñe poctetsa o'ch yaphuer

* **11:26** Ñeñt̄ otenet israelena'tarnesha', ñaña sióno'marnesha', ñaña Jacob po'm̄reneñ, ñaña jersaléño'marnesha' ñetpa' ñeñfaret̄a judioneshet.

Yompor yechets. O'ch yaphuer allohuen yechets atet ñerra'mrrate' ñeñt muetsete't ahuat Yomporecop ñeñtcha' nenet ñocop. Tarraña ya yechets e'ñech betnatot yaphuer Yompor tarro'mar ñeñipa' e'ñech ñocpa, ñeñtcha' nanac coshatene' ña. Attochña e'ñech yeyochrocmañen cohuen yocter Yompor. ² Allochña' amach allo'na atet es yepatse'tyesneno ñeñt atet yeychen ya aña patsro, ellochña yoctape'cherr etserra atoch etserrataterrnay Yompor yocpaña. Attochña e'ñe cohuen señooh erra'tsente'ña muenen Yompor ñeñt e'ñe cohuen enten ña, ñaña ñeñtcha'ña coshatene' e'ñe poctacma.

Atto Yomporpa' ama pocteye' entenye o'ch yot yañeña yo'ña nanac sherbets

³ Yompor puemuereñoenpa' ahuo't llesensenen attoch nach torretsa ñocop. Ñeñto'marña te'pa' notenes ñeñt atet muenen Yompor. Ama't puesheñarrotesapa' amach sentatsto sañeña ñeñteso' ello nanac sherbets. Añcha'ña pocte' sentena allpon sesherven atto puesheña'ttsos Yomporpa' ahuo't apa'yesas attoch e'ñe seyemteño setorra'yesa ñocop. ⁴ Ñato' o'ch yetma'ntacha ñeñt atet pena yechets. Ñehua, yechetspa' ama e'ñe patrrayaya, atet ñerra'm yecle' ñaña yot ñaña yetac. Ñaña ama e'ñe patrrayaye sherbenye, e'ñe po'poñe'ttsocma sherbeney. Tarraña ama't po'poñe'ttsocma sherbeneypa' e'ñe yocma yechets yeñohueñ, tarro'mar e'ñe patrra yechets atet petsa. ⁵ Ñaña attecma yepena allohueney ñeñtey ame'ñenaya Cristo. Ama't shonteyeñ ñaña ama'tcha' po'poñe'ttsocma yetorra'yesa ñocoppa' ñaña'apa' e'ñech patrra enteney, atet ñerra'mrrate' e'ñe po'chets peney. Attochña e'ñech yeparrocmaten e'ñe puesheña'ttsoy epay Cristo. Attoña e'ñe yeparrocmateño Cristopa' o'ch yeparrocmatu-ahua allohueney ñeñtey ame'ñenaya Cristo.

⁶ E'ñech po'poñe'ttsocma yetorra'yena Yomporecop, tarro'mar ñapa' ahuo't apa'yese' e'ñe po'poñe'ttsocma ñeñtcha' atet yesherbe' e'ñe cohuen. Ñehua, ñerra'm añ apueney alloch ya'potoñ po'ñoñpa' ya'potepa'ch errponcha' yemtatenya. ⁷ Amapa' ñerra'm añ apueney attoch yesherbe' po'psheññechno e'ñepa'chña cohuen yeshervenenet. Amapa' ñerra'm añ apueney attoch yeychateñ po'psheññechno e'ñepa'chña cohuen yeychatyenenet. ⁸ Amapa' ñerra'm añ yeñoten attoch yoctape'chatyesanet ñeñt cohuentetsa Yomporecop, e'ñepa'chña cohuen yoctape'chateñ acheñenesha'. Amapa' ñerra'm añ yeñoten attoch es yapa'yese acheñenesha' ñeñt es pallta'yetsapa' e'ñepa'chña yeñmañeshocmañen es yapa'yenanet, amachña cha yempa'tana'tatsche. Amapa' ñerra'm añ yeñoten attoch ya'mñcha'tarettena, e'ñepa'chña yocsheñeshocmañen ya'mñcha'tarettena, amachña cha yemuenme'chatsche. Amapa' ñerra'm añ yeñoten attoch yeyenpue' ñeñt muerochtetsa, e'ñepa'chña yocsheñesha' yeyenpuenanet.

Atetcha' pa'yesa ñeñt pueyochresha' pen Cristo

⁹ Amorrentanna'tpahuepa'ch yentannena e'ñe yeñmañeshocmañen. Ñaña allohuen ñeñt ama cohuenaye' enteno Yompor o'ch e'ñe ya'mñechya nanac attoch ya'ypo'ñe'. Tarraña allohuen ñeñt e'ñe cohuen enten Yomporpa' amach cha ya'ypo'ñatsche. ¹⁰ Ñaña añ poctetsa amorrentanna'tpo'ch yentannena allohueney atet ñerra'm po'ñooh

e'ñe yemo'nasheñ yeḡannena. O'ch atet yeñch po'psheñeñ ñapa' atarr sherben, amachña yañeña nanac asherben entetso.

¹¹ Amach ḡha seḡllana'tatsto torraya ñeñt cohuen enten Yompor. Añcha'ña e'ñech seyoḡcromañen sesherbe' Yepartseshar atto ahuamen-cat penes Parets Puecamoñeñ.

¹² Ñaña e'ñepa'ch socshena tarro'mar yapa' e'ñe yeyemteñoť yecuenña ñeñt o'patatenya Yompor. Ñaña ñerra'm esempo huaponasa mue-roḡhteñets e'ñepa'chña sa'huante'. Ñaña ḡhocmuepa'chña sema'yocheña Yompor.

¹³ Ñaña ñeñt pueyoḡresha' pen Yompor ñerra'm esempo es pallta'yenet, sañapa' sapa'yesanetcha' ñeñt pallta'yenet. Ñaña e'ñepa'chña cohuen sagapannena sepaḡclo.

¹⁴ Ñaña añ poctetsa o'ch senamoñ Yompor attoch a'natana ñeñt se'moñe'tene'. Amachña ḡha sarrnomare'tatscho.

¹⁵ Ñaña ñerra'm esempo esesha' atarr coshetsa, sapa'ḡho'ña soc-shapretanetepa'ch. Ñaña ñerra'm esempo esesha' yahuetsa puellquēñoť, sapa'ḡho'ña sellcapretanetepa'ch.

¹⁶ Amachña ḡha atsrre'moḡchen sentanna'teno. Ñaña amach añ se'natsto attoch sommo'chena. Añcha'ña pocte' senten o'ch seyemteña ñeñt ama esoshe'maye' entyeneto. Ñaña amach sentatsto sañeña, so'ña e'ñe sapuet atarro' es señoten.

¹⁷ Ñaña ñerra'm po'psheñeñ erroten ḡpasa' sapa' amach setsa'tatatsche ama't coñe'ta. Sapa' añcha'ña e'ñe sema'yoḡhra ñeñt ḡhocma sepena ñeñt cohuen enten allohuen acheñenesha'. ¹⁸ E'ñe puesheña'ttsospa' ḡhochña se'nyes ñeñtcha' atet seḡa'yes ñeñt pocte' enten allohuen acheñenesha'; attochña e'ñe cohuen sentannena. Alloḡñapa' o'ch socr-rena e'ñe cohuen muechet e'ñe sagattsa ñeñt parro'marneshas. ¹⁹ Te' o'ch masheñneshacha' ñaña noḡhaneshacha' e'ñe nemorrenteñoťespa' o'ch notas, ñerra'm esempo po'psheñeñ erroť ḡpasa' sañapa' ama't coñe'tapa' amach setsa'tatatsche. Añcha'ña semnat Yompor atto ñapa' tsa'taterranetcha'. Tarro'mar ñeñtpa' atet oten Yompor po'ñoñ ñeñt anuaret ahuatoteñ. Allempo atet otanete't Yompor, ñeñtpa' atet ot: "Napa' naña ñeñten atsa'tatañen, napa' nach tsa'tatuerrahuet." Arrpa' allohua ñeñt atet ote't Yompor. ²⁰ Añcha'ña atet sepoñ ñeñt se'moñe'tene' ñeñt e'ñe atet oteney Yompor po'ñoñ. Ñehua, ñeñtpa' atet oten: "Ñeñt se'moñe'tene' ñerra'm esempo cheporrenapa' sañapa' sapepa'ch ñeñtcha' rra'. Ñaña ñerra'm esempo oñpa'ten sañapa' sapepa'ch ñeñtcha' orr. Ñerra'm atetcha' sepe'pa' ñaña'pa' o'ch penquēna nanac. Atarrcha' at-serr e'man atto penquēna. Allempoñapa' ñato' e'ñe puepenquēñoťpa' ñeñtcha'ña cotape'chatterre' cohuen." ²¹ Ñeñto'marña notas, ñerra'm esempo po'psheñeñ erroť ḡpasa' sapa' amach sañeña muenatstaye o'ch alla setsa'tatera. Añcha'ña atet seḡa' ñeñt e'ñe cohuentetsa. Ñerra'm atet yepenapa' e'ñe yepeñoť cohuenpa' o'ch ya'huañat ñeñt ama cohue-nayaye.

13

Atto añ poctetsa o'ch yame'ñeña ñeñt amcha'taretetyetsa añe patsro alloḡñapa' attoch yocrrena e'ñe cohuen muechet

1 Ñaŋa añ poctetsa e'ñe puesheña'ttsoypa' o'ch yame'ñya ñeññ am'cha'taretetyetsa ñeññ pueyochresha' pen gobierno'. Tarro'mar amach eñallñeña ñeññcha' am'cha'taretetyetsa ñerra'm ama Yompor muenatenahueto o'ch atet pet. Tarro'mar ñeññ am'cha'taretetyetsa arr patsropa' ñetpa' Yompor muenatenahueto o'ch atet pet. 2 Ñeñño'marña yeñoteñ ñerra'm esesha' atpare'tene' ñeññ am'cha'tarettetsa arr patsro ñapa' aña'na atpare'ten Yompor; tarro'mar Yomporpa' ña muenatenahueto o'ch am'cha'taretetyenet arr patsro. Ñaŋa ñeññ atpare'tene' ñeññ am'cha'tarettetsa arr patsro ñapa' e'ñe ñañeña patpare'teño' atsa'tatarettach. 3 Ñaŋa ñerra'm chocma yepa'yen ñeññ cohuen enten am'cha'taretpa' amach am'cha'nochenaye' yenteñeña ñeññ am'cha'tarettetsa, tarro'mar e'ñe attotapa' amach erro' pa'ye. Tarraña ñeññ atpare'tene' ñeññ atet muenen am'cha'taretpa' ñetñapa' atarrcha' am'cha'nochen enteñetña am'cha'taret tarro'mar am'cha'taretpa' chocmach tsa'taterranaña ñeññ atpare'tene' ña. Ñehua, ñerra'm ama semno o'ch am'cha'nochen señch am'cha'taretpa' e'ñechña cohuen es sepa'yen, attochña am'cha'taretpa' e'ñech cohuen entenes, amach erro' paso ama't mamesha. 4 Tarro'mar ñeññ am'cha'tarettetsa arr patsropa' añ torrenet ñeññ atet muenatenanet Yompor; allochñapa' attoch a'pocstatenet esheccha' e'ñe cohuen yocrena arr patsro. Tarraña ñerra'm añ atet sepen ñeññ ama cohuenayayepa' pocte'ña'cho'ña allochñapa' attoch sem'cha'teñ am'cha'taret, tarro'mar ñapa' ama orrena am'cha'taretteno, chocmach tsa'tatana ñeññ atpare'tene'. Tarro'mar ñapa' Yompor muenatene' ñapa' ñach tsa'tatenaya allohuen ñeññ atet pene' ñeññ ama cohuenayaye. 5 Ñeñño'marña añ pocte' o'ch yame'ñya ñeññ am'cha'tarettetsa arr patsro; allochñapa' attoch amach tsa'taterrye Yompor e'ñe ya yatparño'. Elloña ñeññ atet yame'ñena, tarro'mar e'ñe yeyochropa' yeñotena ñeññpa' e'ñe pocte' o'ch e'ñe yame'ñena. 6 Ñeñño'marña ñaŋa añ poctetsa o'ch yetsa'ta impuesto, ñeññ atet anaret ñoñets ñeññ cobrenyet am'cha'tareteshot tarro'mar ñeññ am'cha'taretetyetsa añ patsro, ñeññpa' atet muenatenanet Yompor ñeññcha' atet torrenet ñeññ po'taruas penet.

7 Chocmach setsa'ta allohuen ñeññ atet anaret ñoñets atto cobrenyet atet ñerra'm allpon quelle ñeññ enamueney am'cha'taretñesha' atet ñerra'm impuesto'chno, chocmach setsa'cha. Ñaŋa acheñ ñeññ am'cha'na'tpo' entenetpa' chocmuepa'ch sem'cha'na'tueñ. Ñaŋa acheñ ñeññ atarr amorrentaretapa' chocmuepa'ch semorrentueña. 8 Amach esesha' setebatsto, ama't puesheñarra. Añcha'ña sepa ñeññ poctetsa socop, o'ch semorreñcha samo'ts. Tarro'mar ñerra'm e'ñe yemorrenteña yamo'tspa' attochña yetsotua ora Yompor po'ñoñ ñeññ atet anaret ñeññcha' atet yepenamet e'ñe cohuen. 9 Atet ñerra'm paterr ñoñets ñeññ atet anaret ñeññpa' atet oten: "Amach sechtapretanna'tatsto setapor." Po'poñ ñoñetspa' ñeññpa' atet oten: "Amach semtsanna'tatsto." Po'poñpa' atet oten: "Amach setyesatsto"; po'poñpa' atet oten: "Amach setoma'tam'psatsche samo'ts." Po'poñpa' atet oten: "Amach seye'chapretanna'tatsto", ñaŋa eñall po'poñe'chno ñoñets ñeññ atet yechateney. Allohuen añ ñoñets ama't po'poñe'ttsochma atet ye'chateney, tarraña po'ño'chpa' e'ñe patrra oteneý, ñeññpa'

atet oteneŷ: “Atarrepa’chña yemorrenteña yamo’ts e’ñe atet atarr yemorrentena yañeña.” Ñerra’m chocma yemorrenteña yamo’tspa’ allempoña po’ñoçhpa’ yetsotuach ora allohuen ñeñt atet yeçhatyeny po’poñe’ttsoçma ñoñets ñeñt atet anaret. ¹⁰ Tarro’mar ñerra’m po’ñoçh chocma yemorrenteña yamo’tspa’ amach yemno o’ch errot yeapanet te’t çha yellcatenanet. Añeçhno atetpa’ ama morrenteñtsoyaye. Ñeñto’marña yeñoteñ ñerra’m po’ñoçh chocma yemorrenteña yamo’tspa’ ñeñtpa’ attoçhña e’ñe yetsotua ora allohuen ñoñets ñeñt atet anaret ahuatoteñ Yomporeshot.

¹¹ Atetçha’ sepoçhua ñeñt atet o’ notuas, tarro’mar yeñoteñ o’ çhapmoch allempoch huerra Cristo, ñeñto’mar socoppa’ añ poçtetsa o’ch alla setanterra Cristocop amachña seçllañoña es sepa’yeno atet ñerra’m çha semuen. Tarro’mar ahuañmo’cha allempo ñanam yame’ñera Cristopa’ allempo atarr atomat palltenmeñ attoçh ya’qeshpataretterra. Tarraña te’pa’ ama atarr atomatmeñeyaye. O’ mameshamerra attoçh ya’qeshpataretterra. ¹² Arr patsropa’ eñall shonte’ sosya’tsañeçhno. Ñato’ o’ch yetma’ntacha atet ñerra’mrrate’ yapa’ cheçmeta yeyçhena. Tarraña te’pa’ e’ñe atet pena ñerra’mrrate’ o’ metuamoch cheçmete’ o’ puetarenmoch, tarro’mar yapa’ yeñoteñ o’ çhapmoch allempoch huerra Cristo. Ñeñto’marña añ poçtetsa o’ch yesuanom allohuen ñeñt ama cohuenayaye ñeñt atet atma’ntataret cheçmete’. Añcha’ña atet yeça’yen ñeñt cohuen enten Yompor ñeñt atet atma’ntataret puetare’. Attoçhña yetorrena Yomporecop atet ñerra’mrrate’ çho yeçllarena ñocop. ¹³ Añepa’chña yeça’yen cohuen ñeñt atet penet yeçto, ñeñt ama apen-coçhenayaye ñeñtpa’ ama atteyaye ñerra’m ñeñt atet penet tsapo. Amach yoçtapretatsto all nanac coshena aposañe’teçhno, e’ñe porrare’tetnoçet all atarr pa’namen coshatse’tyenet. Ñaña amach yechta’yesatsto coyaneshaçhno, amach atet yeçpatsto ñeñt pa’namen sosya’tsañeçhno. Amach ye’natsto atsrre’moçhen, ñaña amach ye’moñe’tanna’tatsto e’ñe yesope’cheñoç. ¹⁴ Añcha’ña ahuamencaç sepene’ Yepartseshar Jesucristo, alloçhñapa’ attoçh amach semnatatsto seçhets o’ch muenatse’tatas ñeñt ama cohuenayaye.

14

Atto eñall ñeñt epuoye’ ame’ñenayañ Cristo tarro’mar ama huomencaye’ penano pueyoçher Yomporecop

¹ Ñaña te’pa’ o’ch notas po’poñ ñeñtçha’ atet seça. Ñerra’m eñall sesho acheñ ñeñt ame’ñetsañ tarraña ñapa’ ama huomencaye’ penano pueyoçher Yomporecop tarro’mar ama e’ñe eñoteñe po’ñoçh atet yeyemteña Cristo, sañapa’ o’ch sagaç e’ñe cohuen attoçhña e’ñeçh parroçma seyemteña Cristo. Tarraña amach añeçpa sagape attoçh sapa’ o’ch sotnare’ch tarro’mar ñapa’ po’poñoneç cotape’çhyen. ² Atet ñato’ eñall acheñ ñeñt ama huomencaye’ penano pueyoçher Yomporecop tarro’mar ama e’ñe eñoteñe ñeñt atet po’ñoçh yeyemteña Cristo; ñeñto’marña ñapa’ çhach oten ama poçteyaye o’ch yerra’yes berr po’çhets, añach paçterr yerren narmetsoçhno. Elloña po’psheññeçhno e’ñe pueyemteñoçet Cristo ñetñapa’ otenet e’ñe poçte’ o’ch yerra’yes ama’t erra’tsena rreñets. ³ Ñeñtey pa’namen es rra’yetspa’ amuepa’ch

yentatsche ñeñt tore'tetsa ñapa' ama es eñoto. Ñaña ñeñt es tore'tetsapa' amuepa'ch otatsetye ya ñeñtey pa'namen es rra'yets ama pocteyaye o'ch yerratse'tyes pa'namen ñeñt ama arrapahuoyaye. Tarro'mar Yomporpa' ñaña o' aguërrey attoch pueyochresha' perrey. ⁴Ñeñto'marña yapa' yeñoteñ ama pocteyaye o'ch yotanna'tena e'ñe yagattsa Yompor pueyochresha'pa' ama pocteyaye ñeñt atet penet. Tarro'mar ñetpa' Ayochreshatecpuet tarro'mar ñapa' ñaña ñapueñ otets atto pocte' entenan pueyochresha' amapa' ñerra'm ama pocteye' entenano pueyochresha'. Ñaña Ayochreshat Cristopa' chocmach e'ñe pocte' entenan pueyochresha' tarro'mar ñapa' ñach ahuañencat pahuet pueyochro.

⁵Ñaña ñato' eñall acheñ ñeñt ama e'ñe eñotenaye ñeñt atet e'ñe po'ñoçh yeyemteña Cristo, ñeñto'marña ñetpa' cha otenet añ poctetsa o'ch yonañcha'yen pate'tets yet ñeñtcha' atet yetsotayes attochña e'ñe pocte' enteney Yompor. Ñaña ñato' po'psheññeçhno ñeñt atet ñerra'm yapa' otenet ama yepallteno o'ch yonañcha'yen pate'tets yet ñeñtcha' atet yetsotayes tarro'mar allpon yetpa' Yomporecma pueyeçhcatuar. Tarraña puesheña'ttsoypa' yeñochepa'ch ñeñt e'ñe pocte' yentyen ya e'ñe yeyoçhro ñeñtcha' atet yeña. ⁶Tarro'mar ñerra'm esesha' onañcha'yene' yet ñeñtcha' atet etsotayes, ñapa' atet oten ñeñtpa' atet yame'ñeña ya Yompor. Attecma yepena yamña ñeñtey ama onañcha'yenaye yet, yapa'cho'ña atet yame'ñeña Yompor. Ñaña ñeñtey pa'namen es rra'yetspa' yapa'cho'ña atet yame'ñeña Yompor, tarro'mar yeparasyoso'teñesha' Yompor es yerra'yen. Attecma pena ñaña ñeñt es tore'tetsa, ñetpa'cho'ña atet ame'ñeñet Yompor ñaña ñetpa' e'ñe pueparasyoso'teñeshet Yompor es tore'tyenet.

⁷Tarro'mar ama e'ñe ya yemneññoteye' atet es yeña'yeno añe patsro. Atto yocrrena añe patsropa' ñeñtpa' ama e'ñe yaptecpayaye, ñaña allemPOCH yerromapa' ñeñtpa'cho'ña ama yemneññoteye' yerromueno. ⁸Tarro'mar atto yocrrena allponmat añe patsro ñeñtpa' añecop attoch yesherbeñ Yepartseshar. Ñaña allemPO yerromuenpa' ñeñtpa' tarro'mar atet muenateney Yepartseshar. Ñeñto'marña yapa' yoten allemPO yocrrena añe patsro ñeñtpa' ama yaptecpaye' yocrreno, ñeñtpa' Yepartsesharecop. Ñaña allemPO yerromuen, ñeñtpa'cho'ña ama yaptecpayaye, ñeñtpa'cho'ña Yepartsesharecop. Ñeñto'marña ñeñtpa' chocma atet pena tarro'mar ñapa' e'ñe o'paterrya ñaña e'ñe ñocpay. ⁹Tarro'mar Cristopa' ñeñtecop rroma, elloñapa' alla correrra attochña ñapa' ñach yamo'mte' yepen allohueney. Ama't allemPO yocrrenmeñ, ama't ñaña allemPO yerromuen, atterach yamo'mte' yepeñ, tarro'mar ñapa' pueñotuaran atet peney romueñets ñaña atto yocrrena ñeñtey arromñañey.

¹⁰Ñeñto'marña amach yotatsche yemo'nasheñ ñeñt atet pena ñapa' ñeñtpa' ama pocteyaye. Ñaña amach yotatsche ñapa' ama es eñoteno. Tarro'mar Cristo ñapa' ñach yoterre' errotentcha' entyerrey esempohuañen allemPOCH yapçherra allohueney ñesho. ¹¹Tarro'mar Yompor po'ñoñ ñeñt anuañet ahuatoteñpa' ñeñt allpa' Yompor otatset atet: Napa' na ñeñten ama arromñañeshayayno ñaña ama puenesho neñoñ. Po'ñoçhpa' atetcha' perra esempohuañen. Ora

allohuen acheñenesha'pa' concorpanrrorterrnetcha'. Allñapa' otuerrnetcha': "Pa Yomporep ñeñtep atarr Partsoḡ."

12 Attoña yeñoteñ allohuene y puesheña'ttsoy Yomporpa' a'metataterreycha' ñeñt atet o' yeḡohuahuenta arr patsro.

Atto ama pocteyaye e'ñe atet yepeñoḡ ya o'ch alla ya'puerratater yemo'nasheñ

13 Ñeñto'mar ama pocteyaye o'ch yañeña yotanna'ta ñeñt atet yentannena arr patsro. Añcha'ña yañeña e'ñech yeñotena ñeñt atet yeḡa'yena ya tarro'mar ñeñt atet yeḡa'yena yapa' ñato'rraña ḡate' ya'puerratater yemo'nasheñ ñerra'm ñapa' ama pocteye' entenano ñeñt atet yeḡa'yen ya. 14 Napa' e'ñe neyemteñoḡ Yepartseshar Jesús neñoteñ e'ñe pocte' o'ch es yerra'yes tarro'mar neñoten allohuen rreñetspa' e'ñe arrapahuocma Yomporecop. Tarraña ñerra'm esesha' ama arrapahuoye' entenaye ñeñt allohuen rreñetspa' e'ñe ñocoppa' ama pocteyaye o'ch rrenan ñeñt rreñets. 15 Ama't e'ñe poctey o'ch yerra'yes, tarraña ñerra'm yemo'nasheñpa' ama arrapahuoye' enteñe, yapa' e'ñe ya yerreñoḡpa' ñato' o'ch yeḡe'chateña allempoñapa' o'ch rre' ñaña, ñaña'pa' ḡach enteñ ñeñtpa' ochña'teñets Yomporecop. Atteñapa' ñato' o'ch alla puesuerran Yompor. Ñato' yerreñoḡ ama't e'ñe cohuenepa' o'te' yequeḡpatater yemo'nasheñ Yompor. Ñeñto'marña notenes, amach yerratsto allempo, te't ñeñto'mara yequeḡpatater yemo'nasheñ Yompor. Ñaña ñerra'm atet yepeñ yemo'nasheñpa' po'ñoḡpa' ama yemorrenteño, ñeñtara yemo'nasheñer ama't Cristopa' ñocpa'na rroma. 16 Ñeñto'marña notenes, ama't poctey ñeñt atet yeḡa'yena, tarraña ñerra'm yemo'nasheñpa' ama pocteye' enteñe, ñaña'pa' ñeñtoḡach sasare'teney. Ñehua, ama't e'ñe poctey o'ch atet yepenañ, tarraña amach atet yeḡatsche. 17 Tarro'mar ñerra'm añ yoctehñañ Yompor po'cohuenña atto pueyochresha' peney, ñeñt atto es yerra'yen amapa' atto es yetore'tyena, ñeñtpa' ama esoyayeña Yomporecop. Añña ñeñt nanac sherbets attoch yoctehñañ Yompor po'cohuenña, ñeñtpa' atto e'ñe pocte' es yeḡannena añe patsro, ñaña atto e'ñe cohuen yentannena attochña yocrena e'ñe cohuen muechet, ñaña attochña Parets Puecamquēñpa' ḡocmach coshateney yeyoḡro. 18 Ñerra'm atetcha' yame'ñeña Cristo, Pomporñapa' e'ñech cohuen enteney, ama't allohuen acheñenesha'pa'ḡo'ña e'ñech cohuen enteneyet.

19 Ñeñto'marña napa' notenes, añepa'chña ye'nen ñeñt attoch e'ñe yeparrocmaterr allohuene y ñaña attochña e'ñe cohuen yeyenpanna. Allochñapa' allo'nach e'ñe huomenc yeḡanna'tnena yeyoḡher Yomporecop. 20 E'ñe ya yerreñoḡ po'chetSPA' amach ya'huañataterrñañe po'psheneñ ñeñt atet ame'ñenanañ Yompor. Ama't allohuen rreñtsoḡno cohuenacmañ ñeñtcha' yerra'yeneñ, tarraña ñerra'm yerreñoḡ o'ch alla ya'puerratater po'psheneñ attoch o'huañcha' ame'ñenana Cristo, ñeñteḡña'pa' e'ñe pocte' amach yerratsto ñeñtcha' a'puerrataterre' po'psheneñ, tarro'mar atetpa' ama cohuenaye' enteñe Yompor. 21 Ñeñto'marña notenes, ama't erra'tsena ñeñt atet yepeñoḡ po'psheneñpa' o'ch alla ya'puerratater, ñeñteḡña'pa' amach atet yeḡatsto, allochñapa' amach puerrero ama't puesheñarra ñeñt ame'ñenaya Cristo. Atet ñerra'm allempo yerren herr po'chets ñaña allempo yorren

co'nes,* ñerra'm atet yepeñoť o'ch alla ya'puerratater yemo'nasheñ, ñeñtepa' añ poctetsa amach yerratsto berr po'chets, amach yorratsto ñaña co'nes, tarro'mar allempopa' ama cohuenaye' enteñe Yompor. ²² Ñerra'm e'ñe pame'ñeñoť Yompor peñotena ñeñť atet pepa'yena ñeñťpa' e'ñe pocte' entapretenep Yompor, tarraña pāpa' e'ñech peyočhro poctape'cheñ Yompor atet, amachña čha pe'matare'tatstoña allo. Nanac cosheñso'tseney ñerra'm yeñotena po'ñočh e'ñe pocte' entapreteney Yompor ñeñť atet es yepa'yen, tarro'mar yeyočhropa' ama epuoye' es yepa'yeno. ²³ Tarraña ñerra'm esesha' ñeñť epuoye' es rra'yenpa' ñocoppa' ama pocteyaye o'ch rren, ñañaapa' ñeñťaña po'chñar pen. Tarro'mar ama pueñmañeshocmañenaye' es rreno, ñaña yapa' yeñoteñ ñerra'm ama yeñmañeshocmañenaye' es yepa'yeno, ñeñťpa' ñeñťa yo'chñar entennay Yompor.

15

Atto añcha'ña ye'nen ñeñť e'ñe pocte' enten yemo'nasheñ

¹ Ñeñťo'marña napa' notenes, ñeñťey e'ñe huomenc pene' yeyočher Yomporecop, ñeñťey ama epuoye' yame'ñeño Yompor, añña poctetsa o'ch yeyenpueñ yemo'nasheñ ñeñť ama huomencaye' penaye pueyočher Yomporecop ñeñť čhocma epuoye' ame'ñenana Yompor. Ñeñťpa' atetča' yeyenpueñ, amachña añña atet es yepa'yeno ñeñť atet yemnen ya. ² Añcha'ña ye'nen o'ch atet yepen ñeñť e'ñe pocte' enten yemo'nasheñ. Ñeñťpa' atetča' yeyenpueñ allochñapa' o'ch e'ñe huomenc pā'nman ñaña pueyočher Yomporecop, allochñapa' amach allo'na epuoye' ame'ñenano Yompor. ³ Amach añña atet es yepa'yeno ñeñť atet yemnen ya tarro'mar Cristopa' ama añña atet pā'yese'te ñeñť atet muene't e'ñe ñañeña. Añña pā'yese't ñeñť muenache't Pompor. Tarro'mar ñapa' ñeñťecopña mueročhte't ñeñť atet muenache't Pompor. Ñeñťo'marña Cristopa' atet otane't Pompor, ñeñťpa' atet och: "Pa e'moñe'tetañpa' attoña sasare'tennet." Attoña e'ñe etsoterra ñoñets ñeñť atet aquellca'huaret ama't ahuatoteñ. ⁴ Ñaña allohuen añ ñoñets ñeñť atet aquellca'huaret ahuatoteñ, ñeñťpa' yocpa'ñaña atet anaret. Allochñapa' attoch yapa'čho'ña o'ch yečhaterryet ñeñť atet muenen Yompor. Allochñapa' attochña huomenc yepen yeyočher Yomporecop. Ñaña añ ñoñets ñeñť atet aquellca'huaret ahuatoteñpa' nanaccha' coshaterrey allochñapa' attochña e'ñe yocsheñesha' yeyemteññaña Yompor ñeñť o'patatenya. ⁵ Yompor ñapa' ñeñť ahuamencat yepene' ñaña ñapa' ñeñťña yocshatene' yeyočhro. Ñaña ñepa'chña e'ñe señotaterre', allochñapa' attoch e'ñe cohuen seyčherr ñeñť atet muenen Cristo Jesús, allochñapa' e'ñech cohuen sentannena. ⁶ Allochñapa' allohuenespa' e'ñech parrocma sa'ye'chočhtateññañ Yompor, ñeñťara Yepartseshar Jesucristo Pompor.

Atto ama't ñeñť ama judioneshayayepa' ahuo't aserrpare'tatarettet añ cohuen ñoñets alloch yequeshperra

⁷ Ñeñťo'marña napa' notenes, e'ñech cohuen es sepanna'tyena allohuenes e'ñe atet cohuen o' perrey Cristo, allochñapa' attoch seyemteñoť parro cohuencha' sa'cshapretarettena Yompor. ⁸ Ñaña te'pa' o'ch

* 14:21 Ñehua, Pablo añ toma'ntatanet vino ñeñť poco'nes penet all pa'nyo.

notas, Cristopa' ahuo't huapa arr patsro attoch torrosa judioneshacop. Allochñapa' attoch allohuen acheñenesha'pa' o'ch chapanet pueyoçhreto, Yomporpa' ama puenesho po'ñoñ. Ñeñt e'ñe atet otane't judionesha'pa'tañeshañ ahuatpa' ñeñtcha' atet muenaterranet esempo, ñeñtpa' çhocmachña e'ñe etsoterra poctacma. ⁹ Ñeñtecopña huapa ñaña attochña acheñenesha' ñeñt ama judioneshayaye ñetpa'çho'ña o'ch aye'choçhtatoñet ñamet Yompor tarro'mar Yomporpa' ahuo't muere-nanet ñamet. Attoña etsoterra ñoñets ñeñt quellca'huet ahuat atet ñerra'mrrate' e'ñe Cristo ote' Pompor, ñeñtpa' atet ot:

Ñeño'marña napa' o'ch na'ye'choçhtatona' allo'tsa'yen acheñenesha' ñeñt ama judioneshayaye, allñapa' na'çhotene'pcha' nemorreñesha'.

¹⁰ Ñaña po'poñ ñoñets ñeñt atet aquellca'hua'et ahuatoteñ, ñeñtpa' atet oten:

Ñaña sa ñeñtes po'poñ acheñes ñeñtes ama judioneshayaysopa' socshepa'ch samña, atet coshena judionesha' ñeñt pueyoçhresha' pen Yompor.

¹¹ Ñaña po'poñ ñoñets ñeñtpa' atet oten:

Ñeñtes ama judioneshayaysopa' sa'ye'choçhtatoñepa'ch Yompor, ama't allohuenes pa'namen acheñes sa'ye'choçhtatoñepa'ch Yompor.

¹² Elloña Isaíaspa'çho'ña atet ote't ahuat:

Esempopa' orrterrach puesheñarr ñeñt Isai* po'mreñeñ. Ñapa' orrterrach allochñapa' ñeñtcha' pa'mcha'tarefer perr allohuen pa'namen acheñenesha', ñaña allohuenet ñachña atarr yemterret. Arrpa' allohua ñeñt atet a'potete't Cristo ahuat.

¹³ Yomporpa' ñachña atarr ayemuetpoterrtsa. Ñaña ñepa'chña socshatene' e'ñe poctacma. Allochñapa' amach eñalle ama't coñe'ta ñeñtcha' sellcatene' atto same'ñeña ña. Allochñapa' Paretsña Puecamquëñpa' ñachña ahua'mencat sepene'. Attochña e'ñech socsheñesha' secuen ñeñt o'patatensa Yompor.

Atto Pablo' ahuo't llesenseñ Jesucristo attoch amach puencha'ño'teye' alla yerpaterraneto ñeñt e'ñe pocte' enten Yompor

¹⁴ Ñaña te'pa' o'ch masheñesha ñaña noçhanesha notas, napa' neñotenes sapa' atarr semorrentannena ñaña neñotenes o' e'ñe çhaponasa seyoçhro ñeñt atet muenatenes Yompor. Allochñapa' attochña e'ñe cohuen soctape'chatannena erra'tsente' cohuentetsa Yomporcop. ¹⁵ Tarraña ama't atetpa' ama nemñcha'ño'teye'

o' notuanmaso pa'namen arr necartot ñeñt atet pocte' enten Yompor. Attoña o' alla neyerpaterrrserr ñeñt atet muenen Yompor. Ñeño'marña atet nepenes, tarro'mar e'ñe Yompor puemuereño'tenpa'

¹⁶ ahuo't muenatenen nach torretsa Jesucristocop. Erracmañen allemeñ anetso'mar netorrena, allo'tsa'yen acheñenesha' ñeñt ama judioneshayaye. Napa' na a'potenahuet Yompor po'ñoñ ñeñt po'ñoçh alloch yequeshperra. O'ch name'ñatuera ñeñt ama judioneshayaye, allempoñapa' attochña nehuapat Janet Yomporesho atet ñerra'mrrate' çho es yapueñ Yompor, ñaña'pa' ñeñtcha'ña atarr coshatene'. Allotñapa'

* **15:12** Isaías' ñeñtara Jesé. Ñehua, ñapa' ñeñt puechemeran David ñeñt amcha'tarettatse't Jerusaléño.

Paretsña Puecamquëññapa' ñachña a'cohuentatuerrahuet. Attochña e'ñe cohuen enteñet Yompor.

¹⁷Ñeñto'marña te'pa' e'ñe neyemteñoť Cristopa' e'ñe pocte' nenteñ o'ch e'ñe nocsheña ñeñt allo netorrena Yomporecop. ¹⁸Napa' aña paterr noten atto Cristopa' e'ñe ahuamencat penen, ñeñto'marña chocma name'ñateña ama't ñeñt ama judioneshayaye. Atto neserrpare'tatanet Yompor po'ñoñ, ñetñapa' ahuo't e'ñe name'ñatuanet. Ñaña atto napa' e'ñe cohuenare' es norrtatyen, ñetñapa' ahuo't e'ñe cohuen ame'ñeñet Yompor. ¹⁹Ñaña ñetpa' añaña ame'ñatahuet ñeñt atto e'ñe ahuamencat penen Cristo attoña norrtatanet Yompor po'partsoña ñeñt ama puentareto. Ñetpa' ñeñtña eñotatuahuet, ñeñtpa' po'ñoch e'ñe Parets Puecamquëñoť ñeñt e'ñe ahuamencat yepene'. Atteñapa' ora erracmañen o' neserrpare'tua añ cohuen ñoñets atto e'ñe yame'ñeñoť Cristopa' o'ch yequeshperra. Atetña neserrpare'tyesnom allemeñ anetso'mar e'ñe Jerusaléñofoñ Ilírico'marohuen. ²⁰Napa' añaña atarr nemnen o'ch neserrpare'tyen añ cohuen ñoñets errařaren bačhayo'mar all ama pue'mareto ñeñt Cristotets. Attochña napa' amach arra neseno serrpare'tats all o' serrpare'tatuahua po'psheñeñ. ²¹Attochña etsoterra añ ñoñets ñeñt atet aquellca'huaret ahuatoten, ñeñtpa' atet oten Cristocop:

Acheñenesha' ñeñt ama't ahuatapa' ama aserrpare'tataretteneto ñeñt atet pena ña, ñetñapa' enteretcha'. Ñeñtara acheñer ñeñt ama pue'marano ñeñt atet pena ña, ñetñapa' cherranetcha' pueyočhreto ñeñt atet pena ña.

Atto Pablopa' atarr sechena o'ch ahuo' anetso Romo o'ch emo'tenana' ñeñt ame'ñetsa all

²²Napa' shonte' neserrpare'tatyen erracmañen arr, ñeñto'marña ama eshcaye' neseno sesho. Ama't ahuañofoñ atarr nesechenañ o'ch nabchensa', ama erroť nepeñe. ²³Tarraña na te'pa' o' ne'nua netaruas ñeñt atto neserrpare'tyen arro'mar allemeña. Ñaña napa' ahuatoteñ nesechena o'ch nabchensa'. ²⁴Ñeñto'marña te'pa' e'ñe po'ñoch nesechena o'ch ahuen sesho o'ch nabchensa'. Allochñapa' o'ch yabchanna'ta allponmat, allempoñapa' ñato' attotpa' o'ch seyempa'n attoch nečhap ñaña España. ²⁵Ñehua, te'pa' ñanomcha' Jerusaléño neta, attoch nanmanet allpon ofrenda masheñneshacop ñeñt ame'ñetsa all. ²⁶Tarro'mar allpon ñeñt ame'ñetsa Macedonio ñaña Acayo, ñetpa' e'ñe pocte' enteñet o'ch apuet allpon ofrenda, ñeñtcha' oñmachtet masheñnesha' Jerusaléño ñeñt nanac es pallta'yenet. ²⁷Macedonio'marnesha' ñaña Acayo'marnesha' ñetpa' ama judioneshayayeto. Tarraña e'ñe pocte' enteñet o'ch yenpueñet judionesha' ñeñt Jerusaléño'tsa'yen ñeñt nanac es pallta'yenet. Napa'cho'ña e'ñe pocte' nenteñ tarro'marña ñeñt judionesha' ñetpa' ñetña serrpare'taterret ñanom ñeñt ama judioneshayaye Yompor po'ñoñ. Ñeñt atet ařarettet ñetpa' ñeñtpa' puecamquëñecop. Ñeñto'marña te'pa' e'ñe pocte', ñeñt ama judioneshayayepa' o'ch alla yenpuerran ñaña ñeñt judionesha' ñeñt poctetsa po'chtsocpuet alloch correnet arr patsro. ²⁸Allempoch nečhap Jerusaléño o'ch napos masheñnesha' ofrenda. O'ch naphuerranet attochña e'ñe ne'nua ñeñt netaruas nepen. Allempoñapa' o'ch ahuen ñaña España. Ñehua, amach nečhena' España' o'ch

nemo'tnomues allponmat, allotcha' nem'terrerr seshotpa' allempochña o'ch ahuen Español. ²⁹ Ñaña neñoteñ ñerra'm esempoch nechap sesho e'ñe neserrpare'tateñotes Cristo po'ñoñ, sapa' nanaccha' nocshaterres e'ñe nanac Yompore pa'nateñoñ.

³⁰ Ñaña te'pa' o'ch masheñnesha notas, e'ñe seyemteñoñ Yepartseshar Jesucristo, ñaña attoch apueney Parets Puecamqueni alloch e'ñe yemorrentannena, sapa' chocmach sema'yocham'pesna. Nanaccha' sema'yochapretna, ³¹ o'ch senamatón Yompore attoch cohuan'psen allochñapa' amach cha rromapno judionesha' ñeñt ama ame'ñetso all Judeo. Ñaña o'ch senamatón Yompore añecop judionesha' ñeñt ame'ñetsa Jerusaléno, attoch e'ñe cohuen entapretapnet ñeñtcha' naposanet. ³² Allochñapa' ñerra'm Yompore muenatspa' e'ñech nocsheñnesha' nechap sesho. Allñapa' namesoste' e'ñe cohuen allponmat, ñaña e'ñe yabchanna'teñoñpa' o'te' alla e'ñe nocsherra neyochro. ³³ Yomporepa'chña e'ñe cohuen sa'nataya allohuenes, ñeñtara Yompore ñeñt e'ñe cohuen yocshatene' yeyochro. Ñeñtapa' attetepa'ch Nompore.

16

Atto Pablo arr po'cartotpa' e'ñe huom'cha'tuan ora allohuen ñeñt ame'ñenaya Cristo all anetso Romo

¹ Ñaña te'pa' añ necartotpa' nemneñ o'ch neñotatas ñeñt yoch yepen ya arr ñeñtapa' añ pa'so'cheñ Febe. Ñapa' ña sherbets Yompore pa'paclo allecma apchenet Yomporecop añ anetso Cencreo. ² Ñapa' mueneñ ahuo'ch ahuo' sesho. Ñerra'm esempo chap seshopa' o'ch sagañ cohuen, ñeñt atet poctetsa o'ch yagapannena e'ñe cohuen, ñeñtey ame'ñenaya Yepartseshar Cristo. Ñaña ñerra'm o'ch chap sesho, ñerra'm escha' palltosa ama't erra'tsena, añ poctetsa sapa' o'ch seyempueñ tarro'mar ñapa' atarr cohuen ayenpañ; ama't napa' nanac yenpuenen.

³ Napa' nemneñ añ necartot o'ch nehuom'cha'ch noch Priscila puerrollare'na ñeñtara masheñ Aquila, ñeñt parro netorrena ahuañmo'cha Cristo Jesúsocop. ⁴ Ñetpa' nanac yenpuennet ahuañmo'cha allempo muene' muetsanetañ. Ñetñapa' autsa rromatsetañ attot a'queshp'atnet na allempo muene' muetsaneñ ñeñt ne'moñe'tene'. Ñeñto'marña napa' atarr neparasyoso'tenanet ñaña ama nap'tayaya añña ñaña ñeñt allohuen ñeñt ama judioneshayaye, ñeñt e'ñe pame'ñeñotet ap'cha'yenet allemeñ anetso'mar, ñetpa'cho'ña atarr parasyoso'teñet noch Priscila ñaña masheñ Aquila, tarro'mar ñetpa' ahuo't a'queshp'atnet, attot ellopa' o' alla neserrpare'tatererr ñeñt ama judioneshayaye. ⁵ Ñaña te'pa' o'ch nehuom'cha'ch allohuen masheñnesha' ñeñt pame'ñeñotet chocma apchenet masheñ Aquila pa'paclo, all yechena epuet puetapor Priscila. Ñaña arr necartotpa' nemneñ o'ch nehuom'cha'ch masheñ Epeneto ñeñt nanac nemorrentena. Ñapa' ña ñanom ame'ñenaya Cristo all anetso Acayo. ⁶ Allotpa' o'ch nehuom'cha'ch ñaña noch María ñeñt nanac torretsa sesho parro. ⁷ Te'ñapa' o'ch nehuom'cha'ch ñaña namo'ts ñeñtara masheñ Andrónico ñaña masheñ Junias, tarro'mar ñet ahuañmo'chapa' ñeñt parro ehuanca'retey. Ñetpa' ama't allsensareñnesha'pa' nanac asherben entarettet, tarro'mar ñetpa' ahuatoteñ ame'ñeret Cristo. Ama't allempo napa' ama name'ñena' ñetñapa' o' ame'ña'huet ñanom.

8 Alloṭpa' nemneñ o'ch nehuom̃cha'ch ñãma masheñ Amplias ñeñt̃ atarr nemuerena e'ñe yame'ñeñoṭ Yepartseshar parro. 9 Alloṭpa' ñãma masheñ Urbano, o'ch nehuom̃cha'ch ñãma ñeñt̃ parro yetorrena ñeñt̃ po'taruas pen Cristo Jesús. Alloṭpa' e'ñe nemorrenteñoṭpa' o'ch nehuom̃cha'ch ñãma masheñ Estaquis. 10 O'ch nehuom̃cha'ch ñãma masheñ Apeles ñeñt̃ chocma ahuantene' allohuen pa'namen topateñets attoña e'ñe cohuen cotenan Cristo. Alloṭpa' ñãma o'ch nehuom̃cha'ch allohuen ñeñt̃ pamo'ts pen Aristóbulo. 11 Alloṭpa' ñãma namo'ts Herodión, alloṭpa' ñãma ñeñt̃ pamo'tsesha' pen Narciso. Ñetpa' atarr ame'ñeñet Yepartseshar. 12 Te'ñapa' nemneñ o'ch nehuom̃cha'ch ñãma noçh Trifena ñãma noçh Trifosa. Ñetñapa' nanac torreññañet Yepartseshar po'taruas, alloṭpa' noçh Pérsida ñapa'çho'ña nanac yemorreneteña atto nanac torrena ñãma Yepartsesharecop. 13 Ñãma arrpa' o'ch nehuom̃cha'ch ñãma po'psheñeñ masheñ Rufo ñeñt̃ pame'ñeñoṭ nanac asherben yenteñ Yepartsesharecop. Ñãma pachore'na o'ch nehuom̃cha'ch, tarro'mar ñapa' e'ñe atet nenteñ ñerra'mrrate' ñeñt̃ e'ñe nachor nepen. 14 Te'ñapa' o'ch nehuom̃cha'tererr po'potantañ masheñnesha' ñeñt̃ añ Asíncrito, ñãma Flegonte ñãma Hermas, ñãma Patrobas, alloṭpa' ñãma Hermes, ñãma po'potantañ masheñnesha' ñeñt̃ parrompaño'tsa'yenet. 15 Te'pa' o'ch alla nehuom̃cha'tererr ñeñt̃ masheñ Filólogo ñãma noçh Julia, alloṭpa' ñãma masheñ Nereo epuet ñãma po'ch, alloṭpa' ñãma Olimpas, ñãma ama't allohuenet masheñnesha' ñeñt̃ parrompaño'tsa'yenet.

16 E'ñe semorrentanna'teñoṭpa' atetcha' sehuom̃cha'tanna'tena* ñeñt̃ atet poctetsa Partsocop. Ñãma allohuenet masheñnesha' ñeñt̃ apçha'yetset allemeñ anetso'mar e'ñe pame'ñeñoṭet Cristo, ñetpa'çho'ña mueneñet o'ch huom̃cha'taset ñãma arr necartot.

Atto Pablo arr po'cartotpa' o' alla cotape'chaterraneterr po'pocheño

17 O'ch masheñneshacha' ñãma noçhaneshacha' noterrser po'poñ añ necartot. Señoṭcha' añ acheñenesha' ñeñt̃ muenene' o'ch ellopa'tetstatonaset soçtaṭña ñeñt̃ atto same'ñeña Cristo, tarro'mar ñetpa' mueneñet o'ch cotape'chataset ñeñt̃ ama atteyaye ñeñt̃ atet o'yeyçhatuas. Ñeñt̃ acheñer atetpa' o'ch sello'tsentach seshoṭ, amach seyemtatstanet ñeñt̃ atet yeçhatenet. 18 Tarro'mar ñetpa' ama añeye'sherbeneto Yepartseshar Jesucristo. Aña cotape'chenet ñeñt̃ atet muenenet ñet po'çhets atto correnet. Atto serrpare'tenet coçhnesha'ñoñets, ñeñt̃pa' atta shequēñet acheñenesha' ñeñt̃ ama huom̃cayey penaye pueyoçher. 19 Ñehua, allohueney yeñotenes sapa' o' same'ñera Cristo ñeño'marña napa' atarr nocshensa. Aña nemnen o'ch e'ñe señoṭ ñeñt̃ e'ñe cohuentetsa Yomporecop. Allochñapa' amach soçtaṭpe'chatsto ñeñt̃ ama cohuenayaye. 20 Allochñapa' Yomporpa' ahuencha' a'huañam̃p̃sonas ñeñt̃ atto atarr shequēnes oneñet, ñeñt̃ara Yompor ñeñt̃ e'ñe cohuen yocshatene'yeyoçhro. Yepartsesharepa'chña Jesucristo e'ñe sa'natenaya.

21 Te'pa' o'ch alla neñotaterrser añ necartot, masheñ Timoteopa'çho'ña mueneñ o'ch huom̃cha'tas ñãma, ñapa' ñeñt̃ epan netorrena. Alloṭpa' ñãma añ namo'ts ma'psheño'maret ñetpa'çho'ña mueneñet o'ch

* 16:16 Po'ñoçh oteneñ, "E'ñe semorrentanna'teñoṭ choç setso'tstsa'pa'tannena ñerra'm esempo sehuom̃cha'tanna'tena." Ñeñt̃pa' atet yeçhete't ahuat.

huom̃cha'taset ñamet. Puesheñarrpa' añ masheñ Lucio, allotpa' ñaña masheñ Jasón, ñaña masheñ Sosípater.

²² Napa'cho'ña ñeñten sochetsa Tercio, e'ñe name'ñeño' Yepartseshar nemneñ o'ch nehuom̃cha'tas añ masheñ Pablo po'cartot. Napa' ñeñten quellcaten masheñ Pablo.

²³ Masheñ Gayopa'cho'ña muenen o'ch huom̃cha'tas ñaña. Na te'pa' e'ñe pa'paclo'tsenen ña, tarro'mar all nechap. Ñapa' atet otenanet chocmach apchenet allohuenet pa'paclo ñeñt ame'ñetsa arr. Ñaña masheñ Erasto mueneñ o'ch huom̃cha'tas ñaña. Ñapa' ña tesorerotets arr Corinto, ña añño'tene' quelle anetsocop. Ñaña masheñ Cuartopa'cho'ña mueneñ o'ch huom̃cha'tas ñeñfara añ necartot.

²⁴ Yepartsesharepa'chña Jesucristo sa'nataya allohuenes. Ñeñtpa' attetepa'ch Nompore.

Atto all huañen Yompor po'ñoñ añ cartotpa' ya'ye'chochtatoñepa'ch ora allohueney

²⁵ Te'ñapa' ya'ye'chochtatoñepa'ch Yompor tarro'mar ñapa' ñach ahua-mencañ sepene', ñeñt e'ñe atet oten añ cohuen ñoñets alloch yequesh-perra. Ñeñfara añ cohuen cotapñats ñeñt neserrpare'tatenes ñeñt e'ñe atet pena Jesucristo ñeñt ahuatoteñ ama eñotpahuo. ²⁶ Tarraña te'pa' Yompor ñeñt ama arromñatēshayayepa' muenaterrey o'ch yeñoter ñeñt ama eñotpahuo ahuatoteñ. Ñehua, ñapa' ahuatpa' añ eñotate't ñeñt a'mta'yesaye't po'ñoñ, ñetñapa' ahuo'ch quellquēnet ñeñt atet eñotatenanet Yompor. Attochña yeñoter yaña, ama't ñaña allohuen pa'namen acheñenesha'; allochñapa' attoch e'ñe yame'ña'huerra ora eraparen, ñeñtey pa'namen acheñey.

²⁷ E'ñe puemuereño'fey Jesucristo aye'chochtatarettepa'ch Yompor erponohuañen, ñeñfara Yompor ñeñt ñapuef e'ñe eñotañtetsa. Ñeñtpa' attetepa'ch Nompore. Allohua huañ añ necarta.

Pablo

AÑ ÑANOM SAN PABLO PO' CARTA ÑEÑÑ QUELLCAN CORINTO' MARNESHA' 1 CORINTIOS

Atto Pablopá' quellcan carta añecop ñeññ ame'ñetsa anetso Corinto

¹⁻² Masheñeshacha' ñaña nochaneshacha' ñeñtes allohuenes e'ñe same'ñeñoť Yompór ċhocma sapċhena parro all anetso Corinto, ñeñtes o' hua'ñerres Parets attoch pueyochresha' perres atto e'ñe separrocmateñoť epas Cristo Jesúspa' sañapa' sa'cohuentataretterra Partsocop. E'ñe parrocma hua'ñerres Parets attoch pueyochresha' perres, e'ñe attecma o' hua'ñerran allohuen ama't erra'tsena acheñer ñeññ e'ñe pame'ñeñoť ċhore'tene' Yepartseshar Jesucristo ama't errate' yeċha'yenet. Ñeñña Jesucristo ñeññ Yepartseshar yepen ora allohueney ñeñfey ame'ñenaya. Na Pablon sequellquene'ña añ carta epan masheñ Sóstenes. Napa' Jesucristo puellsensaren tarro'mar Yomporpa' ñeñfecopña o' ċhore'terren attoch nesherber. ³ Te'ña e'ñe nehuomċha'teñoťespa' o'ċh notas: Yomporepa'ċhña sebensare'tamċpene' ñeññara Parets epuet Puechemer Jesucristo ñeññ Yepartseshar yepen. Ñetepa'ċhña socshatene' e'ñe sa seyoċhro allohuenes.

Arrpa' all parasyoso'tamċsanet

⁴⁻⁵ Te'pa' o'ċh notas, napa' ċhocma neparasyoso'teñ Yompór socop tarro'mar ña puemuereñoťpa' atarr bensare'tamċpenes. E'ñe separrocmateñoť Cristo Jesúspa' o' eñotaterres pa'namen coċhnesha' cotapñats seyoċhro. Ñeñño'mar te'pa' ama't ora allpon señosyen e'ñe ñeshoťpa' e'ñech cohuenare' señosyen. Ñaña ama't allohuen cohuen cotapñatspa' o' señoťuer. ⁶ Ñeññ atet yotuanmas ñeññċha' atet ponas Cristo, te'pa' atetċho' o' etsotatuonas. ⁷ Ñeñño'marña te'pa' ama es pallteto ñeññċha' apuerrser po'poñ Yompór. Te'pa' aña palltetsa o'ċh secuame'teñ esempohuañencha' huerra Yepartseshar Jesucristo. ⁸ Ñeññara Jesús ñeññċha' allo'na huomenc sepa'nene' seyoċher. Attoťach ċhap allempoċh huerra Yepartseshar Jesucristo. Attoťhña allempopa' amach eñalle alloch otteñe'ċharetes ama't mamesha. ⁹ Tarro'mar Yomporpa' ama puenesho po'ñoñ, erroť oťpa' atetċha' pa. Ñeññara Yompór ñeññ o' hua'ñerrey o'ċh yeyemterrñaña Puechemer ñeññara Yepartseshar Jesucristo.

Arrpa' all yeċhatanet attoch e'ñe patrra cotapñats anmuet

¹⁰ Te'pa' o'ċh masheñeshacha' ñaña nochaneshacha' notas ñeññċha' atet sepa, e'ñech patrra soťape'ċh allohuenes. Amach allo'na soťape'ċhyesatsto po'poñe'ttsocma. E'ñech patrra cotapñats soťape'ċh allohuenes; erra'tsen soťape'ċhpa' ñeññach cohuen sent allohuenes. E'ñe patrra soťapññoťpa' o'ċh separrocmatua allohuenes. E'ñe yame'ñeñoť Yepartseshar Jesucristo ñeñño'marña notenes ñeññċha' atet sepa. ¹¹ Tarro'mar ñeññ parro yeċhena Cloépa' ñetpa' e'mare'tatnet atto' sepena. Ñeññpa' atet otnet atto sa masheñeshacha' ċhocma po'poñ sentanna'tyena. ¹² Ñeññ notenespa' ñeññpa' atet sepena: Puesheña'tsospa' atet sotyen: "Napa' añaċha' name'ña masheñ Pablo."

Po'potantaññapa' ñeñtpa' atet otyenet: "Napa' añcha' name'ña masheñ Apolos." Po'potantaññapa' ñeñtpa' atet otyenet: "Napa' añcha' name'ña masheñ Pedro."* Po'poñechnoñapa' atet otyenet: "Napa' añcha' name'ña Cristo." ¹³ Ñehua, ama't señotheña, po'ñoçhpa' ama eñalle attoch yellopa'tetstach Cristo. Po'ñoçhpa' amaca'ye naye' corso'tam̄pseto ñeñt e'ñe socop attoch na'queshp̄atas. Ña'ña ama naye' same'ñeñoñ o' sapataretterroña Partsocop. ¹⁴ Napa' atarr neparasyoso'teñ Yompor tarro'mar napa' ama muenatno o'ch napatas ama't puesheñarrofesa Partsocop. Ñehua, napa' e'ñe epsheña napat Partsocop, ñeñtpa' masheñ Crispo ña'ña masheñ Gayo. ¹⁵ Napa' e'ñe nocshena tarro'mar te'pa' amach errotenoñ sotno e'ño' na same'ñeñoñ sapataretterra. ¹⁶ Ñehua, po'ñoçh ellopa' napach masheñ Estéfanos epuet pamo'tsesha'. Ñerra'm eñalle' po'poñechno ñeñt napatpa' tarraña ñeñtpa' ama neñoteñ. ¹⁷ Napa' ama añcepaye' llesensa'noña Cristo o'ch napatyes Partsocop ñeñt allpon ame'ñetsa, añeçpaña llesensa'n attoch o'ch neserrpare't cohuen ñoñets alloch yequeshp̄erra. Ña'ña ama añeye' coçhnesha' na neñoñ neserrpare'tatenso, tarro'mar ñerra'm aña neserrpare'tatenes coçhnesha' neñoñ name'ñatasapa' çhate' soten atto rroma Cristo corsochopa' ñeñtpa' amaca'ye es sherbeno attoch yame'ñera Cristo.

Añ ñoñets atto rroma Cristo corsocho, ñeñña ñoñets Yomporo po'huamenc alloch a'queshp̄atyerran acheñenesha'

¹⁸ Po'ñoçh ñerra'm esempo yeserrparen atto Cristo rroma corsocho e'ñe ya yo'chñaroñpa' añña acheñenesha' ñeñt chenquetsapa' çhach otenapuetañ attate' yotatse'tyen. Tarraña ya ñeñtey a'queshp̄atareteypa' añña ñoñets atto rroma Cristo corsochopa' ñeñña ñoñetspa' yeñoteñ allotña huena Yompor po'huamenc attoch a'queshp̄atyerran acheñenesha'. ¹⁹ Tarro'mar añ ñoñetspa' e'ñe anuaret ama't ahuatoteñ, ñeñtpa' atet oten Yompor:

Ñeñt entetsa ñapa' nanaco' es eñoten patso'marecoppa' napa' o'ch na'huañam̄pesuanet ñeñt pueñoteñ. Ña'ña ama't ñeñt entetsa ñapa' nanaco' eñotañtenapa' napa' o'ch nehuapore'tam̄pes atto es eñotatse'tyenet.

²⁰ Ñehua, ama't señotheña, ama't ñeñt nanac es eñotatse'tyets arr patsro ama eñalleña ñeñt atarr asherben enten Yompor. Ña'ña ñeñt atarr etsotayenayeñ ñoñets ñeñt atet anuaret ahuatoteñ ña'ña ñeñt nanac eño'ñattetsañ aña patsro ama eñalleña ñeñt atarr asherben enten Yompor. Ñetpa' çhate' otenapuetañ atarrte' es eñotenet tarraña Yompor o' eñotatuay po'ñoçh ñeñtpa' e'ñeca'ye orrena atet otatse'tyenet arr patsro. ²¹ Tarro'mar Yomporpa' e'ñe pueñoteñoñ ñapa' ama pocteye' enteñe e'ñe ya yoçtaññoñpa' o'ch yenter Yompor, ama't yapa' yoteneñ atarrte' es yeñoten. Añmapa' ñeñña pocte' enten Yompor: ñeñtara coçtaññats ñeñt atto rroma Jesucristo yocop ñeñt çhach enteñet ñerra'mrrate' atta yotatse'tyen, añ ñeñtara coçtaññats ñeñña muenen Yompor o'ch yeserrpare'toñ alloch a'queshp̄aterrey allohueney ñeñtey ame'ñenaya.

²² Ñerra'm esempo yeserrpare'tach judionesha' atto Cristo rroma yocop, ñetñapa' amach asherbenaye' entenetoña yoçtañña tarro'mar

* 1:12 Añ Pedropa' ñeñtara otenet Cefas.

ñetpa' añach muenet yorrtatanetepa'to' Cristo po'partsoña. Ñaña ñerra'm esempo yeserrpare'tateñ ñeñt ama judioneshayeyeto atto Cristo rroma yocop ñetpa'cho'ña amach asherbenaye' entonayetoña yocpañña tarro'mar ñetpa' añach muenet yorrtatanetepa'to' ñeñticha' eñotatahuet e'ñeñe' po'ñoçh atet yoten. ²³ Tarraña yapa' añcha'ña yeserrpare'tatanet atto Cristo rroma corsocho yocop. Tarraña añña judionesha' puet-sena'teñoñetpa' amach cohuenaye' enteñeto. Ñaña ñeñt ama judioneshayaye ñetpa'cho'ña attach enteñet ñerra'mrrate' atta yotatse'tyen. ²⁴ Tarraña acheñenesha' ñeñt o' ame'ñerra ñetpa' o' çhapanet pueyoçhreto po'ñoçhpa' Cristo e'ñe Pomp por po'huamenco'tpa' o'ch a'queshpaterrey, ñaña e'ñe Pomp por pueñoñeñotpa' o'ch a'queshpaterrey. Atteçma o' çhapanet pueyoçhreto ñeñt o' ame'ñerra ama't ñeñt judionesha' ñaña ama't ñeñt ama judioneshayaye. ²⁵ Ñeñt ama ame'ñetsopa' ama't otenapuetañ Yompor poçtañña' attate' otatse'tyen, tarraña ñeñtara poçtañña e'ñe ña pueñoñeñ ñeñtña nanac sherbets. Acheñpa' ama't atarr es eñoteneñpa' tarraña poçtaññetpa' ama tama sherbeno tarro'mar acheñpa' ama tama es eñoteneto. Ñaña ama't otenetañ Yompor po'huamencpa' ama a'ñshe'maye' orrtenopa' tarraña yocoppa' ello metanennay allohueney yehuamenc tarro'mar yapa' aromña'faya. ²⁶ Ñehua, masheñneshacha' ñaña noçhaneshacha' soçtape'ch allempo hua'ñerres Cristo o'ch same'ñera. Allempo ama't acheñenesha'pa' entasete't sapa' ama esoye' señoñe'te tarraña Yomporpa' o' hua'ñerres, ñaña ama't ama sasherbeno, ñaña ama't ama añeyayso puechemeres añcha'taret. Ñehua, ñato' pueñeña'ttsospa' ñeñtes, tarraña ama allohuenacmaye' attecmaso. ²⁷ Añña poçte' enten Yompor o'ch a'queshpatan acheñ ñeñt acheñenesha'pa' çhach otenapuetañ ñeñtpa' amate' es eñoteno. Tarrecop poçte' enteñ Yompor allochñapa' o'ch pencatan acheñenesha' ñeñt nanac es eñotatse'tyets. Añpa'cho'ña poçte' enteñ Yompor o'ch a'queshpatan acheñ ñeñt acheñenesha'pa' çhach otenapuetañ ñeñtpa' amate' esoyaye. Tarrecop poçte' enteñ Yompor allochñapa' o'ch pencatan acheñenesha' ñeñt çhach otenapañ ñetpa' atarrte' es sherbenet. ²⁸ Añpa'cho'ña poçte' enteñ Yompor o'ch a'queshpatan acheñenesha' ñeñt entenet ñeñt ama es-oshe'mayaye ñaña ñeñt atsena'taret. Ñaña añ acheñer muenen Yompor ñeñt ama es echeno attoch sherba' ama't mamesha. Tarrecop mueneñ Yompor allochñapa' ñoñetpa' o'ch huapore'tam'psan acheñ poçtañña ñeñt añ patso'mara. E'ñech orrena enteret acheñ poçtañña. ²⁹ Ñeño'marña ya acheñeypa' ama't pueñeñarro'teya ama poçteyaye o'ch e'ñe yañeña cohuen yentena tarro'mar Yomporpa' ama atteye' entenye. ³⁰ Tarro'mar ñapña Yompor yapuene'ña attoch yapa' corretsayach. E'ñe yeparroc-mateñoç Cristo Jesús a'crrateney Pomp or. Ñaña Yomporpa' atto nan Puechemer Cristo ñach yeñotaterre' ñeñt cohuentetsa Yeyompor-recop, ñaña ñeñtara Cristo ñeñticha' e'ñe cohuen a'poçtatene' yocop attoch cohuen entueney Pomp or ñaña ñeñtara Cristo ñeñtña a'cohuentaterrey Partsocop, ñaña ñeñtara Cristo ñeñt yetsa'terroya yo'chñar attoch yequeshperra. ³¹ Ñeño'mar atet anuare'tta Yompor po'ñoñ ahuat: "Ñerra'm eseshaycha' es aye'choçhtatetspa' Yomporecpuepa'chña es ya'ye'choçhtaten."

2

Arrpa' all yerpaterranet atet serrpare'tatenaneta' ahuaña ñeñt atto Jesucristo rroma yocop corsocho

¹ O'ch notas masheñeshacha' ñaña nochaneshacha', ahuaña allempo nechap seshopa' neserrpare'tatoses cohuen allempo na' potonas Yompor poctaþña. Allempopa' ama cochneshoteye' neñoñoť na' potonaso Yompor po'ñoñ atet noñets cochnesha' entyen acheñenesha'. Ñaña ama cochneshoteye' noctapñoť na' potonaso Yompor poctaþña atet ñerra'mrrate' acheñ ñeñt nanac eñotañ entueñ allohuen acheñenesha'. ² Añña e'ñe patrra cotapñats neserrpare'tatenes ñeñt atto Jesucristopa' rroma yocop corsocho. Tarro'mar allempopa' atet noten neyočhro ñeñtach paterr o'ch neserrpare'tatanet. ³ Ama't allempopa' ama asherbenoteye' norrtoso sesho. Ñaña allempopa' atarr nemcha'ten, čha neyoruos nellquěñoť. ⁴ Ñaña ama ne'ñoreñoťe' e'ñe cohuen neserrpare'tataso attoch same'ña'na e'ñe neñoñoťa ñeñt atet pena ñeñt čhach otenapañ ñapa' nanacte' es eñoten. Añña e'ñe neserrpare'teñoťa norrtatonas ñeñt atet þonay Parets Puecamquěñ e'ñe po'huamencoť Yompor. ⁵ Ñaña ya acheñeypa' ama't cochnesha'tatsta yoctapñapa' tarraña napa' ama nemno e'ñe na neñoteñoťpa' o'ch name'ñatasa. Napa' añña nemnen o'ch name'ñatasa e'ñe Yompor po'huamencoť.

Yompor Puecamquěñpa' ñeñña es yeñotatene'

⁶ Tarraña ama't atetpa' esempopa' o'ch neserrpare'tach ñeñt o' ame'ñerra huomenc. O'ch neserrpare'tatanet e'ñe cochnesha' cotapñats, ñeñtara Yompor poctaþña ñeñt atarr es eñotets. Tarraña añ cotapñatspa' amach patso'mareyaye, ñaña amach aneyaye amcha'taretečno poctaþña ñeñt aňe patsro'tsen. Tarro'mar ñetpa'čho'ña huañerretcha' esempo. ⁷ Yomporepa'chña poctaþña ya'poťa ñeñt atarr es eñotets, ñeñtara ama't ahuatoteñpa' ama eñotpahuo poctaþña. Tarraña ama't allempo ama ayečcatarettena' patspa' ñeñtñapa' o' anaretetua attoch cohuencha' ya'queshpataretterra esempohuañen. ⁸ Añña amcha'taretnesha' ñeñt aňe patsro'tsa'yenpa' ama čhapaneto Yompor poctaþña. Ñerra'm čhapanetañcha' ahuaña pueyočhretopa' amate' corso'tañperetañeña Yepartseshar ñeñt atarr nanac cohuen. ⁹ Tarro'mar atet anuaretta Yompor po'ñoñ ahuať, ñeñtapa' atet oten: Ama't ahuaťa ya ñeñtey arromñateyapa' ama yentare ñeñt o'patatenya Yompor ñeñt cochnesha'tetsa yocop, ñaña ama ye'mare, ñaña ama čhaponaye'te yeyočhro ñeñt o'patatenya Yompor ñeñteycha' morrenterraya ña.

¹⁰ Tarraña ñeñteyña ame'ñerraya ñeñtey allohueneypa' o' eñotaterrey Yompor e'ñe ña Puecamquěñoť ñeñt chorratenya. Po'ñočh yeñoteñ Yompor Puecamquěñpa' ña eñotuene' allohuen Yompor poctaþña ñaña ama't ñeñt ama eñotpahuooyaye.

¹¹ Attecma yepena yaña ñeñtey acheñey. Amach errotenoť po'psheñeñpa' eñotonay atet yoctape'chen ya yeyočhro, e'ñech yapta yeñoteñ. Attecma pena ñaña po'potantañ amach errotenoť eñotano Yompor poctaþña, e'ñech Yompora ñapueť Puecamquěñ eñotene'. ¹² Yapa' o' yagapoñ Yompor Puecamquěñ, amaña acheña poctaþña yaguerro ñeñt patso'marecpa. Ñeñtara Yompor Puecamquěñ ñeñt čhapatene'

yeyochro ñaña ñeñt yeñotatene' atto ña muerenya. E'ñe puemuereñoŕey shonte' es apa'yeney. ¹³ Ñaña ñeñt ñoñets ñeñt yeŕhateney Yompor Puecamquẽña' ñeñtara ñoñets o'ch yeserrpare'tatas saña ama't ñaña po'potantañechno. Ñeñtpa' ama añeyaye ñoñets ñeñt atet yeŕhatyen acheñenesha' ñeñt eñotañetyetsa. Ñaña ñeñt ñoñets atto yeŕhateney Yompor Puecamquẽñoŕpa' ñeñt yeyŕhatenes saña ñeñtes o' chorrerra saña Yompor Puecamquẽñ.

¹⁴ Tarraña acheñenesha' ñeñt ama chorreña' Yompor Puecamquẽña' amach errotenoŕ ŕhapaneto Yompor poctaŕña ñaña amach errotenoŕ agapoñeto ñeñtcha' apanetañ Yompor Puecamquẽñoŕ. Ñerra'm yeserrpare'tatanet atto es apueney Yompor Puecamquẽñoŕpa' ñetpa' ŕhach otyeset atto yotatse'tyen. Tarro'mar ñaŕta ŕhenana pueyoŕhro ñeñt chorrena Yompor Puecamquẽñ. ¹⁵ Tarraña añña ñeñt chorrena Yompor Puecamquẽña' ñetpa' ŕhenanet pueyoŕhreto ora ñeñt atet pena Yompor. Tarraña ñeñt ama chorreno Yompor Puecamquẽñ, ñetñaŕpa' amach errotenoŕ ŕhapaneto pueyoŕhro esocopte' atet penaña ñeñt chorrena Yompor Puecamquẽñ. ¹⁶ E'ñe attecma oteney Yompor po'ñoñ ñeñt anuaŕet ahuaŕoteñ, ñeñtpa' atet oten: "Esesha'huate'ca' eñote'ña ñeñt atet coŕape'chen Yompor attoch ñetpa' o'ch coŕape'chateret ñamet Yompor." Tarraña te'ña yapa' attecma yoctape'chen atet coŕape'chen Cristo.

3

Arrpa' all ama patrraye' coŕape'cheno corinto'marnesha'

¹ Ñaña o'ch notas masheñneshacha' ñaña noŕhaneshacha' ama't ahuañoŕeñ noteneñ o'ch noctape'chatas e'ñe cohuen, atet noctape'chateñ acheñ ñeñt e'ñe chorrena Yompor Puecamquẽñ. Tarraña amach errotenoŕ noctape'chataso tarro'mar sapa' atŕa socrena atet muenatenes sechets. Cha sottena atet ñerra'm cheshaŕoll ñeñt ama eñotena'. Sapa' ama e'ñe ŕhennasa' ñeñt cohuentetsa Cristocop. Ñeño'mar teme'ttsen atŕa noctape'chatenes atet ñerra'm cheshaŕolleshasa. ² Ñeño'marña ahuañoŕeñ atŕa neñotatenes ñeñt ama torrapahuoyaye Yomporecop. Ñeño'marña amach erroteno noctape'chaterrserro ello ñeñt nanac echarr coŕaŕñats. Atŕa sottena ñerra'mrrate' ematoll, napa' atŕach nemomatenes semomos atet peñet ematoll, ñeñtara yoten coŕaŕñats Yomporecop ñeñt ama echarro. Ñaña ama echarroye' serrar napuenso, tarro'mar amate' erroteno setsoto, ama't teme'ttsenpa' ama setsoteññañe Yompor poctaŕña ñeñt nanac echarr. ³ Tarro'mar teme'ttsen atŕa socrena atet muenatenes sechets. Po'ñoŕh ñerra'm esempo es yeye'chapretannena, amapa' ñerra'm ŕho ye'moñe'tannena, ñeñtpa' atŕa yocrena atet muenateney yechets. Ñeñtpa' ama'tña atŕera sorrteno atet pena acheñ ñeñt ama ameñenayo Cristo. ⁴ Tarro'mar ñerra'm ŕha yotyen: "Napa' añcha' name'ña Pablo", po'psheñeññaŕpa' ñato' oten: "Napa' añcha' name'ña Apolos." Ñeñt atet sepena ŕhachca'ye sottena ñerra'mrrate' ñeñt ama Cristona'tareyaye.

Puesheña'ttsoypa' añ yetorra'yena Yomporecop ñeñt atet yechyenya

⁵ Ñaña o'ch notas, yapa' ama esoyayye ama't Apolos, ama't na, añayaca'ye ñeñtey torretsa Yomporecop. Yapa' amñareŕeya attoch o'ch yame'ñatasa. Puesheña'ttsoypa' añ yetorra'yena Yomporecop ñeñt

atet yechyenyá. ⁶ Atet ñerra'm napa' na ñanom same'ñate' Yompor po'ñoñ. Alotñapa' ahuo't huapa ñaña Apolos, ñapa' ña seserrpare'tate' attoch allo'na sesen huomenc pa'nmué' seyoçher. O'ch netma'ntacha atet: Napa' atten ñerra'mrrate' ñeñt nare'tets. Alotñapa' o'ch huapa po'psheñeñ ñeñtcha' she'tamo're'tosets, Yomporñapa' ñach a'chpate' narmets. ⁷ Ñeñto'mar yeñoteñ ñeñt nare'tetspa' ama esoyaye, ama't ñaña ñeñt she'tamo're'tetspa' ama esoyaye. Aña Yompor ñeñtña es a'chpatets ñaña sherbets. ⁸ Ñeñto'marña yeñoteñ ñeñtey nare'tets ñaña ñeñtey she'tamo're'tetspa' e'ñe parrocma yetorra Yomporcop. Elloña Yomporpa' apa'yerreycha' puesheña'ttsoy cohuen ñeñtcha' atarr yocshaterre'. Apa'yerreycha' erro'tente' yetorra'yesnoma ñocop. ⁹ Yomporpa' enteney atet ñerra'mrrate' parro yetaruasen ñocop. Sapa' Yomporpa' entenes atet ñerra'm ña pa'mres, allcha' nanac torrena ña.

Ñaña Yomporpa' entenes atet ñerra'm pocoll o'ch tomatey ña. ¹⁰ Atet ñerra'm na, Yompor puemuereño'pa' o' yeçhaten na o'ch neñoç e'ñe huomenc, attoch nanomcha' ame'ñaterraya acheñenesha' Jesucristo. Ñehua, o'ch netma'ntacha atet ñerra'm Yomporpa' o' yeçhatenen attoch o'ch neñoç tomate' pocoll e'ñe huomenc. E'ñe neñoçno' o'ch natomat ñanom quellpach e'ñe echarr. Alotñapa' o'ch huapa po'psheñeñ ñeñtcha' allo'na yeçchatnomue'. Tarraña ñeñtcha' allo'na yeçchatnomue'pa' cotape'chepa' ñanom, pocte'te' atet peñ, ñato' amate'. ¹¹ Ñehua, añ quellpach ñeñt anaret ñanompa' ñeñt toma'ntenaya atet ñerra'm ya ñanompa' o'ch yame'ñera Jesucristo. Ñap'ach Cristo yame'ñerra. Ama eñalle po'poñ ñeñtcha' yame'ñerra, tarro'mar amach erro'tenot yame'ñyo po'poñ ñeñt ama Cristoyaye, aña'ña ñeñtara Cristo ñeñt o' yotuanmas. ¹² Ñeñt o' yame'ñata Cristo, ñetpa' allo'nach yeyçhatnenanet aco'pa attoch huomenc pa'nmué' pueyoçher. Ñehua, o'ch netma'ntacha atet: Ñerra'm çho yeyeçcaten pocoll ñanemcha' quellpach yatomat. O'chña echarr yatomatua quellpachpa' allo'nachña yesen yeçchatnomue' pocoll. Erra'tsenpa' ñato' o'ch yeçcatenan oropo' pocoll ñeñt atarr nanac cohuen, ñato' po'psheñeñpa' o'ch yeçcatan asrepo' ñeñt nanac cohuen ñaña, po'psheñeñpa' o'ch yeçcatan cohuen mapyepo' ñeñt nanac tsa'te'. Tarraña ñato' po'psheñeñpa' o'ch tomatan tablapo' ñeñt ama tama cohuenayaye, ñato' po'psheñeñpa' aspanapo'ch, ñeñtpa'çho'ña amach tama cohuenayaye, ñato' po'psheñeñpa' atach yeçcatan atet ñerra'mrrate' posho'llpo' ñeñt ama cohuenayaye ama't mamesha. ¹³⁻¹⁴ Esemphuañeña allemphoç huerra Cristopa' entatuareteycha' allohueney ñato' espo'te' yeyeçcatyes yepaquëll, ñato' oropo', ñato' tablapo' amapa' ñato' atet ñerra'm posho'llpo'. Ñehua, aña'ña yeñotate'tso'. Yompor poyoroçhenño'pa' o'ch etoman'pesyesonay yepacla'çho. Ñehua, yeñoteñ ñeñt oropo' amach poyo, asrepo'pa'çho'ña amach poyo, mapyepo'pa'çho'ña amach poyo. Tarro'mar ñeñtpa' ama acraño, ñeñto'marña nanac sherben. Tarraña tablapo'pa' ñeñtpa' poyuach, aspanapo'pa'çho'ña poyuach, posho'llpo'pa'çho'ña poyuach. Tarro'mar ñeñtpa' ama es sherbeno, attochña eñotuareteycha' e'ñe puesheña'ttsoy erro'tente' yeyeçcatyes, ñato' cohente' ñato' amate' cohuenayaye allempho es yetorra'yesnoma Cristocop. Ñerra'm esemphoç etoman'pesyesonay yeyeçcatar ñerra'm amach poyo yeyeçcatar,

allemPOCHña yeñoch atto es yetorra'yesnoma Cristocoppa' ñeñtpa' e'ñe cohuen. Ñeñto'marña allempopa' aphuerreycha' e'ñe puesheña'ttsoy ñeñtcha' atarr yocshattere'. ¹⁵ Tarraña ñerra'm yeyeçcatarña çha poyuapa' o'ch yeñoch atto yetorra'yesnoma Cristocoppa' ama es sherbeno, çhach a'chencatonay yeyeçcatar ñeñt Cristocpañ. Tarraña ama'tcha' a'chencatonay yeyeçcatar, yaña yecamquëñpa' queshperrach. Tarraña e'ñech yemuerochenñota yequeshperra atet ñerra'm çho poyen pocoll yañapa' o'ch yequeshpa.

¹⁶ Te'pa' o'ch notas po'poñ: Sapa' ama't señotheña Paretspa' o' pa'paquëll perres allohuenes ñeñtes ame'ñetsa. Yeparrocmatueñoñ allohueneypa' te'pa' e'ñe atet enterrey atet ñerra'm pa'paquëll, allcha' yeçhena Puecamquëñ ña. ¹⁷ Tarraña ñerra'm esesha' alla soctape'chattere' ñeñt ama cohuenaye' enteno Yompor ñeñtña atet petsa çhach ottena ñerra'mrrate' çho a'matenan Parets pa'paquëll. Ñerra'm esesha'ña a'matene' Parets pa'paquëll ñeñtña Yomporpa' çhocmach a'chencater. Tarro'mar Parets pa'paquëllpa' ñeñtpa' Partsocpa, saca'yeña o' pa'paquëll perresña Parets ñeñt e'ñe ñocpa.

¹⁸ O'ch noterrser po'poñ: E'ñech señota sañeña. Ñerra'm eseshas otets, napa' atarr es neñoten añe patsro, añ pocte' o'huañepa'ch es eñotatse'tyes e'ñe patso'mara. Añña pocte' o'ch orrta atet ñerra'mrrate' ama es eñoteno. Añepa'chña eñot ñeñt huetsa Yomproshot. ¹⁹ Tarro'mar ñerra'm esempo ñeñtey acheñey añe patsro ñerra'm çha yotenapañ yapa' atarrte' es yeñoten, Yomporña' atet enteney ñerra'mrrate' çha yotatse'tyen. Ñeñtpa' anuaret ñaña ahuatoteñ Yompor po'ñoño, ñeñtpa' atet oten: "Ama't atto es eñotatse'tyenetpa' Yomporña' o'ch eñotanet atta otatse'tyenet, ama't ñetpa' otenapuetañ nanacte' es eñotenet tarraña ñeñtpa' shequëñtsa." ²⁰ Añ ñoñetspa'çho'ña anuaret ahuatoteñ, ñeñtpa' atet oten: "Ñeñt çha otenapañ nanacte' es eñotenpa' añña Yomporpa' eñotenanet ñeñt atet cotape'chenet ñetpa' e'ñe orrena." ²¹ Ñeñto'marña te'pa' o'ch alla noterrser: Amach ellocma sa'ye'choçhtatanna'tyesatsto atet yoctape'chen ya ñeñtey arromñatey. Tarro'mar allohuen ñeñt apuenes Yompor ñeñtcha' soctape'chate' cohuen. ²² Ama't na Pablonpa' Yompor o' nà'n ñeñten allohuenacpas, ñaña ama't masheñ Apolos, ñaña ama't masheñ Pedro. Yomporpa' apueney allohuen ama't ñeñt yentyes añe patsro ñeñtcha' yeyenpue' ñeñt alloch yocsheña Yompor. Yocsheñepa'ch ama't allempo yocrrena, ñaña ama't allempoch yerroma, ñaña ama't ora allpon ñeñt eñall te' çhocmuepa'ch coshateney. Ñaña ora allpon ñeñtcha' eñalletatsa tsapaonetpa' ñeñtpa'çho'ña coshatasepa'ch. Ama't allohuen ñeñt pa'namen esoçhno ñeñtpa' yocop ñeñtcha' yeyenpue'. ²³ Elloña yapa' e'ñe pueyochresha' pohueney Cristo allohueney, Cristoñapa' Parets Puechemer pene'.

4

Atet pena ñeñt torretsa Cristocop

¹ Ñeñto'marña te'pa' notenes, epsheño'marey na epan masheñ Apolos, añ pocte' o'ch senteney atet ñerra'm ñeñtey torretsa Cristocop. Ñaña añ pocte' o'ch senteney atet ñerra'm yapa' eyecharetey o'ch ya'potoñ Yompor po'cohuenña. ² Ñehua, yeñoteñ ñerra'm erra'tseney

eyechareteypa' añcha'ña atet yepena atet yechenyet. ³ Ñato' sapa' sentenente' napa' nepena atet eyechareten ñato' amate', ñeñtpa' ama añecpayaye ñeñt atet nellquëna na. Ama't acheñenesha' ñeñt amcha'taretetyetsa, ñerra'm errotente' entennet ñeñt atet nepenapa' ñeñtpa'cho'ña ama añeyaye ñeñt atet nellquëna na. Ama't napa'cho'ña ama neyemteno ñeñt atet nentena e'ñe nañeña. ⁴ Ñehua, e'ñe cohuenare' nenteñeñ allohuen ñeñt atet es nepa'yen, tarraña ñeñtpa' ama añeyaye alloch yeñoch e'ñefe' cohuenare' es yepa'yen. Añña e'ñe pocte' nenten Yepartsesharcha'ña otats e'ñefe' pocte' entenen, amapa' ñato' amate'. ⁵ Ñeñto'marña notenes, amach sotatsto atet: añ acheñer nanac cohuen, po'psheñeñpa' ama cohuenayaye. Te'pa' amach sotatsto atet, tarro'mar esempohuañencha' huerra Yepartseshar. Allempopa' ñachña eñotaturrets ñeñt ya'nasotyena te'. Ñaña ñachña eñotaturrets ama't ñeñt atet yemna'yen yeyochro. Errponeycha' ñeñtey cohuen entuerr Yomporpa' allponeycha'cho' aye'chochtatuerr.

⁶ O' notuas ñeñt poctetsa ñeñtcha' atet sentey ya epan masheñ Apolos. Masheñeshacha' ñaña nochaneshacha' tarro'mar atet notenes, allochñapa' attoch señoach añ pocte' e'ñech attecma senteñ ama't allohuen acheñ, e'ñe atet oteney Yompor po'ñoñ ñeñt atet anuaret ahuatoteñ. Allochñapa' amach yommo'chatsche acheñ ñeñt cohuen yenten e'ñe yañeña. ⁷ Sapa' atarr cohuen sentena sañeña tarraña amaña po'psheñeñye' atarr eñotañ sentenaye ama't puesheñarra. Ama't allpon señotyenpa' amaca'ye e'ñe sotaye' es señotyeno; Yomporca'ye señotatene'. Po'ñoçhpa' atto Yompor es eñotatenespa' eso'mare'tña sommo'chyenaña atet ñerra'm e'ñe soña es señotyen.

⁸ Cha't sotenapañ o'te' nanac setsotoñ Yompor poctapña. Cha sottena atet ñerra'm ama es sepallteno ama't coñe'ta Yomporeshot. Yañapa' o'huañ acua'psenaye' senterrey. Sañapa' o' cha amcha'taretoyen sorrtena. Ñehua, e'ñe pocte' sa'mcha'tarettepa' tarro'mar ñerra'm po'ñoçh o'ch sa'mcha'taretterra' ñato' attotpa' o'ch semnatey yaña o'ch ya'mcha'taretapreterra. ⁹ Tarraña napa' noctape'chen ñato' ya ñeñtey allsensareteypa' Yomporpa' ñato' o'ch muenatan acheñenesha' yapa' o'ch a'ypo'ñerryet. Acheñenesha'ñapa' chach amtsen entenyet. Attach cohuanatyeny allohuen acheñenesha' arr patsro, ama't ñaña ñeñt Yompor po'millañoñeñaneshar o'ch cohuanatyet ñamet. ¹⁰ E'ñe yame'ñeñot Cristopa' añña acheñenesha'pa' chach otenet yapa' amo' es yeñoteno, tarraña sapa' chaña atet sentena ñerra'mrrate' atarr nanac eñotañes. Ñaña yapa' chach otenyet amo' esoshe'mayayye, tarraña sañapa' attaña ahuamencatoyen sentena. Ñaña sapa' nanac amcha'na'tpo' entenset, yañapa' amach acua'psenaye' entenyeto. ¹¹ Yañapa' teme'ttsen yemuerochtena ama't yachporrñoñ, yo'ñpañoñe'na yemuerochtena ñaña yemuelleñoñe'na. Atta epaye' atserrpenyet, ñaña ama yecheno allcha' yeycha. ¹² E'ñe yetorreñoñ nanac yetaruasen e'ñe ya yotot. Ñaña ñerra'm esempo sasare'tenyetpa' yañapa' o'ch yenamatenanet Yompor pa'nateña ñocpuet. Ñaña ñerra'm esempo pue'moñe'teñoñet cotare'tenyetpa' yañapa' attach ya'huantenanet. ¹³ Ñaña ñerra'm esempo sochatse'tenyetpa' yañapa' chach yamo'tstanet cohuen. Ñaña ama't teme'ttsen entenyet atet ñerra'mrrate' es

ahuapore'tareġ, ñeñġ ama es sherbetso ama't mamesha arr patsro.

¹⁴ Napa' ama añecpaye' nequellquënnaso añ ñoñets attoch o'ch nepencatas, añecopña nequellquënnas attoch noctape'chaterres e'ñe cohuen atet ñerra'm e'ñe nechemereres ñeñġ nanac nemuerara. ¹⁵ Na po'ño'chpa' atet nentenes ñerra'mrrate' e'ñe nechemereshas. Tarro'mar ahuaña allempo neserrpare'tatoses cohuen ñoñets ñeñġ Yomporeshotpa' o' name'ñatasa Cristo Jesús, ñeñġpa' atet ñerra'm cho nechemere'tensa Cristocop. Ñeñto'marña te'pa' notenes, ama't eñall shonte' acheñ ñeñġcha' soctape'chaterre' ñeñġ cohuentetsa Cristocop, tarraña e'ñe patrra sompor sepen ñeñġ ñanom same'ñate', ñeñġpa' atet ñerra'm na. ¹⁶ Ñeñto'marña napa' notenes: Atet sentenen atet nepena na e'ñe cohuen, sapa'cho'ña atetcha' sepa samña.

¹⁷ Ñeñto'marña nemñonas masheñ Timoteo; ñapa'cho'ña nechemer nepen. Ñapa' nanac nemorrenteña, ñapa' chocma ame'ñenana Yepartseshar. Ñapa' ñach seyerpate' Cristo poctapña ñeñġtara coťapñats neychatyes erracmañen errate' pame'ñeñotet apchenet Yomporecop. ¹⁸ Patanta'ttsospa' nanac sommo'chena atto es señoťyen. Sapa' cha't sotenapañ ñato' napa' amach ne'chapoña sesho. ¹⁹ Tarraña po'ño'chcha' ne'chap sesho ñerra'm Yomporcha' muenats. Ama't tayecmapa' poctet o'ch ahuen ñerra'm ña muenats. Esemepoch ne'cherrerrpa' allempochña neñotos ñeñġ ommo'chetsa, ñato' po'ño'chte' ahuamencatet Yomporecop, amapa' ñato' atate' ommo'chenet. ²⁰ Amaña e'ñe ñapña yeserrpare'teñoť yorrtateññañeña Yompor po'cohuenña attoch atarr ayochreshattena ña; po'huamencote'nachña yorrtateññañ po'cohuenña. ²¹ Ñehua, te'pa' o'ch na'pťo'tas: ¿Erroťena't semnen ñeñġcha' atet ne'poses allempoch ne'chap sesho? Ñato' o'ch necoñchatoses, ñato' o'ch soctape'cherr cohuen tayecma attoch esempoch ne'chappa' amach eñalle attoch o'ch necoñchatoses. Allempopa' ñato' ellochña chach nemuerosa e'ñe cohuen.

5

Atto Pablopa' ama pocteye' entano atto puesheñarr corinto'marnesha' orrtatan ñeñġ ama pocteyaye tarraña pamo'tsesha'ñapa' ama erroťeye' oteñeto

¹ Ñehua, te'pa' o'ch notas po'poñ. Tarro'mar atet otyenet, po'ño'ch eñallo' sesho puesheñarr yacma ahuo' yorerran pachoretsore'. Ñeñġpa' nanac ochña'teñets atet, tarro'mar ama't ñeñġ ama ame'ñetsopa' ama pocteye' entenetoña atet. ² Tarraña sapa' chocmo' cohuen senteñ ñeñġ atet sepena. Eso'mare'tña ama choye'ña llecatenso. Tarro'mar ñeñġ ochña'tets atetpa' amach allo'na senteñe attoch o'ch allo'na separrocmatnen epas. ³⁻⁴ Ama't napa' ama allo'tsenno parro, tarraña e'ñe neyerpueñoťespa' allo'tseney parro. Ama't ama allo'tsennopa' napa' o'ch notas necartoť ñeñġ poctet nenten na, attecma ñerra'm allo'tseney parro. Napa' o' neñoch ñeñġcha' atet sepe' ñeñġ ochña'tets atet. O'ch notas ñeñġcha' atet sepe': O'ch sapcha allohuenes e'ñe same'ñeñoť Yepartseshar Jesús; napa'cho'ña e'ñe neyerpueñoťespa' allo'tseneycha' parro. Allochñapa' e'ñe Yepartseshar Jesús po'huamencotpa' ⁵ o'ch sepon ñeñġ yacmar o'ch sapuer oneñet attoch a'coñchatoñ po'chets. Allochñapa' puecamquëñpa' queshperrach esempohuañencha' huerra Yepartseshar Jesús.

6 O'ch alla noterrser: Sapa' ama't sommo'chenañ atto e'ñe cohuenare' es sepeneñpa' tarraña ñeñpa' ama pocteyaye, tarro'mar atfa e'ñe semateñ achein' o'ch allo'na ochña'tnen. Ama't señoñe ñerra'm allo'na yemnatneñ o'ch ochña't ama't e'ñe puesheñarrotapa' tsapatonetpa' o'ch pet allohuenet atet. Ñato' o'ch netma'ntacha atet: "Ñerra'm yena' coñe't chase' allempo yeyechcaten pan, ama't e'ñe coñe'ta yena'pa' o'ch epa'hua ora, attoch e'ñe ropa'ptatuan ora pan." 7 Ñeñto'marña o' notas o'ch sa'ypo'ñerr ñeñt ahuat soctapña ñeñt nanac sosey. Añcha'ña o'ch setser-rataterr soctapña. Tarro'mar po'ñoç etserra o' yechcaterres Yompor. O'ch netma'ntacha atet pete't ahuat allempo o'ch çherr pascuapo çhocmach huapore'tuet allohuen pan ñeñt a'chasaret. O'ch yechcatet etserra pan ñeñt ama a'chasareteyaye. Ñaña pascuapopa' çhocmach muetsete't carrnerotoll, tarraña te'pa' Cristoña o' amtsaretta yocop. 8 Ñaña ahuat pascuapo añ coshatahuete't pan ñeñt ama a'chasareteyaye tarraña te'pa' añcha'ña yocshatterre' attoch o'ch ya'ypo'ña'huerr ñeñt ahuat yocapña ñeñt allo yo'chña'tare'te't ñaña ñeñt nanac sosey Yomporecop. Añcha'ña o'ch yocape'cherr etserra ñeñt e'ñe cohuenare' cotapñats Yomporecop ñeñtara cotapñats ñeñt e'ñe po'ñoç cohuen.

9-10 Te'pa' o'ch notas po'poñ. Ahuaña po'poñ necartotpa' atet notuas: Amach seyemtatscho ñeñt cheta'yene' coyanesha' amach puetaporeyaye. Ñehua, allempo notas necartotpa' añecop noten ñeñt ame'ñetsa tarro'mar ñerra'm attera cheta'yenan coyanesha', amach seyemtatsche achein' ñeñt atet petsa. Tarraña ama añecpaye' atet noteno ñeñt ama ame'ñetso ñeñt atet petsapa' amach seyemtatsche. Tarro'mar añe patsropa' çhocmach yeyemcha ama't ñeñt ama ame'ñetso, atet ñerra'm ñeñt cheta'yene' coyanesha' ñeñt ama puetaporeyaye, ñaña atet ñerra'm ñeñt atarr es ye'chapretetsa, amapa' ñaña eñe't, ñaña ñeñt ma'yochenaya ayeçcataret. Ñerra'm ama yeyemtaretopa' amate' erroteno yocroña añe patsro. 11 Añña notenes amach seyemtatsche ñeñt otets ame'ñenano' Cristo tarraña ñeñt attera cheta'yene' coyane-sha' ñeñt ama puetaporeyaye, amapa' ñeñt attera es ye'chapretyetsa, amapa' ñeñt attera ma'yochenaya ayeçcataret, amapa' ñeñt attera sasare'tets, amapa' ñeñt attera posa'tarets, amapa' ñeñt attera etyets. Ñeñt atet pa'yetsapa' amach seyematstero, ñaña ama't attapa' amach serrallme'cherro epas. 12 Ñehua, añecop atet o' notuas, tarro'mar yocoppa' ama pocteyaye o'ch yotteñe'chein' ñeñt ama ame'ñetso. Yocoppa' añña e'ñe pocte' o'ch yotteñe'chein' ñeñt pame'ñeñotet atterach es pan-tenet. 13 Yomporpa' ñachña otteñe'cherre' ñeñt ama ame'ñetso. Sapa' añña poctetsa socop sehupore'ch ñeñt atterach sosya'tsañach orrtatyenet.

6

Atto ama pocteyaye o'ch yetmantanna'ta

1 Te'pa' o'ch noterrser po'poñ. Ñaña o' ne'mare'tas atto sapa' çhocmo' setmantannena ñerra'm esempo errot sepannena, ñaña ama't ñeñteso' pueyochresha' o' perrsoñ Parets. Eso'mare't çhocma soteñña añcha'taret ñeñt ama ame'ñetso o'ch a'pocatonas ñeñt atto se'moñe'tannena. Socoppa' añña pocte' o'ch soch puesheñarr ñeñt e'ñe parrocmá same'ñena ñetcha'ña a'pocotate' ñeñt atet sepannena.

² Ama't seño'teñe ya ñeñ'tey o' pueyochresha' perrey Paretspa' yach am'cha'taretterrtsa allohuen acheñeneshacop arr patsro esempohuañen. Ñehua, ñerra'm po'ño'ch yeñoteñ o'ch ya'm'cha'taretterra allohuen acheñeneshacop arr patsro esempohuañenpa' eso'mare'tña ama seño'teñe o'ch sa'poc'tat ñoñets e'ñe sañeña ñeñ't ama torrapahuoyaye. ³ Ñaña ama't seño'teñe esempohuañenpa' yach am'cha'taretterrtsa ama't Yompor po'm'illaño'eñnanesharecop. Ñeñ'to'marña te'pa' notenes e'ñe pocte' o'ch ya'poc'tatanna'ta ya yeñoñ ñeñ't atet yey'chena te' arr. ⁴ Ñerra'm esempoc' setmantannenapa' eso'mare'tña o'ch sene' puesheñarr ñeñ't ama cohuenaye' enteno ñeñ't ame'ñetsa, ñach a'poc'tate' señoñ socop. ⁵ E'ñe nepencna'ntateño'es sapa' ñeñ'to'marña atet notenes: Seshopa' ¿ama'tña eñalleña ama't puesheñarra ñeñ't ame'ñetsa ñeñ't eñotene' o'ch a'poc'tatan ñoñets? Ñeñ't eñotene'pa' e'ñe pocte' ñach a'poc'tatene' señoñ ñeñ'tes parro same'ñena. ⁶ Tarraña te'pa' ama atteye' sepeno. Chocmo' setmantannena ama't ñeñ'teso' parro same'ñenañ. Sapa' ahuo'ch'cho' ahues tomantanna'ttsa a'yo allo'tsen acheñ ñeñ't ama ame'ñetso, ñapa' ahuo'ch'cho' a'poc'tatonas señoñ socop.

⁷ Tarraña ñeñ'tpa' ama pocteyaye ama't mamesha o'ch setmantannena. Tarro'mar ñerra'm chocma yetmantannenapa' ñeñ'tpa' ama añeye' yepeno atet muenen Yompor. Añña ñerra'm esempo erro't p'onas po'psheñeñpa' eso'mare'tña amaña alla sa'huantannenoña ñeñ't atto erro't es se'panna'tyena. Ñaña ñerra'm esempo es puerratañpensetpa' eso'mare'tña amaña alla sa'huantenaneto. Añ poctetsa o'ch alla ya'huantenanet alla. ⁸ Tarraña sañapa' ama atteye'ña sepeno. Añña sapa' chocmo' erro't se'pannena, ñaña chocmo' es seprratañpsannena ama't e'ñe sagattsa ñeñ'tes ame'ñetsañ.

⁹ Ama't seño'teñeña ñeñ't ama cohuen es petsopa' amach es o'paterroña all am'cha'tarettena Yompor. Amach semnatatsche po'psheñeñ o'ch atta shecare'tas. Po'ño'ch atet notenes, ñeñ't cañoresha'tetspa' amach es o'paterro all am'cha'tarettena Yompor. Ñaña ñeñ't po'yomporer pa'yene' aye'chcateretpa' ñetpa'cho'ña amach es o'patataretterretoña all am'cha'tarettena Yompor, ñaña ama't ñeñ't apretets taporets, ñaña yacmanesha' ñeñ't agapannetsa e'ñe ñagattset. ¹⁰ Allotpa' ñaña ñeñ't etyets ñaña ñeñ't atarr es ye'chapretyetsa, ñaña ñeñ't posa'tare'tyets, ñeñ't atet pa'yetsapa' amach es o'patataretterreto all am'cha'tarettena Yompor. Allotpa' ñaña ñeñ't achm'are'tets ñaña ñeñ't puerratañpesyets ñetpa'cho'ña amach es o'patataretterreto all am'cha'tarettena Yompor. ¹¹ Sapa'cho'ña puesheña'ttsos attecma sepe't samña ahuaña. Tarraña te'pa' o' e'shohuaretterra so'chñar, attoña o' sa'cohuentataretterra Part-socop. E'ñe seyemteño't Yepartseshar Jesucristo te'ña Pomporpa' o' pocte' enterres. Ñaña e'ñe puechorreño'es Yompor Puecamquëñpa' o' pocte' enterres Yompor.

Añ pocte' o'ch e'ñe yecuen cohuen yechets tarro'mar ñeñ'tara yechetspa' po'chets peñ ñaña Cristo

¹² Te'pa' o'ch noterrser po'poñ. Ñehua, napa' neñotenes puesheña'ttsospa' atet sotatse'tyen, "e'ño' pocte' yepa'yes ama't erra'tsente' yemnen." Ñehua, yapa' yeñoteñ Yompor po'ñoñpa' ama't ama atet otenyeñe amach es yepa'yesatsto, ñeñ'to'marña

“e’ñe pocten allohuenpa’ o’ch es ye’pa’yeneñ.” Tarraña ama’t e’ñe pocten o’ch atet es ye’pa’yeneñ allohuenpa’ tarraña ñerra’m ñeñtpa’ ama añecpayaye alloch yeyenpueñ yamo’ts attoch e’ñe huomenc ye’pannena yeyo’cher Yomporecoppa’ ñehua, ñeñtepñapa’ amach atet ye’patsto. Ñaña ama’t pocten allohuenpa’ o’ch es ye’pa’yepa’, tarraña ama pocteyaye o’ch nanac es yayomatse’tyesa tarro’mar ñerra’m es nanac yayomenapa’ ñeñtaña pomnaren peneña yechets. ¹³ Ñaña neñotenes puesheña’ttsospa’ atet sotatse’tyen, e’ño’ pocte’ senteñ o’ch señmatat sechets e’ñe sa secañoresha’tetño’ tarro’mar ñeñtecpo’ yechquënaña sechets o’ch atet se’pateñ. Neñto’marña atet setma’ntatenaña sechets ñerra’mrrate’ allempo sachporrena choch serra’ serrar attochña e’ñe señmatat sa’ e’ñe ora sechtsohuen tarro’mar satpa’ ñeñtecpo’ yechquëna. Tarraña te’ napa’ o’ch notas, ama’t pocten o’ch yeñmatateneñ ya’ arr patsropa’ chapcha’ esempohuañen allempopa’ o’huañcha’ yemna’ ya’ ñaña yerrar, tarro’mar atet ne’ Yompor. Tarraña ama’t pocten o’ch yeñmatateneñ ya’tpa’ tarraña ama pocteyaye o’ch e’ñe yeñmataten yechets yecañoresha’tetño’ tarro’mar ama añecpaye’ ayeçhcatareña yechets attoch yecañoresha’ten. Yechetspa’ añecopña ayeçhcataret attoch yetorra’yesa Yepartsesharecop. Ñaña ñapa’ ñach yecuañpeneña yechets. ¹⁴ Neñto’mar Yomporpa’ o’ tantaterran Puechemer ñeñt Yepartseshar yepen ya. Neñto’marña yeñoteñ yapa’cho’ña esempohuañenpa’ tantaterrnaycha’ yaña yechets. E’ñe po’huamenco’tpa’ tantatuerreycha’.

¹⁵ Ama’t señoteñeña e’ñe yeparrocmateño’ Cristopa’ ñeñt ya yechetspa’ po’ño’chpa’ ñeñtara po’chets pen ñaña Cristo. Neñto’marña notenes, atto ñeñt po’chets pen Cristo ñeñtara ya yechetspa’ eso’mare’tña e’ñe pocte’ sentenña e’ñe ya yechtsotpa’ o’ch yecañoresha’tach Cristo. Amaca’ye pocteyaye o’ch yetsetach Cristo po’chets epuet yecañoresha’.

¹⁶ Ñehua, ama’t señoteñeña ñerra’m esempo yo’chña’t epay ottatsña’tpa’ epsheño’marey o’ch e’ñe yeparrocmatatach yechtso. Po’ño’ch atet enteney Yompor atet oteneñ po’ño’ño’ ñeñt anuaret ahuatoteñ, añmapa’ ñeñt atet oten: “ñeñt epsheño’maretpa’ e’ñech patrra po’chets penet.”

¹⁷ Tarro’mar e’ñe yeparrocmateño’ Yepartsesharpa’ epsheño’mareypa’ e’ñech patrra yoc’tape’chen yeyo’chro ñeñt yecamquëñecop.

¹⁸ Neñto’marña notenes añ pocte’ o’ch sa’ypo’ñer cañoresha’tetñets. Po’po’ñe’chno ñeñt ye’pa’yen soseypa’ ñeñtpa’ ama yechtsoye’ ya’sosyateno. Tarraña añña cañoresha’tetñetspa’ ñeñtpa’ e’ñe ya yechets ya’sosyaten. ¹⁹ Ama’t señoteñeña ye’narpa’ ñeñtara pa’paquëll pen Parets Puecamquëñ ñeñt chorratenya Yompor. Neñto’mar yeñoteñ yechetspa’ ama yoyaye, ñeñtpa’ Yomporo tarro’mar ²⁰ ñapa’ ahuo’t rañterrya. Atto rañterryapa’ nanac muero’chta Puechemer attoch tsa’tuerrnaya yo’chñar. Neñto’marña notenes, ama’t atto yocrrena yechtsotpa’ Yomporepa’chña yecohuentaten e’ñe yecamquëñohuen tarro’mar ñeñt epo’marpa’ Yomporo.

7

Atetcha’ ye’pa ñerra’m yemneñ o’ch yesna’ta

¹ Te'pa' o'ch neserrpare'tatas ñeñt atet sa'pto'ten ahuaña secartot. Ahuo't sa'pto'ten pocte'te' o'ch yesna'ta. Ñehua, ñanom o'ch notas atet, e'ñe pocten amate' yeyoratsche coyanesha' ñeñtcha' yetapor ye'pa'.
² Tarraña ellopa' añ pocte' ñaña allohueney yacmaneshay o'ch yeyore puesheñarr coyanesha' ñeñtcha' yetapor ye'pa'. Coyanesha'pa'cho'ña pocte' ñaña echanepa' e'ñe ña puerrollar. O' notas atet tarro'mar ñerra'm ama cho seyoro puesheñarr ñeñtcha' setapor se'pa'pa' attate' allo'na secañoresha'tnen.
³ E'ñe pocte' epas setaporpa' sagapanna'tepa'ch.
⁴ Tarro'mar coyanesha' ñeñt arrollaretpa' ama e'ñe ñapfayaye po'chets, ñeñtpa' puerrollaro'nach. Ñaña yacmapa'cho'ña amach ñapfayaye po'chets, ñeñtpa' puetaporo'nach.
⁵ E'ñe pocte' chocmach sagapannena. Tarraña ñerra'm erroteno esempo pocte' senten epsheño'mares o'ch sa'pocpat ñoñets e'ñe sañeña amach sagapanna'terro allponmat attoch añach sema'yo'chra ma'yochatsa. Tarraña ñerra'm o' met allponmat allempo o' sa'pocstatuepa' pocte' o'ch alla sagapannerra. Tarro'mar ñerra'm ama ahuen sagapannerropa' chate' oneñe'pa' topatas amate' sa'huanto.

⁶ Tarraña ama notenso ñeñtach paterr poctetsa o'ch yesna'ta, aña'pa' atta notenes ñerra'm semneñ o'ch sesna'tapa' pocte' sena'tepa'.
⁷ Tarraña napa' e'ñe pocte' nenteñ ñerra'm allohuenes atteseñ ñerra'm na.* (Tarro'mar Yomporpa' ahuo't apuen attoch amach nemno coyanesha'.) Tarraña allohueneypa' ama attecmayayye. Tarro'mar Yomporpa' ahuo't apa'yese'y ellocma atetcha' yesherbe' e'ñe cohuen.

⁸ Ñaña o'ch notas, ñeñtes ama ataporetesopa' e'ñe pocten amate' sesna'tatsto. Ñaña ñeñtes rretornaneshasp' e'ñe pocten ñaña amate' sesome'terro. E'ñe pocten o'te' socrrañ e'ñe atta atet nepena na.
⁹ Tarraña ama't notensoñ atetpa' ñerra'm ama erroteno sa'huantopa' e'ñe pocte' sesna'tepa'. Ama pocteyaye o'ch atta nanac yemneñ coyanesha'. Añaña pocte' yesna'tepa'. Tarraña añaña nanac cohuen ñaña amach yesna'to.

¹⁰ Te'pa' o'ch notas ñeñtes arrollaretes ñeñtcha' atet se'pa. Ñehua, po'ño'ch ama naye' otetso, añaña Yepartsesharña otets. Añ pocte' amach sesatstere serrollar.
¹¹ Tarraña ñerra'm eseshas serre' serrollarpa' añ pocte' amach sesome'tatsterro ello, amapa' o'ch alla samo'tstera serrollareshe'mañ. Ñaña o'ch notas saña ñeñtes ataporetes, amach sesatstere setapor.

¹² Te'pa' o'ch notas ñeñt atet pocte' nenten na. Ama't Yepartsesharpa' ama otenne ñeñt poctetsa añecop, tarraña napa' o'ch neñotatas ñeñt pocte' nenten na. Ñerra'm puesheñarr yacma ñeñt o' ame'ñerra ñeñt atapore'tañ, tarraña ñerra'm puetaporpa' ama ame'ñeno, añ pocte' amach satsterrano puetapor ñerra'm puetaporpa' ama mueno o'ch ahuer.
¹³ Attecma ñaña puesheñarr coyanesha' ñeñt o' ame'ñerra ñeñt arrollare'tañ, tarraña ñerra'm puerrollarpa' ama ame'ñeno, añaña pocte' amach satsterrano puerrollar ñerra'm puerrollarpa' ama mueno o'ch ser.
¹⁴ Tarro'mar ñerra'm puetaporpa' ame'ñena, chocma eñall attoch o'ch ame'ñatana puerrollar. Attecma ñaña ñerra'm puesheñarr yacma ñeñt ame'ñetsa, chocma eñall attoch ame'ñatana ñaña puetapor. Ñaña ñerra'm sesannenapa' ñato' sechemereshapa' amach es eñoterro Part-socop. Tarraña ñerra'm ama sesannerropa' sacñefarnesha'ñapa' o'ch

* 7:7 Ñehua, Pablopa' ama eñalle puetapor.

so'patacha ñaña Parets. ¹⁵ Tarraña ñerra'm puesheñarr yacma ñeñt ama ame'ñetso, ñerra'm mueneñ o'ch serran puetapor ñeñt ame'ñetsa, ñehua, pocte' serepa'. Tarro'mar puetapor ñeñt ame'ñetsapa' ama es palltetso puerrollarecop. Ñaña Yomporpa' ama mueno ellopa' o'ch allo'na ye'moñe'tanna'tnena yerrollarecop. Attecma ñerra'm puesheñarr coyanesha' ñeñt ama ame'ñetso, ñerra'm mueneñ o'ch serran puerrollar ñeñt ame'ñetsa, ñehua, pocte' serepa'. ¹⁶ Atet notenes sesannerrepa' tarro'mar ñeñtes arrollaretspa' po'ñoçhpa' amach erroteno señoche ñato' sa'queshpachcha' serrollar, ñato' amate'. Ñaña ñeñtes ataporetspa' amach erroteno señoche ñato' sa'queshpachcha' setapor, ñato' amate'.

¹⁷ Ñeño'mar te'pa' o'ch noterrser, erroteno'tseneste' ama't allempo errte' same'ñera Yepartsesharpa' atterasepa'ch. Ñaña atet muenatyeny Yomporpa' attepa'ch yepena puesheña'ttsoy. Ñeñtpa' attec mach neyçhatyes ama't ñaña ora allohuen ñeñt pame'ñeñofet apçha'yetsa allemeñ anetso'mar. ¹⁸ Atet ñaña ñerra'm puesheñarr yacma allempo errte' ame'ñertset, ñerra'm allempopa' o' atorrarefetuet atet yeche't judionesha'pa' te'pa' ama pallteno o'ch a'huañerran all tsorret ahua't. Attecma ñaña po'psheñeñ allempo errte' ame'ñertset, ñerra'm ñetpa' ama atorrarefeto, te'pa' ama pallteno o'ch atorrarettet atet yeçhena judionesha'. ¹⁹ Ama't ya'tsorrarettatstapa' ñeñtpa' ama es sherbeno. Ñaña ama't ama ya'tsorrarettatstopa' ñeñtpa'çho'ña ama es sherbeno. Añña nanac sherbets o'ch yeça ñeñt atet oteney Yompor. ²⁰ Ñeñtpa' o'ch alla noterrser, añ pocte', ama't erroteno'tseneste' allempo errte' same'ñerrapa' atterasepa'ch. ²¹ Ama't allempo errte' pame'ñerra, ama't añepte' ñeñt ataruasatare't e'ñe attapa' e'ñe pocte', amach pellcatsto. Atterach petaruasen pepatronarecop, tarraña ñerra'm erroteno't o'ch pa'rroyaterra pepatronareshotpa' e'ñech pocte' a'rroyerrpetepa' allot taruasatenpet e'ñe atta. ²² Ñato' o'ch netma'ntacha atet: Eñall puesheñarr yacma ñeñt ataruasatare't e'ñe atta, tarraña o' chap allempo agapan Yepartseshar ñeñtcha' Pamo'mte' perr. Allempopa' ama't attera taruasateñeñ ñeñt po'patronar pen arr patsopa' tarraña te'ña Cristopa' a'rroyatamper po'chñar ñeñt nanac taruasataye't ahuaña. Te'pa' añcha'ña taruasaterre' Cristo ñeñt Yepartseshar yepen. Ñaña eñall puesheñarr yacma ñeñtñapa' cohuen'tsen ñeñt ama ataruasatare'teyaye. Ñapa'çho'ña o' chap allempoch aguërran Yepartseshar Cristo ñeñtcha' Pamo'mte' perr. Te'ña Pamo'mte' Cristopa' ñachña taruasaterre' e'ñe cohuen ñeñt ahuañapa' ama ataruasatare'te e'ñe atta. ²³ Cristopa' o' rañferrya. Atto rañferryapa' nanac mueroçhta attoch tsa'tuerrnaya yo'chñar. Ñeño'marña notenes, amach acheña ñapue't samo'mte' sepatsto, añña e'ñe po'ñoçh Yamo'mte' yepen Cristo. ²⁴ Ñeño'marña masheñeshacha' ñaña noçhaneshacha' o'ch noterrserr alla, ama't erroteno'tseneste' allempo errte' same'ñera Cristopa' pocte' atterasepa'ch. Tarraña Yomporpa'chña seyenpue'.

²⁵ Te'pa' o'ch noterrser po'poñ. Añpa' ñeñt atet sa'pto'ten ahuaña ñato' pocto'te' ahuo'ch some'ta ñeñt shopsheshare'. Ñehua, napa' o'ch notas, Yepartsesharpa' ama otenyeñe ñeñtcha' atet yepe' shopshesharecop, tarraña napa' o'ch neñotatas ñeñt pocte' nenten e'ñe na, tarro'mar

Yepartseshar puemuereñoŕpa' ahuo't eñotañ p̄a'n attoch sapa' seye-muetna. ²⁶ Ñehua, ñanompa' o'ch notas: Ama't te'pa' chocma huen-naya shonte' esocmañen ñeñt' echarr yentyen ñeñto'marña pocte' nenteñ amate' sesome'to, ñaña amate' sesna'to. Añña poctetsa attate' yocrra. ²⁷ Tarraña ñerra'm o' seyore coyanesha'pa' e'ñe pocte'; te'pa' amach sesatstere. Atteña ñerra'm ama seyoreña' coyanesha'pa' pocte' ñaña; te'pa' amach seyoratsche. ²⁸ Tarraña ñerra'm esempo semne' o'ch sesna'tapa' e'ñe pocte'. Ñaña ñerra'm esempo coyanesha'pa' mueneñ o'ch some'ta, ñeñtpa'cho'ña e'ñe pocte', tarro'mar ñeñtpa' ama ochña'teñtsoyaye Yomporecop. Tarraña ñerra'm yacmapa' o'ch sena'ta, ñaña ñerra'm coyanesha'pa' o'ch some'ta ñaña, allempopa' o'ch echan shonte' ñeñtcha' llecatyese' attoch corret arr patsro. Ñeñto'marña notenes amach sesna'tatsto, coyanesha'pa'cho'ña amach some'tatsto, tarro'mar napa' ama nemno o'ch sechen shonte' ñeñtcha' sellcatyene'.

²⁹ Ñeñto'marña masheñneshacha' ñaña nochaneshacha' nemneñ o'ch alla noterrser. Te'pa' ama atonaye' pallteno char attoch yetorrena Yomporecop. Ñeñto'marña o'ch notas ñeñtes o' setapore't, ama't o' setapore'tpa' añña poctetsa e'ñe tayoteñ amach patrra sellcatsto ñeñt setaporecpa. Añecpa'nachña setorrena Yomporecop. ³⁰ Ñaña ñerra'm esempo huaponasa llequẽñetspa' amach ñeñto'a yequechpatsterro atto yetorrena Yomporecop. Ñaña ama't esempo es nanac yocshatene'pa' amach ñeñto'a yepsatstere Yompor. Ñaña ñerra'm esempo yapa' esocmañen yechenpa' tarraña amach ñeñto'a yepsatstere Yompor. ³¹ Ñaña ñerra'm esempo es ye'pa'yen ñeñt patsomarecpapa' amach e'ñe ñeñta yocshatsto ñeñt patsomarecpa. Tarro'mar ñeñt atet yeychen añ patsomarpa' ñeñtpa' huañerrcha' esempo.

³² Ñeñto'marña notenes añechno, tarro'mar nemneñ sapa' amach eñalletatsto po'poñ ñeñtcha' nanac sellcate'. Atet pena yacma ñeñt ama ataporetepa' añach e'ñe llequẽna ñeñt Yomporecop. E'ñech ma'yoçhrena attoch coshatenan Yepartseshar. ³³ Tarraña yacmaña ñeñt ataporetpa' añach e'ñe llequẽna ñeñt atto yocrra añe patsro. Ñaña añach ma'yoçhrena attoch coshatenan puetapor. ³⁴ Ñeñto'marña amach errotenot patrra ma'yoçhreno ñeñt Yomporecop. Attecma pena ñaña coyanesha' ñeñt ama arrollarete. Añach ma'yoçhrena ñeñt Yomporecop. E'ñe po'chtsohuenpa' mueneñcha' o'ch a'rroya Partsocop. Ñaña ama't ora pocta'pñohuenpa' o'ch ma'yoçhrena Partsocop. Tarraña coyanesha' ñeñt arrollaretpa' añach lleca ñeñt atto yocrra añe patsro, ñaña añach lleca attoch coshatan puerrollar.

³⁵ Ñeñt notenespa' ama añecpayaye attoch o'ch nompa'tas amach sesna'tatsto. Añecopña atet notenes attoch napa' neyēpas, attoch chocma cohuenare' es sorratyen. Ñaña chocmach socsheñesha'pa' o'ch sema'yoçhrena Yomporecop, amach eñalletatsto ñeñtcha' sepatene'.

³⁶ Te'pa' o'ch noterrser po'poñ: Ñerra'm eseshas echene' seseñ ñeñt o' po'natuena, ñaña ñerra'm pocte' senteñ o'ch some'tapa' ñehua, pocte' some'tepa'. E'ñe pocte' o'ch semnach some'tepa' tarro'mar ñeñtpa' ama ochña'teñtsoyaye Yomporecop. ³⁷ Tarraña ñerra'm erra'tsenotespa' sechen seseñ, ñaña ñerra'm ama semno o'ch some'ta, ñaña ñerra'm seseñpa' e'ñe pocte' enteñ amach some'tatstopa' ñehua, pocte' ñaña

amach sesome'tatatsche. Ñerra'm po'ñoçh señoñeñ seyoçhro añpa' e'ñe pocte' atet, ñehua, amach sesome'tatatsche. Elloña ñeñpa' nanac cohuen. ³⁸ Ñeño'marña te'pa' o' notas: Ñerra'm erra'tsenotes muenate' seseñ o'ch some'tapa' ñeñpa' pocte'. Tarraña ñerra'm erra'tsenotes ama some'tataye seseña' elloña ñeñpa' nanac cohuen.

³⁹ Te'pa' o'ch noterrser po'poñ. Ama't esempapa' ama pocteyaye coy-anesha'pa' o'ch serran puerrollar. Ama't errponmatcha' correna puerrollar, amach satstere. Tarraña ñerra'm esempo rroma puerrollar, allempopa' e'ñe pocte' o'ch some'terra ello, tarraña ñerra'm erra'tsencha' muener ñeñcha' yorerre' ñeñpa' ame'ñenach ñaña. ⁴⁰ Tarraña ama't o' notuaseñ e'ñe pocte' o'ch some'terra rretornanesha', elloña napa' noctape'cheñ ñerra'm o'ch some'terra, ñato' allempopa' cosherrañcha' mame'. Tarraña ñerra'm amach some'terro, napa' noctape'cheñ ñato' allempopa' ellochña nanaccha' cosherra ñapueñ. Napa' noten Yompör Puecamquëñoñ neñoten atet.

8

Arrpa' all cotape'chatan corinto'marnesha' añecop ñeññ amtsaret ayeçhcataretocp

¹ Te'pa' o'ch neserrpare'tatas po'poñ ñeññ atet sa'pito'tenen ahuaña, ñeñpa' atet soten: Ñeññey ame'ñenaya Cristopa' ñato' ¿pocto'te' o'ch serra' po'chets ñeññ muetsenet ayeçhcataretocp? Napa' neñotenes puesheña'ttospa' sotyen sapa' señoñeñ ñeññ cohuentetsa Yomporecop. Ñehua, po'ñoçh allohueneypa' yeñoñeñ ñeññ cohuentetsa Yomporecop. Tarraña ñerra'm esempo yoten: "Napa' e'ñe neñotuen ñeññ cohuentetsa Yomporecop", ñerra'm e'ñe yommo'cheñoña yotenpa' ñeñpa' e'ñech orrena atet yoten. Yommo'cheñoña' amach çoye' yeyenpanno attoch huomenc yeña' yeyoçher Yomporecop. Yemorrentanna'teñoña' çhocña yeyenpanna'ta. ² Tarro'mar ñerra'm esempopa' çhach yotenapañ o'te' e'ñe es yeñotua poctacma, tarraña yeñoñeñ po'ñoçhpa' çhocma yepalltena o'ch e'ñe yeñotua poctacma ñeññ cohuentetsa. ³ Tarraña e'ñe yemorrenteñoñ Yompörpa' ñapa' eñoteny yapa'çho'ña yeñoñeñ ñeññ cohuentetsa ñocop.

⁴ Te'pa' o' notuas atet te'ñapa' o'ch neserrpare'tatas ñeññ cohuentetsa Yomporecop. Ñeññey ame'ñenaya Cristopa' pocte'te' o'ch yerren po'chets ñeññ amtsaret ayeçhcataretocp, ñato' amate' pocteyaye. Ñehua, yeñoñeñ ñeññ ayeçhcataret ñeññ toma'ntatenet ñetpa' po'ñoçhpa' ama eñalle Yompör ñeññ atet. Yapa' yeñoñeñ Yompörpa' e'ñe patrra. ⁵ Po'ñoçhpa' ñetpa' pa'namen po'yomporer pa'yenet ama't atet ñerra'm ñeññ ento'tsa'yen, ñaña ama't ñeññ añe patsro'tsa'yen. Ñetpa' pa'namen po'yomporer pa'yenet, ñaña pa'namen po'partseshar pa'yenet. ⁶ Tarraña ya yocoppa' yeñoñeñ Yompör Apapa' e'ñe patrra, ñeññ Yompör ñeññ yeçhcatue' allohuen ñeññ yentyen, ñaña yapa' ahuo't yeçhcatey e'ñe ñocop. Ñaña yeñoñeñ Yepartsesharpa' e'ñe patrra ñeññara Jesucristo ñeññ yeçhcate' allohuen ñeññ yentyen. Te' yapa'çho'ña apueney atto yocrrena.

⁷ Tarraña acheñenesha'pa' ama allohuenacmaye' yoctape'chueno atet. Ñeño'marña puesheña'tetspa' ahuatoteñ yeçhete't o'ch nenet es po'chets

ayeĥcataretecop. Ñeñto'marña ñerra'm esempo rrenet ñeñt po'chets ñeñt muetsenet ayeĥcataretecoppa' e'ñech atta rreñet po'tomña. E'ñe po'tomña'pa' otenet ñato' ama pocteyaye o'ch yerren po'chets ñeñt nenet ayeĥcataretecop. Ñetpa' atta enteñet ama arrapahuoyaye ñeñt Yomporecop. Tarro'mar ama ĥenaneto pueyoĥro atto ñeñt e'ñe poctetsa Yomporecop. ⁸ Ñehua, yapa' yeñoteñ ñeñt yerrenpa' ama añecpayaye attoch e'ñe cohuen entey Yompor. Ama't yerreñ, ñaña ama't ama yerreñe ñehua, e'ñe attecma enteney Yompor. ⁹ Tarraña e'ñech señota: E'ñech acopa es sepa'yes. Ama't yapa' yeñoteñ Yomporpa' e'ñe pocte' enteñeñ o'ch yerren po'chets ñeñt anaret ayeĥcataretecoppa' tarraña ñato' yerreñoñ añeĥnopa' ĥate' alla ya'puerratatuer ñeñt ama tama huomenc penaye pueyoĥer Yomporecop. ¹⁰ Tarro'mar ñato' sapa' atette' sepene. Ñato' o'ch ahuenes puerahuo allo'tsen ayeĥcataret, allña'pa' ñato' o'chĥo' serros po'chets ñeñt amsaret ayeĥcataretecop. Ñaña ñato' sapa' e'ñech socsheñsha' serreñ tarro'mar sapa' señoteñ ñeñt'pa' ama esoye' enteñe Yompor. Tarraña ñato' e'ñe allempoña serreña'pa' ñato' o'ch entas po'psheñeñ ñeñt parro same'ñena. Tarraña ñapa' ñato' ama pocteye' enteñe o'ch yerren po'chets ñeñt amsaret ayeĥcataretecop. Ñato' o'ch peye'ĥateña ñaña pemo'nasheñ o'ch rreñ ñaña ñato' ama't ñapa' ama pocteye' enteñe. ¹¹ Tarraña ñerra'm ñapa' o'ch rrenan po'chets ñeñt anaret ayeĥcataretecoppa' ñapa' o'ch enteñ atetpa' ochña'teñets Yomporecop. Atteñapa' ñato' o'ch alla puesuerran Yompor. Ñeñto'marña notenes, ñato' e'ñe yeñoteñoñ ñeñt cohuentetsa Yomporecoppa' o'te' ya'ĥencatach yemo'nasheñ ñeñtecop Jesús'pa' rroma ñaña. ¹² Ñerra'm esempo atet ye'papa' ĥate' yeyora yo'ĥñar yemo'nasheñecop tarro'mar o' yeye'ĥatera o'ch perra ñeñt ama pocteye' enteno ña. Ñehua, ñerra'm esempo yeyora yo'ĥñar yemo'nasheñecoppa' e'ñe ño'pa' o'ch yo'ĥña't ñaña Cristocop. ¹³ Ñeñto'marña te'pa' o'ch notas atet, ñerra'm esempo yerren po'chets ñeñt anaret ayeĥcataretecop, ñerra'm yerreño'pa' ñato' ya'puerratater yemo'nasheña'pa' e'ñe poctey amach yer-ratsto ñeñt po'chets. Ñeñto'marña napa' ama't esempapa' amach nerratsto ñeñt po'chets te'ta' neyoren no'ĥñar nemo'nasheñecop attotĥa' na'puerratater.

9

Atto e'ñe poctey ñeñt torretsa Yomporecoppa' o'ch es yesherbeñ

¹ Te'pa' o'ch neñotatas po'poñ ñeñt atet nepena na. Napa' e'ñe poctey o'ch ne'pa'yes e'ñe erra'tsencha' nemnen na tarro'mar sapa' señotenen atto napa' ama eñalle ñeñt neyechare'tenaya na, tarro'mar napa' allsensareten Yomporeshot. Ñaña señotenen napa' o' orrterrana Yepartse-shar Jesús, ñaña señotenen ña ahua-menca't nepene' tarro'mar e'ñe na netorreñoñ ñocop attoña same'ñerra samña. ² Ñehua, ama't po'potantaña' otyenetañ napa' amo' allsensareteyayno tarraña sapa' señotenen po'ñoĥ napa' allsensaretenca'ye tarro'mar napa' ñeñten same'ñaterraya samña. Atto sapa' e'ñe cohuen same'ñera Yompor, attoña señotateñña allohuen po'ñoĥ napa' Yomporeshot allsensareten. Ñeñto'marña e'ñe poctey o'ch ne'pa'yes e'ñe erra'tsencha' nemnen na ñeñten allsensareten, tarraña

ñeñtpa' ama atteye' nepeno tarro'mar napa' ama nemno e'ñe atet nepeñoť o'ch nepatare't cohuen ñoñets alloch Cristopa' a'qushpaterres.

³ Ñeñto'marña te'pa' o'ch notas ñeñtcha' atet nanapanet ñerra'm esempo a'pťo'tare'tnet, pocto'te' ñeñť atet nepa'yena. ⁴ Po'ñočhpa' e'ñe pocteñ nocop o'ch serratallme'chennoñ allempo neserrpare'tatenes. Ñaña pocteñ sapa' o'ch sapnoñ ñeñtcha' norryen. ⁵ Ñaña nocop e'ñe pocteñ ñerra'm eñalleñ netapor o'ch nanemñ ñeñť parro yame'ñena all nechopeñe'chyen. Atet pena po'potantañ allsensare'tnesha', ñaña atet pena Yepartseshar pa'mo'nasheñnesha', ñaña ñeñť atet pena Pedro. ⁶ Ñaña sapa' ñato' chate' soten e'ñe pocte' e'ñe epsheño'marey epan masheñ Bernabé yaptach yetaruasen attoch yechen ñeñtcha' yerren. Po'ñočhpa' po'potantañečhno ñeñť torra'yetsa Yomporecoppa' ñetñapa' arratare'ttenet e'ñe atta. ⁷ Po'ñočhpa' ñeñť atet pena soltarnesha'pa' ñetpa' e'ñe atta apare'ttenet ñeñť palltenet, amach es tsa'teneto. Ñaña atet pena ñeñť nare'tene' narmets. Ñetpa' e'ñe puenare'teñoťpa' čhocmach tsomueññañet puenaremñ pue'mer. Ñaña atet pena ñeñť po'taruas pene' o'ch cohuanñipenan carrnero ñaña cabra. Ñetñapa' čhocmach orreññañet puemomos. ⁸ Sapa' chate' sotenapañ ñeñť atet notenes, ñeñtpa' e'ñete' nañeña noctapñoť atet notyenes ñeñť atet yoctape'chyen ya allohueney ñeñtey arromñaatey. Tarraña ñeñtpa' amaca'ye atteyaye tarro'mar ñeñtpa' ñeñťara ñoñets ñeñť atet anareť ahuatoteñ. ⁹ Tarro'mar Moisés po'ñoñ ñeñť atet anuareť ahuatoteñ, ñeñtpa' atet oten: "Ñerra'm esempo saťmama'tateñ huaquesh attoch es serroclome'chach pa'tcot allempopa' amach sempanma'tatsche attoch ñapa'cho' rranepa'ña ñeñť serroclome'chateñ." Ñehua, yapa' yeñoteñ Yomporpa' ama e'ñe ñapťecpa huacshecop eñose'te. ¹⁰ Po'ñočhpa' yocpa'naña eñose't ñeñtey torra'yetsa ñocop. Tarro'mar e'ñe puemorrenteñoťey yapa' Yomporpa' e'ñe pocte' enteñ arratare'teycha' yaña all yetorra'yena ñocop. O'ch netma'ntacha atet: Ñerra'm čho yetamuenpa' čhocmach yeyemtena ñeñťcha' yenare't all, o'ch choppa' ñeñťcha'ña yetsomuerr. Ñaña ñerra'm čho es yerroclome'chenpa' čhocmach yeyemtena ñeñť yerroclome'chen, tarro'mar yapa' yeñoteñ čhocmach apuerryet allpon. ¹¹ Ñehua, o'ch alla netma'ntatererr po'poñ. Allempo yeserrpare'tatenes Yompor po'ñoñ ñeñtpa' attecma ñerra'm čho yenare'ten narmets pue'llomer sesho. Ñeñť atet nare'teñetspa' sherben attoch e'ñe yocrra Yomporecop. Ñehua, ñerra'm yapa' o' yeñotatas ñeñť sherbets errponohuañen yecamquēñecoppa' ama'tña pocte' senteñeña sapa' o'ch sapueneñ ama't coñe'ta ñeñť yepalltena alloch yocrra añe patsro. ¹² Po'ñočhpa' po'potantañečhno ñeñť seserrpare'tatene', ñetpa' enamuenset o'ch sapanet ñeñť alloch correnet. Ñehua, ñeñtpa' e'ñe pocte'. Atto ñetpa' es enamuensetpa' elloña yocoppa'cho'ña e'ñe pocte' o'ch es yenas yaña.

Tarraña ama't e'ñe pocteñ o'ch es yenamaseñpa' po'ñočhpa' ama't coñe'ta ama es yenamuenso. Chocma ya'huanteñ ñeñť echarr yenten yocop. Ama't e'ñe pocteñ o'ch es yenamuenespa' tarraña amaña es yenamuenso tarro'mar ñerra'm ama pocteye' señchepa' yeñoteñ amate' se'ññoto Yompor po'ñoñ ñeñť atet yeserrpare'tatenes. Yapa' ama yemno o'ch yepatare't cohuen ñoñets alloch Cristopa' a'qushpaterres.

13 Elloña sapa' señoteñ ñeñt torretsa Parets pa'paclopa' e'ñe allara Parets pa'paclopa' chocmach entenet puerrar. Ñaña añ cornesha' ñeñt muetsene' huaquësh amapa' carrnero Yomporecoppa' ñetpa'cho'ña e'ñe allotpa' rrenet ñeñt amtsaret Yomporecop. 14 Aftecma ñaña Yepartse-sharpa' nan po'ñoñ. Ñeñtpa' atet ot: Ñeñt serrpare'tene' cohuen ñoñets alloch sequeshpapa' e'ñe pocte' pueserrpare'teñoñ ñeñt e'mñotene'pa' pocte' o'ch apueñet ñeñt palltena alloch corra. 15 Ñehua, ama't e'ñe poctet o'ch sapuennoñ ñeñt nepalltenapa' tarraña napa' ama't ahuatapa' ama es notase'te o'ch es sapuen. Ama't te'pa' ama ñeñtcepaye' nequel-lquënnaso atet. Tarro'mar ama nemno o'ch huañ atto neserrpare'tatenes e'ñe atta. E'ñechña nocsheñesha' neserrpare'tatenes e'ñe atta. Ñerra'm o'ch huañ atto neserrpare'tatenes e'ñe attapa' añate' pocte' nenten o'ch nerrroma. Tarro'mar napa' ama nemno ama't eseshapa' o'ch puer-ratamñpsenña ñeñt allo e'ñe nocshena.

16 Ñaña e'ñe neserrpare'teñoñ cohuen ñoñets napa' amate' errotent e'ñe atta nommo'cho, tarro'mar napa' e'ñe atet eyechareten. Ñerra'm ama atet ne'papa' napa' nanacte' llequëñtso'tsenen. 17 Ñerra'm e'ñe na nemneññoña neserrpare'teneñpa' ñehua, poctet o'ch tsa'tenna Yompor attoch coshaterren. Tarraña ñerra'm atet otenen Yomporpa' ñeñtpa' ama nañeña nemneññoñeye' neserrpare'teno. Po'ñoçhpa' allsensareten ñeñto'marña neserrpare'taterña acheñenesha'. 18 Ñeñt ellonet apuenen Yompor ñeñtcha' atarr nocshate' na, ñeñtpa' attot neserrpare'tatenes cohuen ñoñets e'ñe atta. Ama't e'ñe poctet o'ch setsa'tnapa' tarraña napa' ama nemnoña atet.

19 Ñaña ama't ama eñalle puesheñarr ñeñtcha' neyechayapa' po'ñoçhpa' añña nanac netorratenaya allohuen acheñenesha' tarro'mar na atet muenets. Ñaña tarro'mar netorrana ñocpuet attoch name'ñacha shonte' acheñenesha'. 20 Ñaña allempo allo'tsenen parro epan namo'tsesha' judionesha'pa' napa' o'ch nepena atet yeçhenet ñet. Allochñapa' ñetpa' o'ch e'mñoterrnet; e'ñe pue'mñoteñoñetpa' ñato'rraña o'ch name'ñatera namo'tsesha' judionesha'. Ñerra'm esempo allo'tsenen parro epan ñeñt cotene' Moisés po'ñoñ ñeñt atet anaretpa' napa' ama'tcha' ama nocteno ñeñt atet cotape'chenet ñetpa' tarraña napa' amach nachñare'taneto ñeñt atet penet ñet, allochñapa' ñato' attotpa' o'ch name'ñatanet ñamet. 21 Ñaña ñerra'm allempo allo'tsenen parro epan ñeñt ama cotape'chenaye ñoñets ñeñt atet anare't Partsocop, napa'cho'ña o'ch nepena atet ñerra'mrrate' ama nocteno ñoñets ñeñt atet anare't Partsocop. Ñehua, po'ñoçhpa' nocteneñña ñeñt ñoñets ñeñt atet anare't Partsocop tarro'mar añcha'ña e'ñe nocten Cristo po'ñoñ. Atetcha' nepeñña ñeñt ama es cotape'chetso Partsocop allochñapa' attotcha' name'ñaterranet ñamet Cristo ama't ñeñt ama es cotape'cheno Partsocop ama't mamesha. 22 Ñaña ñerra'm esempo allo'tsenen parro epan ñeñt ama huomenc penaye pueyoçher Yomporecoppa' napa'cho'ña o'ch nepena atet ñerra'mrrate' ama huomencayaye naña neyoçher Yomporecop, allochñapa' attoch noctape'chach cohuen ñeñt ama huomenc penaye pueyoçher Yomporecop. Ñaña ama't erra'tsena acheñ errotencho' cotape'chenpa' napa'cho'ña allempo allo'tsenen parro epan atetcha' nepena naña atet pocte' entenet ñet, allochñapa'

attoch ama't errottenette' attochña na'qushp̄aterranetcha' ama't patanta'ttsa. ²³ Atetcha' nepena attoch name'ñatanet ñerra'm esempo neserrpare'tatanet cohuen ñoñets atto Cristopa' ñach ya'qushp̄aterre'. Attoch napa'cho'ña e'ñe name'ñeñoñ Cristopa' nocshapretanetcha' ñerra'm ame'ñeret ñamet Cristo.

²⁴ Te'pa' o'ch noterrser po'poñ, ñato' o'ch netma'ntacha atet. Ñehua, po'ñoçh sapa' señoñeñ ñerra'm esempo o'ch eñoçhet esesha'te' nanac matetsapa' shonte'ch acheñ matatsa. Allohuenetpa' mueneñetcha' o'ch meshe'tuet po'poñeçhno acheñ attoch ganet premio. Tarraña ama'tcha' shonte' matatsapa' eñallachña puesheñarr ñeñicha' ganat-uaya allohuen ñeñ parro mataçha'tet. Ñeño'marña te'pa' añ poctetsa o'ch yetorrena yaña e'ñe cohuen Yomporecop attoch yegana ñeñ o'patatenya ña. ²⁵ Ñaña yeñoñeñ allohuen ñeñ po'taruas pene' johueñetspa' ñetpa' o'ch p̄ohuanmuet ora ñeñ atet poctetsa attoch echet po'huamenc esheccha' ganet. Ñeño'marña ñetpa' o'ch queçhpa'huet ñeñ ayoram̄psañ yehuamenc. Ñeñtpa' añecop atet penet attoch ganet premio atet ñerra'm copa.* Ñehua, ñeñ atet penet ñet attoch ganet copa, ama't ñeñ copapa' ahuañaña, ñeñtepñapa' yapa' o'ch yetorra yaña Yomporecop attoch yegana ñeñ o'patatenya ñeñ ama ahuañaño. ²⁶ Atet pena ñeñ matetsapa' e'ñech paçharr matena. Ñehua, napa'cho'ña e'ñech patrra nema'yoçhra Yomporecop. Atet ñaña ñerra'm esempo yeçhotna'tena, ñerra'm atta ya'm̄tapechpa' amach errotent̄ yegano. Ñeñtepñapa' napa' amach atta na'm̄tapechatsto ñeñ Yomporecop. ²⁷ Chochña neunat ñañeña nechets. E'ñe nach taruasate' nechets Yomporecop. Atetcha' neña tarro'mar ama't na serrpare'tate' po'psheñeçhnopa' ñato'rraña ellopa' te't alla ahupore'tareten ñañeña tarro'mar ama netsotoñe ñeñ muenen Yomp̄or.

10

Arppa' all yerpatanet ñeñ atet patse'tyese't ahuat israelena'tarnesha'

¹ Ñeño'mar te'pa' masheñeshacha' ñaña noçhaneshacha' o'ch noterrser po'poñ. Nemneñ o'ch neñotatas ñeñ atet pe't ahuañ yatañeshañ. Allempo chopeñe'chyesete't amaretarero'marpa' añ anmahuete't os ñeñ cohuan̄psatanete't Yomp̄or e'ñe allohuenet. Ñaña Yomp̄orpa' ellopa'tetstatan sa'p attoña orrtatanet toñ allcha' e'ñe cohuen oñmuet patso. Attoña metanuet sa'p ñeñ otenet Sa'p Tsasasen. ² Ñaña ahuo' na'nmet Moisés ñeñicha' pa'm̄cha'tareter pet. Ñaña e'ñe pame'ñeñoñet Moisés allohuenetpa' ahuo't a'natenanet os. Ñato' o'ch netma'ntacha atet, ñetpa' allohuenet apatarettet oñ ñaña oso't e'ñe pueyemteñoñet Moisés. ³ Ñaña allohuenet Paretspa' apanete't puerrar ñeñ rrete't allohuenet ñeñ mueñanete't entot. ⁴ Ñaña allohuenetpa' çhocmo' apanete't Parets ñeñ orrete't allohuenet. Tarro'mar ahuañ allempo potanet oñ e'ñe mapueto't allot orretpa' ñeñña mapue'pa' toma'ntenana Cristo ñeñ Partso'tets ñaña. Po'ñoçh Cristo ñeñ onahuete't ñaña ñeñtara ñapa' ña co'ta'nmahuete't. ⁵ Ama't Yomp̄orpa' nanaco' a'natanetañe'tpa' tarraña ñapa' amo' pocteye'

* **9:25** Po'ñoçh añpa' oten choyo'mets tarro'mar ñeñ po'premio pete't ahuañ.

entane'te atfo ñetpa' atpare'tyesete't. Ñeñto'marña ahuo' a'cllatuanet e'ñe alla amarato. Puesheña'ttso' pocte' ente't Yompor ñeñt e'ñe cohuen cotape'chyestse't.

⁶ Ñaña ñeñt atet patse't ñeñt ama pocteyayepa' añ ye'chateney yaña amach yeye'chapretatsto yaña atet. ⁷ Ñaña amach yeyomporer yepatsche ñeñt aye'chcataret ñeñt ma'yochyesete't ñet patanta'tets. Yapa' yeñoteñ añecop atet pete't, tarro'mar atet anuaret Yompor po'ñoñ, ñeñtpa' atet oten: "Acheñenesha'pa' o' anorr'cha'tet, o'ña anorr'cha'tuetpa' o' rrallme'chapretet. Allotpa' orryeset ñaña. Allempoña o' rrallme'chapretuetpa' o' tanrra'terret o'cho' alla coshame'tañperret pueye'chcatar." ⁸ Ñaña ama pocteyaye o'ch yecañoresha'ten atet pete't ñet patanta'tets. Ñeñto'marña shonte' acheñenesha' colla'huatsa allempo, e'ñe vientitrés mil acheñenesha' rromats e'ñe pamtarrocma. ⁹ Ñaña ama pocteyaye e'ñe po'tomñapa' o'ch ya'llocchame'ch Yompor. Ñeñt atet pe't patanta'tets acheñenesha'pa' ñeñto'maro'ña shonte' acheñenesha' ñeñt a'chanatyes shecheppa' e'ñe colla'huet. ¹⁰ Ñaña ama pocteyaye o'ch yetanmare'cha Yompor. Ñeñt atet pe't ñaña patanta'tets acheñenesha'pa' ñeñto'maro'ña amñare'ttet ñeñt amtsañpa' o' a'cllatuanet.

¹¹ Tarro'mar ñetpa' atet huapyesanete't pa'namen allochña yapa'cho'ña o'ch yeñoch yaña ama pocteyaye o'ch atet ye'pa yaña. Ñeñto'marña ama't ahua'tpa' atet quellquët atet pete't allempo, ñeñtpa' e'ñe yocpa'naña ñeñtey te'pa'cho'ña huaponayach allempoch mellapoterra. Añpa' ñeñt atet ye'chateney yaña amach ye'patsto atet pete't ñet. ¹² Ñeñto'marña te'pa' o'ch notas, e'ñech se'nota. Amach sotap'sa'tatsto, napa' amach ne'po ñeñt atet pete't ahua't. Tarro'mar ñerra'm esempo yot atetpa' ñato'rraña machayota alla atet yeperra yaña ñeñt ama pocteyaye. ¹³ Tarro'mar allohueneypa' chocmach huaponaya topateñets, ñeñtara topateñets ñeñt ye'chenoya allohueney ñeñtey arromñatey. Tarraña Yomporpa' chocmach yeyomcha tarro'mar ñapa' ama muenatenye o'ch topatey attoch metanonay yehuamenc. Tarraña ñerra'm esempoch chaponaya topateñetspa' ñapa' chocmach orrtatonay attoch ya'huante' attoch amach metanonaye yehuamenc.

¹⁴ Ñeñto'marña masheñeshacha' ñaña no'chaneshacha' notenes, e'ñe pocte' o'ch sa'ypo'ña'huerr ñeñt aye'chcatare'te'chno ñeñt po'yomporer penet ñet. ¹⁵ Sapa' se'notueñ ñeñt cohuentetsa Yomporcop. Ñeñto'marña o'ch notas, ¿ama't pocte' sente'ne ñeñt o' notuas? ¹⁶ Ñeñto'marña allempo yorreññañ ñeñt toma'ntenaya Cristo po'rras ñeñt atet anaret Yomporcoppa', choch ñanom yema'yochañpesya attoch yeparasyoso'ch Yompor. Allempo yorreñ allohueneypa' e'ñech yeyemte'ño' Cristo ñeñt rromats yocop po'ño'chpa' o'ch yeparrocmatua allohueney ama't ñaña Cristo. Ñaña attecmach yepena ñerra'm esempo yerren pan ñeñt toma'ntenaya Cristo po'chets. Allempo yeshota'ten pan, o'ch yerreñ parro allohueneypa' e'ñech yeyemte'ño' Cristo ñeñt a'rroye' po'chets yocop po'ño'ch allempopa' e'ñe yeparrocmatuen allohueney ama't ñaña Cristo. ¹⁷ Ñaña ama't'cha' shonteypa' e'ñech patrra pan yeshota't ñeñt'cha' yerra'y es ama't allohueney. Ñeñto'marña yeñoteñ ama't shonteypa' e'ñe yeparrocmate'ño' Cristopa' e'ñe patrra enteney allohueney, ñaña ñeñtara e'ñech

po'chets peney.

¹⁸ Ñehua, o'ch yoctape'ch ñaña ñeñt atet pe't israelena'tarnesha'. Ñetpa' o'ch muetset huaquesh amapa' carrnero Yomporecop. Al-
lotñapa' o'ch rrenet ñeñt puecha'yetsa. Allempo rreñetpa' po'ñoçh e'ñech
pueyemteñoet Yomporpa' o'ch parrocmatet epuet Parets. ¹⁹⁻²⁰ Ñehua,
po'ñoçhpa' ama notenso ñerra'm esempo serren po'chets ñeñt amt-
saret ayeçhcataretecoppa' o'ch separrocmat epas, tarro'mar ama't
toma'ntateñetañ Paretspa' ama Partsoyaye. Añña notenes ñerra'm es-
empo ñeñt ama ame'ñenayo Cristopa' o'ch es muetset ayeçhcataretecop,
tarraña po'ñoçhpa' añeçpa muetseñet oneñeñecop, ama añeçpaye' muet-
señeto Yomporecop. Ñeño'marña napa' notenes ñato' amach ser-
ratsche tarro'mar ama nemno e'ñe serreñoçpa' te't separrocmaten epas
oneñeñ. ²¹ Po'ñoçhpa' amate' errotentot yeparrocmatoña epay Yepart-
seshar Cristo ñerra'm cha yeparrocmaten epay oneñeñ. Ñeño'marña
notenes amate' errotentot e'ñe yeyemteñoet Cristopa' o'ch yorr ñeñt ñocop,
ñaña ñerra'm aña yetsoten ñeñt oneñeñecop. Ñaña amate' errotentot
yerroña parro ñeñt anaret Yepartsesharecop, ñaña ñerra'm aña yetsoten
ñeñt oneñeñecop. ²² Ñerra'm atet yeçapa' çhate' ya'llocchame'ch Yompor
ñaña e'ñe puempa'teñoçeypa' çhate' ya'tsrre'mach. Çhate' yotta ñerra'm
yapa' nanac ahuamencatey, ñañaapa' amate' ahuamencateye' yenteñe.

Atto ama't e'ñe poctet o'ch es yeça'yeseña'p tarraña amach yeçatsto

²³ Ñeño'mar te'pa' o'ch alla noterrser; e'ñe poctet o'ch yerreneñ
po'chets ñeñt amsaret ayeçhcataretecop, tarro'mar Yompor po'ñoçhpa'
ama otenñe amach yeçatsto atet. Tarraña ama't eñalleñ pa'namen ñeñt
e'ñe poctet o'ch yeçapa' tarraña ñerra'm ñeñt'pa' ama añeçpayaye alloch
huomenc yeça' yeyoçher Yomporecoppa' ñehua, ñeñt'pñapa' amach atet
yeçatsto. Ama't eñalleñ pa'namen ñeñt e'ñe poctet o'ch yeçapa' tarraña
ñerra'm ñeñt'pa' ama añeçpayaye alloch yeyenpue' po'pshet'ñeñ attoch
huomenc pan pueyoçher Yomporecoppa' ñehua, ñeñt'pñapa' amach atet
yeçatsto. ²⁴ Añcha'ña o'ch yepena attoch yeyenpue' yamo'ts attoch o'ch
huomenc pet pueyoçher. Amachña aña yellcatsto ñeñt e'ñe yocpa.

²⁵ Ñaña o'ch notas ñeñt'cha' atet seça: Ñerra'm esempo seta allecma
vendenet po'chetspa' amach sa'p'to'tatsche ñeñt vendets, amach so-
tatsche atet: "Añ po'chetspa' ¿añe't ñeñt amsaret ayeçhcataretecop?"
Amach sa'p'to'tatsto allochñapa' esheccha' serre' e'ñe cohuen. ²⁶ E'ñe
pocte' o'ch yerren ama't erra'tsente' po'chets tarro'mar allohuen es
yentyen arr patsro ñeñt'pa' Yomporo pueyeçhcatuar. Ñaña ama't ora
patspa' e'ñe ñocma.

²⁷ Te'pa' o'ch notas po'poñ ñeñt'cha' atet seça. Ñerra'm esempo
ñeñt ama ame'ñenaye Cristopa' o'ch hua'ñas o'ch serrallme'chapreteña'
ñaña ñerra'm sapa' seseçhapa', e'ñe pocte' o'ch ahues ñaña o'ch serra'
ama't erra'tsencha' po'chets apaset. Po'tomña amach sotatsto atet:
"Ta', ¿pocte'te' o'ch yerren añ po'chets? Ñato' ñeñt'ara añ po'chets
ñeñt'e' amsaret ayeçhcataretecop." ²⁸⁻²⁹ Tarraña o'ch notas po'poñoneñ:
Ñerra'm allo'tsen puesheñarr ñeñt ama pocteye' entenaye o'ch yerren
po'chets ñeñt amsaret ayeçhcataretecoppa' ñerra'm ñapa' o'ch otas:
"Añ po'chetspa' ñeñt amsaret ayeçhcataretecop", ñehua, allempopa' añ

pocte' amach serratsche. Amach yerratsche tarro'mar añ pocte' amach yepatsto ñeñt ama pocteye' enteno po'psheñeñ, ñato' ama't yapa' e'ñe pocte' yenteñeñ o'ch yerre'.

Ñehua, ñato' sapa' o'ch sot: "Ta', ¿eso'marte' pocte' yapa' o'ch yeña ñeñt atet pocte' enten po'psheñeñ? ¿Eso'marte'ña ama pocteyaye o'ch yeña ñeñt atet pocte' yenten ya?" ³⁰ Ñaña ñato' o'ch sot atet: "Ñerra'm po'ñoçh neparasyoso'teño'pa' nerren nerrarpa' ¿eso'marte'ña otenet ama pocteyaye o'ch nerra' ñeñt o' neparasyoso'tam'pesua?" ³¹ Ñeñto'mar te'pa' o'ch notas: Ama't erra'tsena es yeña'yenpa' añ pocte' o'ch yorrena e'ñe cohuen, attoch acheñenesha' o'ch ay'e'chochtateññañet ñamet Yompor. Ama't allempo es yerra'yen, ñaña ama't allempo es yorrenpa' añ pocte' o'ch yorrtaten e'ñe cohuen Yomporecop. ³² Añ pocte' amach yepatsto ñeñt ama pocteye' enteno judionesha'. Ñaña añ pocte' amach yepatsto ñeñt ama pocteye' enteno ñeñt ama judioneshayaye. Ñaña amach yepatsto ñeñt ama pocteye' enteno allohuen acheñenesha' ñeñt ame'ñenaya Yompor. Tarro'mar ñerra'm atet yeña ñeñt ama pocteye' entenetopa' çhate' ya'psatateranet Yompor. ³³ Ñeñto'marña napa' ama't erra'tsena neña'yenpa' añña nemneñ o'ch nocshach allohuen acheñ ñeñt atet pocte' entenet ñet. Tarro'mar napa' ama ne'nen ñeñt e'ñe nocpa, añña ne'nen ñeñt sherbets allohuen acheñenesha'cop. Tarro'marña napa' çhocma ne'nen atet, allochña'pa' attoch na'quesçpaterranet.

11

¹ Ñeñto'marña napa' notenes: Atet sentenen ñeñt atet nepena napa' ñeñt'pa' e'ñe pocte' ñeñt'cha' atet seña samña, tarro'mar napa' añ nepena ñeñt atet pena ñaña Cristo.

Ñeñt poctetsa ñeñt'cha' atet pa'coyaneshachno allempo yapçhena Parets pa'paclo

² Te'pa' o'ch masheñeshacha' ñaña noçhaneshacha' notas po'poñ. Napa' e'ñe pocte' nentenes atto sapa' ama sepseno ñeñt atet neyçhatuanmas ñeñt'cha' atet seña, ñaña atto çhocma seyerpuenna. ³ Te'ña añmapa' ñeñt nemneñ o'ch señoçh samña, atto ya allohueny ñeñtey asheñorreypa' añ pomnaren yepene' Cristo. Añña coyanesha'pa' añ pomnaren penahuet puerrollar. Cristoña'pa' añ pomnaren pene' Pompor. ⁴ Ñeñto'marña yoten ama pocteyaye ya ñeñtey asheñorreypa' o'ch yeca'matamño'ta allempo yema'yochena, amapa' allempo ya'poteññañ Yompor po'ñoñ. Tarro'mar ñerra'm esempo yeca'matamño'tenapa' çhach yottena ñerra'mrrate' po'psheñña acheñ pomnaren yepene', amach añeye' pomnaren yepenaye Cristo. Atteña'pa' o'ch çha yepencna'ntach Cristo ñeñt po'ñoçh pomnaren yepene'. ⁵ Yapa' añña yoten coyanesha'pa' e'ñe pocte' o'ch ca'matamño'ta ñerra'm esempo ma'yochena, amapa' ñerra'm allempo a'potenan Yompor po'ñoñ. Tarro'mar ñerra'm ama ca'matamño'topa' çhach ottena ñerra'mrrate' ama puerrollareye' pomnaren penaye. Ñeñto'marña yapa' atarrcha' pencna'ntateney poñ tarro'mar ama çhoye' ca'matamño'teno. Ñerra'm ama ca'matamño'topa' añ poctetsa penquëpa' tarro'mar çha ottena atette'ña ñerra'm ashopena'taret. ⁶ Atteña ñerra'm coyanesha' ama mueno o'ch ca'matamño'tapa' ñehua, ama'tpa' shopena'tatepa'. Attochña

ñerra'm o'ch cha pencana atto shopena'tenapa' ñehua, ama'tpa' ca'matamño'tepa'. Ñaña ñerra'm puetsorrño'tateño'tpa' o'ch pencapa' ñehua, ama'tpa' ca'matamño'tepa' ñaña. ⁷ Yocopña ama pocteyaye ñeñtey asheñorreypa' o'ch yeca'matamño'ta, allempo yeserrpare'ten Yompor pa'paclo tarro'mar ya Yomporpa' puetma'ntatarey ña, ñaña yapa' chocma po'cohuenña peneý. Tarraña coyanesha'pa' aña po'cohuenña pene' puerrollar. ⁸ Ñehua, tarro'mar ahuat Yomporpa' asheñorrof yehcatan coyanesha'. Asheñorrpa' ama coyaneshoteye' yehcache. ⁹ Ñaña yeñoteñ asheñorrpa' ama añecpaye' yehcache coyanesacop. Añecopña yehcatan coyanesha' attoch o'ch yenpa'y ya ñeñtey asheñorrey. ¹⁰ Ñeñto'marña añ pocte' coyanesha'pa' o'ch ca'matamño'tena attoch ama't Yompor po'ñllaño'teñnanesharpa' o'ch eñochet añ po'ño'ch pomnaren pene' puerrollar. ¹¹ Tarraña e'ñe yame'ñeño't Yepartsesharpa' añ pocte' ya ñeñtey asheñorreypa' o'ch yeyenpueñ yañña coyanesha'. Coyanesha'pa'cho'ña pocte' o'ch yenpueney ya ñeñtey asheñorrey. ¹² Ñeñto'marña yeñoteñ ahuat Yomporpa' asheñorrof yehcatan coyanesha'. Ñaña e'ñe allempoteñ ama't ya ñeñtey asheñorreypa' ahuo't eñalletateney coyanesha'. Tarraña po'ño'chpa' yeñoteñ ñeñtpa' e'ñe Yomporeshotecma huena.

¹³ Ñehua, o'ch na'p'to'tas: Ñeñt atet seyçhena sa ¿ama't pocteye' senteñeña coyanesha'pa' o'ch ma'yochenana Yompor ñerra'm ama ca'matamño'teno? ¹⁴ Ñeñt atet yeyçhena yapa' ñeñtpa' añ yeñotatene' ñerra'm ya ñeñtey asheñorreypa' esempo atesha'ta yehcha' o'ch pencateney. ¹⁵ Tarraña ñerra'm coyanesha'ña atesha'tatsa pue'chpa' e'ñech cohuen entapreteñ allohuen acheñenesha'. Ñaña ñerra'm ateshet pue'chpa' ñeñtpa' alloch ca'matamño'tenet, tarro'mar ñetpa' atet yehcatanet Yompor. ¹⁶ Ñehua, ñerra'm eseshas ama pocteye' entaye ñeñt atet o' notuaspa' ñehua, pocte' o'ch alla noterrser, tarro'mar ñeñt atet o' notuaspa' ñeñtpa' atetcha' sepa tarro'mar ama eñalle po'poñ ñeñt pocte' yenten. Ama't ñaña allohuen ñeñt pame'ñeño'tet Yompor ñeñt apcha'yetsapa' ñetpa'cho'ña pocte' enteñet ñeñt atet o' notuas.

Añpa' ñeñt ama aþapahuo allempo yorren ñeñt toma'ntenaya Cristo po'r ras

¹⁷⁻¹⁸ Te'pa' o'ch notas po'poñ ñeñtcha' atet sepa allempocma sapçhena. Tarraña ñanompa' o'ch notas, ama pocteye' nentenso ñeñt atet sepena te' allempocma sapçhena. Tarro'mar ñeñt atet sepenapa' ama añecpayaye attoch seyennannena e'ñe cohuen, elloña ñeñtpa' cha epatenes. Tarro'mar napa' o' ne'mare'tas ñeñt atet sepena. Ñerra'm esempo sapçhena e'ñe same'ñeño'tpa' amo'ch patrraye' soctape'cheno. Elloña sapa' atto'ch nanac es sotnare'tannena. Ñeñto'marña napa' noten ñato' po'ño'chte' atet sepena. ¹⁹ Po'ño'ch ñeñtey ame'ñetsapa' chocmach eñall ñeñtcha' ama pa'charroye' ame'ñatso, ñeñto'marña ya allempopa' o'ch yeñoch ñeñt e'ñe pa'charr cotape'chets, ñaña o'ch yeñoch ñeñtcha' ama pa'charroye' cotape'chatso. ²⁰ Ñaña ñerra'm esempo sapçhenapa' e'ñe seyerpueño't Yepartsesharpa' ahuo'ch serrallme'chen, tarraña po'ño'chpa' ama Yepartsesharecpaye' serrallme'cheno. ²¹ Tarro'mar puesheña'tets e'ñe pa'chporrño'tetpa' ahuo'chcho' rrenet

ñanmacma, amo'chña parrocmaye' serrallme'cheno. Ñeñto'marña ñato' pueheña'tetspa' ahuo'ch atta nanac cheporrena, ñato' po'psheñeññapa' ahuo'ch cha posa'tyes. ²² Ñeñt atet sepenapa' ama pocteyaye tarro'mar sapa' sechenca'yeña sepaquëll allcha' serren ñaãa allcha' es sorryen. Eso'mare'tña amaña añcha'na'tpahuoye' senteññañeña Yompor pa'paquëll. Allñapa' o'ch atta sepencateñ ñaãa ñeñt ama es echetso. Te'ña po'ño'ch napa' o'ch notas, amaca'ye nocshapretensoña sa ñeñt atet sepena.

Atet pa Jesús allempo ñanom toma'ntatana po'rras orrpapo'
(Mt. 26.26-29; Mr. 14.22-25; Lc. 22.14-20)

²³ Añmapa' ñeñtña atet yethatnerrey Yepartseshar ñeñtcha' attoch yeyerpueña. Ñeñtara ñoñets sapa' o' neñotatuas ahuañacma. Ñeñtpa' atet oten: Ñeñte tsaprocma allempo Judaspa' pomuerran Yepartse-shar Jesús, ñaãapa' chetan pan. Chetan panpa' ²⁴ parasyoso'tam̄pes allotñapa' shota'chpa' atet otanet: "Añmapa' ñeñt toma'ntenaya nechets ñeñtcha' atserrpare'tterrtsa socop. Añmapa' ñeñtcha' atet sepa. Ñerra'm esempo serren pan atetpa' e'ñech seyerpueño'ten napa' o'ch serre'." ²⁵ Allempoña o' rrohuetpa' attecma pa' o' chetan ñaãa orramets alocma orrete'tpa' atet otanet: "Añ ñeñtcha' sorrpa' ñeñt toma'ntenaya nerras ñeñtcha' etserra anaret allochñapa' attoch apretna'huaretterra so'chñar. Añmapa' ñeñtcha' atet sepa: Ñerra'm esempoch sorren ñeñt toma'ntenaya nerraspa' e'ñech seyerpueño'ten napa' sorreñcha'." Añpa' allohua ñeñt atet otnerrey Yepartseshar. ²⁶ Ñeñto'marña te'pa' ñerra'm esempo yerren añ pan, ñaãa yorren añ orrpapo'pa' chocmach yeñotach acheñenesha' atto rroma Yepartseshar yocop. Ñeñtpa' e'ñech tayoteñ atet yepa tarrempohuach esempohuañencha' huerra.

Añpa' ñeñtcha' atet yepa allempo yorren ñeñt toma'ntenaya Cristo po'rras

²⁷ Tarraña ñerra'm yapa' ama yeyerpueño'teye' e'ñe ña yerreno pan, ñaãa o'ch yorr ñeñt toma'ntatana Yepartseshar po'rraspa' yapa' chate' yeyora yo'chñar e'ñe ya'llocchame'teño'f Yepartseshar po'chets ñaãa po'rras. ²⁸ Ñeñto'marña te'pa' o'ch notas, amach sorreña'pa' o'ch soctape'ch ñanom, o'ch seño'ta sañeña ñeñt atet o' sepo'hua. ²⁹ Tarraña ñerra'm atta ama es yep'cheno rre', ama yoc'tape'cho ñanom ñeñt toma'ntatana Yepartseshar po'chetspa' ñerra'm atta yerre' ñaãa atta yorrpa' e'ñe yerreño'f ñaãa yorreño'tpa' atsa'tatare'teycha'. ³⁰ Ñeñto'marña seshopa' shonte' acheñenesha' ñeñt ama a'ñshe'mtetso, ñaãa po'potantañpa' cha atsna'tyeset, po'potantaññapa' o' rromayeset. ³¹ Tarraña ñerra'm cho ñanom yoc'tape'ch e'ñe cohuen, o'ch yeñota yañeña ñanomp'a' allempoña po'ño'chpa' amach atsa'tatare'teye. ³² Tarraña ñeñtcha' atet tsa'tatya te' Yomporpa' ñeñtpa' añecop attoch cotape'chaterrey e'ñe cohuen attoch esempohuañenpa' amach a'coñchatare'teye epay ñeñt ama ame'ñetso arr patsro.

³³ Ñeñto'marña masheñeshacha' ñaãa no'chaneshacha' te'pa' o'ch noterserr: Ñerra'm esempo sap'cha allohuenes o'ch serra' ñeñt anaret Yepartsesharecoppa' añ pocte' choch ñanom secuanna'ta attoch o'ch ser-reñ e'ñe parrocm'a. ³⁴ Tarraña ñerra'm eseshas cheporratsapa' e'ñe pocte' o'ch serrerra' sepaclo. Tarro'mar ama pocteyaye e'ñe sap'cheño'tpa'

o'ch secoñchatanna'ta. Ñaña po'poñechno ñeñt palltetsapa' allach neserrpare'tatoses ñerra'm esempoch nechap sesho.

12

Atto Parets Puecamquëñpa' apa'yeney po'poñe'ttsocma attoch yetorra'yesa Yomporecop

¹ Te'pa' masheñeshacha' ñaña nochaneshacha' o'ch yeserrpare't ñaña atto Parets Puecamquëñpa' ñach ahuamencat ye'pa'yese' attoch yetorra'yesa po'poñe'ttsocma Yomporecop. Tarro'mar napa' nemneñ o'ch señoçh ñeñt e'ñe atet pennay Parets Puecamquëñ.

² Ama't sapa' señotheñ ahuañmo'cha allempo ama same'ñerra'pa' atta sema'yochatse'tyese't aye'chcatarete'chno. Ñaña aye'chcatarete'chnopa' ama't ama eñorenopa' atta nanac ame'ñatasete't, ama't all seta'yese't. ³ Tarraña ñerra'm machaya esesha' eñoratsa, napa' nemneñ chochña e'ñe señoçh ñato' po'ño'chte' añ eñoratene' Parets Puecamquëñ, ñato' amate'. Ñeñto'marña o'ch neñotatas atet attoch sapa' señoçh: Ñerra'm esesha' achm'are'tene' Jesús'pa' ñeñtña sapa' o'ch señoçh ama a'ñeye' eñoratenaye Yompor Puecamquëñ. Tarraña ñerra'm esesha'ña otets: "Jesús'pa' ñeñt po'ño'ch Yepartseshar yepen", ñeñtña po'ño'chpa' o'ch señoçh añ eñoratene' Parets Puecamquëñ.

⁴ Ñaña Yomporpa' ama't e'ñe patrra Puecamquëñpa' tarraña ñapa' o'ch ahuamencat pa'yese'y attoch yetorra'yesa e'ñe po'poñe'ttsocma Yomporecop. ⁵ Ama'tcha' po'poñe'ttsocma yetorra'yesa'ña' tarraña ñeñtarach paterr Yepartseshar yesher'ba'huen allohueney. ⁶ Ñaña ama't eñalleñ po'poñe'ttsocma atto ahuamencat pohueney allohueney tarraña e'ñe patrra Yompor ñeñt ahuamencat yepene' allohueney. ⁷ Ñaña allohueney Parets Puecamquëñpa' ahuo't apa'yese'y attoch yorrtatye-soñ Yompor po'huamenc. Ñeñt'pa' añecop aparetey attoch yeyen-panna'ta alloch huomenc ye'pa'yese'yeyo'cher Yomporecop. ⁸ Atet ñerra'm ñato' puesheñarr Parets Puecamquëño'pa' o'ch a'p attoch e'ñe eñotan ñeñt cohuentetsa Yomporecop, attoch ñapa' o'ch cotape'chatan pamo'tsesha'. Ñato' po'psheñeñ añ Parets Puecamquëñpa' o'ch nanac chapatoñ pueyo'chro ñeñt cohuentetsa Yomporecop, attoch ñapa'cho'ña o'ch yenpan pamo'tsesha'. Tarraña ñeñtara Parets Puecamquëñ ñeñtña eñotatenahuet. ⁹ Ñato' po'psheñeñpa' nanaccha' yemtenana Yompor. Ñeñtara Parets Puecamquëñpa' o'ch a'p attoch yemcha nanac. Ñato' po'psheñeñpa' o'ch a'p po'huamenc attoch a'crratyesan atsnañe'fe'chno. Tarraña ñeñtara Parets Puecamquëñ ñeñtña apuene' attoch a'crratyes. ¹⁰ Ñato' po'psheñeñpa' o'ch a'p attoch orrtatyesan Yompor po'partsoña. Ñato' po'psheñeñpa' nanaccha' cohuen a'potan Yompor po'ñoñ. Ñato' po'psheñeñpa' o'ch eñotyese' pa'namen cotapñats, attoch ñapa' o'ch eñoçh erro'tte' huena ñeñt cotapñats, ñato' Parets Puecamquëño' amapa' oneñe'ate' pocta'pña. Ñato' po'psheñeñpa' Parets Puecamquëñcha' eñotatene' eñosyese'ts po'poñ ñoñtso. Amapa' ñato' po'psheñeñpa' o'ch a'mitan ñoñets atet eñenet po'poñ ñoñtso. ¹¹ Tarraña allohueney'pa' e'ñe patrra Parets Puecamquëñ ñeñt'cha' yeñotatene' ñeñtara ñeñt'cha' yapa'yese' puesheñat'tsoy erra'tsencha' muena' ña attoch yetorra'yesa pa'namen ñocop.

Ama't e'ñe po'poñe'ttsocma yetorra'yena Yomporecoppa' tarraña ñapa' e'ñe attecma cohuen enteney

¹² Ñato' o'ch netma'ntacha ñeñt atet yeçhquëna yechets. Ñehua, allemeñ yechetspa' ama'tcha' ellopa'tetstenañpa' tarraña allohuenpa' e'ñe patrra yechtsot. Attecma yepena yaña allohueney ñeñtey ame'ña'yenaya Cristo. Ama't shonteyen po'poñe'ttsocmaypa' tarraña e'ñe yame'ñeñoť Cristopa' o'ch yeparrocmatuahua allohueney. ¹³ Tarro'mar allempo o' yapataretetuapa' Parets Puecamquëñpa' o'ch parrocmatatuerrey allohueney. Ama't ñaña po'poñe'ttsocmay acheñey atet ñerra'm patanta'ttsoypa' judioneshay, ñato' po'potantañpa' amach judioneshayaye. Tarraña allohueney e'ñe puechorreñoťey Parets Puecamquëñpa' e'ñe allempoteñpa' o'ch yeparrocmatua allohueney. Ama't ñaña acheñ ñeñt ataruasataret e'ñe atta ñeñt ama esoye' enteñeto ñaña acheñ ñeñt e'ñe cohueno'tsen. Tarraña e'ñe puechorreñoťey Parets Puecamquëñ ñeñt e'ñe patrrapa' e'ñe allempoteñpa' o'ch yeparrocmatua allohueney.

¹⁴ O'ch alla netma'ntatererr ñeñt atet yeçhquëna yechets. Ñehua, atet ñerra'm allemeñ yechetspa' ama patrraye' yeçhquëtso, shonte'ca'ye yeçhquëtso. Tarraña ama't shonte' yeçhquëñañ yechetspa' e'ñe patrra yechets ottetsa. Attecma yepena yaña allohueney ñeñtey ame'ña'yenaya Cristo. Ama't shonteyen po'poñe'ttsocmaypa' tarraña e'ñe yame'ñeñoť Cristopa' o'ch yeparrocmatuahua. ¹⁵ Ñehua, o'ch netma'ntatererr po'poñ: Ñato' atet ñerra'm yetacpa' o'ch ot: "Napa' ama es nesherbena atet sherben otats, ñeño'marña ama pocteye' nenteñe o'ch neparrocmat epan ye'nar." Tarraña ama't atet oteneñ yetacpa' ñeñtpa' ama atteyaye, çhocma parrocmaten. ¹⁶ Amapa' ñato' atet ñerra'm yetpa' o'ch ot: "Napa' ama es nesherbena atet sherben quëllo'yets ñeño'marña napa' ama pocteye' nenteñe o'ch neparrocmat epan ye'nar." Tarraña ama't atet oteneñ yetpa' ñeñtpa' ama atteyaye, çhocma parrocmaten ñaña. ¹⁷ Ñerra'm yechetspa' e'ñe yecloyochayapa' amate' erroteno ye'mueno. Ñaña ñerra'm yechetspa' e'ñe yetochayapa' amate' erroteno es yemosyeno. ¹⁸ Tarraña po'ñoçpa' ama atteye' yeçhcatye Yompor. Ñapa' ahuo't ne' attoch yeçhca'yesa allemeñ yechets ñeñt atet pocte' ent ña. Ñeño'marña yeñoteñ ama't errotençho' yetorra'yesa Yomporecop puesheña'ttsoypa' ñeñtpa' çhocma sherba'yen. ¹⁹ Po'ñoçpa' ñerra'm yechetspa' aña yeçhcatsa paterr atet ñerra'm e'ñe yecloyochayapa' amate' errotenoť orroña e'ñe cohuen ora yechets. ²⁰ Tarraña po'ñoçpa' ama atteye' ayechcatareťeye. Aña çhocma eñalleyesa allemeñ yechets. Tarraña ama't ellopa'tetstenañpa' e'ñe patrra yechets ottetsa. Ñeñtpa' attecma yepena yaña allohueney ñeñtey ame'ña'yenaya Cristo. Ama't po'poñe'ttsocma yetorra'yesa Yomporecoppa' tarraña e'ñe yame'ñeñoť Cristopa' o'ch yeparrocmatuahua allohueney.

²¹ Ñato' o'ch netma'ntatererr po'poñ: Atet ñerra'm yecle'pa' ama pocteyaye o'ch otan yot: "Napa' ama nepallteno ñeñt atet pesherven pa." Ñaña yoñpa' ama pocteyaye o'ch otan yetac: "Napa' ama nepallteno ñeñt atet pesherven pa." ²² Ñeño'marña ama pocteyaye o'ch yoctape'chyas atet, tarro'mar ora allohuen yechetspa' e'ñe sherba'huen. Ñato' yapa'

chach yotenapañ ñato' erra'tsen yechetspa' amate' es sherbeno. Tarraña ñato' ñeñtara yechetspa' ello metana'tuenan atto sherben po'poñechno yechets. Attecma yepena yama allohueney ñeñtey ame'ña'yenaya Cristo. Ñato' yapa' chach yotenapañ ñato' erra'tsen acheña' amate' es sherbeno. Tarraña ñato' ñeñña acheña' ello metana'tuenan atto sherben po'poñechno acheñ. ²³ Ñaña ñerra'm erra'tsen yechets ama tama cohuenaye' yentenopa' ñato' o'ch yechorrataña e'ñe cohuen attoch ellopa' o'ch yorrta nanac cohuen. Ñaña ñato' erra'tsen yechets ñeñt yepenatene'pa' ñato' o'ch ya'nach e'ñe cohuen. ²⁴ Tarraña ñeñt e'ñe cohuen yechetspa' amach yemno o'ch ya'nach, añña chochña yorrtateñ. Atet yeçcatonay Yompor yechets attoch ama't ñeñt ama tama cohuenaye' yentenopa' o'ch yañño'teñ e'ñe cohuen attoch ellopa' o'ch orrta nanac cohuen. ²⁵ Allempoña allemeñ yechetspa' o'ch parrocmatet e'ñe cohuen, ñaña allempopa' o'ch e'ñe cohuen yenpannenet. ²⁶ Ñeñto'marña ñerra'm esempo paterr yechetspa' atserrtena allohuen yechetspa'cho' o'ch atsotapretannenet. Ñaña ñerra'm paterr yechetspa' o'ch orrta e'ñe cohuen allohuen yechetspa'cho' o'ch coshapretannenet. Attecma yepena yama ñeñtey ame'ña'yenaya Cristo. E'ñe yeparrocmatanna'teñoñ ñerra'm puesheñarr yamo'ts cha llequena ñeñt parro yame'ñenapa' allohueney ñeñtey ame'ñetsapa' o'ch yellcapretannena. Amapa' ñerra'm puesheñarofeypa' nanac yocshenapa' allohueneypa'cho'ña o'ch yocshapretannena.

²⁷ Ñehua, añ yechets ñeñt o' notuapa' añ toma'ntena ya allohueney ñeñtey o' yame'ñera, Cristopa' o' enterrey atet ñerra'm e'ñe ña po'chtsoy, tarro'mar o' yeparrocmat epay Cristo. Ñaña ama't shonteyeñ e'ñe po'poñe'ttsocmaypa' tarraña e'ñe yeparrocmateño'pa' o' atet yeperra atet ñerra'm Cristo po'chtsoy. ²⁸ Ñaña allohueney e'ñe yame'ñeñoñ Yomporpa' e'ñe po'poñe'ttsocma yetorra'yena Yomporecop. Tarro'mar Yomporpa' atto na'yesonay pa'namen attoch yetorra'yesa ñocop. Ñanompa' ahuo't nan puesheña'tets allsensaretnesha'. Allo'pa' ahuo't nan po'poñechno ñeñtcha' a'pote' po'ñoñ. Allo'pa' ahuo't nan ñaña po'potantañ ñeñtcha' yeçhatenahuet Yompor po'ñoñ. Allo'pa' ahuo't nan po'potantañ ñeñtcha' orrtate' po'partsoña. Allo'pa' ahuo't nan po'potantañ ñeñtcha' torratta attoch a'crratyaset ñeñt atsna'tyets. Po'potantañña'pa' ahuo't ne' ñeñtcha' torratta yenpue' allohuen acheñenesha'. Po'potantañña'pa' ahuo't ne' ñeñtcha' yeçhatenahuet allohuenet. Po'potantañña'pa' ahuo't ne' ñeñtcha' eñosyets pa'namen ñoñtso. ²⁹ Po'ñoçpa' ama allohuenacmaye' allsensareteye. Ñaña ama allohuenacmaye' ya'poteno Yompor po'ñoñ. Ñaña ama allohuenacmaye' yeyçhateno. Ñaña ama allohuenacmaye' yorrtateññañe Yompor po'partsoña. ³⁰ Ñaña ama allohuenacmaye' ya'crratyene atsnañe'fēchno. Ñaña ama allohuenacmaye' yeñosyeno po'poñ ñoñtso. Ñaña ama allohuenacmaye' ya'mteno ñoñets ñeñt eñets po'poñ ñoñtso. ³¹ Tarraña ama't ama allohuenacma atteyepa' e'ñe poçte' o'ch yeye'chena ñeñtcha' yetorra'yena e'ñe cohuen puesheña'ttsoy Yomporecop. Tarraña ellopa' o'ch neñotatas po'poñ ñeñt nanac sherbets Yomporecop.

13

Eñall paterr ñeñĩ nanac sherbets, ñeñĩpa' añ: atto amor-rentanna'tpahuepa'ch allohueney

¹ Ama't yeñosyesatset e'ñe cohuen pa'namen acheñ po'ñoñetoña' ñerra'm ama yemorreñcho yamo'tspa' e'ñe yeñosyeño'tpa' añña Yomporpa' attach enteney atet ñerra'mrate' con ñeñĩ atta ama'tochtetsa. Tarro'mar ama yemorrenteño'teye' yeñosyeno pa'namen ñoñets. Ñato' ama't yapa' yeñosatsetyes e'ñe cohuen atet ñerra'm Yompor po'mllaño'teñnanesharña' ñerra'mña ama yamo'ts yemorrentenopa' e'ñe yeñosyeño' Yomporpa' attach enteney atet ñerra'mrate' patashalla challachallatspenet. Tarro'mar ama yemorrenteño'teye' yeñeno. ² Ñaña ama't yapa' yeñotatset a'mite' Yompor po'ñoñ, tarraña ñerra'm ama yemorreñcho yamo'ts, atetpa' amach esoye' entenye. Ñaña ama't yeñotatset o'ch ya'po'ta ñeñĩ ñap'ta eñoten Yompor tarraña ñerra'm ama yemorreñcho yamo'tspa' ñeñĩpa'cho'ña amach esoye' entenye Yompor. Ñaña ama't yeñotatset ora allpon ñeñĩ eñall, tarraña ñerra'm ama yemorreñcho yamo'ts, ñeñĩpa'cho'ña amach esoye' entenye Yompor. Ñaña ñato' nanac yeyemteño' Yomporpa' aphueney allohuen ñeñĩ yenamueñ, ama't ñeñĩ echarr yentyen. Ñato' o'ch netma'ntacha atet: Ñato' o'ch yoch Yompor, añ aspenetpa' chenquëpa'. Ñato' e'ñe yeyemteño' Yomporpa' o'chcho' chenca. Tarraña ama't yeyemteño' Yomporpa' o' ye'pohua atet, tarraña ñerra'm ama yemorreñcho yamo'tspa' attecma enteney Yompor, ama esoyaye. ³ Ñaña ama't es yapa'yesatsech huocchañnasha' ora allohuen ñeñĩ yechyenña', ñerra'm ama yemorrenteño'teye' es yapa'yenanetopa' ama't atet ye'patstapa' Yomporpa' amach cohuenaye' entenye. Ñaña ama't e'ñe yame'ñeño' pocte' yentatsech pue'moñe'teño'fetay o'ch chamayet ora betnatoteypa' tarraña ñerra'm ama yemorrenteño yamo'ts, ama't atet ye'patstapa' Yomporpa' atterach amach cohuenaye' entenye.

⁴ Tarraña ñerra'm esempo po'ño'ch cho yemorrenteña yamo'tspa' e'ñech aco'pa es ye'pa'yenanet, attach ya'huantenanet ñaña cho'chña ya'muerañtena. Ñaña amach cha es yeye'chapretyenaneto, ñaña amach cha yommo'chana'tatstaneto. ⁵ Ñaña amach yañeña entatstatso e'ñe cohueney. Ñaña ñerra'm esempo po'ño'ch cho yemorrenteña yamo'tspa' e'ñechña pocte' es ye'pa'yenanet, ñaña amach añña ye'natsto ñeñĩ e'ñe atet yemnen ya. Añcha'ña ye'nen ñeñĩ atet muenen po'psheñeñ. Ñaña ñerra'm esempo po'ño'ch cho yemorrenteña yamo'tspa' amach cha ye'moñe'tyananeto, ñaña amach cha atsrre'mo'chen yentuenaneto. ⁶ Ñaña ñerra'm esempo es 'pohua po'psheñeñ ñeñĩ ama pocte'ye' enteno Yomporpa' ñerra'm po'ño'ch amuerañaypa' yapa' amach cha yocshatsto. Añcha'ña yocshapretena ñerra'm esempo e'ñe cohuenare' es penet. ⁷ Ñerra'm po'ño'ch cho yemorrenteña yamo'tspa' ama't cho errot 'ponaypa' yapa' cho'cmach ya'huantoñ. Ñaña ñerra'm po'ño'ch cho yemorrenteña yamo'tspa' cho'cmach yeyemcha ñeñĩ atet pena amapa' ñeñĩ atet oten. Ñaña ñerra'm po'ño'ch cho yemorrenteña yamo'tspa' e'ñe yeyemteño'fanet cho'cmach yeyenpuenanet attoch huomenc pet

pueyoçher ñamet Yomporecop. Ñaña ñerra'm po'ñoçh çho yemorrenteña yamo'tspa' çhocmach ya'huanta'huanom pa'namen topateñtsoçhno.

⁸ Atto yemorrentannenapa' ñeñtpa' amach ahuañañaatto ama't erponaña. Ñaña te'pa' ama't ya'poteññañeñ Yompopor po'ñoñ tarraña esempohuañenpa' huañcha' atto ya'poteñ te'. Ñaña ama't atto te'pa' yeñosyen po'poñ ñoñtsopa' ñeñtpa'çho'ña esempohuañenpa' huañcha'. Ñaña ama't atto yeñotañtena te'pa' ñeñtpa'çho'ña esempohuañenpa' huañerrcha'.⁹ Tarro'mar ama't allpon es yeñotyen te'pa' ama e'ñe yeñotueñe poctacma. Ñaña ama't te'pa' ya'poteññañ Yompopor po'ñoñ ñeñtpa'çho'ña ama e'ñe yeñotueñe poctacma. ¹⁰ Tarraña ñerra'm esempoch huerra Cristo ñeñt e'ñe yeñotañtetsa poctacmapa' allempoña yapa' o'ch e'ñe es yeñotuahua yaña.

¹¹ Ñehua, ñato' o'ch netma'ntacha atet: Napa' allempo cheshenna'pa' atta neñosatsetyese't atet eñen cheshatollesha'. Ñaña allempopa' atta noctape'chatsetyese't atet cotape'chyen cheshaneshas'. Ñaña añach cohuen nentapreyese't atet cohuen entyen cheshatollesha'. Tarraña te'pa' o' nepo'npa' o'huañ noctape'chatsetyese't atet pena cheshatollesha'.¹² Ñaña yapa' ama yeñotueno e'ñe ora atet pena Parets. Ñehua, ñato' o'ch netma'ntatererr atet: Yapa' çha yottena atet ñerra'mrrate' rerpato'ta yecueñ Yompopor, amach tama yechme'teñe. Tarraña esempohuañenpa' yentercha' e'ñe allame'tets. Ñaña te'pa' atto es yeñotyen mamesha'tets, tarraña esempohuañenpa' yeñotuerrcha' ñeñt e'ñe atet pena Parets, e'ñech yeñotañetuerra atet pena te' Yomporpora' e'ñe eñotueney ñeñt atet yepena. ¹³ Ñeñto'mar te'pa' yeñoteñ eñall ma'pa ñeñtcha' ama ahuañañañatatto ñeñtpa' añ: atto yeyemteña Yompopor, ñaña atto yeyemteño' yecuame'teñ ñeñt o'patatenya, ñaña atto yemorrentannena. Tarraña añ ma'po'marpa' añña nanac sherbets Yomporecop atto yemorrenteña allohuen acheñenesha'.

14

Ama't yeñosatsetyes po'poñ ñoñtsopa' ñeñtpa' ama tama sherbeno

¹ Ñeñto'marña te'pa' añ poctetsa o'ch yema'yoçhrena attoch yemorentanna'ta e'ñe poctacma. Ñaña añ pocte' o'ch yeye'chaprecha Yompopor attoch o'ch apa'yese'y e'ñe Puecamquëño' attoch yetorra'yesa ñocop. Añña e'ñe pocte' o'ch yeye'chaprecha nanac attoch apuey o'ch ya'potoñ po'ñoñ e'ñe eñotoçhen. ² Tarro'mar ñeñt eñets po'poñ ñoñtsopa' añeçpa sherben attoch eñora epuet Yompopor, tarro'mar añña acheñenesha' ñeñt e'mñnotenahuetaña' amach esesha' eñotenaye ñeñt atet oten. Ama't añ ye'ñoratatste' Parets Puecamquëñ ñeñt ama eñotpahuo ñoñetsña' ñerra'm acheñenesha'pa' ama eñoteñeto atet yotyenanet, ñeñtpa' e'ñe Yompopora ñapuef e'muene'. ³ Tarraña ñerra'm esempo ya'potoñ Yompopor po'ñoñ e'ñe eñotoçhenpa' ñeñtpa' po'ñoçh çhoch es yeñotatenanet attoch huomenc penet pueyoçher Yomporecop. Ñaña çhoch yeñotatanet ñeñt atet oteney Yompopor po'ñoñ ñeñtcha' atet ye'pa e'ñe cohuen. Ñaña çhoch yeñotatanet Yompopor po'ñoñ attoch ñetpa' coshenet Yomporecop. ⁴ Tarraña ñeñt eñets po'poñ ñoñtsopa' ñeñtpa' amach atteye' peno. Añeçpach eñen e'ñe ñocpa attoch huomenc pan pueyoçher e'ñe ñañeña. Tarraña ñerra'm esempoña ya'poteññañ Yompopor po'ñoñ e'ñe eñotoçhenpa' ñeñtpa' çhoch po'ñoçh

es yeñotateñ allohuen ñeñĩ ame'ñetsa attoch huomenc penet pueyoçher Yomporecop.

⁵ Ñehua, po'ñoçhpa' pocte' nenteñ o'ch seños po'poñ ñoñtso allohuenes, tarraña ñeñĩ nanac nemnen o'ch señospa' ñeñĩtpa' añ: o'ch sa'potoñ Yomporecop po'ñoñ e'ñe eñotoçhen ñeñĩ allo yeñen. Tarro'mar ñerra'm esempo ya'potoñ Yomporecop po'ñoñ e'ñe eñotoçhenpa' nanaccha' yesherben Yomporecop. Tarraña ñerra'm esempoña yeñen po'poñ ñoñtso' amach tama yesherbeno. Ñehua, pocte' enteñ Yomporecop ñerra'm po'ñoçh eñall puesheñarr ñeñĩ a'ñtene' ñoñets e'ñe ya yeñoño, attoch allohueney ñeñey ame'ñetsapa' o'ch çhaponaya Yomporecop po'ñoñ yeyoçhro attoch huomenc yepa' yeyoçher. ⁶ O'ch notas masheñeshacha' ñaña noçhaneshacha' ama't napa' ñerra'm machayota neçhap seshopa' ñerra'm nañapa' añ neserrpare'tatoses po'poñ ñoñtso ñeñĩ ama yeñenopa' errotenotuáte'ñaca'yeña señoçh tarro'mar amaca'ye se'muenoña ñeñĩ ñoñtsor ñeñĩ atet notenes attoch e'ñe cohuen neyenpas. Tarraña añña pocte' socop napa' çhocmach na'potonas e'ñe eñotoçhen ama't coñeña'ttsa ñeñĩ atet eñotatenen Yomporecop. Ñaña napa' elloña çhocña es neñotatyesas po'poñ ñeñĩ ama señoçh sa. Ñaña napa' çhocña na'potonas mamesha'tets Yomporecop po'ñoñ, ñaña çhocña es neyçhatas ñeñĩ cohuentetsa.

⁷ Ñato' o'ch netma'ntacha ñeñĩ atet pena pencoll, ama't pencollpa' ama acheñeyaye. Atet ñerra'm napa' esempo nepenclla'tenña' ñerra'm ama cohuenaye' na'poçhe'teno nepencollpa' amach esesha' eñotaye errotenete' neçchateñ. Amapa' atet ñerra'm napa' esempo netoca' yetarra,* ñerra' ama atteye' netoco atet toquëñetpa' amach esesha' eñotaye errotenete' neçchateñ. ⁸ Ñehua, ñato' o'ch netma'ntatererr po'poñ. Atet ñerra'm esempo o'ch ahuanmuet quellaratsapa' çhoc ñanome puesheñarr solltarpa' o'ch corrneta't quellareñtsoreçho, attoch solltarnesha'pa' o'ch eñoçh o' çhap allempoch ahuanmuet quellaratset. Tarraña ñerra'm solltarpa' ama cohuen a'poçhe'tano po'cornetpa' añña solltarnesha'pa' amach eñoçheto ñato' añecopte' a'toreñet attoch ahuanmuet quellaratset. ⁹ Attecma pena ñaña yocop ñerra'm esempo yeserrpare'ten po'poñ ñoñtso ñeñĩ ama allo eñeno acheñenesha', ñetpa' amach errotenoç çhapaneto pueyoçhreto ñeñĩ atet yotenanet. Atetpa' çhach yottena atette'ña ama eñalle acheñenesha' ñeñĩ ye'ññotene'. ¹⁰ Po'ñoçhpa' eñalleñcha' shonte' po'poñe'ttsocma ñoñets ñeñĩ atet yeñosyen añ patsro. Ñaña po'poñe'ttsocmay acheñey ñeñey eñotyene' ñeñĩ e'ñe yeñoñ allo yeñosyen. ¹¹ Tarraña ñerra'm po'psheñeñpa' o'ch serrpare'tatey e'ñe ña po'ñoño ñeñĩ ama allo yeñeno yapa', ñeñĩtpa' amach yeñoche errotenete' oteneý ña po'ñoño. Yapa' attach ye'mueñ ñerra'mrrate' atta otatsen. Ñaña attecmay yaña ñerra'm yapa' o'ch yeserrpare'tach ñeñĩ ama eñetso yeñoño'pa' amach eñoche errotenete' yoteñ yeñoño. Ñapa'çho'ña attach e'mueney ñerra'mrrate' atta yotatsen. ¹² Napa' tarro'mar atet notenes tarro'mar sapa' çhocma seye'chyena atto Parets Puecamquëñpa' o'ch çpatyesas ñeñĩ atet semna'yen sa. Tarraña napa' añcha'ña o'ch notas, añña pocte' o'ch seye'chena attoch señoçh e'ñe cohuen alloch huomenc sepoñ pueyoçher allohuen ñeñĩ ame'ñetsa.

* 14:7 Po'ñoçh añpa' oten arpa.

13 Ñeñto'mar te'pa' o'ch notas: Ñerra'm esesha' eñosets po'poñ ñoñtsopa' añ pocte' ma'yochanepa' Yompor attoch eñotach o'ch a'mñtan eñoñets e'ñe eñotochen añ ñeñtara ñoñtso. 14 Tarro'mar ñerra'm esempo yema'yochena po'poñ ñoñtsopa' ama't e'ñe Parets Puecamquëñ yema'yochatate'pa' tarraña allempo po'ñoçhpa' amach añeye' yoctape'cheno attoch yeyenpue' yamo'ts. 15 Ñehua, ñeñto'marña te'pa' o'ch notas ñeñtcha' atet ye'pa'yesa e'ñe cohuen. Po'ñoçhpa' e'ñe pocte' o'ch ma'yochatey Parets Puecamquëñ po'poñ ñoñtso, tarraña añ e'ñe pocte' ñaña o'ch yema'yochena e'ñe eñotochen. Ñaña attecma e'ñe pocte' Parets Puecamquëño'tpa' o'ch yemorreacha Yomporecop po'poñ ñoñtso, tarraña añ pocte' ñaña o'ch yemorreachena allo e'ñe yeñen. 16 Tarro'mar ñerra'm po'poñ ñoñtsa ya'ye'choçhtateññañ Yompor atet eñoratey Puecamquëñ, tarraña ñerra'm allo'tsa'yen po'poñeçhno acheñenesha' ñeñt e'ñe errte' e'mñotetspa' amach errotenot pocte' entapretyeto atto ya'ye'choçhtateññañ Yompor, tarro'mar ama e'muennayeto yeñoñ. 17 Ñaña ama't e'ñe cohuen yeparasyoso'teñeñ Yomporpa' tarraña ñerra'm po'poñ ñoñtsa yema'yochena, ñeñtpa' ama añecpayaye alloch huomenc ye'poñ po'psheneñ pueyoçher, tarro'mar ama eñoteñeto erro'tente' yoten. 18 Napa' atarr neparasyoso'teñ Yompor, tarro'mar ama't napa'çho' neñoteñ eñosets po'poñ ñoñtso. Ñato' ñeñtpa' ello metanennas allohuenes atto señosyen po'poñ ñoñtso. 19 Tarraña allempo yapçhena allohueney ñeñtey ame'ñetsapa' napa' añña pocte' nenten o'ch neserrpare't ama't e'ñe coñe'ta ñoñets ñeñt eñotochen attoch e'ñe yeñotue. Añña ama tama cohuenaye' nenteno ama'tcha' neserrpare'ten shonte' ñoñets, tarraña ñerra'm po'poñ ñoñtsa neñenpa' ñeñtpa' amach çhoye' neyenpueñe namo'ts.

20 Ñeñto'marña masheñneshacha' ñaña noçhaneshacha' amach soctape'chatsto atet co'tape'chen cheshaneshha' ñeñt ama eñotenaye ñeñt atet cohuentetsa. Ñehua, po'ñoçh ñerra'm esempo yoctape'chyen sosya'tsañ allempoña pocte' o'ch yoctape'chen ñeñt atet co'tape'chen cheshatoll, tarro'mar cheshatollpa' ama tama co'tape'cheneta' sosya'tsañ. Tarraña allempo yoctape'chen ñeñt cohuentetsa Yomporecoppa' allempoña po'ñoçhpa' o'ch yoctape'chen atet co'tape'chen po'naneshha' ñeñt atarr es eñotets. 21 Añpa' ñeñt Yompor po'ñoñ ñeñt atet anaret ahuatoteñ allempo Yomporpa' atet otane't israelena'tarnesha'. Ñeñtpa' atet otanete't: "O'ch noñmatas po'poñ acheñ ñeñtcha' seserrpare'tatene' e'ñe ñet po'ñoñeto tarraña ama'tcha' atet neponaspa' amach esesha' name'ñerraye tarro'mar amach eseshaye' eñotaye ñeñt atet aserrpare'tatarettenet." Ñeñtpa' Yompor atet otahuete't ahuat. 22 Ñeñto'marña te'pa' atet notenes ama't yeserrpare'tatset po'poñ ñoñtsopa' ñeñtpa' ama añecpayaye attoch yame'ñacha ñeñt ama ame'ñetso tarro'mar añ ñoñets ñeñt ahuatoteñ anaret ñeñtña yeñotate'ña ama'tcha' yeserrpare'tatset po'poñ ñoñtso amach esesha' yame'ñerrayo. Ñeñtcha'ña yeñotate'ña erra'tsente' po'ñoçh ñeñt ama ame'ñetso. Tarraña ñerra'm esempo ya'poteññañ Yompor po'ñoñ e'ñe ya yeñoño ñeñt atarr eñotochen, añña ñeñt ame'ñetsa ñetñapa' e'ñech cohuen e'mñoteñet allochña huomenc yepenayet pueyoçhret Yomporecop. Ñeñtcha'ña yeñotate'ña ñetpa' po'ñoçh ame'ñenet tarro'mar ñeñt po'ñoçh ama ame'ñetso, ñetpa' amach mueneñeto o'ch e'mñotet

ama't ñeñt atarr eñotochen ñoñets. ²³ Ñaña o'ch notas, ñerra'm esempo sapçhena allohuenes ñeñtes ame'ñetsa, ñerra'm allohuenespa' atfa señosyen po'poñe'tsocma ñoñtsopa' ñerra'mña machaya huapa ñaña ñeñt ama ame'ñetso amapa' ñeñt errte' e'mñotetspa' ñetpa' ama'tte'ña çha otaseto çho'te' semospuena. ²⁴ Tarraña ñerra'm esempoña sa'poten allohuenes Yompor po'ñoñ e'ñe eñotochen ñerra'm allempoña huapa ñeñt ama ame'ñetso amapa' ñeñt errte' e'mñotetspa' ñeñtña atet seserrpare'ten Yompor po'ñoñpa' ñato' allohuenetpa' o'ch çhapanet pueyoçhro, o'ch eñotet ñañeñeta ñeñt atet cotape'chyenet ñetpa' ñeñt'pa' ama pocteyaye Yomporecop. ²⁵ Allempoñapa' ñato' o'ch yore'tanet po'chñaret ñeñt cotape'chatyenahuet pueyoçhro e'ñe a'nahua ñato' puellquëñotetpa' o'ch concorpuet ñato' o'ch aguëret ñamet Yompor. Tarro'mar ñato' allempopa' o'ch ot: "Po'ñoçhepa't Yompor se'ñoratylene'."

Parets pa'paclopa' ama aserrpare'tpahuo e'ñe parrocmá

²⁶ Ñehua, masheñeshacha' ñaña noçhaneshacha' ñeñtcha' atet sepa cohuen ñeñt'pa' atet: Sapa' allempo sapçhenapa' ñato' puesheña'ttsospa' o'ch semorrechena, ñato' po'psheñeñpa' o'ch yeçhatenet, ñato' po'psheñeñpa' o'ch a'potan ñeñt atet eñotateñ Yompor, ñato' po'psheñeñpa' o'ch eños po'poñ ñoñtso, ñato' po'psheñeñpa' o'chçho' a'mtan añ ñoñets. Tarraña ñeñt'pa' añecopcha' atet sepa attoch huomenc sepoñ po'psheñeñ pueyoçher. ²⁷ Tarraña ñerra'm eseshas eñosets po'poñ ñoñtsopa' ama pocteyaye o'ch seños e'ñe allohuenes, ñato' e'ñech epsheña eñosets amapa' ma'psheña allotpa' ñeñtach. Ñaña añ pocte' ñeñtcha' eñosetspa' ñap'tepa'tetscha' eñoset. Tarraña añ pocte' ñaña eñallcha' ñeñtcha' eñotatenahuet ñoñets ñeñt atet eñenet. ²⁸ Tarraña ñerra'm ama eñalle ñeñtcha' eñotatahuet ñoñetspa' amach eñosatsteto e'ñe alla allempo sapçhena allohuenes ñeñtes ame'ñetsa. Allempopa' eñorana'çhetepa' Yompor e'ñe ñap'teto e'ñe pueyoçhreto. ²⁹ Ñaña añ pocte' e'ñech epsheña, amapa' ma'psheña ñeñtcha' a'pote' Yompor po'ñoñ. Po'poñeçhno acheñenesha'pa' añ pocte' çhoch e'mñochet, ñaña çhoch cotape'çhet po'ñoçhte' atet oteneý Yompor. ³⁰ Ñaña ñerra'm esempo po'psheñeñ mueneñ o'ch a'potan ñeñt eñotateñ ñaña Yompor Puecamquëñpa' añ pocte' allempopa' amach serrpare'tatsto ñeñt ñanom serrpare'tets. ³¹ Attochña o'ch sa'potuoñ allohuenes Yompor po'ñoñ e'ñe sap'tepa'tets, ñaña attoch allohuenespa' o'ch e'ñe señoçh, ñaña attoch allo'na coshatneces Yompor po'ñoñ. ³² Tarro'mar ñeñteý a'potene' Yompor po'ñoñpa' çhocmach eñall attoch yeunata yañeña ñanom attoch çhocma yemnatannena. ³³ Yomporpa' ama mueno o'ch atfa yano'tatse'ten allohueney, añña muenen o'ch yesen e'ñe cohuen.

Ñaña atet pena allemeñ anetso ñeñt apçha'yetsa ñeñt pueyochresha' pen Parets. Ñaña allempo sapçhena allohuenes ñeñtes ame'ñetsapa' ³⁴ coyaneshaçhnpa' amach serrpare'tatsteto, tarro'mar ñeñt'pa' ama pocteyaye. Añña pocte' çhoch ame'ñyet ñeñt amçha'tarettetsa, ñeñt'pa' atet oteneý ñoñets ñeñt atet anaret ahuatoteñ. ³⁵ Ñehua, ñerra'm mueñenet o'ch es eñotetpa' a'p'to'çhetepa' puerrollaret allempo çherret pa'paclo, tarro'mar ama pocteyaye coyaneshapa' o'ch serrpare't allempo yapçhena ñeñteý ame'ñetsa.

³⁶ Ñehua, ñerra'm ama pocteye' senteñe ñeñt atet o' notuaspa' ñehua, o'ch notas atet: Yompor po'ñoñpa' ama e'ñe sa soctapñofoye' hueno, ñaña ama e'ñe saptecpa hueno. ³⁷ Ñaña ñerra'm esesha' otats, "napa'cho'ña na'poteññañ Yompor po'ñoñ", ñehua, eñotanepa' ñeñt atet noten necartotpa' ñeñtpa' po'ñoñ atet oteney Yepartseshar ñeñtcha' atet yeña. Ñaña ñerra'm esesha' otats, "napa'cho'ña chorrenna Parets Puecamquëñ", ñehua, ñapa'cho'ña eñotanepa' ñeñt atet noten necartot ñeñtpa' po'ñoñ atet oteney Yompor ñeñtcha' atet yeña. ³⁸ Tarraña ñerra'm esesha' ama name'ñayo ñeñt atet o' notuaspa' ñehua, ñapa' amach se'mñotatsche.

³⁹ Ñeñto'marña te' masheñeshacha' ñaña noçhaneshacha' o'ch noterrser: Añ pocte' o'ch sema'yoçhrena a'pote' Yompor po'ñoñ e'ñe eñotoçhen ñoñtso, tarraña pocte' o'ch semnatanet eñosetepa' po'poñ ñoñtso. ⁴⁰ Tarraña ama't erra'tsencha' seña'yespa' e'ñech cohuen sesen ñeñt poctetsa, ñaña çhocmach semnatanna'ta o'ch es seña'yes e'ñe saptepa'tets.

15

Allempo tanterra Cristopa' ahuo't orrterrana shonte' acheñenesha'

¹ Te'pa' o'ch masheñeshacha' ñaña noçhaneshacha' notas po'poñ. Napa' nemneñ ellopa' o'ch alla neyerpaterrser e'ñe errotente'ña ñeñt e'ñe atet pena cohuen ñoñets ñeñt neserrpare'tatuanmas, ama't ahuatoteñ. Ñeñtpa' ñeñtara cohuen ñoñets ñeñt o' same'ñerra, ñaña ñeñtara ñoñets ñeñt allo o' huomenc seperr seyoçher. ² Ñaña ñeñtara ñoñets allo o' sa'queshpataretterra ñerra'm amach sequeçpuere, tarraña ñato' po'ñoçhpa' ama çhoye' same'ñeno.

³ Ñaña ñeñt neserrpare'tatas ama't ahuatoteñpa' ñeñtara cotapñats ñeñt atet eñotanennet naña, ñeñt nanac sherbets, ñaña ñeñtara ñoñets ñeñt atet anuaret Yompor po'ñoño ama't ahuatoteñ. Ñeñtpa' atet o' neserrpare'tatuas: Cristopa' rroma yo'chñarecop, ⁴ allotpa' apampare'tta, tarraña poma'pamtañopa' alla tanterra. Ñeñtpa' attecma oten ñaña ñeñt atet anuaret ahuatoteñ Yompor po'ñoño. ⁵ Allempo tanterrapa' ñanempa' orrterrana Pedro, allotpa' orrterrana allohuen pueyochresha'. ⁶ Allotpa' orrterrana ñaña shonte' acheñenesha' ñeñt ame'ñetsa. Ñato' metanenanante' quinientos acheñenesha' ñeñt enterre' allempo e'ñe parrocmet. Ñeñt enterre' allempopa' ama't teme'ttsen shontet corra'yenet. Tarraña puesheña'tetspa' o' colla'huenet. ⁷ Allotñapa' orrterrana ñaña Jacobo, allotpa' orrterrana ñaña allohuen po'poñeçhno ñeñt allsensaretnesha'.

⁸ E'ñe chenta'ñapa' orrtona naña, ama't napa' ama esoyayno. Atta nentena ñerra'mrrate' sapeñtsoma'to'ta ne'ñallettera Yomporecop. ⁹ Po'poñeçhno allsensaretnesha'pa' ñetpa' nanac sherbenet, tarraña napa' ama't allsensareteneñpa' ama tama nesherbena. Ñaña napa' pocte' nenteñ amach otatsetneto allsensareten, tarro'mar napa' nanac na'mueroçhtache't ñeñt ame'ñenaya Yompor. ¹⁰ Tarraña ama't atet nepe'tpa' Yomporpa' atarr morrentna. E'ñe puemuereño'tpa' attoña a'pnaserren ñeñt nanac sherbets ñocop. Tarraña ama orrena morrentno Yompor, tarro'mar te'pa' nanac netorrena Yomporecop. Po'potañ allsensaretnesha'pa' ama't torra'yenet Yomporecoppa' tarraña napa' ello nanac netorrena atet torrenet ñet. Ñehua, ama't noteneñ napa'

netorrena Yomporecop, po'ñoçpa' ama naye' torretso, añña Yompor puemuereño'pa' ñeñña torretsa na nechtsoť. ¹¹ Ñehua, amach yoto ñeñey nanac sherbets, ñato' na amapa' po'poñeçhno allsensaretnesha'. Añcha'ña yot ñerra'm ya po'ñoçh yeserrpare'teñoť o' same'ña'huerrapa' ñeñña nanac sherbets.

Atto esempohuañepa' yetantuerrach rromot

¹² Ñehua, ñerra'm po'ñoçh o' same'ñerra ñeñť atet yeserrpare'tatenes atto Cristopa' o' tanterra allempo rroma, eso'mare'tña soten ñerra'm yerromapa' amach erroťenot yetanterro. Po'ñoçh ñeñťpa' atet oten puešheña'tets ñeñť sesho'tsen. ¹³ Ñehua, ñerra'm po'ñoçh ama eñalle attoch yetanterra yapa', Cristopa'çho'ña amate' tanterrañe ama't teme'ttsen. ¹⁴ Ñerra'm po'ñoçh Cristopa' teme'ttsen rromueneña' ñeñť atet yeserrpare'tatenes te'pa' amate' es sherbenñe. Ñaña ñerra'm po'ñoçh ama tanterrañe Cristopa' te'pa' e'ñeťe' orrena yeyemteñañ. ¹⁵ Ñaña ñerra'm po'ñoçh ama tanterrañe Cristopa' yapa' attate' yeshquēnsoñ atto' pena po'ñoçh Yompor, tarro'mar yapa' o' yeserrpare'tuoñ Yompor atto ñapa' o' tantaterran Puechemer Cristo. Tarraña ñerra'm po'ñoçh ama eñallñe attoch yetanterra rromotpa' ñeñña atet o' yeserrpare'tatuas atto Yomporpa' o' tantaterran Puechemer Cristo, ñeñťpa' amate' po'ñoçhoyayñe. ¹⁶ Po'ñoçhpa' ñerra'm amach yetanterro yapa', Cristopa'çho'ña teme'ttsente' ama tanterrañe. ¹⁷ Ñaña ñerra'm po'ñoçh teme'ttsen amach tanterrañe Cristopa' e'ñeťe' orrena seyemteñañ, ñaña so'chñarpa' amate' apretnareťeñe teme'ttsen. ¹⁸ Ñaña allohuen ñeñť o' colla'huena ñeñť ame'ña'nmaya Cristopa' ñetpa' o'te' e'ñe poctacma chenca'huerretañ. ¹⁹ Ñaña ñerra'm añecpa yeyemteñañ Cristo allempo huomchenya', ñaña ñerra'm po'ñoçh amach yetanterro, ñerra'm atteña' nanacte' llequēñtso'tsenyeyñ. Ñeñť llequēñetspa' ellote' metanenaneñ ñeñť atet yellcatyene' añe patsro.

²⁰ Tarraña ñeñťpa' ama atteyaye, tarro'mar po'ñoçh Cristopa' o' tanterra ñanom. Atto tanterrapa' amach alla rromuerre'te allochñapa' esempohuañen allohueney ñeñťey ame'ña'nmaya Cristopa' yapa'çho'ña attec mach yetanterra. ²¹ Atet pa' ñaña ahuať Adán e'ñe ña po'chñaroť o' anareťta attoch yerroma, ama't e'ñe puešheñarrofa. Te'pa'çho'ña e'ñe puešheñarro'pa' o' orrterra attoch yetanterra ama't esempoch yerroma. ²² Tarro'mar e'ñe po'chñaroť Adán ñeñťey pamo'tsna'tareypa' yocoppa'çho'ña o' anareťta attoch yerroma yaña allohueney. Tarraña te'pa' e'ñe yeparrocmateñoť Cristopa' elloch alla yocrra'huerra allohueney. ²³ Tarraña ñeñťpa' atetcha' perra: Cristo ñanom o' tanterra allochñapa' ñerra'm esempoch huerra, yapa'çho'ña ñeñťey ame'ñenayapa' attec mach yocrra'huerra allohueney. ²⁴⁻²⁸ Allempoña Cristopa' o'ch puerratañpesuan po'huamenc allohuen ñeñť añcha'tareťetyetsa, ama't ñaña ñeñť añcha'noçhetyetsa, ñaña ñeñť ahuamencatetyetsa. Tarro'mar añ poctetsa Cristopa' ñach añcha'tareťterrtsa e'ñe ñapueť esempohuañencha' yoramēpsuan po'huamenc allohuen ñeñť e'moñe'tene'. Ñaña esempohuañen e'ñe chenta'pa' o'ch a'huañañperrey rromueñets ñeñť o'patatareťey te' allohueney. Tarro'mar Cristopa' o' aphue Pompom po'huamenc attoch pomnaren penan allohuen esocmañen. Ñehua, ama't oteneñ Yompor

po'ñoñ Cristopa' pomnaren penano' allohuen esocmañenpa' tarraña yeñoteñ amach pomnaren ñano Pompor, tarro'mar Pomporpa' ña apuene' po'huamenc. Esemphuañencha'ña pomnaren pohuan allohuen esocmañen allempoña Cristopa' o'ch aphuerran Pompor ñeñt' nanac Parets atto añcha'tarettena. Allempoña Pomporpa' o'ch alla pomnaren perran Cristo ñeñfara Pompor ñeñt' o' ahuamencat' o' pohue. Allempoña Pomporpa' ñach añcha'taretterrtsa, ñaña allempopa' ñach pomnaren perre' allohuen esocmañen. Allempopa' o'ch mellapoterra.

²⁹ Te'pa' o'ch alla noterrser po'poñ. Ñerra'm po'ñoñ ama eñalle atoch yetanterra esempohuañenpa' eso'mare'tña puesheña'tets acheña' apatarettenañña añecop ñeñt' o' rroma. Po'ñoñ ñerra'm amach errotenot' tanterro ñeñt' o' rromapa' eso'mare'tña apatarettenetña ñeñfecop.

³⁰ Ñaña ñerra'm po'ñoñ amach errotenot' yetanterra' eso'mare'tña pocte' nenteñ e'ñe name'ñeño'pa' ama't' chocma nemueroçhtena ñocoppa' e'ñe pocte' nenteñ. ³¹ Napa' atet noten tarro'mar pate'tets yetpa' e'ñe na'llpuepñoña ama muetsayenneto. Ñehua, neñoteñ ñeñt'pa' atecmach pa'net. Tarraña masheñeshacha' ñaña noçhaneshacha' errponcha' nemueroçhtapa' allponcha' nocshapretensa samña, tarro'mar e'ñe yeparrocmateño' epay Yepartseshar Jesucristo. ³² Ñaña arr Efesopa' e'ñe na'llpuepñoña a'qeshpatnet atet ñerra'mrate' cho norrotena epan ma'yarr. Tarraña ñerra'm amach errotenot' yetanterra' ñeñña atto na'llpuepñoña a'qeshpatyennetpa' amach es sherba'no, tarro'mar ñeñt' patso'marecpapa' ama sherbeno. Po'ñoçpa' ñerra'm amach eñallne atoch yetanterra'ña' e'ñe pocte' o'ch yoteneñ: "Te'pa' acsha'yeshpahu'pa'ch, ñaña o'ch yotanna'ta arrallme'chapretyeshpahu'pa'ch, ñaña o'ch yotanna'ta orrare'tyeshpahu'pa'ch tayepa'tña'pa' huomichay. Tsapatoneña o'ch yerromapa' amach allo'na atet yepa'nenno."

³³ Tarraña amach sotapsa'tatso atet, tarro'mar yeñoteñ "ñerra'm esempo yeyemteña ñeñt' atta cotape'chatse'tyets ñeñt' ama cohuenayaye Yomporecop yapa'cho'ña chach shequenyet tarro'mar tsapatone'pa' ñato' o'ch alla atet yeperra yaña atet pa'yenet ñet, ama't' te' yapa' e'ñe cohuen yocape'chen Yomporecop." ³⁴ Añña pocte' o'ch soctape'cherr ello, ñaña o'ch sequechpuerr ñeñt' atet sepa'yese't' ñeñt' ama pocteyaye Yomporecop. Te'pa' sepenquëpa' tarro'mar ñato' po'ñoñ ama señoñeñe Yompor allohuenes.

Atetcha' yepo'poñet allempoch yetanterra rromot

³⁵ Te'pa' o'ch notas po'poñ. Ñehua, ñato' puesheñarrotespa' atet sotenen: "Amate' errotenot' yetanterra'ña rromot. Ñerra'm po'ñoñ atanterrapo' rromot, yechetsña allempopa' ¿errofena'tcha'ña orrterra?"

³⁶ Sapa' are'tña es señoñeno. Ñehua, ñato' o'ch netma'ntacha atet: Yeñoteñ ñerra'm es yenare't' pue'llomerpa' amach ahuen chopo. Choch ñanom puetsa' pa'tall esheccha'ña chopo. ³⁷ Ñaña ama añeye' yenare'teno narmets ora ñeñt' e'ñe atet chopuets. Atet ñerra'm chop* yenare'tpa' pue'llomrach yenare'teññañ. ³⁸ Ñaña ñeñt'pa' Yomporcha' a'chpate', tarraña ñeñt'cha'ña chopatpa' o'ch po'poñet ñeñt' atet orrtena ahuaña pue'llomer. Ñeñt'pa'cho' Yompor a'po'poñetatene' tarro'mar atet

* 15:37 Po'ñoñ añpa' oten trigo.

muenen ña. Ñaña ñerra'm po'poñe'ttsocma es yenare't pue'llomerpa' e'ñech po'poñe'ttsocma chopyes ñaña narmets ñeñt e'ñe atet anaret. ³⁹ Añpa'cho' chetsotspa' e'ñe po'poñe'ttsocma chetsots, ama e'ñe attecmayaye. Atet ñerra'm ya acheñeypa' po'poñicho' yechets yechen. Ñaña es berrochnopa' po'poñicho' po'chets pen. Ñaña otechnopa'cho' po'poñi po'chets pen ñaña. Cacachnopa'cho'ña po'poñicho' po'chets pen ñaña. ⁴⁰ Ñaña ñeñt allpon ento'marnesha' ama e'ñe attecmayayeto ñerra'm patso'marnesha'. Tarraña ñeñt ento'tsa'yenpa' ellonetcho' cochnesha'tyenet tarro'mar atet anaretet. Ñeñt patso'tsa'yenpa'cho'ña ellonetcho' cohuenetyenet ñamet tarro'mar ñetpa'cho'ña atet anaretet. ⁴¹ Ñaña atet cohuentena atsne'pa' ñeñtpa' po'poñi poptena tarro'mar atet anaret ñaña. Arrorrrpa'cho'ña po'poñonefcho' cohuentena tarro'mar atet anaret. Rantochnopa'cho'ña po'poñonefcho' cohuenetyenet. Ñaña pate'tets rantopa' po'poñe'ttsocma cohuenetyenet ñamet tarro'mar atet anaretet. ⁴² Attec mach yeperra yaña ñerra'm esempohuañencha' yetanterra. Ñeñt atet orrtena te' yechetspa' allempoch yetanterrapa' amach atteraye' yorrterro. Te'pa' arromñañayapa' chocmach yerroma allotpa' o'chcho' pampa'yet allcha' puetsohuerr yechets. Tarraña esempoch yetanterrapa' amach alla ya'rromñañterre'te. ⁴³ Ñaña te' yechetspa' atarr pencna'ntateney tarro'mar chocmach yatsna'ten. Ñerra'm yatsna'tpa' o'chcho' yerroma, allotñapa' o'chcho' pampa'yet. Tarraña ñerra'm esempoch yetanterrapa' allempo yechetspa' amach alla pencna'ntaterrye'te. Allempopa' e'ñech cohuen yorreyena. Ñaña te'pa' ama ahuaamencateye ñeñto'marña chocma yerromuen, allotñapa' o'chcho' pampa'yet. Tarraña ñerra'm esempoch yetanterrapa' allempopa' nanaccha' ahuaamencatey. ⁴⁴ Atet yeyeçquëna te' arr patso'marpa' ñeñtpa' chocmach yerroma, allotñapa' o'chcho' pampa'yet. Tarraña ñerra'm esempoch yetanterrapa' allempopa' camuecñetsotach yorrterra. Po'ñoç yeñoteñ atet yorrtena te' yechtsotpa' yeñoteñ ñaña yecamquëño'pa'cho'ña yorrterrach esempohuañen.

⁴⁵ Ñeñto'marña ama't Yompor po'ñoño atet anuaret ahuaototeñ, ñeñtpa' atet oten: "Allempo Adánpa' yeçcach Yompor allempoñapa' ahuo't a'p po'rrerrña attoch corra e'ñe po'chtsot. Ñeñto'mar Adánpa' ñeñt ñanom acheñetats." Tarraña chenta'ñapa' acheñetos ñaña Cristo attoch ñach yapuerre' ello o'ch alla yocrra'huerra yecamquëño'. ⁴⁶ Tarro'mar Yomporpa' atet na'y. Ñanompa' o'ch yocrra e'ñe yeçtsot, esempohuañenñapa' o'ch alla yocrra'huerra ñaña yecamquëño'. ⁴⁷ Tarro'mar ñeñt ñanom acheñ ñeñtara Adánpa' patsa ayeçcataret, ñeñto'marña ñapa' atta patso'marneshat. Tarraña puepañ ñeñt acheñetosets ñeñtara Yepartseshar Jesucristo ñeñtpa' entot huapa. ⁴⁸ Ñaña ñeñtey arromñañeneshaypa' yapa'cho'ña attaya ñerra'mrrate' Adán ñeñt ayeçcataret pats. Tarraña ñeñtey yame'ñenaya Cristo ñeñt huaptsa entotpa' yapa'cho'ña yocrra'huerrach yecamquëño' ento atet ñerra'mrrate' Cristo ñeñt huaptsa entot. ⁴⁹ Atteña te'pa' atta yeyeçquëna yeçtsot atet ñerra'mrrate' Adán ñeñt ñanom ayeçcataret pats tarraña esempohuañenpa' yeyeçquërrach ello atet ñerra'mrrate' Cristo ñeñt huaptsa entot.

⁵⁰ Ñeñto'marña masheñneshacha' ñaña noçhaneshacha' notenes: E'ñe

yechtsoŕpa' amach es yo'pato all amŕcha'tarettena Yompor. Tarro'mar allempo arromñaŕayapa' amate' erroŕtenoŕ es yo'patoña ñeñŕ ama ahuañaño. ⁵¹ Ñehua, o'ch neñotatas ñeñŕcha' atet perra esempo, ñeñŕ ñapŕa eñoteñ te' Yompor. Po'ñoŕhpa' amach e'ñe allohuenyey yeromhuo. Tarro'mar ñeñŕey orameñ corretsa allempoch huerra Cristopa' amach yerromo. Allempopa' attach yepo'poñet ⁵² e'ñech machayoŕa e'ñe allempocma esempoŕ e'morrterra Yompor po'pocŕoŕ e'ñe allohuanen. Ñehua, ñeñŕpa' atetcha' perra allempo. Ñanompa' o'ch e'morrterra Yompor po'pocŕoŕ. Allempoñaŕa' o'ch tanrra'tuena ñeñŕ colla'huatsa ahuatoteñ. Allempochña tanterreŕpa' amach alla arromñaŕterreŕe'ŕe. Yaña ñeñŕey orameñ corretsapa' yapa'cho'ña o'ch yepo'poñet e'ñe allempocma. ⁵³ Tarro'mar yechets ñeñŕ aptsañaŕa' añ palltetsa o'ch puenasa ñeñŕ ama aptsaña. Tarro'mar ñeñŕey arromñaŕeypa' añ palltetsa o'ch yepnasa ñeñŕ ama arromñaŕeypaye. ⁵⁴ Ñerra'm esempo yechets ñeñŕ aptsañaŕa' ñerra'm o'ch puenasa ñeñŕ ama aptsaña, ñaña ñerra'm esempoŕ ñeñŕey arromñaŕeypa' o'ch yepnasa ñeñŕ ama arromñaŕeypaye' e'ñe allempopa' o'ch e'ñe etsotua ñoñets ñeñŕ atet anareŕ ahuatoteñ, ñeñŕpa' atet oten: "Allempo o'ch huañerrña ñeñŕ atto o'patenya rromueñets. ⁵⁵ Ñeñŕo'marña allempopa' amach yerromuerre'ŕe, tarro'mar amach eñalleterre'ŕeña ñeñŕcha' alla ya'tserrperrayerr ama't yerromñoŕa."

⁵⁶ Tarro'mar te'pa' yo'chñaŕoŕ o'patenyaña rromueñets, tarraña allempopa' amach eñalle yo'chñaŕ. Ñaña yatpare'teñoŕ ñoñets ñeñŕ atet anareŕpa' ñeñŕña yo'patataye'ña rromueñets allempo nanac yeyore't yo'chñaŕ. ⁵⁷ Ñeñŕo'marña te'pa' yeparasyoso'cheŕa'ch Yompor tarro'mar atto apuey Puechemer ñeñŕara Yepartseshar Jesucristo ñeñŕcha' ŕhocma ya'pocŕatene' allohuen pa'namen ñeñŕ yocop.

⁵⁸ Ñeñŕo'mar e'ñe nemorrenteñoŕpa' o'ch masheñeshacha' ñaña noŕhaneshacha' noterrŕerr: Te'pa' huomenquēpa'ch seŕpa' seyoŕher, amach sequeŕhpatsere. Ñaña ŕhocmuepa'ch setorrena Yomporecop. Ñaña sapa' señocheŕa'ch ñeñŕ atto yetorrena Yomporecoppa' ama orrena yetorreno.

16

Añ quellepa' ñeñŕ apete't huocchañneshachno

¹ Te'pa' o'ch notas po'poñ. Añ allpon quelle ñeñŕ ŕhocma senen huocchañneshachnocop ñeñŕ ame'ñetsa, ñeñŕpa' attecŕmach seŕpa. Tarro'mar ñeñŕ ame'ñetsa Galaciopa' o' neñotatuanet ñeñŕcha' atet pet, ñeñŕo'marña sapa'cho'ña atetcha' seŕpa saña. ² Ñeñŕpa' atetcha' seŕpa: Paŕe'tets temencpa' añ pocŕe' ŕhocŕmach sena'yes elloŕpa'tets errponcha' semna'yes o'ch sena'yes Yomporecop. Ñaña errponte'ña seŕhyen ñeñŕcha' sena'yes Yomporecop, ñato' aton amapa' ñato' coñe't. Ñeñŕpa' o'ch sañño'tue e'ñe elloŕcma attoŕach o'ch satontatyes. Allochñaŕa' ñerra'm esempoŕ neŕhap seŕhopa' amach pallteno e'ñe allempopa' o'ch taya sena'yes. ³ Ñaña ñerra'm esempoŕ neŕhap seŕhopa' o'ch nequellca' carta ñeñŕcha' nemña Jerusaléño. Ñaña o'ch nemñe acheñ ñeñŕcha' anmue' quelle, ama't erra'tsena acheñ ñeñŕcha' pocŕe' sentensa. ⁴ Ñaña ñerra'm pocŕe' senteñ o'ch ahuen nañapa' e'ñe pocŕe' o'ch yahuanena e'ñe parro.

Allempo sechena Pablo o'ch ahuo' po'poñ anetso'mar

⁵ Ñaña ñerra'm esempoch ahuen arrot attoch nechap seshopa' napa' noctape'cheñ arrcha' noñem Macedonio'mar. ⁶⁻⁷ Añ atarr nemnen ñerra'm Yompor muenatspa' allate' na'llponmat sesho, ñato' allate' nechara'pena. Tarro'mar napa' ama nemno o'ch atta nepomuetom sesho, añña napa' nemneñ ñerra'm Yompor muenatspa' allate' natomat. Ñaña ñato' e'ñe allotpa' o'te' sanemyesen errach'cho' neshecha allempo. ⁸⁻⁹ Tarraña te'pa' amach erra neto. Allanach arr Efeso tarro'mar te'pa' eñall attoch o'ch neserrpare'tatyes shonte' Yompor po'ñoñ. Ñaña te'pa' neñoteñ ñato' o'ch ame'ñenna shonte' acheñ, tarraña chocma eñall ñaña shonte' ñeñtcha' nepatare'tene'. Tarraña o'ch chap Pentecostepopa' o'ch ahuerren arrot.

Atet otanet Timoteocop

¹⁰ Ñaña o'ch notas, ñerra'm esempoch chap masheñ Timoteopa' o'ch sagaḡ e'ñe cohuen, allochñapa' amach cha llecoso sesho. Tarro'mar ñapa'cho'ña nanac torrena Yomporecop atet ñerra'm na. ¹¹ Ñaña ñerra'm esempoch chap seshopa' añ pocte' chocmach se'mñooh e'ñe cohuen. Ñaña e'ñech cohuen seyenpue' allochñapa' ñerra'm esempo puerrerra allotpa' e'ñech cohseñesha' cherr nesho. Tarro'mar napa' chocma necueñ masheñ Timoteo epan po'poñechno masheñneshachno.

¹² Ñaña masheñ Apolospa' nanac nemñare'teñ o'ch emo'tensa' epuet po'poñechno masheñneshapa' tarraña te'pa' ñapa' ama mueno. Tarraña esempopa' chomach chap sesho ñerra'm esempoch pocta'huoña.

Allempo so'terranet po'cartot

¹³ E'ñe allohuanenpa' o'ch noterrser: Te'pa' e'ñech señoata, tarro'mar chocma eñall ñeñtcha' ya'psaterre' Yompor. Ñaña e'ñe same'ñeñoḡpa' huomenquēpa'ch seḡa' seyo'cher. Ñaña amach señtcha'tatsto, chocña seumencta Yomporecop. ¹⁴ Ñaña ora allpon ñeñt seḡa'yenpa' e'ñepa'ch semorrentanna'teño' es seḡa'yen.

¹⁵ Te'pa' o'ch masheñneshacha' ñaña no'chaneshacha' notas po'poñ. Sapa' señooteñ ñaña atto masheñ Estéfanaspapa' ña ñanom ame'ñerrtsa ahuat all Acayo. Ñaña ahuo't ame'ñerret epuet pamo'tsesha'. E'ñe allempoteñ ñetpa' ahuo't torra'yenet añecop attoch yenpuet allohuen ñeñt pueyochresha' o' perr te' Paret. ¹⁶ Ñeño'mar te'pa' o'ch notas: E'ñe pocte' o'ch se'mñooh Estéfanas, ñaña ama't allohuen po'poñechno acheñ ñeñt chocma torrapretetsa Yomporecop. ¹⁷ Napa' te'pa' atarr nocshena tarro'mar o' huapa arr nesho masheñ Estéfanas ñaña Fortunato ñaña Acaico. Tarro'mar sapa' ama't ama sehuapopa' ñetpa' o' huapuet. ¹⁸ Ñetpa' atarr coshatosnet neyo'chrocmañen. Ñato' sapa'cho'ña o'te' coshataset. Cohuenepa'ch señch acheñ ñeñt atet petsa.

¹⁹ Ñaña allohuen ñeñt ame'ña'yetsa arr Asio'marpa' mueneñet o'ch huomñcha'taset ñamet añ necartot. Masheñ Aquilapa'cho'ña mueneñ o'ch huomñcha'tas epuet puetapor Priscila. Ñaña allohuen masheñneshapa' ñaña no'chaneshachno ñeñt pame'ñeño'tet ap'chetset Aquilapahuo mueneñet o'ch huomñcha'taset ñamet. Tarro'mar e'ñe yeparrocmateño' epay Yepartsesharpa' o' huomñcha'taset añ necartot. ²⁰ Ñaña allohuen masheñneshachno ñaña no'chaneshachno ñeñt arro'tsa'yenpa'

mueneñet o'ch huom̃cha'taset ñamet. E'ñe semorrentanna'teñoŋpa' atetcha' sehuom̃cha'tanna'tena ñeñŋ atet poctetsa Partsocop.*

²¹ Añ coñe'ŋpa' o'ch nequellca' nam̃a e'ñe na notot, attoch o'ch nehuom̃cha'tas nam̃a.

²² Ñerra'm esesha' ama morrentenaye Yepartseshar Jesucristo ñeñŋña atet petsa a'coñchatareŋtepa'ch. Te'pa' ñeñŋach notas, huerrnayepa'te' ñeñŋ Yepartseshar yepen.

²³ Yepartsesharepa'chña Jesucristo sa'natenaya allohuenes. ²⁴ E'ñe name'ñeñoŋ Cristo Jesús atarr nemorrentensa. Te'pa' ñeñŋach notas, ñeñŋpa' atetepa'chña Nompore. Allohua.

Pablo

* **16:20** Po'ñoč oteneŋ, "E'ñe semorrentanna'teñoŋ čhoch setso'ttsa'pa'tannena ñerra'm esempo sehuom̃cha'tanna'tena ñeñŋ atet poctetsa Partsocop." Ñeñŋpa' atet yečhete'ŋ ahuat.

AÑ PUEPAÑ SAN PABLO PO' CARTA ÑEÑŦ QUELLQUËRRANERR CORINTO' MARNESHA' 2 CORINTIOS

Atto Pablopa' alla quellquërranerr carta añecop ñeñŦ ame'ñetsa anetso Corinto

¹ Masheñeshacha' ñaña noçhaneshacha' ñeñŦes allohuenes ame'ñenaya Yompor ñaña e'ñe same'ñeñot' çhocma sapçhena Yomporecop all anetso Corinto. Ñaña añ cartapa' añecpa'ñaña nequellquëñ allohuenacop ñeñŦ o' pueyochresha' perranet Parets ñeñŦ apçha'yetsa allemefñ anetso Acayo'mar. Na Pablon o'ch alla nequellquërrnaserr po'poñ carta epan masheñ Timoteo. Napa' ñeñŦen Jesucristo puellsensaren tarro'mar atet muenen Yompor. ² Te'pa' e'ñe nehuon'cha'teñofes sa napa' o'ch notas: Yomporepa'chña sebensare'tam'pene' ñeñŦ nanac Parets epuet Puechemer Jesucristo ñeñŦ Yepartseshar yepen. Ñetepa'chña socshatene' e'ñe sa seyoçhro allohuenes.

Yomporpa' ñachña çhocma yocshatene' allempo es yehuenoya

³ Aye'choçhtaterrapo'ch Yompor, ñeñŦara ñeñŦ Pompore pen Yepartseshar Jesucristo. ÑeñŦara Yompor ñeñŦ atarr amueraña, ñeñŦcha' çhocma yocshaterre' allempo es yelcatene' yeyoçhro. ⁴ Ñerra'm esempo huennaya pa'namen ñeñŦ amueroçhtatañtetsa ñapa' ñachña çhocma yocshaterre'. Tarro'mar o' coshaterrey Yompor, allochña yapa'cho'ña attoch yeñoteñ o'ch yocshater yaña masheñesha' ñerra'm esempo huapanet ñamet ñeñŦcha' mueroçhtatahuet. Añ poçtetsa o'ch yocshateranet ñet atto Yomporpa' o' coshaterrey yaña. ⁵ Atto nanac yemueroçhtapreteña Cristo tarraña ñachña ello atarr yocshaterre'. ⁶ ÑeñŦo'marña te'pa' o'ch notas, ñerra'm esempo nemueroçhtena na, ñeñŦpa' e'ñe po'ñoçh socop, tarro'mar ñerra'm esempo nemueroçhtena napa' ñeñŦpa' alloch socsherra samña attotcha'ña sequeshperra. Ñaña ñerra'm esempo coshaterren Yompor ñeñŦpa'cho'ña alloch nocshaterres samña. Allochña' e'ñe socsheñeshocmañen çhocmach sa'huanten allohuen mueroçhteñets ñeñŦ atet nepena na. ⁷ ÑeñŦo'mar napa' neñotenes çhocmach sa'huanta' ñeñŦ echarr senten. Tarro'mar napa' neñoteñ ñerra'm allpon semueroçhtapretna, elloña allempopa' o'ch alla e'ñe socshapreterrna atto Yomporpa' ñachña çhocma yocshaterre'.

⁸ Ñehua, te'pa' nemneñ o'ch masheñeshacha' señoten ñeñŦ atet nemueroçhtosa ahuaña all anetso Asia. Allempopa' napa' atarr nanac nellquëna. Napa' notapañ çhach nerroma, amach erroç nepe o'ch na'queshpata nañeña. ⁹ Po'ñoçh napa' neñoteñ neyoçhro te'pa' o' çhapona ñeñŦ nocop allempoch nerroma. Tarraña añecpa huapona echarrteñets atet, allochña' attoch e'ñe neñoteñ Yomporcha'ña neyemtena. Amachña nañeña yemtetso. Tarro'mar Yompor po'huamencot ama't arromña'pa' çhocmach tantater. ¹⁰ Tarraña ama't muene' nerromañ Yomporpa' allorocma tantaterren po'huamencot attoch ama nerromo. ÑeñŦo'marña napa' neñoteñ Yomporpa' çhocmach

a'qeshpaterrey. Ñeñto'marña te'pa' ñachña chocma neyemtena. Neñoteñ allo'na sen na'qeshpatnene' ñerra'm esempo es nohuerroyerr ñeñt atarr echarr. ¹¹ Ñaña añ poctetsa o'ch sema'yochañpenna attoch seyempa'n. Ñaña shonte' acheñenesha' ñerra'm esempo eñotennet atto Yomporpa' chocma a'natenna e'ñe puema'yocheñofet ñet, allempopa' chocmach parasyoso'teñet Yompor atto a'natenna.

Atto Pablopa' ama eñotenario puehquëñ

¹² Ñehua, te'pa' o'ch notas po'poñ ñeñt atet noctape'chen. Napa' ñeñña atarr nocshatene' nanac. Napa' neñotena neyoçhro po'ñoçh arr patsropa' chocma noctape'chen ñeñt atet pocte' enten Parets. E'ñe name'ñeñof Yompor, napa' ama nemno o'ch esesha' neshca'yes ama't mamesha. Elloña sapa' ama nemno o'ch neshcas ama't e'ñe mamesha. Ama ñaña neyemteno ñeñt atet yoctape'chen ya acheñey arr patsro, añcha'ña neyemteñof Yompor attoch ñach neyenpuene'. E'ñe pueuereñof ñachña neñotatene' ñeñt cohuen enten ña. ¹³ Ñehua, sapa' çhate' sotapañ napa' attate' neshquënes ñeñt notenes necartot. Tarraña ñeñt allpon notenes necartotpa', o'ch selleye' allochña'pa' esheccha' señoçh ñeñtpa' e'ñe po'ñoçh atet, añ ñoñetspa' ama shequëñtsoyaye. Napa' necuenes esempohuañen o'ch e'ñe seyemtena e'ñe poctacma, o'ch e'ñe señoçh ñeñt atet notenes necartot ñeñtpa' e'ñe po'ñoçh atet. Napa' ama çhoye' neshquënso. ¹⁴ Ama't te'pa' ama e'ñe poctacmaye' seyemtenno, tarraña ñerra'm seyemtena e'ñe poctacma, allemponapa' ñerra'm esempoch huerra Yepartseshar Jesús'pa' atto socshenna na, napa'çho'ña allempopa' nocshersach saña.

Atto Pablopa' sechenañ o'ch emo'tenana' corinto'marnesha'

¹⁵⁻¹⁶ Napa' notenapañ chocmate' seyemtena, tarro'mar napa' ama çhoye' neshquënso. Ñeñto'mar napa' ahuaña nesechena o'ch ahuen Macedonio, napa' noctape'cheñ o'ch nemo'tnomues. Choncha'ña metats ñaña Macedonio, allempona noctape'cheñ o'ch nerr Macedonio'tpa' o'ch alla nemo'tnerrerr. Attoch puepocheño o'ch nocshaterres, ñaña attoch seyempa'n saña o'ch alla ahuerren Judeo. ¹⁷ Tarraña ama't atet noctape'cheneñ o'ch nemo'tersañpa' tarraña ama neseno o'ch nabcherrsa'; ñeñto'marña sapa' çhate' sotenapañ napa' epuote' noctape'chen cohuen. Sapa' attate' sentenen atet ñerra'm acheñ ñeñt attach es puechena arr patsro. Ama'tcha' otenan acheñenesha' ñeñtcha' atet pa, tarraña pueyoçhroña'pa' cotape'chenayach po'poñ. ¹⁸ Tarraña napa' ama atteye' noctape'cheno. Ñerra'm es notenes ñeñtcha' atet ne'papa' neyoçhroña'pa' ama esoye' noctape'cheno po'poñ. Tarro'mar Yompor ñerra'm es oteneñ ñeñtcha' atet ponaypa' atetcha'çho' pennay tarro'mar ñapa' ama puenesho po'ñoñ. ¹⁹ Ñaña Yompor Puechemer ñeñtara Cristo Jesús ñerra'm es oteneñ ñeñtcha' atet ponaypa' atetcha'çho' pennay, chocmach orrtateñ e'ñe po'ñoçh, tarro'mar ñapa'çho'ña ama puenesho po'ñoñ. Ñeñtara Jesucristo ñeñt chocma yeserrpare'tatenes epan masheñ Silvano ñaña masheñ Timoteo. ²⁰ Tarro'mar allohuen ñeñt allpon atet oteneñ Yompor ñeñtcha' atet perrnay, Puechemerña ñeñt Cristo Jesús ñaña e'ñe etsotatuene' po'ñoñ. Ñeñto'mar ñerra'm esempo yoten "attetepa'ch Yompor yocop" yeñoteñ Cristopa' ñaña e'ñe etsotatuene' Pompor po'ñoñ

yocop. Allochñapa' attoch e'ñe cohuen ya'ye'chochtateññañ Yompor. ²¹ Ñeñtara Yompor ñeñt ahuamencat pene' allohueney yeyoçher e'ñe yame'ñeñoñ Puechemer Cristo. Ñeñtara Yompor ñeñt yellsensene' attoch yetorra'yesa ñocop. ²² Ñaña ñapa' ahuo't apuerrey attoch yeñoter o' puechemer perrey ña. Ñeñtpa' ñato' o'ch netma'ntacha atet ñerra'mrrate' aynatuaretey Yomporecop. Ñaña ahuo't apuerrey Puecamquëñ ñeñtcha' yecherrtsa yeyoçhro ñeñtpa' ñeñtcha'ña yeñotatene' orameñ shonte' ñeñt o'patatenya Yompor.

²³ Te'pa' o'ch neñotaterserr ñeñt atet noctape'chen ñeñto'marña ama nemo'terrso ahuaña. Yomporpa' eñotenen ñeñtcha' atet notas ñeñtpa' e'ñe po'ñoçh atet. E'ñe nemorrenteñoñes sapa' ama neçherro all seyçhena Corinto. Tarro'mar ama neto, ñerra'm netañ o'ch neçhap seshopa' çhate' muene' neche'ptare'tyesoses e'ñe sa satpare'teñoñen. Ñerra'm atetpa' çhate' alla nellcaterres. Ñeñto'mar te'pa' o'ch notas e'ñe nemorrenteñoñes sapa' attoña ama neçherro sesho. Ñerra'm po'ñoçhte' ama atteye' notensopa' Yomporepa'chña na'chencaterre'. ²⁴ Ama añeçpaye' notenso attoch sapa' o'ch sa'mcha'tareter seperren na, ñeñtes ame'ñenaya Yompor. Añcha'ña netorrapretasa attoch neyenpas. Ama't atto o' huomenc same'ñeññañ Yompor, napa' çhocmach netorrena socop allochñapa' attoch señmañeshocmañen soçter Yompor e'ñe poctacma.

2

¹ Ñehua, ama'tcha' nemneñeñ o'ch alla neçherrerr sesho tarraña napa' ahuo't alla noctape'cherr ello neyoçhro, noten amach neto tarro'mar ama nemno o'ch neçhap nellquëñesha' sesho te't sapa' o'te' alla nellcaterreserr saña. ² Tarro'mar noten ñerra'm ne'ñotare'teñoñes na o'ch alla nellcaterrespa' attoch nellcaterres sa, sellquëñapa' amach nocshapretaso, tarro'mar sapa' sañeña e'ñe nocshatene'. ³ Ñeñto'marña ama neçherro sesho ahuaña, ña nequellconas carta ñeñtcha' soçtape'çhaterre' e'ñe cohuen. Allochñapa' ñerra'm machayo'ta neçherr sesho ñerra'm o'ch alla soçtape'cherr cohuen, ñeñtcha'ña atarr nocshapretuerrsa. Allochñapa' amach tama nellquëñso tarro'mar añ poctetsa socop çhocmachña e'ñe socshaterren. Ñaña neñotenes ñerra'm esempo nocshena na sapa'çho'ña allohuenespa' o'ch e'ñe socsherra. ⁴ Ñaña allempo nequellconas añ carta ahuañapa' e'ñe nellquëñesha' nequellquënnas. Ama neñmateno neyoçhro ama't mamesha, e'ñe ñeñña nenen neyoçhro. Elloñapa' e'ñe neya'chpeñesha' nequellquënnas ñeñt carta. Napa' ama añeçpaye' nequellquënnaso carta attoch nellcatas sa; añeçpaña nequellquënnas attoch sapa' o'ch señoçh atarr nanac nemorrentensa.

Arrpa' all cotape'chatanet attoch peretnet atparñañ

⁵ Ñaña añ acheñer ñeñt atpare'tetsa seshopa' ama naptayaya llecatenno na, añña ama't sapa'çho'ña allohuenespa' çhocma llecatenes. Ñehua, tarraña ama't atteñpa' ñato' o'ch notas ama allohuenacmas atet petso, te't atta atarr natontaten ñoñets ñeñt ama atteyaye po'ñoçh. ⁶ Ñaña te'pa' o'ch notas, e'ñe pocte' atto o' secoñchatue ñeñt acheñer, te'pa' allohuach. Ama't shonteseñ ñeñtes pocte' entenayeñ o'ch secoñchatererr ñeñt atparñañ, tarraña te'pa' ñeñtch. ⁷ Te'pa' añña poctetsa o'ch alla

sepretner, allochñapa' attoch socshater, te't atta nanac llequëna, puel-lquëño'tpa' o'te' alla quechpuerran Yompor. ⁸ Ñeñto'mar te'pa' notenes añ poctetsa o'ch sorrtratoñ cohuen ñocop attoch eñoter po'ño'chpa' atarr semorrenteña. ⁹ Ñeñtecpaña noctape'chatas ahuaña necartot ñeñtcha' atet sepe' ñeñt atpare'tetsa attoch netpatenes o'ch neñotas ñerra'm po'ño'chte' e'ñe same'ñena ñeñt poctetsa Yomporecop, ama't erroteno'tsensa. ¹⁰ Ñaña o'ch noterrser, ñerra'm esesha' sepretnerr sa, napa'cho'ña e'ñech pocte' nenteñ ñaña a'pretnaretterrepa'ch. Ñeñt chocma natpare'tene' ahuaña te'ña ñapa' o' nepretner, ñeñtpa' e'ñe socop. Ama't Cristopa' e'ñe entenen. ¹¹ Ñaña añ e'ñe poctetsa o'ch yepretnannena. Allochñapa' ama't oneñe'pa' amach alla a'psaterrre Yompor. Tarro'mar ñapa' yeñoteñ chocma e'nenan attoch shequëney.

Atto Pablopa' atarr llequënana corinto'marnesha' allempo ama huerra' Tito Corintot

¹² Te'pa' o'ch neñotaterrser ñeñt atet ne'pa ahuaña. Ahuaña allempo necherr Troaso, napa' o'ch neserrpare'tatanetañ Cristo po'ñoñ ñeñt alloch yequeshperrapa' shonte' acheñenesha' mueneñetañ o'ch e'mñotoñet Yepartseshar po'ñoñ, ¹³ tarraña napa' ama't mamesha ama neñmateno neyo'chro tarro'mar allpa' ama nentose masheñ Tito. Ñeñto'mar ama na'po all, atta neso'tnerranet, o'ch necherr all anetso Macedonia.

Yomporpa' chocma moñenya allempo es yehuenoya

¹⁴ Yeparasyoso'chepa'ch Yompor tarro'mar ñapa' chocma moñenya allempo es yehuenoya. Ñaña e'ñe yeyemteño' Puechemer Cristo Jesús'pa' chapaterreycha' cosheñtso. Ama't yapa' o' muenaterrey attoch ya'poterrñañ po'ñoñ errañaren, allochñapa' attoch epa'huerra po'cohuenña erracmañen. Ñato' o'ch netma'ntacha atet ñerra'mrate' ñeñt atarr es eñmosa'tetsa, chach epa'hua e'ñe cohuen erracmañen pue'ñmosa'teña. ¹⁵ Tarro'mar ñeñtey a'potene' Cristo, Pomporñapa' e'ñe atet enteney ñerra'mrate' ñeñt eñmosa'tetsa e'ñe cohuen ñocop, ñeñtcha' epa'huerrtsa erracmañen allo'tsa'yen acheñenesha' añ patsro. Patanta'tetspa' pame'ñeño'tetpa' a'queshpataretterretcha', patanta'tetsña ñeñtcha' ama ame'ñerrtsopa' ñetpa' chenca'huerrretcha'. ¹⁶ Acheñenesha' ñeñtcha' chenquërrtsapa' e'ñech atet enteññañet Yompor po'ñoñ ñeñt yeserrpare'ten ñerra'mrate' ñeñt amtsañtetsa, añña ñeñteycha' queshperrtsapa' yañapa' o' yenterrñañ Yompor po'ñoñ atet ñerra'm es ñeñt ama ahuañaño alloña yapa' corretsayach. Ñato' o'ch netma'ntacha ñerra'mrate' ñeñt atarr eñmosa't ñeñtcha'ña ya'crraterre' errponohuañen. Esesha'huachñaca' pocte' enterrña Yompor ñeñtcha' serrpare'terre' po'ñoñ. ¹⁷ Añ pocte' enten Yompor ñeñtcha' serrpare'tene' po'ñoñ ñeñt e'ñe pueñmañeshocmañen serrpare'tene'. Atet ñerra'm ya, tarro'mar yapa' ama choye' yetseteno Yompor po'ñoñ acheñ pocta'ño ñeñt atet pena shonte' po'potantañ acheñenesha'. Ñetpa' atet penet attoch pocshateño' acheñenesha'pa' o'ch es apa'yenanet. Añcha'ña e'ñe yeñmañeshocmañen yeserrpare'teññañ po'ñoñ atet llesensaney Yompor. Ñapa' enteney ñeñt atet ye'ñorena ñocop e'ñe yeyemteño' Puechemer Cristo.

3

Atto Pablopa' ama pallteno o'ch quellcoñet carta attoch cohuen enteñ acheñenesha'

¹ Sapa' çhate' sotenapañ napa' o' alla neñerrerr e'ñe cohuen, ñato' nocpate', ñato' çhate' nommo'chena. Tarraña ñeñtpa' ama atteyaye. Amapa' ñato' sapa' çhate' sotenapañ añte' nepalltena carta ñeñtcha' señotate' atto po'poñ anetso'marnesha'pa' e'ñech cohuen entapretennet atto napa' cohuen netorrena Yomporecop. Tarraña napa' ama es nepallteno. Ñehua, ñaãna çhate' sotenapañ añte' nepalltena carta ñeñtcha' sequellcon sa alloch señotach po'potantañ acheñ atto e'ñe cohuen sentenen na, atet pena po'psheññeçhno ñeñt serrpare'tets attoch cohuen enteñ acheñenesha' e'ñe ñaãneña. ² Tarraña napa' ama nepallteno ñeñt po'poñ carta ñeñtcha' eñotate' po'potantañ acheñenesha' ñeñt atto netorrena na Yomporecoppa' ñeñtña atarr sherbets. Tarro'mar sapa' saña e'ñe sherbets atet ñerra'mrrate' necarta nepenes. Tarro'mar allempo acheñenesha' eñotenset sa atto te'pa' o' soctape'cherr cohuen Yomporecop, ñeñtcha'ña eñotatenahuet ñeñt atto netorrena na, ñeñtpa' ñeñtña e'ñe sherbets Yomporecop. Ñato' o'ch netma'ntacha atet: Na necarta ñeñtña eñotatenahuet ñeñtpa' all aquellcaret e'ñe neyoçhro ñeñtcha' lleyen allohuen acheñenesha' ñeñtcha'ña eñotatenahuet. ³ Ñaãna sa atto te'pa' sordaten ñeñt e'ñe cohuentetsa, acheñenesha'ñapa' o'ch eñotapretaset ñeñtpa' po'ñoçh Cristo po'taruas pene'. Ñato' o'ch netma'ntacha atet: Sapa' atet sesherven ñerra'mrrate' yecarta ñeñtcha' eñotatenahuet, ñeñt cartapa' o' quellca'huonay Cristo e'ñe ña. Añ cartapa' ahua't aquellca'huareta ahuañmo'çoteñ allempo yapa' yechapatonas Yompor po'ñoñ ñeñt same'ñatate' Yompor. Tarraña añ cartapa' ama ayo'e' aquellcaretto tinto, añña Yompor Puecamquëño' anareta, ñeñtara Yompor ñeñt ama arromñateshayaye. Tarraña añ cartapa' ama arreye' aquellcarete mapyettallo. Añpa' arrña aquellcaret e'ñe ya yeyoçhro ama't ñeñtey arromñatey.

Atto Yomporpa' a'poctaterrnay e'ñe etserra

⁴⁻⁵ Napa' neñoteñ ama nepallteno po'poñ carta ñeñtcha' eñotatenahuet. Saña ñeñtes e'ñe necarta nepenes. Ama notenso e'ñe nañeña nohuamenco' es nepa'yen. Añña e'ñe neyemteño' Cristo napa' netorrena Pomporecop. Ora allohuen es nepa'yen Yomporña ahuañmenco' nepene'. ⁶ Ñeñtara Yompor ñeñt ahuañmenco' yepene' allochñapa' attoch yeserrpare'terrñañ pocatapña ñeñt atet a'poctaterrnay e'ñe etserra. Añpa' ama atteyaye atet pa' ahua't Yompor allempo apan Moisés po'ñoñ ñeñt anarettatse't ñeñtcha' e'ñe yetsotuañ esheccha' a'queshpateney Yompor. Ñeñt ama etsotaye'te, ñocpuetpa' o' anarettet rromuetcha', chenquërretcha'. Tarraña ñeñt atto a'pocstatuerrnay Yompor etserra, ñeñtpa' atto apuñey Puecamquëñ alloch yocrra'huerra, tayoteñ erponohuañen.

⁷ Añ ñoñets ñeñt aquellcarettatsa mapyettallo, ñeñt ama etsotenaye, ñocpuetpa' o' anarettet rromuetcha', chenquërretcha'. Ñaãna ahua't allempo Yomporpa' apan Moisés po'ñoñ atet, e'ñe po'cohuenteno' apan Moisés. Moiséspa' atet orra'ta pa'clloyot çha poptena, atarr a'rrechatañ. Ama't israelnesha'pa' ama eshcaye' cohuaçle'çheto. Tarraña ama't atet pañpa' acopo'teñ maya'huanerr ñeñt atto poptena. ⁸⁻⁹ Ama't añ

cotaṗñatser ñeñtcha' ya'chencaterrayeñpa' tarraña Yomporpa' atarr cohuenoṭ orrtach allempo. Te'ña e'ñe ellonetpa' o' alla orrtaterrnayerr ña poctaṗña attoch e'ñe pocte' entuerrey. Ñeñtpa' e'ñe Parets Puecamquëñoṭ orrtatuerrnay ñeñto'marña ñapa' ello cohuentena nanac. ¹⁰ Ñeñt atet popta ahuaṭ Moisés pa'cloyoṭ allempo aṗ Yompor po'ñoñ, te'ña ñeñtpa' o'huañ e'ñeye' cohuenaye' yeñch tarro'mar te'pa' eñall Cristo po'ñoñ ñeñt atarr cohuen yenten, ello metanenan atto cohuenta't Moisés po'ñoñ. ¹¹ Tarro'mar ñeñt atet cohuenta't Moisés ñeñtpa' acoṗoteñ maya'huanerr atto cohuentena. Tarraña te'pa' atto cohuentena Cristo po'ñoñ ñeñtpa' amach ahuañaña'aterra, ñeñto'marña ñeñtpa' ello metanenan Moisés po'cohuenña.

Atto Cristo po'cohuenña ñeñtpa' amach ahuañaña'aterra

¹² Yapa' o' yeñoterrñañ Cristo po'cohuenña ñeñtpa' amach ahuañaña'aterra. Ñeñto'marña yapa' ama yepenquëñoṭeye' yeserrpare'teññañe po'ñoñ. ¹³ Yapa' ama atteye' yepeno atet ṗa ahuaṭ Moisés. Ñapa' cha huañerr atto popta pa'cloyoṭpa' ahuo't ca'macle'cha allochña israelnesha'pa' amach eñcheto pa'cloyoṭ o' huañerr atto poptena. ¹⁴ Israelnesha'pa' ama çhapaneto pueyoçhreto attoch cotape'cherret cohuen Yomporecop. Ama't teme'ttsen ñerra'm esempo lleyeññañet ñeñt a'poceta Yompor ahuaṭ atfaretach amach çhapaneto pueyoçhro ñeñt atet muenen Yompor. Po'ñoçhpa' añaõcha'ña çhaponaya yeyoçhro ñeñt atet muenen Yompor e'ñe yeyemteñoṭ Puechemer ñeñt Cristo. Israelnesha' ama cohuenaye' enteñeto Cristo ñeñto'mar noten ñetpa' teme'ttsen atet penet ñerra'mrrate' cho ca'macle'chenet. ¹⁵ Po'ñoçh ama't teme'ttsen ñerra'm esempo e'mñotenet all lleyeññañet Moisés po'ñoñ amach es eñoteneto. Chach ottenet ñerra'mrrate' cha es a'npuenahuet attoch amach eñotoñeto Yompor poctaṗña. ¹⁶ Tarraña ama't puesheñarroṭeya ñeñtey erra'tseney acheñrey, allempoteñ yaguër Yepartseshar Cristo, allempoteñcha'ña çhaponaya yeyoçhro ñeñt atet muenen Yompor; Cristopa' ñachña yehuapore'tamṗse'ña ñeñt ya'npuenayeñ. ¹⁷ Ñeñt yoten Parets Puecamquëñ, ñeñtara Yepartseshar Cristo Puecamquëñ. Ñaña atarr cosheñtso'tseney ñerra'm esempoch çhaponaya Cristo Puecamquëñ yeyoçhro. O'huañcha' yemueroçhtame'ta attoch puechemer perrey Yompor, e'ñech yocsheñsha' yoçter Yompor. ¹⁸ Allohueney ñeñtey ame'ñenaya Yepartseshar Cristo, ña Puecamquëñpa' ñachña ya'po'poñeterre', allochña'pa' allo'nach yesen cohuentapretaya Cristo. Yapa' ama atteyaye ñerra'mrrate' ñeñt a'natacle'charet attoch amach enteññañeto Cristo po'cohuenña. Yapa' e'ñe yecueñoṭ Cristo po'cohuenña, yapa'cho'ña o'ch yecohuentapreteña yanña, atet ñerra'mrrate' rerep poptetsa ñerra'm cho yecuach atsretonet.

4

Atto Pablopa' atarr cohuen yechatenanet Yompor po'ñoñ

¹ Yomporpa' e'ñe puemuerenoṭ muenatenen o'ch neṭorreññaña ñeñt nanac sherbets ñocop. Ñeñto'marña napa' ama nellquëñoṭeye' neserrpare'teññañe po'ñoñ. ² Ñeñt a'nahua es ṗa'yenet ñeñt apencoçhen yenten yocop ya ñeñtey torretsa Yomporecoppa' ñeñña

napa' o' na'ypo'ñamper. Ñaña napa' ama es neshquëñoť nepa'yeno masheñneshacop. Ñaña napa' allempo neserrpare'tateñ acheñenesha' ama čhoye' na'po'poñeteññañe Yompor po'ñoñ. Añcha'ña e'ñe na'poteññañ Yompor po'ñoñ e'ñe po'ñočh ñeñť atet oten po'ñoñ. Yomporpa' entenen ñeñť atet notenes ñeñťpa' e'ñe po'ñočh atet. Ñaña ama't erra'tsena acheñer ñeñť eñotene' ñeñť e'ñe pocte' entenet ñet pueyočhretopa' ñetpa'čho'ña e'ñech cohuen entapretennet. ³ Atto yeserrpare'teññañ Yompor po'ñoñ ñeñť po'ñočh alloch yequeshperra tarraña patantarr acheñenesha'pa' amach čhapaneto pueyočhreto ñeñť alloch yequeshperra. Ñeñť atet petsapa' allo'na senet allcha' chenca'huerret. ⁴ Ñeñťara acheñenesha' ñeñť ama ame'ñetso, ñetpa' añña po'yomporer penet arr patsro ñeñť oneñeť, ñeñťña ama muenatenaneto o'ch čhapanet pueyočhreto Yompor po'ñoñ; allochñapa' attotcha' amach eshcaye' cohuen enteññañeto Cristo po'cohuenña. Ñapa' attecma cohuentena ñerra'mrrate' Pompor Parets ñeñť ama entpahuoyaye. Ñeñť po'cohuenñapa' ñeñťara yoten cohuen ñoñets alloch yequeshperra. Ñato' o'ch netma'ntacha atto oneñeťpa' a'nataclle'chenanet attochña amach eshcaye' cohuen enteññañeto Cristo po'puetarenña. ⁵ Tarro'mar ñeñťey e'ñe yeñmañeshocmañen seserrpare'tatene'pa' ñeñťpa' ama añecpaye' atet yepeno attoch senteney ya ñerra'mrrate' samo'mte' sepeney. Añcha'ña yeserrpare'tatenes Jesucristo, ñachña Separtseshar sepen. Yapa' añña atarr yetorrena socop e'ñe yemorrenteñoť Jesús. ⁶ Ñehua, yapa' yeñoteñ atet ot ahuat Yompor, ñeñťpa' atet ot: "Eñalletepa'ch pueta're' allochñapa' o'huañcha' checmet." Ñeñťara Yompor te'ñapa' o' a'puetarsañperrnay yaña yeyočher allochñapa' attoch yeñotater po'potantañ acheñenesha' atto Cristopa' ña orrtatene' Pompor po'cohuenña.

Ama't ama esoshe'mayayye e'ñe yeyemteñoť Yomporpa' ñapa' čhocmach ahuaumentat peneý

⁷ Ñeñťpa' atto Yomporpa' ahua't chorrerrya yeyočhro po'cohuenña, ama't yapa' arromñaataya, ama esoshe'mayayye. Añecopña o' chorrerrya ya ama't ñeñťey ama esoshe'mayayye, allochñapa' attoch eñochet ñeñť atto atarr ahuaumentat yentenapa' ñeñťpa' ama yoyaye yehuomenc, ñeñťpa' Yomporshot huena. Ñato' o'ch netma'ntacha atet ñerra'm ahuat po'poñ acheñ ñerra'm esempo atarr es morrenteneta' o'ch esha'teñet patsrrogo ama't ñeñť coyempa' ama e'ñe cohuenayaye. ⁸ Ñehua, ama't allenateñcha' huaponaya ñeñťcha' atarr ya'llpatate', tarraña čhocmach eñall attoch yesuanem. Ñaña ama'tcha' atarr yellquëñañ nanacpa' tarraña čhocmach eñall attoch yesuanem allohuen ñeñť allcatañtetsa. ⁹ Ñehua, ama'tcha' cotare'teney ñeñť ye'moñe'tene' tarraña Yomporpa' amach a'ypo'ñenye ama't mamesha. Ama'tcha' o'shshe'mayet patsopa' čhocmach alla yetanterra. ¹⁰ Chocmach muene' yerromañ atet pete't Jesús. Tarraña atto Jesús'pa' o' alla tanterra yapa'čho'ña attoña o' a'queshpaterrey allempo es yehuenoya. Attochña yeñotach acheñenesha' atto Jesús te'pa' o' betterra. ¹¹ Atto allponmat yocrrena añe patsro yapa' čhocmach pomatatenyet yerromuepa'to'. E'ñe yemorrenteñoť Jesús atet penyet. Tarraña atto Jesús'pa' o' alla tanterra, yapa'čho'ña attoña a'queshpaterrey allempo es yehuenoya ama't yapa' arromñañeneshaya.

Attochña yeñotach acheñenesha' atto Jesús te'pa' o' betterra. ¹² E'ñe netorreñoť Cristocop čhocmach nanac nemueročhetuanena autsanča' rromuets. Tarraña ñeñťpa' atarr cohuen socop tarro'mar ñeñťpa' alloch e'ñe sequesħpa'huerra sama.

¹³ Añmapa' ñeñť atet oten Yompor po'ñoñ ñeñť atet anuaret ahuatoteñ ñeñťpa' atet oten ñeñť quellquē' libro Salmos, "Napa' atarr neyemteña Yompor ñeñťo'mar atet ne'ñorena ñocop." Yapa'cho'ña e'ñe attecma yoctape'chen yaña. E'ñe attecma yeyemteña Yompor, ñeñťo'mar yapa'cho'ña attecma ye'ñorena yaña. ¹⁴ Yapa' yeñoteñ Yomporpa' ahuo't tantaterran Puechemer ñeñťara Yepartseshar Jesús. Ñeñťo'mar yeñoteñ yapa'cho'ña tantatuerreycha' Yompor e'ñe atet řan Puechemer Jesús, allochñapa' ama't sapa' o'ch čhapatuerres allohuenes e'ñe parro ñesho. ¹⁵ Ñeñťo'marña napa' Yomporña nemnate' o'ch nemueročhtame'ta; ñeñťpa' e'ñe socop, allochñapa' attotcha' Yompor puemuereña čhapcha' shonte' acheñenesesho, allochñapa' shonte'ch acheñenesha' allo'nach senet parasyoso'tnomuet Yompor, attochña e'ñe cohuen ya'ye'chočhtateññañ Yompor.

¹⁶ Ñeñťo'marña napa' ama nellquēñoteye' netorreññañoña Yompor po'taruas. Ama't nechetspa' allo'na sen huañuanmats atto noumencna'ntena, tarraña necamquēññapa' allo'na sen huomencatnomuets e'ñe pate'tets yet. ¹⁷ Tarro'mar ñeñť atto allpon yemueročhtame'tyena aña patsro, ñeñťpa' ama esoyaye, e'ñe mamecpa. Ñeñťpa' añecpaña huennaya allochñapa' attoch huapatuerrnay ñeñť atarr nanac cosheñets ñeñť ama ahuañaño ama't errponaña, ñeñť ello nanac atarr cočhnesha'tetsa, ñeñť atarr nanac cohuen. ¹⁸ Tarro'mar yapa' ama aye'e' yeyemteno ñeñť allpon cočhnesha' yentyen arr patsro, tarro'mar añečno ñeñť allpon yentyenpa' huañerrcha'. Yapa' añña yeyemtena añečno ñeñť cohuentetsa Yomporcop ñeñťpa' ama entpahuoyaye ñaña ñeñťpa' amach huañerro ama't errponaña.

5

Atto Yomporpa' o' añño'terrnay ñeñťcha' yepaquēll yeperr all pue'ntaño

¹ Yapa' yeñoteñ ñeñťey arromñaťey, yechetspa' čhocmach huañerr. E'ñe mamecpa sherbeney aña patsro, atet ñerra'mrrate' yequērpachet ñeñť pocollashe'm all yemanatena. Ñeñť pocollashe'mpa' mamecpach sherba'y. Yechetspa'cho'ña mamecpa sherbeney atto yocrrena aña patsro ñeñť yepacllashe'm yepen. Tarraña yapa' o' yeñoter ñerra'm esempoch yerroma, Yomporpa' o' añño'terrnay ñeñťcha' yepaquēll yeperr all pue'ntaño allcha' yeyča'huerra, ñeñťpa' amach ahuañañaťterro. Ñeñťcha' yepaquēll yeperr allpa' ama arromñaťeshaye' yečcatenaye, Yomporña yečcatene'. ² Po'ñočh arr patsro yechets ñeñť yepaquēll yepenpa' čhocmach es e'mnatatuene'. Ñeñťo'marña yapa' atarr yemneñ o'ch yechorrerra ñeñťcha' yepaquēll yeperr Yompor pue'ntaño. ³ Tarro'mar yemneñ yecamquēñpa' o'ch chorrerrana ñeñťcha' pa'shtam perr Yompor pue'ntaño, allochñapa' yecamquēñpa' amach atta huocchapoterro čhocmach eñall ñeñťcha' chorrena. ⁴ Tarraña atet ñerra'm te' orameñ yechets ñeñť yepaquēll yepen atto yocrrena arr patsro, čhocmach eñall ñeñťcha' e'mnatatuene'. Ñeñťo'marña yapa' atarr

yemneñ ama't ama yerromuena', yechetspa' o'ch a'po'poñeterrnay Yompor tayoteñ ama't esempo huerra, ñeñtcha'ña pa'shtam perr yecamquëñ. Allochñapa' attoch yocrerra etserra correñets ñeñt amach ahuañañaterro, ñeñtcha'ña a'huañaterre'ña ñeñt atto ya'rromñaatte't. Ñato' o'ch netma'ntacha atet ñerra'mrrate' o'ch yechorra shetamuets ñeñt e'ñe etserra emarr ñeñtcha' yena' enot o'ch yepmata. Allochñapa' ñeñtcha' yena' enot, ñeñtcha'ña a'natue'ña mellashañ ñeñt yechorre't ahuañoñeñ. Allochñapa' attoch eñall ñeñtcha' yechorratenaya. ⁵ Ñeñt yemnatene' e'ñe atet ñeñt'pa' Yompor ña atet yepatene', tarro'mar ñapa' chorrenya Puecamquëñ ñeñtña yeñotatene' orameñ eñall cohuenñats ñeñt o'patatenya ñeñtcha' aphuerrey Yompor.

⁶ Ñeñt'o'marña e'ñe yeyemteñoñ Yompor chocmach yecueñ ñeñtcha' atet perrnay esempo. Yeñoteñ yechets yepaquëll yepenmeñ arr patsro allaparo'tsenmeñey attoch yeycha'huerra Yepartsesharesho. ⁷ E'ñe yeyemteñoñ Yomporpa' allo'nach yesen eñotnomue' ñeñtcha' atet perrnay ña, ama añeye' es yeñotatenaye ñeñt yentyen arr patsro. ⁸ E'ñe yeyemteñoñ Yompor chocmach yecuen ñeñtcha' atet perrnay ña. Ñaña yapa' añ atarr cohuen yenten o'ch huañ atto yocrrena arr patsro, o'ch yesa'nom yechets ñeñt yepaquëll yepen arr attoch ye'chap allcha' yocrra'huerra Yepartsesharesho. ⁹ Yapa' ñeñt'ach paterr yema'yo'chrena chocmuepa'chña yocshateñ Yepartseshar, ama't allempo orameñ yocrrena e'ñe yechtso arr patsro, ñaña ama't allempoch yerroma o'ch yesa'nom yechets e'ñepa'ch Yepartsesharesho'tseney attoch yocshateñ e'ñe all pue'ntaño. ¹⁰ Tarro'mar o' anaretta allohuenacpay yehua-puepa'to' Cristesho allcha' eñotatarétey e'ñe puesheña'ttsoy. Allochñapa' allcha'ña atet pa'yeseñ errotencha' entapretuerrey, ñato' e'ñech cohuen entapretuerrey atto e'ñe cohuen es yepa'yen e'ñe yechtso't allempo yocrrena arr patsro, ñato' amach cohuenaye' entapretuerrye.

Atto Pablopa' e'ñe pueñmañesha' e'ñe cohuen es orrtatyen

¹¹ Ñeñt'pa' ama't atarr yoro'chen yenteñeñña Yompor, tarraña nocoppa' ama yoro'chenayaye tarro'mar Yomporpa' entenen e'ñe cohuen ñeñt atet nepena. Te'pa' aña palltetsa o'ch noctape'chater allohuen acheñenesha' attoch ñetpa'cho'ña e'ñech cohuen entapretennet. Ama't sapa'cho'ña te'pa' necuenes, nemneñ o'ch seño'ter sam'a e'ñe seyo'chro atto e'ñe neñmañesha' cohuen es nepa'yen. ¹² Ñeñt atet notenes te'pa' ñeñt'pa' ama añecpayay o'ch alla neñerrerr cohuen ñeñt e'ñe nocpa. Añecopña o' alla neñerrerr atet allochñapa' o'ch alla socshapreterrna, allochñapa' attoch seño'ch ote' ñeñt e'ñe ñañeña cohuen entetsa e'ñe poctapño'mara. Ama añeye' eñoteno pueyo'chro ñeñt cohuentetsa Yomporecop. ¹³ Ñehua, sapa' chate' sotenen napa' cho' muene' nemospuena. Ñerra'm po'ño'ch cha nemospuenapa' ñeñt'pa' e'ñe pocte' Yomporecop. Ñaña ñerra'm ama choye' nemospueno atto e'ñe cohuenare' es noctape'chen ñeñt'pa'cho'ña e'ñe pocte' allo nesherbene's sa. ¹⁴⁻¹⁵ Ñaña atto Cristopa' atarr morrentenya ñeñtña ama yemnatene' o'ch allo'na yesen corratsa e'ñe yocpa. Ñaña atto te'pa' yeñoteñ Cristo ahuo't rroma allohuenacpay, allochñapa' atto yocrrena yapa' o'huañcha' yocrra e'ñe yocpa. Ñeñt'pa' ñeñt'ara yoten o' yerromaprecha Cristo, allohueney ñeñtey ame'ñenaya. Añcha'ña atet yocrrena e'ñe ñocop, ñeñt rromats yocop, elloñapa' alla

tanterra yocop. ¹⁶ Ñeñto'marña napa' ama't puesheñarrapa' o'huañcha' cohuen nenteñ ñeñt e'ñe cohuen enten po'potantañ acheñenesha' arr patsro e'ñe ñet poctapño'maret, ñeñtpa' arromñaña poctapña. Tarraña ama't na ahuatpa' cohuen nentapretanete't poctapña. Ñeñto'marña napa'cho'ña tseña'tatnete't Cristo allempo, tarraña te'pa' o'huañ atet neñch Cristo. ¹⁷ Ñeñto'marña ñeñtey o' yeyemtera Cristo, Yomporpa' o' etserrataterrnay yocapña e'ñe poctacma. Ñeñt atet yocape'che't ahuat, ñeñtpa' o' huañerr, te'ñapa' o' e'ñe yocape'cherr ñeñt e'ñe cohuenare' etserra.

¹⁸ Ñeñña o' atet perrnay Yompor ñeñt muenatan Puechemer Cristo, ñachña yamo'tstaterre' Pomporesho. Ñeñtara Yompor ama't napa' ahuo't llesensa'n attoch neñotach acheñenesha' allochñapa' ñetpa'cho'ña o'ch amo'tsterranet ñamet Yompor. ¹⁹ Ñaña atto Yomporpa' muenatan Puechemer Cristo allempopa' ñachña allo'na sets yamo'tstataya allohueney acheñeneshay Pomporesho. Allochñapa' o'huañcha' allo'na ochñañenesha' enteney Yompor. Attoña yapa' apuerrey llesens ellone't attoch yach eñotatyses' pa'namen acheñenesha' allochñapa' ñetpa'cho'ña attoch e'ñe amo'tsterranet Yompor. ²⁰ Ñeñto'marña yapa' allsensaretey ñeñtcha' yetaruas yeperr ñeñteycha' eñosets cohuen Cristocop attoch yame'ñacha allohuen acheñenesha'. Ñeñtpa' atto Yomporpa' o' hua'ñerres o'ch same'ñera, tarraña ñeñtpa' e'ñe ya yeserrpare'tateñotes o' hua'ñerres Yompor. Ñeñto'mar te'pa' o'ch notas Cristocop, ñach same'ñerra allochñapa' attoch e'ñe amo'tsterrsa Yompor e'ñe poctacma. ²¹ Añ ñeñtara Cristo ñapa' ama't parrochapa' ama' ñano ñeñt ama pocteye' enteno Pompor Parets, tarraña Pomporñapa' ahuo't muenateñ o'ch atet a'paretta ñerra'mrrate' acheñ ñeñt atarr ochñañ. Tarraña ñeñt atto a'parettapa' ñeñtpa' e'ñe yocop. Allochñapa' e'ñe yeyemteñot Puechemer Cristo, Pomporña yapuerre' alloch e'ñe pocte' enterrey.

6

Ñeñt torretsa Yomporecoppa' añ poctetsa ñocop çhocmach orrtatenan ñeñt e'ñe pocte' enten Yompor

¹ Te'pa' atto yetorraprecha Yompor, napa' o'ch notas, amach e'ñe orrena sagapatstoñe Yompor puemuereña. ² Ñehua, ñeñtpa' atet oteneY Yompor po'ñon ñeñt anuaret ahuatoteñ, ñeñtpa' Yompor atet otets: Allempo seçhore'tenen napa' e'ñe ne'mñnotenes ñeñt atet sotenen, tarro'mar allempopa' o' çhap ñeñt poctetsa o'ch saguerren. Nañapa' o'ch naguërres saña. Attoña napa' ahuo't neyenpas tarro'mar allempopa' o' çhap ñeñt poctetsa attoch na'qeshpaterres.

Ñeñto'marña na te'pa' o'ch notas, o' e'ñe çhap allempo ñeñt poctetsa o'ch saguer Yompor, tarro'mar te'pa' o' çhap allempoch a'qeshpaterrey.

³ Ñehua, yapa' yeñoteñ ñeñtey ame'ñetsa ñerra'm o'ch yepa'yen ñeñt ama pocteyaye Yomporecop ñeñña ama ame'ñetsopa' çhach ya'npare'teñ attoch ame'ñerret ñamet. Ñeñto'marña yapa' ama yemno ama't mamesha o'ch ya'npare'ch ama't puesheñarra allochñapa' attoch ame'ñerret ñamet Yompor. Ñaña ya atto yetorrena Yomporecoppa' ama yemno o'ch atet entapretyet ñeñt ama cohuenayaye. Allochñapa'

amach achm̄are'teññañeto Yompor po'taruas e'ñe ya atet̄ yeḡatse'tyeñoť. 4 Yapa' añña yemnen ama't erroteno'tsenya ḡocmach yemneñ o'ch yeñotach acheñenesha' po'ñoč e'ñe cohuen yetorrena Yomporecop ñeñť atet̄ poctetsa yocop ñeñfey torretsa Yomporecop. Ñeñťpa' añečno ñeñťcha'ña eñotaterahuē: allpon es yehuapoyapa' ḡocmach ya'huanteñ e'ñe cohuen, ama't allpon atto yemueročhtame'tyena, ama't allpon ñeñť yepallta'yena, ḡocmach ya'huanteñ allohuen. Ama't ora allohuen ñeñť allpon ñeñť allcatañtetsa, țarraña ñeñťpa' ḡocmach ya'huanteñ. 5 Ñaña atto ashta'yenyet, atto yottam̄penyet, atto ama'točhtana'tenyet pa'tsrre'mueñoťet, atto atarr nanac yetaruasen, atto yarepen țorratsa Yomporecop, atto yemueročhtena yachporrñoť, ñeñťña eñotatene'ña allohuen acheñenesha' atto yapa' e'ñe cohuen yetorrena Yomporecop. 6 Ñaña atto yeñmañesha' yocrrēna, ama sosya'tsañeye' yoc̄tape'chyeno, ñaña atto yeñoten ñeñť e'ñe po'ñoč Yompor po'ñoñ ñeñť ama shequēñtsoyaye, ñaña atto es ya'huanta'yen, amachña čha atsrre'matenye, ñaña attochña e'ñe ya'muerañtēna, ñaña atto chorrenya Parets Puecamquēñ, ñaña atto e'ñe cohuen yemorrenteña allohuen masheñneshačhno, ñeñťpa'čho'ña ñeñťña eñotatene'ña acheñenesha' atto yapa' e'ñe cohuen yetorrena Yomporecop. 7 Ñaña atto ye'ñorena ñeñťpa' e'ñe po'ñoč atet̄. Yomporña po'huamenc ñeñť ahuamencat yepene'. Ñaña ñeñť e'ñe pocte' enten Yompor, ñeñťpa' ñeñťña allo ḡocma es yeḡa'yen, alloña yečllarena Yomporecop, ñeñťpa' alloña yemoñeññaña Yompor poctapña. 8 Erroteno e'ñech cohuen entapretenyet, țarraña errotenoñapa' amach cohuenaye' entapretenyeto; erroteno e'ñech cohuen eñosyenet yocop, errotenoñapa' čhach sasare'tenyet. Errotenopa' attach entenyet ñerra'mrrate' atta yeshquēn, ama't amach čhoje' yeshquēno. 9 Errotenopa' e'ñech cohuen emchorrenyet, errotenoñapa' amach acua'psenaye' entenyeto. Errotenopa' autsaycha' rromuets, țarraña ḡocmach allo'na yesen huom̄chetsa. Erroteno ama'tcha' a'coñchatareḡey, yañapa' corretsayach. 10 Ñaña erroteno ama'tcha' yellquēnañpa' țarraña ḡocmach alla yocsherra. Ñaña ama't e'ñe huocchañeypa' shonte'ch cočhnesha' cotapñats yapa'yepo'potantañ. Ama't ama es yechenñe arr patsro, țarraña shonte' esocmañen es yechen Yomproshot.

Atto Pablopa' e'ñe pueyočhrocmañen morrentenana allohuen ñeñť ame'ñenaya Yompor

11 Te'pa' masheñneshacha' corinto'marnesha o' neñotatuas ora allpon ñeñť atet̄ noctape'chen neyočhro. E'ñe neyočhrocmañen nemorrentensa. 12 Nocoppa' ama palltenmeñe ama't mamesha attoch semorrenterra e'ñe poctacma. Añña sapa' ḡocmate' sepalltēna attoch semorrenterra naña. 13 Napa' e'ñe nechemesha' nepenes. Ñeñťo'marña o'ch nenamas, o'ch notas, atto napa' e'ñe neyočhrocmañen nemorrentensa sa, sapa'čho'ña añ poctetsa e'ñe seyočhrocmañenpa' o'ch semorrenterra naña.

Atto ama ayemuetpahuo ñeñť ama ame'ñetso

14 Te'pa' o'ch noterrser po'poñ, amach e'ñe seyemtatsche ñeñť ama ame'ñetso, țarro'mar amach patraye' soctape'chueno. Acheñ ñeñť e'ñe pocte' es ḡa'yetspa' amate' errotenoť yemtanoña acheñ ñeñť ama cohuenaye' es ḡa'yetso, țarro'mar ama attecmañe' es ḡa'yeneto. Ñato'

o'ch netma'ntacha atet ñerra'mrrate' checmete'pa' amate' errotenoŧ alla epteto parro epuet puetare'. ¹⁵Ñeñt atet pena Cristo ñaña oneñet amate' errotenoŧ cohuen amo'tstanna'teto. Attecma ñaña ñeñt ame'ñetsapa' amach patrraye' cotape'chueneto epuet ñeñt ama ame'ñetso.

Atto yapa' pa'paquëll peney Yompor

¹⁶Ñaña ñeñt pa'paquëll pen Yomporpa' ama atteyaye ñerra'mrrate' ñeñt ayečhcataret ñeñt po'yomporer pa'yen po'potantañ acheñenesha' arr patsro. Tarro'mar ama't yapa' allohueney ñeñtey ame'ñenaya, yañapa' pa'paquëll peney Yompor ñeñt ama arromñañeshayaye. Añpa' ñeñt atet oten Yompor:

Napa' čhocmach neyčhena e'ñe ñesheto parro allcha' nechopeñe'chen. Napa' Po'yomporer pennet, ñetpa'čo'ña e'ñe neyochrenesha' nepenanet.

¹⁷Ñeñto'marña Yomporpa' oteney:

Añ poctetsa o'ch sesuanem ñeñt ama ame'ñetso, allochña'pa' o'ch sell-opa'tetstatua soctapña. Amach seyčhapretatsto sosya'tsañ ñeñt orrtatyenet. Allochña'pa' attochña napa' o'ch naguërres e'ñe nosheñesha'.

¹⁸Allochña sapa' attochña e'ñe Sompore seperren na, napa'čo'ña o'ch nechemerasha' neřohuerres ama't ñaña allohuen nesñenesohuen. Ñeñtpa' atet ot Yompor ñeñt nanac partsotets.

7

¹Ñehua, e'ñe nemorrenteñoŧes, masheñneshacha' ñaña nočhaneshacha' o' notuas atet oteney Yompor ñeñtcha' atet perrnay. Ñeñto'marña te'pa' añ poctetsa yocop yapa' o'ch yesuanem ora allohuen ñeñt čhocma a'sosyatene' yechets ñaña ñeñt čhocma a'sosyatene' ama't yecamquëñ. Añña e'ñe yem'cha'na'teñoŧ Yomporpa' añcha'ña yema'yochrena ñeñt pocte' enten ña.

Atto Pablopa' o' alla atarr coshater corinto'marnesha' tarro'mar o' cotape'cherret cohuen e'ñe etserra

²Napa' atarr nemneñ, masheñneshacha' o'ch alla semorrenterrna e'ñe seyočhrocmañen. Napa' ama't puesheñarroŧesapa' ama čo erroŧ neřaso, ñaña ama't puesheñarroŧesa ama añeye' neyčhataso ñeñt ama cohuenayaye, ñaña ama't puesheñarroŧesapa' ama čhoye' neshcare'taso ama't e'ñe mamesha. ³Ñeñtpa' ama añecpaye' notenso o'ch neyohuare'tasa. Añecopña o' alla noterrser e'ñe nemorrenteñoŧes ñeñt atet o' notuanmas. Po'ñočpa' atarr nemorrentensa e'ñe neyočhrocmañen. Ñeñto'marña napa' e'ñe pocte' nenteñ e'ñech parrocmayocrena ama't ñaña e'ñech parrocmayerro. ⁴Napa' neñotenes sapa' čhocmach sepa'yen ñeñt cohuentetsa Yomporecop. Ñeñto'marña napa' atarr noschhapretensa. Ama't nellquënañ nemueročhteñoŧpa' elloña o' alla nanac socshaterren.

⁵Ama't allempo nečherr Macedoniopa' čhocma atarr nellca'huerrerr alla. Allpa'čo'ña čhocma es nehuapoya pa'namen ñeñtña ama't mameshapa' ama eshcaye' neñmatataye neyočhro attoch e'ñe cohuen nellapŧos muechet. ⁶Atteñapa' o' čherr masheñ Tito. Atto čherr masheñ Titopa' allempoña Yomporpa' alla coshaterren neyočhro, ñeñtara Yompor ñeñt čhocma yocshatene' allempo es yellcatene'. ⁷Ama e'ñe aña noschataye

atto çherr Tito, añña atarr nocshatene' ñeñt' atto e'ñe cohuen entaprentensa', ñapa'çho'ña atarr socshater. Ñehua, ñapa' eñotatuerren atto sapa' atarr o' seyerpuenna, ñaña o' eñotatuerren atto sellquëño' sapa' o' alla same'ñerra e'ñe cohuen, ñaña o' eñotatuerren atto o' alla sellcapreterrna ñeñt' atto sellcatenen na. Ñeñt' allpon serrpare'tatuerren, napa' ñeñña ello atarr nanac nocshaterre'.

⁸ Carta ñeñt' nequellconas ahuaña, ñeñtpa' çha llecatas. Ñeñto'marña allempo napa'çho'ña çha muene' llecatna namã tarro'mar o' nemñonas atet carta. Ama't te'pa' neñoteñ añ necarta çha llecatenes tarraña ñeñtpa' e'ñe mamecpa, ñeñt' e'ñe pocte' nenteñ. ⁹ Attoña te' napa' e'ñe cohuen nocshena. Ñeñtpa' ama añecpaye' nocsheno atto sapa' nellcatas. Te' napa' añecopña nocshena atto sapa' e'ñe sellquëño' o' alla same'ñerra e'ñe cohuen. Tarraña atto sellquëna sapa' ñeñtpa' atet senteñ ñerra'm Yompor sellcatene' ñeñt'cha'ña same'ñaterraya e'ñe cohuen ñocop. Ñeñto'marña ñeñt' atet neponas, ñeñtpa' e'ñe cohuen socop, ñeñt' allopa' ama çoye' erroten nepenso ñeñt' ama pocteyaye ama't mamesha. ¹⁰ Tarro'mar ñerra'm esempo atet yenteñ Yomporña atet yellcatene' ñeñtpa' e'ñech pocte' yenteñ tarro'mar ñeñtpa' alloch yoctape'çherr cohuen ñocop, allochñapa' attochña yequeshperra. Tarraña atto yellquëna arr patsro, ama Yomporecpaye' yellquëno ñeñtpa' ñeñña allo'na aneney rromueñtso, allcha' yechenquerra poctacma. ¹¹ Sa sellquëñapa' e'ñe atet senteñ ñerra'm Yompor e'ñe sellcatene'. Ñeñto'marña allempoteñ yoroçhen senten sa so'chñar ñeñto'marña sapa' semneñ o'çh alla cohuen nentapreterres. Ñaña ñeñtpa' apencoçhen senteñ ñeñt' atarr atparña. Ñeñto'marña semchaño'pa' atarr semneñ o'çh alla senterren, attoch e'ñe cohuen na'poctatonas. Ñaña allempoteñña e'ñe pocte' senteñ o'çh secoñchach ñeñt' atparñañtetsa. Ñeñto'marña te'pa' atet o' sepohuerra ñeñt' e'ñe pocte' nenten, allochñapa' amach allo'na sa'yohuaretteno. ¹² Ñaña o'çh notas, ahuaña allempo nequellquërrnaserr añ necartapa' ama atparñaatecpaye' nequellquërrnaserro ñaña ama nocpaye' nequellquërrnaserro ñeñten atarr atpare'tenet. Añecpa'ñaña nequellquërrnaserr carta allochñapa' attoch çhaponasa seyoçhro po'ñoçh sapa' atarr semorrentenna. Ama't Yomporpa' eñotenes. ¹³ Ñeñto'marña attoña o' alla atarr socshaterrey.

Elloña napa' añ atarr nocshaterre' atto nenter masheñ Tito atto ña ahuo't alla atarr socshater, e'ñe pueyoçhrocmañen o' atarr cosherra. ¹⁴ Ñehua, ahuaña allempoch ahuo' masheñ Tito sesho, napa' atet noch sapa' atarrcha' cohuen same'ñya. Allempoña çhap seshopa' e'ñe atet same'ñya ñeñt' atet noch. Ñeñto'marña napa' ama't mameshapa' amach errotenot sepenatno, ama atta nommo'chenso. E'ñe po'ñoçh atet sepohuena ñeñt' atet noch Tito. Ñaña ñeñt' ora allpon atet notas, ñeñtpa' e'ñe po'ñoçh atet. ¹⁵ Ñaña e'ñe semcha'na'teño'pa' ahuo't sagap Tito e'ñe cohuen. Ñaña ñeñt' ora allpon cotape'chatas Tito sapa' ahuo't e'ñe cohuen ame'ñaterrsa. Ñeñto'marña te' Titopa' e'ñe pueyerpueño'es, ñapa' atarr morrentensa nanac. ¹⁶ Ñeñto'marña napa' atarr nocshena tarro'mar neñotenes sapa' o' same'ña'huerra e'ñe cohuen.

8

Atto macedonio'marnesha'pa' e'ñe pocsheñeshocmañen es apa'yenet Yomporecop

¹ Ñehua, te' masheñeshacha' ñaña nochaneshacha' o'ch neñotaterrser atto Yompopa' orrtaterranet puemuereña allohuenacop ñeñ pame'ñeñofet chocma apcha'yenet all anetso Macedonio'mar. ² Ñehua, macedonio'marnesha'pa' ama't shonte' pa'namen huenanet ñeñ atarr topatenahuet, tarraña ñetpa' chocma atarr coshenet. Ñaña ama't atarr huocchañetyenet, tarraña ñetpa' chocma apa'yeñet po'potantañ ñeñ atarr es nanac palltetsa. Apa'yeñet e'ñe pocsheñeshocmañen atet ñerra'mrrate' ñetpa' shonte' esocmañen echenet po'checom. ³ Napa' neñotenanet ñetpa' ahuo't pomyenet ñeñ allpon muena'yenet ñet puesheña'tset. Ama't ñocpuetpa' palltenetañ tarraña elloneñña' o' alla apa'yereterr po'psheñeñ po'pocheño, ama't ñocpuetpa' palltenetañ. Ñet e'ñe puemnenñofet atet penet. ⁴ Ñetpa' chocma a'pto'tennet pocte'te' o'ch notanet attoch yenpuet ñamet ñeñ masheñeshachno huocchañeshachno. ⁵ Napa' e'ñe allpona notanet ñetña ellonetpa' atarr shonte' pomyeset, tarraña ama't allempo ama pomueneta' po'clayor Yomporecop, ñetña'pa' ñanmacmuet o' e'ñe pomhuerret Yomporecop, allotpa' ñaña yocop ñeñ atet muenateney Yompore allohueney. ⁶ Atet nenteñ macedonio'marnesha' atarr es pomuenet Yomporecop, ñeño'marña te'pa' o' alla notererr masheñ Tito o'ch alla ahuererr sesho, allochña'pa' attoch allo'nach señotnen e'ñe cohuen pomuene' Yomporecop, ñeñ allpon yechatensa' ahuaña Tito. ⁷ Ñaña sapa' atarr setsoteññañ allohuen ñeñ cohuen enten Yompore. Ñanompa' atarr seyemteña Yompore, ñaña atarr cohuen seserrpare'teññañ po'ñoñ, pa'namen esocmañen es señotyen, ñaña e'ñe socsheñesha' es sepa'yen Yomporecop, ñaña e'ñe cohuen semorrentenya. Ñaña e'ñe setsotuen ñeñ atet cohuentetsa Yomporecop. Ñeño'marña te'pa' aña sepalltena paterr attoch o'ch setsota eñote' apa'yese' po'potantañ ñeñ es pallta'yetsa.

⁸ Napa' ama neyechare'teñoñeye' notenso atet, aña nemnen o'ch neñotatas ñeñ atet pena po'potantañ ñeñ e'ñe pocsheñeshocmañen es apa'yeñet ñeñ es pallta'yetsa. Allochña ñerra'm ñeñ señot, napa' neñotenes atetcha' sephouerra saña. Attoña neñotenes e'ñe po'ñoñ semueranna'tuena allohuenes. ⁹ Ñehua, sapa' o' señoter ñeñ atet pa Yepartseshar Jesucristo. Ñapa' atarr amuerañtosa, ñapa' esocmañen echeñ Pomproesho, tarraña e'ñe puemorrenteñoñey ya, ñaña'pa' atta huocchañetos. Allochña e'ñe puehuocchañeteñoñ yocop, yañapa' shonte'ch esocmañen yecherr Yomporeshot.

¹⁰⁻¹² Ñehua, sa ahuaña charopa' atarr semneñ o'ch es sapa'yeñ acheñenesha' ñeñ es pallta'yetsa. E'ñe socsheñesha' sapa' ahuo't samotech es apa'yese' po'potantañ. Ñeño'marña te'pa' añ e'ñe pocte' nenteñ socop. Te'pa' allo'nach sesen socsheñeshocmañen es apa'yeshahuet, e'ñe allpon semna'yen puesheña'ttsos, e'ñech allpon sapa'yasanet. Tarro'mar ñerra'm e'ñe yemneññoñ es yap Yomporecop, ñapa' e'ñech pocte' enteñ ama't e'ñe errpona yemneñ o'ch yap. Tarro'mar ñapa' amach enamye aton ñerra'm ama yecheñe. Allochña'pa' o'ch

senue e'ñe poctacma. Attotcha'ña setsotua allohuen ñeñt atet poctetsa Yomporecop.

¹³ Napa' ama notenso tarrecopcha' es sapa'yen allochñapa' o'ch atta atarr es sepalltena sa. ¹⁴ Añecopña notenes o'ch sattecmatua. Ateñ ñerra'm te'pa' shonte' sechen, socoppa' añ poctetsa o'ch sapa'yen ñeñt es pallta'yetsa te'. Allochñapa' ñerra'm esempo es sepalltena sañapa' añ poctetsa o'ch apuerrset ñamet, allochñapa' attochña e'ñech sattecmaten. ¹⁵ Ñeñtpa' atet oteney Yompor po'ñoñ ñeñt atet anuaret ahuatoteñ, ñeñtpa' atet oten: "Ñeñt echene' shonte'pa' amach es a'pchateno. Ama't ñaña ñeñt echene' coñe'tpa' amach es pallteno."

Atto Titopa' alla ahuerrerr po'pocheño Corinto

¹⁶ Napa' chocma neparasyoso'teñ Yompor tarro'mar añ nenan masheñ Tito pueyo'chro atto ñapa'cho'ña chocma llecpretensa atet ñerra'm na. ¹⁷ Ñeñto'marña allempo noteñ o'ch ahuerr sesho, ñapa' e'ñe pocte' enteñ. Elloña ñapa' e'ñe puenneññoñ atarr sechena o'ch alla ahuerrerr o'ch abcherrsa'.

¹⁸ Ñaña yapa' o'ch yemñererr masheñ Tito epuet ñaña po'psheñeñ masheñ. Ñehua, añ masheñerpa' allohuen ñeñt ap'cha'yetsa pame'ñeñotetpa' atarr cohuen enteñet atto serrpare'tatenanet añ cohuen ñoñets ñeñt alloch yequeshperra. ¹⁹ Elloña ñeñt masheñerpa' allohuen ñeñt ap'cha'yetsa pame'ñeñotetpa' o' net o'ch yechopeñe'ch parro attoch ñach yeyenpuene' ñeñt atto yetorrena o'ch yeyenpueñ po'potantañ. Ñeñtpa' añecop sherben attoch aye'chochtateññañet Yompor, ñaña añecop sherben attoch eñoteñet e'ñech yocsheñesha' yemneñ o'ch yeyenpannena e'ñe cohuen. ²⁰ Ñeñto'marña o' net ñaña po'psheñeñ masheñ allochñapa' atto yap'chaten quellepa' amach cha sasare'tenyeto quellayo'mara. ²¹ Tarro'mar yapa' añña yema'yo'chrena o'ch yorrtat ñeñt e'ñe cohuen enten Yompor, ama't ñaña ñeñt cohuen enten acheñesha'.

²² Ñehua, te'pa' o'ch yemñonas po'poñ masheñ ñeñtcha' tatsa, ma'psheña. Ñeñt po'psheñeñ masheñpa' napa' neñoteñ ñapa' e'ñe pocsheñeshocmañen atarr cohuen es ma'yo'chra'yena ñeñt cohuentetsa Yomporecop. Ñaña ama't te' atto e'mare'tenes sa e'ño' cohuen same'ñeña Yompor, elloña te' ñapa' atarr mueneñ o'ch allo'na sen torra'nmatsa e'ñe cohuen Yomporecop. ²³ Ñaña ñerra'm esesha' sa'p'to'tene' o'ch otaset, "¿ama't se'mare'teñe masheñ Tito, erro'tsen'te?" sañapa' o'ch soch "ñapa' añ epuet torrena masheñ Pablo taruasats Yomporecop attoña e'ñe sherbeney yaña." Amapa' ñerra'm a'p'to'taset ñaña añ po'psheñeñ masheñecop, sañapa' o'ch señotatanet ñetpa' arroñ amñare'ttenet all ap'chena allohuen masheñeshachno ñeñt ame'ñetsa all Macedonio. Ñetpa' e'ñe cohuen orrtatenet Cristo po'cohuenña. ²⁴ Ñeñto'marña te'pa' o'ch notas e'ñech cohuen sagañ añ masheñesha', allochña ñetpa' esheccha' eñotaset sapa' po'ño'ch atarr semuerenanet, attochña eñotas ñaña allohuen masheñesha' ñeñt pame'ñeñotet ap'cha'yetsa allot amñare'ttenet. Allochñapa' o'ch eñotaset po'ño'ch e'ñe cohuen same'ñena ñeñt atet notenanet socop.

9

Yomporpa' añ atarr morrentena ñeñt e'ñe pocsheñeshocmañen es apa'yets ñocop

¹ Ñaña ñeñtcha' sapchen alloch seyepue' masheñnesha' ñeñt atarr es pallta'yetsa Jerusaléño, napa' neñotenes ama sepallteno o'ch alla noctape'chaterrser necartot ñeñtcha' atet sepa. ² Tarro'mar napa' neñotenes ñeñtpa' atet atarr semnen sa. Ñeñto'marña arr Macedonio chocma noteñ macedonio'marnesha' sapa' chocma semneñ o'ch es sapa'yes añecop ñeñt atarr es pallta'yetsa. Ñeñto'marña napa' e'ñe nocsheñeshocmañen neñotateñ macedonio'marnesha' ñeñt atet sepensa sa ñeñtes acayo'marneshas ñeñfarasa corinto'marneshas. Ñehua, napa' o' neñotatanet atto ahuaña charo sapa' semneñeñ o'ch e'ñe sa'pocstat attoch es sapa'yes ñeñt atarr es pallta'yetsa. Atto sapa' atarr semneñ o'ch seyepue' ñeñt atarr es pallta'yetsa, ñeñto'marña all Macedoniotpa'cho'ña te'pa' eñall shonte' ñeñt muenets o'ch es apa'yenet ñamet. ³ Tarraña ama't napa' neñotenes atarr semneñeñ o'ch seyepue' ñeñt atarr es pallta'yetsa, ñeñto'marña napa' o'ch nemñonas añ masheñnesha' ñeñtcha' otatsa. Ñetpa' o'ch yenposset attoch sapcha' añecop ñeñt es pallta'yetsa. Allochñapa' ñerra'm e'ñe cohuen sañño'tue, attochña eñotaset ñeñt e'ñe cohuen notenanet socop, ñeñtpa' e'ñe po'ño'ch atet sepohuena. ⁴ Allochñapa' ñerra'm esempo nechap naña sesho epan ñaña masheñnesha'chno macedonio'marnesha' ñerra'm yentoses ama sapchatueña', allempoña yapa' chate' parrocmayepencna'tatanna'ta. Allempoña e'ñete' orrena neyemtensa. ⁵ Ñeñto'marña napa' añ poc'te' nenten o'ch noch po'psheñeñ masheñnesha' ñetpa' otetepa' ñanmacmuet, ñeñtcha' sabcherraya' attoch ñetpa' o'ch yenposset attoch e'ñe sapcha'hua ñeñt semnen sa o'ch e'ñe saphue ñeñt es pallta'yetsa Jerusaléño, ñeñt atet sot ahuatoteñ. Tarro'mar napa' e'ñe poc'te' nenteñ sa e'ñe semneñño'e'ñe'ch señmañesha' es sapa'yes ñeñt atarr es pallta'yetsa. Amachña cha es enamare'tyenseto attoch es sapuenanet.

⁶ Chocmach seyerpuena añ ñoñets, ñeñtpa' atet oten: Ñerra'm ya atarr coñe't es yapa'yen Yomporecop, yapa'cho'ña o'ch alla yaguërr ñeñt atarr coñe't. Ñerra'm atarr aton es yapa'yen Yomporecop, yapa'cho'ña o'ch alla yaguërr ñeñt atarr aton. Ñehua, ñato' o'ch netma'ntacha atet ñerra'mrate' cho yenare'tatse'ten ya'mro. Ñerra'm atarr coñe't yenare'tatse'tpa' atarrcha' coñe't ya'yapa'cherr ñerra'm esempo po'nen. Ñerra'm atarr aton yenare'tatse'tpa' atarrcha' aton ya'yapa'cherr ñerra'm esempo po'nen. ⁷ Ñaña añ poc'tetsa e'ñe puesheña'ttsoy o'ch yapa'yen e'ñe allpon ñeñt poc'te' yentyen e'ñe ya yeyo'chro. Amachña yempaño'ta es yapa'yeno ñaña amachña puenamare'teño'teta es yapuenaneto. Tarro'mar Yomporpa' añña atarr morrentena ñeñt e'ñe pocsheñeshocmañen es apa'yets. ⁸ Ñaña Yomporpa' shonte' esocmañen echen ñeñtcha' apuerres allochñapa' attoch chocma sechencha' shonte' ñeñt atarr cohuen socop, ñaña sechencha' shonte' attoch seyepuen pa'namenot ñeñt cohuentesa Yomporecop. ⁹ Añpa' ñeñt atet oten Yompor po'ñoñ ñeñt anuaret ahuatoteñ, ñeñtpa' atet oten:

Ñeñt atarr es apuene' huocchañnesha' ama't ahuatapa' amach ap-sare'tterro ñeñt atto e'ñe cohuen es pen.

¹⁰ Yomporpa' apuenescha' shonte' esocmañen allochñapa' attoch ÷hocma sechencha' shonte' attoch seyenpuenanet pa'namenot ñeñt cohuentetsa Yomporecop. Ñaña ñapa' allo'nach sen es sapuene' pa'namen allochñapa' allo'nach sesen yenpuene' pa'namenot ñeñt cohuentetsa Yomporecop. Ñeñtpa' ñerra'm netma'ntacha ñato' o'ch not: Ñeñtara Yompor ñeñt yapuene' puerets ñeñtcha' yenare'ten o'ch ÷hap allempo po'nenpa' allempochña yeyoren ñeñtcha' yerrar yepen, ñeñtpa' Yomporña a'torene' attoch ya'yapa'cheñ o'ch yeshonteñ.

¹¹ Attochña sapa' sechencha' allohuen shonte' esocmañen allochñapa' attochña shonte'ch esocmañen sapa'yeñ ñeñt es pa'namen pallta'yetsa. Ñerra'mña atet se'papa' yañapa' yach aphuerrahuet attochña ñetpa' ÷hore'teñet Yompor o'ch ochet "Parasyos Nompore, ÷a yapuene' ora allohuen." ¹² Ñerra'm atetcha' sepena es apa'yese' masheñnesha' ñeñt ame'ñetsa, ama e'ñe añecpa sherbeno attoch es sapuenanet ñeñt palltenet. Añecpa'ñaña sherben attoch ñetpa'÷ho'ña atarrcha' ÷hore'chet Yompor o'ch ochet: "Parasyos Nompore, ÷a yapatene' ñeñt allpon yepalltena." ¹³ Ñaña attoña ñetpa' aye'chochtateññañetcha' Yompor, tarro'mar o'ch eñotenset sapa' po'ño'ch attera same'ñeññaña Cristo po'ñoñ. Tarro'mare'ñaña ñetpa' aye'chochtateññañetcha' Yompor, atto sapa' sapuenanet pa'namen ñeñt allpon palltenet ñet, ñaña po'potantañecop. ¹⁴ E'ñech pueyerpueño'tetas sapa' ñetpa' atarrcha' nanac ÷hore'tatonaset Yompor, tarro'mar sapa' o'ch sorrtatanet Yompor puemuereña allo atarr muerenya. ¹⁵ Yeparasyoso'chepa'ch Yompor tarro'mar ña yapuene' Puechemer, ñesho'ña huena ora muereñets ñeñt atarr co'chñeshare'. Ama't yemneñeñ o'ch ya'ye'chochtatue e'ñe poctacma, tarraña ya arromña'teypa' amach errot yepe, ñaña ama yeno yeñoñ attoch ya'ye'chochtatuoñ e'ñe poctacma ñeñt atet yocshena yeyo'chro.

10

Atto Pablopa' eñotatan corinto'marnesha' ñapa' e'ñe po'ño'ch allsensaret Yomporeshot

¹⁻² Ñehua, te'pa' na Pablon o'ch alla noctape'chaterrser e'ñe nemuereño'tes atten ñerra'm Cristo ñeñt nanac amuerañtostsa. Puemuereño'tey ya ñapa' e'ñe pocte' eñche't o'ch atet enteñet ñerra'm ñapa' ama esoshe'mayaye. Ñehua, sapa' patanta'ttsospa' attach sentenen ama errot notenso atsrre'mo'chen ñerra'm esempo allo'tsenen sesho. Tarraña ñerra'm esempo allaparo'tsenen, allempo nequellquennas cartapa' allempoña sapa' atet sentenen ñerra'mrate' ama ÷hoye' neñcha'tenso ama't e'ñe mamesha, e'ñech eche'çharr notenes necartot. Tarraña ñeñtpa' ama atteyaye. Ama't allempo allo'tsenen sesho, ñerra'm nemneñeñ atet ne'ñoronasapa' e'ñete' eche'çharr ne'ñorennasa. Ñeño'marña te'pa' e'ñe neyo'chrocmañen o'ch notas, soctape'cherr cohuen e'ñe tayecma allochñapa' ñerra'm esempo'ch ne'cherr seshopa' amach ÷ha se'ñoratno eche'çharr. Tarro'mar ñerra'm ama soctape'cherr cohuen, po'ño'ch ñerra'm esempo ne'cherr seshopa' ÷hach se'ñoraten eche'çharr, ñeñtes notene' napa' e'ño' ñañeña noctapño' atet es

neṗatse'tyen ñeñt atet ṗa'yena acheñenesha' arr patsro, ñeñtpa' e'ñe ñocueta sherben. Tarraña napa' ama atteye' nepeno. ³ Ñehua, ama't napa' nocrrena arr patsro atet yocrrena allohueney acheñey tarraña ñeñt atet nema'yochrena Yomporecop, ñeñtpa' ama atteyaye ñeñt atet ma'yochrena acheñenesha' arr patsro. ⁴ Tarro'mar ñeñt atet yema'yochrena Yomporecoppa' ñeñtpa' ama añeyaye ñeñt atet yoctape'chen ya acheñey arr patsro. Añña atto yema'yochrena ñocop, e'ñe ña po'huamencot atet yepena. Attochña yehuapore'toñ allohuen ñeñt epatare'tene' Yompor poctaṗña. ⁵ Ñaña allohuen serrparñatsochno ñeñtña epatare'tene' Yompor po'ñoñ ñeñtcha'ña yehuapore'tua. Ñaña allohuen cotapñatsochno atto nanac ommo'chenet, ñeñtña ama muenatenahueto attoch enteret Yompor, ñeñtpa'cho'ña Yomporcha'ña po'huamencot o'ch yehuapore'tue. Ñaña ñeñt allpon yoctape'chyen arr patsro ñeñtña atpare'tatene' Yompor poctaṗña, ñeñtcha'ña ya'meta'huerr Cristesho, allochñapa' attochña Cristopa' o'ch ame'ñatera. ⁶ Ñaña ñerra'm o' alla name'ñatuerrsa e'ñe cohuen, tarraña ñerra'm esesha' ora atpare'tetsa, napa' e'ñe pocte' nenteñ o'ch yecoñchach ñeñt atet atpare'tetsa.

⁷ Sapa' aña cohuen senten ñeñt allpon sentyen seclloyot. Ñerra'm esesha' entetsa atet ñapa' Cristo mueñene', ñeñt acheñerpa' eñocheṗa' napa'cho'ña Cristoña nemñene'. ⁸ Ama't atarr natontaten neñoñ atto alla noterrserr napa' Cristo puellsensaren, tarraña napa' ama choye' neyllateno neñoñ attoch nepenca. Tarro'mar atto llesensa'n Yepartse-shar Cristopa' ñeñtpa' añecopña attoch neyenpas attoch allo'na sesen huomenc ṗa'nmue' seyoçher Yomporecop. Ñeñtpa' ama añecpayaye alloch na'puerrataterres ñeñt atto same'ñena. ⁹ Napa' ama nemno o'ch añcha'noçhen sentenen e'ñe necartota. ¹⁰ Tarro'mar patanta'ttsos atet sentennan necarta ñerra'mrrate' atarr eche'charroṗ es notenes ñeñt atarr echarr senten. Ñaña ñerra'm esempo allo'tsenen sesho sapa' ama ahuamencatoyenaye' sentenno ama't mamesha, ñaña atto neser-ppare'tatenespa' ama't e'ñe mameshapa' ama asherbenaye' senteñe. ¹¹ Tarraña acheñenesha' ñeñt atet otetspa' eñochetepa'ch ñerra'm erroṗ notas necartot ama't atarr allaṗaro'tsenen atetcha'cho' po'ñoçh nepennas ñerra'm esempoch neçherr sesho.

Atto Yomporpa' ama pocteye' entenano acheñenesha' o'ch cohuen entenet e'ñe ñañeñeta

¹² Napa' ama't mameshapa' ama nemno o'ch sentenen napa'cho'ña ñato' attente' ñeñt atet pena po'potantañ ñeñt atarr cohuen eñosyets e'ñe ñocueta. Napa' ama nemno o'ch not napa' e'ñe attecma nepena atet penet ñet. Tarro'mar ñeñt atet penet ñetpa' ama cohuenayaye. Ñetpa' e'ñe ñañeñeta poctaṗñetpa' coshapretannenet e'ñe ñagattseta. E'ñe ñañeñeta poctaṗñetpa' cohuen entapretanna'tyenet, ñeñtpa' atfa otatse'tyenet. ¹³ Tarro'mar yapa' ama yoyaye yoctaṗña ñeñt atarr yocshapretannena. Añña Yompor poctaṗña ñeñtpa' allohua onañchareṗ yocop ñeñtcha' e'ñe cohuen yocshapretannena. Ñaña Yompor poctaṗña ñeñt atet onañchennaypa' ñeñtpa' añecpa'ñaña sherben attoch yeçhapatonas Yompor po'ñoñ e'ñe seshohuen ñeñtes corinto'marneshas. ¹⁴ Ñeñto'marña yapa' ama cho yatontateññañe

Yompor poctaþña tarro'mar ñeñt allpon onañchennay, ñeñtþa' e'ñech allohua yetorrena ñocop. Ñeñtþa' añeþpa'naña sherben attoch yeþhapat Yompor po'ñoñ ama't seshohuen. Ñeñto'marña ya ahuatþa' yanom þhapate' Yompor po'ñoñ sesho ñeñtara añ cohuen ñoñets alloch yequeshperra e'ñe yame'ñeñoþa Cristo. ¹⁵ Ñaña ya e'ñe yocoppa' ama yemno o'ch yommo'choña po'psheñeñ po'taruas ñeñt ñanom torratsa all Yomporecop. Tarraña yapa' yecuenes ñerra'm esempo sa o'ch allo'na sesen ame'ñetsa cohuenpa' allempoña napa' noctape'chen ellonet o'ch alla netorrera sesho. ¹⁶ Attochña ama't allpon anetsoþno ñeñt allemeñ allo'tsa'yen ellonet seshoþa' allña nesechena ñaña allcha'ña neserrpare'tatyesosanet Yompor po'ñoñ, ñeñtara cohuen ñoñets alloch yequeshperra. Nemneñ o'ch na'potoñ Yompor po'ñoñ all ama aserrpare'tatareñteta' allochñaþa' amach þha nommo'choñe po'psheñeñ po'taruas ñeñt ñanom serrpare'tats all.

¹⁷ Ñerra'm esesha' muenetseñ o'ch e'ñe cohuen eños puesheñarrocop tarraña ñeñtþa' Yomporecopcha'ña e'ñe cohuen eñen. ¹⁸ Tarro'mar añ acheñer ñeñt eñoretsa e'ñe cohuen ñocpapa' ñeñtþa' ama pocteye' enteñe Yompor. Tarraña ama't erra'tsena acheñer Yomporcha' eñosets cohuen ñocop, ñeñtña e'ñe pocte' enten ña.

11

Atto ommoñañatesha'pa' ahuo't shequënan corinto'marnesha' ñetpa' allsensareteto'

¹ Napa' atarr nemneñ o'ch se'mñoton atto þha muene' atta es notatse'tyen. Po'ñoch o'ch notas, se'mñoton ñeñt atet es notatse'tyen, allochñaþa' attoch neñotatas ñeñt atet noctape'chen. ² Tarro'mar napa' atarr necuenes atet ñerra'm Yompor ña secuene'. Tarro'mar napa' añ no'patatensa Cristo attoch allohuenes o'ch e'ñe napuas poctacma. Atto o'patatare'tes, napa' o'ch necuenes attoch amach yoratstaso po'psheñeñ. Ñehua, o'ch netma'ntatasa atet ñerra'mrrate' puesheñarr yacma ñeñt esñeñ. Po'seññaþa' o'ch o'patacha puesheñarr yacma ñeñtcha' puerrollar þa'. Ñapa' o'ch cohuanþenan po'señ e'ñe cohuen tarrempohuach esempoch huapa ñeñt o'patenaya allempochña pomañña po'señ ñeñt ama a'þllareteyaye. Ñeñto'marña napa' e'ñe atet nentenes ñerra'mrrate' nesñenesha' nepenes attoch napuas Cristo ñeñt atet ñerra'mrrate' ñeñtcha' e'ñe serrollar seþa' ñapueñ. ³ Tarraña napa' þha sellcatenen. Napa' noten sapa' o'te' þha semnatena o'ch shecaset saña, atet þa ahuat shecheþ allempo shecan Eva tarro'mar ñeñt shecheþpa' atarr etsotenan shequëñets. Ñerra'm sapa'cho'ña puesheñeñetaspaspa' añach yeþhatenset ñeñt ama cohuenayaye cotapñats, ñeñto'marña o'huañcha' allo'na sesen ame'ñenaya Cristo ñapueñ ñeñt e'ñe cohuen. ⁴ Tarro'mar sapa' ñerra'm esempo huena po'potantañ sesho, ama't serrpare'tatensetañ ñeñt atet pe't Jesús tarraña ñeñtþa' ama atteyaye ñeñt atet yeyþhatuas ya ahuañmo'cha, sañaþa' eso'mare'tña allorocma e'ñe socsheñesha' same'ñeña. Ama't serrpare'tatenset po'poñ cotapñats ñeñtþa' ama añeyaye Yompor poctaþña, sañaþa' allorocma'tña e'ñe pocte' senteñ o'ch same'ñya. Ama't serrpare'tatensetañ po'poñ ñoñets alloch sequeshperrañ, ñeñtþa' ama añeyaye ñeñt e'ñe cohuen ñoñets

ñeñt same'ña'hua ahuañmo'cha, tarraña sañapa' e'ñe't pocte' senteñ o'ch ame'ñataset po'poñ ñoñets. ⁵ Ñaña ñetpa' atta ommo'chenet allsensareteto' Yomporeshot, ñetpa' atarro' sherbenet. Tarraña napa' elloña atarr asherben nentena. ⁶ Ama't napa' ama ay'chatareñeno atoch neserrpare't coçhneshare' ñoñets tarraña napa' e'ñe neñotueññañ Yompor po'ñoñ. Sapa' señotenen ñeñt atet notenes ñeñt'pa' e'ñe po'ñoçh atet tarro'mar shonte' pa'namen norrtatyen erracmañen ñeñña e'ñe señotatene'.

⁷ Ñehua, sapa' amate' pocteye' sentenno tarro'mar ama't ahuañmo'chapa' ama çoye' necobraso atto neserrpare'tatensa' Yompor po'ñoñ ñeñt alloch yequeshperra. Ñato' amate' asherbenaye' sentenno atto ama necobraso. Tarraña ñeñt'pa' añecop sherben atoch sapa' o'ch tantaterres Yompor sosya'tsañoç allochñapa' o'ch puechemer perres saña. ⁸ Ñehua, po'poñ anetso all ap'cha'yenet pame'ñeñoçet Yompor, na errotenopa' çhocma naguënanet ñeñt allpon muenenet o'ch tsa'tnet e'ñe ñet poctap'ñoçet. Ñeñto'marña ama pallteno o'ch setsa'tna saña atto neserrpare'tatenes. Ñeñt napa' atet nenteñ ñerra'mrrate' po'poñ anetso all ap'cha'yenet pame'ñeñoçet Yompor, napa' ahuo't neprratam'psanet ñet atoch nesherbas sa. ⁹ Ahuañmo'cha allempo na'posa seshopa' ñerra'm esempo nanac es nepalltena, sapa' ama't puesheñarrotesapa' ama na'tsrre'moçhtana'taso es senamare'te' ñeñt nepalltena. Tarraña allempo atarr es nepalltenapa' o' huaçha'ta masheñnesha' Macedoniot, ñetñapa' o' aposnet allpon ñeñt atarr nepalltena. Attoña allponmat na'puena sesho ahuañmo'cha, napa' ama't mameshapa' ama nemno o'ch na'tsrre'moçhtana'tasa ama't e'ñe puesheñarrotesa. Ñaña napa' çhocmach atet nepena. ¹⁰ Napa' neñotena Cristopa' entenen e'ñe po'ñoçh cohuen ñeñt atet nepena, ñeñto'marña napa' ama't eseshapa' amate' errotenot queçhpatatnetoña atto e'ñe cohuen neserrpare'teññañ Yompor po'ñoñ e'ñe atta ñeñt allo atarr nocshena, ama't errap'aren nesen Acayo'mar. ¹¹ ¿Eso'marte'ña atet notenes? ¿Ama't señoeteñe? Çhate' sotenapañ amate' nemorrentenso. Tarraña ñeñt'pa' ama atteyaye. Yomporña nentene' atarrca'ye nemorrentensa.

¹² Napa' çhocmach atet nepena amach necobrenso ñeñt atet pena po'potantañ ñeñt pommo'cheñoçeta serrpare'tatyenset. Allochña ñetpa' amach errotenoç otneto napa'çho'ña ahuo' na'tsrre'moçhtana'ch naña acheñnesha' atet penet ñet. Tarro'mar napa' ama pocteye' nenteñe o'ch otet e'ño' attecma yetorrena Yomporcop. ¹³ Tarro'mar ñeñt atet acheñpa' ama Yomporreye' llesensenaye, ñetpa' aña po'taruas penet shequëñets atoch ganenet e'ñe atta. Atta mueneñet o'ch po'poñetet ahuo'ch orrtet atet ñerra'm Cristo puellsensar. ¹⁴⁻¹⁵ Ñehua, yapa' yeñoteñ oneñe'tpa' çhocma atet pena ñaña o'ch po'poñet attotcha' shequëney. Oneñe'tpa' çhocma orrtatennay ñeñt'cha' cohuen yenten ya, o'ch ortatennay atet ñerra'mrrate' ñapa' Yompor po'puetarenñoç amñareç ñeñt atarr cohuen. Ñeñto'marña yeñoteñ oneñe't pueyochresha' ñeñt torretsa ñocoppa' ñetpa'çho'ña atarrcha' ashcañareret, mueneñet o'ch po'poñetet attotcha' orrtenet atet ñerra'm añ acheñer ñeñt e'ñe po'ñoçh torretsa Yomporcop. Tarraña ñeñt atet petsapa' añ o'patenahuet coñcheñets ñeñt poctetsa añecop ñeñt atet patse'tyetsa.

Atto Pablopa' pa'namenot muerochtateñet e'ñe pame'ñeñoi Cristo

16 Ñehua, te'pa' o'ch alla noterrser. Amach sentatsetno napa' attate' notatsetyen. Ñehua, ama't sentenen atet ñerra'm otatsñañenpa' notatseteñoñapa' se'mñoten. Tarro'mar napa'cho'ña o'ch e'ñe cohuen neños ñeñt e'ñe nocpa atet ñerra'mrrate' cho nommo'chena mame'. 17 Ñehua, ñeñt atet notenes te'pa' ama cohuenayaye tarro'mar ama añecpaye' llesensa'noña Yepartseshar o'ch e'ñe cohuen neñen ñeñt e'ñe nocpa. Te'pa' e'ñe na notatseteñoi e'ñe cohuen neñen ñeñt e'ñe nocpa atet ñerra'mrrate' cho nommo'chena. Tarraña ñeñt atet notenes neñoteñ ñeñtpa' e'ñe po'noch netsotueñ. 18 Atto shonte' po'potantañ ommo'chyenet ñeñt atet etsotenet ñet arr patsro, napa'cho'ña o'ch neñosatsetapretyesamet atet ñerra'mrrate' cho nommo'chapretyenamet. 19 Sapa' e'ñe atet sentena sañeña atarro' es señoten ñeñto'marña e'ñe pocte' senteñ o'ch se'mñoteññañ ama't otatsñañ ñeñt atto ommo'chena. 20 Ama't ñet atto pomnaren penset, sañapa' e'ñech pocte' senteñ. Ama't es puerratañpsaset ñeñt allpon sechyen, sañapa' e'ñech pocte' senteñ. Ama't pa'namenot shecare'tenset, sañapa' e'ñech pocte' senteñ. Ama't atarr puetsena'teñoftaspa' sañapa' e'ñech pomnaren sepatena. Ñerra'm esempo ama't cho taclapechenset, sañapa' e'ñech pocte' senteñ atto atarr pencna'ntatenset. 21 Napa' ama nepenqueñofoeye' notenso, napa' ama nemno nehuamencotpa' o'ch pomnaren nepenes, atet penes po'potantañ.

Ñehua, tarraña ama't errotenote' ommo'chyenetpa' napa'cho'ña o'ch atet neñosatsetapretyesamet. Notatseteñoñpa' chach nottena atet ñerra'mrrate' cho nommo'chapreteña ommoñañenesha'. 22 Ñetpa' pommo'cheñoftetpa' otenet ñetpa' hebreonesheto'. Ñehua, napa'cho'ña o'ch notas, hebreoneshan naña. Ñetpa' pommo'cheñoftet otenet israelena'tareto'. Ñehua, napa'cho'ña o'ch notas israelena'taren naña. Ñaña ñetpa' otenet po'mrenñaneto' yatañ Abraham. Ñehua, napa'cho'ña po'mrenñen yatañ Abraham. 23 Ñetpa' pommo'cheñoftet otenet ñetpa' atarro' torrenet Cristocop. Ñehua, napa'cho'ña elloña atarr nanac netorrena Cristocop. Ama't e'ñe notatseteñoña noten, ñeñtpa' e'ñe po'ñoch atet. Ama't allpon torrenet ñet, elloña napa' atarr nanac netorrena na. Ñaña ama't allpon amuerochtataretetyenet ñet elloña napa' atarr nanac amuerochtatareten. Allpon ayottamñsareten all coñchatennet, ñeñtpa'cho'ña nanac atonoche'tats. Ñaña allpon ashtennetpa' ñeñtpa'cho'ña atarr nanac atonoche'tats. Ñaña ñeñt allpon autsanchar' rromuetseñ, ñeñtpa'cho'ña atarr nanac atonoche'tats. 24 Ñaña judionesha' e'ñe pue'moñe'teñoftetan napa' atet ashtennet e'ñe amnaroche'tats. Allempoña ashtennetpa' ma'poch charra' puechena escon ñeñt atto pacapacatspennet. 25 Ñaña ellonetpa' o'chcho' alla nallerrneterr ñaña tsachpo, e'ñe ma'poche'ttsoema nallennet. Po'pocheño'cho'ña parrochpa' o'cho' alla rrolle'terrneterr. Po'pocheño'cho'ña allempo nesen noñto sapo'marpa' alla nepotamñperrerr ma'poche'ttsoema. Allempopa' alla narepen alla nellapan oño enopa'rrtatsa. 26 Napa' chocma nechopeñe'chyen ellapar allo'tsa'yen pa'namen ñeñt atarr añcha'nochenare', atet

ñerra'm allempo netam̄pena noñto oño'mar, ñaña allempo neçhap all am̄cha'noçhtena eñeteçhno, ñaña allempo am̄cha'noçhtana'tenen namo'tsesha' ñaña po'poñ acheñ ñeñt̄ ama judioneshayaye. Ñaña ñeñt̄ am̄cha'noçhetyetsa all anetso'mar, ñaña ñeñt̄ am̄cha'noçhetyetsa all puetsato'mar, ñaña ñeñt̄ am̄cha'noçhetyetsa all oño'mar. Ñaña ñeñt̄ atto am̄cha'noçhtena po'potantañ ama't otenetañ masheñpa' tarraña ama masheñeyayeto, ñetpa' ama ame'ñeñeto Yompor. ²⁷ Elloña çhocma atarr netaruasen, ñaña shonte' ñeñt̄ atarr echarr nentyen. Ñaña atonoche'tats atarr nanac na'huanten nemoñ torratsa Yomporecop. Ñaña epaye' nemueroçhtena nachporrñoñ, ñaña no'ñpañoñ tarro'mar ama eñalle ñeñt̄cha' nerren ñaña ñeñt̄cha' norren. Ñaña epaye' mueroçhtatenen senet tarro'mar ama eñalle neshtam ñeñt̄cha' nechorra, o' e'ñe neptsapesua.

²⁸ Ñaña ellonet napa' çhocma nellquëña ñeñt̄ pame'ñeñoñet allemeñ apçha'yetsa. Napa' añe'naña çhocma nellcatene' ñeñt̄ atarr torrapo' nentyen pa'namen. ²⁹ Ama't erra'tsena acheñer ñerra'm ama huomencaye' penano pueyoçher Yomporecop, nañapa' atarrcha' nellcapreteña. Ñeñt̄ña atet nellcapreteña nañapa' o'ch atet ne'muen neyoçhro ñerra'mrrate' o'huañ huomenc nepa' neyoçher Yomporecop. Ñaña ama't erra'tsena acheñer ñerra'm o'ch a'puerratateret o'ch atet perran ñeñt̄ ama pocteye' enteno Yompor, ñaña nepencapreteñoñpa' ama't mameshapa' amach pocteye' nenteñe. ³⁰ Ñato' te'pa' o'ch noterrser po'poñoneñ cotaññats. Sapa' po'ñoçh señosatse'tatyenen cohuen ñeñt̄ e'ñe nocpa. Añña cohuen nenten attoch neños cohuen ñeñt̄ e'ñe nocpa, ñeñt̄pa' atto ama ahuamencatoyenaye' entenno acheñenesha'. ³¹ Yomporpa' eñotenen ñeñt̄ atet notenes, ñeñt̄pa' ama shequëñtsoyaye. Ñeñt̄ara Yompor ñeñt̄ Pompore pen ñaña Yepartseshar Jesucristo ñeñt̄cha'ña ya'ye'choçhtaterr tayoteñ errponohuañen. ³² Ñehua, napa' o'ch neyerpatasa atet apareten ahuañmo'cha allempo Damasco'tsenen. Ñehua, ñeñt̄ am̄cha'taretatset̄ all Damasco, ñeñt̄pa' ñeñt̄ara am̄cha'taret Aretas pueyoçhresha'. Ñeñt̄ña nene'ña guardianesha' ñeñt̄ camretsa allemeñ yetarroñ. Ñetpa' añecop camrenet attoch rroma'netañpa' o'ch yottam̄pesnetañ allcha' coñchatnetañ. ³³ Tarraña napa' arr esha'tnet cañtro attoña çha'nmaterrnet ventanoñ allotña a'suatañperrnet conçhtot. Attoña e'ñe cohuen nequeshperra, ñeñto'marña ama eshcaye' rroma'ñoña guardia.

12

Atto Pablopa' a'tapataretta Yompor pue'ntañño ñeñt̄ e'ñe poma'ptañoñhua

¹ Ñeñt̄ atto señosatse'tatyenen e'ñe cohuen nocpa, ñeñt̄pa' ama es sherbeno. Tarraña ama't atteñpa' o'ch alla neserrpare'taterrser atto Yepartseshar ñaña es negatyene' ñeñt̄ña es neñotatyene'. ²⁻³ Ñehua, napa' neñoteñ na pueheñarrana ñeñt̄en ame'ñenaya Cristo te'pa' o' met çharra' puechena pa'tats char, allempoña napa' a'tapaten Yompor pue'ntañño ñeñt̄ e'ñe poma'ptañoñhua. Napa' ama neñoteñe, ñato' orate' nechso a'tapatareten, amapa' ñato' necamquëñoñate' a'tapatnet. Ñeñt̄pa' Yomporña eñotene'. Napa' e'ñe neñoteñ po'ñoçh a'tapatareten Yompor pue'ntañño all atarr nanac cosheñtso'tsa'yenet. ⁴ Ñoñets ñeñt̄ ne'muena'

allpa' ama aserrpare'teno tarro'mar ya arromñaŕey ama pocteyaye o'ch yeserrpare't allo. ⁵ Ñeñt atet aŕareteneñ allempo, ñeñtŕpa' e'ñe poctey o'ch cohuen neñoŕeñ e'ñe nocpa, tarraña amach atet neŕatsto, añachña nocshena atto ama ahuamencatoyenaye' entenno acheñenesha'. ⁶ Ñehua, ñeñt atet aŕareteneñ allempo ñeñtŕpa' e'ñe poctey o'ch cohuen neñoŕeñ e'ñe nocop, ñeñtŕpa' ama čhoye' notatse'teno, tarro'mar ñeñtŕpa' e'ñe po'ñočh atet aŕareten. Tarraña napa' ama nemno o'ch cohuen neños e'ñe nocpa. Añachña nemnen ñeñtŕcha' cohuen entapretennet ñeñt e'ñe allpona entapretennet ñeñt atet es neŕa'yen cohuen ñaña ñeñt e'ñe allpona e'ñeñotapretennet ñeñt atet e'ñe cohuen neserrpare'ten.

⁷ Atto Yepartseshar ñaña es negatyene' ñeñtña es neñotatyene' ñeñtŕpa' atarr cohuen nanac yenteñ. Tarraña napa' attoch amach nocsheno e'ñe nañeñapa' Yomporña nemnatene' e'ñe nechtso ñeñtña atarr nemueročhtatame'tene' nanac. Ñeñt atto nanac nemueročhtena, napa' atet nenteñ ñerra'mrrate' aj nechtsotamŕpena ñeñtŕpa' oneñešhotña huenana ñeñtña atarr atserr nepene'. Attoña Yomporpa' ama muenatenno o'ch nocshena e'ñe nañeña. ⁸ Napa' o' ma'poche'tats nenamueñ Yompor a'huañamŕperrnepa' ñeñt atarr nemueročhtatene'. ⁹ Tarraña ñapa' ahuo't otenen: "Amach na'huañamŕpsatsterrpe, tarraña napa' atta čhocma atarr nemuerenŕa, ŕapa' ñeñtña pepalltena. Tarro'mar ñeñt ama eñalle e'ñe ña po'huamencpa' ñeñtŕcha'ña orrtatene' na nehuamenc." Ñeñtŕpa' atet otenen Yompor. Ñeñto'marña atto napa' ama eñalle e'ñe na nehuamenc, ñeñtŕpa' ñeñtña atarr nocshatene' na, tarro'mar neñoteñ ñerra'm attenpa' Cristo po'huamencña ñeñt nechorrenaya; ñeñtña norrtatenpa', ama noyaye nehuamenc, ñeñtŕpa' Cristo. ¹⁰ Ñeñto'marña napa' añ atarr nocshatene' atto napa' ama ahuamencatoyenayayno ñaña atto atarr pencna'ntatennet tarro'mar ama esoye' entenneto. Ñaña napa' añña nocshatene' ñeñt allpon atarr echarrare' nentyen, ñaña atto čhocmach coŕare'tennet, ñaña ama't allpon ñeñt nehuenoya ñeñtña atarr nocshatene'. E'ñe pocte' nenteñ o'ch nemueročhta Cristocop. Tarro'mar neñoteñ ñerra'm esempo ama ahuamencatoyenaye' yenteno e'ñe ya, allempoña Cristopa' ahuamencat peney.

Atto Pablopa' atarr llequēnana corinto'marnesha' ñeñt ame'netsa

¹¹ Sapa' atto señoŕatse'tatyenen e'ñe cohuen ñeñt e'ñe nocpa, tarraña ama't atteñpa' napa' e'ñe po'ñočh notatse'tyen, tarro'mar napa' ama nepallteno o'ch neños e'ñe cohuen ñeñt e'ñe nocpa. Añña palltetsa sa o'ch señoŕapreten cohuen ñeñt e'ñe nocpa. Tarro'mar sapa' señoŕatenen atarr asherboyenen. Ama't po'potantañ ñeñt atarr se'ñeñotatene' atarr ommo'chenetañ, ñetpa' allsensareteto' Yomporeshot, ñetpa' atarro' nanac sherbenet, elloña napa' atarr asherben entenen Yompor, ama't napa' ama esoye' nenteno. ¹² Tarro'mar ahuañmo'cha allempo na'puena sesho, napa' allña norrtatyesonas Yompor po'huamenc ñeñt atarr echarrare' ñeñt sapa' ama't ahuatapa' ama sentare ñeñtŕcha'ña señoŕate' ñeñtŕpa' Parets po'huamenc ñaña ñeñtŕcha' señoŕate' napa' po'ñočh Yomporña nellensene'. Ñeñto'marña e'ñe cohuen na'huantennas ñeñt atarr torrapo' sentyen. ¹³ Attecma es norrtatyennas ñeñt atet neŕa'yen po'potantañ ñeñt pame'ñeñoŕet apčha'yetsa allemeñ anetso'mar. Añña ama na'tsrre'močhtana'taso es senamare'tyese'. Tarraña ñerra'm

ama pocteye' sentono ñeñt' cohuenare' neponaspa', ñehua, ñato' o'ch seporetnerren.

¹⁴ Te'pa' poma'pocheño'pa' o'ch ahuerrnerr sesho. Attecma neponuerrerr, amach na'tsrre'moçhtana'taso es senamare'te' ñeñt' nepalltena na. Tarro'mar napa' ama aÑeye' ne'нено ñeñt'cha' es sapuen na; napa' añña nemnen o'ch sepomhua sañña Cristesho. Tarro'mar napa' atet nentenes ñerra'mrrate' po'ñoçh e'Ñe nechemer nepenes. Ñehua, cheshaneshapa' ama aÑeye' pallteneto o'ch es a'yapaçhet ñeñt'cha' añño'tet pamo'mtayecop. Añña nanac pallteta, pamo'mte'chña es a'yapaçhets ñeñt' puechemereshacop. ¹⁵ Ñeñto'marña e'Ñe nocsheñsha' o'ch nepomhua e'Ñe nañña ñeñt'pa' e'Ñech socop. Allochña'pa' attoch sequeshperra saña. Ñaña allpon nechyen, e'Ñe nocsheñsha'pa' o'ch nepomyeñ e'Ñe socop. Ama't napa' elloña atarr nemorrentensa saña'pa' o'huañ e'Ñeye' semorrentenna na.

¹⁶ Sapa' señotenen napa' ama na'tsrre'moçhtana'taso es senamare'te' ñeñt' e'Ñe nocop. Tarraña sapa' çhate' sotenapañ napa' atarrte' neñoteñ attoch neshcare'tas ñeñt' e'Ñe po'poñe'ttsoçma shecare'teñets. ¹⁷ Ñeñt' nemña ahuañmo'cha epsheña sesho, çhate' sotenapañ ñeñt'pa' tarrecpate' attoch shecare'taset. ¹⁸ Ñehua, na te'pa' o' nesechach masheñ Tito ñeñt'cha' tatsa sesho, epuet po'psheñeñ masheñ o' nemñanet epsheño'maret sesho. Sapa' çhate' sotenapañ masheñ Titopa' o'ch shecare'tensa'. Ama't señoteñña yapa' atecma cohuen yoçtape'chen yeyoçro epan masheñ Tito ñaña atecma es yepa'yennas e'Ñe cohuen.

¹⁹ Sapa' çhate' sotenapañ añeçpate' neñen cohuen nocop allochña'pa' attoch o'ch alla cohuen sentuerren. Tarraña e'Ñe nemorrenteñotes masheñeshacha' ñaña noçhaneshacha' o'ch notas, ñeñt'pa' ama nocpayaye. Añeçopña notenes ñeñt' e'Ñe socop allochña'pa' o'ch alla huomenc seperr seyoçher Yomporecop. Napa' e'Ñe neyemteñoç Cristo, Yomporña'pa' entenen ñeñt' atet notenes. ²⁰ Tarro'mar e'Ñe nellquëñotes sa noten, ñato' esempo neçherr sesho, ñerra'm attera nentyesuerrerr ñeñt' atet sepatse'tyena, napa' ñeñt'cha'ña atarr nellcatuerrayerr sesho. Attoña ñerra'm sentapuerren nellquëñesha' neçherr seshopa' ñeñt'cha'ña sellcate' saña. Ñato' o'ch nentuerrerr attera se'moñe'tannena, attera es seye'chapretannena, attera sa'tsrre'mare'tatannena sañña attoch o'ch sa'nicha'taretta; ñato' attera sesasare'tanna'tyena, attera sa'metare'tam'psannena, ñaña e'Ñe puesheña'ttsos attera atarr cohuen sentena sañña, ñato' attera se'moñe'tanna'teño'tpa' seche'çhame'tanna'tyena. ²¹ Ñaña napa' nellquëñotes sa noten, ñerra'm esempo neçherrerr sesho po'pocheño'pa' ñato'rraña o'te' alla pencna'ntaterrnerr Yompor e'Ñe so'mara. Tarro'mar ñato' patanta'ttsos ama sequeçpueno ñeñt' ama pocteye' enteno Yompor ñeñt' atet seyçha'yen sa sosya'tsañeçno, ñaña atto seçhta'yeñ coyaneshaçno ñeñt' ama setaporeyaye, ñaña coyanesha'pa'çho'ña aguënan yacma ñeñt' ama puerrollareyaye, ñaña atto sayom'atse'tyena ñeñt' po'ñoçh ama atet apapahuoyaye. Ñato' attera sepatse'tyena atet sepe't ahuat ama llecatensoña so'çñar attoch soçtape'çherr etserra cohuen. Ñeñto'marña ñerra'm esempo neçherrerr sesho ñerra'm attera nentuerrerr, nellquëño'tpa' çhate' neya'na'tuerres.

13

E'ñe allohuanen atet cotape'chatyesnerranet pa'namen esocmañen

¹ Ñato' poma'pocheño o'ch alla ahuerrnerr sesho. Ñaña o'ch notas po'poñ, ñeñ' otteñe'charettetsa, ñerra'm epsheña a'metare'tampene' amapa' ma'psheña, allempopa' pocte' o'ch ye'mñoch ñato' po'ñochte' atet p'atse'tyena. ² Ahuañmo'cha allempo puepocheño necherr sesho, ñeñ' attera p'atse'tyetsa ñeñ' ama pocteyaye, napa' o' notuanet allempo ñeñ'cha' atet a'parettet ñerra'm atteretach. Ñehua, te'pa' necarto'pa' o'ch alla noterraneterr ñet, ama't e'ñe allohuenes o'ch notas, ñerra'm esempo necherrerr po'pocheño'pa' o'ch ne'ñotare'tuerres allohuenes ñeñ'fes attera p'atse'tyetsa. ³ Allochñapa' sapa' e'ñech seño'tuenen po'ño'ch nach eñorostsa ñeñ' atet muenatenen Cristo. Ñehua, ñeñ'pa' tarro'mar sapa' chocma senamuenen o'ch norrtatennasa' attoch seño'ten napa' po'ño'ch Cristo ne'ñoratene'. Ñaña Cristopa' e'ñe po'huamencotña chocmach erro'ten es p'a'yennas, ñaña atarr ahuamencat penes. ⁴ Ñehua, po'ño'ch yeñoteñ allempo corso'tam'pset Cristopa' ama ahuamencateye' enteñeto tarraña Pomporña e'ñe po'huamencot' alla tantater. Yapa'cho'ña atecma yeñotena ama ahuamencateye' yenteno ñerra'm ña, tarraña te'ña yapa' o' yocrrerra po'huamencot' Yompor attey ñerra'm ña. Attoña po'huamencot' Yompor e'ñe cohuen yesherbene's.

⁵ Te'pa' o'ch noterrerr, socoppa' añ poctetsa o'ch seño'ta sañeña, ¿po'ño'chte' same'ñena? O'ch seño'ta esheccha' seño'ch po'ño'chte' sapa' same'ñena. Ama't seño'teñe Jesucristoña sechorrenaya. Ñehua, ñerra'm po'ño'ch ama same'ñeño, amachña erro'tenot chorraso. ⁶ Tarraña napa' chocma necuene's o'ch chaponasa seyo'chro attochña seño'ten po'ño'ch napa' añ nellsensene' Yompor. ⁷ Napa' nema'yocheño'pa' chocma nenuamennas Yompor socop attoch amach allo'na atet se'patsto ñeñ' ama cohuenayaye Yomporecop. Ñeñ'pa' ama añecpayaye attoch sapa' o'ch seño'tenen napa' po'ño'ch allsensare'ten Yomporeshot. Añecopña nenuamennas Yompor socop attoch sapa' chocmach se'pa'yen ñeñ' cohuen enten Yompor, tarro'mar ñeñ'pa' ñeñ'ña e'ñe cohuentetsa Yomporecop. Ñeñ'pa' atetña nemnen socop ama't napa' atet sentennoñ atet ñerra'm'rate' ama allsensare'teno Yomporeshot. ⁸ Tarro'mar napa' ama nemno o'ch nepatare't ñeñ' e'ñe po'ño'ch cohuentetsa Yomporecop. Napa' añña atarr nemnen o'ch nepatuahuoñ ñeñ' e'ñe po'ño'ch cohuentetsa ñocop. ⁹ Ñerra'm soctape'cherr cohuen attochña huomenc seperr seyo'cher Yomporecop amach nepallteno o'ch norrtatonas nehuamenc' atto allsensare'ten Yomporeshot. Tarraña atetpa' e'ñe pocte'. Ama't napa' ama ahuamencatoyenaye' sentenno, tarraña ñerra'm sapa' ahuamencat perres Yompor, ñeñ'pa' e'ñe pocte' nenteñ. Ñaña atto nema'yochena socop allo'nepa'chña sesen e'ñe huomenc p'a'nmue' seyo'cher Yomporecop. ¹⁰ Ama't ella'paro'tsenen o'ch nequellquërrnaserr necarta, ama't ama nesena' sesho, allochñapa' o'ch alla soctape'cherr cohuen Yomporecop. Attochña ñerra'm esempo necherr seshopa' amach cha muene' neche'chame'tyesuerrso attoch seño'ten ñeñ' atet llesense'nen Yepartseshar. Tarro'mar atet allsensare'ten, ñeñ'pa' ama añecpaye' sherbeno alloch na'puerratatuerres, ñeñ'pa' añecopña sherben attoch neyepas huomenc p'a'nmue' seyo'cher Yomporecop.

Arrpa' all e'ñe poctacma so'tnerranet po'cartot

¹¹ Te' masheñeshacha' ñaña noçhaneshacha' allohuach notas añ necartot. E'ñe neso'teñotespa' o'ch notas, Yomporepa'chña sa'nataya. Te'pa' ñeñfach noterrerr mame'. Allo'nepa'chña sesen cotape'chnomue' ñeñ e'ñe cohuentetsa Yomporecop. Ñeñ atto o' noctape'chaterrerr añ necartot, se'mñotonepa'ch neñoñ attoch socsherra e'ñe poctacma. E'ñepa'chña patrra soctape'chuen allohuenes, attochña e'ñech cohuen sentannena. Yomporepa'ch sa'nataya ñeñtara Yompor ñeñ atarr amorrentña ñeñña atarr yocshatene' yeyochro. ¹² E'ñe semorrentanna'teño'pa' atetcha' sehuomcha'tanna'tena ñeñ atet poctetsa Partsocop.* ¹³ Ñaña arrpa' allohuen ñeñ o' pueyochresha' perr Parets, ñetpa' mueneñet o'ch huomcha'taset ñamet arr necartot.

¹⁴ Yepartsesharepa'chña Jesucristo sebensare'tamipene' allohuenes, ñaña Yomporepa'chña semorrentaya attoch semorrentannena saña, ñaña Puecamqueñepa'chña sechorrenaya attoch e'ñe separrocmatu-ahua allohuenes epas Cristo. Te'pa' ñeñfach notas, ñeñtpa' attetepa'chña Nompore. Allohua.

Pablo

* **13:12** Po'ñoçh oteneý, "E'ñe semorrentanna'teño' ÷hoch setso'ttsa'pa'tannena ñerra'm esempo sehuomcha'tanna'tena ñeñ atet poctetsa Partsocop." Ñeñtpa' atet yechete't ahuat.

AÑ SAN PABLO PO' CARTA ÑEÑÑ QUELLCAN GALACIO' MARNESHA' GÁLATAS

Atto Pablopá' quellcan carta añecop ñeññ ame'ñetsa anetso Galacio

1-2 Masheñeshacha' ñaña nochaneshacha' ñeñtes allohuenes same'ñeñot apcha'yetsa allemeñ anetso Galacio'mar. Na Pablón sequellquene'ña añ carta ñeñten Jesucristo puellsensaren. Napa' ama acheñeye' nellsensenaye, Jesucristoña nellsensene' epuet Pompor Parets ñeññ tantaterre' Puechemer rromot. Ñaña allohuen masheñeshachno ñeññ parro arro'tsenen, ñetpa'cho'ña mueneñet o'ch huomñcha'taset ñamet añ necartot. ³ Te'pa' e'ñe nehuomñcha'teñotes o'ch notas: Yomporepa'chña sebensare'tam'pene' ñeññ atarr Parets epuet Puechemer Jesucristo ñeññ Yepartseshar yepen. Ñetepa'chña socshatene' e'ñe sa seyo'chro allohuenes. ⁴ Ñeññara Jesucristo ñeññ e'ñe pocte' ente' o'ch rroma yo'chñarecop attochña yapa' cohueno'tseneycha' ama't añ patsropa' sosya'tsaño'tsenya, tarro'mar ñeññpa' atet pocte' eñch Pompor ñeññara Yompór ñeññ nanac Parets. ⁵ Ñeññara Parets'pa' aye'cho'chtaterrapo'ch e'ñe ñayoteñ errponohuañen. Ñeññpa' attetepa'ch Nompore.

All eñotatanet atto ama eñalle po'poñ alloch yequeshperra

⁶ Te' napa' o'ch notas: Eso'mare'tña e'ñe mamecmapa' o' alla soctape'chyerr po'poñ. Sapa' cha semneñ o'ch seque'chpuer Yompór ñeññ o' hua'ñerres o'ch same'ñerrñaña Puechemer Cristo ñeññ rromats attoch sequeshperra. Tarraña sañapa' cha semneñ o'ch alla soctape'cherr po'poñ ñeññot'ch sa'queshpaterrayeñ. ⁷ Po'ño'chpa' ama't ama eñalle po'poñ alloch yequeshperrapa' añña ñeññ huapyetsa seshopa' ñetpa' cha mueneñet o'ch alla moññe'taterrset soctapña. Ñaña ñetpa' mueneñet o'ch a'po'poñetonaset soctapña ñeññ cotapñats po'ño'ch alloch yequeshperra e'ñe yame'ñeño'fa Cristo. ⁸⁻⁹ Tarraña napa' o'ch notas: Ama't erra'tsencha' seserrpare'tate' po'poñ cotapñats ñeññ ama ñeññarayaye ñeññ atet o' same'ñerra ahuañapa' ñeññ acheñerpa' amuepa'ch yenpueñe Yompór. Ama't yapa'cho'ña ñerra'm o'ch alla yeserrpare'taterrset ello ñeññ ama ñeññarayaye ñeññ atet o' neserrpare'tatuas ahuaña ñeññ po'ño'ch alloch yequeshperra yapa'cho'ña amuepa'ch allo'na yenpa'nenye Yompór. Ñaña ama't añ atet patsa ñeññ Yompór po'millaño'teñer entotpa' ama't ñapa'cho'ña amuepa'ch yenpueñe Yompór. Ama't ñeññpa' o' notuaseñ ahuatoteñpa' tarraña te'pa' o'ch alla noterrset, amuepa'ch yenpueñe Yompór ñeññ atet petsa.

¹⁰ Te' sapa' señotenen napa' ama añecpaye' notenso attoch cohuen entenen acheñ, añña nemnen o'ch cohuen entenen Yompór. Ñaña ama acheñeneshaye' nemneno o'ch nocshach tarro'mar ñerra'm aña orameñ nemneñ o'ch nocshach acheñpa' ñeññepñapa' amate' erroteno noto napa' pueyo'cher penen Cristo.

Atet pa Pablo allempo errete' allsensaretterra

¹¹ Napa' nemneñ masheñneshacha' ñaña nochaneshacha' o'ch señoñ ñeñt atet neserrpare'tatas ahuañapa' ñeñtpa' ama acheñoyaye poctapña alloch yequeshperra. ¹² Napa' ama acheña neñotatenaye atet, ñaña napa' ama esesha' neyçhatenaye. Añña e'ñe Jesucristo ñaña e'ñe neñotatene' atet.

¹³ Sapa' o' se'mare'tuan atet nepe't ahuañmo'cha allempo noctoñe't judionesha' poctapña. Napa' allempo nanac noctare'che't ñeñt ame'ñenaya Yompor. Napa' atarrcha' nemne't o'ch na'cclatuanet. ¹⁴ Napa' e'ñe netso-toñe't judionesha' poctapña. Napa' ello nemtana'tue't shonte' nacmanesha' judionesha' ñeñt parro neyemte't. Napa' nanac nema'yoçhroñe't judionesha' poctapña ñeñt atet yeche't ahuatnaneshañ, ñaña ñeñtara atet yeçhatyesete't ñaña puechemereshañ. ¹⁵⁻¹⁶ Tarraña Yomporpa' ahuo't acrerren ahuatoteñ ama't allempo ama ne'ñalletena'. Tarro'mar allempo çhap allempoch eñotaterrenpa' o' yemtaterrena Puechemer ñeñtara Jesús. E'ñe puemuereñofen nanacpa' o' çhore'terren attoch nach serrpare'te' po'ñoñ allo'tsa'yen ñeñt ama judioneshayaye. Ñaña allempo e'ñe pocte' enteñ Yompor o'ch eñotaten atetpa' napa' ama esesha' na'p'to'to ama't pueseñarra. ¹⁷ Ñaña ama't Jerusaléñapa' ama neto o'ch nenteña' ñeñt allsensaretnesha' ahuatoteñ. Elloña napa' arra ahuen all oteñet Arabia, allpa' ama acheñempañooyaye. Allñapa' all na'llponmatena' e'ñe alla; allotñapa' alla nepuerrerra Damasco.

¹⁸ O'ña met ma'pa char allempañapa' ahuen Jerusaléño o'ch nenteña' masheñ Pedro.* Allñapa' alla na'pa ñesho çharramat puechena amnarmat. ¹⁹ Tarraña allempo allo'tsenenpa' ama nenteño po'psheññeçhno ñeñt allsensaretnesha', ñap'ta nenteña' masheñ Jacobo† ñeñtara ñeñt pa'mo'nasheñ pen Yepartseshar Jesús. ²⁰ Po'ñoçhpa' ama't Yomporpa' eñotenen ñeñt atet notenespa' ñeñtpa' e'ñe po'ñoçh atet.

²¹ Allempoña nerr, arr nasuanerr Sirio'mar ñaña Cilicio'mar. ²² Tarraña ama't allempo ñeñt ame'ñenaya Cristo all Judeo'marpa' ñetñapa' ama eseshaye' nechme'tenaye. ²³ Tarraña ahuo't e'mare'chet ñeñt cotare'tahuete't ahuaña te'ñapa' o' serrpare'terran attoch yame'ñerra ñeñtara cotapñats ñeñt çhocma mueneñ ahuaña o'ch huapore'tater. ²⁴ Ñeñto'marña te'pa' e'ñe no'marpa' nanac aye'choçhtateññañet Yompor.

2

Atto po'psheññeçhno allsensaretnesha' e'ñe pocte' eñchet Pablo

¹ Allempoña o' meterrerr çharra' char puechena pa'tatspa' o' alla ahuerrnerr Jerusaléño epan ñaña masheñ Bernabé. Ñaña o' nanem masheñ Tito. ² Napa' ahuerrnerr alla tarro'mar atet oten Yompor. Allempoña nethap Jerusaléñopa' neserrpare'tatosanet ora allohuen ñeñt atet o' neserrpare'tatue' ñeñt ama judioneshayaye. Neñotach ñaña jerusaléño'marnesha' ñeñt atet neserrpare'tatyeyen acheñenesha' e'ñe yame'ñeñoña Cristopa' o'ch yequeshperra. Ñehua, ñanompa' neserrpare'tach ñeñt am'cha'tare'tetyetsa Jerusaléño e'ñe ñap'teto. Napa' tarro'mar notanet atet allochñapa' attoch neñoçh ñato' pocte'ch entapret-net ñeñt atet nepena, allochñapa' atto neserrpare'tatyenpa' amate' e'ñe

* 1:18 Añ Pedropa' ñeñtara otenet Cefas. † 1:19 Jacobopa' ñeñtara ñeñt sochenet Santiago.

orrena neserrpare'tyeno. ³ Allempoña neserrpare'tatuanet atetpa' e'ñe pocte' eñchet ñeñt atet neserrpare'tyen. Ñeñto'marña ama't allo'tsen masheñ Tito ñeñt ama judioneshayayepa' ama't e'ñe puesheñarrofetapa' amaña eseshaye' notaye netsorrachepa'to' masheñ Tito tarro'mar ñapa' ama judioneshayaye.* ⁴ Tarraña ama't allempopa' ama eñallñeña ñeñt torrapo' yentyenpa' añña puesheña'tetspa' o' huapyesa yesho. Ñaña ñetpa' ama't otenetañ ahuo' ame'ñerret atet ñerra'm ya tarraña e'ñe a'nahuapa' mueneñetañ ahuo'ch nonayet ñoñets ñeñt nanac torrapo' yenten. Ñetpa' añecpa huapuet a'nahua o'ch e'monayet atto yapa' yoten e'ñe yame'ñeñoña Cristo Jesúsapa' o'ch yequeshperra. Tarraña ñetpa' añña mueneñetañ o'ch alla nerrnayet judionesha' poctaþña ñeñt nanac torrapo' yenten. ⁵ Tarraña yapa' ama yemno o'ch alla ya'po'poñetañperres ñeñt cohuen ñoñets ñeñt e'ñe po'ñoçh alloch yequeshperra.

⁶ Allempoña neñotach añcha'taretñesha' ñeñt Jerusaléño'tsa'yen ñeñt atet o' neþohuapa' tarraña amaña erro't otneto ñeñto' nepalltena ñeñtcha' atet neþa. Ñehua, po'ñoçh napa' ama nepallteno o'ch e'mñotaten añcha'taret tarro'mar ama ñapña añcha'taret pocte' entenoña Yompor. Ñeñto'marña ñeñt pa'mcha'taretñeshar penet ñeñt ame'ñetsa amaña erro't otneto ñeñto' nepalltenmeñ ñeñtcha' atet neþa. ⁷ Añña ñetpa' e'ñe pocte' entnet, tarro'mar o' eñoçet napa' po'ñoçh allsensareten o'ch neserrpare'tach acheñenesha' cohuen ñoñets, ama't ñeñt ama judioneshayaye. Attecma ñaña masheñ Pedro allsensaret o'ch serrpare'tan cohuen ñoñets judioneshacop, napa'cho'ña attecma allsensareten o'ch neserrpare't cohuen ñoñets añecop ñeñt ama judioneshayaye. ⁸ Tarro'mar ñeñtara Yompor ñeñt llesense' Pedro o'ch serrpare'tatan judionesha', napa'cho'ña ñeñtara Yompor ñeñt nellense' ñaña o'ch neserrpare'tach ñeñt ama judioneshayaye.

⁹ Ñeñto'marña ñeñt añcha'taretetyetsa atet ñerra'm masheñ Jacobo ñaña masheñ Pedro ñaña masheñ Juanpa' ñetpa' e'ñe eñoçet po'ñoçh napa' Yompor o'yenpuerren. Ñeñto'mar ñetpa' e'ñe cohuen agapyet epan masheñ Bernabé. Pagapueñoñetaypa' orratyot pot po'cohuenrot attoch yeñotanna'ta e'ñe attecma yoctape'chen Yomporecop. Allempoña ñetpa' e'ñe pocte' entyot yeserrpare'tachepa'to' ñeñt ama judioneshayaye, atet ñerra'm ñetpa' o'ch serrpare'tachet ñeñt judionesha'. ¹⁰ Ñetpa' añña paterr otyet, es yapa'yeseapa'to' huocchañnesha'çhno; ñeñtña ama't napa' e'ñe pocte' neñch ñaña.

Allempo Pablopa' muene' che'ptare'tan Pedro

¹¹ Tarraña allempo çhap ñaña masheñ Pedro Antioquíopa' napa' cha muene' neche'ptare'ch allempo yeserrpare'ten parro, tarro'mar allempo ñapa' añ þa ñeñt ama pocteyaye. Ñeñtpa' atet þa, ¹² allempo e'ñe errte' çhets masheñ Pedro Antioquíopa' ñapa' allenta rrallme'chapretosan ñeñt ama judioneshayaye. Tarraña allempoña çhaçha't ñaña puesheña'tets ñeñt huetsa masheñ Jacobueshotpa'

* **2:3** Añ ñoñets "atsorrateñ", añ ñeñt otets atet yeçhe't judionesha'. Ñeñtpa' atet: Ñerra'm allempo eñalletena asheñorrofollesha' ñeñt e'ñe judionesha'pa' añña pomporma' o'ch tsorrateñet po'çhtso. Ñehua, ñeñt tsorrateñetpa' ematollach o'ch çhapa'muen po'psocmatño. Ñehua, po'çhtso allcha' tsorret asheñorrofollla' all e'ñeçh poteretollo e'ñe poñof pa'rmatollo.

allempona masheñ Pedropa' o'huañ rrallme'chapretan ñeñt ama judioneshayaye, tarro'mar ñapa' añ mecha'ten ñeñt cotene' judionesha' pocta'ña. Ñeñto'marña e'ñe allempopa' o'huañ rrallme'chapretanet, ñaña o'huañ yemtanet. ¹³ Añpa'cho'ña judionesha' ñeñt ame'ñetsapa' ñetpa'cho'ña o' atet pa'yeset ñamet ñeñt atet pena masheñ Pedro. Ñeñto'marña allempopa' ama't masheñ Bernabépa' o' p'achet ñaña ñeñt atet penet ñet. Po'ñoçhpa' ama't eñoteñetañ ama atet a'papahuo. ¹⁴ Tarraña allempo nentanet ama e'ñe pa'charroye' peneto ñeñt cohuen ñoñets ñeñt po'ñoçh Yompor po'ñoñ allempona napa' atet noch masheñ Pedro e'ñe allo'tsa'yen allohuen acheñenesha', ñeñtpa' atet noch: "Papa' ama't judioneshapeñpa' tarraña o' pe'pohua ñeñt atet pena ñeñt ama judioneshayaye, te'ñapa' eso'mare'tña pa'ñapa' pemneñ o'ch penoñña ñeñt ama judioneshayaye añ ñoñets ñeñt atet anaret judioneshacop ñeñt ama't papa' ama atteye' pepeno atet anaret añ ñoñets."

Ama't judionesha'pa' e'ñech attecma a'queshpataretterret ñerra'm ame'ñeretcha' Jesús

¹⁵ Yapa' e'ñe judiona'tareshot e'ñalletñay. Tarraña yapa' ama atteyayye ñerra'm ñeñt ama judioneshayaye ñeñt nanac ochñañ. ¹⁶ Tarro'mar ya ama't judioneshaypa' yeñoteñ e'ñe yame'ñeñoña Jesucristopa' o'ch pocte' enterrey Yompor, ñeñtpa' ama año'teyaye o'ch e'ñe ye'pohua ñeñt atet anaret judioneshacop. Añña e'ñe yame'ñeñoña Jesucristopa' o'ch pocte' enterrey Yompor, ñeñto'marña o' yame'ñera Cristo, tarro'mar yeñoteñ e'ñe yetsoteñoña ñeñt atet anaret judioneshacoppa' amach pocte' enterrey Yompor ama't puesheñaroteya.

¹⁷ Ñaña te' yapa' e'ñe yame'ñeñoñ Cristopa' yeñoteñ e'ñech pocte' enterrey Yompor. Tarraña ama't atarr yeyemteñapa' chocmach yentena yapa' ochñañtey. Ñeñto'marña sapa' chate' sotenapañ Cristopa' ñeñite'ña ochña'tatañtetsa. Tarraña ñeñtpa' amaca'ye atteyaye. ¹⁸ Tarraña ñerra'm o'ch alla yoctape'cherrerr ora allohuen ñoñets ñeñt atet anaret judioneshacop ñeñt o' yepuesuanom ahuañapa' elloña allempopa' o'ch alla yenterra yapa' nanac ochñañtey. ¹⁹ Tarro'mar ñeñt ñoñets ñeñt atet anaret judioneshacop ahuatpa' te' napa' neñoteñ ñeñtpa' ama añecpayaye attoch o'ch ya'queshpatterra yañeña. Ñeñto'marña ya ñeñtey o' yame'ñera Cristo yapa' o' ya'ypo'ñamper attochña te'pa' o'ch yocrrerra cohuen Yomporecop e'ñe yeyo'chrohuen. ²⁰ Ñeñto'marña yapa' o' yeque'chpa'huerr atet muenatse'tatyese't yechets. Ñeñto'marña o' e'ñe atet yeperra ñerra'mrrate' o' corso'tamperryet epay Cristo. Te'pa' ama't ora yocrrenañpa' tarraña ama yaye' corretso, añña Cristo ñeñt yechorrenayapa' ñeñtña corretsa te' yechtso. Te'pa' e'ñe yeyemteñoñ Yompor Puechemerpa' yocrrena e'ñe cohuen arr patsro, tarro'mar ña yemorrenterraya, ñaña ña rromats yocop. ²¹ Ñeñto'mar te'pa' ama yemno o'ch yehupore'terrñañ Yompor puemuereña atto apuey Puechemer alloch yequeshperra. Tarro'mar ñerra'm eñalleñ attoch yequeshperrañ e'ñe yetsoteñoña ñoñets ñeñt atet anaretpa' ñeñtepa'ña' atto rroma Cristopa' amate' es sherbeno.

3

E'ñe yame'ñeñoia Cristopa' o' yequeshperra, ama añ yetsoteñoie ñoñets ñeñĩ atet anaret judioneshacop

¹ Sapa' nanac galacio'marneshacha' sepanteñ. Po'ñoçh sa o'ca'ye çha shecaset attoña te' sapa' o'huañ same'ñenaña ñeñĩ e'ñe po'ñoçh alloch yequeshperra. Ama't ahuaña allempo yeserrpare'tatensa'pa' yapa' añ yeñotatuas atto po'ñoçh Jesucristopa' o' acorso'tamñpsarettā e'ñe yocop. Ñeñĩña po'ñoçh same'ñaña sa allempo. ² Ñeñto'marña te'pa' nemneñ o'ch neñotatas ama't añ paterr ñoñets: Sapa' e'ñe seyemteñoĩ ñeñĩ Cristo po'ñoñ attoña chorrasaña Parets Puecamquēñ. Amaña añoŧeye' chorraso e'ñe setsoteñoĩ añ ñoñets ñeñĩ atet anaret judioneshacop. ³ Eso'mare'tña sapa' nanac sepanteñ. Atto sa ahuañapa' añ seyemtena Parets Puecamquēñ ñeñĩ ahuamencat añaña' eso'mare'tña te'ñapa' o'ch alla seyemterrerr e'ñe sañeña setsotateñ. ⁴ E'ñehuachñaca' orrena atarr semueroçhetyesa. Po'ñoçh ñato' ñeñĩpa' amate' e'ñe orrenayaye ñerra'm o'ch alla soctape'cherr cohuen. ⁵ Ñaña allempo Yomporpa' chorrataa Puecamquēñpa' ñapa' añ orrtatonas partsoteñets e'ñe sesho. Ñehua, ñeñĩpa' amaca'ye añoŧeye' orrto e'ñe sa setsoteñoĩ ñeñĩ atet anaret judioneshacop, ñeñĩpa' añoŧca'yeña orrta e'ñe same'ñeñoia ñeñĩ atet yeserrpare'tatuas.

Abrahampa' e'ñe pueyemteñoĩ Yomporpa' o' pocte' eñch Yompor

⁶ Ñehua, Abrahampa' nanac yemtane't ñeñĩ atet och Yompor, ñeñto'marña Yomporpa' e'ñe pocte' eñche't. ⁷ Ñeñto'marña yeñoteñ ñeñĩ nanac yemtenaya ñeñĩ atet oten Yompor ñeñĩña Yomporpa' e'ñe pocte' enteñ atet ñerra'm puechemereshanet Abraham. ⁸ Yomporpa' e'ñe eñotue't ahuatoteñ ama't ñeñĩ ama judioneshayayepa' o'ch ame'ñeret esempo, ñaña e'ñe pame'ñeñoŧetpa' pocte'ch enterranet. Ñeñto'marña ama't ahuatoteñpa' e'ñe anuaret po'ñoño. Yomporpa' atet otan Abraham: "E'ñe peshoŧpa' o'ch nebensare'tamñpes allohuen pa'namen acheñ." Ñeñto'marña yeñoteñ ama't ahuatoteñ Yomporpa' serrpare'tatane't Abraham ñeñĩ cohuen ñoñets alloch yequeshperra. ⁹ Ñeñto'marña yeñoteñ te'pa' allohuen ñeñĩ ame'ñenaya Cristopa' e'ñe attecma cohueno'tsenacma atet ñerra'm Abraham ñeñĩ nanac ame'ñaye't Yompor ahua't.

¹⁰ Tarraña allohuen ñeñĩ yemtenaya ñoñets ñeñĩ atet anaret judioneshacop o'ch e'ñe etsotuet ñetñapa' o' anarettet allohuenetpa' a'coñchatare'tetcha' tarro'mar atet anuaret Yompor po'ñoño ama't ahuatoteñ, ñeñĩpa' atet oten: "Allohuen ñeñĩ ama etsotuenaye e'ñe poctacma allohuen allpon ñoñets ñeñĩ atet anaret quellco, ñaña ñerra'm ama pohueto allohuen ñeñĩ atet anaretpa' a'coñchatare'tetepa'ch."

¹¹ Ñeñto'marña yeñoteñ amach pocteye' enterrye Yompor e'ñe yemneññoia o'ch yetsotua añ ñoñets ñeñĩ atet anaret, tarro'mar amach errotenoŧ yetsotuo ora allpon ñeñĩ atet anaret. Ñeñto'marña ama't puesheñarroŧeyapa' amach pocteye' enterrye Yompor. Ñeñto'mar ama't Yompor po'ñoñopa' atet anuaret ahuatoteñ, ñeñĩpa' atet oten: "E'ñe yeyemteñoia Yompor ñapa' o'ch pocte' enterrey attoch ello yocrerra errponohuañen." ¹² Tarraña ñeñĩ ñoñets ñeñĩ atet anaret

judioneshacoppa' ama atteye' oteno, ñeñtpa' atet oten: "Ñerra'm yepohuencha' e'ñe poctacma ñeñt atet anaretpa' esheccha' ello yocrrerra errponohuañen."

Cristopa' e'ñe pocte' eñch attoch ñach arrnomarettatsa yocop

¹³ Ñoñtsopa' ama't o'patatenyañ coñcheñets tarraña Cristopa' ñaña coñcherrtsa e'ñe yocop attochña yapa' amach yecoñcherro. Ñeñtpa' yeñoteñ tarro'mar ama't ahuatoteñpa' atet anuaret Yompor po'ñoño, ñeñtpa' atet oten: "Ama't erra'tsena acheñer puepencateñme'chatset cho echañchet tsachopa' ñeñtpa' a'coñchatarefcha' entyes acheñenesha'."

¹⁴ Ñeñto'marña yeñoteñ e'ñe pame'ñeñofet Jesucristopa' o'ch eñalleta attoch Yomporpa' e'ñech pocte' entanet ñamet ñeñt ama't ama judioneshayaye, attecma pe't ahuatoteñ Yompor e'ñe pocte' entane't Abraham. Ñaña e'ñe yame'ñeñofpa' attoña eñall attoch chorrerrya allohueny Parets Puecamquañ, atet Yomporpa' otan ahuat Abraham.

Ñeñt atet Yomporpa' otan ahuat Abraham ñeñtcha' atet poñ

¹⁵ Ñehua, masheñeshacha' ñaña nochaneshacha' te'pa' o'ch alla neñotaterrser po'poñ. Ñehua, ñato' o'ch netma'ntacha ñeñt atet yocrena añ patsro. Atet ñerra'm puesheñarr yacmapa' o'ch a'pochtachet epuet po'psheñeñ, o'ch quellcatet, allotpa' o'ch quellca'huet pa'so'cheñ all, allochñapa' amach errotenot esesha' a'po'poñeterroye po'ñoñ ñeñt atet o' quellcatuet, ñaña attoch amach esesha' huapore'terroye po'ñoñ. Atet yepena yaña ama't acheñaya atet petsa ellohuate'ñaca' Yomporpa' ama pueno po'ñoñ. ¹⁶ Yompor ahuatpa' atet otan Abraham ñeñtcha' atet poñ e'ñe puesheñarrof po'mrenñoñ. Tarraña ama allohuenaye' po'mrenñecop atet oche, e'ñe puesheñarrocpa atet och, ñeñtpa' yeñoteñ ñeñtara ñeñt Cristotats. Ñeñtpa' attecma oten ama't ahuatoteñ Yompor po'ñoñ. ¹⁷ Añmapa' ñeñtña atet neychatenes. Ñehua, yapa' yeñotueñ atto Yomporpa' a'pochtachet ama't ahuatoteñ epuet Abraham. Al-lotñapa' allempo o' met cuatrocientos treinta charpa' allempoñapa' chap allempoch anaretta añ ñoñets judioneshacop ñeñt atet quellcanet Moisés. Tarraña ama't o' anaretta añ ñoñets ñeñt quellcanet Moiséspa' tarraña ñeñtpa' yeñoteñ amach erroteno huapore'tatereto ñeñt atet o' anaretetua ñeñt atet o' a'pochtataua Yompor epuet Abraham ama't ahuatoteñ, tarro'mar Yomporpa' ama puenesho po'ñoñ. ¹⁸ Ñaña ñerra'm eñalleñ attoch yequeshperrañ e'ñe yetsoteñofa añ ñoñets ñeñt atet quellca' ahuat Moiséspa' ñeñtepñapa' amate' palltenañe attoch Yomporpa' otan ahuat Abraham o'ch eñalleta e'ñe ña po'mrenñoñ puesheñarr ñeñtcha' ya'queshpaterre' e'ñe yame'ñeñofa ñeñt atet oteney.

¹⁹ Añ ñoñets ñeñt atet net allempopa' ñeñtpa' atet pa: Yomporpa' ahuo't mueñan po'mllañoñeñnashar attoch ñetpa' o'ch eñorana'chet Moisés attoch ñach a'mte' añ ñoñets judioneshacop. Tarraña añ ñoñetspa' e'ñe tarremphua sherba' allempo huapa Cristo atet Yompor otan ahuat Abraham. E'ñe po'ñoñch yame'ñeñof a'queshpaterreycha'. Te' ellonetpa' o'ch neñotatas ñeñtecop nanña ellonet Moisés po'ñoñ. Ñehua, ñeñtpa' añecpa anaretta attoch yeñoch ñeñt allpon ochña'teñets enten Yompor ñaña attoch ñeñtcha' yeñotatene' ñerra'm esempo o' yepohua ñeñt ama pocteye' enteno Yompor. ²⁰ Tarraña allempo Yomporpa' eñorana'tana

Abraham ñeñtcha' atet ñoñpa' allempopa' e'ñe ña ote' allame'tets. Allempo Yomporpa' ama esesha' oto po'psheñeñ ñeñtcha' a'mtahueta añ ñoñets.

Añ ñoñets ñeñt atet anaret ahuatoteñ judioneshacop añecopña sherben ñeñtcha' yame'ñaterraya Cristo

²¹ Ñehua, ñato' sapa' o'ch soten, ñeñtepñapa' añ ñoñets ñeñt atet quellcanet Moiséspa' ta', chote' epatenan Yompor po'ñoñ ñeñt atet otan ahuañ Abraham. Ñeñtpa' amaca'ye atteyaye. Tarro'mar ñerra'm eñalleñ e'ñech ñoñtsoña ñeñt atet anaret o'ch etserrataterrnayeñ cohuen yeyoñher Yomporecoppa' amate' palltenañeña po'poñ attoch pocte' enterrey Yompor; ñeñtpa' e'ñete' ñoñtsoña ñeñt atet anaretpa' o'ch pocte' enterryeñ Yompor; tarraña ñeñtpa' ama atteyaye. ²² Tarro'mar Yompor po'ñoñ ñeñt anuaret ahuatoteñpa' oteneñ, allohueneypa' e'ñe yo'chña'tuen, amach errotenoñ e'ñe yetsotuoñe ñeñt atet anaret Yomporecop. Ñeñto'marña ñeñtpa' ama añecpayaye alloch yequeshperra. Añña e'ñe yame'ñeñoña Jesucristopa' o'ch yequeshperra, ñeñtara Cristo ñeñt atet Yomporpa' otan ahuañ Abraham.

²³ Ahuañ allempo ama huena' Cristo ñeñtcha' yame'ñerrapa' amach errotenoñ ya'ypo'ñerro añ ñoñets ñeñt atet anaret. Atta yepe't tarremphua allempo huapa Cristo attoña e'ñe yame'ñeñoña ñapa' o'huañcha' allo'na amcha'noçhta ñoñets yocop. ²⁴ Ñehua, ñato' o'ch netma'ntacha atet. Añ ñoñets ñeñt atet anaret judioneshacoppa' ña yecuañpsaye't ahuañ. Ñeñtpa' tarremphua atet pa' allempo huapa Cristo, ñaña añ ñoñetspa' añecpa sherba' attoch ame'ñaterraya Cristo, allochñapa' e'ñe yame'ñeñoña ñapa' o'ch pocte' enterrey Yompor. ²⁵ Tarraña te'ña o' yame'ñera Cristopa' ama yepallteno ñeñtcha' allo'na yecuañpse'.

E'ñe yame'ñeñoña' atetcha' enterrey Yompor ñerra'mrrate' e'ñe puechemer Abraham

²⁶ Tarro'mar te'pa' e'ñe yeparrocmateñoñ Cristo Jesúsapa' o'ch puechemer perrey allohueney Pompor; tarro'mar e'ñe yame'ñeñoñ Puechemer. ²⁷ Ñaña allohuenes ñeñtes o' sapataretterra e'ñe same'ñeñoñ Cristopa' o' chorrersa Cristo. ²⁸ Ñaña te'pa' e'ñe yeparrocmateñoñ epay Cristo, Yomporpa' ama po'poñe'ttsocmaye' entenye, e'ñe attecma enteney allohueney, ama't judionesha', amapa' ñeñt ama judioneshayaye, amapa' ñeñt ataruasataret e'ñe atta, amapa' ñeñt ama ataruasatareteye e'ñe atta. E'ñe attecma enteney allohueney ama't asheñorrey, ama't ñaña coyanesha'. Tarraña Yomporpa' e'ñe attecma enteney. Tarro'mar e'ñe yeparrocmateñoñ epay Cristo Jesús e'ñe puesheña'tsoyapa' o'ch e'ñe yeparrocmatua allohueney e'ñe parro. ²⁹ Ñaña ñerra'm yapa' Cristona'tareypa' añña Yomporpa' e'ñe atet enteney ñerra'mrrate' po'ñreneñ peney Abraham. Ñeñto'marña yapa' o'ch yagapapreter ñeñt atet Yomporpa' otan ahuañ Abraham ñeñtcha' atet a'nacha.

4

Atto Cristopa' a'huañamperran acheñenesha' atto amcha'noçhtanete't ahuañ ñoñets ñeñt atet anaret

1-2 Ñeñt notenespa' ñato' o'ch netma'ntacha atet. Ñerra'm puesheñarr yacma eñall puechemer, esempoña o'ch po'nerr allempoch o'paterrana ora allpon echen pompor. Ñehua, ama't yeñoteñ ñapa' o'ch o'paterrana ora allpon echen pomporpa' tarraña allempo ama po'nenapa' amach es o'patena' ama't coñe'ta. Ñaña allempo ama po'nenapa' amach errotenot es pa'yesoña e'ñe ñoña, tarro'mar allempopa' chocma eñall puesheñarr ñeñt cohuanpene', ñaña allempopa' chocmach es tsa'teññañet ñeñt cheshar. Allempoña atet penapa' chach ottena ñerra'mrrate' atfa ñañreteñet, ama't ora allpon echeneñ pomporpa' ñocpañ. Tarraña esempoña chap pompor ponañcho allempoch po'n puechemerpa' allempoñapa' o'ch agapan ora allpon echen pompor. 3 Ñeñtpa' atet yepe't yanña ahuat. Allempopa' atet yepe't ñerra'mrrate' cheshanesha'. Ñaña allempopa' añña yame'ñataye't ñeñt poctapña ña'yese't ahuatnanesha' arr patsro. 4 Tarraña allempoña o' etsota allempo onañche' ahuat Yomporpa' o' mueñonay Puechemer arr patsro. Arrñapa' eñalletach puesheñarr coy-anesha' ñeñt judiona'tar. Añña ñoñets ñeñt atet anaret judioneshacoppa' nanac añcha'nochte't allempo ama't ñocop. 5 Tarraña Cristopa' añecop eñalleta attoch a'huañamperrey atto añcha'nochtana añ ñoñets yocop. Ñeñtpa' añecop atet ña attoch puechemer perrey Yompor.

6 Te'ña Yomporpa' o' puechemer perrey ñeñto'mar o' mueñernay Puecamquëñ ñeñcha' yeçherrtsa yeyoçhro. Ñeñña Puechemer Puecamquëñpa' ñeñcha' yeñotatene' ñerra'm esempo yeçhore'ch ama't Paretspa' e'ñe pocte' o'ch yoch, "Apa." 7 Ñeñto'marña te'pa' yeñoteñ o' puechemer perrey Yompor, ama pueñañrayaya penye. Ñeñto'mar yeñoteñ ñerra'm po'ñoçh o' puechemer perrey Yompor, yapa' yo'patapreterach ora allpon o'patatenya te' Yompor.

Ñerra'm yapa' o'ch alla yeyemterrerr añ ñoñets ñeñt atet anaret judioneshacoppa' ñeñtpa' e'ñech orrena nanac yetorrerra

8 Ahuat allempo ama señoterra' ñeñt e'ñe po'ñoçh Yomporpa' añña sey-omporer sepe't ñeñt po'ñoçh ama Yomporeyaye. Sañapa' ñeñta nanac ame'ñatasete't. 9 Tarraña te'pa' o' senterr ñeñt e'ñe po'ñoçh Yompor, amapa' ñato' o'ch yot, Yomporpa' o' enterres sa. Te'ñapa' eso'mare'tña semneñ o'ch alla sepurrerra, o'ch alla same'ñerra añ cotapñats ñeñt ama es sherbeno sañapa' allo'ch po'noçh sequeshperra. Eso'mare't semneñña o'ch alla señorrerrerr nanac ñeñt e'ñe orrena. 10 Ñaña sapa' chocma sonañcha'yen yet ñeñcha' atet setsotayen atto'ch sequeshperra —pueña'tets arrorr, ñaña pate'tets char, amapa' allempo chocma coshena judionesha'. 11 Ñeñto'marña nellquëño'tpa' atet noten, ñeñt atto netorrrena ahuaña socoppa' ñato' amach es sherberro.

Arrpa' all yerpatanet atto ñetpa' e'ñe cohuen agapet allempo ñanom asena' Galacio

12 Te'pa' o'ch masheñneshacha' ñaña noçhaneshacha' notas, atarr nemneñ o'ch soctape'cherr atet noctape'chen na. Tarro'mar napa' o' na'ypo'ñerrñañ judionesha' poctapña. Te'pa' o' noctape'cherr ñeñt atet sepe't ahuat sa, allempo ama soctape'cherrñañ judionesha' poctapña. Ahuañmo'cha allempo allo'tsenen seshopa' e'ñe cohuen semuera'ne't. 13 Sapa' señotuenen atto napa' allempo ñanom neçhap

seshopa' napa' cha natsna'tos ñeño'mar allempopa' eñall attoch nerrpare'tatas añ ñoñets alloch yequeshperra. ¹⁴ Ñaña ama't añ at-snañtsorpa' nanac sosey nenteñpa' tarraña sapa' ama setsena'tno, ñaña ama sa'ypo'ña'no. Elloña sapa' o' sagapuen e'ñe cohuen atette'ña ñerra'm Yompor po'millañoñeñer huetsa sesho, ñaña e'ñe atet sagapuen ñerra'mrrate' ñaña Jesucristotets. ¹⁵ Ñehua, te'pa' eso'mare'tña o'huañ tama socsha'na. Ahuañmo'chapa' nanac semuera'ne't, ñaña allempopa' ama't esa nepalltapa' sañapa' o'chcho' sapuen, ñaña ama't añcha' nepall-tañe't necle'pa' napa' neñotenes ñerra'm errotenot serrotañ secle'pa' ama't ñeñpa' ñeñte' sapnoñe't. ¹⁶ Ñato' sapa' chate' sotenapañ chote' o' ne'moñe'tas, tarro'mar napa' o' neserrpare'tatas ñeñ e'ñe po'ñoçh atet noten.

¹⁷ Po'potantañ ñeñ seychatene' judionesha' poctapñapa' ama't nanac ma'yochrenetañ socoppa' tarraña ñeñpa' ama añecpayaye attoch yenpaset e'ñe po'ñoçh. Ñetpa' añecpa mopa'tenset attoch o'ch socshapretanet nanac e'ñe ñañeñeta. ¹⁸ Ñehua, napa' e'ñe pocte' nenteñ o'ch yemneñ acheñenesha' o'ch coshapretenyet ñerra'm po'ñoçh añecop yema'yochrena attoch yeyenpanet e'ñe po'ñoçh. Atet napa'cho'ña nemneñ chocmach socshapretna ama't allempo ama allo'tsenye parro. ¹⁹ E'ñe nemorrenteñoñes atet nentenes ñerra'mrrate' nechemereshas, ñaña te'pa' alla nemueroçhterrerr socop. Atet nanen atserrash atette'ña coyanesha' atsotenaya pue'mar. Tarraña napa' chocmach nemueroçhta esempohuach e'ñe chorrassa Cristo, attoch ñach soctape'chaterre' e'ñe poctacma cohuen. ²⁰ Esuaca' alla nene' tayecma sesho attote' neserrpare'tatas e'ñe cohuen, allochñapa' amate' cha muene' neche'ptare'taso. Tarraña ñeñpa' amach errotenot, po'ñoçhpa' chocma sellcatenen.

Te'pa' e'ñe yame'ñeñoi Cristopa' o'huañcha' yeyemta añ ñoñets ñeñ atet anaret; ñeñpa' añ toma'ntena Agar ñaña Sara

²¹ Ñehua, te'pa' o'ch se'mñnoten sa ñeñtes muenets o'ch alla seyemterra añ ñoñets ñeñ atet anaret ahuatoteñ. Sapa' ama't señoñe ñeñ atet oten añ ñoñets ñeñ atet anaret. ²² Ñehua, te'pa' o'ch neñotatas ñeñ atet oten ñoñets ñeñ atet anaret Yompor po'ñoño ahuatoteñ. Ñeñpa' atet oten: Abrahampa' eñall epsheña puechemer. Puesheñarrpa' arroñ chemere't pueñañreshoñ ñeñ pa'taruasañer pe't. Ñeñ coyanesha'pa' añ sochena Agar. Po'psheñeññapa' e'ñe puetaporeshoñ chemere't ñeñ ama pa'taruasañreyaye. ²³ Ñeñ puechemer ñeñ eñalletatsa pueñañreshoñpa' atet eñalleta ñeñ e'ñe attecma yeyeçquena allohueny acheñey. Tarraña po'poñ puechemer ñeñ eñalletatsa puetaporeshoñ ñeñ ama pa'taruasañreyaye ñeñpa' añecop eñalleta attoch etsota Yompor po'ñoñ ñeñ atet oten ahuatoteñ Abraham. ²⁴ Ñeñ atet papa' ñeñpa' añ yeçhateney tarro'mar añ epsheño'mar coyanesha'pa' añ toma'ntena atto Yomporpa' epsheñoñ a'poctatonay. Ñeñ Agarpa' añ toma'ntena atto Yomporpa' eñorana'tanet ahuat Sinaí'no. Allempoteñ anareta añ ñoñets ñeñcha' atet etsotetañ. Ñeñña ñoñetspa' añ toma'ntena Agar, tarro'mar ña puechoyoresha'pa' aña añcha'noçhtana'tenahuet añ ñoñets ñeñ atet anaret. ²⁵ Agarpa' po'ñoçh shallchenana aspenet Sinaí'pen ñeñ Arabio'tsen. Ñaña ñeñfara Agarpa' toma'ntenana judionesha' ñeñ

pa'netser pene' Jerusalén. Tarro'mar allohuen judiona'tarpa'teme'ttsen añña amícha'noçhtana'tenahuet añ ñoñets ñeñt atet anaret ahuatoteñ. ²⁶ Tarraña ñeñtey ame'ñenaya Cristopa' añ ñoñets ñeñt atet anaret ahuatoteñpa' ama amícha'noçhteno yocop. E'ñe yame'ñeñoña allohueney Cristopa' e'ñe cohueno'tseney. Ñaña ñeñtpa' e'ñe cohuen yenteñ atet ñerra'mrrate' yachor. Ñaña ñeñtpa' atetcha' netma'ntatererr atet: E'ñe yeparrocmateñoñ allohueney epay Cristopa' e'ñe attey ñerra'm Yompor pa'netser etserra Jerusalén, ñaña ñeñtpa' e'ñe atet yenteñ ñerra'mrrate' yachor. ²⁷ Ñeñto'marña atet anaret Yompor po'ñoñ ahuatoteñ, ñeñtpa' atet oten toma'nteñtso:

Coshepa' coyanesha' mueçhoḥ ñeñt ama achyore'tño, ñaña pocsheñeshoḥpa' rranare'tepa' ñeñt ama't ahuatapa' ama patsotarano pue'mar, tarro'mar ama't añ coyanesha' ñeñt aqueçhparet mame' (ñeñtara Sarapa') shonte'ch acheñenesha' pachor perre'. Elloch metanerran allpon puechoyor echen ñeñt agapue' puerrollar (ñeñtara Agar).

Ñeñt ñoñetspa' añ toma'ntena atto te'pa' yame'ñeñoñ Cristo ñeñtña nanac sherbets attoch atonterra acheñ ñeñtcha' pueyochresha' perr Yompor. Tarraña ñoñets ñeñt atet anaret ahuatoteñpa' ñeñtpa' ama tama sherbeno attoch atonterra ñeñtcha' pueyochresha' perr Yompor.

²⁸ Ñehua, o'ch notas masheñneshacha' ñaña noçhaneshacha', allohueney ñeñtey ame'ñenaya Cristo, yapa' attey ñerra'm Abraham puechemer ñeñt Isaac ñeñt eñalletatsa attoch etsota Yompor po'ñoñ ñeñt atet otoñ pompor Abraham. Tarro'mar yapa'cho'ña attoña ye'ñalleterra ello attoch etsota Yompor po'ñoñ ñeñt atet ote't ama't ahuatoteñ. ²⁹ Tarraña ñeñt eñalletatsa ahuat ñeñt e'ñe attecma yeyeçhquëna allohueney acheñey (ñeñt sochet Ismael) ñapa' çhocma e'moñe'tane't ñeñt eñalletatsa atto etsota Yompor po'ñoñ. Attecmach perra ñaña te'. Ñeñtcha' eñalleterrtsa ñeñt e'ñe attecma yeyeçhquëna allohueney acheñey ñeñtara ñeñt muenene' o'ch etsotan judionesha' poçtaḥña ñetpa' çhocmach e'moñe'tenyet ñeñtey eñalleterrtsa Yompor Puecamquëñoñ. ³⁰ Ñehua, ama't señoñeña ñeñt atet oteney Yompor po'ñoñ ñeñt anaret ahuatoteñ. Po'ñoçh oteney atto Yomporpa' otan ahuat Abraham ñeñtpa' atet och: "O'ch pehuapore'ch peñañra epuet puechoyor, tarro'mar ña puechoyorpa' amach es o'patapretaḥo, amach atteye' ḥo puechoyor ñeñt eñalletatsa peḥaporeshoḥ ñeñt ama ḥa'taruasañreyaye." ³¹ Ñeñto'marña te' masheñneshacha' ñaña noçhaneshacha' o'ch alla noterrerr: Ama pallteno o'ch yame'ña judionesha' poçtaḥña. Nato' o'ch netma'ntacha atet: Ama puechoyoreyayye Abraham pueñañra ñeñt pa'taruasañer e'ñe atta. Añña puechoyorey Abraham pueḥapor ñeñt ama pa'taruasañreyaye. Ñeñtara ñeñt yoten e'ñe yame'ñeñoña Cristopa' e'ñech cohueno'tseney.

5

Atto te'pa' atarr cohueno'tseney, te'ñapa' amach yequeçhpatstere

¹ Cristopa' o' a'poçtaterrnay attoch e'ñe yame'ñeñoḥpa' cohueno'tseneycha'. Attoch yocoppa' amach amícha'noçhteno ñoñets ñeñt atet anaret judioneshacop. Ñeñto'mar te'pa' amach allo'na

same'ñatsterrerro judionesha' poctapña ñeñt nanac amuerochtatañ. E'ñepa'chña huomenc sepa' seyoçher Cristocop.

² Ñehua, te'pa' o'ch se'mñoten na ñeñten allsensareten ñeñtcha' atet notas: Ñeñt atet seyemtenañ atto'ch sequeshperra e'ñe setsorranna'teño'apa' tarraña ñeñto' Cristopa' amach erroteno' yenpaso.*
³ Tarraña te'pa' o'ch alla noterrser, ñeñt muenets o'ch atsorrare'tapa' ñehua, po'ñoçh añ palltetsa ñaña o'ch e'ñe etsotuan ama't ñaña allohuen ñoñets ñeñt atet anaret judioneshacop. ⁴ Ñeñtes muenets o'ch pocte' entas Yompor e'ñe setsoteño' ñoñets ñeñt atet anare'tpa' sañapa' o' alla sequetchpuerña Cristo. Ñeñto'marña te'pa' amach erroteno' muererro Yompor. ⁵ Tarraña yapa' e'ñe yeyemteño' Cristopa' e'ñe yocsheñsha' yecuen esempohuañencha' yeçhacherr Yomporesho tarro'mar yeñoteñ o' pocte' entuerrey Yompor. Ñaña e'ñe ña Puecamquëño' te'pa' o' ya'pocataretterra. ⁶ Ñerra'm o' yeparrocmaterr epay Cristo Jesúspa' ama sherbeno atto yetsorranna'tena, ñaña ama't ama atsorrare'teyepa' ñeñt'pa'cho'ña ama sherbeno Yomporcop. Aña ñapue' sherbets e'ñe yame'ñeño' Cristopa' o'ch yemorrentanna'ta.

⁷ Sa ahuañmo'chapa' e'ñe cohuen same'ñye't Cristo. Te'ñapa' po'ñoçhca'ye o'cha a'psaterrsetña añ ñoñets ñeñt e'ñe po'ñoçh Yompor po'ñoñ. ⁸ Ñeñt'pa' ama Yomporaye' sa'psatenaye, tarro'mar ñapa' o' hua'ñerres o'ch same'ñerrñaña Puechemer Cristo. ⁹ Ama't seño'teñe ama't puesheñarra yeçhatats po'poñ ñeñt ama po'ñoçhoyayepa' mameshapa' o'ch epa'hua erracmañen ñeñt atet yeçhaten. Ñato' o'ch netma'ntacha atet pena chase'. Ama'tcha' coñe'ta chasetoll yena'pa' mameshapa' o'ch a'chasa'huan emasa. ¹⁰ Tarraña ñeñt semoññe'tatene'pa' tsa'taterach Yompor, ama't erra'tsena atet petsa. Tarraña na e'ñe neyemteño' Yepartsesharpa' neñotenes te'pa' o'ch alla sequetchpuerr ñeñt atet yeçhatenes po'psheñeñ, o'ch alla same'ñerra ñeñt neyçhatenes.

¹¹ Ñato' napa'cho'ña çhate' otyennet año' neserrpare'taten o'ch yetsorranna'ta attoch yequeshperra. Ñehua, masheñneshacha' ñaña noçhaneshacha' ñerra'm po'ñoçh ñeñtara neserrpare'tateneñ atet'pa' amate' erroteno' e'moñe'tennoñeña judionesha' ñeñt serrpare'tene' o'ch yetsorranna'ta. Tarraña po'ñoçhpa' ama atteye' neserrpare'tateno. Aña neserrpare'taten atto Cristopa' rroma corsocho yocop atto tsa'tuerrnaya yo'chñar, allochñapa' e'ñe yame'ñeño'ta ñapa' o'ch yequeshperra. Ñeñtña atet neserrpare'teño' aña ñeñt serrpare'tene' o'ch yetsorranna'tapa' ñetñapa' ñeñtña nanac atsrre'matenahuet. Ñerra'm o'huañcha' atet neserrpare'tañpa' o'huañe' e'moñe'tnetañ. ¹² Napa' atarr nemneñ ñeñt çhocma semoññe'tatene'pa' o'te' alla queçhpa'nerres.

E'ñe yemorrenteño' yamo'tspa' o'ch e'ñe yetsotua allohuen ñoñets ñeñt atet anaret Yomporesho'

¹³ Tarro'mar sa masheñneshacha' ñaña noçhaneshacha' o' hua'ñerres Yompor attoch cohueno'tsenescha'. Ñapa' ama mueno o'ch añcha'noçhtena socop ñoñets ñeñt atet anaret. Tarraña ama't o' hua'ñerrey Yompor attoch cohueno'tseneypa' ñeñt'pa' ama añecpayaye o'ch ye'pa'yesa nanac sosey ñeñt atet muenateney yechets. Ñapa' mueneñ e'ñe yemorrentanna'teño'pa' o'ch yeyenpanna'ta, tarro'mar

* 5:2 O'ch secue' nota 2.3.

yapa' cohueno'tseney. ¹⁴ Ñerra'm cho yemorreñcha yamo'tspa' ñeñtpa' attoch ama't e'ñe parrotapa' o'ch yetsotua ora allohuen ñoñets ñeñt atet anaret ahuatoteñ Yomporshot, tarro'mar Yompor po'ñoñpa' oteneý: "Atarrepa'ch semorreñcha samo'ts e'ñe atet atarr semorrentena sañeña." ¹⁵ Tarro'mar ñerra'm sapa' chocma se'moñe'teñ samo'ts, amapa' cha amtsen senteñ samo'ts, ñeñtpa' ama pocteyaye atet sepena, tarro'mar ñerra'm atet sepenapa' señocheпа'ch atto'cha'ña chach sa'chencatannerra e'ñe sagattsa.

Ñeñt atet cotape'chateney Parets Puecamquëñ, ñaña ñeñt atet muenateney yechets

¹⁶ Tarraña napa' o'ch notas ñeñt poctetsa ñeñtcha' atet sepa. E'ñepa'chña cohuen socrrena Partsocop ñeñt atet cotape'chatenes Parets Puecamquëñ. Allochñapa' amach allo'na sepa'yenesno ñeñt atet muenatyenes sechets. ¹⁷ Tarro'mar ñeñt atet muenatse'tateney yechetspa' ñeñtpa' ama yemtenano ñeñt atet cotape'chatyeny Parets Puecamquëñ. Añpa'cho'ña Parets Puecamquëñpa' ama yemtenano ñeñt atet muenatse'tateney yechets. Ñeñto'mañña amach errotenot yocape'cho e'ñe pa'rra cotapñats, tarro'mar ñetpa' cha e'moñe'tannenet. ¹⁸ Tarraña ñerra'm po'ño'ch ye'pa atet cotape'chateney Parets Puecamquëñpa' allempopa' amach errotenot añcha'no'chto yocop añ ñoñets ñeñt atet anaret ahuatoteñ, tarro'mar ñapa' añcha' pateney ñeñt atet muenen Yompor.

¹⁹ Ñehua, yapa' o' yeñotuer ñeñt atet muenatse'tateney yechets. Ñeñt allpon yemnatse'tyenpa' ñeñtpa' atet ñerra'mrrate' erra'tsente' cheta'yene' coyanesha' ñeñt amach puetaporeyaye, atet ñaña erra'tsente' coyaneshar ñeñt cheta'yene' yacma ñeñt ama puerrollareyaye, ñaña atet ñerra'mrrate' ñeñt nanac cotape'chyene' sosya'tsañ, ñaña ñeñt nanac yomenaya ottatsñats. ²⁰ Ñaña ñeñt po'yomporer pa'yene' po'poñe'chno ñeñt ama po'ño'ch Yomporoyaye, ñaña atet pena achyo'tañe'chno, amapa' ñeñt atet pena pa'llerrnanesha' ñaña ñeñt atet pena amase'ñet. Ñaña po'poñ ñeñt atet muenatse'tyen yechetspa' ñeñtpa' atet ñerra'mrrate' e'moñe'tanna'teñets, ñaña orroteñets, ñaña ye'chapretanna'teñets, ñaña atsrre'mare'teñets, ñaña moparrñats, ñaña elloptanneñets atto amach e'ñe amo'tstanneneto, ñaña atet pena ñeñt cotape'chyene' po'poñ cotapñats ñeñt ama po'ño'choyaye. ²¹ Ñaña po'poñe'chno ñeñt atet muenatse'tyen yechetspa' atet ñerra'm ye'chapreteñets, ñaña muetsanna'teñets, ñaña posa'tarñats, ñaña arepsarñats porrare'teño't, ñaña eñallmeñ po'poñe'chno shonte' attema't ñeñt atet o' notua. Te'pa' o' alla noctape'chaterrser ñeñtara atet notuanmas ama't ahuaña, ñeñt atet petsapa' amach es o'patatereto all añcha'tarettena Yompor.

²² Tarraña ñeñt pene' cohuen ñeñt atet ye'chateñ Parets Puecamquëñpa' ñeñtpa' atetcha' pena, o'ch morrentenana pamo'ts, ñaña e'ñech cosha'huena pueyo'chro Yomporocop, ñaña amach es llecatenaye ama't e'ñe mamesha, e'ñech ahuanta'huenan allohuen ñeñt echarr entyen. Ñaña ñeñt pene' cohuen ñeñt atet ye'chateñ Parets Puecamquëñpa' o'ch amuerañtina, ñaña o'ch yenpa'yenan pamo'tsesha', ñaña erro't otpa' atetcha'cho' pena. ²³ Ñaña amach atsrre'ma'peno

ñaña e'ñech puetpara es p̄a'yen. Ñerra'm ñeñña atet o' yeṗohuapa' o'ch yetsotua allohuen ñoñets ñeññ atet anaret Yomporeshot. ²⁴ Ñaña ñeññ po'ñoçh o' pueyochresha' perr Cristo Jesús pa' o' huennerran ñeññ atet muenatse'tyen yechets ñeññ atto es yeye'chyena ya acheñey. Ñeñña' e'ñech atet yentena ñerra'm acorso'tamṗsaretey. ²⁵ Atto Parets Puecamquẽña' o' apuerrey attoch yocrrerra e'ñe cohuen Yomporecop, te'pa' añ pocte' o'ch yeṗa'yena e'ñe cohuen ñeññ atet cotape'chateney Parets Puecamquẽñ.

²⁶ Amachña ÷ha yommo'chueno, ñaña amach ÷ha es yotnare'tanna'tyeno, ñaña amach ÷ha yeye'chapretanneno.

6

Añ pocte' ÷hocmach yeyenpanna'ta attoch yemesha allohuen topateñets

¹ Ñaña o'ch masheñeshacha' ñaña noçhaneshacha' notas, ñerra'm esempo señoñeñ po'psheñeñ o' ṗohua ñeññ ama pocteye' enteno Yomporpa' sa ñeñtes o' cotape'chatterres cohuen Yompor Puecamquẽña' sach alla cotape'chaterrahuet cohuen attoch alla tanterret Yomporecop. Tarraña e'ñe semuereño'pa' e'ñech acopa soctape'chatanet cohuen. Tarraña sapa'cho'ña e'ñech señoña, te't sapa'cho'ña attecma seṗa samña ñerra'm esempo topatenes oneñeñ o'ch ṗatenes ñeññ ama pocteye' enteno Yompor. ² Ñaña añ poctetsa ÷hocmach yeyenpanna'ta attoch ya'huanta'hua allohuen topateñets. Ñerra'm atetña yeṗohuapa' o'ch yetsotuoñ Cristo po'ñoñ ñeññ atet oteney o'ch yemorrentanna'ta.

³ Ñerra'm esesha' pommo'cheñoñ oten, "napa' ama ÷ho es neyeçcateno Yomporecop ñeññ ama pocteyaye", ñeñña' ñañeñach shequẽtsa, tarro'mar po'ñoçh ñeññ atet acheñpa' amach es sherbeno Yomporecop. ⁴ Tarro'mar puesheña'ttsoypa' ÷hoch ñanom yeñota erroñente'ña yocrrena. Ñerra'm yeñotena e'ñe po'ñoçh cohuen yocape'chen yeyoçhropa' ñeñña nanac acsha'po'. Tarro'mar ama acsha'pahuo ñerra'm esempo yeñch po'psheñeñpa' o' ṗohua ñeññ ama pocteye' enteno Yompor. ⁵ Ñaña añ pocte' e'ñe puesheña'ttsoy o'ch ya'huanten topateñets ñeññ yehuenoya.

⁶ Ñaña te'pa' o'ch notas po'poñ: Ñeññ e'mñotene' Yompor po'ñoñpa' añ pocte' o'ch es cohuen apa'yaset ñeññ yeçhatenahuet Yompor po'ñoñ.

⁷ Amach sepantatsche, o'ch señoçh po'ñoçh Yomporpa' ama allocchame'tpahuo. Tarro'mar ñerra'm yeyeçcaten ñeññ cohuentetsa Yomporecop arr partsropa' ñach yapuerre' ñeñña' yocshatterre' tsapatonet. Tarraña ñerra'm yeṗa'yes ñeññ ama cohuenayaye, ñeñña'cho'ña ñach yetsa'taterraya esempohuañen. Ñato' o'ch netma'ntacha atet. Ñerra'm es yenare'tpa' ñeñña'cho' emere'tats tsapatonet. ⁸ Attecma ñaña ñerra'm añ yeṗatse'tyen ñeññ atet muenatse'tyen yechetspa' ñeññara ñeññ yeṗa'yenapa' a'chencataterreycha'. Tarraña ñerra'm añ yocape'chen cohuen ñeññ atet cotape'chateney Parets Puecamquẽña' ñeññara Puecamquẽño'pa' yocrrerrach esempohuañen. Ñato' o'ch netma'ntatererr atet: Ñerra'm te'pa' e'ñe cohuen yenare'ten, tsapatonetpa' nanaccha' coshatterrey. Tarraña ñerra'm te'pa' ama cohuenaye' yenare'teno, tsapatonetña'pa'

nanaccha' llecaterrey. ⁹ Ñaña amach yemuenme'chatsche p̄a'yese' ñeñt̄ cohuenetyetsa Yomporecop. Tarro'mar esempohuañen allempoch e'ñe pocte' enteñ Yomporpa' apuerreycha' ñeñt̄cha' yocshaterre' ñerra'm amach cha yequechpuere. Ñato' o'ch netma'ntatererr atet: Ñerra'm te'pa' ama yemuenme'cheñe nare'tatspa' tsapatoneñña' nanaccha' shonte' me'tarsats. ¹⁰ Ñeñto'marña te'pa' o'ch notas: Chocmach yeyenpa'yese allohuen yamo'tsesha' tayepa'tña orameñ attoch yeyenpanna'ta. Ñaña añña nanac cohuen ñerra'm cho yeyenpueñ yamo'ts ñeñt̄ parro o' yame'ñera Cristo.

Arrpa' all so'terranet añ cartot

¹¹ Te'pa' e'ñe na nototpa' o'ch nequellconas mame'. Sapa' o'ch sent ñeñt̄ ateshaclo'yerr quellecpa' ñeñt̄pa' na quellquene'. ¹² O'ch alla noterrser: Ñeñt̄ muenene' o'ch tsorraspa' añcpa mueneñet attoch judionesha'pa' o'ch cohuen entanet. Tarro'mar ñetpa' ama mueneñeto o'ch e'moñe'tanet judionesha'. Ñetpa' eñoteñet ñerra'm o'ch serrpare'tet atto e'ñe yame'ñeñoña Cristo ñeñt̄ rromats yocop o'ch yequeshp̄apa' añña judionesha'pa' o'ch e'moñe'tanetpa' o'ch cotare'tanet. ¹³ Tarraña ama't ñeñt̄ o' atsorrare'tetuapa' ama ame'ña'hueneto allohuen ñoñets ñeñt̄ atet anaret judioneshacop. Ñetpa' añña muenenet e'ñe same'ñeñoñ ñetpa' o'ch tsorratenset attoch ñetpa' o'ch ommo'chuerrnaset judioneshesho sechets. ¹⁴ Tarraña napa' ama't ahuatapa' ama nemno o'ch atet nommo'chena. Napa' añña nemnen chocmach na'ye'chochtatoñ Yepart-seshar Jesucristo ñeñt̄ rromats corsocho yocop. Ñeñt̄ña name'ñeñoñ o' neunerr ñeñt̄ atet nemnatse'tyese't ahuañmo'cha ñeñt̄ patso'marecpa. Te'pa' o'huañ nommo'cha ñeñt̄ patso'marecpa. Napa' atet nentena ñerra'm acorso'tam̄psareten. ¹⁵ Ama't ya'tsorrare'ttatstapa' ñeñt̄pa' ama es sherbeno. Ñaña ama't ama ya'tsorrare'ttatstopa' ñeñt̄pa'cho'ña ama es sherbeno. Añña nanac sherbets Yomporecop, o'ch yetserrataterr yocta'p̄ña, o'ch yeye'chquerra etserra Yomporecop. ¹⁶ Yomporepa'chña sa'nataya allohuenes ñeñtes atet petsa ñeñt̄ atet o' notuas ñeñt̄ cohuentetsa Yomporecop. Ñaña Yomporepa'chña semueraya allohuenes ñeñtes po'ño'ch Yomporena'tares.

¹⁷ Te'pa' ama pocteyaye ama't puesheñarrapa' o'ch alla orrtaterrnanerr ñeñt̄ atarr echarr nenten nocop tarro'mar ñeñt̄ atet ney'chatenpa' ñeñt̄ña po'ño'ch Yompor pocta'p̄ña. Tarro'mar teme'ttsen orretyena nechets all mareña'yena all atserrp̄atse'tyesnet ahuañmo'cha. Te'pa' ñeñt̄ña eñotatyenahuet po'ño'ch napa' neforrena Jesúsocop ñeñt̄ Yepartseshar yepen.

¹⁸ Te'pa' ñeñt̄ach masheñeshacha' ñaña no'chaneshacha' notas, Yepart-sesharepa'chña sa'nataya, ñeñfara Jesucristopa' ñepa'chña semueraya. Ñeñt̄pa' attetepa'chña Nompore. Allohua.

Pablo

AÑ SAN PABLO PO' CARTA ÑEÑÑ QUELLCAN EFESO'MARNESHA' EFESIOS

Atto Pablopa' quellcan carta añecop ñeññ ame'ñetsa anetso Efeso

¹ Masheñneshacha' ñaña nochaneshacha' ñeññes allohuenes pueyochresha' o' perres Parets ñeññes ame'ñenaya Cristo Jesús all anetso Efeso. Na Pablon sequellquëne'ña añ carta ñeññen Jesucristo puellsensaren tarro'mar ñeññtpa' atet muenen Yompor. ² Te'pa' e'ñe nehuomñcha'teñoñes sa, napa' o'ch notas: Yomporepa'chña sebensare'tamñpene' ñeññ nanac Parets epuet Puechemer Jesucristo ñeññ Yepartseshar yepen. Ñetepa'chña socshatene' e'ñe sa seyoçhro allohuenes.

Atto Yomporpa' e'ñe pa'nateñoñey çhocma apueney ñeññ atarr cohuen sherbets yecamquëñecop

³ Te'pa' aye'choçhtatpahuëpa'ch Yompor ñeññ Pompom pen Yepartseshar Jesucristo. E'ñe yeparrocmateñoñ epay Cristo, Pompomña' e'ñe pa'nateñoñey çhocma cotape'chateney ora allpon ñeññ esocmañen coçhnesha'tetsa all pue'ntaño ñeññ atarr sherbets yecamquëñecop. ⁴ Atet ahuat pa'motroteñ allempo ama ayeçhcatareñttena' añe patserpa' Yomporña' allempoteñña acramñperrey parro epay Puechemer Cristo attoch yapa' a'parrocmataterreycha' epay Puechemer. Tarro'mar añecop acramñperrey Puechemereshot allochña yapa' añach e'ñe yema'yoçhrena ñeññ cohuentetsa Partsocop. Allochña' attochña e'ñe pocte' entueney Yompor, amach eñalle attoch otteñe'cherrey ama't e'ñe mamesha. ⁵ Ñapa' atarr morrentenya; e'ñe puemorrenteñoñey'pa' o' e'ñe a'pocatonay yocop ama't ahuatoteñ. Ñeññtpa' attochña e'ñe puechemer perrey. Ñeññtpa' añña e'ñe etsotatuierre' Puechemer Jesucristo. Yomporpa' e'ñe atet a'pocatuonay tarro'mar ñeññ atto morrentenya ñapa' atetña muenen. ⁶⁻⁷ Aye'choçhtatpahuëpa'ch Yompor atto ñapa' atarr nanac cohuen muerenya. Atto ñapa' ahuo't mueñonay Puechemer Cristo ñeññ rromosets yocop. Atto ashatareñta po'rras ñeññtpa' alloña tsa'tuernaya yo'chñar. Te'ña ya e'ñe yeyenteñoñ Puechemer, Pompomña' attoña o' e'shohuerrnay ñeññ yo'chñar yepe't. Ñeñño'marña yapa' yeñoteñ ñapa' atarr morrentenya. Atto atarr morrentenana Puechemer Jesús'pa' yapa'cho'ña attecma atarr morrentenya e'ñe yeparrocmateñoñ Yompor Puechemer. ⁸⁻¹⁰ Yapa' yeñoteñ Yomporpa' atarr morrentenya tarro'mar ña te'pa' o' eñotatuierrey e'ñe ora ñeññ atet cotape'chen ña ama't ñeññ ama eñotpahuo ahuatoteñ. Ñapa' o' e'ñe eñotaterrey yeyoçhro ñeññ atet muenen ña. Ñeññtpa' añña atet muenen ña: Ñerra'm esempoch çhap allempoch etsoterra allempo onañche' ahuat Yomporpa', allempoña Cristo ñach etsotatuierre' allohuen ñeññ allpon eñall, ama't ora allpon ñeññ pue'ntaño'tsa'yen ama't ñaña ora allpon ñeññ añe patsro'tsa'yen. E'ñech Cristesho a'yapa'cha'huerret allcha'ña e'ñe yeparrocmatuerr allohueney.

11 Yomporpa' atarr coçhnesha' o'patatenana Puechemer Cristo. Ya'naña e'ñe o'patatena atto e'ñe yeparrocmateño' Cristo. Ñehua, ñeñtpa' atet cotape'che't Yompor ahuat yocop. Ñeñto'marña te'pa' atetña o' perrnay ñeñt atet cotape'che't ña ñeñt e'ñe pocte' ente't e'ñe ña pomnenño'. Tarro'mar Yomporpa' ama puenesho po'ñoñ, çhocmach e'ñe etsuerra ñeñt allpon atet onañchen ña. 12 Ñeñtpa' atet e'ñe cohuen pōnay Yompor allochñapa' attochña ya'ye'choçhtaterrñañ ora allohuen ñeñt po'cohuenña pen ña, allohueney ya ñeñtey yanom o' yeyemterrñaña Puechemer ñeñtara Cristo. 13 Sapa'çho'ña te'pa' o' se'muerrñañ Yompor po'ñoñ ñeñt ñoñets e'ñe po'ñoçh alloch sequeshperra saña. Attoña sapa'çho'ña o' same'ñera Cristo. E'ñe seyemteño'ta sa, Yomporñapa' o' chorraterrsa Puecamquēñ ñeñtcha' seño'tate' po'ñoçh o' puechemer perres. Ñehua, ñeñtpa' ñeñtara Parets Puecamquēñ ñeñt atet ote't ahuat Yompor ñeñtcha' aphuerrey esempo. 14 Ñeñtara Puecamquēñ ñeñt apueney ñanom ñeñtpa' ñeñtcha'ña yeñotate' orameñ ñeñt o'patatenya Yompor. Attochña ñerra'm esempo a'queshpaterrey poctacma ñeñtey o'patatena, allempochña yaguērr ñeñt allpon orameñ o'patatenya. Ñeñto'marña añ poctetsa ya'ye'choçhtatoñepa'ch ora allohuen ñeñt po'cohuenña pen ña.

Arrpa' atto ma'yochañpenanet Pablo

15 Ñeñto'marña na te'pa' o'ch notas, napa' o' ne'mare'tas atto sapa' atarr same'ñeña Yepartseshar Jesús ñaña ne'mare'tenes atto sapa' e'ñe cohuen semuerannena allohuenes ñeñtes pueyochresha' perres Parets. 16 Ñeñto'marña napa' çhocma neparasyoso'teñ Yompor allempo nema'yochañpensa. 17 Ñaña nenamuennas Yompor ñeñt Pompor pen Jesucristo, ñeñtara Yompor ñeñt atarr cohuen Partsetets. Añ nenamuennas, Yompor Puecamquēño'pa' e'ño'tatasepa'ch ñeñt e'ñe atet pena ña poctañña. Attochña sapa' esheccha' seño'terrña ñeñt atarr cohuen sherbets ñocop ñeñt ama't ahua'ta sapa' ama seño'teñe. 18 Ñaña ñapa' çhapatonascha' seyoçhro attochña seño'terrñañ ora allpon ñeñt po'cohuenña ñeñt yecuen ñeñtcha' aphuerrey Yompor esempo tarro'mar yapa' ñeñtecopña çhore'terrey ahuatoteñ. Ñaña o'ch señoçh atarr nanac cohuen ñeñtcha' aphuerrey Yompor, ñeñtpa' alloch yapa' corretsayach errponañohuen allohueney ñeñtey pueyochresha' pen. 19-20 Ñaña te'pa' o'ch seño'terrñañ Yompor po'huamenc atarr nanac huomenc ama atpa'huapahuo ñeñt atet ahuamencat peney allohueney ñeñtey ame'ñenaya ña. Ñeñtpa' ñeñtara po'huamenc ñeñt atarr huomenc orrtatan allo tantaterran Puechemer Cristo allempo rroma. O' tantater ñeñtara po'huamencot attoña çhapater ñesho allñapa' anorruerr Pompor po'cohuenrot all pue'ntañño allña e'ñe partsotuerr epuet Pompor. 21 Ña te'pa' atarr añcha'tare'ttena nanac. Atto añcha'tare'ttena ñapa' ñeñtpa' e'ñe metana'tuenan ora allpon allohuen ñeñt añcha'taretetyetsa ñaña ora allpon allohuen allsensaretetyetsa ñaña ora allpon allohuen ñeñt ahuamencatetyetsa ñaña ora allpon allohuen ñeñt cohuen entyetsa ama't allohuen so'chñetsoçhno. Cristoña po'huamencot e'ñe metana'tuenanet allohuenet. Ñaña ñapa' ama mamecpayaya atet peno, ñapa' tayoteñña ñaña

errponañohuencha' atet pena. ²² Ñaña Yomporpa' o' nan Puechemer Cristo allochñapa' ñach pomnaren pene' ora allpon ñeñt esocmañen eñall. Ñaña allohuen allpon ñeñt ame'ñenaya, Yomporpa' attoña apamet Puechemer allochñapa' ñach yochresha'tenahuet allohuenet. ²³ Ñato' o'ch netma'ntacha atet: Allohueney allponey ñeñtey ame'ña'yenaya Cristo, Cristoñapa' e'ñe yeyocher* yepohueñ allohueney, yañapa' Cristo po'chets yepene' allohueney. Ñeñto'mar ñeñtey ame'ñenaya Cristo e'ñe allohueney e'ñe parrocmay, Cristoñapa' e'ñe ña yechorra'huenaya, tarro'mar ñapa' e'ñe po'chets pohueney allohueney.

2

Atto Yomporpa' e'ñe puemuereñoŕey ya o' a'queshpaterrey

¹ Ama't atet ñerra'm sa. Sapa'cho'ña ahuatpa' ña soctape'chyese't ñeñt ama cohuenaye' enteno Yompor. ² Aña seyche't ñeñt atet patse'tyena acheñenesha' arr patsro ñeñt ama ame'ñetso. Allempo sapa' ña same'ñataye't oneñet ñeñt pa'mcha'tareter pen allohuen ñeñt erracmañen añcha'nochetsetsa entot ñeñt ama entpahuoyaye. Ñeñña oneñet poctapñapa' ñeñt atarr coshatene' allohuen acheñenesha' ñeñt atparñattetsa te' arr patsro. ³ Ñehua, ama't allohueney ahuatpa' e'ñe attecma yeyche't. Aña yoctape'chyese't ñeñt e'ñe atet yemnatse'tyen ya, ñeñt atet muenatse'tateney ya yechets ñaña ñeñt cohuen yente't e'ñe yañeña yoctapñof. E'ñe ya yoctapñof ñeñt atet yeyche'tpa' ñeñña e'ñe yoctape'chats'e'tatyesaye't. Ñeñfo'marña Yomporpa' ña o'patatyet attoch coñchaterrey. Ñehua, ama't allohuen po'potantañ acheñenesha' ñeñt atet patse'tyesete'tpa' Yomporñapa' e'ñe attecma o'patatanete't ñeñfara coñcheñets. Ñerra'm allempocmach yerromañapa' e'ñech yechenca'huerrañ, ⁴ tarraña Yomporñapa' atarr nanac amorrentña, atarr muerenya. E'ñe ña puemuereñoŕeypa' o' a'queshpaterrey. ⁵⁻⁶ Ñato' o'ch netma'ntacha atet ñerra'm o' yerroma yo'chñaroñ tarraña Yomporpa' o' alla tantaterrey. Ñehua, allempo tantaterran Puechemer Cristopa' ya'ñaña tantaterr tarro'mar e'ñe yeparrocmaten epay Cristo. Ñaña atto chapaterran Po'cristor pue'ntaño allcha' atarr cosheñtso'tsen, ya'ñaña o' chapaterr allcha' atarr cosheñtso'tseney yaña tarro'mar e'ñe yeparrocmaten epay Po'cristor. O'ch netma'ntacha atet ñerra'mrate' o' yechap Yompor pue'ntaño allcha' yecohuentapretera Cristo. ⁷ Attoña Yomporpa' chocmach orrtatennay puemuereña ama't errponañohuen. Attoña o' chapuonaya yeyochro Yomporpa' atarr muerenya nanac. Atto atarr muerenana Po'cristor ya'ñaña atarr muerena tarro'mar yapa' yeparrocmaterrñaña Po'cristor ñeñfara Jesús. ⁸ Tarro'mar po'ñoçh e'ñe puemuereñoŕey Yomporñapa' a'queshpaterrey e'ñe yeyemteñoŕa ña. Ama añoŕeye'ña a'queshpaterreye atto e'ñe cohuenare' es yepa'yen ya. Yomporpa' e'ñe atta a'queshpaterrey. ⁹ Ñaña ama yetorreñoŕeye' ñocop a'queshpaterreyeña Yompor attoch tsa'terrya ñeñt allpon yetorra ñocop. Tarro'mar ñerra'm e'ñe yetorreñoŕa ya'queshpatenañ, yañapa' chate' atarr cohuen yentena yañeña ñeñt atto ya'queshpatena. Allempoña Yomporpa' amate' a'queshpatañeye' yenteñe. ¹⁰ Tarraña Yomporpa'

* 1:23 Ñehua, po'ñoçh Cristopa' arr atma'ntataret atet ñerra'mrate' ñeñt yoñ yepen.

o' etserraterney yocapña allochñapa' attoch e'ñe cohuen es yepa'yen. Po'ñoch e'ñe yeparrocmateñoñ Cristo, Yomporñapa' o' etserra yečcaterrey. Tarro'mar ñapa' ama't ahuatoteña' atet cotape'che't yocop attochña yapa' e'ñepa'chña cohuenare' es yepa'yen.

Cristopa' e'ñe cohuen amo'tstatanna'tña allohuenacop

¹¹ Ñehua, te'pa' o'ch alla seyerpuerra ñeñt atet sepe't ahuat. Allempopa' atarr allařaro'tsa'yenes Yomporeshoť. Ñehua, sapa' atet eñalletñas ama judioneshayayso. Añña ñeñt atet eñalletena judionesha' ñetpa' aña yečhenet o'ch tsorrannenet. Ñeñto'marña ñetpa' otare'ttenet atsorrare'tnesha'. Ñeñto'mar ñet sañapa' atta sochatse'tenset sapa' año' atsorrare'tneshayayso año' puechemereyayso Yompor. ¹² Po'ñoch allempo sapa' atarr allařaro'tsa'yenes Cristeshoť tarro'mar ama separrocmaterra' epas. Ñaña ama't israelena'tarnesha' ñeñt otenet Yompor pueyochresha', sañapa' ama parro'marneshayayso. Ñaña atto Yompor a'pocatan israelena'tar allempo otanete't ñeñtcha' atet yenpuerranet esempo, saña allempopa' ama't mameshapa' ama se'mare'tpera'. Ama es secueno ama't mamesha ñeñtcha' sa'qeshpaterre' tarro'mar allempo sapa' ama eñalle Seyomporer ñeñtcha' po'ñoch seyemtena saña arr patsroť. ¹³ Tarraña te' sapa' o' señoter Cristo Jesús ñeñt rromats ñaña socpa'na. Ashataretta po'rras ama't saña so'chñarecpa'na. Ñeñto'marña yoten e'ñe po'rrasoť attoña o' čhapteres saña Yomporesho ama't sa ñeñtes ahuat atarr allařaro'tsa'yenes Yomporeshoť. ¹⁴ Tarro'mar Cristopa' atarr amo'tstatanna'tña allohuenacop. Ama't ya ñeñtey judioneshay ñaña sa ñeñtes ama judioneshayayso, Cristoñapa' ahuo't parro'marneshatatey allohueney. Ñaña ñeñt atto atsrre'močen yentanna'tyese't ahuat ñaña'pa' o' huapore'tam̄pesyeny ñeñt yellopa'tetstatyese't ahuat. ¹⁵ Ñeñtpa' atet pōnay Cristo allempo rroma yocop. E'ñe ña po'chtso'tpa' o' a'huañam̄peney atto añcha'nočen yenten añ ñoñets ñeñt atet anare't ahuat judioneshacop, ñeñtara pa'namen a'pocateñtsoñ ñeñt atet anarettetañ ñocpuet ñeñtcha' atet pohuetañ. Attoña allempoteña' o' e'ñe patra yocape'chen ñeñt atet cotape'chateny Cristo. Allempoteñaña amach alla atsrre'močen yentanna'tyerre'te. Ñato' o'ch yot atto ahuat allohuen aheñenesha' ellopa'tetstete't e'ñe ñet počapño'mareta, Cristoñapa' o' a'huañam̄psanet attoña e'ñe parrocmatatuerrey, e'ñe cohuen yamo'tstanna'tuerra allohueney. ¹⁶ Attoña epotanto'marey e'ñe yeparrocmateñoñ, Cristoñapa' e'ñe cohuen amo'tstaterrya ñaña Pomporesho. E'ñe puerromñoť corsochopa' ñaña'pa' o' a'pocatonay Pomporesho. Atto ñapa' o' a'huañam̄perrey ñeñt ahuat atto čhocma ye'moñe'tanna'tyese't.

¹⁷ Ñeñto'marña Cristopa' huapa. Ñach yeserrpare'tatose' cohuen ñoñets atto ñapa' ña amo'tstanna'tatañtetsa. Attecma serrpare'tatosey allohueney, ama't sa ñeñtes ama judioneshayayso ñeñtes atarr al- lařaro'tsa'yenes atet entyenesña Yompor. Attecma serrpare'tatosey ama't yaña ñeñtey judioneshay ñeñtey e'ñe allame'tsa entyeny Yompor. ¹⁸ Attoña allohueney ama't ñeñtey judioneshatets ñaña ñeñt ama judioneshayaye e'ñe Cristeshoťecma e'mñotenyña Yompor

tarro'mar Puecamquëñpa'cho'ña e'ñe patrre ñeñt yechorrenaya allohueny. ¹⁹ Ñeñto'marña te'pa' o'ch notas, sa ñeñtes ama judioneshayayso, te'pa' e'ñe parro'marneshacmay enteneyña Yompor, ama't allohuen ñeñt pueyochresha' pen Parets, tarro'mar allohueny e'ñe puechemerasha' peney Yompor. Ñeñto'marña te' sa ama atteye' entenso atet ñerra'mrrate' ñeñt ama puentare ña, o'huañ atteye' entenes ñerra'mrrate' ñeñt atta huetsa po'poñ anetsot. ²⁰⁻²² Ñeñt atet entenes te'pa' ñato' o'ch netma'ntacha ñeñt atto yatomaten pocoll. Ñehua, atto cohuen torra'yese't allohuen ñeñt allpon Yompor puellsensarnesota' epuet ñaña allohuen ñeñt allpon a'mta'yese't po'ñoñ, ñetpa' añ toma'ntete't ñeñt ñanom yatomaten allo echarr yepen yepaquëll. Ñaña Jesucristopa' añ toma'ntena pocoll po'quellpach ñeñt atarr echarr orrene' pocoll. Ñehua, sa ñeñt atto o' separrocmatara Yepartseshar Cristo, pueconer penes ñaña pueyoßacher penes allohuenes ñeñtes e'ñe huomenc rremuene' pocoll. Attoña e'ñe cohuen sa'yechcataretterra puepahuarr pocoll, ñeñtes pa'paquëll o' perres Parets, attoña o' yecherra Puecamquëñ sesho.

3

Atto Pablopa' allsensaretterra o'ch serrpare'tatan ñeñt ama judioneshayaye

¹ Ñeñto'marña napa' çhocma nema'yochena socop. Neserrpare'tateño'tes sa Cristo Jesús ñeñtes ama judioneshayayso ñeñto'marña na te'pa' yottam'pennet. ² Ñehua, sapa' o'te' se'mare'tuan atto Yomporpa' o' llesenserren e'ñe puemuereño'ten, nach a'potene' po'ñoñ socop sa ñeñtes ama judioneshayayso. ³ Seño'te'ñte' ñaña atto gaterren Yompor atto te'pa' o' neñoterrñañ ñeñt ahuatoteñpa' ama eñotpahuoyaye. Ñehua, ñeñtpa' o' notuanmas mame' necartot. ⁴ Ñerra'm esempoch selleyon ñeñt nequellquënnas allempochña seño'ch napa' po'ño'ch o' çhapona neyo'çhro e'ñe ora ñeñt atet sherbeney Cristo, ñeñt ama't ahuatoteñ ama eñotpahuoyaye. ⁵ Tarro'mar ahuatpa' ama çhena' allempo pocte' enteñ Parets o'ch eñotatey ya ñeñtey arromña'feneshay ama't ñeñt correta' allempo. Ñeñto'marña allempopa' ama e'ñeye' eñotatuanete'te atet ñerra'm te'pa' e'ñe Puecamquëño't e'ñe eñotatuanen allohuen ñeñt pueyochresha' pen ña atet ñerra'm ñeñt puellsensarnesota' pen ñaña ñeñt a'mtene' po'ñoñ. ⁶ Ñeñt eñotatey te'pa' ñeñtpa' atto ama't ñeñt ama judioneshayaye, ñetpa'cho'ña o'patapreteretcha' Yompor ñeñtcha' apuerranet attecma o'patatenya yaña ñeñtey judioneshay. Te'pa' e'ñe separrocmateño't Cristo, te'ña sapa' e'ñe po'çhets penes atet ñerra'm ya ñeñtey judioneshay. Attoña o' e'ñe yeparrocmatuahuerr allohueny. Ñaña atet ote't Yompor ahuat ñeñtcha' atet cohuen perrnay esempo e'ñe Cristesho't attoch a'queshpaterreypa' ñeñtpa' añecpa'ñaña ñeñt ama judioneshayaye. Ñehua, ñet año't a'queshpataretterret atto e'ñe pame'ñeño'tet añ cohuen ñoñets ñeñt alloch yequeshperra allohueny.

⁷ Ñeñto'marña napa' o' naparetterra llesens attoch nach torrerraya serrpare'terre' añ cohuen ñoñets ñeñt alloch yequeshperra. Napa' atto naparetterra amaña año'teye' o' naparetterro atto e'ñe cohuen

es nepa'yen ñeñt e'ñe nocpa. Ñapa' e'ñe puemuereñoŋen o' ahua-mencat perren, ⁸ ama't napa' ama esoyayno ama't mamesha, atarr coñe'tot nesherven. Ora allohuen allpon ñeñt pueyochresha' pen Parets ñeñt sherbene' ña, naña ellonetpa' e'ñe atet nentena ñerra'mrrate' atarr coñe'tot nesherbeñ Parets. Tarraña ama't ama esoyaynopá Yomporña puemuereñoŋ o' muenaterren nach serrpare'tatyese' ñeñt ama judioneshayaye. Attochña nach eñotatyenuhuet atto Cristopa' shonte' esocmañen echyen pa'namen ñeñtña yo'patapreteña ñeñtey yemtenaya ña. Ama't ya arromñaŋaya amate' errotenoŋ e'ñe çhaphuonayo yeyochro ñeñt ora allpon o'patataretey e'ñe yeyemteñoŋ Cristo. ⁹ Ñaña nach eñotatyene' ama't allohuen acheñenesha' ñeñt atet cotape'chennay Yompor. Tarro'mar ñeñtpa' ahuatoteñ ama eñotpahuoyaye tarro'mar ama çhena' allemPOCH a'poterrnay Yompor, ñeñtara Yompor ñeñt e'ñe yeçhcatuahue' ora allpon ñeñt yentyen. ¹⁰ Allochñapa' allohuen ñeñtcha' allpon ame'ñerrtsapa' ñetñapa' orrtateññañetcha' Yompor atto ñapa' atarr esocmañen es eñoten. Attochña ama't allohuen ñeñt amñha'taretetyetsa ñaña allohuen ñeñt allsensaretetyetsa all ento, ñetpa'cho'ña eñotueñet atto Yomporpa' atarr esocmañen es eñoten ñeñt nanac sherbets yocop. ¹¹ Ñeñtpa' atet cotape'che't Yompor ahuat pueyochreshacop ñeñtcha' sherbats allemPoteñ e'ñe errponañohuen. Ñaña añ onañche't ñeñtcha' etsoterre' poctapña ñeñtpa' añ Cristo Jesús ñeñtara Yepartseshar yepen. ¹² Ñeñto'marña yapa' e'ñe yame'ñeñoŋ Cristo e'ñech yeñmañesha' yeçhore'teñ Yompor. Amach yemñha'nañofeye' yeçhore'teñe tarro'mar añ yeyemteññaña Puechemer Cristo ñeñt o' a'poctaterrey Pomprosho. ¹³ Ñeñto'marña napa' o'ch notas, atto señotenen napa' atarr nemueroçhtena socop, sapa' amach sellquẽñoŋa se'charrtatatsto seyoçher. E'ñepa'chña cohuen socshapretenna.

Atto Cristopa' atarr morrentenya

¹⁴ Ñeñto'marña napa' çhocma neconcorpuena Yomproshoneŋ allot nema'yochamñensa. ¹⁵ Ñeñtara Yompor allot huena ora allpon pa'namen acheñenesha' ñeñt e'ñe pamo'tsna'tarecma ðannenet ama't ñeñt pue'ntañot'sa'yen ama't ñaña allpon ñeñt patso'tsa'yen. ¹⁶ Atto Yomporpa' shonte' esocmañen echyen ñeñt atarr nanac cohuenñatsotets Puecamquẽñoŋpa' ñepa'chña atarr ahua-mencat sepene' e'ñe seyoçhro. Nema'yochenoŋpa' atet nenamuennas Yompor. ¹⁷ Ñaña çhocmuepa'ch yeçhena Cristo e'ñe seyoçhro e'ñe seyemteñoŋ ña. Allochñapa' attochña e'ñe sagapoñ Yompor pue-morrenteña attoch e'ñe huomenc sepa' seyoçher Yomprorecop. Atet ñerra'mrrate' tsach ñeñt atarr erçhat e'ñech huomenc orrena patso, allochña pue'chorpa' e'ñech cohuen ten. ¹⁸⁻¹⁹ Allochñapa' attochña atarrcha' huomenc çhaponasa seyoçhro atto Cristopa' atarr nanac morrentenya. Ñeñt allpon atto atarr morrentenyapa' ñeñtpa' ama ahuañaño. Ñato' o'ch netma'ntacha atto yeçhope'chen patso. O'ch ahuey tenonet, ama'tcha' yeçhap ðaçhayo amach yemñtanhuoñeña ñeñt atto morrentenya Cristo. Attecma ñaña toponet ama'tcha' yeçhap ðaçhayo amach yemñtanhuoñeña ñeñt atto morrentenya Cristo. Attecma ñaña onnatonet ama'tcha' yeçhap ðaçhayo amach yemñtanhuoñeña ñeñt atto morrentenya Cristo. Attecma ñaña enoneŋ ñaña o'pononet, ama'tcha' yeçhap atarr allaparpa'

amach yem̄tanhuoñeña ñeñt̄ atto morrentenya Cristo. Ama't ñaña allohuen ñeñt̄ allpon ñeñt̄ ame'ñenayapa' eñochetepa'ch ñamet atto atarr morrentenya Cristo. Tarraña ama't ama e'ñeye' eñotpahuoyaye ora allpon ñeñt̄ atet pena Cristo puemorreneteña yocop, tarraña sapa' señocheapa'ch ama't e'ñe allpona. Ñeñtpa' atet nenamatennas Yompor. Allochñapa' attochña e'ñe poctacma chorrersa Yompor.

Aye'chochtatpahuēpa'ch Yompor allohueney e'ñe yame'ñeñot̄

²⁰⁻²¹ Te'ñapa' aye'chochtatpahuēpa'ch yenteñ Yompor tarro'mar ña ahuamencat yepene'. Ña po'huamencotpa' atetcha' p̄atonay ya ñeñt̄ allpon yenamueñ, elloña ñapa' atetcha' pennay elloch metana'tuonay ñeñt̄ allpon yenamueñ. Ñaña elloña metana'tuennay ñeñt̄ allpon yoctape'chyen. Elloña nanacocmañen e'ñe cohuen es pennay e'ñe po'huamencot ña. Ya'ye'chochtatonepa'ch Yompor allohueney ñeñtey yame'ñeñot̄ chocma yapcha'yena ñocop. Aye'chochtatpahuēpa'ch tayoteñ ama't ñaña errponañohuen tarro'mar ña yapuerre' Puechemer ñeñt̄ Cristo Jesús. Ñeñtpa' attetepa'ch Yompore yocop.

4

Attoch e'ñe yeparrocmatuen allohueney ñeñtey ame'ñenaya Cristo

¹ Ñeñto'marña te'pa' añ notenes ama't na ñeñten ayottam̄psareten e'ñe netorreoñ serrpare'te' Yepartseshar Cristo. Te'pa' o'ch notas: E'ñech cohuen es sorrtyaten ñeñt̄ atet poctetsa añecop ñeñt̄ o' hua'ñerr Yompor ñeñt̄cha' pueyochresha' perr atet ñerra'm sa. ² Ama't mameshapa' amach sañeña entatstatso ñeñteso' atarr nanac sherbets. E'ñe semorrentanna'teñoñ e'ñech acopa es sepanna'tyena. Chocmuepa'ch sa'huantannena ñerra'm erroñ penes po'psheñeñ, amachña se'moñe'tatsche saña. Añcha'ña e'ñech cohuen semorrentanna'tuena allohuenes. ³ Añepa'chña se'nen attoch sepaterrtat soctapña allohuenes ñeñt̄ e'ñe atet paterr cotape'chatenes Parets Puecamquēñ. Allochñapa' e'ñe separrocmateñoñ, e'ñech cohuen sentannena, amachña cha po'poñ sentanna'tueno. ⁴ Tarro'mar po'ñoçhpa' e'ñe yeparrocmatuen allohueney ñeñtey ame'ñenaya Cristo ñaña ñeñt̄ara paterr Parets Puecamquēñ ñeñt̄ yechorra'yenaya allohueney. Ñaña ama't pa'nameney shontey ñeñtey o' chore'terrey Yompor tarraña e'ñe ñeñt̄ara yeyemteñoñ yecuen allohueney ñeñt̄ o'patatenya Yompor ñeñt̄cha' apa'yueserrey. ⁵ Po'ñoçhpa' e'ñe patrra Yepartseshar Cristo ñaña ñeñt̄ara patrra poctapña ñeñt̄ yame'ña'huena allohueney, ñaña e'ñe allohueney attecma yapatare'tta e'ñe yame'ñeñot̄ Cristo. ⁶ Ñaña e'ñe patrra Parets ñeñt̄ Yeyomporer yeṑohuen allohueney, ñeñt̄ara ñeñt̄ ya'mcha'tareter yeṑohuen allohueney. Ñaña ñeñt̄ara Yompor ñeñt̄ yetorratyenaya pa'namen allohueney ñaña ñeñt̄ara Yompor ñeñt̄ yechorra'yenaya yeyoçhro allohueney.

Atto Cristopa' apa'yeney allohueney attoch yetorra'yesa e'ñe po'poñe'ttsocma

⁷ Ñaña Cristopa' apa'yeney allohueney e'ñe po'poñe'ttsocma attoch yetorra'yesa Yomporecop e'ñe pa'namenot̄. Puesheña'ttsoypa' o'ch

apa'yesey errponte' pocte' enten ña. ⁸ Ñehua, ñeñtpa' atet oteney Yompor po'ñoñ ñeñt aquellca'huare't ahuatoteñ, ñeñtpa' atet oten Cristocop: Allempo a'terr pue'ntañopa' ahuanerran allohuen ñeñt e'moñe'tene' attotña a'mchechahuerranet. Allempoñapa' e'ñe pocsheñesho' shonte' es apa'yesnerran acheñenesha'.

⁹ Ñehua, all oten "a'terr pue'ntaño." Ñeñto'marña yeñoteñ allempo ama a'terra'pa' ñapa' entot asuaña, chap ama't allohuanen patso o'pono. ¹⁰ Ñeñtara ñeñt sohuatsa entot ñeñtpa' ñeñtara ñeñt a'terrets ama't e'ñe allohuanen ento. Attotña e'ñe erracmañen epa'huenta Cristo. ¹¹ Ñaña ñeñt atet oten ñoñets ñeñt anare't ahuatoteñ atto shonte' es apa'yenan acheñenesha' ñeñtpa' añ oten ñeñt atto ñapa' e'ñe po'huamencot es apa'yeney attoch yetorra'yesa po'poñe'ttsocma ñocop. Patantarr acheñpa' atet aparettet o'ch torrenet atet ñerra'm ñeñt allsensarettetsa Yomporecop; po'potantaññapa' añcha' torrenet o'ch a'mteññañet Yompor po'ñoñ; po'potantaññapa' añcha' torrenet o'ch serrpare'tatoñet po'ñoñ acheñeneshesho'mar; po'potantaññapa' añcha' torrenet o'ch cohuanpenan allohuen ñeñt ame'ñetsa ñeñtara ñeñtcha' ye'chatenahuet Yompor po'ñoñ. ¹² Attotña ahuanencat pa'yeney allochñapa' ñach po'huamencaro yetorra'yesa po'poñe'ttsocma e'ñe puesheña'ttsocmay ñeñtey pueyochresha' o' perrey Parets. Attochña e'ñe cohuen yeyenpanneño'pa' o'ch huomenc yepanna'ta yeyo'cher Yomporecop allohueney ñeñtey ame'ñenaya Cristo. ¹³ Attotña e'ñe yeparrocmatuen e'ñe yame'ñeño' Yompor Puechemer ñeñt Cristo tarro'mar allohueneypa' o'ch yeñotuerr ñeñt e'ñe cohuenare' ñeñt atet ye'chateney Yompor Puechemer. Attochña o'ch e'ñe atet ye'pohuen yaña ora allpon ñeñt cohuentetsa ñeñt atet pena Cristo ñeñt yechorra'yenaya. Ñato' o'ch netma'ntacha o'ch not, yapa' o' e'ñe yepo'n Cristocop. ¹⁴ Ya te'pa' ama atteye ñerra'm cheshanesh'a' ñeñt ama es eñotetso ñeñt epuoye' cotape'chene' cohuen. Ñehua, atet ñerra'm cheshanesh'a' te'pa' ñato' po'poñcha' cotape'chyenet, ñato' tsapañña' o'ch'cho' cotape'chyeneterr po'poñ. Yapa'cho'ña atet yepena yaña allempo ama yepo'nena' Cristocop. Yaña ñeñtey ama epuoye' yoctene Cristopa' amach errotentot ye'mñocheña ya ashcañ attoch ame'ñatya ña poctapña, attoch o'ch pantatey. ¹⁵ Yapa' añachña e'ñech patrra yoctape'chen ñeñt e'ñe po'ño'ch alloch yequeshperra ñeñt atet oteney Yompor po'ñoñ. E'ñech yemorrentanna'teño' es ye'pa'yen. Attochña e'ñe ye'pohuen allohuen ñeñt atet cotape'chateney Cristo. Attochña yapa' e'ñech ora yoctape'chen e'ñe atet cotape'chen Cristo. Ñeñto'marña esheccha'ña yeparrocmat epay Cristo, ñeñtña Cristopa' yeyo'cher* yepeñ ñeñt chocma yoctape'chatene' cohuen Yomporecop. ¹⁶ Ñato' o'ch netma'ntacha ñeñt atet pena yechets. Ñehua, yechetspa' amach errotentot ellopa'tetsteno. Ama't allemeñ meyna'ten yechets chocma parrocmaten atto rremannenet e'ñe cohuen attotña yenpannenet. Ñaña yapa' yame'ñeño' Cristo e'ñe po'chets p'ohueney allohueney ama't pa'namen acheñrey. Attotña Cristopa' e'ñe parrocmateney ñeñto'marña e'ñe yemorrentanna'teño' o'ch yeyenpannena e'ñe cohuen. Attochña allo'nach yesen atontatnomue' ñeñt atet eñotateney Yompor

* 4:15 O'ch secue' nota 1.23.

o'ch yemorrentannerra allohueny.

Atto Yomporpa' o' etserrataterrnay octapña ñeñt atet muenen ña

¹⁷ Ñeñto'marña te'pa' o'ch notas ñeñt po'ñoç sherbets Yepartsesharecop. Sapa' amach allo'na atet sepa'yesneno ñeñt atet pãtse'tyena ñeñt ama ame'ñenayo Yompor. Tarro'mar ñeñt atet cotape'chatse'tyenet ñetpa' ñeñtpa' e'ñe orrena ama't mameshapa' ama es sherbeno. ¹⁸ Ñetpa' ama çhenaneto pueyoçhreto ñeñt Cristo poctapña. Ñetpa' çha ottenet ñerra'mrrate' atarr checmeto'tsenet. Tarro'mar ñetpa' atarr echarretenet pueyoçhret attoch coteret Yompor. Ñeñto'marña amach enterreto correñets ñeñt huetsa Yomporeshot tarro'mar ama eñoteñeto Yompor. ¹⁹ Ñet po'chñaret ama't mamesha o'huañcha' apencoçhen eñchet. Ñetñapa' e'ñech pocsheñsha' pomuenet po'chets attochña e'ñe ñeñta yonia'yenet ñeñt pa'namen sosya'tsañeçhno ñeñt ama aþapahuoyaye ama't mamesha. ²⁰ Tarraña sapa' amaña atteye' seyçheno. Sapa' aña seyçhen ñeñt atet yeçhateney Cristo. ²¹ Tarro'mar napa' neñotenes sapa' o' se'ññoterrñañ Cristo po'ñoñ allempo yeyçhatas ñeñt e'ñe po'ñoç attoch yeyemtera Jesús. ²² Sa ahuatpa' atta soctape'chatse'tyese't te'ña ñeñtpa' o'ch sa'ypo'ñamper. Sapa' ñeññaña atarr seshcare'taye't attoña añach e'ñe semnatse'tyese't ñeñt ama cohuenayaye ama't mamesha. ²³ Te'ña sapa' añepa'chña setserrataterra' Yompor e'ñe ora ñeñt atet soctape'chyen seyoçhro. ²⁴ Añepa'chña chorraterra' Yompor ñeñtcha' soctape'chatterre' cohuen e'ñe etserra. Ñeñtpa' attochña etserrataterrnas Yompor soctapña e'ñe atet cotape'chen ña. Allochñapa' attoch e'ñe pocte' es sepa'yen arr patsro ñeñt e'ñe po'ñoç cohuen enten Parets.

Arrpa' all cotape'chatyenanet pa'namen ñeñt atarr sherbets

²⁵ Ñeñto'marña te'pa' añ poctetsa socop amach allo'na seshcare'tanna'tyesneno. E'ñe puesheña'ttsos erroten sotannena, e'ñepa'ch po'ñoç sa'poctaten señoñ samo'tseshacop. Tarro'mar e'ñe yame'ñeñot Cristo e'ñe yeparrocmatuen.

²⁶ Ñaña ñerra'm esempo sa'tsrre'mapa' amach alla señoatatoña' o'ch sorrtat ñeñt ama cohuenayaye. Ñaña çhocmach semaçha'nerr e'ñe mamecma amachña ñeññaña sellapsateno. ²⁷ Allochñapa' attoch amach yemnatatsche oneñeñ o'ch atarr topateney, tarro'mar yocop ama pocteyaye o'ch yemnach oneñeñ o'ch atarr ahuañmencat peney.

²⁸ Ñaña ñerra'm eseshas etetspa' añ poctetsa te'ñapa' amach allo'na setyesatsetneno. Ñeñt acheñerpa' taruasepa'ña e'ñe ña potot. Ama't erra'tsena ñeñtcha' po'taruas pa'pa' ñeñt taruaspas e'ñe cohuen ama apencoçhenayaye. Allochñapa' attotcha' echenan shonte' attoch apa'yesan ñaña po'potantañ ñeñt atarr es pallta'yetsa.

²⁹ Amach yeñosatse'tyesatsto ñeñt ama cohuenayaye ama't mamesha. Añcha'ña yeñosyen ñeñt e'ñe cohuen entuen allohuen acheñenasha' ñeñtcha' yenpuene' ñeñt e'ññotets. Attochña ñetpa' o'ch huomenc pet pueyoçher Yomporcop. ³⁰ Attochña amach çha yellcateññañe Yompor Puecamquëñ ñeñt yeçhetsa yeyoçhro ñeñtara ñeñt Puecamquëñ pen ñeñt atarr cohuen Parets. Tarro'mar puechorreñofey ya, Parets Puecamquëñ ñeñtpa' ñeñtña yeñotatene' yapa' puechermer peney Yompor tayoteñ ñaña esempohuañencha' allempoch ya'queshpataretterra.

³¹ Amach atsrre'moçhen sentanna'tatsto ama't seyoçhra. Allochñapa' attoch amach çha sa'tsrre'mare'tatanneno, attochña amach seche'çhame'tanneno. Ñaña amach sesasare'tanna'tatsto. Ama't mameshapa' amach se'moñe'tanna'tatsto. ³² Añcha'ña e'ñech cohuen yentannena ñaña e'ñech cohuen yemuerannena. Ñaña añña poctetsa çhocmach ye'pretnannena atto Yomporpa' o' peretnerrey yaña. Ñeñtpa' añoñ peretnerrey atto rroma Puechemer Cristo yocop.

5

Ñeñtey puechemer pen Yomporpa' o'ch yorrtaten ñeññ atet muenen ña

¹ Yomporpa' atarr morrentenya, attoña e'ñe puechemer peney. Ñeñto'marña yocoppa'çho'ña añ poctetsa o'ch yorrtateññañ ñeññ atet cohuenare' es pa'yen ña ñeññ Yeyomporer yepen. ² Elloña Cristopa' atarr morrentenya. Ñeñto'marña e'ñe pocte' eñch attoña poma ñañeña atto rroma yocop atet pete't ahuat allempo muetsete't carrnero Yomporecop. Ñeñña e'ñe cohuen ente't Yompor e'ñe atet ñerra'mrrate' ñeññ allo atarr eñmosañtampsachete't ahuat ña. Atto atarr morrentenya Cristo, yocoppa'çho'ña añ poctetsa e'ñech cohuen yemorrentanna'tuena.

³ Ñaña amach ye'pa'yesatsto ñeññ ama pocteye' enteno ña. Ama't parrocha amach yechtatsche ñeññ ama yetaporeyaye, ñaña coyane-sha'pa' amach agapatstano ñeññ ama puerrollareyaye. Ñaña ama't mameshapa' amach ye'patsto ñeññ atarr sosya'tsañyets ñaña ama es aye'chapretanna'tpahuo. Ñeññ atet poctetsa allohuenacpay ñeñtey pueyochresha' o' perrey Parets. Allochñapa' ama't parrochapa' amach erroteno't otyeto' yapa' atto yepena. ⁴ Ñaña serrpare'tatse'teñets sosya'tsañ ñeññ ama aserrpare'tpahuoyaye ñeñto'marña yapa' amach atet ye'patsto ama't mamesha. Ñaña otatse'teñets ñeñtpa' ama sherbeno Yomporecop ñeñto'marña yapa' amach atet ye'patsto. Ñaña allocchame'tanneñets ñeññ ama ayellsheñe'chpahuoyaye allo, ñeñtpa'çho'ña amach atet ye'patsto. Añcha'ña yapa' Yomporepa'chña yeparasyoso'ten. ⁵ Sapa' señoñeñ ñeññ cañoresha'tetspa' amach es o'paterroña Yomporesho ama't e'ñe esempaña allcha' añcha'tare'terra Cristo epuet Pompor. Ñaña allohuen ñeññ eñotene' pa'namen sosya'tsañ, ñeñtpa'çho'ña amach es o'patatare'terrtsoña all añcha'tare'tena Yompor. Ñaña ñeññ atarr es ye'chapretetsa añña po'yomporer pen ñeññ atarr es ye'chatse'tatene'. Ñeñto'marña ñapa'çho'ña amach es o'patateñoña Yompor all añcha'tare'tena. ⁶ Amach se'ññotatsche acheñ ñeññ muenene' o'ch shecare'tas o'ch otas ñeñtcha' atet se'patse'ta samña ñeñtpa' e'ñe pocte' Yomporecop. Tarraña napa' o'ch notas, ñeñtpa' ama po'ñoçhoyaye, tarro'mar Yomporpa' çhocmach coñchatuerran allohuen ñeññ atet atpare'tetsa, ñeñtpa' o' e'ñe notuanmas. ⁷ Ñeñto'marña te'pa' o'ch notas, sapa' amach socshapretatstaneto ñeññ atet patse'tyenet.

Ñeññ atet yorrtatyen allempo o' yocrrerra e'ñe cohuen puetaro

⁸ Nehua, sapa' ahuatpa' po'ñoçh e'ñe atet socshapretatse'tyese't allempo sapa' checmeta socrra'yese't. Tarraña te' e'ñe seyemteño't Yepartseshar o' çhapatonas seyoçhro ñeññ cohuen enten ña. Ñeñto'marña te' socoppa' añ poctetsa o'ch sorrtrateññañ ñeññ cohuen enten ña, atto sapa'

o' socrrerra puetaro. ⁹ Ñehua, ñerra'm puetaroch yocrrrena, ñeñpa' atetcha' yorrattyen. E'ñech cohuenacma es yeþanna'tyena ñeñt' e'ñe pocte' enten Yompor ñaña ñeñpa' ama shequëñtsoyaye ama't mamesha. ¹⁰ Ñaña socoppa' añ poctetsa o'ch sema'yoçhra eñotnomue' ñeñcha' atarr cohuen entapretenes Yepartseshar. ¹¹ Ñaña te'pa' o'ch alla noterrser; amach socshapretatsche ñeñt' atet þatse'tyenet, ñeñpa' ama es sherbeno ama't e'ñe mamesha. Tarro'mar ñetpa' checmeta correnet. Sapa' añcha'ña sorrattyen ñeñt' e'ñe cohuenare' allochñapa' attoch eñochet ñeñt' atet þatse'tyenet ñet, ñeñt' ama't mameshapa' ama cohuenaye' enteñe Yompor. Ñeñpa' ñato' yapa' o'ch yot, yapa' o' ya'puetarsamþsanet ñet ñeñt' atet þatse'tyenet checmeto. ¹² Ñehua, sapa' señoñeñ ñeñt' atet þatse'tyenet a'nahua. Ñerra'm ya'mete'pa' ñeñpa' atarr apencoçhen. ¹³ Ñaña ñerra'm ya'puetarsamþsanet ñet ñeñt' þatse'tyenet ñeñt' ama cohuenayaye, attoña ñetpa' o'ch çhapanet pueyoçhro ñeñt' atet penet ñetpa' po'ñoçh ama cohuenayaye. ¹⁴ Ñeñto'marña socoppa' atet açhotenes añ ñoñets:

Papa' ñeñteþ atet þatse'tyetsa e'ñe atteþ ñerra'm çha atarr rroma pemuen. Te'ñapa' o'ch pe'manerra o'ch petanterra atto rroma pemuen. Cristopa' ñach þa'puetarsamþperre'.

¹⁵ Ñeñto'marña te'pa' o'ch notas: Señoña e'ñe erroñente' seþa'yen, ñato' cohuyente' ñato' amate' cohuenayaye. Amach atet seþatsto atet ñerra'mrrate' ñeñt' ama es eñotetso. Añcha'ña atet seþa'yen atet ñerra'm ñeñt' atarr es eñotets ñeñt' cohuentetsa Yomporecop. ¹⁶ Te'pa' arosña atta es pueçhatstatsa çhochña yetorra Yomporecop tarro'mar te' acheñenesha' atarr sosey yeçchatyenet arr patsro. ¹⁷ Ñeñto'marña notenes amach atta es sepçhatsto ñeñt' atet pena ñeñt' ama es eñotetso. Sapa' añcha'ña o'ch señoñeñ ñeñt' atet muenen Yepartseshar ñeñcha' atet yeþa ñeñt' cohuen enten ña. ¹⁸ Ñaña o'ch notas, amach seposa'tatsto; ñeñpa' çhach cotape'chatenes sosya'tsañeçhno attoch a'puerrataterres. Amach seposa'tatsto, añepa'chña sechorrenaya ñeñt'cha' socshatene' ñeñt'ara Parets Puecamquëñ. ¹⁹ Añepa'chña e'ñe socshapretannena ñeñt' atet saçhoteñ Yepartseshar. E'ñepa'chña socsheñesha' seyoçhrocmañen semorreçhena allo ya'ye'choçhtateññañ Parets, ñaña allohuen morreñtsoçhno ñeñt' Partsocop. ²⁰ E'ñe yeyerpueñoñ Yepartseshar Jesucristo çhocmuepa'ch yeparasyoso'teññañ Pompore allohuenacop pa'namenacop. ²¹ E'ñe semorreñteñoñ Cristopa' e'ñepa'chña cohuen same'ñannena. Attochña yecohuentateññañ Cristo.

Arrpa' all cotape'chatan yacma epuet puetapor

²² Ñeñtes arrollaretes o'ch notas, añ pocte' serrollarpa' ñachña e'ñe same'ñena atet yepen ñaña Yepartseshar Cristopa' ñachña e'ñe same'ñena. ²³ Tarro'mar serrollarpa' añ poctetsa atetcha' senteñ ñerra'mrrate' samo'mte' sepeñ. Attecma yepena yaña allohueney ñeñtey ame'ñetsa, añ Yamo'mte' yepen Cristo ñeñt' yecuamþene'. Tarro'mar ñapa' o' a'quesþaterrey ñeñtey o' po'çhets perrey. ²⁴ Ñeñto'mar añ pocte' serrollarpa' ñach pomnaren sepene' allohuenacop, attecma yaña ñeñtey ame'ñetsapa' añcha' pomnaren yepene' Cristo.

25 Te'pa' o'ch notas samña ñeñtes ataporetes, añ poctetsa e'ñech cohuen semorreñcha setapor. O'ch semuerya nanac atet peney Cristo atarr muerenya yamña ñeñtey ame'ñenaya ña. Ñeñto'marña puemorrenteñoŕtey ya ñapa' e'ñe pocte' eñch o'ch rroma yocop. 26 Allochñapa' attochña e'ñe e'shohuerrnay allohuen yo'chñar o'ch a'cohuentaterray Partsocop. Ñehua, ñeñt toma'ntena allempo yapataretterra Yomporecop. Ñama po'ñoñpa' ñeñtña e'ñe ya'cohuentaterrre'. 27 Allempoña o' ya'cohuentataretterra' ñapa' mueneñ o'ch aguërrey allohueny ñeñtey ame'ñenaya ña. Ñama ya atto o' ya'cohuentataretterra' amach alla eñalletterre'te ama't mamesha ñeñtcha' ya'sosyaterrayerr. Amach alla enterrre'te atto ama cohuenaye' yorrteno ama't errotena. E'ñechña ya'cohuentataretterra Partsocop. 28 Po'ño'chpa' ñeñtes ataporetespa' añ poctetsa socop e'ñepa'ch cohuen semuerya setapor e'ñe atet atarr semorrentena sañeña. Tarro'mar ñerra'm atarr yemorrenteña yetapor ya'naña atarr morrentetsa, tarro'mar yetaporpa' ñeñtara yechets yepen. 29 Ñehua, yapa' yeñoteñ ama't e'ñe puesheñarroŕteya ama yetsena'tenoña e'ñe ya yechets. Chochña e'ñe cohuen yerren esheccha' e'ñe huomencna'ntateney. E'ñech cohuen yecuen e'ñe ya yechets. Attecma peney ñama Cristo atarrcha' cohuanmpeney ya allohueny ñeñtey ame'ñenaya ña. 30 Tarro'mar ñapa' ña e'ñe po'ño'ch po'chets pohueney ya. Pa'namenot po'chets pa'yeney allohueny ñeñtey ame'ñenaya ña. 31 Ñehua, Yompor po'ñoñ ñeñt aquellcaret ahuatoteñ ñeñtpa' atet oten: “Ñeñto'marña ñerra'm esempo yesna'ta amapa' coyanesha'pa' o'ch echan puerrollar, añ pocte' o'huañcha' tama yeyemteña yachor ñama yompor. Allochñapa' attoch e'ñe yeparrocmaten epay yetapor. Attoña e'ñe epsheño'mareypa' e'ñech patrra yechets yepen.” 32 Ñeñtpa' ahuatoteñ ama eñotpahuoyaye ñeñt toma'ntatenya añ cotapñats. Tarraña te'pa' napa' noten añ yetma'ntenaya ñeñt atarr cohuen ñeñt atto e'ñe yeparrocmaten epay Cristo allohueny ñeñtey ame'ñenaya ña, ñeñtara ñeñt po'chets yepene' allohueny. 33 Ñeñto'marña o'ch alla noterrser; e'ñe puesheña'ttsospa' e'ñepa'ch cohuen semuerya setapor atet atarr semorrentena e'ñe sañeña. Ñama ñeñtes coyaneshaspa' o'ch notas, añ poctetsa ñama socop semorrenteñoŕpa' same'ñyach serrollar, ñama e'ñech cohuen senteñ.

6

Arrpa' all cotape'chatan cheshanesh'a' epuet pamo'mte'

1 Te' cheshaneshacha' o'ch notas ñeñt poctetsa socop ñeñtcha' atet sepa. E'ñe same'ñeñoŕ Yepartseshar Cristo chocmuepa'ch e'ñe cohuen same'ñeña sompor ñama sachor, tarro'mar ñeñt poctetsa socop. 2 “Ñama e'ñe semorrenteñoŕ somporpa' chocmuepa'ch semtcha'na'ch ñama sachor” tarro'mar ñeñtpa' ñeñt e'ñe ñanom atet ot Yompor ñeñtcha' atet yepen yamo'mte' allochñapa' attoch e'ñe cohuen a'natenya Yompor. 3 “Attoch pa'nateñoŕes e'ñe cohuenpa' atomatcha' socrrena arr patsro.”

4 Te'pa' o'ch notas samña ñeñtes pamo'mte' pen cheshanesh'a', se'moñe'teñoŕpa' amach sa'tsrre'mare'tatatsche sacñefarnesha'. E'ñechña añeñolloteñ e'ñe secuanp'eñoŕ cohuenpa' o'ch seychatyenanet

e'ñe cohuen attoch ñetpa'cho'ña o'ch ame'ñeret ñamet Yepartseshar Cristo. Ñaña amach semnatatstaneto o'ch atfa atarr atpare'taset.

Arrpa' all cotape' chatan ataruasañ epuet po' patronar

⁵ Te'pa' o'ch notas samña ñeñtes ataruasataretēs ñeñt pōctetsa socop. Chocmach same'ñya ñeñt setaruasatene' arr patsro. Ama't erra'tsena apuenset ñeñcha' setaruas sepa' e'ñechña semcha'na'teñoť setaruasen e'ñe cohuen seyočhrocmañen. Ama't acheñečpa setaruasenpa' atetcha' setaruasen ñerra'mrrate' Cristocop setaruasen.

⁶ Amachña e'ñe puecuampeñoťesa sema'yore'teno taruasats attoch e'ñe cohuen socshach sepatronar attoch e'ñe pocte' entenes. Añcha'ña ama't acheñečpa setaruasenpa' e'ñechña atet sesherbeñ cohuen ñerra'mrrate' Cristo sesherben. E'ñechña seyočhrocmañen sepena cohuen ñeñt atet muenen Yompor. ⁷ E'ñe semneññoťpa' e'ñech cohuen socsheñeshocmañen setaruasen tarro'mar ama ñapfa' acheñečop setaruaseno, Yomporečpa'naña setaruasen. ⁸ Te' sapa' e'ñe señoťeñ ama't erra'tsente' cohuen es yeřa'yen, Yepartsesharñapa' chocmach alla aphuerrey e'ñe puesheña'ttsoy ñeñcha' atarr cohuen yocshaterre' ama't añ acheñer ñeñt ataruasataret amapa' añ acheñer ñeñt e'ñe cohueno'tsen, attecmach apa'yesuerranet ñeñcha' atarr cohuen coshaterrahuet ñet.

⁹ Ñaña te'pa' o'ch notas ñeñtes taruasatets. Sapa'cho'ña atetcha' sepoñ sa'taruasañer ñeñt atet pōctetsa, amachña čha sechemama'tyenaneto. Señočepa'ch sapa'cho'ña sechen Samo'mte' Cristo ñeñt pue'ntaño'tsen. Ñeñtara ñeñt Pamo'mte' pen allohuen sa'taruasañrenesha'. Ñaña ñapa' ama puesheña'ttsa morrenteno.

Ñeñt apueney Yompor ñeñcha' yemoñenaya attoch amach alla a'puerrataterrye oneñeť

¹⁰ Allohuanen arr necartōť o'ch masheñneshacha' ñaña nočhaneshacha' notas, ahuamencatepa'ch pas Yepartseshar tarro'mar ñapa' ña atarr ahuamencattetsa. ¹¹ Ñeñto'marña añ pōctetsa yocop o'ch yaguerrñañ ora allpon ñeñt apueney Yompor allochñapa' ñeñcha'ña yemoñenaya attoch amach alla a'puerrataterrye oneñeť. Tarro'mar yeñoťeñ oneñeťpa' chocma e'nenan attoch shecare'teney. ¹² Tarro'mar po'ñočhpa' ama acheñeye' yečllareno ñeñt entpo' po'čets. Yapa' añña yečllaren oneñeťečhno ñeñt ama erroť ařapahuo e'ñe ya yotoť tarro'mar ñeñtpa' ama entpahuoyaye po'čets erroťente'ña. Tarraña ñeñtpa' atarr amcha'nočhetyena ñaña atarr ahuamencatečhno. Attoña pomnaren penan allohuen acheñenesha' arr patsro ñeñt řatse'tyene' ñeñt ama cohuenayaye ñeñt checmeto'tsena. Ñeñtara oneñeťečhno ñeñt ama cohuenaye' yečhcatetso ñeñt erracmañen amcha'nočhetyetsa entōť. ¹³ Ñeñto'marña notenes, o'ch saguerrñañ allohuen allpon ora ñeñt apueney Yompor allochñapa' ñeñcha'ña allo yemoñena attoch amach alla a'puerrataterrye oneñeť ñerra'm esempo atarr nanac topateney. Tarraña ama't allempo pa'namenot atarr topateney yañapa' amach erroťenot a'puerrataterrye. ¹⁴ Te'pa' o'ch neñotatas ñeñt apueney Yompor ñeñña yemoñenaya attoch ama a'puerrataterrye oneñeť allempo topateney. Ñato' o'ch netma'ntacha ñeñt atet

pa'namen chorra'yena solltarnesha' allempo quellarenet.* Ñeñtñanam ñeñtpa' Yompor po'ñoñ ñeñt e'ñe po'noch ama shequëñtsoyaye ama't mamesha. Ñeñto'marña yapa' e'ñech yeñmañesha' es yeþa'yen, amach yeshcare'tanna'tyesatsto. Nato' o'ch netma'ntacha ñeñtpa' ñeñtña yechanar yepen ñeñtcha' ahuamencat yepe' atet ñerra'm solltar apueñet chanarets alloch chanena ñeñt quellaratén. Elloñapa' e'ñepa'ch cohuen es yeþanna'tyesnoma ñeñt atet e'ñe pocte' enten Yompor. Ñeñtpa' añ toma'ntena asrom atet ñerra'mrrate' ñeñt chorrena solltar ñeñt a'natene' puesomap allempo quellarena. ¹⁵ Te'ñapa' o'ch se'shpo'cha e'ñe socsheñesha' o'ch ahues allcha' seserrpare'tyena' atto Yomporpa' o' amotsterrya attochña e'ñe cohuen a'qeshþaterrey. Ñeñtpa' añ toma'ntena atet pena solltar o'ch nan po'sapatpa' o'ch ahuo' allcha' quellarosa. ¹⁶ Elloña ñeñt nanac sherbets ñeñtpa' añ, chocmuepa'ch e'ñe cohuen yeyemteña Yompor ñeñt atet oteney. Ñeñtpa' añ toma'ntena solltar pue'scudo allo a'natena allochñapa' attoch ama etaretteneto. Nehua, atto huomenc topateney oneñtñato' o'ch netma'ntacha ñerra'mrrate' ñapa' cho sanapecheney po'chopaþo ñeñt huoretnets. Tarraña ya e'ñe yeyemteñoñ Yompor ñeñtpa' ñeñtña ye'scudo yepen ñeñtcha' chocma emayene' oneñt po'chopaþ ñeñt huoretnets allo sanapecheney. ¹⁷ Ñaña yapa' yeñoteñ Yomporpa' te'pa' o' a'qeshþaterrey, ñeñtña yemoñenaya. Ñeñtpa' añ toma'ntena atet pena solltar o'ch na'nman asret poño attoch ama etto'cheto. Ñaña o'ch yerrmoñ Yompor po'ñoñ yeyochro ñeñt atet eñotateney ña Puecamquëñoñ; ñeñtpa' ñeñtña yepanmet yepen alloña yeçllareñña oneñt. ¹⁸ Ñaña sapa' chocmuepa'ch sema'yochena ama't erroteno'tsensa. Añcha'ña seyepuene' Parets Puecamquëñ. Allochñapa' attochña chocma sema'yochrena ma'yochatsa. O'ch senañ Yompor ora allpon ñeñt sepalltena, ñaña chocmuepa'chña e'ñe sema'yochamþesueña allohuen ñeñt pueyochresha' pen Parets. ¹⁹ Napa'cho'ña chocmuepa'chña sema'yochamþenna. O'ch senamon Yompor nocop allochñapa' ñachña ne'ñoratene' attoch amach nemcha'nañoña neserrpare'teññañe po'ñoñ. Allochñapa' attochña neñotatyesanet cohuen ñoñets ñeñt alloch e'ñe yeqeshþa'huerra allohueney; ñeñtpa' ama eñotpahuoyaye, ama't ahuatoteñ. ²⁰ Napa' allsensareten ñeñten eñosyets e'ñe cohuen Yomporecop. E'ñe neñosyeñot Yomporecop ñeñto'marña te'pa' yottamþennet. Ñeñto'marña nemneñ o'ch sema'yochamþenna attoch amach nemcha'nañoña neserrpare'teno ñeñt e'ñe cohuen ñoñets alloch yeqeshþa'huerra. Attochña e'ñe nocsheñeshocmañen neserrpare'ten tarro'mar ñeñt e'ñe cohuen atet poctsa nocop.

Arrpa' all so'tnerranet e'ñe po'cartot

²¹⁻²² Te'ñapa' o'ch notas, o'ch nemñonas masheñ Tíquico ñeñt atarr nemorrentena. Napa'cho'ña chocma atarr cohuen torrena Yepart-sesharecop. Napa' ñeñto'marña o' nemñe sesho allochñapa' ñach señotatuerrre' ñeñt atet yepena ya arr. Attochña atarr coshatuerres seyoçhro.

* **6:14** Nehua, ñeñtpa' atet chorra'yese't ahuat solltarnesha' allempo quellarete't.

²³ Te'ña masheñeshacha' ñaña nočhaneshacha', Yomporepa'chña semorrentanna'tataya e'ñe same'ñeñoť, ñeñtara Parets epuet Puechemer Jesucristo ñeñť Yepartseshar yepen. Ñetepa'chña socshatene' seyočhro.
²⁴ Ñaña ñetepa'chña e'ñe sa'natenaya allohuenes ñeñtes e'ñe cohuen morrentenaya Yepartseshar Jesucristo. Ñeñť atto semorrenteñapa' amach ahuañañatťerro ama't e'ñe ahuaťa. Ñeñťach notas, ñeñťpa' attetepa'ch Nompore. Allohua.

Pablo

AÑ SAN PABLO PO' CARTA ÑEÑÑ QUELLCAN FILIPOSO' MARNESHA' FILIPENSES

Pablopa' quellcan carta all ayottam̄psarettena; añecop quellquë' ñeññ ame'ñetsa anetso Filipo

¹ Masheñeshacha' ñaña nochaneshacha' ñeññes allohuenes o' pueyochresha' perres Parets e'ñe separrocmateñoi Cristo Jesús all anetso Filipo, ama't ñaña sa'm̄cha'tareterneshohuen ñaña ñeññes díaconochnos ñeññes sherbets all puerahuo. Na Pablon epan masheñ Timoteo ñeññen sequellquëne'ña añ carta. ² Te'pa' e'ñe nehuom̄cha'teñoñes sa, napa' o'ch notas: Yomporepa'chña sebensare'tam̄pene' ñeññ nanac Parets epuet Puechemer Jesucristo ñeññ Yepartseshar yepen. Ñetepa'chña socshatene' e'ñe sa seyoçhro allohuenes.

Arrpa' atet ma'yocham̄penanet Pablo

³⁻⁴ Te'pa' o'ch notas, allempo nema'yocheña Yompore ñeññ neyemtena na, neyerpueñoñespa' çhocma nocshensa Yomporeshot. Ñeñño'marña allempo es nenamuennas Yomporepa' çhocma nocshensa Yomporeshot allohuenes. ⁵ Tarro'mar allempoteñ saguër Cristopa' sapa' allo'na't sesen ame'ñatsa teme'ttsen. E'ñe same'ñeñoñpa' attoña selcapretna attoch errotento'pa' o'te' epa'huerra erracmañen añ cohuen ñoñets alloch yequeshperra. ⁶ Ñaña napa' neñotenes atto Yomporepa' o' ame'ñatasa ahuaña, te'ñapa' ñepa'chña allo'na ahuañencat sepa'nmue' e'ñe ñocop, tayoteñ ama't esempohuañencha' huerra Jesucristo pue'ntañot. ⁷ Ñeññ atet nentapretenespa' ñeññpa' e'ñe pocte' tarro'mar atarr nemorrentensa e'ñe neyoçhrocmañen. Ñeñño'marña yelcanna'teñoñpa' yeñoñteñ Yompore e'ñe puemuereñoñpa' amach a'ypo'ñerrno na ama't ñaña sa. Atet napa' ama't cárcelo'tsenen Yompore puemuereñoñtenpa' amach a'ypo'ñerrno. Ñaña ñerra'm allempo achm̄are'tenet añ cohuen ñoñets alloch yequeshperra, atto napa' nemoñena añ cohuen ñoñets, Yompore puemuereñoñtenpa' çhocma ahuañencat penen. Ñaña allempo name'ñateña acheñenesha' añ cohuen ñoñets alloch yequeshperra, Yompore puemuereñoñpa' çhocma ahuañencat penen. ⁸ Ñeñño'marña te' Yomporepa' eñotenen po'ñoçh te'pa' nanac neyerpuensa. E'ñe atet nanac nemorrentensa ñerra'm atet morrentenya Jesucristo e'ñe cohuen. ⁹ Atet nenamuennas Yompore socoppa' atet noten, allo'nepa'ch sesen morrentanna'tnomtsa nanac ñaña allo'nepa'ch sesen eñotnomue' ñeññ nanac sherbets yamo'tseshacop. Allochñapa' attoch çhocma yorrtaten yemorrenteña e'ñe po'ñoçh. ¹⁰ Attochña señoçh erra'tsent'e'ña nanac cohuen sherbets Yomporecop. Allochñapa' e'ñe señoñteñoñpa' añepa'chña atet sepa'yen ñeññ e'ñe cohuenare'. Allochñapa' amach cha sa'yohuaretterro ñerra'm esempohuañencha' huerra Cristo. ¹¹ Ora atet nenamuennas Yompore socoppa' atet noten, e'ñe same'ñeñoñ Jesucristo poctacmapa' añepa'chña cohuen atet sepa'yen ñeññ nanac sherbets Yomporecop. Ñerra'm atet yepenapa' attochña e'ñe cohuen ya'cshapretarettena Yompore po'cohuenña.

Atto epatuan allohuenacop Yompor po'ñoñ e'ñe cárceloĩ

¹² Ñeñto'marña masheñeshacha' ñaña noñheshacha' o'ch neñotatas, ama't atto ayottam̄psareten cárcelo ñeñtpa' ama añecpayaye attoch o'ch epatare'tenan cohuen ñoñets alloch yequeshperra. Elloña e'ñe attotpa' allo'nach sen epa'huatsa Yompor po'ñoñ. ¹³ Ñeñto'marña te'pa' allohuen guardianesha' ñeñt cohuan̄pene' añcha'taretepo' ñetpa'cho'ña o' e'ñe eñotuanet atto ayottam̄psareten cárcelopa' añoñña e'ñe name'ñeñoĩ Cristo atet pennet. Ñaña ama't pa'namen acheñenesha' te'pa' o' eñotuanet ñeñtecop nemueroçhtena. ¹⁴ Ñeñto'marña te'pa' shonte' masheñesha' e'ñe allo'na senet yemuetnomuet Yepartseshar Cristo poc-tacma, tarro'mar ñetpa' atet entennet e'ñe name'ñeñoña Cristo nemue-roçhtena cárcelo. Ñeñto'marña ñetpa'cho'ña o'huañ mecha'na'tet ser-ppare'tet Yompor po'ñoñ.

¹⁵ Ñehua, po'ñoçhpa' eñall puesheña'tets tarrecpach serrpare'tenet Cristo e'ñe pue'matare'teñoñetan na. Tarraña po'psheññeçhnopa' e'ñech pocsheñeshocmañen a'poteññañet Yompor po'ñoñ. ¹⁶⁻¹⁷ Añpa' e'ñe puemorreneteñoñetan atet penet tarro'mar ñetpa' eñotennet napa' anareten atto nach moñenaya añ cohuen ñoñets alloch yequeshperra ñerra'm esempo achm̄are'teñet. Tarraña ñeñtña serrpare'tene' Cristo po'ñoñ e'ñe ñocpuetapa' amach pueñmañeshacmaye' serrpare'teneto. Ñetpa' çhate' otenapuetañ allo'nach atsrre'moçhen entatnennet ama't cárcelo'tsenen.

¹⁸⁻¹⁹ Ñehua, ama't atetpa' nocoppa' e'ñe pocte'. Ama't erroteno serrpare'tenet cohuen ñoñets Cristocop, nocoppa' e'ñe pocte' nenteñ. Tarro'mar ama't puehquẽñme'chatsa serrpare'tenet Cristo, ama't ñaña pueñmañeshoçha' serrpare'tenetpa' napa' ñeñtcha'ña nanac nocshatene'. Ñeñto'marña napa' çhocmach nocshena tarro'mar napa' neñotenes sapa' çhocma sema'yocham̄penna ñaña neñotena Jesucristo Puecamquẽñpa' ñeñtña ahuañmenca't nepene'. Ñeñto'marña neñoteñ añ mueroçhteñets tsapaonetpa' a'pocataretcha' e'ñe cohuen nocop.

Atto Pablopa' ora allpon corre't arr patsropa' ñeñtpa' e'ñe ora Cristocop

²⁰ Ñeñto'marña e'ñe noçsheñesha' necueñ tarro'mar neñoteñ amach apencatare'teno ama't mamesha. Ñaña amach nencha'nañotayaya ne'ñoñeno e'ñe cohuen Cristocop. Attochña napa' acshapretpo' entapretennet Cristo, ama't napa' erroteno'tsenencha' ama't ñerra'm nerroma amapa' ñerra'm ora nocrenmeñ. Atet ahuatoteñpa' te'pa'cho'ña attecnuetpa'ch pena. ²¹ Tarro'mar napa' allpon nocrena arr patsropa' ñeñtpa' e'ñe ora Cristocop. Ñaña ama't çho nerromapa' ñeñtpa' elloña nanac cohuen nocop. ²² Ñaña ñerra'm allempo nocrenmeñpa' torrenayanach Yompor po'taruas tarro'mar attotcha'ña allo'nach nesherb̄atneññañ Yompor po'ñoñ. Ñeñto'marña ñeñtcha' nanac nemna' te'pa' ama neñoteñe erra'tsente'ña ñeñt nanac sherbets, ñato' o'ch nerroma tayecma amapa' ñato' corretsanach. ²³ Ñeñt nanac torrapo' nenten o'ch notas ñeñt atarr cohuen nenten, ñato' o'ch nerroma amapa' corretsanach. Napa' nemneñeñ o'huañcha' nocrra añe patsro allochñapa' o'ch neçhap tecma Cristesho, tarro'mar ñeñtpa' elloña nanac cohuen nocop. ²⁴ Tarraña ñerra'm amach nerromopa' ñeñtcha'ña nanac sherb̄ats socop. ²⁵ Ñeñto'marña napa' neñoteñ amach nerromo, amach

nesa'nerrso, allochñapa' allo'nach nesen seyčhatnomue' allohuenes atto ñerra'm allo'na yesen yemtaya Cristopa' čhocmachña yocshena. ²⁶ Allochñapa' ñerra'm esempo nečherr seshopa' allempochña alla neñotaterserr nanac, attoch allo'na sesen nanacocmañen coshaya Cristo.

Chocmuepa'ch yocrrena e'ñe cohuen ñeñt atet oteney Yompor po'ñoñt
²⁷ Te'pa' añach notas, čhocmuepa'ch socrra e'ñe cohuen ñeñt atet yorraten ñeñtey ame'ñenaya Cristo po'ñoñ. Allochñapa' ñerra'm machayoča nabcherrsa' amapa' ñerra'm ama'tcha' ama yabčhannerropa' e'ñepa'chña cohuen ne'mare'tenes atto e'ñe huomenc sepen seyöcher attoch e'ñe patrra soctape'chen. Ñaña o'ch ne'mare'tas atto sapa' sema'yočhrena allohuenes parro attoch semoñena añ cohuen ñoñets alloch yequeshperra. ²⁸ Ñaña amuepa'chña añ seyore'tatstaye ama't mamesha ñeñt se'moñe'tene' tarro'mar ñetpa' ñeñtcha'ña eñotatahuet po'ñoč ñetpa' amach qeshperreto. Tarraña yocopñapa' ñeñtña yeñotatene' po'ñočpa' yequeshpa'huerrach. Añechnopa' Yomporo poctapña. ²⁹ Ama patrrayaya muenateney Yompor atto o' yame'ñera Cristo. Añña e'ñe pemuereñotey muenateney ñaña e'ñe yame'ñeñotpa' čhochña yemueročhta ñocop. ³⁰ Ñeñto'marña sapa'čho'ña e'ñe pocte' o'ch sa'mueročhtatareta Cristocop e'ñe atet sentenen na ahuatoteñ ama't teme'ttsenpa' se'mare'tenen napa' allo'tsenarana all nemueročhtena e'ñe name'ñeñot Cristo.

2

Atetcha' yentena yañeña e'ñe puesheña'ttsoy atet ente't Cristo e'ñe ñañeña

¹⁻² Te'pa' o'ch notas ñaña po'poñ. Ñerra'm po'ñočh yame'ñeñot Cristo e'ñech yocshatannena allempoña po'ñočh sapa' socshatterrencha' ñaña. Añña ñeñtcha' nocshatene' e'ñe poctacma ñerra'm e'ñech patrra soctape'chuen allohuenes. Ñaña ñerra'm po'ñočh e'ñe yemorrentanna'teñot e'ñech yeyemtanna'tuenapa' ñehua, te'ñapa' čhocmuepa'ch semorrentannena ama't e'ñe sagattsa ñeñtes e'ñe parro'marneshacmas. Ñaña ñerra'm allohueney po'ñočh chorra'huenya ñeñtara Parets Puecamquēñpa' ñeñtotcha'ña e'ñepa'ch sepatrratuen soctapñoč allohuenes. Ñaña ñerra'm po'ñočh e'ñe socsheñesha' semuerannenapa' ñeñtotcha'ña amach po'poñ sentanna'tuatsto. ³⁻⁴ Ñaña amach añ atarr sellcatsto ñeñt e'ñe socpa. Añcha'ña puesheña'ttospa' sellcapreta ñeñt llecatyene' samo'ts. Ñaña amach sañeña entatstatso atet ñerra'mrrate' ñeñtes nanac sherbets. Añcha'ña atet sent samo'ts atet ñerra'mrrate' ñeñtña nanac sherbetset, pañapa' amach es asherbenaye' penteno.

⁵ Añña pocte' o'ch senta sañeña atet ente't Cristo Jesús e'ñe ñañeña allempo huapa añe patsro. ⁶ Ñehua, ñapa' ama't nanac Paretspa' ama ommo'chane'te po'partsoña. ⁷⁻⁸ Ñapa' e'ñe pocte' enche't o'ch atet enteñ acheñenesha' ñerra'mrrate' ñapa' ama Partsoyaye, o'ch atta orrtena ñerra'm ama esoyaye atet pena acheñ ñeñt e'ñech pauner ařarettena. Tarraña añecop atet pe't attotcha' sherbenan Pompor ama't ñaña acheñenesha'. Ñaña ñapa' ama't Paretspa' o' acheñetos arr patsro, e'ñe atet orrtosa ñerra'm ya ñeñtey arromñatey. Ñaña' allo'na

sen pauner entatatsa attotña e'ñe pue'mñnoteñoř Pomporpa' e'ñe pocte' eñch o'ch rroma corsocho ñeñt nanac apencoçhen entete't ñerra'm esesha' rromats atet corsocho. ⁹ Ñeñto'marña attotña Pomporpa' o' alla nanac a'cohuentater ñaña o' alla aphuer ello pa'so'cheñ ñeñt nanac cohuen sherbets. Ñeñtña so'chñetspa' ello metana'tuanenan allohuen po'poñeçhno so'chñetsöchno. ¹⁰⁻¹¹ Ñeñto'marña esempohuañenpa' allohuenet po'yorñořetpa' a'meta'hueretcha' e'ñe poctacma, Jesucristepa'tña ñeñt nanac partsotets. Allochñapa' atto e'ñe pame'ña'rreñořet Jesús pa'so'chñopa' concorpa'rretueretcha' allohuenet ñeñt allpon eñall ama't allohuen ñeñt ento'marnesha' ñaña allohuen patso'marnesha' ñaña allohuen o'pono'tseneshaçhno ñeñt patso'tsen. Attochña allempopa' aye'choçhtataretterra Yompor ñeñt nanac Parets.

Añach yema'yoçhrena attoch allo'nach yesen ama't acořa etsotyenosmue' ñeñt poçtetsa Cristocop

¹² Te'pa' e'ñe nemorrenteñořes masheñnesha ñaña noçhanesha o'ch notenes, ahuañmo'chapa' çhocma se'mñotne't ñeñt atet notase't allempo sesho'tsenen. Te'pa'çho'ña attecmaç se'mñoten ñeñtcha' atet noterrser ama't te'pa' nanac baçhayo'tsenen seshoř. Te'pa' añach notas ñeñtcha' atet seřa. Chocmuepa'çh sema'yoçhra attoch allo'nach sesen etsotnomue' ñeñt cohuen enten Yompor, tarro'mar ñapa' ñeñtecopña o' a'quespaterres. Tarraña e'ñech señcha'na'teñoř seyomcha Yompor tarro'mar yeñořeñ yoroçheno'tsenya ñerra'm ama Yompor po'huamenco yeyemto. ¹³ Tarro'mar Yompora e'ñe yemnatene' e'ñe yeyoçhro ñeñt cohuen enten ña. Ñaña ñapa' ñach ahuañmenca't yepene' attoch yetsotoñ ama't ora erra'tsencha' coshatene' ña.

¹⁴ O'ch noterrser ellone't te'pa' ñeñt ama atteye' es sepeno. Ama't eseshacpa amach epuoye' es atet sepeno, señořeñeshořpa' amach es sotnare'tanna'tatsto. ¹⁵ Allochñapa' ñerra'm ama atet yepenopa' e'ñech cohuen entyenyey allohuen acheñenesha', amach eñalle attoch esesha'pa' o'ch eñosyenet yocop año' poçteye' es yeřa'yeno, tarro'mar e'ñech cohuen es yocape'chyen attoch yorrtaten atet penaña ñeñt po'ñoçh o' puechemer per Yompor. Amach eñalle ñeñtcha' a'sosyatene' atto yocrrena e'ñe cohuen Yomporcop año patsro. E'ñech cohuen yorrtena acheñeneshapo ama't ñeñt ama ame'ñetso ñeñt atarr nanac sosey cotape'chenet. Cohuencha' yorreyena atet ñerra'mrrate' rantoçhno ñeñt a'puetarene' checmete' tsapo. ¹⁶ Attoch sa'puetarsamřsanetpa' çhoc señořaterranet ñoñets ñeñt huetsa Yomporeshoř alloch yocrrerra e'ñe cohuen. Allochñapa' ñerra'm esempohuañencha' huerra Cristopa' socshaterrencha', tarro'mar neñořtercha' ama e'ñe orrena nanac netorrerro socop. ¹⁷ Ñaña ama'tcha' machayota muetsataterret arr atto napa' o' name'ñatasa, napa' atarr nocshena ñaña te'pa'çho'ña nocshapretensa atto same'ñerra. Añña same'ñeñapa' ñeñtcha' yehuapateññañ Yompor atet ñerra'mrrate' ñeñt amtsarettetsa ñocop. Ñaña nerraspa' ñeñtcha' orrtatsa ñerra'mrrate' ñeñtcha' ashatarettatsa all ñeñtcha' o'patateñet Yompor. ¹⁸ Ñeñto'marña napa' nemneñ sapa' amach çha sellcatsto, çhocñña socshapreterrna ñeñt atet o' notuas.

Timoteopa' nanac cohuen llecapretane't pamo'tsesha'

19 Te'pa' o'ch notas ñeñt atet noctape'chen. Añ noctape'chen o'te' nemñer masheñ Timoteo tayecma o'ch enterrsa', ñerra'm atetcha' muena' Yepartseshar Jesús. Allochñapa' ñach neñotatuierre' errotente' sepa'yena, allochñapa' attoch socshaterren ñerra'm cohueno'tseneste'. 20-21 Añcha' nemñonas masheñ Timoteo tarro'mar ama eñalle ama't puesheñarra ñeñt cotape'chene' cohuen atet ñerra'm ña ñeñtcha' e'ñe po'ño'ch sellcapretenaya ñeñt echarr sentyen. Tarro'mar ama't eñalleñ ñeñt parro yetorrena, ama allohuenacmaye' llecapretenseto ñeñt echarr sentyen. Añach torra'yenet ñeñt e'ñe ñocueta. Amachña añeye' llecapreteneto attoch torrenet ñeñt nanac sherbets Jesucristocop. 22 Ñaña sapa' e'ñe señotueñ atet masheñ Timoteopa' e'ñe cohuen pa'yena allempo parro yeserrpare'tatyen añ cohuen ñoñets alloch yequeshperra. E'ñe cohuen torrapretenna atette'ña ñerra'm yechemerpa' e'ñech cohuen yenpueney yetaruas. 23 Ñehua, esempoch e'ñe neñoch ñato' errotente' poptetsa nocoppa' napa' noctape'cheñ o'ch nemñonas masheñ Timoteo. 24 Na te'pa' aña necuen Yepartseshar Cristo ñerra'm ñach muenats, napa'cho'ña nabcherrsa'ch amach atarr natomatatatsche.

Atto Epafroditopa' yenpa'yesosan Pablo all cárcelo

25 Ñaña o'ch notas po'poñ, e'ñe pocte' nenteñ te'pa' o'ch alla nemñer sesho masheñ Epafrodito ñeñt parro yetaruaseño'tpa' nanac yetorre't Yomporecop. Ñeñtara masheñ Epafroditopa' ñeñt semñon ahuaña ñach neyenpa'yese' all es nepalltena ñeñtcha' neyenpose' arr. 26 Napa' e'ñe pocte' nenteñ te'pa' o'ch alla ahuer sesho, tarro'mar ñapa' nanac yerpuensa attoch o'ch alla entuerres. Tarro'mar ñapa' añ nanac llecatene' atto sapa' ahuo't se'mare'ch ñapa' cha atsnat'os arr. 27 Ñehua, po'ño'ch ahuañapa' cha atsnat'os cha muene' rromañ, tarraña Yompor e'ñe puemueñeño'teypa' o' alla a'crrater atto ñerra'm rromañpa' ellote' na'na llecatañ arr cárcelo. 28 Ñeñto'marña e'ñe poctennana o'ch nemñer e'ñe tayecma sesho allochñapa' o'ch socshapuera ñerra'm esempoch cherr e'ñe sesho. Allochñapa' amach ña'na allo'na nellcatnenaye. 29 E'ñech separasyoso'teñsha' Yepartseshar Cristo o'ch sagapapuer ñaña e'ñe socsheñeshocmañen. Ñaña o'ch notas, chocmuepa'ch semorrenteña ama't erra'tsena acheñer ñeñt e'ñe atet senten ñerra'm ña. 30 Atto ñapa' e'ñe puemneñño'f o'ch torra Cristocop cha atsnat' ama't cha muene' rromañ. Atarr yoreretsot correrra arr, tarraña ñapa' ama ñeñtayaya mecha'to attoch ñapa' o'ch yenposen, ñeñt sapa' amate' errot sepe attoch sehua'cha'ta ba'chayot e'ñe puesheña'ttsos attoch seyenpuenna' arr.

3

Arrpa' all eñotatyesanet ñeñt e'ñe po'ño'ch sherbets Yomporecop ñaña ñeñt e'ñe orrena cotapñats

1 Ellonetpa' o'ch alla masheñnesha ñaña no'chanesha noterrser po'pocheño, e'ñe same'ñeño'f Yepartseshar Cristopa' chocmuepa'ch socshena. Ama't te'pa' o'ch alla noterrser atet tarro'mar amach nemuenme'che sotare'te' atet, tarro'mar ñeñt'pa' ñeñtcha' nanac seyemta sa. 2 Ñaña te'pa' o'ch notas po'poñonef. Señota'tach ñato'tña seyemteña' ñeñt acheñeneshar ñeñt añach torrenet ñeñt ama cohuenayaye, ñeñt e'moñe'tene' cohuen serrparñats ñeñt alloch po'ño'ch yequeshperra.

Ñetpa' e'ñe atet nentenanet ñerra'mrrate' ochec ñeñt nanac atsena'tareť. Ñeñt judionesha' ñeñt o' notuanmaspa' añach ma'yočhrenet coťapñats attoch tsorrannenet atto'ch puechemer perranetañ Yompor. ³ Tarraña yapa' yaña e'ñe po'ñočh puechemer o' enterrey Yompor, tarro'mar yapa' e'ñe yeñoteñ ama yetsorranna'teñoťeye' puechemer penye Yompor. Po'ñočh puechemer perrey tarro'mar yapa' e'ñe yocsheñoť Parets ñeñtpa' e'ñe Puecamquėñoť huena. Ñaña puechemer o' perrey Yompor tarro'mar yapa' yocsheññaña Puechemer Cristo Jesús ñaña tarro'mar yapa' ama añeye' yeyemteno ñeñt atet yetsotaten e'ñe yañeña, ñeñt e'ñech yechtsochaya. ⁴ Ñehua, ñerra'm esesha' ñetpa' čhate' otenapuetañ añte' poctetsa o'ch yeyemtena ñeñt allo es yepenañ alloch yequeshperra e'ñe yototapa' nocoppa'čho' eñalleñ shonte' ñeñt neyemtenañ, tarro'mar ñeñt allpon o' netsotatuena' ello metana'tuenan allohuen po'psheñnečno namo'tseshachno puetsotateñ. ⁵ Tarro'mar napa' o' e'ñe allpon netsotueññañ judionesha' poctapña: Ama't po'psocmatñoťeñ allempo ne'ñalletuapa' napa' atorrataťolle'tareťen* ñeñt atet anuaret allohuen asheñorroťolleshacop ñeñtey judioneshay, tarro'mar e'ñe israelena'tareshoť ñeñt e'ñe judiomřreyoť eñalletñan. Ellonetpa' ñaña napa' Benjamín po'mřnenñen. Ñaña napa' e'ñe hebreoneshan tarro'mar ach ñaña apapa' e'ñe judioneshet poctacma ñeñt eñets e'ñe ya yeñoño ñeñtara hebreachō. Alloťpa' ñaña na ahuatpa' e'ñe fariseoneshan ñeñten nanac ma'yočhraye't attoch netsotua ora allpon ñoñets ñeñt aquellica'huaret judioneshacop. ⁶ Nanac netsote't judionesha' poctapña. E'ñe nemoñseñoť yocťapña napa' ne'moñe'che't allohuen ñeñt o' ame'ñerrana Cristo. Ñeñto'marña epaye'ch ne'name'tanete't attoch erroťenotpa' o'te' erroť nepatanet. Ñaña ora atet oteney ñoñets ñeñt atet anaret judioneshacop napa' čhocma e'ñe atet nepohuahue't. Ñeñto'marña ama eñalle'te ama't patrra ñeñt nepalltena attoch ello po'psheñeñpa' o'ch otnet ñeñto' nepalltenmeñ. ⁷ Allempo atet netsotrrote't ñeñtecop nañapa' ñeñta notenapañ ñeñt'e'ña nanac sherbets nocop. Tarraña te'ñapa' e'ñe nemorrenteñoť Cristopa' o' neñoter ñeñt allpon o' nepohuahuaapa' amach es sherberro nocop ama't coñe'ta. ⁸ Ama't ellonet allohuen po'poñečno ñeñt nente't ñeñto'ch sherbatseñ nocoppa' te'ña e'ñe neyemteñoť Cristopa' ama asherbenaye' nente'ne, ama't coñe'ta, tarro'mar te'pa' o' neyemtera Yepartseshar Cristo Jesús ñeñt nanac sherbets. Ñapa' ello metana'tuenan allohuen po'poñečno ñeñt atet nente't na ñeñto'ña nanac sherbets. Ñeñto'marña nemorrenteñoť Cristo te'pa' o' nepuesuerr ora po'poñečno, nocop te'ñapa' ama esoye' nente'ne esheccha' te'pa' e'ñech nocsheñsha' nocter Cristo. ⁹ Allochñapa' e'ñe yeparrocmateñoť Cristo, Pomporpa' e'ñech pocte' enteney tarro'mar amach añoťeye' a'quespaterrye e'ñe yotota ama't yetsotatsetuahua ñoñets ñeñt atet anaret judioneshacop. Añoťcha'ña te'pa' e'ñech pocte' enterrey e'ñe yeyemteñoťa ñeñt Puechemer pen ñeñtpa' Cristo. ¹⁰ Atto e'ñe yeparrocmateñoť Cristopa' o'ch yaguėrrñañ po'huamenc atto ñapa' nanac ahuamencattena allempoteñ tanterra puerromñoť. Ñaña e'ñe yeyemteñoť Cristopa' e'ñech pocte' yeñch ama't e'ñe erroťenotpa' o'ch yemueročhta e'ñe ño'mara atto ñapa' nanac amueročhtatarete't. Ñaña

* 3:5 O'ch secue' nota San Lucas 1.59.

ama't yemuerochetuanenōñ Cristocopcha' yerromapa' ñeñtpa' e'ñepa'ch pocte' yeñch tarro'mar atetcha' yerromaprecha Cristo. ¹¹ Attochña yapa'cho'ña yetantuerrach esempohuañen.

Ñeñtach e'ñe paterr llequē't Pablo

¹² Ñehua, napa' ama noteno napa' o' e'ñe poctacma netsotuahuen ora allpon ñeñt pocte' enten Cristo. Ñaña po'ñoçhpa' ama noteno napa' e'ñe es coçhneshare' noctape'chuen. Tarraña ama't atet neñotenapa' elloña te'pa' allo'ña nesen ama't acoþa o'ch netsotnom ñeñt pocte' enten Cristo Jesús, tarro'mar ñapa' ñeñtecop o' pueyochresha' perren. ¹³ Napa' masheñneshasha ñaña noçhanesha neñotena po'ñoçhpa' ama atteye' neþohueno ora allpon ñeñt cohuentetsa Cristocop. Tarraña ama't atetpa' amach ñeñta neyerpuerre'te, çhochña nepuesuanom ñeñt atet neþatse'tyese't ahuatoteñ. Te'ñapa' añach nema'yochrena attoch allo'nach nesen ama't acoþa etsotayesnomue' ñeñt poctetsa Cristocop. ¹⁴ Tarro'mar ñeñtecop o' çhore'terrey Yompor pue'ntañōñ attoch e'ñe yeparrocmateñōñ epay Puechemer ñeñt Cristo Jesús, esempopa' yeþohuerrach ora errponte' e'ñe pocte' enten ña. Allochñapa' aphuerreycha' ñeñt o'patatenya ñeñtcha' nanac yocshatuerre' allohueney ñeñtey o' yame'ñera.

¹⁵ Ñaña o'ch notas ñeñtes po'ñoçh o' same'ña'huera Cristo ahuañmo'çhoteñ, te'pa' ñeñtña o' notuanmas e'ñepa'ch seyoçhre'cha. Ñaña ñerra'm erra'tsente' soctape'chyen ñeñt ama atteye' poctetso Yomporecoppa' ñeñtpa'cho'ña e'ñe ña Puecamquēñoñpa' ñach e'ñe señotatuerra'. ¹⁶ Añcha'ña e'ñe pocte' o'ch yeþohuena ñeñt allpon o' çhapatuonay Yompor e'ñe yeyoçhro ñeñt yeñoten erra'tsente' e'ñe pocte' enten ña.

E'ñech cohuen yocrrena atet corre't Pablo

¹⁷ Ñaña o'ch masheñneshacha' ñaña noçhaneshacha' o'ch notas, ñeñt atet sentenen atet nocrrena napa' sapa'cho'ña atetcha' socrra samña allohuenes. Ñaña añcha'ña secua' ñeñt señoten erra'tsente' ñeñt e'ñe atet corretsa cohuen ñeñt atet entenyet ya. ¹⁸ Tarro'mar añ patsropa' eñall shonte' acheñneshasha' ñeñt atet penetpa' yapa' yeñoteñ ama ayemuetpahuoye' enteñeto atto Cristopa' rroma corsocho attotcha' yequeshperra. Ama't ñeñtpa' shontoch o' notuanmas ahuañapa' te'pa'cho'ña e'ñe nanac nellquēñesha'pa' o' alla noterrser. ¹⁹ Ñetpa' aña o'patenahuet attoch allohuenetpa' e'ñech chenca'huerret. Añach yomña'yenet attoch rra'yenet amapa' orrare'tyenet. Ñeñt atet yomatse'tyenetpa' ñeñtpa' atet ñerra'mrrate' ñeñta po'yomporer penet. Ama't ñeñtcha' pen-catahuetañpa' tarraña ñetñapa' ñeñtach atarr coshatenahuet. Ñaña añach e'ñe nenet pueyoçhro ñeñtcha' atet coshatse'tatyenahuet arr patsro. ²⁰ Tarraña yapa' o'huañ atteye' yoctape'ch tarro'mar añ patsropa' ama't all yeyçhenañpa' tarraña po'ñoçhpa' ama ya'netsreyaye. Tarro'mar ya'netsro allcha' yeyçherra ya erponohuañenpa' ñeñtpa' all Yompor pue'ntañōñ. Ñeñtara pue'ntañōñpa' yecueñ allot esempohuañencha' huerra Yepartseshar Jesucristo ñeñt Ya'queshpatañer yepen. ²¹ Ñerra'm o'ch huerra añe patsropa' ya ñeñtey aromñañeypa' ñapa' o'ch a'po'poñetuernay yechets, allochñapa' yapa'cho'ña yorrterrach e'ñech attey ñerra'm ña po'partsoteñōñpa' nanac cohuentena. E'ñech

ña po'huamencot a'po'poñetuerrey ñeñtara po'huamencotpa' e'ñech pomnaren p̄ohuerran allohuen allpon ñeñt eñall.

4

¹ Ñeñto'marña masheñneshacha' ñaña nochaneshacha' e'ñe nemorrenotespa' o'ch notas, chocmuepa'ch huomenc sepa'nem seyoçher Cristocop ñeñt Yepartseshar yepen. Añpa' atet notenes tarro'mar sapa' chocma neyerpuensa ñaña chocma socshatenen atto sapa' e'ñe cohuen same'ñena. Nanac nocshensa tarro'mar napa' nentenes atet ñerra'mrrate' necopa' ñeñt o' naguërr e'ñe netorreñoñ Yomporecop e'ñe so'mar. Atarr nanac nemorrentensa.

² Ñaña o'ch noteñ nochanesha' Evodia ñaña Síntique, amach allo'na po'poñ entanna'tatsetneneto tarro'mar e'ñe yame'ñeñoñ Yepartseshar Cristopa' e'ñech cohuen yemuerannena. ³ Ñaña o'ch notas, ama't erra'tsenotesa ñeñtes po'ñoçh nanac neyemtenapa' o'ch samo'tstatanna'terranet añ epsheña coyanesha' tarro'mar ahuañmo'chapa' e'ñe parrocmā nanac yema'yoçhre't attoch epa'hua añ cohuen ñoñets alloch yequeshperra, ñaña epay Clemente ñaña po'potantañ ñeñt parrocmā nanac yetorre't ahuañmo'cha. Ñet pa'so'chñeçhnpa' o' aquellca'huaretterret attochña ñetpa' corretsetach.

E'ñe yame'ñeñoñ Yomporpa' chocmuepa'ch yocshena

⁴ Te'ñapa' o'ch noterrerr atet, e'ñe same'ñeñoñ Yepartseshar Cristopa' chocmuepa'ch socshena. O'ch alla noterrerr, chocmuepa'ch socshena. ⁵ Eñotuasepa'ch allohuen acheñenesha' atto sapa' e'ñe cohuen acheñes, amach cha po'poñ es sentatatsetuenaye, ama't erroteno'tsenes. Tarro'mar yeñoteñ po'ñoçhpa' alla'tsena Yepartseshar Cristo.

⁶ Amach es sellcatsto ama't e'ñe mamesha. Añcha'ña ama't erroteno'tsenes e'ñe sema'yocheño'tpa' chocmuepa'ch sotue Yompor ñeñt sellcatyene' ñaña e'ñe socsheñoñ Yomporpa' chocmuepa'ch senamyeyñ ñaña ñeñt sepallta'yena. ⁷ Ñerra'm atetcha' chocma sepēna, Yomporpa' ñachña ama semnatenaye o'ch es sena'yen seyoçhro ama't coñe'ta. Attoch eñmataterrnay Yompor yeyoçherpa' ya acheñey e'ñe yocpa'ñoçapa' amate' erroteno't e'ñe yotapa' yeñmataterro atet. Ñeñto'marña e'ñe yeparrocmateñoñ epay Cristo Jesús, Pomporñapa' cohuanpennaycha' yeyoçher attoch amach allo'na yena'nenō yeyoçhro ñeñt allcatañtetsa.

Añcha'ña e'ñe cohuen yoctape'ch ñeñt e'ñe cohuen entuen allohuen acheñenesha'

⁸ Te'ña masheñnesha ñaña nochanesha e'ñe allohuanenpa' o'ch noteres, añcha'ña soctape'chyes ora erra'tsente' señoten ñeñt e'ñe cohuenetyetsa ñaña ñeñt ora cohuen entuapotetsa. Ñeñtcha'ña soctape'chyes ora erra'tsente' ñeñt ama shequēñtsoyaye, allotpa' ñaña ora erra'tsente' asherben entpahuotets, allotpa' ñaña ora erra'tsente' ñeñt poctetsa, allotpa' ñaña ora erra'tsente' ñeñt ama sosya'tsañeyaye, ñaña ora erra'tsente' amorrentanna'tatañtetsa, ñaña ora erra'tsente' ñeñt e'ñe cohuen aserrpare'tpahuotets. Ora allpon añeçhnpa' ñeñtcha'ña atet soctape'chyes.

⁹ Ñaña o'ch noterrerr po'poñ ñeñtcha' atet sepa. Allpon o' neyçhatuas, ñaña allpon o' neçhapatuonas seyoçhro, ñaña allpon o' neñotatyetas,

ñaña allpon sentenen ñeñt atet es neḡa'yena napa' sapa'cho'ña te'ñapa' e'ñepa'chña atet es seḡa'yen saña. Allochñapa' Yompor ñeñt achatañtetsa yeyoçhropa' ñachña parro'tsenes allohuenes.

Atto filiposo'marnesha'pa' es apueñet Pablo ñeñt pallta'yena

¹⁰ Ñaña o'ch notas, e'ñe neyemteñoḡ Yepartseshar Cristo, napa' atarr nocshena tarro'mar sapa' o' alla seyerpuerRNA. Ñehua, napa' ama notenso o'te' sepuesuerren, añña noten sapa' ama't erroḡ sepeñe attoch seyempa'n. ¹¹ Ama cho es nemnapreteñoḡeye' notenso atet, tarro'mar na te'pa' o' çhapona neyoçhro ñeñt atet cohuentetsa, ñeñto'marña te'pa' o' attañña neyçha ama't erroteno'tsenanapa' tarraña attachña çhocma nocshena neyoçhro. ¹² Ñehua, napa' neñotena errotenopa' nanaccha' es nepallta'yese't atto yocrrena añe patsro, ellonetña errotenopa' esocmañencha' nechyses't. Tarraña ama't erroteno'tsenenpa' na te'pa' o' neñoch o'ch attañña neyçha; ñerra'm es nepalltena errotenopa' amach çha llecatenno, ama't cho esocmañen es nechyes errotenopa' amach çha nommo'cheño. Ñaña attecmaçh nocshena ama't esempo eñall shonte' nerrar ñeñtcha' neyetenana, amapa' esempo ama eñalle ñeñtcha' nerren, amach es ne'нено. ¹³ Ñeñto'marña napa' e'ñe neñoteñ, yapa' ama't erroteno'tsenyapa' çhocmaçh ahuañcatey tarro'mar Cristopa' ñach nanac ahuañcatey yepene'. ¹⁴ Tarraña ama't o' notuanmas atetpa' e'ñe pocte' nenteñ atto sapa' sellcapretenna ñeñt nemueroçhtatene' arr.

¹⁵ Ñaña sa ñeñtes filiposo'marneshas e'ñe señoḡueñ allempo ñanom nerrpare'tnom cohuen ñoñets alloch yequeshperra, allempo non Macedoniot, allempopa' ama't allemeñ anets'o'marpa' ama eñalle acheñenesha' ñeñt atet apçherrtsa Yomporcop ñeñtcha' nellcapretenaya attoch e'ñe parroçma es yapanna'ta. Sapa' saña e'ñe sapta ñeñtes es napuene' ñeñt allpon nepalltena. ¹⁶ Napa' ama't ahuañmo'cha allempo Tesalónico'tsenenpa' ama parroçotayaya sapa' çhocma soñmaten ñeñt sapuenen añecop ñeñt nepallta'yena all. ¹⁷ Ñehua, napa' ama nocpaye' nemnapretenso o'ch es sapuenen. Añña nemnen ñaña allochñapa' socoppa'cho'ña ellopa' o'ch atonetnoma attoch coshatuerres Yompor. ¹⁸ Te'pa' o' aposen masheñ Epafrodito ñeñt allpon soñmaten nocop. Ñeñt allpon o' nagaponaspa' te'pa' ama es nepallteno ama't coñe'ta, elloña çha metanuosan allpon ñeñt nepalltena. Ñeñt allpon sapuanpa' napa' e'ñe attecoptar nenteñ ñerra'mrrate' ñeñt apuenet Yomporcop ñeñt eñmosa'ttetsa ñeñtcha' e'ñe pocte' enten, ñaña ñeñtcha' nanac coshatene' ña. ¹⁹ Ñaña Yompor ñeñt e'ñe neyemtena napa' ñachña sapuerre' saña ama't ora ñeñt allpon sepallta'yena sa, tarro'mar e'ñe yeparroçmateñoḡ epay Puechemer ñeñt Cristo Jesús ñeñt e'ñe esocmañen es eçhyetspa' nanacocmañencha' esocmañen apuerrey yaña. ²⁰ Aye'choçhtatartetpa'ch Yompor ñeñt atarr Parets. Ñeñtpa' attetepa'ch ama't tayoteñ errponohuañen.

Arrpa' all so'tnerranet e'ñe po'cartot

²¹ Ñaña o'ch notas, o'ch sehuoñtcha'ch allohuen ñeñt pueyochresha' o' perr Cristo Jesús. Ñaña allohuen masheñnesha' ñeñt e'ñe parro'tseneypa' ñetpa'cho'ña mueneñet o'ch huoñtcha'taset ñamet arr necartot. ²² Ñaña allohuen ñeñt pueyochresha' o' perranet Parets

arr Romopa' ñetpa'cho'ña mueneñet o'ch huom'cha'taset ñamet necartof.
Ñeñt nanac muenets atetpa' ñeñt'pa' ñeñt parro ye'chena ñeñt atarr
añcha'tarettetsa arr Romo.

²³ E'ñe Yepartseshar Jesucristopa' ñepa'chña e'ñe sa'natenaya allo-
huenes. Te'pa' ñeñtach notas, ñeñt'pa' attetepa'chña Nompore. Allohua.

Pablo

AÑ SAN PABLO PO' CARTA ÑEÑŨ QUELLCAN COLOSASO' MARNESHA' COLOSENSES

Atto Pablopá' quellcan carta añecop ñeñŨ ame'ñetsa anetso Colosaso

¹⁻² Masheñneshacha' ñaña nochaneshacha' ñeñŨes o' pueyochresha' perres Parets e'ñe seyemteñoŨ Cristo, sa ñeñŨes yeçhetsa all anetso Colosaso. Na Pablón sequellquene'ña añ carta epan masheñ Timoteo. Napa' ñeñŨen Cristo Jesús puellsensaren tarro'mar atet muenatenen Yompor. E'ñe nehuoñcha'teñoŨes sa napa' o'ch notas: Yomporepa'ch Parets sebensare'tam̄pene' ñepa'chña socshatene' e'ñe sa seyoçhro allohuenes.

Arrpa' all parasyoso'teñet Yompor ñocpuet

³ Yapa' allempo yema'yocham̄pensapa' çhocma yeparasyoso'teñ Yompor, ñeñŨara Yepartseshar Jesucristo Pompor. ⁴ Tarro'mar yapa' o' ye'mare'tas atto sapa' atarr same'ñeña Cristo Jesús. Ñaña ye'mare'tenes sapa' atarr semuereña allohuen ñeñŨ pueyochresha' pen Parets. ⁵ ÑeñŨpa' tarro'marña sapa' atet atarr seyemteña sapa' e'ñe same'ñeñoŨ Cristopa' sapa' añ atarr seyemtena ñeñŨ o'patatensa all pue'ntaño. ÑeñŨña sapa' ahuañoŨeñ se'mñotenña cohuen ñoñets ñeñŨ e'ñe po'ñoçh Yompor po'ñoñ alloch yequeshperra. ⁶ ÑeñŨña cohuen ñoñets ñeñŨ çhapats sesho ñeñŨña te'pa' allemeñ çhapyen, allpa'cho'ña nanac ame'ñatenana shonte' acheñenesha'. Allpa' allo'na senet orrtatyaset ñeñŨ e'ñe cohuen enten Yompor. Ñetpa' e'ñe atet penet atet sepena saña. Sa po'ñoçh allempo erres e'muerre' Yompor po'ñoñ atto ñapa' atarr morrentenya, sañapa' e'ñe allempoteñ çhaponasa seyoçhro ñeñŨña ñoñetspa' e'ñe po'ñoçh Yomporo po'ñoñ. Allempoteñña sapa'cho'ña allo'na sesen orrtatyesnomue' ñeñŨ e'ñe cohuen enten Yompor. ⁷ ÑeñŨara cohuen ñoñets ñeñŨ ñanom yeçhatas masheñ Epafras. Ñapa' ñeñŨ e'ñe parrocmá yeŨorrena Yomporecop, atarr yemuerannena. Ñapa' çhocma atarr cohuen torrena Cristocop ñeñŨñapa' e'ñe socop. ⁸ Ñapa' e'ñe cohuen eñotaturrey atto sapa' atarr semorrentannena e'ñe same'ñeñoŨ Cristo.

Arrpa' all ma'yocham̄peñet colosaso'marnesha'

⁹ ÑeñŨo'marña allempo ye'mare'tas allempoteñ yapa' ama yequeçhpueno sema'yocham̄psaya Yompor. Yapa' añ yenamuenas Yompor: Sapa' çhocmuepa'chña eñotatenes ñeñŨ atet muenen ña ñeñŨcha' atet sepa'yes e'ñe cohuen ñocop. Ñaña çhaponasepa'ch seyoçhro ora allohuen ñeñŨ atarr cohuentetsa yecamquëñecop. ¹⁰ Allochñapa' o'ch e'ñe seyçherr ñeñŨ atet poctetsa allohuenacop ñeñŨey pueyochresha' pen Yepartseshar. Allochñapa' attochña e'ñe socshateñ. E'ñe atto es cohuen sorrtatyenpa' nanaccha' cohuenoŨ sesherbeñ. Allo'nepa'chña sesen eñotnomue' ñeñŨ atet penaña Parets. ¹¹ Ñaña añ yenamuenas Yompor: Po'partsoteña ñeñŨ cohuenñatsotetspa' e'ñepa'chña ahuamencat pa'yesas e'ñe poctacma allochñapa' amach çha sequèçhpatstere. E'ñeçhña socsheñesha' sa'huinta'huanomña allohuen ñeñŨ atarr echarr sentyen.

12 Ñaña sapa' chocmuepa'ch separasyoso'ch Yompor tarro'mar ñapa' a'poclaterrnay attoch yagapapreter yaña ñeñt' o'patatenana allohuen pueyochreshachno. Ñeñt'ña' ñeñt' po'cohuenña pen ñeñt' atarr cohuentetsa allña'puetaretsa. 13 Tarro'mar te' Yomporpa' o' cheterrey checmetot' all añcha'nochtana oneñet'. Te'ña yapa' o' chapaterrey po'cohuenño all ayochreshattena e'ñe ña Puechemer ñeñt' Jesucristo ñeñt' atarr morrentena ña. 14 Ñeñt'ña Jesucristo ñeñt'ña rromats yocop ñapa' attoña e'ñe tsa'tuerrnayaña yo'chñar attoch e'ñe peretna'huerrnay yo'chñar esheccha'ña e'ñech cohuen a'quespaterrey Yompor.

Allempo ashataretta Cristo po'rras corsocho, ñeñt'ña e'ñe a'mchechatue'ña allohuen esocmañen

15 Yompor Paretspa' ama entpahuu, tarraña Cristoña ama't entpo'pa' ñapa' e'ñe parro attecma ñerra'm Pompor Parets ñeñt' ama entpahuoyaye. Ora allohuen allpon eñalletyestsas, Cristoña' e'ñe ñanom eñall ñeñt'cha' pomnaren penahuet allohuenet. 16 Allohuen ñeñt' allpon ayeçcataretetyestsas ña e'ñe yeçcatuahuet, ama't ora allpon ñeñt' ento'tsa'yen ñeñt' ama entpahuoyaye ñaña allohuen ñeñt' yentyen arr patsro, e'ñe ñocma pueyeçcatuar. Ñaña allohuen ñeñt' allpon añcha'taretetyestsas, ñaña allohuen ñeñt' allpon ayochreshatetyestsas, ñaña allohuen ñeñt' allpon añcha'noçhetyestsas erracmañen, ama't ñaña allohuen ñeñt' allpon huomenc entyestsas, ora allohuenet ñeñt'et ayeçcataretet e'ñe ñocma pueyeçcatuaranet. E'ñe ñocpacma ayeçcataretetyesuahuet. 17 Ora allpon ñeñt' esocmañen eñallpa' ñaña' e'ñe ñanom eñall. Ora allpon ñeñt' esocmañen eñallpa' ñapa' ña orratyenañet. 18 Cristoña' yeyoçher* yeçohueñ allohueney ñeñt'ey parrocmatenaya e'ñe yame'ñeño'ña, tarro'mar ñapa' ña yoçtape'chatene' e'ñe cohuen allohueney ya ñeñt'ey e'ñe po'chets pöhueney. Ñeñt'o'mar Cristopa' pomnaren peney allohueney ñeñt'ey ame'ñenaya ña. Ñapa' e'ñe ñanom orrtatene' allochña yapa' corretsayach allohueney ñeñt'ey e'ñe po'chets pöhueney e'ñe yeparrocmateño' epay ña. Ñaña ñapa' ñanom tanterrtsa rromot', ñeñt'ña' ellochña nanac sherber. Ñeñt'pa' tarro'mar atet pa' allochña' ora ñeñt' esocmañen allpon eñall, ñeñt'ña' Cristochña e'ñe ñanom nanac cohuen entyenet. 19 Pompor Parets e'ñe poçte' enteñ o'ch e'ñe cohuen chorrataña ora allohuen po'partsoña. 20 Ñaña' e'ñe alla parrocmaten Pomporesho e'ñe parrocmata allohuen esocmañen, ama't ñeñt' patso'tsa'yen, ama't ñeñt' ento'tsa'yen. Allempo ashataretta Cristo po'rras corsocho, ñeñt'ña e'ñe a'mchechatue'ña allohuen esocmañen.

21 Ama't sa ahuatpa' atarr ella'paro'tsa'yenes Yomporeshot'. E'ñe se'moñe'teño' Yompor seyoçthro saña' aña seyeçcatyese't' ñeñt' ama cohuenayaye. 22 Tarraña te'ña Yomporpa' o' e'ñe parrocmata terres e'ñe ñesho. Ñehua, allempo amueroçhtataretta Cristo e'ñe ña po'chtso atto rroma, ñeñt'pa' attochña e'ñe parrocmata terres saña. O' e'ñe parrocmata terres attoña sapa'cho'ña o' sa'cohuentataretterra Partsocop, ñaña attoch amach sa'tanmare'terro, amach eñalle attoch sottene'charetterra. Te'pa' atetca'ye enterresña Yompor. 23 Ñerra'm po'ñoçh chocmach same'ñera Cristo, ñerra'm e'ñech huomenc seperr seyoçher attochña sapa'

* 1:18 Ñehua, po'ñoçh Cristopa' arr atma'ntataret atet ñerra'mrrate' ñeñt' yoñ yepen.

amach sepurrerro. Cohuen ñoñets ñeñt o' se'mhua alloch yequeshperra ñerra'm amach cha sa'ypo'ñañpere ñeñt o' seyemterra Yomporña'pa' enterrescha' o' e'ñe sa'cohuentaterra. Añ cohuen ñoñets ñeñt o' se'mare'tua sa, te'ñapa' aserrpare'taterra'rach ñaña allohuen ñeñt corra'yetsa añe patsro. Ñeñto'marña na ñeñten Pablon nach sherberrets te'ñapa' nach serrpare'taterra'rahet.

Atto Pablo a'potan ñeñt ahuatoteñ ama eñotpahuo

²⁴ Te'ña na e'ñe nemuerochteñoñ socoppa' atarr nocshena. E'ñe nemuerochteñoñ nechtsopa' ñeñtpa' attoña netsotatennas allpon ñeñt palltetsa attoch nemuerochtaprecha Cristo allohuenacop ñeñt ame'ñenaya ña ñeñt e'ñe po'chets pen Cristo ñeñt e'ñe a'parrocmataten. ²⁵ Ñeñto'marña te'pa' nach sherberre' allohuen ñeñt ame'ñenaya Cristo. Atet llesensenen Parets e'ñe socop, attochña napa' o'ch e'ñe na'potuerrñañ ora Yompor po'ñoñ. ²⁶ Añcha' na'poterr ñeñt ama't ahuatapa' ama eseshaye' eñotaye'te e'ñe yatañeshapofeñ tarro'mar allemppopa' ama chena' allem-poch eñotateranet Yompor. Tarraña te'ñapa' e'ñe eñotaterrey Yompor allohuenaya ya ñeñtey pueyochresha' pen Parets. ²⁷ Te'ña Yomporpa' atarr muenoñ o'ch eñotaterrey ñeñt atarr cochneshare' ñeñt po'cohuenña e'ñe ahuatoteña' ama eseshaye' eñotaye'te. Te'ña ñeñt po'cohuenña'pa' o' e'ñe orrtaterra' añecop ama't ñeñt ama judioneshayaye. Ñeñña ama eñotete'te ahuatpa', ñeñña'pa' añepa't Cristo ñeñt chorrenaya yeyo'cher. Attoña e'ñe yeyemteñoñ ña yañapa' o'ch yecohuentapretera.

²⁸ Ñeñto'marña Cristopa' chocmach ya'poteñ. E'ñechña cohuen yoc'tape'chatyeñ allohuen ama't erra'tsena acheñer. Ñaña e'ñech cohuen yey'chatyeñña allohuen ama't erra'tsena acheñer attochña ñetpa'cho'ña e'ñech eñotyeneñt ñeñt atet pena Cristo. Attoña e'ñe pueyemteño'tet Cristopa' o'ch ame'ñeñet e'ñe poctacma. ²⁹ Ñeñto'marña napa' nanac netorrena ñocop. E'ñe po'huamenco ñeñt atarr ahua'encat nepene' attoña napa' chocma atarr netorra'yena ñocop.

2

¹ Napa' nemneñ o'ch seño'ch atto napa' e'ñe nellquëño'tes sa atarr nanac netorrena socop. E'ñe attecma netorrena ñaña laodiceo'marneshacop, ama't ñaña allohuenacop ñeñt ama puentarno. ² Allochña'pa' attochña e'ñe socsherra seyo'chrohuen atto e'ñe semorrentanna'teño'tpa' o'ch e'ñe separrocmaterr. Attochña chaponasa seyo'chro attoch atarr es seño'tyerr. O'ch seño'terr ñeñt ama eñotete'te ahuatoteñ, ñeñtpa' ñapñaña Yompor eñotene'. Ñeñtpa' e'ñepa'tca'ye Cristesho'tsenña ³ allohuen pa'namen eñoteñets ñeñt nanac cochneshare' yentyen. Ñeñtpa' e'ñe yeyemteño'fa Cristo esheccha' yeñoterrña ñeñt ama't ahuatapa' ama eñotpahuo. ⁴ Ñeñto'marña napa' atet notenes allochña'pa' sapa' amach esesha' seshquërraye ama'tcha' cotape'chatyesaset ñeñt atarr cohuen ñoñets sentyerreñ. ⁵ Ama'tcha' ama allo'tsenno e'ñe na tarraña neyerpueño'tes neyo'chropa' e'ñe parro'tsa'yenacmay. Sapa' e'ñech nocshesha' nentyenen atto e'ñe cohuen e'ñe sorrtatyen. Ñaña nentenen atto e'ñe same'ño'ño' Cristo o' e'ñe huomenc sepa'yen seyo'cher ñocop.

⁶ Atto o' sagapuer Yepartseshar Cristo Jesús, te'ña sapa' allo'nepa'ch sesen e'ñe parrocmatats epas. ⁷ Attochña sapa'

e'ñech huomenc serrmuerrñañ po'ñoñ atet ñerra'mrrate' tsachrech atarr huomenc rromuenan pats, e'ñe separrocmateñoť epaspa' allo'nepa'chña atonetnomaña ñeñť atto same'ñena. E'ñe same'ñeñoťpa' huomenquêpa'chña sepa'yesnom seyočer. Atterepa'chña allo'na senen ñeñť atet yečhatyenes. Ñaña čhocmuepa'chña separasyoso'chña Yompor.

E'ñe yame'ñeñoť Cristopa' o'ch yesuanomña atet muenatyesy'e't yechets

⁸ Señota'tach allochña sapa' amach esesha' seshquerraye. Ñato'rraña po'poñ cotapñatsoťpa' čhate' shequerrset. Ñeñť cotapñatserpa' e'ñe orrena tarro'mar ñeñťpa' atta shequenset. Ñeñťpa' arromñaña a'mtene'ña poctapña ñeñť atto shecare'tyenet. Ñeñťpa' patso'marnesha, ñeñťñapa' ama poctenanofña Cristo poctapña.

⁹ Tarro'mar Cristo atto acheñetos ñepa'tña chorrenayaña allohuen Yompor po'partsoña. ¹⁰ Sapa' e'ñe separrocmateñoť Cristo sa'naña chorrapretenayaña Parets. Ñeñť allohuen allpon amča'taretetyests, Cristoñapa' e'ñe ñapfa atarr sherben. Ñaña allohuen ñeñť allsensaretetyests, ñaña'apa' e'ñe ñapfa atarr sherben. ¹¹ Sapa' e'ñe separrocmateñoť Cristo te'pa' sesuanom atet muenatyese'ť sa sechets. Ñeñťpa' ama añoťeye' hueno o'ch setsorratannena e'ñe sañeña sechets ñeñť atet yečhena judionesha'. Ñeñťpa' Cristeshoťña huena e'ñe seyemteñoť ña. Ñeñťmarña e'ñe separrocmateñoť Cristopa' te'ña sapa' o' seyomporena'tarterra e'ñe po'ñočh. ¹² Tarro'mar allempo sapataretña Yomporecop sapa' añ setma'ntena ñerra'mrrate' čho sepampapreteña Cristo. Elloña e'ñe sa same'ñeñoťpa' attoña o' setantapreteraña Cristo. Tarro'mar sapa' añ same'ñate' atto Yomporpa' orrtatan po'partsoteña allo tantaterran Puechemer allempo rroma. ¹³ Ahuať sapa' so'chñarofña ama es soctape'čhperra' seyočhro ama't e'ñe mamesha ñeñť cohuentetsa Yomporecop. E'ñe atet sepe't ñerra'm po'poñ acheñ ñeñť ama Yomporena'tareyaye. Ñeñťmarña sapa' čha sotto't ñerra'mrrate' secamquēñpa' čha rromuen. Tarraña te'ña Yomporpa' o' apuerres attoch sapa'čho'ña corretsasach e'ñe atet pena Cristo, tarro'mar ñapa' o' peretna'huernas allohuen so'chñar. ¹⁴ Tarro'mar ñapa' o' e'ñe e'shohuerrnay ñoñets ñeñť o' quellca'huetañ alloch yotteñe'charetterrañ ya, atet oten ñoñets ñeñť atet anaret ahuatoteñ. Ñeñť ñoñets Paretsñapa' alla a'huañatañperrey atet ñerra'mrrate' ñeñť apatarettetsa corsocho. ¹⁵ Ñeñťña amča'nočhetyetsa añe patsro ama't ñaña ñeñť huomenc entyetsapa' Cristoñapa' e'ñe puerratanñpesuerranet allo amča'nočhetyenet. Atto rroma corsocho allotña e'ñe a'mtsoññetueranet. Allempoñapa' orrtatanet allohuenet acheñeneshesho attoch ñetpa' eñochet ñeñťpa' o' aprrataretterra po'huamenc.

¹⁶ Ñato't same'ñeña'ña ama't erra'tsena acheñer ñeñťcha' sote' sa amo' pocteyaye ñeñť atto es serra'yen ama't ñaña atto es sorryen. Ñaña amach same'ñatsche ñeñťcha' sotene' sapa' amo' setsotenoña añ yetñatser ñeñť allpon ana'yesaret judioneshacop, ama't allempoch čherrerr pate'tets char, ama't ñaña allempoch e'ñe errete' orrterrtsa puenña'tets arrorr. Ñaña amach same'ñatsche ñeñťcha' sotene' sapa' año'

setsotenoña ñeñt yetñatser ñeñt anaret allempocma yamesen. ¹⁷ Ñeñtpa' pa'choyeshe'maca'ye peñña ñeñt huapatsa. Ñeñt huapatsapa' po'ñoçhpa' ñeñtca'yeña Cristo ñeñt atarr sherbets. ¹⁸ Ñaña amach same'ñatsche ñeñtcha' soterre' sapa' año'ch saguërroña attoch coshaterres Yompor tarro'mar sapa' año' atteye' sepeno ñeñt atet penet ñet. Ñeñt acheñer atet, ñetpa' aña cotape'chyenet o'ch mueroçhtatenet e'ñe ñañeñeta, tarraña ñetpa' pommoc'heñoña atet penet ñeñt po'ñoçhpa' ama es sherbeno Yomporecop. Ñeñto'marca'yeña ñetpa' añaca'ye ma'yochyenet Yompor po'mllañoñeñer. Ñaña ñetpa' aña nanac yemtenet ñeñt entpesa'tyenetañ. Poçtaññofet ñeñt e'ñe ñeta po'chtsofet huena, ñetpa' ñeñta atarr ommo'chenet, ñeñto'marña ñeñtpa' e'ñe orrena atet penet. ¹⁹ Ñetpa' ama parrocmateñeto Cristo ñeñto'marña ama pueyoçhreye' peñetoña Cristo. Ñehua, yapa' yoten yeyoçher* ñeñtña atarr sherbets tarro'mar ñeñt atarrtatene'ña ora yechets. Atet pena yelloquëm ñaña yechtsoreçh ñeñtña orrene'ña yechets ñeñto'marña e'ñe parrocmateñ attoña ora yechetspa' atarrtena. Atet penaña Cristo atet ñerra'm po'ñoçh ñeñt yeyoçher yepen. Allohueneñ ñeñtey ame'ña'yenaya Cristo e'ñe parrocmateney, allochña yapa' allo'nach yesen orratyenosmue' ñeñt atarr sherbets Yomporecop tarro'mar yapa' atet muenateney Yompor.

²⁰ Sa atto o' serromapretera Cristo ñeñto'marña añ cotañatser arr patsro ñeñt arromñañenesha poçtañña, ñeñtpa' amaca'ye socpayaye. Sa atto o' serromapretera Cristo ñeñtpa' añecop attoch sequeçhpuerrñañ arromñañenesha' poçtañña. Te'ñapa' eso'mare'tcha'ña alla same'ñerrerrña patso'mar cotaññats. Ñato'tña same'ñena'ña ñerra'm esempo otenset: ²¹ "Amach es sa'pplatsetyesatsto, amach es serratse'tyesatsto, amach es seçhta'yesatsto." Tarraña ñeñtpa' e'ñech orrena atet otenset, ²² tarro'mar ñeñt allohuen ñeñt añe patsro'tsen ñeñtpa' e'ñeca'ye e'nuapo'. Ñerra'm ye'nuapa' o'ch e'ñe huañ. Ñeñto'marña ñeñtcha' atet sotyese' ñeñtpa' arromñañaca'ye poçtañña yeçhatenset. ²³ Ñetpa' po'ñoçhpa' orrtenetañ atet ñerra'm esocmañen eñotuenetañ ñeñt cohuentetsañ tarro'mar puema'yochreñoçetpa' muechatse'tyenet, ñaña ñetpa' e'ñe ñañeñeta mueroçhtatetset po'çhets, tarraña e'ñe pommoc'heñoçeta atet penet. Tarraña ñeñt atet penet ñeñtpa' amaña añeye'ña atet peneto alloch huenaterret ñeñt atet muenatse'tatyanenet po'çhets pa'namen sosya'tsañeçhno.

3

Añach soçtape'chen ñeñt atet muenen Cristo ñeñt pue'ntañotsen

¹ Atto po'ñoçh o' setantapretera Cristo, te'ñapa' añach soçtape'chen ñeñt atet muenen Cristo ñeñt pue'ntañotsen. Ñapa' allña atarr part-soten e'ñe Parets po'cohuenroç. ² Ento'marecopcha'ña sema'yochra. Sapa' amachña aña sema'yochratsto ñeñt patso'marecpa ³ tarro'mar sapa' o'huañcha' socshenaña ñeñt patso'marecpa. Te'ña sapa' e'ñe ates ñerra'mrate' puesheñarr ñeñt rromuets o'huañcha' allo'na cosha'nenana ñeñt patso'marecpa. (Ñeñto'marña yapa' yoten o' yerromapretera Cristo.) Te'ñapa' ñeñtña yocshatene' ñeñt ora allpon atarr cohuen enten

* 2:19 O'ch secue' nota 1.18.

Cristo. Te'pa' atto yocrrerra ello e'ñe yeparrocmateñoŧ Cristo ñeñŧ parrocmatene' Pompor Parets, ya'ñaña o' yeparrocmaterr epay Parets ama't ñeñŧpa' ama entpahuoyaye. ⁴ Ñeñŧo'marña ñerra'm esempoch orrterra Cristo ñeñŧ allo e'ñe yocrrrena, allempoña sapa'cho'ña sorrterrach saña epas Cristo. Attochña sapa' o'ch secohuentapretera saña.

O'ch yesuanom ñeñŧ mellashañ cotapñats ñeñŧ ama pocteye' enteno Yompor

⁵ Ñeñŧo'marña socoppa' añ poctetsa: Ama't erra'tsena sechets ñeñŧ soctape'chatene' patso'marpa' chosaña a'mchechattere', ñeñŧ atto sechta'yeñ ñeñŧ ama setaporeyaye, ñaña pa'namen sosya'tsañechno ñeñŧ atet muenatse'tatyeney yechets, ñaña allpon yemnatse'tyen ñeñŧpa' ama cohuenaye' entapretenye Yompor, ñaña atto es atarr yeye'chapretanna'tyena, ñeñŧpa' ñeñŧaña yeyomporer yepen. ⁶ Ñeñŧo'marcha'ña Yomporpa' entaterranetcha' po'yorochenña ama't allohuen ñeñŧ atpare'tene'. ⁷ Sapa'cho'ña ahuatpa' e'ñe attecma soctape'chyese't allempo sapa' sosya'tsañe'cpa socre't. ⁸ Tarraña te'ña ñeñŧpa' chosaña a'ypo'ñañperre', ama't ora allohuen e'moñe'tanna'teñets, atsrre'mueñets, o'patarñats, achñare'tanna'teñets, ama't allohuen e'ñosatse'teñtsochno ñeñŧ atarr sosya'tsañechno. ⁹ Ñaña amash seshcare'tanna'tatsto tarro'mar te'pa' o' sesuanemñ ñeñŧ mellashañ ñeñŧ atet soctape'chatyesaye't seyo'chro. Ñeñŧ atet sepa'yese't ahua't ñeñŧ ama pocteye' enteno Yompor ñeñŧpa'cho'ña o' sesuanemñ. ¹⁰ Sapa' añcha'ña sechorrerraya ñeñŧ etserra ñeñŧcha'ña soctape'chattere' ello etserra allochña setserrataterrña soctapña. Attoña e'ñe setserrateñoŧpa' o'ch soctape'cherr e'ñe cohuen ñeñŧ atet cotape'chen Yompor ñeñŧ seyechcate'. Attochña sapa' allo'nach sesen e'ñotnene' ñeñŧ atet cotape'chen ña. ¹¹ Atto yetserrataterr yoctapña Cristocop, yaña allohueneypa' e'ñechca'ye attecma puechemer p'ohueneyña Yompor. Ñeñŧo'marña yocoppa' ama eñalleña attoch yotaretta yapa' po'poño' acheñrey, yapa' ellopa'tetstatareyo' año' judioneshayayye, año' atsorrareteyayye, ñaña po'poño' acheñrey ñeñŧ ahua'pña po'poñ anetso't ñaña ñeñŧeyo' yapa' año' es yeñoteno ñaña ñeñŧ acheñrey ñeñŧeyo' ataruasatarey e'ñe atfa ñaña ñeñŧ acheñrey e'ñe cohueno'tseney, tarro'mar Cristopa' ñeñŧca'yeña e'ñe allohuenacpay, ñapa' ña e'ñe yechorra'huenaya allohueney pa'namen acheñrey ñeñŧ parrocmatenaya.

¹² Yomporña puemorrenteñoŧes sapa' o' acrerres ñeñŧescha' a'cohuentatare'tterrtsa Partsocop. Atto acrerrespa' e'ñepa'chña seychen attoch e'ñe cohuen semuerannena, e'ñepa'chña cohuen es sorrtyaten po'potantañecop. Sapa' e'ñepa'chña pocte' señch ñerra'm po'psheñeñ o'ch entenes sapa' ama esoshe'mayayso. Ñaña sapa' amachña añ se'natsto ñeñŧ e'ñe socpa ñeñŧ atet soctape'chen sa tarro'mar sapa' ñeñŧes alleshoncatets. Ñeñŧo'marña sapa' e'ñepa'chña sa'huanta'huanomña ñeñŧ atarr echarrare' sentyen. ¹³ Ñaña e'ñepa'chña cohuen es sa'huantannena ñerra'm esempoch señch po'psheñeñ ñeñŧ ama pocteye' orrtateno socop, sapa' e'ñechña cohuen sepretnannena. Atto Yepartseshar Cristopa' o' peretna'huerres sa, sapa'cho'ña chocmachña sepretnannena saña. ¹⁴ Ñeñŧ atarr nanac sherbets o'ch sey'cherr

attech semorrentannena e'ñe cohuen. Tarro'mar ñerra'm po'ñoçh yemorrennannena' amate' errotenot ya'ypo'ñerroña po'poñeçhno ñeñt cohuenteyetsa ñeñt atet ye'pa'yen. Attochña allo'nachña yesen etsotnomue'ña parrocmateñets. ¹⁵ Atto Yompor o' e'ñe coshaterras seyoçhro, ñeñtcha'ña soctape'chaterre'ña e'ñe cohuen, tarro'mar ñeñtecopña o' çhore'terreyña Yompor attoch e'ñe yeparrocmatuerr allohueney ñeñfey ame'ñenaya. Ñaña o'ch notas: Sapa' çhocmuepa'chña separasyoso'teñ Yompor.

¹⁶ Cristo po'ñoñpa' çhocmuepa'chña e'ñe cohuen soctape'cheñ sa seyoçhro, attochña e'ñe ora seño'teño'huenpa' çhocmuepa'ch seyçhatannena attoch e'ñe cohuen socshatannena. Ñaña separasyoso'teño'pa' semorrechepa'ch allohuen morreñtsoçhno ñeñt Partsocop attoch sa'ye'choçhtatoñ atto sachoteñ. Socsheñeshohuenña seyoçhropa' separasyoso'chepa'ch Yompor. ¹⁷ Ama't esa ñeñt atet es se'pa'yen ama't esa ñeñt atet seño'syen, e'ñechña seyemteño' Yepartseshar Jesús attochña sapa' es se'pa'yes. Ñeño'to'marña sapa' çhocmuepa'ch separasyoso'teñ Yompor Parets e'ñe Yepartseshar Jesucristo pa'so'chño.

Atetcha' yocrra añecop ñeñt parro yepacullo'tsa'yen

¹⁸ Te'pa' o'ch notas samña ñeñtes arrollaretes: Ñeñt serrollar sepenpa' e'ñech cohuen same'ñeña tarro'mar atet poctetsa yocop allohuenacpay ñeñfey ame'ñenaya Yepartseshar Jesucristo. ¹⁹ Ñaña sa ñeñtes ataporetespa' o'ch notas samña: E'ñech cohuen semuerya setapor, amachña çha muene' erro'tuanen sepeñeña setapor. ²⁰ Ñaña sa cheshaneshacha' o'ch notas samña: Chocmach same'ña sompor ñaña sachor amachña çha satpare'tatsto. Ñerra'm atetcha' se'papa' e'ñech cohuen coshena ama't Yompor Parets. ²¹ Ñaña o'ch notas samña ñeñtes achemereshatnesha: Amachña çha sa'tsrre'mare'tatatscheña sechemerasha', te't çha nanac sellcatyenamet. E'ñe puellquëño'tetpa' çhach atarr quellañtsotyeset, amach e'ñe cohuenaye' ame'ñenseto. ²² Ñaña sapa' o'ch notas samña ñeñtes ataruasataretes e'ñe atta: Chocmachña e'ñe cohuen same'ñaña ñeñt samo'mte' sepen añe patsro. Amachña puecuan'peño'tesaña sema'yoreñ setaruasatsto, ñeñt'pa' añecpaña atet sepena attoch e'ñe cohuen entenes samo'mte'. E'ñechña sema'yorñecma seyoçhrocmañen e'ñech cohuen setaruasen. E'ñechña sem'cha'na'teño' Yompor setaruasen e'ñe cohuen. ²³ Ama't erra'tsena ñeñt setaruas se'pa'yen e'ñechña seyoçhrocmañen e'ñe cohuen setaruasen. Tarro'mar ama't acheñecpa setaruasenpa' e'ñechña atet sepena ñerra'mrrate' Yamo'mtayecop Jesucristocop setaruasen. ²⁴ Sapa' e'ñe seño'teñ ñapa' añ o'patatensa ñeñt'cha' atarr socshaterre' tarro'mar sapa' po'ñoçh añ sesherbena Cristo ñeñt e'ñe po'ñoçh Yamo'mte' yepen. ²⁵ Tarraña allohuen ñeñt atet pa'yene' ñeñt ama pocteye' enteno Yompor, ñetñapa' atsa'tataretterretcha' ñeñt allpon pa'yesaye't ñeñt ama pocteyaye. Ñeño'to'marña ama't puesheñarroteta ñocpuetpa' amach eñalleña attoch pocte' enterranet Yompor.

4

¹ Ñaña sapa' o'ch notas samña ñeñtes pamo'mte' pen ñeñt setaruasaten. Sapa' atetcha' sepe'ña sa'taruasañer ñeñt e'ñe pocte' entenet

ñet. Ñaña sapa' señochepa'ch sapa'cho'ña sechenca'yeña Samo'mte' ñeñt pue'ntaño'tsen.

² Ñaña te' allohuenespa' o'ch notas saña: Chocmuepa'chña sema'yochrenaña ma'yochatsa, amach seçllañoña sema'yocheñoña Yompor. E'ñechña separasyoso'teñsha' sema'yocheña. ³ Ñaña o'ch sema'yocheña Yompor yocop, o'ch senamonay attoch eñalleta allcha' yeserrpare'toñ po'ñoñ, allcha' e'ñe ya'potua ñeñt ahuatoteñ ñeñt ama't puesheñarrapa' ama eseshaye' eñotenaye ñeñt atet penaña Cristo. Ñeñto'marña na te'pa' ayottam̄psareten cárcelo. ⁴ Ñaña añcha' senamon Yompor allochña napa' o'ch e'ñe neñotatteranet e'ñe eñoto'chen ñeñt atet poctetsa nocop o'ch e'ñe na'potuer allohuen.

⁵ Ñaña añecop ñeñt ama ame'ñetso sapa' seño'tepa'chña ñeñt cohuentetsa ñeñt'cha' atet sepanet. Ama't taya sapa' arosña atta es puechatstata. ⁶ E'ñe semuereño'tpa' chocmuepa'chña e'ñe cohuen se'ñorana'tyenanet, allochña ñetpa' e'ñech cohuen entonaset ñeñt atet señen. Allochña sapa' seño'chcha' eñorana'tyesahuet attoch e'ñe cohuen sanapyesamet e'ñe puesheña'ttsocmuet.

Arrpa' all so'terranet po'cartot

⁷ Ñaña te'pa' o'ch notas, masheñ Tíquico ñach seño'tatenaya' allohuen ñeñt atet nepena na arr. Ñapa' atarr yemuerannena, ñapa' chocma e'ñe cohuen yenpuenen atto yetorrena Yepartsesharecop. ⁸ Ñeñto'marña napa' ñeñtecopña nemñeña sesho ñach seño'tatenaya' ñeñt atet yepena ya arr. Ñaña ñach socshatose' e'ñe seyo'chrohuen. ⁹ O'ch nemñe epuet masheñ Onésimo. Ñapa'cho'ña chocma atarr cohuen yenpuenen, nanac yemuerannena. Ñapa' e'ñe parro'marneshas. Ñetcha'ña seño'tatose'ña allohuen ñeñt atet yepena ya arr.

¹⁰ Ñaña masheñ Aristarcopa'cho'ña mueneñ o'ch huom̄cha'tas añ necartot. Ñapa'cho'ña e'ñe parro'cma ayottam̄psaretey. Allo'tpa' o'ch huom̄cha'tas ñaña masheñ Marcos ñeñtara añ paterr necartot. Ñapa' Bernabé puepa'ñer. Napa' o' notuas atetcha' sepe' masheñ Marcos. Ñerra'm esempoch chap seshopa' e'ñech cohuen sagañ. ¹¹ Ñaña masheñ Jesús ñeñtara sochetsa Justo, ñapa'cho'ña mueneñ o'ch huom̄cha'tas añ necartot. Ñetpa' ñeñtet ñapue't judioneshet ñeñt ame'ñetsa, ñetña netorrapretenet Yomporecop attoch atarr ayochreshattena ña. Ñetña atarr nocshatene'. ¹² Ñaña masheñ Epafras ñeñt parro'marneshas, ñapa'cho'ña mueneñ o'ch huom̄cha'tas ñaña. Ñapa'cho'ña nanac torrena Cristocop. E'ñe puema'yocheño't huomencpa' atarr torrena socop. Puema'yocheño'tpa' chocma enamatenas Yomporeshot attoch e'ñe huomenc sepa'nom seyo'cher Yomporecop. Ñaña añ enamuennas attoch e'ñech poctacma chaponasa seyo'chro ora allohuen ñeñt atet muenen Yompor. ¹³ Ñocoppa' o' e'ñe neñotatuas ñeñt atet nanac torrena socop ñaña añecop ñeñt Laodiceo'tsa'yen, ñaña ñeñt Hierápoliso'tsa'yen. ¹⁴ Ñaña masheñ Lucas ñeñt apartañtetsa, nanac yemuerannena, ñapa'cho'ña mueneñ o'ch huom̄cha'tas añ necartot. Masheñ Demaspa'cho'ña mueneñ o'ch huom̄cha'tas ñaña.

¹⁵ Te'ña sapa' o'ch sehuom'cha'ch sam'ña nocop masheñ'nesha'chno ñam'ña no'chanesha'chno ñeñ'ñ Laodiceo'tsa'yen. O'ch sehuom'cha'ch ñam'ña Ninfas, sehuom'cha'ch ñam'ña allohuen ñeñ'ñ 'hocma ap'chetsa ña pa'paclo e'ñe pame'ñeñ'otet Cristo. ¹⁶ Esem'poch lleya'huet añ carta sesho allotpa' o'ch selleyach ñam'ña laodiceo'marnesha' ñeñ'ñ pame'ñeñ'otet Cristopa' 'hocma ap'chenet ñamet. Ñam'ña po'poñ necarta ñeñ'ñ nem'ñen Laodiceo sapa'cho'ña selleye'ch ñerra'm esempoch huapateret Laodiceo' o'ch 'cherr sesho. ¹⁷ Ñam'ña o'ch soch masheñ Arquipo ñeñ'ñ atet noten na, po'ño'chpa' etsotanepa'ña ñeñ'ñ atet yecheña Yepartseshar ñeñ'ñcha' po'taruas pa' ñocop.

¹⁸ Na ñeñ'ñten Pablon arrpa' nequellquëñ'ot e'ñe na nototpa' o'ch nehuom'cha'tnerres. Te'pa' o'ch seyerpa'na napa' ayottam'psareten. Te'pa' ñeñ'ñtach notas, Yomporepa'chña sa'nataya. Ñeñ'ñtpa' attetepa'ch Nompore. Allohua.

Pablo

AÑ ÑANOM SAN PABLO PO' CARTA ÑEÑT QUELLCAN TESALÓNICO'MARNESHA' 1 TESALONICENSES

Atto Pablopa' quellcan carta añecop ñeñt ame'ñetsa anetso Tesalónico epuet Silvano ñaña Timoteo

¹ Masheñeshacha' ñaña nochaneshacha' ñeñtes allohuenes apchetsa all anetso Tesalónico e'ñe seyemteñoť Yompor Parets epuet ñaña Puechemer Jesucristo ñeñt Yepartseshar yepen. Na Pablon sequel-lquêne'ña añ carta epan masheñ Silvano ñaña masheñ Timoteo. E'ñe nehuomcha'teñoťes sa napa' o'ch notas: Yomporepa'ch seben-sare'tam̄pene' ñeñtara Parets epuet Puechemer Jesucristo ñeñt Yepartseshar yepen. Ñetepa'chña socshatene' e'ñe sa seyo'chro allohuenes.

Atto ame'ñena ñeñt apchetsa Tesalónico

² Yapa' yema'yocham̄peñoťes sa chocma yeparasyoso'teñ Yompor socop allohuenacpas. ³ Tarro'mar allempo yema'yochena Yompor chocma yeyerprensa atto sapa' e'ñe seyemteñoť Yompor atarr setorra'yena ñocop ñaña e'ñe semorrentanna'teñoťpa' atarr seyenpanna. Ñaña e'ñe seyemteñoť Yepartseshar Jesucristo sapa' o' huomenc sepa'nom seyo'cher e'ñe ñocop. ⁴ Masheñeshacha' ñaña nochaneshacha' Yomporpa' atarr morrentensa. E'ñe yeñoteñ Yomporpa' ahuatoteñ acrerres sa ñeñtescha' ame'ñerraya. ⁵ Tarro'mar añ cohuen ñoñets ñeñt yeserrpare'tatoses ahuaña, ñeñtpa' ama ñoñtsenochayayo, yapa' añña ahua-mencat yepene' Parets Puecamquēñ allochñapa' atto sapa' o' chaponasa seyo'chro ñeñt ñoñetspa' e'ñepa't po'ño'ch ñeñtpa' ama shequēñtsoyaye. Sapa' e'ñe seño'teney ñeñt atet e'ñe cohuen yorrtatyesonas allempo allo'tseney sesho.

⁶ E'ñe atet sentey ya ñeñt atet yepena, sapa'cho'ña te'pa' e'ñech atet sepena sam̄a, ñaña e'ñe atet cohuen orrtatyen Yepartseshar Jesucristo sapa'cho'ña te'pa' ñeñtara sorrtatyen sam̄a. Atto sagapoñ Yompor po'ñoñ e'ñe socsheñsha' Paretsña Puecamquēñ socshate'ña e'ñe sa seyo'chro. E'ñe same'ñeñoť ama't atarr sa' muero'chtataretetyena tarraña sapa' chocma atarr socshena. ⁷ Ñeñto'marña allohuen ñeñt ame'ñetsa Macedonio'mar ñaña Acayo'mar, ñetñapa' atet eñotenset e'ñe cohuen sorrtatyen Yomporecop, ñetpa'cho'ña te'pa' e'ñe attecma orrtatyenet ñamet Yomporecop. ⁸ Te'ña e'ñe seshot o' epa'hua Yompor po'ñoñ all serrpare'tyeñet. Ama allayayo Macedonio ñaña Acayo, oraña o' e'ñe epa'hua erraparen allemeñ. Erraparen o' e'mare'tuaset sapa' atarr same'ñeña Yompor. Te'ña ñet o' e'mare'tuetpa' ñocpuetpa' ama pallteneto o'ch alla yoterraneterr ya ello. ⁹ Ñetñapa' serrpare'tyenyet atto sapa' e'ñe cohuen sagapapuey. Ñaña serrpare'tatanna'tyenet atto sapa' o' soctape'cherr ello cohuen Yomporecop o' seque'chpa'huerr ñeñt sem-chatse'tyese't ayethcataret. Te'ña ñeñtpa' o' seque'chpa'huer e'ñe poc-tacma attotña allempoteñ e'ñe cohuen sesherber Yompor ñeñt ama arromñateshayaye ñeñt e'ñe po'ño'ch Yompor. ¹⁰ Ñaña serrpare'tyeñet

atto sapa' e'ñe seyemteñoť atarr secueññañ Yompor Puechemer es-empohuañencha' huerra pue'ntañoť ñeñfara Puechemer ñeñť tantaterr allempo rroma, ñeñfara Jesús ñeñfcha' ya'qushpaterre' ñerra'm esempo yoročhtatuer Yompor.

2

Atet pa Pablo allempo Tesalónico'tsen

¹ O'ch masheñeshacha' ñaña nočhaneshacha' notas: Saña po'ñočpa' e'ñe señoťeñ ahuañmo'cha e'ñe cohuen sagapapuey, ama orrena yemo'tenso. ² Ellonetpa' e'ñe señoťeñ ama't epaye' mueročhtatyeteť Filiposo, ama't erroťuanen pa'yetañe't, țarraña Yomporña atarr ahuañencať pa'ye't atto yapa' e'ñe yeyemteñoť ña yeserrpare'tatas saña añ cohuen ñoñets ñeñť huetsa Yomporeshoť. Ama't allo'tsa'yen ñaña ñeñť nanac epatarñaťetyetsa, yañapa' čhocmaña yeserrpare'tatase't. ³ Ñeñťpa' ama panteñťsoťeye' yocťape'chataso, ñaña ama sosya'tsañeye' yocťape'chataso, ñaña ama e'ñe ya yeshquēñoť yocťape'chataso. ⁴ Elloña ya Yomporpa' e'ñe poctē' enteney ñeñťo'mar llesensa'y yach a'poterre' po'ñoñ ñeñť e'ñe po'ñoč cohuen ñoñets alloch a'qushpaterrey. Ñeñť atet ye'ñorenapa' ama añecpayaye o'ch e'ñe orrena yocshach acheñenasha', yapa' añecopña ye'ñorena attoch yocshateñ Yompor ñeñť e'ñe yentuene' ñeñť atet yocťape'chyen yeyočhro. ⁵ Ñeñťo'marña sapa' señoťeney ya ama't ahuaťapa' ama e'ñe ya yeñoñoť yocshatenso attoch e'ñe cohuen sentuene'y. Ñaña ama't ahuaťapa' ama erra yeshquēnsō attoch sapa' o'ch sapuey ñeñť yemnapretenes. Ñeñťpa' ama't Yomporpa' e'ñe poctē' entapreteney ñeñť atet yepenes. ⁶ Ñaña ama't ahuaťa ama añeye' yellquēno attoch sapa' o'ch secohuentatennay ama't ñaña allohuen po'potantañečhno. Ñaña yapa' ama't Cristo yellsensenayeñ ñeñťo'marña yocoppa' e'ñe poctēñ o'ch atet yepennaseñ ñeñť atet pena añcha'tareť, țarraña yapa' amaña yemno o'ch atet yepennasa. ⁷ Tarro'mar yapa' yemuereñoťes sapa' e'ñe cohuen es yorrtatyennas. E'ñe atet yentenes ñerra'mrrate' cheshatollesha' e'ñech cohuen muereña pachor. ⁸ Atarr nanac yemorrentensa ñeñťo'marña ama e'ñe ñapťa cohuen ñoñets yapuenso ñeñť Yompor po'ñoñ. Elloña yocoppa'čho'ña poctē' yenteñ o'ch yesuanom ñeñť e'ñe yocpa attoch yeyenpas saña tarro'mar sapa' atarr yemorrentensa. ⁹ Ñeñť atet yepena ya, amate' masheñeshacha' čha sepsenye atto nanac yetaruase't yeto e'ñe tsapome'tets allempo allo'tseney sesho. Ñeñťpa' añecop atarr yetaruase't allochñapa' attoch sa ama't puesheñarroťesapa' amach čha ya'tsrre'močhtana'taso allempo yeserrpare'tatase't cohuen ñoñets ñeñť Yompor po'ñoñ.

¹⁰ Sapa' e'ñe sentye't, Yomporpa'čho'ña e'ñe enteney atto yapa' e'ñe cohuen yorrtatyenes socop ñeñťes ame'ñetsa all. Ñeñťpa' e'ñe cohuen yorrtatyen Partsocop ñeñť e'ñe poctē' enten ña allochñapa' attoch amach erroťenoť otenyeto "ama pocteyaye ñeñť atet sepena." ¹¹ Sapa' señoťeñ yapa' e'ñe atet yentenes ñerra'mrrate' e'ñe yechemerasha' yepohuenes. Ñeñťo'marña e'ñe cohuen yocťape'chatase't e'ñe puesheña'ttsos. E'ñe cohuen yocshaterres, e'ñe cohuen yocťape'chatase't ¹² po'ñočh sapa' e'ñepa'chña cohuen sorrtatyen ñeñť atet poctetsa añecop ñeñť po'ñočh

ame'ñenaya Yompor tarro'mar ñapa' o' hua'ñerres o'ch so'patapretera all
ama'ñchatarettena ña, attochña secohuentapretera samña.

¹³ Ñeñto'marña añecop chocma yeparasyoso'teñ Yompor ña'ña atto
sapa' allempo ye'mñotaterres Yompor po'ñoñ sañapa' e'ñe cohuen
saguèrrñañ po'ñoñ. Ama't ya seserrpare'tatosayen ama acheña po'ñoñ
senteñe, ñeñtpa' Yomporoña po'ñoñ sentña allempo. Ñehua, ñeñtpa'
e'ñe po'ñoñ Yompor po'ñoñ. Te'ña sa ñeñfes o' same'ñerra, Yomporña
po'ñoñ o' cotape'chaterres e'ñe cohuen seyo'chro o' e'ñe huenaterres
ñeñt atet chocma se'patse'tyese't ahuat; te'ña sapa' añ sorratyen ñeñt
e'ñe cohuen enten Yompor. ¹⁴ Sapa'cho'ña masheñeshacha' e'ñe atet
sa'muero'chtatarettena Yomporecop e'ñe atet pe't ñeñt ñanom ap'chatsa
Yomporecop ñeñt Judeo'tsa'yen. Ñetpa' e'ñe pueyemteño'fet Cristo Jesús,
judionesha'ña ñeñt e'ñe pamo'ts penetpa' atarr muero'chtatenanet.
Sapa'cho'ña e'ñe seyemteño'f Cristo atarr muero'chtatenes samña
samo'tsesha'. ¹⁵ Ñeñtara judionesha' ñeñt muetse' Yepartseshar Jesús
ña'ña ñet muetsanate'te't ñeñt a'mta'yesaye't ahuat Yompor po'ñoñ.
Ama't te' yapa'cho'ña pue'moñe'teño'fetay o' cotare'terryeterr yaña.
Ñeñto'marña Yomporpa' ama't e'ñe mameshapa' ama cohuenaye'
entenaneto tarro'mar ñetpa' añe'na e'moñe'tenet allohuen pa'namen
acheñenesha'. ¹⁶ Ñetpa' atarr epatare'tenyet attoch yeserrpare'tach
po'poñ acheñ ñeñt ama judioneshayaye attoch ñetpa'cho'ña o'ch
a'queshpataretterret. Attoña ñetpa' atarr nanac yorenet po'ch'ñaret.
Tarraña te'ña Yomporpa' o' entatuerrmochanet po'yoro'chenña.

Secherra Pablo o'ch abcherraneta'

¹⁷⁻¹⁸ Ña'ña o'ch masheñeshacha' ña'ña no'chaneshacha' notas:
Yaña po'ñoñ allempo cha'ñmataterryet sesho'f allempoteñña ama't
esempapa' ama yabchanna'terro e'ñe teme'ttsen. Chemerrña te' yapa'
o' e'ñe yap'amerra. Tarraña ama't ama allame'ttsa yabchannenopa'
yeyo'chroñapa' e'ñe parrocmatetsey. Yapa' chocma yesechenañ
o'ch yabcherrsa' ama't napa' allponoche'tats nesechenañ. Tarraña
oneñeñapa' chocma epatare'teny. ¹⁹⁻²⁰ Tarro'mar sapa' saña ñeñfes
atarr yochatene'. Ama't allempoch huerra Yepartseshar Jesucristo
sapa' saña ñeñfescha' atarr yeyemterra, ñeñfescha' atarr yochaterre'
allempo, tarro'mar sapa' ñeñfescha' yapataterre' ñeñtcha' atarr
yochatene'ña ya allempo.

3

¹ Allempoña na o'huañ na'huañta' ñeñt atto nellquènsa ñato'
erroteno'tseneste', ñeñto'marña napa' e'ñe pocte' neñch o'ch alla
na'pa napuet Atenso ² attoch nemñonas masheñ Timoteo ñach
semo'terraya', ñach seserrpare'tatose' attoch e'ñe huomenc se'pa'
seyo'cher ñeñt atto same'ñena. Ñach sochaterre' ello ñeñt atto same'ñena.
Tarro'mar masheñ Timoteo ñapa'cho'ña atarr cohuen yetorrena parro
Yomporecop. Atarr serrpare'tatyenanet cohuen ñoñets atto Cristopa' ña
a'queshpatañtetsa. ³ Ñach soctape'chaterre' e'ñe cohuen Yomporecop
allochñapa' ama't atto atarr amuero'chtataretes, amachña ñeñfo'ta
sepuerraterro ama't puesheñarro'fesa. Ñehua, sapa' e'ñe seño'teñ
chocmach huaponaya ñeñt amuero'chtatañ yenten. ⁴ Allempo e'ñe
allo'tsa'yenacmay allohueney e'ñe parro allempo yapa' atet o' yotuas

čhocmach huaponaya mueročhteñets. Ñeñña te'pa' atetcho' o' p̄onasa, te'pa' e'ñete' señoñeñ e'ñe po'ñoč atet. ⁵ Ñeñto'marña ahuaña allempo o'huañ na'huanta' ñeñt atto nellquensa naña allempo nemñe masheñ Timoteo attoch neñotas sapa' erroteneste'ña sa, ñato' atterate' sesen ame'ñaya Yompor. Napa' nellquëño'tpa' atet noten ñato'rraña oneñe't puetpateño'tes o'te' čha quečhpaterres Yompor. Ñerra'm atet seperra napa' atet noten ñeñt atto netorrena e'ñe socoppa' ñato'rraña ñeñt'pa' e'ñete' orrena.

⁶ Tarraña allempo huerra masheñ Timoteo seshot, ñapa' serrpare'tatuerrey cohuen ñoñets, sapa' attera e'ñe cohuen same'ñena, e'ñe cohuen attera semorrentannena. Ñaña serrpare'tatuerrey atto sapa' čhocma seyerpuenya socsheñesha' ñaña atarr semneñ o'ch yabčhannerra parro. Yapa'čho'ña e'ñe attecma atarr yemneñ yaña.

⁷ Ñeñto'marña masheñeshacha' ñaña nočhaneshacha' yapa' ama't allohuen es yehuenoya ñaña ama'tcha' atarr yemueročhetuanena, te'ñapa' o' alla socshaterrey. Atto yeñoterres sapa' attera cohuen same'ñena ñeñña atarr yocshaterre'. ⁸ Atto sapa' e'ñe cohuen huomenc sepen seyother Yepartsesharecop, napa' ñeñña e'ñe cohuen nocshatene' atto nocrena arr patsro. ⁹ Ñeñto'marña atarr nanac yeparasyoso'teñ Yompor socop. E'ñe yeyočhropa' čhocma yocshensa Yomporesho ñeñto'marña čhocma yeparasyoso'teñ Yompor socop. ¹⁰ Chocma yenamueñ Yompor yeto ama't ñaña tsapo attoch yabčhannerra. Atarr yemneñ o'ch yoctape'chaterra' erra'tsente'ña sepalltena attoch same'ñera e'ñe poctacma.

¹¹ Yompor Parets ñaña Yepartseshar Jesús ñetepa'chña yečhaterre'ña sesho. ¹² Yepartsesharepa'chña atontaterre'ña semorrenteña allochñapa' allo'nach nanac sesen morrentanna'ttsa e'ñe sagattsa attochña allo'nach sesen morrentenaya allohuen acheñenesha', e'ñe atet yepena ya sapa' nanac yemorrentensa. ¹³ E'ñe semorrentanna'teño't seyotherñapa' e'ñech huomenc pennas Yepartseshar Cristo. Ñerra'm atetcha' sepa' allempopa' amach erroteno't otteñe'chuerra'soña Yompor tarro'mar sapa' e'ñech cohuen es sorrtatyen Partsocop e'ñe tayoteñ. Attepa'chña entuerresña Yompor Parets ñerra'm allempoch huerra Yepartseshar Jesús. Es-empo po'ñočhpa' huerrach epuet allohuen ñeñt pueyochreshačhno pen ñeñt e'ñe pocte' enten Parets.

4

Allo'nepa'chña cohuen yesen orrtatyesnene' ñeñt atet e'ñe pocte' enten Yompor

¹ Te'ña masheñeshacha' ñaña nočhaneshacha' napa' o'ch notas, e'ñe yame'ñeño't Yepartseshar Jesús, sapa' allo'nepa'chña cohuen sesen orrtatyesnene' ñeñt atet e'ñe pocte' enten Yompor ñeñt yeyčhatuas ahuañmo'čoteñ.

² Sapa' po'ñočhpa' o' señoter ñeñt atet yeyčhatuas e'ñe yame'ñeño't Yepartseshar Jesús attochña sapa'čho'ña o'ch sorrtatyen ñeñt cohuen enten ña. ³ Po'ñočh ñeñt'pa' Yomporña muene'ña atet, sapa' o'ch sa'cohuentataretterra ñocop attochña ama't puesheñarrafapa' amach sechtatscheña ñeñt ama setaporeyaye. ⁴ E'ñe puesheña'ttsospa' čhochña e'ñe señoč attoch e'ñe cohuen seyore coyanesha' ñeñt'cha' e'ñe ñapueñ

setapor sepa'. Atetpa' e'ñech pocte' entapretenes Parets, ama't ñaña allohuen acheñenesha'. E'ñechña cohuen senteñña setapor. ⁵ Amachña e'ñe añepa seyoroña setapor attoch e'ñe socshaten sechets ñeñt atet pena po'potantañ acheñenesha' ñeñt ama eñotenaye Yompor. ⁶ Ama't puešheñarrofesapa' amach so'chña'tañpsatscheña semo'nasheñ, amach sechtapretatsche puetapor. Allohuen ñeñt atet yepa'pa' čhocmach tsataterrya Yompor esempo. Ñeñtpa' ahuañmo'choteñ e'ñe po'ñočh o' yotuas. ⁷ Yomporpa' ama añecpaye' chore'tenye o'ch aña atet yepa'yes ñeñt atarr sosey, añecopña chore'teney o'ch e'ñe ya'cohuentatare'terra ñocop. ⁸ Ñerra'm esesha'ch atpare'tene' ñeñt atet neyčhatenes ñetpa' ama acheñeye' po'ñoñ atpare'teneto, ñeñtpa' Yomporña po'ñoñ atpare'tenet ñeñfara Yompor ñeñt yapuene' Puecamquëñ ñeñtcha' ya'cohuentatene' e'ñe ñocop.

⁹ Atto semorrenteña allohuen masheñneshachnopa' te'ña sapa' ama sepallteno o'ch alla noterrerr necartot, sapa' o' eñotaterres Yompor attoch semorrentannerra allohuenes. ¹⁰ Po'ñočh e'ñe semorrentueña allohuen ñeñt ame'ña'yetsa allemeñ Macedonio. Tarraña ama't atet sepenañpa' ellopa' o'ch masheñneshacha' ñaña nočhaneshacha' alla noterrerr: Allo'nepa'ch sesen morrentanna'tnomtsa e'ñe cohuen. ¹¹ Sapa' añcha'ña se'nen attoch e'ñe cohuen muechet seyčhena sa'netsro, amachña aña sorrtatatsetyeso attoch se'moñe'tannena. Ñaña o'ch alla noterrerr e'ñe sa soto'pa' čhocmachña setaruasa'yes ñeñt atet o' notuas. ¹² Cohuencha' setaruasa'yes allochñapa' e'ñech cohuen entenes ama't ñeñt ama ame'ñetso. Ñaña sapa' añecopcha'ña setaruasa'yes attoch amach čha es sepallteno.

Attoch tantuerra ñeñt arromñainesha' allempoch huerra Jesús

¹³ Masheñneshacha' ñaña nočhaneshacha' yapa' yemneñ o'ch e'ñe señoter erroteno'tsa'yente'ña ñeñt pame'ñeñot rromuets. Allochñapa' amach atta atarr sellquënaneto ñeñt atet pena po'potantañ, ñetpa' ama es yemteneto. ¹⁴ Yapa' atto yame'ñeña Jesús ña ama't rroma ellopa' alla tanterra, yame'ñeña ñaña Yomporpa' attecmač tantatuerrey allohueney ñeñteycha' e'ñe yame'ñeñot Jesucristo yerroma.

¹⁵ Ñeñto'marña te' sapa' o'ch neñotatas ñeñt atet eñotaterrey Yepartsešhar Jesucristo, ñeñtpa' atet yečhatey: Allohueney ñeñteycha' orameñ corretsa allempoch huerra ña ñeñteycha' ama rromhuetsa' allempo, yañapa' amach yotañpesyoña yanom ñeñt o' rromhua, añcha' ñanom oterrtsa ñeñt o' rromhua allotñapa' yaña ñeñtey orameñ corretsa, tarro'mar allempopa' atetcha' perra. ¹⁶ Partsesha'pa' ñachña eñerrets huomenc ñaña ñeñt pa'mcha'tareter pen allohuen mellaño'eññaneshach' ñachña rrana'nerrtsa, e'ñech allempocma e'morrterra ñaña Yompor po'pocor. Attochña ñapa' sohua'nerra pue'ntañoč. Ñeñtña rromuets ñeñt ameña'nmaya Cristo ñetña allempopa' ñanmuetcha' tantrra'tuerret. ¹⁷ Allotñapa' yaña ñeñtey orameñ corretsa arr patsro a'tapatareteycha' yaña oso e'ñe parro epay ñeñt o' tantrra'tuena rromot attochña e'ñech parrocsa yepocter Yepartsešhar eno. Attochña e'ñe allohueneypa' parro'tseneycha' epay Yepartsešhar e'ñe allempoteñ errponañohuen. ¹⁸ Ñeñto'marña sapa' čhocmach seyerpatannena añ cohuen ñoñets attoch e'ñe cohuen socshatannena.

5

1 Te'ña masheñeshacha' ñaña no'chaneshacha' socoppa' ama pallteno o'ch alla noterrser añ necartot e'ñech esempo etsoterra allempoch huerraña Yepartseshar. 2 Tarro'mar sapa'cho'ña o' e'ñe señoter çherrcha' paterr yet allempoch huerra Yepartseshar Jesús. Allempopa' e'ñech machayota huerra e'ñe atet ñerra'm esempo huennaya eñet tsapo e'ñech machoyota huapa. 3 Allempo amach çhena' ñeñt yeter allempoch huerra Yepartseshar acheñenesha'ña arr patsro ñetñapa' atetcha' otyerret allempo: "Te'ña yapa' e'ñe cohuen muechet yeyçhena arr patsro. Yocoppa' ama't ahuatapa' amach eñalletteroña ñeñtcha' yeyore'tame'terre'." Tarraña e'ñech allorocma machayotach huerranet ñeñtcha' e'ñe a'cclatuerrahuet. Allempo ama't puesheñarrapa' amach eñalleña attoch yeterret. E'ñech atet çherranet ñerra'mrrate' allempo atsotenana coyanesha' pue'mar amach eñalleña attoch yetam̄psana atto atserpeñ pue'mar attoch amach atserpe. 4 Tarraña saña po'ño'ch masheñeshacha' ñaña no'chaneshacha' sapa' ama checmeto'tsenayayso ñeñt atet pena acheñenesha' ñeñt ama ame'ñetso. Sapa' e'ñe señoteñ ñeñto'marña ama'tcha' machayota huerra e'ñe atet machayota huennaya eñet, sañapa' amach çha seyorenatsto. 5 Tarro'mar sapa' e'ñe same'ñeño' Cristo e'ñe señoteññañ po'cohuenña ñeñto'marña napa' o'ch netma'ntatasa sapa' puetarenana'tarneshas ñaña yetena'tarneshas. Po'ño'ch yapa' ama tsapo'marneshayaye ñaña ama checmeto'marneshayaye tarro'mar yapa' ama añeye' yepa'yeno ñeñt atet patse'tyen ñeñt ama ame'ñetso. 6 Ñeñto'marña o'ch notas: Yapa' amach çha yeçllatsto Yomporecop, tarro'mar ñerra'm atet yepapa' çhach yottena ñerra'm çha yemuen Yomporecop atet pena po'potantañ ñeñt atta es pueçha'yetsa. Yapa' amachña çha yemanrra'tatsto çhochña e'ñe yeñotena attochña yeñose're'tyesuena. 7 Ñehua, yeñoteñ ñeñt manrretspa' tsapoch manrrenet ñaña ñeñt posa'tare'tyetspa' tsapoch posa'tare'tyenet. 8 Tarraña yapa' yeto'marneshay ñeñto'mar çhocmuepa'ch e'ñe yeñoteño' yeñose're'tyesuena. E'ñe yame'ñeño' Yompor ñaña yemorrentanna'teño' ñeñtña cohuan̄pene'ña yeyoçher Yomporecop attoch amach aña yoctape'chatsto ñeñt ama pocteye' enteno Yompor. Ñeñtapa' añ toma'ntena asrom atet ñerra'mrrate' ñeñt chorrena solltar ñeñt a'natene' puesomap allempo quellarena attoch ama etaretteneto. Ñaña yapa' yeyemteño' Cristo te'ñapa' e'ñe a'qeshpatarey ñeñtapa'cho'ña ñeñtña yemoñenaya. Ñeñtapa' añ toma'ntena atet pena solltar o'ch na'nman asret poño attoch ama etto'taretteto. 9 Tarro'mar Yompor po'ño'chpa' ama añeye' o'patatenyo attoch coñchatuerrey; yapa' añña o'patatenya attoch e'ñe cohuen a'qeshpatarey allohueney e'ñe yame'ñeño'ta Yepartseshar Jesucristo 10 ñeñt rromats yocop, attochña ama'tcha' o' yoclla'huenañ allempoch huerra amapa' ñato' orameñ yocrenmeñ allempoch huerra atterayach yañapa' corretsayach epay ña e'ñe parro. 11 Ñeñto'marña te'pa' notenes, sapa' çhocmuepa'ch socshatannena Yomporecop. Chocmuepa'chña huomenc sepanna'ta seyoçher Yomporecop e'ñech atet sepa tayoteñ.

Pablopa' e'ñe cohuen cotape'chatyesanet

12 O'ch masheñneshacha' ñaña no'chaneshacha' notas po'poñ, sem'cha'na'teño'tpa' e'ñepa'ch cohuen semorrenteña allohuen ñeñt torra'yetsa Yomporecop sesho tarro'mar ñetpa' e'ñe Partseshesho't anarettenet ñeñt'cha' an'cha'tarettatsa socop, ñetcha'ña soctape'chatene'ña e'ñe cohuen. 13 Atto atarr torrenet Yomporecop sañapa' e'ñepa'chña cohuen sentenanet, atarrcha' semorrentenanet. Ñaña ama't allohuenes e'ñe sagattsapa' e'ñepa'chña cohuen sentannena attoch e'ñe cohuen sey'chena e'ñe señmañesha'.

14 Ñaña o'ch masheñneshacha' alla noterrser ñeñt'cha' atet sepa: Ñeñt atarr quellañtsotyets sesho sachña cotape'chaterrahuet cohuen attoch amach allo'na quellañtsoteneto. Ñaña ñeñt ama coshetso sachña e'ñe cohuen coshaterrahuet ñaña ñeñt ama huomencaye' penaye pueyo'cher Yomporecop, sachña e'ñe cohuen coshatyerrahuet attoch e'ñe huomenc perret ñamet pueyo'cher Yomporecop. E'ñe allohuenet saña e'ñe semorrenteño'fanet ñetpa' 'chocmuepa'chña e'ñe cohuen sa'huantenanet.

15 Ñaña sapa' 'chocmuepa'ch e'ñe cohuen seño'tena allochñapa' ñerra'm po'psheñeñ erro't p'onaspa' sapa' ama't e'ñe puesheñarro'tesa amach setsa'tatatsche ama't coñe'ta. Añcha'ña e'ñechña cohuen sepeñ samo'ts ama't ñaña allohuen po'potantañ acheñenesha'.

16 Ñaña sapa' 'chocmuepa'ch e'ñe cohuen socshena. 17 Ñaña 'chocmuepa'chña sema'yochena. 18 Ñaña ama't erro'teno'tsensa 'chocmuepa'ch separasyoso'teñ Yompor tarro'mar ñeñt'pa' atet muenen e'ñe yocop allohuenacpay ñeñfey yemtenoya Puechemer ñeñt Cristo Jesús.

19 Ñaña amach satpare'tatsche ñeñt atet cotape'chatenes Parets Puecamquëñ e'ñe seyochro, tarro'mar ñerra'm atet se'papa' 'chate' sa'huañaterrñañ ñeñt atet eñotatyenes Yompor Puecamquëño't. Ñeñt'pa' e'ñe atet ñerra'mrrate' o' semayerrñañ Yompor po'urare. 20 Ñaña amach atet sentatsche ñeñt atet eñoraten Parets Puecamquëño't ñerra'm ama asherbenaye' senteñe. 21 Allohuen ama't erra'tsena 'chochña ñanom seño'ch ñato' e'ñe'te' cohuen ñato'pa' amate' cohuenayaye. Ñeñt allohuen erra'tsencha' e'ñe cohuen sentyes ñeñt'ñapa' amach seque'chpatstere ama't ahuata. 22 Tarraña allohuen erra'tsencha' ama cohuenaye' sentyeso ñeñt'ñapa' 'chosaña a'ypo'ñerre'.

23 Yompor ñeñt e'ñe yocshatene' yeyochro, ñepa'chña e'ñe sa'cohuentaterre' e'ñe cohuen Partsocop. 'Chocmuepa'ch allo'na sesen e'ñe cohuen allochñapa' ñerra'm esempoch huerra Yepartseshar Jesucristo, socoppa' amach eñalleña ama't coñe'ta attoch otteñe'chuerres ama't secamquëño'huen, ama't seyochrohuen, ama't ñaña sechtsohuen. 24 Tarro'mar Yompor ñeñt o' 'chore'terres ñapa' ña atarr ayemuetpotetsa, ñachña setsotatue'ña e'ñe ora allohuen ñeñt e'ñe cohuentetsa ñocop.

Arrpa' all so'terranet po'cartot

25 O'ch masheñneshacha' ñaña no'chaneshacha' notas, 'chocmach sema'yocham'pesya yaña.

26 Ñaña te'pa' nemneñ o'ch nehuon'cha'tas allohuenes ñeñtes ame'ñetsa.*

* 5:26 Po'ño'ch oteneý. "Choch setso'ttsa'pa'tannena ñerra'm esempo sehuon'cha'tanna'tena ñeñt atet poctetsa Partsocop." Ñeñt'pa' atet ye'chete't ahuat.

²⁷ Ñaña te'pa' o'ch notas, e'ñe yemcha'na'teñoť Yepartseshar Cristo añ cartapa' o'ch selleyach allohuen masheñneshachno ñaña nočhaneshachno.

²⁸ Yepartsesharepa'chña Jesucristo sa'natenaya e'ñe allohuenes. Ñeñtach notas, ñeñtpa' attetepa'ch Nompore. Allohua.

Pablo

AÑ PUEPAÑ SAN PABLO PO' CARTA ÑEÑĪ QUELLQUĒRRANERR TESALÓNICO'MARNESHA' 2 TESALONICENSES

*Atto Pablopa' quellquĒrranerr carta añecop ñeñĪ ame'ñetsa anetso
Tesalónico epuet Silvano ñaãa Timoteo*

¹ Masheñeshacha' ñaãa noċhaneshacha' ñeñĪes allohuenes apċhetsa all anetso Tesalónico e'ñe seyemteñoĪ Yompor Parets epuet ñaãa Puechemer Jesucristo ñeñĪ Yepartseshar yepen. Na Pablon o'ch alla nequellquĒrrnaserr po'poñ carta epan masheñ Silvano ñaãa masheñ Timoteo. ² E'ñe nehuom'cha'teñoĪes sa napa' o'ch notas: Yomporepa'chña sebensare'tañpene' ñeñĪara Parets epuet Puechemer Jesucristo ñeñĪ Yepartseshar yepen. Ñetepa'chña socshatene' e'ñe sa seyoċhro allohuenes.

*Allempoċ huerra Cristopa' a'coñchatareĪterrach allohuen ñeñĪ ama
eñotaye'te Yompor*

³ O'ch masheñeshacha' ñaãa noċhaneshacha' notas, e'ñe pocte' ċhocmach yeparasyoso'teñ Yompor socop tarro'mar sapa' po'ñoċh allo'na sesen ame'ña'nmaya Yompor ñaãa allohuenes e'ñe puesheña'ttsospa' allo'na sesen morrentanna'tyesnomtsa. ⁴ ÑeñĪto'marña yañapa' atarr yocshensa. E'ñe yocsheñoĪpa' atarr cohuen yeñosyen socop all allampaño'mar all apċha'yenet Yomporecop. Ñetpa' ċhocma yeñotatyenanet atet sepena sa, ama't ñeñĪ se'moñe'tene' ñeñĪ ċhocma soctare'tene' atto mueroċhtatenset, tarraña sañapa' ċhocma atarr sa'huantenanet e'ñe same'ñeñoĪ Yompor. ⁵ Ñehua, yapa' yeñoteñ Yomporpa' e'ñe pocte' es pa'yen. ÑeñĪto'marña yeñoteñ sapa' e'ñe same'ñeñoĪ ña, ñañapa' e'ñeca'ye pocte' entenes allochñapa' attoċh seċherr all am'cha'tarettena ña, sapa' ñeñĪtecopña atarr sa'mueroċhtatarettenaña te'.

⁶ Tarraña Yomporpa' e'ñe pocte' enteñ ñach tsa'taterraya mueroċhteñtso allohuen ñeñĪ semueroċhtatene' sa te'. ⁷ ÑeñĪ atto atarr semueroċhtena te' e'ñe ñocop, Yomporña' e'ñe pocte' enteñ socop, ñachña ello socshaterre'ña sa e'ñe atet atarr coshateney ya. Yapa' ñeñĪcha'ña atarr yocshaterre' ñerra'm esempoch orretuerra Yepartseshar Jesús allempoċ huerra pue'ntañoĪ. Ña po'ñoċhpa' orretuerrach epuet po'millañoĪeññaneshar ñeñĪ atarr ahuamencatesha' pa'yen. Ñapa' e'ñech po'yoroċhenñoĪ huerra atet ñerra'mrate' tso' huoretnets. ⁸ Allempoċ huerrapa' coñchatuerrancha' allohuen ñeñĪ ama eñotaye'te Yompor ñeñĪ ama ame'ña'poye' entaye'te cohuen ñoñĪets ñeñĪ Yepartsesharecop Jesucristo. ⁹ Ñetña'pa' attoċh a'coñchatareĪterretpa' chenca'huerretcha' errponañohuen. Attoċh ñetpa' o'ch ellopa'tetstatareĪtetterret amach entereto Yepartseshar, amach enterrñañeto po'cohuenña all nanac partsotena. ¹⁰ Ñapa' tarro'marcha' huerra attoċh allohueney ñeñĪfey pueyochresha' pen Parets, yañapa' yecohuentatapuerrñañcha'. Allohueney ñeñĪfey ame'ñaye't atarrcha'

yecuanrrortapuer. Sa'nachña cohuentatapuerre' tarro'mar sapa'cho'ña same'ñena cohuen ñoñets ñeñt yeñotatenes.

¹¹ Ñeñto'marña yapa' chocma yema'yocham'pensa allochñapa' attoch Yomporpa' e'ñe pocte' entenes atto ñapa' o' chore'terres o'ch pueyochresha' perres saña. Ñaña yapa' añ yenamuennas Yompor e'ñepa'chña po'huamencot etsotatonasña allohuen ñeñt atet soctape'chyen cohuen ñocop ñaña ora ñeñt allpon setorra'yena e'ñe same'ñeñoñ ña. ¹² Attochña sapa' e'ñech cohuen secohuentaterrñañ Yepartseshar Jesús, ñaña' co-huentaterrescha' saña. Ñeñtpa' e'ñe Yompor puemuerenofey ñaña Yepartseshar Jesucristo.

2

Allempoch orrterra puesheñarr acheñ ñeñt atarr atparñañtetsa

¹ Te'pa' o'ch masheñeshacha' ñaña nochaneshacha' neñotatas po'poñ ñeñtpa' añ allempoch huerra Yepartseshar Jesucristo attoch ñapa' o'ch ap'chatuerrey allohueney e'ñe ñesho. ² Te'pa' ñeñto'marña notenes: Ama't puesheñarrotesapa' ñato't cha yore'tensa'ña po'poñ cotapñats. Sapa' amach cha seyorenatsto ama'tcha' se'mare'ter o' cherr allempoch huerra Yepartseshar. Ama'tcha' otasetañ ñetpa' e'ño' Parets Puecamquëñ eñoratenahuet, sañapa' ñato'tña cha seyorena'. Ama'tcha' pueserrparñofet atet otaset, sañapa' amach seyorenatsto. Ama'tcha' atet otasetañ te'pa' o' chap carta ñeñt mueñen Pablo ñeñtpa' atet oten carta, te'pa' o' cherr allempoch huerra Yepartseshar, saña e'ñe seyorño'pa' ñato'tña ñeññaña same'ñena'. ³ Ama't puesheñarrotesa sapa' amach se'mñotatstaneto ama't e'ñe errotencha' otyesaset, tarro'mar ñetpa' atetcha' shecare'tasetañ. Ñeñto'marña napa' o'ch notas, allempopa' amaca'ye cherra' ñeñeñpo ñeñte yetñatsroch huerra Yepartseshar, ato'tña atarr atonterra' ñeñtcha' quechpuerre' Yompor. Ñaña allempopa' orrterrach puesheñarr acheñ ñeñt atarr atparñañtetsa, ñeñtpa' chenguëñtsa o'patenaya. Ñaña'pa' Yomporach atarr e'moñe'terr ñaña allohuen acheñenesha' ñeñt muechatse'tyene' pa'namen ñeñt po'yomporer pa'yenet ñachña e'ñe tanterrahuet. ⁴ Ñaña ñeñña atparña'pa' e'ñe pommo'cheño'pa' atetcha' oterran acheñenesha' ñapa' ño'ña e'ñe Yomporetets. Attochña ama't Parets pa'paclopa' o'ch anorruerr, o'ch e'ñe atet perra ñerra'mrrate' ña po'ño'ch Yomporetets.

⁵ Sapa' ama't seyerpuenoña allempo allo'tsenmeñen sesho na ama't ñeñtpa' e'ñe notuase't. ⁶ Sapa' señoñe' ñeñt onare'tatene'ña ña atot amo' huerro tarraña chocmach orrterra allempoch cherr e'ñe atet onañchare't ñocop. ⁷ Ama't e'ñe tayoteñ atto atpare'tenet ñoñets ñeñt atet anare'tpa' ñetña e'ñe a'nahuapa' chocma atet penet. Tarraña te'pa' eñall ñeñt onare'tatene' ñeñt acheñer ñeñtcha' atarr atparña'ttertsa, ñeñtña'pa' chocmach atet pena tarremphuach esempoch aprratam'psare'tterra ñeñt onare'tatene' te'. ⁸ O'ch aprratam'psare'tterrapa' ñeñtña' acheñer ñeñtcha' atparña'ttertsa allempochña orrtatere'tterra. Tarraña allempoch huerra Yepartseshar Jesús ñachña e'ñe puenamot po'r'rerrño'pa' ñeñtcha' muetserre'ña ñeñt atarr atparñañtetsa. Attoch orrterra Jesús e'ñe ña po'partsoteño' ñeñtcha'ña e'ñe a'mchechatterre'ña ñeñt atparñañtetsa. ⁹ Ñehua, ñeñt

acheñerpa' oneñeñ atarr ahuamencat pene' attoch orrterra. Ñeñto'marña pa'namencha' orrtaterr ñeñt po'partsoña pen ña ñeñt ama't ahuata acheñenesha' arr patsropa' ama't puesheñarrofetapa' ama puentareto. Tarraña ñeñt po'partsoteña pen ñapa' ñeñtpa' ama Yomporeye' apuenaye, ñeñtpa' oneñeña apuene' atto shecare'tyenan acheñenesha'.¹⁰ Attach e'ñe pa'namenot atarr shecare'tyerran acheñenesha' ñeñt ama't mameshapa' ama pocteyaye. Añcha' ashcare'tterrtsa allohuen ñeñt ama ame'ñetso ñeñt o'patena chenquëñets. Tarro'mar ñetpa' ahuatoteñ ama ame'ña'poye' enteññañetoña Yompor po'ñoñ ñeñt e'ñe po'ñoçh alloch a'qeshpatare'tterretañ.¹¹ Ñeñto'marña Yomporpa' muenaterranetcha' o'ch atarr ashcare'tterret, attochña ñetpa' e'ñech aña ame'ñerret shequëñets ñeñt ama po'ñoçhayaye ama't mamesha.¹² Attochña allohuen ñeñt ama ame'ña'poye' entaye'te Yompor po'ñoñ ñeñt e'ñe po'ñoçh qeshpeñets, ñetpa' aña coshete't ñeñt ama pocteye' enteno Yompor, ñeñto'marña ñetpa' a'coñchatare'tterretcha' allempo.

Yapa' e'ñe ahuatoteñ acrerrey Yompor attoch a'qeshpaterrey

¹³ Tarraña saña masheñnesha ñaña noçhaneshacha', yapa' çhocma yeparasyoso'teñ Yompor socop ñeñtes atarr muerena Yepartseshar. Tarro'mar Yomporpa' ahuatoteñ acrerres sa attoch a'qeshpaterres e'ñe cohuen. Ñeñtpa' añcha' sa'qeshpaterre' atto Parets Puecamquëñpa' e'ñe a'cohuentatenes ñocop atto sapa' e'ñe cohuen same'ñerrñaña po'ñoñ ñeñt e'ñe po'ñoçh alloch yeqeshperra.¹⁴ Sapa' ñeñtecopña çhore'terresña Yompor allempo yeserrpare'tatase't cohuen ñoñets alloch a'qeshpaterrey Yompor. Attochña sapa'çho'ña secohuentapreterach Yepartseshar Jesucristo esempohuañen.

¹⁵ Ñeñto'marña o'ch masheñneshacha' ñaña noçhaneshacha' noterrser: Sapa' e'ñepa'chña huomenc sepa'nom seyoçher Yomporecop. Ñaña ora allpon ñeñt yeyçhatyesase't e'ñe ya yenamot yeserrpare'tatase't ama't ñaña yecartot ñeñtña'pa' e'ñepa'ch huomenc seyoçhre'cha.¹⁶⁻¹⁷ Te'ñapa' o'ch notas: Yepartseshar Jesucristo ñaña Yompor Parets ñetepa'chña e'ñe cohuen socshaterre'ña sa seyoçhro, ñetepa'chña ahuamencat sepa'yese' allochña'pa' attochña sapa' çhocmach señosyen ñeñt e'ñe cohuen ñoñets ñaña e'ñechña cohuenare' es sorratyen. Tarro'mar Yomporpa' ñeñtña atarr yemorrenenaya, ñapa' ña ñeñt çhocma yocshatene' yeyoçhro. Ñeñtña cosheñetspa' amach ahuañañatërro ama't errponaña. Ña e'ñe puemuereño'tpa' çhocma eñotateney e'ñe cohuen ñeñt atarr yeyemtena.

3

Atto Pablopá' otanet çhocmach ma'yochamñepeñet

¹ Masheñneshacha' ñaña noçhaneshacha' te'ña e'ñe allohuapa' o'ch notas: Sapa' çhocmach sema'yochamñepesya yaña. O'ch senamueñ Yompor attoch epa'huerra tecma Yepartseshar po'ñoñ erraparen, cohuenepa'ch entyeññañet po'ñoñ e'ñe atet atarr cohuen señch saña

allempo chap sesho. ² Tarro'mar acheñenesha'pa' ama allohuenacmaye' ame'ñeneto, shonte' ñeñt atpare'tene' Yompor ñaña shonte' atsrre'mñañesha' ñeñt ama cohuenayaye. Ñeñto'marña sapa' añcha' senamueñ Yompor amuepa'chña cha epatare'tatsetyeto. ³ Tarraña Yepartsesharpa' ñachña atarr yeyemtena, ñachña ahuaменcaт sepeñe', ñach secuam'pene', ñach sa'nataya, amach muenatano o'ch chaponasa ñeñt ama cohuenayaye. ⁴ Ñaña yapa' e'ñe yeyemteño' Yepartseshar sapa' e'ñe yeñotenes ñeñt atet yotenes sañapa' e'ñech atet sepena te' ama't ñaña tsapatone' čhocmachña atet sepena. ⁵ Yepartsesharepa'chña Jesús e'ñe cohuen señoatene'ña seyočhro atto Yomporpa' atarr morrentensa, attochña e'ñech cohuen sa'huinta'huanom allohuen topateñets e'ñe atet pe't Cristo.

Yocoppa' añ poctetsa čhocmach yetaruasen

⁶ Te'ñapa' masheñeshacha' o'ch notas e'ñe Ya'm'cha'tareter Jesucristo pa'so'chño, sapa' ñato't seyemteña'ña ñeñt atarr quellañets ñeñt amach mueno taruasa'. Ñeñt atet petsapa' ama mueno o'ch ame'ñanaña ñeñt atet yeyčhatenes. ⁷ Sapa' e'ñe señoateñ añ poctetsa socop o'ch atet sepena samña e'ñe atet senteney ya. Yapa' allempo allo'tseney parro yapa' čhocma yetaruasen. ⁸ Yapa' ama't errotena ama't puesheñarrapa' ama yerraprecheña puerrar e'ñe atta. Ñamche'ña yapa' čhocma yetaruasen yeto e'ñe tsapome'tets attot yentña ya yerrar allempo allo'tseney sesho. Yapa' ama čhoje' ya'tsrre'močhtana'taso ama't puesheñarrotesa. ⁹ Ama't e'ñe poctey o'ch serratapyeñ e'ñe atta, tarraña yapa' ama yemno tarro'mar yapa'cho'ña yemneñ o'ch yetaruasos yaña allochñapa' attoch yorrtatonas ñeñt e'ñe cohuentetsa socop allochñapa' atetcha' sepa samña. ¹⁰ Allempo allo'tseney seshopa' atet yotas, ñerra'm esesha'ch atarr quelletspa' arepa'ña rratstats, rranepa' po'čllañ. ¹¹ Yapa' ye'mare'tenes puesheña'tsos sapa' sečllaño'pa' atta sellapene't, ama čhoje' setaruaseno ama't mamesha, añaña e'ñe setorra'yena sa ñeñt ama es sherbeno. ¹² Allohuenes ñeñtes atarr quellañsarerespa' te'pa' o'ch notas e'ñe Ya'm'cha'tareter Jesucristo pa'so'chño, sapa' čhoñaca'yeña setaruasa'ña e'ñe cohuen señmañesha' attotcha' sechen allpon ñeñt sepallta'yena arr patsro.

¹³ Ñaña sa masheñeshacha' ñaña nočhaneshacha', sapa' ñato'tña cha semuenme'chena'ña orrtatyese' cohuen ñeñt attecma sepa'yena. ¹⁴ Ñerra'm esesha'ch ama e'm'ñotaye atet yotenes añ yecartot, ñeñña acheñerpa' o'ch se'ñotortach ñapa' čhocma atet pena. Sañapa' ñato'tña seyemteña'ña ñeñt atet petsa, allochñapa' attotcha' penquerra. ¹⁵ Tarraña amach atet sentatsche ñerra'mrate' cho se'moñe'teñ. Sapa' čochña e'ñe cohuen soctape'chater atet e'ñe cohuen yoctape'chateñ yemo'nasheñ.

Arrpa' all so'terranet po'cartot

¹⁶ Yepartseshar ñeñt e'ñe yocshatene' yeyočhro ñepa'chña socshaterre' sa seyočhro ama'tcha' erroteno'tsenes. Yepartsesharpa' e'ñepa'chña parro allo'tsenes allohuenes.

¹⁷ Na ñeñfen Pablon arrpa' nequellquëño' e'ñe na nototpa' o'ch nehuom'cha'tnerres. Sapa' ñeñtcha'ña señoatete' añmapa' e'ñe no necarta. Allohuen ñeñt e'ñe no necartapa' attecma nequellquëñ.

18 Yepartsesharepa'chña Jesucristo sa'natenaya e'ñe allohuenes.
Ñeñtach notas, ñeñtpa' attetepa'ch Nompore. Allohua.

Pablo

AÑ ÑANOM SAN PABLO PO' CARTA ÑEÑÑ QUELLCAN TIMOTEO 1 TIMOTEO

Atto Pablopa' quellcan carta Timoteocop

¹⁻² Masheñe Timoteo ñeñteḡ e'ñe yame'ñeñoḡ e'ñe atet nenteneḡ ñerra'mrrate' e'ñe nechemer nepeneḡ, na Pablon pequellquene'ña añ carta ñeñten Jesucristo puellsensaren, tarro'mar ñeñtpa' atet llesenserren Yompor Parets epuet Puechemer Jesucristo ñeñtcha' nanac yeyemterra. Ñeñtpa' ñeñtara Yompor ñeñt Ya'queshpatañer yepen, ñaña ñeñtara Puechemer Jesucristo ñeñt Yepartseshar yepen. Te'pa' e'ñe nehuomtcha'teñoḡeḡpa' o'ch notap, Yomporepa'chña pebensare'tamḡpene' ñeñt nanac Parets epuet Puechemer Cristo Jesús ñeñt Yepartseshar yepen. Ñetepa'chña pemuerenaya. Ñetepa'chña pocsatene' e'ñe pa poyoḡhro.

Timoteopa' ña cotape'chaterrahuet cohuen all anetso Efeso all aychatarettenet po'poñ cotapñats

³ Ñaña te'pa' o'ch notap, ahuañmo'cha allempo nesechena o'ch ahuen Macedoniopa' atet notnomueḡ, papa' allach pa'pa Efeso attoch p̄ach cotape'chatyese' ñeñt yeḡhatyets po'poñ cotapñats, attoch ñetpa' amach allo'na yeḡchatneneto ñet poctapñet ñeñt ama po'ñoḡhoyaye. Te'pa' ñeñtecopña nequellquennap añ carta allochñapa' o'ch alla neyerpaterrperr. ⁴ Ñaña te'pa' p̄ach otyesahuet attoch amach allo'na cotape'chatyesneneto e'ñe ñet pueserrparñet ñeñt ama po'ñoḡhoyaye. Ñaña p̄ach otyesahuet attoch amach allo'na cotape'chatyesneneto ñeñt atet serrpare'tatyesanete't pa'tañneshañ. Tarro'mar ñeñt serrparñatspa' atta nanac moññe'tateñet acheñenesha'. Ñeñtpa' ama añecpayaye alloch e'ñe yeñoter erra'tsente' e'ñe po'ñoḡ alloch yesherber Parets ñeñt atet muenen ña. Añña e'ñe yame'ñeñoḡa Cristopa' o'ch yeñoter.

⁵ Yomporpa' añña muenen o'ch yeychach acheñenesha' amorrentanna'tpahuepa'ch allohueny. Tarro'mar e'ñe yame'ñeñoḡ Cristo poctacma arrña yeyoḡhropa' e'ñech cohuenare' yocape'chyen Yomporecop. Ñaña e'ñech yeñmañesha' yocape'chen cohuen. ⁶ Tarraña p̄uesheña'tets acheñenesha'pa' ahuo't alla queḡhpa'huerret ñeñt atet muenen Yompor. Ñeñtña atet serrpare'tatenet po'poñ cotapñats, ñeñtñapa' ama es sherbeno ama't mamesha Yomporecop. ⁷ Ñetpa' añña muenenet ahuo'ch orrtet atet ñerra'mrrate' nanac etsotenet añ ñoñets ñeñt atet anaret judioneshacop ahuat. Tarraña ama't atet penetañpa' amaña eñoteñeto este'ña yeḡchateneyña añ ñoñets ñeñt ḡhocma serrpare'tenet. Ama'tcha' ñeñta nanac torrenetañpa' amachña ḡhenaneto pueyoḡhro ñeñt po'ñoḡ alloch atet yeḡchateney ñeñt ñoñets.

Attoch yeñoch eseshacopte' sherben añ ñoñets ñeñt atet anaret

⁸ Ñehua, allohuenyepa' e'ñe yeñotueñ, ama't erra'tsena ñoñets ñeñt atet anaret ñeñtcha' atet yepapa' ḡhocma sherben ñerra'm añecop

yesherbaten añ ñoñets ñeñt atet muenen Yompor. ⁹ Ñaña allohueneypa' e'ñe yeñotueñ añ ñoñets ñeñt atet anaret ñeñtcha' atet ye'papa' ama añecpaye' anarete acheñeneshacop ñeñt cohuenare' es pa'yets, tarro'mar ñetpa' o' ye'cha'hueñet e'ñe poctacma. Ñeñt'pa' añecpa anaret añ acheñrecop ñeñt ama es otapespahuo, ñaña ñeñt nanac atpare'tetsa, ñaña ñeñt ama es chenoyo pueyo'chro ñeñt cohuentetsa Yomporecop, ñaña ñeñt nanac ochña'tare'tets, ñaña ñeñt ama añcha'na'tpo' entenaye Yompor po'ñoñ, ñaña ñeñt ama't Paretspa' achñare'teñcha'. Ñaña añecpa anaret añ ñoñets añ acheñrecop ñeñt amtsañtetsa, ñaña ñeñt muetsene' pompor, ama't ñaña pachor. ¹⁰ Ñaña añecpa anaret añ ñoñets añ acheñrecop ñeñt cañoesha'tets, ñaña ñeñt aguène' pacma, ñaña ñeñt a'yetyene' acheñ, ñaña ñeñt atta toma'tyets, ñaña ñeñt shecare'tyets ama'tcha' atarr huomenc nenaneñña po'ñoñ Yompor pa'so'chño, ñaña ama't erra'tsente' acheñer ñeñt atpare'tene' ñeñt atet cohuen ye'chateney Yompor po'ñoñ. ¹¹ Ñaña ñeñt atet ye'chateney Yompor po'ñoñ ñeñt'pa' ñeñtara cohuen ñoñets ñeñt alloch a'queshpaterrey Yompor e'ñe po'cohuenño, ñeñtara Yompor ñeñt nellsenserre' na o'ch neserrpare'toñ po'ñoñ, ñaña ñeñtara Yompor ñeñt atarr ya'ye'chochtatyen allohueny.

Atto Pablopá' atarr parasyoso'ten atto atarr ahuamencat per Yompor

¹² Tarraña ama't ña nellsenserrayeñpa' napa' nanac neparasyoso'teñ Yepartseshar Jesucristo tarro'mar atto nanac ahuamencat pa'n. Ñaña nanac neparasyoso'teñ Yompor, tarro'mar ñapa' e'ñe pocte' enterren o'ch nesherber ¹³ ama't na ahuatpa' nanac nachñare'che't Cristo, ñaña nanac noctare'che't ñeñt ame'ñaye't ña, ñaña nanac na'tserrpa'yesanete't. Tarraña ama't atet nepe'tpa' Yomporpa' ama coñe'ta morrenterno tarro'mar allempopa' ama es nechenoyo neyo'chro, ñaña allempopa' ama name'ñe'te. ¹⁴ Tarraña Yomporpa' ama coñe'ta morrenterno, ñeñto'marña ame'ñataternna attotña te'pa' e'ñe neyemteño't ñapa' nemorrentera allohuen acheñenesha'.

¹⁵ Ñeñto'mar te'pa' o' neñoter añepa'tña ñoñets ñeñt e'ñe po'ño'ch: Cristo Jesús'pa' añecopña huapa añ patso attoch a'queshpatosan allohuen ochña'atenesha'. Ñeñto'marña te' napa' neñotena, allohuen ñeñt ochña'atenesha'pa' na ello metana'tuenahuet po'chñaret. Ñeñto'mar te'pa' añña poctetsa o'ch yame'ña'huerra ñeñtara añ ñoñets. ¹⁶ Ñeñto'mar Yomporpa' attotña peretnerren na, ama't napa' nanac ochña'aten, allochñapa' attoch eñochet ama't erra'tsente' acheñer ñeñt nanac ochña'tpa' attera nanac morrenteña Jesucristo. Allochñapa' ñerra'm esesha'ña ame'ñerrayapa' ñetñapa' corretsetach pocsheñeshocmañen tayoteñ e'ñe errponañohuen. ¹⁷ Ñeñto'marña te'pa' nanac nocsheño't noten, amorrentpahuepa'ch Yompor ñeñt partsetets e'ñe ñapue't ahuatoteñ errponohuañen, ñeñtara ñeñt ama arromñateshayaye ama't ahuata, ñeñt ama't eseshapa' ama puentare, ñeñtara ñeñt e'ñe ñapue't eñotañ. Ñeñto'marña yecohuentatoñepa'ch tayoteñ errponohuañen. Ñeñt'pa' attetepa'ch Nompore.

Añpa' ñeñt atet otan Timoteo ñeñt'cha' atet pa

18-20 Te' masheñe Timoteo ellopa' o'ch alla noterrperr po'pocheño ñeñtcha' atet pepa, tarro'mar atet nenteneñ atet ñerra'mrrate' e'ñe nechemer nepeneñ. Te'pa' e'ñech peyoçhrocmañen petorra Yomporecop atet ñerra'mrrate' çho yeçllarena. E'ñe pame'ñeñoí Cristo e'ñech peñmañeshocmañen es porrtatyen. Napa' añ noctape'chen ñeñt atet eños e'ñe cohuen pöcop ahuañmo'cha ñeñt a'mtene' ñoñets Yomporeshot. Ama't papa' çhocmuepa'ch peyerpa ñeñt atet a'pöctat pöcop, tarro'mar ñeñt atet eños pöcoppa' ñeñtcha' allo'na ahuañencat pepene'. Ñaña çhocmach pame'ñya Cristo e'ñe cohuen e'ñe peñmañesha', tarro'mar ñerra'm ama e'ñe yeñmañesha' yoctene Cristopa' ñato' acoñonetpa' o'huañcha' yame'ñera Cristo. Ñeñt atet pa ahuaña epsheña yacma ñeñt pa'so'cheñ Himeneo ñaña Alejandro, ñaña po'poñeçhno acheñ ñeñt atet petsa. Ñeñto'marña napa' napuenanet oneñeñ ñeñtara epsheña yacma attoch ñapa' o'ch mueroçhtatanet allochñapa' o'ch eñoçhet ama achñare'tpahuo Yompor.

2

Atto e'ñe pocte' o'ch yema'yochañpesya ñaña ama't amcha'tareteçhno

¹ Te'pa' o'ch notañ po'poñ ñeñtcha' atet pöctape'chatyes acheñenesha' ñeñtcha' atet pet. Ñanompa' ma'yochañpesyetepa'ch allohuen acheñenesha', ñaña enamatoñetepa'ch acheñenesha' Yompor, ñaña parasyoso'chetepa'ch Yompor. ² Ñaña ma'yochañpesyetepa'ch allohuen amcha'tareteçhno ama't ñaña gobierno'. Allochñapa' attoch Yomporpa' co'tape'chatanet e'ñe cohuen attoch amcha'tarettet e'ñe cohuen, allochñapa' attoch yocrrena yaña e'ñe cohuen muechet. Ñerra'm atet penetpa' attochña eñall ñaña yocop attoch yema'yochrena e'ñe cohuen Yomporecop, ñaña attoch e'ñe cohuen yentannena. ³ Ñerra'm atetña yepenapa' e'ñech cohuen enteney Yompor ñeñt Ya'queshpatañer yepen. ⁴ Tarro'mar ñapa' mueneñ allohuen acheñenesha'pa' o'ch a'queshpaterranet, ñaña mueneñ o'ch eñotatuerranet añ ñoñets ñeñt e'ñe po'ñoçh Yompor po'ñoñ. ⁵ Tarro'mar yapa' yeñoteñ Yomporpa' e'ñe patrra. Ñaña yeñoteñ e'ñe puesheñarra ñeñt çhocma eñets yocop Yomporesho, ñeñtara Yompor Puechemer ñeñt Jesucristo ñeñt acheñetosets arr patsro. ⁶ Ñaña ñeñtara ñeñt a'rroyatsa e'ñe ñañeña attoch puerromueñoí ñapa' o'ch tsa'tuonaya yo'chñar e'ñe allohueney ñeñtey acheñey. Ñeñtpa', atet orrtatonay Pompor allochñapa' attoch yeñoçh ñeñt atet co'tape'chen ña. Allempoña çhap allempo e'ñe pocte' enteñ Pompor o'ch çhap añ patsropa' allempoña e'ñe eñotatay ñeñtepa't atet co'tape'chen Pompor. ⁷ Ñeñto'marña napa' na allsensare't atto nach chopeñe'chats erracmañen atto e'ñe na neserrpare'tateñoípa' o'ch name'ñatyesanet ñeñt e'ñe po'ñoçh Yompor po'ñoñ, ama't ñeñt ama judioneshayaye. Ñeñt atet noten e'ñe name'ñeñoí Cristo ñeñtpa' e'ñe po'ñoçh tarro'mar ñeñtpa' ama shequëñtsoyaye.

Añ poctetsa e'ñech yeñmañesha' yema'yochena

⁸ Ñaña napa' nemneñ ora ama't errate' apcha'yenet Yomporecoppa' añ yacmanesha' allempo echantenet pot puema'yochenoíetpa' e'ñepa'ch pueñmañesha' ma'yochenet, amachña çha po'poñ entueneto pueyoçhro,

ñaña amach čha atsrre'močhen entueneto. ⁹⁻¹⁰ Ateť ñaña coyane-shačhnopa' chorretepa' atet chorra'yena po'potantañ pacmanesha' ñeñť po'nanesha'. Amachña aña chorra'yesatsteto attoch aye'charettenet e'ñe ñet po'llchapoťa. Ñaña pue'chetpa' e'shorretepa' atet e'shorra'yena po'potantañ. Añña ama pocteyaye o'ch aña ma'yočhret attoch añño'tet e'ñe cohuen pue'ch. Añño'epa'chña orrtet e'ñe cohuen atto amuerañtenet, ñaña atto cohuenare' es pa'yenet. Amachña aña cohuen orrtatenahueto atto na'yenet oro, amapa' seretsma't ñeñť nanac tsa'te', ñaña atto es chorra'yenet ñeñť nanac cočhnesha' ñeñť nanaccha' tsa'te'. Añepa'chña atet penet ñeñť e'ñe cohuentetsa Yomporecop, ñeñť poctetsa coyane-shacop ñeñť otets ñapa' o' ame'ñerrana Yompor. ¹¹ Ñaña allempo sapčhena Yomporecoppa' añ coyaneshačhnopa' e'mñnotetepa' e'ñe muet-soñnen attoch es eñotet. Amachña čha atpare'teneto ama't mamesha. ¹² Ñaña allempo sapčhena Yomporecoppa' napa' ama pocteye' nenteñe coyanesha'pa' o'ch yečhaten all chorren allohuen yacmanesha', ñaña amach pomnaren patstano yacma. E'ñepa'chña mamtetenet allempo sapčhena Yomporecop. ¹³ Tarro'mar Adánpa' ñanom ayečcataret acheñ, allotpa' ñaña Eva ñeñťcha' puetapor pa' Adán. ¹⁴ Ñaña Adánpa' ama esesha' shecaye. Aña shecoñet puetapor Eva, allot orrta atparñats Yomporecop. ¹⁵ Ñeñťo'marña te' allempo cheyore'ten coyanesha'pa' e'ñech pa'llpuepñoťa cheyore'ten. Tarraña ama't atteñpa' Yomporñapa' čhocmach yenpueñ attoch čhocma queshpenet e'ñe cohuen, ñerra'm po'ñoč čhocma ame'ñenet, ñaña ñerra'm čhocma amuerañtenet, ñaña ñerra'm e'ñe cohuen es orrtatyenet Partsocop, ñaña ñerra'm e'ñe cohuen yečhenet.

3

Attoch yeñoch erra'tsente' pocte' ñeñťcha' yena' añcha'taret puerahuo

¹ Te'pa' o'ch notap po'poñ ñeñť e'ñe po'ñoč atet. Ñerra'm esesha' muenats o'ch añcha'tareťta allohuenacop ñeñť ame'ñetsa ñeñť atarr muenene' o'ch torrena Yomporecop ñeñťpa' e'ñe poctet ñeñť atarr mueneneñ tarraña eñochepa'chña atarr torrapo' attoch e'ñe cohuen orrtatyesan ñeñť atarr sherbets. ² Tarro'mar ñeñť muenets o'ch añcha'tareťta allohuenacop ñeñť ame'ñetsapa' añcha' se'n ñeñť etsotuene' añečno. Ñeñťcha' sena' añcha'tareťpa' añcha' se'n ñeñť e'ñe cohuenare' es pets. Ñeñť ama't ahuatapa' amach eñalle attoch tanmare'cha acheñenesha' ama't mamesha. Ñaña ñeñťcha' pa'ñcha'tareť pa'y'es allohuen ñeñť ame'ñetsapa' añcha' sena'y'es erra'tsente' senten e'ñe patrpa puetapor pen (ñerra'm ataporec), ñaña ñeñť nanac ma'yočhrenaya ñeñť cohuentetsa Yomporecop, ñaña ñeñť e'ñe eñotuene' ñeñť cohuentetsa, ñaña ñeñť añcha'na'tpo' entuen allohuen acheñenesha'. Ñaña añ e'ñe pocte' o'ch añcha'tareťta ñeñť e'ñe cohuen aguene' acheñenesha' pa'paclo, ñaña ñeñť e'ñe cohuen yečhatene' acheñenesha' Yompor po'ñoñ. ³ Ñaña añcha' se'n ñeñť ama posa'tare'tetso, ñaña ñeñť amach orroñaťeyaye. Ñaña añcha'ña se'n ñeñť e'ñe cohuen muerenana pamo'ts, ñaña ñeñť ama atsrre'mñaťeyaye, ñaña ñeñť ama nanac ye'chapretetso quelle ñeñť apencočhenot o'ch gana. ⁴ Ñaña ñeñťcha' añcha'tareťtatsapa' añcha'

se'n ñeñt e'ñech cohuen ame'ñatuenana puechemerasha', ñaña ñeñt e'ñech mecha'na'tueñ allohuen ama't ñeñt parro yeçhena. ⁵ Tarro'mar ñerra'm ama eñotenano attoch e'ñe cohuen ame'ñatuana ñeñt parro yeçhenapa' amachca'ye cohuenaye' añcha'tarettoña allohuenacop ñeñt ame'ñenaya Yompor. ⁶ Ñaña ñeñtcha' añcha'tarettatsapa' amach aña senatsto ñeñt errte' ame'ñetsa, tarro'mar ñerra'm aña sena' añcha'taret ñeñt errte' ame'ñetsapa' ñeñtpa' amach e'ñe eñotuenano ñeñt cohuentetsa Yomporcop, allempopa' e'ñe ña pa'mcha'taretteño'tpa' çhate' atarr ommo'cha. Tarro'mar ñerra'm çha yommo'chapa' ñeñtpa' ama pocteye' enteñe Yompor. Chate' ahupore'taretey atet pet ahua't oneñet e'ñe pommo'cheño'tpa' ahuo't huapore'chet. ⁷ Ñaña ñeñtcha' añcha'tarettatsapa' añcha' sena' ñeñt ama't ñeñt ama ame'ñetsopa' e'ñech cohuen entueñet ñamet. Tarro'mar ñerra'm nanac sasare'teñ ñeñt ama ame'ñetso, e'ñe puesasare'teño'tetpa' ñato'rraña çhate' oneñetpa' nanac topachpa' ellopa' o'te' alla nanac atpare'terran Yompor.

Attoch yeñoch ñaña erra'tsente' pocte' ñeñtcha' yena' diácono

⁸ Attecmach pa ñaña ñeñtcha' sherbets Yompor pa'paclo, ñeñt otenet diácono. Ñeñtcha' sherbatspa' añcha' se'n ñeñt añcha'na'tpo' entuen allohuen acheñenesha', ñaña ñerra'm erro't opta' amach shequëno, ñaña ñeñt ama posa'tare'tetso, ñaña ñeñt ama nanac ye'chapretetso quelle ñeñt apencoçhenot o'ch gana. ⁹ Ñaña ñeñtcha' sherbats Yompor pa'paclopa' añcha' se'n ñeñt e'ñech pueñmañesha' ma'yoçhrenaya ora ñeñt atet yame'ñera Cristo ñeñt e'ñe po'ñoçh cohuen. ¹⁰ Ñeñto'marña añ pocte' çhoch ñanom secue' ñeñtcha' sena' diácono. Ñerra'm atette' pena ñeñt atet o' notuapa' ñehua, pocte' o'ch sene' ñeñtcha' sherbats Yompor pa'paclo. ¹¹ Attecmach ñaña coyaneshachnopa' añcha'na'tpo'ch enteñ allohuen acheñenesha', ñaña amachña atta nanac puetomañenteneto, ñaña ñeñt nanac ma'yoçhrenaya ñeñt cohuentetsa Yomporcop, ñaña e'ñech cohuen cotape'chenet Partsocop. ¹² Ñaña ñeñtcha' sena' diáconopa' añcha' sena' erra'tsente' senten e'ñe pa'rra puetapor pen (ñerra'm atapore't), ñaña erra'tsente' senten ñeñt e'ñe cohuen ame'ñatuenaya puechemerasha' ñaña ñeñt e'ñe cohuen ame'ñatuenaya ñeñt parro yeçhena pa'paclo. ¹³ Tarro'mar ñeñt e'ñe cohuen sherbets atet ñerra'm diáconopa' e'ñech cohuen entueñ allohuen acheñenesha', ñaña o'huañcha' pomcha'naño'fayaya serrpare't ama't e'ñe mamesha atto atarr ame'ñenana Cristo Jesús.

Ñeñt atet cotape'chateney Yompor attoch yame'ñerapa' ñeñtpa' nanac coçhnesha' ama't ahuatoteñpa' ama eseshaye' eñotenaye

¹⁴ Te'pa' o'ch notap' po'poñ. Napa' neseçhenañ o'ch nabçherrpa'. ¹⁵ Tarraña ñerra'm ama nehuapopa' amach sepallteno sapa' o'ch señoçh ñeñtcha' atet sepa, tarro'mar o' notuap' añ necartot ñeñtcha' atet sepa ñeñtes parro same'ñeña Yompor, ñerra'm esempo sapçhena Yomporcop, ñeñtara Yompor ñeñt ama arromña'feshayaye. Ñaña ñeñtara Yompor ñeñt e'ñe yame'ñeño' allohueneypa' çhochña yorrtatyen ñeñt e'ñe po'ñoçh Yompor po'ñoñ amachña çha ya'nasoteño. ¹⁶ Ñaña yapa' yeñoteñ ñeñt atet cotape'chateney Yompor atto yame'ñerapa' ñeñtpa'

nanac cochnesha' ama't ahuatofeñpa' ama eseshaye' eñotenaye. Añpa' ñeñt atet ya'choteñ Cristo:

Ama't Paretspa' o' acheñetos añe patsro, tarraña Yompor Puecamquëñoña nanac ahuamencattosa ñeñt eñotateneña acheñenesha' ñapa' e'ñe po'ñoç cohuen. Ama't allohuen mellañoñeñnanesha'pa' e'ñe entuoñete't ñeñt atet pa'yese't añ patsro, ñaña ñeñt ame'ñaye'tpa' çhocma a'potet Cristo erracmañen arr patsro ama't all ama judioneshayaye. Ñaña shonte' acheñ ame'ñerraya Cristo, allotña Yompor po'cohuenñoçpa' o' alla agüer pue'ntaño.

4

Atto esempohuañenpa' puerruerrach patantarr ama't ñeñt ame'ñetsa te'

¹ Te'pa' o'ch notap po'poñ. E'ñe po'ñoç atet eñotateney Parets Puecamquëñoñ. O'ch mellapoterrmochapa' puerruerrach patantarr acheñ ama't ñeñt ame'ñetsa te'. Allempopa' o'ch alla ame'ñeret ñeñt ashcañtetsa, ñaña o'ch añ ma'yoçhrerret oneñet poctapña. ² Tarro'mar o'ch alla ame'ñeret acheñ ñeñt ashcañtetsa, ñeñtara acheñ ñeñt ama es çhenoyo pueyoçhro ama't mamesha ama't allempo o' achmãare'tuan Yompor. ³ Ñaña ñeñtara añ acheñpa' o'ch otyenan acheñenesha', ama pocteyaye o'ch sesna'ta. Ñaña ama pocteyaye o'ch es serratse'tyes. Tarraña allohuen ñeñt yerrenpa' e'ñe pocte' o'ch yerreñ, ñeñto'mar yeçhach Yompor ñeñtcha' yerren. Tarro'mar ñeñtey o' yeñoterr ñeñt e'ñe po'ñoç Yompor po'ñoñ, ñaña ñeñtey ame'ñetsapa' e'ñe pocte' o'ch yerren e'ñe yema'yocheñoñ Yompor. ⁴ Tarro'mar allohuen ñeñt yeçhcatua Yompor ñeñtcha' yerrenpa' e'ñe cohuenacma, ñeñto'marña amach errotenoñ yoto ama pocteyaye o'ch yerre'. Añña pocte' çhocmach es yerren e'ñe yeparasyoso'teñoñ Yompor. ⁵ Yema'yochampeñoñ yer-rarpa' e'ñe pocte' Partsocop o'ch yerreñ, tarro'mar ñeñtapa' atet oteneñ Yompor.

Atto Timoteo atarr cohuen sherbenan Jesucristo

⁶ Te'pa' o'ch masheñe Timoteo notap po'poñ. Ñerra'm atetcha' peyçhatyes acheñenesha' ñeñt ame'ñetsa ñeñt atet o' notua'ppa' allempoña po'ñoçhpa' e'ñech cohuen pesherbeñ Yepartseshar Jesucristo. Tarro'mar atto poctape'cheññan Yompor po'ñoñpa' ñeñtcha'ña allo'na ahuamencat pepene'. Ñaña atto poctape'chen e'ñe cohuen Yomporecoppa' ñeñtcha'ña allo'na ahuamencat pepene'. ⁷ Ñaña amach pe'mñotatsto serrparñats ñeñt ama añeyaye ñeñt atet yeçhateney Yompor po'ñoñ attot yame'ñera Cristo, tarro'mar ñeñtapa' ama es sherbeno. Añcha'ña pema'yoçhra ñeñt atet yeçhateney Yompor po'ñoñ. ⁸ Ñaña añcha'ña o'ch pema'yoçhra attoch huomenc pe'pa' peyoçher Yomporecop. Atet pena po'potantañ acheñenesha' ma'yoçhraya attoch huomencatet e'ñe ñañeñeta po'çhets, ama't ñeñtapa' ama tama es sherbeno. Tarraña papa' añcha'ña pema'yoçhra attoch huomenc pe'pa' peyoçher Yomporecop, tarro'mar ñeñtapa' ello nanac sherben attoch yocrra cohuen añe patsro, ñaña sherben attoch ello yocrra'huerra cohuen esempohuañen. ⁹ Ñeñt atet notene'ppa' e'ñe po'ñoçh atet, ñeñto'marña añ pocte' o'ch ame'ñyet allohuenet. ¹⁰ Ñeñto'marña te'pa' ama't e'ñe yemueroçhteñoçpa' çhocma

yettorrena Yomporecop, tarro'mar ñapa' ñach yeyemterra e'ñe poctacma, ñeñt' Yomporecop ñeñt' ama arromñat'eshayaye, ñaña ñeñt'ara Yomporecop ñeñt' Ya'qeshp'atañer yepen allohuene y añecop ñeñt'ey ame'ñenaya.

¹¹ Te'pa' ñeñt' atet o' notua'p'pa' ñeñt'cha' atet p'otyey acheñenesha' ñeñt'cha' atet pet, ñaña e'ñech cohuenacma pey'chatyasanet. ¹² Ñaña çhocmach p'orrta e'ñe cohuen acheñenesha'cop, attoch ñetpa' e'mñotapet ama't p'apa' nanac huepuesha'p'. Ñaña çhocmach p'orrta cohuen ama't atet pe'ñorena, ñaña ama't allempo es pe'pa'yen. Ñaña çhocmach pe-muereña acheñenesha', ñaña çhocmach p'ame'ñya e'ñe cohuen Yomporecop, ñaña ama't peyo'çhropa' çhocmach p'octape'ch e'ñe cohuen ñeñt' atet pena ñeñt' e'ñe po'ño'ch Cristona'tartetsa. Allochñapa' e'ñe pesho' añña acheñenesha' ñeñt' ame'ñetsapa' o'ch çhapanet pueyo'çhreto ñeñt' atet cohuentetsa Yomporecop. ¹³ Ñaña te'pa' ama't ama ne'çhena' napa', çhocmach pelleyatanet Yomporecop po'ño'ñ allempo çhocma sap'çhena allohuenes. Ñaña çhocmach peserrpare'tatanet, ñaña e'ñech cohuen pey'chatenanet. ¹⁴ Ñaña çhocmach peyerpa atto ahua'ño'm'cha Yomporecop ahua'mencat p'ap' allempo ñeñt' pompornesha' pen ñeñt' ame'ñetsapa' ñetpa' net pot pesho. Ñaña atto e'ñoratanet Yomporecop ñeñt' allempopa' e'ñe cohuen e'ñosyaset p'ocop. Ñeñt'o'marña te'pa' añ poctetsa çhocmach pe'orra Yomporecop.

¹⁵ Chocmach pema'yochra ñeñt' cohuentetsa Yomporecop, ñaña çhocmach p'ayon'ya, attoch acheñenesha'pa' entonapet ñeñt' atet petsoten Yomporecop. ¹⁶ Ñaña çhocmach pe'nota p'añeña, ñato' cohuenta' p'octape'chen, ñato' amate'. Ñaña çhocmach pe'nota p'añeña ñato' e'ñe'te' atet pey'chaten. Ñaña çhocmach pey'chat cohuen e'ñe atet otene yomporecop po'ño'ñ attoch peqeshperra p'a, ñaña allohuene ñeñt' pe'mñotene'.

5

Añpa' ñeñt'cha' atet yep'annena ñeñt'ey ame'ñetsa

¹ Masheñe Timoteo, te'pa' o'ch noterrperr po'po'ñ. Amach peche'ptare'tatsche ñeñt' po'nare' yacma ñerra'm esempo pantenet. Elloña çhocña p'octape'çhaterranet cohuen e'ñe aco'pa. Atet'cha' pentanet ñerra'mrrate' e'ñe p'ompor pepenanet. Añña allohuene hueparneshach'nopa' atet'cha' pentanet ñerra'mrrate' e'ñe pemo'nasheñ pepenanet poctacma. ² Ñaña coyanesha'çhno ñeñt' po'nare'pa' atet'cha' pentanet ñerra'mrrate' e'ñe p'achor pepenanet poctacma. Añña ñeñt' shopshare'pa' atet'cha' pentanet ñerra'mrrate' e'ñe p'och pepenanet poctacma. Amachña çha muene' p'a'llocchame'tyenaneo ama't mamesha.

³ Ñaña añ poctetsa çhocmach seyempue' rretorrnanesha' ñerra'm esempo ama e'ñallete ñeñt'cha' yempahuet. ⁴ Tarraña ñerra'm erra'tsen rretorrnanesha' echene' puechyoresha' amapa' pue'ñaresha', ñeñt'pa' añ pocte' ñetach cohuan'p'set pachor. Tarro'mar añ pocte' e'ñe ñet o'ch e'ño'chet ñanomcha' añ yecuan'pes yamo'ts attochña yesherber Yomporecop ñaña attoch yesherber ñeñt' atto ñetpa' cohuan'pesyet yam'a ahua't. Tarro'mar ñerra'm atet yep'apa' e'ñech yocshate' ama't Yomporecop. ⁵ Añpa' attoch seño'ch erra'tsente' rretorrnanesha' palltetsa o'ch seyempue': Añcha' seyempa' ñeñt' rratotetsa e'ñe ñap'a ñeñt' ama echenaye

puechoyoresha', ñaṃa ñeñt' e'ñe yemtenaya Yompor, ñaṃa ñeñt' čhocma ma'yochenaya Yompor pate'tets yet, ñaṃa ama't tsapo. ⁶ Tarraña erra'tsen rretorrnaneshar ñeñt' atta coshatse'tyetsapa' čhach ottena ñerra'mrrate' o' rroma, ama't allempo correnmeñ. ⁷ Te'pa' o'ch potanet ñeñt'cha' atet pet attoch ama eñalle ama't eseshapa' o'ch sasare'tanet. ⁸ Ñerra'm esesha' ama muenenaye o'ch cohuan'psan pamo'ts ama't ñeñt' parro yečhena ñeñt'ña acheñ atetpa' amaca'ye po'ñočhaye' ame'ñenano ñeñt' atet oteney Yompor. Ñaṃa ñeñt' atet acheñpa' amach pocteye' enteñe Yompor ama't mamesha. Ñeñt'pa' elloch metaneñ ama't ñeñt' ama ame'ñetso.

⁹ Ñaṃa po'poñ attoch señoč erra'tsente' rretorrnaneshar ñeñt' pocte' ñeñt'cha' seyepa', ñeñt'pa' erra'tsente' po'nmeneshar ñeñt' echene' pechapoch čharra' po'charña, ñaṃa ñeñt' patrrach puerrollar pe't. ¹⁰ Ñaṃa erra'tsente' senten ñeñt' e'ñe cohuenare' es pets, ñeñt' e'ñe cohuen cohuan'pene' puechoyoresha', ñaṃa ñeñt' nanac amueraña, ñaṃa ñeñt' e'ñe cohuen aguene' puemo'to, ñaṃa ñeñt' e'ñe pueñmañesha' sherbene' allohuen ñeñt' ame'ñetsa, ñaṃa ñeñt' nanac yenpuene' ama't ñeñt' muerochtetsa, ñaṃa ñeñt' nanac pa'yene' po'poñečno ñeñt' cohuentetsa.

¹¹ Tarraña ñeñt' rretorrnaneshar attera shopsheshameñ ñeñt' ama echenana' pechapoch čharra' po'charñapa' amach sagapatsche, tarro'mar ñerra'm machaya muenme'cherran sherbe' Cristopa' o'te' alla some'terra, ¹² čhate' tanmare'cha acheñenesha' tarro'mar amach etsotano ñeñt' atet otan Cristo ahuam'ocha. ¹³ Ñaṃa ñato' o'ch atta nanac quella', ñato' po'čllaño'tpa' ñato' o'ch atta ta'yesa po'poñ pocollo'mar serrpare'tatse'tyesets pa'namen ñoñets, ñaṃa ñato' o'ch atta a'metare'tyesan ñeñt' atet pa'yena po'psheñečno ama't ñeñt' ama otenayaye. ¹⁴ Ñeñt'o'marña napa' e'ñe pocte' nenteñ ñeñt' shopsheshameñpa' some'terrepa' ñaṃa cheyore'terrepa' attoch añach ma'yochrena ñeñt' pa'pacllacop. Ñerra'm atet penetpa' attochña amach eñalle ama't ñeñt' ye'moñe'tene'pa' amach sasare'tye. ¹⁵ Tarro'mar puesheña'tets rretorrnaneshapa' o' alla puerruerret o' alla coteret oneñe't.

¹⁶ Te' ellopa' o'ch notap' po'poñone't. Ñerra'm eñall ama't coyanesha' ñeñt' ame'ñetsa, ñaṃa ñerra'm ña pamo'ts rra'totatsapa' e'ñe pocte' ñañeñach cohuan'pse' pamo'ts. Allochñapa' amach pallteno allohuen ñeñt' ame'ñetsapa' o'ch apueñet ñeñt' pallta'yena. Allochñapa' attoch añcha'ña yenpuenet po'poñečno rretorrnaneshapa' ñeñt' ama echenaye pamo'ts ñeñt'cha' yenpuene'.

Añ poctetsa ñeñt'cha' atet yepeñ ñeñt' nanac torretsa Yomporecop

¹⁷ Te'pa' o'ch notap' po'poñ. Ñeñt' pompornesha' pen ñeñt' ame'ñetsapa' ñerra'm e'ñe cohuen añcha'tarettenetpa' e'ñe pocte' acheñenesha'pa' cohuencha' cosheñet, ñaṃa ellopa' añ pocte' o'ch es apueñet ñeñt' palltena. Ñeñt'pa' ñeñt'cha' atet sepeñ erra'tsencha' ñeñt' po'taruas pe' atto serrpare'ten, ñaṃa ñeñt' e'ñe ma'yochrenaya yečhatets Yompor po'ñoñ. ¹⁸ Tarro'mar ama't Yompor po'ñoñ ñeñt' anuaret ahuatoteñpa' atet toma'ntateney, ñeñt'pa' atet oten: “Ñerra'm esempo satmama'tateñ huaquesh attoch es serrocllome'chach pa'tco't, allempopa' amach sempanma'tatsche. E'ñe pocte' rranepa' ñaṃa ñeñt' serrocllome'chateñ.”

Ñaña ñeñt atet oten po'poñ Yompor po'ñoñ: “Ñeñt ataruasaña' e'ñe pocte' ÷hocmach agapan po'tsa' atto taruasen.”

¹⁹ Ñaña ñerra'm eñall puesheñarr ñeñt a'metare'tañpene' ñeñt pompor pen ñeñt ame'ñetsapa' sapa' amach same'ñatscho. Añña ñerra'm epsheña a'metare'tañpene' amapa' ma'psheña, allempopa' pocte' o'ch se'mñoch, tarro'mar allempopa' o'ch señoç ñato' po'ñoçhte' atet. ²⁰ Atteña ñerra'm po'ñoçhte' atet pena, allempo allo'tsa'yen allohuen acheñenesha'pa' añ poctetsa o'ch soch ñeñt atetpa' ama aña'pahuo. Allochñapa' po'potantaña'cho'ña esheccha' mecha'na'tenet. ²¹ Aña' ÷hocmach atet peña ñeñt atet o' notuañ ama't errofente' o' ÷ohua ñeñt parro nanac peyemtena ahuaña. Tarro'mar Yomporpa' enteneñ epuet Puechemer Jesucristo ñeñtara Yepartseshar yepen, ñaña epuet po'millañoñeñnashar ñeñt epuet yemtena ña. Allohuenetpa' e'ñe entuenpet ñeñto'marña te'pa' añ pocte' o'ch pepena ñeñt atet o' notuañ. ²² Te'pa' o'ch noctape'chaterrperr po'poñ ñeñtcha' atet seña. Ñerra'm esempo semneñ o'ch sena'yesh ñeñtcha' añcha'taretterrtsa Yomporecop, amach ahuen senatstere ñeñtcha' añcha'taretterrtsa, ÷hochña secua'yesh erra'tsente' acheñer ñeñt e'ñe cohuen es pa'yets. Tarro'mar ñerra'm aña sena'yesh ñeñt ama cohuen es petsopa' te't e'ñe ña po'chñarofpa' atet sepena samña. Ñeñto'marña te'pa' ÷hocmach pa'ypo'ñampes ñeñt ama cohuenayaye ama't mamesha.

²³ Te'pa' o'ch notañ po'poñ. Atto pa'pa' ÷hocma pa'tsna'tame'ten, ñaña atto atserrpare'teneñ pa'topa' añ pocte' amach pa'rratsterrerro e'ñe ñapueñ oñ, añcha'ña epuet pa'rr coñe't vino.

²⁴ Ñaña te'pa' o'ch notañ po'poñ attoch peñoç. Eñall puesheña'tets acheñ ñerra'm esempo pena ñeñt ama cohuenayaye Yomporecoppa' yapa'cho'ña o'ch yeñotanet allorocma. Allempoña yapa' o'ch yot, po'ñoç aña' ama pocteyaye. Tarraña eñall ñaña po'poñeçhno acheñ ama't esempo pet ñeñt ama cohuenayaye Yomporecoppa' ñeñtapa' amach esha' eñotaye ama't puesheñarfoa. Tarraña esempohuañenpa' orrtatuarertrach. ²⁵ Attecma pena ñaña ñerra'm esempo yepena e'ñe cohuen, acheñenesha'pa' o'ch entuenyet e'ñe cohuen. Tarraña errotenopa' ama't e'ñe cohuen enteney Yomporpa' acheñenesha'pa' amach e'ñe cohuenayaye entenyeto. Tarraña esempohuañenpa' ÷herranetcha' pueyoçhro.

6

Aña' ñeñt poctetsa ñeñtcha' atet pa' ñeñt ataruasataret e'ñe atta

¹ Te'pa' o'ch notañ po'poñ ñeñt poctetsa ñeñtcha' atet pa' ñeñt ataruasataret e'ñe atta ñeñtara ñeñt o' ame'ñerrana Cristo. Añ pocte' ñetpa' cohuencha' eñchet po'patronar, attoch e'ñe ñofofetpa' amach errotenoñ eñalle attoch achñare'tachet Yompor, ñaña ñeñt atet yeychaten Cristocop. ² Ñaña ñeñt ataruasataret e'ñe atta, ñerra'm po'patronarpa' ame'ñenet ñametpa' elloña allempopa' amach atpare'tatscheto ama't mamesha, tarro'mar o' pa'mo'nasheñ peret e'ñe pame'ñeñoñet Yompor. Amach otaña'tatsteto “te'pa' ama'tcha' ama e'ñe name'ño yepatronarña o' ame'ñerrapa' amach erroñ pa'no.” Elloña te'pa' e'ñe yemorrenesha' yeshereñ yemo'nasheñ e'ñe cohuen. Masheñ Timoteo, aña' ÷hocmach peychatanet, ñaña o'ch pa'tanet ñeñtcha' atet pet.

Cotaṗñats ñeñt ama po'ñoçhoyaye

³ Ñerra'm esesha' yechatats po'poñ cotaṗñats ñeñt ama attheyaye atet yechateney Yepartseshar Jesucristo ñeñt po'ñoçh atet muenen Yomporpa' ⁴ ñeñt acheñ atetpa' attach ommo'chena, po'ñoçh ñeñtpa' ama çhoye' es eñoteno. Ñeñt atet acheñerpa' añecpach atet pena attoch es otnare'tyesan acheñenesha' e'ñe po'poñ cotaṗñatso'mara. E'ñe potnare'tanna'teñoțetpa' o'ch atta atsrre'mare'tet, ñaṃa o'ch atta e'moñe'tanna'tet, ñaṃa o'ch atta sasare'tanna'tyeset, ñaṃa allempopa' o'huañcha' eñoranna'tet. ⁵ Po'ñoçh añ acheñ ñeñt atta cotape'chatsetets e'ñe ñaṃeña poctaṗñoțpa' po'ñoçhpa' amach cotape'chenano ama't mamesha ñeñt cohuentetsa ñaṃa amach eñotenano ñeñt po'ñoçh alloch yequeshperra. Ñetpa' attach çhocma mueneñet o'ch es otnare'tanna'tyeset. Ñaṃa ñetpa' añecpach mueneñet o'ch serrpare'tet Yomporecop attoch ganet esocmañen. Ñeñto'marña ñeñt atet acheñpa' amach peyemtatscho. ⁶ Ñehua, po'ñoçh yapa' yeñoteñ e'ñe yame'ñeñoț Cristopa' shonte' yechen esocmañen. Ñeñto'marña yapa' ñeñtch nanac yocshena. ⁷ Tarro'mar allempo ye'ñalleta ahuatpa' atta ye'ñalleta muelle'mcot. Te'pa'çho'ña ñerra'm esempo yerromuenpa' amach errotenoț yahuanmo yechecom. ⁸ Ñeñto'mar yapa' amach es yellcatsto. Ñerra'm yechen ñeñtcha' yerra' ñaṃa ñeñtcha' yechorrapa' ñeñtch yocshena. ⁹ Tarro'mar ñeñt muenets o'ch echan esocmañenpa' amach errotenoț ahuantano atto topatyeney oneñet. Attach pa'namen ye'chatsetyenet ñeñt ama es sherbetso. Elloña ñeñtpa' ñeñtcha' anmahuet chenquēntso esempohuañen. ¹⁰ Tarro'mar e'ñe yeye'chapreteñoț quellepa' allot huenaña esocmañen sosya'tsañ. Tarro'mar puesheña'tets ñeñt nanac muenets o'ch ganet shonte' quellepa' atteñapa' o'huañcha' ame'ñyet Yompor. Ñeñto'marña acoṗonetpa' o'ch huapanet shonte' ñeñtcha' nanac llecatahuet.

Añach paterr yema'yoçhra ñeñt cohuentetsa Yomporecop

¹¹ Tarraña ṗapa' amach atet peṗatsto tarro'mar ṗapa' anareteṗ Yomporecop. Ñeñto'marña ṗapa' añach pema'yoçhra ñeñt cohuentetsa Yomporecop, ñaṃa çhocmach peyerepya Yompor, ñaṃa çhocmach ṗame'ñya cohuen, ñaṃa çhocmach pemorrencha ṗamo'ts, ñaṃa çhocmach ṗa'huanta'hanom ñeñt atarr echarr pentyen amach ṗañeña e'ñe cohuen entatstatso. ¹² Ñaṃa çhocmach ṗame'ñya cohuen Yompor atet ñerra'm çho peçllarena Yomporecop. Allochñapa' esheccha' peñoçh ṗapa' corretsapach tayoteñ e'ñe errponañohuen. Ñeñto'mar Yomporpa' çhore'taṗ ahuaña allempo peñoțach allohuen acheñenesha' atto ṗapa' o' ṗame'ñerra. ¹³⁻¹⁴ Te'pa' o'ch masheñe noterrperr po'poñ ñeñtcha' atet peṗa. Chocmach petsotua ora ñeñt atet oteneṗ Yompor. Amach poctaṗe'chatsto po'poñoneț attoch amach eñalle attoch tanmare'taṗa acheñenesha'. Añpa' atetcha' peṗa tarremphua esempohuañencha' huerra Yepartseshar Jesucristo. Tarro'mar ama't te' Yomporpa' enteneṗ, ñeñtara Yompor ñeñt yapuene' yocrreña teme'ttsen, ñaṃa allohuen ñeñt yentyen. Ñaṃa Puechemer Jesucristopa'çho'ña enteneṗ, añ ñeñtara Cristo ñeñt eñosets e'ñe cohuen allempo a'ṗto'tare'teñ Poncio Pilato. ¹⁵ Esemphuañencha'ña pocte' enter Yomporpa' allemphoçña

mueñerranerr alla Puechemer arr patsro, ñeñtara Yompor ñeñt e'ñe patrra, ñaña ñeñtara ñeñt atarr ya'ye'chochtatyen allohueney, ñaña ñeñtara ñeñt nanac ahuamencat, ñeñt Pompor pen ama't allohuen ñeñt amcha'taretetyetsa, ñaña allohuen ñeñt ayochreshatetyetsa. ¹⁶ Ñaña ñeñtara Yompor ñeñt ñapuet ama arromñaťeshayaye, ñeñtara Yompor ñeñt yeťhetsa allo'tsen puetare' ñeñt nanac a'rrechatañ all amach errotenot yeťhapo. Ama't puesheñarra acheñpa' ama puentare all, tarro'mar amate' errotenot yeťhapo. Ñeñto'marña ya'ye'chochtatoñepa'ch Yompor, ñaña ahuamencatepa'ch tayoteñ errponohuañen. Ñeñtpa' atťetepa'ch Nompore.

Arrpa' all cotape'chatan ñeñt nanac ecłlayoret

¹⁷ Te'pa' o'ch notap po'poñ. Ñeñt nanac ehecmaťtetsa añ patsropa' o'ch potanet amach ommo'chatsteto e'ñe po'checmoť, ñaña amach cotape'chatsteto ñato' počłlayoroťpa' amach es pallterreto, tarro'mar ñeñtpa' huañerrcha' esempohuañen. Añña yemchetepa' Yompor ñeñt ama arromñaťeshayaye ñaña ñeñt yapuene' shonte' esocmañen ñeñtcha' čhocma yocshatene'. ¹⁸ Ñaña o'ch potanet petepa' e'ñe cohuen Yomporecop, ñaña es apa'yesetepa' ñeñt es palltetsa, ñaña amuerañtetepa'. ¹⁹ Ñerra'm atťcha' petpa' eñallcha' shonte' alloch coshatterranet tsapatonet Yompor. Ellopa' o'ch ap Janet ñaña atťochña ñetpa' corretsetach pocsheñeshocmañen tayoteñ e'ñe errponañohuen.

Ñeñt atť otan Timoteo e'ñe allohuanen

²⁰ E'ñe allohuanenpa' o'ch masheñe Timoteo noterrperr alla: Chocmach petsotua ora ñeñt atť oteneť Yompor. Amach pe'mñotatsche ñeñt čhocma muenets o'ch es otnare'tanna'tyesa. Ñeñtpa' ama sherbeno ama't mamesha Yomporecop. Ama't ñetpa' otenetañ po'ñočo' es eñotenetpa' tarraña yapa' yeñoteñ ñeñtpa' ama po'ñočoyaye. ²¹ Tarro'mar puesheña'tets ñeñt cotene' atťepa' ama čhenaneto pueyočhro ñeñt atť yame'ñeña Cristo.

Te'pa' Yomporepa'ch pa'nataya. Ñeñtach notap, ñeñtpa' atťetepa'ch Nompore. Allohua.

Pablo

AÑ PUEPAÑ SAN PABLO PO' CARTA ÑEÑŦ QUELLQUËRRANERR TIMOTEO 2 TIMOTEO

Atto Pablopá' alla quellquërranerr carta Timoteocop

¹⁻² Masheñe Timoteo, ñeñteþ nanac nemuerena tarro'mar atet nenteneþ ñerra'mrrate' e'ñe nechemer nepeneþ. Na Pablon o'ch alla nequellquërrnaperr po'poñ carta, ñeñten Jesucristo puellsensaren tarro'mar atet muenen Yompor attoch nach eñotatyese' allohuen acheñenesha' ñeñt atet oteneý Yompor: E'ñe yeyemteñot Puechemer Cristo Jesúsapa' yañapa' corretsayach yocsheñeshocmañen tayoteñ e'ñe errponañohuen. Te'pa' e'ñe nehuomcha'teñoteþpa' o'ch notap: Yomporepa'chña pebensare'tamþene' ñeñt nanac Parets epuet Puechemer Cristo Jesús ñeñt Yepartseshar yepen. Ñetepa'chña pemuerenaya. Ñetepa'chña þocshatene' e'ñe þa peyoçhro.

Atto Timoteo e'ñe cohuen ame'ñena

³ E'ñe neyerpueñoteþpa' napa' çhocma neparasyoso'teñ Yompor þocop, yeto ama't ñaña tsapo allempo çhocma nema'yocheña Yompor þocop. Ñeñtara Yompor ñeñt çhocma neñmañesha' nesherven, atet sherbe't ñaña ahuat natañneshañ. ⁴ Ñaña napa' çhocma neyerpuena allempo peya'na'tapuen ahuañmo'cha. Ñeñto'mar te' napa' nemneñ errotenohuaca' yentannerra attote' þocshatterren. ⁵ Ñaña çhocma neyerpuenþa atto þapa' e'ñe cohuen þame'ñena, ñaña atet ame'ñena ñaña þacnor Loida ñaña þachor Eunice. Ñeñto'marña napa' neñoteñ þapa'çho'ña çhocmate' þame'ñena e'ñe cohuen.

Atto ama apenca'pahuo e'ñe yeserrpare'teñot Yompor po'ñoñ

⁶ Ñeñto'mar napa' nemneñ o'ch alla neyerpaterrperr atto ahuañmo'cha Yomporpa' ahuañmencat þaþ allempo nena' naña not pesho. Ñeñto'marña te'pa' amach pemuenme'chatstoñe ñeñt atet otaþ Yompor. ⁷ Tarro'mar Yomporpa' ama añecpaye' chorratenyoña Puecamquëñ attoch yapa' o'ch çha yemcha't, añecopña chorratenya attoch ahuañmencat þa'y, ñaña attoch yemorrentanna'ta allohueney, ñaña attoch e'ñe cohuen yorrtatyen ñeñt atet muenen Yompor. ⁸ Ñeñto'marña te'pa' amach pepencatsto atto peserrpare'teññañ ñeñt atet pena Yepartseshar Cristo. Ñaña amach pepencatsto e'ñe no'mar atto napa' o' cárcele'terrnet e'ñe name'ñeñot Cristo. Elloña çhochña pocte' peñch þaña o'ch pemueroçhtapretna e'ñe peserrpare'teñot Cristo po'ñoñ tarro'mar Yomporpa' attoña ahuañmencat peneþ. ⁹ Ñeñtara ñeñt o' a'qeshþaterrey, attoña o' çhore'terrey attoch yema'yoçhra ñeñt cohuentetsa Partsocp. Tarraña añmapa' ama añofeyaye atto e'ñe cohuen es yepa'yese't ahuat, añmapa' tarro'mar atet muenen ña. Yomporpa' nanac morrentye't ñeñto'mar ama't ahuañoteñpa' ahuo't o'patatya Puechemer Cristo Jesús. ¹⁰ Ñeñt huapatsa attoña te'pa' o' yeñoter atto nanac morrentya Pompor. Ñeñtara Puechemer Jesucristo ñeñt Ya'qeshþatañer yepen, tarro'mar ñach ya'qeshþaterre' yerromñoñ

attoch elloch yocrra'huerra, allempopa' amach alla ya'rromñafterre'te. Ñeñto'marña yoten te'ña yapa' o' a'huañaãperrey Cristo atto o'patye't rromueñets. Te'pa' o' yeñoter tarro'mar atet yeçhateney cohuen ñoñets ñeñt huetsa Yomporeshot.

¹¹ Ñeñtña añ cohuen ñoñetspa' ñeñtecop allsensareten attoch nach a'pote' allemeñ acheñeneshesho'mar ama't ñaña ñeñt ama judioneshayaye, ñaña attoch nach yeçhatyesahuet ñeñtara añ ñoñets. ¹² Ñeñto'marña te'pa' e'ñe neserrpare'teñoť añ ñoñetspa' muerochtatennet, tarraña napa' ama nepenquëno tarro'mar napa' neñoteñ Yompor ñeñt neyemtenapa' nanac ahuamencata. Ñeñto'marña neñoteñ e'ñe po'huamencotpa' o'ch cohuañpura ora all netora'yese't ñocop ñeñt atet yechenna ama't tayoteñ esempohuañencha' huerra.

¹³ Papa' çhocmach poctape'ch ñeñt atet o' neyçhatuanmař, ñeñtara ñoñets ñeñt e'ñe paçharr cotapñats. Ñaña peparrocmateñoť Cristo Jesúsapa' çhocmach pame'ñya cohuen, ñaña çhocmach pa'mueraña. ¹⁴ Ñaña çhocmach peñota, amach pa'po'poñetatstoñe Yompor poctapña ñeñt atet yechenpa Yompor. E'ñe po'huamencot Parets Puecamquëñ ñeñt yeçhetsa yeyochro ñepa'chña peyenpue'.

Atto puesheña'tetspa' a'ypo'ña'huaneret Pablo

¹⁵ Napa' o' notap atet tarro'mar ama't papa' peñoteñte' shonte' acheñ ñeñt yeçha'yetsa Asio'marpa' o' sohuanerrnet, atet ñerra'm Figelo ñaña Hermógenes. ¹⁶ Te'pa' aña çhocma nocshatene' Onesíforo tarro'mar ñapa' ama penquëno ama't napa' cárcelot'senen. Ñeñto'marña Yomporpa' a'natanepa' Onesíforo pamo'tsesha'. ¹⁷ Ahuañmo'cha allempo çhap Onesíforo arr Romopa' ñapa' nanac e'name'terren attot enterren. ¹⁸ Ama't papa' nanac peñoteñ, ahuañmo'cha Efesopa' ñapa' nanac yenpa'y. Ñeñto'marña Yomporpa' muera'huerepa'ch esempohuañencha' huerra po'yoroçhenñoť.

2

Ñeñticha' atet yetorra e'ñe cohuen Jesucristocop

¹ Nechemere Timoteo, e'ñe peparrocmateñoť Cristo Jesúsapa' huomenquëpa'ch peña' peyoçher tarro'mar ñapa' çhocmach yenpař. ² Allpon pe'mone't ñeñt atet neserrpare'tache't shonte' acheñeneshapa' papa'cho'ña te'pa' attecmaçh peyçhach po'poñeçhno ñeñt ame'ñetsa attoch ñetpa'cho'ña eñoçet yeçhatet allohuen pamo'tsesha'.

³ Ñaña o'ch notap po'poñ. Papa' amach peñtata'tatsto attoch pemuerochtapretya. Chochña pocte' peñch o'ch pemuerochta atet ñerra'mrate' cho peçllarena e'ñe cohuen Jesucristocop. ⁴ Ñato' o'ch netma'ntacha ñeñt atet pena solltarnesha'. Solltar ñeñt ejército'tsenpa' amach es cotape'cheno po'poñone't ñeñt atet pena ñeñt ama ejército'tseno. Añach paterr cotape'chen attoch coshatan ñeñt mandene'. Añ toma'ntena yapa'cho'ña añach paterr yocape'chen attoch yocshach Jesucristo ñeñt yeyechenaya yaña. ⁵ Ñato' o'ch netma'ntatererr po'poñ ñeñt atet pena ñeñt atarr jueguëtsa. Ñeñt atarr cohuen jueguëtsa çhocmaçh jueguënet e'ñe cohuen e'ñe atet anarettenet ñocpuet attoch e'ñe cohuen ganet. Ñerra'm ama e'ñe atet jueguëto e'ñe atet anarettenet ñocpuet,

amach errotenoŝ aparettetoña ñeñtcha' coshatahuet ñeñtecop atarr jueguenet. Ñeñtpa' añ toma'ntena yapa'cho'ña ñerra'm amach atet yeperro ñeñt atet anaret Yompor po'ñoñ yocop, amach errotenoŝ apuer-rye ñeñtcha' nanac yocshaterre'. ⁶ O'ch netma'ntatererr po'poñ. Ñeñt nanac taruaset pa'mropa' ñapa' ñanomcha' rre' ñeñt nare'ten. Ñeñtpa' añ toma'ntena ñeñt nanac torretsa Yomporecop ñapa'cho'ña nanaccha' coshateñ po'taruas ñeñt atet torrena Yomporecop. ⁷ Ñehua, p̄octape'ch ñeñt atet noteneŝ tarro'mar Yepartsesharpa' chapatonap̄cha' peyoçhro ora ñeñt atet toma'ntena añeçhno.

Añ pocte' çhocmach yeyerpueña Jesucristo

⁸ Amach pepsatsto atto Jesucristopa' tanterra allempo rroma, ñeñtara ñeñt po'mreneñ David, ñaña ñeñtara Cristo ñeñt çhocma neserrpare'ten attoch yequeshperra. ⁹ Ñeñto'marña napa' attoña huanca'net atto te'pa' nanac nemueroçhtena atet ñerra'mrrate' amtsañen. Tarraña Yompor po'ñoña' amach errotenoŝ huanqueto. ¹⁰ Ñeñto'marña napa' çhocma na'huanten atto nemueroçhtena, allochñapa' ñerra'm erra'tsencha' acerr Yompor ñeñtcha' ame'ñerrayapa' queshperretcha' e'ñe pame'ñeñoŝet Cristo Jesús. Ñaña all Yompor po'cohuenño'pa' correrretcha' errpono-huañen.

¹¹ Añ ñoñets allo çhocma ya'çhoteñ Yomporpa' e'ñe po'ñoçh atet: Ñerra'm e'ñe yame'ñeñoŝ Cristo yerromapa' yeyçherrach parro epay Cristo.

¹² Ñaña ñerra'm çho yemueroçhtaprecha Cristopa' ya'mcha'tarettapreterach esempohuañen. Tarraña ñerra'm çha ya'nasoteña'pa', ñapa'cho'ña a'nasoterryach esempohuañen.

¹³ Ama't allempo yapa' ama yeyemteño, tarraña po'ñoñ ñeñt atet otenpa' çhocma po'ñoçh atet, tarro'mar amach errotenoŝ alla a'po'poñeterrano ñañaña po'ñoñ.

Atto Yomporpa' e'ñech cohuen pa'taruasañer peney

¹⁴ O'ch alla noterrperr po'poñ: Chocmach peyerpacha acheñenesha' ñeñt atet o' notuaŝ, ñaña o'ch p̄otanet e'ñe Yompor po'huamencot amach allo'na otnare'tanna'tyesneneto e'ñe ñañañeta p̄octaŝño'maret. Tarro'mar atto es otnare'tanna'tyenetpa' ama't mameshapa' ama es sherbeno. Ñerra'm attach penetpa' atteña'pa' o'ch alla puerruerra allohuen acheñenesha' ñeñt e'mñnotenahuet. ¹⁵ Tarraña p̄apa' añcha'ña pema'yoçhra ñeñt cohuentetsa Yomporecop attoch ñapa' entaŝ e'ñe cohuen ataruasañeŝ. Amach eñalle ñeñtcha' pepencate' all petorra'yena ñocop. Attochña çhocmach pesherbatoñ po'ñoñ ñeñt e'ñe po'ñoçh ama shequëñtsoyaye. ¹⁶ Ñaña p̄apa' amach pa'na otnare'tatstahueto ñerra'm esempo es otnare'tanna'tyenet. Tarro'mar ñeñt atet serrpare'tatyenetpa' ama añeyaye alloch huomenc yeŝa' yeyoçher Yomporecop. Ñaña ñeñt atet petsapa' atteña'pa' o'ch allo'na senet puesuanmuet ñeñt atet yeçhateney Yompor. ¹⁷ Ñaña ñerra'm allo'nach yeçhatnenet ñeñt ama es sherbetsopa', atteña'pa' ñerra'm o'chña epa'hua orapa' allo'nach senet puesuanmuet ñeñt atet muenen Yompor. Ñato' o'ch netma'ntacha ñeñt atet pena atsañets ñeñt otenet cáncer ñeñtpa' mamesha o'ch epa'hua ora yechtso o'ch muetsay. Ñeñtpa' atet pa' epsheña ñeñt pa'so'cheñ Himeneo ñaña

Fileto, tarro'mar ñetpa' aña yečhatenet po'poñ cotaṗñats. ¹⁸ Ñetpa' atta ayčha'natateññañet Yompor po'ñoñ all oteney esempopa' yetanterrach. Ñetpa' ahuo't serrpare'tatieset acheñenesha' atet: "All oteney Yompor attoch yetanterra esempopa' ñeñtpa' toma'nteñtsa. Ñeñtpa' aña toma'ntena atto yapataretta ahuaña oño." Ñeñto'marña patanta'tets ñeñt ame'ñetsapa' alla quečpa'hueret atto ame'ñeñet Yompor. ¹⁹ Ama't atet pañ patantarrpa' tarraña Yompor po'ñočpa' ama pueno po'ñoñ. Ama't Yompor po'ñoñ ñeñt aquellcaret ahuatoteña' atet eñotateney eñallach pate'tets acheñ ñeñt po'ñoč ame'ñenaya. Ñeñtpa' atet oten: "Yomporpa' cheme'tenan ñeñt po'ñoč ame'ñenaya." Añpa' arr eñotateney po'poñ Yompor po'ñoñ ñeñt aquellcaret ahuatoteñ, ñeñtpa' atet oten: "Allohueny ñeñtey cotene' Cristopa' yequečpa'huerrepa' allohuen sosya'tsañ."

O'ch netma'ntacha ñeñt atet pena pocoll

²⁰⁻²¹ Po'ñočpa' čhoch yesuanom allohuen sosya'tsañ, allochñapa' attoch añach yema'yočhra attoch yesherbe' e'ñe cohuen Yompor. Tarro'mar allohueny ñeñtey ame'ñetsapa' ama e'ñe attecmaye' yesherbeñe Yompor. Ñato' puesheña'tetspa' nanaccha' cohuen sherbeñet Yompor, ñato' po'potantañña' amach. Ñato' o'ch netma'ntacha ñeñt atet pena pocoll. Ñeñt acheñ ečllayoretpa' arrña pa'paclopa' shonte'ch eñall pa'namen coymečhno. Ñato' patantarrpa' ororro'ch ñato' po'potantañpa' asrerro'ch, ñato' po'potantañña' tsachrro'ch, ñato' po'potantañña' patsrro'ch. Tarraña allohuenpa' amach e'ñe attecmaye' sherbenano pamo'mte'. Atet ñerra'm ñeñt ororro'pa' nanaccha' cočhneshoť sherbenan pamo'mte', tarraña atet ñerra'm patsrro'pa' amach tama cočhneshoťeye' sherbenano pamo'mte'. Ñeñto'marña yapa'cho'ña ñerra'm yemneñ o'ch yesherbe' e'ñe cočhneshoť Yamo'mte' Cristopa' añ palltetsa čhoch ñanom yesuanom allohuen sosya'tsañ attoch añach yema'yočhrena ñeñt cohuentetsa Yamo'mtayecop. Allochñapa' ama't erra'tsena es yeṗa'yenpa' e'ñech cohuenacma yocshateñ Yamo'mte' Cristo.

²² Ñeñto'marña ṗapa' noteneṗ o'ch pesuanom allohuen sosya'tsañ ñeñt atet muenatse'tyen huepaneshachno ñeñt ama po'ñočhaye' sherbenaye Yompor, allochña ṗapa' añach pema'yočhrena ñeñt cohuentetsa Yomporcop, ñaña čhoch ṗame'ñya Yompor e'ñe peñmañesha', ñaña čhocmach pemuerya allohuen ṗamo'tsesha'. Allochñapa' attoch peparrocmať epaṗ allohuen ñeñt e'ñe cohuen pueyočher pene' Yepartsesharecop. ²³ Ñaña ñerra'm esempo es otnare'tanna'tyenetpa' ṗapa' amach pe'mñotatstaneto, tarro'mar ñeñt atet otatse'tyetspa' e'ñe orrena atet penet. Ama't ṗapa' peñoteñ ñerra'm čho es yotnare'tanna'tapa' allot huena shonte' atsrre'mueñets. ²⁴ Tarro'mar ñeñt torretsa Yepartsharecoppa' ama pocteyaye o'ch atta atsrre'mare'tyesa allemeñ. Elloña čhochña ya'mueraña allohuenacop. Ñaña čhochña yeyčhatyes e'ñe cohuen acheñenesha' ñeñt atet cohuen enten Yompor. Ñaña ama't ñetpa' erroť ṗa'yetpa' yapa' e'ñe yemorrenteñoťpa' o'ch ya'huantoñ. ²⁵ Ñaña añ pocte' o'ch alla yocťape'chater cohuen ñeñt ye'moñe'tene'. Tarraña e'ñech acoṗa yocťape'chatyerranet e'ñe cohuen. Ñaña o'ch yecuenanet e'ñe acoṗa esempohuañencha' čhapanet pueyočhro ñeñt

e'ñe po'ñoçh cohuen enten Yompor. Ñaña o'ch yecuenanet esempo-huañencha' cotape'cherret ello e'ñe cohuen Yomporecop. ²⁶Ñerra'm atet ye'papa' ñato' attotpa' o'ch a'rroyerranet oneñet atto huanquënanet atto te'pa' pa'yenet sosya'tsañ ñeñt atet muenatenanet ña.

3

Ñeñtcha' atet perra esempoch mellapoterrmocha

¹Ñehua, te'pa' o'ch neñotatañ po'poñ ñeñtcha' atet perra esempoch mellapoterrmocha. Allempopa' nanaccha' echarr attoch yoc'te' Cristo. ²Tarro'mar allempopa' atetcha' perra acheñenesha'. Allempo acheñpa' nanaccha' moparrareret, ñaña añach paterr cotape'chenet ñeñt atet muenenat e'ñe ñocpueta. Ñaña allempopa' nanaccha' ye'chapretenet quelle. Ñaña allempopa' nanaccha' ommo'chenet ñeñt echyenet, atarrcha' cohuen entyerret e'ñe ñañeñeta, po'potantaññapa' amach esoye' asherben entyereto. Ñaña allempopa' nanaccha' achm'are'teret Yompor, ñaña allempopa' o'huañcha' ame'ñyet ama't ñeñt pamo'mte' penet, ñaña ñetpa' amach es coshatenahueto ama't coñe'ta. Ñaña allempopa' nanaccha' tsena'teret allohuen ñeñt anaret Partsocop. ³Ñaña allempopa' o'huañcha' esesha' mueranna'tertrsa, ñaña o'huañcha' muenet o'ch amo'tstanna'terret. Ñaña allempopa' nanaccha' toma'tam'psanna'tyerret ñaña allempopa' errotent'cho' muenetpa' atetcha' p'atse'tyenet, ñaña allempopa' nanaccha' mueroçhtatanna'tyerret attoch nanac coshenet, ñaña nanaccha' tsena'terret ñeñt cohuentetsa. ⁴Ñaña nanaccha' apomatatañterret, ñaña allempopa' amach es yepuer entyerreto, ñaña allempopa' e'ñech ñañeñeta nanac cohuen entetset, ñaña allempopa' ñañeñetach e'nenet alloch nanac coshenet, amachña añeye' e'neneto atet muenen Yompor. ⁵Ñaña allempopa' ama'tcha' ottenetañ ñerra'mrrate' ame'ñenetpa', tarraña amach po'ñoçhaye' ame'ñeneto. Tarro'mar ñetpa' amach po'ñoçhaye' mueneñeto o'ch çhapanet pueyoçhro ñeñt cohuentetsa Yomporecop attoch huomenc pa'nmuet pueyoçher e'ñe po'ñoçh.

Ñeñt atet acheñpa' amach pecua'psatsche. ⁶Tarro'mar ñeñt acheñ atetpa' attach mueneñ o'ch sheca'yesan acheñenesha'. Ñato' o'ch ahuanmuet po'ppauño'marpa' ñerra'm be'toset a'nahua pocollopa' añña coyaneshaçhno ñeñt ama es eñotopa' o'ch atta ame'ñateñet e'ñe ñet poçtapñet. Tarro'mar ñeñt coyaneshaçhnopa' nanaccha' yorateñet po'chñar. Ñaña ñetpa' añach e'nenet pa'namen ñeñtcha' coshatenahueto. ⁷Ñeñto'marña añ coyaneshaçhnopa' pa'namencha' topatyentañ cotapñats. Tarraña ama't ahuatapa' amach errotent'ot enterreto ñeñt po'ñoçh Yompor poçtapña. ⁸Yacma ñeñtcha' atet shequërre' acheñenesha'pa' ñeñt'pa' añña muenen o'ch epatare'tan añ cotapñats ñeñt e'ñe po'ñoçh Yompor poçtapña. Atet pa ñaña ahuat Janes epuet Jambres ñeñt muenatseñ o'ch epatare'tan Moisés. Ñeñt yacma ñeñt atet shequëne' acheñenesha'pa' amach cotape'chenano ñeñt cohuentetsa ama't mamesha. Ñetpa' çhach a'po'poñetenet ñeñt atet yame'ñena. ⁹Tarraña ñet poçtapñetpa' amach allohuenacmaye' anetso'mar epuerro tarro'mar esempopa' ñato' allohuen acheñenesha'pa' o'ch eñotuet ñeñt

atet otatse'tyenetpa' ñeñtpa' shequëñtsa. Ñato' atetcha' pa atet pa ahuat epsheña yacma ñeñt muenatseñ o'ch epatare'taneñ Moisés.

Arrpa' all cotape'chatan e'ñe cohuen Timoteo

¹⁰ Tarraña papa' ama atteye' pepeno. Tarro'mar papa' añ pocta'nen ñeñt atet nepena na. Ñaña papa' peñotuennan ñeñt atet neychatyen Yomporecop, ñaña ñeñt atet nocrrena e'ñe cohuen Yomporecop, ñaña atto e'ñe patrira nema'yochrena ñeñt cohuentetsa. Ñaña papa' peñotueñ ñeñt atet nanac neyemteña Yompor ñaña atto nanac na'huanten allohuen ñeñt echarr nentyen, ñaña atto nanac nemorroñteña allohuen acheñenesha', ñaña atto ama't nemueroçhteño'pa' çhocma nocteñ Cristo. ¹¹ Ñaña peñotueñ atto pue'moñe'teño'tetanpa' çhocma cotare'tnete't atto mueroçhtatyesnete't. Ñaña ama't papa' peñotueñ ñeñt atet mueroçhtatyesnet a'yo anetso ñeñt pa'so'cheñ Antioquío, ñaña Iconio, allotpa' ñaña Listro. Tarraña ama't atet pa'yesnete'tpa' Yomporñapa' çhocma a'quespätysesne't allot. ¹² Ñehua, yapa' yeñoteñ erra'tsencha' muenats o'ch cotan e'ñe cohuen Cristo Jesúsapa' çhocmach mueroçhtatanet ñeñt e'moñe'tenahuet. ¹³ Tarraña ñeñt ama cohuenayaye acheñpa' allo'nach senet patse'tnomuet sosya'tsañ. Ñaña ñeñt atfa sheca'yetspa' allo'nach senet shecanna'tatset.

¹⁴ Tarraña papa' çhocmach poctape'ch ñeñt atet ayçhataretep, ñeñtara ñeñt ama't papa' o' peñoter ñeñt e'ñe po'ñoçh cohuen cotapñats. Tarro'mar papa' peyemtenya ñeñtey peychate' ahuatoteñ. ¹⁵ Ñaña papa' e'ñe cheshoteñ ayçhataretep Parets po'ñoñ ñeñtara añ ñoñets ñeñt peñotaterre' atto e'ñe yame'ñeño'ta Cristo Jesúsapa' o'ch yequeshperra. ¹⁶ Allohuen Yompor po'ñoñ ñeñt aquellcaretpa' e'ñe Partshotecma anare't. Ñeño'tmar añ ñoñetspa' nanac sherben ñeñtcha' yeyçhate' ñeñt atet muenen Yompor, ñaña ñeñtcha' alla yoctape'chaterre' cohuen ñerra'm esempo es yepanten, ñaña ñeñtcha' yeñotatene' e'ñe cohuen ñeñt atet poctetsa Yomporecop. ¹⁷ Allochñapa' attoch ñeñtey o' puechemer perrey Yomporpa' e'ñech yeñotuen allohuen ñeñt cohuentetsa Yomporecop, ñaña attoch huomenc yepa' yeyoçher allohuenacop ñeñt cohuentetsa Yomporecop.

4

Añ pocte' çhocmach yeserrpare'toñ Yompor po'ñoñ ama't erroteno'tsenya

¹⁻² Te'pa' o'ch alla noterrperr ñeñtcha' atet pepa: Chocmach peserrpare'toñ Yompor po'ñoñ ama't esempo erroteno'tsenpa. Tarro'mar Yomporpa' enteney epuet Puechemer Jesucristo, ñeñtara ñeñt Yepartsheshar yepen, ñaña ñeñtarach huerrtsa ama't esempohuañen, ñaña ñeñtarach añcha'taretetuerrtsa esempohuañen, ñeñtcha' acrerre' allohuen acheñenesha' ñeñt e'ñe cohuenare', ñaña ama't ñeñt ama cohuenayaye. Atetcha' pan allohuen ñeñt corretsmeñ allempo, ñaña ama't ñeñt o' colla'huenta. Ñaña te' papa' o'ch peñotatyes acheñenesha' ñerra'm esempo ñetpa' ama pocteye' es peneto. Pañapa' pach otyesahuat amach atet yepatsto, allotpa' o'ch poctape'chatyerranet e'ñe peñmañesha'. Ñaña çhocmach peychatyesanet ñeñt poctetsa Yomporecop. ³ Tarro'mar esempohuañenpa' çhapcha' allempo acheñenesha'pa'

o'huañcha' muenet o'ch ame'ñet ñeñt e'ñe pa'charr co'apñats, ñeñt atet ye'chateney Yompor po'ñoñ. Allempopa' añach e'nyerret erra'tsente' serrpare'tene' co'apñatser ñeñt e'ñe cohuen entenet ñet atotcha'ña atonterraña ñeñtcha' ye'chaterrahuet ñeñt e'ñe ñet po'apñet. ⁴ Allempopa' amach esesha' muenerraye o'ch e'mñotet co'apñats ñeñt e'ñe po'ño'ch. Atteñapa' o'ch aña e'ñe cotape'cherret ñeñt e'ñe ñet pueserrparñet. ⁵ Tarraña p'apa' añach pa'terr po'ctape'ch ñeñt cohuentetsa Yomporecop, ñaña 'chocmach pa'huanta' ñerra'm huapona'pa muero'chteñets, ñaña añach pa'terr pema'yochra serrpare'tatyesets cohuen ñoñets alloch yequeshperra. Ñaña 'chocmach pe'torra ñeñt atet petaruas apa'p Yompor.

Allempo o' muetsamochet Pablo

⁶ Napa' amach erro't nepere'te tarro'mar o' 'chapmoch allempoch na'mtsaretta Yomporecop. Te'pa' neñotena napa' o' muetsamochnet. ⁷ Tarraña napa' o' epaye' netorra'nma Yomporecop atet ñerra'mrrate' 'cho ne'cllarena Yomporecop. Ñaña napa' o' netsotua ora ñeñt atet oterren Yompor. Ñato' o'ch netma'ntacha ñeñt atet nepena: Ñerra'm 'cho erra yesechapa' 'chocmach ye'chap all yesechena. Ñaña napa' ama't mameshapa' ama neque'chpue'te atto name'ñeña Yompor. ⁸ Te'ña napa' aña necuen esempoch nagap ñeñt o'patatenna Yompor ñeñtcha' nanac nocshatterre', tarro'mar napa' añ ne'pa'yese't ñeñt atet muene't Yompor. Ñeñto'marña te' esempoch huerra Yepartseshar Cristopa' allempo napa' aphuerrencha' ñeñt o'patatenna. Tarraña amach nap'ta aphuerrno ñeñt o'patatenya. Añe'nachña aphuerr ñaña allohuen ñeñt 'chocma cohua'me'tene'te' Cristo o'ch huerra. Ñeñtara Yepartseshar Cristo ñeñtcha' yeñotaterre' ñeñt po'ño'ch atet ye'pa'yena te'.

Arrpa' all otyesan Timoteo ñeñt atet a'parettena

⁹ Te'pa' o'ch notap' ñaña ñerra'm erro'tenotpa' o'te' p'on arr tayecma. ¹⁰ Tarro'mar arr masheñ Demaspa' o' a'ypo'ña'nerren arr napue't, ñapa' o' ahuerresalónico, tarro'mar ñapa' aña nanac morrentena ñeñt patso'marecpa. Añpa'cho'ña masheñ Crescentepa' o' ahuo' ñaña Galacio. Ñaña masheñ Titopa' o' ahuo' anetso Dalmacio. ¹¹ Te' arrpa' aña arro'tsen masheñ Lucas. Ñaña o'ch pa'sech masheñ Marcos ñeñtcha' epap' p'on arr, tarro'mar ñato' ñapa' o'ch yenpa'n arr. ¹² Masheñ Tíquicopa' o' nemñe a'yo anetso Efeso. ¹³ Ñaña o'ch notap' ñerra'm p'oncha' arrpa' p'anmoncha' necapa ñeñt nena'nom Troaso e'ñe Carpo pa'paclo. Ñaña p'anmoncha' allohuen nelibro'chno, ñaña nepap'lle'chno. Ñeñtara añ nepap'lle'chnopa' ñeñt nanac nemnen.

¹⁴ Alejandro ñeñt po'taruas pene' asre'chnopa' ñapa' at'a nanac a'metare'tam'psen. Tarraña Yomporpa' tsat'aterach ñeñt atet pa'n. ¹⁵ Ñeñto'mar p'apa' e'ñech peñota ñocop, tarro'mar ñapa' nanac epatare'tenan Yompor po'ñoñ ñeñt atet yeserrpare'ten.

¹⁶ Ñaña o'ch notap'. Ama't ahuañmo'cha allempo ñanom na'poc'at neñoñ am'cha'tare'teshopa' ama't puesheñarrapa' ama esesha' neñosapretaye. Elloña ñeñtapa' 'cha a'ypo'ña'hanet. Tarraña ama't atet pa'netañpa' napa' ama nemno Yomporpa' o'ch tsat'aterranet. ¹⁷ Tarraña Yepartseshar Cristopa' ama a'ypo'ña'no, elloña nanac ahua'mencat pa'n. Ñeñto'marña o' alla neserrpare'terrerr Yompor po'ñoñ attoch

e'mare'ch allohuen acheñenesha' ama't ñeñt' ama judioneshayaye ñeñt' alloch yequeshperra. Atto nequeshperra allempo all atarr amuerochtatareñen, napa' atet nenteñ ñerra'mrrate' Yepartsesharpa' o' a'queshpaterren e'ñe ma'yarr puenamoť. ¹⁸ Ñeñto'marña te'pa' neñoteñ Yepartsesharpa' čhocmach a'queshpaterren arrot all ama cohuenayaye, ñaña napa' neñoteñ čhocmach cohuanpenen, attochña čhapterren all amicha'tarettena ña pue'ntaño. Ñeñto'marña čhocmuepa'ch ya'ye'chochtatoñ errponohuañen. Ñeñtpa' attetepa'ch.

Arrpa' all huomicha'tyesnerranet po'cartot

¹⁹ Ñaña añ necartotpa' nemneñ o'ch nehuomicha'ch nočh Prisca epuet puerrollar Aquila, ñaña o'ch nehuomicha'ch Onesíforo pamo'tsesha'.

²⁰ Ñaña masheñ Erastopa' alla a'pa anetso Corinto, ñaña masheñ Trófimopa' alla nesa'neñ patsnañot Mileto. ²¹ Ñaña papa' ñerra'm errotentopa' čhocmate' pehuapa allempo ama huapuenta'. Ñaña añ necartotpa' mueneñ o'ch huomicha'tař masheñ Eubulo, ñaña Pudente, allotpa' ñaña Lino, ñaña nočh Claudia ñaña allohuen masheñneshačno ñeñtey ame'ñetsa arr Romo.

²² E'ñe allohuanenpa' o'ch notař, Yepartseshar Jesucristopa' čhocmuepa'chña e'ñe parro'tsenep. Ñaña Yomporepa'ch sa'natenaya allohuenes. Ñeñtpa' attetepa'ch Nompore. Allohua.

Pablo

AÑ SAN PABLO PO' CARTA ÑEÑT QUELLCAN TITO TITO

Atto Pablopa' quellcan carta Titocop

¹⁻⁴ Masheñe Tito ñeñteḡ e'ñe parro yame'ñeñoḡ e'ñe atet nenteneḡ ñerra'mrrate' e'ñe nechemer nepeneḡ, na Pablon pequellquene'ña añ carta ñeñten nanac torretsa Yomporecop. Ñaña napa' ñeñten Jesucristo puellsensaren. Ñapa' atto llesenserren attoch nach ame'ñaterre'ña allohuen acheñenesha' ñeñt acre't Yompor ahuatoteñ attochña ñetpa' o'ch ame'ñeret. Ñaña añecop llesensa'n attoch nach eñotaterahuet ñeñt e'ñe po'ñoḡ atet poctetsa Partsocop, ñaña nach eñotaterahuet e'ñe yeyemteñoḡ ña yañapa' corretsayach yocsheñeshocmañen tayoteñ e'ñe errponañohuen. Tarro'mar ñeñtḡpa' atet oteney Yompor ama't ahuatoteñ ñeñtcha' atet ḡonay, ñaña yapa' yeñoteñ Yomporpa' ama puenesho po'ñoñ. Ñeñto'marña te'pa' o' ḡherr allempo e'ñe pocte' enteñ ña o'ch eñotaterrey ña po'cohuenña. Ñeñto'marña napa' o' llesenserren Yompor ñeñt Ya'qushḡatañer yepen, nach serrpare'terre' po'ñoñ ñeñt atet otenen. Te'pa' e'ñe nehuom'cha'teñoḡeḡpa' o'ch notaḡ: Yomporepa'chña pebensare'tam'pene' ñeñt atarr Parets epuet Puechemer Jesucristo ñeñt Yepartseshar yepen ñeñtara Ya'qushḡatañer yepen. Ñetepa'chña pemuerenaya. Ñetepa'chña ḡocshatene' e'ñe ḡa peyoḡthro.

Ñeñt po'taruas ḡa' Tito Yomporecop all anetso Creto

⁵ Te'pa' o'ch notaḡ, napa' atto nena'nmaḡ ahuaña Creto attoch ḡach a'poctatyese' ñeñt pallta'yetsa, ñaña ḡach acra'yese' puesheña'tets ñeñtcha' pena'yese' allemeñ anetso'mar ñeñtcha' pompornesha' ḡa'yese' ñeñt ame'ñetsa. Añmapa' ñeñtña atet notnomueḡ ahuañmo'cha. ⁶ Ñeñtcha' pompornesha' ḡa'yeseḡpa' añcha' pena'yese' acheñ ñeñt e'ñe cohuenare' es ḡa'yets, ñeñt amach eñalle attoch tanmare'teña acheñenesha'. Ñaña ñeñtcha' pompornesha' ḡa'yeseḡpa' añcha' pena'yese' erra'tsente' penten e'ñe paḡrra puetapor pen (ñerra'm ataporeḡ), ñaña erra'tsente' penten ama't puechemeresha'pa' e'ñech ame'ña'huenet, ñaña puechemeresheḡpa' amach atteye' enteñe acheñenesha' atet ḡa'yena po'poñeḡhno acheñenesha' ñeñt atta coshatse'tyenet, ñaña ñeñt ama atpare'tetso puechemeresha'. ⁷ Tarro'mar ñeñtcha' pa'm'cha'tareter ḡa' ñeñt ame'ñetsapa' añcha' pena'yese' acheñ ñeñt e'ñe cohuenare' es ḡa'yets, ñeñt amach eñalle attoch tanmare'teña acheñenesha', tarro'mar ñapa' anareḡ ñach a'poctatyene' pa'namen ñeñt poctetsa Yomporecop. Ñaña ñeñtcha' pa'm'cha'tareter ḡa'yese' ñeñt ame'ñetsapa' amach añeyaye acheñer ñeñt añach pocte' enten o'ch ḡhocma ḡatanet ñeñt atet muenen e'ñe ña, ñaña amach ḡha atsrre'moḡchen entueno, ñaña ñeñt ama posa'tare'tetso, ñaña ñeñt amach orroñateyaye, ñaña ñeñt ama nanac ye'chapretetso quelle ñeñt apencoḡchenoḡ o'ch gana. ⁸ Añña e'ñe pocte' o'ch am'cha'taretta ñeñt e'ñe cohuen aguene' acheñenesha' pa'paḡclo, ñaña ñeñt nanac muenene' o'ch e'ñe cohuenare' es ḡa'yese', ñaña ñeñt e'ñe eñotene' ñeñt cohuentetsa, ñaña ñeñt e'ñe pocte' es

pa'yets acheñeneshacop ñaña Partsocop, ñaña ñeñt e'ñech puetpara es pa'yen. ⁹ Ñaña ñeñtcha' pa'mcha'tareter pa'yets ñeñt ame'ñetsapa' e'ñech yemtenana poctacma añ ñoñets ñeñt e'ñe po'ñoçh Yompor po'ñoñ ñeñt atet yeçhateñet. Allochñapa' ñapa'cho'ña e'ñech attecma yeçhatan ñaña po'potantañeçhno ñeñt e'ñe paçharr cotapñats, ñaña ñeñt eñotene' attoch anapuanen e'ñe cohuenacma ñeñt achmāre'tene' Yompor po'ñoñ attoch ñetpa' amach errotenof anapeto.

¹⁰ Tarro'mar eñall shonte' ñeñt atpare'tets, ñaña ñeñt e'ñe orrena otatse'tyets, ñaña ñeñt shecare'tyets. Po'ñoçh ñeñtpa' atet pena shonte' judionesha'. ¹¹ Ñeñto'marña añ palltetsa o'huañcha' yeçhatyenet po'poñe'ttsoçma cotapñats. Tarro'mar ñetpa' atta nanac moññe'tateñet acheñenesha' poctapña; ama puesheña'ttsayaya atet petso ama't allohuen ñeñt parro yeçha'yenet. Ñetpa'cho'ña añ yeçhatenet ñeñt ama pocteyaye. Ñaña añeçpa yeçhatenet attoch ganet quelle, tarraña ñeñtpa' apencoçhena.

Ñeñt atet pena creto'marnesha'

¹² Puesheñarr creto'marnesha' ñeñt nanac etsotene' e'ñe ñañeñeta poctapñetpa' ñeñtña acheñer ama pocteye' entenano pamo'tsesha' ñeñto'marña atet oten pamo'tseshacop: "Allohuen namo'ts creto'marnesha'pa' ñetpa' çhocma nanac toma'tañpeñet pamo'tsesha', ñaña ñetpa' nanac atsrre'mñaatet e'ñe attet ñerra'mrrate' berr ñeñt nanac bellac, ñaña nanac quellañsareret, atarr araquet ama ayetñaateto."

¹³ Ñeñt atet a'metampanan pamo'ts ñeñtpa' e'ñe po'ñoçh atet. Ñeñto'marña o'ch notap, te'pa' paçh otahuet, "te'pa' amach allo'na atet sepanna'tneno." Allochñapa' attoch allo'na ame'ña'nmuet añ cotapñats ñeñt e'ñe paçharr, ¹⁴ ñaña allochñapa' amach allo'na e'mñotneññañeto ñeñt pueserrparña pe't ahuatnaneshañ judionesha', ñaña allochñapa' amach allo'na e'mñotneñe acheñenesha' ñeñt atet yeçhatyenanet ñeñtcha' atet pet, tarro'mar ñetpa' çhach atpare'tenet ñoñets ñeñt e'ñe po'ñoçh Yompor po'ñoñ.

¹⁵ Ñaña o'ch señoçh: Ñeñt acheñer e'ñe cohuenare' es cotape'chen pueyoçhro Yomporecoppa' ñocoppa' ama es eñalle attoch sosey enteñ Parets. Tarraña ñeñt nanac sosey cotape'chets pueyoçhro ñaña ñeñt ama ame'ñetsopa' ñocoppa' ama eñalle ñeñt cohuen enten ña. Tarro'mar poctapñetpa' atarr sosey. Ñeñto'marña ñetpa' amach çhapaneto pueyoçhro ama't esempo o' pohuet ñeñt ama pocteye' enteno Yompor.

¹⁶ Ñeñt atet acheñpa' ama't otenetañ eñoteñeto' Yomporpa' tarraña ñeñt atet patse'tyenetpa' yeñoteñ ñeñtpa' ama atteyaye. Ñeñt Yomporpa' ama pocteye' entapretenaneto, tarro'mar ñetpa' ama es otapahueto, ñaña ñetpa' ama es sherbeneto ama't mamesha.

2

Ñeñt e'ñe paçharr cotapñats Yomporecop

¹ Tarraña pocoppa' añña poctetsa o'ch peyçhateñ acheñenesha' ñeñt e'ñe paçharr cotapñats Yomporecop. ² Ñaña ñeñt po'nmeneshaçhno yacmapa' o'ch peyçhatanet atet: Amach orrare'tatsteto attoch çhocma cotape'chenet e'ñe cohuen, allochñapa' pamo'tsesha'pa' amcha'na'tpo'ch enteñ, ñaña attoch nanac eñotenet ñeñtcha' atet

pa'yeset ñeñt' cohuentetsa Yomporecop. Ñaña o'ch pōtanet e'ñe cohuenacma, ame'ñetepa' ñeñt' e'ñe pa'charr cota'pñats Yomporecop, ñaña morrentanna'tetepa' ñaña ahuanta'huetepa'ch allohuen topateñets. ³ Attecmach pey'chach ñaña po'nmenesha'chno coyanesha' ñetpa' añepa'ch orrtatyenet ñeñt' e'ñe pocte' enten Parets ñaña ama't allohuen acheñenesha'. Amachña 'chaña atomañeñteneto, ñaña ñetpa'cho'ña amach orrare'tatsteto. Añña pocte' o'ch yethachet pacmanesha' ñeñt' cohuen enten Yompor. ⁴ Ñetpa' yechachetepa' pacmanesha'chno ñeñt' shopshare' ñeñt' o' some'tua allochñapa' attoch e'ñe cohuen mueryet puerrollaret, ñaña attoch e'ñe cohuen mueryet puechyoreshet, ⁵ ñaña attoch ñetpa' eñotenet nanac ñeñt'cha' atet pa'yeset ñeñt' poctetsa ñaña attoch muechettetenet, ñaña attoch amach muenme'cheneto ñeñt' po'taruas penet pa'pacleto, ñaña e'ñech amuerañtenet, ñaña e'ñech ame'ñeñet puerrollaret. Allochñapa' e'ñe ñesho'tepa' amach erroteno't acheñenesha'pa' achmāare'toñeto Yompor po'ñoñ.

⁶ Attecmach pey'chach ñaña yacmanesha' ñeñt' huepaneshameñ attoch ñetpa'cho'ña o'ch eñochet ñeñt'cha' atet pa'yeset ñeñt' poctetsa. ⁷ Papa'cho'ña e'ñech cohuenare' es pe'pa'yes pa'ña, allochñapa' attoch entap' acheñenesha' ñeñt' cohuen enten Yompor. Ñaña allpon pey'chatenanetpa' e'ñepa'chña pa'charr pey'chatenanet, amachña 'cha muene' peyellsheño'ta pey'chatenaneto attoch añcha'na'tpo' entoñet Yompor po'ñoñ. ⁸ Tarro'mar e'ñe pey'chateño't Yompor po'ñoñ ñeñt' e'ñe pa'charrpa' amach erroteno't ama't eseshapa' oto añpa' ama atteyaye. Ñaña ama't ñeñt' pe'moñe'tyene'ñerra'm e'ñe pey'chateño't e'ñe cohuenpa' allempoña ñetpa' o'ch penquēt, tarro'mar e'ñe pey'chateño't cohuen pa'charr. Allempoña ñetpa' amach erroteno't alla sasare'terrpeterro.

⁹ Ñaña e'ñech cohuen pōctape'chatyēs acheñenesha' ñeñt' ataruasatarettetsa e'ñe atta. O'ch pōtanet ame'ñyetepa' e'ñe cohuen ñeñt' po'patronar penet. Ñaña añ pocte' allpon muenenet po'patronaretpa' e'ñepa'chña ame'ña'hueñet, allochñapa' attoch coshateñet po'patronar. Amachña 'cha anapare'teñeto. ¹⁰ Ñaña amachña 'cha etyeneto attoch po'patronaretpa' e'ñech yemtenanet poctacma. Allochñapa' e'ñe pame'ñeño'tet cohuen po'patronaretpa' añña acheñenesha'pa' e'ñech cohuen entapretenet Yompor pocta'pñña, ñeñtara ñeñt' Ya'queshpatañer yepen.

Atto Yomporpa' orrtatan puemuerēña allohuenacpay

¹¹ Yomporpa' orrtaterrnay pomuerēña e'ñe allohuenacpay pa'namen acheñenesha'cop attoch yequeshperra. ¹² Ñaña ñeñt' ama cohuen enteno Yomporpa' añ pocte' o'ch ya'ypo'ña'huer, ñaña ñeñt' allpon yemnatse'tyen arr patsropa' añ pocte' ñaña o'ch ya'ypo'ña'huer, tarro'mar puemorrenteño't Yomporpa' ñeñto'mar yechatey atet. Añña pocte' ama't añe patsropa' o'ch yepena ñeñt' cohuentetsa, ñaña o'ch yepena ñeñt' atet pocte' enten Yompor, ñaña ñeñt' atet muenen o'ch yetsotoñ. ¹³ Añpa' attoch yecuame'teñ e'ñe yocsheñesha' esempohuañencha' huerra po'cohuenño Jesucristo ñeñt' nanac Parets ñeñt' Ya'queshpatañer yepen. ¹⁴ Tarro'mar ñapa' ña pocte' ente' o'ch rroma yocop attoch o'huañcha'

allo'na yepatse'tnena sosya'tsañ. Ñaña ñapa' attoña e'shohuerrnay allohuen ñeñt ama pocteyaye. Allochñapa' attoch pueyochresha' perrey, ñaña attoch yapa' yema'yoçhrena ñeñt cohuentetsa.

¹⁵ Allohuen ñeñt atet o' notuap̄ papa' ñeñtcha'ña peychatyesanet. Ñaña o'ch poctape'chatyesanet e'ñe cohuen, ñaña ñerra'm pa'yenet ñeñt ama pocteyayepa' o'ch potanet, amach patsteto atet, tarro'mar papa' ñeñtecop anaretep̄. Ñaña ñeñt ama pocteyayepa' amach atet pepatsto, te't acheñenesha'pa' amate' acua'psenaye' entenpeto.

3

Ñeñt atet poctetsa allohuenacop ñeñtey ame'ñetsa

¹ Ñaña o'ch peyerpacha acheñenesha' añ pocte' o'ch ame'ñeñet ñeñt nenet nanac añcha'tareṭ, ñaña allohuen po'psheññechno ñeñt añcha'taretetyetsapa' añ poctetsa o'ch ame'ñeñet. Ñaña añepa'chña pocsheñesha' çhocma torra'yenet erra'tsente' cohuen enten acheñenesha'. ² Ñaña o'ch peyerpatanet amach allo'na sasare'tneñeto ama't puesheñarra, ñaña e'ñepa'chña cohuen entannenet, ñaña e'ñepa'ch acopa es penet po'psheññecop ñaña e'ñepa'ch cohuen amuerañtenet allohuenacop.

³ Ñeñtapa' e'ñe pocte' atetcha' pannenet tarro'mar yapa'cho'ña yeñoteñ ahuatpa' añ yepatse'tyese't ñeñt ama pocteyaye. Yapa'cho'ña attach ama es yepche'te allempo nanac yepatse'tyese't sosya'tsañ. Ñaña nanac yatpare'te't ahuat, ñaña añ yeçhatyesyete't ñeñt ama po'ñoçhoyaye cotap̄ñats. Yechetspa' añ nanac muenatse'tatye't ñeñt ama cohuenayaye ñaña allempopa' añ nanac yocshe't pa'namen sosya'tsañechno. Ñaña allempopa' nanac atsrre'moçhen yentanna'tyese't ñaña nanac es yeye'chapretanna'tyese't. Ñaña allempopa' ñerra'm esesha' ye'moñe'te'pa' yapa'cho'ña o'chcho' ye'moñe'chcho' yaña. ⁴ Tarraña allempoña Yomporpa' eñotatey e'ñe ña puemuereñoṭpa' mueneñ o'ch yenpa'y, e'ñe allempocma yapa' attoña a'qeshp̄aterrey, ñeñto'marña Yomporpa' ñeñt Ya'qeshp̄atañer yepen. ⁵ Ñeñtapa' ama añoṭeyaye atto e'ñe cohuen es yeṭa'yen, añña e'ñe puemuereñoṭeya ñapa' a'qeshp̄aterrey. Attoña e'shohuerrnayña yo'chñar attochña ellopa' o'ch yoctape'cherr e'ñe cohuen etserra ñocop, ñaña Puecamquëñoṭpa' o' e'ñe etserrataterrnay yoctap̄ña. ⁶ Ñeñto'marña Puechemer Jesucristopa' attoña a'poctatuonay yocop attoch Pomporpa' chorraterrya Puecamquëñ e'ñe poctacma. Jesucristopa' ñeñtña Ya'qeshp̄atañer yepen. ⁷ Ñeñto'marña te'pa' yeñoteñ e'ñe puemuereñoṭey Yomporpa' o' pocte' entuerrey allohueney, ñeñto'marña te'pa' e'ñe yeyemteñoṭ çhocma yecuame'ten ñeñt o'patatenya, ñeñtapa' attochña yapa' corretsayach yocsheñeshocmañen tayoteñ e'ñe errronañohuen.

⁸ Ñeñt atet notenpa' e'ñe po'ñoçh. Ñeñto'marña napa' atarr nemneñ o'ch poctape'chatanet e'ñe huomenco atet, allochñapa' ñeñt ame'ñenaya Yomporpa' e'ñech añ ma'yoçhrenet o'ch penet ñeñt cohuen enten ña. Ñeñt o' notuapa' ñeñtña cohuentetsa ñaña ñeñtña nanac sherbets allohuenacop. ⁹ Ñaña o'ch notap̄, amach pa'na anapare'tatstahueto ñerra'm esempo anapare'tanna'tyena acheñenesha' e'ñe ñet

poctaḗño'maret. Ñaña amach ḗa'na anapare'tatstahueto ñerra'm esempo anapare'tanna'tyenet atet ḗa'yesete't pa'tañneshañet. Ñaña amach ḗa'na otnare'tatstahueto ñerra'm esempo pueserrparño'tetpa' es otnare'tanna'tyenet. Ñaña amach ḗa'na anapare'tatstahueto ñerra'm esempo anapare'tanna'tyenet e'ñe Moisés po'ñoño'mar. Tarro'mar atto yanapare'tannenapa' ñeñ'tpa' ama es sherbeno, ñaña ñeñ'tpa' e'ñe orrena.

¹⁰ Ñaña ñerra'm esesha' ñeñ't muenets o'ch atta e'moñe'tatyesan acheñnesha'pa' ñeñ'tpa' atetcha' pepe', o'ch peñotach atetpa' ama aḗapahuo. Ñerra'm ama huenano ñeñ't atet penapa' ñato' o'ch alla ḗotererr po'pocheño. Ñerra'm allempoña ama huenererropa' añ pocte' o'ch sa'ypo'ñe'. ¹¹ Tarro'mar ñeñ't atet acheñpa' yeñoteñ ñeñ'tpa' po'chñarotcha' nanac es panten. Ama't ñapa' eñoteñeñ ñeñ't atet pena ñeñ'tpa' ochña'teñets.

¹² Ñehua, o'ch noterrperr po'poñ. Ñerra'm esempoch chap pesho masheñ Artemas amapa' masheñ Tíquico ñeñ'tcha' nemña peshopa' ñerra'm errotentpa' chocmate' ḗon, o'ch pechap Nicópoliso, tarro'mar napa' noctape'cheñ ñato' allcha' nechara'perra. ¹³ Ñaña chocmach peyenpue' masheñ Zenas ñaña masheñ Apolos attoch ñetpa' chapuet all sechenet, ñaña attoch amach es pallteto. Zenaspa' ñeñ't nanac etsotene' ñoñets ñeñ't atet anaret. ¹⁴ Allochñapa' ñeñ't parro yame'ñena allpa' añ pocte' o'ch ḗa'yenet ñamet ñeñ't atet cohuenteyetsa, ñaña attoch ñetpa' yenpueñet ñaña ñeñ't nanac es palltetsa. Allochñapa' ñetpa'cho'ña o'ch sherbeñet pamo'ts.

Arrpa' all huomcha'tyesnerranet po'cartot

¹⁵ Allohuenet ñeñ't parro'tsenenpa' mueneñet o'ch huomcha'tapet ñamet añ necartot. Ñaña o'ch pehuomcha'ch allohuen ñeñ't pame'ñeño'tetpa' chocma morrentenyet. Yomporpa'chña sa'nataya allohuenes. Te'pa' ñeñ'tach notap, ñeñ'tpa' attetepa'ch Nompore. Allohua.

Pablo

AÑ SAN PABLO PO' CARTA ÑEÑT̃ QUELLCAN FILEMÓN FILEMÓN

Atto Pablopa' quellcan carta Filemónacop

¹ O'ch masheñe Filemóna nequellconañ añ carta, na Pablon epan masheñ Timoteo. Napa' o' yottam̃pennet e'ñe neserrpare'teñot̃ Cristo Jesús po'ñoñ. Te'pa' o'ch masheñe yehuom̃cha'tañ p̃a ñeñteḡ atarr yemorrentena ñeñteḡ atarr yetorrapretenaya Yomporecop. ² O'ch yehuom̃cha'teñ ñaña allohuen ñeñt̃ pame'ñeñot̃et̃ chocma apchenet pepaclo. Ñaña o'ch yehuom̃cha'teñ yo'ch Apia ñaña masheñ Arquivo ñeñt̃ nanac yetorrapretenaya ñaña Yomporecop. ³ E'ñe nehuom̃cha'teñotes sapa' napa' o'ch notas: Yomporepa'ch sebensare'tam̃pene' ñeñtara Parets epuet Puechemer Jesucristo ñeñt̃ Yepartseshar yepen. Ñetepa'chña socshatene' e'ñe sa seyo'chro allohuenes.

Atto Filemón e'ñe pame'ñeñot̃an Cristo atarr morrentenana allohuen ñeñt̃ ame'ñetsa

⁴⁻⁵ Ñaña te'pa' o'ch notañ masheñe. Napa' atet ne'mare'teneḡ p̃apa' nanac peyemteña Yepartseshar Jesús ñaña atarro' pemorrenteña allohuen Yompor pueyochreshachno. Ñeñto'marña na atet ne'mare'teneḡp̃a' chocma neparasyoso'teñ Yompor allempo nema'yocham̃penḡa. ⁶ Ñaña o'ch notañ, añ nenamueñ Yompor p̃ocop, ñeñt̃ allpon p̃ame'ñatena e'ñe p̃ame'ñeñot̃ Yompor, ñetpa'cho'ña chapanetepa'ña pueyo'chreto atto nanac shonte' e'ñe cohuen bensare'tam̃peney Yompor e'ñe yame'ñeñot̃ Puechemer ñeñt̃ Cristo Jesús. ⁷ Ñehua, masheñe atarr nocshena atto p̃apa' atarr pemorrenteña allohuen ñeñt̃ pueyochresha' pen Parets. Atto atarr pemuerenanetpa' ñeñto'marña na'ñaña atarr p̃ocshaten neyo'chrohuen.

Atto Pablopa' otenan Filemón e'ñech cohuen aguërran pa'taruasañer Onésimo

⁸ Ñeñto'marña te'pa' o'ch noterrperr po'poñ: Napa' ñeñten Cristo puellsensaren ñeñto'marña p̃ocoppa' e'ñe poctet̃ o'te' atet notapeñ e'ñe ne'mueñocma ñeñt̃ poctetsa atetcha' peḡa. ⁹ Tarraña neñoteneḡ p̃apa' atarr amuerañañ ñeñto'marña te'pa' o'ch notañ e'ñe p̃a pemuereñot̃ atetñaca'yeña peḡa. Ñehua, na Pablon ñeñten atet p̃otene' napa' po'nm̃ota o' yottam̃perrnet e'ñe neserrpare'teñota Cristo Jesús po'ñoñ. ¹⁰ Tarro'mar na p̃otene' añecop ñeñt̃ atet nenteñ ñerra'mrrate' nechemer. Ñehua, ñapa' o' name'ñacha arr all ayottam̃psareten ñeñto'marña te'pa' e'ñe nechemer nepeñ. Ñeñt̃pa' añ pa'so'cheñ Onésimo ñeñt̃ p̃a'taruasañer pepeḡ allempo ama yetam̃penḡa'.

¹¹ Ña ahuatpa' ama es asherben peñche'te allempo petaruasacheḡ e'ñe atta. Te'ñapa' nanaccha' asherben penter e'ñe atet atarr asherben nenteñ naña. ¹² Te'pa' o' alla nemñer pesho, e'ñepa'chña cohuenacma alla paguër, e'ñech atet peḡapuer ñerra'mrrate' e'ñe no

nechemer paguën, tarro'mar ñapa' e'ñe neyoçhrocmañen atarr nemor-renteña. ¹³ Napa' atarrçho' nemneñeñ o'ch na'pacheñ arr ñeñtcha' epan atto ñapa' ñate' neshherbenayeñ. Ñehua, napa' neñoteñ ñerra'm pa arro'tsenpeñcha'pa' pãte'ña neshherbenayeñ arr all ayottam̄psareten e'ñe neserrpare'teñoñ Cristo po'ñoñ. Tarraña pãpa' amaña arro'tsenayaype ñeñto'marña napa' nemneñeñ o'ch na'patonapeñ pãcheñer ñeñtcha' neshherbenayeñ. ¹⁴ Napa' ama't atarr nemneñeñ o'ch atet nepeñ, tarraña ama nemno o'ch atet nepa ñerra'm ama pã atet notaye, atfoña e'ñe pã pãtañño'pa' añcha'ña porrtatonay pemuereña. Ama nemno o'ch e'ñe na ne'mueñocmapa' o'ch notapã atetcha'ña pepa'y, ñeñto'marña te'pa' o'ch alla nemñer masheñ Onésimo pesho. ¹⁵ Ñaña o'ch notapã ñato' tarrecpate' yetam̄psaãa mame' attoch e'ñe parrocmaterreñ e'ñe tayoteñ errponañohuen. ¹⁶ Te'pa' o'huañcha' atet peñch ñerra'mrate' pã'taruasaña pepeñ ñeñt ama esoye' pente'te. Te'pa' e'ñechña atet penter ñerra'mrate' e'ñe pemo'nasheñ ñeñt atarr pemorrentena. Napa' atarr nemuereña elloña pãpa' o'ch atarr pemuerya nanac tarro'mar ñapa' ama e'ñe atta pemo'nasheñ pepeñe atet yeñannena allohueney acheñey, te'ñapa' e'ñe yame'ñeñto' Yompor o'ch e'ñe pemo'nasheñtera e'ñe poctacma.

¹⁷ Ñerra'm po'ñoçh atette' pentenen na ñeñtey parro attecmay yeyemtannena, ñeñtepñapa' e'ñechca'ye cohuen paguërña yemo'nasheñ Onésimo atet ñerra'mrate' na e'ñe cohuen paguën. ¹⁸ Ñerra'm çhote' erroñ pennapã ñeñt ama cohuenayaye amapa' ñerra'm çhote' tebeneñ, te'ñapa' nach petsa'terraya. ¹⁹ Na Pablonpa' te'pa' o'ch nequellconapã e'ñe na notot attoch e'ñe cohuen neñotatañ nach petsa'terraya. Tarraña ñato' o'ch neyerpatapa' atto na pame'ñaterraya attoch pã'queshpataretterra, ñeñto'marña pãcoppa' añ poctetsa te'pa' o'ch alla pãchaterren namã. ²⁰ Po'ñoçh masheñe, napa' añ e'ñe nemnen te'pa' o'ch alla pãchaterren namã e'ñe pame'ñeñto' Yepartseshar Jesucristo. Allochñapa' napa'çho'ña attoch e'ñe cohuen nocsherra neyoçhro e'ñe name'ñeñto' namã Cristo.

²¹ Napa' neñoteneñ pãpa' çhocmach pe'mñoten ñeñto'marña nequel-lquënnañ añ carta. Neñoteneñ amach ñeñtayaya atet pepo ñeñt o' notuañ, pãpa' ellochña atarrcha' cohuen pepa'yes allohuen ñeñt atarr cohuentetsa. ²² Te'pa' o'ch noterrperr po'poñ: pãñño'toncha' ñaña nocop allcha' neçhap ñerra'm esempoch a'rroyernnet. Sema'yocham̄peñtoñ Yomporpa' napa' añ atarr necuen ñato' esempopa' a'rroyernnetcha'. Allempopa' esheçte' neta sesho o'ch nemo'terrsa'.

Arrpa' atto so'tner po'cartot

²³ Arr necartot all huom̄cha'teneñ ñaña masheñ Epafras ñeñt parro yottam̄penyet e'ñe yeserrpare'teñoñ Cristo Jesús po'ñoñ. ²⁴ Huom̄cha'teneñ ñaña masheñ Marcos ñaña masheñ Aristarco ñaña masheñ Demas ñaña masheñ Lucas. Ñetpa' çhocma torrapretennet Jesucristocop.

²⁵ Te'ñapa' ñeñtach notapã masheñe. Yepartsesharepa'chña Jesucristo sa'nataya allohuenes. Ñeñtãpa' attetepa'ch Nompore. Allohua.

Pablo

AÑ CARTA ÑEÑÑ HEBREONESHACOP HEBREOS

Te'ña Yompor Puechemerpa' ña e'ñe ye'ñorana'terraya ñeñt atet oteñ Pompor yocop

¹ E'ñe ahuatoteñ Yomporñapa' chocma eñorana'tyesane't ñeñt pueyochresha' pe't ñeñtcha' a'mta'yesaye't po'ñoñ ñeñtara profetanesha'. E'ñe pa'namenot eñotatyesanete't. Ñetñapa' o'ch eñotatennayet yatañneshañ judionesha' ñeñt atet otenanet Yompor. ² Tarraña te'ña yapa' e'ñe ña Puechemer o' eñorana'terrya ñeñt atet eñoreññaña Yompor yocop. Ñehua, ñeñtpa' ñeñtara Puechemer ñeñt Jesucristotets ñeñt ne't Pompor ahuatoteñ, ñach o'patenaya allohuen ñeñt ora allpon eñall, tarro'mar ña ye'chcataprete' ahuat Pompor añ patser ña'ña allohuen ñeñt esocmañen pa'namen eñalletyesta. ³ Ñeñtara Cristo atto atarr cohuentena ña pa'tsnomueño't, ñeñtpa' Pomporña orrtaten po'partsoña. Ñeñt atet cohuen orrtatyen ñapa', Pomporpa'cho'ña e'ñe parro attecmet. Ñapa' e'ñe po'ñoño'ta orrtatuan ora esocmañen ñeñt allpon pa'namen eñall tarro'mar ña po'ñoñpa' atarr huomenc. Ñeñtara ñeñt rromats attoch e'ñe e'shamperrey yo'chñar. Allempoña o' orrtatuan atto e'shamperrey yo'chñar allempoñapa' o' alla anorruerr Pompor Parets po'cohuenrot allña atarr partsotapretuerrana Pompor po'conañe e'ñe all pue'ntañe.

Ñeñt Yompor Puechemerpa' ña metana'tuene' allohuen mellaño'eññanesha' atto atarr sherben ña

⁴ Ñeñto'marña te'ña ñapa' atarr añcha'tarettena, ello metana'tuenan allohuen mellaño'eññanesha', tarro'mar ñapa' ñeñt otenet ñapa' e'ñe Parets Puechemer. Ñeñtña mellaño'eññanesha' ñetpa' ama atteye' otaretteneto. ⁵ Ña'ña ye'ñoteñ ñapa' ña e'ñe metana'tuenahuet tarro'mar mellaño'eññanesha' ama't puešeñarro'tetapa' ama otaneto ñeñt atet otan Puechemer, ñeñtpa' atet ot Puechemerecop:

Papa' p'a ñeñtep e'ñe Nechemerep, te'ñapa' o'ch e'ñe neñotach acheñenesha' po'ño'ch p'apa' e'ñe Nechemer nepenep.

Po'pocheñoñapa' atet oterrerr Puechemerecop:

Napa' na ñeñfen Pompor, ñapa' no Nechemer.

⁶ Po'pocheñoña allempo chapatan Puechemer po'moter ñeñt atarr nanac sherbets añe patsro atet eñora ñocop, ñeñtpa' atet ot:

Te'pa' concorpana'teñepa'ch allohuen nemñaño'eññaneshar.

⁷ Po'ñllaño'eññaneshar ñetpa' añecpa anarettenet ñetcha' sherbenet Yompor. Ñeñto'marña atet eñorena ñocpuet:

Ñerra'm erra nemñayenonet e'ñech poma'yorñecma erra senet e'ñe atet penet ñerra'm m'orr. Atarr cohuen sherbennet atet ñerra'mrate' tso' ñeñt atarr cohuen huoretyets.

⁸ Tarraña Puechemerecoppa' ama atteye' oteno. Ñocoppa' atet eñora:

Papa' atarr Partsop, ñeñtepcha' chocma añcha'tarettsa peconañe ñeñt errponañohuen. Ña'ña ñeñt atto p'a'mcha'tarettena p'apa' e'ñe pocte' es pepa'yenonet.

9 Ñaña ñeñt e'ñe pocte' nenten napa' ñeñtña atarr p̄ocshatene'. Ñaña ñeñt ama pocteye' nenteno napa', p̄apa'cho'ña ñeñt atarr petsena'ten. Ñeñto'mar napa' ñeñten Peyomporer pepenen, ahuo't atarr nanac nocshaterreḡ. Atto atarr p̄ocshena p̄apa' ello penñtana'tueñ allohuen po'potantañ ñeñt nesherba'yene' ñamet.

10 Yomporpa' alla eñorerrerr Puechemerecop, ñeñt̄pa' atet otererr: Parteseshacha' p̄a yeḡcatue' ahuaḡ pats, e'ñe echarr p̄orratue. Enetpa'cho'ña e'ñe pehuamencotecma peyeḡcatue.

11 Ñeñt e'ñe peyeḡcatuapa' ñeñt̄pa' huañerrcha' e'ñech chenca'huerra esempo, tarraña p̄apa' ama arromñañeshayaype ama't e'ñe erponaña. Allohuen ñeñt peyeḡcatua ñeñt̄pa' e'ñech mellasha'tua e'ñech atet pena ñerra'mrrate' shetamuets ñeñt atarr añllasha'tña.

12 Atetcha' peperr peyeḡcatar atet ñerra'mrrate' shetamtsoshe'm ñeñt o' mellasha't. O'ch a'metatse'chet o'ch huapore'chet allempo chorrenet po'poñ ñeñt atarr cohuen emarr. Tarraña p̄apa' atterap̄ach errponañohuen. Atto p̄ocrrena p̄apa' ama't ahuatapa' amach ahuañañat̄terro.

13 Po'pocheño Yomporpa' alla oterranerr Puechemer, ñeñt̄pa' atet och: Te'pa' o'ch alla p̄anorruerr arr necohuenroḡ allcha' pepartsotapretuer-rna. Esemphouañencha' allohuen ñeñt pe'moñe'tene' o'ch e'ñe na'mchechueranet atochña pomnaren peḡohueranet.

Tarraña mellañoḡeññanasha'ñapa' ama atteye' oche ñeñt atet otan Puechemer. (Ñeñto'mar yeñoteñ Yompor Puechemer ña atarr sherbets, ello metana'tuenan allohuen mellañoḡeññanasha'.) ¹⁴ Yeñoteñ allohuen mellañoḡeññanasha'pa' añecpa allsensarettenet atet ñerra'm Yompor Puecamquēñ, ñetcha' sherbenet Yompor. Attochña ñetcha' yenpuenet allohuen ñeñtcha' a'queshp̄ataretterrtsa.

2

Amach atta es yep̄chatsto esheccha' ya'queshp̄ataretterra

¹ Te'pa' atto o' yeñoterrñañ Yompor Puechemer atto atarr nanac partsoten ñeñto'marepa'chña te'pa' elloch yema'yoḡherra o'ch ye'mñoter e'ñe poctacma ñeñt atto o' ye'muerrñañ po'ñoñ. Ye'mñoterrepa'chña e'ñe cohuen te't acopoteñpa' ñato'rraña o'te' alla yepserrñañ ñeñt atet o' yeḡchaterrey Yompor Puechemer. ² Tarro'mar yeñoteñ Yomporpa' ama puenesho po'ñoñ ñeñt atto eñorana'tanet ahuaḡ. Tarro'mar allempo ñeñt ama e'mñotaye ñeñt atta atpare'te'pa' e'ñe tsa'tatuanete't allohuen ñeñt allpon e'ñe pocte' ent ña. Ama't añ ñoñets ñeñt orrtat po'mllañoḡeññrenasha' ḡocma tsa'tatuanete't ñerra'm esempo atpare'tenet ñeñt ñoñets. ³ Ñeñto'marña yapa' yeñoteñ ñerra'm ama ye'mñoterrñañe e'ñe ña Puechemer, yañapa' errotenotuachñaca'yeña yequeshp̄erate'ña ñerra'm atta ama es yep̄cheno; e'ñe atta eñalleñca'yeña atoch ya'queshp̄ataretterrañ e'ñe cohuen. Ñehua, ñenma'pa' Yepartseshar Jesúsña serrpare'tatahuet atoch ya'queshp̄ataretterra. Allempoña ñeñt e'muene' atet otanet Yepartseshar Jesús, ñetñapa' o' serrpare'tatyet yaña atoch yeñoch ñeñt e'ñe po'noḡh ña a'queshp̄atañtetsa. ⁴ Ñaña Pomporñapa' ñaña yeñotate' Puechemer po'ñoñ ñeñt atet oteneypa' e'ñe po'ñoḡh. Ñapa' orrtatyesanet po'partsoña ñaña po'huamenc ñeñt acheñenesha'pa' ama puentareto.

Ñaña ña Puecamquëñoŧpa' o' apa'yeseŧ e'ñe puesheña'ttsoy erroŧencha' muenateŧ ña ñeñŧcha' atet yetorra'yesa ñocop.

Atto Jesucristopa' e'ñe poctacma acheñetos arr patsro attoña e'ñe pa'mo'nasheñ pohuerrey

⁵ Te'pa' o'ch noterrserreŧ po'poñoneŧ añ patser ñeñŧcha' huerrtsa tsapaŧoneŧ. Ñeñŧpa' ama mellañoŧeñnesheŧe' noña Yompor ñeñŧcha' pomnaren perre'. Ñapa' aña na' acheñ ñeñŧpa' arromñaŧenesha'.
⁶ Tarro'mar atet anareŧ Yompor po'ñoñ ahuatoteñ allempo puesheñarrpa' atet otan Yompor:

Ama't acheñaya ama't mamesha ama esoyayye, tarraña pa Nomporepa' atarrepa't peyerpuenya. Ama't ya ñeñŧey arromñaŧena'taraya tarraña pa Nomporepa' atarrepa't pemuerenya.

⁷ Ñeñŧ arromñaŧenesha'pa' ama tama ahuamencateŧeyayeto atet atarr sherben mellañoŧeñnesheŧe'. Tarraña ñeñŧpa' mamecpa atet pemnach. Tarraña ama't atteñpa' elloña o'ch alla pecohuentater atet ñierra'mrrate' esempo o'ch net ñeñŧcha' añcha'tareŧterrtsa, allempopa' o'ch nachet po'choyo'm ñeñŧ atarr cohuen.

⁸ Ñeñŧpa' tarro'marña atet pene' arromñaŧena'tar allochñapa' attoch e'ñe pomnaren penan allohuen ñeñŧ allpon es peyeçhcatua. Arrpa' allohua atet oten ñoñets ñeñŧ ahuatoteñ anareŧ.

Ñehua, ñeñŧ ñoñets all oten arromñaŧena'tar ñeñŧcha' e'ñe pomnaren perre' allohuen, ñeñŧpa' añca'yeña oteney allohuenacop ñeñŧ errañaren eñall; amach eñalleña ama't e'ñe patra ñeñŧcha' ama pomnaren perreto. Tarraña ama't atet oteneñ ñeñŧpa' amaña yentera' allempoch pomnaren es perr arromñaŧena'tar, tarro'mar ama çhera' allempoch etsoterra ñeñŧecop anareŧ. ⁹ Tarraña e'ñe yeñoteñ puesheñarr ñeñŧ arromñaŧecoptartosta ñeñŧ atet poŧsa ñeñŧca'yeña Jesús. Allempo acheñetos arr patsro Pomporña muenate' amach tama ahuamencattoso atet atarr ahuamencattena mellañoŧeñnesheŧe'. Tarraña ñeñŧpa' mamecpa atet muenach attoch e'ñe arromñaŧecoptartosa arr patsro. Ñeñŧpa' añecopña atet pa attoch mueroçhtosa o'ch rromos allohuenacpay ñeñŧey arromñaŧenesha'. Yompor e'ñe puemuereñoŧey ya attoña muenatan Puechemer o'ch rroma yocop. Ñeñŧo'marña Pomporpa' o' alla atarr cohuentaterran Puechemer allempo o' alla ner ñeñŧcha' atarr añcha'tareŧterrtsa.

¹⁰ Ñehua, Yomporpa' yeçhcatan allohuen ñeñŧ eñalleteŧsa. Ñaña allohuenpa' tarro'mar yeçhcatue attoch cohuentateññañet ña. Ñaña ñapa' añ muenen shonte' ñeñŧcha' e'ñe puechemerasha' perr ñeñŧcha' cohuentapreterreraŧa ña. Yomporpa' e'ñe pocte' enteñ o'ch muenatan Puechemer attoch mueroçhtateñ acheñenesha'. Attochña e'ñe etsotatoñ Puechemer esheccha' a'qeshpaterran allohuen ñeñŧcha' puechemerasha' perr; attochña e'ñe ahuanerranet allcha' cohuentapreterreraŧa Pompor. ¹¹ Ñehua, Puechemer ñeñŧ Jesús, ñapa' a'cohuentatan acheñenesha' Partsocop, attoña e'ñe e'shampesuanet po'chñar. Te'ña ñeñŧey a'cohuentatuareŧey ñaña ñeñŧ ya'cohuentaterre' ñeñŧpa' ñeñŧña e'ñe ñeñŧena'tarecmay tarro'mar ñeñŧara Yompor yepen ñeñŧ Pompor pen ña. Ñeñŧo'marña Jesúsapa' ama puepençñoŧeye' pa'mo'nasheñ penye. ¹² Yeñoteñ ama penquënyo tarro'mar Yompor

po'ñoñ ñeñt̄ anaret ahuatoteñ ñeñt̄pa' atet oten ñerra'mrrate' Puechemer otets:

Napa' neserrpare'tachcha' nemo'nasheñnesha' atet e'ñe cohuenare' es peḡa'yen ḡa. E'ñe načhoteñoteḡ ḡapa' ḡhocmach na'ye'choḡtatonaḡ all apḡchena allohuen masheñneshaḡhno.

13 Yompor po'ñoñ ñeñt̄ aquellcareḡpa' atet oterrerr ñerra'mrrate' Cristo o' alla oterrerr:

Napa'ḡo'ña neyemteña Yompor.

Ñaña atet oterrerr Cristo:

Te'arro'tsenen epan Nompor puechemerasha' ñeñt̄ cohuanḡpsatenen ña.

14 Ñehua, allohuen ñeñt̄ e'ñe pa'mo'nasheñncmuet ḡannetsa, ñetpa' e'ñe ñeñtena'tarecmuet. Ñeñt̄o'marña Jesúsḡpa' e'ñe acheñetos attoch pa'mo'nasheñ ḡosey. E'ñe arromñaḡena'tartosa e'ñe atet ñerra'mrrate' ya. Ñapa' tarro'marña atet ḡosa allochñapa' attoch rromos. Tarro'mar allempo rromapa' attoña puerrataḡpesuan oneñet̄ po'huamenc atto atarr aḡcha'noḡtana'teney allempo yerromuen. 15 Ñeñt̄pa' Jesúsña a'huañaḡaḡpesuose' ñeñt̄ ama't cheshoteñ ḡhocmach yeḡcha'ten atto yerromuen, ñeñt̄pa' atarr aḡcha'noḡchen yenteñ. 16 Ñehua, yeñoteñ ama mellañoḡeññaneshaye' llequēnoña Jesús ñeñt̄cha' yenpos arr patsro. Yaña llecosa ñeñtey arromñaḡeneshay ñeñtey e'ñe po'ñoḡh po'mñrenñey pen Abraham; ñeñt̄o'marña ñapa' mueneñ o'ch yenposey. 17 Ñeñt̄o'marña ñocoppa' e'ñe poctoña o'ch acheñetos, o'ch e'ñe attetos ñerra'm ya ñeñtey pa'mo'nasheñnesha' pen. Allochñapa' e'ñe puellcapreteñoḡey ya ñeñtey e'ñe pamo'ts penpa' e'ñech cohuen a'pocḡaterrey Partsesho. Attoña ñapa' ḡhocma e'ñe cohuen sherbenan Pompor atet ñerra'mrrate' ñeñt̄ corne-shatyets Partsocop. Ñapa' e'ñe po'ñoḡh Pa'mḡcha'taretey peñ allohuen ñeñt̄ cornaneshatyets Partsocop. Ñeñt̄o'marña ñapa' e'ñe ña tsa'tuerraya allohueney acheñeneshay yo'chñar allempo ashatareḡta e'ñe ña po'rras. Attoña e'ñe a'pocḡaterrnay yo'chñar Yomporesho. 18 Ñapa' atarr mue-roḡtosa allempo huapoñe't̄ topateñets; ñeñt̄pa' attoch a'ypo'ñereñ Pompor. Ñeñt̄o'marña te'pa' e'ñe puellcapreteñoḡey ya ñapa' e'ñe eñoteñ o'ch yenpa'y attoch ahuamencat̄ ḡonay yeyoḡcher allochñapa' amach alla a'puerrataterreye topateñets ñeñt̄cha' allpon yehuapoya yaña.

3

Jesús ñeñt̄ Yompor Puechemer ña metanene' ama't Moisés atto atarr sherben ña

1-2 Ñehua, masheñneshacha' ñaña noḡchaneshacha' sapa' ñeñtes o' sa'cohuentataretterra Partsocop ñeñtes o' ḡhore'terres Yompor o'ch ḡhapaterres all pue'ntaño. Te'pa' o'ch notas, o'ch soḡtape'ch e'ñe cohuen ñeñt̄ atet perrnay Cristo Jesús ñeñt̄ yame'ñerra. Ñapa' atto allsen-sareḡtapa' e'ñe cohuen etsotuan ñeñt̄ atet llesense' Pompor. Ñaña ñapa' ña Yecorneshar yepen ñeñt̄ atarr sherbets Partsocop allohuenacpay ñeñtey ame'ñenaya Yompor. Ñapa' e'ñe attecma cohuen etsotuan ora allpon ñeñt̄ atet muenach Pompor acheñeneshacop atet pe't̄ ñaña Moisés ñapa'ḡo'ña e'ñe etsotan ñeñt̄ atet och Yompor allohuen pueyochreneshacop. Ñehua, allohuen ñeñt̄ pueyochrenesha' pen Yomporpa' ñetpa' pa'paquell penanet Yompor. 3 Ñehua, yeñoteñ

ñerra'm eñall puepahuarr pocoll ñeñt̄ tomatenet e'ñe cohuen añcha'ña atarr cohuen yenten ñeñt̄ tomatene'. Amachña aña cohuen yenteno pocoll tarro'mar pocollpa' ama ñoñaye' cohuenteno; eñallca'yeña pamo'mte' ñeñt̄ a'cohuentatene'. Attecmach yeñch ñaña Jesús atarr cohuen tarro'mar ñapa' atto ame'ñatana shonte' ñeñt̄cha' pueyochrenesha' pa' Pompór atfoña tomatosan ñaña pocoll ñeñt̄ atarr cohuen ñeñt̄cha' pa'paquél pen Pompór. Moiséspa' amachña ñañeña atarr cohuen yenteno tarro'mar ñapa' ama ñaye' tomataye ñeñt̄cha' pa'paquél perr Yompór. ⁴ Ñehua, yeñoteñ allohuen pocollpa' ama ñoñaye' yeçhquëno; çhocmaca'yeña eñall ñeñt̄ yeçhcatene'. Ñeñt̄ yeçhcate' esocmañen ñeñt̄ eñalleyetsa ñeñt̄pa' Yompórña yeçhcatuahue'. ⁵ Añña Moiséspa' e'ñe cohuen etsotan ñeñt̄ atet yeçhya Yompór; ñeñt̄pa' o'ch es eñotatyesan acheñenesha' tarraña ñeñt̄pa' toma'nteñtsa. Tsapatoneña Yompórpa' o'ch eñotaterranet ñeñt̄ e'ñe eñotoçhen. Ama't e'ñe cohuen etsotenaneñ Moisés allohuenacop ñeñt̄ pa'paquél pen Yompór allempo, tarraña ñeñt̄ atto sherbenan Yompór pa'pacillopa' ñapa' atfa pueñañra peñ Yompór. Amaña Puechemereye'ña peñe. ⁶ Ñapa' aña'yeña Puechemer pen Cristo ñeñt̄cha' sherberrets tsapatonet allohuenacop ñeñt̄cha' e'ñe pa'paquél perr Pompór. Ñapa' e'ñe cohuen etsoterran ñeñt̄ e'ñe Pomporecop. Allohueneypa' e'ñe pa'paquél ðohueney Yompór allcha' yeçhena ña ñerra'm allo'nach huomenc yeyemuetneña attoçhña e'ñe yocsheñeshocma yecua'huanom ñeñt̄ o'patatenya.

Yompórpa' e'ñech cohuen amesaterran pueyochreshaçhno ñeñt̄cha' e'ñe cohuen ame'ñerraya attoçh e'ñe cohuen cosherret

⁷ Ñeñt̄o'marña Parets Puecamquëño'tpa' atet oten all aquellcaret Yompór po'ñoño ñeñt̄pa' atet oten:

Ñerra'm se'mueñ Yompór atto çhore'tenes te',

⁸ sañapa' çhochña se'mñoçh, amachña çha se'charrtatatsto seyoçher. Amach çha sañpare'tatsche atet pe't israelnesha' ahua't allempo chopeñe'çyesete't amayo. Allñapa' epaye' atsrre'moçhtana'tyesnete't.

⁹ All amayo satañneshaññapa' atarr topatnete't atto'ch eñotnet po'ñoçho'te' atsa'tatañen. Ñetpa' atet pa'yesnete't ama't çhocma entyesonete't ñeñt̄ norrtatyesanete't. Pa'tatsoçh çharra' charohua entyesonete't ñeñt̄ çhocma negatyesanete't.

¹⁰ Ñeñt̄o'marña napa' atsrre'moçhen nentyesanet, napa' atet not: “Ñeñt̄ atet cotape'chenet pueyoçhro ñeñt̄ ama cohuenayaye ñetpa' atarr panteñet nocop. Ama añeye' mueneneto o'ch cotape'chet ñeñt̄ cohuen nenten na.”

¹¹ Atarr atsrre'moçhen nentanete't. Ñeñt̄o'marña atet not ñocpuet: “Ñetña po'ñoçh ama't ahua'tapa' amach neçhapaterraneto allcha' pocsheñesho'tpa' o'te' amesapreterrnetañ.” Ñeñt̄o'marña ñocpuetpa' atet nena' neñoñ e'ñe na neso'chño.

¹² Ñeñt̄o'marña masheñeshacha' ñaña noçhaneshacha' te'pa' o'ch notas saña, e'ñech señoa seyoçhro atet soçtape'çhyen e'ñe puesheña'ttsos, ñato'pa' amate' cohuenaye' soçtape'çheno, ñato'pa' amate' po'ñoçhaye' same'ñeñoña Yompór. Ñerra'm po'ñoçh atet sepenapa' ñeñt̄pa' ñeñt̄fach sequeçhpaterre' Yompór ama't ñeñt̄

Yomporer ñeñt ama arromñaeshayaye. ¹³ Sapa' e'ñepa'chña cohuen soctape'chatanna'tnoma pate'tets yet tayepa'tñapa' orameñ yet allempoteñ o' chore'terrey Yompor. Attochña so'chñarpa' amach errotenot alla shequërrserro. Attoch amach cha se'charrteno seyochro allochñapa' amach alla satpare'tere Yompor, ama't e'ñe puešheñarrotesa. ¹⁴ Allo'nepa'chña e'ñe huomenc ye'pa'nom yeyocher. E'ñepa'chña yeyochrocmañen yeyemteña Cristo atet ye'pa' allempo e'ñe errtey ame'ñenaya. Ñerra'm atetcha' yeyemuetnomña allempopa' yagapapretercha' Cristo ñeñt o'patateña Pompor.

¹⁵ Ñeñto'marña o'ch alla neyerpaterrser ñeñt atet oten Yompor po'ñoñ ñeñt aquellcaret ahuatoteñ, ñeñtpa' atet oteney:

Ñerra'm se'mueñ Yompor atto chore'tenes te' sañapa' chochña se'mñocho, amachña cha se'charrtatsto seyocher. Amach cha satpare'tatsche ñeñt atet pe't israelnesha' ahuat allempo chopeñe'chyesete't amayo.

¹⁶ Ñaña te'pa' o'ch neyerpaterrser ñeñt atpare'tyesaye't Yompor allempo puechore'teño'pa' eñorana'tanete't, ñetpa' ñeñtareta ñeñtet cha'nmacha'taterr Moisés Egipto. ¹⁷ Ñaña o'ch neyerpaterrser, ñeñt atarr atsrre'mochen entyese't Yompor ahuat ama't pa'tatsoch charra' charohua, ñetpa' ñeñtareta ñeñtet atarr ochña'tare'tatsete't. Ñeñto'marña ñet allempopa' e'ñe alla colla'huet amayo. ¹⁸ Ñaña o'ch neyerpaterrser, ñeñt otarettatsa allempo ñetpa' ama't ahuatapa' amach amnataretterreto attoch pocsheñesho'tetpa' o'te' amesapreteretañ Yompor, ñeñtpa' ñeñtara ñeñtet atarr atparña'tatsete't. Ñeñt atet otarettete't allempo, Yomporña nahuet po'ñoñ e'ñe ña pa'so'chño, tarro'mar ñapa' ama puenesho po'ñoñ. ¹⁹ Attoña yeñotenanet ñetpa' ama't puešheñarrofetapa' amach eshcaye' chapueto allcha' ye'cha'huerretañ e'ñe cohuen pueñmañesha' tarro'mar ñetpa' ama eseshaye' cohuen ame'ñayo Yompor.

4

¹ Ñehua, Yomporpa' po'ño'ch oteney ye'chapcha' allcha' yamesapretera allcha' e'ñe cohuen yocsha'huera Yompor ñerra'm po'ño'chcha' yame'ñera yaña. Tayepa'tñapa' orameñ atet oteney yaña e'ñe yem'cha'naño'pa' yame'ñyepa'ch te't puešheña'ttotespa' amate' se'cherro saña all. ² Tarro'mar ñeñt atpare'taye't all amayopa' aserrpare'tatarettetañña cohuen ñoñets Yomporeshot tarraña ama huenetoña patparñet tarro'mar ama't e'metaña'pa' ama eseshaye' ame'ña'pahuoye' entaye. Yapa'cho'ña o' serrpare'taterryet yaña cohuen ñoñets Yomporeshot. ³ Ñeñteycha' e'ñe po'ño'ch ama'ñerraya Yompor ñeñteycha'ña cherrets allcha' yamesapretera allcha' e'ñe cohuen yocsha'huera Yompor. Ñeñña ama ame'ñetsopa' ñetpa' amach esesha' chertso allcha' coshapreteret Yompor. Ñeñtpa' e'ñe attecma ñeñt atet otare'tta ahuat ñeñt ama ame'ñatso. E'ñe atet oteney Yompor po'ñoñ all aquellcaret, ñeñtpa' atet oten Yompor:

Atarr atsrre'mochen nentanete't ñeñto'marña atet nena' neñoñ ñocpuet:
 “Ñet po'ño'ch ama't ahuatapa' amach ne'chapatterraneto allcha' amesapreterrnet allcha' e'ñe cohuen cosha'huerrnetañ.”

Attoña ñetpa' amach eseshaye' çhertso allcha' e'ñe cohuen coshapreteret Yompor. Ñehua, ahuat Yomporpa' ña orrtate' ameseñets e'ñe allempoteñ yeçcatuahuan pats ñaña enet. Ñeñña ameseñetspa' atarr coshateney yeyoçhrocmañen. ⁴Tarro'mar all po'ñoño yeñoteñ atet aquellcaret, ñeñtpa' atet oten:

O' yeçcatuan Yompor allohuen ñeñt allpon yeçcatyesua, po'cançherrmatñoñapa' o' ames Yompor.

⁵Tarraña po'pocheño all oterrerr Yompor po'ñoñ ñeñt aquellcaret, ñeñtpa' atet oten:

Ñeñt ama ñenayopa' amach eseshaye' çhertso allcha' amesapreterrnet attoch e'ñe cohuen coshapreterrnet.

⁶Ñeñto'mar yeñoteñ ñeñt e'mayeñ ahuat cohuen ñoñets ñetpa' amach eseshaye' çhertso allcha' amesaterranet Yompor attoch e'ñe cohuen pueyoçhrohuen cosherret tarro'mar ñetpa' ama eseshaye' ame'ña'pahuoye' entaye Yompor. Tarraña ama't atteñpa' yeñoteñ Yomporpa' ama puenesho po'ñoñ. Ñeñto'marña te'pa' yeñoteñ Yomporpa' atterach e'ñe cohuen amesaterran ama't erra'tsena ñeñtcha' po'ñoçh ame'ña'po' enterre', attochña ñetpa' çherretcha' allcha' e'ñe cohuen cosherret. ⁷Ñehua, ñeñto'marña Yomporpa' onañcherran po'poñ po'yeter, ñeñtpa' o' çherr te' esheccha' ama't patantarra acheñpa' o'ch ame'ñeñet. Ñeñto'marña yeñoteñ Yomporpa' ora attera cohueney tarro'mar ama't metuen aton char allempoteñ atpare'chete't all amayopa' o' çhap allempo atto eñosatan David. Ñeñtpa' ñeñfara ñeñt o' notuanmas:

Ñerra'm esempoch se'mueñ Yompor atto çhore'tenes sañapa' çhochña se'mñoçh tayepa'tña orameñ yet allempo o' çhore'terres Yompor, amachña çha se'charrtatatsto seyocher.

⁸Ñehua, yeñoteñ Josué ahuatpa' e'ñe çhapatan israelnesha' puechemereshachno all patso ñeñt all sechete't ahuatoteñ allcha' yeçhomet. Tarraña ama't çhapatanetañ allpa' ama eseshaye' pocsheñesho' pueyoçhrohuen amesostsoña all. Ñerra'm e'ñech cohuen amesaterranetañ Josuépa' amach onañcherranñerroña Yompor po'poñ po'yeter attoch coshaterrey e'ñe cohuen yeyoçhrohuen.

⁹Ñeñto'marña yeñoteñ te'pa' eñallmeñ ñeñt o'patatenya Yompor ñeñfey pueyochresha' pen allcha' e'ñe yocsheñeshocmañen yamesuerr. Ñeñtpa' e'ñe atet ñerra'mrrate' allempo ames Yompor ahuat po'cançherrmatño.

¹⁰Tarro'mar allohuen erra'tsencha' çherrets allcha' amesaterranet Yomporpa' ñetñapa' amach alla es llecaterrahuete'te; e'ñe pameseñotet cohuenpa' e'ñech eñmattered pueyoçhrohuenet atet ñerra'mrrate' allempo e'nuan e'ñe poctacma Yompor po'taruas, e'ñe pocsheñeshocma ames. ¹¹Yapa'çho'ña añepa'chña ye'nen attoch yeçherr yaña allcha' amesaterrey Yompor attochña e'ñe yocsberra yeyoçhro. Te'ñapa' ama't pueñeñarrofeyapa' amuepa'ch alla yatpare'terre'te te't ama yeçherro yaña all.

¹²Yompor erro't oteney, po'ñoñpa' atarr ahuañencat ñeñtpa' ama ahuañañate. Ñeñt po'ñoñpa' e'ñe atet etsotenan ñeñt atet muenen ña. Po'ñoñpa' allo çhocma ñerra'mrrate' cochell ñeñt atarr etsotañtare't emoto'mar. O'ch es yepata' allopa' e'ñech be'tosua ora, e'ñech pecha'tañpesuoñ ama't posapohuen. Atetca'ye penaña Yompor

po'ñoñ e'ñech çhaponaya e'ñe yeyoçhro ama't e'ñe yecamquëñoñhuen, ñeñtcha'ña e'ñe yeñotaterre' ñeñt yeyoçhro'tsen ama't ñeñt allpon yoctape'chyen ora esocmañen. ¹³ Ama't puesheñarro'teya amach errotent' ye'potam'pesyoña Yompor ñeñt yeyeçhcate'. Amate' errotent' ya'nasotam'pesyoña, ñapa' e'ñeca'ye entuennayña yeyoçher ñeñt ora allpon es yoctape'chyen. Ñapa' ñach ya'metatatuerre' allohuen ñeñt allpon yoctape'chyen.

Jesúspa' ña corneshaterrets, e'ñe metana'tuerran allohuen cornaneshachno atto atarr sherben ña

¹⁴ Ñehua, yeñoteñ eñall ñeñt Yecorneshar yepen ñeñt atarr Parteshatets, ñeñtpa' ñeñtara Jesús ñeñt Yompor Puechemer. Ñaña'pa' o' alla çherr allohuanen pue'ntaño e'ñe all Pomporesho, allña e'ñe cohuen a'pocstatennay yocop. Ñeñto'marña yapa'cho'ña allo'nepa'ch yeyemuetneña. Amuepa'chña yequeçhpatstere. ¹⁵ Tarro'mar Jesús ñeñt Yecorneshar yepen ñapa' e'ñe eñoteñ attoch e'ñe cohuen llecapretenya allempo ama e'ñeye' huomencaye'yenteno yeyoçhro. Tarro'mar ñapa'cho'ña attecma huapoñe't allohuen pa'namen topateñets, e'ñe atet yepena ya te' çhocma huennaya pa'namen topateñets. Tarraña ñapa' ama't pa'namen huapoye't topateñets, ñapa' ama't parrocha ama ñano ñeñt ama poc'teye' enteno Pompor. ¹⁶ Ñeñto'marepa'chña e'ñe yeyemteño' Yompor Puechemer, amach yem'cha'nañote'ye' yeçhore'teñe Yompor ama't ñeñt atarr partotets po'conaño. E'ñe pue'muereño'fey e'ñech cohuen e'mñotene'y, çhocmach yenpueney. Ñaña ñerra'm esempo huennaya ñeñtcha' yelcatene' ñachña e'ñe ahuamencat yepene'.

5

¹ Ñehua, yeñoteñ allohuen ama't erra'tsena ñeñt pa'm'cha'tareter pen ñeñt corneshatyets judioneshacop, ñeñtpa' acheña, arromña'ña. Ñapa' añecop acrare'tta ñach anare'ttatsa attoch eñen acheñeneshacop Yompore'sho. Allempo es apueñet Yomporpa' ñach anene' o'pono Yompor pa'paclo. Allempo muetsenet payara ñeñt allo sherbeñet Yomporpa' ñach nene' eyarra po'r'ras allo tsa'tenana pueyochreshachno po'chñar. ²⁻³ Ñapa'cho'ña ama huomencaye' enteno pueyoçhro tarro'mar ñapa' arromña'ña ñeñto'marña ama e'ñe pueyochreshacpayaya nenanoña eyarra po'r'ras; ñeñtpa' ñocpa'naña neñ allo tsa'tenana ñaña po'chñar Yompore'sho. Atto ñapa'cho'ña ama huomencaye' enteno pueyoçhro ñeñto'marña ñapa' e'ñe eñoteñ o'ch llecapretana pueyochresha' allempo es pantenet ñet ñaña allempo yeçhcatenet ñeñt sosey enten Yompor tarro'mar amaña e'ñe ñeña neneto pueyoçhreto; çhocmaña pueseñet Yompor.

⁴ Ñaña yeñoteñ ama't e'ñe puesheñarrapa' ama eseshaye' netso e'ñe ñañeña attoch corneshat Partsocop. Ñeñtpa' Yomporña çhore'tene' ama't erra'tsena puesheñarr ñeñtcha'ña corneshatats. Atet pa' ñaña Aarón, ñapa' Yomporña ne' atto corneshate't Partsocop. ⁵ Cristopa'cho'ña attecma pa' ñaña ama ñaye' atatso, "ñapa' nach corneshatats." Pomporña ne' ñeñtcha' corneshatats attoch yecohuentateññañ. Yeñoteñ Pomporpa' atet cohuentateñ tarro'mar Yompor po'ñoñ ñeñt aquellcare't ahuat ñeñtpa' atet oten:

Papa' Nechemereḡ, te'ñapa' o'ch neñotach acheñenesha' po'ñočh papa' Nechemer nepeneḡ tarro'mar te'pa' o'ch nenaḡ p'ach am'icha'tare'ttertsa.

⁶ Po'poñ aquellcare'topa' all otererr:

Papa' attoch pecorneshaterrpa' ñeñ'tpa' amach huañerro ama't e'ñe erponaña. E'ñe atet o' p'a'llsensare'tterra atet ñerra'm Melquisedec ñeñ't corneshatatse't ahuat.

⁷ Allempo allo'tsenmeñ Cristo arr patsropa' ma'yocham'psa ñañaña. Ma'yocham'psa e'ñe huomenc puellquēñesha'. Pueya'chpeñesha' enaman Pompor ñeñ't atarr ahuamencatesha' attoch a'queshpach puerromueñoť. E'ñe pom'icha'na'teñoťan Pomporpa' atet och: "Amach añeye' atet peḡatstono ñeñ't nemnen na; añcha'ña atet peḡon ñeñ't pemnen p'a." Ñeñ'to'marña Pomporpa' e'ñe e'mñoch. ⁸ Ñehua, Cristo ama't e'ñe Yompor Puechemerpa' ñapa'cho'ña atarr muerdohta, attoña e'ñe yečhan attoch e'ñe cohuen e'mñotenan Pompor. ⁹ Atto yečhan pue'mñoteña' ñeñ'to'marña e'ñe etsotan ora attoch a'queshpataña, allochña'pa' attoch a'queshpatteran e'ñe poctacma allohuen erra'tsencha' e'mñoterre' ña. ¹⁰ Ñeñ'to'marña Pomporpa' ne' ñach corneshaterrets Partsocop e'ñe atet corneshate't ahuat Melquisedec.

Ñeñ't ama huomencaye' penaye pueyočher Yomporecop čha ottena ñerra'm ematoll

¹¹ Ñeñ'tpa' orameñ shontemeñ nemneñeñ o'ch notaseñ. Tarraña ama'tcha' notaseña' atarr torrapo' o'ch nečhapatonas seyočhro tarro'mar te'pa' o'huañ tama semne' ama't erra'tsenapa' o'ch se'mñoteñ. ¹² Sapa' ahuatoteñ same'ñenañ ñeñ'to'marña te'pa' socoppa' añ poctetsañ o'ch seyčhatyeseñ po'potantañečhno ñeñ't allpon shonte' señoťyeneñ. Tarraña sañapa' amaña atteye'ña sepeno tarro'mar sapa' teme'ttsen sepalltena o'ch alla yečhaterrseterr Yompor po'ñoñ ñeñ't yečhatuaset e'ñe ñenmať ama't ñeñ'tpa' ama torrapahuoyaye yocop o'ch yeñočh. Sapa' ama huomencaye' sepeno seyočher tarro'mar sapa' čha sottena ñerra'mrrate' ematoll ñeñ't añach orren pachor pomosos ñeñ't ama etsotenana' o'ch rran rreñets ñeñ't yerren ya. ¹³⁻¹⁴ Ñaña yeñoteñ allohuen ñeñ't añach pocrram' pen pomosos, ñeñ'tpa' ematolla ama eñotenana' o'ch e'nan rreñets ñeñ't čhocma yerren. Ñaña ñeñ't ottetsa ñerra'mrrate' ematollpa' ama eñotenanoña Yompor po'ñoñ attoch pocte' eñčh Yompor. Tarraña ñeñ't po'ñočh atet enten Yompor ñerra'mrrate' po'ñanesha' ñetpa' e'ñečh eñotenet ñeñ't pocte' enten Pomporet ñaña ñeñ't ama pocteye' enteno; tarro'mar ñetpa' ahuatoteñ ame'ñeret Pomporet. Ñeñ'to'marña ñetpa' allo'na senet etsotnomuet Yompor po'ñoñ ama't ñeñ't atarr echarr ñeñ'tña e'ñe pocrram' penet.

6

¹⁻³ Allo'nepa'ch yesen e'ñe yečha'nmue' Yompor poctapña ama't ñeñ't atarr echarr. Allochña'pa' yepeñoť atet muenen ñapa' e'ñečh po'n enteneyña Yompor. Ñehua, sapa' o' e'ñe seyčherr ñeñ't ñenmať yečhataset Cristocop, attoch sequečhpa'huerrña ñeñ't atet seyečcatyeseñ ñeñ't ama a'queshpatañeyaye. Añca'yeña o' ello soctape'cherr cohuen Yomporecop čhoca'yeña o' same'ñera. O' señoťerr ñaña ñeñ't atet yapatare'ttena Yomporecop, ñaña atto čhocma yenen yot ñesheto ñeñ't ame'ñatsa. Ñaña

o' sa'yčhatare'tterra attoch yetanterra ñaña attoch esempohuañenpa' ya'cra're'tterrach allohueny errotencha' entyesuerrey Yompor; ñato' cohuenete' ye'pa'yen, ñato' amate' cohuenaye' yepeno. Ñeñt' o' ye'chaturanmaset ahuaño'feñ Cristocoppa' amachña ñeññaña alla seserpare'tame'te'te. Añcha'ña allo'nepa'chña yesen eñotnomue' po'poñe'chno Yompor poctap'ña ñerra'm Yomporcha' yemnate'.

⁴⁻⁶ Tarro'mar yeñoteñ ñerra'm esesha' o' çhapoña pueyo'chro ñeñt' cohuen enten Yompor ñaña ñerra'm o' agapan Yompor ñeñt' apueney attochña yapa' corretsayach tayoteñ errponohuañen pue'ntaño, ñaña ñerra'm o' agapan Yompor Puecamquëñ ñaña ñerra'm çho yomenana Yompor po'ñoñ ñaña ñerra'm eñotuanman Yompor po'huamenc ñeñt' ama ahuañañateyaye, tarraña ñerra'm o'ch alla puerrrerret, ñetpa' amach errotenot alla yoctape'chaterranete'te attoch cotape'cherret etserra cohuen Yomporecop. Tarro'mar ñeñt' acheñerpa' añ toma'ntena ñeñt' atarr muenene' o'ch alla corso'tam'perranerr po'pocheño Yompor Puechemer; attoña o' alla achm'are'tererr allo'tsa'yen shonte' acheñenesha'. ⁷ Ñeñt' atet petsapa' o'ch netma'ntacha ñeñt' atet pena pats. Ñehua, allempo e'ñe cohuen huapotam'psatenan Yompor pats ñerra'm o'ch chepares pa'namen narmetso'chno ñeñt'cha' coshatene' pamo'mte' ñeñt' nare'tene', Yomporña çhocma a'torene' ñeñt' pats esheccha' pa'namen ye'chquëtsa all. ⁸ Tarraña ñerra'm añña cheparsats pa'namen aja'chno ñeñt' ama cohuenayaye, ñeñt'ña patspa' amach es sherbeno. Yomporeshotpa' arnomare'tterrach attoch a'poyare'tterra.

Atto e'ñe yeyemteñot Yompor çhocmach yecuen ñeñt' o'patatyenya

⁹ Tarraña ama't atet notensoñ masheñneshacha' sa ñeñtes atarr nemor-rentena, napa' necuenes ñaña neñotenes sapa' o'ch alla sorrtatyerr e'ñe cohuenare' ñeñt' atet orrtatyen allohuen ñeñt'cha' qeshperrtsa. ¹⁰ Tarro'mar Yomporpa' e'ñe pocte' es pennay. Ñapa' çhocma po'ño'ch entenes ñeñt' atet setorra'yena ñocop ñaña atto semorrenteññaña allohuen ñeñt' pueyochresha' pen Parets. Ñeñto'marña e'ñe same'ñeñot ñapa' e'ñe cohuen seyempa'yen allohuen masheñsha'chno ñeñt' pueyochresha' pen ña, ama't teme'ttsen attecma sepena. ¹¹ Añña atarr nemnen ama't allohuenespa' allo'nepa'chña sesen orrtatyesnomue' ñeñt' cohuen enten Yompor, e'ñe'chña socsheñeshocmañen sorrtatyesuanom allohuen ñeñt' cohuen enten Yompor e'ñe atet socsheñot çhocma seyempa'yen ñeñt' pueyochresha' pen Parets. Attoña e'ñe seyemteñot Yompor secuen ñeñt' o'patatyenya. ¹² Attochña amach çha seçllatsto Yomporecop, añcha'ña sepena saña ñeñt' atet pa'yena po'potantañe'chno ñeñt' pame'ñeñotet Yomporpa' ama't erro'tuaneno'tsa'yenet ñetpa' çhocma ahuanta'huanefet. Attochña e'ñe o'patueññañet Yompor ñeñt' otene'y Yompor ñeñt'cha' apuerrey.

¹³ Tarro'mar yapa' yeñoteñ çhocmach apuerrey ñeñt' atet otene'y. Ñehua, yeñoteñ Yompor ahuatpa' atet otane't Abraham ñeñt'cha' atet perrñañ tsapatone't po'm'renñecop. E'ñe ñañeña pa'so'chño atet otan Abraham tarro'mar ama eñalle po'poñ ñeñt' atarr ahuamencatesha' atet ñerra'm ña allcha' a'poc'tatan po'ñoñ. ¹⁴ Ñeñto'mar e'ñe ña pa'so'chño atet otan Abraham: "Na po'ño'chpa' atarrcha' nebensare'tam'psap attochña na'm'raterrna'p ñeñt'cha' pen'reneñ peperr." ¹⁵ Ñeñto'marña

Abrahampa' e'ñe pueyemteñoť Yompor po'ñoñ atet oteñ ñapa' ama quechpueñe, chocma cohuenan ñeñť atet oteñ Yompor. Ñeñťo'marña Abrahampa' po'ñočh agapater Yompor ñeñť atet ochet' ahuatoteñ. 16 Ñehua, yapa' yeñoteñ acheñ arr patsro ñerra'm es muenenet o'ch es otenet e'ñe po'ñočh, ñetpa' o'ch otenet e'ñe añ pa'so'chño ñeñť atarr ahuamencatesha'. Ñerra'm atet penetpa' atfoña eñoteñet ñeñť ñoñetspa' o' anaretta, o'huañcha' allo'na otnare'tanna'tnenet po'ñoñomaret. 17 Yomporpa'cho'ña e'ñe attecma nan po'ñoñ e'ñe ña pa'so'chño tarro'mar ñapa' mueneñ o'ch eñotateney amachña a'po'poñetañperryeña po'ñoñ, allohueneñ ñeñfey o'patatena ñeñť atet oteney o'ch apuerrey. 18 Ñeñťo'mar yeñoteñ Yomporpa' e'ñe epoch eñotateney e'ñe po'ñočh atetcha' permay, ñaña Yompor po'ñoñpa' ama choye' shequēnye. Ñeñťo'marña e'ñe yeyemteñoť ñapa' yeñoteñ po'ñočhpa' a'queshpaturreycha' ñeñť atet oteney. Ñeñťo'marña yecueñ ama't allohueneñ ñeñfey e'nene' ña ñachña ya'queshpaturre'. 19 Ñeñťo'marña yeñoteñ ñeñť yecuen ya o'ch a'queshpaturrey Yompor ñeñťpa' e'ñe po'ñočh, ñeñť ama ahuañañayaye. Ñeñťo'marña yeñoteñ e'ñe yeyemteñoť ña yecamquēñña' e'ñe cohueno'tsen amach errotent' chenquērro. Yeyemteñoť Yompor ñeñťpa' añ toma'ntena ñeñť orrene' barco oño ñeñť otenet ancla. Allochña barcopa' amach errotent' chenco. Ñeñť atto yeyemteña Yompor ñeñťña anclatetsña yecamquēñecop ñaña ñeñťpa' e'ñe po'ñočh allo e'ñe huomenc orrena yecamquēñ tarro'mar ñeñťpa' Yomporeshoť anaret e'ñe allohuanen ñeñť allo'tsen Parets pa'paclo pue'ntaño, e'ñe allohuanen allo'tsen besom allo yottañpeññañet Parets po'poner. Allca'yeña anarettenaña ñeñť toma'ntenaya ancla atto ya yeyemteña Yompor. 20 Tarro'mar e'ñe all Parteshopa' allña o' cherrña Jesús ñeñť o' otamñperrya allcha' a'pocatosnay e'ñe cohuen yocop Pomporesho. Allña'pa' o' corneshatuerr Partesho. Atto o' corneshatuerr ñeñťpa' amach huañerro ama't errponaña. E'ñe atet o' allsensaretterra o'ch corneshatuerr ñerra'mrate' atet corneshate't ahuat Melquisedec.

7

Jesús'pa' atarr cohuen corneshatos Partsocop atet corneshate't ñaña Melquisedec Partsocop ahuat

1 Ñehua, te'pa' o'ch alla neyerpaterrsa ñeñť atet pe't ñeñť corneshatate't ahuat ñeñťpa' añ pa'so'cheñ Melquisedec. Ñapa' ñeñť corneshatate't Partsocop ñeñť atarr partotets. Ñaña ñapa' ñeñť amcha'tarettate't all anetso ñeñť pa'so'cheñ Salem. Allempopa' correna ñaña yatañ Abraham. Parrochña Abrahampa' ahuo' allcha' quellarenana' po'potantañečno ñeñť amcha'taretetyetsa allo'mar. E'ñe a'mchechuahuaneta'pa' huerra. Allempo err, toñopa' all poctapueñ cornesha' Melquisedec. Allña poctetpa' allenta bensare'tamñsapuena Abraham. 2 Ora ñeñť allpon yoramñsan ñeñť o' quellara'huena'pa' allempoña Abrahampa' aphuanen cornesha' Melquisedec allpon ñeñť Partsocop. Allpon aphueña' ñeñťpa' ñeñť allpon otenet la décima parte. Ñeñťpa' atet ñerra'm es eñall ñeñť yechen charrapa'tsocma, pate'tetsña'pa' o'ch yeneñ e'ñe Partsocop. Ñehua, ñeñť so'chñetser

Melquisedecpa' añ otenet "ñeñt pompor pen allohuen añcha'taretečno ñeñt e'ñe pocte' enten Parets." Allotpa' ñaña ñapa' arr añcha'tarettena anetso añ pa'so'cheñ Salem. Ñeñt anetser pa'so'cheñ añ otenet "muechetteñtsonpaño" tarro'mar all añcha'tarettena ñapa' ña orratene' e'ñe cohuen morrentanna'teñets attoña yechenet e'ñe cohuen muechet. ³ Ñeñt Melquisedecpa' ama eñotpahuoyayeña ñeñt pompor pe't ñaña ñeñt pachor pe't tarro'mar ama aquellcareteyaye ñeñt pa'so'cheñ. Ñaña ñeñt pa'tañeshañ pe't ñeñtpa'cho'ña ama eñotpahuoyaye. Ama't ñaña allempoteñ eñalleta Melquisedec ama't ñaña allempo rroma ñeñtpa'cho'ña ama eñotpahuoyaye. Ñapa' tarro'mar atet pe't añ toma'tena ñeñt Puechemer pen Parets. Ñeñto'marña atto corneshaten ñeñtpa' amach huañerro ama't errponaña.

⁴ Señochepa'ch cornesha' Melquisedec ñapa' atarr sherben. Ama't yatañ Abrahampa' chocma es apañet Melquisedec atet ñerra'mrrate' ñeñt es yenen ñeñt Partsocop. Añ aphueñ ñeñt allpon yorampsan ñeñt o' quellara'huenta'. Allpon aphueñ ñeñt atet ñerra'm cho es yenen Partsocop ñeñtpa' atet ñerra'mrrate' ñeñt allpon es yechyen e'ñe çharrapa'ttsocma, pate'tetsñapa' o'ch yeneñ e'ñe Partsocop. ⁵ Ñehua, yeñoteñ levína'tarnesha'pa' ñeñtēna'tarña anarettatset' judioneshacop ñeñtcha' corneshatets Partsocop. Ñocpuetña nanña Moisés po'ñoñ, ñeñtña ñoñetspa' atet oten ñocpuet: E'ñe pocte' secobreñ acheñenesha'. Apa'yenetepa'ña allponapa'tets ñeñt Partsocop, atet ñerra'mrrate' ñeñt allpon yechyen e'ñe çharrapa'ttsocma, pate'tetsñapa' o'ch yeneñ e'ñe Partsocop (ñeñtara otenet diezmo). Ñeñto'marña chocma cobreñetña pamo'tsesha' ama't e'ñe ñeñtēna'tarecmuet, tarro'mar Abrahampa' ñeñtara pa'to' pohueñet allohuenet. ⁶ Tarraña Melquisedec ama't ñapa' ama levína'tarneshayaye ñañapa' ello metana'tuenanet ñet tarro'mar ñapa' ama't yatañ Abrahampa' agapoñe't allpon ñeñtcha' ap' Partsocop. Elloña bensare'tampenan Abraham ama't Abrahampa' o' otue Yompor ñach bensare'tamipse'. (Abrahampa' e'ñe pocte' enteñ tarro'mar atarr ahuamencatesha' entenan Melquisedec.) ⁷ Ñehua, yeñoteñ po'ñoçh ñeñt atarr nanac añcha'tarettetsa ñapa' ñachña bensare'tamipene' po'potantañečno ñeñt ama tama añcha'tarettetso atet ñerra'm ña. Ñeñto'marña yeñoteñ Melquisedecpa' atarr sherben tarro'mar ama't añcha'taret Abrahampa' ñapa' ello bensare'tamipeñ. ⁸ Ñeñt yenten arr patsro ñeñt corneshatets Partsocop, ñetpa' arromñafo'ta atet penet. Tarraña ama't arromñafo'ta atet penet chocma aguēññañet acheñenesha' ñeñt apa'yenet Partsocop. Melquisedecpa'cho' ñaña agapaye't ñeñt apa'yesete't Partsocop. Tarraña Melquisedec ñeñt atet anaret Yompor po'ñoño ñocop ñeñtpa' atet oten ñerra'mrrate' ñapa' ama arromñañeshayaye. ⁹⁻¹⁰ Ñehua, ñato' o'ch yot Leví ama't allohuen pue'ñareshohuen, ñeta'naña agapanpsanet Melquisedec ñeñt allpon apueñet Partsocop e'ñe allempocma agapan ñeñt ap' Abraham Partsocop. Ama't ama eñalletena' Leví allempopa' te'pa' o'ch yot ñapa' e'ñe pa'to' Abraham po'chtso'tsen allempo, allempo pocten Melquisedec. Ñeñto'mar te'pa' o'ch yot levína'tarnesha' ñeñt po'taruas pene' o'ch cobran acheñenesha' attoch allpon apa'yenet Partsocop, ñeta'netepa'tña cobra'ña allempo Melquisedec. Ñeñto'marña yeñoteñ Melquisedecpa'

atarr sherben, ello metana'tuenan levína'tarnesha' ñeñt corneshatyets Partsocop.

¹¹ Ñehua, yeñoteñ ahuat allempo aparetta israelnesha' ñoñets ñeñt atet anaret, ñeñtpa' añ orrtate' levínesha' ñeñt corneshatyestse't ahuat Partsocop. Tarraña añ ñoñets ñeñt orrtat cornanesachno ñeñtara levínesha'pa' ñeñtpa' amach errotenot a'cohuentaterreñoña Yomporecop. Ñerra'm po'ñoçcha' a'cohuentateneñ amate' eso'mar huapoña Cristo ñeñtcha' corneshatosets ello ñeñt atet corneshate't Melquisedec, ñeñtpa' ama atteye' corneshatoso ñeñt atet corneshaten Aarón ñeñtara levína'tarnesha'. ¹² Ñehua, yeñoteñ ñerra'm esempo Yomporpa' orrtaterran po'psheñeñ ñeñtcha' corneshaterrets po'poñonef, yeñoteñ añ ñoñets ñeñt atet anaret ñeñt orrtat cornanesha' levína'tarnesha' ñeñt ñoñsorpa'çho'ña o'ch cha po'poñetuerr. ¹³⁻¹⁴ Yeñoteñ Yepartseshar Cristo ñeñtña otenña Yompor po'ñoñ ñeñtcha'ña ello corneshatosets. Yeñoteñ ñapa' ama levína'tareyaye, ñapa' judámereñtsoroñ eñalleta, ñeñt po'poñ mereñtsor ñeñtara israelena'tar. Ñetpa' ama anaretteyayeto o'ch corneshatet Partsocop ñeñt atet anaretta levína'tarneshacop. Moiséspa' ama esoye' sochaneto ñocpuet ama't puesheñarroña attoch corneshatet. Ñaña ñetpa' ama't puesheñarroñeta ama eseshaye' tetso altaro allotecma sherbeñet Parets.

¹⁵ Elloña yeñoteñ o' po'poñet ñeñtcha' e'ñe cohuen corneshaterrets tarro'mar allempo orrta Cristo, ñach corneshaterrets atet anarette't Melquisedec. Ñapa' ama atteyaye ñerra'mrrate' atet anarette't levína'tarnesha'. ¹⁶ Atto corneshatos Cristo ñeñtpa' ama añecpayaye attoch allo'na corneshatnen levína'tar ñeñt atet anarettenet ñocpuet. Ñapa' añecopña corneshaterr Partsocop tarro'mar ñapa' ña atarr ahuamencatesha' ñeñt ama arromñañeshayaye ama't errponaña. ¹⁷ E'ñe Cristocop eñotateney añ ñoñets ñeñt atet anaret Yompor po'ñoño, ñeñtpa' atet otenñ Pompoc:

Papa' attoch pecorneshaterrpa' ñeñtpa' amach huañerro ama't e'ñe errponaña. E'ñe atet o' pa'llsensaretterra atet ñerra'm Melquisedec ñeñt corneshatatse't ahuat.

¹⁸⁻¹⁹ Ñeñt ahuatoteñ ñoñets ñeñt atet nonaye't Moisés ñeñtcha' atet yepohueneñ ñeñtña te'pa' o'huañcha' ye'cua'per tarro'mar ñeñtpa' ama eñalle po'huamenc attoch ñeñtcha' ya'cohuentaterre' Yomporecop, e'ñe orrena atarr yetorra'yese't. Tarraña te'pa' o' orrtterranya po'poñ ñeñtña'pa' ello atarr sherben ñeñtcha' ya'cohuentaterre' Yomporecop esheccha' yecherr Yomporesho ñeñtcha'ña atarr yeyemterraña te'.

²⁰ Yomporpa' e'ñe ña pa'so'chño nan po'ñoñ allempo llesensan Cristo ñach corneshaterrets errponañohuen. ²¹ Po'potantañeçhno ñeñt corneshatyets ñeñtara levína'tarnesha' allempo acornesha'taretetyeset ñetpa' ama Yomporeye' nahueto pa'so'chño attoch corneshatyaset. Tarraña Cristo allempo allsensaretta attoch corneshatos, ñeñt eñoraten Yompor Cristocoppa' ñeñtña'pa' atet oten:

Yompor o' nan po'ñoñ e'ñe ña pa'so'chño ñeñto'mar amach errotenot a'po'poñetuerrano po'ñoñ; (ñeñtpa' atet ot Cristocop): "Papa' attoch pecorneshaterrpa' ñeñtpa' amach huañerro ama't e'ñe errponaña. E'ñe atet o' pa'llsensaretterra atet ñerra'm Melquisedec ñeñt corneshatatse't ahuat."

22 Ñeñto'marña Jesúsapa' eñotochtaterrnay po'ñoçh atto Yomporpa' a'pocataterrnay etserra ñeñtña atarr sherbets, ello o' metana'tuerran ñeñt atet a'pocatonaye't ahuat. 23 Ñeñt ahuatoteñ cornaneshachno ñeñtara levína'tarnesha', ñetpa' epaye' shonta'nmuet tarro'mar çhocmach rromayesete't attoña o'huañcha' allo'na corneshatyenesnet. Ellopa' o'chçho' huapa po'psheñeñ ñeñtara levína'tar ñeñtcha' alla corneshaterrets. Ñeñto'mar epaye'shonta'nma ñeñt corneshatyenesnomtse't ahuatoteñ. 24 Tarraña Cristopa' errponañohuencha' corneshaterr tarro'mar ñapa' ama arromñañeshayaye. 25 Ñeñto'mar Cristopa' ña eñotene' attoch çhocma a'qushpatenan allohuen ñeñt e'nene' Yompor ñerra'm e'ñe pueyemteñotet ña, tarro'mar ñapa' çhocma allo'tsen Pomporesho allecma a'pocataennay ñeñt e'ñe cohuen yocop. 26 Ñeñtapa' e'ñeca'ye pocte'ña yocop o'ch yechen Yecorneshar ñeñt Cristo tarro'mar ñapa' e'ñe cohuen Parets, ama eñalle po'chñar ama't mamesha ñeñtcha' a'sosyatene'. Ñapa' o' sohuanerran allohuen ñeñt co'tene' sosya'tsañ o' alla çherr allohuanen Yompor pue'ntañño allña partsotapretenan Pompor. 27 Ñapa' ama atteye' ÷oso ñerra'm po'potantañ cornaneshachno ñeñt ahuatoteñ. Ñet pate'tets yetpa' epaye' muetsete't payaraçhno; ñeñt eyarra po'rraspa' alloña peretnatane'tña cornaneshachno po'chñar. Ellonetpa' o'ch peretnateñet ña'ña allohuen acheñenesha' po'chñar ñeñtara eyarra po'rroso. Tarraña Cristo ñapa' e'ñe parrocha shatan e'ñe ñañeña po'rras allohuenacop ochñartsocop allempo rroma yocop e'ñe ña puenneñot; ñeñtapa' attoña tsa'tuerrnaya yo'chñar Pomporesho. 28 Moisés ñeñt atet nan ñoñets ahuatpa' ñeñtapa' acheña na'yes ñeñtcha' corneshatyetsets atfeta ñerra'mrrate' ya ñeñtey ama cohuenacmaye' es petso. Tarraña allempo met allpon charpa' allempoña Yomporpa' o' alla nerran po'ñoñ e'ñe ña pa'so'chño. Allempoñapa' nerran Puechemer ñeñtcha' corneshaterrets ñeñt e'ñe cohuenare' es pa'yets Partsocop; ñeñtapa' amach huañerro ama't errponaña. (Ñeñto'marña Cristopa' e'ñe etsotuan ñeñt nanac sherbets.)

8

Jesúsapa' ña a'pocatañtertsa e'ñe etserra yocop

1 Ora allpon ñeñt o' notuanmas ñeñtapa' e'ñe po'ñoçh atet notenes: ñeñt atto atarr sherben Cornesha' Cristo te'ña ñapa' o' alla anorruerr Parets po'cohuenrot all anen po'conaño all pue'ntañño. Allñapa' o' alla partsotuerr ña'ña. 2 Allñapa' o' atarr sherba'huerr e'ñe allohuanen Parets po'prahuo all e'ñe po'ñoçh allo'tsen Yompor. Ñeñtapa' ama atteyaye ñerra'm patso'mar puerahua' ñeñt tomaten acheñ. Allpa' Yomporña tomatene'ña po'prahua' e'ñe ña pue'ntañño. 3 Yeñoteñ allohuen ñeñt corneshatets Partsocop, ñetpa' añecopña anarettenet attoch ñetcha' es apuenet Yompor ña'ña ñetpa' o'ch muetsenet payaraçhno Yomporporecop attoch peretnatenet po'chñaret. Ñeñto'marña Cornesha' Jesús, ñocoppa'çho'ña e'ñe pocte' o'ch es apañ Pompor. (Ñeñtapa' aña apuerran Pompor e'ñe ñañeña po'çhets attoch rroma yocop.) 4 Ñehua, ñerra'm ñapa' allo'tsenaraña aña patsropa' ama't mamesha amate' pocteye' enteñeña ñeñt corneshatyets aña patsro, tarro'mar ñetpa' añach e'ñe cohuen entenent o'ch es apueñet Yompor ñeñt e'ñe atet nanete't Moisés po'ñoñ.

5 Ñeñto'marña yeñoteñ ñeñt atet sherbenet ñet ñeñt'pa' atta toma'nteñet ñeñt atto po'ñoçh Cristo e'ñe cohuen sherben Parets po'prahuo ñeñt pue'ntaño'tsen. Añach sherbenet ñeñt attema'ttetsa ñeñt e'ñe po'ñoçh atet muenen Yompor. Yeñoteñ ñeñtecma sherbete't tarro'mar ahuat allempo Moisés'pa' ahuo'ch tomataneñ ñeñt'cha' po'prahua' pa' Parets arr patsro, all aspeno Yomporña gate' ñeñt toma'ntenaya e'ñe ña po'prahua' ñeñt pue'ntaño'tsen. Allempoñapa' atet otan Moisés: "Po'ñoçh'pa' e'ñech atet pue'chcaton ñeñt'cha' neprahua' ne'pa' añ patsro allcha' ye'chena Necamquëñ." Arrpa' allohua atet otan Yompor Moisés. 6 Tarraña Cornesha' Cristo te' atto sherberr all pue'ntaño, ñeñt'pa' e'ñe po'ñoçh poctacma cohuen. Ello metana'tuenan ñeñt atet sherba'yese't ahuatoteñ cornaneshachno arr patsro. Tarro'mar te' ñeñt atet o' a'pocaterney Pomporeshopa' ñeñtña e'ñe poctacma cohuen yocop, tarro'mar añ a'pocateñetspa' pa'namen oteney ñeñt'cha' atet perrnay coshateñtso.

7 Yeñoteñ ñerra'm e'ñe cohuen a'pocatyene't ñeñt ñenma't allempopa' amach palltenañe o'ch alla a'pocaterreyeterr e'ñe ello etserra. 8 Yeñoteñ ñeñt ahuat a'pocateñetspa' ama e'ñeye' cohuen yenpa'ye'te tarro'mar allempo Yomporpa' ama pocteye' entane'te israelnesha'. Tarro'mar po'ñoñpa' atet oten ñeñt aquellcare't ñeñt'pa' atet ot Yompor:

Chapcha' allempoch nenerrerr po'poñ neñoñ israelena'tarneshacop ñaña judána'tarneshacop, ñeñt'pa' allochña na'pocaterret e'ñe cohuen etserra. 9 Ñeñt'pa' amach atteyaye ñerra'm ñeñt atet na'pocatanet ñenma't pa'tañneshañ allempo nerraneta' Egipto't e'ñe cohuen na nehuamencot. Tarro'mar allempo ñetpa' ama atteye' pöneto ñeñt atet nenanet ñeñt'cha' a'pocatahuetañ. Ñeñto'mar napa'cho'ña atta na'ypo'ñanet. Ñeñt'pa' atet ot Yompor allempo.

10 Allempoñapa' o' alla oterrerr Yompor ñeñfara:

Esempohuañenpa' o'ch alla na'pocatererr po'poñ ñeñt israelena'tarneshacop. Ñeñt'pa' atet'cha' neperranet allempo esheccha'ña ne'chapaterret neñoñ e'ñe ñet pueyo'chreto, ñeñt'pa' ñato' o'ch netma'ntacha atto neñoñpa' o' aquellcare'tterret e'ñe ñet pueyo'chreto ñeñt'cha' cotape'chaterrahuetña e'ñe cohuen. Allempoña po'ñoçh'pa' e'ñech Po'yomporer perrnet, napa'cho'ña e'ñech neyochrenesha' neperranet ñamet.

11 Ñaña allempo allohuenetpa' e'ñech eñotuerranet ñeñt'cha' atet noctape'chaterranet cohuen pueyo'chreto. Allohuenetpa' e'ñech attecma eñoterrnet pomporneshohuenet ama't ñaña añetolleshohuen ama't ñeñt atarr sherbets ama't ñaña ñeñt ama esoye' enteñeto. Ñeñto'marña allempo ñeñt am'cha'na'tpo' entetsapa' ama pallteno o'ch ye'chatan po'potantañ pamo'ts ama't ñaña pa'mo'nasheñ. Amach esesha' oterraruete'te te'pa' añ poctetsa o'ch señoter Yompor, tarro'mar allempopa' o'ch e'ñe eñotuerrnet.

12 Ñaña napa' e'ñe nemuereñoñanetpa' nepretnerranet'cha' po'chñaret, amach alla neyerpuerranete'te po'chñaret. Arrpa' allohua atet ot Yompor ahuat.

13 Ñeñto'marña yeñoteñ ñeñt atto Yomporpa' all oten e'ñe etserra o'ch a'pocaterrey, ñeñt'pa' tarro'mar ñapa' o' a'ypo'ñerran ñeñt attoch ñanom

a'poclatyeñ. Ñaña ñeñt ahuatoteñ a'po'tateñets te'pa' o' a'ypoeñare'terra, ñeñtpa' huañerrcha'.

9

Ñeñt patso'mar Yompor po'prahua'pa' añ toma'ntateññañet ñeñt e'ñe ña pue'ntañ'tsen po'prahua'

¹ Ñehua, yeñoteñ ñeñt atet a'poclatanetañ ahuat Yompor ñeñtpa' echenan ñoñets anaret ñeñtcha' atet sherba'yeset Parets. Ñaña arrcha' e'ñe etsotetña ñeñt Yomporecop e'ñe ña po'prahuo, ñeñt puerahua'pa' ama't acheña tomatene' arr patsro. ² Ñehua, ñeñt puerahuatats'e't ahuat ñeñtpa' shetamtsopo'. Ñeñt tomatenet ñehuapo'tpa' ñeñt otenet Partso'pahuesho allo'tsen all orratenet huerare ñaña allo'tsen mesa allecma nenet pan Partso'cop. ³ Allohuanen allohua ayottan'psaret besmo po'ppahueñ shetamtsopo' ñeñt otenet, E'ñe Partso'pahuesho Po'ponro. ⁴ Allñapa' allo'tsen altar, enotñapa' allecma a'crratenet tsach puese' ñeñt atarr eñmosa'tetsa Partso'cop; ñeñtña altar eno'marpa' e'ñe cohuen orotattena. Ñaña allohuanen po'ppauño allo'tsen tsapot; ñeñtpa'cho'ña eno'marpa' orotaten. Allña añño'tenet mapuettall allo aquellcare't Yompor po'ñoñ ñeñt a'poclat Yompor ahuat acheñenes'ahacop. All añño'tenet ñaña pajo' orotaten, allña esha'taret coñe't maná ñaña tsapoto allo'tsen Aarón po'carr ñeñt tapa'llatse't ahuat. ⁵ Tsapoto enot all ten epsheña mellañoteñma't ñeñt aye'chcataret ñeñt otenet querubíñ ñeñt toma'ntenaya Parets po'partsoña ñeñt chorrets all. Querubíñ pa'pa'yopa' alloña ca'matenan tsapot enot allot e'tam'penet tsapot. Allñapa' allecma peretnanete't Yompor po'chñaret. Ñehua, te'pa' o'ch noterr'serr po'poñe'chno ñeñt pa'namen atma'ntataret all.

⁶ Allpa' pa'namen añño'taretetyetsa ñeñt all puerahuo. Ñaña ñeñt cornaneshatyets Partso'coppa' chocmach be'tosyenet ñeñt all puerahuo ñehuapo't, allcha'ña etsotayenet ñeñt atet anaret Partso'cop. ⁷ Tarraña ñeñt allohuanen po'ppahueñ Parets po'poner ama eseshaye' be'tetsoña all. Allpa' añach be'tets puesheñarr cornesha' ñeñt pa'micha'tareter pen po'potantañ cornaneshachno. Ama't ñapa' paterr charpa' e'ñech parrocha be'ten. Ñaña chocmach anman eyarra po'rras alloch peretn'nanet Yompor po'chñaret. Ñeñtpa' e'ñe ñocpa'na po'chñarecop ama't ñaña allohuen acheñenesha' po'chñarec'puet. ⁸ Ama't ñeñt ñehuapo'te'tsen puerahua' allecma sherba'yen cornaneshachno ñeñt atet anaret Partso'cop, tarraña e'ñe allohuanen Parets po'ponro añach be'tets ñeñt nanac corneshatets e'ñe ñapu'e't. Ñeñto'marña te'pa' Parets Puecamquëñña yeñotatene' atto ama atoram'psaret'eyaye allohuenac'pay attoch ye'chapam'peña Yompor all partsoten. ⁹ Ñeñt allempopa' añña toma'ntena ñeñtcha' atet cohuen p'osa tsapatonet Cristo allempoch huapa; atet ñerra'm te'ña o' huapa Cristopa' o' etsotua. Tarro'mar allempo all Parets po'prahuo ama't es apuenetañ Yomporecop ñaña ama't es muetsayenetañ Yomporecop, ñeñtpa' arepa't a'cohuentatenanoña añ poclapña ñeñt atet sherbenayeñ Yompor. ¹⁰ Tarro'mar ora atet anarettet allempo ñeñtpa' añecpa sherben ñeñt e'ñe po'chtsocpueta ñeñt atet ñerra'm ñeñtcha' rrenet ñaña ñeñtcha' orrenet ñaña atto apa'yesete't Partso'cop. Ñeñt orapa' añecpa sherbe't attoch a'poclatenet po'chets Partso'cop. Ñaña ñeñtpa' mamec'pa

anarettá esempohuañeña Yomporpa' orrtaterrnaycha' po'poñ ñeñtcha' ello nanac yesherberre'.

¹¹ Ñeñtpa' e'ñe tarremphua e'ñe etsoterra allempo huapa Cristo, ñeñña orrtatose' ñeñt ello nanac sherbets te' yocop. Ñapa' atto corneshatospa' o' alla be'tosuerr allohuanen Partsopahuesho all pue'ntaño ñeñña ello nanac sherbets Partsocop. Ñapa' e'ñe metana'tuerran ñeñt sherba'yestse't ahuat puerahuo Partsocop ñeñt tomaten acheñ arr patsro. Tarro'mar ñeñt Parets po'prahua' ñeñt pue'ntaño'tsenpa' ama acheñeye' tomatenaye ñaña ñeñtpa' ama aña patsroye' atomatareyaye. ¹² Ñaña Cristo allempo be'tosuerr allohuanen Partsopahuesho ñeñtpa' e'ñe parrocha be'tosuerr all pue'ntaño. Ñaña ñapa' ama añeye' anmo eyarra po'rras — cabra amapa' huacshetoll. Ñapa' e'ñe ñañeña po'rras pomhuerr. Ñaña ñapa' e'ñe parrocha pomanña po'rras all ama't allohuen pa'namen acheñeshacop po'chñarecop. Attoña e'ñe cohuen a'pocatonay attotcha' a'queshpaterrey, ñaña ñeñtpa' amach ahuañañaterra ama't errponaña. ¹³ Ñehua, yeñoteñ ñeñt atto shellcapechyesane't cornesha' acheñesha' cabra po'rraso amapa' huaquesh po'rraso amapa' huacshetoll po'tsapñero ñeñt a'poyenet altaro, ñeñtpa' attoña a'pocatenan ama't erratsena acheñer po'chets Partsocop, ama't erroteno a'sosyatena Partsocop. ¹⁴ Tarraña ñeñtpa' e'ñe po'chtsochaya a'pocatarettenet Partsocop. Tarraña allempo ashataretta Cristo po'rras, ñeñtpa' ellonet añecopña nanac sherbos attoch a'pocaternay ama't ñeñt atet yoctape'chyen yeyochro. Ñeñto'marña allempoteña' amach alla yeyemtererro ñeñt atet yeye'chcatyen arr patsro ñeñt ama a'queshpatañeyaye. Añcha'ña e'ñe cohuen yesherben Yompor ñeñt ama arromñateshayaye. Cristopa' ñeñto'marña ello atarr sherbeney atto pomuerra ñañeña o'ch rroma yocop ama't ñapa' ama eñalle po'chñar ama't e'ñe mamesha. Ñeñtpa' e'ñe Yompor Puecamquëño' atet posa; ñeñña Camuecñetserpa' ama ahuañaño.

¹⁵ Atto Jesucristopa' ña eñosets yocop attoch a'pocatuerrnay e'ñe cohuen etserra. Tarro'mar allempo rroma Cristo ñeñtpa' añecopña sherben attoch peretna'huerrnay yo'chñar ñeñt o' allpon yepohuen ahuatoteñ allempoteñ yocta'nom ñeñt ñanom a'pocatañtatsañ. Allochñapa' allohueney ñeñtey o' ya'hua'ñare'terra o'ch yame'ñera, ñapa' aphuerreycha' ñeñt o'patatenya ñeñt atet oteney attochña yapa' corretsayach errponohuañen. ¹⁶⁻¹⁷ Ñehua, yeñoteñ arr patsro chocma eñall puesheña'tets acheñ ñeñt atet petsa o'ch quellca'nman ñoñets all oten ñeñtcha' allpon puechatsre'chno apa'nman pamo'tsesha' ñerra'm esempoch rroma. Tarraña allempo orameñ correna ñeñt quellquëne' e'ñe ña po'ñoñ, añña ñeñt o'patatenya' amach erroteno' amnataretto o'ch yoret e'ñe allempocma. Tarraña ñerra'm esempoch eñoteñet po'ño'ch o' rromuen ñeñt o'patatenahuet, allempoñapa' aparetetyesetcha' ñeñt allpon o'patataretetyenet. (Ñeñto'marña yapa' yeñoteñ allempo rroma Cristo atto ashataretta po'rraspa' ñeñt allpon o'patatenya yaña ñeñtpa'cho'ña e'ñe yocma.) ¹⁸ Ñeñto'marña ahuat allempo ñenma't a'pocatarete't Partsocop, ama't allempopa'cho'ña o'ch muetset eyarra, po'rrasoñapa' allochña shellcata'tyeset. Ñeñtpa' attoña e'ñe

a'pocatatete'tña po'ñoñ. ¹⁹Ñehua, Moisés'pa' atet p̄a allempo. E'ñe eñotatuan acheñenesha' ora allpon atet oten Yompor po'ñoñ ñeñtcha' atet pet, allempoña ñapa' o' yoran carrnero pue'ch ñeñt e'chomaret tsama'to ñeñtña'p' huanquē' hisopoch puetacro, allotña'p' yoran ñama huacshetoll po'rras ñama cabra po'rras, tsech epuet oñ. Allña e'choman carrnero pue'ch ñeñt huanquēn tsachp̄o allempoña'p' shellcata'tan allo libro ñeñt all anaret Yompor po'ñoñ, attoña shellcana'tam̄pesuan ñama allohuen acheñenesha'. ²⁰Allempoña'p' atet otan acheñenesha': "Añ po'rras ñeñt'pa' alloña Yompor'pa' a'pocatatennas ñeñt atet nenan po'ñoñ socop ñeñtcha' atet sepa." ²¹Ñama attecma p̄an ñama puerahua' ñeñt shetamsopo' o' shellcapo'ch ñeñtara errasatso. Ñama ora allpon coymechno ñeñt allo'tsa'yen allecma sherbeñet Parets, ñeñt'pa'cho'ña e'ñe shellca'ta'tue. ²²Ñehua, yeñoteñ ñeñt atet oten ñoñets ñeñt atet anaret, allohuen es po'rrasochña e'ñe a'cohuentatenet Partsocop. Allohuen pa'namen ñeñt allo'tsa'yenpa' e'ñe autsa allohuen a'cohuentatue atto ashellcana'taretta eyarra po'rraso. Ñeñto'marña yeñoteñ ñerra'm ama es muetseneto attoch shatatoñet po'rraspa' amach eseshaye' ap̄retnarettetso po'chñaret.

Atto amtsaretta Cristo yo'chñarecoppa' attoña e'shohuerrnayo'chñar

²³Ñeñto'marña yeñoteñ añe patsro puerahua'pa' eyarra po'rrasoña a'cohuentatyenetña allohuen ñeñt Partsocop. Ñeñt puerahua' añ patso'marpa' añ toma'ntena Parets po'prahua' ñeñt pue'ntaño'tsen, ñeñt'pa'cho'ña attecma errasatso a'cohuentatarettena allohuen ñeñt allpon allo'tsa'yen. Tarraña ñeñt rromats Parets po'prahuacop ñeñt pue'ntaño'tsen ñeñt'pa' añ muenen errasats ñeñt ello atarr cohuen sherbets. ²⁴Ñeñto'marña Cristopa' ñeñtecopña rroma. Tarro'mar Cristopa' ama arreye' be'tosuero ñeñt patso'mar puerahua' ñeñt ye'chcaten acheñ ñeñt atta toma'ntenaya Yompor po'prahua' ñeñt pue'ntaño'tsen. Allña be'tosuerrña Cristo Parets po'prahuo ñeñt pue'ntaño'tsen ñeñto'marña te' ñapa' allo'tsen e'ñe allohuanen Yomporesho allña torra'huerra cohuen yocop. ²⁵Ñama Cristopa' ama atteye' p̄oso atet pena cornaneshachno ahuat. Ñetpa' chocma be'tosete't allohuanen Parets po'ponro e'ñe pate'tets char. Ñama errasats ñeñtcha' anenet o'pono ñeñt'pa' ama ñetoyaye po'rraset. ²⁶Tarraña Cristopa' e'ñe parrochecpa anaret o'ch pomuerra ñañeña o'ch rroma attoch ashataretta po'rras. Tarro'mar ñerra'm ama atteye' anareteñepa' chocmate' rromame'tañ ama't tarrempoñeñ allempoñeñ e'ñe errete' aye'chcatarettetsa pats. Tarraña ñeñt'pa' ama atteye' p̄o. Ñapa' añecopña huapa attoch e'ñech parrocha amtsaretta allohueney yo'chñarecop attoch ñachña yahuanman̄perre' yo'chñar. Ñeñto'marña huapa allempohuach cherr yet allempoch mellapotermocha. ²⁷Yeñoteñ ama't allohueney acheñey chocmach yerrmuen. Tarraña e'ñech parrocha yerrroma allempoña'p' o'ch huerriyaya attoch Yompor'pa' eñotatyesuerrey e'ñe errotentcha' entyesuerrey — ñato' e'ñech cohuen entyesuerrey amapa' ñato' amach cohuenaye' entyesuerrye. ²⁸Attecma p̄a ñama Cristo e'ñe parrocha rroma allempo amtsaretta allohuen ochñartsocop. Attoña ñapa' e'ñe ahuanman̄perrey shontey allohueney yo'chñar. Ama't amtsarettañ ochñartsocop, tarraña Cristopa' allach orrterra po'pocheño. Allempoch huerra po'pocheño'pa' po'cohuenño amach añecpaye' huerro o'ch alla

rromuerrerr ello ochñartsocop. Añecopcha'ña huerra po'pocheño o'ch e'ñe a'queshp̄atuerran allohuen ñeñt̄ chocma cohuenē' ña.

10

¹ Ñeñto'marña yeñoteñ Moisés po'ñoñ ñeñt̄ atet anaret ahuat judioneshacop, ñeñt̄pa' ama e'ñeye' cohuenteno ñeñt̄ atet cohuentena te' ñeñt̄ orrtatosnay Cristo. Añ ñoñets ñeñt̄ atet anaret ahuat ñeñt̄pa' aña toma'ntena ñeñt̄cha' e'ñe po'ñoçh cohuenetuerrtsa ñeñt̄cha' orrterrtsa tsapatonet. Ñeñto'marña añ ñoñets ñeñt̄ atet anaret ahuat ñeñt̄pa' amach errotenot a'cohuentatanoña acheñenesha' ama't puešheñarra ñeñt̄ muenenayeñ o'ch yemtenanañ Yompor. Ama't chocma muetsa'yeseña'e't̄ eyarraçhno po'chñarecop e'ñe atet oteneñ añ ñoñets ñeñt̄ atet anaret, ñeñt̄pa' amach errotenot e'ñe a'cohuentatanoña acheñenesha'. Ama't pate'tets char chocma muetsa'yeseña'e't̄ ñeñt̄ Yomporecop, ñeñt̄pa' ama e'ñeye' a'cohuentatane'teña acheñenesha' Yomporecop ama't puešheñarra ñeñt̄ muenenayeñ o'ch yemtenanañ Yompor. ² Ñerra'm e'ñe po'ñoçh a'cohuentatenaneñña acheñenesha' eso'marte'ña o'ch alla muetsereterrña po'poñeçhno shonte' eyarra. Ñerra'm po'ñoçh a'cohuentatenaneñ acheñenesha' ñeñt̄ atet cotape'chyene' sosya'tsañ pueyoçhreto, eso'marte'ña alla yerpapa'taterranete'tña po'chñaret ñeñt̄ pueyoçhro'tsa'yenet. ³ Tarrña po'ñoçh epaye' yerpapa'taterranete'tña po'chñaret. E'ñe pate'tets char allempopa' o'ch alla muetserreterr eyarraçhno añecop ñeñt̄ atto yerpapa'taterraneterr po'chñaret. ⁴ Ñeñto'marña yeñoteñ eyarra po'rraspa' amate' errotenot ahuanman̄perryeña yo'chñar ama't toro po'rras amapa' cabra po'rras.

⁵ Ñeñto'marña Cristopa' atet otosan pompor allempo acheñetos arr patsro ñeñt̄pa' atet ot:

Pa te'pa' ama añeye' pemneno eyarra ñeñt̄ amtsarettetsa p̄ocop ñeñt̄cha' atarr p̄ocshatene'. Ama't ñaña ñeñt̄ es apa'yenet p̄ocop. Ñeñto'marña nocop te'pa' o' p̄eçhcatuerrnan nechets añ patsrecop ñeñt̄ e'ñe atet pemnen p̄a, e'ñeçh nechtsot nesherb̄osep̄ attoch e'ñe cohuen nocshatenep̄.

⁶ Po'ñoçh te'pa' ama añeye' atarr p̄ocshatenaye atto chamuenet eyarra p̄ocop amapa' allempo muetsanatenet eyarra ñeñt̄ po'chñarecpuet.

⁷ Ñeñto'marña Nompore te' napa' o'ch notap̄: “Napa' añecopña nohuapa arr patsro attoch netsotosnaḡ ñeñt̄ atet pemnen p̄a, ñeñt̄ e'ñe atet anaret peñoño nocop.” Arrpa' allohua atet otan Cristo pompor.

⁸ Ñehua, ñeñt̄ atet ot Cristo arr ñeñt̄pa' atto Yomporpa' ama añeye' mueneno eyarra ñeñt̄ amtsarettetsa ochñartsocop attoch coshateñet ña. Ama't ñaña ñeñt̄ es apa'yenet ñocop ñeñt̄pa'cho'ña ama ñeñt̄eye' e'nenno ñeñt̄cha' coshatene' ama't ñeñt̄ achamaret̄ ñocop ama't ñaña ñeñt̄ amtsarettetsa ochñartsocop. Ñeñt̄ ora añeçhno ñeñt̄ atet nane't̄ Moisés po'ñoñ atetcha' es apueñet Yompor, te'ña ñeñt̄pa' ama coshatenano Yompor; atet oten Cristo. ⁹ Elloña ñapa' atet oten, “Napa' añecopña nehuapa Nompore, o'ch netsotosnaḡ ñeñt̄ atet pemnen p̄a.” Ñeñt̄pa' añ eñotatosey, ña a'huañatose' ñeñt̄ ahuatoteñ atto muetsete't̄ eyarra po'chñarecop. Attoña ñapa' nosan po'ñoñ ñach rromosets

yo'chñarecop. ¹⁰ Ñeñto'marña Jesucristopa' pomosa ñañeña yo'chñarecop. Ama't parrocha rromapa' ñeñtpa' allohuenacpay. Atto ñapa' etsotenan ñeñt atet muenen Pompor yañapa' e'ñe a'cohuentaterrey Partso-cop. ¹¹ Ñaña ñeñt cornaneshatyets judioneshacop ñet pate'tets yetpa' chocma tenet all altaro allotecma sherbeñet Yompor allecma muetsanaterretañe't eyarraçhno ñeñt ochñartsocop. Tarraña ama't amtsarettenañpa' amach errotenot ahuanmanoña ochñarets. ¹² Tarraña Jesucristopa' e'ñe parrocha pomuerra e'ñe ñañeña ñach amtsarettertsa ochñartsocop. Ama't parrocha rroma ñeñtpa' allohuenacop e'ñech erponohuañenacop. Allempoñapa' o' alla anorruerr Pompor po'cohuenrot allña partsotuerr. ¹³ Allostña cohuenan allohuen ñeñt e'moñe'tene' esempohuañenpa' a'mchechatuerranetcha'. ¹⁴ Jesucristo allempo pomuerra ñañeña, ñapa' e'ñe etsotatuerrnay attoch e'ñe a'cohuentaterrey Partso-cop. Ama't parrocha rroma ñeñtpa' e'ñe allohuenacop ama't ahuatoteñ errponohuañenacop añecop ñeñt pueyochresha' pen Parets. ¹⁵⁻¹⁶ Ama't Yompor Pucamquëñ ñeñtpa' cho'ña eñotoçhatennay tarro'mar ñapa' añ eñotatyet ñeñt atet otyet Yompor, ñeñtpa' atet ot:

Esempohuañenpa' napa' o'ch na'pocatterranet po'pocheño. Ñeñtpa' atetcha' neperranet. Allempo esheccha'ña neçapaterranet neñoñ e'ñe pueyoçhreto. Ñeñtpa' ñato' o'ch netma'ntacha atto neñoñpa' o' aquellcatterret e'ñe ñet pueyoçhreto ñeñtcha'ca'yeña cotape'chaterrahuetña e'ñe cohuen.

¹⁷ Ellonetpa' atet ote't allempo:

Napa' amach alla neyerpuerranete'te po'chñaret. Ama't ora atto atpare'tnete'tpa' amachña ñeñta alla neyerpuerranete'te.

¹⁸ Ñeñto'marña yeñoteñ atto Yomporpa' o' peretna'huerrnay yo'chñar amach alla yerpuerrnaye'te ñeñto'marña amach alla es yemtserre'te ñeñt yo'chñarecop.

Te'pa' ama es palltetso yocop attoch e'ñe cohuen ye'ñorana'tera Yompor Parets

¹⁹ Ñeñto'marña masheñneshacha' ñaña noçhaneshacha' te'pa' yeñoteñ e'ñe pocte' yocop e'ñe ya yeçhore'teño't Yomporpa' e'ñech yeyemteña e'ñe atet ñerra'm yamo'ts yeyemtena e'ñe allame'tets. Ñeñtpa' añ toma'ntena ñerra'mrate' o' yebe'terr e'ñe allohuanen Parets po'ponro all po'prahuo atet pe't ahuat cornanesh'a' ñeñt be'tostset ñapueñ ñeñt anmayet eyarra po'rras all, tarro'mar te'ña atto o' rroma Jesucristo yocop, po'rrasña ñeñtña e'ñe ya'pocatterre'ña ya attoch ye'ñorana'tera ama't ñeñt atarr Parets. ²⁰ Po'ñoçh Jesucristo e'ñe ña po'chtsot orrtaterrnay po'poñ etserra attoch yapa'cho'ña o'ch yeçhapanpera Yompor attoch ye'ñorana'tera. Ñeñtpa' e'ñe cohuen attoch yeyemteña e'ñe po'ñoçh. Ñeñtpa' añ toma'ntena ñerra'mrate' Cristopa' o' çhapterrey allohua yottañpeññañet besmo Parets po'ponro all po'prahuo. ²¹ Jesús te'pa' yeñoteñ ñeñtña atarr Yecorneshar yepen ñeñt çhets Yompor pa'paclo, ñapa' allña añcha'taretetuerra Yomporepahuo añecop allohuen ñeñt pueyochresha'çhno pen Parets. ²² Ñeñto'marña e'ñe yeyemteño'tpa' amach yemcha'naño'ayaya yeçhore'teña. E'ñepa'chña yeñmañesha' yeyoçhrocmañen yeçhore'teñ, tarro'mar Cristo po'rrasoña o' a'cohuentaterrnay yeyoçher atto te'pa' o'

e'ñe cohuen yoctape'chyerr, amachña allo'na yerpapa'tatnenye yo'chñar. Ñeñtpa' añ toma'ntena atfo yapa' e'ñe cohuen apatarētey oño ñeñt' poctetsa Partsocop. ²³ Chocmuepa'chña yecueñña ñeñt' yeyemtena allochñapa' a'qeshpaterreycha', amuepa'chña cha ye'charrtatatstenoña yeyo'cher tarro'mar Yompor ñapa' chocmach a'pocstaterrnay po'ñoñ ñeñt' atet oteneý. ²⁴ Ñaña añepa'chña e'ñe cohuen ye'nen attoch yeyenpannena allohueneý allochñapa' attoch e'ñe cohuen yeychen morrentanna'teñets ñaña e'ñech cohuen es yeyenpannena. ²⁵ Ñaña chocmuepa'ch yesen all chocma yapchena e'ñe yame'ñeñoñ Cristo. Amachña atfa yepatsto ñeñt' atet pena po'potantañ ñeñt' ama huetso allecma yapchena. Añcha'ña atet yepena allempo yapchena e'ñech cohuen yoctape'chatannena Yomporecop. Elloña te'pa' chocmach yapchena ñeñt' nanac cohuentetsa yocop tarro'mar yeñoteñ te'pa' o' cherrmoch allempoch huerra Yepartseshar Cristo.

²⁶ Tarro'mar ñerra'm o' yeñoter po'ño'ch Cristo rromats yocop attoch a'qeshpaterrey ñaña ñerra'm ñeñto' yame'ñerra tarraña ñerra'm allo'na yesen ochña'tare'tnomuets e'ñe ya yemneñño'pa' allempopa' amach eñalleña ñeñt'cha' rromuerrtserr po'pocheño ñeñt'cha' yetsa'terroyerr ello yo'chñar. ²⁷ Ñeñt' allo'na sets ochña'tare'tnomuets añach o'paterrahuet coñcheñets ñeñt' atarr añcha'nochtetsa ñeñt'ara Yompor po'yoro'chenña ñeñt' tso'pa' e'ñech e'nuerran allohuen ñeñt' e'moñe'tene' Yompor. ²⁸ Ñehua, ahuat ñerra'm eñall ama't puesheñarra ñeñt' atpare'taye't Moisés po'ñoñ, ñerra'm eñall epsheña amapa' ma'psheña ñeñt'cha' a'metampene' ñeñt'ña atparña'tpa' ahuo'ch muetse allohuen acheñenesha'. Ama't puesheñarrapa' amach eñalleña ñeñt'cha' morrentaya. ²⁹ Elloña ñeñt' ama esoye' entenaye Yompor Puechemerpa' atarrcha' nanac a'coñchatare'tterret. Elloña po'rras ñeñt'cha' a'cohuentaterrahuetañ Partsocop ñeñt'pa'cho'ña ama esoye' enteñeto ama't ñeñt' errasatser ñeñt' etserra a'pocstatañtetsa. Elloña ama't Yompor Puecamquēñ ñeñt'pa'cho'ña chach sasare'teññañet ñeñt'ara Puecamquēñ ñeñt'cha' morrenterrahuetañ attoch chorrerranetañ. Ama't seño'teñña elloña atarrcha' nanac acoñchatare'tterra ñeñt' atet atarr tsena'tene' Yompor Puechemer. ³⁰ Tarro'mar yapa' yeñoteñ Yomporña atet otets: "Napa' ñeñt'cha' coñchaterrahuet, napa' ñeñt'cha' tsa'taterrahuet." Elloñapa' atet oten Yompor: "Napa' ñeñt'cha' otteñe'cherrahuet attochña necoñchatterranet ama't ñeñt' neyochresha'chno nepeneñ." ³¹ Ñeñto'marña yeñoteñ atarr yoro'cheno'tsen ama't allohuen ñeñt' añña o'patenaya ñeñt' po'yoro'chenña pen Yompor ñeñt' ama arromña'teshayaye.

³² Tarraña te'pa' o'ch notas, o'ch alla seyerpuerra atet seña ahuañmo'cha allempo e'ñe errtes eñoterre' po'ño'ch Cristepa'tña a'qeshpatañ. Ñeñt'pa' allempo ñanom a'puetarsañpsaretta seyo'chro soctapña. Allempopa' ama't atarr amuero'chtatare'teseñ sañapa' e'ñe sa'huantahuanom pa'namen topateñtso'chno ñeñt' setantyesoya; ñeñt'pa' e'ñe atet ñerra'mrrate' sapa' cho atarr secllarena. ³³ Patanta'ttsospa' atarrca'ye che'tatsetasete't e'ñe allo'tsa'yen allohuen acheñenesha'. All atarr sa'muero'chtatare'tta. Elloña ñerra'm esempo muero'chtateñet po'potantañ samo'tsesha' sapa'cho'ña chocmach

semuerochtapretanete't. ³⁴ Po'ño'ch ñeñt' arrmanatarettatset' o'ch ayottam'psarettet, sañapa' e'ñe sellcapreteño'tanetpa' chocmach e'ñe cohuen seyempuenanet. Ama't allempo puerratan'psatsre'taset' ñeñt' se'moñe'tyesaye't, sañapa' e'ñech socsheñesha' sa'huantenanet. Tarro'mar sapa' seño'teñ o' secherr ento ñeñt' atarr sherbets ñeñt' ello metana'tuene' atto sherbenes sechatser, tarro'mar ñeñt'pa' ama aptsaño. ³⁵ Ñeñto'marña masheñeshacha' o'ch alla noterrser, amach alla sequechpatsterrña'ñe ñeñt' atto atarr seyemteña Cristo tarro'mar Yomporpa' ñachña atarr cohuen setsa'terraya. ³⁶ Te' sapa' aña sepalltena attoch e'ñe aco'pa sa'huañta'huanom ñeñt' atarr echarr sentyen, attochña allo'nach sesen pa'yesnomue' ñeñt' atet muenen Yompor, attochña Yomporpa' apuerrescha' ñeñt' e'ñe atet otenes. ³⁷ Tarro'mar yeñoteñ Yompor po'ñoñ ñeñt' aquellcare't ahuatoteñ ñeñt'pa' Cristocop atet oten: O' mameshamerra o'ch orretuerra ñeñt'cha' huerrtsa, te'pa' amach alla atomato pue'ntaño.

³⁸ Tarraña Yomporpa' atet oten:

Ñeñt' e'ñe pocte' nenten na ama't erra'tsena acheñer tarro'mar e'ñe pueyemteño'ten na, ñeñt'ñapa' corretsach. Tarraña ñerra'm esesha' nepuerran'perraya ñapa' o'huañcha' allo'na coshatenen.

³⁹ Tarraña yapa' ama atteyayye ñerra'mrrate' ñeñt'cha' puerran'perraya Yompor ñeñt'cha' chenqu'errtsa. Yapa' añeyca'yeña ñeñt'eycha' chocma yemterraya Yompor ñeñt'eycha' a'quesh'patarettertsa e'ñe yecamqu'ño'huen.

11

E'ñe yeyemteño't Yomporpa' e'ñech cohuen es yetsotayen ñocop

¹ Ñehua, allempo po'ño'ch yeyemteña Yompor e'ñe yeñoteñ chocmach apuerrey ama't esempo ñeñt' atarr yecuen te' e'ñe yenamueño't. Ama't ama yenteña' e'ñe yeyochroña yeñoteñ ñeñt' yecuen te' po'ño'chpa' apuerreycha' ama't esempo. ² Yatañneshañ ahuatpa' atarr yemuetyesete't Yompor. Ñeñt' atto yemuetyesyete't Yomporñapa' e'ñe pocte' entyesanete't.

³ Ñaña ya e'ñe yeyemteño't Yompor te'ñapa' o' yeñoter allpon ñeñt' yentyen arr patsro ñeñt'pa' e'ñe po'ño'ño'ta ye'chca'hua. Allempopa' ama't coñe'ta ama es orrtetso ñeñt'cha' pa'namen ye'chcatyes ñeñt' atet yentyen te'.

⁴ Ñaña Abel ahuat atto yemtane't Yompor, ñapa' apan Yompor ñeñt' atarr coshate'. Pa'mo'nasheñña Cain ama't apaneñ ñaña Yompor, ñeñt'ñapa' ama coshatano Yompor. Ñeñto'mar Yomporpa' e'ñe cohuen agapan ñeñt' ap' Abel; attoña Yomporpa' eñotatanet e'ñe pocte' entapretan Abel. Tarraña Abel ama't romañpa' atto atarr yemtane't Yompor, ñeñt'pa' e'ñe teme'ttsen eñotateney ñeñt' cohuen enten Yompor. Ñeñt'pa' attema't ñerra'mrrate' Abelpa' teme'ttsen serrpare'tatene'y cohuen.

⁵ Ñaña ahuat Enoc ñeñt' atarr cohuen yemtaye't Yompor, ñapa' e'ñe ora aner Yompor pue'ntaño e'ñe betnatot. Ñapa' ama choye'rromo arr patsro. E'ñe at'a a'chencach pamo'tsesha' ama esesha' enterraye tarro'mar Yompor erraya'. Ñehua, allempo ama a'tapatera' Yompor pue'ntaño ñapa' atarr cohuen coshatane't Yompor allempo aña

patsro'tsen, tarro'mar ñeñtpa' atet oten Yompor po'ñoñ ñeñt aque-llcaret. ⁶ Ñerra'm ama yeyemteñe Yompor amach errotenoť yocshateñe ama't e'ñe mamesha. Tarraña ñerra'm esesha' muenene' o'ch yemteret ñamet Yompor añ poctetsa o'ch otet po'ñočpa' Yomporpa' eñall, ñaña eñoteretepa'chña Yomporpa' chocmach coshaterran allohuen ñeñt e'nene' ña. ⁷ Ñaña ahuat Yomporpa' eñotatan Noé ñeñtcha' atet e'chořan oñ tsapaťonet. Allempo atet otan Noé ama't mameshapa' ama huate'te. Tarraña Noéñapa' e'ñe yemtenana atet och Yompor allempo. Ñaña'pa' yečcatuan po'compuer allochñapa' attoch a'qeshřatan pamo'tsesha'. Atto yečcatan po'compuer e'ñe ñapueť e'ñe pueyemteñoť Yomporpa' eñotataneñña allohuen po'potantañečhno pamo'tsesha' ñetpa' coñchatuerranetcha' Yompor. Ñeñto'marña e'ñe pueyemteñoť, Yomporñapa' e'ñe pocte' entenan Noé.

⁸ Ñaña ahuat Abrahampa' allempo chore'ch Yompor o'ch mueñe al- lařar allcha' apuer pats, ñaña'pa' e'ñe pueyemteñoť Yompor e'ñe cohuen ame'ñya. Allempoñapa' sa'nman pa'netser o' ahuo' ama't ñapa' ama eñoteñe allcha' ta tarro'mar ama puentare all sen. ⁹ Allempo chap anetso all oteñ Yompor ñeñtcha' apuer esempohuañen, allñapa' all yečhosa e'ñe pueyemteñoť Yompor. Tarraña ña allpa' atta yečhosa atet ñerra'm ahuařña. Ama't ñeñt patspa' ñeñt o'patateña Yompor ñeñtcha' apuer, tarraña allempopa' ama apueña' Yompor ñeñt atet oteñ. Ñeñto'mar ñapa' atta shetamtsopo'tos all manatoset. Ñaña ama't ñeñtcha' po'mreñeñ perr Isaac ñaña Jacob ñetpa'cho'ña attera yečherret shetamtsopahuo. Ñetpa'cho'ña atta cohueñet esempohuañencha' apuerranet Yompor ñeñt patser e'ñe atet otenanet ñamet. ¹⁰ Abraham po'ñočpa' aña cohuen ñeñt Yompor pa'netser ñeñt e'ñe echarr ařaret tarro'mar Yompor yečcatene' e'ñe echarr peñ.

¹¹ Puetapor Sarapa'cho'ña e'ñe pueyemteñoť Yomporpa' cheyore'terr ama't ñapa' o' atarr po'nme'ten. Ama't o' meten allempo atto cheyore'ten coyanesha' e'ñe pueyemteñoťa Yomporpa' ña ahuañencat pe' attoch cheyore't. Tarro'mar ñapa' atarr ayemuetpo' entenan Yompor atet oteñ. ¹² Attoña e'ñe Abrahamoťa atarr mererra shonte' acheñenesha' nanac ama't ñapa' o' atarr nanac po'nme'ten allempo. Allpon acheñenesha' ña e'ñe po'mreñeñ řohuenahuet ñeñt allpon shonte' nanac atet ñerra'mrrate' ora allohuen rantočhno ñeñt ento'tsa'yen ñaña atet yenteññañ sa'p po'mñer ñeñt ama e'ñotuapahuoyaye.

¹³ Ñeñtet allponet atarr yemuetnomuet Yompor ama't allempo Yomporpa' ama apuaneta' ñeñt patser ñeñt o'patatanete't. Tarraña ama't ama apareťterreta' ñeñt patser ñeñt o'patatanete't Yompor, ñetñapa' pueyemuetneñoťet Yompor eñoteñet ñetpa' apareťterretcha' ñeñtcha' po'ñoč pa'netser perret. Ñeñtcha' atarr coshaterrahuo. Tarro'marña ñetpa' eñoteñet añ patser po'ñoč ama pa'netsreye' peñeto. Ñetpa' ahuařñanesheta entenet arr patsro.

¹⁴ Ñehua, yeñoteñ acheñ ñeñt atet entetsa ñerra'm ahuařñanesheta ñetpa' aña e'nenet ñeñtcha' e'ñe pa'netser perret po'ñoč. ¹⁵ Ñaña ama añeye' pa'netser peneto allot onet tarro'mar ñerra'm ñeñta e'nenetañpa' po'ñočpa' o'ch alla puerrrerretañ allot onet tarraña ñetpa' ama ñeñteyena e'name'teneto. ¹⁶ Ñetpa' aña e'nete't ñeñtcha' e'ñe

pa'netser perret po'ñoçh ñeñt atarr nanac cohuen, ñeñtpa' añepa't Yompor pa'netser ñeñt pue'ntañ'o'tsen. Ñeñto'marña Yomporpa' e'ñe pocte' entenanet ama penquënaneto atto Po'yomporer peñet. Ñaña'pa' o'patatananet ñeñtcha' e'ñe po'ñoçh pa'netser perret all pue'ntañ'o.

¹⁷ Ñaña allempo Yomporpa' atarr topatan Abraham; ñeñtpa' atet otan Abraham: "Te'pa' o'ch pemtser pechemer Isaac e'ñe atet ñerra'm ñeñt muetsenet nocop." E'ñe pueyemteño't Yompor Abrahamña'pa' e'ñe pocte' eñch o'ch poman puechemer Isaac o'ch muetse Yomporecop. Ñehua, Yomporpa' atet o' otuan Abraham ahuatoteñ: ¹⁸ "E'ñe pechemeresho't Isaacpa' mererrach shonte' acheñenesha' ñeñtcha' e'ñe pem'reneñ peperr." Tarraña ama't atet oteñeñ Yompor, ñaña'pa' e'ñe pueyemteño't Yomporpa' e'ñe pocte' eñch ahuo'ch muetsan po'patrro' allempo atet otererr Yompor. ¹⁹ Tarro'mar ñapa' atet oten, Yomporpa' atarr ahuaemcatesha' ñach tantatuerre' ama't ñeñtcha' rromats. Ñeñtpa' atet ñerra'mrrate' Yomporpa' o' alla tantaterrñañ puechemer rromot, o' alla agapuer pompor po'pocheño.

²⁰ Isaacpa'cho'ña allempo po'n e'ñe pueyemteño't Yomporpa' enaman puechemereshacop Yompor pa'nateña añecop Jacob ñaña Esaú; ñeñtcha' atet bensare'tam'perranet tsapa'onet. ²¹ Jacobpa'cho'ña allempo rromamoch e'ñe pueyemteño't Yomporpa' enamatnoman Yompor pa'nateña pue'ñare'folleshacop ñeñt puechemer José puechemeretollesha' puepo'nmeño'tpa' po'carra quellpuena allña ma'yochenanaña Yompor. ²² Josépa'cho'ña e'ñe pueyemteño't Yompor allempoch rroma allapar all anetso Egipto, ñapa' atet otnoman pamo'tsesha': "Po'ñoçhpa' çhocmach çhap allempoch allohuenes israelena'tarneshas seçha'nerrcha' arrot Egiptot, o'ch sahanerra allo'tsen pats ñeñt o'pataty'e't ahuatoteñ Yompor ñeñtcha' apuerrey. Ñaña ñerra'm esempoch ahuerres arrot'pa' sanerrnancha' nenpa'ts."

²³ Ñaña allempo eñalleta Moisés, pamo'mte'ñapa' e'ñe cohuenatoll entan ematoll. Ñetpa' e'ñe pueyemteño'tet Yomporpa' o' e'pochet. Ama mecha'teññañeto am'cha'taret po'ñoñ ñeñt atet nen attoch çhocma muetsanachet allohuen asheñorro'tollesha' ñeñt eñalleteysa. E'ñe ma'pña arrorr alla e'poteñet. ²⁴ Tarraña Moisés allempo o' po'n ñapa'cho'ña e'ñe pueyemteño'ta Yomporpa' ama mueno o'ch oteñet ño' pue'ñar penña am'cha'taret, tarro'mar ñapa' atta ñañreteña am'cha'taret po'señ ñeñt egipto'marnesha'. ²⁵ Ñapa' añña e'ñe pocte' ent o'ch mueroçhtapretana israelnesha' ñeñt e'ñe pamo'tsesha' pen ñeñtara ñeñt pueyochresha'chno pen Yompor. Ama pocteye' entano o'ch coshapretana egipto'marnesha' ñeñt atet yeçhenet ñeñt ama pocteye' enteno Yompor tarro'mar ñapa' eñoteñ ñeñtpa' e'ñe mamecpa atet coshenet. ²⁶ Ñapa' atta ahuantenan atto atarr sasare'teñet israelnesha'. Tarro'mar ñapa' añ pocte' enten o'ch mueroçhta Cristocop. Ñapa' ñeñtña atarr cohuen enten, ello metana'tuanan ñeñt atet sherben allohuen ñeñt esocmañen ñeñt atarr morrentena egipto'marnesha'. Tarro'mar ñapa' añña cohuen ñeñtcha' apuer Yompor ñeñtcha'ña atarr coshaterre'.

²⁷⁻²⁸ Ñeñto'marña Moisés e'ñe pueyemteño't Yomporpa' atet otan allohuen israelena'tar ñeñt Egipto'tsa'yen: "Te'pa' o'ch semtsa carrnerotoll tarro'mar Yompor otets. Ñeñtña po'rraspa'

o'ch seshellcata'tyes allot sebe'ten so'ponro, allochñapa' ñerra'm esempoch huapa mellaño'teñ ñeñt amñare't ñeñtcha' muetsanatuena'ya' allohuen egipto'marnesha' po'mo'ternesha' attochña sa ñeñtes israelena'tarneshaspa' ama't puesheñarrofesapa' amach muetsenso." Ñaña Moisés e'ñe pueyemteño't Yomporpa' sa'nerran anets Egipto, ama mecha'tnomano ñeñt añcha'tarettetsa all Egipto ñeñt atarr atsrre'mñaí. Moiséspa' atta ahuanta'huanman allohuen ñeñt atarr echarr entyen tarro'mar ñapa' añ e'ñe yemtena Yompor ñeñt ama't ama entpahuoyaye. ²⁹ Ñaña allempo onacherr allohuen israelena'tarnesha' Egiptot allempo chacha'tet atarr sa'po ñeñt otenet Sa'p Tsasasen, israelena'tarnesha' e'ñe pueyemteño'tet Yomporpa' e'ñe atta ahuanmoset all chope'chnomuet atet ñerra'mrrate' e'ñe porrare' patso chope'chenet. Egipto'marnesha'ña ñeñt co'tahuetañpa' ñetpa'cho'ña ahuanmosetañ ñamet all sa'po, tarraña ñetñapa' e'ñe allohuenet ño'shrra'tuusetña all oño.

³⁰ Ñaña allempo chacha'tet all anetso Jericó ñeñtña allo'marnesha'pa' ama mueneñeto o'ch abe'tosamñsarettet. Tarraña israelena'tarnesha' e'ñe pueyemteño'tet Yomporpa' cancherrmatoset; o' canchrrroch puete-samñsame'toset ñeñt anetser Jericó ñeñt atet otanet Yompor. Allempoña e'ñe pueyemteño'tet Yomporpa' ñeñtña conchet allo aconcha'tamñsaret ñeñt anetser all puetesme'tet canchrrroch e'ñepa'tcha' ño'ta mata'nom. ³¹ Ñaña Rahab ama't ñeñt atarr ecañoresha'tatset' ahuatpa' atto atarr yemterrana ñaña Yompor, ñeñt coyanesharpa' ama rromo allempo a'cllataretta allohuen pamo'tsesha' ñeñtara jerico'marnesha' ñeñt atarr atpare'tyesaye't Yompor all anetso. Tarro'mar ñapa' e'ñe cohuen agapan pa'paclo allponsheña israelena'tar ñeñt ñanom amñare'ttatsa all anetso ñeñtcha' eñotenaya' erro'tente'ña ñeñt anetser ñaña ñeñt yechetsa all, ñato' ahuamencatarrerette' ñato'pa' amate'.

³² Po'potantañechnopa' shontemeñ ñeñtcha' alla neyerpaterrsañerr ñeñt atarr yemtaye't Yompor ahuat. Tarraña ama eñalle allponmat yet attoch alla neyerpatuerrsa allohuen ñeñt atarr yemtaye't Yompor, atet ñerra'm Gedeón, ñaña Barac, ñaña Sansón, ñaña Jefe'té, ñaña David, ñaña Samuel ñaña allohuen ñeñt a'mta'yese't Yompor po'ñoñ ahuat. ³³ Tarraña allohuenet e'ñe pueyemteño'tet Yomporpa' pa'namen etsotayenet ñeñt atet muenatenanet Yompor. Puesheña'ttsetpa' e'ñe a'mchechueñet po'potantañ añcha'taretnesha'chno ñeñt e'moñe'tenahuet. Po'potantañapa' e'ñe pueyemteño'tet Yompor e'ñe cohuen añcha'tare'ttenet. E'ñe pueyemteño'tet Yompor ñapa' alla yenpuerranet ñeñt atet otanete't. Ama't po'psheñeñpa' e'ñe pueyemteño't Yompor ama muenatano ma'yarr o'ch erro't pe'. ³⁴ Ñaña ama't tso'ña ama't atarr huomenc huorten ama muenache o'ch atserpe'. Po'psheñeñpa' e'ñe pueyemteño't Yompor ñapa' a'qeshpach attoch ama muetseto espado. Po'potantañpa' ama't ama eñalleto po'huamenc, e'ñe pueyemteño'tet Yompor atarr ahuamencat panet. Ñeñtña huomencñatserpa' alloña quellarenet. Atto e'ñe a'mchechuet ñeñt e'moñe'tenahuet. ³⁵ Ama't po'potantañ coyanesha'chno ñetpa'cho'ña e'ñe pueyemteño'tet Yompor, o' alla atantatare'tterret pamo'ts ñeñt rromuets.

Po'potantañ ama't atarr atserrpatsetare'ttenet, ñetpa'cho'ña e'ñe pueyemteño'tet Yompor ama mueneñeto o'ch quechpuet Yompor

attoch a'rroyaretetyerret. E'ñe pocte' enteñet o'ch rromuet pueyemteñotet Yompor tarro'mar ñetpa' eñoteñet allach tanterret ello ñeñt atarr nanac cohuentetsa. ³⁶ Po'potantañechno ñetpa'cho'ña e'ñe pueyemteñotet Yompor ahuanta'yenet pa'namen atto atarr atserrpáset'aretetyesete't — atfoña atarr ache'tatsetarettete't, all ashtarettete't, ehuananatarettete't, ayottanñsaretetyesete't. ³⁷ Po'potantañ amsanatarettete't atto arrollapecharettete't. Po'potantañpa' ashesharettetyesete't e'ñe puerrochreto atto amsanatarettetyesete't, atarr huomenc huapanete't topateñets. Po'potantañ espado amsanatarettetyesete't. Po'potantañ atta chopeñe'chyese'te't, aña chorra'yese'te't carrnerorrom, ñama cabrarrrom. Atarr huocchañetyesete't atfaña atarr amuerochtatarettete't atto atserrpa'yese'tete't. ³⁸ Atta chopeñe'chyese'te't amayo'mar, aspeno'mar. Esho'tyese'te't arrorofo'mar, mapuetpono'mar aña patsro. Allohuenet ñet ñeñt atto atarr amuerochtatarettete't, Yomporñapa' atarr cohuen entanete't. Ello metana'tueñet ora allohuen acheñenesha' arr patsro. ³⁹ Allohuenet ñeñtet atarr yemte'te't Yompor ahuat, Yomporñapa' e'ñe cohuen entanete't, tarraña ñetpa' amaña enterretoña ora allpon ñeñt atet otanete't Yompor ahuat ñeñtcha' atet apuerranet. ⁴⁰ Tarro'mar Yomporpa' ama't ahuatoteñ añ cotape'chen ñeñt ello nanac cohuen enten ña. Ñeñtpa' yocpa'na allohuenacpay. Ñapa' añ muenen allohueney parro o'ch etsotaterrnay ñeñt o'patatenya ñeñtcha' e'ñe cohuen ya'cohuentaterre' allohueney.

12

Chocmuepa'chña e'ñe yeyemuetneña Yepartseshar Jesús

¹ Ñeñto'marña yeñoteñ shonte' acheñ ñeñt orrtatyesaye't ahuatoteñ; e'ñe pueyemteñotet Yompor e'ñe etsotayese'te't Yomporecop ñeñt atarr echarr. Ñama ñet te'pa' o'ch netma'ntatanet ñerra'mrrate' allohuenetpa' o' cohupreterryet yama o'ch entyesyet errotentcha' yetsota yama ñeñt atet muenateney Yompor. Ñeñto'marña yocoppa' añ poctetsa o'ch e'ñe yesuanom ama't erra'tsena ñeñt yepatare'tene' ama't ñama yo'chñar ñeñt atarr yetpatyene'. Ñama e'ñepa'ch ya'huanta'huanom allohuen ñeñt echarr yentyen. Allochñapa' attoch e'ñe cohuen yet-soteññañ ñeñt atet muenateney Yompor. Ñeñtpa' e'ñe atet ñerra'mrrate' ñeñt matetsa ñetpa' chocmach chapuet allohua onañchareñtenet ñocpuet. ² Añcha'ña chocmuepa'chña e'ñe yeyemuetneña Jesús ñeñt orrtaterre' attoch yeyemtera ñama ñeñtcha' yetsotaterre' ñeñt atto atarr yeyemuetneña. Tarro'mar ñapa' e'ñe pocte' eñche't o'ch ahuanta'huan allohuen ñeñt echarr ente't ama't atto rroma corsocho. Ama't ñeñt atarr apenco'chen entyenet, ñapa' e'ñe poctacma ahuanta'huanemñ. Tarro'mar e'ñe pueyemteñoña Pompor ñapa' eñoteñ ñach apapuerre' ñeñtcha'ña atarr coshatuerre'. Ñeñto'marña te'pa' o' alla anorruerr Pompor po'cohuenrot all anen po'conañño allña partsotuerr ñama.

³ Nehua, te' sapa' o'ch alla seyerpuera Jesús atto ñapa' atarr muerochtater ñeñt atarr ochñañenesha' ñeñt atarr e'moñe'taye't. Tarraña ñapa' allohuen muerochteñetspa' e'ñe ahuanta'huanemñ. Allochñapa' sapa'cho'ña amach cha semuenme'chatsche ñeñtcha' atarr echarr sehuapoya, attochña amach cha llecatenso. ⁴ Tarraña saña ama't atarr

satpare'tyeññ atto atarr topatase't so'chñar amaña čhoye' muetsenseto ñeñt atet ařaretta Jesús, ashatare'tta po'rras ochñartsocop. ⁵ Ñaña sapa' o'te' čha sepuesua ñeñt atet cotape'chateney Yompor po'ñoño allohueney ñeñtey puechemer pen. Ñeñtpa' atet oteney po'ñoñ:

Nechemere, ñerra'm esempo cotape'chaterres cohuen Yompor amachña atta sentatsche ñerra'm ama esoye' sherbeno. Ñaña ñerra'm esempo coñchatas mame' attoch o'ch alla soctape'cherr cohuen amachña ñeñtota čha muene' sequečpatstere. ⁶ Tarro'mar allohueney ñeñtey morrentena Yompor ñeñteyča'ña cotape'chaterreh cohuen. Ñaña allohueney ñeñtey puechemerasha' pen ñeñteyča'ña coñchatyes mamesha'tets attoch o'ch alla yocape'cherr cohuen ñocop.

⁷ E'ñepa'chña ya'huanta'huanom atto coñchateney mame' tarro'mar ñapa' añ muenen o'ch e'ñe puechemer perrey poptacma. Ñehua, yeñoteñ e'ñe pocte' atto ñeñt achemereshat errotenopa' o'ch coñchachet puechemer mame' allochñapa' attoch e'ñe cohuen ame'ñenanet puechemer. ⁸ Tarro'mar ñerra'm esesha' ama coñchatenaye mame' puechemer attoch e'ñe cohuen ame'ñachet ñeñtpa' po'ñočh ama puechemereye' peñe; ñeñtpa' čha ottena ñerra'm ellapnanesha'. Ñeñto'mar sapa'čho'ña ñerra'm ama coñchatenso Yompor mame' attoch same'ñya e'ñe cohuen po'ñočh amaca'ye puechemereye' penso. ⁹ Elloña yeñoteñ allempo cheshenya' ñeñt yompor yepen arr patsro atto e'ñe cohuen cotape'chatyesye't, ñeñtpa' e'ñe pocte' yeñche't tarro'mar yeñoteñ ñeñtpa' e'ñe cohuen yocop. Ñeñto'marña te'pa'čho'ña e'ñepa'chña cohuen yenteñ atto Yomporpa' o' cotape'chaterrey cohuen ñeñtara Yompor ñeñt pue'ntañotsen ñeñt pamo'mte' pen yecamquēñ attoña yapa' corretsayach. ¹⁰ Ñehua, ñeñt yamo'mte' yepen arr patsro ñetpa' e'ñe allponmata cotape'chatyesyete't allempo yapa' cheshenya'. Ñetpa' čhocma coñchatyesyete't allpon pocte' entyesete't ñet. Ñaña Yompor atto allpon coñchatyeney mamesha'tets ñeñtpa'čho'ña e'ñe cohuenacma yocop allochñapa' yapa'čho'ña e'ñech cohuenare' es yorrtatyen e'ñe atet ñerra'm ñapa' e'ñe cohuenare' es orrtatyen. ¹¹ Ñaña yapa' yeñoteñ ñerra'm esesha' yecoñchatene' ñeñtpa' ama cohuenaye' yenteñe e'ñe allempo coñchatenyet, tarro'mar ñeñtpa' čhocmach llecatenyet. Tarraña puecoñchateñotetaypa' o'ch yeñoterr ñeñt atarr cohuen enten Yompor. Allochñapa' attochña e'ñech yocsheñesha' yeyčhena cohuen muechet.

Ñato'tña atta es sepčhamipena'ña ñeñt atet anaret Partseshot socop te'tña ama sečherro ñesho

¹² Ñeñto'marña te'pa' o'ch notas, o'ch alla setanterra o'ch alla sa'huamencatterra Yomporcop. Atetcha' netma'ntatasa atet ñerra'mrrate' o' alla ahuamencat seperr sot ñeñt čha yoncota'ten ñaña atto seyonllocme'chenpa' o'ch alla ahuamencat seperr selloquēm.

¹³ E'ñepa'ch cohuen es sorrtatyen allochñapa' ñerra'm esesha' ama e'ñeye' huomencaye' penaye pueyočher Yomporcop, sañapa' amach añ sorrtateno ñeñtča' a'puerrataterrahuet. Añča'ña sorrtateññañ ñeñtča' e'ñe cohuen yepuene'. Ñeñtpa' atetcha' netma'ntatasa ñerra'mrrate' sapa' añ se'nen toñ ñeñt atarr cohuen pačharr sets muepñarero allcha' e'ñe cohuen sechope'chen. Allochñapa' ñerra'm

eseshas checa'repuets amach čha sepoto'tatse'tnomo amach čha sa'tserrpa'nmo attochña e'ñe cohuen sechope'chnom e'ñe huomenc.

¹⁴ Añepa'chña sema'yočhrena attoch e'ñe cohuen samo'tstannena, e'ñech muechet seyčhena epas allohuen samo'tsashačhno. Ñaña añcha'ña soctape'chyen ñeñt e'ñe cohuenare' enten Parets. Tarro'mar ñerra'm añ ama yoctape'cheno ñeñt cohuenare' enten Paretspa' amach errotenot yentereña Yompor. ¹⁵ Ñaña señotanna'tnomuepa'ch, ñato' eseshapa' ama añeye' e'нено Yompor ñeñt'cha' yempue'. Ñaña señotanna'tepa'ch ñato'tña ama't e'ñe mameshapa' sorrtatena'ña attoch se'moñe'tanna'ta. Ñerra'm atet sepenapa' acopoteñpa' o'ch e'ñe epa'huapa' čhach orrtatan atsrre'moçhen. Attoña ñerra'm shonte' acheñenesha'pa' čhach a'sosyatuanet; ñeñt'pa' ama pocteye' enteñe Parets. Ñeñt'pa' atet'cha' netma'ntacha ñerra'mrate' narmets ñeñt atarr pesherr ye'muen. ¹⁶ Ñaña señotanna'tnomuepa'ch ñato'tña esesha' chetenaya'ña ñeñt ama puetaporeyaye. Amapa' ñato'tña atfa es sepčhampena'ña ñaña ñeñt atarr sherbets Partsocop, ñeñt atet pa ahuat Esaú. Ñapa' e'ñe pa'chporrñoča pomhuan ñeñt anaret ñocop Partseshot. Ñeñt'pa' ñeñt o'patacha pompor ñeñt metana'tuene' ñeñt'cha' allpon apa'nman po'poñ puechemerasha' tarro'mar ñapa' ñeñt e'ñe po'moter pen pompor. Tarraña Esaúpa' ama esoye' enteñe ñeñt anaret ñocop Partseshot ñeñto'mar e'ñe pomhuan ñeñt o'patacha pompor ama't e'ñe parrocha rrachet. ¹⁷ Tarraña e'ñe allponmatapa' yeñoteñ o' alla muenerran ñeñt anaret ñocop Partseshot, tarraña allempopa' amach errotenot alla apuereterro. Ama't pueya'chpeñesha' enamuerreñ allempopa' amate' errotenot a'po'poñeterretoña ñeñt atet o' pohuet ñenmat.

¹⁸ Nehua, yeñoteñ ahuat allempo Yomporpa' eñotatan israe-lena'tarnesha' attoch a'pocatanetañ Parets all aspeno Sinaíño, ñeñt'pa' atarr yoroçhen. Allña aspeno ñerra'm esesha' chapats ama't pa'rrpapa' allorocmach errotoset all. Ñeñtña aspen terpa' all huorten tso' ñaña ama machecmeto, añcha'noçhtena, huomenquëshaten. ¹⁹ All e'morrtena ñaña poctor atarr yoroçhen. Atto eñorana'tanet Paretspa' atarr añcha'noçhen enteñet. Ñeñto'marña acheñenesha' ñeñt e'mñotene' atto eñorena Parets, ñetñapa' atet otyenet. “Ñeñt'epa'ta amach allo'na eñorana'tnenye Parets.” ²⁰ Ama eshcaye' ahuantenaye' enteñeto ñeñt atet otarettenet: “Ñerra'm esesha' chapats ñeñt aspen tero ama't pa'rrpapa' amtsarettepa' — arrolle'tarettepa'ch amapa' enapecharettetepa' panmeto. Ama't ñaña eyarra muetsetepa'.” ²¹ Ama't Moiséspa'čo'ña atarr yoroçhen enteñ, ama't ñapa' atet otanet: “Ama't napa' nemcha'na'teñoča' čha neyonshema'ten.”

²² Tarraña sapa' ama sentare aspenet all añcha'noçhtena Parets. Sapa' aña senterr ñeñt Siónapen ñeñt toma'ntenaya all yeçhena Yompor ñeñt ama arromñañeshayaye. Ñaña aña senterr Jerusalén ñeñt toma'ntenaya Yompor pa'netser ñeñt pue'ntaño'tsen. Allñapa' shonte' coshame'tañpeña mellañoñeñesha' shonte' nanac. Ñeñt allpon allo'tsa'yenpa' ama e'ñotuapahuoyaye. ²³ Ñaña sapa' aña senterr allohuen ñeñt puechemerasha' o' perr Parets ñeñt apçhetsa pame'ñeñoçet ña. Ñetña allohuenetpa' ñeñtet aquellcaretet pa'so'chñeçhno Yompor

pue'ntaño. Ñaña sa te'pa' o' senter Yompor ñeñtcha' yeñotaterre' allohueney erra'tsenchá' cohuen entyesuerr ñaña erra'tsenchá' ama cohuenaye' entyesuerro. Ñaña allo'tsa'yen allohuen acheñenesha' puecamquëñechno ñeñt e'ñe pocte' enten Yompor; ñeñtñapa' o' e'ñe etsotatuanet all pue'ntaño. ²⁴ Ñaña te' o' senter ñaña Jesús ñeñt eñosets yocop Yomporesho attoch e'ñe cohuen a'pocatonay etserra. Ñaña o' señoterrñañ po'rras ñeñt ashatarettatsa alloña o' apretñaretterraña yo'chñar. Ñeñtpa' elloña e'ñe cohuen yenpuerrey. Ñeñtpa' ama atteyaye ñerra'm Abel po'rras ñeñt ashatarettatsa ahuat.

²⁵ Ñeñto'marña te'pa' o'ch notas, se'mñoterepa'ch Yompor ñeñt se'ñorana'tenaya te'. Tarro'mar ahuat israelena'tarnesha' ñeñt ama e'mñotaye'te Yompor allempo eñorana'tanete't arr patsro, ñetñapa' ama eseshaye' qeshpato. Ñeñto'marña yeñoteñ ñerra'm yapa' amach ye'mñotere yaña Yompor ñeñt ye'ñorana'tenaya te' pue'ntañot, elloña yapa'cho'ña ama't pueñeñarrofeyapa' amach eseshay qeshperrtso. ²⁶ Ahuat allempo eñorana'tanet aspenot, po'ñoñña' cha pelle'llchatenan pats. Ñaña te'pa' elloña o' alla atet oterrer Yompor ñeñtcha' atet perrerr; ñeñtpa' atet oten: "Elloña esempohuañen po'pocheñopa' o'ch alla nepelle'llchatererr pats, tarraña amach ñapñayaya pats nepelle'llchaterro, enta'nachña nepelle'llchaterr." ²⁷ Ñeñtña po'ñoñer all oten "po'pocheño" ñeñtña yeñotatene' esempohuañenpa' ahupore'taretterrach allohuen ñeñt aye'chcataret ñeñt apelle'llchatpo'. Allempopa' añach a'puerrtsa ñeñt ama apelle'llchatpahuoyaye. ²⁸ Ñaña atto amcha'tarettena Yompor; ñeñtpa' ama apelle'llchatpahuoyaye. Ñeñto'marña yeparasyoso'chepa'ch Yompor tarro'mar ñeñt o'patatenyapa' ama ahupore'tpahuoyaye. E'ñe yemcha'na'teñotpa' e'ñepa'chña cohuen yesherbeñ Yompor ñeñtcha' e'ñe coshatene' ña. ²⁹ Tarro'mar yeñoteñ ñeñt Yeyomporer yepen ñapa' atarr Parets e'ñe atet ñerra'm tso' ñeñt e'nuene' ama't erra'tsena ñeñt ama erro't apen yenteno.

13

Atetcha' yeña attoch e'ñe cohuen yocshach Yompor

¹ Atterepa'ch chocma semorrentannena allohuenes atet ñerra'm e'ñe semo'nasheñ sepanna'tuena. ² Ñaña amach sepsatsto attoch e'ñe cohuen sagap allohuen ama't esesha ñeñt huapyetsa sepaclo. Tarro'mar ama señotanna'tueno; ñato'rraña añ saguën ñeñt mueñen Yompor atet pena po'potantañ ñetpa' añepa't agapuet mellañoñeñ.

³ Ñaña chocmuepa'chña seyerepya ñeñt ayottamñsaretetyetsa. E'ñech cohuen sellcapretenanet atet ñerra'mrrate' sapa'cho'ña ayottamñsaretes e'ñe parro. Ñaña ñeñt amurochtataretetyetsa e'ñepa'ch cohuen sellcapretenanet ñamet tarro'mar sapa'cho'ña señoteñ attecma errotenopa' chocmach semurochtana samña e'ñe sechtso.

⁴ Ñaña o'ch notas po'poñ: Allohuenes ñerra'm esempo sesna'tena o' e'ñe seyoranna'ta epas setapor e'ñepa'ch cohuen sentña ñeñt atto seyorannena. Ama't parrochapa' amuepa'chña se'namñsanna'tatsto. Yacmapa' amach chetatstano coyanesha' ñeñt ama pueñaporeyaye ama't e'ñe parrocha. Coyanesha'pa'cho'ña amach agapatstanoña ñaña ñeñt

ama puerrollareyaye ama't e'ñe parrocha. Tarro'mar Yomporpa' chocmach tsa'taterrana ñeñt chetene' ñeñt ama puetaporeyaye ama't ñaña ñeñt aguëne' ñeñt ama puerrollareyaye.

⁵ Ñaña te'pa' o'ch noterrser po'poñ: Amuepa'chña aña atarr seye'chapretatsetyesatsto quelle. E'ñepa'chña aña socshena ñeñt e'ñe allpona sechyen. Tarro'mar Yomporpa' atet otene: "Napa' ama't ahuatapa' amach nequechpuerrso, amach na'ypo'ñerrso ama't ahuata."

⁶ Ñeñto'marña yeyemteño' Yompor e'ñech yocsheñesho' chocmuepa'ch atet yoten:

Yomporpa' ñeñña yeyenpuene' ñeñto'marña amach es yemcha'tatsto. Ama't errotuanen muene' peney po'potantañ Yomporpa' ñach yecuañpene'.

⁷ Ñaña seyerpueño' chocmuepa'ch cohuen senteñ ñeñt a'potene' Yompor po'ñoñ socop, ñeñcha' señoatnomue' cohuen. Ñaña o'ch soctape'ch ñeñt atarr cohuenare' orrtatyesnomuet sesho, atto ñetpa' e'ñe cohuen yemteñet Yompor, sapa'cho'ña atetcha' sepa samña yemtenaya Yompor e'ñe cohuen.

⁸ Jesucristo ñapa' atterach yeyemteña ama't ahuatoteñ, ama't teme'ttsen, ama't ñaña errponañohuen ñeñtach attera ayemuetpotena.

⁹ Ñeñto'marña amach seyematstoña ñeñt po'poñechno yehateñets ñeñt ama atteye' aychatareteso ahuañmo'choteñ. Tarro'mar aña poctetsa o'ch huomenc ye'pa' yeyo'cher e'ñe Yompor puemorrenteño'tey atto atarr yenpueney e'ñe atfa. Ama aña'te'ye' huomenc yepenoña yeyo'cher atto es yerra'yen amapa' atto es yetore'tyena. Tarro'mar ñeñt cotene' añ yehateñets rreñsocpa'na, ñeñt yehateñsorpa' ama yenpuenaneto attoch huomenc pa'nmuet pueyo'cher Yomporecop.

¹⁰⁻¹¹ Ñehua, yeñoteñ ñeñt corneshatets judioneshacop ñerra'm esempo muetsenet eyarra all altaro ñeñt po'chñarecquet, ñeñña eyarra po'rraspa' ñeñtpa' o'ch anem' cornesha' e'ñe allohuanen Parets po'ponro ñeñt ochñartsocpatets. Tarraña ñeñña eyarra po'chetspa' amach esesha' rrenaye. Ñeñña po'chetspa' o'ch anmet a'yo all ama acheñempaño'yaye, allcha' chamoset. Tarraña te'ña yocop ñeñt amtsarettertsa yo'chñarecop ñeñtpa' Cristo. Yapa' ñeñt po'ñoñ pocrañ pen yecamquëñ allohueney ñeñtey yemtenaya ña. Tarraña ñeñt attera corneshatets judionesha' pocta'ñacop all po'prahuo peñet, ñetpa' amach errotentot pocrañ petoña Cristo.

¹² Ñaña atto anenan judionesha' eyarra po'chets a'yo all ama acheñempaño'yaye, ñeñtpa' añ toma'ntena atto Cristopa'cho'ña anmet a'yo all ama acheñempaño'yaye allcha' e'ñe puemuerochtateño'tetpa' o'ch rroma. Attoña e'ñe ña po'rroso a'cohuentaterrey Partsocop.

¹³ Ñeñto'marña te'pa' e'ñepa'chña yesuanom ñeñt ahuat yocpa'ña ñeñtara ñeñt ya'netser yepenpa' o'ch ahuey a'yo allo'tsen Jesús. Allcha'ña yemuerochtapretosya yaña all atarr otnare'tyeñet.

¹⁴ Tarro'mar aña patserpa' ama añeyaye ñeñt po'ño'ch ya'netser yepen tarro'mar ñeñtpa' huañerrcha'. Yapa' aña ye'nen ñeñcha' ya'netser yeperr ñeñcha' yenterr Yompor pue'ntaño ñeñt ama ahuañaño ama't e'ñe errponaña. ¹⁵ E'ñe yeyemteño' Jesucristo chocmuepa'chña ya'ye'chochtateññañ Yompor. Atto chocma ya'ye'chochtateññañ ñeñtpa' añ toma'ntena ñeñcha' ya'pueñ Yompor atet pete't ahuat o'ch muetset eyarra ñocop. E'ñepa'chña

ya yenamot ya'ye'chochtateññañ pa'so'cheñ attochña e'ñech yocshateñ.
 16 Ñaña chocmuepa'chña e'ñe cohuen seyenpannena ñaña e'ñech cohuen sa'muerañtena. Tarro'mar te'pa' ñeñña atto es yapueñ Yompor ñeñtcha' atarr coshatene' ña.

17 Ñaña ñeñt sa'mcha'tareternesha' sepa'yenpa' chocmuepa'chña same'ñenanet, tarro'mar ñetpa' añecop anareñtenet ñetcha' cohuanpenet secamquëñ Yomporecop. Ñaña Yomporpa' eñotatuerranetcha' ñeñt atet pa'yenet, ñato' e'ñete' cohuen cohuanpenset ñato'pa' amate' cohuenaye' cohuanpenseto. Ñeñto'marña socoppa' añ poctetsa e'ñechña cohuen same'ñenanet attochña ñetpa' e'ñech pocsheñeshocmañen torrenet socop. Amuepa'ch cha sellcatatstenaneto tarro'mar ñerra'm atetpa' amach er-rotenot coshaterrsetoña saña.

18 Ñaña te'pa' o'ch notas, chocmach sema'yochampenya. Yapa'yenotena yeyochro ama eñalle attoch po'poñ yentannena. Yapa'añña yemnen chocmach yorrtatyen ñeñt atarr cohuen enten Yompor.
 19 Ellopa' o'ch alla noterrser chocmach sema'yocham'pesna allochñapa' amach atarr atomatatstopa' o'ch alla neçherrerr sesho.

Arrpa' all so'tnerranet po'cartot

20-21 Te'ñapa' Yomporepa'chña e'ñe ahuaencat sepene' ama't allohuen pa'namenacop ñeñt atarr sherbets ñocop. E'ñe yame'ñeñot Puechemer ñeñt Jesucristo ñachña ya'cohuentatene'ña ora yoctapña ñeñt atet yoctape'chyen yeyochro allochñapa' attochña e'ñe cohuen yoctape'cherr ora allohuen ñeñt cohuen enten ña. Attochña e'ñech cohuenare' sorrtatyen ñeñt e'ñe atet muenen ña. Ñeñtpa' ñeñtara Yompor ñeñt e'ñe yocshatene' yeyochro ñaña ñeñtara ñeñt tantaterre' Puechemer rromot ñeñt Yepartseshar yepen, Jesucristo ñeñña atarr cohuen yecuanpene' atet ñerra'mrrate' ñeñt atarr cohuen cohuanpene' po'carrneror. E'ñe po'rrosoña alloña a'poctatonay ñeñt e'ñe etserra ñeñña a'poctateñetspa' ama't errponañapa' amach huañerro. Te'ña e'ñe tayoteña' yecohuentatoñepa'ch Cristo ama't errponohuañen. Ñeñtpa' atetepa'ch Nompore yocop.

22 E'ñe allohuanen masheñeshacha' ñaña noçhaneshacha' o'ch alla noterrser, e'ñepa'ch cohuen se'mñoton neñoñ ñeñt allpon o'ch alla noctape'chaterres tarro'mar ama atonaye' ñoñets nequellquënnaso.

23 Ñaña o'ch neñotatas masheñ Timoteopa' o'ch alla a'rroyeret. Ñerra'm ahuencha' chap arrpa' epsheño'mareypa' o'ch ahuey o'ch yemo'tensa'.

24 Ñaña napa' nemnen o'ch nehuomcha'ch necartot allohuen ñeñt sa'mcha'tareternesha' sepa'yen, ñaña allohuen masheñeshachno ñeñt pueyochresha' pen Parets all sesho. Ñaña itatio'marnesha' ñeñt ame'ñetsapa' ñetpa'cho'ña mueneñet o'ch huomcha'taset ñamet añ necartot.

25 Te'ñapa' Yomporepa'ch sa'nataya allohuenes. Ñeñtach notas, ñeñtpa' atetepa'ch Nompore. Allohua.

AÑ SANTIAGO PO' CARTA SANTIAGO

Atto Santiago quellcan carta allohuenacop ñeñĩ atto parratse'tyets allemeñ

¹ Masheñeshacha' ñaña nochaneshacha' ñeñĩtes Israel puechemere-sha' po'mrenñes, ñeñĩ charrasheña puechena epsheña ñeñĩña po'mreneñ sepeñeña sa, ñeñĩtes atto parratse'tyets allemeñ anetso'mar. Na Santiagon sequellqueneña añ carta ñeñĩten torretsa Yomporecop ama't ñaña Puechemerecop Jesucristo ñeñĩ Yepartseshar yepen. Te'pa' o'ch nehuorñcha'tas allohuenes añ necartot.

Attoch ya'huanten allohuen topateñets

² Ñaña te'pa' o'ch masheñeshacha' ñaña nochaneshacha' notas, ñerra'm esempo huaponasa pa'namen topateñetspa' sapa' socshepa'ch nanac. ³ Tarro'mar sapa' señoteñ ñerra'm cho huaponaya topateñets, ñeñĩpa' añecopcha' huapa attoch topatenya' ñerra'm po'ñochte' yameñena. Allochñapa' attoch chocma es ya'huanten. ⁴ E'ñe pocte' allo'nepa'ch sesen ahuanta'huanmue' allohuen topateñets, allochñapa' attoch poctacma huomenc sepa' seyocher Yomporecop, ñaña attoch amach es sepallteno ama't mamesha atto sameñeña Yompore.

Yomporpa' chocma mueneñ o'ch es eñotatey

⁵ Ñerra'm eseshaste' ama e'ñeye' eñotenaye ñeñĩ cohuen enten Yomporpa' sapa' añcha'ña senam Yompore, ñapa' chocmach es eñotatey, tarro'mar ñapa' e'ñech pocsheñesha' es apueney allohueney, amachña ñeñĩapa' cha che'ptare'tye. ⁶ Tarraña ñerra'm esempo es senamueñ Yomporpa' e'ñech seyemteñoñ es sanamñ. Amach cha se'charrtatsto seyochro ama't mamesha. Tarro'mar ñeñĩ chocma e'charrtetsa pueyo'chropa' amach e'ñeye' yemtenano Yompore ñeñĩto'marña ñeñĩ atet petsapa'chach ottena ñerra'mrrate' oñ pue'mo'yer ñeñĩ allemñateñ anen mñorr. ⁷⁻⁸ Ñeñĩ atet petsapa' e'ñochetepa' po'ño'chpa' amach es ape Yompore, tarro'mar ñeñĩ atet petsapa' amach patrraye' cotape'cheno. Atet ñerra'm te'pa' ñato' po'poñcha' cotape'chen, ñato' tsapatñapa' o'chcho' cotape'chenan po'poñ. Ñeñĩ acheñerpa' chocmach atet pa'yena.

⁹ Tarraña ñerra'm eseshas masheñre esempo atet sentena ñerra'm ama esoshe'mayaysopa' socshepa'ch, tarro'mar allempo Yomporpa' atetcha' entenes ñerra'mrrate' ñeñĩtes nanac sherbets. ¹⁰ Ñaña añ masheñer ñeñĩ echene' shonte' po'çllayorpa' coshepa'ch ñerra'm esempo es huapoya. Allempopa' amach esoshe'maye' entereto. Tarro'mar ñeñĩ eçllayoreñ ñeñĩpa' mamecpa atet pena ñerra'mrrate' ta'te' puerorer ñeñĩ nanac auyaña. ¹¹ Tarro'mar ñeñĩ ror atetpa' ñerra'm o'ch huapa'muena atsne', ñerra'm o'ch atserrtapa' chach a'uyatoñña pue'chor, añña puerorerñapa' o'ch shorna'tua; ñeñĩña atto cohuentenapa' o'ch huañ. E'ñe atet penaña ñeñĩ eçllayoreñ. E'ñe puechecma'teño'pa' huañerrcha' ñaña.

E'ñe yañeña yemnenñoñ topateney oneñeñ

¹² Nanac cosheñtso'tsen allohuen ñeñĩ ahuantene' ora pa'namen topateñets, tarro'mar ñerra'm esempo ahuanta'huan ora topateñetspa'

nanaccha' cohuen entuer Yompor. Allempopa' aphuercha' Yompor ñeñtcha' atarr coshaterre' alloch ñapa' corretsach tayoteñ ama't erponañohuen. Ñeñt'pa' aña o'patatena allohuen ñeñt morrentenaya ña. ¹³ Ñaña te'pa' o'ch notas, ñerra'm esempo e'ñe sañeña semneññoť o'ch sepa ñeñt ama cohuenayayepa' amach sotatsto, "aña' Yomporte' o' topaten." Tarro'mar Yomporpa' ama esesha' topatenaye attoch ñapa' o'ch pa ñaña ñeñt ama cohuenayaye. Ñeñto'marña ñapa'cho' amach errotenoť topatye yaña. ¹⁴ Elloña añmapa' e'ñe sañeña semneññoť attoch huaponasa topateneťs o'ch sepa ñeñt ama cohuenayaye. ¹⁵ Tarro'mar ñerra'm esempo es yemnatse'tyen yeyo'chro, ñerra'm o'chcho' ye'pa atetpa', ñeñt'pa' ñeñt'ña yo'chñar yepen. Ñaña ñerra'm chocma allo'na yesen pa'nmue' ñeñt ama cohuenayayepa' e'ñe yo'chñarot'pa' o'ch yechenquerra.

¹⁶ Masheñneshacha' ñaña nothaneshacha' e'ñe nemorrenteñotespa' o'ch alla noterrser, amach sepantatsche sañeña. Po'ño'chpa' ama Yomporeye' yetpatenaye attoch ye'pa' ñeñt ama cohuenayaye. ¹⁷ Yomporpa' e'ñe cohuenare' es apueney ñeñtcha' allo'na yeyenpuene' ñeñtara ñeñt mueñennay pue'ntañoť. Ñaña ñeñtara Yompor ñeñt ye'chcate' allohuen ñeñt ye'choyo'tañpene' pue'ntañoť. Tarraña erroteno e'ñe puechope'cheñotpa' amach tama choyo'tañpenye. Tarraña Paretspa' ama atteye' peno. Ñapa' amach ellopa' alla a'po'poñetañperrye ñeñt atet muenateney. ¹⁸ Allempo yame'ñerrñaña po'ñoñ ñeñt e'ñe po'ño'ch atet oteney ñeshoññapa' ye'ñalleterra atet ñerra'mrrate' e'ñe puechemerey ñeñt e'ñe po'moter pen ñeñt anaret e'ñe ñocop. Tarro'mar ñeñt'pa' atet muenen ña.

Añpa' ñeñt'cha' atet yesherbe' Yompor e'ñe cohuen

¹⁹ Ñeñto'marña masheñneshacha' ñaña nochaneshacha' e'ñe nemorrenteñotespa' o'ch neñotaterrser po'poñ. Sa allohuenes añ poctetsa chocmach pocte' señch o'ch se'mñoch cohuen ama't erra'tsena ñeñtcha' serrpare'tatets. Añcha'ña chocmach serrmuen señoñ. Ñaña amach e'ñe attota sa'tsrre'ma'yeno, chocña ñanom es soctape'ch ñato' at-srre'mochente' ñeñt atet otenset, ñato' amate'. ²⁰ Tarro'mar e'ñe ya'tsrre'mueñoťpa' amach errotenoť yetsotoña ñeñt atet pocte' enten Yompor. ²¹ Ñeñto'marña sapa' o'ch seque'chpa'huerr sosya'tsañ ora allohuen ñeñt shonte' sepa'yen ñeñt ama pocteyaye Yomporecop. Añcha'ña sapa' o'ch sagapoñ Yompor po'ñoñ e'ñe señmañesha'. Tarro'mar ñerra'm o'ch chaponaya Yompor po'ñoñ e'ñe yeyo'chropa' ñeñt'pa' ñeñtcha' ya'qeshpaterre' esempohuañen yecamquëñoť.

²² Ñaña sapa' amach e'ñe orrena se'matstoñe Yompor po'ñoñ, chocña sorratyeseña ñeñt atet oteney. Tarro'mar ñeñt e'ñe orrena e'muene' Yompor po'ñoñpa' ñeñt'pa' ñañeñach shequëtsa tarro'mar chate' otenapañ ñato' ñeñtate' poctetsa ñocop attoch qeshperra. ²³ Ñaña ñeñt atet petsapa' chach ottena ñerra'mrrate' ñeñt atta cohuetra rerpo. ²⁴ Añecpach cohuen o'ch entan errotenoť orrtena pa'clloyoť. O'chña entuan ñeñt atet orrtena' allempoñapa' o'ch ahuerr. Allempoña cherr a'yopa' o'ch alla puesuerran ñeñt atet orrtena pa'clloyoť. ²⁵ Tarraña ñeñt'ña e'ñe pomnenñoť ma'yochrenaya Yompor po'ñoñ ñeñt e'ñe cohuen atet oteneypa' ñeñt'ña' ama atteye' peno ñeñt atet pena ñeñt e'ñe orrena

e'muene' Yompor po'ñoñ ñeñt' atta puesene' ñeñt' atet' oteney Yompor. Añcha'ña chocmach orrtatyenan ñeñt' atet' oten Yompor po'ñoñ. Elloña ñeñt' atet' petsapa' nanaccha' cosheñtso'tsen.

²⁶ Ñerra'm esesha' otets ñapa' nanaco' cohuen sherbenan Yompor, tarraña ñerra'm ña ama anenano po'ñoñpa' ñeñt'pa' ñañeñach shequëtsa. Tarro'mar ñerra'm atterach yeñosatse'tyenpa' amach po'ñoçhaye' yesherbeñe Yompor. ²⁷ Añña e'ñe pocte' enten Yompor Apa ñeñt'cha' atet' yesherbeñ ña e'ñe cohuen: O'ch yeyenpueñ huocchaneshaçhno, ñaña rretorranesha' ñerra'm esempo es muerochtatenahuet. Ñaña yapa' amach ya'sosyatatsto yechets ñeñt' atet' patse'tyena ñeñt' ama ame'ñetso arr patsro.

2

Atto amach puesheña'ttsa cohuen yentatsto

¹ Masheñeshacha' ñaña noçhaneshacha' te'pa' o'ch noterrser po'poñ. Sa e'ñe same'ñeñof Yepartseshar Jesucristo ñeñt' e'ñe coçhneshare' orrtatetspa' amach puesheña'ttsa e'ñe cohuen sentatsto. Sapa' e'ñech cohuen senteñ allohuen acheñenesha'. ²⁻³ Ñato' sa errotenopa' o'ch sapçhena allohuenes Yompor pa'paclo. Allempoña sapçhenapa' ñato' o'ch huapa puesheñarr ñeñt' chorrenaya ñeñt' nanac cohuen, ñeñt' nene' anillo orotlullen. Ñato' ñapa' e'ñech cohuen sagaþ o'chçho' sotaþ: "Panorros arr allame'tets e'ñe cohueno." Ñato' e'ñech allempocma o'ch huapa ñaña ñeñt' atarr huocchañ ñeñt' cha shetsre'she'muen pa'shtam. Ñato' ñeñt'ña' çhach sotaþ: "Papa' alla patomos tarronet, amapa' alla panorros patso." ⁴ Tarraña ñerra'm atet' sepenapa' ñeñt'pa' amach allohuenacmaye' cohuen sentanneno. Ñaña çhach sottena ñerra'mrrate' sañeña eñotene' ñeñt' acheñer nanac sherbets. Tarraña ñerra'm atet' yepenapa' ñeñt'pa' amach cohuenaye' yoctape'cheno. ⁵ Masheñeshacha' ñaña noçhaneshacha' e'ñe nemorrenteñotes te'pa' nemneñ o'ch se'mñoten ñeñt'cha' atet' notas. Elloña Yomporpa' añña nanac muenen o'ch acerran allohuen ñeñt' nanac huocchañetets añ patsro, attoch e'ñe pame'ñeñofet ñetpa' echerretcha' esocmañen Yomporeshot. Esemphuañenñapa' o'ch aguërret ñaña ñeñt' o'patatenanet Yompor all añcha'tarettena pue'ntaño. Ñaña ñeñt' o'patatenya allohueney ñeñt'ey morrentenaya ña. ⁶ Tarraña sañapa' çhaña semneñ o'ch sepencach ñeñt' huocchañetets. Sapa' ama't señoteñeña ñeñt' nanac eçllayoretpa' ñeñt'ña es aprratamþsañ, amapa' o'ch temantas añcha'taretesho. ⁷ Ñaña ama't señoteñeña ñeñt' nanac eçllayoretpa' ñeñt'ña nanac achmãare'tene' Cristo pa'so'cheñ ñeñfara ñeñt' nanac añcha'na'tpo' yenten ya ñeñt'ey Cristona'tarey.

⁸ Ñerra'm chocma semorrentannenapa' allempopa' o'ch setsotua añ ñoñets ñeñt' atet' anaret' Yompor po'ñoño ahuatoteñ, ñeñt'pa' atet' oten: "O'ch atarr cohuen pemuerya þamo'ts e'ñe atet' atarr pemorrentena þañeña." Añ ñoñets ñeñt'ña nanac sherbets, ello metana'tuenan po'poñeçhno. Ñerra'm atet'cha' seþapa' allempopa' amach es sepallteno Yomporcop. ⁹ Tarraña ñerra'm sapa' e'ñe puesheña'ttsa semorrentenapa' ñeñt'pa' allotña chocma yo'chña'ten. Ñaña ñerra'm atet' yepenapa' nanaccha' yeyoren yo'chñar, tarro'mar

ama atet yepeno ñeñt atet oteneY Yompor po'ñoñ ñeñt atet anaret. ¹⁰ Ñaña ama't e'ñe yeychatset allohuen Yompor po'ñoñ ñeñt atet anaretña', ñerra'm paterrñapa' ama atteye' yepeñepa' Yomporñapa' o'ch enteneY ñerra'mrrate' o' ora yepanta'huoñ. ¹¹ Añ Yompor ñeñt yotene' "amach sechtapretatsto taporets" ñeñtara Yompor ñeñt yotene' ñaña "amach semtsanna'tatsto." Ñeño'marña ama't ama yechtapretatsto taporetsña' ñerra'm errotenopa' machayota yemtse acheñ Yomporñapa' o'ch enteneY ñerra'mrrate' o' ora yatpare'tuoñ po'ñoñ ñeñt atet anaret. ¹² Ñeño'marña sapa' chocmach seyerpa atto esempohuañen Yomporpa' eñotatyesserrecha' e'ñe errotench'a' entyesserrey. Tarro'mar ñato' yepena ama't ñeñt atet oteneY te' Cristo po'ñoñ ñeñt atet anaret ñeñt ama amuerochtatañeyaye. Ñeño'marña sapa' e'ñe señoeteñoñ atetpa' ama't errotena señenpa' e'ñepa'chña cohuenare' señosyen. Ñaña e'ñe señoeteñoñ atetpa' e'ñepa'ch cohuenare' es sorratyen. ¹³ Ñaña sapa' señochepe'ch ñeñt ama morrentenayo te' pamo'tspa' ñapa'cho'ña esempohuañen allempoch eñotatyesserrey Yompor e'ñe errotench'a' entyesserrey, ñapa'cho'ña allempopa' amach eseshaye' morrenterrayo. Añña ñeñt morrentenaya te' pamo'tspa' esempohuañenña allempoch eñotatyesserrey Yompor e'ñe errotench'a' entyesserrey, allempoña ñapa' nanaccha' amuerare'tterra.

Ñerra'm po'ño'ch yame'ñenapa' choch yorrtat ñaña ñeñt cohuentetsa ñocop

¹⁴ Masheñeshacha' ñaña no'chaneshacha' te'pa' o'ch notas. Po'ño'ch ama sherbenoña añ acheñer ñeñt otets ñapa' ame'ñeno', tarraña ñerra'm ama orrtatenano ñeñt cohuentetsa Yomporecop. Ñeñtña acheñer atetpa' amach po'ño'chaye' ame'ñeno. Amachca'ye a'queshpaterena ñeñt atto oten e'ñe orrena ñapa' ame'ñeno'. ¹⁵ Ñehua, ñato' o'ch netma'ntacha atet. Ñerra'm puesheñarr masheñ, amapa' yo'ch palltenet ñeñtcha' chorret, amapa' ñeñtcha' rret allempo, ¹⁶ tarraña ñerra'm sapa' atta sotyeñ: "Ahua'ta, Yomporepa'chña pa'nataya. Eñalletepa' ñeñtcha' pechorra, ñaña ñeñtcha' perra'." Tarraña ñerra'm amaña es sape ñeñt palltenapa' atetpa' amaca'ye choye' es sesherbena. ¹⁷ Ñeñtpa' atet pena ñaña ñerra'm esempo atta yoten, "napa' name'ñena", tarraña ñerra'm ama yorrtateno ñeñt cohuentetsa Yomporecoppa', ñeñtña atto yoten, napa' name'ñenapa' amach es sherbena. Chach yottena ñerra'mrrate' o' huañerr atto yame'ñena.

¹⁸ Ñato' o'ch netma'ntacha atet. Ñato' puesheñarrpa' o'ch otan po'psheñeñ: "Papa' e'ño' peyemteññaña ñeñt atet oteneY Yompor po'ñoñ, tarraña amaña porrtatyenoña ñeñt atet oteneY Yompor po'ñoñ. Tarraña napa' e'ñe nepohuen ñeñt cohuentetsa Yomporecop. Ñehua, ¿erra'tsenoteyte'ña e'ñe pocte' enten Yompor?" Ñehua, te'pa' o'ch notap ñeñtep atet otets: Po'ño'ch ñerra'm ama yepeno ñeñt cohuentetsa Yomporecoppa' amach errotent yeñotache po'psheñeñ ñato' po'ño'chte' yeyemteññaña Yompor po'ñoñ. Tarro'mar ñerra'm po'ño'ch yame'ñenapa' chocmach yorrtat ñaña ñeñt cohuentetsa Yomporecop. ¹⁹ Ñaña papa' peyemteño'pa' peñoteñ Yomporpa' e'ñe patrra. Ñehua, ñeñtpa' e'ñe pocte' atet, tarraña oneñetpa'cho'ña eñotenan ñaña atet. Tarraña ñapa' ama't eñotenaneñña Yomporpa' ama't e'ñe patrra, tarraña po'yorño'fach

eñoteñ, tarro'mar ñapa' eñotena amach queshperro. ²⁰ Te' p̄apa' amate' peñoteña'. Chote' pemneñ o'ch neñotatañ atto ñerra'm ama yepeno ñeññ cohuentetsa Yomporecoppa' ama't yoteneñ yame'ñena e'ñech orrena atet yoten. ²¹ Ñehua, Yomporpa' e'ñe pocte' entan ahuat yatañ Abraham allempo muene' muetsaneñ puechemer Isaac Yomporecop,* tarro'mar ñapa' añ orrtaten ñeññ cohuen enten Yompor. ²² Ñapa' e'ñe pocte' entan Abraham tarro'mar e'ñe pueyemteño'pa' orrtatuan ora ñeññ atet och Yompor. Ñeñño'marña yeñoteñ Abrahampa' e'ñe poctacma ame'ñane't Yompor. ²³ Allempo atet pe'tpa' attotña e'ñe etsotuan Yompor po'ñoñ ñeññ atet aquellcare't ahuatoteñ Génesis, ñeññtpa' atet oten: "Abrahampa' nanac yemtana Yompor, ñeñño'marña e'ñe pueyemteño'fa Yomporñapa' e'ñe pocte' eñche't. Ñeñño'mar Abrahampa' atet ochete't, añmapa' ñeññ e'ñe parro yemtena epuet Yompor."

²⁴ Ñeñño'mar yeñoteñ Yomporpa' e'ñech pocte' enteney ñerra'm esempo yorrtatyehñañ ñeññ cohuentetsa ñocop. Ama't errpon yotatset yapa' e'ñe cohuen yame'ñena tarraña ñerra'm ama ye'pohueno ñeññ atet muenen ñapa' amach erro'tenot pocte' entyeña Yompor. ²⁵ Tarro'mar ama't Yomporpa' e'ñe pocte' entan ahuat coyanesha' ñeññ pa'so'cheñ Rahab, ama't ñapa' allempo pa' ñeññ e'ñe pocte' ent Yompor ñocop. Ama't ñeññ coyanesha'pa' nanac ecañoresha't, tarraña ñapa' e'ñe añota pocte' eñch Yompor atto ñapa' agapan e'ñe cohuen pa'paclo ñeññ mueña ahuat Josué ñeññcha' entenaya' ñanom pats. Allo'tpa' ñaña ahuo't gaterranet po'poñ toñ allcha' oñerret attoch ama rromuerraneto allo'marnesha' ñeññ e'moñe'tenahuet. E'ñe atet puepeño'fa Yomporñapa' e'ñe pocte' eñch e'ñe attecma ñerra'm Abraham. ²⁶ Ñeñño'marña te'pa' yeñoteñ ama't errpon yotatset yapa' e'ñe cohuen yame'ñena, tarraña ñerra'm ama yorrtateno ñeññ poctetsa Yomporecoppa' amate' eso yesherbeña Yompor. Ñato' o'ch netma'ntacha atet. Allohueneypa' e'ñe yeñotueñ ñerra'm esempo yeñch yamo'ts o' rromapa' o'ch yeñoch ñeññtpa' o' sa'neñ puecamquëñ tarro'mar ñerra'm ñeñño' o' yerromapa' añ yechetspa' amach es sherberre'te.

3

E'ñe yeñosatse'teño'fa nanac yochña'ten Yomporecop

¹ Masheñeshacha' ñaña no'chaneshacha' te'pa' o'ch notas po'poñ. Ama pocteyaye o'ch sechen shonte' ñeññ muenets o'ch cotape'chaten ñeññ cohuentetsa Yomporecop. Tarro'mar señoteñ ñeññey cotape'chatets cohuen Yomporecoppa' ello nanaccha' yoro'cheno'tseney ñerra'm esempo yepena ñeññ ama cohuenayaye tarro'mar Yomporpa' amach pocteye' entenye ama't e'ñe mamesha. ² Tarro'mar allohueneypa' chocma es yepanten. Ñerra'm esesha'ña ama es panteno pueñosatse'teño'pa' ñeññña po'ño'chpa' e'ñech cohuen cotape'chen, ñaña ñeññ atet acheñpa' e'ñech eñoteñ attoch huenatan ora ñeññ atet muenatse'tyen yechets. ³ Atet pena ñaña cahuall. Ñerra'm echenan attoch yame'ñacha, E'ñe puenamo'tpa' esheccha' yanemñ all yesechateñ. E'ñe puenamo'tpa'

* **2:21** Ñehua, ahuat Yomporpa' ahuo't otan Abraham muetsanepa'to' puechemer ñocop. Tarraña ñapa' añecpa atet och attoch topach ñato' po'ño'chte' ame'ñeña. Ñeñño'marña Abrahampa' autsa muetsayeh puechemer Yomporecop, tarraña ello'pa' ama muenache Yompor.

o'ch yameñacha ora pue'mocrohuen. ⁴ Ñato' o'ch netma'ntacha ñaña ñeñt atet pena bote ñeñt chope'chets oño. Ñehua, botepa' ama'tcha' nanac añecmuen noñtpa' e'ñe puepopapa'otpa' o'ch aneñet all sechateñ pamo'mte'. Ñaña ama'tcha' puepopappa' añetollpach, ñaña ama't mörppa' mueneñeñcha' o'ch anem a'yenet allenet ama yesechateñe, e'ñe puepopapa'otpa' o'ch e'ñe cohuen aneñet allenet sechateñ pamo'mte'. ⁵⁻⁶ Atet pena ñaña yenam. Yenampa' ama't añetolla yechetspa' atar-rcha' pa'namen esocmañen yeñosyen allot. Ñaña ñeñt atto yeñosatse'ten sosey e'ñe yenamotpa' ñeñtpa' atet pena ñerra'mrrate' tso'. Ñehua, tso'pa' ama'tcha' añetolla ya'torapa' mameshapa' o'ch epa'hua erracmañen puetsato'mar, allotpa' o'ch a'poyuonay ama't ora ñeñt nanac yemorrentena. Ñeñtpa' atet pena ñaña eñosatse'teñets. Eñosatse'teñetspa' ama'tcha' mamesha yeñosatse'tpa' mameshapa' o'ch epa'hua erracmañen. Allempoñapa' o'ch cha a'huañerran ñeñt cohuentetsa Yomporecop. Tarro'mar ñeñt atto yeñosatse'tyenpa' allot huena esocmañen sosya'tsañechno ñeñt añe patsro'tsen. Ñaña ñeñtpa' a'sosyatennay ora allohuen yoctapña. Ñaña allohuen eñosatse'teñetspa' arroñ huena e'ñe oneñet pa'netsroñ, allara coñcha'puetso all parraren tso' erraparen. Ñeñtcha' a'sosyatene' ora allohuen ñeñt atet yocrena arr patsro. ⁷ Ñehua, allohueney acheñeypa' e'ñe pomnaren yepohueñ allohuen berrochno, ñaña otechno, ñaña allohuen shechpechno, ñaña ama't ñeñt yecha'yetsa oño'mar. Ora añechnopa' e'ñe pomnaren yepohueñ. ⁸ Tarraña atto yeñosatse'tyen yenamotpa' ama esesha' pomnaren penaye. Tarro'mar atto yeñosatse'tenpa' amate' errotenoñ yeunache, ñeñto'marña chocmach yeñosatse'tyen. Ñeñto'marña yeñosatse'teñapa' e'ñe atet pena ñerra'mrrate' shecheñ ñeñt nanac amtsañ. Shecheñ amtsañpa' ñerra'm cho achay mameshapa' o'ch muetsay. ⁹ Ñaña añ ñeñtara yenamotpa' ñato' errotenopa' o'ch ya'ye'chochtatoñ Yompör ñeñt Yepart-seshar yepen. Tarraña errotenopa' ñeñtara añ yenamotpa' ñato' o'ch yesasare'ch yamo'ts ñeñtara ñeñt yeçcat Yompör ñeñt puetma'ntatara atet ñerra'm ña. ¹⁰ Ñeñto'marña masheñeshacha' ñaña noçhaneshacha' sapa' amach atet sepatsto tarro'mar ama pocteyaye e'ñe yenamotpa' allot yenamateññañ yamo'ts Yompör pa'nateña, ñato' elloñapa' o'chcho' alla yesasare'ter yamo'ts ñeñtara añ yenamot. Sapa' amach atet sepatsto tarro'mar po'poñ Yompör pueyeçcatar, ñeñtpa' ama atteye' panneneto. ¹¹ Ñato' o'ch netma'ntacha atet: Ama't sapa' señoteñ ñerra'm erroñ poten oñ e'ñe cohuenpa' amach erroñeno poto ñaña all oñ ñeñt cha rreno'sen. ¹² Ñaña masheñeshacha' ñaña noçhaneshacha' ama't sapa' e'ñe señotueñ, ñerra'm yenare't poporppa' amach pue'mer panoña ñaña parte allempo me'ten, amapa' ñerra'm yenare't ompa' amach pue'mer panoña ñaña poporr.* Ñaña ellopa' e'ñe señotueñ, ñerra'm erroñ poten oñ e'ñe cohuenpa' amach erroñenoñ poto ñaña all oñ ñeñt cha poserrsa-sena. Ñeñto'marña yeñoteñ yocoppa' ama pocteyaye o'ch yorrtat ñeñt epa' ñeñtara yenamot. Ñeñt paterrpa' atto ya'ye'chochtateññañ Yompör, po'poñña'pa' o'chcho' alla yeñosatse'terr allohuen pa'namen sosya'tsañ

* **3:12** Po'ño'ch arrpa' añ toma'ntatanet higoçh ñaña uva ñaña aceituna tarro'mar ñeñt chopuets Palestino. Ñeñtpa' atet oten: "Ñerra'm yenare't higoçhpa' amach pue'mer panoña ñaña aceituna, amapa' ñerra'm yenare't uvachpa' amach pue'mer panoña ñaña higo."

ñeñtara yenamot.

Añpa' ñeñt atet pena eñoteñets ñeñt huetsa e'ñe yañeña yoctapñot

¹³ Ñehua, te'pa' o'ch noterrser po'poñ. Ñerra'm eñall sesho ñeñt otets ñapa' nanaco' eñotenan esocmañen, ñaña ñapa' e'ño' es etsotuen, ñehua, orrtepa' atet pena ñeñt e'ñe cohuen acheñ attoch acheñenesha'pa' eñochet po'ñoche'pa't eñotuenan ñeñt cohuentetsa Yomporecop. Tarraña ellopa' amachña cha ommo'chatsteto atto e'ñe cohuenare' es pa'yenet. Tarro'mar ñerra'm po'ño'ch es yeñotenpa' o'ch yeñoch ñaña ñeñt atto es ye'pa'yen e'ñe cohuenpa' ama ommo'chpahuoyaye. ¹⁴ Tarraña ñerra'm sapa' attera nanac sa'tsrre'muena seyo'chro e'ñe sesope'chapreteño' samo'ts ñaña ñerra'm aña sema'yo'chrena ñeñt e'ñe socpa ñeñte'pñapa' ama pocteyaye o'ch sommo'chena atto es seño'tyeneñ mamesha'tets. Tarro'mar ñerra'm ñeñta atarr yommo'chatene'pa' ñeñtpa' attaca'yeña yeshquën. ¹⁵ Tarro'mar ñeñt atet eñoteñetspa' ama arroteye' hueno Yomporeshot. Ñeñtpa' arrota huena e'ñe ya yoctapñot ñeñt patso'marecpa. Ñaña ñeñt atet eñoteñetspa' arrota huena e'ñe oneñe' poctapñot. ¹⁶ Tarro'mar ñerra'm chocma ya'tsrre'muena yesope'chapreteño' yamo'ts amapa' ñerra'm aña yema'yo'chrena ñeñt e'ñe yocpa, ñeñtpa' allot huenaña e'moñe'tanna'teñets, ñaña allohuen sosya'tsañe'chno.

Atet pena eñoteñets ñeñt huetsa Yomporeshot

¹⁷ Tarraña ñerra'm po'ño'ch Yompor eñotañ yepene'pa' ñeñtpa' atetcha' yepena: Ñanompa' o'ch yesuanom allohuen sosya'tsañe'chno ñeñt ama pocteye' enteno Yompor, ñaña amach allo'na atarr atsrre'mo'chen yenteno, ñaña e'ñech cohuen yentueñ allohuen yamo'tsesha', amachña cha po'poñ yentueno. Ñaña ñerra'm po'ño'ch Yompor eñotañ yepene'pa' chochña ya'muerañtena, ñaña e'ñech cohuenare' es yorrtatyen yamo'tseshacop, ñaña ñerra'm erroten yotenpa' e'ñech po'ño'ch atet yepena, amachña cha yeshcare'tanneno. ¹⁸ Ñeñña ma'yo'chrenaya attoch e'ñe cohuen yentannenapa' ñeñtpa' añ muenen o'ch etsotan attoch allohueneypa' o'ch yepohuerra ñeñt atet pocte' enten Yompor.

4

Ñeñt coshatse'tyenaya ñeñt patso'marecpapa' ñeñña e'moñe'tene' ñeñt cohuentetsa Yomporecop

¹ Ñehua, te'pa' o'ch yoctape'ch po'poñ attoch seño'ch errotte' huenaña e'moñe'tanna'teñets ñaña orroteñets ñeñt chocma orrtatyenet sesho. Ñehua, ñeñtpa' arrot huena e'ñe sa seye'chapretanna'teño' pa'namen ñeñña quellara'yetsaña seyo'chro. ² Tarro'mar ñerra'm erroteno nanac es yeye'chapretena, ñerra'm yapa' ama yecheñepa' o'chcho' ñeñto'mara yemtsanna'ta. Ñaña ñerra'm esempo es yesope'chapreten, ñerra'm yapa' ama yecheñepa' o'chcho' ñeñto'mara yorrota, amapa' o'chcho' ñeñto'mara ye'llaranna'ta. Ñehua, yapa' año' ama yecheno ñeñt nanac yemna'yen, tarro'mar ama añ yenamueno Yompor. ³ Ñato' ama'tcha' es yenañpa' amach yagape, tarro'mar ñato' añecpach es yenamueñ ñeñt ama pocteyaye ñocop. Tarro'mar ñato' añecpach es yenamueñ attoch yañapa' o'ch nanac es yocshatse'tyena allo. ⁴ Ñehua, ahuañapa' soten

ahuo'ch same'ñera Cristo, tarraña te'ñapa' aña socshatse'tyena po'poñ. Ama't señoñe ñeñt coshatse'tyenaya ñeñt patso'marecpapa' ñeñña e'moñe'tene' ñeñt cohuentetsa Yomporecop. Ñeñto'marña ñerra'm yapa'cho' o'ch alla yocshatse'terra ñeñt patso'marecpapa' o'chcho' alla ye'moñe'ter yaña Yompor. ⁵ Ñeñtpa' ama orrena oteno Yompor po'ñoñ ñeñt aquellcayet ahuatoteñ, ñeñtpa' atet oten. "Yompor Puecamquëñ ñeñt chorratenya ñapa' e'ñe puemorrenteño'teypa' nanac mopa'teney." ⁶ Ñeñto'marña Yomporpa' chocmach mueneñ o'ch ahuamencañ pa'y attoch amach alla yepsere ña. Ñeñto'mar ama't Yompor po'ñoñopa' e'ñe anuaret ahuatoteñ ñeñtpa' atet oten: "Yomporpa' amach errotentot yenpano ñeñt e'ñe cohuen entetsa ñañeña, amachña Yomporeye' ame'ñeno. Ñeñto'marña Yomporpa' añach nanac yenpuen ñeñt e'ñe pueñmañesha' ame'ñenaya ña." ⁷ Ñeñto'marña sapa' chocmach e'ñe cohuen same'ñeña Yompor. Añcha'ña satpare't oneñet tarro'mar ñerra'm atetcha' se'papa', oneñe'pa' quechpa'nerrescha'. ⁸ Ñeñto'marña o'ch alla separocmaterr epas Yompor. Tarro'mar ñapa' chocmach alla aguerres. Te'pa' ama't o'te' se'pohua ñeñt ama cohuenayaye Yomporecoppa' te'pa' añ poctetsa o'ch alla soctape'cherr cohuen attoch Yomporpa' o'ch alla enterres e'ñe cohuen. Tarro'mar sapa' ama't semneñeñ o'ch semorrentera Yomporpa', tarraña chocma semorrentena ñaña ñeñt patso'marecpa. Ñeñto'marña te'pa' aña poctetsa o'ch sa'ypo'ña'huerr sosya'tsañ ñeñt seyo'chro'tsen. ⁹ E'ñe satpare'teño't Yomporpa' chosa llequërrtsa. E'ñe sellquëño'tpa' seyahuepa'ch. Ñaña amach allo'na seche'tatsetneno, chochña seyahua. Ñaña amach allo'na nanac es socshatse'tneno, chochña sellca. ¹⁰ Ñaña o'ch sa'meterr so'chñar Yomporesho attoch Yomporpa' o'ch alla tantaterres.

Atto ama atompare'tpahuo yamo'ts

¹¹ Masheñeshacha' ñaña no'chaneshacha' amach sesasare'tanna'tatsto. Tarro'mar ñerra'm esesha' sasare'tene' pamo'ts, amapa' ñeñt tompare'tene' pamo'tspa' po'ño'chpa' o' achñare'tan ñaña Yompor po'ñoñ ñeñt atet anaret. (Tarro'mar Yompor po'ñoñ ñeñt atet anaretpa' atet oten, yemorrentanna'tepa'ch allohueney.) Tarro'mar ñetpa' chach otenapuetañ Yompor po'ñoñ ñeñt atet anaretpa' ñato'amate' es sherbeno. Tarraña ñerra'm esempo atet yepenapa' chach yottena ñerra'mrrate' yañeña e'ñe es eñotets. Tarraña ñeñtpa' ama atteyaye. Añña pocte' chocmach yame'ña Yompor po'ñoñ ñeñt atet anaret. ¹² Tarraña yapa' yeñoteñ e'ñe puesheñarra ñeñt nene' añ ñoñets eñeñara Yompor ñeñt e'ñe po'ño'ch es eñotets. Ñeñara Yompor ñeñt eñotene' ñeñtcha' allpon a'queshpater, ñaña ñeñtcha' allpon chenquërrtsa. Eso'mare'tña sañapa' chate' sotenapañ ñato' e'ñech sañeña eñote' ñeñt ama cohuenayaye acheñ.

Atto ama eñotpahuo ñeñtcha' yetantoya tsapatonet

¹³ Te'pa' o'ch notas ñaña po'poñoneñ. O'ch se'mñoten ñeñtes atet otets: "Te'ch amapa' ñato' tsapatcha' o'ch ahuen bachayo po'poñ anetso, allcha' netaruasena' paterr char attoch negana shonte' quelle." ¹⁴ Tarraña ama't atet soteneñpa' amaña señoñeña ñato' escha' se-tantoya tsapatonet. Tarro'mar añ patsropa' e'ñe mamecpa yocrrena. Atto yocrrena arr mame' añ patsropa' e'ñe attey ñerra'mrrate' os

ñeñt yenta'muene't ahuatecma čhach rrema'čhen e'ñe patso. O'chña enome'ta'muen atsne'pa' o'ch huañerr. ¹⁵ Ñeñto'mar aña pocte' o'ch soten atet: "Ñerra'm Yomporcha' muenatspa' a'natnepa' attoch nepa'yese ñeñt atet noctape'chen." ¹⁶ Tarraña sapa' ama atteye'ña sepeno. Ñeñtapa' attachña pa'namen sotyen e'ñe sommo'cheñoť. Tarraña ñeñt atto yommo'chyenapa' ñeñtpa' ama cohuenayaye. ¹⁷ Ñeñto'marña ellopa' o'ch alla noterrerr: Ñerra'm esempo yeñoteñ yeyo'chro ñeñt cohuentetsa Yomporecop, ñerra'm amaña atet yeřopa' ñeñtpa' ñeñtña yo'chñar yepen.

5

Ñeñt atet otan ečllayoretnesha'

¹ Te'pa' o'ch se'mñoten ñeñtes nanac ečllayoretēs. Te'pa' e'ñe seya'chpeñesha'pa' serranare'ta tarro'mar po'ñočh čhocma eñall ñeñtcha' sehuapoya esempo ñeñtcha' semueročhtate'. ² Ama't te'pa' o' atta puetsana'tuen sechecom. Sapa' ñeñtaña atarr semorrentena. Ñaña ñeñt nanac cočhnesha' ñeñt sechorra'yenapa' o' atta pompere'chua. ³ Ñaña ama't te' sečllayorpa' o' atta chomatille'chuen. Te'pa' ama es sherbeno. Yeñoteñ e'ñe puechmatlle'cheñoť sečllayorpa' ñeñtcha'ña se'nuerre' samña sechets esempohuañen atet ñerra'mrrate' achamaretēs tso. Te'ña ama't o' mellapoterrmochapa' sañapa' allo'na seshonta'huanen sečllayor. ⁴ Ñaña te' ñeñt atta setaruasatyese't ñeñt ama setsa'tyese'tepa' te'ña ñetpa' puellquēñotetpa' nanac eñenet socop. Ñeñto'marña te' Yompor ñeñt nanac Paretspa' e'muenanet ñeñt atet pueya'chpeñesha' čhocma eñenet socop. ⁵ Ñaña sa aña patsropa' esocmañen sechen ama es sepallteno ama't mamesha. Ñeñto'marña ñerra'm errotenčho' nanac cohuen sentenpa' atetča'čho' sepena. Chach sottena ñerra'mrrate' chañcho ñeñt nanac erratareť attoch nanac ota'. Ñerra'm o'chña nanac esoya'tpa' allempoñapa' o'ch muetset. Sapa'čho'ña atetča' perres samña Yompor esempohuañencha' huerra. ⁶ Tarro'mar sapa' čhocma semueročhtatyēñ ačeñ ñeñt ama es yečcatetso attachña sapa' semtsatyenanet. Ñaña ñetpa' amach errotenoť a'queshp̄ateto ñañeñeta allempo sapa' soteñe'chenanet.

Atto ama amuenme'chpahuo cohuame'te' Cristo

⁷ Ñeñto'marña masheñneshacha' ñaña nočhaneshacha' o'ch notas, čhocmach e'ñe sa'huanata'huanom ñeñt echarr sentyen, attoch secuame'ch Yepartseshar Cristo esempohuañencha' huerra. Atetča' sepa atet yepena ñerra'm esempo yemneñ o'ch es yenare't. Ñerra'm yemneñ o'ch es yenare'tpa' čhocmach ñanom yecuen esempohuañencha' huapotyena esheccha' e'ñech cohuen es yečcatsa ñeñt nanac yemorrentyena. ⁸ Ñeñto'marña sapa'čho'ña čhocmach es sa'huanten. Amach semuenme'chatsche tarro'mar o' mameshamerrapa' o'ch huerra Yepartseshar. ⁹ Masheñneshacha' ñaña nočhaneshacha' amach setanmare'tanna'tatsto, attoch Yompor ñeñt e'ñe es eñotetspa' amach otteñe'chuerrso samña ñerra'm esempoch huerra. Tarro'mar Yomporpa' o' allanerrmoch. ¹⁰ O'ch masheñneshacha' ñaña nočhaneshacha' sotape'ch ñeñt atet pa'yese't ahuať ñeñt a'mta'yese't Yompor po'ñočh. Tarro'mar ñetpa' nanac ahuantete't atto nanac amueročhtatarettete't.

Ñeñto'marña sapa'cho'ña atetcha' sepa sama. ¹¹ Po'ño'chpa' yeñoteñ ñeñt nanac ahuantene' muerochteñetspa' ñeñtpa' nanaccha' cosheñtso'tsen. Ama't sapa' seño'tueñ ñeñt atet pa' ahua't Job. Ñapa' nanac ahuantan topateñets. Ñaña sapa' e'ñe seño'tueñ ñeñt atet poñ Yompor. Allempo muerochetua Job Yomporñapa' alla apuer esocmañen attoch eñoch Yomporpa' nanac amueraña.

¹² Ñeñto'marña sa masheñeshacha' ñaña no'chaneshacha' añ pocte' sapa'cho'ña añcha' ñanom seque'chpa'hua. Ama't e'ñe erra'tsena pa'so'chñopa' ñato't senena'ña señoñ; amach sotatsto o'ch sena' señoñ Yompor pue'ntañ pa'so'chño, ñaña amach sotatsto o'ch sena' señoñ Yompor po'patseñ pa'so'chño. Añcha'ña ñerra'm esempo e'ñe pocte' es sentenpa' attach sanap: "Atette'ca'ye." Ñaña ñerra'm esempo ama es pocte' sentenopa' attach sanap: "Ama atteyaye." Allotpa' ñeñtach. Allochñapa' amach eñalle attoch otteñe'chuerres Yompor.

Añ pocte' chocmach yema'yocham'psannena

¹³ Añña ñeñt poctetsa ñeñtcha' atet sepa. Ñerra'm erra'tsenotes muerochtatsapa' chochña sema'yocha. Ñaña ñerra'm esesha' e'ñe coshetsapa' e'ñe pocte' morrechetepa' allo ya'ye'chochtateñ Yompor. ¹⁴ Ñaña ñerra'm eseshas atsna'tetspa' añ pocte' o'ch sagotach ñeñt pompornesha' pen ñeñt ame'ñetsa, attochña ñetcha' ma'yocham'pset atsñañeñ. Allotpa' e'ñe pue'chore'teño'fet Yomporpa' noñetepa' coñe't es puese' atsñañeñesho. ¹⁵ Ñerra'm e'ñe pueyemteño'fet Yompor ma'yochetpa' atsñañeññapa' cor-rerrach. Tarro'mar Yomporpa' ñach ahua'mencat perre'. Ñaña ñerra'm añ o' pöhua ñeñt ama pocteyayepa' allempo Yomporpa' o'ch alla peretnerrñañ po'chñar. ¹⁶ Ñeñto'marña añ pocte' o'ch sa'meta'huerr allohuenes so'chñar. Allochñapa' chocmach sema'yocham'psannena attoch so'crrerra e'ñe cohuen. Ñaña ama't erra'tsena acheñer ñerra'm e'ñe cohuen cotape'chen Yomporcop ñaña ñerra'm e'ñe pueyo'chrocmañen ma'yochetpa' atetña e'mñotenña Yompor. ¹⁷ Atet pa' ahua't Elías ñeñt a'mtaye't Yompor po'ñoñ. Ñeñtña Elías ama't atta ñerra'm ya ñeñtey arromñañey. Tarraña allempo ma'yochana Yompor atto enam amach huaterropa' e'ñe allempoteñña ama huaterro ma'pa char ñaña meterrerr pechapña arorr ama huateno. ¹⁸ Allempoñapa' o' alla ma'yocherrerr attoch enamueran Yompor huaterrepa'. Allempoñapa' o' alla huaterra, ñaña allempopa' o' alla choparesyerr narmetso'chno.

¹⁹ Masheñeshacha' ñaña no'chanesha ñerra'm sa puesheñarrofes o'ch alla sepurrerra ñeñtes te'pa' cotene' cohuen Yompor po'ñoñ, tarraña ñerra'm esesha'ña alla soctape'chaterre' e'ñe cohuenpa' ²⁰ sapa' seño'chepa'ch ñeñt atet cotape'chatets e'ñe cohuenpa' choch a'qeshpatenan pamo'ts puecamquēñ ñeñt atarr ochñañ ñaña choch peretnateññañ allohuen shonte' po'chñar. Te'pa' ñeñtach notas. Allohua.

Santiago

AÑ ÑANOM SAN PEDRO PO' CARTA 1 SAN PEDRO

Atto Pedropa' quellcan carta allohuenacop ñeñĩ ame'ñetsa ñeñĩ atta a'parratse'tataret'

¹⁻² Masheññeshacha' ñaña nochaneshacha' ñeñĩtes a'yetaten ñeñĩ sa'muerochtatene'. O' e'ñe sesuanom seney o' atta a'parratse'tataset allemeña anetso'mar, all anetso Ponto ñaña Galacia, ñaña Capadocia, ñaña Asia ñaña Bitinia. Sapa' ñeñĩtes ahuatoteñ nase't Yomporets e'ñe ñocop. Ñapa' e'ñe eñotuase't sach a'cohuentatareterrtsa Partsocop. E'ñe ña Puecamquẽñpa' ñeñĩña sa'cohuentaterre'ña sa attoña e'ñe same'ña'hueraña Jesucristo. Attoña ña po'rraspa' ñeñĩña o' e'shohuerrnasña so'chñar. Na Pedron sequellquẽne'ña añ carta, napa' ñeñĩten Jesucristo puellsensaren. E'ñe nehuom'cha'teño'tes sa napa' o'ch notas: Yomporepa'chña atarr sebensare'tam'pene', ñepa'chña socshatene'ña e'ñe sa seyo'chro allohuenes.

E'ñe yeyemteño't Yepartseshar Jesucristo chocmach yecuame'ten ñeñĩ o'patataretey

³ Te'ñapa' aye'chochtaterrapo'ch Yomporets ñeñĩ Yepartseshar Jesucristo Pompor ñeñĩfara ñeñĩ Po'yomporer pen, tarro'mar o' ye'ñalletterra etserra e'ñe ña nanac puemuereño'tey. Allempoteñña ya e'ñe yeyemteño't ña chocmach yecuame'teñ esempohuañen tarremphua allempoch ama ya'rromña'terro. Atto Jesucristopa' o' tanterra, ñeñĩto'marña yapa'cho'ña yecuen yaña attoch amach ya'rromña'terro. ⁴ Ñaña yeyemteño't chocmach yecuame'ten ñeñĩ o'patataretey pue'ntaño't tarro'mar allpa' allña añño'tarettenaña alloch yeqeshperra. Ñeñĩña queshpeñetspa' amach ahuañaña'terro, ñaña ama asosyatño, ñaña ama añllasha'tño. ⁵ Sapa' e'ñe seyemteño'tña Cristo Yomporpa' a'natasepa'ch. A'natasepa'ch chocma attoch sequeshpa'huerra esempohuañencha' mellapoterra. Yompore po'huamencopa' a'natasepa'ch attoch e'ñe seño'tuerr po'ño'ch e'ñech sequeshpa'huerra.

⁶ Ñeñĩto'marña te'pa' allohuenespa' socshepa'ch. Ama't te'ña atto semuerochtenapa' ñeñĩpa' e'ñe mamecpa. Tarraña ama't o' chaponasa pa'namen topateñetspa' sapa' chocmuepa'ch socsheña Yompore. ⁷ Tarro'mar nanac huomenc echarr yenteñ, tarraña Yomporpa' e'ño'chcha' ñerra'm po'ño'ch e'ñe yame'ñeña ña. Ate't ñerra'm oropa' choch ñanom atserrtchet huomenc allochña'pa' o'ch e'ño'chet ñerra'm po'ño'ch ñeñĩpa' e'ñete' oroche'. Ñeñĩña ama't oropa' huañerrcha' esempo. Ama't nanac tsa'te' oro, tarraña atto po'ño'ch yame'ñera Cristo, ñeñĩña ello nanac sherbets. Ñerra'm po'ño'ch yeyemteña ña, yeyemteño't ñapa' e'ñech cohuen entyesuerrey esempohuañencha' huerra Jesucristo, attochña e'ñe cohuen yecohuentapretera, e'ñech cohuen ya'micha'tarettapretera.

⁸ Jesucristo ama't ama sentarñepa' te'ñapa' o' semorrentera. Ama't ama senteñe, te'ñapa' o' same'ñera. E'ñe socsheñeshocmañen o' same'ñeña, ñeñĩña cosheñetspa' atarr nanac cohuen. Te'pa' amach erra yenerre'te

yeñoñ ñeñcha' atet yoterrerr. ⁹ Attoña e'ñe same'ñeñoñ Cristopa' sa'queshpaterrcha' secamquëñ.

¹⁰ Ñaña o'ch notas, ama't ñeñt a'mta'yese't Yompor po'ñoñ ahuatpa' ñeñña serrpare'tete't allempo attoch orrtaterrnay Yompor pemuereña alloch yequeshperra. Tarraña ñetpa' ama e'ñeye' eñochete'te errotente'ña alloch yequeshperra. (Ñehua, allempopa' amaca'ye orrtena' Cristo arr patsro.) Ñetpa' ñeñña nanac e'netañe't errotente'ña ñeñcha' a'queshpatañterrtsa. Ñetpa' nanac a'p'to'tanna'tyesete't e'ñe ñagattseta errotente'ca'yeña Yompor pemuereña alloch e'ñe yequeshperra. ¹¹ Ñetpa'cho'ña e'ñe Cristo Puecamquëñña chorrahuete't ñeñña eñotahuete't o'ch orrtterra ñeñcha' Cristoterrets arr patsro. O'ch chap añe patsropa' elloñapa' o'ch muerochtateret. O'ch amurochtataretuapa' allempochña orrtaterranña po'cohuenña. Tarraña ñeñt a'mta'yese't Yompor po'ñoñ ahuatpa' o' alla a'p'to'tanna'tyerreterr; ta', ¿eseshachña Cristoterrets? ¿Esempo'tcha'ña orrtterra? ¹² Yomporpa' eñotatanet ñeñtpa' amachca'ye ahuenaye' etsoterro; shonte'ch char allempochña etsoterra atet eñotatanet Yompor. Tarraña ñeñt eñotat allempopa' ñeñtpa' ama ñocpuetayaye, ñeñtpa' e'ñechca'ye yocop. Te'ñapa' ñeñt seserrpare'tatene' cohuen ñoñetspa' ñeñña señoatene' e'ñe cohuen ñeñt atet penaña ñeñt cotapñats. Parets Puecamquëñ ñeñt huetsa pue'ntañotpa' ñeñña eñotatenahuetña attoch serrpare'tataset saña añ cohuen ñoñets. Ama't Parets po'ñllañoñeñnashar ñetpa'cho'ña atarr mueneñet o'ch eñochet ñamet ñeñt o' señoatuerr sa.

Añ poctetsa o'ch yepomhuerra yañeña e'ñe Partsocop

¹³ Ñeñto'marña te'pa' añ poctetsa e'ñe sa señoñeñotpa' e'ñech cohuen soctape'chen. E'ñe seyemteñoñ ñapa' o'ch secuame'teñ esempoch huerra Jesucristo. Allempopa' ellochña nanac muera'huerrsa, cohuencha' es aphuerres. ¹⁴ Se'mñoch Yompor atet ñerra'm ñapa' puechemere-sha'ch perres. Amach aña seychatsto atet ñerra'm ahuat allempo ama señoñeña'; allempopa' aña semnatse'tyese't ñeñt ama cohuenayaye. ¹⁵ Yomporpa' e'ñe cohuenare' es pen. Ñeñtara Yompor ñeñt o' hua'ñerrey ya. Ñeñto'marña yapa'cho'ña añ poctetsa o'ch yepomhuerra yañeña e'ñe Partsocop. Atet ñapa' e'ñe cohuenare' es pen, yapa'cho'ña añ poctetsa o'ch yepa' atet es pen ña. ¹⁶ Atet otene'y Yompor po'ñoñoñ ñeñt anuaret ahuatoteñ: "Atet nepena na ñeñten Seyomporer sepen, napa' e'ñe cohuenare' es nepen, sapa'cho'ña e'ñepa'ch cohuenare' es sepen."

¹⁷ Yomporpa' ñach tsa'taterrahuet allpon ye'chcatyese'te't ñeñt ama cohuenayaye. Amach eñalleña ama't puesheñarra ñeñcha' queshpatsa ñeñt ama ame'ñenaye ña. Atto yema'yocheña Yompor ñeñtcha' yetsa'tatuerraya, ñeñtepñapa' te'pa' añcha'na'tpo'ch Yompor. Ama't allponmat socrrena arr patsro ñeñtpa' ama sa'netsreyaye, e'ñech tayoteñ señcha'na'tnomñ Yompor. ¹⁸ Sapa' satañneshañpa' apa'nmaset poctapñña atet pete't e'ñe orrena. Te'ña sapa' o' seño'ter Yomporpa' o' tsa'tuonasa attoch sesuanom ñeñt ahuatneshañ poctapñña. Ama quellayoye' tsa'tonaye. Quellepa' ahuañaña. ¹⁹ Añña atto tsa'tonaya po'rroso Puechmer ñeñt Cristo. Po'rraspa' ñeñt nanac sherbets atet ñerra'm carrnerotollpa' e'ñech co'chnesha' muetsete't Partsocop.

20 Ama't ama aye'hcatare'ttena' pats Yomporpa' o' nan Puechemer Cristo, ñach tsa'terraya yo'chñar. Ama't ahuatoteñ anare'tpa' tarraña ama orrteno aña patsro. Te'ñapa' orrta e'ñe yocop, tarro'mar te'pa' o' mellapoterrmocha. 21 Yame'ñeñoñ Cristopa' o'ch yeyemterñaña Pompor; tarro'mar Pomporpa' o' tantater ama't o' rromhua. Tantater attoch alla e'ñe cohuentater Pompor. Ñeñto'marña te' yapa' o'ch yeyemcha Yompor, o'ch yecuame'toñ ñeñt o'patatenya.

22 Sapa' o' same'ña'hua ñoñets ñeñt e'ñe po'ño'ch Yompor po'ñoñ. Ñeñto'marña e'ñe Parets po'huamencot o' sesuanom allpon sosya'tsañ ñeñt seyo'chro'tsen, attotcha' e'ñe semorrentanna'ta. Te'ñapa' semorrentanna'tepa'ch poctacma e'ñe seyo'chrocmañen. 23 E'ñe yame'ñeñoñ Yompor po'ñoñpa' o' ye'ñallettera etserra. Añ eñalleteñetspa' ama atteyaye ñerra'm allempo eñalletey yachor. Atto eñalletey yachorpa' ñeñtpa' huañerrcha'. Añña Yompor po'ñoñoñña ye'ñallettera ñeñtpa' amach ahuañaña'terro ama't errponaña. 24 Tarro'mar Yompor po'ñoñ ñeñt anuaret ahuatoteñ ñeñtpa' atet oten:

Allohueney ñeñtey arromña'feypa' attey ñerra'mrrate' ta'te' tarro'mar mamecpa yocrrena. Ñaña ñeñt cohuen yentyen ya, ñeñtpa' atet ñerra'mrrate' ta'te' puerorer. Ta'te'pa' o'ch hueya'hua pue'chorpa' puerorerpa'cho'ña ama't co'chnesha'tenañpa' shor'cha'tuach.

25 Tarraña ñeñt Parets po'ñoñpa' amach ahuañaña'to ama't errponaña. Ñeñt po'ñoñpa' ñeñfara cohuen ñoñets ñeñt o' serrpare'tatuaset saña.

2

1 Te'ñapa' añ poctetsa o'ch sesuanem allohuen ñeñt ama cohuenaye' enteno Yompor. Atto ora allpon allo seshcanna'tenapa' o'ch seque'chpa'huer. Añ shecaneñets ñeñt attoch entenes po'psheñeñ e'ñe cohuenpa' ñeñtpa'cho'ña añ palltetsa te'pa' o'ch seque'chpa'huer. Atto seye'chapretannenapa'cho'ña o'ch sepuesuer ñaña. Sasare'teñetspa'cho'ña o'ch sepuesuer. 2 Añña poctetsa atarrcha' yeye'cheññaña Yompor po'ñoñ e'ñe atet pena ematollpa' nanaccha' ye'chenana puemomos. Yapa'cho'ña añ poctetsa o'ch yeye'chya atet ñerra'm ñeñt yemomos yepen, tarraña ñeñtpa' ñeñfara Yompor po'ñoñ. Yompor po'ñoñpa' nanac cohuenare' alloch yocshaten yecamquëñ, attotcha' allo'na yesen eñotnomue' ñeñt poctetsa Yomporecop attochña a'queshpatare'feycha'. 3 Sapa' o' seño'tuerrñañ Yompor pumuereña atto ñapa' nanac muerensa. Ñeñto'marña añ poctetsa sapa'cho'ña o'ch seye'choña po'ñoñ.

Atto Cristo atma'ntataretta mapue'; elloña ñapa' nanac sherben alloch e'ñe yocrrerra

4 Añ poctetsa o'ch separrocmaterr epas Cristo. Cristo ñeñt atarr sherbets atet ñerra'm mapue' ñeñt nenet quellpach pa'rrp'ot allo orratenet pocoll ñeñt nanac echarr. Tarraña mapue' ama't nanac sherbenpa' ama añeyaye alloch e'ñe yocrra. Añña Cristo atto sherbenpa' allochña e'ñe yocrra po'ño'ch. Ama't acheñenesha' ama't ama cohuenaye' enteñeto Cristopa' Pomporñapa' e'ñe pocte' enteñ. Pomporñapa' ña acre' ñeñticha' nanac sherbats ñocop atet ñerra'm mapue' ñeñt nanac cohuen allochña tomatenan pa'paquëll. 5 Yomporpa' pa'paquëll penan allohuen ñeñt ame'ñenaya ña. Yapa'cho'ña attey ñerra'mrrate' mapue' alloch

tomatenan pa'paquëll. Tarraña yapa' atteyeyñ ñerra'mrrate' mapue'pa' tarraña yapa' ñeñfey o'rrerrñaot yocrena. Yapa'cho'ña añ poctetsa o'ch yattecmatuerr ñerra'mrrate' Parets pa'paquëll. Allñapa' yesherberrcha' Partsocop. Yecamquëñopa' o'ch yepomhuerra e'ñe yeyochrohuen yepomuerra atoch Paretspa' coshena. Yame'ñeñoñ Jesucristopa' o'ch yesherber errottencha' muenateney Parets. ⁶ Tarro'mar atet oteney Yompor po'ñoñ ñeñf anuaret ahuatoteñ, ñeñtpa' atet oten Yompor Cristocop:

All anetso Sión ñeñfara Jerusalén o'ch nemñanet puesheñarr ñeñf atarr sherbets ñeñf atet ñerra'mrrate' mapue' ñeñf acrareñ ñeñf nanac sherbets ñeñf alloch natomat nepaquëll. Ñerra'm esesha' ame'ñenaya ñapa', ñetñapa' amach alla e'nerrete'te po'psheñeñ.

⁷ Ñeñfey ame'ñenaya Cristopa' e'ñech yocsheñeshocmañen yenteñ. Añña ñeñf atpare'tene' Yomporpa' atetcha' enteñet Cristo ñerra'mrrate' mapue' ñeñf huapore'ten ñeñf tomatene' pocoll tarro'mar atet enteñet Cristo ñerra'mrrate' ama es sherbeno. Ñeñto'marña Yompor po'ñoñpa' atet oterryerr:

Añ mapue' ñeñf huapore'ten ñeñf tomatene' pocoll, ñeñfña mapue'pa' Yompor nene' ñeñfcha' nanac sherbets.

⁸ Añ ñeñfara Cristo ñeñf toma'ntenaya

Mapue' allcha' epoto'tena ñeñf ama ame'ñetso ñeñfcha'ña a'shoratahuet chenquëñtso.

Añ epoto'teñetspa' añ toma'ntena atto atpare'teññañet Cristo po'ñoñ. Ñeñto'marña atet anaret, ñerra'm ama yame'ñyopa' e'ñech yechenca'huerra.

Ya ahuatpa' ama esona'tareyayye, te'ñapa' e'ñe Yomporena'tarey

⁹ Tarraña sapa' ama añeyayso ñeñf atpare'tene' Yompor. Ya ñeñfey ame'ñenaya Yomporpa' atetcha' enteney ñeñfey acraretterrtsa ñocop. Ñaña atetcha' enteney ñeñfeycha' sherberrets Partsocop, ñeñfeycha' anaretterrtsa ñocop. Ñaña e'ñech Yomporena'tar enteney. Ñeñto'marña yocoppa' añ poctetsa o'ch yorrtatyesoñ po'cohuenña. O'ch yeser-rpare'toñ atto ñapa' cheterrey checmetot all sosya'tsañoñ, te'ñapa' o' chapaterrey e'ñe ña po'puetarenño all e'ñe cohuentena ña. ¹⁰ Ahuatpa' ama esona'tareyayye, te'ñapa' Yomporena'tarey. Ahuatpa' ama amuer-areteyayye, te'ñapa' o' ya'muerareterra.

Atto cohuen es yepen attochña e'ñe cohuen yesherbeñ Yompor

¹¹ O'ch masheñeshacha' ñaña nochaneshacha' e'ñe nemorrenteñoñes o'ch notas: Sapa' ama't seyçhenañ añe patsro ñeñtpa' ama sa'netsreyaye. Ñeñto'marña añ poctetsa o'ch sa'ypo'ñampes ñeñf muenatse'tyese't sechets. Atet muena'yen yechetspa' ñeñfña quellarene'ña yecamquëñ; mueneñ o'ch a'chencatonay yecamquëñ. ¹² Ñeñf ama ame'ñetso seshopa' añ poctetsa o'ch sorrtatoñ ñeñf atet e'ñe cohuenare' es sepen. Allochñapa' ñerra'm mueneñet o'ch sasare'tasetpa' o'ch entonaset atto e'ñe cohuenare' es sepen. Allochñapa' ñerra'm esempo huerra Cristo attoch eñotaturrey ñeñf atet yepa'yena, ñetpa'cho'ña o'ch aye'chochtaterrñañet Yompor.

¹³ Te'pa' o'ch notas ñaña, allpon ñoñets ñeñf nen amcha'taret añ patsropa' añ poctetsa o'ch same'ñya. Yame'ñeñoñ Yepartseshar Cristopa' añ palltetsa o'ch yame'ñera ñaña allpon ñoñets ñeñf nen

ñeññ atarr amcha'tarettetsa arr patsro. ¹⁴ O'ch same'ñera ñaña ñeññ mueñen amcha'taret ñeññcha' a'coñchatuene' allohuen ñeññ ama pocteye' es petso, ñaña ñeññara ñeññcha' coshapretene' allohuen ñeññ e'ñe cohuenare' es pets. ¹⁵ Tarro'mar atef muenen Yompor: chocmach yorrdaten atef e'ñe cohuenare' es yepen. Ñato' yorrdateñoñ e'ñe cohuenpa' o'ch quechpa'huerret atto eñosatse'tyenet. Ñetpa' patpare'teñoñet eñosatse'tyenet tarro'mar ama es eñoteneto. Ñato' yorrdateñoñ e'ñe cohuenpa' o'ch yequechpatuerranet atto eñosatse'tyenet.

¹⁶ Ñaña e'ñech same'ña cohuen ama't Yompor po'ñoñpa' ama amcha'nochenaye' senteñe socop. Tarraña ama't ama amcha'nochtano po'ñoñ yocoppa' amach allo'na yeña'yenesno ñeññ sosya'tsañ. Añcha'ña o'ch atef yame'ña atto pueyochresha' perrey Yompor. ¹⁷ Añ poctetsa o'ch semñcha'na'ch allohuen acheñ. O'ch semorrentanna'ta allohuenes ñeññes ame'ñetsa. O'ch semñcha'na'ch ñaña Yompor. O'ch same'ñya ñaña ñeññ amcha'taretetyetsa arr patsro.

Añ poctetsa o'ch yemuerochtaprecha Cristo

¹⁸ Ñeññes ataruasataretespa' o'ch notas, añ poctetsa socop. Semñcha'na'teñoñpa' o'ch same'ñya samo'mte'. O'ch same'ñya samo'mte' ñeññ amueraña. Allotpa' o'ch same'ñya ñaña ñeññ ama't ama amueraño. ¹⁹ Ñaña ama't po'psheñeñ muerochtateney ama't allempo yepen ñeññ cohuenare', e'ñe yame'ñoñ Yomporpa' amach ya'tsrre'matsto, ñeññpa' e'ñech pocte' enteney Yompor. ²⁰ Ñerra'm esempo cho erroñ yepen po'psheñeñ ñerra'm coñchatuerrey, ñeññpa' e'ñe pocte' yecoñchepa'. Ama't ama ya'tsrre'mo allempo, tarraña amach cohuenaye' enteney Yompor, tarro'mar ñeññpa' chocma mueneñ o'ch yecoñcha. Tarraña ñerra'm esempo ama't yepena ñeññ cohuenare' ñato' ama't muerochtatey po'psheñeñpa' ñerra'm ama ya'tsrre'mopa' ñeññpa' e'ñech pocte' enteney Yompor. ²¹ Ñeñño'marña te'pa' yapa' o' hua'ñerrey Cristo atoch yame'ña'huera, allochñapa' o'ch yemuerochtaprecha ña. Ñapa' ña ñanóm muerochtatsa, tarraña ñapa' yechatnerrey atoch añ poctetsa o'ch yemuerochtapretera ña. ²² Ñapa' ama eñalletatane'te po'chñar ama't coñe'ta. Ñapa' ama sheca'ye'te ama't parrocha. ²³ Ama't allempo sasare'chete'tpa' ñapa' amach ellopa' sasare'terraneto ñaña. Ama't allempo muerochtachete'tpa' ñapa' amach ellopa' o'terraneto o'ch nemuerochtaterres saña. Ñapa' ña e'ñe yemte't Pompor, tarro'mar eñoteñ Pomporpa' a'poctaterrñañcha', tarro'mar ñapa' ña e'ñe pocte' es pets. ²⁴ Ñapa' ña yecoñchaterr e'ñe ya yo'chñarof allempo muerochta all corsocho. Allempoña rroma e'ñe ña po'chtso'tpa' o' ahuanmanperrey yo'chñar. Te'ña yocoppa' añ poctetsa o'ch ya'ypo'ña'huerr ora yo'chñar o'ch yeperra ñeññ atef poctetsa Partsocop. Atto atarr atserrparetterra ahuat ñeññpa' attoña a'queshpaterrey ya. ²⁵ "Yapa' ahuatpa' atey ñerra'm carrnero. Ya'ypo'ña'uye't ñeññ yecuanmpene'." Tarraña te'ñapa' o' alla yocape'cherr e'ñe cohuen, o' yeyemtera Cristo ñeññ yecuanmpene', ñeññara ñeññ Pamo'mte' pen ñaña yecamquëñ.

3

Arrpa' all cotape'chatan ñeññ arrollaretnesha'

1-2 Sapa'cho'ña ñeñtes arrollaretes, o'ch notas samña. Añ poctetsa o'ch same'ña serrollar. Chocmach same'ña serrollar ama't serrollarpa' ama ame'ñenano Yompor po'ñoñ. E'ñe cohuen same'ñeñof serrollarpa' ama't ama erroten es sotoño ñato' attotpa' o'te' ame'ñerra ñaña serrollar. Ñetpa'cho'ña o'ch cotape'cherret e'ñe cohuen ñerra'm esempo entennaset atet e'ñe cohuenare' es sepen. ³ Amach e'ñe patrra sema'yoçhratsto atto secohuentena e'ñe orrena. Atet ñerra'm sechpa' amach ñeña sellquëno o'ch sañño'teñ e'ñe cohuen attoch enteney yamo'tsesha' e'ñe cohuen, tarraña ñeñtpa' e'ñe orrena. Ñaña amach e'ñe patrra sema'yoçhratsto attoch sech alloch secohuenta atet ñerra'm oro, tarraña ñeñtpa'cho'ña e'ñe orrena. Amach sema'yoçhratsto ñaña attoch sechorra'yesa e'ñe coçhnesha'. Añ aña'teñets ñeñt yentapretannena e'ñe yechsopa' ñeñtpa' e'ñe orrena orrtateney e'ñe cohuen. ⁴ Añcha'ña yema'yoçhra o'ch yecohuentena yeyoçhro attoch Yomporpa' entapretey e'ñe cohuen. Añ cohuentets yeyoçhro ñeñtpa' ama entpahuoyaye tarraña ñeñtpa' amach ahuañañaterro. Atet ñerra'm muereñets ñeñtpa' e'ñech cohuen entapreteney Yompor. Ñerra'm ama atsrre'mñañeyaye ñeñtpa'cho'ña e'ñech cohuen entapreteney Yompor. Ñerra'm e'ñe cohuen yoctape'chen, Yomporpa' entapreteney yoctapña atet ñerra'm ñeñt nanac sherbets, ñaña ñeñt nanac coçhnesha'. ⁵ Atet pa'yese't ahua't coyaneshaçhno ñeñt e'ñe cohuenare' es pa'yestse't Partsocop. Ñetpa' e'ñe pueyemteñofet Yomporpa' e'ñe cohuen ame'ñyete't puerrollaret. Ñeña pueyoçhretpa' e'ñe a'cohuenchete't Yomporcop. ⁶ Atet pe't ñaña ahua't Sara. Ñapa' e'ñe cohuen ame'ñane't puerrollar Abraham. Ñapa' e'ñe atet entane't puerrollar ñerra'mrrate' ñeñt pamo'mte' pen, nanac ame'ñye't. Sapa'cho'ña te'pa' sachorcha' seper Sara ñerra'm ama semñañoña es pocte' sepa'yeno samña.

Attecma cotape'chatan ñaña ñeñt ataporetnesha'

⁷ Attecmach notas samña ñeñtes ataporetetes. O'ch semuerya setapor e'ñe cohuen. Sapa' o'ch senteñ samña setapor e'ñe cohuen, tarro'mar coyanesha' ama tama ahuañcate. Añcha'ña o'ch sagaphuer parro ñeñtcha' apas Yompor. E'ñe pueuereñofes sapa' apascha' allochña sapa' corretsasach socsheñeshocmañen e'ñe tayoteñ errponañohuen. O'ch seyçha e'ñe cohuen epas setapor, attotcha' Yomporpa' e'ñnotas ñerra'm esempo sema'yoçhya.

⁸ Te'ñapa' o'ch notas allohuenes. Añ poctetsa o'ch soctape'cherr e'ñe patrra ñeñt amuerañtetsa. Ñaña o'ch sellcapretanna'ta ñerra'm esempo es sellcatyene'. Ñaña e'ñech cohuen yemorrentanna'ta allohueney ñeñtey ame'ñetsa, ñaña e'ñech cohuen yemueranna'ta. O'ch es yentaprech po'psheñeñ e'ñe cohuen, amachña yañeña e'ñe cohuen entatstatso. ⁹ Ñerra'm po'psheñeñ erro't paspa' sapa' amach setsa'tatatsche eso. Ñerra'm po'psheñeñ sasare'taspa' sapa' amach sesasare'tatsterraneto. Añcha'ña o'ch senamoñ Yompor a'nachepa', tarro'mar atet muenen Yompor atetcha' yeña. Allochñapa' ñerra'm atet yeñapa' ñapa' o'ch a'natenya yaña. ¹⁰ Tarro'mar atet oteneñ Yompor po'ñoñ:

Ñerra'm yemneñ o'ch yeyçha e'ñe cohuen, ñaña ñerra'm yemneñ o'ch yocsherrapa' ñeñtpa' añ poctetsa, amach yesasare'tatsto, ñaña añ poctetsa, amach yeshcare'tatsto.

11 Ñerra'm yemneñ e'ñe cohuen yocsherra, añ poctetsa o'ch yesuanem ñeñt ama cohuenaye' enteno Yompor. Ñeñt e'ñe atet muenen Yomporpa' ñeñtcha'ña atet yeþa. Ñaña añ poctetsa, o'ch ye'nerr attoch yentannena e'ñe cohuen epay yamo'tsesha'. Te'ñapa' allo'nepa'ch yesen entanna'ttsa e'ñe cohuen.

12 Yomporñapa' e'ñech cohuanpeney ñeñtey e'ñe pocte' es pets. Ñapa' e'mñoteney allempo es yenamueñ e'ñe ñesho. Añña ñeñt petsa ñeñt ama pocteyayepa' Yomporñapa' amach cohuenaye' enteñe ama't mamesha.

Ñerra'm esempo e'ñe attota muerochtatenyet yapa' atarrcha' cosheñtso'tseney

13 Ñerra'm sapa' chocma sema'yoçhrena ñeñt cohuentetsa Yomporecop, allempoñapa' amach esesha' errotenot semuerochtataye. 14 Tarraña ñato' errotenopa' o'ch muerochtataset ama't añ sema'yoçhrena ñeñt cohuentetsa Yomporecop. Tarraña ñerra'm e'ñe attota muerochtatasetpa' sañapa' atarrcha' cosheñtso'tsenes. Amach semcha'tatstaneto ñaña amach sellcatso. 15 Añcha'ña o'ch seyemcha Cristo e'ñe seyoçhrohuen. O'ch senteñ Cristo atarr cohuen Parets ñeñt Yepartseshar yepen. Ñerra'm esempo esesha'pa' o'ch a'þto'tas ¿eso'marte'ña atarr same'ñeñaña Cristo? sapa' chocmuepa'chña e'ñe cohuen señoñeña atetcha' sanap e'ñe cohuen. E'ñe semuereñoñ e'ñech acoþa sanapanet e'ñe cohuen e'ñe semcha'na'teñoñanet. 16 Chocmach e'ñe señañesha' seyoçthro e'ñech cohuenare' es sepen. Allochñapa' ñerra'm ama't esempo sasare'tenyetpa' ñeñña atto e'ñe pocte' es yeþa'yen Cristocoppa' ñeñtpa' ñeñtcha'ña pencatahuet. 17 Añ pocte' ama't yemueroçhta atto ama't e'ñe cohuenare' es yepen. Ñerra'm atet muenen Yomporpa' pocte' o'ch yemueroçhta. Añña ñerra'm e'ñe yo'chñaroþpa' o'ch yemueroçhta, ñeñtpa' orrenach yemueroçhta.

18 Ama't Cristopa'cho'ña ahuatpa' atarr muerochtachete't. Ñapa' ña rromats e'ñe parrocha allohuenacpay attotña tsa'tuerrnaya yo'chñar. Cristo ama't ña ñeñt e'ñe pocte' es petspa' attoña rroma yocop ñeñtey ama pocteye' es petso. Tarro'mar rroma yocop attotcha' yeparrocmaterr epay Yompor. Ña ama't rroma po'chtsoþpa' puecamquẽñña' ama rromo. 19 E'ñe puecamquẽñoþpa' arr ahuo' allo'tsa'yen ahuatnaneshañ puecamquẽñesha' ñeñt alla ayottamþsaret, ñeñt ama cha'netso. Ñaña puecamquẽñ allñapa' serrpare'tatosanet. 20 Ñehua, añ puecamquẽñ ñeñt ahuatnaneshañ ñeñt nanac atpare'taye't Yompor po'ñoñ allempo corre't Noé. Allempopa' Yompor nanac cohame'tanetañe't o'ch ame'ñyet. Allempoteñ Noépa' yeçcatane't po'compuer, Yomporpa' cohame'tanete't esesha'ch ame'ñatsa. Tarraña ama eseshaye'ña ame'ñatso, e'ñe posocsheña ñeñt ame'ñatsa. Añ posocsheña ñeñt ame'ñaya Yomporpa' ñeñtara posocsheña ama esesha' ño'sha'tso, ñetpa' qeshpet oñoñ. 21 Tarro'mar yapa'cho'ña te' ñerra'm yapataretta oñoñ Partsocop e'ñe atet pena ñerra'm ahuat Noépa' o' qeshþa e'ñe oñoñ. Ñeño'marña yapa'cho'ña ñerra'm yame'ñeñoñ o' yapataretta Partsocop e'ñe oñoþpa' yeñoñteñ o' yeqeshþa. Ñehua, ñeñt apataretteñetspa' ama añecpayaye o'ch yapa oño attoch huañ yepatser. Añcha'ña ñeñt alloch yeqeshþa. Atto yapataretta Partsocop o'ch yenamñ Yompor etserrataterrnayepa'

yoctapña e'ñe cohuen. Atto yapataretta Partsocoppa' yeñoteñ o' yequeshpa tarro'mar Jesucristo atto tanterra ama't rromhua. ²² Allempo tanterra Cristopa' o' ahuer pue'ntaño. Te'ñapa' allo'tsen epuet Pompore e'ñe po'cohuenrot, allña'apa' all partsoten. Ama't allohuen ñeñt Pompore po'millaño'feñanesharpa' ñetpa'cho'ña te'pa' e'ñe cohuen ame'ñeñet ñamet. Ñaña ama't allohuen ñeñt añcha'taretetyetsa pue'ntaño'pa' ñetpa'cho'ña ello ame'ña'hueñet ñamet. Ama't allohuen ñeñt ahuamencatechnopa'cho'ña ello ame'ña'hueñet.

4

Atto e'ñe yemuerochteño'pa' o'ch huomenc yepa' yeyo'cher Yomporecop

¹ Cristo allempo añe patsro'tsenpa' ñapa' e'ñe pocte' enteñ attoch muerochtateñet nanac. Ñeñto'marña sapa'cho' e'ñepa'chña pocte' senteñ o'ch semueroçhta e'ñe ñocop. E'ñe yemueroçhteño'pa' o'ch huomenc yepa' yeyo'cher. Yemueroçhteño' yechsopa' o'ch yequeçhpa'huerr ñeñt ama pocteyaye Yomporecop. ² Allochñapa' amach allo'na yepa' neno atet muenatyesyet yechets ahuat. Yocoppa' añ poctetsa o'ch yoctape'chen ñeñt atet muenen Yompor. ³ Te'ñapa' ñeñtेशा'ñach atet sepa' atet sepa'yese't ahuatoteñ ñeñt atet pena te' ñeñt ama ame'ñetso. Ñetpa' aña pa'namen pa'yenet ñeñt atarr sosya'tsañeçhno ñeñt allohuen pa'namen muenatse'tyeñets sosya'tsañ ñaña posa'tarñats ñaña coshatse'teñets ñaña orrare'teñets ñaña muechatse'teñets ñeñt ama't mameshapa' ama pocteye' enteñe Yompor. Te'ñapa' ñeñtेशा'ñach atet sepa' ñeñt semnatse'tyen sa. ⁴ Ñeñt peyemte't ahuat ñeñt epa'p porrare'te'tpa' te'ñapa' amach çhapaneto pueyoçhro eso'marte' o'huañ porrare'tapretanet. Attoña ñetpa' mueneñetcha' o'ch achmāre'taset. ⁵ Tarraña te'pa' o'ch notas, ama't ñeñt ama ame'ñetso, esempohuañenpa' a'metatatuerranetcha' Yompor. Po'ñoçh ñapa' ñach tsa'taya ñeñt ame'ñetsa. Ñaña ama't ñeñt ama ame'ñatsopa'cho' ñach tsa'tatuerrahuet, ora allohuenet, ama't ñeñt corretsa, ñaña ama't ñeñt o' colla'huena. ⁶ Ñeñto'marña ama't ñeñt arromñañesha' o' aserrpare'tatuarettet cohuen ñoñets. Allochñapa' ama'tcha' a'coñchatare'tetañ po'chtso'tet atet pena allohuen arromñañesha', puecamquēño'tetñapa' corra'huerretcha' e'ñe atet correna Yompor.

⁷ Te'ñapa' o' mellapoterrmocha. Ñeñto'marña añ poctetsa, e'ñe yeñotateño'pa' o'ch yema'yochera Yompor. E'ñech yetpara es yepen attotcha' amach yepseñe Yompor ma'yochaya. ⁸ Añpa' ñeñtña ñanom nanac sherbets: o'ch yemorrentanna'ta nanac e'ñe yeyoçhrocmañen. Yemorrentanneño'pa' o'ch yep'retnanna'ta atto erro'ten ye'panna. ⁹ Ñaña e'ñech socsheñesha' o'ch sagapannena e'ñe sepaclo. ¹⁰ Yompor puemuereño'pa' o' e'ñe apa'yemas attoch setorra'yesa e'ñe ñocop. Te'ñapa' o'ch notas, o'ch seyenpanna'ta año ñeñt apuenes Yompor. Attochña sesherbatyeshañña Yompor puemuereña. ¹¹ Ñeñt'pa' atet ñerra'm eseshas serrpare'tatspa' Yomporepa'chña po'ñoñ seserrpare'ten. Ñerra'm eseshas yenpuene' po'psheñeñpa' Yomporepa'chña po'huamencot seyenpanna. Allochñapa' yeparrocmateño' epay Jesucristopa' o'ch ya'ye'choçhtatuerrñañ Yompor. Yomporepa'chña

aye'chochtatuapo' allohueney. Ancha'na'tpahuepa'ch po'partsoña tayoteñ errponohuañen. Ñeñtpa' attepa'chña Nompore.

Ñerra'm esempo sasare'tenyet atto yapa' yecristona'tarterra yañapa' atarrcha' cosheñtso'tseney

¹² Amach masheñeshacha' ñaña nochaneshacha' seyorenatsto ñerra'm huaponasa topateñets nanac huomenc; tarro'marcha' huaponasa o'ch topatensa'. Amach seyorenatsto atet sepena ñerra'm esempo huaponasa ñeñt ama sentare. Attecma ama't masheñesha' ñeñto' ame'ña'huapa' attecma o' topatuanet. ¹³ Allempoteñ o' semueroçhtaprecha Cristo, e'ñe semueroçhteño'tpa' socshepa'ch. Allochñapa' ñerra'm esempoch orrterra po'cohuenñapa' sapa'cho'ña socshapreterach e'ñe cohuen. ¹⁴ Ñerra'm cho sasare'tenset atto o' secristona'tarterra, sañapa' atarrcha' cosheñtso'tsenes, tarro'mar e'ñe allempoteñ Yompor Puecamquëñ ñeñt cohuenñatsotetspa' çhaponasa sesho. Po'ño'ch ñetpa' Cristo'na sasare'tenet tarraña sapa' e'ñe cohuen secohuentateññañ Cristo. ¹⁵ Añña ama cohueno o'ch yemueroçhta yemtseño' acheñ, ama't ñaña yeteño', ama't ñaña yepeño' ñeñt ama cohuenayaye, ama't ñaña ya'metanpeño' attochcha' ye'moñe'tanna'ta. Ñerra'm attotña yemueroçhtapa' ñeñtpa' e'ñech orrena yemueroçhta. ¹⁶ Añña ñerra'm añecop yemueroçhta tarro'mar o' yecristona'tarta, amach yepencatsto. Chocmach yecohuentatoñ Yompor tarro'mar o' yanerrñañ pa'so'cheñ.

¹⁷ O' çhappmoch allempoch Yomporpa' acranatuerrey allohueney ya. Yapa' yanomcha' a'meterr atet enteney ama't ñeñtey puechemereshay o' perrey Yompor. Ñerra'm yapa' yanomcha' a'metanperr ama't ñeñtey ame'ñatsapa', allempopa' errotenotuachca' queshperrate' ñeñt nanac atpare'tene' cohuen ñoñets ñeñt Yompor po'ñoñ. ¹⁸ Ama't ñeñtey e'ñe pocte' es petspa' e'ñech yemueroçhenño'a yequeshperra, allempopa' errotenotuachca' çhapña ñeñt ochñañesha' ñeñt atarr atpare'tene' Yompor. ¹⁹ Ñeñto'marña ñerra'm esempo yemueroçhta e'ñe Yompor puemneñño'tpa' allempopa' amach yellcatsto. Añña poctetsa o'ch alla yeyemtera Yompor e'ñe yocsheñeshocmañen yeyoçhro, tarro'mar ñapa' ña ñeñt yeyeçhcate'. Ñapa' ña ñeñt e'ñe pocte' es pets, ñapa' e'ñech a'poctatonay. Añcha'ña allo'nepa'ch yesen cotape'cherre' ñeñt cohuentetsa Yomporcop.

5

Atto cotape'chatan allohuen ñeñt pompornesha' pen ñeñt ame'ñetsa

¹ Te'pa' o'ch notas samã ñeñtes pompor pen ñeñt ame'ñetsa sesho. Napa'cho'ña nach pompor pen ñeñt ame'ñetsa nesho. Napa' neñche't atet mueroçhte't Cristo. Tarraña ñerra'm esempo huerra po'cohuenño'pa' yapa' o'ch yecohuentapretera yaña. ² Napa' te'pa' o'ch notas sa ñeñtes pompor pen ñeñt ame'ñetsa. Atet pena ñeñt cohuanpene' po'carrneror, sapa'cho'ña secuanpescha' e'ñe cohuen ñeñt ame'ñetsa sesho, tarro'mar ñetpa'cho' po'carrneror penanet Yompor. Amachña seçllaño'a secuanpsatstaneto atet sepeñ ñeñt ama tama cohuenaye' senteno. E'ñechña socsheñesha' secuanpenanet atet muenen Yompor. Tarraña amach sagapeño'a quelle secuanpsatstaneto. Ñerra'm quellayecop yecuanpeña' o'ch yepenca. Añcha'ña e'ñech yocsheñesha'

yecuan̄psanet. ³ Amach čha sa'm̄cha'nočhteñoŕeye' secuan̄penaneto, ñeñtes atet anaretēs sach cohuan̄penahuet. Añcha'ña čhocmach yentatanet atet e'ñe cohuen es yepen. E'ñe yocŕape'chateñoŕ cohuenpa' o'ch yeyčhatenanet allohuen ñeñt e'ñe po'carrneror pen Yompor. ⁴ Cristoñapa' ñeñt yecuan̄pene' allohueney atet ñerra'm po'carrnerorey. Ñerra'm esempo huerra, allempopa' yapa'čo' atsa'tareteyča'. Atsa'tareteyča' po'cohuenño ñeñtča' atarr nanac yocshaterre' ñeñtpa' ama ahuañaño ama't errponaña.

⁵ Ñeñtes huepaneshas, te'pa' napa' o'ch notas sam̄a. Añ poctetsa o'ch same'ñaña ñeñt po'n yacma ñeñt sompor sepen. Po'ñočh o'ch notas allohuenes, e'ñech cohuen same'ñannena amach sañeña e'ñe cohuen entatstatso tarro'mar:

Yomporpa' ama pocteye' entenano ñeñt atet ommo'chetsa. Añña ñeñt ama esoye' entetso ñeñtña atarr muerenaña Yompor.

⁶ Yapa' yeñoteñ Yomporpa' nanac ahuañencat. Yapa' ama ya yehuañencoteye' yommo'cheno. Ñeñto'marña yeñoteñ Yomporpa' ama cohuenaye' entenano ommo'cheñets. Amach yeyemtastso e'ñe yañeña, tarro'mar yapa' ama es yesherbena. Añcha'ña e'ñe cohuen yeyemtana Yompor, allochñapa' ñerra'm esempo ña muenats, ñachña yocshaterre'ña e'ñe cohuen. ⁷ Ora allpon ñeñt yellcatene' añ poctetsa o'ch yotue Yompor. Tarro'mar ñapa' po'ñočh čhocma llecapretenya ñeñt yellcatene'. Allochñapa' ñachña ya'metuerre' yellquēña attoch yocsha'huerra e'ñe cohuen.

⁸ E'ñe señoŕateñoŕpa' señoŕa'tach, tarro'mar oneñet ñeñt se'moñe'tene'pa' čhocma chopeñe'chen erraparen atet ñerra'm ma'yarr, čhach añcha'nočhetnena e'nyese' ñeñtča' a'čhencat.

⁹ Añcha'ña satpare't oneñet. E'ñe yame'ñoŕoŕ Cristo o'ch huomenc yeŕa' yeyočer. O'ch señočh attecŕmach mueročhtatuan allohuen masheñneshas' ama't ñeñt o' ame'ña'huerra ora erraparen aña patsro.

¹⁰ Ama't mueročhtatyesasetcha' mame' tarraña Yomporpa' nanac amueraña. Ñapa' ñachña a'poctatuerre'ña socop, attoch huomenc perrnas seyočer. Allochñapa' amach alla sepuesuere. Atetča' ŕatonay Yompor, ñeñtey muenene' o'ch yecohuentaprecha po'cohuenño. E'ñe yame'ñoŕoŕ Cristo yecohuentapreterach po'cohuenña ñeñtča' ama ahuañañaŕterrtso. ¹¹ Yomporepa'chña aye'čočhtatuapo' allohueney. Añcha'na'tpahuepa'ch po'partsoña tayoteñ errponohuañen. Ñeñtpa' attetepa'chña Nompore.

Arpa' all so'tnerranet po'cartot

¹² Te'ñapa' ñeñtch e'ñe notas necartoŕ. Te'pa' o' notuas o'ch same'ña'huera e'ñe po'ñočhocmañen. Ñaña o' notuas añpa' ñeñtña e'ñe po'ñočh Yompor pueñuereña alloch atarr bensare'tam̄peney. Te'ñapa' o'ch alla noterrser, po'ñočhpa' o'ch seyemtoña Yompor pueñuereña. Ñeñt masheñ Silvanopa' ña nequellcaten attoch neserrpare'tatas mame' añ necartoŕ. Atet nenteñ masheñ Silvano, ñapa' nanac cohuen ame'ñenana Yompor.

¹³ Ñaña ñeñt ame'ñetsa arr Babilonia* mueneñet o'ch huom̄cha'taset ñamet añ necartoŕ. Ñetpa'čo'ña o' acerrranet Yompor e'ñe atet ñerra'm

* 5:13 Anets ñeñt pa'so'cheñ Roma te'ñapa' añ toma'ntateñet anets Babilonia.

sa. Ñaña neyoher Marcospa'cho'ña mueneñ o'ch huom'cha'tas ñaña necartot. ¹⁴E'ñe semorrentanna'teñoť o'ch sehuom'cha'tanna'ta.†

E'ñe seyemteñoť Jesucristo, Yomporepa'ch'ña socshatene'ña e'ñe cohuen seyo'chro. Te'pa' ñeñtach notas, ñeñtpa' attetepa'ch'ña Nompore. Allohua.

Pedro

† **5:14** Po'ño'ch oteneý, "E'ñe semorrentanna'teñoť 'choch setso'ttsa'pa'tannena ñerra'm esempo sehuom'cha'tanna'tena." Ñeñtpa' atet ye'chete't ahuat.

AÑ PUEPAÑ SAN PEDRO PO' CARTA 2 SAN PEDRO

Atto Pedropa' quellquërranerr carta allohuenacop ñeñt ame'ñetsa

¹ Masheñeshacha' ñaña nochaneshacha' allohuenes ñeñtes e'ñe attecma cohuen same'ñena atet yame'ñena yaña, tarro'mar allohuenepya' e'ñe ñapña Jesucristo ñeñt Yeyomporer yepen ñeñtara ñeñt Ya'queshpatañer yepen, ñeñtña e'ñe pocte' es pets. Na Simón Pedronpa' o'ch alla nequellquërrnaserr po'poñ carta, ñeñten torretsa Jesucristocop, ña puellsensaren. ² E'ñe nehuomcha'teñoŧes sa napa' o'ch notas: Yomporepa'chña atarr sebensare'tam'pene'; ñepa'chña socshatene'ña e'ñe sa seyo'chro allohuenes e'ñe seyemteñoŧ Yompor ñaña Puechemer Jesús ñeñt Yepartseshar yepen.

Atetcha' ye'pa'yena allohueney ñeñtey e'ñe cohuen ame'ña'yenaya Cristo

³ E'ñe yeyemteñoŧ Yompor ñapa' chocma apueney allohuen ñeñt allpon yepalltena alloch yocrena e'ñe cohuen ñocop. Ñaña apueney attoch yoctape'cherr ñeñt e'ñe pocte' enten ña. Ñeñtpa' e'ñe ña po'partsoteñoŧ apueney. Ñapa' añ muenen o'ch yecohuentapretera ña. Ñaña añ atarr muenen o'ch yorrtatapreter po'cohuenña. ⁴ E'ñe po'cohuenñoŧ ñapa' atet oterrey ñeñtcha' apuerrey ñeñtcha' nanac cohuen yenterr, ñaña ñeñtcha' atarr nanac sherberrets yocop. Añ apuerrey po'huamenc attoch amach añ atarr yemna'yeno ñeñt yentyen arr pat-sro. Attochña amach atarr nanac ya'sosyateno e'ñe yañeña. Allochñapa' e'ñe yeyemteñoŧ Paretspa' o'ch yaguërrñañ ñeñt e'ñe atet pena ña. ⁵ Ñeñto'marña añ poctetsa, ñanomcha'ña Cristo yeyemta. Allotpa' ñaña o'ch yorrtaten atto e'ñe pocte' es yepen. Allotpa' ñaña añ poctetsa, o'ch yeñotua e'ñe ora atet muenen Yompor. ⁶ Allotpa' ñaña o'ch yepuesuanom ñeñt atet yemnatse'tyen ya. Allotpa' ñaña e'ñech ya'huanta'huanom allohuen ñeñt atarr echarr yentyen, alloteññapa' o'ch yoctape'ch ñeñt poctetsa Partsocop. ⁷ Allotpa' ñaña o'ch yemorrentanna'ta, e'ñech yemo'nasheñsha' ye'panna. Allotpa' ñaña e'ñech yemuerannena.

⁸ Ñerra'm atetcha' se'pa añe'chno atet ñeñt o' notuaspa', allempoñapa' allo'nach sesen parrocmatats epas Yepartseshar Jesucristo. Allochñapa' amach e'ñe orrena señoŧere, añcha'ña e'ñe sorrtatyen ñeñt atet muenen Yompor. Allempoñapa' nanaccha' sesherberr Cristocop. ⁹ Ñerra'm ama allo'na yeyemuetneño Cristopa' yapa' amach e'ñe es cohue-naye' yeñotueno. Chach yottena ñerra'mrrate' puesheñarr ñeñt ama cheme'tetso a'yo. Añach cheme'ten ñeñt alla'tsena. Amapa' chach yottena ñerra'mrrate' puesheñarr aporo'yet ñeñt ama entetso, ama't e'ñe mamesha. Tarro'mar ñapa' o' cha puesuerran atto Cristopa' e'ñe e'shohuerrñañeñ po'chñar. ¹⁰ Ñeñto'marña masheñeshacha' ñaña nochaneshacha' te'pa' o'ch alla noterrser. Allo'nepa'ch sesen yemuet-nomaya Cristo atto ñapa' o' hua'ñerres attoch same'ñeñoŧpa' o'ch sequeshperra. Ñerra'm atetcha' se'papa' ama't ahuatapa' amach sepsere, ñaña amach alla sepueerro atarr toñoneŧ. ¹¹ Allochña sapa' se'cherrcha' all añcha'tarettena Yepartseshar Jesucristo ñeñt Ya'queshpatañer yepen.

Allñapa' o'ch aguërres e'ñe pocsheñeshocmañen all partsoten. Ña po'partsoñapa' ñeñt'pa' amach ahuañaña'atterro ama't e'ñe errponaña.

¹²Ñeñto'marña napa' noten, chocmach neyerpatasa atet noctape'chen. Ama't sapa' o' seño'tue añe'chno, napa' o'ch alla noterrser. Ama't o' chaponasa seyo'chro ñeñt' ñoñets po'ño'chpa' napa' nemneñ allo'nach neyerpatnensa. ¹³Napa' noten, te'pa' orameñ nocrrena e'ñe pocte' o'ch neyerpatnensa attoch o'ch setorroña Yompor po'ñoñ. ¹⁴Napa' neñoteñ o' manñamenapa' o'ch nerromuen, tarro'mar atet otne't Yepartseshar Jesucristo. ¹⁵Allochñapa' amach nemnatenso o'ch sepuesuer ama't erponaña. Ama't allempoch o' nerromuenpa' sapa' allo'nach seyerpueerra ñeñt' atet o' notuanmas.

Pedropa' e'ñe entane't Cristo allempo orrtatyesanete't po'partsoña

¹⁶Ya te'pa' o' e'ñe yeñotatas atto Yepartseshar Jesucristo ña partsotets, ñapa' ñach huerrtsa po'pocheño. Añ ñoñets po'ño'chpa' ama shequëñtsoyaye ñoñets ñeñt' o' yotuas. Ñeñt'pa' ama yaye' yocapña yotenso, ñaña ama ahuatnaneshañeyaye pueserrpareñ. Ya po'ño'chpa' e'ñeca'ye allame'ttsa yeñche'tña Yepartseshar Cristo. Yapa' e'ñe yentuoñe'tña po'partsoña. ¹⁷⁻¹⁸Tarro'mar yapa' e'ñe parro allo'tseney all aspento allempo Yompor Parets gatey Puechemer po'cohuenña. Yapa' allempopa' e'ñe ye'mhuaña ñoñets ñeñt' ye'morrtoya entot. Yompor ñeñt' nanac partsotets pue'ntaño, po'cohuenñopa' atet cohuentatenan Puechemer, ñeñt'pa' atet oten: "Añmapa' ñeñt' Nechemer ñeñt' nanac nemorrentena, ñapa' ña nanac nocshatene'." Ñeñt'pa' attoña aye'chochtatenan Puechemer.

¹⁹Te'ña ñeñt' otyese't ahuat ñeñt' a'mta'yesaye't Yompor po'ño'ñpa' te'ña e'ñe po'ño'chpa' o' e'ñe etsotuerra. Ñeñto'marña yapa' attoña yeñoteñ ñapa' e'ñe po'ño'ch otye't po'ño'ñoñ. Ñeñto'marña yocoppa' añ poctetsa o'ch yame'ña ñaña ñeñt' a'mta'yesaye't ahuat Yompor po'ñoñ. Ñeñt'ña ñoñetspa' a'puetarsampennay yocapña atet ñerra'mrrate' lampareñ a'puetarene' checmete'. Te'ña o' huapa Cristo; ñapa' ñeñt'cha'ña a'puetarerre' yaña yeyo'cher. Yapa' atarr cohuen yenteñ Cristo atet ñerra'm ranto atarrenñ. ²⁰⁻²¹Ñaña seño'chepa'chña ñeñt' a'mta'yesaye't ahuat Yompor po'ñoñ ñetpa' ama añaye' orrtatete'te ñeñt' atet cotape'chete't ñet. Atto ñet ma'yo'chrete't Partsocop, Paretsña Puecamquëñña eñotatahuete't atet'cha' serrpare'toñet Yompor po'ñoñ. Ñeñto'marña seño'chepa'ch ama pocteyaye e'ñe yañeña yocapño'ñ o'ch ye'nachatañeña po'ñoñ.

2

Ñeñt' ashcañtetsa amach Yomporeye' po'ñoñ serrpare'teno
(Jud 4-13)

¹Te'pa' o'ch notas ñaña po'poñ. Ahuatpa' orrte't ashcañ ñeñt' ama Yomporeye' po'ñoñ orrtatete'te, ñeñt'pa' atta shecane't israelena'tarnesha'. Sapa'cho'ña attecnoch orrtonasa ñeñt' amach Yomporeye' po'ñoñ a'poñeno. E'ñe a'nahuapa' o'ch ye'chatas po'poñ poctapña. Tarro'marcha' ñetpa' atet pet atotcha' a'chencatatuerrres. O'ch a'nasotamp'sasa atto Yepartseshar Cristopa' ñeñt'ña tsa'terroyaña yo'chñar. Tarraña ñetpa' machayotach a'chencatatuerrret ñañeñeta.

2 Esemepoch orrta, shonte'ch acheñ ñeñtcha' ameñaya atetcha' yeçhatanet. Ashcañpa' eñech pocte' entan ama't ñeñt atarr yeçhene' sosya'tsañ. Ñeñto'marña eñe ñoto' acheñenesha'pa' o'ch achmãre'teññañet Cristo po'ñoñ ñeñt po'ñoçh Yompor po'ñoñ. 3 Eñe pueye'cheño'pa' o'ch shecaset attoch yoram̄pesuas seçllayor. Eñe pocta'pño'pa' shecasetcha'. Tarraña ama't ahuatoteñ Yomporpa' ote't ahuo'ch mueñanet coñcha'puetso. Yomporpa' ama orrena ote'te, ama pueno po'ñoñ; atet oten, atetcha' pa. Ñeñt ama Yomporeye' po'ñoñ yeçhatetsopa' chenca'huerretcha'.

4 Tarro'mar ahuatpa' ama't Yompor po'millaño'feñnaneschar allempo atpare'chete'tpa' ama esesha' queshpatse'te. Yomporpa' allempoña huapore'tanete't o'pono coñcha'puetso, allña'pa' all ehuanca'rettenet checmeto. Allo'tpa' amach cha'nerreto, allotña esempohuañenpa' a'coñchata're'terrach. 5 Ñaña acheñenesha' ahuatpa' ama esesha' queshpatso allempo nanac atpare'chete't Yompor. Ñaña'pa' e'cho'pam̄psanet oñ, ora errañaren patso. Ñapña Noé a'queshpat epuet cançherrsheña ñeñt pamo'tsesha'. Tarro'mar Noé'pa' serrpare'te't ñeñt atet poctetsa Yomporecop. 6 Ñaña ahuatpa' ñeñt yeçhatse't anetso ñeñt pa'so'cheñ Sodoma ñaña Gomorra, Yomporpa' etomam̄psanet pa'netser. Atto etomam̄pesuerranet pa'netserpa' allohuenetpa' eñe poctacma poyuerret. Ora eñe tsapñere'tuet, o' a'chencatuerranet eñe poctacma. Atto te'pa' eñotatenan po'psheññeçhno ñerra'm o'ch atpare'teñet Yomporpa' attec'mach perraneter. Ñeñto'marña yeñoteñ erra'tsencha' orrtatene' ñeñt ama Yomporeye' po'ñoñ a'poteno, ñetpa'çho'ña attec'mach chenca'huerret ñamet. 7 Tarraña Yomporpa' a'queshpatan puesheñarr ñeñt pa'so'cheñ Lot ñeñt eñe pocte' es patse't. Ñaña'pa' epaye' entenan pamo'tsesha' atto' pa'yesete't ñeñt nanac sosey enten Yompor. Ñapa' epaye' llecachete't. 8 Ñapa' eñe cohuen cotape'che't. Pamo'tsesha'ña'pa' nanac pa'yesete't ñeñt ama cohuenayaye. Ñaña'pa' epaye' entapretanete't ñeñt cotape'chete't ñet, ñaña epaye' e'mapretanete't atto eñosatse'tyesete't. Ñaña'pa' epaye' llecanete't tarro'mar ñapa' eñe cohuen cotape'che't pueyoçhro. 9 Ñeñto'marña Yomporpa' eñoteñ attoch a'queshpatan ñeñt eñe pocte' es pets, ñerra'm esempo o' huapanet topateñets huomenc. Ñaña eñoteñ attoch mueroçhtatan ñeñt ama pocteye' es petso. Allo'nach mueroçhtatnenanet esempohuañencha' acrare'tetuerra allohuen acheñenesha'. Allempopa' mueñuerranetcha' coñcha'puetso.

10 Po'ñoçhpa' coñchatancha' ñeñt aña ma'yoçhrenaya ñeñt atta muenatse'tyets eñe po'çhtso't, atto nanaccha' sosyare' yeçha'yenet, añach eñe yomenet ñeñt eñe ñet pocta'pñet. Ñeñto'marña ama't Yepart-sesharpa' ama añcha'na'tpahuoye' enteñeto, attoña ama't ñaña allohuen ñeñt ahuamencatetyetsapa'çho'ña eñe achmãre'tueñet. Amach añcha'na'tpahuoye' enteñeto. 11 Tarraña Yompor po'millaño'feñnaneschar ama't nanac ahuamencatet, ñaña ama't nanac añcha'taretet, ñetña'pa' ama't Yomporesho'tsenet, ama sasare'teñetoña ñeñt ahuamencattetsa.

12 Tarro'mar ñeñt ama Yomporeye' po'ñoñ yeçhatetso ñetña'pa' sasare'tenet tarro'mar ama es eñoteneto, eñe atet ñerra'm es berr ñeñt ama es eñotetso. Atet muena'yenetpa' atetcha' penet. Ñeñt atet eñalletetsa

atef ñerra'm es berr; tsapatonetpa' o'ch rromueñet. O'ch rromuetpa' o'ch muetset. Ñeñt ama Yomporeye' po'ñoñ yeçhatetsopa' ñetpa'çho'ña esempohuañen attecmaçh a'cllatuaretterret. ¹³ Tarro'mar attoch atsa'tatuaretterret allohuen po'chñaret. Tarro'mar e'ñech ellapenete't coshatsetatset ñeñt ama pocteyaye. Ama't atto rrallme'chapretasetpa' nanaccha' pencatenset tarro'mar ñetpa' nanac sosyare' es penet. E'ñech pocsheñsha' mueneñet o'ch shecaset.

¹⁴ Ñeñt ama Yomporeye' po'ñoñ yeçhatetsopa' çhocmach mueneñ o'ch cohua'yesan coyanesha' attoch nanac cañoresha'tenet. Amach huañeno atto cotape'chenet sosey. Nanaccha' shequëñet coyanesha' ñeñt ama tama es eñoto attoch aguëñet. Añach yeçhenet atto es ye'chatse'tyenet. Tarraña ñeñt atef petsapa' o'patataretetcha' coñcheñets. ¹⁵ Tarro'mar ñetpa' o' puesuerret ñeñt poctetsa. O' sa'nmet Yompom nanac ellaçar. Ñetpa' co'a'neñet atef pe't Balaam ñeñt Beor puechemer. Ñapa' ahua'tpa' añach cohuen ente't o'ch pa'yesa ñeñt ama pocteyaye alloña gane't shonte' quelle. ¹⁶ Allempoña atef pe't Balaam ñeñt ama pocteyaye, pashanorñapa' o' che'ptare'ch, atto' eños atef ñerra'm acheñ eñets, ama't ashenpa' yeñoteñ ama eñeno. O'ña eñosuapa' Balaamñapa' allempoteña o'huañ atef pa'yesan sosey.

¹⁷ Ñeñt ama Yomporeye' po'ñoñ yeçhatenetopa' ñetñapa' amach es sherberrtso. Ñetpa' ama't attetañ ñerra'mrrate' oñ allot potenpa' te'ñapa' o' masohua. Ñetpa' amach es sherbatso ama't attetañ ñerra'mrrate' os, tarraña ñerra'm o' matach mōrr a'yopa', amach huato. Tarraña ñeñt atef petsapa' o'patataretetcha' all ama machecmeto o'pono. ¹⁸ Ña'ma nanaccha' ommo'chenet atto pa'yenet ñeñt nanac sosyare'. Ña'ma o'ch a'secheñet po'psheñeñ attoch o'ch p'achet ñeñt nanac muenenet po'chets attotcha' a'psataretterret, allempoñapa' o'chçho' alla puerrerrret. Shonte' acheñ ñeñt e'ñe etserra puesuanmue' ñeñt atef yeçha'yesete't ñeñt nanac sosyare', tarraña allempoñapa' o'ch alla muenereterr ñeñt o' puesuanmuetañ ahua't pocta'pñet. ¹⁹ Ñeñt ama Yomporeye' po'ñoñ yeçhatetsopa' o'ch alla oterraneterr: "Ama palltenoña o'ch es yesuanom. Yapa' e'ñe cohuenotseney. Yocoppa' ama eñalleña ñeñtcha' yeyore'terre'." Ama't atef oteneñ ñeñt atpare'tetspa' tarraña napa' o'ch notas, ñeñt atetpa' aña yeçhenet e'ñe ñet pocta'pña ñeñt nanac sosyare'. Tarro'mar ñerra'm erra'tsen es yeyçhatene' ñeñt'pa' ñeñt'ñaña pomnaren yepene'. ²⁰ Attecma ñerra'm ya. O' yeñotuer Yepartseshar Jesucristo, ñeñt'ara Ya'queshpatañer yepen. Yeparrocmateñot Cristo o' yesuanom sosya'tsañ. Tarraña ñerra'm yo'chñarpa' alla a'psaterrey Yompom po'ñoñpa' yañapa' elloña nanaccha' yoroçheno'tseney. ²¹ Ahua'tpa' yoroçheno'tseney tarro'mar ama yentare ñeñt poctetsa Partsocop. Te'ñapa' o' yenter ñeñt poctetsa. Tarraña ñerra'm te'pa' o'ch alla yepuerrerra ña'ma o'ch alla yepuesuerrñañ po'ñoñ atef oteneñ Parets, te'ñapa' yañapa' elloña nanaccha' yoroçheno'tseney. ²² Yapa' po'ñoçh ñerra'm o'ch alla yepuerrerra çha yottena ñerra'mrrate' ochec. Yapa' o'ch alla yepuerrerra "atef ñerra'm ochec o'ch a'tatsta; o'ch a'tatsetuapa' tematenpa' o'ch alla puerrerra allo'tsen pa'tatsña." Amapa' çha yottena ñerra'm atef pena ña'ma chañcho. "Chañchopa' o'ch apa; o'chña apuapa' o'chçho' alla puerrerra atstso allcha' e'ya'pna'tuerra o'ch alla atsetseñe'chuerr." Ama't ahua'toteñ atef otete't atef pena ochec, ña'ma atef pena chañcho.

3

Esempoch huerrmocha Cristopa' orrterrach ñeñtcha' achmāre'terre' Yompor

¹ Te'ñapa' masheñneshacha' ñaña nochaneshacha' o'ch notas, po'pocheño o' alla nequellquèrnaserr carta. Tarro'mar añecop nemneñ o'ch alla noctape'chatterserr, o'ch alla neyerpaterrser socpaña e'ñe cohuen. ² Ñaña o'ch alla noterrser, añ poctetsa amach sepsatsche ñeñt otye't ñeñt a'nta'yesaye't Parets po'ñoñ. Atet otye'tpa' atetcha' etsoterra esempohuañen. Ñaña amach sepsatsche atet o' otuas ñeñt Yompor puellsensarnesha'. Ñetpa' o' ye'chatuaset Yepartseshar Cristo po'ñoñ ñeñtpa' atetcha' sepa, ñeñtara Cristo Ya'queshpatañer yepen.

³ Ñanom o'ch señoach añ, ñerra'm esempoch o' huerrmocha Cristopa' huapach ñeñtcha' achmāre'tene' Yompor poctapña. Ñeñtpa' attach cotape'chen atet muenatse'tyenet ñeñt cohuen entenet po'chets. ⁴ Pachmāre'teño'tpa' o'ch otet: "Cristopa' otnerr esempopa' ahuo'ch huerra. Te'ñapa' ¿eso'marte' amo' huerro? Ama't yatañeshañpa' o' colla'huenet; teme'ttsen yenten ora erraparen e'ñe attera atet orrte't ahuatoteñ allempo errte' aye'hcataret pats." ⁵ Ñetpa' mueneñet o'ch puesuerret atto ahuat Yompor e'ñe po'ñoño'a o' ye'hcaturan enet. Patspa'cho'ña e'ñe po'ñoño'a ye'hc'a'hua. Ñaña e'ñe oño'pa' ye'hc'a añ pats. ⁶ Ahuatpa'cho'ña e'ñe puechopeño' oñpa' chenca'hua pats allempo e'ñe chorra oñ erraparen. ⁷ Ñaña Yompor po'ñoño'pa' te'pa' ama't patspa' esempohuañenpa' poyuerrcha'. Enetpa'cho'ña attec mach poyuerrcha' ñaña. Aña cohuen esempohuañencha' acrarētetuerra allohuen acheñenesha'. Allempochña mellapoterra. Ñeñtña ama ame'ñenaye ñapa' o'ch mueñanet coñcheñtso.

⁸ Tarraña te'ña masheñneshacha' ñaña nochaneshacha' amach atta es sep'chatsto. Añcha'ña o'ch señoach; Yomporpa' entenan ama't mil char atet ñerra'm pamtarra. Ama't ñeñt ñapa' pamtarr enten, yocopñapa' yenteñ atet ñerra'm mil char. ⁹ Puesheña'tets acheñpa' otenet o' meten shonte' char amo' huerro. Tarraña yapa' yeñoteñ Yepartseshar chocmach a'poctatan po'ñoñ o'ch huerra. Yapa' yeñoteñ tarro'mar amo' huerro añ cohuen ñato' esempoch o'ch yocape'chuerr ello cohuen Yomporecop allohueney. Ñapa' nanac muerenya ama mueno ama't eseshapa' o'ch chenquerra.

¹⁰ Tarraña ama't amo' huerro, esempopa' machayotach huerra. Atet ñerra'm eñet amach es yep'chenopa' machayotach huapa tsapo. E'ñech atet perraña ñaña Yepartseshar Cristo, e'ñech machayota huerra. Allempopa' huañerrcha' enet. E'ñe puepotrrareño'pa' huañcha'. Huañcha' ora ñeñt orretyetsa ñaña ama't ora allpon eñall, pañna'tuerrcha' ñaña e'yohuach. Tso'ñapa' ñach e'ñe e'yatuerrre' allohuen ñeñt eñall. Patspa'cho'ña ñaña ora ñeñt aye'hcataret arr patsropa' poyuach.

¹¹ O'ch poyuapa' o'ch e'yohua ora esocmañen. Ñeñto'marña sapa' añ poctetsa socop. O'ch socape'cherr e'ñe cohuen Partsocop, ñaña o'ch sepomhuerra sañeña e'ñe Yomporecop. ¹² Ñaña añ poctetsa o'ch secuame'teñ esempoch yoro'chtatuer Yompor. Sapa' o'ch se'torreññaña

attochña mameshapa' o'ch huerra. Esemepoch yoroçhtatuer allem-popa' ñachña a'crratuerra' enet. O'ch a'crratuerra enetpa' allem-pochña potlle'chuerr e'ñe poctacma. Ñaña ora ñeñt orreyetsa entopa' ñeñtpa'çho'ña e'ñech poyuahuer. O'ch poyuahuerpa' o'ch e'yohuerra poctacma. Tso'ñapa' ñach e'ñe e'yatuahuerre' ora allohuen ñeñt eñall. ¹³ Tarraña yapa' yecueñ o'ch etsoterra atet oterrey. Ñapa' ña yotnerre', eñalleterro'ch po'poñ enet etserrare', Patspa'çho'ña o'ch eñalleterra etserra. Allñapa' añach orrtatsa ñeñt e'ñe cohuenare' es pa'yets.

¹⁴ Ñehua, masheñeshacha' ñaña noçhaneshacha' o'ch secuame'teñ. Secuame'teño'pa' o'ch sema'yoçhrena attoch entuerres Yompor e'ñe pocte', attoch amach eñalle ñeñt'cha' sepencate'. O'ch cohuen sentannena epas samo'tseshá'. ¹⁵ Ñaña o'ch señoçh e'ñe eso'marte' amo' huerro Yepartseshar Cristo. Ñapa' atarr muerenana allohuen acheñenesha'. Ñapa' mueneñ yapa' o'ch yame'ñatuera acheñenesha' attoch yequeshpa'huerra allohueney. Ñeñtara o' quellconas ñaña masheñ Pablo po'cartot. E'ñe Yompor pueñotateño'fey atet quellconas ñaña. Yapa' nanac yemuerannena. ¹⁶ Ora allpon Pablo po'cartotpa' o' e'ño'tatey atet'cha' perra esempo. Pate'tets ñoñets ñeñt quellquë't Pablopa' nanac echarr yenteñ o'ch yeñoçh e'ñe atet oteneý. Puesheña'tets acheñ ñeñt ama tama es eñotopa' atarr moññe'toñete't Pablo po'ñoñ. Tarro'mar ñetpa' ama tama cosheññañeto Yompor po'ñoñ ñeñto'marña çhocmach mueneñet o'ch e'nachaterriñañet atet oteneý Pablo po'cartot. Ñaña po'poñ Yompor po'ñoñ ñetpa' çhocma mueneñet o'ch e'nachaterriñañet atet oteneý. Ñetpa' atotcha' a'chencatatuerrret ñetañeña.

¹⁷ Ñeñto'marña masheñeshacha' ñaña noçhaneshacha' te' napa' o' notuas necarto' ama't ama etsotena' atet notenes, attochña señoçh. Te'ñapa' seño'ta'tach allochñapa' amach shecaseto atto es panten ñeñt atpare'tets. Saña te'pa' amach sequeçhpatsterrñañe Yompor po'ñoñ atet atarr same'ñena te'. ¹⁸ Añcha'ña e'ñe Yompor puemuereño'pa' allo'nepa'ch sesen cotape'chnomue' e'ñe cohuen, ñaña allo'nepa'ch sesen yemuetnomaya Yepartseshar Jesucristo ñeñtara Ya'queshpatañer yepen. Ya'ye'choçhtatoñepa'ch tayoteñ e'ñe errponohuañen. Te'pa' ñeñt'ach notas, ñeñtpa' attetepa'ch Nompore. Allohua.

Pedro

AÑ ÑANOM SAN JUAN PO' CARTA 1 SAN JUAN

Jesucristo ñeñt po'ñoñ pen Yompor, yañapa' allochña e'ñe yocrrerra

¹ Te'pa' o'ch neserrpare'tatas arr nequellcot ñeñt atet pena Jesucristo; ñapa' chocma eñall ama't ahuatoteñ ama't allempo ama ayeçhcatarettena' pats. Ñeñtña yapa' e'ñe ye'me't atet serrpare'tatiesye't allempo orrtosa arr patsro, ama't ya yecloyotpa' e'ñe yeñche't e'ñe allame'tets, ama't e'ñe ya yototpa' ya'plla'yese't. Ñeñtña Jesucristo ñapa' ñeñtña po'ñoñ penña Pompore Paretstarro'mar ñach e'ñe eñotaterre'ña acheñenesha' atet oten Pompore Paretst. Ñeñtña ña po'ñoñpa' po'ñoçh yapa' allochña corretsayach. ² Ñeñtña Jesucristo allempo acheñetos arr patsro yañapa' e'ñe yeñche't. Ñeñto'marña te' yapa'cho'ña chocma yeñotatenes samña. Ñeñto'marña yeserrpare'tatenes ñeñtña Cristopa' ñeñt alloch yocrrena ama't tayoteñ e'ñe errponañohuen. Ña ahuatpa' e'ñe parro'tsen epuet Pompore Paretst. Te'ña atto orrtosnaya arr patsro yapa' e'ñe yeñche't e'ñe ye'me't atet serrpare'tatiesye't. Ñeñto'marña te' ya ñeñt atet yentyese't, ñeñt atet ye'myese't, te'ñapa' o'ch yeserrpare'tatas samña. ³ Allochñapa' attoch allohueney yeparrocmaterr epay Yompor Paretst ñaña Puechemer ñeñt Jesucristo. ⁴ Ñeñto'marña nequellquemas ñeñt e'ñe po'ñoçh yeñoten attochña sapa'cho'ña o'ch e'ñe socsherra samña.

Yomporpa' añ toma'ntena puetare' tarro'mar ñapa' e'ñech cohuen es orrtatyen

⁵ Añ ñoñets ñeñt ye'mapretyese't Jesucristo, te'ñapa' o'ch yeserrpare'tatas. Ñeñtapa' atet eñotateney: Yomporpa' ña e'ñe cohuenare' es pa'yets, ñapa' e'ñe atet pena ñerra'm puetare' e'ñech cohuen yenteñ. Ñapa' ama't mameshapa' ama orrtatenanoña ñeñt ama cohuenayaye; ñeñto'marña yoten, ñeshopa' ama't coñe'tapa' ama eñalleña checmete'. ⁶ Yapa' ama't yoteneñ o' e'ñe yeparrocmaterr epay Yompor, tarraña ñerra'm ora yorrtatyen ñeñt ama cohuenaye' enteno ña, yañapa' atta yeshquën. Ñeñto'marña chach yottena ñerra'm checmeta yechope'chen tarro'mar ama e'ñe yeychena' ñeñt e'ñe po'ñoçh cohuen enten Yompor. ⁷ Tarraña ñerra'm e'ñe cohuenare' es yorrtatyen atet pena Yompor, ñeñtñaapa' e'ñe atet yepena ñerra'mrate' arr yechope'chen puetaro e'ñe allo'tseney epay Yompor. Attoña allohueney e'ñech cohuen yeparrocmatuen ñaña Yompor Puechemer ñeñt Jesucristo ña po'rrasoña chocma e'shennayña allohuen yo'chñar.

⁸ Tarraña ñerra'm cha yoten, "ñapa' amaca'ye eñalle no'chñar", ñeñtñaapa' yañeñaca'ye shequëtsa tarro'mar Yompor poctapña ñeñt e'ñe po'ñoçh cohuenpa' amaca'ye chennayoña yeyoçhro. ⁹ Tarraña ñerra'm cho ya'meten yo'chñar, Yomporñaapa' e'ñech peretna'huernay allohuen yo'chñar, e'ñech e'shohuerrnay allohuen ñeñt ama pocteye' entapre'tenye tarro'mar ñapa' ama puenesho po'ñoñ, ñapa' e'ñe pocte' es pen, ñeñto'marña ñapa' chocmach peretnerrey. ¹⁰ Ñaña ñerra'm cha yoten, "ñapa' ama no'chña'tpeno", Yomporñaapa' cha yottatateñ ñerra'mrate'

ñapa' atarr ashcañ tarro'mar po'ñoñpa' atet otene y ya allohueneypa' e'ñe yo'chña'tuen. Ñeñña po'ñoñpa' yañapa' ama't e'ñe mameshapa' ama çhappennayoña yeyoçhro.

2

Jesucristo ñeñ e'ñe cohuen eñets yocop Yomporesho

¹ Nechemerneshacha' te' socoppa' o'ch nequellconas attoch amach allo'na sepa'nen ñeñ ama't mameshapa' ama pocteye' enteno Yompor. Tarraña ñerra'm esesha' orrtatene' ñeñ ama cohuenayaye, ñerra'm o'ch enamuerr peretneñets, Yomporpa' o'ch peretner tarro'mar eñall yocop ñeñcha' eñosets Apuesho. Ñeññaapa' añ Jesucristo ñeñ e'ñe pocte' es pa'yets. ² Ñapa' ña aparet attoch tsa'tuernaya yo'chñar. Ñeñpa' ama e'ñe yaptecpayaye, añeçpa'ñaña allohuene y ñeñtey añe patsro'tsa'yeney.

³ Ñerra'm e'ñe po'ñoçh yame'ñerrñaña Yompor po'ñoñ ñeñ atet otene y allempoñapa' e'ñech po'ñoçh yeñoter ñeñ atet pena ña. ⁴ Ñeñ otets, ñapa' e'ño' eñoteñ atet pena Yompor, ñerra'm attera atpare'tenan Yompor po'ñoñ ñeñ atet otene y, ñeñña atet otetspa' ñapa' attaca'ye shequën. Ama't e'ñe mameshapa' ama cheññañoña Yompor po'ñoñ pueyoçhro ñeñ e'ñe po'ñoçh atet otene y. ⁵ Tarraña ñerra'm esesha' e'ñe po'ñoçh ame'ñerraya Yompor po'ñoñ ñeñ atet otene y, ña po'ñoçhpa' o' morrenter-rana Yompor e'ñe pueyoçhrocmañen. Ñeñpa' attoña yeñoteñ po'ñoçhpa' o' yeparrocmaterr epay Yompor. ⁶ Ñerra'm esesha' otets, ñapa' e'ño' parrocmaten epuet Yompor, ñeñtepa' orrtatyesanepa'ña ñeñ atet pa'yese't Yompor Puechemer ñeñ Jesucristo.

Cristopa' ña orrtaterre' etserra morrentanna'teñets attochña e'ñe cohuen yemorrentannerra

⁷ O'ch masheñneshacha' ñaña noçhaneshacha' notas, ñeñ atet notenes nequellcot te' amorrentanna'tpahuepa'ch sentannena allohuenes ñeñpa' ama añeyaye ñoñets ñeñ ama se'mare. Ama't allempoteñ e'ñe errte' same'ñerrapa' allempoteñ se'muerrña ñeñ ñoñets ñeñcha' atet sepa' e'ñe cohuen ñeñtara Yompor po'ñoñ ñeñ e'ñe errtes e'muene' allempo. ⁸ Tarraña morrentanna'teñets ñeñ atet nequellquënnas te' ñeñpa' e'ñe atet ñerra'mrrate' o' tayo' orrtatonasetña atet morrentanna'teñets, tarro'mar Cristo e'ñe po'ñoçh orrtatonayña e'ñe etserra attoch e'ñe cohuen yemorrentanna'terra, ñeñto'marña sapa'cho'ña te'pa' o' e'ñe etserra sorrtaterrña samña attoch semorrentannerra. Morrentanna'teñets po'ñoçhpa' ñeñña atarr sherbets tarro'mar ora allohuen ñeñ ama cohuenaye' enteno Yompor, ñeññaapa' allo'na sen huañuanmats. Ñeñpa' e'ñe atet pena ñerra'mrrate' checmete'pa' allo'na sen metuanmats. Allohuen ñeñ e'ñe po'ñoçh cohuen enten Yompor, ñeñpa' atet ñerra'mrrate' puetare', ñeñña po'ñoçh o' a'puetarsañperres.

⁹ Ñeñña otets ñapa'cho'ña Yomporo' po'puetarenño'tsen tarraña ñerra'm orameñ e'moñe'tyenan pamo'ts, ñapa'cho' orameñ checmeto'tsena. ¹⁰ Tarraña ñeñ e'ñe po'ñoçh muerenaya pamo'tsesha', ñeññaapa' e'ñe Yompor po'puetarenño yechena. Allñaapa' ama eñalleña ñeñcha' paterrayerr ñeñ ama pocteye' enteno Yompor. ¹¹ Ñeñña e'moñe'tyene' pamo'ts ñapa' orameñ checmeto'tsen. Ñañaapa' atet pena

ñerra'mrrate' puesheñarr ñeñt checmetach chopheñe'chyen, ama eñoteñe erreneñte'ña sen tarro'mar checmete'pa' ñeñta a'nataclle'chene'.

¹² Nechemerneshacha' sa so'chñarpa' o' a'pretna'huare'tterra Cristeshot, ñeñto'marña te'pa' atet nequellquënnas. ¹³ Ñaña te'pa' o'ch notas saña allohuenes ñeñtes e'ñe pompornesha' penset. Sa te'pa' o' señoter Cristo ñeñt e'ñe ahuatoteñ eñall ama't e'ñe allempoteñ ama aye'chcatarettena' pats; ñeñto'marña te'pa' atet nequellquënnas saña. Ñaña te'pa' o'ch notas saña allohuenes ñeñtes huepueshares, sapa' o' e'ñe satpare'ter oneñet; ñeñto'marña socop te'pa' atet nequellquënnas saña.

Ñaña sa nechemerneshacha' te' sapa' o' e'ñe señoter atet penaña Yompor Parets; ñeñto'marña te'pa' atet nequellquënnas e'ñe socop. ¹⁴ Ñaña sa ñeñtes pompornesha' e'ñe penset, sa te'pa' o' señoter Cristo ñeñt e'ñe ahuatoteñ eñall ama't e'ñe allempoteñ ama aye'chcatarettena' pats; ñeñto'marña te'pa' atet nequellquënnas. Ñaña sa ñeñtes huepueshares, sapa' atarr ahuañcates tarro'mar Yompor po'ñoñpa' o' e'ñe çhaponasa seyo'chro ñeñto'marña sapa' o' atarr satpare'ter oneñet; ñeñto'marña te'pa' atet nequellquënnas.

¹⁵ Amachña aña atarr semorrenatsto allohuen ñeñt yentyen aña patsro tarro'mar ñerra'm aña atarr yemorrentena ñeñt aña patsro'tsenpa' Yomporña Parets po'ño'chpa' amach yemorrenteño, (ñeñto'marña amach errotenot çhaponayoña yeyo'chro ñeñt atet muenen ña). ¹⁶ Allohuen ñeñt eñall aña patsro, atet ñerra'm ñeñt atet muenatyenyey yechets, ñaña ñeñt yeye'chapretyena e'ñe ya yecueño't, ñaña ñeñt e'ñe yemnen ya o'ch e'ñe cohuen entapretyenyet, ñeñtña allohuenpa' ama Yomporeshoteye' hueno, ñeñtpa' aña patsro'marnesha poctapña. ¹⁷ Allohuen ñeñt yentyen aña patsropa' ñeñtpa' atarr ahuañaña, ñaña ñeñt yemnatse'tyen aña patsro ñeñtpa'cho'ña atarr ahuañaña. Tarraña ñeñt atet petsa ñeñt e'ñe atet muenen Yomporpa' ñeñtña' amach huañerro ama't errponaña.

Atet pena cotapñats ñeñt e'ñe po'ño'ch Yompor poctapña ñaña atet pena po'poñ cotapñats ñeñt shequëñtsa

¹⁸ Te' nechemerneshacha' o'ch notas po'poñoneñ. Te'pa' o' mameshamerra o'ch huañerr allempochña mellapoterra. Atet se'myen te' ñeñtpa' allempochña orrterra ñeñtcha' atarr e'moñe'terre' Cristo pueyochreshohuen. O' e'ñe tayoteñ orretyesa shonte' ñeñt çhocma e'moñe'tene' Cristo. Ñeñto'marña te'pa' yeñoteñ o' mellapoterrmocha. ¹⁹ Ama't ahuañmo'cha e'ñe parrocmayap'chañe't ñetña te'pa' o' ahuanmuet ellonet o' sohuanerryet tarro'mar po'ño'chpa' ama allohuenacmaye' yeparrocma'terro. Ñerra'm po'ño'chcha' allohuenacmay yeparrocma'terreñ allempoña ñetpa' allo'tsa'yenetaña'te' ñamet yesho. Tarraña te'ña ñetpa' o' ahuanerret ellonet attoña o' yeñoterranet po'ño'chpa' ama allohuenacmaye' yeparrocma'terro.

²⁰⁻²¹ Tarraña te'ña sapa' Cristoña sechorratenayaña Parets Puecamquëñ. Attoña allohuenes o' e'ñe señotuer. Sapa' o' e'ñe señotuerr ñoñets ñeñt po'ño'ch, ñeñtpa' ama shequëñtsoyaye. Te' sapa' ama e'ñe sepallteño'teye' nequellquënnaso ñeñt atet poctetsa socop. Tarro'mar sapa' seño'teñ ñeñt ñoñets shequëñtspa' ama Yomporeshoteye'

hueno tarro'mar ñeñt' Yompor po'ñoñpa' ñeñtña e'ñe po'ñoçh ama shequëñtsoyaye.

²² Te'ña sapa' señochepe'ch ñeñt' atarr nanac ashcañtetsapa' ñeñtca'yeña otets Jesúsapa' año' Cristoyaye ñeñt' atarr yecuen ya ahuatoteñ ñeñtcha' llesenserr Yompor. Ñeñto'marña ñetpa' cha e'moñe'teñetña Cristo, ama çhoye' ame'ñeñeto, Pompore'naña ama ame'ñeññañeto, cha a'nasoteñet. ²³ Allohuen ñeñt' a'nasotenaya Yompor Puechemer, ñetpa' Pompore'naña ama aguëññañeto. Tarraña allohuen ñeñt' otets, Jesúsapa' Yomporo Puechemer ñeñt' Cristotets, ñetñaapa' e'ñe aguëññañet Pompore'.

²⁴ Ñeñto'marña o'ch notas, Yompor po'cohuenña ñeñt' se'muerr ahuañmo'çoteñ, te'ña sa atto o' e'ñe señoter seyoçhro allo'nepa'ch sesen ame'ña'nmata allochñapa' attoch e'ñe cohuen separrocmaterr epas Yompor Puechemer ñaña epas Yompor Parets. ²⁵ Jesucristopa' atet otnerrey o'ch apuerrey e'ñe po'ñoçh attochña yapa' corretsayach yocsheñeshocmañen tayoteñ e'ñe errponañohuen.

²⁶ Ñeñt' notenes añ nequellcot ñeñt'pa' añeçpa nequellquënnas attoch sapa' e'ñech señoter allochñapa' attoch ama sa'shcarettero. ²⁷ Tarro'mar Jesucristo o' chorraterresa Parets Puecamquëñ, ñeñto'marña sapa' ama sepallteno o'ch esesha' yeçhata tarro'mar ñapa' eñotatascha' allohuen. Ñaña ñeñt'cha' atet yeçhaterres ñapa' e'ñeca'ye po'ñoçh atet, ñeñt'pa' ama shequëñtsoyaye. Ñeñt' atet yeçhatenes sapa' allo'nepa'ch sesen parrocmatenaya Cristo.

²⁸ Te'ña nechemerneshacha' allo'nepa'ch sesen parrocmatenaya Cristo allochñapa' ñerra'm esempoch huerra ñapa' ñachña e'ñe seyemtapuerra attoch sapa' amach cha sepencapuerro ñerra'm esempoch huerra. ²⁹ Ñehua, sa te'pa' o' e'ñe señoter Jesucristo ñapa' e'ñe pocte' es pa'yen. Ñeñto'marña señochepe'ch ñaña allohuen ñeñt' e'ñe pocte' es orrtatyets ñeñt'ñaapa' e'ñe po'ñoçh puechemer peñ Yompor.

3

Yomporpa' e'ñe puechemerasha' peney

¹ Te' sapa' çhosaña e'ñe cotape'cherre', Yomporpa' atarrca'ye nanac morrentenya. Ña e'ñe puemorreneteñoçey ñapa' e'ñe puechemer peney, ñeñto'marña yapa' e'ñe po'ñoçh Yomporena'tarey. Ñeñto'marña acheñenesha' arr patsro ñeñt' ama ame'ñetso ñetñaapa' ama eseshaye' eñotenayeña ñeñt' atet yoctape'chyen Yomporecop tarro'mar Yomporpa'çho'ña ama eseshaye' eñotenaye ñeñt' atet cotape'chen ña. ² O'ch masheñeshacha' ñaña noçhaneshacha' o'ch alla noterrser, te'ña yapa' e'ñe po'ñoçh puechemer peney Yompor. Ama't ama e'ñe eñotatenya' erroteneycha'ña ya esempohuañen tarraña yapa' e'ñe yeñoteñ ñerra'm esempo orrterra Jesucristo, yañapa' e'ñech attey yaña ñerra'm ña tarro'mar allempo yapa' yentercha' ñeñt' atet atarr cohuentena ña. ³ Allohuen ñeñt' atet ame'ñetsa, ñetña e'ñe pueyemteñoçet cohua'me'teñet, attoña ñetpa' e'ñech cohuen cohuentataretterret ñamet e'ñech attet ñerra'm Jesucristo ñeñt' e'ñe cohuenare' es orrtatyets.

⁴ Allohuen erra'tsen ochña'tetspa' ñeñt'ñaapa' cha atpare'tenan Yompor po'ñoñ ñeñt' atet anaret. Tarro'mar ñerra'm esempo yatpare'ten ñoñets ñeñt' atet anaret, ñeñtña yapa' çhach yeyoren yo'chñar. ⁵ Sapa' e'ñe

señoteñ Cristo ñapa' tarro'mar huapa arr patsro ñach ahuanerre' ya yo'chñar ama't ñapa' ama eñalle po'chñar ama't coñe'ta. ⁶ Ñeñto'marña allohuen esesha'ch parrocmaterre' Cristo, ñetñapa' ama çhoye' ochña'tare'teneto. Tarro'mar ñeñt atarr ochña'tare'tetspa' ñeñtñapa' ama puentaranoña Cristo, ama cheññañoña pueyoçhro ñeñt atet pena Cristo. ⁷ Nechemerneshacha' sapa' señohepa'ch ñeñtcha' atet noterrser te', allochñapa' attoch amach esesha' seshquèrraye. Po'ñoçh ñeñt orrtatyene' ñeñt e'ñe pocte' enten Yompor, ñeñtña po'ñoçhpa' e'ñe cohuen acheñer, e'ñech atet pena ñerra'm Cristo ñeñt e'ñe pocte' es pa'yets. ⁸ Tarraña ñeñt çhocma orrtatyene' ñeñt ama pocteye' enteno Yompor, ñeñtña acheñerpa' po'ñoçh oneñeñena'tar, tarro'mar oneñetpa' e'ñe ahuatoteñ ñapa' aña orrtatyes ñeñt ama't mameshapa' ama pocteye' enteno Yompor. Ñeñto'marña Yompor Puechemerpa' huapa, allochñapa' ñach e'nuerre' atet pãtse'tyena oneñet.

⁹ Allohueny ñeñtey po'ñoçh eñalleterrtsa Yomporotpa' amach allo'na yo'chña'tare'tneno tarro'mar yapa' o' yeyçherrñañ ñeñt atet pena Yompor Parets. Yapa' po'ñoçhpa' o' ye'ñalleterra Yomporot ñeñto'marña amach errotenot alla yo'chña'tare'terre'te. ¹⁰ Arrpa' attoña yeñoteñña ñeñt Yomporena'tar ñaña ñeñt oneñeñena'tar. Allohuen ñeñt ama pocteye' es orrtatyetso ñeñt ama morrentenaye pamo'tsesha', ñetñapa' amaca'ye Yomporena'tareyayeto.

Amorrentanna'tpahuepa'ch yentannena e'ñe allohueny

¹¹ Añ ñoñetspa' e'ñe ahuatoteñ eñotatasete't amorrentanna'tpahuepa'ch e'ñe allohueny. ¹² Amach atet yeãatsto atet pa' ahuat Caín, ñapa' oneñeñena'tara. Ñañapa' pa'mo'nasheña muetsa. Tarro'marca'yeña muetse ñapa' amaca'ye cohuenaye' cotape'che'te; pa'mo'nasheñña Abel ñeñt muetsa, ñañapa' e'ñe cohuen cotape'che't Yomporecop.

¹³ Ñeñto'marña masheñneshacha' ñaña noçhaneshacha' e'ñepa'ch señota sapa' ñeñto'marcha'ña e'moñe'tasña acheñenesha' añ patsro ñeñt ama ame'ñetso. ¹⁴ Tarraña ya e'ñe yemorreneteño't yamo'tspa' e'ñe yeñoteñ yapa' o' yemñtanerrña allcha' e'ñe poctacma yerromuerreñ. Yapa' o' yècherr allña yapa' corretsayach. Ñeñtña ama muerenayo pamo'ts ñetñapa' allo'tsenareta allcha' e'ñe rromuerret e'ñe poctacma. ¹⁵ Allohuen ñeñt çha e'moñe'tyenan pamo'tspa' ñeñt po'ñoçhpa' amtsaña enteñña Yompor. Ama't e'ñe sapa'çho'ña seño'teñ ñeñt amtsaña' pueyoçhropa' ama eñalleña attoch ñapa'çho'ña corretsach tayoteñ e'ñe errponañohuen. ¹⁶ Arrpa' attoña e'ñe yeñoteñña ñeñt atet penaña e'ñe po'ñoçh morrenteñets, attoña Jesucristopa' a'rroya ñañeña attoch rroma yocop. Yapa'çho'ña e'ñepa'chña pocte' yeñch o'ch ya'rroya yañeña attoch yerroma yamo'tseshacop. ¹⁷ Tarraña yaña ñerra'm yechyen attoch e'ñe cohuen yocrena arr patsro, allempo yenteñ yamo'ts çha atarr es pallta'yenet yañapa' ama yemorreneteño, Yomporpa'çho'ña ama't e'ñe mameshapa' amaca'ye yemorreneteñoña yeyoçhro. ¹⁸ Amach nechemerneshacha' e'ñe yeñoñoçhaya yotanna'tatsto atarr yemorrentannena. Chochña yorrtatyesña yemorreneteña e'ñe po'ñoçh atet es yeãa'yen po'psheññecop e'ñe cohuen.

Attoch e'ñe cohuen yeyemtera Yompor

¹⁹ Alloña yapa' e'ñech yeñotena yapa' e'ñe po'ñochey ñeñtey atet petsa e'ñe cohuen. Ñeñto'marña yapa' e'ñech yeñmataten yeyoçher Yomporeshonet. ²⁰ Tarro'mar ñerra'm ama e'ñe yeñmañeshocmaye' es yepa'yeno Yomporecop, Yomporñapa' elloña e'ñe po'ñoçh atet eñoteny tarro'mar ñapa' ña atarr eñotañesha'. ²¹ Tarraña nechemerneshacha' ñerra'm e'ñe yeñmañeshocmañen es yepa'yen Yomporecop ñeñtepñapa' Yomporcha'ña e'ñe cohuen yeyemtena. ²² Atto yame'ñerrñaña po'ñoñ ñeñt atet oteneý, ñapa' atarr coshenya; ñeñto'marña ñerra'm es yenamueñ, ñapa' çhocmach e'ñe po'ñoçh apueneý. ²³ Yompor po'ñoñoç atet oteneý o'ch e'ñe cohuen yame'ñerrñaña Puechemer ñeñt Jesucristo. Ñaña oteneý amueranna'terrapo'ch allohueneý, atet oteneýña ña. ²⁴ Erra'tsencha' e'ñe cohuen ame'ñenaya Yompor po'ñoñ ñeñt atet oteneý, ñetñapa' e'ñe parrocmatenet epuet Yompor. Ñeñto'marña yeñoteñ yeparrocmaten, Parets Puecamquëñot ñeñt chorratenya ñeñtña yeñotatene'ña e'ñe yeparrocmateña Yompor.

4

Attoch yeñoch erra'tsente'ña ñeñt e'ñe po'ñoçh eñoraten Yompor Puecamquëñ; attoch yeñoch ñaña ñeñt epatare'tene' Yompor poctaþña

¹ Ñaña te'pa' o'ch masheñneshacha' ñaña noçhaneshacha' noterrser; sapa' ñato't same'ñena'ña allohuen pa'namen coþañats tarro'mar ñetpa' ama't otenetañ Partso' Puecamquëñ eñoratenahuet, sapa' çhochña señotyesña ñeñt pa'namen coþañatser attochña sapa' e'ñe señoçh erra'tsente'ña ñeñt e'ñe po'ñoçh huetsa Yomporeshot. Tarro'mar shonteñ ñeñt otetseñ ñetpa' Yomporo' po'ñoñ a'mitenet tarraña ñeñtpa' ama Yomporeyaye po'ñoñ. Ñeñtpa' erraþaren o' orretyesa añ patsro. ² Arr sapa' alloch señoçh erra'tsente'ña e'ñe po'ñoçh eñoratenña Parets Puecamquëñ: Erra'tsencha' otats Jesucristopa' ña po'ñoçh partsoç acheñetos arr patsro, ñeñtña coþañatserpa' e'ñe po'ñoçh Parets Puecamquëñ eñoratene'. ³ Erra'tsencha' ñeñt amach atteye' otetso Jesúsocop, ñeñtña coþañatserpa' ama po'ñoçh Parets Puecamquëñ eñoratenahuet. Ñeñtpa' ñeñtña po'ñoçh e'moñe'tene'ña Cristo ñeñt atet se'mare'tyese't o'ch huapa. Te'ñapa' o' orrtonaya añ patsro.

⁴ Saña po'ñoçh nechemerneshacha' e'ñe po'ñoçh Yomporena'tares tarro'mar sapa' ama añ se'mñoteno atto pa'namenot shecare'tyensetañ. Yompor Puecamquëñ ñeñt sechorrenayapa' ñeñtña sapa' atarr ahuamencattatenes. Ñeñtña chorrenaya añ patso'marnesha'pa' ñapa' ama e'ñeye' ahuamencattatenaneto. ⁵ Ñeñtña shecare'tyets e'ñe ñet poctaþñoçet po'ñoçhpa' patso'marnesheta. Ñeñto'marña ñerra'm eñosetpa' añach serrpare'tyenet ñeñt patso'marecpa. Ñeñto'marña ñetpa' patso'marneshach e'mñnotenahuet. ⁶ Yaña po'ñoçhpa' Yomporena'tarey. Ñeñt po'ñoçh eñotene' Yompor, ñetñapa' e'ñech cohuen e'mñnotenyet ya. Ñeñtña ama Yomporena'tareyaye, ñetñapa' amach e'mñnotenyet. Yapa' alloña yeñotenña coþañats ñeñt po'ñoçh huetsa Yomporeshot attoña yeñotenña ñaña coþañats ñeñt shequëñets.

Atto Yomporpa' ña atarr amorrentañtetsa

⁷ Masheñneshacha' ñaña noçhaneshacha' amueranna'tpahuepa'ch allohueny tarro'mar ñeñtpa' Yomporeshot huena. Allohuen amorrentñapa' ñetpa' o' eñalleteret Yomporot, po'ñoçh o' eñoteret ñeñt atet pena Yompor. ⁸ Ñeñña ama amorrentñopa' ñocpuetpa' ama eñoteñetoña atet penaña Yompor, tarro'mar Yompor ñapa' ña atarr amorrentañtetsa. ⁹ Añpa' Yompor orrtate yocop allochñapa' yapa' o'ch yeñoter Yomporpa' atarr morrentenya. Attoña mueñan Puechemer arr patsro ñeñt po'patrro pen attochña yapa' corretsayach e'ñe ñeshot. ¹⁰ Arrpa' all orrtatonay Yompor ñeñt e'ñe po'ñoçh morrenteñets: Allempo ya ama't mameshapa' ama yemorrentpeño Yompor, ñañapa' allempoteñ atarr morrentenya ya. Ñeñto'marña ñapa' mueñonay Puechemer ñeñtcha' yetsa'terroya yo'chñar.

¹¹ Ñeñto'mar masheñneshacha' atto Yomporpa' atarr nanac morrentenya, yapa'cho'ña e'ñepa'chña yemorrentanna'tuena allohueny. ¹² Yomporpa' ama esesha' puentare. Tarraña ñerra'm e'ñe yemorrentannena allohueny, po'ñoçhpa' e'ñe yeparrocmaten epay Yompor. Ña pueomorrenteñapa' e'ñech chorrenya poctacma. ¹³ Ña atto apuerrey e'ñe ña Puecamquëñ ñeñña yeñotatene'ña yapa' e'ñe yeparrocmaten epay Yompor. ¹⁴ Ñaña yapa' e'ñe yentuoñet Yompor Puechemer ñeñto'marña ya te'pa' o' ya'potonas saña atto Yompor po'ñoçhpa' mueñonay Puechemer ñeñtcha' ya'queshpaterre' ya ñeñtey yeçha'yetsa añ patsro. ¹⁵ Ñeñt ame'ñenaya Jesús ñapa' po'ñoçh e'ñe Yomporo Puechemer, ñetñapa' e'ñe parrocmatenet epuet Yompor.

¹⁶ Attoña ya te'pa' e'ñe yeñoteñ ñaña yame'ñeña atto Yomporpa' atarr morrentenya. Yompor ñapa' ña atarr amorrentañtetsa. Ñerra'm e'ñe po'ñoçh yemorrentannena po'ñoçhpa' o' yeparrocmaterr epay Yompor. ¹⁷ Attoña yapa' e'ñech cohuen yemorrenteña Yompor e'ñe poctacma, allochñapa' yapa' amach yeñcha'nañotayaya yeyemtero Yompor ñerra'm esempohuañen eñotatyesuerrey e'ñe errotencha' entyesuerrey. Tarro'mar e'ñe atet pena Jesucristo, yapa'cho'ña e'ñech atet yepena yaña arr patsro. ¹⁸ Ñerra'm po'ñoçh yemorrenteña Yomporpa' amachña cha yeñcha'teñe. Tarro'mar atto e'ñe poctacma cohuen yemorrentannena epay Yompor, ñeñña po'ñoçh yehuapore'tampene'ña yeñchañ. Ñerra'm esempo cha es yeñcha'tenpa' attoña e'ñe yañeña coñchatetsa. Ñaña ñerra'm orameñ yeñcha'ten amaca'ye e'ñe yeyçhena'ña attoch e'ñe cohuen yemorrentannena e'ñe poctacma.

¹⁹ Yomporpa' o' e'ñe morrenterria yanom, ñeñto'marña yapa'cho'ña te'pa' o'ch e'ñe yemorrentera yaña. ²⁰ Ñerra'm esesha' otets, ñapa'cho'ña e'ño' cohuen morrentenana Yompor, tarraña ñerra'm cha e'moñe'tyanan pamo'ts, ñeñña atet otetspa' ataca'ye shequën. Atto ama morrentenano pamo'ts ama't ñeñtpa' e'ñe enteñ, amach errotenoñ morrentanoña ñaña Yomporña tarro'mar ñeñtpa' amaca'ye çhoye' enteñe. ²¹ Yompor po'ñoñ ñeñt yotene': Ñerra'm po'ñoçh yemorrenteña Yompor, yamo'tspa'cho'ña e'ñepa'chña cohuen yemorrentenanet.

5

E'ñe yeyemteñot Cristo çhocmach pomnaren yepen allohuen ñeñt ama pocteye' enteno Yompor arr patsro

¹ Allohueney erra'tseneycha' ame'ñerraya Jesús'pa' ña Cristotats ñeñteña yapa' o' e'ñe puechemer perrey Yompor. Ñehua, yeñoteñ arr patsro ñerra'm yemorrenteña puesheñarr acheñ ñeñt' achemereshat, puechemereshanaña e'ñe yemorrentuena. ² Ñeñto'marña yeñoteñ ñaña ñerra'm esempo yemorrenteña Yompor ñaña yame'ñerrñaña po'ñoñ atet oteneý, aña'ñaña e'ñe yemorrentuena ñeñt' puechemereshat' pen Yompor. ³ Atto yemorrenteña Yompor ðhoc yame'ñerrñaña po'ñoñ ñeñt' atet oteneý. O'ch e'ñe yepena ñeñt' atet oteneý, ñeñtpa' ama torrapahuoyaye. ⁴ Tarro'mar allohueney ñeñtey puechemer pen Yompor; yañapa' e'ñe yeyemteño Jesús ðhocma pomnaren yepen allohuen ñeñt' ama pocteye' entyeno Yompor arr patsro. ⁵ Allohuen ñeñt' ame'ñenaya Jesús ñapa' Yomporo' Puechemer; ñetña e'ñe ñaptet pomnaren penetña allohuen ñeñt' ama pocteye' entyeno Yompor arr patsro.

Allpon ñeñt' yeñotaterre' Jesucristopa' e'ñe po'ñoçh Yomporeshot huapa

⁶ Ñeñta Jesucristo allempo huapa arr patsro eñall ñeñt' yeñotaterre'ña ñapa' e'ñe po'ñoçh Yomporeshot huapa. Ñeñt' ñanompa' allempo atto apataretta Yomporecop oño. Tarraña ama e'ñe ñapta oña yeñotataye ñapa' e'ñe po'ñoçh Yompor Puechemer. Po'rraso'ñaña yeñotate'ña allempo acorso'tamþsaretterra; ñapa' e'ñe po'ñoçh Yompor Puechemer. Ñaña Parets Puecamquëñ ñeñtpa'çho'ña ña yeñotaterre'ña Jesús'pa' e'ñe po'ñoçh Yompor Puechemer tarro'mar Parets Puecamquëñpa' erroten es eñotateney ñeñtpa' e'ñe po'ñoçh atet. ⁷ Ñaña eñall ma'pa ñeñt' pue'ntaño'tsen ñeñtña yeñotatene'ña ya. Ñeñtpa' Yompor Parets ñaña po'ñoñ ñaña Puecamquëñ. Ñetpa' ama't ma'po'maret e'ñe patrra atet petsa. ⁸ Ñaña arr patsro eñall ma'pa ñeñtña yeñotatene' Jesús'pa' ña po'ñoçh Yompor Puechemer. Ñeñtpa' Parets Puecamquëñ, allotpa' oñ allempo apataretta Yomporecop allotpa' ñaña po'rras atto acorso'tamþsaretterra. Ñetpa' ama't ma'po'maret eñotatenet, e'ñe patrra eñotatyenet ñeñt' Jesús ñapa' e'ñe po'ñoçh Yomporo' Puechemer. ⁹ Ñehua, arr patsro ðhocma e'ñe pocte' yenteñ ñeñt' atet eñotateney acheñ tarro'mar ñeñtpa' ðhocma sherbeney. Ñaña ñeñt' atet eñotateney Yompor elloña ñeñtpa' atarr nanac sherbeney. Tarro'mar ñeñtpa' e'ñe ña Puechemererecop eñotateney Jesús'pa' Yomporo' Puechemer. ¹⁰ Ñerra'm esesha'ch ame'ñerraya Yompor Puechemer, ñeñtña' echerrancha' e'ñe ña pueyoçhro ñeñtcha' eñotaterre' e'ñe pocte' o'ch e'ñe yemterrana Jesucristo ñeñt' e'ñe po'ñoçh Yompor Puechemer. Ñeñtña ama ame'ñenayo Yomporpa' cha ottatateñ ñerra'mrate' ñapa' atarr ashcañ tarro'mar ñeñt' acheñerpa' ama ame'ñenano Yompor ñeñt' atet eñotateney Puechemererecop. ¹¹ Yomporpa' atet eñotateney atto yapa' apuey Puechemer, e'ñe ñeshoñña yapa' corretsayach yocsheñeshocmañen tayoteñ e'ñe erponañohuen. ¹² Ñeñtña aguërre' Yompor Puechemer aña'ñaña o' aguërret attoçhña ñetpa' corretsetach tayoteñ e'ñe errponañohuen. Añña ñeñt' ama aguërre' Yompor Puechemer, ñetña' amach esesha' aguërre' alloch correrret.

All pa'namen cotape'chatnerranet e'ñe allohuanen allempo so'tnerranet po'cartot

13 Ñeñt allpon o' nequellconas sa ñeñtes ame'ñenaya Yompör Puechemer, sapa' ñeñtcha'ña señotaterre' po'ñoç sapa' corretsasach socsheñeshocmañen e'ñe tayoteñ errponañohuen.

14 Yapa' e'ñe yeyemteñoť Yompör ñeñto'marña yeñoteñ es yenamñ ñeñt pocte' enten ña, yapa' çhocmach e'ññoteney. 15 Ñaña atto yeñoteñ ñapa' çhocma e'ññoteney ñerra'm es yenamñ ñeñto'marña yeñoteñ e'ñe allorocma o' yo'patatareña ñerra'm escha' yenamueñ.

16 Ñerra'm eseshascha' eñote' samo'ts ñeñt atet pene' ñeñt ama pocteye' enteno Yompör, ñeñtña po'chñarpa' ñerra'm ama añecpayaye alloch rromuerr attoch chenquerra e'ñe poctacma, sañapa' añcha' senamoñ Yompör attoch ñach a'çrraterre' e'ñe puecamquẽñoť. Yompörpa' o'ch a'çrrater ñerra'm po'chñarpa' ama añecpayaye alloch rromuerr attoch chenquerra e'ñe poctacma. Po'ñoçhpa' eñall yo'chñar alloch yerromuerr attoch yechenquerra e'ñe poctacma. Ñeñto'marña napa' ama añecpaye' notenso sapa' çhocmach sema'yochampeña ñeñtcha' chenquerrtsa e'ñe ña patpare'teñoť. 17 Ñehua, yeñoteñ allohuen ñeñt ama pocteye' enteno Yompör ñeñtpa' ochña'teñets enteñ Yompör. Tarraña eñall ñaña ochñarets ñeñtpa' ama añeyaye ñeñt alloch yerromuerr attoch yechenquerra e'ñe poctacma. 18 Yeñoteñ allohueney ñeñtey po'ñoç eñalleterrtsa Yompörötpa' amach allo'na yepa'nenó ñeñt ochñarets enten Yompör. Tarro'mar Yompör Puechemerpa' çhocma cohuañpeney ñeñto'marña oneñeñpa' ama't e'ñe mameshapa' amach alla erroť perrye'te.

19 Te'ña yapa' yeñoteñ o' yeyomporena'tarterra ya. Po'potantañña acheñenesha' arr patsro ñeñt ama ame'ñetso, ñetñapa' aña yochresha'tenahuet oneñeť.

20 Yañapa' yeñoteñ ñeñt Puechemer pen Yompörpa' ñañapa' o' huapa. Ñaña yechapaterre'ña yeyoçhro attochña yapa' o'ch yeñoter Yompör ñeñt e'ñe po'ñoç Parets. Ñeñto'marña yeñoteñ o' yeparrocmaterr epay ñeñt e'ñe po'ñoç Yompör Puechemer ñeñtpa' Jesucristo. Attoña yapa' o' e'ñe yeñoter Yompör ñeñt e'ñe po'ñoç Parets, ñeñtña yapa' allochña e'ñe corretsayach yocsheñeshocmañen tayoteñ e'ñe errponañohuen. 21 Te'ña nechemerneshacha' sapa' e'ñech señotnoma, ñato'tña seyomporer sepeña'ña po'poñ ñeñt ama po'ñoç Partsoyaye. Te'pa' ñeñtach notas, ñeñtpa' attetepa'ch Nompore. Allohua.

Juan

AÑ PUEPAÑ SAN JUAN PO' CARTA 2 SAN JUAN

Attoch cohuen yemorrentannena e'ñe po'ñoch atet otene yompor po'ñoñ

¹ Napa' na ñeñten pompopor pen allohuen ñeñt ame'ñenaya Yompor, te'pa' o'ch nequellconas añ carta. O'ch nequellconap̄ ãa ñeñteḡ e'ñe nočhesha' nepeneḡ, ãa ñeñteḡ o' acerr Yompor. O'ch nequellconap̄ ñaña ora pechoyoreshohuen ñeñt e'ñe pachor pepene'. Napa' e'ñe po'ñoch atarr nemorrentensa, ama e'ñe nap̄ta nemorrentenso, elloña po'potantañečno ñeñt o' enterran ñeñt e'ñe po'ñoch Yompor po'ñoñ, ñetpa'cho'ña e'ñe morrentuenset. ² Tarro'marña sapa' atarr yemorrentensa atto yapa' o' e'ñe çhernaya ya yeyoçhro ñeñt e'ñe po'ñoch Yompor po'ñoñ. Ñeñtpa' allach e'ñe a'puena yeyoçhro errponañohuen. ³ E'ñe nehuom̄cha'teñoḡes sa napa' o'ch notas: Yomporepa'ch sebensare'tam̄pene' ñeñtara Parets epuet Puechemer Jesucristo ñeñt Yepart-seshar yepen. Ñetepa'chña semuerenaya attochña sapa' e'ñech cohuen socshena seyoçhro. Ñeñtpa' añecop attochña sapa' señoḡterrñañ ñeñt e'ñe po'ñoch Yompor po'ñoñ attochña sapa' o'ch semorrentannerra e'ñe cohuen allohuenes.

⁴ Te'pa' o'ch notaḡ, ãa ñeñteḡ e'ñe nočhesha' nepeneḡ na atto nentnap̄ puesheña'tets ñeñt pechoyoresha' pepen, ñetpa' çhocma e'ñe cohuen cotape'cheññañet Yompor Parets po'ñoñ ñeñt e'ñe po'ñoch atet otene y, napa' ñeñña atarr nocshatene'. ⁵ O'ch nočheshacha' neyerpataḡa, allo'nepa'ch amorrentanna'tpo' sentannena allohuenes. Ñeñt atet noteneḡ arr nequellcotpa' ñeñtpa' ama añeyaye ñoñets ñeñt ama se'mare. Ama't allempoteñ e'ñe erre't same'ñerrapa' allempoteñ se'muerrña ñeñt ñoñets. ⁶ Ñerra'm yemneñ yemorrentanna'tapa' añcha'ña atet yeḡohuerra ñeñt atet otene y Yompor. Ñerra'm añ yemneñ o'ch e'ñe atet yeḡohuerra ñeñt atet otene y Yomporpa' çhochña e'ñe cohuen yemorrentannerra allohueney. Ñeñtpa' e'ñe ahuatoteñ atet serrpare'tatyesasete'.

Atet pena ashcañnesha' ñeñt çhocma e'moñe'tene' Cristo

⁷ Ñeño'marña te'pa' atet notenes tarro'mar ñeñt shequène' acheñpa' o' epa'hua añ patsro. Shonte'ch ñeñtcha' shequène' acheñ, ñetpa' atet otyenet Jesucristo ama partsoye' acheñetostso. Ñeñt otets atetpa' ñeñña po'ñoch ashcaña ñeñña e'moñe'tene' Cristo. ⁸ Sapa' e'ñech señoḡa allochñapa' amach shecaso. Ñerra'm shecas allempopa' e'ñe'e' orrena setorrerra Yomporecop. Añcha'ña setorrrena attochña sapa' e'ñech sagaphuerr ora allpon ñeñt alloch tsa'tuerra ña.

⁹ Ñerra'm erra'tsencha' ama attecma'e' yeçhatatso ñeñt atet yeçhateney Cristo, ñerra'm çha a'po'poñeteññañ po'ñoñ, ñeñt atet petsapa' amach Yomporeye' yemteno. Añcha'ña erra'tseneyte' allo'na cotene' Cristo po'ñoñ yapa' e'ñe po'ñoch yeyemteña Yompor Parets e'ñe Puechemere'na. ¹⁰ Ñerra'm esesha'ch huapatsa sesho ñapa' atetcha' otos

ñapa'cho' año' yečhaten Yompor po'ñoñ tarraña ñapa' ñerra'm ama atteye' yečhateno atet yečhaten Cristopa' ñehua, amach sagapatsche sepaclo. Ama't sehuom'cha'teño'fapa' amach sotatsche, "Yompore't pa'natenaya."
 11 Amach sehuom'cha'tatsche tarro'mar ñerra'm sehuom'cha'teñ, sapa' ñeñtate' seyčhaprech ñeñt' ama po'ñočoyaye.

Atto so'terranet po'cartot

12 Shontemeñ po'poñečno ñeñt'cha' notaseñ tarraña ama nemno o'ch e'ñe notuas arr necartot. Tarro'mar napa' nesechena o'ch nemo'tensa' allempochña attoch yeserrpare't e'ñe parro, attochña e'ñech cohuen parro yocsherra.

13 Añ pemo'nerr puechoyoresha'pa' ñetpa' huom'cha'tenpet ñamet arr necartot. Ñetpa'cho'ña ñeñt'et o' acerranet Yompor. Te'pa' ñeñt'ach notas, Yomporepa'ch sa'nataya. Ñeñt'pa' attetepa'ch Nompore. Allohua.

Juan

AÑ POMA'PAÑ SAN JUAN PO'CARTA 3 SAN JUAN

Atto Juanpa' eñnoten Gayopa' e'ñe cohuen ame'ñena

¹ O'ch masheñe Gayo nequellconañ añ carta, napa' na ñeñten pompör pen allohuen ñeñt ame'ñenaya Yompör. O'ch notañ, napa' e'ñe po'ñoç atarr nemuerenpa.

² Ñehua, masheñe çhocma nema'yochampenpa allochñapa' Yompörpa' e'ñech a'natenpa. E'ñepa'ch cohuen pehuomçhena, tarro'mar napa' neñoteneñ e'ñe pecamqueñoöpa' e'ñe cohuen poctape'chen Yompörecop.

³ O'ch notañ, napa' atarr nocsha allempo huerra masheñnesha' peshot. Ñetpa' atet serrpare'tatuerrnet papa' e'ño' po'ñoç cohuen pame'ñena, e'ño' cohuen poctape'cheññañ Yompör po'ñoñ ñeñt e'ñe po'ñoç atet oteneý. ⁴ Allempo ne'mare'tas atto sapa' e'ñe cohuen soctape'chen ñeñt e'ñe po'ñoç atet oteneý Yompör po'ñoñ, napa' ñeñña atarr nocshatene'; ama eñalle po'poñ ñeñt atet atarr nocshatene'. Napa' e'ñe atet nentenes ñerra'mrate' nechemeres ñeñto'marña napa' atarr nocshensa.

⁵ Ñehua, masheñe o'ch notañ, papa' e'ñe pocte' atet pepena ñeñt atto pagueñ e'ñe cohuen pepaclo masheñnesha' ñeñt huapyetsa po'poñ anetsot. ⁶ Ahuaña allempo yapçhena allohueney ñeñteý ame'ñetsa, ñetñapa' atet serrpare'tatuerryet atto papa' e'ñe cohuen pemuerapanet. Ñaña o'ch notañ, çhocmach peyenpuenanet, papanetcha' ñeñt palltenet attoch anerret Yompör po'ñoñ po'poñ anetso. Ñerra'm atet pepenapa' ñeñtpa' e'ñech pocte' enteneñ Yompör tarro'mar ñetpa' Yompör sherbenet. ⁷ Ñehua, ñetpa' o' ahuanmuet attoch serrpare'teññañeta' Jesucristo po'ñoñ tarraña ñetpa' ama mueneñeto o'ch es apapanet ñaña ñeñt ama ame'ñetso. ⁸ Ñeñto'marña yapa' e'ñe pocte' o'ch es yapapanet tarro'mar ñeñtpa' attoña yetorrapretenañeta Yompör po'ñoñ.

Atto Diótrfespa' ama't mameshapa' ama cohuenaye' entenano ñeñt ame'ñetsa

⁹ O'ch noterrperr po'poñ. O' nequellca'hua carta allohuenacop ñeñt apçhetsa all pa'ñetro. O' notuanet ora allpon atet notuañ arr necartot, tarraña Diótrfespa' çha achmare'tey. Ñapa' e'ñe pommo'cheñoñ e'ñe ñañeñapa' aña muenen o'ch pomnaren pa'yenan acheñnesha' ñeñt o' ame'ñerrana Yompör, ñeñto'marña ama e'mñoteny. ¹⁰ Ñeñto'marña esempoch neçhap peshopa' o'ch neyerpatosanet ñeñt atet pena Diótrfes. Ñapa' çhocma toma'tampeney attach eñosats'e'tyen yocop. Ama ñeñtayaya atet peno, elloña ama aguënano masheñneshaçhno ñeñt anene' Yompör po'ñoñ. Ama aguënaneto ñaña ama muenatenano acheñnesha' o'ch aguënet ñamet masheñneshaçhno. Ñerra'm esesha'ña aguënahuetpa' ñañaapa' o'chçho' mueño'terranet arroç all sapçhena.

¹¹ Ñehua, masheñe papa' amach peyçhapretatsto ñeñt atet pentapreten ñeñt ama pocteyaye. Papa' añcha'ña peyçha' ñeñt pentapreten atto e'ñe pocte' es pa'yenet. Ñeñto'marña atet noteneñ tarro'mar erra'tsen ñeñt

e'ñe pocte' es petspa' ñeñtca'yeña Yompor pueyochresha'; ñeñtña ama pocteye' es p̄a'yetsa ñeñtña ama't mameshapa' ama eñotenanoña Yompor.

Atto e'ñe cohuen orrtaten Demetrio

¹² Ñehua, o'ch notap̄ ñaña po'psheññecop ñeñt̄pa' añ pa'so'cheñ Demetrio. Ñaña po'ñoçhpa' e'ñe cohuen enteñ allohuen acheñenesha'. Ñapa' e'ñe atet pena atet oten Yompor po'ñoñ ñeñt̄ e'ñe po'ñoçh cohuen. Ñeñto'marña yapa'çho'ña yeñoteñ ñapa' e'ñe cohuen acheñer. Ñehua, p̄apa' e'ñe peñoteney ñerra'm erroten yoten, ñeñt̄pa' e'ñech po'ñoçh atet.

¹³ Shontemeñ ñeñt̄cha' notapeñpa' tarraña amach e'ñe notuape añ necartot. ¹⁴ Tarro'mar napa' atarr nemneñ ahuenepoña neçhap pesho. Ñerra'm esempoch neçhappa' allempochña e'ñe yeserrpare'tatanna'ta parro.

¹⁵ Ñeñt̄ arro'tsa'yen masheñnesha' ñetpa'çho'ña huom̄cha'tenpet ñeñtara añ necartot. Pañapa' o'ch pehuom̄cha'tyesanet e'ñe puesheña'tsocma masheñnesha' ñeñt̄ parro'tseneñ. Te'pa' ñeñt̄fach notap̄ masheñe, Yomporepa'chña p̄a'natenaya. Allohua.

Juan

AÑ SAN JUDAS PO' CARTA SAN JUDAS

Atto Judaspa' quellcan carta allohuenacop ñeñt pueyochresha' pen Yompör

¹ Masheññeshacha' ñaña noçhaneshacha', allohuenes ñeñtes o' huañerres Yompör Parets attoch pueyochresha' perres, ñeñtes o' sa'cohuentataretterra Partsocop, ñeñtes e'ñe cohuanpen Yompör e'ñe separrocmateñoť Jesucristo. Ñeñto'marña napa' nequellquënnas añ carta na Judason ñeñfen torretsa Jesucristocop. ² E'ñe nehuorñcha'teñoťes sa napa' o'ch notas: Yomporepa'chña semuerenaya, ñaña nanquëpa'chña morrentensa, nanquëpa'chña coshatenes seyochro.

*Ñeñt ashcañtetsa amach Yomporeye' po'ñoñ serrpare'teno
(2Pe. 2.1-17)*

³ Te'pa' o'ch notas, masheññeshacha' ñaña noçhaneshacha' napa' atarr nemneñ o'te' nequellconas attoch neñotatas ñeñt e'ñe errotentochañña a'queshpataretey e'ñe allohueney ñeñtey ameñenaya Jesucristo. Tarraña te'pa' añ nenten ñeñt atarr palltetsa o'ch notas, nanquëpa'ch sema'yochra añ ñeñt atto yameñena attochña e'ñech cohuen semoñena, attoch amach semnateñe ama't puesheñarra o'ch a'po'poñetonaset ñeñt atet yameñeña Jesucristo. ⁴ Añecopña notenes tarro'mar çhocma orreyena acheñenesha' ñeñt ashcañtetsa ñeñt ama Yomporeye' po'ñoñ cotape'cheneto. Ñet puehquëñoťespa' ñato'rraña çhate' a'po'poñeternayet ñeñt atto po'ñoçh yameñerñaña Yompör po'ñoñ. Ñetpa' atetcha' otyeset, e'ñeca'ye pocte' o'ch sosya'tsañeçhna yeyçhen tarro'mar Yompörpa' çhocma peretneneý, ñapa' atarr amueraña ñeñto'mar amach coñchatterye. Ñetpa' po'ñoçh ama pamo'tmayeye' peñeto Yompör ñeñt ñapueť Yamo'mte' yepen ya. Ñaña ñetpa' ama po'partshareye' peñetoña Jesucristo. Tarraña sapa' señochepa'ch e'ñe ahuatoteñ anuaretta ñeñt atet petsapa' ñeñtña o'patatenetña coñcheñtes.

⁵ Ñehua, sapa' po'ñoçh e'ñe señoťeñ ñeñt atet pa ahuat, tarraña te'pa' o'ch alla neyerpaterrsa atto Yompörpa' çha coñchatuerran ñeñt alla queçhpuerre' ñeñt e'ñe atet oteneý Yompör. Ñeñtpa' atet pa allempo a'queshpaterran israelnesha' allempo erraneta' Egiptot all atarr amuerochtataretteť. Tarraña ama't a'queshpaterranetañ allempo, elloña tsapatonetpa' o' alla a'cllatuerran allohuen ñeñt ama cohueñaye' ameñaye'te. E'ñech attecma perran allohuen ama't te' ñeñt ama ameñetso. ⁶ Te'pa' o'ch alla neyerpaterserr po'poñ ñeñt atet pa ñaña patanta'tets mellañoťeñnesha'. Ñetpa' anaretetañ ñetcha' sherbenet Yompör, tarraña ama't atet anaretetañpa' ñetña ellopa' o' a'ypo'ña'nmuete pue'ntañ e'ñe patpare'teñoťet Yompör. Ñeñto'marña Yompörpa' alla huancanet cadeno ñeñt ama apyapahuoyaye ama't errponaña alla huapore'tanet nanac checmeto. Ñetña'apa' alletach tarrempohua esempoch mellapoterra allempochña mueñerranet ñaña

coñcha'puetso. ⁷ Te'pa' o'ch alla neyerpaterrrerr ña'ña ñeñt atet pe't sodomo'marnesha' ña'ña gomorro'marnesha' ña'ña allohuen ñeñt allampaño'marnesha' all. Ñetpa' e'ñe atet pete't atet pa patantarr mellaño'teñnesha' atto nanac ye'chcatenet ñeñt nanac sosey enten Yompor. Cañoresha'tyenet nanac ama't yacmapa' agapannena e'ñe parro yacmacma, ñeñtpa' amaca'ye atteye' anareteye. Ñeñto'marña Yompor allpa' attoña coñchatanet o' etomam'psanet attoch e'ñe a'poyatatuerranet tso' ñeñt ama emaya'pahuoyaye. Ñeñto'marña yeñoteñ allohueney eñall coñcheñets ñeñt ama ahuañaño.

⁸ E'ñe attecma patse'tyena ña'ña ashcañnesha' ñeñt orretyetsa te'. Ña'ña ñetpa' po'poñonta es cotape'chyenet ñeñt ama po'ño'ch atteyaye. Attoña ñetpa' a'sosyatenet po'chets e'ñe ñañeñeta. Ñeñto'marña ama't Yepartsesharpa' ama añcha'na'tpahuoye' enteñeto, attoña ama't ña'ña allohuen ñeñt ahuañcatetyetsapa'cho'ña e'ñe achm'are'tueñet. ⁹ Tarraña ama achm'are'tpahuoyaye ama't Yepartseshar ama't ña'ña allohuen ñeñt ahuañcatetyetsa. Ñehua, ama't Miguel ñeñt pa'm'cha'tareter pen mellaño'teñnesha' ñapa' ama achm'are'tapanoña oneñet. Allempo rroma Moisés oneñetñapa' huapa, ñapa' añ atarr mueneñ o'ch enana' arromñañ, tarraña Miguelñapa' ama muenache o'ch aner. Ama't muene' es otnare'tanna'tetaña' Miguelñapa' amaca'ye achm'are'tanoña oneñet. Ñeñtpa' atta och: “Ñehua, ñeñt atet pepena te' Yomporpa' ñach potteñe'che'.” ¹⁰ Tarraña ñeñtña ashcañnesha' ñeñt orretyetsa te'pa' ñetñapa' chocma achm'are'teñet ama't ñeñt atarr ahuañcatesha' tarro'mar ñetpa' ama eñoteññañeto po'huañc. Añach e'ñe paterr eñotenet ñeñt e'ñe patso'marecpa. Ñetpa' e'ñe atet penet ñerra'mrrate' berr ñeñt añach pa'yen ñeñt atet muenatyenanet po'chets, ama es cotape'chpenayeña o'ch eñotet erra'tsente'ña ñeñt po'ño'ch cohuentetsa. Ñeñto'marña ñetpa' a'chenataterretcha' e'ñe ñañeñeta.

¹¹ Atarr yoro'cheno'tsa'yenet tarro'mar ñetpa' ama morrenteñeto pamo'ts, e'ñe atet penet ñerra'mrrate' atet pe't Caín allempo muetsan pa'mo'nasheñ Abel. Attoch aparettet quelle, ñetpa' añach cotape'chenet o'ch shecare'teñet acheñenesha' atet pe't Balaam. Ñeñto'marña ñetpa' chenqu'rretcha' tarro'mar e'ñe atet penet ñeñt atet pe't Coré ñeñt amt-sarettatsa ahuañt e'ñe ña patpare'teño't. ¹² Ñeñtña ashcañnesha'pa' sapa' ñeñtña sepercna'ntatene' allempo sap'chena o'ch serratallme'channena ñeñtes ame'ñenaya Yompor. Sapa' serratallme'channena e'ñe semorrentanna'teño't, tarraña ñetpa' attach nanac rratse'tyenet amach ayetña'tteneto amach cohua'peñetoña ña'ña po'psheñeñ ñeñt cheporretsa ñeñt muenets o'ch rra' ña'ña. Ñetpa' e'ñe atet penetañ ñerra'mrrate' ñeñt cohuañpenayeñ carrnero ñeñtcha' rratenayeñ tarraña amachña carrneroye'ña rrateno, ñeñtpa' ñañeñetach atarr rretset. Ñetpa' ama es sherbeneto e'ñe atta penet atet ñerra'mrrate' os ñeñt ama huetetso attach matateñ m'orr. Ña'ña e'ñe atet ñerra'mrrate' narmetsoch ñeñt ama ame'tño, ama'tcha' chen pueme'teñporopa' amach me'teno. Ña'ña ñeñtña narmetsocherpa' e'ñech atet pena ñerra'mrrate' rromuech o'ch ya'mare ora puer'chohuenpa' o'ch e'ñe puetsohua o'ch huañ. Ñeñtña ama't mameshapa' amach es sherberrye. ¹³ Amach pueñmañesho'feye' es orrtatyeneto e'ñech pommo'cheño'teta es orrtatyenet. E'ñe atet

penet ñerra'mrrate' oñ apellche' puemo'yer. Ama't mameshapa' amach muechecheno. Ñeñña emo'ypa' çhach huapore'tenan sosyare' toñña'so all pa'so'ten. Ñeñtpa' e'ñe atet penaña ashcañnesha' amach pasayaya orrtatenetoña apencoçhen. Ñetpa' e'ñe attet ñerra'mrrate' shepraño' ñeñt yenten o'ch shora'nom o'ch ahuo' patso ñeñtpa' ama es sherbeno. Yomporpa' o'patenanet o'ch mueñanet coñcha'puetso all atarr nanac checmete', allotña ñetpa' amach çha'nerreto ama't errponaña.

¹⁴ Ñaña te'pa' o'ch notas, ahuatpa' eñall puesheñarr yacma añ pa'so'cheñ Enoc ñeñt Adán po'mireneñ po'cançhrrroño'hua. Ñaña'pa' ñeñt a'mtaye't Yompor po'ñoñ. Ñapa' eñotatan acheñnesha' atetcha' aþaretterra ama't ñeñt ashcañnesha'. Ñocpueta'ñaña atet ote't: "Huerrach Partsessa' e'ñe pueyochreshaçhnohuen ñeñt nanac po'nnacaren patsopueñ. ¹⁵ Huerrach allochñapa' o'ch entuerran allohuen acheñnesha' ñato' cohuenette' ñato' amate' cohuenayayeto. Allohuen ñeñtcha' ama cohuenaye' entuerro Yompor, ñetña'pa' amñare'tterretcha' coñcheñtso. Attochña tsa'tatuerrana allohuen ochñañenesha' ora allpon þatse'tyesete't ñeñt ama pocteye' enteno Yompor Parets ama't mamesha. Ñaña atetcha' tsa'tatuerranet ora allpon atto sasare'chete't Yompor e'ñe pachmare'teño'tet." Arrpa' allohua huañ ñeñt atet eñose't Enoc ahuat. ¹⁶ Ñaña ñeñt ashcañnesha'pa' atarrcha' tanmare'tyeñet, çhach po'poñ entuenet. Añach cotape'chyenet ñeñt muena'yenet e'ñe ñocpueta. Cho'nate' ñetpa' atarrcha' ommoñatet. Ñaña ñerra'm esempo e'ñe cohuen eñosyenet acheñnesha'cop, ñetpa' añcepach e'ñe cohuen eñosyenet attoch es apuenanet acheñnesha'.

Atto pa'namen cotape'chatenan allohuen ñeñt ame'ñetsa

¹⁷ Tarraña sa masheñneshacha' ñaña noçhaneshacha' amachña ñeñta same'ñatsto. Sapa' añcha'ña seyerpä ñeñt atet otyese't Yepartseshar Jesucristo puellsensarnesha'. Ñetpa' ahuatoteñ atet otete't ñeñtcha' orreyerrtsa tsapa'tonet. ¹⁸ Ñeñtpa' atet otyete't: "Allempoch mellapoter-rmochapa' orrtarrach ñeñtcha' achmare'terre' Parets. Añach yeçhenet ñeñt muenatse'tyenet ñañeñeta, ñeñtpa' ama't mameshapa' ama cohuenaye' enteñe Parets." ¹⁹ Ñeñt ashcañnesha'pa' çhocmach mueneñet o'ch ellopa'tetstateret ñeñt ame'ñenaya Yompor. Ñeñfara ashcañnesha'pa' añach cotape'chenet ñeñt atet muenatenanet ñet po'chets; ñetpa' ama chorrenaneto Parets Puecamquëñ.

²⁰ Tarraña sa masheñneshacha' ñaña noçhaneshacha' e'ñe nemuereño'tespa' o'ch notas, amach seyçhatstaneto ñeñt atet penet ñet. Sapa' e'ñechña same'ñeño't Yompor huomenquëpa'ch seþa' seyocher tarro'mar ñeñt same'ñena sapa' e'ñeca'ye Partseshotecma huena. Chocmach sema'yochena. Sapa' amach sotaye' se'ñoreno allempo sema'yochena. Añcha'ña se'ñoratene' Parets Puecamquëñ ñeñt atarr ahuamencatesha'. ²¹ Atetcha' seþaña sa allochñapa' çhocmach seño'teñ atto atarr morrentenya Yompor, amach sepurratsterro. Socsheñesha'pa' çhocmach seyemteña Yepartseshar Jesucristo; ña e'ñe pemuereño'tey esempohuañen a'queshpaterreycha', attochña yañapa' corretsayach yocsheñeshocmañen errponañohuen.

²² Ñehua, o'ch notas ñaña atetcha' sepe' po'potantañeçhno. Patanta'tets acheñpa' atarr echarr enteñet o'ch ame'ñerrñañet Yompor po'ñoñ.

Ñetpa' čhoch soctape'chaterranet e'ñe cohuen attoch ame'ñerret ñeñĩ e'ñe po'ñočh Yompor po'ñoñ, ²³ atarr yoročheno'tsenet po'chñarořet. Ñeñto'marña sapa' o'ch sa'queshp̄aterranet, ñeñĩpa' e'ñech atet sepenanet ñerra'mrrate' cheshařoll ya'queshp̄aten o'ch yechter all poyapen pocoll. Po'potantañečhno ñeñĩ yečhene' atarr sosya'tsañečhno, ñetpa' čhochña semuerenanet țarraña ama'tcha' semueranetañpa' amach socshapretatstanetoña ñeñĩ atet yečhenet sosya'tsañ. Sapa' čhochña setsena'tapretanet ñeñĩ atet p̄a'yenet sosey, ře't sa'naña a'shoratatenet.

E'ñe yame'ñeñoř Yepartseshar Jesucristo aye'chočhtaterrapo'ch Yompor

²⁴⁻²⁵ Te'ña Yompor ñeñĩ e'ñe ñapueř partsořets, ñeñĩ allohuen es eñotyets, ñaña ñeñĩ Ya'queshp̄atañer yepen, ñañapa' atarr ahuamencatesha', ñachña ahuamencat sepenet' allochñapa' amach alla seshora'nerro. Attochña sapa' čhapatuerrescha' e'ñe ñesho all atarr cohuentena ña. E'ñech socsheñeshocmañen sečhačherr, amach eñalle ama't coñe'ta ñeñĩcha' entapreterres ñeñĩ ama pocteye' enteno ña. Te'pa' e'ñe yame'ñeñoř Yepartseshar Jesucristo aye'chočhtaterrapo'ch Yompor attoch e'ñe cohuen yecohuentaterrñañ. Chocmuepa'ch e'ñe ñapueř Yepartseshar yepen, čhocmuepa'ch amcha'tareřtena e'ñe tayoteñ errponañohuen ñeñĩ atet p̄a ahuatoteñ. Te'pa' ñeñĩach notas, ñeñĩpa' atetepa'ch Nompore. Allohua.

Judas

ATTO SAN JUANPA' EÑOTATER YOMPOR ÑEÑT'CHA' ATET PERRTSA TSAPATONET EL APOCALIPSIS

Atto Yomporpa' gatyesan Puechemer Jesucristo

¹ Añ ñoñets ñeñt'pa' atto Yomporpa' gatyenan Puechemer Jesucristo, allochñapa' ñachña eñotatyese' allohuen ñeñt' torra'yetsa Yomporecop. Ñeñt'cha' eñotatanetpa' ñeñt'pa' ñeñt'cha' ahuen atet perra ama't esempo. Atto eñotaten na, ñapa' ahuo't mueñon po'mllañoñeñer, allochñapa' ñach negatyese' na ñeñten sohetsa Juan ñeñten torretsa ñocop, allochñapa' attoch eñoch ñaña allohuen ñeñt' torra'yetsa Yomporecop. ² Tarro'mar napa' nach eñotatahuet allohuenet ñeñt' e'ñe po'ñoñ ñeñt' atet eñotatenen Yompor po'ñoñ ñaña ora ñeñt' allpon eñotatenen Jesucristo ama't ñaña ñeñt' ora allpon gatyennet.

³ Atarrcha' cosheñtso'tsen ñeñt'cha' lleyatene' acheñenesha' añ ñoñets ñeñt' huetsa Yomporeshot ñeñt' yeñotatene' ñeñt'cha' atet perra esempo. Atarrcha' cosheñtso'tsa'yen ñaña allohuen ñeñt'cha' e'mñotene' añ ñoñets ñaña e'ñech ayemuetpo' enteñet, ora allpon ñoñets ñeñt' aquellcayet arr. Tarro'mar o' çhapmoch allempoch etsotuerra añ ñoñets.

Atto Juanpa' quellcan cançherr ñeñt' anetser all apçha'yena allohuen ñeñt' ame'ñenaya Cristo

⁴⁻⁵ Napa' o'ch nequellconas carta allohuenacpas ñeñtes apçha'yetsa e'ñe same'ñoñot Yompor all ñeñt' po'poñe'ttsocma anets ñeñt' cançherr ñeñt' Asio'tsa'yen. E'ñe nehuomñcha'teñoñespa' o'ch notas: Yomporepa'chña semueraya epuet ñaña Puecamquëñ epuet ñaña Puechemer ñeñt' Jesucristo. Ñetepa'chña sebensare'tampene'. Añ ñeñfara Yompor ñeñt' çhocma eñall, ama't ahuatoteñ çhocma eñall ñaña ñeñfara ñeñt'cha' huerrtsa po'pocheño. Ñaña Puecamquëñ ñeñt'pa' ñeñfara cançherr ñeñt' sherba'yets e'ñe all po'conaño e'ñe po'poñe'ttsocma sherbenet. Ñaña ñeñfara Jesucristo ñeñt' atarr ayemuetpo' yenten ñeñt' ora allpon ñeñt' eñotateney; ñaña ñeñfara Jesucristo ñeñt' ñanom tanterrtsa puerromñoñ ñapa' amach alla rromuerre'te. Attoña pa'mñcha'tareter peñ allohuen ama't allohuen amñcha'tareteçhno añe patsro. Ya'ye'choçhtatoñepa'ch ñeñfara Jesucristo ñeñt' atarr amorrentña, e'ñe ña puemorrenteñoñeypa' attoña rroma yocop allochñapa' attoch ashataretta po'rراس e'ñe yocop allochñapa' attoch e'ñe e'shohuaretterra yo'chñar. ⁶ Ñaña ñapa' attoña e'ñe cohuen aguëney attochña ya'mñcha'tarettapretera attochña yesherbapreterrñañ Pompom ñeñt' atarr Patters, attey ñerra'mrrate' ñeñt' corneshatets Partsocop. A'cohuentaterrapo'ch Jesucristo, amñcha'tarettepa'ch tayoteñ ama't erponohuañen. Ñeñt'pa' attetepa'ch Yompor.

⁷ O'ch secueñ huerrach Cristo, oscha' a'suatamperre'. Ama't allohuen acheñenesha'pa' entuapueretcha' e'ñe pa'clloyotet. Ama't ñeñt' pata'te'pa' entuapueretcha' ñamet. Allempoña ñeñt' shonte' pa'namen acheñenesha' ñeñt' yeçha'yetsa arr patsropa' ya'na'tapueretcha' e'ñe puellquëñoñet. Ñeñt'pa' e'ñech atet perra.

⁸ Yompor ñeñt nanac Parets ñeñt Yepartseshar yepen ñapa' čhocma eñall, ama't ahuatoteñ čhocma eñall, ñeñt'pa' ñeñt'ara ñeñt'cha' huerrtsa po'pocheño. Ñapa' atetña ot: "Ñapa' e'ñe pa'motroteñ eñallen atten ñerra'mrrate' quellec A ñeñt' pa'moter pen alfabeto. Allempoteña napa' čhocma eñallen esempohuañencha' huañerr ñeñt' allpon eñall, napa' atten ñerra'mrrate' quellec Z ñeñt' all puen alfabeto." Añpa' allohua ñeñt' atet toma'ntatena Cristo.

Atto Cristopa' orrtana Juan e'ñe po'cohuentañoť

⁹ Te' napa' ñeñfen sochetsa Juan o'ch alla noterrser. Napa' ñeñfen e'ñe semo'nasheñ sephouenen sa. Napa' ñeñfen semueročtapretenaya e'ñe yame'ñeñoť Jesús. Ñaňa e'ñe yeyemteñoť ñapa' e'ñech acopa es ya'huanten esheccha' ya'nicha'tarettapretera. Nehua, napa' o'ch neñotatas ñeñt' atet nepena na arr. Ahuañmo'cha napa' e'ñe neser- rpare'teñoť Yompor po'ñoñ ñeñt' atet eñotatenen Yepartseshar Jesucristo, añña ñeñt' ne'moñe'tene'pa' o' huapore'tenneta' arr atarr allařar all rročhpe'chañefollo ñeñt' otenet Patmos. ¹⁰ Pamtarr allempo čhapa'muen añe yetro allempo čhocma yeyerpueña Yompor napa' neyerpueñoť ñapa' e'ñe machayota chorratna huomenc Yompor Puecamquẽñ. Allempoñapa' machayota ne'm ñoñets huapa necha'ñoť. Atarr huomenc eñen atet ñerra'mrrate' poctor e'morrtetsa huomenc. Ñeñt'pa' atet oten añ ñoñets:

¹¹ —Napa' ñeñfen ñanom eñallen, allempoteña napa' čhocma eñallen ama't esempohuañencha' huañerr ora allpon ñeñt' eñall, napa' atten ñerra'mrrate' quellec A ñeñt' ñanom huetsa alfabetoť, arrohua all huañen alfabeto ñeñt' yoten Z. Te' napa' o'ch notapř ñeñt' ora allpon ñeñt'cha' negatyesař añ poctetsa o'ch pequellca'yep pepařllo allotpa' o'ch pemñe all anetsočhno ñeñt' cančherr ñeñt' ap'cha'yetsa all pa'namen anetso ñeñt' ame'ñetsa. Ñeñt' ñanom añ pa'so'cheñ Efeso, allotpa' Esmirna, allotpa' Pérgamo, allotpa' Tiatira, ñaňa Sardis, ñaňa Filadelfia, allotpa' ñaňa Laodicea. Ora añečhno anetspa' ñeñt' Asio'tsen.

¹² Allempoña ne'muen atet ñoñetspa' nañapa' neptallsa o'ch neñch esesha'te' ne'ñorana'tenaya. Allñapa' nent cančherr ñeñt' all orratenet huerare allo čhoyo'tenet ñeñt'pa' oro ayečhcatareť. ¹³ E'ñe rročo ñeñt' cančherr all orratenet huerare all orrtena puesheñarr yacma ñeñt'pa' Jesucristo ñeñt'ara Ñeñt' Acheñetosets. Ashtamat, pa'shtampa' e'ñe čhen pa'tcohua. Achanareť, po'chanarpa' orotommuen ñeñt' allo chanena puesomapo. ¹⁴ Poñoť pue'chpa' e'ñe ora atarr huallama't atet ñerra'mrrate' carrnero pue'ch ñeñt' e'ñe huallama't. Amapa' o'ch not pue'chpa' e'ñe ora huallama't atet ñerra'm senet ñeñt' otenet nieve ñeñt' atarr huallama't. Pa'clle'pa' atarr poptena atet ñerra'mrrate' tso' po'huorter nanac a'rrechatañ. ¹⁵ Pa'tacpa'čo'ña attecma poptena atet ñerra'm aser yachamuen. Allempo eñorena e'ñe atet e'morrtena po'ñoñ atet ñerra'mrrate' shonte' oñ atarr huomenc ma'moreten. ¹⁶ Pot po'cohuenroťpa' orrenan cančherr ranto. Puenamoťpa'čo'ña all orrtena cochell ñeñt' emoshenito'mar etsotañtatareť. Ora pa'tsa'pot e'ñe atet poptena ñerra'mrrate' atsne' atarr huomenc a'rrechatañ.

¹⁷ Allempo neñchpa' e'ñe neñcha'na'teñoťpa' nañapa' o' nerrmosa patso e'ñe pa'tco. Neyorñoťpa' ama nepelleno ama't mamesha, čha

nottena ñerra'mrrate' cho nerromuen. Tarraña ña potot po'cohuenrot a'plla'n, oten:

—Amach pemcha'tatsto, napa' ñeñfen ñanom eñallen, allempoteñña napa' chocma eñallen ama't esempohuañencha' huañerr ora allpon ñeñ eñall. ¹⁸ Napa' ñeñfen ama arromñafeshayayno. Ama't nerromhua ahuaña tarraña te'pa' o' alla nocrrerra, amach alla nerromuerre'te ama't ahuata. Ñaña napa' nechen llave, ñeññ nehuamenc nepen alloch pomnaren nepen rromueñets ñaña ñeññcha' aguërre' allohuen ñeññ rromuets. ¹⁹ Te' pocoppa' añ pocetsa o'ch pequellca'yes ora ñeññ allpon o' negatyeseþ ñaña allpon ñeññcha' negatyerrperr ñeññcha' atet perrtsa esempohuañen. ²⁰ Ñehua, te'pa' o'ch neñotataþ ñeññ atet toma'ntena añ cancherr ranto ñeññ penten e'ñe notot necohuenrot ñeññ ama eñotenaye' penteno. Ñeññ cancherr rantopa' añ toma'ntena ñeññ cohuanmpesyenahuet ora allohuen ñeññ name'ña'yenaya allemeñ ñeññ cancherr anetso ñeññ apcha'yetsa all. Ñaña ñeññ atet pent ñeññ ayeçhcataret oroch all orratenet huerare, ñeññpa' añ toma'ntena ora allpon ñeññ apcha'yetsa allemeñ anetso ñeññ cancherr ñeññ name'ña'yenaya.

2

Atto Juanpa' quellcan carta añecop ñeññ ame'ñetsa anetso Efeso

¹ Ñeññ neserrpare'tatene' ñapa' alla oterrerr, ñapa' atet oten:

—An pocetsa o'ch pequellca' carta añecop ñeññ cohuanmpene' allohuen ñeññ ame'ñetsa all anetso Efeso, o'ch potanet atet: “Napa' o'ch nequellconas carta attoch neñotatas ñeññ atet otenes Jesucristo ñeññ orrene' cancherr ranto e'ñe all poto po'cohuenrot, ñeññara Cristo ñeññ chope'chets rrocho e'ñe allo'tsen ñeññ ayeçhcataret oroch all orratenet huerare. ² Ñañaapa' atet otenes: ‘Napa' neñotuennas ñeññ ora allpon atet seþa'yena all. Napa' e'ñe nentuennas ñeññ allpon nanac setorra'yena ñaña allpon ñeññ e'ñe cohuen acoþa es sa'huantha' huanen. Ñaña napa' e'ñe nentuenes sapa' ama saguëñe ñeññ ama cohuenaye' es pa'yetso. Sapa' atto setpatyeñ ñeññ otetseñ ñetpa' allsensareteto'tarraña ñetpa' atta shecare'tenet. Attoña setpateño' o' señotanet ñetpa' atta shecare'tenset. ³ Ñaña napa' neñotuenes ñeññ allpon semueroçhtena nocop ñaña atto e'ñe cohuen sa'huantha'huen mueroçhteñets, ama semuenme'cheñe allo setorrena. ⁴ Tarraña ama't atteñpa' nentuennas paterr ñeññ ama cohuenaye' nentapretenso. Ñeññpa' añ atto sapa' o'huañ e'ñe semorrentna ñeññ atet seþa ahuat allempo e'ñe errte' same'ñerrna. ⁵ Te'pa' o'ch notas, o'ch seyerpuerra atto ahuañmo'cha nanac cohuen semorrentenna. Te'pa' ama atteye' sepeno. Añ pocte' o'ch alla soctape'cherr e'ñe cohuen attoch o'ch alla seperra cohuen ñeññ atet seþa allempo e'ñe ñenma't same'ñenna. Ñerra'm amach ello soctape'cherro cohuen napa' tayecma o'ch ahuen o'ch neprratamperres ñeññ atma'ntataret socop ñeññara ñeññ all orratenet huerare. ⁶ Tarraña ama't atteñpa' napa' añña e'ñe cohuen nentuennas atto sapa' ama pocteye' senteno ñeññ atet þatse'tyen aheñenesha' ñeññ cotene' Nicolás poctapña. Napa'cho'ña ama pocteye' nenteno ñeññ atet þatse'tyenet sosya'tsañ. ⁷ Ñeññ e'mñotene' añ ñoñetspa' çhapanetepa'ch pueyoçhreto ñeññ

atef neñotatenanet na Necamquëñoť, ora allohuen ñeñť pame'ñeñoťet čhocma apčha'yenet allemeñ anetso'mar. Ñeñť metana'tue' allohuen pa'namen topateñťsočhno, ñeñť ama nepuerram̄perrayo, ñetñapa' naphuerranetcha' ñeñť no'patatenanet ñeñťcha' atarr yom̄a'huerret e'ñe poctacma Nomporešo, allpa' e'ñech cosheñťso'tsenet. Ñeñťña napa' o'ch not, napa' o'ch nemnaterranet attoch o'ch tsomhuerret añ tsach pue'mer alloch corra'huerret e'ñe poctacma amach alla rromuerrete'ťe ama't ahuata.' ” Arrpa' allohua huañ atef ot efeso'marneshacop.

Atto Juanpa' quellcan carta añecop ñeñť ame'ñetsa anetso Esmirno

⁸ Allempoña ñeñť neserrpare'tatene' ñapa' alla oterrerr:

—Te'pa' o'ch pequellquërrerr carta añecop ñeñť cohuan̄pene' ñeñť ame'ñetsa all anetso Esmirna, o'ch p̄otanet atef: “Napa' o'ch nequellconas carta attoch neñotatas ñeñť atef otenes Jesucristo ñeñť ñanom eñall, allempoteñña ñapa' čhocma eñall ama't esempohuañencha' huañerr ora allpon ñeñť eñall. Jesucristo ñapa' ñeñť rromhuats tarraña te'pa' o' alla betterra. ⁹ Ña te'pa' atef otenes: ‘Napa' neñotuennas ora allpon ñeñť atef sepa'yena. Neñotuennas ñaña atto atarr sa'mueročhtatareťtena, ñaña atto atarr huocchañes. Ñehua, ama't huocchañsoñpa' Yomporešoť shonte' esocmañen ñeñť sechyen. Ñaña ñeñť se'moñe'tene' neñotuennas atto atarr sasare'tenset. Ama't otenetañ ñetpa' judionesheto' tarraña ñetpa' ama Yomporeye' pueyochresha' penahueto; ñetpa' aña pueyochresha' penahuet oneñeť ama't allohuenet. ¹⁰ Amach yore'tatstaso mueročhteñes ñeñťcha' ahuen sehuapoya. Tarro'mar ñeñťcha' seyotam̄pse' patanta'ttsos, ñeñťpa' oneñeťeshoť huena añecopña attoch topatuas ñerra'm po'ñočhte' same'ñena. Puesheña'ttsos mueročhtatasetcha' e'ñe čharramat. Ama'tcha' muetsasetpa' añ pocte' o'ch serromapes atto same'ñena. Allochña napa' naphuerrescha' ñeñť no'patatensa alloch socrra'huerra e'ñe socsheñeshocmañen. Ñeñťpa' ñeñťara noten po'poñ ñoñťso naphuerrescha' sepremio ñeñťcha' socshatuerre' e'ñe poctacma. ¹¹ Ñeñť e'mñotene' añ ñoñetspa' čhapanetepa'ch pueyochreto ñeñť atef neñotatenanet na Necamquëñoť ora allohuen ñeñť pame'ñeñoťet čhocma apčha'yenet allemeñ anetso'mar. Ñeñť metana'tue' allohuen pa'namen topateñťsočhno, ñeñť ama nepuerram̄perrayo, ñetpa' ama't puesheñarroťetapa' amach amñareťterreto coñcheñťso ama't ahuata. Ñetpa' amach alla rromuerreterro po'pocheño.' ” Arrpa' allohua huañ atef ot esmirno'marneshacop.

Atto Juanpa' quellcan carta añecop ñeñť ame'ñetsa anetso Pérgamo

¹² Allempoña ñeñť neserrpare'tatene', ñapa' alla oterrerr:

—Te'pa' o'ch pequellquërrerr carta añecop ñeñť cohuan̄pene' ñeñť ame'ñetsa all anetso Pérgamo, o'ch p̄otanet atef: “Napa' o'ch nequellconas carta attoch neñotatas ñeñť atef otenes Jesucristo ñeñť orrtatene' cochell puenamoť, po'čhellpa' ñeñť emoshenťo'mar etsotañtareť. ¹³ Ñapa' te'pa' otenes: ‘Napa' neñotuennas ora allpon ñeñť atef sepa'yena. Napa' neñotenes all seyčhena ñeñťpa' all atarr am̄cha'nočhtena oneñeť. Tarraña ama't atteñpa' sapa' ama sequečhpueno atto same'ñenna, ñaña čhocma sa'meten atto same'ñenna, ama't e'ñe allempo muetsennanet ñeñť name'ñenaya ñeñťara Antipas ñeñť čhocma neserrpare'tene' neñoñ

sesho, allara ñeñt pa'netser peñ oneñeñ. ¹⁴ Tarraña ama't atteñpa' napa' nentuprenso coñe't ñeñt ama pocteye' nentapretenso ñeñt atet sepatse'tena. E'ñe all Pérgamo patanta'ttsos ama semno o'ch sequéchpa' ñeñt pueychateñ pe't atet yeçhate't Balaam ahuat. Balaam ahuatpa' atet cotape'chatane't Balac attoch shecare'tane't israelena'tarnesha' allochñapa' attoch ñetpa' o'ch patse'tyenet ñeñt ama pocteye' enteno Yompor. Ñeñt atet patse'tyenet ñeñtpa' atet pete't o'ch rrallme'chapretan po'poñ acheñ ñeñt po'yomporer pene' ñeñt ayeçhcataret, ñerra'm esempo rrenet po'chets ñeñt muetsenet allo sherbeñet pueyechcatar. Elloña allempo ñetpa' e'ñe pocshapreteñotetpa' o'ch agapanna'tet ama't ñeñt ama puetaporeyaye, allñapa' o'ch cañoresha'tenet. ¹⁵ E'ñe attecma se-shopa'cho'ña patanta'ttsos atarr ashcaretes ñeñtes puesheña'ttsos ñeñtes ama semno o'ch sequéchpoñ Nicolás poctapña ñeñt atet yeçhatenes ñeñt ama pocteye' nenteno. ¹⁶ Tarraña napa' o'ch notas, sequéchpa' ñeñt añ cotapñatser, o'ch alla soctape'cherr e'ñe cohuen. Ñerra'm amach ello soctape'cherro cohuen, napa' e'ñe tayecma o'ch ahuen o'ch neçllarenaneta' nocchello't ñeñt nenamo'tsen. ¹⁷ Ñeñt e'mñotene' añ ñoñetspa' çhapanetepa'ch pueyoçhreto ñeñt atet neñotatenanet na Necamqueño'ora allohuen ñeñt pame'ñeñotet çhocma apçha'yenet allemeñ anetso'mar. Ñeñt metana'tue' allohuen pa'namen topateñtsoçhno, ñeñt ama nepuerranperrayo ñetñapa' napanetcha' maná ñeñtcha' pocrran' perret ñeñt ama entpahuesho. Ñaña o'ch napanet mapyetoll ñeñt atarr huallamemen allo aquellcare'tena so'chñets e'ñe etserra. Ñeñtcha' agapue' ñeñtpa' ñapta eñotenan añ so'chñets ñeñt aquellcare't all.' ” Arrpa' allohua huañ atet ot pérgamo'marneshacop.

Atto Juanpa' quellcan carta añecop ñeñt ame'ñetsa anetso Tiatiro

¹⁸ Allempoña añ ñeñt neserrpare'tatene' ñapa' alla otterrerr:

—Te'pa' o'ch pequellquerrerr carta ñaña añecop ñeñt cohuanpene' ñeñt ame'ñetsa all anetso Tiatira, o'ch potanet atet: “Napa' o'ch nequellconas carta attoch neñotatas ñeñt atet otenes ñeñt Yompor Puechemer, ñeñfara ñeñt pa'clle'pa' atarr a'rrechatañ atet ñerra'mrate' tso' po'huorter, ñaña ñeñfara pa'tacpa' atarr poptena atet ñerra'm aser ñeñt bronce ñeñt atarr cohuen poptetsa. ¹⁹ Ñapa' te'pa' atet otenes: 'Napa' neñotuennas ora allpon ñeñt atet cohuen sepa'yen, atto atarr semorrentannena ñaña atto atarr same'ñena, ñaña atto atarr seyennannena, ñaña atto e'ñe cohuen sa'huantha'huen ñeñt atarr echarr senten. Ñaña elloña allo'na sesen atet pa'nmue' ñeñt atarr cohuen enten Yompor. ²⁰ Tarraña ama't atteñpa' eñall paterr ñeñt ama pocteye' nentapretenso. Ñeñtpa' atto sapa' semnateñ coyanesha' ñeñt sochetsa Jezabel atto ñapa' aña yeçhaten ñeñt ama cohuenaye' nenteno na. Ama't ñapa' oteneñ ño' a'nítene' Yompor po'ñoñ tarraña ama atteyaye, ñapa' atta shecare'tenes ñeñtes torretsañ nocop. Ñaña ñapa' aña yeçhatenes ñeñt atto secañoresha'ten, ñapa' otenes ñeñtpa' e'ñe pocte' enteñ Yompor. Ñaña aña yeçhatenes ñeñt atto serrapreten po'chets ñeñt muetsenet ayeçhcataretocp, ñapa' otenes ñeñtpa'cho'ña e'ñe pocte' enteñ Yompor. Tarraña Yomporñapa' ama't mameshapa' ama pocteye' enteñe. ²¹ Napa' atta necueñ allponmat, noten ñato' o'ch cotape'cherran cohuen tarraña teme'ttsenpa' ama mueno o'ch cotape'cherran cohuen.

Ñapa' aña atarr cohuen enten atto cañoresha'ten. ²² Ñeñto'mar te' napa' o'ch nemnach o'ch atsna'ten attoch amach cha'nerro po'mayot. Ñaña ñeñt epuet atet penet ñerra'm ama cotape'cherreto cohuen attoch quechpuenet ñeñt atet yeçhatenanet ña, ñetpa'çho'ña o'ch necoñchatanet nanac. ²³ Ama't ñaña puechoyoreshohuen napa' o'ch ne'nuerranet. Allochñapa' attoch allohuen ñeñt pame'ñeñotet apçha'yetsa allemeñ anetso o'ch eñochet ñeñt atetpa' ama apapahuo. Napa' e'ñe nentuenas ama't ñeñt atet soctape'chen seyoçhro. Napa' ñeñtencha' sapuerre' allpon ñeñt poctetsa e'ñe puesheña'ttsocpas, ñeñt allpon atet sepa'yen. ²⁴ Tarraña po'potantañes ñeñtes tiatiro'marneshas sapa' ama soctaññañe ñeñt atet yeçhaten coyanesha'. Ama't ñaña ñeñt otenet oneñet poctañña ñeñt ama eñotpahuoyaye, puesheña'ttsa e'ñe et-sotene' — ñeñtpa'çho'ña sapa' ama seycheñe. Ñeñto'mar te'pa' o'ch notas, napa' amach nenonaso po'poñ ñoñets ñeñt atarr echarr senten. ²⁵ Añña notenes, amach sequeçhpatsche ñeñt atto soctape'chen cohuen Yomporecop, ama't tayoteñ ñaña esempohuañen allempoch nohuerra. ²⁶⁻²⁷ Ñeñt metana'tue' allohuen pa'namen topateñtsoçhno, ñeñt ama nepuerranperrayo, ñeñt allo'na sets pa'nmue' ñeñt pocte' nenten na, ñetpa' naphuerranetcha' attoch añcha'taret entenanet allohuen pa'namen acheñenesha' ñeñt yeçha'yetsa aña patsro. Ñeñtpa' atet Nompore apuenen ñaña. Neyoroçhenñoch añcha'noçhtapreterrnetcha'. E'ñe po'huamencotet ñerra'm ñet muenats atarrcha' mueroçhtateret allohuen pa'namen acheñenesha' arr patsro. Ñeñtpa' o'ch netma'ntacha ñerra'mrrate' ñeñt echene' po'carr asreþ, ñerra'm allo aso'tet patsro'pa' çhach a'mllo'tstach e'ñe poctacma. ²⁸ Ñeñt metana'tue' allohuen pa'namen topateñtsoçhno elloña ñetpa' napanetcha' ranto ñeñt atarr ateshamerr. ²⁹ Ñeñt e'mñotene' añ ñoñetspa' çhapanetepa'ch pueyoçhreto ñeñt atet neñotatenanet na Necamquëñoñ, ora allohuen ñeñt pame'ñeñotet çhocma apçha'yenet allemeñ anetso'mar.' ” Arrpa' allohua ñeñt atet ot tiatiro'marneshacop.

3

Atto Juanpa' quellcan carta añecop ñeñt ame'ñetsa anetso Sardiso

¹ Allempoña ñeñt neserrpare'tatene' ñapa' alla oterrnerr:

—Te'pa' o'ch pequellquërrerr carta añecop ñeñt cohuanpene' ñeñt ame'ñetsa all anetso Sardis, o'ch potanet atet: “Napa' o'ch nequellconas carta attoch neñotatas ñeñt atet otenes Jesucristo ñeñt e'ñe chorratena Yompore Puecamquëñ cançherr ñeñtara cançherr ñeñt sherba'yets. Ñetpa' po'poñe'tsocma sherbenet. Ñaña ñeñtara Cristo ñeñt orrene' cançherr ranto. Ñapa' te'pa' atet otenes: ‘Napa' neñotuennas ora allpon ñeñt sepa'yen. Ñaña neñotuennas atto sa acheñenesha'pa' atet entensetañ ñerra'mrrate' e'ñe cohuen socrrera Yomporecop. Tarraña ñeñtpa' ama atteye' sepeno çhaña sottena ñerra'mrrate' çho serromuen, amaña es sesherbenaña Yomporecop. ² Ama't atto same'ñenañ mame' tarraña ñeñtpa' allo'na sen huañuanmats. Napa' nentuenes ama set-sotenoña ñeñt e'ñe pocte' enten Nompore. Te'pa' o'ch notas, e'ñeçña señoña, o'ch alla setanterra Yomporecop. ³ Chocmachña seyerpueña ñeñt atto aserrpare'tataretes ahuañmo'çhoteñ. Amach sepsatsche añ

ñoñets ñeñt same'ñataya. Ñeñto'marña te'pa' añ poctetsa o'ch alla soctape'cherr cohuen Yomporecop. Ñerra'm ama atteye' sepeno napa' machayotach nohuerrnasa atet ñerra'mrrate' eñe'pa' amach señoñe esempopa' machayotach huaponasa. ⁴ Tarraña ama't atteñpa' all anetso Sardiso e'ñe puešheña'ttsaña ñeñt ama ye'chenaye sosya'tsañ ñeñt ama pocteye' enteno Yompor. Ñetpa' atet atma'ntatarettenet ama't pa'shtamueta' ama a'sosyateñeto. Ñeñto'mar ñetpa' e'ñe pocte' nentananet ñaña attochña nemnaterranet o'ch yechope'cherr e'ñe parro tarro'mar ñet ñeñt neshtamtatenanetpa' ama a'sosyateñeto, e'ñe cohuenarer orrtenet e'ñe huallama'tareret. ⁵ Ñeñt metana'tue' allohuen pa'namen topateñets ñeñt ama nepuerran'perrayo, ñetpa' neshtamtateranet shetamuets ñeñt atarr huallama't. Ñetpa' amach ne'sherraneto pa'so'cheñ all aquellcarennet Yompor po'libro attochña ñetpa' corretsetach. Ñetña'pa' nechme'taterranetcha' ñeñt na Nompor ñaña allohuen po'millaño'eññaneshar. ⁶ Ñeñt e'mñotene' añ ñoñets çhapanetepa'ch pueyoçhreto ñeñt atet neñotatenanet na Necamquëño' ora allohuen ñeñt pame'ñeño'fet çhocma ap'cha'yenet allemeñ anetso'mar.' ” Arrpa' allohua ñeñt atet ot sardiso'marneshacop.

Atto Juanpa' quellcan carta añecop ñeñt ame'ñetsa anetso Filadelfio

⁷ Ñeñt neserrpare'tatene' ñapa' alla oterrnerr:

—Te'pa' o'ch pequellquërrerr carta añecop ñeñt cohuan'pene' ñeñt ame'ñetsa all anetso Filadelfia, o'ch potanet atet: “Napa' o'ch nequellconas carta attoch neñotatas ñeñt atet otenes Jesucristo ñeñt e'ñe Parets ñeñt e'ñe po'ñoç allohuen es oten. Ñeñtara Cristo ñeñt allsensaret ñach añcha'taretterrtsa e'ñe atet añcha'tarette't David. Ñato' o'ch netma'ntacha o'ch not ñapa' echenan David po'llave. Ama't erra'tsencha' o'ch toran'penanet attoch çhapanet Yompor po'cohuenña ama't eseshapa' amach erroteno't alla epatare'terraneto. Ñaña ñerra'm ñach yottan'perre' ama't eseshapa' amach erroteno't toran'pereto. ⁸ Cristopa' te'pa' atet otenes sa: ‘Napa' e'ñe neñotuennas ñeñt atet cohuen es sepa'yen. Ama't ama tama ahuamencateso Yomporecop, tarraña ama't coñe'ta sehuamenc sepen çhocma same'ñennana neñoñ ñaña çhocma sa'meten atto same'ñenna ama sa'nasotenko. Ñeñto'mar napa' o'ch netoran'psonas allcha' sa'potennan neñoñ, ñaña ama't eseshapa' amach erroteno't alla yottan'pernaso. ⁹ Ñaña añña ñeñt otetseñ ñetpa' judionesheto' — ñehua, ñetpa' ama Yomporeye' pueyoçhresha' penahueto tarro'mar ñetpa' añña pueyoçhresha' penahuet oneñe't, ñetpa' atta shecare'tenset. Tarraña ñetña te'pa' o'ch name'ñatanet allochñapa' o'ch çhapanet pueyoçhreto sapa' ñeñtes atarr nemorrentena. Ñeñto'marña ñetpa' o'ch huapuet sesho o'ch concorposet allo'tsenes. ¹⁰ Sapa' e'ñe cohuen aco'pa setsoton allpon neñoñ, ama sa'ypo'ñenko na, ñeñto'marña napa'çho'ña amach na'ypo'ñaso. O'ch necuan'perres tarremphoua allemphoch mueroc'hteñsopoterra ñeñtcha' topaterre' ora allohuen acheñenesha' ñeñt ye'cha'yetsa añe patsro. ¹¹ O'ch e'ñe mamerrrrpa' o'ch nohuerrnasa. Ñeñt atto allpon same'ñena o'ch e'ñe señoñuanem amach sequeçhpatsche. Allochñapa' ama't eseshapa' amach erroteno't puerratan'psaso ñeñt no'patatensa ñeñtcha' atarr socshaterre'. ¹² Ñeñt metana'tue' allohuen pa'namen topateñtsoçhno ñeñt

ama nepuerram̄perrayo ñetpa' amate' errotenot ahupore'taretterreto allot, ñetpa' e'ñe atet ñerra'mrrate' all orratenet pocoll ñeñt pa'paquell pen Nompore ñeñt e'ñe huomenc echarr āparet. Ama't eseshapa' amate' errotenot huapore'che. Ñaña e'ñe ñesheto napa' o'ch nequellcoñ Nompore pa'so'cheñ, allotpa' o'ch nequellcoñ ñaña Nompore pa'netser e'ñe allara ñesheto, ñeñtara pa'netser ñeñt sochetsa Jerusaléñ, ñeñtcha' sohuerrtsa entot e'ñe etserrare'. Allotpa' o'ch nequellca' ñaña neso'cheñ all e'ñe ñesheto ñeñt e'ñe etserrare' neso'cheñ. ¹³ Ñeñt e'mñotene' añ ñoñets çhapanetepa'ch pueyoçhreto ñeñt atet neñotatenanet na Necamquëñot ora allohuen ñeñt pame'ñeñotet apçha'yenet allemeñ anetso'mar.' ” Arrpa' allohua ñeñt atet ot filadelfio'marneshacop.

Atto Juanpa' quellcan carta añecop ñeñt ame'ñetsa anetso Laodiceo

¹⁴ Ñeñt neserrpare'tatene' ñapa' alla oterrner:

—Te'pa' o'ch pequellquërrer carta añecop ñeñt cohuan̄pene' ñeñt ame'ñetsa all anetso Laodicea, o'ch p̄otanet atet: “Napa' o'ch nequellconas carta attoch neñotatas ñeñt atet otenes Jesucristo ñeñt amapuenesho po'ñoñ. Ñeñt atet oteney Pomporecop ñeñtapa' atetcha' pernay, ñaña ñeñt allpon oten, ñeñtapa' e'ñe po'ñoçh atet, ñaña ñeñtara Cristo ñeñt ñanom eñall, allotña Pomporepa' yechcatyesan allohuen ñeñt allpon eñall. ¹⁵⁻¹⁶ Cristoña te'pa' atet otenes: ‘Napa' e'ñe neñotuennas ñeñt ora allpon atet sepa'yen. Tarraña sapa' seçllañotetsetsa same'ñenna, ama e'ñe huomencaye' same'ñenno. Ñerra'm ama semno o'ch same'ña'na huomencpa' amachña same'ñatsetno ama't mamesha. Tarraña sapa' seçllañotetsetsa same'ñenna. Ñato' o'ch netma'ntacha atet. Sapa' ama atteyayso ñerra'mrrate' oñ ñeñt atarr atserrrasen. Sapa' atta sepena ñerra'mrrate' oñ ñeñt mamesha shorrsastetsa ñeñt nanac netsena'ten. Ñeñto'marña napa' e'ñe atet nentenes atet ñerra'mrrate' oñ ñeñt çha aya'pesatañtena. Ñerra'm yorppa' çhach ya'pesatey o'ch ya'tatstera. Ñeñto'marña sapa' e'ñe atet nentenes çhach nemneñ o'ch nehuapore'tam̄perres. ¹⁷ Sapa' ama't soteneñ año' es sepallteno e'ño' sechuen ora ñeñt allpon poctetsa socop e'ñe sa setaruasot. Tarraña ñeñt sherbets secamquëñecoppa' ama secheñe ama't coñe'ta. Napa' atta nentenes atet ñerra'mrrate' ñeñt nanac atsena'taret, atarrcha' amueroçhtatarettena ñeñt e'ñe huocchañ ñaña aporo'yet attach muelle'mquën. ¹⁸ Ñeñto'marña na te'pa' o'ch noctape'çhaterres sa o'ch notas sapa' ñeñt sepalltena. O'ch senamuen nesho ñeñt po'ñoçh nanac sherbets secamquëñecop. Allochñapa' attoch sechuerr shonte' esocmañen ñeñt e'ñe po'ñoçh sherbets. Ñeñt ama sherbetsopa' o'ch sa'ypo'ñer. Ñato' o'ch netma'ntacha atto allempe atserrtatenet oropa' o'ch nohuanña a'yo ñeñt ama sherbetso allempeñapa' o'ch e'ñe orochayaña ñeñt nanac sherbets. Ñeñt atarr sherbets atet ñerra'm oro ñeñtcha'ña se'nenña nesho. Elloña napa' o'ch netma'ntatasa atetcha' sepa, o'ch seraña nesho shetamuets ñeñt atarr huallama't. Allochñapa' ñeñtcha' sechorrerra attoch o'huañcha' sepenca ñeñt atto semuelle'mquën. Attoch serañena ñaña quëllo'yeñtsopar alloch separterr seclle' allochñapa' attoch secuerr o'ch

senterra e'ñe cohuen. ¹⁹ Ñehua, allohuen ñeñt' po'ñočh atarr nemor-
 rentenapa' čhocmach e'ñe cohuen noctape'chaterranet ñerra'm
 esempo atpare'tennet. Ñaña erroteno allohuen ñeñt' nemorrentena o'ch
 necoñchach mame', tarraña ñeñt'pa' e'ñe ñocpueta allochñapa' attoch
 o'ch alla cotape'cherret cohuen nōcop, o'ch alla ame'ñerrnet huomenc.
²⁰ Señochepe'ch ñeñt'cha' atet netma'ntaterrsa. Napa' atet'cha' nepena
 ñerra'mrrate' esesha' ñeñt' čhocma chore'tets yetarroť. Ñerra'm
 eseshas se'mapuerrnan neñoñ ñaña ñerra'm setoranipenen, nañapa' o'ch
 nebe'tos all, allñapa' o'ch yerrallme'chen parro. ²¹ Ñeñt' metana'tue' al-
 lohuen pa'namen topateñtsočhno ñeñt' ama nepuerranperraye, ñetñapa'
 nemnatanetcha' o'ch añcha'tarettapreterrnet e'ñe all neconaño. E'ñech
 attet ñerra'mrrate' na, napa' e'ñe nemtana'tua allohuen pa'namen
 topateñtsočhno. Ñeñto'marña napa' na'ñcha'tarettapreteña Nomp
 e'ñe all po'conaño. ²² Ñeñt' e'mñotene' añ ñoñets čhapanetepa'ch
 pueyočhreto ñeñt' atet neñotatenanet na Necamquēñoť ora allohuen ñeñt'
 pame'ñeñotet apčha'yenet allemeñ anetso'mar.' ” Arrpa' allohua ñeñt'
 atet ot laodiceo'marneshacop.

4

Atto Juanpa' entan Yompor po'conaño e'ñe alla pue'ntaña

¹ Allempoñapa' alla gatyerrnerr po'poñ. Necuerrerr, allñapa' nentos
 yetarr atoraret allcha' nebe'tos o'ch nečhap ento. Alla ne'muerrerr
 ñoñets ñeñt' atet e'morrtetsa ñorra' atarr huomenc atet ñerra'mrrate'
 poctar atarr huomenc eñen. Ñeñt'ña ñoñetspa' atet oten:

—Apon arr, o'ch pebe'tosanpesna o'ch negatyesař allohuen ñeñt'cha'
 atet perrtsa tsapatonet.

² Allempoña Yompor Puecamquēñ e'ñe chorrenna, atto nečhap ento
 all nentos puešeñarr alla anen po'conaño. ³ Ñeñt' anets all po'conaño'pa'
 atarr nanac cohuen aspanamcoquēno poptamco'tena atet ñerra'mrrate'
 mapue' ñeñt' atarr cohuen poptetsa ñeñt' otenet jaspe. Ellonetpa'
 po'poñoñto atarr nanac cohuen tsamcoquēno poptamco'tena atet
 ñerra'mrrate' mapue' ñeñt' otenet cornalina. Ñaña allo arca'tanipenapa'
 ñeñt'pa'čho'ña atet ñerra'mrrate' ayon tarraña ñeñt'pa' atarr nanac
 cohuen aspano shemashro poptena; e'ñe atet poptena ñerra'mrrate'
 mapue' ñeñt' otenet esmeralda. ⁴ Ñaña to'pño'mar ñeñt' rročhtanipene'
 all shonte' po'poñ conañečhno. Ñeñt' conañečhno to'pño'tsa'yen ñeñt'
 rročhtanipene' allo'tsen epoch čharra' puechena pa'tats. Ñaña
 ñeñt' anorrčhets allohuen conañečhno ñeñt'pa'čho'ña allo'tsen epoch
 čharrasheña puechena pa'tats ñeñt' sherbene' Yompor all pue'ntaña.
 Cočhneshareret pa'shtam atarr huallama'tarer, po'choyo'met oro
 ayečcataret ñeñt' choyo'mtenet. ⁵ E'ñe rročh conañotpa' allot huena
 meratste', allot huena ñaña tatste'. Allpa' atarr huomenc ma'moreten.
 E'ñe alla allame'tets po'conaño ñehuapof allotsen cančherr huerare
 ñeñt' huoretyets all. Ñeñt'pa' ñeñt' toma'ntenaya Yompor Puecamquēñ
 ñeñt' cančherr ñeñt' sherba'yets e'ñe po'poñe'ttsocma. ⁶ E'ñe alla a'yenet
 po'conañoť all orrtena erracmañen atet ñerra'mrrate' ñeñt' añecmuen
 rerpat ñeñt' e'ñe orrtatuene' ora ñeñt' allpon eñall all.

Allo'tsen po'conañ e'ñe pa'tatsshemto'marot all tomchen pa'tats ñeñt berrma'ttetsa. Ñeñtñapa' shonte' pa'cloyechno emota cohua'yen. Pa'chco'tagotpa'cho' shonte' pa'cille' allot cohuen. ⁷ Ñeñt ñanom ñeñt berrma'ttetsa all, ñeñtpa' e'ñe atet ñerra'mrrate' ma'ñor. Po'poñpa' allo'tsen ñaama atet ñerra'mrrate' toro, po'poñ pa'tsa'pot pa'cloyotpa' e'ñe atet orrtena ñerra'mrrate' acheñ. Po'poñ all orrtena attema't ñerra'mrrate' ñeñt otenet contor ñerra'm esempo anena. ⁸ Ñeñt pa'tatso'mar berrma'tpa' e'ñe apa'payetarerochet, pate'tetspa' echenan pechapa'ttsocmuwet pa'pue' penet. Pa'pa'yot notpa' e'ñe acloyetarerochet, puelleca'notpa'cho'ña acloyetareret emoto'mar allot cohua'yenet. E'ñe ellapenete't arepenete't all achoteñet Yompor, ama't mameshapa' ama ameseneto atto achoteñet Yompor. Ñeñtpa' atet otenet:

Parets, parets, parets ñeñtara Yompor ñeñt atarr ahuamencat nanac ñeñt Yepartseshar yepen ñeñt chocma eñall. Ama't ahuatoteñ eñall ñaama ñeñtara ñeñtcha' ello huerrtsa po'pocheño.

⁹ Ñaama ñeñt berrma'ttetsa allpa' cohuentateññañet Yompor ñeñt anets all po'conaño, atarr amcha'na'tpo' enteñet, ñaama chocma puema'yocheñofet parasyoso'teñet Parets ñeñt ama arromñateshayaye ama't ahuata. ¹⁰ Ñetpa' ñerra'm esempo aye'chochtateñet Parets, añña ñeñt epoch charrasheña ñeñt puechetsa pa'tats ñeñt sherbene' Yompor allpa' ñetpa'cho'ña o'chcho' concorpa'rretenet e'ñe all ñesho, o'chcho' ma'yocheñet ñamet Yompor ñeñt ama arromñateshayaye ama't errponaña. Allo'tpa' o'ch a'meyet po'choyo'm o'chcho' net e'ñe Yomporshonet ñeñt anets all po'conaño. O'chcho' aye'chochtateñet Yompor ñamet, ñeñtpa' atet otenet:

¹¹ Yompore, ñeñtep Yepartsesharep, ñeñtep nanac Partsop, ya añ poctetsa o'ch yecohuentatonap ñeñtep amcha'na'tpahuep ñaama atarr ahuamencatep. Tarro'mar pa yechcatyene' ora allpon ñeñt eñall, e'ñe pa pemneñno't ahuo't eñalletesya, e'ñe pa peñoño't ahuo't yechca'yena ñeñt allpon eñall.

5

Atto Juanpa' entan Cristo ñeñt atma'ntataret Carrnero, e'ñe ñapita toran Yompor po'libro

¹ Allempoñapa' alla necuererr ñeñt anets all po'conaño. Potot po'cohuenrotpa' all nent all orrenan libro apco'nottataret, e'ñe emoto'mar aquellca'huaret o'ponot ñaama enot. Echenan cancherr ñeñt allo ayomrraret atto e'ñe echarr aparet. ² Ñaama all nent puesheñarr mellañofoñ ñeñt atarr ahuamencat. Ñaña'pa' rrana huomenc, ñeñtpa' atet oten:

—Esesha'huaca' e'ñe cohuenare' cotape'chetsña Yomporecop ñeñtcha' tore' añ Yompor po'libro allo echarr aparettena.

³ Tarraña ama't puesheñarrapa' ama eñalle ñeñtcha' tore' Yompor po'libro. Ama't puesheñarra ñeñt ento'tsen ñaama ama't ñeñt patso'tsen ñaama ama't ñeñt o'pono'tsen patso, ama eñalle ñeñtcha' muenatet ñeñtcha' tore' Yompor po'libro attoch eñorachet. ⁴ Napa' ñeñtña atarr neyarré' atto ama't puesheñarrapa' ama neñche ñeñt e'ñe cohuenare' es cotape'chets Yomporecop ñeñtcha' muenatet o'ch toran Yompor po'libro

ñeñtcha' eñorate'. ⁵ Allempoña ñeñt epoch çharrasheña ñeñt puechetsa pa'tats ñeñt sherbene' Yompor, puesheñarrñapa' oten:

—Amach peyahuatsto, tarro'mar eñall puesheñarr ñeñt e'ñe pocte' ñeñtcha' tore' Yompor po'libro ñeñt cançherr allo echarr aparettena, tarro'mar ñapa' ñeñt metana'tue' allohuen pa'namen topateñtsoçhno, ñeñtñapa' añepa't Cristo ñeñtara atma'ntataret Ma'ñor. Ñeñtpa' judámerena'tar ñeñtara David po'mñreneñ.

⁶ Necuererr, allñapa' nent Cristo ñeñt toma'ntenaya Carrnero. All ten e'ñe rroçho allo'tsa'yen Parets po'conañ ñaña añ pa'tatso'mar ñeñt berrma'ttetsa ñaña e'ñe allo'tsa'yen ñeñt sherbene' Yompor. E'ñe rroçho all ten Cristo ñeñt atma'ntataret Carrnero. Orrtena atet ñerra'mrrate' carrnero ñeñt amtsarettetsa ochñartsocop. Ñeñt carrneropa' cançherr po'ucor, echenan ñaña cançherr pa'clle'. Ñeñt cançherr pa'clle'pa' ñeñtpa' añ Yompor Puecamquëñ ñeñtara cançherr ñeñtcha' sherba'yets e'ñe po'poñe'ttsoçma ora erracmañen añe patsro allcha' amñarefetyerret. ⁷ Allempoña añ Carrneropa' o' huapa o' çhap allo'tsen Yompor ñeñt anets all po'conañ. Ñaña' chetsosan Yompor po'libro ñeñt orren po'cohuenrot. ⁸ O' chetan libropa' allempoña añ ñeñt pa'tatso'mar berrma't ñaña ñeñt epoch çharrasheña ñeñt puechetsa pa'tats ñeñt sherbene' Yompor, allohuenetñapa' concorpa'rrteñet Cristo ñeñt atma'ntataret Carrnero. Puesheña'ttsetpa' orrenet arpa ñaña pajo' ñeñt orotaten all anaret ñeñt atarr eñmosa'ttetsa Yomporecop. Ñehua, añ ñeñt eñmosa'ttetsa añ toma'ntena ñeñt atto ma'yochena ñeñt pueyochresha' pen Parets. ⁹ Añña ñeñt concorpa'rrtetsapa' ñetñapa' morrechenet ñeñt etserra morreñets ñeñtpa' atet açhoteñet Cristo ñeñt atma'ntataret Carrnero:

Papa' e'ñe cohuenare' es peña'yen ñeñto'mar e'ñe pocte' pñach chete' Yompor po'libro, e'ñe pocte' pñach tore' allo echarr aparettena tarro'mar papa' pa' amtsarettatsa, perrasoña papa' allo petsa'tuonaya yo'chñar allochñapa' attoch e'ñe puechemer perrey Yompor ama't allohueney ñeñtey pa'namen acheñey, ama't erra'tsena mereñtsorey alloç yehuena, ama't ñaña erra'tsena ñoñtsor allo yeñosyen e'ñe po'poñe'ttsoçma, ama't ñaña pa'namenana'tarey allohuen errohuanen ñeñt e'ñe ya'netser yeña'yen.

¹⁰ Ñeñtey allohueneypa' pñayemnatene' o'ch ya'mñcha'tarettapretaña attochña yesherbapreteneñ Yompor ñeñt atarr Parets. Attoña yecorneshaten Partsocop. Ñaña attoch ya'mñcha'tarettterra añe patsro.

¹¹ Allempoña alla necuererr o' ne'muererr mellaño'eñnesha' atet eñosyenet. Shontet nanac che'muechenet all rroçhtañpeñet a'yohuen errañaren. Ñaña ñeñt berrma'ttetsa all ñaña ñeñt sherbene' Yompor ñeñt allohuenet ma'potanto'maretpa' ñeñt e'ñe rroçhtañpene' Yompor ñeñt anets all po'conañ. ¹² Ñeñt mellaño'eñnesha' ñetñapa' e'morrtenet huomenc all açhoteñet Cristo ñeñt atma'ntataret Carrnero. Ñeñtpa' atet otenet:

Cristo ñeñt toma'ntenaya Carrnero ñeñt amtsarettatsa, ñapa' e'ñe cohuenare' es pa'yen ñeñto'marña ñapa' e'ñe pocte' ahuamencattena, agapanepa' shonte' esocmañen ñaña e'ñe pocte'

eñotañtepa'ch, ñaña e'ñe pocte' partsotepa'ch, ñaña e'ñe pocte' amicha'na'tpahutepa'ch. Ñaña e'ñe pocte' ya yecohuentateñōt ya'ye'chochtatoñepa'ch.

¹³ Allempoña ne'muerrerr atet ama't allohuen ñeñt Yompor pueyečcatar aye'chochtateññañet Yompor ama't ñeñt ento'tsa'yen ñaña ama't allohuen ñeñt patso'tsa'yen, ñaña allohuen ñeñt o'pono'tsen patso ñaña oño. Ama't e'ñe allohuen pueyečcatar ñeñt allo'tsa'yen allohuenet aye'chochtateññañet Yompor, atet otenet:

Ya'ye'chochtatoñepa'ch Yompor ñeñt anets po'conaño ñaña Puechemer Cristo ñeñt atma'ntataret Carrnero. Amicha'na'tpahuepa'ch yenteñ, yecohuentatoñepa'ch tarro'mar ñetpa' atarr ahuamencatet tayoteñ ama't errponañohuen.

¹⁴ Ñaña ñeñt berrma'ttetsa pa'tatso'mar all ñetñapa' otenet:

—Ñeñtpa' attetepa'ch.

Ñaña añña ñeñt sherbene' Yompor ñeñt epoch čharrasheña ñeñt puechetsa pa'tats o' concorpa'rrtet all ma'yocheñet Yompor ñeñt ama arromñaťeshayaye.

6

Atto Cristopa' toran ñeñt cančherr allo echarr ařarettena Yompor po'libro

¹ Allempoñapa' nent Cristo ñeñt toma'ntenaya Carrnero attoch ñach tore' ñeñt cančherr allo echarr ařarettena Yompor po'libro. Allempoña ñapa' o' tore paterr ñeñt e'ñe ñanom allo ayomrraret ñeñt libro. Allempoña o' tore, añña pa'tatso'mar ñeñt berrma'ttetsa, puesheñarrñapa' eños. Nañapa' o' ne'muerrerr ñeñt atet eñen huomenc, po'ñoñpa' e'ñe atet e'morrtena ñerra'mrrate' čho tatstena. Ñeñtpa' atet oten:

—¡Ařon, pecue'!

² Naña necue'pa' nent paterr cahuall atarr huallařnanen. Ñeñtña montenayapa' echenan paterr po'ca'not ñeñt orra'nen potot. Allñapa' apet paterr choyo'mets ñeñtča' choyo'metnoma. Nañapa' ahuo' o'ch quellara'yena' o'ch e'ñe a'mchechuan ñeñt e'moñe'tyen.

³ Allempo torerranerr ñeñt puepañ allo ayomrraret Yompor po'libro, nañapa' alla ne'muererr ñeñt puepañ berrma'tpa' o' alla eñorerrerr. Ñeñtpa'čho'ña ñeñtara atet oterrerr:

—¡Ařon, pecue'!

⁴ Allempoñapa' čha'nerrerr po'poñ cahuall, ñeñtñapa' atarr tsařnanen. Ñeñtña montenaya allñapa' apet paterr espada atarr allpocha'ř. Nañapa' o' muenateñet o'ch quellaratanna'tatan acheñenesha' arr patsro attochña muetsatanna'tatenanet. Attoña ñetpa' o'huañcha' muechet yečhenet arr patsro.

⁵ Allempo torerranerr ñeñt puema'pañ allo ayomrraret Yompor po'libro nañapa' alla ne'muererr ñeñt puema'pañ berrma'tpa' o' alla eñorerrerr. Ñeñtpa'čho'ña ñeñtara atet oterrerr:

—¡Ařon, pecue'!

Naña necuererrpa' nenterrerr po'poñ cahuall ñeñtñapa' atarr quellueřnanen. Ñeñt montenayapa' orra'nenan paterr pesamets.

6 Allo'tsa'yen ñeñt berrma'ttetsapa' e'ñe all rroçho'tpa' ne'muererr ñeñt atet e'morrterrerr ñoñets, ñeñt'pa' atet oten ñoñets:

—Paterr kilo trigopa' nanquëpa'ch tsa'teterr ama't ñeñt paterr denario*, ñaña ma'pa kilo cebadapa' nanquëpa'ch tsa'terra. Tsa'terrepa'ch ñaña paterr denario. Tarraña olivose' ñaña vinospa' çhocmuepa'ch eñall, amach seprratam'psatsetye.

7 Allempo torerranerr ñeñt puepa'tatseñ allo ayomrraret Yompor po'libro, nañapa' alla ne'muererr ñeñt puepa'tatseñ berrma'tpa' o' alla eñorerrerr. Ñeñt'pa'çho'ña ñeñt'ara atet oterrerr:

—¡Apon, pecue'!

8 Naña necuererrpa' nenterrerr ñeñt paterr cahual atarr shemashreñnaneno puerrama'pnen. Ñeñt montenayapa' añ pa'so'cheñ Rromueñets. Ñeñt cotene' chenta'pa' añ toma'ntena ñeñt'cha' aguëne' allohuen ñeñt'cha' rromuets. Ñeñt'pa' apare't llesens añecop attoch a'cllatatan shonte' acheñenesha' arr patso. Ama't pasheparr pats, allpon otenet un cuarto, allponcha' a'cllatatuerran acheñenesha'. Ñeñt'pa' atet'cha' a'cllatatanet, quellareñtsoterrcha', chaporrñatsoterrcha', atsnañtsoterrcha', orrterrach berr ñeñt atarr atsre'mñañ ñeñt atarr bellac arr patso.

9 Allempoñapa' o' torerranerr ñeñt pa'mnareñ allo ayomrraret Yompor po'libro, naña necuererrpa' allña'pa' nenterrerr altar ñeñt allecma a'crratete't ñeñt eñmosañtetsa Yomporecop. E'ñe all patso't altaro all nent shonte' camuecñetsoçhno ñeñt amtsanatarettatset't all e'ñe pueserrpare'teñotet Yompor po'ñoñ atto a'metete't ñaña atto ame'ñeñet Cristo. ¹⁰ Añña ñeñt camuecñetsoçhno'pa' ñetña'pa' rrannartenetpa' oteñet Yompor:

—Yompore pa atarr Partsof, atarr ayemuetpo' atet poteney. Es-empohuachca' peçoñchatuerña acheñenesha' all patsro, esempohuachca' petsa'tateraña ñeñt acheñer yemtsanataye't ñeñt patso'tsen. Añpa' allohua atet ot camuecñetsnesha'.

¹¹ Ñetña pueheña'tsetpa' apare'ttenet pa'shtam atarr huallama'tarer. Ñaña ñetña'pa' otarettet ato't e'ñe ameseta'. “O' mameshaña o'ch etsotua allpon po'potantañecop semo'nasheñ ñeñt'cha' amtsanatarettterrtterr ñeñtes e'ñe attecma sesherbeñ Cristo.”

¹² Allempo torerranerr ñeñt po'pechapueñ allo ayomrraret Yompor po'libro naña o' alla necuererrpa' nent ñaña çha puetalle'chena pats huomenc. Atsne'ñapa' o' checmet atet ñerra'mrrate' shetamuets ñeñt atarr quellue ñeñt chorrena ñeñt atarr llequëtsa. Arrorrñapa' o' çha tsama'tta atet ñerra'mrrate' errasats. ¹³ Rantoçhno ñaña ñeñt ento'tsa'yen allohuenpa' o'çha shorçha'tua o' çaçha't patso. O'ch netma'ntacha atet ñerra'mrrate' parte ñeñt e'meret o'ch huomenquëshatpa' pue'merña'pa' o'ch a'shore'tam'pesue huomenquësha', ama't atarr emeñ pue'mer.† ¹⁴ Enetpa'çho'ña o' e'ñe chenca'hua atet ñerra'm papell epare'tpa' o'huañcha' orrta. Ama't ora allpon aspentarerpa'çho'ña o' e'ñe rrote'tyesuahua ñopa'tets. Ñaña ora allohuen oñeçhno ñeñt rroçhpe'chañeçhno ñeñt'pa'çho'ña o' e'ñe rrote'tyesuahua. ¹⁵ Allempoñapa' allohuen acheñenesha'

* 6:6 Denariopa' quelle ñeñt allpon tsa'tenet pamtarr ñeñt taruaset all pa'nyo. † 6:13 Ñehua, Juanpa' añ toma'ntatena higo ñeñt puenarem' penet all pa'nyo.

ñeñt yecha'yetsa aña patsropa' o' e'ñe e'potrra'tuet arroroto'mar ñaña mapueta'pono'mar ñeñt aspen'arero'tsa'yen. Ama't allohuen am'cha'taretnesha'chno o' e'ñe e'potrra'tuet, ñaña allohuen ñeñt atarr sher'ba'yets, ñaña ñeñt e'cllayorete'chno, ñaña ñeñt pa'm'cha'tareter pen solltar, ñaña ñeñt atarr ahuamencat entyetsa, ñaña ama't allohuen acheñ ñeñt ama esoye' enteneto ñeñt ataruasataret e'ñe atta, ama't ñaña allohuen ñeñt ama ataruasareteyaye ñeñt e'ñe cohueno'tsen, allohuenet e'ñe e'potrra'tuenet. ¹⁶ Allohuenetpa' chore'teñet aspenet ñaña mapueta'chno atet otenet:

—Te'ñapa' yeñgata'mperrepa' atto'tcha' e'poterrey attoch amach enterrye Parets ñeñt anets all po'conaño allochñapa' amach errotenot coñchaterrye Cristo ñeñt toma'ntenaya Carrnero.

¹⁷ Tarro'mar te'pa' o' chap añ yetro allempoch yoro'chterra allempoch atsa'tataretterra allohuen acheñenesha'. Ama't eseshapa' amach errotenot ahuantofñeto Yompor po'yoro'chenña.

7

Atto Israel po'm'reneñ ñeñt'cha' ayato'ma'tareteyestsas

¹ Allempoña napa' nent mellaño'teñnesha' pa'tatssheña. E'ñe allohuanen pats, ñeñt pa'tats po'topñaro'mar allñapa' all tomyen puesheña'tets mellaño'teñ ñeñt pa'tatssheña. Ñeñt pa'tatssheña ñetñapa' ñet epatare'tenet m'orr pa'tatssher'nto'marot allot huapyena m'orr. Allochñapa' attoch amach atarr m'orrarsañpeno añ patser, ama't ñaña oñe'chno, ñaña ama't patrra tsachpa' amach m'orrarsañpeno.

² Allempoña napa' o' alla nenterrerr po'psheñeñ mellaño'teñ, arr orrtena allot huena atsne'. Ñapa' añ orren yapets ñeñt alloch yanatan allohuen ñeñt pueyochresha' pen Yompor ñeñt ama arromñateshayaye ama't ahuata. Ñaña' rrana huomencpa' otan mellaño'teñnesha' ñeñt pa'tatssheño'mar ñeñt añecop ahuamencattenet attoch ñet'cha' pomnaren pet pats ñaña oñe'chno. ³ Ñeñt'pa' atet otanet:

—Amach erro't sepatsto añ pats ama't oñ ama't tsach ato'tña yeyato'ma'tueya' allohuen ñeñt torra'yetsa Yomporecop.

⁴ Allempoña ne'muerrerr ñeñt atet oteñet ñeñt'cha' allpon ayato'ma'tarettatsa. Ciento cuarenta cuatro mil ñeñt'pa' allpon otenet. Ñeñt ciento cuarenta cuatro mil acheñenesha' ñetpa' e'ñe po'poñe'ttso'cmuet mereñtsoret. E'ñe ñeñta mereñtsore'cmuet ñeñt çharrasheña puechena epa ñeñt pa'tañ pene' Israel ñeñt corratse't ahuat.

⁵ Nehua, pate'tets mereñtsorpa' allponsheña ñeñt'cha' ayato'ma'tarettatsa: Judána'tarpa' allo'tsencha' çharra' puechena epa mil acheñenesha'; Rubénna'tarpa'cho'ña allo'tsencha' çharra' puechena epa mil acheñenesha'; Gadna'tarpa'cho'ña allo'tsencha' çharra' puechena epa mil acheñenesha'; ⁶ Aserna'tarpa'cho'ña allo'tsencha' çharra' puechena epa mil acheñenesha'; Neftalina'tarpa'cho'ña çharra' puechena epa mil acheñenesha'; Manasésna'tarpa'cho'ña çharra' puechena epa mil; ⁷ Simeónna'tarpa'cho'ña çharra' puechena epa mil; Levína'tarpa'cho'ña çharra' puechena epa mil; Isacarna'tarpa'cho'ña çharra' puechena epa mil; ⁸ Zabolónna'tarpa'cho'ña çharra' puechena epa mil; Joséna'tarpa'cho'ña çharra' puechena epa mil; Benjamínna'tarpa'cho'ña çharra' puechena epa mil acheñenesha'.

Atto shonte' pa'namen acheñenesha' ñetpa' e'ñe huallama'tarerochet pa'shtam

⁹ Allempoña napa' o' alla nenterrerr shonte' acheñenesha', nanac che'muechenet ama e'ñotuenteno ñeñt allpon allo'tsen. Shonte' pa'namen acheñenesha'. Ñeñt'pa' pa'namen anetsot huačha'tyenet, shonte' pa'namen mereñtsoret ñeñt huačhetsa all, shonte' pa'namen ñoñets e'ñe po'poñe'ttsocma eñosyenet. Ñetñapa' all tomčhenet e'ñe ñehupoť allo'tsen Yompor po'conañ allo'tsen ñaña Cristo ñeñt toma'ntenaya Carrnero. Ñetpa' e'ñe huallama'tarerochet pa'shtam. Pototetñapa' añ orra'yenet atet ñerra'm shequëpan. ¹⁰ Allohuenetpa' rranenet, otenet:

Yompor ñeñt po'conaño'tsen ñapa' o' a'queshpaterrey epuet ñaña Puechemer ñeñt toma'ntenaya Carrnero.

¹¹ Ñeñt berrma'ttetsa pa'tatso'mar ñaña ñeñt sherbene' Yompor all, ñaña allohuen mellañoñeñnesha' ñeñt tomčhets a'yohuen erraparen, ñetña allohuenetpa' e'ñe rrochtam'pesueñet Yompor ñeñt po'conaño'tsen. Ñeñt mellañoñeñnesha' all rrema'rrartenet Yompor po'conaño atet ma'yocheñet Yompor. ¹² Ñeñt'pa' atet aye'chochtateññañet Yompor, ñeñt'pa' atet otenet:

Attetepa'ch yocop ya'ye'chochtatoñepa'ch, yecohuenta-toñepa'ch, amuepa'ch ahuañaño atto eñotañtena Yompor, yeparasyoso'chepa'ch, añcha'na'tpahuepa'ch yenteñ, amuepa'ch ahuañañaño ñeñt atto ahuamencattena Yompor, añcha'tarettepa'ch tayoteñ errponohuañen. Ñeñt'pa' attetepa'ch.

¹³ Allempoña puesheñarr ñeñt sherbene' Yompor, ñaña'pa' a'p'to'ten, atet oten:

—Papa' ¿ama't peñoteñeña eseshačhnote'ña ñeñt chorrenaya hual-lama'tarer, ñaña ama't peñoteñe erroťte'ña huačhenet?

¹⁴ Nañapa' atet noch:

—Amaca'ye Nompore neñoteñe. Pate'ca'yeña eñotene'.

Ñaña'pa' o' alla oterren:

—Añenesha' ñeñt chorrenaya huallama'tarer ñetña ahuanterret allempo orrterra pa'namen mueročhteñtsočhno. Ñaña ñetpa' atto e'sshouarettet po'chñaret e'ñe Cristo po'rraso, ñeñtña ottetsa atet ñerra'mrrate' ñetpa' o' atsama'taretet pa'shtam attoch e'ñe cohuen a'huallama'ttarettet pa'shtamuet e'ñe cohuen. ¹⁵ Ñeñto'marña ñetpa' allo'tsa'yenet Yompor po'conaño. All čocma sherbeñet Yompor — ellapenete't, arepenete't sherbatset all Yompor pa'paclo. Yomporña ñeñt anets all po'conaño, ñachña e'ñe a'natenahuet e'ñe ñesho. ¹⁶ Ñetpa' amach mueročhterrete'te pa'chporrñoť ama't po'ñapañoť. Ñaña ñetpa' amach erroťtenoť chemuerranete'te atsne' ñaña amach a'mñechaterranete'te ñaña huerate'. ¹⁷ Tarro'mar Cristo ñeñt atma'ntataret Carrnero ñeñt allo'tsen all Yompor po'conaño, ñachña cohuan'penahuet e'ñe atet ñerra'mrrate' carrnero e'ñech cohuan'peñ pamo'mte'. Ñapa' čapatanetcha' all poten oñ ñeñt'cha' apahuet attoch correnet errponañohuen. Yomporña ñach a'huañañpsahuet puellquëña ama't ahuatapa' amach yahuerrete'te.

8

Allempo Cristopa' toruan po'cančhrrroñ ñeñt allo ayomrrarettena Yompor po'libro allempoñapa' orrta ñaña puesheñarr mellañoñeñ ñeñt orrene' po'pajo' orotaten

¹ Allempoña Cristo ñeñt toma'ntenaya Carrnero, ñapa' allempo e'ñe toruan po'cančhrrroñ ñeñt allo ayomrraret Yompor po'libro, e'ñe muetsoneñtua poctacma pue'ntaño tematuanen. ² Allempoña napa' alla nenterrerr mellañoñeñnesha' ñeñt cančherrsheña ñeñt tomčhets e'ñe all Yomporesho. Ñetña puesheña'ttset allpa' aparettet poctor. ³ Allempoña o' huapa po'psheñeñ mellañoñeñ. Huapapa' o' tomos all altaro. Añ altarpa' allecma a'crratenet tsach puese' ñeñña atarr amostetsa all. Pamosoñña' ñeñt atarr eñmosa'ttetsa Yomporecop. Ñeñt mellañoñeña' añ orren pajo' orotaten allcha' nenan ñeñtcha' eñmosa'ttetsa. Ñeñt mellañoñeña' allña apet shonte' eñmosa't ñeñtcha' eñmosa'ttate' ñeñt atto ma'yochena Parets pueyochresha'. Ñeñtña eñmosa'ttetsapa' ñeñtcha' net altaro ñeñt ayečcataret oro ñeñt e'ñe ñehuapofe'tsen Yompor po'conaño. ⁴ Ñeñt orrampen mellañoñeñ eñmosa'tpa' cha amosoñe'chnen enonet allo'tsen Yompor, ñeñtña eñmosa'ttaten' ñeñt atto ma'yochena Parets pueyochresha'. ⁵ Allempoña mellañoñeña' cheterran pajo'pa' o' esha'tan tso' puecallamshor ñeñt cheta' altarot e'ñe e'chorran tso' pajo. Allempoñapa' huapore'ch patso. Chap patsopa' meratstosa, tatstosa, e'morrtosa huomenc, pellatan pats.

Atto Juanpa' entan cančherrsheña mellañoñeñ ñeñt poctorets

⁶ Allempoña mellañoñeñ ñeñt cančherrsheña ñeñt epoctoretarer puesheña'ttsetpa' o' echantyeset po'poctor o'ch a'toret.

⁷ Allempoña ñeñt ñanom mellañoñeña' o' poctora', poctora'huatsapa' orrta ñeñt ma'po'mar ñeñtcha' ahupore'tarettatsa patso. Ñeñtpa' añ hue' allotpa' ñaña tso' ñeñt tsetetsa errasatso. Atto ahupore'taretta patso allempo chap patsopa' e'ñe a'huortatuosan ñeñt allo'tsen all chap patso. Tso'ñapa' erraparen e'ñe a'poyuosan ñeñt allpon tsachečno ñaña allpon ta'tečno ñeñt allo'tsa'yen ama't allohuanen pats allpon ñeñt otenet la tercera parte.

⁸ Allempoña po'psheñeñ mellañoñeñ ñeñt puepañpa' o' poctorerrerr. Poctora'huerrtserrpa' orrtterrerr atet ñerra'm ñeñt nanac atarr aspenet. Ñeñtña' cha huorten. Ñeñt aspenetpa' ahupore'taretta sa'po. O'ña chap oñopa' erraparenña oñpa' puenasa errasats allohuanen oñ ñeñt allpon otenet la tercera parte. ⁹ Ñaña ñeñt allpon yečhetsa all oño erraparen, e'ñe colla'hua, allpon colla'huatsa ñeñt otenet la tercera parte. Ñaña ñeñt allohuen botečno ñeñt chope'chyets all oño erraparen e'ñe chenca'huet, allpon chenca'huatsa ñeñt otenet la tercera parte.

¹⁰⁻¹¹ Allempoña po'psheñeñ mellañoñeñ ñeñt poema'pañpa' o' poctorerrerr. Poctora'huerrtserrpa' orrtterrerr ranto ento ñeñt añecmuen atarren. Shora'nerrerr cha huerarere'tnena. Chap allo'tsa'yen po'ñesočno ñaña allot potayen oñečno erraparen arr patsro. Ñeñtpa' arrohua chap ñeñt allpon otenet la tercera parte. Ñeñt rantopa' añ pa'so'cheñ Peshrrenñ. Chap allo'tsa'yen oñečno ñeñtpa' cha a'pesherrtuosan oñečno erraparen arr patsro. Ñeñtpa' allponohua a'pesherrtatan

oñechno ñeñt allpon otenet la tercera parte. Oñ po'peshrroña ñeñtña a'cllatue'ña shonte' acheñenesha' all.

¹² Allempoña po'psheñeñ mellañoñeñ ñeñt puepa'tatseñ o' poctorerrerr. Poctora'huerrtserrpa' allempocma çhote' errotetyesa atsne' ñaña arrorr ñaña rantochno, o' attaña checmetyeset. Ñetpa' allpon checmetyesets ñeñt allpon otenet la tercera parte. Ñeñt atto çhoyo'tenet yeño ñaña tsapopa' o' huañ atsnomyeset. Ñeñt allpon o' huañ çhoyo'tyeset yeño ñaña tsapo ñeñtpa' allpon otenet la tercera parte.

¹³ Allempoña napa' o' alla necuererrpa' allñapa' nenterrerr po'psheñeñ mellañoñeñ ñapuet all anoma'mtena ento allpononet. Allñapa' ne'muerrerr ñeñt atet eñosnom huomenc. Panoma'mteño'tpa' atet oten:

—Llequëñtsa-bee ñeñt allohuenacop ñeñt yeçha'yetsa aña patsro. O' mameshaña o'ch poctora'huerrerr po'poñ ma'psheño'mar mellañoñeñ.

9

Atto o' e'ñe ma'psheñaña mellañoñeñ ñeñtcha' poctorerrtserr e'ñe allohuanen

¹ Allempoña po'psheñeñ mellañoñeñ ñeñt pa'mnareñpa' o' poctorerrerr. Poctora'huerrtserrpa' nañapa' all nenterrerr ranto atarremñ ñeñt shora'nmats entot o' e'ñe çhap patso e'ñe atet orrtosa ñerra'm mellañoñeñ. Ñeñtña mellañoñeñ allñapa' apet paterr llave alloch toran allo e'tamñsaret arrotot ñeñt atarr o'pononet arrototena pats.

² Nañapa' o' toramñsan arrotot. Ñeñtña arrotot allotña çha'nom amos shonte' atet ñerra'mrrate' çho chemue'chenet. Chepoten amos çha muene' emayenan ama't atsne', erracmañen chepoten, e'ñe chorren amos.

³ Atto atarr chepoten amospa' çha'nmaçha'tatan ñaña allot ahuañchenclla nanac shonte', pamçha'tyesa erracmañen patso. Ñehua, ñeñt ahuañchenclapa' o' apet attoch epotaña atet pena ñerra'mrrate' yellas ñeñt atarr epotañ. ⁴ Ahuañchencllañapa' atet otaretta amach errot patstano ta'te' ñeñt patso'tsen, amach errot patstano ñaña tsach. Ama't ñaña allohuen ñeñt pa'namen chopyets aña patsro amach errot patsche. Añcha'ña errot pa' acheñ ñeñt ama ayato'ma'tareteyaye Yompor pueyot-saparo.

⁵ Ama muenacheto o'ch muetsan ama't patra acheñ allempo. Ñeñt ahuañchenclapa' aña oteñet o'ch muerotchtatan acheñ amnarña arrorr. Ñeñtpa' atetcha' atserrpanet atet atserrtena yellas ñerra'm çho epota'y. ⁶ Allempoña acheñenesha'pa' e'netcha' attoch rromuet tarraña amach errotentot rromueto. Ama'tcha' atarr ya'ñameta're'tenetañpa' amach rromueto.

⁷ Ñeñt ahuañchenclla atet orrtena ñerra'mrrate' cahuall allempo o'ch natyeñet attoch quellarachet. Poñpa' e'ñe atet orrtena ñerra'm çhoyo'mets ñeñt orotaten. Pa'clloyotpa' e'ñe atet orrtena ñerra'mrrate' acheñ. ⁸ Eche't, pue'çhpa' añecmuen atet ñerra'mrrate' coyanesha' pue'çh. Pa'spa' e'ñe atet orrtena ñerra'mrrate' ma'yarras. ⁹ Pa'tallpa' e'ñe atet orrtena ñerra'mrrate' asertall ñeñtcha' moñenaya, amach etsoto allo saneñet. Ñaña ahuañchenclla ñerra'm esempo anomçhenapa' e'ñech atet e'morrtena ñerra'mrrate' shonte' carro ma'moretets allempo matateñ cahuall huomenc attoch çhapuet allcha' quellaroset.

¹⁰ Pa'sme'llpa' e'ñe atet orrtena ñerra'mrrate' yellas pa'sme'll allot epotañtena. Pa'sme'llo'tsen puepotañer allot atserrpenan acheñenesha'.

E'ñech amnarnña arrorr muerochtatenanet. ¹¹ Ñeñt ahuañchenlla ñetpa'cho'ña añ pa'mcha'tareter penet mellañoñeñ ñeñt amcha'tarettetsa all allo'tsen arroroñ ñeñt atarr arroroñ o'pononet pats. Mellañoñeñ ñeñt pa'mcha'tareter pen ahuañchenlla, hebreyachopa' añ socheñet Abadón; griegaçhoñapa' añ socheñet Apolión. Ñeñt epo'mar so'chñets ya yeñoño ñeñt yoten amtsanatañ.

¹² Allempopa' met ñeñt ñanom ñeñt allcatañtetsa, tarraña señochepa'ch palltena po'poñ epa ñeñtcha' allcatañterrtterr.

¹³ Allempoña po'psheñeñ mellañoñeñ ñeñt po'pechapueñ o' poctorerrerr. Poctora'huerrtterrpa' naña allpa' ne'muerrerr ñoñets ñeñt e'morrtetsa altar pa'tatso'marot po'ucoroñ. Añ altar ñeñt ayeçhcataret oro, ñeñtpa' e'ñe ñehuapo'e'tsen Yompor po'conaño. ¹⁴ Ñeñtña ñoñetspa' atet otenan mellañoñeñ ñeñt po'pechapueñ ñeñtara ñeñt o' poctora'huerrerr. Ñeñtña ñoñetspa' atet otenan mellañoñeñ:

—Te'pa' o'ch pepyamper mellañoñeñnesha' pa'tatssheño'mar ñeñt ehucarettetsa all ñeñt atarr po'ñeso ñeñt pa'so'cheñ Eufrates.

¹⁵ Ñehua, ñeñt mellañoñeñ pa'tatssheño'maretpa' añecop añño'tarettenet all atomat o'ch çhap allempo onañchareñ allempochña ñetpa' o'ch a'cllatueret shonte' acheñenesha'. Ñeñt ora allpon acheñenesha' ñeñt yeçha'yetsa arr patsro allponcha' colla'huerrtsa ñeñt allpon otenet la tercera parte. Te'pa' o' e'ñe etsotua ñeñt atet onañchareñ ñeñt hora, ñaña ñeñt yetro, ñaña ñeñt arrorr-ro ñaña ñeñt chararo. Allempoña ñeñt mellañoñeñ pa'tatssheño'marpa' o' a'rroyaretterret. ¹⁶ Ñeñt mellañoñeñ pa'tatssheño'mar ñetñapa' ahuanmet po'solltarer ñeñt monta'yesnetsa puecahualloro. Nañapa' ne'muen allpon ñeñt atet oten ñeñt allo'tsa'yen. Ñeñtpa' atarr aton shonte'. Ñeñt che'muechets all, allo'tsen doscientos millones solltarnesha'.

¹⁷ Ñeñt atet gatennet all nent ñaña cahualleçhno, ñaña nent ñeñt atet orrtena ñeñt montenaya. Puesomapotpa' añ chorra'yenet asrom. Patanta'tetspa' añ chorra'yenet tsamamuenare', po'potantañpa' añ chorra'yenet asollemamuenare', po'potantañpa' añ chorra'yenet shemashremamuenare'. Ñaña cahualleçhno poñpa' atet orretyena ñerra'mrrate' ma'yarroto'. Puenamoñapa' allot çha'nen tso' huorte' epuet ñaña amos epuet ñaña ñeñt huoretnets shemashrepñeñen ñeñt otenet azufre. ¹⁸ Añña ñeñt çha'nets puenamot atsetaren ma'po'marpa' ñeñtpa' ñeñtña amtsañtetsa ñeñtcha' a'cllatuerre' shonte' acheñenesha' ñeñt allpon otenet la tercera parte. ¹⁹ Ña po'huamenc allo muetsenan acheñenesha' ama puenamotayaya atet peno, añña ama't pa'sme'llotpa'cho'ña amtsañtena. Tarro'mar pa'sme'llpa' shechpeto' ñeñt poso'sme'll pen. Ñeñtpa' alloña atserrpenan acheñenesha'.

²⁰ Allpon acheñenesha' ñeñt qeshpatsa ñeñt ama muetsanato ñeñt amtsañtetsa ñetñapa' attera atpare'teñet Yompor. Ama cotape'cherreto cohuen attoch queçhpuet ñeñt atet pats'e'tyenet sosya'tsañ. Ñetpa' attera mueneñet o'ch ma'yochyet oneñeçhno ñeñt ama cohuenayaye. Ñaña ñetpa' attera mueneñet o'ch yeçhcatatse'tyeset pa'namen ñeñtcha' ma'yochenet atet ñerra'm oro ñaña quellema't, ñaña bronce, ñaña mapue', ñaña tsach. Allohuenet ñeñt yeçhcatyenet ñeñtñaña po'yomporer penet, ñeñtña ma'yochenet ama't ama enteno, ama't ama e'mueno,

ama't ama chope'cheno. ²¹ Ñaña ama que'chpueneto ñeñ't atto muet-sanna'tenet ñaña atto tsam'nannenet ñaña atto nanac cañoresha'tenet ñaña atto etatsre'tanna'tyenet. Ora añe'chnopa' alloña ama cohuenaye' cotape'cheneto.

10

Atto Juanpa' entan puesheñarr mellañoñeñ ñeñ't orrene' po'librotoll

¹ Allempoña napa' o' alla nenterrerr po'psheñeñ mellañoñeñ ñeñ't atarr ahuamencattetsa. Ñaña'p' sohua'nena entot, e'ñe oso't sohua'mpena. Poñoñ'ñapa' añ arca'tam'pesnene' ayon. Pa'clloyotñapa' e'ñe atet'poptena ñerra'mrrate' atsne' choyo'tetsa. Pa'tac pa'chepohuen ora atet'ortena ñerra'mrrate' tso' huortets enonet. ² Sohua'nenapa' orra'nenan po'librotoll. Ñeñ'tña librotollpa' e'ñe cohuen atoraret' ñeñ't rremuen potot. O'chap patsopa' pa'tacña po'cohuenrot'pa' tomos oño, po'ptecañña ñeñ't pue'hcóterot'pa' tomos patso. ³ Allempoña tomospa' rranosa huomenc. Po'ñoñ'ñapa' e'ñe atet' e'morrtosa ñerra'mrrate' ma'yarr tecoretsa. Atto rranosapa' e'ñe atet' e'morrtena ñerra'mrrate' tecore' anapuene' ñeñ't can'ch'rroche'tats tecorena. ⁴ Allempoña e'morrtta ñeñ't can'cherr' tecore' napa' nemneñeñ o'ch nequellcañ ñeñ't atet' ne'm' tecore', tarraña na allempopa' ne'muerrerr ñoñets all e'morrtena ento. Ñeñ'tña ñoñetspa' atet' otenen:

—Amach pequellcatsche ñeñ't atet' pe'mueñ' tecore' chochña pa'nasocha.

⁵ Allempoña añ mellañoñeñ ñeñ't tomosets oño ñaña patso, ñaña'p' echantosan pot enonet po'cohuenrot. ⁶ Allña eñosospa' e'ñe huomenc nosan po'ñoñ' Yompor pa'so'chño, ñeñ'tpa' atet' otos:

—Yompor ñeñ't ama arromñateshayaye ñeñ't ye'chcate' enet ñaña ora allpon ñeñ't allo'tsa'yen pue'ntaño, ñaña ñeñ't ye'chcate' pats ñaña ora allpon ñeñ't allo'tsa'yen po'patsño, ñaña ñeñ't ye'chcate' oñe'chno ñaña ora allpon ñeñ't allo'tsa'yen pueye'chcatareso, ñaña'p' entenen ñeñ't atet' noten te' ñeñ'tpa' e'ñech po'ño'ch atet' perra. Te'pa' amach alla yecuame'tere'te atomatuanen. ⁷ Ñerra'm esempoch poc-torrerr po'psheñeñ mellañoñeñ ñeñ't po'can'ch'rroñpa' allempochña e'ñe etsotuerra Yompor pocta'ña ñeñ't ama e'ñeye' eñot'pahuoyaye ama't ahuatoteñ ama't allempo ñanom eñotatyesane't ñeñ'tcha' a'm'ta'yesaye't po'ñoñ' ñeñ'tara ñeñ't nanac torra'yestse't ñocop. Allohua ñeñ't atet' eños mellañoñeñ.

⁸ Allempoña napa' o' alla ne'muerrerr ñoñets ñeñ'tara ñeñ't atet' ne'm' ñorra' ñeñ't e'morrtetsa pue'ntaño't, alla oterrerr:

—Te'pa' o'ch peponem'ya mellañoñeñ ñeñ't tets oño ñaña patso o'ch pechtosñañ potot po'libro ñeñ't e'ñe cohuen atoraret'.

⁹ Ñaña'p' ahuen allo'tsen mellañoñeñ, ne'chap ñeshopa' notos:

—Te'pa' o'ch pa'puen pelibrotoll.

Ñaña'p' atet' oten:

—Añca'ye peyore o'ch perre'. Penamo'tpa' atarrcha' nanac puetsarr pe'm' atet' ñerra'm pets po'moñ, tarraña ñerra'm o'ch chap pa'topa' atarrcha' pesherr pe'm'.

¹⁰ Allempoña napa' o' nechtosñañ po'libro potot'pa' o' nerre'. Allempo nerruepa' nenamo'tña atarr puetsarr ne'm' atet' ñerra'm pets po'moñ

tarraña allempo chap natopa' atarr pesherr ne'm. ¹¹ Allempoña napa' o' alla oterrneterr:

—Te'pa' añ pocte' o'ch alla peserrpare'terrerr ñeñcha' atet etsotaterr Yompor esempohuañen. Añcha' peserrpare'tyes ñeñcha' atet perra shonte' pa'namen acheñenesha' ñaña atetcha' perra pa'namen anetso'marnesha' ñaña atetcha' perra pa'namen mereñtsorečno ñeñt eñosyets po'poñe'ttsoçma ñoñtso ñaña atetcha' perra pa'namen añcha'taretečno.

11

Atto epsheña ñeñt pueyochresha' pen Paretspa' ñetcha'ña eñertset Yomporecop

¹ Allempoña napa' apnet tepapets ñeñt atarr allpocha'p e'ñe atet ñerra'm carrots. Ñaña allpa' atet otnet:

—Te'pa' o'ch ahuep o'ch petpueññaña' Yompor pa'paquell allo, ñaña altar ñeñt allo'tsen. Ñaña o'ch pe'ñotena' errosheñate' ñeñt ma'yochetsa all. ² Tarraña amach petpamñsatscheña ñeñt a'yote'tsa'yen cha'petot. Tarro'mar all ñetpa' aparettetcha' po'poñ acheñ ñeñt ama ame'ñetso. Ñetña'apa' atmama'terretcha' all anetso ñeñt anaret Partsoçop. Pa'tatsoch çharranña puechena epña arorr allponmatcha' a'sosyateñet all ñeñt anarettetsa Partsoçop. ³ Ñaña allempopa' o'ch nemñe epsheña ñeñt neyochresha' nepen. Nach ahuamencat pahuet attoch a'potet ñeñtcha' atet perra esempohuañen. Mil doscientos sesenta yet allponmatcha' serrpare'tennanet neñoñ. Puellquëñoçet chorretcha' pa'shtamashe'm. Arrpa' allohua ñeñt atet otnet all Yompor pue'ntañ.

⁴ Ñehua, añ epsheño'mar ñeñtcha' eñerrets Yomporecop ñetpa' atma'ntatarettenet epcha olivoch ñaña epa all orratenet huerare ñeñt e'ñe tomçhets all Yomporesho, ñeñtara Yompor ñeñt pomnaren pohuene' allohuen acheñenesha' arr patsro. ⁵ Ñaña añ epsheña ñeñtcha' eñerrets Yomporecop, ñerra'm ama't esesha ñeñt muenene' o'ch errot pet añ epsheña, ñetña'apa' puenamoçpa' o'ch cha'nmattet tso' huorte' ñeñtcha' e'nue' ñeñt e'moñe'tenahuet. Ñeño'mar yeñoteñ ñerra'm esesha' e'moñe'tenahuet, ñetña'apa' e'ñech rromhuet poçtactma. ⁶ Ñaña añ epsheña ñeñtcha' eñerrets Yomporecop, ñetpa' atarrcha' ahuamencatet. E'ñe ñet po'huamencoç epatare'teñet o' entot attotcha' ama huateno e'ñech allponmat eñorenet Yomporecop. Ñaña e'ñe ñet po'huamencoç oñña'apa' o'ch a'pnaseret errasats. Ñaña e'ñe ñet po'huamencoçet o'ch çhapterret añ arr patsro pa'namen ñeñtcha' amtsañterrtsa. Ama't esempo allempo atet muenenet ñet, allempocmach atet pet. ⁷ Tarraña ñerra'm esepoch e'ñe e'nuet ñeñtcha' allpon eñoret arr patsro, allempoña'apa' o'ch cha'nom ñaña ñeñt berrma'ttetsa ñeñt atarr bellac. Arrotcha' cha'nom arrorotot ñeñt atarr o'pononet arrorottena pats. O'chña' cha'nompapa' o'ch quellarosana añ ñeñt epsheña ñeñtcha' eñerrets Yomporecop. Ñeñt berrma'ttetsa ñachña ganatsa o'ch muetsana añ ñeñt epsheña. ⁸⁻⁹ Añña epsheña ñeñt amtsaretpa' attach o'shshe'muet toño alleçma chopeñe'çhen allohuen acheñenesha'. E'ñe ma'pamuet ñaña po'poñ puehmet yet allach o'shshe'muena all atarr anetso, ñeñtara anetser Jerusalén all corso'tañpset Yepartseshar Jesucristo ahuat.

Ñeñña anetserpa' ñato' o'ch netma'ntacha ñerra'mrrate' ñeññ atet pete't anetso Sodomā ñaṃa anetso Egipto. Añña epsheña ñeññ amtsaret attach o'shshe'muet all amach esesha' muenateto o'ch pampuet. Allñapa' allcha' huachena shonte' pa'namen acheñenesha' ñeññcha' cohuanrrortene', shonte' pa'namen mereñsorečno ñeññ eñosyets po'poñe'ttsocma ñoñtso. Shonte' pa'namen anetsočno allot huachena. ¹⁰ Acheñenesha' ñeññ yecha'yetsa errañaren arr patsro ñetñapa' o'ch coshame'tañpesyet añ epsheña arromñat. Atarrcha' nanac cosherret. Pocsheñeshoñetña ñetpa' o'ch es apanna'tyeset e'ñe atfa. Ñetpa' añecopcha'ña atarr coshenet tarro'mar o' rroma añ epsheña ñeññ atsrre'moçhen entenet ñeññ yore'tatenahuet po'chñaret e'ñe pueserrpare'teñoñet Yompor po'ñoñ. ¹¹ Allempoña o'ch met ma'pamuet ñaṃa po'poñ pueshmet yet, añña ñeññ epsheña machayotepa'tcha' alla tanterret tarro'mar Yomporña alla tantaterre'. Allohuen acheñenesha' ñeññ cohuanrrortene'pa' atarrepā'tcha' nanac yorenet. ¹² Allempoña tanterret epsheño'maret, e'muet ñoñets ñeññ e'morrtetsa atarr huomenc ento. Ñoñetsñapa' atet otenanet:

—Sa'tap arr ento.

Ñetñapa' o'cho' a'tapuet, ospa' ñeñña anmahuet ento. ¹³ Cohuanrrortets ñeññ e'moñe'tenahuetpa' e'ñe allempocmaña pella pats huomenc. Allña anetsopa' shonte' matna't pocoll, allpon otenet la décima parte. Ñaṃa cançherr mil acheñenesha' ñeññ allpon colla'huatsa. Ñeñña allpon queshpatsapa' atarr yorenet. Pueyorñoñetpa' e'ñe allempocma añcha'na'tpo' eñchet Yompor ñeññ pue'ntaño'tsen. Allñapa' cohuentatoñet.

¹⁴ Allempopa' o' metuaña ñeññ puepañ ñeññ allcatañtetsa, tarraña señoche'pa'ch palltena po'poñ paterr ñeññcha' tecma allcatañtatsa ñeññcha' puema'pañ.

Allempoch poctora'huerr mellañoñeñ e'ñe allohuanen allempochña añcha'taretetuerra Yompor arr patsro

¹⁵ Allempoña po'psheñeñ mellañoñeñ ñeññ po'cançhroñpa' o' poctorerrerr ñaṃa. Poctora'huerrtserrpa' entoñapa' atarr huomenc e'morrterrerr ñeññ eñoretsa all ento. Ñeñtpa' atet otenet:

Ñeññ allpon añcha'taretetyetsa arr patsro te'ñapa' o'huañcha' allo'na añcha'taretetnenet tarro'mar ñeññ atto añcha'taretetyenetpa' ñeñtpa' allochña añcha'tareterra Yompor epuet ñaṃa Puechemer ñeññ Cristo. Ñeññcha' atto añcha'tareterra Yomporpa' ñeñtpa' amach ahuaññañterro ama't errponaña.

¹⁶ Allempoña añ ñeññ epoch çharrasheña ñeññ puechetsa pa'tats ñeññ anorrçhets all e'ñe ñet po'conañeto allot sherbeñet Yompor all pue'ntaño, ñetñapa' rrema'rrartenet Yomporeshonet atet ma'yocheñet Yompor.

¹⁷ Ñetñapa' atet otenet:

Pa Yompore ñeñteṓ atarr nanac Partsoṓ ñeñteṓ Yepartseshar yepeneṓ, ñeñteṓ çhocma eñalleṓ ama't ahuatoteñ ñaṃa ñeñteṓcha' alla huerrtserr po'pocheño añe patsro, yañapa' atarr yeparasyosoteneṓ tarro'mar te'pa' o'ch alla ṓo'paterra ṓa pehuamenc atotcha' o'ch alla atarr ṓa'mcha'tareterra.

¹⁸ Shonte' pa'namen acheñenesha', pa'namen anets allo'tsa'yenet, ñet pa'tsrre'mueñoñetpa' e'ñe e'moñe'tuenpet, tarraña te'pa' o' çhap

allempoch pecoñchatuerranet. Ñaña te'pa' o' chap allempo onañhare't añecop ñeñt colla'huetsa ahuatoteñ allempoch peñotatuerranet ñeñt atet pa'yesete't. Añña ñeñt torra'yestse't atto a'mtonapete't peñoñ ñeñt e'ñe peyochresha' pepe't, te'ñapa' o' chap allempoch petsa'tuerranet. Ama't allohuen ñeñt pame'ñaye't pa' ama't ñeñt atarr asherben entyesete't ñaña ñeñt ama asherben entete'te, te'ñapa' o' chap allempoch petsa'tuerranet allohuenet ñeñt pame'ñenaya pa. Ñaña te'pa' o' chap allempoch e'ñe pa'chencatuer allohuen ñeñt a'chencatañtetsa añe patsro.

¹⁹ Allempoña añ Yompor pa'paquëll ñeñt ento'tsenpa' e'ñe cohuen atorarettena. O'ponoña all nentoñ Yompor po'tsapot all chocma añño'tenet ñeñt aquellcare't ñeñt a'poclat Yompor yocop. Allñapa' meratstena, tatsllaren ma'moreten huomenc, pellena pats ñaña atet huechen huomenc.

12

Atto Juanpa' entan puesheñarr coyanesha' ñeñt emaret, pue'maretollpa' ñeñtara Cristo, añyaññapa' mueneñeñ o'ch añyañpes pue'maretoll

¹ Allempoña all pue'ntañopa' all orrtena ñeñt ama't ahuata ama't puesheñarrofeyapa' ama yentare. Ñeñtpa' ñeñtcha'ña yeñotaterre' ñeñtcha' atet perra esempohuañen. Allñapa' all orrtena puesheñarr coyanesha'; añ po'cashe'm pen atsne'. Pa'rrpoñapa' allo'tsen ñaña arorr. Poñoññapa' echoyo'met. Po'choyo'mopa' all orrtena charra' ranto puechena epa. ² Ñeñña coyanesharpa' a'chomen, o' chen allempoch eñalletatan pue'mar. Atto atsotenana pue'marpa' cha rranare'tena, atarr allpatateñ pue'mar. ³ Allempoña all pue'ntañño all orrtena po'poñ ñaña ñeñt ama't ahuatapa' ama yentare. Ñeñtpa' añ orrtetsa añyañ ñeñt atarr amcha'nochen. Ñeñt añyañpa' atarr añecmuen ñaña atarr tsama't orrtena. Poñpa' cancherrmāga. Cancherrmāgo'mar poñpa' e'ñe echoyo'metareroche'. Ñaña po'ucorpa' allo'tsen charra'. ⁴ Pa'sme'll ñeñt chetare'tnen alloña tarra'huanenanña shonte' rantochno e'ñe a'shore'tuanen patso. Ñeñt allpon ranto ñeñt ento'tsen, allpon a'shore'tuaret ñeñt otenet la tercera parte. Ñeñña añyañpa' alla tomos e'ñe coyaneshesho ñeñt atsotenaya pue'mar all cohueñ ñerra'm o'ch eñalletatan pue'marpa' ñach añyañpse'. ⁵ Allempoña coyanesha'pa' o' eñalletatan pue'mar ñeñtpa' asheñorr. Allempo eñalletua ñeñt asheñorroñollpa' e'ñe allempocma a'tapachet Yompor po'conañño tarro'mar ñapa' ñach anaretterrtsa ñeñtcha' amcha'taretterrtsa allohuen pa'namen acheñenesacop. E'ñech po'yorochenñoñ amcha'taretterranet, atet ñerra'mrate' ñapa' a'sreperet o'ch amcha'nochtana'terranet. ⁶ Allempoña coyanesha'pa' allorocma o'yeta o' chap allapa' all amarato. Allña Yomporpa' e'ñe cohuen añño'tatoñ allcha' cohuanñpeñet allcha' rrateñet allponmat yet ñeñt otenet mil doscientos sesenta yet.

Atto quellareñet Yompor pue'ntañño

⁷ Allempoña quellareñet Yompor pue'ntañño. Ñeñt pa'mcha'tareter pen allohuen ñeñt e'ñe cohuen mellañoñeñnesha'pa' añ pa'so'cheñ Miguel. ⁸⁻⁹ Miguelñapa' all quellara po'mllañoñeñnesharohuen. Quellareñet añyañ, añyaññapa' o' quellara ñaña pueyochreshohuen. Miguelpa'

chetanna'tet parro epuet añaña all Yompor pue'ntaño. Ñehua, ñeñt pueyochresha' pen añaña ñeñtpa'cho'ña mellañoñeñsha' tarraña ñeñt mellañoñeñpa' ama cohuenayaye. Tarraña añaña atto quellaran Miguelpa' ñapa' ama gano. Ñeño'marña añaña' huapore'chet entoť pueyochreshohuen a'shoraretterret patso. Attoña ahuapore'tarettaña añaña ama't atarr nanac ancha'nocheneñ. Ñehua, añaña'pa' ñeñt shechep ahuatoteñ ñeñfara yoten oneñeť ñaña ñeñt otenet Satanás ñeñt atarr ashcañtetsa ora erraparen aña patsro.

¹⁰ Allempoña napa' o' alla ne'muerrerr po'poñ ñoñets ñeñt atarr e'morrtetsa huomenc all Yompor pue'ntaño. Ñeñt ñoñetspa' atet oten:

—Te'ñapa' po'ñočh o' čhap allempoch queshpa'huerra allohuen acheñenesha' ñeñt pueyochresha' pen Yompor, tarro'mar o'ch alla o'paterrana po'huamenc e'ñe poctacma o'ch alla ancha'taretterra ñapueť epuet Puechemer ñeñt Cristo ñeñt nen ña ñeñtcha' ancha'tarettapretenaya. Añ oneñeť ñeñt čhocma atta toma'tam pesyene' masheñneshačhno all Yomprosho yeto ama't ñaña tsapome'tets ñeñtñapa' o' ahuapore'taretta. ¹¹ Ñeñt masheñneshačhno ñeñt ame'ñenaya Yompor, ñetñapa' o' e'ñe a'mchechueret oneñeť ñeñt toma'tam pesyenahuet e'ñe atta. Añ a'mchechatterre' ñeñt atto Cristo rroma, ashataretta po'rراس ñeñt toma'ntenaya Carrnero ñeñt muetsete't ochñartsocop. Ñaña añ a'mchechatterre' ñeñt atto masheñneshačhno čhocma eñosyenet e'ñe cohuen ñeñt atet pena Cristo po'cohuenña. Ama't amuerochtataretetyenetpa' ñetpa' ama quečhpueñeto atto eñosyenet e'ñe cohuen Cristocop, tarro'mar ñetpa' ama mecha'teneto ama't mamesha o'ch rromuet e'ñe pame'ñeñofet Cristo. ¹² Atarr cosheñets Yompor pue'ntaño allohuenacop ñeñt allo'tsa'yen. Tarraña atarr llequēñets allohuenacop ñeñt yečha'yetsa aña patsro ama't ñaña ñeñt oño'tsa'yen. Tarro'mar oneñeťpa' o' sohuam̄perranet e'ñe pa'tsrre'mueñesha'. Ñapa' eñoteñ e'ñech mameshapa' o'ch alla ahuapore'taretterrerr.

Atto añaña'pa' attera cotare'tenan coyanesha' ñeñt o' eñalletatuan puechoyor

¹³ Allempoña añ añaña ñeñfara oneñeť o' eñota ñapa' o' ahuapore'taretta entoť, ña pa'tsrre'mueñoťpa' o' alla cotare'terranerr coyanesha' ñeñt o' eñalletatuan puechoyor asheñorroťoll. ¹⁴ Tarraña coyanesha'pa' allempo cotare'terrerr añaña'pa' ñeñtña coyanesha'pa' o' apet eppa'ya pa'pue' ñeñt atesha' contor pa'pue'. Ñeñtpa' alloch anomam̄psana po'yalloť ñeñfara añaña o'ch sa'nem o'ch čhap bačhayo all amarato all añaño'teññañet ñocop e'ñe cohuen allcha' cohuan̄peñet. E'ñech ma'pa char ñaña po'poñerrerr puešmet char, ñeñtpa' allponmatcha' rrachet all. ¹⁵ Allempoña añ po'yalloťpa' e'ñe puenamot čha'nmatan shonte' oñ atet ñerra'mrrate' po'ñes apellchetsa. Ñapa' čha otapañ ñeñtcha' rremuerraya' coyanesha' ñeñt cotare'ten attoch a'ño'shach. Tarraña ñeñtpa' ama attetache. ¹⁶ Ama't patspa' yenpan coyanesha', attoña tara'nom all esha'tanña oñ e'ñe masohua ñeñt allpon čha'nmat po'yalloť puenamot. ¹⁷⁻¹⁸ Ñeñtña atarr atrsrre'mate'ña añaña, ello alla atarr e'moñe'terranerr coyanesha'. Allempoñapa' ahuo' allo'tsa'yen po'potantañ coyanesha' puechoyoresha' o'ch quellaros Janet

ñamet. Tarro'mar ñetpa'cho'ña chocma ame'ñeñet Yompor po'ñoñ ñeñt atet anaret ñaña chocma coteññañet Jesucristo poctapña.

13

Atto Juanpa' entan berrma't ñeñt atarr amcha'nochen ñeñt cha'nets oñoi

¹ Allempoña napa' natomos sa'patopño, allñapa' nenterrerr berrma't atarr amcha'nochen ñeñt cha'nmats oñoi. Poñpa' cancherrmāga, po'ucorpa' charra'. Pate'tets po'ucorpa' e'ñe echoyo'metoche'. Puenāga'ttso all aquellcaret sochatse'teñets ñeñt pa'namen sosya'tsañ allo achmāre'teñet Yompor. ² Ñeñña berrma't pue'moquer e'ñe atet ñerra'mrate' ma'yarr tarraña pa'tacñapa' e'ñe atet ñerra'mrate' orranatec. Puenampa' e'ñe atet ñerra'm ma'ñorenā. Añyaññapa' ñeñt apue' po'huamenc, ap ñaña llesens attoch amcha'nochtaprecha all po'conaño. ³ Puenāgarr poñpa' all orrtena cha atserrpena nanac huomenc cha mettaguē ñeñtcha' muetsayēñ tarraña ama rromo alla correrra. Ñeñto'marña allohuen acheñenesha' arr patsro ñetpa' atta cohuanrrorteñet cha otapuetañ ñato' chach rroma, tarraña ama rromo. Ñeñt atto ama rromopa' acheñenesha'ña arr patsro ñeñtña ame'ñatenahuet. Ñetpa' otenapuetañ ñato' ñeñte'ña Parets. ⁴ Ñeñto'marña acheñenesha' ma'yocheñet ma'yarrma't. Ñetpa' atet otanna'tyeset:

—Ama eñalle po'poñ ñeñt nanac ahuamencat atet ñerra'm añ ma'yarrma't ñeñt yenten. Ama't e'ñe eseshapa' amate' errotent a'mchechachetoña añ ñeñt atarr ahuamencat.

Ama't añyañpa'cho'ña ñeñt ma'yochena acheñenesha' tarro'mar añyañpa' ña ahuamencat pe' ma'yarrma't.

⁵ Añyañpa' muenatenan ma'yarrma't o'ch ommo'chatse'tyesa. Pommo'chatse'teñoipa' o'ch achmāre'tenan Yompor. Ñaña muenatan ma'yarrma't o'ch amcha'taretta pa'tatsoch charrama ñaña puechena epña arrorr. ⁶ Atet pa' ma'yarrma't achmāre'tenan Yompor, sochatse'teññañ pa'so'cheñ. Ñaña Yompor pa'paquell ñaña allohuen ñeñt allpon allo'tsa'yen pue'ntaño e'ñe achmāre'tueñ. ⁷ Ñaña muenateñ o'ch quellaran ñeñt pueyochresha' pen Parets. Ñaña muenateñ o'ch ganana Yompor pueyochresha'. Ñaña muenateñ o'ch amcha'taretta allohuenacop ñeñt pa'namen acheñenesha', allpon ñeñt pa'namen mereñtsor ñeñt e'ñe eñosyets po'poñe'ttsochma ñoñtso ñeñt ora allpon allemeñ anetso'mar. ⁸ Ora allohuen acheñenesha' ñeñt añe patsro'tsa'yen añach ma'yochenet ma'yarrma't tarro'mar ñeñt acheñenesha'pa' ama aquellcareteyayeto pa'so'cheñ Cristo po'libro all aquellcattena allohuen ñeñt corretsetach ñeñt ame'ñenaya Cristo ñeñt amtsarettatsa ochñartsocop atet ñerra'm carrnero. Ahuat allempo errete' ayeçcattaretta pats, Cristoña po'libropa' all aquellcaret so'chñetsochno attochña ñetpa' corretsetach.

⁹ Ñerra'm esesha' e'mñotene' añ ñoñets, çhaponēpa'ch pueyoçhro ñeñt atet yeçhateney añ ñoñets. Ñeñt ñoñetspa' atet oten: ¹⁰ Ñerra'm esesha' rromanatene' po'potantañ attoch yottamñpsatanet, ñetpa'cho'ña ayotamñpsaretterretcha'. Ñaña ñerra'm esesha' muetsanatene' po'potantañ espado, ñetpa'cho'ña amtsaretterretcha' espado. Ñeñto'mar añ ñeñt

poctetsa yocop e'ñe yeyemteñoŧ Yompor o'ch ya'huanten acoŧoteñ ñerra'm es yehuapoya, allohueney ñeñŧey o' pueyochresha' perrey Parets.

Atto Juanpa' entan po'poñ berrma't ñeñŧ cha'nets o'ponoŧ patsoŧ

¹¹ Allempoña na allpa' nenterrerr po'poñ ñeñŧ berrma'ttetsa. Ñeñŧpa' arroŧ cha'nom o'ponoŧ patsoŧ. Ñeñŧña' e'ñe epa po'ucor atet ñerra'm carrnero po'ucor, tarraña ñeñŧpa' atarr añcha'nochen eñen e'ñe atet eñen ñerra'mrrate' añaña eñoretsa. ¹²⁻¹³ Ñapa'cho'ña atarr añcha'taretta e'ñe atet añcha'tarettena ma'yarrma't ñeñŧ ñanom nent ñeñŧ cha'nmats oñoŧ. Allña'pa' añcha'tarettapretenana ñeñŧ ma'yarrma'ttetsa all. Ñeñŧ cha'nmats o'ponoŧ patsoŧ ñeñŧña'pa' muenatenan allohuen acheñenesha' ñeñŧ aña patstro'tsa'yen o'ch ma'yochyet ñeñŧ ma'yarrma't. Ñeñŧara ma'yarrma't ñeñŧ correrrtsa e'ñe mamecma allempo mettaguën. Ñeñŧ atto mettaguën ñeñŧcha' muetsayeñ tarraña ñapa' ama rromo. Añ berrma't ñeñŧ cha'nmats o'ponoŧ patsoŧpa' ñerra'm esempo allo'tsen parro epuet ma'yarrma't ñaña'pa' eñall attoch orrtatenan acheñenesha'cop pa'namen ñeñŧ ama puentareto ama't ahuata. Attoña a'shoran entoŧ huorte' tso' ñeñŧña tso' huorte'pa' o' e'ñe chap patso allña'pa' cohuanrrortatan shonte' acheñenesha'. ¹⁴ Ñeñŧña'pa' allo shequënan shonte' acheñenesha' ñeñŧ aña patso'tsen. Ñeñŧo'marña ñerra'm allempo otenan acheñenesha', o'ch seyeŧcat ma'yarrma't, ñetña'pa' e'ñech pocte' enteñet. Añ ñeñŧara ma'yarrma't ñeñŧ metto'ten espada tarraña ñapa' e'ñe mamecma o' alla correrra. ¹⁵ Aña berrma't ñeñŧ cha'nmats o'ponoŧ patsoŧ ñeñŧña'pa' muenateñet o'ch o'rrerratan ayeŧcataret ñeñŧ toma'ntatenet ma'yarrma't. Allochña'pa' attoch eñorana'tanet pueyeŧcatar. Ñaña ma'yarrma'tpa' atet nanet po'ñoñ, ñeñŧpa' atet oten: Ñerra'm esesha' ama ma'yochenaye ayeŧcataret muetsanachetepa'ch. ¹⁶⁻¹⁷ Elloña'pa' oterranerr acheñenesha':

—Te'pa' o'ch seyaco'mta'tyesa sotoŧ secohuenrot amapa' arr seto'mo'mar. Allcha' sena'yeson neso'cheñ amapa' sena'yeson ñeñŧ nenúmero nepen. Atet patan allohuen acheñenesha' ama't ñeñŧ ama esoshe'mayaye acheñ, ama't ñaña ñeñŧ atarr sherbets, ama't ñaña acheñ ñeñŧ atarr eçllayoret, ama't ñaña ñeñŧ atarr huocchañetets, ama't ñaña acheñ ñeñŧ e'ñe cohueno'tsen, ama't añ acheñer ñeñŧ ataruasataret e'ñe atta. Allohuen acheñenesha' ñeñŧ ama ayaco'mta'tarete all neññañet ma'yarrma't pa'so'cheñ amapa' ñeñŧ po'número pen ma'yarrma't, ñetña'pa' amach errotenoŧ es pomueneto ñaña amach errotenoŧ es rañeneto ñeñŧ muenenet ñet. ¹⁸ Ñehua, ñeñŧ allpon po'número pen ma'yarrma'tpa' ñeñŧpa' allo'tsen seiscientos sesenta seis. Ñeñŧ número añ toma'tena pueheñarr acheñ pa'so'cheñ ñeñŧcha' ñanom orrterrtsa tsapaonet. Ñerra'm esesha'ch atarr es eñoterrets eñoterrñañetepa'ch pa'so'cheñ ñeñŧ atma'ntataret añ número.

14

Allempo Juanpa' entan Cristo ñeñŧ atma'ntataret Carrnero, all ten Siónaño epuet ñaña shonte' acheñenesha'

¹ Allempoña na cohuerrtsanerrpa' alla nenterrerr Cristo all ten Siónaño. All orrtena e'ñe atet orrtena ñerra'm Carrnero. All

tomchen ñaña shonte' acheñenesha'. Ñeñt' acheñenesha'pa' allo'tsen ciento cuarenta cuatro mil acheñenesha' ñeñt' emchorrenaya Cristo. Ñeñña acheñenesha'pa' e'ñe ayato'ma'tarefoche'. Pueto'muetopa' all na'yeññañet Cristo pa'so'cheñ ñeñt' atma'ntataret Carrnero, ñaña Pompor pa'so'cheñ ñeñtara ya Yeyomporer. ² Allñapa' ne'muen ñeñt' huomenc e'morrretsa, arrot huena entot. Atarr huomenc e'morrtena atet ñerra'm all etsase'tena shonte' oñechno ñeñt' atarr huomenc ma'moretets. Po'ma'moreteñapa' atarr huomenc e'morrtena cha ottena ñerra'm cho tecor-rraren huomenc ñeñt' yoten tatsllare'. Ñeñt' ma'moretets all añepa't ma'moretets ñeñt' shontetsa acheñenesha' all añepa't a'ma'moretenet arpa. ³ Allñapa' cohuentatenet morreñets ñeñt' e'ñe etserra morreñets all Yompor po'conaño. Allo'tsen ñaña pa'tatso'mar ñeñt' berma'ttetsa, ñaña allo'tsa'yen ñeñt' sherbene' Yompor ñeñt' epoch çharra' ñeñt' puechetsa pa'tatssheña. Ama't e'ñe puesheñarrapa' ama eseshaye' yeçhenayeña añ morreñets ñeñt' etserra. Añña eñotene' ñeñt' ciento cuarenta cuatro mil acheñenesha' ñeñt' a'qeshpatarettetsa añe patsrot. ⁴ Ñetpa' ama a'sosyateneto atto yorayeñet coyanesha' tarro'mar ñetpa' e'ñe cohuen correnet. Ñetpa' añ e'ñe cohuen cotenet Cristo ñeñt' toma'tnenaya Carrnero. All ama't erra muene' sen Cristo, ñetñapa' e'ñe chota'neñet cohuen. Ñetpa' e'ñe ñanom a'qeshpatarettet attoña ñetpa' anarettenet atet ñerra'mrrate' ñeñt' ñanom yapueñ Yompor ñeñt' atarr cohuen, ñeñtara o'patena ñaña Cristo ñeñt' atma'ntataret Carrnero. ⁵ Ama't puesheñarrofetapa' ama shequëneto ama't e'ñe mamesha. Ñetpa' e'ñe cohuen orreyenet amach errotenet otteñe'charetterreto ama't ahuata all Yompor po'conaño.

Allempo Juanpa' enterranerr ma'psheña mellañoñeñ ñeñt' eñosyetsnets anomamatot

⁶ Allempoña napa' alla nenterrerr po'poñ mellañoñeñ all anomamtena allpononet enonet. Ñapa' ñeñña serrpare'tatenahuet cohuen ñoñets ñeñt' ama ahuañaño ñeñt' alloch yequeshperra. Añ cohuen ñoñets ñeñt'cha' serrpare'tatan allohuen pa'namen acheñenesha' ñeñt' yeçha'yetsa añe patsro, ama't ora allemeñ pa'namen anetsoçhno ñeñt' pa'namen mereñtsoreçhno ñeñt' eñosyets e'ñe po'poñe'ttsocma ñoñtso. ⁷ Ñeñt' atto anomamtena all, eñosnen, atarr huomenc e'morrtena, ñeñt'pa' atet otnen:

—Senicha'na'chepa'ch Yompor, çhochña secohuentatoñ tarro'mar te'pa' o' çhap allempoch entyesas e'ñe puesheña'tsos errotente' sepa'yena. Te'pa' ñachña sema'yocha ñeñt' yeçcate' enet ñaña ñeñt' yeçcate' pats, ñaña oñechno ama't allot potayen oñ.

⁸ Allempoñapa' alla cota'nererr po'poñ mellañoñeñ ñeñt' puepañ mellañoñeñ. Ñapa'çho'ña eñosnerrerr, ñeñt'ñapa' atet otnom:

—Te'pa' o' ahupore'tareta añ anets ñeñt' atma'ntataret Babilonia ñeñt' nanac atarr anets. Tarro'mar ñeñt'pa' añ yeçhatyenan ora allpon po'poñechno anetsoçhno ñeñt' atarr sosya'tsañechno ñeñt' atet mue-natse'tatyenanet ñet po'chets.

⁹ Allempoñapa' alla cota'huerrerr po'poñ mellañoñeñ ñeñt' puema'pañ. Ñapa'çho'ña eñosnerrerr, po'ñoñpa' atarr huomenc e'morrtena, ñeñt'ñapa' atet otnerrerr:

—Ñerra'm esesha' ma'yochenaya ma'yarrma't amapa' ayečhcatare't ñeñt toma'ntenaya ma'yarrma't, amapa' ñerra'm esesha' muenatenet o'ch yaco'mta'chet ma'yarrma't pueyotsaparo amapa' pueto'mo ayato'ma'taretta, ¹⁰ ñetñapa' a'coñchatare'tterretcha', tarro'mar Yomporña e'ñe po'yoročhenño'pa' ñachña e'ñe coñchatuerrahuet e'ñe poctacma. Tso'pa' ñeñtcha'ña muerochtatuerrahuet ñaña ñeñt epuet huorten tso'pa' ñeñt'pa' atarr shemasher ñeñt otenet azufre. Allcha' a'coñchatare'tterret, allotcha'ña cohueretña allohuen mellaño'feñnaneshachno ñeñt pueyochresha' pen Parets. Cohueretcha' ñaña Cristo ñeñt atma'ntatare't Carrnero. ¹¹ Attoch achamare'tterret, tso'ñapa' chepoten pamosoñ enonet ñeñtñapa' amach ahuañaña'tterro ama't errponaña. Amach huañerro ama't mamesha ñeñt atto a'coñchatare'ttenet ama't ye'to ama't ñaña tsapo. Tarro'mar ñetpa' aña ma'yochenet ma'yarrma't ñaña ayečhcatare't ñeñt toma'ntenaya ña. Ñaña muenateñet acheñ o'ch yaco'mta'chet o'ch noñet pa'co'meto ma'yarrma't pa'so'cheñ amapa' pueto'mo. Arrpa' allohua ñeñt atet ot mellaño'feñ ñeñt anoma'mtetsa eno'mar.

¹² Ñeñto'marña allohueney ñeñtey e'ñe pueyochresha' peney Parets ñeñtey ame'ñenaya Yompor po'ñoñ ñeñt atet oteney ñeñtey e'ñe yemtenaya Jesús, yocopñapa' añ poctetsa o'ch ya'huanta'huen e'ñe aco'pa ñeñt allpon pa'namen es yehuenoya.

¹³ Allempoña na allpa' ne'muerrerr ñoñets arro't huena ento't, ñeñt'pa' atet oten:

—Te'pa' o'ch pequellca' añ ñoñets: “Te'ñapa' atarrcha' cosheñtso'tsa'yen allohuen ñeñtcha' rromayets e'ñe pame'ñeñofet Yepartseshar Jesucristo.” Po'ño'ch atet oten Yompor Puecamquëñ, ñetpa' amesatare'tterretcha'. Te'pa' amach alla torrerrete'te tarro'mar ñeñt allpon o' torra'yenet añ patsro, ñeñt'pa' e'ñe eñotuare't all Yompor pue'ntaño.

Attoch çherr ñeñteño allempoch apçherret narmets ñeñt o' pomella'huen

¹⁴ Allempoña na cohuerrtsanerrpa' nenterrerr os atarr huallama't. Ñeñtña ospa' all anen puešheñarr ñeñt'pa' aña'pa't Jesús ñeñtara Ñeñt Acheñetosets arr patsro. Ñeñtñapa' echoyo'met, ñeñtña po'choyo'm'pa' oro ñeñt choyo'm'tena. Pototñapa' orrenan cochell ñeñt atore'gorro't ñeñt atarr nanac etsotañ ñeñt otenet hoz. ¹⁵ Allempoña Yompor pa'paclo'tpa' cha'nom po'psheñeñ mellaño'feñ. Ñaña'pa' otosan ñeñt anets oso. Po'ño'ñña'pa' atarr huomenc e'morrtena, ñeñt'pa' atet otenan ñeñt anets oso:

—Pamat p'occhello ñeñt pomellets allochñapa' o'ch pa'yapache' tarro'mar o' chap ñeñteño allempo yapçhen ñeñt o' pomella'hua yenarenñ.

¹⁶ Allempoña ñeñt anets oso, ñaña'pa' o'cho' amatan ñeñt o' pomella'huen ora erraparen aña patsro. Ñaña'pa' o' a'yapachan allemateñ ñeñt pomellets aña patsro.

¹⁷ Allempoña cha'nerrerr po'psheñeñ mellaño'feñ Yompor pa'paclo't ñeñt ento'tsen. Ñapa'cho'ña orrenan po'cchell ñeñt atarr nanac etsotañ. ¹⁸ Allempoñapa' cha'nerrerr po'psheñeñ mellaño'feñ. Ñapa' arro't huapa allo'tsen altar. Ñaña'pa' ñeñt ahua'mencattetsa attoch pomnaren penan

tso'. Ñaña'pa' otan ñeñt' occhellet. Po'ñoñña'pa' atarr huomenc e'morrtena, ñeñtpa' atet oten:

—Te'pa' o'ch ñamat ñocchello ñeñt' atarr nanac etsotañ o'ch ñapcha' allo puechma'tets uva ñeñt' aña patsro'tsen tarro'mar o' atarr nanac yen.

¹⁹ Ñeñña mellañoñeñ atet oteñetpa' atetcho' ña. Allempoña amatan po'cchello uva ñeñt' aña patsro'tsen o'cho' a'yapachach. A'yapachatupepa' o' shontanña uva allcha' atmama'chet attoch cha'nmatoñet po'ñer. Ñeñña'pa' añ toma'ntena atto Yompor po'yorochenño'pa' atarrcha' coñchaterran acheñenesha'. ²⁰ All atmama'teñet uva, pocollotpa' tama a'yente'tsen. Ñeñt' atto cha'nen uva po'ñer ñeñtpa' añ toma'ntena o'ch chorrerr errasats arr patsro a'yohuen ñeñt' allohuanen trescientos kilómetros ñaña enonet chapcha' e'ñe cahual po'frenohua ñeñt' chets e'ñe yelleca'nohua.

15

Allempo Juanpa' enterranerr cancherrsheña mellañoñeñ, ñetpa' o'ch orrtaterret ñeñcha' amuerochtatañterrtsa

¹ Allempoña all ento napa' o' nenterrerr po'poñ ñeñt' atarr yorochen ñeñt' ama yentare ñeñcha' yeñotaterre' ñeñcha' atet perra esempo. Nenterrerr mellañoñeñesha' cancherrsheña. Ñetña'pa' allsensare'ttenet attoch orrtaterret ñeñcha' amuerochtatañterrtsa. Puesheña'ttsetpa' orrtaterretcha' ñeñcha' amuerochtatañterrtsa e'ñe po'poñe'ttsoema cancherrsheño'maret. Allempochña etsuerra allohuen ñeñcha' atto Yomporpa' yorochtater.

² Allña napa' nenterrerr ñeñt' atet orrtetsa erracmañen atet ñerra'mrrate' ñeñt' añecmuen rerpat e'ñe atet huorten atet ñerra'm tso' huortets all. Allña'pa' all tomchen allohuen acheñenesha' ñeñt' e'ñe metana'tue' ora allpon ñeñt' atet topatyenanet ma'yarrma't ñaña ñeñt' pueyechcatar. Ñetpa' ama ayato'ma'tareteyayeto ma'yarrma't pueyotsaparo attoch noñet pa'so'cheñ amapa' ñaña po'número. All tomchenet e'ñe arpatochet ñeñtpa' Yompor apuenahuet.

³ Ñetña pueñtana'tueño'tet allohuen topateñets morrechenet Moisés puemorreño ñeñt' Moisés ñeñt' atarr torratset Yomporecop. Pa'qeshpatareteño'tet morrechenet ñaña Cristo puemorreño ñeñt' toma'ntenaya Carrnero. Ñeñtpa' atet achoteñet Yompor:

Yompore, ñeñteñ nanac Partsoñ ña ñeñteñ Yepartseshar yepen, atarr echarr es petsotatyen, atarr cochneshare' es peña'yen. Pa ñeñteñ Pa'micha'tareter pen allohuen pa'namen acheñenesha' ñeñteñ e'ñe pocte' es peña'yen. Ñaña e'ñe po'ño'ch atet ñeñt' allpon es potyen.

⁴ Allohuen acheñenesha' e'ñe añcha'na'tpo' entenpet, Yompore. Ama't puesheñarrapa' ama eñalle ñeñt' ama añcha'na'tpahuoye' pentenaye, Yompore. Allohuen acheñenesha'pa' e'ñe ñapta cohuentatennapet, tarro'mar e'ñe ñapta ña ñeñteñ atarr Partsoñ. Tarro'mar allohuen acheñenesha' ñeñt' pa'namen anetsoñ hua'cha'tetcha' pesho attoch ma'yochapet ña e'ñe papuet tarro'mar ñetpa' o' ñaya chapamet pueyo'chro atto papa' e'ñe cohuen pocte' es peña'yen.

⁵ Allempoña napa' cohuerrtsanerr nenterrñañerr Yompor pa'paquell ñeñt pue'ntaño'tsen. Ñeñña pocoll popellrrarpa' e'ñe cohuen atoraret. O'ponoñapa' allo'tsen all añño'tenet mapuettall ñeñt allo aquellcaret Yompor po'ñoñ ñeñt atet anaret ama't ahuatoteñ. ⁶ O'ponoñña Yompor pa'paclotpa' cha'nmaçherrerr ñeñt cançherrsheña mellañoñeñnesha'. Puesheña'ttset orrtaterretcha' ñeñtcha' amuroçhtatañterrtsa e'ñe po'poñe'ttsoçma cançherrsheño'maret. Añ chorra'yenet ñeñt atarr nanac cohuen ñeñt otenet lino ñeñt ama asosyatño ama't e'ñe mamesha. E'ñe cohuen poptama'tyena. Achanaretareret, po'chanaretpa' orotommuenare' ñeñt allo chana'yenet puesomapo. ⁷ Allempoña añ ñeñt pa'tatso'mar berrma't, paterrñaapa' apa'yesan mellañoñeñnesha' cançherrsheño'mar pajo'. Apa'yesanet puesheña'ttset po'pajo' ñeñt orotaten. Ñeñña pajo'pa' all e'chorrayesaret alloch coñchaterran Yompor pa'namen acheñenesha' ñeñt añe patsro'tsen, ñeñtara Yompor ñeñt ama arromñañeshayaye ama't errponaña ama't ahuaata. ⁸ Allña Yompor pa'paclo e'ñe chorren amos. Ñeñña amospa' añepa't ottetsa Yompor po'cohuenña ñaña po'partsoña. Allñaapa' ama't puesheñarrapa' ama muenateñeto o'ch be'toset all Yompor pa'paclo tarremphuach esempoch orrtatan ñeñt cançherrsheña mellañoñeñnesha' mueroçhteñets. Allempochña be'tosçherret all Yompor pa'paclo.

16

Allempo Juanpa' enterranerr cançherrsheña mellañoñeñt ñeñt echene' po'pajotollesha' all na'yenet ñeñtcha' amuroçhtatañterrtsa pa'namenot

¹ Allempoña napa' alla ne'muerrerr ñoñets ñeñt e'morrtetsa huomenc Yompor pa'paclo. Ñeñña ñoñetspa' atet otenan mellañoñeñnesha' ñeñt cançherrsheña, atet otenanet:

—Te'pa' o'ch sahanma allcha' seyo'panat errañaren patso ñeñt sena'yen sepajotollesho ñeñt cançhro'mar attoch sorrtaoñ Yompor po'yoroçhenña.

² Allempoña puesheñarr ñanom mellañoñeña' o'cho' ahuo'. Allñaapa' yo'posan ñeñt po'pajotollo'tsen patso. Allempo çhap patsopa' ñeñtñaapa' orrtatan puetsarñats ñeñt ama amapoçhatatañe ñeñtapa' ama eñalle pa'par alloch partet attoch metuerranet. Ñeñtapa' añña a'ptsarsat ñeñt ayato'ma'taretetyetsa ma'yarrma't pueyotsaparo ñaña ñeñt ma'yochenaya ayeçcataret ñeñt toma'ntatenet ma'yarrma't.

³ Allempoña po'psheñeñ ñeñt puepañ mellañoñeña' o'cho' ahurrerr o'ch yo'puenana' oño ñeñt po'pajotollo'tsen. Allempo yo'pos oño all atarr sa'po, oññaapa' cha errassastach, e'ñe atet orrta ñerra'mrrate' arromñañ po'rras. Ñeñtñaapa' e'ñe a'cllatuosan allohuen ñeñt allpon yeçhetsa all oño'mar.

⁴ Allempoña ñeñt puema'pañ mellañoñeña' o' ahurrerr ñaña o'ch yo'puenana' ontapo ñeñt po'pajotollo'tsen ñaña allot potayen oñ. Ñeñña allempo ayo'paretta oño cha a'pnasatosan oñ errasats. ⁵ Allempoña napa' ne'muen ñeñt atet otenan mellañoñeñ Yompor. Ñehua, ñeñña mellañoñeña' atarr ahuamencat attoch pomnaren penan ora allohuen oñeçhno. Ñeñña mellañoñeña' atet otenan Yompor:

—E'ñe pocte' Nompore ñeñt atet pecoñchatyenonet, ña ñeñteþ çhocma eñalleþ ama't ahuañoteña' ñeñteþ atarr nanac Partsoþ. ⁶ Tarro'mar acheñenesha' ñeñt pe'moñe'tene'pa' çhocma muetsanatennapet ñeñt peyochresha' pepen ñaña ñeñt a'mta'yene' peñoñ, çhocma shatyeññañet po'rras. Te'ña ñapa' o' ñonerranet errasats. Ñeñtpa' e'ñe pocte' tarro'mar ñetpa' añ o' ñohuet ñeñt ama pocteye' penteno ña.

⁷ Allempoña e'morrterrerr ñoñets arr e'morrta altarot, ñeñtña' atet oten:

—Attेशa' Yompore, ña ñeñteþ atarr nanac Partsoþ ñeñteþ Yeparteshar yepen. Ñeñt atto pentyenanet ñeñtpa' e'ñe po'ñoçh atet, e'ñe pocte' ñeñt atet o' pecoñchaterranet.

⁸ Allempoña po'psheñeñ mellañoñeñ ñeñt puepa'tatseñ o' yo'puerranerr ñeñt po'pajotollo'tsen. E'ñe arr yo'pue' allo'tsen ñeñt yeçhoyo'tampene'. Ñeñtcha' ahuañencat pe' atsne' attoch chemuerran acheñenesha' atet ñerra'm tso'. ⁹ Acheñenesha' ama't atarr etomuenanetañña atsne'pa' tarraña ama es queçhpuenayeña ñeñt atet correnet sosya'tsañeçhno. Ama eseshaye' coñape'cherraye cohuen Yomporecop attoch cohuentateññañet Yompor. Elloña ñetña' atarr nanac achmāre'teññañet Yompor pa'so'cheñ ama't ñeñt atarr ahuañencatetsa atto çhapatanet ñeñtcha' mueroçhtaterrahuet.

¹⁰ Allempoña po'psheñeñ mellañoñeñ ñeñt pa'mnareñ, ñapa'çho'ña o' yo'puerranerr ñeñt po'pajotollo'tsen. E'ñe arr yo'pue' ma'yarrma't po'conaño all añcha'tarettena. Ñeñtña all añcha'tarettena' cha a'checmetue. Acheñenesha'ña allpa' epaye' mueroçhtatanet pa'namen atserrpeñets. Ñeñt atserrpeñetspa' cha muellatstame'tatyesanet, açhañe'chatyesanet atserr. ¹¹ Tarraña ñetpa' ama't atet o' aþarettetañpa' ama queçhpuenetoña ñeñt atet þatse'tyenet sosya'tsañeçhno. Elloña ñetpa' allo'na achmāre'tneñet Yompor ñeñt ento'tsen ñeñt atto atserrpenanet puetsarñats.

¹² Allempoña ñeñt po'pechapueñ mellañoñeñ, ñapa'çho'ña o' yo'puerranerr ñeñt po'pajotollo'tsen. Arr yo'pue' po'ñeso ñeñt añecmuen atarres ñeñt po'ñes añ pa'so'cheñ Eufrates. Yo'pose'pa' cha emasa'huosanña po'ñes ama't atarr añecmuen. Ñeñtña allot masohuapa' ñeñta toñeterrets ñeñta pa'teþ perret allcha' oñem añcha'tareteçhno ñeñtcha' huaçha'ttsa allot huena atsne'.

¹³ Allempoña napa' nenterrerr añyañ epuet ma'yarrma't epuet ñaña ñeñt a'mtene' ma'yarrma't po'ñoñ añe patsro tarraña ñeñtpa' ashcaña. Ñetña e'ñe puenamotetpa' cha'nmatyeset puesheña'tets oneñet ñeñt ama mapoçho. Ñeñt oneñetpa' ma'psheña. Ñetña' e'ñe atet orreyenet ñerra'mrate' rrehuancro. ¹⁴⁻¹⁶ Tarraña ñeñtpa' oneñetca'ye ñeñtcha' orrtaterre' ñeñt ama puentare allohuen acheñenesha' ñeñtcha' cohuanrrortaterrahuet. Ñetpa' o'ch chopeñe'chyerret erracmañen attoch apçheret allohuen ñeñt añcha'tareteyetsa añe patsro. Allochña' attoch quellareret Yompor ñeñt atarr ahuañencat, attoch quellareret allempoçh çherr ponañcho ñeñte yetroch yoroçhcatat Yompor. Allohuen añcha'taretnesha' ñeñtcha' quellareret Yompor, arrcha' apçhataretterret anets ñeñt pa'so'cheñ Armagedón, allotcha' quellareret Yompor. Añ Armagedónpa' ñeñtpa' hebreonesha' soçhene' añ ñeñt

anetsér. Ñehua, o'ch neyerpatasa ñeñt atet ote't Yepartseshar Jesús, ñapa' atet ote't: "Señoche'pa'ch napa' e'ñech machayo'ta nohuerra atet ñerra'mrrate' eñet amach esesha' eñotenaye esempoch huapa. Tarraña atarr cosheñtso'tsa'yen ñeñt'chocma neñose'rtenaya ñeñto'marña ñetpa' e'ñe cohuen añño'tenet pa'shmat ñeñt'cha' chorra'nmuét allochñapa' amach muelle'mcota'cha'nmueto amach'cha' apenco'chterreto."

¹⁷ Allempoña po'psheñeñ mellaño'teñ ñeñt pocan'chroñ, ñapa'cho'ña o' yo'puerranerr ñeñt po'pajotollo'tsen. E'ñe arr yo'pue' morresho. Allempocma e'morrta ñoñets ñeñt huetsa Yompor po'conañot ñeñt pa'paclo'tsen all pue'ntaño. Ñeñtña ñoñetspa' atarr huomenc e'morrtena, ñeñt'pa' atet oten:

—Te'ña po'ño'chpa' o' etsotuerra, huañerrcha' ñeñt ahuatoteñ.

¹⁸ Allempoña' meramerta o' tatsllares, e'morrta ñaña ñeñt ma'moretets, atarr huomenc e'morrtena. Puetalle'cha ñaña pats nanac huomenc ñeñt ama't ahuatapa' ama atet pue'paro allempoteñ e'ñe pa'motroteñ eñalleta acheñenesha' arr patsro. ¹⁹ Añ ñeñt atarr anets ñeñt atma'ntataret anets Babiloniapa' ñeñtña anetsérpa' o' rrara'pes ma'psherña. Ama't ora allpon pa'namen anetso'chno añe patsro all shonta'yena pa'namen acheñenesha', ñetpa'cho'ña e'ñe ñegata'mpesuahuet. Yomporpa' añcha' yerpaterranet ñeñt allohuen allpon p'atse'tyenet ñeñt atarr sosya'tsañ all atarr anetso ñeñt atma'ntataret Babilonia. Ñeñt allpon allohuen allo'tsa'yenet e'ñe coñchatuerranet Yompor, o' e'ñe tsa'tatuerranet po'yorothenño. ²⁰ Allempoña ama't ñeñt rro'chpe'chañe'chno ñaña aspen'te'chno o' e'ñe chenca'huerra. ²¹ Shora'nom ñaña ento't hue' ñeñt atarr añecmuesheñ ateshamerr. Pate'tetspa' eñerrtena cuarenta kilo. Ñeñtña e'ñe a'tpetse'tuose' allohuen acheñenesha'. Allempoña ñetpa' atarr achñare'teñet Yompor tarro'mar o' coñchaterranet atarr huomenc.

17

Attoch a'coñchatare'tterra coyanesha' ecañoresha't ñeñt toma'ntenaya anets Babilonia all ama esesha' yerpa'penayo Yompor

¹ Allempoña mellaño'teñ ñeñt can'cherrsheña ñeñt echyene' po'pajotollesha', puesheñarrñapa' o' huapa. Huapa neshopa' otosen:

—Te'pa' o'ch p'octa'n o'ch negaten'pa' allcha' a'coñchatare'tta añ coyanesha' ñeñt atarr ecañoresha't ñeñt ame'ñatenaya pa'namen añcha'taretnesha' ñeñt pa'namen anetso'tsa'yen e'ñe allohuanen'chen oñe'chno añe patsro. Ñapa' po'conañ penan oñe'chno all anen. ² Ñeñt añcha'taretetyetsa añe patsropa' pame'ñeñofet ñetpa' e'ñe po'cañoreshacma peñet ñeñt coyanesha'. Allohuen ñeñt añe patsro'tsen acheñenesha' e'ñe a'posa'tuenanet tarro'mar ñeñt atto cañoresha'tenanet ñeñt'pa' 'chochña a'posa'tenanet attoch e'ñe cohuen ame'ñeñet.

³ Allempoña ñeñt mellaño'teñpa' arr anmuen amara'to, e'ñe Yompor puecamquëño'f anmuenet. Allñapa' nentos puesheñarr coyanesha' ñeñt anets berrma't pa'che'ño. Ñeñt berrma'tpa' atarr añcha'no'chen, atarr tsapñanan. Poñpa' can'cherrmaga, po'ucorñapa' 'charra'. Ora pue'mocro'marpa' e'ñe aquellca'huaret allemeñ. Ñeñtña quellecpa' allo sochatse'teñet Yompor. ⁴ Ñeñtña coyanesha'pa' añ chorrena

yetsñorromamuen epuet tsamamuen. Ñaña allo añño'tena ñeñtpa' atet ñerra'm orollmemen ñeñt atarr cohuen, ñaña mapyellmetollesha' ñeñt nanac poptallme'chyetsa ñeñt nanac tsa'te' ñaña po'ser ñeñt atarr cohuen orrtatene' ña. Potot orrenan po'pajo' orotaten. Ñeñt pajo'pa' e'ñe e'chorrenan pa'namen sosya'tsañechno ñeñt atarr yetsena'ten ñeñt atto nanac cañoresha'ten. ⁵ Pueto'mpa' aquellcato'ma'taret. Añ so'chñets ñeñt quellquënet allpa' ñeñtpa' attoch eñotatanet ñeñt ama e'ñeye' eñotpahuo, ñeñtpa' atet oten: "Añpa' ñeñt toma'ntenaya anets Babilonia ñeñt nanac atarr anets ñeñtara pachor pen ñaña allohuen ñeñt atarr ecañoreshañ ñaña pa'namen sosya'tsañechno ñeñt atarr yetsena'tyen arr patsro." ⁶ Allempoña ñeñt coyanesha'pa' neñoach atarr posa'ten. Ñaña'pa' añ posa'tena errasats ñeñt po'rras ñeñt muetsanatete't ñeñt pueyochresha' pen Parets tarro'mar ñapa' atarr cohuen entenan o'ch muetsachet ñeñt serrpare'tene' atto ame'ñeñet Jesús. Allempo neñch ñaña'pa' atta necuana'ch ñeñt coyanesha'. ⁷ Ñaña allempo mellañoñeñpa' o' alla oterren:

—¿Eso'mare'tña atta pecuana'teñ? Te'pa' o'ch neñotatañ ñeñt toma'ntena añ coyanesha' ñaña ñeñt toma'ntena añ berrma't ñeñt allo anen ñeñt cancherrmaga poñ, po'ucorñapa' çharra'. ⁸ Añ berrma't ñeñt penten, ñeñtpa' añ toma'ntena ñeñt corratset ahuañmo'cha te'pa' ama eñalle o' rroma. Tarraña o' mameshamerra o'ch alla tarraña o'ch çha'nerr arrotot. Tarraña ñeñtpa' mamecpach atet perra, ellochña o'ch alla romuerrerr. Allempochña o'ch chenca e'ñe poctacma. Acheñenesha' ñeñt yeçha'yetsa añe patsro ñeñt ama ame'ñetso ñeñtpa' atarrcha' cohuanrrorteret añ berrma't tarro'mar ama puentareto ñeñt atet pena añ berrma't. Ama't ñeñt corratset arr patsro, tarraña ahuañmo'chapa' o' rroma. Ama't o' rromhuañ tarraña o' alla orrterrerr. Ñeñto'marña acheñenesha'pa' atarr cohuanrrortet. Ñehua, ñeñt cohuanrrortene'pa' ama aquellcareteyaye pa'so'cheñ Yompor po'libro all aquellcarenna pa'so'chñechno ñeñt pueyochresha' pen Yompor; ñeñtpa' corretsetach errponañoñhuen. Ñeñt ama ame'ñetso ama aquellcareteyayeto pa'so'cheñ ahuañtoñ allempoteñ e'ñe errete' ayeçcatarettsa pats.

⁹ Te' ñeñtcha' neñotatappa' o'ch poctape'ch e'ñe cohuen esheccha' peñot ñeñt atet toma'ntena añ berrma't poñechno. Ñeñt penten cancherrmaga poñ, ñeñtpa' añ toma'ntena cancherrpena aspenet all yeçhena añ coyanesha'. ¹⁰ Toma'ntenana ñaña cancherrsheña ñeñt añcha'tarettsa añe patsro. Tarraña amnarsheñapa' o'huañ añcha'taretta. Te'pa' o' puesheñarraña añcha'tarettsa. Tarraña puesheñarmeñ palltena ama orrtena'. Tarraña esempoch orrtapa' amach atarr atomat añcha'taretto. ¹¹ Ñaña añ berrma't ñeñt toma'ntenaya puesheñarr añcha'taret ñeñt corratset ahuañmo'cha te'pa' o' rroma. Ama't o' rromañpa' tarraña ñeñtara o'ch alla orrtara o'ch alla añcha'taretterrerr ñeñtcha' posocsheñterre' ñeñt cancherrsheña añcha'taret ñeñt o' colla'hua. Tarraña ñapa'cho'ña çhocmach romuerrerr allempoch chenca e'ñe poctacma. Ñehua, ñapa' ñeñtara ñeñt añcha'tarettatset ñaña ahuañmo'cha allempo cancherrsheñtete't.

¹² Ñaña añ berrma't ñeñt çharra' po'ucor ñeñt penten, ñeñtpa' añ toma'ntena çharrasheña añcha'tarettesha', tarraña ñetpa' ama

añcha'tarettēneta'tarro'mar ama orrteneta'. Tarraña esempocho orrterret allempochña añcha'tarettapreteret berrma't e'ñe mame'. ¹³ Ñetpa' e'ñech patrra cotape'chenet ñeñt atet cotape'chen berrma't, o'ch neñet berrma't ñeñtcha' pa'mcha'tareter perret. Ñeñt'pa' atto yēnpueñet attoch ahuamencat peñet berrma't. ¹⁴ Ñetñapa' pue'moñe'teñoťet Cristo ñeñt toma'ntenaya Carrnero quellareretcha'. Tarraña Cristo ñeñt toma'ntenaya Carrnero ñach a'mchechuerahuet tarro'mar ñapa' atarr ahuamencat. Ama't ora allpon ñeñt ayochreshatetyetsa, Cristoñapa' e'ñe Pa'yochreshater pohueñet allohuenet, ñaña ama't ora allpon ñeñt añcha'taretetyetsa, ñetpa'cho'ña e'ñe Pa'mcha'tareter pohueñet allohuenet. Ñaña ñeñt epuet parro yemtena, ñetpa' Yompor acerrahuet ñeñt chore'ten ña ñeñt atarr yemtenaya ña.

¹⁵ Allempoña añ mellañoťeñ alla oterrerr, ñeñt'pa' atet oten:

—Ñaña añ oñechno ñeñt penten ñeñt allo anen coyanesha' ñeñt atarr ecañoreshat, ñeñt'pa' añ toma'ntena shonte' pa'namen acheñenesha' ñaña pa'namen anetsochno all yecha'yenet ñaña po'poñe'ttsocma ñoñets ñeñt allo eñosyenet. ¹⁶ Ñaña añ berrma't ñeñt penten čharra' po'ucor ñeñt toma'ntenaya čharrasheña añcha'taretnesha', ñetñapa' tsena'čhetcha' ñeñt coyanesha', a'ypo'ñeretcha' e'ñe muelle'mcot. E'nuerrñañetcha' e'ñe ña po'čhets allempochña chamueret tso. ¹⁷ Yomporpa' ña nene' allohuen añcha'taretnesha' pueyočhreto attoch ñetpa' e'ñech patrra cotape'chenet ñeñt atet cotape'chen berrma't, attoch yēnpueñet esheccha' ahuamencat peñet berrma't. Allochñapa' attoch etsotateññañet Yompor po'ñoñ ñeñt atet oten. ¹⁸ Ñaña añ coyanesha' ñeñt penten ñapa' añ toma'ntena ñeñt atarr nanac anets ñeñt pomnaren pene' allohuen ñeñt añcha'taretetyetsa allemeñ anetso'mar ñeñt añe patsro.

18

Atto allohuen ečllayoretnesha'pa'ya'na'teretcha' ñeñt anetser Babilonia o' ahuapore'tareterra

¹ Allempoña o' alla nenterrerr po'psheñeñ mellañoťeñ ñeñt sohua'netsa entot, ñeñtñapa' atarr ahuamencat. O' e'ñe čhap pat-sopa' a'puetarsañpsosan pats e'ñe ña po'popteñoť. ² Ñañapa' rranosa huomenc, ñeñt'pa' atet otos:

—Te'ñapa' o' a'ypo'ñareterra añ anetser ñeñt atma'ntataret Babilonia ñeñt atarr añecmuen anets. Te'pa' añecpach sherberr allcha' shonterra pa'namen oneñeťechno ñeñt atarr apočhenare' ñaña allcha' shonterra pa'namen oťechno ñeñt atarr yetsena'tyen. ³ Tarro'mar añ coyanesha' ñeñt toma'ntenaya anets Babilonia, ñapa' ahuañmo'cha e'ñe po'cañoreshacma pete't allohuenet ñeñt añcha'taretetyetsa añe patsro. Allohuen ñeñt añe patsro'tsen acheñenesha' e'ñe a'posa'tuanete't tarro'mar ñeñt atto cañoresha'tanete't ñeñt'pa' čhoch a'posa'tanete't. Ñaña allohuen ñeñt allpon pomatsre'tyestse't, ñaña atarr ečllayorettatahute't tarro'mar ñapa' shonte' esocmañen muenatse'tyese't.

⁴ Allempoña o' alla ne'muerrerr po'poñ ñoñets ñeñt e'morrtetsa entot, ñeñt'pa' atet oten:

—Ñeñtes neyochresha' nepen, te'pa' o'ch sesa'neñ añ anets ñeñt atma'ntataret' coyanesha'. Amach socshapretatsche ña po'chñar te't sa'na muerochtapretenaya. ⁵ Tarro'mar ña po'chñarpa' allo'na sen atonetnomtsa nanac. Yomporpa' e'ñe eñoteññañ po'chñar ñeñt allpon pa'yese't. ⁶ Te'pa' atsa'tatare'terrepa'ch allpon ñeñt atto errot pa'yese't po'potantañ. Ñehua, ama't epoche'tats atsa'tatare'terrepa'ch allpon ñeñt atto es patse'tyese't. Ñeñt atto allpon llecatyesane't po'potantañ, ñapa' epoche'tatsepa'ch atsa'tatare'terra llequëñtso. ⁷ Ñeñt allpon coshatse'tyese't, te'ñapa' ñeñtepa'chña allpon llecaterayerr. Ñeñt allpon echyese't, te'ñapa' ñeñtepa'chña allpon muerochtaterre'. Tarro'mar ña ahuañmo'chpa' pommo'cheño't atet ote't pueyo'chro: "Ñapa' atto nanen na neconaño'pa' atarr na'ñcha'tare'tena. Ñapa' ama añeyayno ñeñt rretornanesha'. Na ama't ahuatapa' amach nellquërro tarro'mar amach es nemuerochtaterre." ⁸ Tarraña ama't atet ommo'chenañpa' mamerrerrpa' o'ch çhapaña ñeñtcha' muerochtaterre' pa'namen muerochteñets — rromueñets, llequëñets ñaña muecheñets. Ñapa' a'poyatateretcha' tso. Tarro'mar Yompor ñeñt Yepartseshar yepen ñapa' ñeñt atarr Parets ñachña coñchaterre'.

⁹ Ñeñt añcha'tare'te'chno ora errañaren añe patsro, ñetña e'ñe puellquëño'tetpa' ya'na'teretcha' ñerra'm esempo enterrñañet pamosoñ ñeñt atto poyen. Ñeñtara añcha'tare'tnesha' ñeñt e'ñe po'cañoreshacma pe't ahuañmo'cha ñeñt parrocoma epuet atarr coshete't. ¹⁰ Ñetpa' puey-orño'tetpa' cohuanrrorteretcha' a'yot tarro'mar atarrcha' yorenet ñeñt atto o' a'coñchatare'terra. Ñet puellquëño'tetpa' atetcha' otet:

—Atarr llequëñets-bee, ama't ñeñt atarr añecmuen anetser ñeñt atarr ahuamencat, machayota o' çherrñaña ñeñtcha' coñchaterre'.

¹¹ Ñaña allpon ñeñt pomatsre'tyetsa errañaren añe patsro, ñetpa'cho'ña e'ñe puellquëño'tet ya'na'teñet, tarro'mar te'pa' ama eñalle ñeñtcha' rañta'yeshuet ñeñt pomyenet. ¹² Tarro'mar ñet ñeñt po'checom penetpa' shonte' esocmañen pa'namen — oro, ñaña asre'chno ñaña mapyetollesha' ñeñt poptame'te' nanac tsa'te', ñaña serets ñeñt otenet perla, ñaña shetamtso'chno ñeñt atarr co'chnesharer — yetsñorromamuenare', tsamamuenarer, sedamamuen. Shonte' ñaña pa'namen tsache'chno ñeñt atarr eñmosa'te'chno, ñaña marfil ñeñt elefantas ñeñt allot ye'chcatyenet pa'namen, ñaña pa'namen ñeñt ye'chcatyenet tsachot ñeñt atarr nanac tsa'te', ñaña ñeñt ye'chcatyenet bronsot ñaña hierrot ñaña mapyot ñeñt otenet mármol. ¹³ Ñaña ñeñt pa'namen po'checom penet atet ñerra'm ñeñt otenet canela ñaña pa'namen aspanatollesha' ñeñt eñmosa'tare' ñaña tsachese' ñeñtpa'cho'ña eñmosa'tare' ñerra'm esempo a'crrateñet e'ñe atet ñerra'm ñeñt otenet mirra ñaña incienso. Allo'tpa' po'poñe'chno checmañatso'chno ñeñtpa' añ vinos, olive'se', harina ñeñt atarr cohuen ñaña trigo. Ñaña po'poñe'chno ñeñt pomyenet ñeñtpa' añ huacshe'chno, carrnero'chno, cahualle'chno ñaña carrotollesha' ñeñt matatyen cahualle'chno. Ñaña allpa' ama't acheñ pomueñet ñeñtcha' taruasatenet e'ñe atta. Ñeñt acheñerpa' allña pomueññañet pocrraña ñeñt atto correna arr patsro. ¹⁴ Ñeñt pomatsre'tyetsa allpa' ñetña'pa' serrpare'tenet, çha

ottenet ñerra'mrrate' cho es oteñet ñeñt anetser, ñeñtpa' atet oteñet:

—Ñeñt allpon atarr ñayoma'yese't atet ñerra'm puetsarr ñeñt atarr ayoma'po' te'ñapa' ama eñalle o' huañerr. Ñaña ñeñt allpon nanac cohuen pentyese't ñeñt nanac cochnesha'tatse't, te'pa' o' chenca'huerra. Te'ñapa' ama't ahuatapa' amach alla pentere'te. Arrpa' allohua ñeñt atet oteñet ñeñt anetser.

¹⁵ Ñeñt allpon pomyenet allpa' ñetñapa' epaye' ganatanet nanac aton quelle. Tarraña ñet te'pa' po'yorñofet attach tomcha'tet a'yot allotcha' cohuerret ñeñt atet o' a'coñchatareñterra. Ñetñapa' epaye' ya'na'teñet e'ñe puellquëñofteta' ¹⁶ atet otenet:

—Llequëñtsa-bee añ atarr anets tarro'mar ñapa' o' atet perrate' ñeñt atarr añecmuen anetser ñeñt atet ñerra'mrrate' puesheñarr coyanesha' ñeñt nanac cohuen añño'tetsa. Añcha' chorrena ñeñt atarr cochnesha' yetsñorromamuen epuet ñaña tsamamuen ñaña ñapa' nenan oro, ñaña mapyetolleshma't ñeñt atarr cochnesha' poptallme'chyetsa ñaña nenan cochnesha' seretsočno. ¹⁷ Te'ñapa' e'ñe mamecmapa' o' e'ñe huañerr ñeñt atto atarr nanac esocmañen echyese't. Arrpa' allohua ñeñt atet ot ñeñt pomatsre'tetsa all.

Allempoña allohuen ñeñt po'taruas pene' bote ñeñt anmatsetene' checmañats all ñeñt anetsro, ñetpa'cho'ña o' alla tomcha'tet a'yot — atet ñerra'm ñeñt pamo'mte' pen bote ñaña ñeñt achopeñañnesha' ñaña marineronesha' ñeñt taruaset all boto. ¹⁸ Ñetpa'cho'ña allohuenet all tomchenetpa' rrannartenet allempo enterrñañet pamosoñ ñeñt atto poyen ñeñt anetser. E'ñe puellquëñofteta' atet otenet:

—Ama eñalle po'poñ anetser ñeñt atarr cohuen atet ñerra'm añ anetser.

¹⁹ Allñapa' atarr yahuanrrortenet. Puellquëñofteta' pampato'tyeset patso. Rrannaretyesetpa' atet otyeset:

—Llequëñtsa-bee añ atarr anetser tarro'mar allohueney ñeñtey echyene' yebote ñeñt chocma yanene' oñopa' shonte' quelle ganatyet tarro'mar ñeñt anetserpa' shonte' echane't quelle nanac aton. Tarraña ama't atet pe'tpa' te'ñapa' e'ñe mamecmapa' o' e'ñe huañerr.

Atarrcha' cosheñtso'tsa'yen allohuen ñeñt pueyochresha' pen Parets

²⁰ Te'ña sapa' socshepa'ch ñeñtes pue'ntaño'tsenes ñaña allohuen ñeñtes pueyochresha' pen Parets ñaña allohuenes ñeñtes allsensaretes Yomporecop ñaña allohuenes ñeñtes a'mtene' Yompor po'ñoñ tarro'mar ñeñt atto Yompor o' coñchatteran ñeñt anetser, ñeñtpa' attoña o' chemnaterra sa.

²¹ Allempoña mellañoftañ ñeñt atarr ahuaencatpa' ñaña'pa' chetan mapue' ñeñt atarr añecmuenmen atet ñerra'mrrate' ñeñt allocma es puets'tenet ñeñtñapa' huapore'ch sa'po cha chencostsa poctacma. Allempoña ñeñt mellañoftañpa' atet ot:

—Attecmach ahua'pore'tare'tterra añ atarr anetser ñeñtara ñeñt atma'ntatare't Babilonia. Amach orrterre'te ama't ahua'ta. ²² Te'ña allpa' amach es e'morrterre'te ñeñt atto toquënet arpa ñaña atto pencil'tenet ñaña ñeñt atto poctorare'tyenet po'poctoro. Ñaña ñeñt po'taruas ñaye't ñeñt es ye'chcatyesaye't pa'namen esocmañen all, te'ña ama't ahua'ta amach orrterre'te. Ñaña atto e'morrte't allempo es puets'tete't allpa' te'ñapa' amach alla e'morrterre'te. E'ñe muets-soñeñtuerra. ²³ Ñaña ñeñt allo choyo'tamñsete't, te'ñapa' amach alla

čoyo'tam̄perranete'te. Ñaña ñeñt̄ coshame'tam̄psaye't̄ ñeñt̄ sena'tetsa ñaña coyanesha', te'ñapa' amach alla e'morrtaterrete'te pocsham̄ña. Ñaña allpon ñeñt̄ pomatsre'tyesatse't̄ all ñeñt̄ atarr anetsro, ñetpa' atarr asherben etete't̄. Ora errañaren añe patsropa' ama eñalle ñeñt̄ atet sherbets. Ama't atarr asherben entyesetañe't̄ tarraña čhocma shecare'tyesete't̄ allohuen pa'namen acheñenesha' ora errañaren añ patsro. E'ñe atet es ame'ñatena amase'ñe'tpa' e'ñe attecma shecare'tenanet ñeñt̄ anetser.

²⁴ Ñaña all anetsro, ñeñt̄pa' all amtsanatarette't̄ ñeñt̄ a'mtaye't̄ Yomp̄or po'ñoñ ñaña allohuen ñeñt̄ pueyochresha' pen Parets. Allña ashatarettete't̄ po'rras ñaña ama't allohuen ñeñt̄ amtsanatarettatse't̄ ora errañaren añe patsro, ñeñt̄ara anetsrot allotña amtsanatarettete't̄.

19

¹ Allempoña o' alla ne'muerrerr ñeñt̄ e'morrtetsa huomenc ento, shonte' acheñenesha' e'ñe parrocm̄a rrannartenet, ñeñt̄ñapa' atet otenet:

¡Aleluya! Aye'chočhtatpo'ch Yomp̄or tarro'mar ñapa' ña ñapuef̄ a'queshp̄atañtetsa, acohuentatpo'ch Yomp̄or ñeñt̄ ñapuef̄ atarr ahuaencaťesha'.

² Ñaña ñeñt̄ pocte' enten Yomp̄or ñeñt̄pa' e'ñe pocte' attecma, ñaña allpon ñeñt̄ atet oten ña, ñeñt̄pa' e'ñe po'ñočh attecma. Tarro'mar ñapa' o' coñchaterran coyanesha' ñeñt̄ atarr ecañoreshaťtetsa tarro'mar e'ñe ña po'chñaro'tpa' atarr a'sosyatenan acheñenesha' ora allohuen ñeñt̄ yečha'yetsa añe patsro. Te'ña Yomp̄orpa' o' e'ñe tsa'tatuera ñeñt̄ allpon muetsanatoñe't̄ ñeñt̄ torra'yestse't̄ ñocop.

³ Po'pocheñoñapa' alla oterreterr:

—¡Aleluya! Aye'chočhtatpo'ch Yomp̄or tarro'mar te'pa' Yomp̄or o' amosoñe'chaterran ñeñt̄ aťpare'taye't̄. Attoña o' chepoterr pamosoñ enonet; ñeñt̄pa' ama't ahuaťapa' amach huañerro.

⁴ Allempoña añ epoch čharra' ñeñt̄ puechetsa pa'tatssheña ñeñt̄ sherbene' Yomp̄or po'conaño, ñetñapa' concorpa'rrtenet epuet ñaña pa'tats ñeñt̄ berrma'ttetsa. Allohuenet concorpa'rrtenet all Yomp̄oresho. Allohuenetpa' ma'yocheñet Yomp̄or all anen po'conaño. Ñetñapa' atet oteñet:

—Aye'chočhtatpaupepa'ch Yomp̄ore, attetepa'ch p̄ocop errpono-huañen.

⁵ Allempoña all Yomp̄or po'conaño'tpa' allotña e'morrterrerr po'poñ ñoñets, ñeñt̄pa' atet oten:

Sa'ye'chočhtatoñepa'ch Yomp̄or, allohuenes ñeñtes torra'yetsa ñocop, ama't sa ñeñtes atarr sherbets ama't sam̄a ñeñtes ama tama sherbetso. Ama't allohuenes erra'tseneste' ñeñtes atarr añcha'na'tpo' entene' Yomp̄orpa' te'ñapa' sa'ye'chočhtatoñepa'chña.

Atto Cristopa' e'ñe cohuen aguërran allohuen ñeñt̄ ame'ñenaya ña ñeñt̄ atma'ntataret̄ atet ñerra'mrrate' ña puetapor penahuet

⁶ Allempoña napa' o' alla ne'muerrerr shonte' acheñenesha' rranartenet, atarr huomenc e'morrtena atet ñerra'mrrate' all etsase'tena shonte' oñ atarrcha' huomenc ma'moreten. Po'ma'moreteññapa' čha ottena ñerra'mrrate' čho tecor-rraren. Acheñenesha'ña ñeñt̄ rrannartet-sapa' ñetñapa' atet otenet:

Aye'chochtatpo'ch Yompor tarro'mar te'pa' o' chap allempoch ancha'taretterra ña e'ñe ñapueť ñeñtara Yepartseshar ñeñť atarr ahuamencatesha'.

7 Te'ñapa' yocsherrepa'ch, yocshame'tamperrepa'ch, yecohuentaterrñañepa'ch tarro'mar te'pa' o' chap allempoch yocshame'tamipesya Cristo ñeñť atma'ntatareť Carrnero. Te'ñapa' o' chap allempoch sena'ta. Ñaña ñeñť coyanesha' ñeñťcha' puetapor pa', ñañapa' o' e'ñe añño'taretta.

8 Ñañaapa' o' apet ñaña ñeñťcha' chorra ñeñť atarr cohuen huallamať atarr cochnesha' shetamuets ñeñť otenet lino ñeñť ama asosyatño ama't e'ñe mamesha, atterach poptame'tena.

Ñehua, añ shetamuets ñeñť otenet lino ñeñť ama a'sosyatpahuoyaye ama't e'ñe mamesha, ñeñťpa' añ toma'ntena ñeñť atto e'ñe cohuenare' es pa'yen ñeñť pueyochresha' pen Parets. Ñetñapa' añ toma'ntenet Cristo puetapor penahuet.

9 Allempoña mellañoťeñpa' alla oterrner:

—Te'pa' o'ch pequellquerrerr añ ñoñets ñeñť noteneť, ñeñťpa' atet ot: “Atarr cosheñtso'tsen allohuen ñeñť ahua'ñareťetsa o'ch rrallme'chaprechet allcha' coshame'tamipeñet Cristo ñeñť atma'ntatareť Carrnero ñeñť sena'tatsa.”

Mellañoťeññapa' alla oterrner:

—Ora allpon ñeñť atet oteney Yompor arrpa' ñeñťpa' e'ñe po'ñočh atet.

10 Nañapa' neconcorposa mellañoťeñ pa'rrpo ñeñť neserrpare'tatene' o'ch nema'yochyañ, tarraña ñapa' atet oten:

—Napa' amach pema'yochatsetno, napa' añana ñeñťen petorrapretenaya Yomporcop ñaña allohuen pemo'nasheñneshačhno ñeñť serrpare'tene' atto ame'ñeñet Jesús. Papa' ancha'ña pema'yocha Yompor ñapueť.

Tarro'mar allohuen ñeñť a'mítene' Yompor po'ñoñ, e'ñe ña Puecamquẽñoťpa' añ serrpare'tenet ñeñť atto yame'ñeña Jesús.

Cristo ñeñť montenaya cahuall ñeñť atarr huallañnanen

11 Allempoña po'pocheñoapa' alla nenterrerr atorareť enet. Allñapa' allo'tsen cahuall ñeñť atarr huallañnanen. Ñeñť montenaya cahualla' añ socheñet, Ñeñť atarr Ayemuetpotetsa ñaña ñeñť e'ñe Po'ñočh Yompor Po'ñoñ. Tarro'mar ñapa' erra'tsen pocte' ent o'ch coñchach, ñeñťña ñocoppa' e'ñe pocte'. Ñaña ñerra'm ña quellaratahuet ñeñťpa'cho'ña e'ñe pocte' ñocop. 12 Pa'clloyoťñapa' atarr nanac a'rrechatañ atet ñerra'mrrate' tso' po'huorter. Po'ñoñapa' shonte' po'choyo'm ñeñť choyo'mítene. Allñapa' anareť ñaña pa'so'cheñ ñeñťpa' e'ñe ñapfa eñoteñ.

13 Pa'shtampa' año e'chomareť errasatso. Ñaña añ socheñet Yompor Po'ñoñ. 14 Ñaña ñeñť allpon pa'cllarañeshar pen all pue'ntaño, ñetñapa' coteñet chenta' monta'yesnenet ñamet puecahualloro ñeñť atarr huallañnarren. Ñetpa'cho'ña ñeñť pa'shtam penet atarr huallama'tarer. Ñeñť shetamuetspa' atarr cohuen ñeñť otenet lino ñeñť ama sosyatetso ama't mamesha. 15 Ñeñť anenahuet, e'ñe puenamot all orrtena cochell ñeñť atarr etsotañtareť. Ñeñť cochellpa' añecop sherben alloch ame'ñatuerrana ora allpon pa'namen acheñenesha' arr patsro. Allochñapa' po'yoročhenñoťpa' o'ch ancha'taretterranet atet ñerra'mrrate' ñapa'

a'sreperet o'ch amcha'nochtana'terranet. Ñaña ñach coñchaterrahuet. O'ch netma'ntacha atet ñerra'mrrate' ñach atmama'te' uva esheccha' cha'nom po'ñer. Ñeñt atet atmama'teñet uvapa' añ toma'ntena affo Yompor ñeñt atarr ahuamencat e'ñe ña po'yoro'chenño'pa' atarrcha' coñchaterran acheñenesha' ñeñt atpare'tetsa. ¹⁶ Ñaña pa'shtamo e'ñe pa'tapacoptaro allñapa' all aquellcaret ñoñets ñeñtcha' atet enteñet Cristo, ñeñt'pa' atet oten ñoñets: "Allohuen ñeñt amcha'tarete'chno añmapa' ñeñtña e'ñe Pa'mcha'tareter pohueñet allohuenet. Ñaña allohuen ñeñt ayochreshate'chno añmapa' ñeñtña e'ñe Pa'yochreshater pohuenet allohuenet."

¹⁷ Allempoña napa' o' alla nenterrerr mellaño'teñ ñeñt tets all ñeñt yechoyo'tam'pene'. Ñaña'pa' atarr huomenc eñen, chore'tenan allohuen tse'machno ñeñt anom'cha'tyetsa eno. Ñeñtñapa' atet otenanet:

—Sehua'cha'ta allohuenes o'ch sap'cha arr o'ch serren po'chets ñeñt atarr aton rratenes Yompor. ¹⁸ Attoch serroñ po'chtso'chno shonte' acheñenesha' ñeñt amcha'tare'tetyetsa, ñaña shonte' ñeñt capitanatyets, ñaña shonte' ñeñt atarr ahuamencat entyenet. Serroñ ñaña shonte' cahualle'chno po'chets ñaña añ po'chets ñeñt montenaya. Ama't shonte' pa'namen acheñenesha' o'ch serroñ po'chets ama't ñeñt acheñer ñeñt atarr sherbets ñaña ama't ñeñt ama sherbetso, ama't ñeñt e'ñe cohueno'tsen acheñ, ama't ñaña ñeñt ataruasataret e'ñe atta — o'ch e'ñe serruanet po'chets allohuenet.

¹⁹ Allempoña napa' o' alla nenterrerr ma'yarrma't epuet ñaña allohuen amcha'tarete'chno ora erra'paren ñeñt añe patsro'tsen epuet ñaña allohuen ñeñt pa'çllarañneshar pen. Ñetpa' añecop ap'chenet allochñapa' o'ch quellareñet ñeñt montenaya puecahuallor ñeñt atarr hualla'ñnanen ñaña epuet ora allpon ñeñt pa'çllarañneshar pen ña. ²⁰ Allempoña quellaranna'tet ma'yarrma'tñapa' cha rremuet epuet ñaña ñeñt a'mtene' e'ñe ña po'ñoñ tarraña ñeñt'pa' ashcaña. Añ ñeñt ashcañerpa' e'ñe ma'yarrma't po'huamencot gatenan acheñenesha' ñeñt ama puentareto. Ñeñt'pa' alloña shequënan acheñenesha' attoch ame'ñeñet. Ñeñtña acheñenesha'pa' o' e'ñe yato'matuanet ma'yarrma't pueyot-saparo. Ñetñapa' añ ma'yochenet aye'chcataret ñeñt toma'ntatenet ma'yarrma't. Allempoña rremuet ma'yarrma't epuet ñaña ñeñt a'mtene' po'ñoñ allempoñapa' ahuapore'tarettet epsheño'maret e'ñe betareret all parraren tso' erra'paren. Ñeñt tso'pa' atarr shemasher huorten. ²¹ Po'potanta'che'chno ñeñt epuet quellarañ ma'yarrma't ñetpa'cho'ña o' e'ñe amtsanataretetuet. Año amtsanatarettet cochllo ñeñt puenamo'tsen ñeñt montenaya puecahuallor ñeñt atarr hualla'ñnanen. Allempoña ñeñt allohuen tse'machno epaye' ochare'ch po'chets allempo rret añ po'chets ñeñt o' e'ñe amtsanataretetua.

20

Attoch çherr allempoch mellapoterra

¹ Allempoña o' alla nenterrerr po'psheñeñ mellaño'teñ ñeñt sohua'netsa entot. Ñaña potot'pa' añ orren llave alloch toram'psan arrorot ñeñt atarr o'pononet arrorottena pats. Pototñapa' orrenan ñaña cadena ñeñt atarr añecmuen cadena. ² Ñeñtña mellaño'teñpa' rremosan añyañ.

Añyañpa' ñeñtara shecheþ ñeñt ahuatoteñ ñeñtara yoten oneñeñ ñaña ñeñt otenet Satanás. Atto rremue'pa' allempoñapa' huanquë'. Ñeñt atto ehucarettapa' e'ñech errponañohuen char ñeñt otenet mil char, atterach ehucarettena. ³Allempo huanca'huepa' o' huapore'ch o'pono arroroto. Allña yottamþes o' noñ alloch e'ñe echarr þamþes. Allochñapa' amach alla shecare'terranerro allohuen pa'namen acheñenesha' arr patsro. Ñehua, ñerra'm o'ch çhap mil charpa' allempoñapa' o'ch alla a'rroyeret. Tarraña ñerra'm o'ch alla a'rroyeretpa' ñeñtapa' mamecpach a'rroyeretterra.

⁴Allempoña o' alla nenterrerr ñeñt anorrçha'tyets po'conaño'mar. Ñetñapa' allsensarettet attoch ñetpa' o'ch añcha'taretetyenet. Ñaña napa' o' e'ñe nentuerrñañ puecamquëñechno allohuen ñeñt apecha'tanatarettatset e'ñe pueserrpare'teñoñet Yepartseshar Jesús ñeñt atto a'potoñete't Yompor po'ñoñ. Ñaña ñetpa' ama muenete'te o'ch ayato'ma'tarettet ma'yarrma't pueyotsaparo ama't pa'co'metotetapa' ama ayaco'mta'tarettete'te. Ñetpa' ama ma'yochyete'te ma'yarrma't ama't ayeçhcataret ñeñt toma'ntenaya ña ama esesha' ma'yochaye'te. Ñaña ñetpa' ama muenete'te o'ch ayato'ma'tarettet ma'yarrma't pueyotsaparo ama't pa'co'metotetapa' ama ayaco'mta'tarettete'te. Ñetña allpa' corretseta all añcha'tarettapreteñet Cristo shonte' char allpon ñeñt otenet mil char. ⁵Ñetñapa' ñanmuetcha' atantataretterret. Tarraña po'potantañechno arromñañnesha' ñetña allpa' ama allo'tseneto tarro'mar ñetpa' ama atantataretyeyeto tarrempohuach allempoch çherr mil char. ⁶Atarr cosheñtso'tsen allohuen ñeñt e'ñe pueyochresha' pen Parets tarro'mar ñetpa' ñanmuetcha' atantataretterret. Tarro'mar ñetpa' amach alla rromuerrete'te po'pocheño ñeñtcha' atet rromuerr po'potantañ ñeñtcha' chenquërrtsa e'ñe poctacma. Tarro'mar ñeñtcha' tanterrtsa ñanompa' ñetpa' amach errotenot o'pataneto po'pocheño rromueñets ñeñtara chenquëñets. Ñetpa' añcha'ña sherbenet Yompor epuet Puechemer Cristo. Ñetpa' Yompor po'corneshar penahuet, añcha'tarettapreteretcha' nanac aton shonte' char ñeñt mil char.

Atto Juanpa' entan oneñeñ o' ahuapore'taretta all parraren tso' erraparen

⁷Allempoch metua añ mil charpa' allempochña a'rroyeret oneñeñ all ayottamþsarettena mil charohua. ⁸Ñañaapa' o'ch auyes ora erraparen pa'namen anetso'mar arr patsro allcha' shecare'tyerran pa'namen acheñenesha'. O'ch shecare'terran Gog ñaña Magog attoch a'yapaçhaterranet o'ch quellaterranet. Ñeñt atet yenteññañ ontap po'mñer atetcha' shonterran ñaña pa'namen acheñenesha' arr patsro, ñeñt ama e'ñoituapahuoyaye. ⁹Atet nentanet ñetpa' ahuanmuet mopñarero'mar o'ch parratsettet erraparen allcha' orretyeset. Ñetpa' arrentach ahuanenet Yompor pa'netsronet ñeñt atarr morrentena tarro'mar allpa' allo'tsa'yen ñeñt pueyochresha' pen ña. O' e'ñe arrotamþesuoyet attoch rremanatoñet Yompor pueyochresha'. Tarraña Yompor pue'ntañotpa' e'ñe allempocma a'shoranet tso' attoch e'ñe a'poyatuanet. ¹⁰Allempoña oneñeñ ñeñt shecare'tenahueta' o' huapore'teret ñaña all parraren tso' erraparen ñeñt huortets shemasher. Allo'tsa'yen ñaña ma'yarrma't epuet ñaña ñeñt a'mtene'

po'ñoñ. Allñapa' allempoteñ a'coñchatarefetuerret e'ñe parrocmá, yetome'tets, tsapome'tets ama't ahuata ñeñtpa' amach ahuañañattero ama't errponaña.

Ñeñt atto allohuen arromñañnesha'pa' tomcherretcha' Yompor po'conaño allñapa' allcha' entyesaretterret errotente' ñeñt atet pa'yese't e'ñe puesheña'ttset

¹¹ Allempoña o' nenterrerr atarr añecmuen conañ ñeñt atarr hualama't ñaña ñeñt anets all. Ñaña e'ñe po'partsoteñoñ a'chencatuan añ pats ñaña enet, o' e'ñe chenca'huerra poctacma. Ñocpuet ama eñalle allcha' a'puet ama't e'ñe coñe'ta. ¹²⁻¹³ Nent ñaña allohuen arromñañnesha' all tomchenet Yompor po'conaño. Ama't allohuen arromñañnesha' allo'tsa'yenet ama't ñeñt atarr sherba'yestse't ama't ñaña ñeñt ama asherboyenaye' entete'te. Ama't allpon omarrñañechno ñeñt omarrcha'tyestse't ahuatpa' ñetña ama't oñotpa' o' alla tantrra'tuerret. Ama't allohuen arromñañnesha' ama't o' chapuet all o'patenanet rromueñets, allotña o' alla tantrra'tuerret allohuenet. Ñeñto'mar ñet te'pa' e'ñe Yompor po'conaño tomcha'tuenet allohuenet. Allempoña allpa'tore'tet shonte' libro, ñeñña librorpa' all aquellca'huaret ñeñcha'yerpatterahuat ñeñt allpon atet patse'tyese't e'ñe puesheña'ttset. Allempoña Yomporpa' all entan ñeñt libro all aquellcayet ñeñt ama cohuenaye' es petso. Ñeñto'marña ñapa' attoña otteñe'cherranet o'ch mueñanet coñcheñtso. Allotñapa' tore'tet po'poñ libro ñeñt libropa' all aquellcayet añ pa'so'chñechno attochña ñetpa' corretsetach. ¹⁴⁻¹⁵ Allohuen ñeñt ama enteññañeto pa'so'cheñ libro all aquellcayet añ pa'so'chñechno ñeñt corretsetach, ñetñapa' asaprrotarettet o'pono all parraren tso' erraparen. Ñeñtpa' attochña rromuerreterr po'pocheño ñeñt puepocheñ rromueñets ñeñt e'ñe poctacma chenquëñets. Ñaña añ rromueñets ñeñt o'patenaya arromñañechno ñeñtara pa'netser pen rromueñets, ñeñtpa'cho'ña ahuaapore'taretta o'pono all parraren tso' erraparen.

21

Atto Juanpa' entan po'poñ enet ñeñt e'ñe etserra ñaña patspa'cho'ña o' etserraterr

¹ Allempoña na ñeñten Juanan allpa' o' nenterrerr po'poñ enet ñeñt e'ñe etserra, patspa'cho'ña o' etserraterr. Tarro'mar ñeñt atet yenten enet te' ñaña pats, ñeñtpa' o' e'ñe chenca'huerra o' huañerr. Ñeñt etserra patspa' allña ama't sa'p ñeñt yenten añecmuen ama eñalle. ² Nenterrerr ñaña Parets pa'netser ñeñtara Jerusalén ñeñt o' etserraterr. Ñeñtñapa' entot a'suataretterra e'ñe Yomporeshot. Ñeñtñapa' atarr cohuen orrtena e'ñe atet orrtena ñerra'm puesheñarr coyanesha' allempo some'tenapa' o'ch añño'tena e'ñe cochneshot attochña puerrollarpa' atarrcha' cohuen enteñ. ³ Allempoña napa' o' alla ne'muerrerr all e'morrtena ñoñets ñeñt huetsa entot e'ñe Yompor po'conaño. Ñeñtñapa' atet oten:

—Te'pa' señoche'pa'ch, o' cherr allempoch ye'herra Parets e'ñe parro epuet acheñenesha'. Ñeñtcha' e'ñe parro ye'herra ñetpa' e'ñe pueyochreshoche' penanet Yompor. Ña ama't atarr Paretspa' ye'herrach epuet acheñenesha' ñeñt e'ñe Po'yomporer penet. ⁴ Te'ña Yomporpa' o' a'huañañperrnay yellquëña, te'ña ama't ahuatapa' amach

alla yeyahuerre'te. Te' ama't ahuatapa' amach yerromuerre'te amach yellquërre'te. Te' ama't ahuatapa' amach eñallettere'te yahueñets ama't ñaña atserrpeñets amach eñalle. Tarro'mar añechno ñeñt allpon yellcatyesaye't te'ñapa' o' e'ñe huañerr.

⁵ Allempoña Yompor ñeñt anets po'conaño'pa' alla eñorana'terrnerr, ñeñt'pa' atet oten:

—Te'ñapa' o'ch seño'ch, napa' o' netserrataterr ñeñt allohuen esocmañen eñall.

Allempoña'pa' alla oterrerr:

—Te' pocoppa' añ pocte' o'ch alla pequellquërrerr ora allohuen añechno tarro'mar añ ñoñets ñeñt'cha' atarr seyemtena ñeñt'pa' e'ñe po'ño'ch atet.

⁶ Allempoña ñapa' alla oterrerr:

—Te'ña po'ño'ch'pa' o' e'ñe etsotuerra, o' huañerr ñeñt sentyese't ahuatoteñ. Napa' e'ñe pa'motroteñ eñallen atten ñerra'mrrate' quelled A ñeñt pa'moter pen alfabeto. Allempoteña napa' chocma eñallen esempohuañencha' huañerr ñeñt allpon eñall, napa' atten ñerra'mrrate' quelled Z ñeñt all puen alfabeto. Te'pa' allohuen ñeñt ama e'ñeye' coshetso pueyo'chro ñeñt chocmach es e'nenet, nañapa' napanetcha' ñeñt alloch e'ñe eñmattered. Tarro'mar atto ama cosheneto cha ottenet ñerra'mrrate' ñeñt atarr nanac oñpa'tets. Ñeñto'marña te' napa' notenes allohuenes ñeñtes oñpa'tetspa' napuerrescha' oñ ñeñt ama ahuañañate ñeñt chocma potets all. Ñeñtña oñ alloña sapa' corretsasach. Tarraña ñeñt'ña' ama't coñe'tapa' amach setsa'tero. E'ñe atta napuenes. ⁷ Allohuen ñeñt metana'tue' pa'namen topateñtso'chnopa' ñet'ña' no'pataterranet ora añechno a'nateñets. Attochña ñetpa' e'ñech Po'yomporer pennet, nañapa' e'ñech nechemerasha' nepohuenanet allohuenet. ⁸ Tarraña allohuen ñeñt ama name'ñenayo ñeñt echarrtetsa pueyo'chro, ñet'ña' aña o'patenahuet all parraren tso' erraparen, ñaña allohuen ñeñt etsotene' sosya'tsañechno ñeñt atarr atsena'tpo' ñaña ñeñt amtsañnesha' ñaña ñeñt cañoresha'tets, ñetpa'cho'ña allohuenetpa' aña o'patenahuet all parraren tso' erraparen. Ñaña ñeñt amase'ñe'echno ñaña ñeñt po'yomporer pa'yene' aye'chcatarete'chno ñaña allohuen ashcarña'echno, ñetpa'cho'ña aña o'patenahuet all parraren tso' erraparen ñeñt huortets shemasher. Ñeñt'pa' allcha' puepocheño rromuerret.

Atto Juanpa' entan Yompor pa'netser ñeñt so'hua'netza entot ñeñt'ara ñeñt sochetsa Jerusalem

⁹ Allempoña ñeñt cancherrsheña mellaño'feñnesha' ñeñt echyesaye't po'pajotollesha' all e'chorrayesarette't ñeñt allof e'ñe orrtatuerret allohuanen muero'chteñets, puesheñarrña mellaño'feñpa' o' huapapa' otosen:

—Apon o'ch pocta'n o'ch negatenpa' ñeñt'cha' puetapor perr Cristo ñeñt atma'ntatere Carrnero.

¹⁰ Allempoña napa' o' alla chorraterterrerr Yompor Puecamquëñ ñeñtña nanmue' a'yo allo'tsen ñeñt atarr añecmuen aspenet. Alotña napa' nentapoñ Parets pa'netser ñeñt sohua'netza entot e'ñe Yomprosho' ñeñt'ara ñeñt Jerusalem. ¹¹ Ñeñtña anetserpa' cha popuetnena atarr co'chnesha' atet cohuentena Yompor po'cohuenña. Po'popteña e'ñe atet ñerra'mrrate' mapue' ñeñt atarr poptame'te' ñeñt mapyer otenet jaspe ñeñt nanac amorrentare't. Ñeñt'pa' e'ñe ora orrtatuenan allohuen

ñeñt allo'tsa'yen e'ñe all. ¹² Ñeñt anetserpa' e'ñe aconcha'tam̄psaret a'yohuen. Ñeñt allo aconcha'tam̄psaretpa' atarr añecmuen enonet. Ñaña allo'tsen charra' puechena epa yetarr allot be'tenet. E'ñe pate'tets yetarr allo'tsa'yen ñaña puesheña'tets mellañoñeñ ñeñt cohuan̄pene' yetarr. Pate'tets yetarropa' all aquellca'yesaret añ pa'so'chñechno Israel po'mreneñ ñeñt charrasheña puechena epa. ¹³ Ñeñt conchet, allot huena atsne' allo'tsen ma'pa yetarr. Ñaña allenet emuena atsne'pa' allo'tsen ñaña ma'pa yetarr. Tenoten̄ta'npa'cho'ña allo'tsen ma'pa yetarr. Topoten̄ta'npa'cho'ña allo'tsen ma'pa yetarr. ¹⁴ Ñeñt conchtar allo echarr aparettena pa'rr̄popa' e'ñe allohuenpa' allo'tsen charra' puechena epa mapue' ñeñt allo echarrtateñet. Ñaña pate'tets mapue' allo echarrtateñet conchetpa' all aquellca'yesaret añ pa'so'chñechno ñeñt charrasheña puechena epa ñeñtpa' ñeñt puellsensarnesha' Cristo ñeñt atma'ntataret Carrnero.

¹⁵ Mellañoñeñ ñeñt neserrpare'tatene' ñañaapa' echenan tepapets ñeñt oropepen allo tepuenan Parets pa'netser ñaña allo aconcha'tam̄psaret ñaña pueyottarohuen. ¹⁶ Mellañoñeñ atto tepuenan Yompor pa'netser e'ñe allponeshacma tepa'hue allem̄ateñ — onnatonet ñaña pa'llpocha'peronet ñaña enonet e'ñe allponeshacma cha'nmach — dos mil doscientos kilómetro allem̄ateñ. ¹⁷ Allempoña tepan ñaña conchet po'bateña ñeñtñapa' allo'tsen sesenta cuatro metro. Ñehua, mellañoñeñ e'ñe atet es tepa'yen atet es yetpa'yen yanña ñeñtey arromña'tey.

¹⁸ Ñaña añ conchetpa' añ ayeçhcataret mapue' ñeñt atarr cohuen aspanamemeno poptame'tyena ñeñt otenet jaspe. Pa'netserñapa' añ ayeçhcataret oro — ora allohuenpa' e'ñe oroche'. Añ oropa' atarr nanac cohuen ñeñtpa' e'ñe orrtatuenan pa'namen ñeñt allpon allo'tsa'yen. E'ñe atet ñerra'mrrate' rerp̄at ñeñt atarr cohuen e'ñech orrtatuenan allohuen pa'namen ñeñt allo'tsa'yen. ¹⁹ Ñehua, añ econach allo orratenet conchet, ñeñt econach puecllo'ya'tetspa' atsetareno poptena ñeñt allo a'cohuentateñet. Ñeñt ñanom econach puecllo'yarr allñapa' añ ana'yesaret atarr cohuen poptame'te' aspanamemenatollesha' ñeñt otenet jaspe. Ñeñt puepuecllo'yañ econach allñapa' añ ana'yesaret atarr cohuen poptame'te' asollememenaretollesha' ñeñt otenet zafiro. Ñeñt econach puema'puecllo'yañ allñapa' añ ana'yesaret atarr cohuen poptame'te' huallamemenatollesha' ñeñt otenet ágata. Ñeñt puepa'tatsecllo'yañ econach allñapa' añ ana'yesaret atarr cohuen poptame'te' aspanamemenatollesha' ñeñt otenet esmeralda. ²⁰ Ñeñt econach pa'mnarecllo'yañ allñapa' añ ana'yesaret ñeñt atarr cohuen pa'namenot poptame'tyena ñeñt otenet ónice. Ñeñt po'pechapuecllo'yañ econach allñapa' añ ana'yesaret atarr cohuen poptame'te' tsamemenatollesha' ñeñt otenet cornalina. Ñeñt econach po'cancherrecllo'yañ allñapa' añ ana'yesaret atarr cohuen poptame'te' shemashrememenatollesha' ñeñt otenet crisólito. Ñeñt econach po'psoccllo'yañ allñapa' añ ana'yesaret atarr cohuen poptame'te' aspanamemenatollesho asolleten ñeñt otenet berilo. Ñeñt econach pue'sconeccllo'yañ allñapa' añ ana'yesaret atarr cohuen poptame'te' e'ñe shemashrememenatollesha' ñeñt otenet topacio. Ñeñt econach po'charraccllo'yañ allñapa' añ ana'yesaret atarr cohuen poptame'te'

ama e'ñey' aspanamemenaretolleshayaye ñeñt otenet crisoprasa. Ñeñt econach po'charraclo'yañ puechena pueccl'o'yarr allñapa' añ ana'yese'et atarr cohuen poptame'te' asollememenma'tetollesha' ñeñt otenet jacinto. Ñeñt econach po'charraclo'yañ puechena epueccl'o'ya allñapa' añ ana'yese'et atarr cohuen poptame'te' yetsñorromemenafollesha' ñeñt otenet amatista. ²¹ Allohuen yetarro'chno ñeñt charra' puechena epa e'ñe cohuen huallat'atren atet ñerra'm chem'peshtall o'ponotpa' atarrcha' huallat'lellen ñeñt otenet perla. Pate'tets yetarr e'ñe patr'ra perla aye'chcataret. Ñaña añ calle ñeñt all chope'ne'chenet ñeñt'pa' e'ñe oroche' aye'chcataret atet ñerra'm rerpat ñeñt e'ñe orrtatuene' ora ñeñt allpon allo'tsa'yen all.

²² All Parets pa'netsro ama't patr'ra pocoll ama neñche ñeñt all ma'yoche'ñet Yompor. Tarro'mar allpa' ama pallteno pocoll allcha' ma'yoche'ñet Yompor, tarro'mar ñeñt nanac Parets ñeñt Yepartseshar yepen ñapa' e'ñe allo'tsen all ñeñt'cha' ma'yoche'na allohuen ache'ñenesha' epuet ñaña Puechemer Cristo ñeñt atma'ntaret Carrnero. ²³ Ñaña Parets pa'netsro allpa' ama muenenano atsne' ama't arrorra ama muene'ñeto ñeñt'cha' 'choyo'tetsa all. Tarro'mar Yompor ñeñt atto poptena pa'tsnomue'ño'tpa' ñeñt'ña 'choyo'tetsa all epuet ñaña Puechemer Cristo ñeñt'ña lampar'ñetets. Ñeñt'ara Cristo ñeñt atma'ntaret Carrnero. ²⁴ Ñeñt atto poptena Yompor pa'tsnomue'ño'tpa' ñeñt'ña a'puetarsañpene' erracma'ñen allohuen pa'namen ache'ñenesha' attoña correnet e'ñe cohuen. Allohuen añcha'tare'ñesha' ñeñt atto cohuentenet añe patsro, huapatueret'cha' Parets pa'netsro alloch cohuentate'ñña'ñet ñamet Parets pa'netser. ²⁵ Ñeñt Parets pa'netser ñeñt pueyottar pen allot be'tenet, amach yottañperre'te e'ñech ellapene't atoraret. Allpa' ama't checmetapa' ama eñalle. ²⁶ Allohuen pa'namen ache'ñenesha' ñeñt añcha'na'tpotyetsa añe patsro ñeñt atto cohuenteyenet, huapatueret'cha' Parets pa'netsro alloch cohuentate'ñña'ñet ñamet Parets pa'netser. ²⁷ Allpa' ama't ahuatapa' amach orrtateto ñeñt sosya'tsa'ñe'chno tarro'mar allpa' ama't pueshe'ñarrapa' ama be'teno ñeñt cotape'chene' sosya'tsa'ñe'chno ñeñt atarr tsena'ten Yompor ñeñt atet ñerra'm ashcar'ña'. Allpa' añe be'tets ñeñt aquellc'aret pa'so'ch'ñe'chno Cristo po'libro attoch'ña ñetpa' corretsetach.

22

¹ Allempo'ña mella'ño'fe'ña'pa' o' alla gaterrnerr po'ñes. Ñeñt'pa' arrot huena cona'ño' allo'tsen Yompor epuet ñaña Puechemer Cristo ñeñt atma'ntaret Carrnero. Ñeñt o'ña'pa' atarr cohuen, atarr llancasaseno poptaso'tena. Oñ ñeñt atarr cohuen añ toma'ntena atto apueney Yompor attoch'ña yapa' corretsayach e'ñe yocshe'ñeshocma'ñen errpono-huañen. ² Ñeñt Parets pa'netsro e'ñe rro'cho allecma chope'ne'chenet, allñapa' all oñen oñ. Ñeñt oñ emoto'mar popame'tar-ro all chopyen tsach. Ñeñt'ña tsachpa' atarr nanac me'ten, puen'ña'tets arrorra'p' 'chocma me'ten. Paterr charpa' charroch me'ten puechena epa. Ñeñt pue'mer ñeñt'cha' apuerrey Yompor añ toma'ntena alloch yocrrerra errponañohuen ñeñt ama ahua'ña'ño ama't ahuata. Ñaña pasopanerpa'

añecop sherben ñeñtcha' a'crraterre' allohuen pa'namen acheñenesha' e'ñe puecamquëñohuenet. ³ Parets pa'netsropa' amach eñalleterro ama't patrra ñeñtcha' a'cmaretttertsa. Tarro'mar Yompor epuet ñaña Puechemer Cristo ñeñt atma'ntataret Carrnero, ñetña partsotetset all po'conañeto. Ñaña allohueney ñeñtey torretsa Yomporecop e'ñech cohuen yesherberr yaña all. ⁴ Yentercha' Parets yecuaccl'e'channerrach parro epay Yompor. Yeto'moña yapa' quellquërrancha' e'ñe ña pa'so'cheñ. ⁵ Allñapa' amach eñalleterro checmete'. Ñeñteycha' yeçherrtsa allpa' amach yemnerro ñeñtcha' yeçhoyo'tamñpse'. Atto te'pa' çhocma yemnen lampareñ alloch yeçhoyo'tamñpena. Allempopa' amach yemnerro ñaña o'ch çhoyo'tamñpeney atsne', tarro'mar Yompor ñeñt Yepartseshar yepen, ñapa' ñaña pa'tsnomueña ñeñtcha' yeçhoyo'tamñperre' all. Ñaña yapa' ya'mñcha'tarettapreterach allempoteñ errponohuañen.

Arrpa' all eñotateney Jesucristopa' ahuencha' huerra po'pocheño arr patsro

⁶ Allempoña mellañoñeñpa' o' alla oterrerr, ñeñtcha' atet oterrerr:

—Ora allohuen añ ñoñetspa' e'ñech seyemcha tarro'mar ñeñtcha' e'ñech po'ñoçh atet perra. Ñaña Yompor ñeñt Yepartseshar yepen ñañaapa' çhocma eñotatenan ñeñtcha' a'mitene' po'ñoñ. Ñeñtara Yompor ama't te'pa' o' llesensan po'mllañoñeñer ñeñtcha' gatyene' ñeñt torretsa ñocop ñeñtcha' ahuen atet perra ama't esempo. ⁷ Ñaña Cristo ñapa' atet oten:

—Señochepa'ch napa' ahuencha' nohuerra.

Atarr cosheñtso'tsen allohuen ñeñt yemtenaya ora allpon añ ñoñets ñeñt aquellcaret all Yompor po'libro ñeñtcha' atet perra esempo. Arrpa' allohua huañ ñeñt atet eñotaten mellañoñeñ.

⁸ Na ñeñten Juananpa' naña e'muene' ñeñt ora allohuen añ ñoñets ñaña naña entene' ñeñt allpon gatyennet. Allempoña napa' neconcorposa e'ñe mellañoñeñ pa'rrpo ñeñt negatyene' ora allpon pa'namen esocmañen o'ch nema'yochyañ. ⁹ Ñañaapa' oten:

—Amach pema'yochatsetno na, tarro'mar napa'çho'ña e'ñe parropa' atta netorrapretenpa Yomporecop ñaña allohuen ñeñt pemo'nasheñshaçhno pepen ñeñt a'mta'yene' Yompor po'ñoñ, epuet ñaña allohuen ñeñt atarr yemtenaya añ ñoñets ñeñt atet aquellcaret añ libro. Papa' Yomporña pema'yocha.

¹⁰ Allempoña ñeñt mellañoñeñpa' alla oterrerr:

—Ñato't cha pa'nasotena' añ ñeñt allpon Yompor po'ñoñ ñeñt o' pequellca'hua. Tarro'mar allpon ñeñt o' pequellca'hua ñeñtcha' atet perra esempo, te'ñapa' o' çhappmoch allempoch attoch e'ñe etsotuerra esempohuañen. ¹¹ Tarraña e'ñe allempoteñ allohuen ñeñt ama cohue-naye' es petso ñeñtcha' allo'nepa'ch senet patse'tyeset ñeñt ama cohue-naye' enteno Yompor. Allohuenet ñeñt añach yeçhenet sosya'tsañeçhno, ñetpa' allo'nepa'ch senet yeçhcatyesnomuete ñeñt atarr sosya'tsañeçhno. Tarraña allohuen ñeñt e'ñech cohuen es pa'yenetpa' ñetñapa' allo'nepa'ch senet e'ñe cohuen es pa'yestset. Ñaña allohuen ñeñt ma'yochrenaya ñeñt atto sherbeñet Parets, ñetpa'çho'ña allo'nepa'ch senet ma'yochrenet ñeñt atarr cohuen enten Parets. ¹² Ñaña Cristo ñapa' atet oten:

—Te'pa' señochepa'ch napa' ahuencha' nohuerra. Nehuapaterrnascha' ñeñt no'patatensa alloch netsa'tuerrsa e'ñe puesheña'ttsos sa errotente'

setorra'yese't. Tarraña o'ca'ye nehuapaterr ña'ña alloch netsa'tatuera ñeñt' ama pocteye' es petso. ¹³ Napa' e'ñe pa'motroteñ eñallen, atten ñerra'mrrate' quellec A ñeñt' pa'moter pen alfabeto. Allempoteña napa' çhocma eñallen esempohuañencha' huañerr ñeñt' allpon eñall, napa' atten ñerra'mrrate' quellec Z ñeñt' all puen alfabeto.

¹⁴ Atarr cosheñtso'tsen allohuen ñeñt' e'ñe pocte' enten Yompor o'ch tsomhuerrñañet Yompor puenaren alloch e'ñe correrret poc-tacma. Allempopa' amach alla rromuerrete'te. Ñeñtpa' ñeñtcha'ña e'ñe yoma'huerret ñesho. Ñehua, ñeñt' e'ñe pocte' enten Yompor ñeñtpa' allohuen ñeñt' e'ñe e'shohuaretterra po'chñar e'ñe pame'ñeñotet Cristo. Ñato' o'ch netma'ntacha atet: Ñetpa' o' e'ñe tsama'tuerret pa'shtamuet attoch e'ñe pocte' entanet Yompor o'ch be'toset yetarro esheccha' çhapuet Yompor pa'netsro. ¹⁵ Tarraña allohuen ñeñt' ama ame'ñenayo Cristo ñetña'pa' a'yote'tsa'yenetach Yompor pa'netsrot. Atet ñerra'm amase'ñeñechno, ña'ña ñeñt' ecañoreshatechno, ña'ña ñeñt' amtsañechno ña'ña allohuen ñeñt' po'yomporer pene' ayeçhcataret ña'ña allohuen ñeñt' cohuen entene' allohuen shequëñtsochno. Ñetpa' e'ñe ñeñta eñotenet o'ch shecare'chet acheñenesha'.

¹⁶ Allempoña Jesús'pa' alla oterrerr, ñeñtpa' atet ot:

—Napa' naña ñeñten llesensene' nemllañoteñer ñeñt' o' eñotaterres ora añechno, allohuenes ñeñtes e'ñe same'ñeñoten na sapa' çhocma sapçha'yena allemeñ anetso'mar. Napa' ñeñten allot huapa amçha'taret David, elloñapa' o' alla po'mñreneñ pernerr naña. Ña'ña napa' atten ñerra'mrrate' ranto ñeñt' atarr atarrem' ñeñt' atarr huomenc atsnets o'ch puetaenmoch. Attoña na'puetarsampeñ allohuen acheñenesha'.

¹⁷ Allohuen ñeñt' pueyochresha' pen Parets ñetpa' atma'ntatarettenet atet ñerra'mrrate' Cristo puetaapor penahuet. Attoña ñet Parets Puecamquëño' oteñet Cristo:

—Apon.

Ña'ña allohuenes ñeñtes e'mñotene' o'ch soch samña Cristo:

—Apon.

Ña'ña allohuenet ñeñt' oñpa'tets ñeñt' ama eñmatetso pueyoçhreto ñeñt' çhocma es e'nyenet, ñetpa'çho'ña huapuetepa'. Yoretapa' añ oñ, allochñapa' ñetpa'çho'ña corretsetach. Ñeñt' oñpa' e'ñech atta aparetet, amach es tsa'tayo ama't e'ñe coñe'ta.

¹⁸ Na te'pa' o'ch noctape'chach allohuen ñeñt' e'mñotene' añ ñoñets all otene' ñeñtcha' atet perra esempo. O'ch notanet: Ñerra'm esesha' atontatene' ñet poctapñet ñeñt' ama atteye' otene' añ ñoñets, Yomporña'pa' o'ch atontatanet ñocpuet ñeñtcha' muerochtaterrahuet ñeñt' atet o' aquel-lca'huareta añ libro. ¹⁹ Ña'ña ñerra'm esesha' çha a'chencatenan ama't patrra ñoñets ñeñt' allpon aquellca'huareta añ libro, Yomporña'pa' amach muenataneto o'ch es o'patapreteret all aquellcarettena libro allpon ñeñt'ña'pa' corretsetach. Ña'ña ñetpa' amach be'tosapo'tampereto Parets pa'netsro ñeñt' atet o' aquellca'huareta añ libro.

²⁰ Ñeñtara Jesús ñeñt' yeñotatyene' ora añechno, ña'ña'pa' alla oterrerr:

—Napa' po'ñochcha' ahuen nohuerrerr po'pocheño.

Yañapa' allohueney yoteñ:

—Apon Yepartseshare Jesucristo. Ñeñtpa' attetepa'ch yocop.

21 Yepartsesharepa'chña Jesucristo sa'natenaya e'ñe allohuenes. Ñeñtpa' attetepa'ch Nompore allohuenacpay. Arrpa' e'ñe allohua puen Yompor po'ñoñ.